

Riosi Ra'íchara

El Nuevo Testamento
de Nuestro Señor Jesucristo
en Tarahumara de Samachique



Riosi Ra'íchara

El Nuevo Testamento
de nuestro Señor Jesucristo
en el idioma
tarahumara de Samachique

Primera edición
El Nuevo Testamento
en el idioma tarahumara
de Samachique
tar 0-100 1.5M
© Liga Bíblica Internacional

Versión electrónica, 2011
©Liga Bíblica Internacional

Se permite copiar, distribuir y comunicar públicamente esta obra bajo las siguientes condiciones:

- Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- No comercial. No puede utilizar esta obra para fines lucrativos.
- Sin obras modificadas. No se puede alterar, transformar o generar una obra a partir de ésta.

SAN MATEO

osali je'ná wabé Galabé Ra'íchali

Jesucristo jiti rugá

Echi jaré ki'yá bachánara piréami pagótami mapu Jesucristo pagótamawara níili
(Lk: 3:23-38)

1 Jena'lí osirúami ju echi jaré ki'yá bachánala piréami pagótami riwalá, si'néami mapu ikí Jesucristo pagótamawala níili. Echi Walubela Jesucristo bilé níili echi Rabiri riwéami rijói kúchala kúchuwala. Ayénachó Binói bilé níili echi ki'yánala bitéami Abrami riwéami rijói kúchala kúchuwala.

²Echi Abrami níili echi Isaka onolá. A'lí echi Isaka níili echi Jakobo onolá. A'lí echi Jakobo níili echi Jurá onolá, ayénachó onolá níili echi auché jaré Jurá ritémawala. ³A'lí echi Jurá níili echi Páresi riwéami rijói onolá. Ayénachó binói níili echi Sera riwéami rijói onolá. A'lí echi Tamari riwéami mukí aboni iyela níili. A'lí echi Páresi níili echi Esromi riwéami rijói onolá. A'lí échi Esromi níili echi Arami riwéami rijói onolá. ⁴A'lí echi Arami níili echi Aminarabi riwéami rijói onolá. A'lí echi Aminarabi níili echi Nasona riwéami rijói onolá. A'lí echi Nasona níili echi Salmoni riwéami rijói onolá. ⁵A'lí echi Salmoni níili echi Bosa riwéami rijói onolá. A'lí echi Ra'aba riwéami mukí níili echi Bosa iyela. A'lí echi Bosa níili echi Obera riwéami rijói onolá. A'lí echi Ruta riwéami mukí níili echi Obera iyela. A'lí echi Obera níili echi Isaí riwéami rijói onolá. ⁶Echi Isaí níili echi Rabiri riwéami rijói onolá.

A'lí biché pe wakinana echi Rabili walula silíami níili. Ayénachó echi Rabiri níili echi Salomoni onolá. Echi mukí mapu chabénala echi Uríasi upila níili, échiko níili echi Salomoni iyela. ⁷Echi Salomoni níili echi Roboami riwéami rijói onolá. Echi Roboami níili echi Abíasi riwéami rijói onolá. A'lí echi Abíasi níili echi Asa riwéami rijói onolá. ⁸Echi Asa níili echi Josapati riwéami rijói onolá. A'lí echi Josapati níili echi Jorama riwéami rijói onolá. A'lí echi Jorama níili echi Usíasi riwéami rijói onolá. ⁹Echi Usíasi níili echi Jotami riwéami rijói onolá. Echi Jotami níili echi Akasa riwéami rijói onolá. A'lí echi Akasa níili echi Esekíasi riwéami rijói onolá. ¹⁰A'lí echi Esekíasi níili echi Manasesi riwéami rijói onolá. A'lí echi Manasesi níili echi Amoni riwéami rijói onolá. A'lí echi Amoni níili echi Josíasi riwéami rijói onolá. ¹¹A'lí echi Josíasi níili echi Jekoníasi riwéami rijói onolá. Ayénachó onolá níili echi auché jalé Jekoníasi ritémawala. Echalí ki'yá níili mapalí si'néami aboni pagótamawala miná si'wina kawichí torúami níili, mapo'ná Babilóniachi anilíwachi níili.

¹² A'lí mapalí echi pagótami ma si'wina torúami níili, pe wakinana echi Jekoníasi níili echi Salatieli riwéami rijói onolá. A'lí biché echi Salatieli níili echi Sorobabéli riwéami rijói onolá. ¹³ A'lí biché echi Sorobabeli níili echi Abiyura riwéami rijói onolá. Echi Abiyura níili echi Eliakimi riwéami rijói onolá. A'lí echi Eliakimi níili echi Asori riwéami rijói onolá. ¹⁴ A'lí echi Asori níili echi Saroka riwéami rijói onolá. Echi Saroka níili echi Akimi riwéami rijói onolá. A'lí echi Akimi níili echi Eliyura riwéami rijói onolá. ¹⁵ A'lí echi Eliyura níili echi Eleasari riwéami rijói onolá. A'lí echi Eleasari níili echi Matani riwéami rijói onolá. A'lí echi Matani níili echi Jakobo riwéami rijói onolá. ¹⁶ A'lí echi Jakobo níili echi José onolá. A'lí echi José, echi María kunala níili. Chopi chabénala niráa echi María rana'lí echi táchala towí Jesusi, echi mapu Cristo anérámi ju.

¹⁷ Echirigá ju mapu makói miná naó rijói onorúami níili echi si'néami aboni kúchuwala yuwa, echalí jonsa mapalí echi Abrami bitéali, echalí yénasí mapalí así bitéali echi Rabiri. A'lí echalí jonsa mapalí bitéali echi Rabiri, makói miná naó rijói ayénachó onorúami níili echi si'néami aboni kúchuwala yuwa, echalí yénasí mapalí echi pagótami miná si'wina torúami níili echo'ná Babilóniachi anilíwachi. A'lí auché jaré makói miná naó rijói ayénachó onorúami níili echi si'néami aboni kúchuwala yuwa, echalí jonsa mapalí echi pagótami miná si'wina torúami níili echo'ná Babilóniachi, echalí yénasí mapalí así ranálati echi Walubela Jesucristo.

Jesucristo je'ná jerigá ranarúami níili

(Lk. 2:1-7)

¹⁸ A'lí biché echi Walubela Jesucristo je'ná jerigá ranarúami níili: Bilé mukí, María riwéami, Binói iyela níima riwéali. A'lí echi María kunema riwéali bilé rijói José riwéami. Chopi mapalí aboni ketasi cho napawili, echalí riwílati mapu echi María ma bocháami níili, mapujiti echi Wabé Galabé Riosi Iwigala echirigá 'yali. ¹⁹ Echalí echi José galá upema riwéali echi María. Chopi mapalí echi José galá machili mapu echi María ma bocháami níili, echalí binói ma ketasi nakili upénala. A'lí echi José wabé galabé oláami níili, echijiti binói ketasi nakili echirigá ku ruyénala echi auché jaré pagótami. ²⁰ Chopi mapuyénasí echi José je'ná jerigá 'náitali, echalí binói rimuga niráa riwali bilé walula Riosi kapitánawala mapu jeaneli: Mujé José, mápumi echi Rabiri riwéami rijói kúchala kúchuwala ju, arigá upé echi María. Ketásirapé majá, mapujiti échiko chopi bocháami ju mapujiti echi Galabé Riosi Iwigala echirigá 'yali. ²¹ Echalí echi walula Riosi kapitánawala ayénachó jeaneli: Echi María ranaméa bilé táchala towí muchali. A'lí mujemi riwarama Jesusi niráa, mapujiti Binói galá ku wikawama si'néami echi jaré Binói pagótamawala mapurigá aboni chati olali.

²² A'lí suwaba je'ná jerigá ikili mapurigá echirigá galá ikimea mapurigá echi Walubela Riosi bachá niráa nuleli nawésanala, mapalí echi walula Riosi jiti nawésami jerigá anili:

²³ ¡Nibira! Bilé tiwé ke bilé cho wesi rijói yuwa kochíami arigá bochama.

A'lí échiko ranamea bilé táchala towí 'muchali.

A'lí bichemi Emanueli riwarama, echirigá mapu jerigá aniwáami ju:

Riosi tamujé tamí yuwa ju.

²⁴ A'lí mapalí echi José galá ku busureli, echalí binói we yáati upeli echi tiwé mapurigá echi walula Riosi kapitánawala nuleli. ²⁵ Chopi echi José ke cho kochili

binói upila yuwa mapuyénasí échiko ke cho ranali echi taa towí, ne bachá wilíami kepu raná. Echalí echi taa towí 'múchali Jesuvi riwarálati.

Jaré wabé 'nátami rijói 'nébia sili

2 A'lí echi Erorsi walula silíami níli echo'ná Juréachi anilíwachi kawírali mapalí echi Jesuvi ranálati echo'ná Belénachi anilíwachi. A'lí echalí rawé jaré wabé 'nátami rijói sili echo'ná Jerusalémachi anilíwachi walúlachi. A'lí aboni ka'yé panina jonsa simíbami níli. ² A'lí biché aboni je'ná jerigá rukuésiya sili: ¿Kumi atí echi taa towí mapu bukulí ranálati, echi mapu pe waminana ne walubela silíami níima, 'yemi Juríosi pagótami yuwa? Echo'ná ka'yé bolónala waminá panina tamujeta ma riwali Binói níwala sopolí. Jípita ma sili mapurigata echo'ná bacháami Binói yuwa, wéemi raweka, chokoba jaga, wabé warubéraga anebo. ³ Chopi mapalí echi walula silíami je'ná jerigá námali, echalí binói ne wabé majali, ne si'néami echi auché jaré echo'ná Jerusalémachi piréami ayénachó. ⁴ Echalí echi Erorsi bayeli napawínala si'néami echi jaré o'wéala sacerdote, ayénachó ne si'néami echi auché jaré Juríosi pagótami níwala binériami, Riosi nulalila binériami. A'lí echi Erorsi rukueli aboni kumi 'nalina ranarúami níima riwéali echi Cristo anilíwami. ⁵ A'lí aboni ku nijéwaga jeaneli: Echo'ná Belenchi ranarúami níima riwéali, echo'ná Juréachi anilíwachi kawírali, mapujiti echiligá osirúami ju echo'ná Riosi Ra'íchara oselíwalachi mapo'ná echi walula Riosi jiti nawésemi je'ná jerigá osali mapurigá Riosi Binói jeanili:

⁶ Echo'ná Belenchi anilíwachi walúlachi,
echo'ná Juréachi anilíwachi kawírali nirúami, arigá wabé walúlachi ju echi
auché jaréana o'wéalachi yuwa,
echo'ná Juréachi anilíwachi kawírali nirúami, mapujiti echo'ná Belenchi
ranarúami níima bilé taa towí mapu walubela niséliami níima,
mapu galá nisérama echi jaré Nijé níwala Isaeli anilíwami pagótami.

⁷ Echalí echi Erorsi chiná niráa bayeli echi jaré galabé 'nátami rijói mapu echo'ná Jerusalémachi sili. A'lí binói rukugá machili mapu chu kilíbuko ne bachá niráa riwirúami níli echi sopolí. ⁸ A'lí echi Erorsi júlaga, echo'ná Belenachi jeanigá júuli: Echo'ná simíbaga, galá rukuesi kumi atigá echi taa towí. Chopi mapalítamo riwá, galá tamí ku ruyesi, mapurigá nijeni ayénachó echo'ná simea, mapurigani ayénachó bacháami binói yuwa, wéemi raweka, chokoba wiligá o'wikema. ⁹ A'lí mapalí aboni ma je'ná jerigá námali mapurigá echi walula silíami aneli, echalí aboni ku simíbali. A'lí biché aboni auchécho riwali echi sopolí mapu aboni ma riwali bukulínal, echo'ná kayé panina. A'lí echi sopolí bacháami ináraga, bayélali aboni mapuyénasí echo'ná Belenchi nawagá, echo'ná moba chukúbali mapo'ná echi taa towí Jesucristo bu'wiri. ¹⁰ Echalí aboni ne wabé kaníli mapalí aboni ku riwali echi sopolí. ¹¹ A'lí ma mo'wigá echo'ná kalírali, aboni riwali echi taa towí Jesucristo, echi Binói iyela, María riwéami, ayénachó. A'lí aboni wéemi raweka bacháami chokoba jaga o'wikeli echi taa towí Jesucristo. Ayénachó aboni toli jaré wabé natéami namuti. A'lí aboni ma irápaga, kóoli echi taa towí, echi wenomí oro aniríwami, bilé wabé natéami moluwá ayénachó, echi wabé su'weti mira aniríwami ayénachó. ¹² A'lí mapalí aboni ma kochigá rimuli, echalí Riosi aneli aboni mapurigá aboni ketasi ku ruyema echi walula Erorsi mapu kumi asali echi taa towí Jesucristo. Echijiti echo'ná si'wina buwichí simáraga, aboni ku simíbali echo'ná aboni kawíwalachi.

Echo'ná Ejíptochi júmsali

¹³ A'lí mapalí echi jaré wabé 'nátami rijói ma ku simíbali, echalí echi José rimuga niráa, riwali echi walula Riosi kapitánawala mapu jeaneli: ¡Asiska we yáa mutú echi táchí towí! ¡We sapú bayéraga togá echi táchí towí, echi Binói iyela ayénachó, echo'ná auché biléana kawírali, Ejíptochi anilwachi! A'lí echo'ná tibí mapuyénasí níjé nimí anema mápumi auchécho ku nawá jena'í mujé kawíwalachi, mapujiti echi walula Erorsi we ama mi'línala echi táchí towí. ¹⁴ A'lí echi José ku busuresa, we yáati, rokogó niráa bayéraga toli echi táchí towí, echi táchí iyela ayénachó, a'lí echo'ná auché biléana kawírali, Ejíptochi anilwachi simíbali. ¹⁵ A'lí aboni echo'ná muchili mapuyénasí ma mukuli echi Erorsi. Echirigá ne sébali ikili mapurigá Riosi bachá niráa anili, mapurigá echi walula Riosi jiti nawésami jeanigá osali: Echi Walubela Riosi jeaní:

Echo'ná Ejíptochi jonsa bayélini echi keni Raná.

Echi walula Erorsi nulali ko'wínara echi jaré kúuchi

¹⁶ A'lí echi Erorsi ne wabé yoli mapalí echi jaré wabé 'nátami rijói ketasi ku ruyeli. Echalí binói nuleli ko'wínala ne si'néami echi jaré kúuchi kúrowi echo'ná Belenchi muchúami, echo'ná mulubé noligá muchúami ayénachó, ne si'néami mapu ikí ketasi cho okuá bamíbami níili, mapujiti binói ruyérami níili echi jaré wabé 'nátami rijói jiti, mapurigá ketasi cho okuá bamíbami níili, mapalí jonsa echi sopolí bachá niráa riwílati.

¹⁷ Echirigá ne sébali ikili mapurigá bachá niráa anirúami níili, mapalí echi walula Riosi jiti nawésami, Jeremíasi riwéami, jeanigá osali:

¹⁸ Echo'ná Ramachi anilwachi piréami pagótami námali bilé mukí wabé naláami.

Echi Rakeli niili, mapalí ne wabé nalali mapujiti ma ko'wirúami níili binói kúchuwala.

A'lí biché binói ketasi chirigá nakili mapu ku kanílatami níima, mapujiti ma suwili kepu kúchuwa.

Aboni ku rowili echo'ná Ejíptochi jonsa

¹⁹ A'lí mapalí echi Erorsi ma mukúami níili, echalí echi José rimuga bu'wili echo'ná Ejíptochi mapalí bilé walula Riosi kapitánawala ra'íchali jeanigá: ²⁰ Wilísaga auchecho siné bayéraga togá echi táchí towí, kepu iyé ayénachó, A'lí echo'ná echi jaré Isaeli anilwami pagótami kawíwalachi ku simigá, mapujiti ma mukuli echi Erorsi mapu miná mi'línali echi táchí towí Jesucristo. ²¹ A'lí biché echi José we sapú wilísaga bayéraga toli echi táchí towí Jesucristo, echi Binói iyela ayénachó. A'lí aboni ku simíbali echo'ná Isaeli aniríwami pagótami kawíwalachi.

²² Chopi mapalí echi José ruyérami níili mapurigá echi Arkelao riwéami ma wilárati mapurigá walula silíami niráa echo'ná Juréachi, A'lí echi José we majali echo'ná simiyá, mapujiti echi Arkelao, echi Erorsi ranala níili. A'lí biché mapalí echi José kochigá rimuli, echalí echi walula Riosi kapitánawala ruyeli mapurigá echo'ná Galiléachi anilwachi kawírali simea. A'lí echo'ná simíbali. ²³ A'lí mapalí aboni sili echo'ná Galiléachi anilwachi kawírali, A'lí aboni piréali echo'ná biléana walúlachi mapo'ná Nasarétachi anilwachi níili. Echirigá ne sébali ikili mapurigá

bachá niráa nawésali echí jaré o'wéala Riosi jiti nawésami mapurigá osirúami ju echo'ná Riosi Ra'íchala oselíwalachi mapurigá echí Walubera Jesucristo echo'ná Nasarétachi bitéami níima.

Echi Juani mapu pagóami níili we nawésali echo'ná biléana waná kawichí

(Mr. 1:1-8; Lk. 3:1-9, 15-17; Jn. 1:19-28)

3 Echalí rawé echí Juani, mapu pagóami níili, echo'ná biléana waná kawichí nawali, echo'ná Juréachi anilíwachi kawírali. A'lí echí Juani we nawésali echí pagótami echo'ná waná kawichí síami. ² A'lí jeanigá nawésali: ¡Auchecho si'nú, galabéala niráa ku 'natas! ¡Ku ro'wisi Riosi yuwa mapujiti ke 'me ayó echí ripá riwigachi atíami Riosi galá nulema jena'í wichimóbachi piréami pagótami! ³ A'lí je'ná Juani binói níili echí rijói mapu echí walula Riosi jiti nawésami, Isaíasi riwéami, bachá niráa echijiti rugá nawésali mapurigá je'ná jerigá osirúami ju echo'ná Riosi Ra'íchala oselíwalachi:

Echo'ná biléana waná kawichí, bilé rijói o'weli ra'íchaga nawésama jeanigá:
Echi Walubela ke sayiná nawama jena'í wichimóbachi.

A'lí mapalí bilé walula echirigá nawama, 'yémítamo sinibí galá a'lara echí buwé mapurigá echo'ná galá simírama echí walula.

Jipi, ayénachó galá a'lárasí 'yemi aboni sulálachi achigórígá mapurigátamo sinibí galá a'lara echí buwé.

⁴ A'lí echí Juani echí kameyo anilíwami bo'wala niwárami napacha iyénali. Ayénachó bilé wichí puka iyénali. A'lí binói ko'wali echí korochi wakichéami. Ayénachó ko'wali echí kolimena, echo'ná kawichí nirúami. ⁵ A'lí ne si'néami pagótami echo'ná Jerusalémachi anilíwachi walúlachi piréami kipúbiya simíbali echo'ná mapo'ná echí Juani nawesa asali. Ayénachó ne si'néami echo'ná Juréachi anilíwachi kawírali piréami echo'ná kipúbiya sili, ne si'néami pagótami echo'ná noligá bakochi Joránachi anilíwachi piréami ayénachó. ⁶ A'lí echo'ná bakochi Joránachi anilíwachi echí Juani galá pagoli echí si'néami pagótami, mapalí aboni ku rugá nawésali suwaba mapurigá aboni ma chati olali.

⁷ Chopi mapalí echí Juani riwali mapu wikabé echí jaré Bariseo anilíwami binériami, ayénachó wikabé echí auché jaré Saruseo anilíwami binériami echo'ná binói yuwa sili mapurigá aboni echirigá ba'wí jiti pagótami níima, A'lí binói jeaneli: ¡'Yemi pagótami mapurigá jaré sinowi kúchuwala ju! ¡'Yémítamo wabé 'yékami ju, echijítitamo wakiná júmsali, mayega mapurigátamo ketasi kastigo 'yárami níibo waminana rawé! ⁸ Ne galabé olasi, mapurigátamo echirigá 'nérabo echí auché jaré pagótami máputamo ma ne bichíwali ku galabé 'nátaga, ma ku ro'wili Riosi yuwa. ⁹ Ketasi chopi 'natasi echo'ná pachana 'yemi sulálachi niráa mapu 'yemi aboni wabé galabé oráami pagótami ju, chopi mapujiti 'yémítamo echí Abrami pagótamawara ju. Nijé 'yemi nimí ané mapu a Riosi nakisáagá mapu auché jaré wikabé Abrami pagótamawala niwárami níima, Riosi Binói galá omérama je'ná wikabé rité jiti, ne wikabé echí Abrami pagótamawala niwayá. ¹⁰ A'lí echí Juani ayénachó jeanili: Echi jaré pagótami mapurigá jaré rakéami namuti ju. Ayénachó ma mulipi ju mapalí jaré rakéami namuti káraka mitétami níima. Echalí ne suwaba rakéami namuti mapu ketasi galabé rakeko, échiko káraka miteka, echo'ná na'írali ulútami níima. ¹¹ Nijé ne bichíwali 'yemi mi pagola echí ba'wí jiti, mapujítitamo ma ku ro'wili Riosi yuwa. Chopi echí Walubela mapu jubáami tamí yuwa inaro, échiko ne wabé simírami

Walubela ju ketasi mapurigá nijé. A'lí nijé ketásini 'me we galá ju mapurigani galá mulubéanama Binói yuwa. Nirapeni galá ju mapurigani akaráptama Binói akalá. Echi Walubela 'yemi mi 'yama echí wabé Galabé Riosi Iwigala, ayénachó Binói walú kastigo 'yama echí jaré chati oláami, echo'ná wabé chati ratáami na'írali.¹² A'lí echí Walubela ma karigá atí mapurigá kasúuwama echí turío, mapujiti echo'ná rapirátachi Binói suwaba galá kasúuwama Binói níwala turío. Ayénachó Binói napabuka katiwama echí turío echo'ná pachá Binói níwala rikóachi. Echalí Binói káraga na'ema echí kajela echo'ná walú na'írali mapo'ná tarapé siné cho'wíami níima.

Echi Jesusi ba'wí jiti pagótami níili

(Mr. 1:9-11; Lk. 3:21-22)

¹³ A'lí Jesusi echo'ná Galiléachi jonsa simisá, a'lí nawali echo'ná bakochi Joránachi anilwachi, mapo'ná echí Juani asali. A'lí Jesusi nakili mapurigá Binói ba'wí jiti pagótami níima echí Juani jiti. ¹⁴ Chopi echí Juani wabé riwélaga, ketasi nakili mapu pagoma. A'lí echí Juani jeaneli echí Jesusi: Arígá galá níima mapurigá Mujé binói tamí pagoma echí ba'wí jiti. ¿Áchami nakí Mujé mapurigá nijé nimí pagoma? ¹⁵ A'lí Jesusi ku nijéwaga jeaneli: Jipi arígá tamí pagó, mapujiti arígá 'wéraili ju mapurigata echirigá sébali olabo ne suwaba echí galabé oluwáwami. A'lí Juani pagoli echí Jesusi ba'wí jiti. ¹⁶ A'lí mapalí Jesusi echirigá ba'wí jiti pagótami níili, A'lí ku machinsa echo'ná ba'wírali jonsa, Binói riwali echo'ná ripá riwigachi mapurigá we iráparami niráa níili. Ayénachó Binói riwali mapurigá echí we Galabé Riosi Iwigala echo'ná Binóichi moba rikinali mapurigá bilé makawi niráa. ¹⁷ A'lí Riosi Binói echo'ná ripá riwigachi jonsa ra'íchaga jeanili: Je'ná ju echí bilepi Nijé Ranala mápuni ne wabé galé. Nijeni ne wabé ganili Binói jiti.

Echi riablo we nakili mapu Jesusi chati olama

(Mr. 1:12-13; Lk. 4:1-13)

4 A'lí echí we Galabé Riosi Iwigala bayérali echí Jesusi echo'ná biléana waná kawichí, mapurigá echí riablo echo'ná ra'íchama Binói Jesusi. Echi riablo chopi nakili mapurigá Jesusi chati olama, chopi Jesusi ketasi chirigá chati olali. ² A'lí biché mapalí Jesusi tarapé namuti ko'wali nawosa makói rawé, nawosa makói rokogó yénasí, a'lí Binói ne wabé locheli. ³ A'lí echí riablo echo'ná Jesusi yuwa nawagá, jeaneli: Mujé a ne bichíwali Riosi Ranala níisagámi, galá nulé je'ná wikabé rité mapurigá wikabé pani nílama. ⁴ A'lí Jesusi ku nijéwaga jeaneli: Echo'ná Riosi Ra'íchala oselíwalachi jerigá osirúami ju:

Echi pagótami ketasi chopi ko'wáami jiti pirérama, chopi ayénachó arígá 'wéraili ju mapu aboni galá bichíima suwaba Riosi Ra'íchala, mapurigá aboni ne bichíwali sinibí niráa pirélama.

⁵ A'lí echí riablo toli echí Jesusi echo'ná Galabé Walúlachi, Jerusalémachi anilwachi. A'lí binói wilali echí Jesusi echo'ná ripá moba echí walubé Juríosi ri'obáwalachi. ⁶ A'lí echí riablo jeaneli: Mujé a ne bichíwali Riosi Ranala níisagá, jena'í jonsa mi ri'lé pochí, a'lí tarapé namuti mi chibi ikimea, mapujiti jerigá osirúami ju echo'ná Riosi Ra'íchala oselíwalachi:

Riosi nulema echí jaré wikabé kepu kapitánowa mi jiti,
mapurigá aboni mi mutúma echo'ná kepu sikachí niráa,
mapurigá mi ke siné chiwimea kepu rarachí echo'ná ritérari.

⁷A'lí Jesusi ku nijéwaga jeaneli: Ayénachó je'ná jerigá osirúami ju echo'ná Riosi Ra'íchala oselíwalachi:

Ketasi mi waminá nulé mapurigá echí Walubela kemi Riósawa chati olama.

⁸A'lí pe wakinana echí riablo toli echí Jesusi echo'ná ripá biréana wabé ripabé rabó. A'lí sinepi niráa 'nérali suníami kawichí walula nulálachi jena'í wichimóbachi nirúami. Ayénachó 'nérali mapurigá echo'ná nuláami o'wéala ne wabé simírami o'wéala níili. ⁹A'lí echí riablo jeaneli: Nijé wabé omérami ju nimí ayá mapurigami ne walubela nuláami níima ne suníami jena'í wichimóbachi. Nijé nimí 'yama suwaba je'ná walubélawala a Mujé arígá tamí yuwa bacháami chokoba wilisáagá, mapurigami tamí waminabi walubélaga anémami, ketasi mapurigá Mujé. ¹⁰A'lí Jesusi jeaneli: Miná waná simigá mujé Satanasi riwéami riablo, mapujiti echo'ná Riosi Ra'íchala oselíwalachi je'ná jerigá osirúami ju:

Mujé chopí bacháami chokoba wiligá walubélaga anema echí Walubela mujé Riósawala.

Ayénachómi chopí o'wikema echí Walubela mujé Riósawala.

¹¹A'lí echí riablo ma ariweli. A'lí echí jaré Riosi kapitánawala we yáati sisáa, ku'wírali echí Jesusi.

Jesusi chótali nawésiya

(Mr. 1:14-15; Lk. 4:14-15)

¹²A'lí mapalí Jesusi ma námali mapu echí Juani ma pachá bachárami níili, echalí Binói ku simili echo'ná Galiléachi anilíwachi kawírali. ¹³A'lí Jesusi ketasi auchecho ku bitéali echo'ná Nasarétachi anilíwachi walúlachi, chopí Binói nawagá bitéali echo'ná Kapernaúmachi anilíwachi walúlachi, echo'ná ba'wírali suwé mapo'ná Sabulona anilíwami pagótami kawíwalachi ju, echí auché jaré Nepalí anilíwami pagótami kawíwalachi ayénachó, ¹⁴mapurigá echirigá galá ikimea mapurigá bachá niráa anili echí Walula Riosi jiti nawésami Isaíasi riwéami, mapalí je'ná jerigá osali:

¹⁵Echo'ná echí jaré Sabulona anilíwami pagótami kawíwalachi, ayénachó echo'ná echí jaré Nepalí anilíwami pagótami kawíwalachi,
echo'ná walú ba'wírali burúami, waminá bo'ónala Joránachi anilíwachi bakochi,
echo'ná Galiléachi anilíwachi kawírali mapo'ná piré echí jaré isena pagótami.

¹⁶Echi pagótami mapu echo'ná rokowárali piréali ma galá machíratami níili.
Ayénachó echí jaré pagótami mapu chopí suwiméa riwéali, ma galá rayéntami níili.

¹⁷Echalfí jonsa Jesusi chótali nawésiya jeanigá: ¡Galabé si'nú niráa 'natasi! ¡Ku ro'wisi Riosi yuwa! Mapujiti ke 'me ayó echí Riosi ripá riwigachi atíami galá nulema si'néami pagótami.

Jesusi bayeli naó rijói mapu rochí sirúami níili, mapurigá aboni Binói yuwa najátama

(Mr. 1:16-20; Lk. 5:1-11)

¹⁸A'lí echo'ná ba'wírali suwé Galiléachi anilíwachi iyénaga, Jesusi riwali okuá rijói najirémami, echí mapu Simoni níili, mapu ayénachó Pegro riwéami níili, echí Antresi ayénachó, mapu echí Simoni rijimala níili. A'lí aboni we pali echí walú

namuti tétami mapuyiri chiní echo'ná ri'lé ba'wílali mapujiti aboni rochí sirúami níili. ¹⁹ A'lí Jesusi jeaneli: Wakiná tamí yuwa najátasi, a'lí 'yemi nimí binérama mapurigátamo galá omérabo binériya echí auché jaré pagótami, mapurigá aboni galá tamí bichíima. ²⁰ A'lí biché aboni we yáa ariwesa echí jaré o'weli namuti tétami mapuyiri chiní, a'lí Jesusi yuwa jubáami najátali.

²¹ Echo'ná jonsa, Jesusi pe minana simigá riwali auché jaré okuá rijói najirémami, echí mapu Jakobo riwéami níili, echí Juani ayénachó mapu binói Jakobo rijimala níili. Okuánika echí bilé rijói Sibireo riwéami kúchuwala níili. Je'ná okuá najirémami muchiri echo'ná pachá biléana bárkochi, echí kepu onó Sibireo riwéami yuwa. A'lí aboni pachókiya muchili echí o'weli tétami namuti mapuyiri chiní mapujiti aboni chapili echí wikabé rochí. A'lí Jesusi bayeli echí aboni. ²² A'lí okuánika aboni we yáati ariwesa echí barko, ayénachó ariwesa aboni onolá, a'lí jubáami najátaga simíbali echí Jesusi yuwa.

Jesusi binérali wikabé pagótami

(Lk. 6:17-19)

²³ A'lí Jesusi ne suníami iyénali echo'ná Galiléachi. Ayénachó galá binéraga nawésali echo'ná suníami aboni ri'obáwalachi. Binói galá nawésali echí Galabé Riosi Ra'íchala, jeanigá mapu Riosi ma galá nulé echí pagótami. Ayénachó Binói galá ku sa'wali suwaba nayúkowami, suwaba okókowami ayénachó. ²⁴ A'lí si'néami echo'ná Síriachi anilíwachi kawírali piréami galá ikíili mapu Jesusi echirigá olali. A'lí aboni echo'ná Binói yuwa pali ne si'néami echí jaré nayúkami, si'néami mapu karúrigá nayúkowami jiti nayúkali, ne si'néami mapu ikí risúu olárami níili echí okókowami jiti ayénachó, ne si'néami echí auché jaré wabé chati riabla aliwala aliwéami ayénachó, ne si'néami echí auché jaré ketasi omériami 'asísiya ayénachó. A'lí Jesusi galá ku sa'wali ne si'néami. ²⁵ A'lí Jesusi yuwa najátali wikabé pagótami echo'ná Galiléachi anilíwachi kawírali piréami, echo'ná makóisana o'wéalachí piréami ayénachó, echo'ná walúlachi Jerusalémachi piréami ayénachó, echo'ná Juréachi anilíwachi kawírali piréami ayénachó, echo'ná bo'ónala bakochi Joránachi anilíwachi piréami ayénachó.

Jesusi galá nawesa, echo'ná ripá rabó asagá

5 Mapalí Jesusi riwari echí wikabé pagótami, a'lí Binói simili echo'ná biléana ripá rabó. A'lí mapalí Binói echo'ná asíbali, a'lí echí jaré mapu Binói binérali echo'ná sili mapo'ná Binói asali. ² A'lí Jesusi chótali binéria, jeanigá:

Echi jaré wabé kaníliami

(Lk. 6:20-23)

³ Arigá ne wabé ganíliami ju si'néami pagótami mapu ikí we o'mónami juko aboni sulálachi niráa, mapujiti Riosi galá nulé aboni. ⁴ Ayénachó arigá wabé ganíliami ju si'néami pagótami mapu ikí we nalákako, mapujiti Riosi galá ganílatama aboni. ⁵ Ayénachó ne wabé ganíliami ju si'néami pagótami mapu ikí ketasi níliami juko, mapujiti aboni narema je'ná kawí mapurigá aboni níwala niráa. ⁶ Ayénachó ne wabé ganíliami ju si'néami pagótami mapu ikí ne wabé nakiko mapu aboni ku wikawárami níima, mapujiti aboni ne bichíwali galá ku wikawárami níima. ⁷ Ayénachó ne wabé

ganíliami nilisi 'yemi si'néami pagótami mapu ikí we natimáami juko, mapujiti Riosi ne wabé natimama aboni. ⁸Ayénachó ne wabé ganíliami ju si'néami pagótami mapu ikí galá bi'wíami suléami juko, mapujiti aboni galá riwimea Riosi. ⁹Ayénachó ne wabé ganíliami ju si'néami pagótami mapu ikí galá ruyé echi auché jaré pagótami, jeanigá mapu aboni kilí ologá pirélama. A'lí echirigá ruyéami pagótami echirigá ganílama mapujiti Riosi anema aboni, Binói kúchuwala niráa. ¹⁰Ayénachó si'néami galá bichiyami pagótami ne wabé ganíliami ju mapalí echi auché jaré ke bichiyami pagótami ne wabé chati ologá a'najátama aboni, chopi mapujiti aboni galá bichíi Riosi, ayénachó mapujiti aboni we galabé olá. A'lí aboni we ganíliami ju mapujiti Riosi galá nulé aboni. ¹¹'Yémítamo arigá ne wabé ganíliami ju mapalí echi auché jaré ke bichiyami pagótami 'yemi mi wabé yóniga a'najátama chopi mapujítitamo tamí bichíi. Ayénachótamo arigá ne wabé ganíliami ju mapalí aboni, 'yékaka niráa, wabé chárígá ra'ichama, 'yemi mi sayéraga. ¹²Echalí ne wabé ganílasi 'yemi, mapujítitamo galá ku natétarami níibo echo'ná ripá riwigachi. Echirigá achigórigá kichiga a'najárami níili echi jaré o'wéala Riosi jiti nawésami mapu chabé ki'yá piréali, mapalí 'yémítamo ketasi cho piréali.

Echi jaré bichiyami mapurigá echi koná ju

(Mr. 9:50; Lk. 14:34-35)

¹³'Yémítamo ju mapurigá echi koná, jena'í wichimóbachi nirúami. Chopi a echi koná ketasi galabé akáami níisagá, echalí echi koná ketasi chirigá galá ku akáami niwárami níima, chopi ma ketasi iré. Echalí miná machí pátami níima mapo'ná echi pagótami we rikema.

Echi jaré bichiyami ayénachó mapurigá rajáami ju

¹⁴'Yémítamo mapurigá rajáami ju, jena'í wichimóbachi. Ayénachó mapalí wikabé kalí niwárami níisa echo'ná biléana ripá rabó, echalí echi kalí sinibí galá riwirúami níima. ¹⁵Mapalí echi pagótami rajema echi chopé, ke wesi aboni wilama echi chopé rajáami echo'ná ri'lé pachá biléana kajonchi. Chopi aboni ripabé ritérali wilama mapurigá aboni echirigá machílatama si'néami echo'ná pachá kalírali muchúami. ¹⁶'Yemi ayénachó echirigá mapurigá rajáami niráa níisi, echo'ná bacháami echi auché jaré pagótami yuwa. Ne galabé ologá pirélasi echi auché jaré pagótami yuwa, mapurigá aboni galá riwimea mapurigá 'yémítamo sinibí galabé ologá piré, mapurigá aboni echijiti waminabi walubéraga anema echi 'yemi Onolá mapu echo'ná ripá riwigachi atí.

Jesusi binérali mapurigá Riosi nuleli echi pagótami

¹⁷Ketasi 'natasi mapu Nijé nakubámiya nawali echi Riosi nulalila. Ni bilé cho 'natasi mapu Nijé nakubámiya nawali echi auché jaré osirúami, Riosi jiti nawésami oselíwala. Ketasini nakubámiya nawali. Chopi Nijeni nawali mapurigani echirigá ne sébali olama mapurigá echo'ná osirúami ju. ¹⁸Ne bichíwali Nijé 'yemi nimí ané mapu ketasi suwibama bilé táo osirúami, nirapé suwibama echi wabé tabéala osirúami mapu echo'ná Riosi nulalila oselíwalachi osirúami ju mapuyénasí abijí tibima Riosi bitélachi echo'ná ripá riwigachi nirúami, mapuyénasí abijí tibima je'ná wichimoba ayénachó. Chopi ne suwaba gará ikímea mapurigá osirúami ju echo'ná Riosi nulalila oselíwalachi. ¹⁹Mapuyíripi rijói ketasi gará nijéwasagá echi wabé

tabéala Riosi nulalila, chopi arigá binérasa echi auché jaré pagótami mapurigá aboni ayénachó ketasi galá nijéwama, échiko ne wabé tabéala níima echo'ná ripá riwigachi mapo'ná Riosi we nulá mapurigá ne Walubela niráa. Chopi mapuyíripi rijói ne galá nijéwasagá, ayénachó echirigá binérasa echi auché jaré pagótami mapurigá aboni ayénachó galá nijéwama, échiko mapurigá bilé walula niráa níima echo'ná ripá riwigachi mapo'ná Riosi nulá mapurigá ne Walubela niráa.²⁰ Mapujiti 'yemi nimí ané mapu a 'yemi ketásitamo waminabi galabé oláami níisagá, ketasi mapurigá echi jaré Riosi nulalila binériami, ayénachó ketasi mapurigá echi Bariseo anilíwami binériami, a'lí 'yémítamo ketasi chirigá sebabo echo'ná ripá riwigachi mapo'ná Riosi we nulá mapurigá ne Walubela niráa.

Jesusi binérali echi pagótami jeanigá mapu aboni ketasi na'áwama (Lk. 12:57-59)

²¹ Mátamo námali mapurigá Riosi aneli echi jaré ki'yá piréami, jeanigá: ¡Ketási mi'yá auché jaré! Ayénachó echi mapuyíripi mi'líságá auché jaré, échiko ne wabé wi'nijírami níima. ²² Chopi Nijé 'yemi nimí jeané: Mapuyíripi rijói ne wabé simírami yónasagá echi auché jaré pagótami, échiko ne wabé simírami wi'nijírami níima. A'lí echi jaré o'wéala ochérami ayénachó wabé wi'nijima mapuyíripi rijói wabé chati anésagá echi auché jaré pagótami. Ayénachó mapuyíripi rijói wabé chati anésagá echi auché jaré, échiko echo'ná ri'lé riáblochi pátami níima, mapo'ná ne walú rajá.

²³ Echijiti ami pásagá mujé níwala kónawami echo'ná pachá Riosi níwala ri'obachi, mapurigami echo'ná bacháami 'yama Riosi, chópimi echo'ná a binói 'natásagá mapurigá auché bilé rijói mi we sayera, jaré namuti jiti, ²⁴echalí echo'ná pachá ri'obachi bacháami ariwé echi mujé níwala kónawami. A'lí bachá niráa ku simigá ku katéwaga ganílama echi auché bilé rijói yuwa mapu mi we sayera. Echalimi auchecho siné ku simigá echo'ná ri'obachi mapurigami galá 'yama Riosi echi mujé níwala kónawami.

²⁵ Sinibí we yáati ku katéwaga ganili echi mujé sayela yuwa, mapuyénasími binói yuwa inaro echo'ná buwichí, mapalí 'yémítamo okuánika katéwaga simabo echi jaré igúsuwami yuwa. Echirigá we yáati ku katéwaga ganili binói yuwa mapurigá ketasi ikímea mapu echi mujé sayela mi banírama echo'ná bacháami echi komisario yuwa, a'lí echi komisario mi 'yama echi kapitani, a'lí bichemi pachá bachárami níimíre. ²⁶ Ne bichíwali nimí ané mapu echirigá ikiságá, mujemi ketasi ku machínama echo'ná pachá kumurachi jonsa, mapuyénasími ke cho káraga natétasagá ne suwaba wenomí mapu ikí echi jaré igúsuwami mi bujénali.

Jesusi binérali jeanigá mapu echi jaré mapu niwíami juko ketasi auché jaré isena yuwa kochimea

²⁷ 'Yémítamo ma námali mapurigá Riosi aneli echi jaré ki'yá piréami jeanigá: 'Yemi rijói jubéami ketasi kochisí echi jaré isena muguí yuwa. Ayénachó 'yemi muguí kunéami ketasi kochisí echi jaré isena rijói yuwa. ²⁸ Chopi Nijé 'yemi nimí jeané: Mapuyíripi rijói chopi we 'néniga nakígá yuwa kochinálasága bilé si'nú mukí yuwa, échiko ma chati olali pachana binói sulálachi niráa, achigórígá mapurigá bilé rijói ne bichíwali we chati olá mapali binói kochimea bilé si'nú mukí yuwa mapu ketasi binói upila ju. ²⁹ Echijiti a mujé busila echo'ná watoná mi chati olárasagá, ketasi nakiwi mapu mujé binói busila mi echirigá chati olárama. ¡Waminá machí

pa echí mujé busila, kérémá! Waminabi ne galá níima wikáwasagá biléana busí, mapurigami arigá ku bitérama echo'ná ripá riwigachi, mapurigami ketasi káraga pátami níima echo'ná ri'lé riáblochi mapo'ná walú rajá.³⁰ Ayénachó a mujé sikala echo'ná watoná mi chati olárasagá, ketasi nakiwi mapu mujé binói sikala mi echirigá chati olárama. ¡Waminá ripuná echí mujé sikala, kérémá! Waminabi ne galá níima wikáwasagámu biléana siká mapurigami arigá ku bitélama echo'ná ripá riwigachi, mapurigami ketasi káraga pátami níima echo'ná ri're ériáblochi mapo'ná walú rajá.

**Jesusi binérali jeanigá mapu echí jaré mapu ma niwíami juko, ma ketasi
auchecho ku rojuama**

(Mat. 19:9; Mr. 10:11-12; Lk. 16:18)

³¹ Ayénachótamo ma námali mapurigá echí Moisesi je'ná jerigá osogá nuleli echí jaré ki'yá piréami pagótami: Mapuyíripi rijói ma ariwesa binói upira, echarí gará níima 'yasa bilé oselí osirúami jeanigá mapu binói ma ariweli echí binói upila, mapurigá aboni echirigá ma ku rojuama. ³² Chopi Nije 'yemi nimí jeané: Mapuyíripi rijói ariwésagá binói upila, échiko we chati olá, binói upila sayéraga, mapujiti echí mukí echirigá osá chokéami niráa kunesa, we chati olá mapurigá bilé si'nú rijói yuwa kochíami. Ayénachó mapuyíripi rijói upeko echí ku pátami mukí yuwa, échiko ayénachó chati olá mapurigá bilé si'nú mukí yuwa kochíami niráa. Chopi siné káachi riwirúami níisa mapurigá echí mukí bachá niráa, auché bilé rijói yuwa kochili mapalí echí mukí ke cho kunéami níili, echalí risensia ju mapu binói kunala ku rojuaga ariwema echí mukí.

**Jesusi binérari jeanigá mapu echí pagótami ketasi chuwé
ra'íchaga anema echí Walubela Riosi riwará**

³³ Ayénachótamo ma námali mapurigá echí Moisesi je'ná jerigá oseli echí ki'yá piréami pagótami: Ketásimi we chuwé ra'íchaga ané echí Warubera Riosi riwalá. Chópimi ne bichíwaga ra'ichama Riosi yuwa. ³⁴ Chopi Nijé 'yemi nimí jeané: Ketásitamo wepi chuwé ra'ichasi tabiyiri namuti jiti, nirapétamo chuwé ra'ichasi echo'ná ripá riwigachi nirúami namuti jiti, mapujiti echo'ná ripá riwigachi Riosi níwara asibálachi ju. ³⁵ Ketasi wepi chuwé ra'ichasi jena'íwichimóbachi nirúami namuti jiti, mapujiti jena'íwichimóbachi ju mapo'ná Riosi we nulé echí pagótami. Nirapé wepi chuwé ra'ichasi echo'ná Jerusalémachi aniríwachi walúlachi jiti, mapujiti echo'ná walúlachi echí Walubela Riosi níwala ju. ³⁶ Nirapétamo wepi chuwé ra'ichasi 'yemi mo'ola jiti, mapujiti ketásitamo omérabo rosákami niwayá ni bilé kupá, nirapétamo omérabo chökami niwayá. ³⁷ Chópitamo jerigá ra'ichasi: Ayena. Ayena. Jerigá anigá kérémá: Ketasi. Ketasi. Mapujiti suwaba mapu waminabi simírami ju je'ná jiti, échiko ketasi 'me galabé ra'ichárami ju.

**Jesusi binérali jeanigá mapu echí pagótami ketasi ku kuwana sayéra
echí jaré aboni asayela**

(Lk. 6:29-30)

³⁸ Mátamo námali mapurigá echí Moisesi je'ná jerigá nuleli echí jaré ki'yá piréami pagótami jeanigá: A bilé rijói mi busugásnasagá biléana busí, a'lí mujé binói ayénachó achigórigá ku busugásanama biléana echí rijói busila. Ayénachó mapu a bilé rijói mi na'mínasagá biléana ramé, a'lí mujé binói ayénachó achigórigá

ku na'mini biléana echí rijói ramilá. ³⁹Chopi Jesúsi binói ayénachó jeanili: Nijé 'yemi nimí jerigá ané: Ketásitamo echirigá ku kuwana sayérabo echí auché jaré pagótami mapu 'yemi mi chati olá. Chopi mapuyíripi rijói mi cho'nisá echo'ná watoná mujé banalachi, ayénachó risénsia 'ya mapurigá binói mi auchecho siné cho'nimea echo'ná o'winá mujé banalachi. ⁴⁰A'lí mapuyíripi rijói nakiko mapu mi 'yema mujé napáchala, mapalí binói justicia tani echí jaré igúsuwami yuwa, arigá káraga 'ya mujé napáchala, mujé kimala ayénachó. ⁴¹A'lí biché mapuyíripi rijói mi nuleko mapu mujé apanéraga simea binói yuwa pe mulubé niráa, arigá simigá binói yuwa auchecho miná osá niráa. ⁴²Galá 'ya mapuyíripi rijói mi tániko bílé namuti. Ayénachó galá wikanéwi mapuyíripi rijói nakiko wikaká chapimea mujé níwala namuti.

**Jesúsi binérali jeanigá mapu echí pagótami arigá kalema echí jaré aboni asayela
(Lk. 6:27-28, 32-36)**

⁴³Mátamo námali mapurigá echí jaré ki'yá piréami pagótami jeanili: Ne galá kalé echí jaré echo'ná mulubé mujé yuwa piréami, ayénachó ne wabé kichí echí jaré mujé asayela. ⁴⁴Chopi Nijé 'yemi nimí jeané: Ne galá kalesi echí jaré 'yemi asayela. Ne galabé ra'íchasi echí jaré mapu 'yemi mi we chati ra'íchaga ané. Ne galá olasi echí jaré yuwa mapu 'yemi mi we kichí. Ayénachó Riosi yuwa tániga ra'íchasi echí jaré jiti mapu 'yemi mi wabé kichiga, risúu olá, ayénachó echí jaré jiti mapu 'yemi mi wabé kichiga a'najata. ⁴⁵Echirigá olasi mapurigátamo ne bichíwali kétamo Onó tanala níibo, mapu echo'ná ripá riwigachi atí, mapujiti Binói galá olá mapurigá echí Binói níwala rayénali ne galá rayénataga olá echí jaré wabé chati oláami pagótami, achigórigá mapurigá ayénachó rayénata echí auché jaré galabé oláami pagótami. A'lí Riosi ayénachó nulá mapu galá ukumea echo'ná echí jaré galabé bichíyami pirélachi, ayénachó echo'ná echí jaré ketasi bichíyami pirélachi. ⁴⁶Mapujiti átamo chopi kalésagá echí jaré pagótami mapu ayénachó 'yemi mi wabé kalé, ¿churigátamo ku natétarami níibo mapurigá galabé oláami niráa? ¿Kéchatamo echirigá achigórigá olá mapurigá echí jaré wenomí napabúami, mapu 'yémitamo we chati oláami niráa ané? ⁴⁷A'lí átamo chopi naripásagá echí auché jaré 'yemi ritémawala, ¿píritamo echirigá wabé simírami galabé olá? ¿Kéchatamo echirigá achigórigá olá mapurigá echí auché jaré ketasi bichíyami pagótami? ⁴⁸Ne galá níisi 'yemi, mapurigá kétamo Onó, ripá riwigachi bitéami ne galabé ju.

Jesúsi binérali jeanigá mapu churigá echí pagótami galabé olama

6 Ketasi chopi olasi echí we galabé olalila bacháami echí auché jaré pagótami yuwa, mapurigátamo echirigá chopi galá riwirúami níibo echí jaré aboni jiti. Átamo echirigá olásagá ketásitamo ku natétarami níibo 'yemi Onolá jiti, mapu echo'ná ripá riwigachi atí.

²Mapalimi kóoma echí auché jaré we tisúwati pagótami, ketasi echirigá olasi chopi mapurigá auché jaré pagótami riwimea mápumi galabé olá. Ketasi nulesi we iwéami siménara bacháami mujé yuwa mapalimi echirigá kóoma echí jaré tisúwati. Echirigá chopi olá echí auché jaré mapu galabéragera ané aboni niráa, chopi aboni arigá wabé 'yékaka olá. Aboni chopi echirigá olá echo'ná pachá aboni ri'obáwalachi, echo'ná walúlachi nasipa ri'narátachi keremá, mapurigá echí auché jaré pagótami echirigá riwisáa, wabé galabéragera anema aboni. Ne bichíwari Nijé

'yemi nimí ané mapu aboni ma ku natétarami ju. Riosi ketasi waminabi natétama aboni. ³Chopi mapalí mujemi kóoma jaré we tisúwati pagótami, galá níima chiná niráa kóosa. Echalí ketasi kóosi aboni echo'ná bacháami auché jaré pagótami yuwa, mapurigá aboni echirigá galá riwisá, a'lí animea mapu mujé binói we galabé oláami ju. ⁴Echijiti we chiná niráa kóosi echí auché jaré we tisúwati. A'lí mujé Onolá mapu ne galá ritiwá suwaba namuti chiná nasótami, échiko ne galá suwaba riwíraga mi galá ku natétama.

Jesusi binérali jeanigá mapu churigá galá níima ra'ichasa Riosi yuwa
(Lk. 11:2-4)

⁵A'lí mapalimi tániga ra'icha Riosi yuwa, ketasi níisi mapurigá echí auché jaré pagótami mapu chopí galabérage ané aboni niráa, chopí aboni arigá wabé 'yékaka olá. Echi jaré aboni we kaníliga jawi echo'ná pachá ri'obachi mapalí aboni olá mapurigá Riosi yuwa ra'ichaga niráa. Ayénachó aboni we kaníliga jawi echo'ná machímanomí mapalí aboni ayénachó echo'ná olá mapurigá Riosi yuwa ra'ichaga niráa. Aboni chopí echirigá olá mapurigá echí auché jaré pagótami, echirigá riwisáa, ne garabé oláami niráa anema echí aboni. Ne bichíwali 'yemi nimí ané mapu aboni ma niwa kepu natétawala. Riosi ketasi waminabi natétama aboni. ⁶Chopi mujé mapalimi ra'icha Riosi yuwa, echo'ná pachánala mujé kalílachi bakí. A'lí ma 'yérasa 'yera, a'lí ra'ichá mujé Onolá yuwa mapu chiná atí. A'lí mujé Onolá mapu galá ritiwá suwaba namuti chiná nasótami, Binói mi galá ne suwaba riwíraga ku natétama.

⁷A'lí mapalimi ra'icha Riosi yuwa, ketasi wisabé ra'ichá bilepi ra'ichali niráa mapurigá echí jaré ketasi galabé bichíyami sinibí olá, mapujiti aboni mayé mapu Riosi galá námama aboni mapujiti aboni wisabé niráa ra'icha bilepi ra'ichali niráa. ⁸Ketasi níisi 'yemi mapurigá aboni niráa, mapujiti kétamo Onó galá machí mapu piri namuti newalé, mapalítamo ke cho táni. ⁹Yémítamo jerigá ra'ichabo Riosi yuwa: Tamujé Onolá mápumi echo'ná ripá riwigachi atí, ne galá o'wikérami níлага Mujé riwalá. ¹⁰Ne galá nulá Mujé jena'í wichimóbachi, ne Walubela niráa. Suwaba galá olá mapurigá Mujé nakí jena'í wichimóbachi, achigórígá mapurigami olá echo'ná ripá riwigachi. ¹¹Tamujé tamí 'ya echí ko'wáami máputa newalé jipi rawé. ¹²Tamujé tamí ku wikawi suwaba mapurigata we chati olali, mapurigá tamujé ayénachó ku wikawa si'néami echí auché jaré mapu tamujé tamí we chati olali. ¹³Ketasi ariwé mapu echí wabé chati oláami riablo tamujé tamí chati olánlalama, chopí tamujé tamí 'ye echí wabé chati oluwáwami, mapujiti Mujé chopí risensia ju mapu nulema echí jaré pagótami, mapujiti Mujé suwaba omérami ju, mapujítimi ne Walubela ju ne sinibí niráa. ¡Echirigá níлага! ¹⁴Mapujiti ayénatamo ku wikawásagá echí auché jaré pagótami mapalí aboni 'yemi mi chati olama, a'lí kétamo Onó, ripá riwigachi atíami, ayénachó 'yemi mi ku wikawama. ¹⁵Chopi a ketásitamo ku wikawásagá echí auché jaré pagótami mapalí aboni 'yemi mi chati olama, a'lí kétamo Onó ketasi cho 'yemi mi ku wikawama mapurigá 'yémi aboni we chati olali.

**Jesusi binérali jeanigá mapu churigá galá níima olasa mapalí aboni wi'ribé niráa
ketásirapé namuti ko'wá, mapalí aboni chopí Riosi yuwa ra'ichaga muchuwi**
¹⁶Ayénachó mapalí 'yémítamo wi'libé niráa ketásirapé ko'wá, mapalítamo chopí Riosi yuwa ra'icha muchuwi, echalí ketasi wabé o'mónami níisi mapurigá olá echí

auché jaré pagótami mapu chopi galabéraga ané aboni niráa, mapalí aboni arigá wabé 'yékaka olá. Echi jaré aboni ne wabé chati chu'wéega o'mona mapurigá echí auché jaré pagótami mayema mapurigá aboni echirigá tarapé ko'wá wi'llibé niráa, mapalí aboni chopi Riosi yuwa ra'icha muchuwi. Arí aboni chopi echirigá olá mapurigá echí auché jaré pagótami galá mayema mapu aboni wabé galabé oláami ju. Ne bichíwali Nijé 'yemi nimí ané mapu aboni ma niwa kepu natétawa. Riosi ma ketasi waminabi natétama aboni.¹⁷ Chopi mapalí mujemi wi'llibé niráa ketásirapé namuti kowá, mapalimi chopi Riosi yuwa ra'icha atí, echalí ne galá tichí mujé kupala, ayénachó galá basigó,¹⁸ mapurigá echí auché jaré pagótami ketasi machimea mápumi echirigá wi'llibé niráa ketásirapé namuti ko'wá, mapalimi chopi Riosi yuwa ra'icha atí. Echirigá olasi mapurigá mujé Onolá mi galá suwaba riwíraga, galá ku natétama, mapujiti Binói ne galá ritiwá ne suwaba namuti chiná nasótami.

**Jesusi binera jeanigá mapu chúrigá echí jaré bichíyami ne wabé níwami
níima echo'ná ripá riwigachi**

(Lk. 12:33-34)

¹⁹ Ketasi chopi napabusí wikabé galabé namuti jena'í wichimóbachi, mapo'ná echí koséwali we suwá echí jaré namuti, ayénachó mapo'ná echí jaré namuti we suwiba, ayénachó mapo'ná echí jaré chigórami we chigóbia, mo'wimea echo'ná pachá 'yemi pirélachi.²⁰ Chopi ne wabé napabusí echí wabé galabéala echo'ná ripá riwigachi, mapo'ná echí koséwali ketasi suwábama echí jaré namuti, ayénachó mapo'ná echí jaré namuti ketasi suwibama, ayénachó mapo'ná echí jaré chigórami ketasi chigóbiya, mo'wiméa echo'ná 'yemi pirélachi.²¹ Mapujiti echo'ná mapo'ná 'yemi níwala galabéala atí, echo'ná 'yemi aboni ayénachótamo nakiboa muchínala.

Bilé na'í rajáami niráa echo'ná pachana echí pagótami surárachi nirúami
(Lk. 11:34-36)

²² Mujé busila mapurigá bilé na'í rajáami ju, echo'ná mujé sapálachi nirúami. A'lí mapalí mujé busila ne galabé níisagá, echalí ne suníami echo'ná pachana mujé sapálachi káraka galá machíimi níima, ayénachómi ne galá kónami níima, ayénachó Riosi galá machílama echo'ná pachana mujé sulálachi, mapurigami galá machimea Riosi Ra'íchala.²³ Chopi mapalí mujé busila wabé chati níisagá, echalí ne suníami echo'ná pachana mujé sapálachi káraka rukuáwami níima, ayénachómi ne wabé risirúami níima, ayénachó Riosi ma ketasi machírama echo'ná pachana mujé sulálachi, echijítimi ketasi galá machimea Riosi Ra'íchala. A'lí mapalí echí rajáami echo'ná pachana mujé sulálachi nirúami arigá we cho'wíami níisagá ¡echalí ne wabé simírami rukuáwami níima echo'ná pachana mujé sulálachi nirúami!

Ketasi galá ju korükawa echí wenomí
(Lk. 16:13)

²⁴ Ke wesi omérama sinepi niráa nijéwiya okuá rijói o'wéala mapurigá ibili echí binói walúlawala níisa, mapujiti echalí biléala we kichima, siné kaachi, a'lí auché biléala we kalema, siné káachi. Echalí echí bilé yuwa wabé kanílama keremá, a'lí echí auché bilé yuwa ketasi kanílama keremá. Echijiti 'yémítamo ketasi omérabo o'wikeya Riosi, átamo sinepi niráa ne wabé korúsagá echí wikabé namuti wenomí jena'í wichimóbachi nirúami.

Riosi ne galá nisé Binói kúchuwala

(Lk. 12:22-31)

²⁵Echijiti Nijé 'yemi nimí jeané: Ketasi wikabé namuti wabé nílaga 'natasi, mapu churigátamo waminabi pirélabo, mapu píritamo kopo, mapu píritamo bajibo kéremá. Nirapé 'natasi 'yemi aboni jiti, mapu píritamo napachabo. Echi pagótami aliwala ne wabé simírami natiguí, ketasi mapurigá echi ko'wáami. Ayénachó echi pagótami sapala waminabi ne wabé simírami natiguí ketasi mapurigá echi jaré napachala. ²⁶Ne galá 'nesi echi jaré chuluguí echo'ná ripá i'nika 'yénami, mapujiti aboni ketasi ichá, nirapé 'wí, nirapé napabú echo'ná biléana rikówachi. Chopi kétamo Onó ripá riwigachi atíami ne galá kowa si'néami echi jaré churuguí. ¡'Yémítamo waminabi wabé simírami natiguí, ketasi mapurigá echi jaré chuluguí! ²⁷Ke wesi 'yemi ne wabé nílaga 'nátaga, omérama a binói auché pée wi'llibé niwayá bilé makali.

²⁸Echijiti ¿churékulátamo ne wabé nílaga 'nata mapu churigátamo napachabo? Ne galá 'nesi mapurigá echi jaré rakó, echo'ná kawichí nirúami, we galá ba'yóami niráa ochero. Echi jaré rakó ketásirapé nocha, nibilé niwá napacha. ²⁹Chopi Nijé 'yemi nimí ané mapu echi walula silíami Salomoni riwéami ketásirapé echiyena ne wabé ba'yóami napáchali ketasi mapurigá bilé rakó niráa, mapalí binói ne wabé níwami níili. ³⁰A'lí a Riosi echirigá ne wabé galá ba'yóami niráa napachátasagá echi rakó mapu jipi rawé galá jawi echo'ná kawichí, chopi ba'alfnala rawé echo'ná naírali ikósarami níima, ¡Riosi Binói 'yemi mi ne wabé simírami gala napachátama, 'yemi pagótami ke 'me galá bichiyami! ³¹Echijiti ketasi wabé nílaga 'natasi jeanigá: ¿Pírita kopo? Jeanigá keremá: ¿pírita bajibo? Jeanigá keremá: ¿pírita napachabo? ³²Mapujiti echi auché jaré pagótami ke bichiyami wabé nílaga amí suwaba je'ná jeyiri namuti. A'lí echi 'yemi Onorá, ripá riwigachi atíami, ne galá machí mapu 'yémítamo we newalé suwaba je'ná jeyiri namuti. ³³Chopi ne bachá niráa tansi mapurigá Riosi 'yemi mi ne galá nulema pachana 'yemi sulálachi niráa, ayénachó ne galabé ologá pirélasi mapurigá Riosi nakí. Echalí Riosi ayénachó 'yemi mi 'yama suwaba je'ná jeyiri namuti mapu ikítamo newalebo. ³⁴Echirigá ketasi wabé nílaga 'natasi jeanigá: ¿Churigá ikimea ba'alí rawé? Mapujiti ba'alfnala rawé arigá nirúlama auché jaré wikabé echiyiri namuti mapu 'yemi mi echirigá wabé nílaga 'natárama, átamo echirigá nakisáagá 'natánala.

Ketasi wi'nijisi auché jaré pagótami

(Lk. 6:37-38, 41-42)

7 Ketasi wi'nijisi auché jaré pagótami, mapurigá Riosi ketasi cho 'yemi mi wi'nijima. ²Mapujiti mapurigá 'yémítamo wi'nijibo echi auché jaré, echi Walubera Riosi echirigá achigórigá 'yemi mi ku wi'nijima. A'lí a 'yémítamo pe téeli niráa anáwisagá echi auché jaré pagótami, echalí Riosi ayénachó echirigá achigórigá 'yemi mi ku anáwima. ³¿Churékurami we 'neni echi táa namuti busuékowami mapu echo'ná mujé rijimala busílachi chukú, a'lí bichemi ketásirapé 'neni echi walú kutega mapu echo'ná mujé binói busílachi bu'wí? ⁴¿Churigami omero jeanée echi mujé rijimala, keremá: Pe téeli buwé. Nijé machí pásama echi táa busuékowami namuti echo'ná mujé busílachi jonsa, mapalí echo'ná mujé binói busílachi abijí bu'wí bilé walú kutega? ⁵¡We ikaléami jumi! Ne bachá machí pa echi walú kutega echo'ná mujé binói busílachi jonsa, a'lí bichemi ne galá riwimea

mapurigami machí pama echí táchá namuti busuékowami echo'ná mujé rijimala busílachi jonsa.

⁶Ketasi 'yasi echí Riosi níwala wabé galabéala echí jaré wabé simírami chati oláami pagótami yuwa, mapu arígá mapurigá kochí ju. Nirapé achasi 'yemi níwala wabé galabéala, mapurigá echí perla anilíwami niráa, echo'ná bacháami echí auché jaré wabé simírami chati oláami pagótami mapu arígá mapurigá kóchi ju, mapurigá echí kóchi ketasi miná rikema, ayénachó mapurigá aboni ketasi ku ro'wiga, 'yemi mi ikima.

Sinibí tániga ra'ichiasi Riosi yuwa

(Lk. 11:9-13; 6:31)

⁷Galá tansi Riosi, a'lí bichétamo 'yárami níibo. Galá asi mapurigá Riosi 'yemi mi 'yama, a'lí bichétamo galá riwiboa. Galá bayesi mapurigá Riosi 'yemi mi irápama, a'lí bichétamo galá iráparami níibo. ⁸Mapujiti si'néami echí jaré mapu ikí tániko Riosi bilé namuti, abóniko ne galá narema. A'lí echí jaré mapu ikí galá amíko mapurigá Riosi 'yama aboni bilé namuti, abóniko galá riwimea. A'lí echí jaré mapu ikí galá bayeko mapurigá Riosi irápama, abóniko galá iráparami níima. ⁹¿Chigá rijói nirú echo'ná 'yémichi, mapalí binói ranala galá tánsa bilé rimé, acha 'yama bilé rité? ¹⁰A'lí mapalí echí binói ranala we tani bilé rochí, ¿Acha 'yama bilé sinówi? ¹¹A'lí 'yemi pagótami ketásitamo galabé oláami ju arígátamo galá machí we galabé kóoya. Chopi a 'yémítamo arígá machisáagá we galabé namuti kóoya 'yemi aboni kúchuwala, ¿kecha Riosi Onorúami, ripá riwigachi atíami, wabé galabé namuti 'yama echí jaré mapu galá tániko?

¹²Echijiti ne suwaba namuti máputamo nakí mapu echí auché jaré pagótami 'yemi mi galá olíima, echirigá achigórigá olasi 'yemi echí auché jaré pagótami yuwa, mapujiti suwaba Riosi Ra'íchala osirúami tamujé tamí je'ná jerigá binera.

Echi pe uchíi yéachi

(Lk. 13:24)

¹³Mo'wisí echo'ná wabé uchíi yéachi, mapujiti ne wabé wi'lé ju echo'ná auché biléana yéachi, ayénachó wabé wi'lé ju echo'ná buwichí, echo'ná ri'lé riáblochi burúami, mapo'ná walú rajá, a'lí biché ne wíkabé ju mapu echo'ná mo'wiko. ¹⁴Mapujiti ne wabé uchíi ju echo'ná yéachi, ayénachó ne wabé uchíi ju echo'ná buwichí mapo'ná arígá 'wéralli ju máputamo simárabo, átamo nakisáagá máputamo sinibí piréami níibo. A'lí pe okuáa ju mapu riwako echí buwé.

Ibili rakéami namuti galá machirúami níima mapalí ma raké

(Lk. 6:43-44)

¹⁵Galá tibusi 'yemi aboni niráa, mapurigá echí jaré 'yékaka nawésami ketasi 'yemi mi 'yékama, mapujiti aboni 'yemi mi yuwa simea mapurigá Riosi pugula bo'wá niráa, chopi pachánala aboni arígá ne wabé aparúami ju mapurigá nalíwali niráa. ¹⁶'Yémítamo galá machiboa aboni, acha ne bichíwali galabé oláami pagótami ju, mapujiti 'yémítamo galá riwiboa mapurigá aboni olá, mapujiti aboni olalila mapurigá aboni rakala niráa ju. 'Yémítamo galá machí mapu echí galabé uva anilíwami rakala ketasi ripunárami níima echo'ná biléana so'uwráli. Ayénachó echí jaré galabé chuná rakala ketasi ripunárami níima echo'ná biléana chakórari. ¹⁷Echijiti suwaba

galabé rakéami namuti, ne bichíwali rakema echi galabé rakala. Ayénachó echi wabé sití rakéami namuti chopi rakema echi we sití rakala.¹⁸ Echi galabé rakéami namuti ketasi omero rakea echi wabé sití rakala. A'lí biché echi wabé sití rakéami namuti ketásirapé omero rakea echi we galabé rakala.¹⁹ Ne suwaba rakéami namuti mapu ketasi rakema echi galabé rakala, échiko miná ripunárami níima, a'lí biché echo'ná na'írali pátami níima.²⁰ Ne bichíwali 'yémítamo galá machiboa echi auché jaré pagótami, acha galabé oláami ju, mapalítamo riwiboa mapu churigá aboni ologá piré, mapujiti aboni olalila ju mapurigá aboni rakala niráa.

Ketasi 'me si'néami pagótami mo'wimea echo'ná ripá riwigachi

(Lk. 13:25-27)

²¹ Ayénachó Jesusi jeanili: Ne wikabé pagótami wisabé tamí jeané: ¡Mujemi ne wabé Walubela ju! Chopi Nijé 'yemi nimí ané mapu ketasi 'me si'néami aboni mo'wimea echo'ná ripá riwigachi. Chopi echo'ná mo'wimea echi jaré mapu galabé olama mapurigá Nijé Onolá ripá riwigachi atíami we nakí.²² Echalí ne jubá rawé wikabé pagótami jerigá tamí anema: ¡Tamuje Walubélwala! Tamujé wabé nawésali Mujé riwalá jiti, ayénachóta Mujé riwalá jiti ku machí a'wali echi jaré riablo aliwala echo'ná pachana jaré pagótami sulálachi jonsa! ¡Tamujeta wisabé wabé galabé si'winárigá olali mujé riwalá jiti, mapurigá ke wesi auché jaré pagótami omero olayá!²³ Chopi echalí Nijeni ku nijéwaga jeanema: Nijeni ke siné 'yemi mi machili. ¡Waminá waná simíbaga! ¡Tamí ariwesi, 'yemi chati oláami pagótami!

Okuá kalí

(Lk. 6:47-49)

²⁴ Mapuyíripi námiko je'ná Nijé Ra'íchala, mapu ayénachó echirigá galá nijéwaga olá mapurigá Nijeni nulá, échiko mapurigá bilé galabé 'nátami rijói ju, echi mapu echo'ná moba biléana rapichí niwali kepu kalí.²⁵ A'lí mapalí ne walubé ukuli, ne walubé bu'wíbali ba'wí echo'ná kalírali. Ayénachó mapalí ne wabé ikali, echalí ne wabé iwéami wichíbari echo'ná kalírali, chopi echi kalí ketasi najuli, mapujiti ne galá tigótami níili echo'ná moba biléana rapichí.²⁶ Chopi mapuyíripi námiko je'ná Nijé Ra'íchala, chopi ketasi echirigá galá nijéwaga olásagá mapurigá Nijeni nurá, échiko mapurigá bilé rijói ketasi 'nátami ju, echi mapu echo'ná satérali moba niwali kepu kalí.²⁷ A'lí mapalí ne walubé ukuli, ne walú bu'wíbali ba'wí echo'ná kalírali. Ayénachó ne wabé iwéami ikagá, wabé wichíbali echo'ná kalírali. Echalí echi kalí káraga najuli.

²⁸ A'lí Jesusi ma sunisa je'ná jerigá ra'icha echalí echi wikabé pagótami ne galá kilí 'nátaga tibili, mapujiti aboni ne wabé galá nirali mapurigá Jesusi nawésali.²⁹ Mapujiti Jesusi ne wabé machíami niráa binérali, mapurigá bilé walubela niráa. Binói ketasi binérali mapurigá echi jaré nulalíwami binériali, mapu chopi binérali mapurigá osirúami ju echo'ná Riosi nulalila oselíwalachí.

Jesusi ku sa'wali bilé rijói ne wabé chati chá nayúami

(Mr. 1:40-45; Lk. 5:12-16)

8 A'lí mapalí Jesusi ku rikníali echo'ná ripá rabó jonsa, echalí Binói yuwa najátili ne wikabé pagótami.² Echalí bilé rijói ne wabé chati cha nayúami nawali echo'ná Jesusi yuwa. A'lí wéemi raweka, bacháami Jesusi yuwa chokóba wiligá,

ne Walubela aneli. Ayénachó jeaneli: ¡Ami galá nakisáagá, Mujé we galá omérami ju mapurigami tamí ku sa'wama! ³A'lí Jesusi wachínaga nochogá jeaneli: ¡Nijeni wabé naki! ¡Galá ku sa'wárami nílaga! A'lí we yáati galá ku sa'wárami níili. Ma ketasi waminabi echirigá chati cha nayúami níili. ⁴A'lí Jesusi jeaneli: Tarapé wesi ku ruyé mapurigami ku sa'wárami níili. Chopi ku simigá 'nérámi echi sacerdote anilíwami rijói mápumi ma ku sa'wárami ju. A'lí 'yami echi jaré namuti mapu Moisesi osogá nulali mápumi 'yama riwéali, mapujítimi ma ku sa'wíami ju. Echirigá olá mapurigá echi auché jaré pagótami galá machimea mápumi ma ku sa'wíami ju.

Jesusi ku sa'wali echi walula sontarsi piónawala

(Lk. 7:1-10)

⁵A'lí mapalí Jesusi ma nawali echo'ná walúlachi, Kapernaúmachi anilíwachi, echalí echo'ná Binói yuwa nawali bilé walula kapitani, bilé kiento sontarsi nuléami. Échiko we risúu anigá tánali, ⁶jeanigá: Walubela, nijé piónawala ne wabé nayúami bu'wí echo'ná bitichí. Ketasi omero wilísiya. ⁷A'lí Jesusi jeaneli: Nijeni echo'ná simigá ku sa'wama echi mujé piónawala. ⁸Chopi echi kapitani ku nijéwaga jeaneli: Walubela, nijeni ketasi ne wabé galabé ju, mapurigá Mujé niráa. Echijiti ketasi galá nímiré Mujé bakisáagá echo'ná pachá nijé bitélachi. Chopi ra'íchaga niráa nulá Mujé, mapurigá ku sa'wárami níima. A'lí echi nijé piónawala galá ku sa'wímea. ⁹Mapujiti echi jaré nijé o'wéalwala tamí we jiwériga nulé. A'lí nijé ayénachó jiwériga nulé echi auché jaré pe kuchípala sontarsi. A'lí mapalini bilé je'ná jerigá ané: ¡Echo'ná simigá! A'lí échiko ne bichíwali echo'ná simea. A'lí auché bilecho jeanésuwa: ¡Wakiná simí! A'lí échiko we yáati wakiná simea. A'lí bicheni echi keni piónawa jerigá anésaga: ¡Je'ná jerigá olá! A'lí échiko ayénachó ne bichíwali echirigá olá. Echijiti chopi ra'íchaga niráa nulá Mujé, mapurigá nijé piónawala galá ku sa'wímea. A'lí ne bichíwali ku sa'wímea. ¹⁰A'lí mapalí Jesusi námali je'ná jerigá aníachi, a'lí Binói ne wabé galá nirali echi rijói. A'lí Binói aneri echi jaré pagótami Binói yuwa síami, jeanigá: Ne bichíwari Nijé 'yemi nimí jeané: Je'ná rijói mapu si'nú pagótami ju, ne wabé galabé niráa tamí bichíi. Ke wésini riwali 'yemi Israeli pagótami mapurigá je'ná jerigá ne garabé bichíyami ju. ¹¹Ayénachó Nijé 'yemi nimí ané mapu ne wikabé simea, ne suníami a'nagú noligá jonsa, a'lí si'néami aboni kopoya muchíbama echo'ná ripá riwigachi, echi Abrami yuwa, echi Isaka yuwa, ayénachó echi Jakobo yuwa. ¹²Chopi jaré 'yemi Israeli pagótami pagótawala mapu echo'ná muchima riwéali, arigá miná machí rokowárali a'wátami níima mapujiti aboni ketasi galá bichíili. A'lí echo'ná aboni ne wabé nalákama, ayénachó aboni ne wabé ki'lákama aboni ramilá, mapujiti aboni ne wabé risúu olárami níima. ¹³A'lí Jesusi jeaneli echi walula kapitani: ¡Ma ku simigá! ¡Mapurigami bichíili, echirigami olárami nílaga! A'lí echi binói piónawala echalí we yáati galá ku sa'wárami níili.

Jesusi ku sa'wali echi Pegro wasila

(Mr. 1:29-31; Lk. 4:38-39)

¹⁴A'lí Jesusi nawagá echo'ná Pegro bitélachi, riwali mapurigá echi Pegro wasila we ínuwa nayú bu'wili. ¹⁵A'lí Jesusi chapili echi mukí sikala, a'lí we yáati ku sa'wárami níili. Ma ketasi ínuwa nayúami níili. A'lí ku asísaga, galá ku nigúuraga náchali echi Jesusi ku'wíriya.

Jesusi ku sa'wali ne wikabé nayúkami

(*Mr. 1:32-34; Lk. 4:40-41*)

¹⁶ A'lí echalí rawé mapalí ma rokogó níili, echo'ná Jesusi yuwa pálati wikabé pagótami mapu wabé chati riablo aliwala aliwéami níili. A'lí Jesusi ra'íchaga chopi nulega, galá ku machí a'wali echí jaré wabé chati riablo aliwala echo'ná pachana echí jaré pagótami sulálachi jonsa. Ayénachó Binói ku sa'wali ne si'néami echí auché jaré nayúkami. ¹⁷Echirigá ne sébali ikili mapurigá bachá niráa nawésarami níili mapu ikimea riwéali, mapalí echí ki'yánala bitéami walula nawésami Isaíasi riwéami jerigá osali:

Echi Walubela Binói ma ku sa'wali tamujé okolíwala, ayénachó Binói galá ku sa'wali tamujé nayúkuwala.

Jaré nakili echí Jesusi yuwa najátanala

(*Lk. 9:57-62*)

¹⁸ A'lí mapalí Jesusi riwali ne wikabé pagótami echo'ná ne noligá Binói yuwa síami, echalí Binói nuleli echí jaré mapu Binói binérali mapurigá mi bo'ónala simea, echo'ná walú ba'wírali moba simáraga. ¹⁹Chopi we yáati echo'ná nawali bilé rijói nulalíwami binériami, echí mapu jeaneli: Binériami, njé nimí yuwa najátama mapo'ná kanápuromí Mujemi simea. ²⁰A'lí Jesusi ku nijéwaga jeaneli: Echi jaré kiyochi echo'ná pachá iwárali piré. Ayénachó echí jaré churuguí a níwa rosolá. Chopi Nijeni ketasi niwa biré kalí mapo'ná ni bu'umea. Arigá Nijeni wilárami ju mapurigá Ku'wíriami niráa. ²¹A'lí auché bilé mapu Jesusi binérali ayénachó jeaneli: Walubela, pe risensia, nijeni buwema mapuyénasí njé onolá ma mukumea, mapujiti ma we ochérami ju. A'lí mapalini ma toma echí njé onolá, echalí njé nimí yuwa najátama. ²²A'lí Jesusi jeaneli: ¡Arigá tamí najató! Echi auché jaré ketasi bichíyami pagótami mapurigá suwíami niráa ju. Ariwé mapurigá aboni toma echí auché jaré aboni níwala suwíami.

Jesusi ku wilábali echí wabé iwéami iká

(*Mr. 4:35-41; Lk. 8:22-25*)

²³ A'lí Jesusi bakili echo'ná pachá biléana bárkochi mapurigá echo'ná asigá ku simea echo'ná walú ba'wírali suwé jonsa. A'lí echí jaré mapu Binói binérali, ayénachó Binói yuwa ku simíbali. ²⁴Chopi echo'ná walú ba'wírali ke sayiná ne wabé jiwériga ikali. Echijiti echo'ná pachá bárkochi ne noguí buchili ba'wí, chopi Jesusi we kochigá bu'wili mapujiti ne wabé risíami níili. ²⁵A'lí echo'ná Jesusi yuwa sigá echí jaré Binói yuwa binéami jeanigá ku achali: ¡Walubela, tamujé tamí ku'wira, wete suwibóaré! ²⁶A'lí Binói jeaneli: ¿Churékulátamo wabé majá, 'yemi rijói ketasi 'me bichíyami? A'lí ku asísaka, Binói we ra'ámali echí wabé jiwéragera ikáami, echí walú ba'wí ayénachó. A'lí we yáati suwaba ne galá siwega ku wilíbali. ²⁷A'lí echí jaré rijói wabé 'nigá muchili, jeanigá: ¿Chuyiri wabé jiwérami Rijói ju je'ná, mapujiti echí wabé jiwérami ikáami ne galá nijewi, echí walú ba'wí ayénachó?

Okuá rijói wabé chati riablo aliwala aliwéami ma ku sa'wárami níili

(*Mr. 5:1-20; Lk. 8:26-39*)

²⁸ A'lí mapalí Jesusi ma nawali echo'ná bo'ónala suwé mapo'ná Garáráchi anilíwachi kawírali ju, echalí okuá rijói we júmsaga natipábiya sili, mapu wabé

chati riabla aliwala aliwéami níili. A'lí aboni echo'ná jaréana risochí chu'wechi jonsa 'machínali. Ayénachó okuánika ne wabé jobátami níili, mapuyénasí ke wesi omérali echo'ná mulubé simara.²⁹ A'lí aboni ne wabé o'weli ra'fchaga jeanigá rukueli: ¿Piri mi olama tamujé tamí yuwa, mujé Jesusi mápumi echi bilepi Riosi Ranala ju? ¿Áchami nawali mapurigami bachá niráa tamujé tamí risúu olama, mapalí ke cho sébachi ju?³⁰ A'lí echo'ná pe mikabé wikabé kóchi ko'yá uchútari.³¹ A'lí echi jaré wabé chati isena riabla aliwala we risúu anigá jeaneli echi Jesusi: Ami tamujé tamí ku machí a'wánalasagá, tamujé tamí risénsia 'ya máputa echo'ná pachana echi wikabé kóchichi mo'wibóa.³² A'lí Jesusi jeaneli: ¡Echo'ná simíbaga! A'lí echi wikabé wabé chati riabla aliwala echo'ná echi rijói sulálachi jonsa ku machínasa, echo'ná pachana echi wikabé kóchichi mo'wili. Echalí ne suwaba echi wikabé kóchi ke sayiná miná júmsali. A'lí echo'ná biléana ripabé koláachi jonsa rrujili echo'ná ri'lé walú ba'wírali. A'lí ne suwaba miná si'lili.

³³ Echalí echi jaré kochi mélamí we sapú ku júmsaga ku sili echo'ná walúlachi. A'lí aboni suwaba ku ruyeli echo'ná piréami mapurigá ikili echi okuá rijói yuwa mapu wabé chati riabla aliwala aliwéami níili.³⁴ A'lí si'néami pagótami echo'ná walúlachi piréami natipábiya simíbali echi Jesusi. Mapalí aboni galá riwali, a'lí aboni ne risúu anigá tánali mapurigá Binói ku simea, echo'ná aboni kawíwalachi jonsa.

Jesusi ku sa'wali bilé rijói mapu tarapé omérami níili asísiya

(Mr. 2:1-12; Lk. 5:17-26)

9 A'lí Jesusi echo'ná bárkochi bakigá, mi bo'ónala simili. A'lí nawali echo'ná walúlachi mapo'ná Binói bitéali.² Echalí bilé rijói nayúami echo'ná Binói yuwa pálati, biléana kimachí rikagá. Echi rijói ke omériami níili asísiya. A'lí Jesusi galá machigá mapurigá aboni galá bichílo, a'lí jeaneli echi rijói ke omériami asísiya: Keni raná, igalá tamí bichíi mujé! ¡Mami ku wikawárami ju ne suwaba mapurigami chati olali!³ A'lí jaré rijói nulalíwami binériami je'ná jerigá 'nata muchili: Je'ná rijói we sayéraga ra'icha echi Walubela Riosi, mapujiti chopi Riosi omero ku wikáwiya echi pagótami chati olalila.⁴ A'lí Jesusi galá machigá echirigá 'nátachi aboni, a'lí jeaneli: ¿Churékulátamo echirigá chati 'nata, echo'ná 'yemi sulálachi?⁵ A'lí Jesusi ayénachó jeaneli: Ketasi wabé simírami oméami níili, Nijeni jeanée je'ná rijói: ¡Mapurigami chati olali, ma galá ku wikawárami ju! A'lí échiko ne bichíwali we yáati galá ku wikawárami níili. Nirapé cho oméami ju mapurigá Nijeni jeanema: ¡Ku wilísaga, ku simigá! A'lí binói ne bichíwali we yáati ku sa'wárami níima.⁶ Echalí Jesusi jeaneli echi pagótami: ¡Yémítamo ma riwiboa mapurigá Nijeni olama, echijítitamo ne galá machiboa mapu Nijeni galá omero ku wikáwiya jena'í wichimóbachi piréami pagótami chati olalila. Riosi tamí wilali mapurigá Ku'wíriami niráa. Echalí Jesusi we yáati jeaneli echi ke omériami asísiya: ¡Asísaga, ku chapigá kemi kimá, ku simigá echo'ná kemi bitélachi!⁷ A'lí echi rijói ke akáanami we yáati ku wilísali. Ma ku sa'wárami níili. A'lí binói ku simili echo'ná binói bitélachi.⁸ A'lí je'ná jerigá riwisá, echi pagótami ne wabé 'nátaga, wabé 'néniga muchili. Ayénachó aboni ne Walubela aneli echi Riosi Onorúami mapu 'yali mapurigá Jesusi echirigá wabé omériga olama.

Jesusi bayeli echi Mateo mapurigá Binói yuwa simea

(*Mr. 2:13-17; Lk. 5:27-32*)

⁹A'lí echo'ná jonsa ku simílasa, Jesusi riwali bilé rijói wenomí napabúami, Mateo riwéami, mapu wenomí napabuya asali echi walula silíami echo'ná nuláami natétimiya. Echalí Jesusi jeaneli: ¡Tamí yuwa najató! A'lí echi Mateo ku wilíska, Jesusi yuwa simili.

¹⁰A'lí Jesusi bayérami níili mapu ko'mea echo'ná echi Mateo bitélachi. Echalí wikabé echi auché jaré wenomí napabúami ayénachó bayérami níili. Auché jaré wikabé ayénachó bayérami níili mapu echi jaré Juríosi chati oláami niráa aneli. Echalí ne si'néami napawika ko'yá muchili Jesusi yuwa. A'lí echi jaré mapu Jesusi binérali ayénachó echo'ná ko'yá muchili. ¹¹A'lí mapalí echi jaré Bariseo anilíwami binériami je'ná jerigá riwali, echalí aboni jeaneli echi jaré mapu Jesusi binérali: ¿Churékula echirigá ko'wá echi 'yemi níwala binériami echi jaré wenomí napabúami yuwa, echi auché jaré yuwa ayénachó mapu chati oláami anérami ju? ¹²A'lí Jesusi je'ná jerigá namsa jeaneli: Echi jaré mapu ketasi nayúkako ketasi newalé bilé óyami. Chopi echi jaré nayúkami newalé. ¹³Echalí Jesusi waminabi jeaneli: Nijeni ketasi bayémiya nawali echi jaré galabé oláami pagótami. Chópini bayémiya nawali echi auché jaré chati oláami pagótami, mapurigá aboni ku ro'wisa, ne si'nú galabéala niráa 'natama. Ma ku simíbaga binesi 'yemi mapurigá aniwáami ju je'ná jerigá osirúami: Nijeni nakí máputamo wabé natimáami níibo, ketasi mapurigátamo chopi wikabé namuti ko'yagá, tamí 'yasa.

Echi jaré mapu Juani binérali we rukueli echi Jesusi

(*Mr. 2:18-22; Lk. 5:33-39*)

¹⁴A'lí echi jaré mapu Juani binérali ma sili echo'ná Jesusi yuwa. A'lí jeaneli: Tamujé wisabé, wi'llibé niráa ketásita ko'wá, mapalita chopi Riosi yuwa ra'icha. Echi auché jaré Bariseo anilíwami binériami ayénachó achigórígá olá. ¿Churékula sinibí arígá wabé ko'wá echi jaré mapu Mujé binérali? ¹⁵A'lí Jesusi jeaneli: Ketasi omérama ne wabé siweya echi jaré mapu jaré bukulí niwíami yuwa omáwiya muchuwi, mapalí echi bukulí niwíami rijói aboni yuwa abijí asisá. Pe waminánomí rawé, mapalí echi bukulí niwíami rijói ma 'yérami níima echo'ná abónichi, echalí rawé aboni ayena wabé siwega ma ketasi ko'mea, wi'llibé niráa, mapalí aboni chopi Riosi yuwa tániga ra'icha muchima.

¹⁶Tarapé wesi pachókama bilé luwíami napacha echi bukulíwami chiní jiti, mapujiti echirigá pachókasuwa, echi bukulíwami pachókalami we téeli níílama, ma wichósuwa. A'lí echi luwíami napacha waminabi chí'wama. ¹⁷Nirapé wesi ro'wama echi bukulíwami uva anilíwami ba'wila echo'ná pachana jaléana sití wichí chiwáwalachi. Echirigá olásagá, ma ronínasa, echi uva ba'wila we chí'wanama echi sití wichí chiwáwala. A'lí suwaba ku'lima echi uva ba'wila. Ayénachó echi wichí chiwáwala suwaba chí'wama. Echijiti galá níima ro'wasa echi bukulíwami uva ba'wila, ke cho ronóami, echo'ná pachana jaréana bukulíwami wichí chiwáwalachi. A'lí ne galá anawí a'nagupi nutétami níima.

Jesusi ku owíntaga achali bilé tiwé mapu ma mukúami níili

(*Mr. 5:21-43; Lk. 8:40-56*)

¹⁸ A'lí mapuyénasí Jesusi abijí je'ná jerigá ra'íchali aboni yuwa, echalí echo'ná nawali bilé rijói walula. A'lí echo'ná Jesusi yuwa bacháami wéemi raweka, chokoba wiligá jeaneli: ¡Nijé malala bukulí mukuli! ¡Arigá tamí yuwa simigá, Mujé sikala jiti nochogá, mapurigá ma ku bitélama! ¹⁹ A'lí Jesusi we yáati wilísaga, echi rijói yuwa simili. A'lí echi jaré mapu Jesusi binérali ayénachó así simíbali.

²⁰ A'lí mapalí Jesusi iyénali echo'ná buwichí echi wikabé pagótami yuwa, echalí bilé mukí, mapu makói miná okuá bamíbali jonsa we léninga nayúami níili, ne jubáami nawagá nocháli Jesusi napáchala suwilá. ²¹ Mapujiti echi mukí je'ná jerigá 'nátili: Chopi nochásagáni echi Jesusi napáchala suwilá, nijeni ma galá ku sa'wárami níima. ²² Chopi Jesusi ku ro'wiga, galá 'néniga jeaneli: ¡Ne galá kaníliga bichíi! Mami ku sa'wárami ju, mapujítimi tamí bichíili. Echalí echi mukí ma galá ku sa'wárami níili.

²³ A'lí mapalí Jesusi nawali echo'ná echi Jáiro bitélachi, Binói echo'ná riwali wikabé echi jaré kuséami, ne wikabé pagótami we nakátará aníami ayénachó, mapujiti echi jaré Juríosi sinibí echirigá olali mapalí ma mukuli bilé. ²⁴ A'lí Jesusi jeaneli: Waminá chakena simíbaga. A'lí Binói galá machili mapu Binói ku owíntama riwéali echi tiwé mapu ma mukúami níili, echijiti Binói jeaneli echi jaré pagótami: Je'ná tiwé, tamí jiti, ketasi mapurigá mukúami ju, chopi kochíami niráa ju. A'lí echo'ná muchúami wabé kachigá tiníchali echirigá aníachi Jesusi. ²⁵ Chopi mapalí echi wikabé pagótami ma ku machí a'wátami níili, echalí Jesusi bakili echo'ná mapo'ná echi mukúami tiwé bu'wili. A'lí mapalí Jesusi chapili echi mukúami tiwé sikala, echalí echi tiwé mapu bukulína mukúami níili, ma ku wilísali, mapujiti binói ma galá ku bitéami níili. ²⁶ Echijiti pe wakinana ne si'néami pagótami echo'ná kawírali piréami galá machili mapu Jesusi echirigá ne wabé jiwériga olali.

Jesusi ku sa'wali okuá rijói mapu ke machíliami níili

²⁷ Chopi mapalí Jesusi simírali echo'ná jonsa, echalí okuá rijói ke machíliami we najátili Binói yuwa, wabé o'weli ra'íchaga, jeanigá: ¡Tamuje tamí we natimá, mujé Rabiri Ranala! ²⁸ Echalí mapalí Jesusi nawali echo'ná biléana kalírali, ayénachó echo'ná sili echi okuá rijói ke machíliami. A'lí Jesusi jeanigá rukueli: ¡Áchatamo bichíi mapurigá Nijeni omérama 'yemi mi ku 'machíliami niwayá? A'lí aboni jeaneli: ¡Ayena, Walubela! ²⁹ A'lí Jesusi nocháli aboni busila jeanegá: ¡Mapurigátamo galá bichíili, echirigá galátamo olárami nílaga! ³⁰ A'lí aboni busila we yáati galá ku machíliami niwálati. A'lí Jesusi iwériga jeanigá nuleli mapurigá aboni tarapé wesi je'ná jerigá ruyema. ³¹ Chopi aboni ku simíbaga waminabi galá nawésali Binói jiti ne suníami echo'ná kawírali piréami.

Jesusi ku sa'wali bilé rijói mapu ke ra'íchami níili

³² A'lí mapalí aboni ku simíbaga olali, echalí bilé rijói ke ra'íchami echo'ná pálati mapu wabé chati riablo aliwala aliwéami níili. ³³ Chopi mapalí echi we chati riablo aliwala ku machí pátami níili, echalí echi rijói galá ku omérali ra'icha. A'lí echi pagótami echo'ná piréami wepi we 'nátaga, 'nigá muchili, jeaniyá: Ke siné echirigá riwirúami níili jena'í tamujé Juríosi pagótami kawíwarachi. ³⁴ Chopi echi jaré

Bariseo anilíwami binériami jeanili: Echi Jesusi chopi omero ku machi á'waya echi jaré chati riablo ariwala, echo'ná echi pagótami sulálachi jonsa, mapujiti Binói we níwa echi ne walula riablo jiwéravala.

Jesusi wabé natimali echi wikabé pagótami

³⁵ A'lí Jesusi ne noligá iyénali echo'ná suníami walúlachi, echo'ná suníami ríjowachi ayénachó. A'lí Binói ne galá binérali echo'ná suníami aboni ri'obáwalachi, mapujiti Binói galá nawésali echi galabé nawésuami, jeanigá mapu Riosi ma galá nulé echi pagótami. Ayénachó Binói ku sa'wali suwaba nawilí, ne suwaba okolí ayénachó, mapu ikí okóli echo'ná piréami pagótami. ³⁶ A'lí mapalí Jesusi riwali echi wikabé pagótami, echalí Binói we natimali aboni, mapujiti mapurigá wikabé bo'wá níili mapu we chijaka 'yena, mapu tarapé te mélami. ³⁷ A'lí Jesusi jeaneli echi jaré mapu Binói binérali: Ne wikabé pagótami ketasi cho galá bichíi Riosi Ra'íchala, chopi Nijeni arigá nakí mapu aboni galá bichíima. A'lí pée okuáa ju echi jaré mapu galá nawesa Riosi Ra'íchala. ³⁸ Echijiti tánsi mapurigá echi Walubela Riosi waminabi wikabé nawisánala julama, mapurigá echi jaré pagótami galá bichíima Riosi Ra'íchala.

Echi jaré makói miná okuá mapu Jesusi binérali

(Mr. 3:13-19; Lk. 6:12-16)

10 A'lí Jesusi bayeli echi jaré makói miná okuá mapu Binói binérali. A'lí omérawami 'yali, echi jaré wabé chati riablo aliwala sayéraga, mapurigá echi jaré mapu Binói binérali galá oméraama ku machí a'wáa echi wabé chati riablo aliwala echo'ná pachana jaré pagótami sulálachi muchúwamichi jonsa. Ayénachó omérawami 'yali mapurigá aboni ku sa'wama ne suwaba nayulí, ne suwaba okowami ayénachó. ² A'lí echi jaré makói miná okuá julárami jerigá riwéami níili: Echi ne bachá Simoni riwéami níili, mapu ayénachó Pegro anérami níili; echi Antresi ayénachó bilé níili, echi mapu binói Pegro rijimala níili; echi Jakobo ayénachó, echi mapu echi Sibireo ranala níili; echi Juani ayénachó, echi mapu echi Jakobo rijimala níili; ³ echi Jilipi; echi Batalomé ayénachó; echi Tomasi; echi Mateo, echi mapu wenomí napabúami níili ayénachó; echi Jakobo, echi Alibeo riwéami ranala; echi Libeo ayénachó, echi mapu ayénachó Tareo anérami níili; ⁴ echi Simoni, echo'ná Kananéachi anilíwachi bitéami ayénachó, echi Júrasi Jiskarioti ayénachó, echi mapu pe wakinana bayébali echi jaré sotarsi mapurigá aboni borogá chapimea echi Jesusi, mapurigá Binói arigá millirúami níima.

Jesusi nawésanala júuli echi jaré makói miná okuá

(Mr. 6:7-13; Lk. 9:1-6)

⁵ Echalí Jesusi nawésanala júuli je'ná makói miná okuá, ayénachó jeanigá nureli: 'Yémitamo Juríosi anilíwami pagótami ju. Ketasi simasi echo'ná echi jaré isena pagótami buwilachi, nibilé mo'wisí echo'ná biléana walúlachi echi jaré Samáriachi piréami walúwachi. ⁶ Chopi ne bachá simasi echi jaré Isaeli anilíwami pagótami yuwa, echi jaré mapu wikáami niráa 'yena mapurigá echi jaré bo'wá wikáami niráa. ⁷ A'lí bichétamo simíbaga, jeanigá nawisasi: Ke 'me ayó rawé Riosi galá nulema jena'í wichimóbachi piréami pagótami. ⁸ Galá ku sa'wasi echi jaré nayúkami. Ayénachó ku sa'wasi echi jaré wabé chati chá nayúkami. Galá ku owíntasi echi jaré ma suwíami.

Ayénachó ku machí a'wasi echí jaré wabé chatí riabó aliwala, echo'ná pachana jaré pagótami sulálachi muchúami. ⁸Yémítamo ketasirapé natétaga, arigá 'yárami níili mapurigátamo galá omérabo echirigá ku sa'wayá echí jaré nayúkami. Echijiti ketásirapé bujesa ku sa'wasi aboni. ⁹Ketásirapé tosí echí wenomí oro anilíwami echo'ná 'yemi níwala malétachi. Ketasi cho tosí echí wenomí plata anilíwami, nírapé tosí echí jaré kúuchi wenomí kobre anilíwami. ¹⁰Ketasi tosí bilé maleta echo'ná bwichí. Ketasi cho okuá napachákoami tosí. Nibilé aká tosí, nibilé tisola, mapujiti galá níima mapurigá echí jaré Nijé níwala nóchami galá kóorami niima.

¹¹Chopi echo'ná chuwé biléana walúlachi mapo'nátamo mo'wiboa, echo'ná chuwé biléana rijówachi keremá, ne bachá galá rukuesi chigá echo'ná bitéami galá oláami ju. A'lí echo'ná echí rijói bitélachi tibisi, mapuyénasítamo ma ku simiba echo'ná walúlachi jonsa. ¹²A'lí mapalítamo mo'wiboa echo'ná kalírali, ne galá kuíraga narépasi echo'ná piréami. Ayénachó tansi Riosi mapurigá aboni galá ku'wíratami níima. ¹³A'lí a echo'ná kalírali piréami pagótami ne galá bichíisagá, a'lí aboni ne bichíwali galá ku'wíratami níima. Chopi a echo'ná piréami ketasi galá bichíyami níisagá, echalí aboni arigá ketasi galá ku'wíratami níima. ¹⁴A'lí mapalí biléana piréami pagótami ketasi 'yemi mi narésagá, nirapé 'yemi mi námanalasagá, echalí mapalítamo ku simabo echo'ná jonsa, ne galá bi'wasi echí napisó mapu ri'leka 'yemi ralálachi chukúbali. Echirigátamo ku ruyebo mapu echo'ná piréami pagótami wabé chatí oláami ju. ¹⁵Ayénachó Jesu jeaneli: Ne bichíwali 'yemi nimí ané mapu echalí ne jubá wi'nijíwachi rawé, echí jaré chatí oláami pagótami echo'ná Sorómachi piréami, ayénachó echí jaré chatí oláami pagótami echo'ná Gomórachi piréami, ketasi 'me walú kastigo 'yárami níima, mapurigá ne wabé kastigo 'yárami níima echí jaré pagótami mapu ketasi 'yemi mi narigako.

Echi jaré nawésami kichiga a'najátarami níima

¹⁶Arigá simíbaga nawisábasi echí Galabé Riosi Ra'íchala. Nijeni 'yemi mi jula mapurigátamo kilí ologá pirélabo mapurigá jaré 'mýchuli niráa, chópitamo nawésabo jaré pagótami mapu ne wabé jobátami níima mapurigá echí jaré nalíwali niráa. Echijiti ne galá 'nénami níisi mapurigá echí jaré sinowi niráa, chopi ayénachó ne galá kilí ologá pirélasi mapurigá echí jaré makawi niráa. ¹⁷Ne galá tibusi 'yemi aboni niráa echí auché jaré pagótami jiti, mapujiti aboni 'yemi mi bologá tomea echo'ná bacháami echí jaré aboni o'wéalowala yuwa, ayénachó aboni 'yemi mi wipisoma echo'ná aboni ri'obáwalachi. ¹⁸Ayénachó 'yemi baníratami níibo echo'ná bacháami jaré o'wéala silíami yuwa, echo'ná bacháami jaré waminabi wabé o'wéala yuwa ayénachó. Echirigátamo risúu olárami níibo mapujítitamo tamí jiti bichíyami ju. Chopi je'ná jerigá ikimea mapurigátamo galá omérabo nawésiya aboni, mapurigátamo ayénachó nawésabo echí auché jaré isena pagótami. ¹⁹Chopi mapalí aboni 'yemi mi echirigá banírama echo'ná bacháami echí jaré o'wéala yuwa, echalí ketasi bachá niráa wabé níлага 'natasi mapu churigátamo ku nijewaga aniboa, mapujiti echalí rawé 'yemi galá 'yárami níibo mapu churigátamo ra'ichabo. ²⁰Mapujiti 'yemi ketasi chopi ju máputamo ra'ichabo echalí rawé, chopi echí Wabé Galabé Riosi Iwigala, echí 'yemi Onolá Iwigala, echalí 'yemi mi binérama mapurigátamo ra'ichabo.

²¹Echalí rawé sébachi echí bilé rijimá nijima auché bilé binói rijimala mapurigá miná mi'lirúami níima. Ayénachó echalí rawé jaré onorúami nijima aboni tanala mapurigá miná ko'wirúami níima. Ayénachó jaré kúcharami ne wabé sayérama

aboni 'wénawala, mapurigá aboni 'wénawala echirigá ko'wirúami níima.²² Echalí rawé ne si'néami echi auché jaré pagótami 'yemi mi ne wabé kichima mapujítitamo tamí bichýami ju. Chopi ne si'néami 'yemi máputamo arigá galá bichíbo, echalí ne jubá rawé yénasí, 'yémítamo galá ku'wíratami níibo.²³ Chopi mapalí biléana walúlachi piréami 'yemi mi wabé kichiga a'najátama, echalí waminá júmsasi echo'ná auché biléana, mapujiti ne bichíwali 'yemi nimí ané máputamo ketasi cho sunibo 'yena echo'ná ne suníami echi jaré Isaeli pagótami o'wéalowalachi mapalí Nijeni ma ku nolínama jena'í wichimóbachi. Riosi tamí wilali mapurigá Ku'wíriami niráa.

²⁴ Ayénachó Jesusi jeaneli: Echi jaré binéami mapu bilé rijói galá binera ketasi waminabi o'wéala ju ketasi mapurigá echi bilé mapu galá binéra aboni, chopi echi binériami waminabi walula ju. A'lí echi jaré pióntami nibilé cho waminabi o'wéala ju ketasi mapurigá echi auché bilé mapu aboni nuláami ju, chopi echi nuláami waminabi walula ju.²⁵ Chopi ne galá sébali ju mapurigá echi jaré mapu binératami ju achigórígá níima mapurigá echi binériami mapu galá binéra aboni. Ayénachó sébali ju mapurigá echi jaré pióntami achigórígá níima mapurigá aboni walúlowala. A'lí a jena'í wichimóbachi piréami tamí jeanésagá: ¡Mujé echi Bersebubi riwéami riablo jumi! Echalí aboni 'yemi mi waminabi echirigá chati anema.

¿Chigá nalina galá níima máputa majasa?

(Lk. 12:2-9)

²⁶ Echirigá ketasi majasi 'yemi, echi jaré aboni jiti, mapujiti suwaba namuti mapu ikí chiná nasótami ju, échiko pe minánomí galá ku riwirúami níima. Ayénachó suwaba echi jaré namuti mapu ikí ke machirúami ju, échiko pe minánomí galá ku machirúami níima.²⁷ A'lí mapurigá Nijé 'yemi nimí ané echo'ná rokowárali niráa, echirigá ne galá machíami niráa anesi 'yemi echo'ná ne galá rayénachi niráa mapurigá ne si'néami echi auché jaré echirigá galá machimea. A'lí mapurigá 'yémítamo ne nakachí niráa námali, echirigá ne galá machíami niráa nawisasi mapurigá echo'ná ripá moba biléana kalírali wilíami nawésami niráa, mapurigá si'néami pagótami galá námama.²⁸ Jesusi jeaneli: Ketasi majasi echi auché jaré mapuyíripi ko'yako echi pagótami, chopi ketasi omero ko'wayá echi pagótami iwigala. Ne bachá galá majasi echi Riosi mapu galá omero suwábiya echi pagótami iwigala, echi pagótami sapala ayénachó, mapalí Binói walú kastigo 'yama echo'ná ri'lé riáblochi, wabé chati rajáami na'írali.²⁹ Echi jaré kúuchi chuluguí tarapé natéami ju. Okuá echi kúuchi chuluguí chopi natiguí bilé kentavo. Arigá echi Walubela Riosi, kétamo Onó, galá machimea mapalí bilé táo chuluguí ri'lé wi'yérali wichí.³⁰ Riosi galá machí chu kipu kupá ibili 'yemi niwa, mapujiti echi wikabé 'yemi kupala arigá ne suwaba galá tarárami ju.³¹ Echirigá ketasi majasi 'yemi, mapujítitamo ne wabé simírami natéami ju Riosi yuwa, ketasi mapurigá echi jaré wikabé kúuchi chuluguí.

Jaré galá nawésako, jeanigá mapu aboni bichíí Jesucristo niráa

(Lk. 12:8-9)

³² A'lí mapuyíripi nawésako echi auché jaré pagótami jeanigá mapu binói galá tamí bichíí, Nijeni ayénachó anema echi Nijé Onolá echo'ná ripá riwigachi atíami mapu Nijeni galá machí echiyiri rijói.³³ A'lí mapuyíripi nawésako echi auché jaré pagótami jeanigá mapu binói ketasi tamí bichíí, Nijeni ayénachó anema echi Nijé Onolá echo'ná ripá riwigachi atíami mapu Nijeni ketasi machí echiyiri rijói.

Jesusi okoná niráa rojuana jena'í wichimóbachi piréami

(Lk. 12:51-53; 14:26-27)

³⁴ Ketasi 'natasi mapu Nijeni nawali mapurigá jena'í wichimóbachi piréami chopi kilí ologá pirélama. Ketásini echijiti nawali, chópini nawali mapurigá jena'í wichimóbachi piréami pagótami okoná niráa rojonárami níima, ³⁵ mapurigá bilé rijói ke bichiyami we sayérama kepu onó mapu galá tamí bichiyami ju. Ayénachó mapurigá bilé tiwé mapu ke bichiyami ju we sayérama binói iyela mapu galá tamí bichiyami ju. Ayénachó mapurigá bilé mo'olí ke bichiyami we sayérama binói wasila mapu galá tamí bichiyami ju. ³⁶ Echirigá ikimea mapu echi auché jaré echo'ná binói bitélachi piréami ne wabé sayérama ibili rijói mapu tamí bichiyami ju.

³⁷ Mapuyíripi waminana ne wabé simírami galeko kepu onó, kepu iyé, ketasi mapurigá binói tamí galé, échiko ketasi ne sébali tamí galé, nirapé galabé olá mapurigá Nijé yuwa binéami niráa. Ayénachó echi mapu waminana ne wabé simírami galeko kepu kúuchi ketasi mapurigá binói tamí galé, echiko nirapé ne sébali tamí galé, nirapé cho galabé olá mapurigá Nijé yuwa binéami niráa. ³⁸ Ayénachó echi mapuyíripi ketasi arigá anacháma mapalí binói risúu olárami níima, achigórigá mapurigá Nijeni arigá anacháma mapalini wabé risúu olárami níima, échiko nirapé ne sébali tamí galé, nirapé cho galá olá mapurigá Nijé yuwa binéami niráa. ³⁹ Mapuyíripi rijói jena'í wichimóbachi chopi kanílaga bitélanaliko, échiko chopi miná mukumea. A'lí mapuyíripi rijói chopi oláanaliko mapurigá Nijeni nakí, échiko ne sinibí niráa bitélama.

Echi galabé oláami pagótami galá ku natétarami níima

(Mr. 9:41)

⁴⁰ Echi mapuyíripi 'yemi mi narigako, échiko ayénachó tamí narigá. A'lí echi mapu tamí narigako, échiko ayénachó narigá Riosi Onorúami, Echi mapu tamí júuli. ⁴¹ Echi mapuyíripi galá bichíiko mapurigá nawesa bilé rijói Riosi jiti nawésami, mapujiti Riosi júuli echi rijói echirigá nawésanala, échiko sinibí niráa bitélama achigórigá mapurigá echi Riosi jiti nawésami sinibí bitélama. Ayénachó echi mapu galá narigako bilé galabé oláami rijói mapujiti echi rijói galabé oláami ju, échiko galá ku natétarami níima, achigórigá mapurigá echi galabé oláami rijói ku natétarami níima. ⁴² Echalí Jesusi ayénachó jeaneli: Echi jaré kúuchi galá tamí bichíiko. Ne bichíwali 'yemi nimí ané mapu ne galá ku natétarami níima mapuyíripi rijói 'yásagá pe taa ba'wí ruláami bilé je'ná kúuchi, chopi mapujiti echiyiri rijói tamí yuwa binéami ju.

Echi Juani rukuénala júuli jaré rijói

(Lk. 7:18-35)

11 Mapalí Jesusi ma sunili echirigá binériya echi jaré makói miná okuá mapu sinibí Binói yuwa 'yénali mapurigá binéami niráa, echalí Jesusi ku simili echo'ná jonsa. A'lí Binói binériga, nawésiya, iyénari ne suníami echo'ná nirúami o'wéalachí.

² A'lí mapalí Juani echo'ná pachá kumurachi bachárami níili, echalí binói galá ruyérami níili suwaba mapu ikí echi Walubela Jesucristo olali. Echalí echi Juani rukuénala júuli okuá rijói mapu binói Juani yuwa binéami níili. ³ A'lí aboni jeanigá

rukueli: ¿Mujecha ju echi bilé nawésami mapu nolínama riwéali? ¿Áchata buwebo mapu auché bilé nolínama, keremá? ⁴A'lí Jesusi ku nijéwaga jeaneli: Ku simíbaga, ku ruyébasi echi Juani suwaba namuti mapuyíripi 'yémítamo ma námali, ne suwaba namuti mapuyíripi 'yémítamo ma riwali ayénachó. ⁵Galá ku ruyébasi mapurigá echi jaré ke machílami galá ku machili, ayénachó mapurigá echi jaré ke akáanami galá ku 'yena, ayénachó mapurigá echi jaré wabé chati cha nayúkami galá ku sa'wárami ju, ayénachó mapurigá echi jaré ke námiami galá ku nami, ayénachó mapurigá echi jaré suwíami galá ku o'wíntarami ju. Ayénachó mapurigá echi jaré wabé tisúwati pagótami galá nawésarami ju echi Galabé Riosi Ra'íchala. ⁶A'lí ne wabé kanlílami ju echi jaré mapu ketasi na'áwako tamí jiti.

⁷Echalí mapalí echi jaré mapu Juani jiti julárami níili ma ku simíbali, echalí Jesusi chótali nawésiya echi auché jaré pagótami, echi Juani jiti rugá. Echalí Jesusi jeaneli: Mapalí 'yémítamo echo'ná waná kawichí 'yénali echi Juani 'nébiya, echalí 'yémítamo ketasi echo'ná 'nébiya simíbali bilé rijói mapu ketasi ne bilepi niráa wachínaga 'nátami ju. Echiyiri rijói mapurigá bilé baká ju mapu we nokérami ju echi iká jiti. ⁸A'lí Jesusi waminabi jeaneli: Echalí 'yémítamo ketasi cho echo'ná waná kawichí 'nébiya simíbali bilé rijói wabé simírami galabé simati napáchami, mapujiti echi jaré galabé simati napáchami chopi muchuwi echo'ná echi jaré o'wéala pirélachi. Echi jaré wabé simati napáchami ketasi 'yena echo'ná jaréana waná kawichí. ⁹Chopi 'yémítamo ne bichíwali echo'ná 'nébiya simíbali bilé rijói walula Riosi jiti nawésami. Ayénachó Nijé 'yemi nimí ané máputamo bilé rijói waminabi wabé walubela 'nébiya simíbali, ketasi mapurigá echi auché jaré o'wéala Riosi jiti nawésami. ¹⁰Mapujiti je'ná Juani ju mapu binói jiti rugá, je'ná jerigá osirúami ju echo'ná Riosi Ra'íchala oseríwalachi:

Waminá bacháami mapo'ná Mujemi simírama, echo'ná a'láranala julámani
bilé keni kapitánawa.

Échiko bachá nawésama echi jaré pagótami, mapurigá aboni mi galá
bichíima, echalí mapalí Mujé echo'ná nawama.

¹¹Ayénachó Jesusi jeaneli: Ne bichíwali 'yemi nimí ané mapu ke wesi jena'í wichimóbachi piréami pagótami waminabi walubela niráa wilíbali ketasi mapurigá echi Juani. Chopi echi mapu ne wabé tabéara juko, echi auché jaré yuwa mapu ikí Riosi galá nulé, échiko arigá waminabi walula ju ketasi mapurigá echi Juani.

¹²Echalí chabénala rawé, echi Juani mapu pagóami níili rawéwalachi jonsa, jipi rawé yénasí, si'néami mapu ikí wabé nakiko olánala mapurigá Riosi nulé, abóni wabé jiwériga ologá, galá omero echirigá olayá. A'lí echi jaré mapu ikí ne wabé simírami bichífinali, abóniko ne galá omero bichiya. ¹³Mapujiti si'néami echi jaré Riosi jiti nawésami ki'yánala piréami galá nawésali mapuyénasí echalí rawé mapalí echi Juani ayénachó nawésali. A'lí aboni nawésali jeanigá mapurigá Riosi galá nulema riwéali echi pagótami. Ayénachó Riosi nulalila mapurigá echi Moisesi osali, echirigá achigórígá aniwáami ju mapu Riosi galá nulema riwéali echi pagótami jena'í wichimóbachi piréami. ¹⁴A'lí átamo nakiságá echirigá bichífinala, echi Juani ma galabé ologá nawali mapurigá echi ki'yá bitéami Elíasi mapu ku nolínama riwéali. ¹⁵A'lí Jesusi jeaneli: ¡'Yemi máputamo nakeko, ne galá namsi!

¹⁶Echalí Jesusi waminabi jeaneli: Je'ná pagótami mapuyiri echi jaré kúrowi ju, mapu echo'ná ri'narárachi ri'yeka, a'nagupi o'weli ra'íchaga ¹⁷jeaní: ¡Tamujeta 'yemi mi tákali echi kusela, chópitamo ketasi awili! ¡Ayénachóta wabé o'móniga

nawajili, chópitamo ketasi nalákali! ¹⁸ Mapujiti mapalí echí Juani nawali, binói tarapé ko'wéami níili, nirapé bajíami níili, chopi 'yémitamo jeanili: ¡Echi Juani we riabلو níwami ju! ¹⁹ A'lí biché Riosi tamí wilali mapurigá Ku'wíriami niráa. Chopi mapalí Nijeni nawali, mápuni ayena we ko'wá, mápuni ayena bají, a'lí bichétamo jeaní: ¡Nibira, bilé rijói we ko'wéami ju, ayénachó we bajíami ju echí uva ba'wila! Ayénachó echí jaré wenomí napabúami apanéravala ju, echí auché jaré chati oláami pagótami ayénachó apanéravala ju. A'lí echí we galabé machiáami we galá anérámi ju, si'néami echí jaré wabé galabé machíami pagótami jiti.

Jaléana o'wéalachí piréami ketasi galá nijéwami níili

(Lk. 10:13-15)

²⁰ A'lí Jesusi 'nátaga yónali echí jaré pagótami echo'ná jaréana o'wéalachí piréami mapo'ná Binói Jesusi chabénala nochogá ku sa'wali echí wikabé nayúkami, ayénachó mapo'ná Binói wisabé wabé omériga olali mapurigá ke wesi auché jaré pagótami omero olayá. A'lí Binói echirigá yónali mapujiti echo'ná o'wéalachí piréami ketasi o'móniga ku ro'wili Riosi yuwa, nirapé bichíli. A'lí Jesusi jerigá anili: ²¹ ¡Báaji 'yemi pagótami echo'ná Korasinchi piréami! ¡Báaji 'yemi pagótami echo'ná Becháirachi piréami! Echo'ná Tírochi, echo'ná Sirónachi piréami pagótami ketasi bichíyami ju, chopi a Nijeni wabé omériga olásagá echo'ná abónichi achigórigá mapurigani ma olali echo'ná 'yémichi, echí jaré ke bichíyami pagótami ma ku ro'wíami níimi Riosi yuwa, ne wabé chajótami napáchaga, ne wabé napisóami níisa, mapurigá wabé o'mónami niráa. ²² A'lí Jesusi ayénachó jeaneli: Echijiti 'yemi nimí ané mapu echo'ná Tírochi piréami, echo'ná Sirónachi piréami ketasi 'me kastigo 'yárami níima echalí ne jubá wi'nijíwachi rawé, chopi 'yémitamo ne wabé kastigo 'yárami níibo. ²³ A'lí 'yemi pagótami echo'ná Kapernaúmachi piréami ne wabé o'wéalatami níili mapurigá echo'ná ripá riwigachi muchúami niráa. Chópitamo ne echo'ná ri'lé riáblochi rikibúrami níibo. Nijé nimí ané mapu echo'ná Sorómachi piréami pagótami ne wabé chati oláami níili, chopi a Nijeni wabé omériga olásagá echo'ná abónichi mapurigá ke wesi auché jaré pagótami omero olayá, achigórigá mapurigá Nijeni ma olali echo'ná 'yémichi, echí jaré pagótami echo'ná Sorómachi piréami ketasi cho káraga suwábarami níimi, jipi rawé yénasí. ²⁴ Echijiti 'yemi nimí ané mapu echo'ná Sorómachi anilíwachi kawírali piréami pagótami ketasi 'me walú kastigo 'yárami níima echalí ne jubá wi'nijíwachi rawé, chopi 'yémitamo ne wabé simírami walubé kastigo 'yárami níibo.

Tamí yuwa sisí, a'lí bichétamo galá isábabo

(Lk. 10:21-22)

²⁵ Echalí rawé Jesusi, Riosi yuwa ra'íchaga, jeanili: Nijé nimí walú natétara 'ya Mujé Onorúami, mapujítimi ne Walubela ju echo'ná ripá riwigachi, jena'í wichimóbachi ayénachó. Nijé nimí walú natétara 'ya mapujítimi chinásali je'ná jeyiri namuti mapurigá echí jaré wabé machíami pagótami ketasi echirigá machimea, ayénachó mapurigá echí auché jaré wabé 'nátami pagótami ketasi cho echirigá machimea. Chópimi ma machírali je'ná jeyiri namuti echí jaré kúuchi. ²⁶ Echirigá Nijé nimí natétara 'ya Mujé Onorúami mapujiti Mujemi echirigá ne wabé nakili olánala.

²⁷ A'lí Jesusi jeaneli echí jaré pagótami: Kení Onó ma tamí 'yali ne suwaba namuti mapu ikí nilú. A'lí ke wesi galá tamí machí, chopi Riosi Onorúami tamí machí,

mapujítini Binói Ranala ju. A'lí ke wesi galá machí Riosi Onorúami, chopi Nijeni galá machí Binói, mapujítini bilepi Binói Ranala ju. A'lí echí auché jaré ayénachó galá machí Riosi Onorúami, si'néami mapu ikí Nijeni nakí mápuni galá machírama aboni echí Onorúami.

²⁸Tamí yuwa sisí si'néami mapuyíripi wabé nocháratami ju, ayénachó si'néami mapuyíripi wabé uchérámi ju. A'lí Nijé 'yemi nimí ku isábatama. ²⁹Bulesa tosí Nijé níwala mosobela 'yemi niráa. Nijé 'yemi nimí yuwa ku'wíraga nochama. Tamí yuwa galá binesi, mapujiti Nijé ketasi chibisíami ju, nibilé choni níliami ju. A'lí bichétamo we galá isábabo echo'ná 'yemi sulálachi niráa. ³⁰Mapujiti Nijé níwala mosobela ketasi oméami ju. Ayénachó ketasi bitéami ju echí jaré Nijé níwala muruka mapu Nijé 'yemi nimí 'yama, mapujiti ketasi 'me oméami ju oluwawa mapurigá Nijeni nakí.

Echi jaré mapu Jesusi binérali we mosika kuli turío siné rawé isábawachi

(Mr. 2:23-28; Lk. 6:1-5)

12 A'lí echalí siné rawé isábawachi Jesusi simírali echo'ná mapo'ná echí turío ma wáami níili. A'lí echí jaré mapu Binói binérali ne wabé 'locheka, chótali mosika kuya echí turío rakala. ²A'lí echí jaré Bariseo anilíwami binériami je'ná jerigá riwisáa jeaneli: ¡Nibira! ¡Echi jaré mapu Mujé binera we olá mapurigá ketasi risénsia ju oluwáwa jipi isábawachi rawé! ³Chopi Jesusi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi, mapurigá echí walula silíami Rabiri riwéami olali mapalí binói ne wabé 'locheli, echí auché jaré mapu binói yuwa muchili ayénachó? ⁴Mapujiti echí Rabiri ma bakigá echo'ná pachá Riosi ri'obáwarachi we ko'wali echí jaré pani mapu Riosi lyárami níili. A'lí ketasi risénsia níili mapu echí Rabiri ko'mea echí pani. Nirapé risénsia níili mapu echí auché jaré Rabiri yuwa 'yénami ko'mea. Chopi risensia níili mapu echí jaré sacerdote anilíwami rijói ko'mea. ⁵A'lí Jesusi ayénachó jeanigá rukueli: ¿Kéchatamo siné 'nénali mapurigá osirúami ju echo'ná Riosi nulalila oselíwalachi mapurigá echo'ná pachá walubé Juríosi ri'obáwalachi echí jaré sacerdote anilíwami rijói we nocha sinibí isábawachi rawé, chopi aboni ketasi wi'nijírami ju? ⁶Jipi Nijeni 'yemi nimí ané mapu Nijé Binói mápuni jena'í atí, Nijeni waminabi ne Walubela ju, ketasi mapurigá echí walubé Juríosi ri'obáwala. ⁷Chopi a galátamo machísáagá mapu churigá aniwáami ju mapurigá Riosi Binói anili, mapurigá je'ná jerigá osirúami ju: Nijeni nakí máputamo wabé natimáami níibo, ketásini nakí mapurigátamo chopi wikabé namuti ko'yagá tamí 'yasa, a'lí 'yémítamo ketasi echirigá wi'nijíbi echí auché jaré mapu ketasi namuti nokuáami ju. ⁸A'lí Jesusi jeanili: Nijeni ne Walubela ju echalí isábawachi rawé, mapujiti Nijeni wilárami níili mapurigá Ku'wíriami niráa.

Bilé rijói ke akáanami níili biléana sikachí

(Mr. 3:1-6; Lk. 6:6-11)

⁹A'lí Jesusi echo'ná jonsa ku simírasa, echo'ná aboni ri'obáwalachi nawali. ¹⁰A'lí echo'ná pachá asali bilé rijói, biléana sikachí ke akáanami. A'lí echí jaré Bariseo anilíwami binériami wabé wi'nijíinalaga rukueli jeanigá: ¿Acha risensia ju ku sa'walíwa echí jaré ke akáanami, jipi isábawachi rawé? ¹¹A'lí Jesusi ku nijéwaga, jeanigá rukueli: ¿Chigá rijói 'yemi, bilé bo'wá bukélasa, a'lí echí bo'wá whichisá echo'ná biléana jochi echalí isábawachi rawé ¿kecha chapigá ku machí pama?

¹² A'lí Jesusi ayénachó jeaneli: ¡Waminabi ne wabé natéami ju bilé rijói, ketasi mapurigá bilé bo'wá! Echijiti ne galá risensia ju galá oluwawa echi jaré pagótami jípi isábawachi rawé. ¹³ A'lí Jesusi jeaneli echi rijói biléana sikachí ke akánami: ¡Wachiná kemi siká! Echalí echi rijói galá ku wachínali binói sikala, mapujiti echalí jonsa binói sikala we yáati galá ku sa'wárami níili mapurigá echi auché biléala. ¹⁴ A'lí mapalí echi jaré Bariseo anilíwami binériami ma ku 'machínali echo'ná ri'obachi jonsa, echalí aboni a'nagupi ra'íchali echi Jesusi sayéraga, mapu churigá aboni omérama miná milimea echi Binói.

Chabé ki'yánara osirúami níili echi Jesusi jiti rugá

¹⁵ Chopi Jesusi echirigá galá machigá ku simili echo'ná jonsa. A'lí wikabé pagótami Binói yuwa najátali. A'lí Jesusi ku sa'wali si'néami echi jaré mapu ikí nayúkami níili. ¹⁶ Chopi Jesusi we iwéami nureli mapurigá aboni ketasi ku ruyema echi auché jaré pagótami mapurigá Binói echirigá omérali olayá. ¹⁷ A'lí Jesusi echalí je'ná jerigá ra'íchali mapurigá echirigá galá ikimea mapurigá Riosi Binói bachá niráa anili Binói Jesusi jiti rugá, mapurigá echi walula Riosi jiti nawésami, Isaási riwéami jeanigá osali:

¹⁸ Je'ná rijói Nijé piónawala ju, echi mapu Nijeni chapili. Nijeni ne wabé galé echi Binói.

Ayénachó Nijeni ne wabé ganíli echi Binói jiti, echo'ná Nijé iwigálachi niráa.

Ayénachó Nijeni 'yama Binói echi ne wabé Galabé Riosi Iwigala.

A'lí Binói justicia olama echi auché jaré isena pagótami yuwa, si'néami mapu ikí ketasi Juríosi pagótami ju.

¹⁹ A'lí echi Binói ketasi yónama auché jaré yuwa, nibilé yónaga, o'weli ra'ichama echo'ná walúlachi nasípasí.

Nibilé wesi námama echi Binói o'weli yóniga ra'íchachi echo'ná pagótami napawílachi.

²⁰ Echi Binói ketasi miná ka'línama echi bilé baká o'líami.

Nibilé cho'wama echi bilé rajilí molínamí, mapuyénasí Binói ke cho seba justicia olayá.

²¹ A'lí echi jaré isena pagótami ne galá bichíima echi Binói.

Jaré anili mapu echi Jesusi níwali echi ne walula riablo ariwala

(Mr. 3:19-30; Lk. 11:14-23; 12:10)

²² A'lí echo'ná Jesusi yuwa pálati bilé rijói mapu bilé wabé chati riablo aliwala aliwéami níili. A'lí echi rijói ke machíliami níili, ke ra'íchami ayénachó, chopi Jesusi galá ku sa'wali. A'lí echi rijói ma galá ku machíliami níili, ayénachó galá ku ra'íchali. ²³ A'lí ne si'néami echi jaré pagótami chopi wabé 'nigá muchili. A'lí aboni a'nagupi jeanigá rukueli: ¿Kecha je'ná ju echi Rabiri Ranala máputa we buwé? ²⁴ Chopi echi jaré Bariseo anilíwami binériami je'ná jerigá námaga, jeanili: Je'ná Jesusi chopi ku machí a'wasá echi jaré riablo aliwala mapujiti Binói niwa echi ne walula chati riablo aliwala, Bersebubi riwéami. ²⁵ A'lí Jesusi galá machigá mapurigá aboni 'náitali, a'lí jeaneli: Echo'ná suníami walula nulálachi piréami, ne si'néami a aboni sayérasagá, ne si'néami káraga suwibama. A'lí biléana rijówachi piréami a aboni sayérasagá, si'néami miná suwibama. Ayénachó biléana kalálali piréami a aboni sayérasagá, si'néami miná suwibama. ²⁶ A'lí a echi Satanasi riwéami

riabó ku machí a'wásagá echí jaré riabó aliwala, echalí echí Satanasi a binói sayéraga oláma. A'lí a echirigá olásagá echí Satanasi ketasi waminabi mapurigá walula níima.²⁷ Allí a Nijeni echí Bersebubi riwéami riabó jiti ku machí a'wásagá echí jaré we chatí riabó aliwala, ¿chigá jiti ku machí a'wasá echí auché jaré 'yemi pagótamawala? Echijiti aboni 'yemi mi wi'nijíami níima.²⁸ Chopi a Nijé ku machí a'wásagá echí jaré wabé chatí riabó aliwala mapujítini niwa echí Wabé Galabé Riosi Iwigala, ne bichíwali Riosi ma galá nulá jena'í 'yémichi.

²⁹ A'lí echí riabó, Satanasi riwéami, ne wabé aparúami ju. A'lí tarapé wesi galá omérama chigoya echo'ná bilé wabé aparúami rijói bitélachi, mapalí ketasi bachá bulérami níisa echí wabé aparúami rijói. Chopi bachá bulusáagá, a'lí echí rijói galá omérama chigoya echo'ná echí wabé aparúami rijói bitélachi.

³⁰ Ayénachó Jesusi jeaneli: Echi mapu ketasi tamí yuwa juko, échiko chopi tamí sayérami ju. A'lí echí mapu ketasi tamí yuwa napawiko echí auché jaré pagótami, échiko chopi waminá chijana echí pagótami mapurigá aboni ketasi tamí yuwa níima.³¹ Echalí Jesusi jeaneli: Echijiti Nijeni 'yemi nimí ané mapu ne suwaba echí jaré pagótami chatí olalila galá ku wikawárami níima, a aboni galá ku tánsagá wikáwali. Ayénachó suwaba mapurigá aboni chatí ra'íchali tamí sayériga echirigá ku wikawárami níima. Chopi echí jaré pagótami mapu we chatí ra'íchako echí we Galabé Riosi Iwigala sayéraga, abóni ma ketasi ku wikawárami níima.³² A'lí Jesusi jeaneli: Nijeni wilálami níili mapurigá Ku'wíriami niráa. A'lí mapuyíripi tamí sayéraga ra'íchako, échiko galá ku wikawárami níima, ku wikáwari tánsagá Riosi. Chopi mapuyíripi echí we Galabé Riosi Iwigala sayéraga ra'íchako, échiko ketasi siné ku wikawárami níima mapuyénasí binói abijí bitélasa jena'í wichimóbachi, nirapé cho mapalí binói ma mukusá.

Ibili rakéami namuti galá machirúami níima, acha galá ju, mapalí ma rakema

(Lk. 6:43-45)

³³ 'Yémítamo galá machí mapu bilé masana we galabé ju mapalí ne galabé niráa raké. Ayénachótamo galá machí mapu auché bilé masana we sití ju mapalí échiko we sití niráa raké, mapujiti ibili masana galá machirúami níima echí masana rakala jiti, acha galabé raké, acha wabé sití raké, kérámá.³⁴ 'Yemi pagótami chopi mapurigá sinowi ju! 'Yémítamo ketasi omero galabé niráa ra'icha mapujítitamo wabé chatí suléami ju, mapujiti ibili rijói chopi ra'icha achigórígá mapurigá binói 'nata echo'ná binói sulálachi niráa.³⁵ Echi we galabé oláami rijói we ra'icha echí we galabé ra'íchali mapujiti galabé suléami ju. A'lí echí we chatí oláami rijói we chatí ra'icha mapujiti we chatí suléami ju.

³⁶ Chopi Nijeni 'yemi mi ané mapu echalí ne jubá wi'nijíwachi rawé echí jaré pagótami arigá ku ruyema Riosi ne suwaba namuti mapurigá aboni we chatí ra'íchali.³⁷ Mapujiti a mi galabé namuti ra'ichásagá, mujemi ku'wíratami níima, chopi a mi wabé chatí niráa ra'ichásagá mujemi wi'nijírami níima.

Jaré chatí oláami pagótami we nakili 'nénara mapurigá Jesusi wabé omériga olali

(Mr. 8:12; Lk. 11:29-32)

³⁸ A'lí echí jaré nulalíwami binériami, echí auché jaré o'wéala Bariseo anilíwami binériami yuwa, si'néami ku nijéwaga jeaneli: Binériami, tamujeta nakí mápumi we yáati wabé omériga olama mapurigá ke wesi auché jaré pagótami omero olayá.

Tamujeta nakí máputa we 'nebo mapalimi echirigá wabé omériga olama. ³⁹A'lí Jesusi jeaneli: Jipi piréami wabé chati oláami pagótami ketasi galá bichiyami ju. Aboni chopi nakí 'nénala mapalí Nijeni wabé simírami omériga olá mapurigá ke wesi auché jaré pagótami omero olayá. Chopi Nijeni ketásirapé namuti echirigá wabé simírami omériga olama chopi mapurigá aboni tamí 'nema echirigá oláachi. Chopi aboni arigá riwimea mapalí Riosi wabé simírami omériga olama tamí yuwa mapurigá Binói olali echi ki'yá bitéami Jonasi riwéami rijói yuwa, mapu Riosi jiti nawésami níli. ⁴⁰Mapujiti mapurigá echi Jonasi asali echo'ná pachá echi bilé walubé rochírali bikiyá rawé, bikiyá rokogó yénasi, echirigá achigórigá Nijeni asimea ri'lé pachá wi'yérali bikiyá rawé, bikiyá rokogó niráa. Nijeni wilárami níli mapurigá Ku'wíriami niráa. ⁴¹A'lí Jesusi ayénachó jeanili: Echalí ne jubá wi'nijíwachi rawé echi jaré ki'yá piréami pagótami mapu echo'ná Nínibichi anilíwachi piréali, si'néami wi'nijíbiya ku 'muchísama je'ná jipi piréami pagótami sayérabiya. Mapujiti echalí ne jubá rawé aboni 'yemi mi echirigá wi'nijima mapujiti aboni ne wabé o'móniga tánali wikáwali Riosi mapalí echi Jonasi we nawéseli aboni. Chopi jipi rawé Nijé mápuni 'yemi mi jena'í nawésiya atí, ne wabé simírami Walubela juni, ketasi mapurigá echi Jonasi, a'lí bichétamo arigá ketasi o'móniga tani wikáwali Riosi. ⁴²Ayénachó Jesusi jeanili: Echalí ne jubá wi'nijíwachi rawé, mapalí je'ná jipi piréami pagótami wi'nijírami níima, echalí echi mukí walula silíami, mapu echo'ná mikabé 'naka bitéami níli, arigá wi'nijímiya ku asísima je'ná jipi piréami pagótami. Echalí echirigá ikimea mapujiti echi mukí walula silíami ne wabé mikabé jonsa kipúmiya simili mapurigá echi walula silíami Salomoni riwéami ne wabé machíami niráa nawésali. Chopi Nijé mápuni jipi rawé jena'í 'yemi yuwa atí, ne wabé simírami Walubela juni, ketasi mapurigá echi walula silíami Salomoni. Chopi 'yémítamo arigá ketasi njewa mapurigá Nijeni 'yemi mi nawesa.

Bilé chati riablo aliwala ku nawali mapo'ná machí pátami níli

(Lk. 11:24-26)

⁴³A'lí Jesusi jeanili: Mapalí bilé we chati riablo aliwala ku machínasa echo'ná bilé rijói sulálachi jonsa, a'lí echi we chati riablo aliwala echo'ná auché jaréana wakichéachi aya iyena mapo'ná asimea. Chopi ketasi riwisa, ⁴⁴echalí echi chati riablo aliwala jerigá aní: Echo'ná ku nijé kalílachi siméa mapo'nani jonsa machínali. A'lí mapalí echi riablo aliwala ku nawá echo'ná rijói sulálachi mapo'ná binói chabénala bitéali, echalí binói riwimea echi rijói sulálachi ma ne galá ku a'láratami niráa, mapurigá bilé kalí ne galá ba'yóratami, ma galá pichítami niráa. ⁴⁵A'lí ku simisáa echi riablo aliwala, a'lí binói yuwa chapimea auchecho kichao ne wabé simírami chati riablo aliwala, ketasi mapurigá binói. A'lí ne si'néami echi jaré riablo aliwala echo'ná echi rijói sulálachi ku mo'wisáa, echo'ná pirélama. Echirigá pe jubáami echi rijói ne wabé simírami risúu olálami níima, ketasi mapurigá binói risúu olálami níli ne bachánala niráa. Echirigá achigórigá ayénachó ikimea je'ná jipi piréami chati oláami pagótami.

Echi Jesusi iyera, Binói 'némiya nawali echi jaré Binói ritémawala ayénachó

(Mr. 3:31-35; Lk. 8:19-21)

⁴⁶A'lí mapalí Jesusi abijí echirigá ra'íchiaya asali echi wikabé pagótami yuwa, echalí echo'ná machí asali echi Jesusi iyela, echi jaré Binói ritémawala ayénachó.

A'lí aboni nakili ra'ichánala Binói yuwa.⁴⁷ A'lí bilé rijói jeaneli: ¡Nibira! Echi Mujé iyela, echi jaré Mujé ritémawala echo'ná machí muchuwi. Aboni we nakí Mujé yuwa ra'ichánala.

⁴⁸Chopi Jesusi ku nijéwaga jerigá rukueli echi rijói: ¿Áchami ne galá machináali chigá ne bichíwali ju mapurigá Nijé iyela, ayénachó mapurigá Nijé ritémawala niráa? ⁴⁹Echalí Jesusi, Binói sikala jiti jówaga echi jaré mapu Binói binérali, a'lí jeanigá ku nijéwali: ¡Nibira! Jena'í muchuwi echi jaré Nijé ritémawala, echi Nijé iyela ayénachó. ⁵⁰Mapujiti mapuyíripi olako mapurigá Nijé Onolá, ripá riwigachi atíami nakí, echi ju Nijé rijimala, Nijé wayela ayénachó, Nijé iyela ayénachó.

Echi turío icháami

(Mr. 4:1-9; Lk. 8:4-8)

13 Echalí rawé Jesusi ma machinsa echo'ná Binói bitélachi jonsa, a'lí simigá echo'ná walú ba'wírali suwé, echo'ná asíbali. ²A'lí echo'ná Jesusi yuwa napawili wikabé pagótami. A'lí Jesusi bakili biléana barkochi echo'ná ba'wichí moba chukúami. Echalí Binói echo'ná bárkochi pachá asíbali. A'lí si'lnéami echi wikabé pagótami echo'ná ba'wírali suwé jali. ³A'lí Binói wikabé namuti irétaga nawésali jeanigá: ¡Nibira! Bilé rijói chótali turío ichayá. ⁴A'lí ma ichisuwa jaré raká rujuili echo'ná mulubé biléana buwichí. A'lí jaré chuluguí echo'ná sisáa, káraga suwali. ⁵A'lí auché jaré raká echo'ná biléana rapirúachi rujuili mapo'ná ketasi 'me wi'yéali. A'lí echi jaré raká we yáati a'wili mapujiti ketasi 'me rokóami wi'yéachi níili. ⁶Chopi mapalí wabé ratáami rayénali, echi kúuchi turío bukulí a'wíami we wakicheka suwili mapujiti ketasi ri'libe nawéali. ⁷A'lí auché jaré raká rujuili echo'ná wabé so'ucléami riyáwachi. A'lí echi riyawi wabé ochérasa waminá napolíbanali echi turío. Echijiti ketasi rakeli. ⁸A'lí auché jaré raká echo'ná galabé wi'yérali rujuisa, ne galá rakeli. A'lí jaré raká ibili niráa bilé kiento rakeli. Auché jaré ibili niráa usansa makói rakeli. Auché jaré ibili niráa baisá makói rakeli. ⁹A'lí Jesusi jeaneli: Mapuyíripi nakeko, ¡galá kipú!

Jesusi irétaga nawésali echi pagótami

(Mr. 4:10-12; Lk. 8:9-10)

¹⁰A'lí echi jaré mapu Jesusi binérali murubéanaga mapo'ná Binói asali, jeanigá rukueli: ¿Churékulami sinibí echirigá irétaga niráa ra'icha echi pagótami? ¹¹A'lí Jesusi ku nijéwaga jeaneli: 'Yémitamo ma galá machíratami ju mapu churigá Riosi we nulé echi pagótami. Chopi echi auché jaré ketasi cho echirigá machíratami ju. Aboni ketasi cho galá machí mapu churigá Riosi nulá, echijiti Nijeni ne suwaba irétaga nawesa echi auché jaré ke cho galá bichíyami. ¹²Mapujiti mapuyíripi ma galá níwako, échiko waminabi 'yárami níima, a'lí waminabi níwama. Chopi mayuyíripi ketasi níwako, échiko suwaba 'yárami níima echi pe okuáa mapu binói abijí niwa. ¹³Echijiti Nijeni irétaga nawesa echi auché jaré pagótami, mapujiti aboni ma 'néniga, ketásirapé galá ritiwá, ayénachó aboni ma kipuga, ketásirapé galá nami. A'lí aboni ketasi galá machí mapurigá Nijeni ra'icha. ¹⁴Echirigá ma galá sébali ikili aboni yuwa mapurigá ne bachá niráa nawésali echi walula Riosi jiti nawésami Isaíasi riwéami mapalí binói je'ná jerigá osali:

'Yemi nakala jítitamo námabo, chópitamo ketasi galá machiboa,
ayénachótamo galá 'néniga riwiboa, chópitamo ketasi galá machiboa.

¹⁵ Mapujiti je'ná pagótami we biwárami suléami ju.

Aboni ketasi nami aboni nakala jiti.

Ayénachó aboni busila ma kupili; mapurigá aboni ketasi 'nénama aboni busila jiti,

mapurigá aboni nirapé námama aboni nakala jiti,

mapurigá aboni nirapé machimea echo'ná aboni sulálachi,

mapurigá aboni ketasi ku ro'wima tamí yuwa, mapurigá Nijeni ku sa'wama aboni.

¹⁶ Chopi 'yémitamo ne wabé kanílatami níibo mapujítitamo ma galá 'neni 'yemi busila jiti, ayénachó mapujítitamo ma galá nami 'yemi nakala jiti. ¹⁷ Mapujiti ne bichíwali 'yemi nimí ané mapu wikabé echí jaré o'wéala Riosi jiti nawésami, ayénachó wikabé echí jaré galabé oláami pagótami, si'léami wabé nakili 'nénala je'ná jeyiri mapurigá 'yémitamo ma ritiwá, chopi aboni ketásirapé riwali. Ayénachó aboni nakili námanala je'ná jeyiri mapurigá 'yémitamo ma nami, chopi aboni ketásirapé námali.

Je'ná jerigá aniwáami ju mapurigá Nijeni nawésali

(Mr. 4:13-20; Lk. 8:11-15)

¹⁸ ¡Ne galá namsi 'yemi! Je'ná jerigá aniwáami ju echí mapurigá Nijeni irétaga nawésali echí pagótami, echí turío icháami jiti: ¹⁹ Mapuyíripi námako nawésaluami mapurigá Riosi galá nulé jena'í wichimóbachi piréami pagótami, a'lí ketasi galá machisáagá chu aniwáami nawésaluami ju, a'lí echí wabé chatí oláami riabó we yáati nolinsa, miná 'wísama echí we Galabé Ra'íchali mapu echí rijói ma galá námali. Echi we Galabé Ra'íchali mapurigá ichirúami niráa níili echo'ná echí rijói surálachi, chopi echí riabó miná 'wísali, mapurigá echí rijói ketasi waminabi echijiti 'natama. Echirigá achigórígá ikili echí rijói yuwa mapurigá ikili echí jaré raká yuwa mapu ichirúami níili echo'ná buwichí suwé, mapalí echí jaré chuluguí sisáa suwali. ²⁰ A'lí Jesusi ayénachó jeaneli: Mapurigá ikili echí jaré turío mapu echo'ná moba biléana rapirúachi rujuili, echirigá achigórígá ikímea echí jaré pagótami mapu bachá niráa galá kaníliga námali echí Galabé Riosi Ra'íchala; ²¹ chopi abóni ketasi we yáati galá bichíi ne sulachí niráa, mapujiti abóni achigórígá ju mapurigá echí jaré turío ketasi 'me galá nawéami. Abóni pe téeli niráa bichíima, chopi mapalí abóni we risíu olárami níima mapujiti abóni echirigá bichíinali Riosi Ra'íchala, echalí abóni ma ketasi waminabi galá bichíima. ²² Ayénachó mapurigá ikili echí jaré turío mapu echo'ná wabé so'uweámi riywáwachi ichirúami níili, achigórígá ikímea echí auché jaré pagótami, si'léami mapu ikí galá namsa Riosi Ra'íchala, arígá ketasi galá bichíima. Abóni chopi wikabé namuti wabé nílaga, 'nátaga pirélama. Ayénachó abóni ne wabé koruma echí wikabé namuti jena'í wichimóbachi nirúami. Echijiti abóni ketasi bichíinali Riosi Ra'íchala. A'lí abóni ketasi galá ku'wíratami níima. ²³ A'lí mapurigá ikili echí jaré turío mapu echo'ná galabé wi'yérali ichirúami níili, echirigá achigórígá ikímea echí auché jaré pagótami, si'léami mapu ikí galá namsa Riosi Ra'íchala ne galá sulachí niráa bichíima. Abóni ne galá nijéwaga olama mapurigá Riosi nulé, ayénachó wabé galá bichíiga, wabé galabé ologá pirélama jena'í wichimóbachi. Jaré abóni mapuyiri echí turío ju mapu baisá makói rakeli. Auché jaré mapuyiri echí auché jaré turío ju mapu usansa makói rakeli, mapujiti abóni waminabi galabé olama. Auché jaré mapuyiri echí auché jaré turío ju mapu bilé kiento rakeli, mapujiti abóni waminabi wabé simírami galabé olama.

Echi basíawi ichirúami níili echo'ná turíoche

²⁴ A'lí Jesusi auchecho siné irétaga ra'íchali jeanigá: Mapalí Riosi we nulé echi pagótami, achigórigá ju mapurigá mapalí bilé rijói ichali ne galabé raká echo'ná binói kawíwalachi. ²⁵ Chopi mapalí echi auché jaré pagótami we kochigá bitili, echalí echo'ná nawali bilé rijói we sayérami mapu we ichali echi basíawi echo'ná mapo'ná echi turío ichílati. A'lí ku simili. ²⁶ A'lí mapalí echi turío ma galá muleli, echalí echo'ná nasipa echi turío yuwa ayénachó riwirúami níili echi basíawi. ²⁷ Echalí echi rijói icháami níwala pioni echo'ná binói yuwa sisáa, jeaneli: Walula, ¿kéchami ne turío chopi ichali echo'ná mujé kawíwalachi? ¿Churékula biché echo'ná we a'wili echi basíawi? ²⁸ A'lí echi rijói jeaneli: Auché bilé rijói tamí sayériga echirigá olali. A'lí echi jaré pioni jeanigá rukueli: ¿Áchami nakí máputa ku simíbaga bo'niboa echi basíawi? ²⁹ A'lí binói jeaneli: Jipi ketasi echirigá bo'nisí echi basíawi, mapujiti átamo bo'nisáaga, siné káachi 'yémítamo ayénachó echi turío yuwa bo'niboa. ³⁰ Chopi ariwesi mapurigá okuánika napawika ochérama mapuyénasí ma seba sikirékwachi. Echalí nijeni jeanema echi jaré turío sikiréami: Bachá chapísí echi basíawi. A'lí bulesa mapurigá sonó, suwaba na'esi. Chopi ku napabusi echi turío echo'ná nijé níwala rikówachi.

Echi mostasa anilíwami rakala

(Mr. 4:30-32; Lk. 13:18-19)

³¹ Echalí Jesusi ayénachó auchéchoko je'ná jerigá irétaga binéraga jeaneli: Mapalí Riosi galá nulé echi pagótami, echalí mapuyírai ju bilé táa mostasa anilíwami rakala mapu bilé rijói ichali echo'ná wilyérali. ³² Echi mostasa anilíwami rakala ne bichíwali ne wabé tabéala ju suwaba echi auché jaré raká yuwa. Chopi mapalí ma ochérasa, echi mostasa ne wabé walube ju suwaba echi auché jaré ichirúami namuti yuwa. A'lí walubé ochera mapurigá bilé masana niráa, a'lí echi jaré chuluguí, ripá i'nika 'yénami, echo'ná sisáa we rosorama echo'ná echi mostasa otowálachi.

Jesusi irétaga binera echi levadura jiti rugá

(Lk. 13:20-21)

³³ A'lí Jesusi auchecho siné irétaga ra'íchali jeanigá: Echi pani echi levadula jiti niwalíwa. A'lí mapalí Riosi galá nulé echi pagótami, achigórigá ju mapurigá mapalí bilé mukí ma baisá niráa anáwaga echi harina, galá nasówali echi levadura echi harina yuwa mapuyénasí suwaba galá kapótami níili.

Jesusi chopi irétaga niráa binérali mapujiti bachá niráa nawésarami níili mapu Binói echirigá binérama riwéali

(Mr. 4:33-34)

³⁴ Echalí Jesusi suwaba je'ná jerigá irétaga ra'íchali echi pagótami yuwa. Ayénachó Jesusi sinibí chopi irétaga niráa ra'íchali aboni. ³⁵ Mapurigá ne galá sébali ikimea mapurigá echi walula Riosi jiti nawésami anili mapalí binói je'ná jerigá osali mapurigá osirúami ju echo'ná Riosi Ra'íchala oselíwalachi:

Chotámani irétaga ra'íchiya.

Ayénachó wíká namuti nawésamani mapu ketasi siné machirúami níili ki'yá chokichí jonsa, mapalí je'ná kawí niwálati.

**Jesusi nawésaga ané churigá aniwáami ju mapurigá Binói binérali echi
basíawi rakala jiti rugá mapu ichirúami níili echo'ná turíochi**

³⁶ A'lí Jesusi ma ku ripórasa echi wikabé pagótami, ku bakiri echo'ná pachá kalírali. A'lí echi jaré mapu Binói binérali echo'ná Binói yuwa sigá jeaneli: Tamujé tamí auché ruyé mapu churigá aniwáami ju mapurigami irétaga nawésali echi basíawi jiti. ³⁷ A'lí Jesusi ku nijéwaga jeaneli: Nijeni wilárami níili mapurigá Ku'wíriami niráa. Nijeni ju mápuni we ichá echi we galabé raká. ³⁸ A'lí Jesusi waminabi jeaneli: Suwaba echi jaré raká ichirúami niráa níili jena'í wichimóbachi. Echi we galabé raká mapurigá si'néami echi jaré pagótami ju mapu ikí galá nijéwaga olá mapurigá Riosi nulé. A'lí echi basíawi rakala mapurigá echi auché jaré chati oláami pagótami ju. ³⁹ A'lí echi sayé mapu ichali echi basíawi, échiko echi riablo ju. A'lí echalí sikirékowachi níima echalí ne jubá rawé. A'lí echi sikiréami, echi jaré Riosi kapitánawala ju. ⁴⁰ Echirigá mapurigá echi basíawi bo'nirúami níima, ayénachó mapurigá na'érámi níima echo'ná na'írali, echirigá achigórígá níima echalí ne jubá rawé. ⁴¹ Nijeni wilárami níili mapurigá Ku'wíriami niráa. A'lí echalí ne jubá rawé Nijeni julama echi jaré Nijé kapitánawala mapurigá aboni chapimea ne si'néami echi jaré wabé chati olíriami, ayénachó echi jaré chati oláami mapu ikí nirú jena'í wichimóbachi mapo'nani Nuláami ju. ⁴² A'lí ne si'néami aboni miná ri'lé wabé chati rajáachi na'írali u'lútami níima. Echo'ná aboni ne wabé nalákama, ayénachó aboni ne wabé ki'lákama aboni ramilá, mapujiti aboni ne wabé risúu olárami níima. ⁴³ A'lí echi auché jaré galabé oláami pagótami echo'ná ripá riwigáchi muchima mapo'ná aboni Onolá we Nuráami ju. A'lí aboni ne galá ratábama mapurigá echi rayénali niráa. ¡Si'néami 'yemi mapu ikítamo nakeko, ne galá namsi!

Echi wabé natéami namuti wenomí mapu chinátarami níili

⁴⁴ Ayénachó mapalí Riosi galá nulé echi pagótami, achigórígá ju mapurigá mapalí bilé wabé natéami namuti wenomí we chinásarami níili echo'ná biléana kawichí. Echalí bilé rijói ma riwisáa echi wabé natéami namuti wenomí, a'lí auchecho ku pólasa, ne bachá wabé kaníliga ralinea suwaba echi jaré binói níwala namuti, mapurigá echirigá wikabé napabusa wenomí, galá ralimea echi kawí mapo'ná chinásarami ju echi wabé natéami namuti wenomí.

Echi wabé natéami perla anilíwami namuti

⁴⁵ Ayénachó mapalí Riosi galá nulé echi pagótami, achigórígá ju mapurigá mapalí bilé rijói we amí echi we galabé natéami perla anilíwami namuti. ⁴⁶ Mapujiti mapalí echi rijói ma riwisáa bilé wabé galabé perla, echalí ma ku simigá ralinea suwaba binói níwala namuti, mapurigá echirigá napabusa wikabé wenomí, galá ralimea echi wabé galabé perla anilíwami.

Echi walubé tétami namuti mapuyiri chiní

⁴⁷ Ayénachó mapalí Riosi galá nulé echi pagótami achigórígá ju mapurigá mapalí bilé walubé tétami namuti mapuyiri chiní echo'ná ri'lé walú ba'wírali achárami ju. Echi jaré rochí sirúami echirigá achasa, wikabé karúmati namuti rochí rakoma. ⁴⁸ Chopi mapalí echi walubé tétami namuti mapuyiri chiní ma galá buchíami níisa echi jaré namuti rochí, echalí echo'ná ba'wírali suwé ku machí pátami níima. A'lí

echo'ná muchika, echi jaré rochí sirúami galá rojuániga, chapigá nutema echi jaré galabé rochí echo'ná jaréana walírali, chopi echi auché jaré wabé sití namuti rochí waminá chakena u'lútami níima. ⁴⁹ A'lí Jesusi ayénachó jeaneli: Echirigá achigórigá níima echalí ne jubá rawé, mapujiti echi jaré Riosi kapitánawala nolínaga, miná rojonama echi jaré chati oláami pagótami, echi auché jaré galabé oláami pagótami ayénachó. ⁵⁰ A'lí echi jaré chati oláami pagótami miná ri'lé wabé chati rajáami na'írali u'lútami níima. A'lí echo'ná aboni ne wabé narákama, ayénachó aboni ne wabé na'áwaga ki'lákama aboni ramilá.

Echi jaré bukuríwami galabé namuti, echi jaré chérami galabé namuti yuwa

⁵¹ A'lí Jesusi rukueli jeanigá: ¿Áchatamo galá machili suwaba je'ná jeyili namuti? A'lí aboni ku nijéwaga jeaneli: Ayena, Walubela. ⁵² A'lí Jesusi ayénachó jeaneli: Echijiti ibili rijói Riosi nulalila binériami mapu ayénachó ma galá binératami ju mapu churigá Riosi ma galá bukulíwami nulé echi pagótami, échiko mapuyiri bilé rijói kalíwami ju mapu echo'ná binói níwala galabéalachí jonsa ku machí a'lá echi jaré ne bukulíwami namuti, echi auché jaré ocháarami namuti ayénachó.

Jesusi ku nawali echo'ná Nasarétachi

(Mr. 6:1-6; Lk. 4:16-30)

⁵³ A'lí mapalí Jesusi ma sunili suwaba je'ná jerigá ra'icha, a'lí Binói ku simíli echo'ná jonsa. ⁵⁴ A'lí ma ku nawasa echo'ná Binói kawíwalachi, Jesusi galá binérali echo'ná piréami pagótami echo'ná aboni níwala ri'obachi. Echijiti si'néami aboni chopi we 'nigá muchili, jeanigá: ¿Churigá galá omero je'ná rijói echirigá ne wabé galá machigá ra'icha, ne suwaba namuti jiti rugá? ¿Churigá je'ná jerigá wabé omériga olá mapurigá ke wesi auché jaré pagótami omero olayá? ⁵⁵ A'lí aboni a'nagupi jeaneli: Tamujeta galá machí je'ná rijói. Binói echi tábala sipáami ju, echi María ranala. Ayénachóta galá machí binói ritémawala, echi jaré mapu Jakobo riwéami ju, echi José ayénachó, echi Simoni ayénachó, echi Júrasí asichiko. ⁵⁶ A'lí jena'í tamujé tamí yuwa muchuwi si'néami Binói a'wayela. Tamujeta machí mapu je'ná rijói ketasi walubela ju. ¿Churigá biché galá omero suwaba je'ná jeyiri namuti olayá? ⁵⁷ A'lí aboni wabé kichili echi Jesusi. Chopi Binói jeaneli: Si'néami pagótami galá o'wiké bilé rijói Riosi jiti nawésami. Chopi echi auché jaré pagótami echo'ná echi binói Riosi jiti nawésami kawíwalachi piréami siné káachi ketasi o'wikema echi nawésami. A'lí echi jaré echo'ná binói nawésami kalílachi piréami nibilé cho o'wikema echi nawésami. ⁵⁸ A'lí echo'ná Jesusi ketasi wabé omériga olali wikabé namuti mapurigá ke wesi auché jaré pagótami omero olayá, mapujiti aboni ketasi galá bichíyami níili.

Echi Juani mapu pagóami níili, ma mi'lirúami níili

(Mr. 6:14-29; Lk. 9:7-9)

14 Echalí rawé echi walula silíami Erorsi riwéami galá námali echi Walubela Jesusi jiti ra'ichálawachi. ² Echijiti echi Erorsi jeaneli echi jaré binói piónawala: ¡Echi rijói echi Juani níima mapu chabénala pagóami níili! ¡Échiko ma mukúami níili, chopi ma ku owinaliré! Echijiti échiko galá omero wabé omériga olayá mapurigá auché jaré pagótami, ke wesi omero olayá.

³ Echi walula Erorsi echirigá anili mapujiti chabénala binói nulali pachá bachánala echi Juani, mapujiti echi Eroríasi riwéami mukí wabé sayérali echi Juani. Echi

Eroríasi riwéami mukí echi Jilipi riwéami rijói upila níili, echi mapu echi binói Erorsi rijimala níili. Chopi echi Erorsi arigá chapili echi Eroríasi mapurigá binói upila niráa. A'lí echi mukí we sayérali echi Juani,⁴ mapujiti echi Juani jeaneli echi Erorsi: Tarapé risensia ju mápumi echirigá chapimea kemi rijimá upila mapurigá kemi upí niráa.⁵ Echijiti echi Erorsi we mi'llináali echi Juani, chopi binói we majali echi auché jaré pagótami jiti, mapujiti si'néami pagótami galá bichíili mapu echi Juani walula Riosi jiti nawésami níilo.

⁶Chopi mapalí echi Erorsi walú omáwali echalí sébachi rawé mapalí binói ranálati, echalí echi Eroríasi riwéami mukí kilá echo'ná pachá nasípasí bakigá, we awili echo'ná bacháami. A'lí echi Erorsi riwisáa wabé kaníli. ⁷Echijiti echi walula Erorsi ne bichíwaga 'yámorúli ne suwaba mapu ikí tasa echi tiwé.⁸ A'lí echi tiwé bachá niráa nulérami níili binói iyela jiti. Echijiti echi tiwé ku nijéwaga jeaneli: Echo'ná biléana bitólachi achagá, we yáati tamí 'ya echi Juani mo'ola, echi Juani mapu pagóami ju mo'ola.⁹ Echalí echi walula silíami ne wabé majaga o'mónali. Chopi mapujiti binói ma echirigá ne bichíwaga aneli echi tiwé, bacháami echi auché jaré echo'ná mésachi muchúami yuwa, echijiti binói arigá nulali mapurigá echirigá olárami níima mapurigá echi tiwé nakili.¹⁰ Echalí echi walula silíami júli bilé sontarsi kotorénala echi Juani, mapu echo'ná pachá kumurachi bachárami níili.¹¹ A'lí echi Juani mo'ola ku párami níili, echo'ná biléana bitólachi achagá. A'lí 'yárami níili echi tiwé. Echalí echi tiwé 'yali binói iyela.¹² A'lí echi jaré mapu echi Juani binérali, echo'ná sigá, chapili echi mukúami sapala. A'lí aboni chu'wiróbiya toli. Echalí aboni ku simíbaga ruyeli echi Jesusi suwaba mapurigá ikili.

Jesusi galá kówali malí mil rijói

(Mr. 6:30-44; Lk. 9:10-17; Jn. 6:1-14)

¹³ A'lí mapalí Jesusi je'ná jerigá námali, a'lí Binói ku simili echo'ná suwé jonsa, biléana bárkochi asagá. Echalí Jesusi waminá bo'ónala biléana waná suwé simináali. Chopi mapalí echi wikabé pagótami ne suníami echo'ná o'wéalachí piréami echirigá galá námali mapurigá Jesusi echirigá ku simili, echalí aboni wichí jaga najátaga, mikabé suwé simánali. A'lí echirigá ologá aboni bachá sili echo'ná bo'ónala suwé mapo'ná Jesusi nawama riwéali.¹⁴ A'lí mapalí Jesusi sébali echo'ná bo'ónala suwé, a'lí mapalí Binói ku machínali echo'ná bárkochi jonsa, echalí Binói riwali mapu echi wikabé pagótami ma echo'ná napawiga muchili. A'lí Jesusi ne wabé natimali echi pagótami. Echalí Binói ku sa'wali ne si'néami mapu ikí nayükami níili.

¹⁵ A'lí echalí rawé mapalí ma alíwachi níili, echi jaré mapu Jesusi binérali, echo'ná Binói yuwa sigá jeaneli: Jena'i wabé waná kawichí ju. Ayénachó ma aliwa. Ma ku ripori echi wikabé pagótami mapurigá aboni ku simama echo'ná jaléana mulubé rijówachi, ko'wáami raliboya, mapujiti aboni tarapé niwa mapu ko'mea.¹⁶ Chopi Jesusi jeaneli: Ketasi arigá 'wéralli ju mapu aboni ku simama. ¡'Yemi aboni 'yasi mapurigá aboni ko'mea!¹⁷ A'lí aboni jeaneli: Tarapeta niwa ko'wáami jena'i tamuje. Chopi malí pani nirú, okuá kúuchi rochí ayénachó.¹⁸ A'lí Jesusi jeaneli: ¡Wakiná tosí!¹⁹ A'lí Binói nureli echo'ná kasaláttali muchínala echi wikabé pagótami. Echalí Binói chapigá echi malí pani, echi okuá rochí ayénachó, a'lí ripá 'néniga, natétara 'yali Riosi. A'lí Jesusi rojuániga 'yali echi pani, echi jaré mapu Binói binérali. A'lí aboni galá nachútali echi wikabé pagótami.²⁰ A'lí si'néami echi wikabé pagótami ma kosá, ne galá posali. A'lí ma sunisa ko'yá, aboni ku napabuli echi kúuchi ko'wáami

tibíami. A'lí aboni echirigá buchíwali makói miná okuá walírali. ²¹ A'lí echi jaré wikabé mapu galá ko'wali, malí mili rijói níili, ke taraka echi jaré wikabé muguí, echi jaré kúuchi ketásichó yuwa tarali.

Jesusi wirigá iyénali echo'ná moba walubé ba'wírali

(Mr. 6:45-52; Jn. 6:16-21)

²² Echalí Jesusi we yáati mo'wínala júuli echo'ná bárkochi echi jaré mapu Binói binérali. A'lí Binói bachá júuli si'néami aboni echo'ná bo'ónala walú ba'wírali suwé simánala, mapuyénasí Binói ku ripórali echi wikabé pagótami. ²³ A'lí Jesusi ma ripórasa echi wikabé pagótami, waminá waná ripá rabo simili, Riosi yuwa ra'ichámiya. A'lí echalí alíi chónachi Jesusi echo'ná waná ripá rabó we bi'neli asali. ²⁴ A'lí echi barko ma echo'ná nasípasí walú ba'wírali inárali. Chopi echi barko wabé chati rakibúrami níili, mapujiti echi wabé iwéami iká ku kuwana rakibuli, ayénachó echi walú ba'wí we chati apulali. ²⁵ Chopi echalí bi'yá chónachi, Jesusi Binói echo'ná walú ba'wichí moba wiligá iyénaga nawali echo'ná nasípasí mapo'ná aboni echirigá sírali, echo'ná bárkochi 'yénaga. ²⁶ A'lí mapalí aboni echirigá riwali echi Jesusi echo'ná ba'wichí moba wiligá inárachi, a'lí aboni ne wabé majajali, jeanigá: ¡Bilé chu'wí ju! A'lí aboni ne wabé majaga sinákali. ²⁷ Chopi Jesusi we yáati ra'íchali jeanigá: ¡Ketasi majasi! Nijeni ju. ¡Tarapé namuti chibi ikimea! ²⁸ A'lí echi Pegro ku nijewaga jeaneli: ¡Walubela, a Mujé Binói níisagá, tamí julá mápuni echo'ná mi yuwa simea, ba'wichí moba wirigá ináraga! ²⁹ A'lí Jesusi jeaneli: ¡Wakiná simí! A'lí echi Pegro rikínaga echo'ná bárkochi jonsa, ayénachó echo'ná ba'wichí moba wiligá inárali, echo'ná Jesusi yuwa simiyá. ³⁰ Chopi ke sayiná galá 'néniga mapurigá wabé iwéami ikali echo'ná walú ba'wírali, echalí echi Pegro ne wabé majali. A'lí we yáa chótali botuwísiya. Chopi ne o'weli sinali jeanigá: ¡Walubela, tamí ku'wiri! ³¹ Echalí Jesusi galá wachínaga Binói sikala, we yáati chapili echi Pegro. A'lí jeaneli: Mujé rijói péebi bichíyami ¿churékula ketasi tamí bichíili? ³² A'lí mapalí okuánika ku mo'wili echo'ná pachá bárkochi, echalí ke sayiná ariweli ikayá. ³³ A'lí si'néami mapu ikí muchili echo'ná bárkochi, echo'ná Jesusi yuwa sigá, wéemi raweka chokoba jábali, jeanigá: ¡Ne bichíwali Mujemi bi'nélipi Riosi Ranala ju!

Jesusi ku sa'wari echi jaré nayúkami echo'ná Jenesarétachi muchúami

(Mr. 6:53-56)

³⁴ A'lí waminá bo'ónala sigá, echo'ná Jenesarétachi anilíwachi kawírali sili. ³⁵ A'lí mapalí echo'ná piréami galá machili mapu echi Jesusi níilo, echalí aboni echo'ná ne suníami noligá jonsa júuli pánala echo'ná Binói yuwa, ne si'néami mapu ikí nayúkami níili. ³⁶ A'lí aboni risensia tánali mapurigá echi jaré nayúkami chopi nochama echo'ná Jesusi napáchala suwilá. A'lí si'néami mapu ikí nocháliko, galá ku sa'wárami níili.

Echi pagótami chati surérama mapujiti aboni chati 'nata

(Mr. 7:1-23)

15 A'lí jaré rijói nulalíwami binériami mulubéanali Jesusi yuwa, jaré rijói Bariseo anilíwami binériami ayénachó mapu echo'ná Jerusalémachi jonsa simíbami níili. A'lí aboni jeanigá rukueli: ² ¿Churékula echi jaré mapu Mujé binérali ketasi nijewaga olá mapurigá echi jaré chabé ki'yá piréami o'wéala sinibí olali?

Aboni ketasi bachá si'winárigá panígasa, arigá we ko'wá. ³Chopi Jesusi jeaneli: 'Yémitamo ayénachó ketasi nijéwaga olá mapurigá Riosi nulali, chópitamo sinibí waminabi olá mapurigá echí auché jaré 'yemi pagótamawala sinibí olali. ⁴Mapujiti Riosi je'ná jerigá nulali: Galá o'wiké kemi onó, echí kemi iyé ayénachó. Echi mapu wabé yóniga aneko kepu onó, echí kepu iyé omá, échiko waminá mi'lirúami níima. ⁵Chopi 'yémitamo jeaní: Mapuyíripi jeanésagá echí binói onolá, echí binói iyela keremá, jeanigá: Mani 'yali Riosi ne suwaba nijé níwala namuti mapujiti nijé nimí ku'wírimi, echijítini ma ketasi omero waminabi mi ku'wíriya. ⁶Echalítamo ayénachó jeaní mapu ma ketasi arigá 'wéralli ju mapurigá échiko waminabi ku'wírama kepu onó, kepu iyé omá. A'lí 'yémitamo echirigá ologá tarapé galabé nírali Riosi nulalila. Chópitamo nijéwaga olá mapurigá echí auché jaré 'yemi pagótamawala sinibí olali. ⁷'Yémitamo wabé 'yékami ju! Echi walula Isaíasi ne bichíwaga nawésali 'yemi jiti rugá, máputamo wabé 'yékaka oláami ju, mapalí binói bachá niráa je'ná jerigá osali:

⁸ Je'ná pagótami chumuchí chopi ra'ichaga aní mapu aboni wabé tamí o'wiké. Chopi aboni arigá ketasi ne sulachí niráa, bichíwaga tamí galé.

⁹ A'lí aboni ketasi bichíwali niráa tamí o'wiké, aboni chopi nawesa mapurigá echí jaré pagótami nulá nawisánala.

A'lí aboni wepi 'yékaka aní mapu Riosi achigórigá nulá.

¹⁰ A'lí Jesusi bayegá echí wikabé pagótami, a'lí jeaneli: Galá námiga machisí je'ná jeyiri: ¹¹Echi pagótami ketasi chirigá chati sulélama chopi mapujiti aboni we ko'wá echí ko'wáami mapu ketasi risensia ju mapu aboni ko'mea. Chopi echí pagótami ne bichíwali we chati sulélama mapujiti aboni wabé chati 'nátaga echo'ná aboni sulálachi, ayénachó wabé chati ra'icha.

¹² A'lí echí jaré mapu Jesusi binérali, echo'ná Binói yuwa sigá, jeaneli: ¿Kéchami machí mapu echí jaré o'wéala Bariseo ne wabé na'áwali mapujítimi echirigá ra'íchali? ¹³Chopi Jesusi ku nijéwaga jeaneli: Ne suwaba echí jaré ichí mapu keni Onó, echo'ná ripá riwigachi atíami ketasi ichali, échiko ku bo'nirúami níima. ¹⁴Ayénachó Jesusi jeaneli: Ariwesi echí jaré Bariseo anilíwami o'wéala binériami. Aboni chopi mapurigá jaré ke machíliami ju mapu we bayera auché jaré ke machíliami. A'lí a bilé ke machíliami rijói miná bayérasagá auché bilé ke machíliami, okuánika echo'ná biléana jochi rujuímire. ¹⁵A'lí echí Pegro ku nijéwaga jeaneli: Tamujé tamí ku ruyé: ¿Chu aniwáami ju mapurigami irétali? ¹⁶A'lí Jesusi jeanigá rukueli: ¿Kéchatamo cho galá machí mapu churigá aniwáami ju mapurigá Nijeni irétaga binera echí pagótami? ¹⁷¿Kéchatamo cho machí mapu suwaba echí ko'wáami mapu ikí bilé rijói ko'wako, échiko echo'ná echí rijói ropárachi chopi simigá, a'lí echo'ná jonsa simíraga ku machínama? ¹⁸Chopi echí pagótami we chati ra'icha achigórigá mapurigá aboni chati suléami ju, echijiti aboni waminabi chati suléami niwárami ju. ¹⁹Echi jaré pagótami wabé chati 'nata mapujiti aboni we chati suléami ju. Auché jaré echijiti wabé nakówaka ko'yáami ju. Auché jaré mapu ma niwíami ju echijiti arigá kochí auché jaré isena yuwa. Auché jaré mapu ke cho niwíami ju echijiti ayénachó chati ologá wiká yuwa kochí. Auché jaré echijiti we chigórami ju. Auché jaré echijiti ikaleka ra'icha. Auché jaré echijiti wabé sayéraga ra'icha Riosi. ²⁰Mapalí echí pagótami we chati olá, echalí aboni wabé chati sulélama. A'lí aboni ketasi chati sulélama chopi mapujiti aboni arigá ko'wá echí ko'wáami, mapalí aboni ketasi cho wisabé si'winárigá panígali.

Bilé mukí mapu si'nú ra'íchami níili arigá bichíili Jesusi

(Mr. 7:24-30)

²¹ A'lí Jesusi ma ku simigá echo'ná jonsa, echo'ná biléana kawichí simili mapo'ná mulubé níili Tírochi anilíwachi walúlachi, Sirónachi anilíwachi ayénachó. ²² A'lí bilé mukí si'nú ra'íchami, echo'ná Kananéachi anilíwachi kawírali bitéami, echo'ná Jesusi yuwa nawagá, o'weli ra'íchaga jeaneli: ¡Mujé Walubela Rabiri Ranala, tamí natimá! Nijé kilá ne wabé risúu olálami ju, mapujiti we niwa bilé wabé chati riablo aliwala! ²³ Chopi Jesusi ketásirapé ku nijéwali. A'lí echí jaré Binói yuwa binéami, sigá jeaneli: ¡Ku julá echí mukí mapujiti binói chopi wabé sinaka najata tamujé tamí yuwa! ²⁴ A'lí Jesusi ku nijéwaga jeaneli: Nijeni chopi julárami níili echí jaré Juríosí pagótami ku'wírimiya, si'néami mapu ikí aboni 'wikáami ju mapurigá bo'wá niráa. ²⁵ A'lí echí mukí echo'ná nawagá, bacháami Jesusi yuwa wéemi raweka, chokoba wilíbali, jeanigá: ¡Walubela, tamí ku'wiro! ²⁶ A'lí Jesusi ku nijéwaga jeaneli: Echi jaré Juríosí pagótami 'yemi mi ané kochí niráa, mapujítitamo isena pagótami ju. Echijiti ariwé mapu echí auché jaré mapu Riosi kúchuwala anérami ju, ne bachá ko'mea. Ketasi galá níima chapiwawa echí jaré Riosi kúchuwala níwala ko'wáami, waminá kochí kóoluwa! ²⁷ A'lí echí mukí jeaneli: ¡Ayena, Walubela! Chopi echí jaré kochí arigá ko'wá echí kúuchi ko'wáami chi'wáami mapu we rujuini echo'ná wi'yérali mapalí echí jaré kochí puguéami ko'yá muchuwi. ¡Echijiti arigá tamí ku'wiro, pe tása niráa! ²⁸ A'lí Jesusi ku nijéwaga jeaneli: ¡Mukí, ne galami bichíi! ¡Galá mi olárami nílaga mapurigami nakí! A'lí echí mukí kilá we yáati galá ku sa'wárami níili echalí jonsa.

Jesusi ku sa'wali wikabé nayúkami

²⁹ A'lí Jesusi ku simigá echo'ná jonsa, ma nawali echo'ná auché biléana mapo'ná mulubé níili walubé ba'wírali Galiléachi anilíwachi. A'lí echo'ná suwé jonsa ku simigá, echo'ná ripá biléana rabó 'moka, echo'ná asíbali. ³⁰ A'lí echo'ná Jesusi yuwa sili ne wikabé pagótami. A'lí aboni así pali wikabé mapu ke akáanami níili, auché jaré mapu ke 'machíliami níili ayénachó, auché jaré mapu ke ra'íchami níili ayénachó, auché jaré sikamochi ayénachó, auché jaré mapuyíripi nayulí jiti nayúkami níili asíchiko. Ne si'néami echo'ná Jesusi yuwa pálati. A'lí Binói galá ku sa'wali si'néami aboni. ³¹ Echijiti echí auché jaré pagótami chopi wabé 'nigá muchili mapalí aboni riwali mapu echí jaré ke ra'íchami ma galá ra'íchali, ayénachó mapu echí jaré sikamochi galá ku akáanami níili, ayénachó mapu echí jaré ke 'machíliami galá ku 'nénali. A'lí echí pagótami waminabi walubélaga aneli echí Walubela Riosi, echí Isaeli pagótami Riósawala.

Jesusi galá kówali naó mili rijói

(Mr. 8:1-10)

³² A'lí Jesusi bayegá echí jaré mapu Binói binérali, a'lí jeaneli: Wabení natimá je'ná wikabé pagótami mapujiti ma bikiyá chi'leli mapalí jonsa aboni tamí yuwa muchuwi. A'lí aboni ma ketasi niwa mapu ko'mea. A'lí bicheni ketasi nakí mápuni ku julama echirigá ke cho kosáagá aboni, mapujiti jaré ketasi omérama simiba echo'ná buwichí, mapujiti aboni we mikabé jonsa simíbali. ³³ A'lí echí jaré mapu Jesusi binérali jeaneli: ¿Churigata galá kóobo je'ná wikabé pagótami jena'í mikabé

kawichí, mapurigá aboni galá posama? ³⁴A'lí Jesusi jeanigá rukueli: ¿Chu kipu ko'wáami níwatamo? A'lí aboni jeaneli: Chópita niwa kichao kúuchi pani, pe okuáa kúuchi rochí ayénachó. ³⁵A'lí Jesusi nuleli muchínala echi wikabé pagótami echo'ná wi'yérali. ³⁶A'lí Binói chapigá echi kichao pani, echi jaré rochí ayénachó, a'lí natétara 'yali Riosi. A'lí rojuániga 'yali echi jaré mapu Binói binérali. A'lí aboni nachútali echi wikabé pagótami. ³⁷A'lí si'néami echi wikabé pagótami ma kosá, ne galá posali. A'lí aboni ku napabuli kichao walírali buchíami echi kúuchi chi'wáami ko'wáami tibíami. ³⁸A'lí echi jaré wikabé pagótami mapu ko'wali, naó mili rijói níili. A'lí ketasi tarárami níili echi jaré wikabé muguí, echi jaré wikabé kúuchi ke cho.

³⁹A'lí mapalí Jesusi ma ku ripórali echi pagótami, echalí Binói ku bakili echo'ná bárkochi. A'lí echo'ná pachá bárkochi asagá ku nawali echo'ná Makatárachi anilíwachi kawírali.

**Jaré rijói tánali mapurigá Jesusi we yáati wabé omériga olama mapurigá
aboni riwimea echirigá oláachi**

(Mr. 8:11-13; Lk. 12:54-56)

16 A'lí echi jaré Bariseo anilíwami binériami sili echo'ná Jesusi yuwa, echi auché jaré Saruseo anilíwami ayénachó. A'lí aboni ketasi bichíili mapu Jesusi ne bichíwali ne wabé omériga olali mapurigá Riosi chopi omero olayá. Echijiti aboni tánali mapurigá Jesusi we yáati echirigá wabé omériga olama sinepi niráa, mapurigá aboni galá riwiméa echirigá oláachi. ²Chopi Binói ku nijéwaga jeaneli: Sinibí alíwachi mapalí we sitana echi nolí, echalí 'yémítamo jeaní: Ba'alí we galá rawéwamaré. ³Chopi ba'alínala bilyá 'yémítamo jeaní: Jipi rawé walú ukuméaré mapujiti we sitana echi nolí, ayénachó mapujiti we nolé. ¡'Yémítamo ne wabé 'yékami ju! Sinibí rawé 'yémítamo galá machí churigá ikimea echalí rawé mapalítamo galá ritiwá echi nolí. Chópitamo ketasi machí churigá ikimea waminánomí rawé. Chopi bachá niráa osirúami níili echo'ná Riosi Ra'íchala oselíwalachi mapurigá ikimea riwéali waminánomí rawé. Ayénachó 'yémítamo ma ritiwá mapurigá ma chótali echirigá ikiyá mapurigá bachá niráa osirúami níili mapurigá ikimea riwéali. ⁴Ayénachó Jesusi jeaneli: Jipi piréami wabé chati oláami pagótami ketasi galá bichiyami ju. Aboni chopi nakí 'nénala mapalí Nijeni wabé simírami omériga olá mapurigá ke wesi auché jaré pagótami omero olayá. Chopi Nijeni ketásirapé namuti echirigá wabé simírami omériga olama chopi mapurigá aboni tamí 'nema echirigá oláachi. A'lí aboni arigá riwimea mapalí Riosi wabé simírami omériga olama tamí yuwa mapurigá Binói olali echi ki'yá bitéami Jonasi riwéami rijói yuwa, mapu Riosi jiti nawésami níili. A'lí Jesusi ma ariwesa aboni, a'lí ku simili.

Echi levadura anilíwami

(Mr. 8:14-21)

⁵A'lí aboni sili echo'ná bo'ónala auché biléana walú ba'wírali suwé, chopi mapalí ma sébali, echalí aboni mayeli mapu ke newaleli jaré pani toyá. (Alí echi pani echi levadura anilíwami jiti niwaliwa.) ⁶A'lí Jesusi jeaneli: ¡Ne galá 'nesi! A aboni niráa galá tibusi mapurigátamo waminá ariwebo echi jaré Bariseo níwala levadura anilíwami, echi auché jaré Saruseo níwala ayénachó. ⁷A'lí aboni je'ná jerigá 'nátili: Binói echirigá aní mapujítita ketasi toli echi jaré pani, mapujiti echi jaré pani echi

levadura achigá niwalíwa. ⁸Echalí Jesusi galá machigá je'ná jerigá 'nátachi aboni, echijiti jeaneli: 'Yemi rijói péebi bichíyami ju. 'Yémitamo wabé nílaga 'nata chopi mapujítitamo ketasi bilé pali echí jaré pani. ⁹¿Kéchatamo cho machí mapurigá Nijeni wabé omériga olá? ¿Kéchatamo newalá mapurigá Nijeni olali mapalini nachútali echí malí kúuchi pani, echí malí mili rijói koya? ¿Nirapéchatamo newalá chu kipu walírali buchíami 'yémitamo ku napabuli echí kúuchi pani chi'wáami tibíami? ¹⁰¿Kéchatamo newalá mapurigani olali maparítamo nachútali echí kichao kúuchi pani echí naó mili rijói koya? ¿Nirapéchatamo newalá chu kipu walírali buchíami 'yémitamo ku napabuli echí kúuchi pani chi'wáami tibíami? ¹¹¿Churékulátamo ketasi machili mapu Nijeni ketasi ra'íchali echí jaré pani jiti rugá, mapalini jeaneli mapu 'yemi aboni galá tibusi mapurigátamo miná ariwebo echí jaré Bariseo níwala levadura, echí jaré Saruseo níwala ayénachó? ¹²Echalí aboni galá machili mapu Jesusi ketasi ra'íchali echí jaré pani jiti rugá, mapalí Binói jeaneli mapu aboni ariwema echí jaré Bariseo níwala levadura, chopi mapurigá aboni ketasi bichíima mapurigá echí jaré Bariseo binérali, nirapé mapurigá echí jaré Saruseo binérali.

Echi Pegro galá nawesa

(Mr. 8:27-30; Lk. 9:18-21)

¹³A'lí mapalí Jesusi nawali echo'ná kawichí mapo'ná mulipi ju echo'ná walúlachi Sesaréachi anilíwachi, echí Jilipi níwala, echalí Jesusi jeaneli echí jaré mapu Binói binérali: Nijeni wilárami níli mapurigá Ku'wíriami niráa, chopi ¿churigá aní echí auché jaré pagótami? Aboni, ¿chigá tamí mayé? ¹⁴A'lí aboni jeaneli: Jaré aboni mayé mapu Mujemi echí Juani ju, echí mapu chabé pagoli echí pagótami. Auché jaré mayé mápumi echí Elíasi ju. Auché jaré mayé mápumi echí Jeramíasi ju, auché bilé kilyá bitéami Riosi jiti nawésami rijói keremá, mápumi ki'yá bitéali jena'í wichimóbachi, chopi mápumi ma ku owíndi. ¹⁵A'lí Jesusi jeanigá rukueli: 'Yemi, ¿chigátamo tamí mayé? ¹⁶A'lí echí Simoni Pegro jeaneli: ¡Mujé ju echí Cristo anilíwami! Riosi mi wilali mapurigá Walubela Nigúurami niráa. ¡Mujé ju echí sinibí bitéami Riosi Ranala! ¹⁷A'lí Jesusi ku nijéwaga jeaneli: Ne wabé kanílatami jumi mujé Simoni, mápumi echí Jonasi ranala ju, mapujiti ke wesi rijói mi echirigá machírali, chopi Nijé Onolá, ripá riwigáchi atíami, mi echirigá machírali. ¹⁸Ayénachó Nijé nimí ané mapu mujemi Pegro riwé, echí mapu je'ná jerigá aniwáami ju: Bilé rité. A'lí je'ná jerigá mapurigá mujemi anili, ne bichíwali ju. Ayénachó je'ná mapurigá mujemi anili, mapurigá biléana rapichí ju mapo'ná ketasi chirigá nokomea. Ayénachó achigórigá mapurigá wabé jiwérami ju bilé kalí mapu kalilárami ju echo'ná moba biléana rapichí, echirigá ayénachó si'néami echí jaré napawika bichíyami mapu ikí bichíiko mapu Nijeni bilepi Riosi Ranala ju, abóni galabé jiwériga napawika bichíyami ju. A'lí echí mukuwáwami ketasi omelo, echiyiri bichíyami sayériya. Chopi aboni sinibí niráa galá tibútarami níima, mapujiti aboni sinibí piréami níima tamí yuwa. ¹⁹A'lí Nijé nimí 'yama mapurigami binérama echí pagótami, mapurigá aboni galá machimea mapurigá Riosi nulé aboni. A'lí ne si'néami mapu ikí ketasi bichíima mapurigami binérama aboni jena'í wichimóbachi, abóniko ketasi ku'wíratami níima echo'ná ripa riwigáchi, chopi si'néami mapu ikí galá bichíima, abóni galá ku'wíratami níima echo'ná ripá riwigáchi. ²⁰A'lí Binói nuleli echí jaré mapu Binói binérali mapurigá aboni ke wesi ruyema mapu Binói Jesusi, echí Cristo anilíwami níili.

Jesusi bachá niráa nawesa mapurigá Binói mi'lirúami níima riwéali

(Mr. 8:31-9:1; Lk. 9:22-27)

²¹ Echalí jonsa Jesusi chótali ruyee echí jaré mapu Binói binérali mapurigá arígá 'wéráli níili mapu Binói simea echo'ná Jerusalémachi, mapurigá Binói echo'ná wabé risúu olárami níima echí jaré o'wéala ochérami jiti, ayénachó echí auché jaré o'wéala sacerdote jiti, ayénachó echí auché jaré nulalíwami binérami jiti, ayénachó mapurigá Binói Jesusi waminá mi'lirúami níima, chopi mapurigá Binói auchecho siné ku owínama riwéali ma bikiyá chi'rígá. ²² A'lí echí Pegro waná togá, chótali jeaniyá: ¡Walubela, Riosi mi galá ku'wírama, ketasi arígá 'wéráli ju mápumi echirigá olárami níima! ²³ A'lí Jesusi ku kuwana 'néniga jeaneli echí Pegro: ¡Miná waná simigá! Mujé tamí we kumé mapujítimi chopi ra'icha mapurigá echí Satanasi riwéami riablo niráa. Mujé ketasi 'nata mapurigá Riosi 'nata, chópimi 'nata mapurigá echí auché jaré pagótami 'nata.

²⁴ A'lí Jesusi jeaneli echí jaré mapu Binói binérali: A jaré 'yemi nakisáagá olánala mapurigá Nijeni nakí máputamo olabo, ketasi waminabi olasi mapurigá 'yemi aboni chopi nakí olánala. Chopi sinibí rawé nijewaga olasi mapurigá Nijé 'yemi nimí nulema, ayénachó arígá anachasi maparítamo risúu olárami níibo, achigórigá mapurigá Nijeni anachama mapalini risúu olárami níima. ²⁵ Mapujiti mapuyíripi chopi nakisáagá mapu binói wabé kanílaga bitélama jena'í wichimóbachi, échiko tarapé biyíri olásagá chopi miná mukumea. A'lí mapuyíripi chopi nakisáagá olánala mapurigá Nijeni nakí mapu binói olama, échiko ne sinibí niráa bitélama. ²⁶ A'lí Jesusi ayénachó jeaneli: A bilé rijói ne suwaba mésagá jena'í wichimóbachi nirúami namuti, a'lí arígá miná mukusá, je'ná echiyiri rijói tarapé chirigá ku'wíratami níima suwaba echí jaré wikabé namuti jiti. Mapujiti ma mukúami níisa, binói ketasi omérama we yáati auchecho ku bitéliya jena'í wichimóbachi. Nibilé wesi omérama echirigá ku bitéliya, a ne suwaba jena'í wichimóbachi nirúami wenomí jiti natétiga. ²⁷ A'lí Jesusi waminabi jeaneli: Nijeni wilárami níili mapurigá Ku'wíriami niráa. A'lí minánomí Nijeni ku nawama jena'í wichimóbachi ne wabé Walubela niráa, mapurigá Nijé Onolá ne Walubela ju. Ayénachó echalini ku nolínama echí jaré wikabé Riosi kapitánawala yuwa. A'lí bicheni ku kuwana natétama ibili rijói achigórigá mapurigá binói olali. ²⁸ Ne bichíwali 'yemi nimí ané mapu jaré 'yemi jena'í muchúami ketásitamo cho suwiboa, átamo ketasi cho tamí riwisáa mapalini ne wabé Walubélatami níima. Nijeni wilárami níili mapurigá Ku'wíriami niráa.

Jesusi si'nú nakulíwarami níili

(Mr. 9:2-13; Lk. 9:28-36)

17 A'lí wakinánokuá usani rawé, Jesusi chapili echí Pegro, echí Jakobo ayénachó, echí Juani, echí Jakobo rijimala ayénachó. A'lí echo'ná waná bayérali, biléana ripabé rabó. ² A'lí aboni riwali mapurigá Jesusi akala si'nú nakulíwarami níili, we galabé rajáami niráa mapurigá echí rayénali. Ayénachó Binói napáchala ne wabé simírami rosákami niwárati, ne wabé ratábami niráa. ³ A'lí ke sayiná echo'ná aboni yuwa jábali echí walula Moisesi, echí walula Elfási ayénachó, echí mapu chabé ki'yá piréali jena'í wichimóbachi, chopi aboni ma ku sigá, ra'íchali echí Jesusi yuwa. ⁴ A'lí echí Pegro jeaneli echí Jesusi: ¡Walubela, ne galá níima máputa jena'í tibibo! Ami nakisáagá, bikiyá kalí látami niwabo jena'í. Echi bilé Mujé níwala

níima. Auché bilé echi Moisesi níwala níima. Auché bilé echi Elíasi níwala níima. ⁵A'lí abijí ra'íchachi echi Pegro, echo'ná ne wabé ratábami bimoli mapuyénasí aboni ma ketasi machíili. Echalí ke sayiná Riosi Binói we ra'íchali echo'ná bimolírali jonsa. A'lí jeanili: ¡Je'ná Jesusi Nijé Ranala ju, mapu Nijeni ne wabé galé! ¡Nijeni ne wabé ganili echi Binói jiti! ¡Galá namsi mapurigá Binói 'yemi mi nawesa! ⁶A'lí echi jaré bikiyá Jesusi yuwa binéami je'ná jerigá namsa, ne wabé majaga, akaná uchúpali. ⁷A'lí Jesusi murubéanaga echo'ná aboni yuwa, chapigá jeaneli: ¡Ku jásasi! ¡Ketásirapé majasi! ⁸A'lí aboni auchécho galá ku 'néniga, ke wesi riwali, chopi bi'neli Jesusi.

⁹A'lí mapalí aboni ku tiguínali echo'ná ripá rabó jonsa, Jesusi jeaneli: Nijeni wilárami níili mapurigá Ku'wíriami niráa. Ke wesi ku ruyesi mapurigáamo riwali echo'ná ripá rabó, mapuyénasí Nijeni auchécho ku owínama mapalí Nijeni ma mukúami níisa. ¹⁰A'lí echi jaré Binói yuwa binéami jeanigá rukueli: ¿Churékula echi jaré nularíwami binériami aní mapu arigá 'wéraili ju mapu echi walula Elíasi bachá ku nolinama? ¹¹A'lí Jesusi ku nijéwaga jeaneli: Ne bichíwali echi Elíasi bachá ku nolínaga, ne galabé ku niwama suwaba namuti. ¹²Chopi Nijeni 'yemi mi ané mapu bilé rijói mapuyiri echi Elíasi ma nawali. A'lí echi jaré pagótami ketasi machili echi rijói, chopi aboni wabé risúu olali echi binói, suwaba mapu ikí aboni nakili olánala. A'lí aboni ayénachó tamí echirigá risúu olama. Nijeni wilárami níili mapurigá Ku'wíriami niráa. ¹³A'lí echi jaré mapu Jesusi binérali galá machili mapu Binói ra'íchali echi Juani jiti rugá, echi mapu pagóami níili.

Jesusi ku sa'wari bilé towí mapu we mukúsawami níili

(Mr. 9:14-29; Lk. 9:37-43)

¹⁴A'lí mapalí aboni auchecheo ku síli echo'ná mapo'ná echi wikabé pagótami muchili, echalí bilé rijói mulubéanali echo'ná Jesusi yuwa. A'lí echo'ná bacháami wéemi raweka chokoba wiligá ¹⁵jeaneli: ¡Walubela, galá natimá echi nijé ranala, mapujiti binói we mukúsuwami ju! Echijiti binói wabé chati risúu olárami ju. A'lí binói wisabé wichí echo'ná na'írali, echo'ná ba'wírali ayénachó. ¹⁶A'lí ma pálini echo'ná echi jaré yuwa mapu Mujemi binérali, chopi aboni ketasi oméralli ku sa'wayá. ¹⁷Echalí Jesusi jeaneli echi jaré mapu Binói binérali: ¡Yémítamo ketasi 'me galá bichíyami ju! Ma wi'llibé niráa Nijé 'yemi nimí yuwa asali chópitamo abijí ketasi cho galá tamí bichíili. ¡Chabé jonsa 'yémítamo ketasi galá nijéwaga olá mapurigá Nijé 'yemi nimí nuleli! ¡Wakiná tosí echi towí! ¹⁸A'lí Jesusi we yóniga ra'íchali echi wabé chati riablo aliwala mapu echo'ná pachana towírali asali. Echalí echi wabé chati aliwá we yáati ku machínali echo'ná pachana towírali jonsa. A'lí echi towí ma ne galá ku sa'wárami níili echalí jonsa.

¹⁹A'lí echi jaré mapu Jesusi binérali echo'ná sili Binói yuwa. A'lí pe waná togá, aboni jeanigá rukueli: ¿Churékula tamujé ketasi oméralli ku machí paya echi wabé chati riablo aliwala? ²⁰A'lí Jesusi jeaneli: Yémítamo ketasi oméralli mapujítitamo ketasi 'me galá bichí. A'lí ne bichíwali 'yemi nimí ané mapu átamo pe táa mapu chulú echi táa mostasa anilíwami rakala niráa bichísagá, a'lí átamo jeansa je'ná ripabé chulichi: ¡Echo'ná waná simigá jena'í jonsa! Echalí ne bichíwali galá simírama. A'lí bichétamo ne bichíwali echirigá galá omérabo ne suwaba namuti olayá. ²¹A'lí Jesusi ayénachó jeanili: Je'ná jeyiri chati riablo aliwala chopi ku machínama mapalítamo we tánabo Riosi, ayénachó mapalítamo wi'llibé niráa ketasi kopoá ko'wáami, mapurigáamo chopi echirigá Riosi yuwa táníga ra'ichabo.

**Jesusi auchecho siné bachá niráa nawesa jeanigá mapurigá Binói mi'lirúami
níima riwéali**

(Mr. 9:30-32; Lk. 9:43-45)

²² A'lí pe minana auchécho ku muchuwachi aboni echo'ná Galiléachi anilwachi kawírali, echalí Jesusi jeaneli: Nijeni wirárami níili mapurigá Ku'wíriami niráa, chopi Nijeni arígá we njírami níima mapurigá echi jaré pagótami tamí risúu olama suwaba mapu ikí aboni nakí olánala. ²³ A'lí aboni tamí mi'limea, chopi baikiyá chi'lígá auchécho ku owínamani. A'lí echi jaré mapu Jesusi binérali ne wabé simírami o'mónali.

Echi wenomí pachá echi rochí rinírachi atíami

²⁴ A'lí mapalí aboni ku síli echo'ná Kapernaúmachi anilwachi walúlachi, echalí jaré rijói nipáami echi Pegro yuwa sili, a'llí jeaneli: Echi 'yemi binériami, ¿kecha natétama echi okuá namúti wenomí mapu echi walubé Juríosí ri'obáwala natétarawami ju? ²⁵ A'lí echi Pegro jeaneli: Ayena ne bichíwali natétama. A'lí biché mapalí echi Pegro auchécho ku bakili echo'ná kalírali, echalí Jesusi bachá ra'íchaga jeaneli: Simoni, ¿churigami mayé mujé? Echi jaré o'wéala jena'í wichimóbachi nuláami, ¿chigá nipama aboni? ¿Acha nipama echi jaré aboni tanala? ¿Kecha nipama echi auché jaré isena keremá? ²⁶ A'lí biché echi Pegro ku njéwaga jeaneli: Aboni chopi nipama echi auché jaré isena. A'lí Jesusi jeaneli: ¡Alí echi jaré aboni kúchuwala ketasi natétama! ²⁷ Chopi mapurigá aboni ketasi tamujé tamí yónama, simigá mujé echo'ná walú ba'wírali mapurigami echo'ná achama bilé binolí, echalí chapigá echi rochí mápumi bachá chiwama, a'llí rinátaga riwiméami bilé namuti wenomí mapu echijiti káraka natétarami níima. Chapigá natétami aboni, Nijé jiti, ayénachó mujé binói jiti.

¿Chigá ne walula níima?

(Mr. 9:33-37; Lk. 9:46-48)

18 Echalí rawé echo'ná sili jaré mapu Jesusi binérali. A'lí aboni jeanigá rukueli: ¿Chigá ne walula níima, echi jaré yuwa mapu Riosi galá nulé? ² A'lí Jesusi bayegá bilé ta towí, echo'ná nasipa aboni yuwa achali. ³ A'lí Jesusi jeaneli: Ne bichíwali 'yemi nimí ané: Átamo ketasi ku rowísaga Riosi yuwa, ayénachó átamo ketasi galá bichíisagá mapurigá echi jaré kúuchi galá bichíi, echalí 'yémítamo ketasi galá njéwami níibo mapurigá Riosi 'yemi mi nulé. ⁴ Echijiti mapuyíripi tarapé níliami níisagá mapurigá je'ná taa towí tarapé níliami ju, échiko ne walula ju si'néami echi auché jaré yuwa mapu ikí Riosi galá nulé. ⁵ A'lí mapuyíripi galeko bilé je'ná jeyili taa towí mapujiti binói galá tamí bichíi, échiko ayénachó galá tamí galé.

¡Ketasi chati olari auché jaré!

(Mr. 9:42-48; Lk. 17:1-2)

⁶ Echalí Jesusi ayénachó jeaneli: Mapuyíripi rijói we chati olárasagá bilé taa mapu tamí bichíi, échiko ne wabé simírami chati olá. Ne bachá niráa ne galá nísimili echiyiri rijói waminá walú ba'wírali pátami níisa, echo'ná binói kutálachi bilé matá jiti bulugá, mapurigá échiko ketasi echirigá chati olárama echi bilé taa mapu tamí bichíi. ⁷ Jena'í wichimóbachi piréami wabé chati risúu olárami ju mapujiti we

nirú jaré mapu wabé chati olíriami ju echí auché jare. Sinibí nirúlama jaré mapu echirigá chati olíriami níima, chopi si'néami mapu ikí echirigá chati olírasagá auché jaré, jabóniko pe minánomí arigá ne wabé simírami kástigo 'yárami níma! ⁸ Wabé galabé níimili mujé ke akánami niráa níisagá, sikamochi niráa, kasimochi niráa kéremá, ami arigá pe waminánomí ku bitélasa echo'ná ripá riwigachi. Chopi ketasi chirigá galá níimili mujé arigá okuá sikeka, ayénachó okuá roneka, waminá pátami níisa echo'ná ri'lé riáblochi mapo'ná walú rajá. Echijiti a mujé sikala mi chati olárasagá, mujé ronola kéremá, ¡waminá ripuná! ⁹ Wabé galabé níimili mujé pe billepi buséami níisagá, ami arigá pe waminánomí ku bitélasa echo'ná ripá riwigachi. Chopi ketasi chírigá galá níimili mujé arigá okuá buseka, waminá pátami níisa echo'ná ri'lé riáblochi mapo'ná walú rajá. Echijiti a mujé busila mi chati olárasagá, ¡waminá machí pa!

Echi bo'wá wikáami

(Lk. 15:3-7)

¹⁰ ¡Galá 'natas! Ketasi kichisi nibilé je'ná jaré kúuchi, mapujiti Nijeni 'yemi mi ané mapu echí jaré o'wéala Riosi kapitánawala ne galá nisé je'ná jaré kúuchi. A'lí echí jaré Riosi kapitánawala sinibí echo'ná bacháami keni Onó yuwa muchuwi, mapu echo'ná ripá riwigachi atí. ¹¹ Nijeni wilárami níili mapurigá Ku'wíriami niráa, a'lí Nijeni nawali jena'í wichimóbachi mapurigani ku riwisáa, ku'wírama echí jaré mapu ma 'wikáami níili.

¹² ¿Churigátamo mayé? A bilé rijói bukélasagá bilé kiento bo'wá, a'lí a bilé bo'wá waminá wikasa, ¿kecha echo'ná kawichí ariwema echí auché jaré kimakoisa makói, miná kimakói, mapuyénasí binói ámiya siméa echí bilé wikáami? ¹³ Ne bichíwali Nijeni 'yemi mi ané mapu a ku riwisáagá echí bilé mapu wikáami níili, echí rijói waminabi ne wabé simírami kanílama echí bilé bo'wá jiti, ketasi mapurigá binói kanílama echí auché jaré kimakoisa makói miná kimakói jiti mapu ketasi 'wikári. ¹⁴ Echirigá achigórígá echí 'yemi Onolá echo'ná ripá riwigachi atíami ketasi nakí mapu nibilé je'ná jaré kúuchi miná 'wikama.

Galá ku wikawasi echí auché jaré ritématami

(Lk. 17:3)

¹⁵ Echijiti a mujé rijimala mi chati ologá sayérasagá, echo'ná binói yuwa simigá, mapurigami oyéraga ra'íchama binói mapalí 'yemi okuánika awínali muchuwi. A'lí a binói galá kilí siwega kipúsagá, mami galá ku katéwali mujé rijimala yuwa. ¹⁶ Chopi siné káachi a binói ketasi nakisáagá ku katiwánala mi yuwa, echalí mi yuwa togá auché bilé rijimala, auché okuá keremá mapurigá suwaba ne galá machirúami níima okuá testigo jiti, bikiyá testigo jiti kéremá. ¹⁷ Chopi a echí rijimá ketasi kilí siwega kipúsagá echí auché jaré, echalí galá ku ruyé suwaba ne si'néami echí jaré napawika bichíyami. A'lí a binói ketasi nakisáagá kilí siwega kipúnala si'néami echí auché jaré napawika bichíyami, echalí miná ariwé echí rijimá, mapurigá ke bichíyami niráa, mapurigá wenomí napabúami kéremá.

¹⁸ Ne bichíwali 'yemi nimí ané mapu ne si'néami mapu ikí ketasi bichíima mapurigátamo binérabo aboni jena'í wichimóbachi, abóni ketasi ku'wíratami níima echo'ná ripá riwigachi, chopi si'néami mapu ikí galá bichíima mapurigátamo binérabo aboni jena'í wichimóbachi, abóni galá ku'wíratami níima echo'ná

ripá riwigachi.¹⁹ Auchecho siné Nijeni 'yemi mi ané mapu a okuá 'yemi jena'í wichimóbachí muchúami sinepi niráa, chopi tánsagá Riosi mapurigá 'yémítamo nakí mapu Riosi 'yemi mi olíima, echalí Riosi, echo'ná ripá riwigachi atíami, ne bichíwali echirigá olama achigórigá mapurigá 'yemi tánali. ¡Echi Walubela Riosi Nijé Onolá!²⁰ Mapujiti mapo'ná okuá bichíyami napawika muchuwi mapujiti aboni galá tamí bichíi, ayénachó mapo'ná bikiyá napawika muchuwi keremá, echo'ná Nijeni ayénachó nasipa aboni yuwa asimea.²¹ A'lí echi Pegro echo'ná Jesusi yuwa nawagá, jeanigá rukueli: Walubela, ¿chu kisabi arigá 'wéralli ju mapu nijeni ku wikawama echi keni rijimá mapalí binói abijí waminabi tamí chati ologá sayérasa? ¿Áchani echirigá ku wikáwama kicháosa chokéami?²² A'lí Jesusi jeaneli: Ketásini chopi mi ané mápumi ku wikawi kichaosa siné, chopi Nijeni mi ané mápumi ku wikawama mapuyénasí kicháosa niráa kicháosa makói chokéami.

Echi pioni mapu ketasi nakili ku wikawánala auche jaré

²³ Echijiti mapalí Riosi galá nulé echi jaré pagótami, mapuyiri ju bilé rijói walula silíami, echi mapu nipámorúli echi jaré binói piónawala.²⁴ A'lí mapalí echi walula silíami chótali echirigá nipásya, echalí bilé rijói echo'ná párami níili mapu makói mili wabé natéami namuti wenomí wikali.²⁵ Chopi mapalí je'ná rijói ketasi omérali ku natétiya, echalí echi walula silíami nulali ralinéanala echi rijói, binói upila ayénachó, binói kúchuwala ayénachó, suwaba binói níwala ayénachó, mapurigá si'néami aboni wabé nochama mapurigá pioni ne sinibí niráa. A'lí echi silíami echirigá nulali ralinéanala, mapurigá echirigá galá ku natétarami níima suwaba mapu ikí echi rijói wikali.²⁶ A'lí echi rijói bacháami echi walula silíami yuwa, wéemi raweka, chokoba wilíbali. A'lí waminabi walubela anega jeaneli: ¡Tamí natimá! ¡Pe téeli buwé! ¡Nijé nimí ku natétama ne suwaba!²⁷ A'lí echi walula silíami wabé natimali echi rijói. A'lí ku su'lánaga, ne suwaba ku wikáwali mapu ikí wikali.²⁸ Chopi mapalí echi bilé rijói ku simili, binói we yáati riwali auché bilé rijói mapu binói apanérawala níili, echi mapu wikáami níili pe okuá peso. A'lí kotochí kusébana chapili, jeanigá: ¡Tamí ku nateti mápumi tamí wiké!²⁹ Echalí echi jubá rijói echo'ná bacháami, wéemi raweka, chokoba wilíbali echi bachá rijói yuwa. A'lí ne wabé risúu anigá jeaneli: ¡Tamí jiti natimaga buwé! Nijeni mi natétama ne suwaba.³⁰ Chopi echi bachá rijói ketasi nakili. A'lí ku simigá, binói pachá bachali echi jubá rijói echo'ná kumurachi, mapuyénasí ne suwaba ku natétama mapu ikí binói wikali.³¹ A'lí echi auché jaré wikabé rijói mapu ayénachó apanérawala níili echi okuá rijói yuwa, aboni ma riwisáa suwaba mapurigá ikili, ne wabé siweli. A'lí biché aboni ku simíbaga ruyeli echi walula silíami suwaba mapurigá ikili.³² A'lí echi walula silíami bayeli echi rijói. A'lí jeaneli: Mujé chati olámi rijói, nijeni mi ku wikáwali suwaba mapu ikí mujemi tamí wikeli, mapujiti mujé tamí risúu anigá tánali.³³ Wabé galá níimili mujé ayénachó galá natimasa mujé apanérawala, mapurigá nijé ayénachó nimí wabé natimali.³⁴ Echalí echi walula silíami ne wabé yoga nijali echi rijói echo'ná echi komisario yuwa, mapurigá echo'ná pachá kumurachi bachárami níima mapuyénasí ne suwaba ku natétasa mapu ikí binói wikali.³⁵ Echalí Jesusi ayénachó jeaneli: Nijé Onolá, echo'ná ripá riwigachi bitéami, echirigá achigórigá olama 'yemi mi yuwa, a 'yémítamo ketasi ku wikawásagá ne sulachí niráa ibili 'yemi ritémawala mapu ikí 'yemi mi chati ologá sayérasa.

Jesusi jeanigá binérali mapu echí jaré niwíami ketasi risensia ju ku rojuana

(Mr. 10:1-12; Lk. 16:18)

19 A'lí mapalí Jesusi sunili je'ná jerigá nawésiya echí pagótami, echalí Binói ku simili echo'ná Galiléachi anilíwachi kawírali jonsa. A'lí Binói ku nawali echo'ná Juréachi anilíwachi kawírali, echo'ná bakochi Joránachi anilíwachi bo'ónala. ²A'lí ne wikabé pagótami jubáami najátali Jesusi yuwa. A'lí Binói echo'ná galá ku sa'wali si'néami mapu ikí nayúkami níili.

³Echalí echo'ná Jesusi yuwa sili echí jaré Bariseo anilíwami binériami, echí mapu we wi'nijínalaga jeanigá rukueli: ¿Acha risénsia ju bilé rijói ariwesa kepu upí, chuwé bilé namuti yiri jiti? ⁴A'lí Jesusi ku nijéwaga jeaneli: ¿Kechátamo siné 'nánari echo'ná Riosi Ra'íchla oselíwalachi, mapurigá osirúami w mapu ki'yá chokichí mapalí Riosi niwali echí pagótami, mapu Binói niwali bilé rijói, miná bilé mukí yuwa? ⁵A'lí Riosi ayénachó jeaneli: Echijiti bilé rijói ariwema binói onolá, binói iyela ayénachó, a'lí echí rijói upema kepu upí. A'lí echalí jonsa okuánika ne bilepi sapá chopi níima. ⁶Echirigá aboni ma ketasi okuá niráa ju, chopi birepi sapá ju. Echijiti 'yemi pagótami ketasi ku rojuasi echí jaré mapu Riosi ma napabuli. ⁷A'lí aboni jeanigá rukueli: ¿Churékula biché osogá nulali echí Moisesi máputa bilé oselí ku rojuákowami osibóa, a'lí risensia ju ku ariwema. ⁸A'lí Jesusi jeaneli: Echi Moisesi 'yemi mi risensia 'yali ku ariwénala 'yemi jubila chopi mapujítitamo wabé biwárami suléami ju; chopi ki'yá chokichí jonsa ketasi echirigá níili. ⁹A'lí Nijeni 'yemi mi ané mapuyíripi ariweko binói upila, a'lí auché bilé upesa, échiko wabé chati olá mapurigá bilé si'nú mukí yuwa kochíami. A'lí mapuyíripi upesa echí mukí ariwérämi, ayénachó wabé chati olá mapurigá si'nú mukí yuwa kochíami. Chopi mapalí machirúami ju mapu echí mukí kochili si'nú rijói yuwa, echalí risensia ju miná ariwema.

¹⁰A'lí echí jaré mapu Jesusi binérali jeaneli: Echirigá níisagá mapalí bilé rijói upé bilé mukí, ketasi galá níima upesa. ¹¹A'lí Jesusi jeaneli: Jaré ketasi omero nijéwiya je'ná mapurigátamo anili, chopi mapuyíripi Riosi echirigá binérama, abóni echirigá olama. ¹²Mapujiti jaré rijói ketasi jubé chopi mapujiti aboni ketasi nakí jubénala. Auché jaré ketasi jubé mapujiti aboni echirigá niwárami níili auché jaré pagótami jiti. Auché jaré rijói ketasi jubé mapujiti aboni chopi nijéwaga olánali mapurigá Riosi nulé aboni. Ne si'néami mapu ikí omero je'ná jerigá nijéwiya, galá níima aboni echirigá olasa.

Jesusi galabéraga aneli echí jaré kúuchi

(Mr. 10:13-16; Lk. 18:15-17)

¹³Echalí echo'ná Jesusi yuwa pálati jaré kúuchi mapurigá Binói echo'ná moba aboni mo'ólachi nochasa Riosi yuwa ra'íchaga támama mapurigá Riosi ku'wírama aboni. Chopi echí jaré mapu Jesusi binérali we ra'ámaga aneli echí jaré mapu pali echí kúuchi, mapu aboni ketasi echirigá kumema echí Binói. ¹⁴Chopi Jesusi jeaneli: Ariwesi mapurigá echí jaré kúuchi tamí yuwa simea. A'lí ketasi anesi mapu ketasi risensia ju mapu aboni tamí yuwa simea, mapujiti Riosi galá nulé si'néami echiyiri bichíyami. ¹⁵A'lí Jesusi ma echirigá nochasa aboni, a'lí biché Binói echo'ná jonsa ku simili.

Echi rijói wikabé namuti níwami

(Mr. 10:17-31; Lk. 18:18-30)

¹⁶ A'lí bilé rijói echo'ná Jesusi yuwa nawagá janeli: Ne galabé Binériami, ¿piri galabé namuti olámani mapurigá nijeni echijiti sinibí niráa bitélama? ¹⁷ A'lí Jesusi ku nijéwaga janeli: ¿Churékulami tamí Galabé ané? Mujemi machí mapu chopi Riosi bi'nélipi galabé ju. Chopi ami nakisáagá mápumi sinibí bitélama, ne galá nijewi Riosi nulalila. ¹⁸ A'lí echi rijói ku nijéwaga janeli: ¿Chu yiri? A'lí Jesusi janeli: Ketasi mi'yá auché jaré pagótami. Ketasi si'nú mukí yuwa kochí. Ketasi chigó. Ketasi ikalega ra'ichá. ¹⁹ Galá o'wiké kemi onó, echi kemi iyé ayénachó. Ne wabé galé echi auché jaré pagótami echo'ná muripi mujé yuwa piréami, achigórigá mupurigami galé mujé binói niráa. ²⁰ A'lí echi rijói ku nijéwaga janeli: Nijeni sinibí suwaba echirigá galá nijéwaga olali, chabé chokichí jonsa mapalini táchá níili. ¿Piri namuti abijí 'wéralli ju mapurigani olama? ²¹ A'lí Jesusi janeli: Ami nakisáagá mápumi ne galabé níima, ku simigá ralinéami ne suwaba mujé níwala namuti. A'lí 'yami echi natigala echi jaré tisúwati. Echalimi wabé níwami níima echo'ná ripá riwigachi. A'lí wakiná tamí yuwa simí, tamí najató. ²² A'lí echi rijói je'ná jerigá námsa, ne wabé o'móniga ku simiri, mapujiti binói wikabé namuti níwami níili.

²³ A'lí biché Jesusi janeli echi jaré mapu Binói binérali: ¡Ne bichíwali Nijeni 'yemi mi ané mapu ne wabé nójchali ju mapurigá bilé rijói wikabé namuti níwami galá nijéwaga olama mapurigá Riosi nulá! ²⁴ Nijeni 'yemi mi auchécho ané mapu ketasi 'me nójchali ologá simíramiré bilé walú namuti kameyo anilíwami echo'ná biléana wichá iwárali. Chopi ne wabé simírami nójchali ju mapurigá bilé rijói wikabé namuti níwami galá nijéwaga olama mapurigá Riosi nulá. ²⁵ Echalí echi jaré mapu Jesusi binérali, je'ná jerigá namsa, chopi ne wabé 'náta muchili. A'lí aboni jeanigá rukueli: ¿Chigá biché galá ku'wílatami níima? ²⁶ A'lí Jesusi galá 'néniga echi jaré aboni, echalí Binói janeli: Echi jaré pagótami jena'í wichimóbachi piréami ketasi omero ku'wíriya echi auché jaré wabé níwami pagótami mapurigá aboni galá nijéwaga olama mapurigá Riosi nulé aboni olánala. Chopi Riosi Binói ne wabé simírami omérami ju ku'wíriya echi jaré wabé níwami pagótami mapurigá aboni galá omérama echirigá olayá, mapujiti Riosi ne suwaba namuti galá omérami ju.

²⁷ A'lí echi Pegro ku nijéwaga janeli: Binériami, tamujeta ne suwába ariweli. A'lí bicheta mi yuwa najátali. ¿Pírita níwabo waminana rawé? ²⁸ A'lí Jesusi janeli: Ne bichíwali Nijé 'yemi nimí ané mapu Nijeni wilárami níili mapurigá Ku'wíriami niráa. A'lí waminana rawé mapalí ne suwaba namuti ku bukulíwami niwárami níima, mapalí Nijeni asibama echo'ná Nijé níwala walubela ripabé asibálawachi, echalí 'yémítamo ayénachó muchíbabu echo'na makói miná okuá ripabé muchíbabu mapurigátamo justicia olabo echi jaré makói miná okuá rojáami echi jaré Isaeli anilíwami pagótami. ²⁹ Echalí Jesusi ayénachó janeli: Jaré mapu tamí bichíko, arigá ariweli kepu kalí mapujiti aboni wabé tamí galeli. Auché jaré ariweli kepu ritémawa mapujiti aboni wabé tamí galeli. Auché jaré echijiti ariweli kepu 'wénawa ayénachó. Auché jaré echijiti ariweli kepu jubí ayénachó. Auché jaré echijiti ariweli kepu kúchuwa ayénachó. Auché jaré echijiti ariweli kepu kawíwala ayénachó. Echalí Jesusi ayénachó waminabi janeli: Mapuyíripi echirigá olako mapujiti binói tamí wabé galé, échiko ku narema bilé kiento chocéami niráa suwaba, ayénachó échiko 'yárami níima mapurigá binói ne sinibí niráa bitélama. ³⁰ Chopi wikabé mapu jipi rawé

ne bachá o'wéala juko, abóniko ne jubá tabéala níima echalí rawé. A'lí biché wikabé mapu jipi rawé ne jubá tabéala juko, abóniko ne bachá o'wéala níima echalí rawé.

Jesusi binérali jaré rijói nóchami jiti rugá

20 A'lí Jesusi ayénachó jeaneli: Mapalí Riosi galá nulé echi pagótami, mapuyiri ju mapalí bilé rijói uva icháami siné rawé bi'yá simili jaré nóchami ásiya mapurigá aboni nocháma echi uva anilíwami rakala napabuya, echo'ná mapo'ná ichirúami níili wikabé echi jaré uva anilíwami rakéami namuti. ²Echalí echi rijói ma katéwaga aboni yuwa makói peso natétama ruyesa siné rawé, a'lí júuli nochánala echo'ná binói kawíwalachi. ³A'lí ma ratabáachi echi rijói ku simigá riwali auché jaré echo'ná walúlachi nasípasí ke nóchaga, wepi muchúami. ⁴A'lí jeaneli: Ayénachó simíbaga nochábasi 'yemi echo'ná nijé kawíwalachi mapo'ná wáami ju echi uva anilíwami rakala. A'lí nijeni 'yemi mi galá natétama. A'lí aboni ayénachó nochábiya simíbali. ⁵A'lí echi rijói anchecho ku simili ne nasipa rawé, ayénachó anchecho ku simili ma kisuwachi, a'lí echalí achigórigá auché jaré nuleli nochánala. ⁶A'lí pe alíwachi ke 'me ayó ku buyáachi echi jaré nóchami echi rijói ayénachó riwali auché jaré ketasi nóchaga muchúami. A'lí jeaneli: ¿Churékulátamo wepi muchuwi ke nóchaga, bi'yá jonsa? ⁷A'lí aboni jeaneli: Jena'ita muchuwi mapujiti ke wesi tamujé tamí nuleli nochánala. A'lí echi rijói jeaneli: Ayénachó nochábiya simíbaga 'yemi echo'ná nijé kawíwalachi, a'lí bichétamo galá natétarami níibo.

⁸A'lí echalí ma alíwachi echi rijói uva níwami jeaneli echi bilé nuláami binói yuwa nóchami: Ku bayegá echi jaré nóchami, ma nateti echi nóchala. Ne bachá nateti echi jaré mapu ne jubá chótali nochasia. A'lí ne jubá nateti echi jaré mapu ne bachá chótali nochasia. ⁹A'lí ma sisáa echi jaré mapu ma alíwachi chótali, mapalí ke 'me ayó buyama riwéali echi nóchami, a'lí ibili niráa makói peso natétalati. ¹⁰A'lí ayénachó sisáa echi jaré mapu ne bachá chótali nochásia, a'lí aboni mayeli mapu pe waminabi wikabé simírami natétarami níima riwéali. Chopi aboni ayénachó ibili niráa chopi makói peso natétalati. ¹¹A'lí chapigá echi natétala aboni sayérga ra'íchali echi rijói uva icháami, ¹²jeanigá: Je'ná jaré mapu ne jubá chótali, chopi pe téeli nóchali, a'lí bichemi achigórigá natétali mapurigami tamujé tamí natétali. Chopi tamujé, bi'yá jonsa, echalí wabé ratáachi ayénachó, ne alíwachi yénasí, ne wabé simírami nóchali. ¹³A'lí echi rijói uva icháami ku nijéwaga jeaneli bilé aboni: Apanero, nijeni ketasi mi 'yékaka olá. Mujemi aligá tamí aneli mápumi nochama riwéali makói peso niráa siné rawé. ¹⁴Chapigá mujé níwala, ku simigá. Chopi nijeni natétanali je'ná mapu pe téeli nóchali achigórigá mapurigá nijeni mi natétali. ¹⁵Nijé chopi binói risénsia ju mapurigá nijeni olama mapurigá nijé binói nakí, echi nijé níwala wenomí jiti. ¡Ketasi galá ju mapu mujé korúkami níima, chopi mapujiti nijé binói galabé oláami ju! ¹⁶A'lí biché Jesusi ayénachó jeaneli: Echirigá níima mapu echi jaré mapu jipi rawé ne bachá o'wéala juko, abóniko ne jubá tabéala níima echalí rawé, mapujiti ne wikabé bayérada ju, chopi pée okuáa chapirúami ju.

Jesusi anchecho siné bachá niráa nawésali mapurigá Binói mi'lirúami níima riwéali

(Mr. 10:32-34; Lk. 18:31-34)

¹⁷A'lí mapalí Jesusi moyénaga inárali echo'ná Jerusalémachi simiyá, echalí echo'ná buwichí Binói waná bayérada echi jaré makói miná okuá mapu Binói

binérali, a'lí jeaneli: ¹⁸Tamí galá kipusi. Riosi tamí wilali mapurigá Ku'wíriami niráa. Chopi mata moyena echo'ná Jerusalémachi simiba. Echo'ná Nijeni echi jaré o'wéala sacerdote, echi jaré nulalíwami binériali 'yárami níímani. A'lí aboni we tamí wi'nijiga mi'linálama. ¹⁹A'lí echo'ná isena pagótamichi níímani, mapurigá aboni tamí mi'limea. A'lí aboni we tamí tiníchama, ayénachó tamí ne wabé wipisoma, a'lí aboni tamí michóniga mi'limea echo'ná kúrsichi. Chopi bikiyá chi'rigá, auchécho ku owínamani.

Echi Sibireo upila tánali Jesusi

(Mr. 10:35-45)

²⁰A'lí echo'ná Jesusi yuwa nawali echi Sibireo kúchuwala iyela, echi okuá binói kúchuwala yuwa. A'lí echo'ná Jesusi yuwa bacháami wéemi raweka chokoba wilfbali. A'lí wabé Walubela anega tánali mapurigá bilé namuti olárami nííma. ²¹Echalí Jesusi jeanigá rukueli: ¿Churigami nakí mapurigá Nijé nímí olíima? A'lí echi mukí jeaneli: Tamí 'ya mapurigá je'ná okuá nijé kúchuwala mi yuwa mulubé a'nagupi muchíbama mapurigá pe kuchípala nuláami niráa, echalí mapalí Mujemi ne Walubela niráa nulama. Tamí risensia 'ya mapurigá bilé echo'ná watonachi asimea, ayénachó mapurigá echi auché bilé echo'ná o'winachi asimea. ²²A'lí Jesusi ku níjewaga jeaneli: 'Yémitamo tarapé machí mapu píritamo tamí tani. ¿Áchatamo anáchaga omérabo mapurigá Nijeni anachama mapalini wabé simírami risúu olárami nííma? ¿Áchatamo anáchaga omérabo mapurigá Nijeni anachama mapalini mi'lirúami nííma? A'lí aboni jeaneli: Ayénata omérabo. ²³A'lí Jesusi jeaneli: Ne bichíwali arigá 'wérali ju mapu 'yémitamo achigórigá anachabo mapurigá Nijeni anachama. Ayénachó 'wérali ju mapurigátamo ko'wirúami níibo, achigorigá mapurigá Nijé Binói mi'lirúami nííma. Chopi Nijé ketasi risensia ju mápuni 'yemi mi 'yama máputamo muchibo echo'ná keni watonachi, echo'ná keni o'winachi kéremá. Chopi risensia ju mapu echo'ná muchima echi jaré mapu Kení Onó, aboni jiti echo'ná a'láraka 'yánali mapu echo'ná muchima.

²⁴A'lí mapalí echi auché jaré makói binéami je'ná jerigá námali, echalí aboni ne wabé na'awali echi okuá najirémami sayéraga. ²⁵A'lí Jesusi bayegá si'néami echi jaré aboni, a'lí jeaneli: 'Yémitamo galá machí mapu echi jaré isena pagótami o'wéalawala ne wabé 'wérali nulé echi jaré isena pagótami. Ayénachótamo machí mapu echi jaré aboni silínawala ne wabé 'wérali olá aboni yuwa. ²⁶Chopi 'yemi yuwa ketasi echirigá nííma, mapujiti mapuyíripi 'yemi nakisáagá mapu ne walula nííma si'néami echi auché jaré 'yemi yuwa, échiko mapurigá si'néami 'yemi piónawala nílaga. ²⁷Ayénachó echi mapu ne bi'neli ne walula níílanaliko si'néami echi auché jaré 'yemi yuwa, échiko wepi nigúurami nílaga, echi auché jaré 'yemi yuwa. ²⁸Nijeni wilárami níili mapurigá Ku'wíriami niráa. Nijeni ketasi nawali chopi mapurigani ku'wíratami nííma. Chopi Nijeni ku'wírimiya nawali echi auché jaré pagótami. Ayénachó mukumea nawálini, mapurigani mukumea echi auché jaré pagótami chati olarila jiti, mapurigani echirigá ku natétama wikabé pagótami chati olalila jiti.

Jesusi ku sa'wali okuá rijói mapu ke machíliami níili

(Mr. 10:46-52; Lk. 18:35-43)

²⁹A'lí mapalí aboni ku simíbali echo'ná Jerikochi anilíwachi walúlachi jonsa, echalí ne wikabé pagótami jubáami najáltali Jesusi yuwa. ³⁰A'lí echo'ná mulubé

buwichí muchili okuá rijói ke machíliami. A'lí mapalí aboni mayeli mapu echí Jesusi echo'ná simíraga inárali, echalí aboni o'weli ra'íchaga jeaneli: Walubela Rabiri Ranala, ¡tamujé tamí natimá! ³¹ A'lí echí auché jaré pagótami ra'ámaga aneli mapu ketasi echirigá o'weli ra'ichama. Chopi aboni waminabi wabé o'weli ra'íchaga jeaneli: ¡Mujé Walubela Rabiri Ranala, tamujé tamí wabé natimá! ³² Echalí Jesusi echo'ná wiríbaga, bayégá echí okuá ke 'machíliami, a'lí jeanigá rukueli: ¿Churigátamo nakí mapurigani 'yemi mi olíima? ³³ A'lí aboni jeaneli: ¡Walubela, tamujeta wabé nakí mapurigata ku machíliami niwárami níibo! ³⁴ A'lí Jesusi wabé natimaga nocháli aboni busílachi. Echalí we yáati aboni galá ku machíliami níili. A'lí aboni ayénachó jubáami najátaga simíbali Jesusi yuwa.

Jesusi nawali echo'ná Jerusalémachi

(Mr. 11:1-11; Lk. 19:28-40; Jn. 12:12-19)

21 A'lí mapalí echí wikabé pagótami mulubéanali echo'ná Jerusalémachi, mapalí aboni sili echo'ná Betajechi anilíwachi, mapo'ná mulipi ju echo'ná ripá rabó Olíbachi anilíwachi, echalí Jesusi okuá júuli echí jaré mapu Binói binérali. ² A'lí Binói jeaneli: Miná bacháami, echo'ná rijówachi simíbaga. Echo'ná 'yémitamo we yáa riwiboa bilé bulito ranéami, wíira chukúami. Ayénachótamo riwiboa echí bulito ranala, ma walú. ¡Ku botánaga, wakiná tosí okuánika! ³ A'lí a jaré echo'ná muchúami ketasi nakisáagá, echalí 'yémitamo jeanebo: Echi Walubela Jesusi wabé newalé je'ná bulito. A'lí aboni we yáa nijima. ⁴ A'lí suwaba je'ná jerigá ne bichíwali ikili mapurigá echí walula Riosi jiti nawésami bachá niráa anili mapu ikimea riwéali, mapurigá je'ná jerigá osirúami ju echo'ná Riosi Ra'íchala osilíwalachi:

⁵ Jeanesi echo'ná Jerusalémachi piréami pagótami:

¡Galá 'nigá muchisi! Echi 'yemi Walubélawala 'yemi mi yuwa nawama, echí mapu ketásirapé chibisífami níima.

Echi Binói we asema bilé bulito, echí mapu auché bilé galá binéami bulito ranala níima.

⁶ A'lí echí okuá binéami echo'ná simasa olali mapurigá Jesusi nuleli. ⁷ A'lí aboni echo'ná pali echí bulito mukila, echí ranala ayénachó. Echalí aboni galá pérali echí bulito, aboni kimala jiti. Echalí Jesusi galá aseli echí bulito ranala ma walú. ⁸ A'lí echí jaré wikabé pagótami pérsali aboni kimala echo'ná buwichí mapo'ná Jesusi simírama riwéali. Ayénachó jaré aboni echí chaliwá sawéami ripúnaga, ayénachó echo'ná buwichí pérsali. ⁹ Echalí echí jaré wikabé pagótami mapu bacháami sírali, ayénachó echí auché jaré wikabé mapu jubáami sírali, si'néami o'weli ra'íchaga jeaneli: ¡Tamujeta nakí mapu Riosi mi ku'wírama, Mujé mápumi Rabiri Ranala ju. Echi Walubela Riosi mapu mi júuli jena'í wíchimóbachi, Binói mi we galá 'ya suwaba echí wabé galabéala. ¡Tamujeta nakí mapu echí Ripá Riwigachi Atíami Riosi mi galá ku'wírama!

¹⁰ Echalí mapalí Jesusi ma nawali echo'ná Jerusalémachi, ne si'néami echo'ná walúlachi piréami ne wabé cha'igá napawika, buchuwí anigá ra'íchali. Ayénachó a'nagupi jeanigá rukueli: ¿Chigá ju je'ná rijói? ¹¹ A'lí echí jaré pagótami Jesusi yuwa 'yénami ku nijéwaga jeaneli: ¡Je'ná ju echí Jesusi, echo'ná Nasarétachi, echo'ná Galiléachi anilíwachi kawírali bitéami, echí mapu walubela Riosi jiti nawésami ju!

Jesusi ku machí a'wali echí jaré ralinéami echo'ná Riosi ri'obáwalachi jonsa

(*Mr. 11:15-19; Lk. 19:45-48; Jn. 2:13-22*)

¹² Echalí Jesusi bakili echo'ná walubé ri'obachi, Riosi ri'obáwalachi. A'lí Binói ku machí a'wali echo'ná jonsa si'néami echí jaré pagótami mapu echo'ná pachá ralinéaga nóchami níli, ayénachó machí a'wali si'néami echí auché jaré echo'ná raláami. A'lí Binói miná na'mínali echí jaré jubechi mapo'ná auché jaré wenomí nakulíwiya muchili. Ayénachó na'mínali echí jubechi mapo'ná auché jaré echí makawi ralinea muchili. ¹³ Echalí Jesusi jeaneli: Echo'ná Riosi Ra'ichala oseríwarachi je'ná jerigá osirúami ju: Nijé kalíla, Riosi yuwa ra'ichálawami kalí anérámi níima. Chopi 'yémitamo ma niwali Riosi kalila mapurigá echí jaré chigórami risochíwala niráa.

¹⁴ A'lí echo'ná walubé ri'obachi machímana Jesusi yuwa sili jaré ke 'machíiami, auché jaré ke a'káanami ayénachó. Echalí Jesusi galá ku sa'wali si'néami aboni.

¹⁵ Chopi echí jaré o'wéala sacerdote, ayénachó echí auché jaré nulalíwami binériami ne wabé na'awali mapalí aboni riwali echí Jesusi wikabé namuti wabé omériga oláachi, mapurigá ke wesi auché jaré pagótami omero olayá. Ayénachó aboni na'láwali mapalí aboni námali echí jaré kíruwi echo'ná ri'obachi jeaníami: ¡Tamuje tamí ku'wiro, Mujé Rabiri Ranala! ¹⁶ Echalí aboni jeaneli echí Jesusi: ¿Kéchami nami mapurigá je'ná jaré kíruwi aní? A'lí Jesusi jeanili: Ayena. ¿Kéchatamo siné 'nénali 'yemi mapurigá je'ná jerigá osirúami ju echo'ná Riosi Ra'ichala oselíwalachi:

Echi jaré kúuchi mi walubélaga anema, echí auché jaré kúuchi chi'íami ayénachó?

¹⁷ A'lí Jesusi ma ariwesa aboni, echalí Binói ku simili echo'ná walúlachi jonsa. A'lí echo'ná Betániachi anilíwachi simigá, echo'ná chi'lébali.

Jesusi yóniga aneli bilé chuná

(*Mr. 11:12-14, 20-26*)

¹⁸ A'lí ba'alínala rawé bi'yá mapalí Jesusi echo'ná buwichí inárali, echo'ná walúlachi ku simiyá, echalí Binói ne wabé 'locheli. ¹⁹ A'lí Binói riwali bilé chuná echo'ná mulípi buwichí wilíami. Chopi ma nawagá echo'ná chunárali, ketási riwali rakala, chopi wabé nirúuli sawala. A'lí Jesusi ra'ichaga jeaneli echí chuná: ¡Ke siné waminabi raké mujé chuná! A'lí echí chuná we yáati waminá wakichelí. ²⁰ A'lí mapalí echí jaré binéami je'ná jerigá riwali, echalí aboni chopi wabé 'nigá jali. A'lí jeanili: ¿Churigá echirigá wabé yáati káraga wakichelí echí chuná? ²¹ A'lí Jesusi ku nijewaga jeaneli: Ne bichíwali Nijeni 'yemi mi ané mapu átamo ne sinibí ne galá bichísisagá, echalí 'yémitamo ketasi chopi je'ná jerigá olabo mapurigá Nijeni olali je'ná chuná yuwa, chopi átamo ayénachó jeanésagá je'ná ripá rabó: ¡Echomí! ¡Echo'ná walú ba'wírali simigá! Echalí ne bichíwali echirigá olárami níima. ²² A'lí mapu chubiyíritamo tásagá mapalítamo Riosi yuwa tániga ra'ichabo, echirigátamo ne bichíwali narepo, átamo ne galá bichísisagá.

Jesusi sinibí olali mapurigá Walubela niráa

(*Mr. 11:27-33; Lk. 20:1-8*)

²³ A'lí mapalí Jesusi ku nawali echo'ná walubé Juríosi ri'obáwalachi echalí Binói binéráli echí pagótami. A'lí Binói yuwa sili echí jaré o'wéala sacerdote, echí jaré o'wéala ochérami pagótami o'wéalawala ayénachó. A'lí aboni jeanigá rukueli:

¿Churigami echirigá wabé omériga olá je'ná jeyiri namuti? ¿Chigami risensia 'yali mapurigami je'ná jerigá olama? ²⁴Echalí Jesusi ku nijéwaga jeaneli: Nijeni ayénachó 'yemi mi sinepi rukuema. Alí átamo tamí ku nijéwasagá, echalí Nijeni ayénachó 'yemi mi anema chigá tamí risensia 'yali mapurigá Nijeni wabé omériga olama je'ná jeyiri namuti. ²⁵ ¿Acha Riosi ripá riwigachi atíami nureli echi Juani pagónala echi pagótami? ¿Acha auché jaré pagótami echirigá nuleli kéremá? Echalí aboni kilí niráa a'nagupi ra'íchaga jeanili: A tamujé jeanisáagá: Echi Riosi ripá riwigachi atíami echirigá nuleli olánala, echalí Binói tamujé tamí je'ná jerigá rukuema: ¿Churékula bichétamo ketasi bichíili mapurigá echi Juani tamí jiti nawésali? ²⁶Alí ata jeanisáagá: Jaré pagótami nuleli echi Juani pagónala echi pagótami, a'lí bicheta wabé majá echi pagótami jiti, mapujiti si'néami pagótami galá bichíili mapu echi Juani, walula Riosi jiti nawésami níili. ²⁷A'lí aboni ku nijéwaga jeaneli: Ketásita machí chigá nuleli echi Juani pagónala echi pagótami. A'lí Jesusi ayénachó jeaneli: Nijeni ketasi cho 'yemi mi anema chigá tamí risensia 'yali mapurigani je'ná jerigá olama.

Bilé rijói okuá kúruwi kúchali

²⁸A'lí Jesusi waminabi jeaneli: ¿Churigátamo mayé? Bilé rijói okuá kúruwi kúchali. A'lí echi rijói echo'ná echi bachá wilíami yuwa nawagá jeaneli: Kení raná, jipi simigá nochá echo'ná nijé kawíwalachi mapo'ná echi uva anilíwami ichirúami ju. ²⁹A'lí echi towí ku nijéwaga jeaneli: ¡Ketásini nakí! Chopi pe wilibeko galá ku 'nátaga, arigá simili nochánala. ³⁰A'lí echi rijói echi auché bilé towí yuwa nawagá achigórigá aneli. Echalí echi jubá wilíami towí jeaneli: Galá ju kení onó, nijeni ayena simea nochámiya; chopi binói arigá ketasi simili. ³¹A'lí Jesusi jeanigá rukueli: ¿Chuyiri echi okuá galá nijéwaga olali mapurigá kepu onó nuleli? A'lí aboni ku nijéwaga jeaneli: Echi bachá wilíami chopi echirigá olali. A'lí Jesusi jeaneli: Ne bichíwali 'yemi nimí ané mapu echi jaré chati oláami wenomí napabúami, echi jaré wabé chati oláami muguí ayénachó ne bachá wabé o'móniga ku ro'wiga Riosi yuwa, galabé olama mapurigá Riosi nulá, mapalí 'yémítamo ketasi cho echirigá olabo. ³²Mapujiti echi Juani chabénala wabé galabé ologá nawali 'yemi yuwa, chópitamo ketasi bichíili. A'lí echi jaré chati oláami wenomí napabúami galá bichíili mapurigá Juani nawésali, echi jaré wabé chati oláami muguí ayénachó. A'lí 'yémítamo je'ná jerigá galá riwisáa arigá ketasi ku ro'wili Riosi yuwa, nirapétamo bichíili.

Echi jaré chati oláami nóchami

(Mr. 12:1-12; Lk. 20:9-19)

³³Ayénachó Jesusi jeaneli: Galá kipusi mapurigani auchecho siné irétaga ra'ichama: Bilé rijói onorúami echo'ná biléana kawichí ichali wikabé uva aniliwami rakéami namuti. A'lí echi rijói ne galá 'yérali echo'ná kawírali. Echalí galá joka, echo'ná niwáli mapo'ná kaminama echi uva rakala, mapurigá machí pama echi uva ba'wila. Ayénachó echo'ná pe ripabé kalirali mapurigá echo'ná jonsa galá oméraama 'nénuya suwaba echo'ná ichirúami. A'lí echi rijói suwaba tanéwaga 'yali auché jaré nóchami. Echalí binói auché biléana kawichí ne wabé mikabé simili. ³⁴A'lí pe kinana mapalí ma sébali echi uva rakala ripunálawachi, echalí echi uva níwami rijói jaré pioni júuli echo'ná echi jaré nóchami yuwa mapurigá aboni narema binói níwala uva rakala. ³⁵Chopi echi jaré nóchami echo'ná tibúami chapili echi auché jaré pioni.

A'lí bilé we chi'wali, auché bilé arigá mi'yali, auché bilé riteti basibuli. ³⁶ A'lí echí rijói waminabi wikabé auché jaré pioni júuli. Chopi echí jaré nóchami achigórigá olali aboni yuwa. ³⁷ A'lí ne jubáami echí rijói júuli bilepi kepu raná, mapujiti jeanili: Aboni galá o'wikémiré je'ná njé ranála. ³⁸ Chopi echí jaré chati oláami nóchami ma riwisáa echí rijói ranala, a'lí a'nagupi jeaneli: Je'ná ju echí mapu ne suwaba níwami níima. ¡Kiná simasi, chapigá mi'lliboa, a'lí bicheta chapiboa binói níwala kawí! ³⁹ A'lí aboni ma chapigá, miná machí paka echo'ná kawírali jonsa, arigá mi'yali.

⁴⁰ Echalí Jesusi jeanigá rukueli: Mapalí ma ku nawasa echí wikabé uva níwami, ¿churigá kastigo 'yama echí jaré chati oláami nóchami? ⁴¹ A'lí aboni ku nijéwaga jeaneli: ¡Échiko suwaba suwábama echí jaré chati oláami nóchami! Echalí tanéwaga 'yama binói níwala kawí auché jaré nóchami. A'lí aboni galá nijima echí binói níwala raká mapalí ma wáami ju. ⁴² Echalí Jesusi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi mapurigá tamí jiti rugá, je'ná jerigá osirúami ju?

Echi rité mapu echí jaré kalí niwáami miná chakena pali, mapurigá ketasi galabé niráa,
je'ná rité echo'ná sitochi,
ma bachá niráa achárami ju.

Echi Walubela Riosi je'ná jerigá olali.

Tamujeta ne galá machí mapurigá Binói echirigá ne wabé jiwériga olali,
mapurigá ke wesi auché jaré omero olayá.

⁴³ A'lí Jesusi waminabi jeaneli: Echijiti Nijeni 'yemi mi ané mapu Riosi ketasi waminabi galá nulema 'yemi pagótami, chopi Binói nulema auché jaré isena pagótami mapu galá nijéwaga ologá pirélama mapurigá Riosi nulema aboni. ⁴⁴ A'lí mapuyíripi echo'ná moba je'ná Ritérali wichisáagá, échiko arigá nosobúrami niráa níima. A'lí mapuyíripi echo'ná binói móbachí wichisáagá je'ná Rité, échiko we kúuchi mojonárami niráa níima.

⁴⁵ A'lí mapalí echí jaré o'wéala sacerdote, ayénachó echí jaré o'wéala Bariseo anilíwami binériami galá kipuli mapurigá Jesusi irétaga binérali, echalí aboni machili mapu Binói, aboni jiti rugá ra'íchali. ⁴⁶ A'lí aboni wabé chapináali echí Binói, chopi aboni arigá wabé majali echí auché jaré pagótami, mapujiti echí pagótami mayeli mapurigá Jesusi ne bichíwali walubela Riosi jiti nawésami níili.

Jesusi binera echí niwíami jiti rugá

22 A'lí Jesusi auchecho siné irétaga ra'íchaga jeaneli: ² Mapalí Riosi galá nulé echí pagótami, mapuyiri ju mapalí bilé walula silíami walú omáwali mapalí binói nolá we niwili. ³ Echalí echí walula silíami júuli jaré binói piónawala we yáati bayénala echí jaré mapu ma bayérami níili, mapurigá aboni ma siméa echo'ná omowálawachi. Chopi echí jaré mapu echirigá bayérami níili, ketasi nakili simánala. ⁴ A'lí echí walula silíami auché jaré jeanigá júuli: Jeanébasi echí jaré mapu bachá bayérami níili: Mani a'lárali echí ko'wáwami. Mani ko'yali njé bukula bóisi, echí jaré wáasi sabéami ayénachó. Suwaba ma galá kariwérami ju. ¡Ma simasi echo'ná omowálawachi! ⁵ Chopi aboni ketasi chirigá nijéwaga, auché jaréana simíbali. Bilé echo'ná binói níwala ichílachi simili. Auché bilé echo'ná binói níwala nóchalachi simili. ⁶ Auché jaré chapigá echí walula silíami piónawala wabé chibi ologá, miná ko'yali. ⁷ A'lí echí walula silíami je'ná jerigá námiga wabé

yónari. A'lí júuli binói sontársawala ko'wínala echí jaré jobátami rijói. A'lí miná ikósali aboni walúlawalachi. ⁸Echalí echí walula silíami jeaneli echí jaré binói piónawala: Ma ne bichíwali galá a'láratami ju mapurigá omoáwaga niwima njé nolá, chopi echí jaré mapu bayérani níli ketasi nakili simánala. Ne si'néami aboni echirigá chatí oláami níli. ⁹Ayénachó jeaneli: Echo'ná suníami buwichí simíbaga mapo'ná echí jaré pagótami 'yena. Wakiná omowálawachi bayesi si'néami mapu ikítamo ritiwá. ¹⁰A'lí echí jaré piónatami echo'ná wikanáami buwichí simíbaga, galá napabuli si'néami echí jaré pagótami mapu ikí aboni riwali. A'lí jaré chatí oláami níli, chopi auché jaré galabé oláami níli. A'lí echo'ná omowálawachi ne sébali buchili echí wikabé pagótami mapu echirigá bayérani níli.

¹¹Echalí echí walula silíami echo'ná pachá 'némiya bakili echí jaré mapu echo'ná bayérani níli. Chopi binói echo'ná riwali bilé rijói mapu ketasi napachátarami níli mapurigá echí walula ma 'yali napachánala ibili niráa mapu ikí echo'ná bayérani níli. ¹²Echalí echí walula silíami jeaneli: Amígo, ¿churigami bakili jena'ibi, mapujitimi ketasi napachátarami ju mapurigá 'wérali ju napachasa mapalimi simea jena'lí niwíkawachi? Chopi echí rijói ketásirapé namuti omérali ku njéwaga ra'icha. ¹³Echalí echí walula silíami jeaneli echí jaré binói piónawala: ¡Chapigá bulesi echí rijói ronólachi, binói sikálachi ayénachó! ¡Miná machí rokowárali pasi! Echo'ná rokowárali echí rijói ne sinibí niráa wabé nalama, ayénachó binói ne wabé ki'lákama binói ramilá, mapujiti binói wabé risúu olárami níima. ¹⁴Mapujiti wikabé pagótami bayérani ju, chopi pe okuáa narétami ju.

¿Acha risensia ju máputa wenomí 'yabo echí silíami?

(Mr. 12:13-17; Lk. 20:20-26)

¹⁵Echalí echí jaré Bariseo anilíwami binériami ku simíbali. A'lí aboni a'nagupi ra'íchaga we 'náitali mapu churigá aboni rukuema riwéali echí Jesusi. A'lí aboni chopi nakili mapu echí Jesusi ku njéwaga ra'ichama, echí nulalíwami sayéraga, mapurigá aboni echijiti galá omérama wi'nijiya Binói Jesusi. ¹⁶Echalí echí jaré Bariseo júuli auché jaré mapu aboni binérali, ayénachó auché jaré mapu Erorsi amígowala níli, mapurigá si'néami aboni ra'ichama Jesusi yuwa. A'lí si'néami aboni Jesusi yuwa ra'íchaga jeaneli: Binériami, tamujeta galá machí mápumi chopi ra'icha echí ne bichíwali, ayénachó mápumi ne bichíwali binera mapu echí pagótami chopi galá bichíiga olama mapurigá Riosi nulé aboni. Mujemi ke bilé wesi majawá, chópimi galabé olá echí jaré tabéala yuwa, achigórígá mapurigami olá echí auché jaré o'wéala yuwa. ¹⁷A'lí aboni waminabi jeaneli: Tamujé tamí ku njewi, ¿churigá mi mayé? ¿Acha risensia ju máputa wenomí 'yabo echí walula silíami Sesara anilíwami? ¿Kéchata 'yabo kéremá? ¹⁸Chopi Jesusi galá machili mapurigá aboni wabé 'yéka ra'íchali. Echijiti Binói jeanigá rukueli: ¿Churékulátamo nakí mapurigani sayéraga ra'ichama echí walula Sésara? 'Yémitamo ne wabé 'yekami ju. ¹⁹Echalí Jesusi ayénachó jeaneli: Tamí 'nérasi echí wenomí, echí walula natétuami. A'lí aboni 'yali bilé namuti wenomí mapurigá aboni natétaga olali echí walula silíami. ²⁰A'lí Jesusi jeanigá rukueli: ¿Chigá ju je'ná mapu jena'lí wenomírali atí? ¿Chigá riwála ju jena'lí osirúami? ²¹A'lí aboni jeaneli: Echi walula Sésara níwala ju suwaba. A'lí Jesusi jeaneli: Echijiti galá natétasi echí Sésara echí mapu echí Sésara níwala ju. Chopi 'yasi Riosi suwaba mapu Riosi níwala ju. ²²A'lí je'ná jerigá námiga, aboni chopi wabé 'nátaga muchili. A'lí aboni ma ariwesa ku simíbali.

Echi jaré suwíami arigá ku o'wínama

(Mr. 12:18-27; Lk. 20:27-40)

²³Echalí rawé echo'ná Jesusi yuwa sili echi jaré Saruseo anilíwami. Aboni we bichíi mapu echi jaré mapu ma suwíami ju ketasi ku o'wínama. Echalí aboni rukueli, ²⁴jeanigá: Binériami, echi ki'yá bitéami Moisesi tamujé tamí osogá nuleli mapu a bilé rijói ke cho kúchuwaga mukusáa, chopi ariwesa binói upila, mapu echalí arigá 'wérali ju mapu echi mukúami rijói rijimala upema echi mukí kunámami, mapurigá jaré kúchalamá. A'lí echi jaré kúcharami mapurigá echi mukúami rijimala kúchawala níima. ²⁵A'lí aboni waminabi jeaneli: Jenáí tamujé yuwa piréali kichao rijói najirémami niili. A'lí echi bachirúami ne bachá upeli, chopi tarapé cho kúcharasa mukuli. Echirigá binói ariweli binói upila mapurigá echi bonirúami echirigá upema. ²⁶A'lí echirigá achigórigá ikili echi osá wilíami bonirúami, echi baisá wilíami bonirúami ayénachó, waminá echi kicháosa wilíami bonirúami yénasí. Iibili niráa echi jaré kichao najirémami echirigá upeli echi mukí. ²⁷A'lí ne jubá ayénachó mukuli echi mukí. ²⁸A'lí echi jaré Sarukeo anilíwami rijói jeaneli: Echalí mapalí echi jaré ma suwíami ku o'wínamiré, ¿chu yiri 'nalina upila níima echi mukí? Mapujiti si'néami echi jaré kichao najirémami ibili niráa upeli.

²⁹Echalí Jesusi ku nijéwaga jeaneli: 'Yémitamo wabé 'yékarami ju mapujítitamo ketasi galá machí mapurigá osirúami ju echo'ná Riosi Ra'íchala oselíwalachi, nirapétamo machí mapurigá Riosi suwaba omériami ju. ³⁰A'lí Jesusi waminabi jeaneli: Mapalí echi jaré ma suwíami ku o'wínama, echalí aboni tarapé wesi jubema, nirapé wesi kunema. Chopi mapurigá echo'ná ripá riwigachi muchúami Riosi kapitánawala níima. ³¹Echalí Jesusi ayénachó jeaneli: ¡Echi jaré ma suwíami ne bichíwali ku o'wínama! Ayénachó 'yémitamo siné káachi ma wisabé 'nénali mapurigá osirúami ju echo'ná Riosi Ra'íchala oselíwalachi mapurigá Riosi Binói jeanigá ra'íchali: ³²Nijeni ju echi Walubela Riosi. Echirigá Nijeni abijí ju echi ki'yá bitéami Abrami Riósawala, ayénachó Nijeni abijí ju echi ki'yá bitéami Isaka Riósawala, ayénachó Nijeni abijí ju echi ki'yá bitéami Jakobo Riósawala, mapujiti aboni abijí piré tamí yuwa jena'í ripabé riwigachi. Echalí Jesusi Binói jeanili: Si'néami echi jaré mapu ikí galá bichíili Riosi, ketasi mapurigá ma suwíami niráa ju, mapujiti Riosi níwala pagótami sinibí piréami ju Riosi yuwa. ³³A'lí echi jaré pagótami wabé kilí 'nátaga muchili mapalí aboni námali je'ná jerigá binérachi echi Jesusi.

¿Chuyiri 'nalí ju mapurigá ne bachá nulá Riosi?

(Mr. 12:28-34)

³⁴A'lí mapalí echi jaré Bariseo anilíwami binériami galá machili mapurigá Jesusi echirigá binériga ra'ámali echi jaré Saruseo anilíwami, echalí aboni bilénapi napawili mapo'ná Jesusi asali. ³⁵Echalí bilé aboni mapu echi nulalíwami binériami níili, je'ná we machináliga rukueli jeanigá: ³⁶Binériami, ¿chuyiri nalí ju mapurigá ne bachá nulá Riosi? ³⁷A'lí Jesusi jeaneli: Ne wabé galesi echi Walubela kétamo Riósawa ne sulachí niráa. Ayénachó ne wabé galesi Riosi ne suwaba kétamo ariwá niráa. Ayénachó ne galá galesi Riosi ne suwaba kétamo 'nátawa niráa. ³⁸Riosi echirigá nulá ne bachá niráa. A'lí je'ná nulalíwami ne wabé simírami walubela ju, ne suwaba echi auché jaré Riosi nulalila yuwa. ³⁹Chopi ne noguí a'nawí ju mapurigá Riosi osá niráa, je'ná jerigá nulá: Ne wabé galé echi auché jaré pagótami

achigórigá mapurigami galé mujé binói niráa. ⁴⁰ A'lí mapalítamo galá nijéwabo je'ná okuá nulalíwami, echalí 'yémítamo ayénachó galá nijéwami níbo ne suwaba echí auché jaré Riosi nulalila, ayénachó ne suwaba mapurigá osali echí jaré o'wéala Riosi jiti nawésami.

¿Chigá ranala ju echí Cristo anilíwami?

(Mr. 12:35-37; Lk. 20:41-44)

⁴¹ Echalí abijí napawika muchúachi echí jaré Bariseo anilíwami binériami, a'lí Jesusi jeanigá rukueli: ⁴² 'Yemi, ¿churigátamo aní échi Cristo anilíwami jiti, echí mapu Riosi júuli jenaí wichimóbachi? ¿Chigá ranala ju? Echalí aboni ku nijéwaga jeaneli: Echi walula Rabiri ranala ju. ⁴³ Echalí Jesusi jeaneli: Mapalí echí Wabé Galabé Riosi Iwigala galá nuleli echí Rabiri, echalí echí Rabiri osali mapu echí Cristo anilíwami, binói Walubélawala ju. ¿Churékula biché aní mapu binói ranala, arigá binói Walubélawala ju? Mapujiti echo'ná Riosi Ra'íchala oselíwarachi osirúami ju mapurigá echí Rabiri jeanigá osali:

⁴⁴ Echi Walubela Riosi jeaneli echí keni Walubélawa:

Jenaí tamí yuwa watonachi asagá, mapuyénako Nijeni wabé omériga
ro'wama echí jaré Mujé sayela echo'ná ri'reámi Mujé ralálachi
mapurigami echirigá galá oméraama aboni.

⁴⁵ A'lí echí Rabiri echirigá anisáagá mapu binói Walubélawala ju, ¿churigá binói ranala níima?

⁴⁶ Echalí ke wesi auché jaré galá omérali ku nijéwiya. Ayénachó ke wesi waminabi rukueli, mapujiti si'néami we majali waminabi rukueya.

Jesusi we wi'nijíli echí jaré Bariseo anilíwami binériami, echí nulalíwami binériami ayénachó

(Mr. 12:38-40; Lk. 11:37-54; 20:45-47)

23 Echalí Jesusi galá ra'íchali echí jaré pagótami. Ayénachó Binói ra'íchali echí jaré mapu Binói binérali. A'lí je'ná jerigá ra'íchali: ² Echi jaré nulalíwami binériami, ayénachó echí jaré Bariseo anilíwami binériami, si'néami we binera mapurigá echí kilyá bitéami walula Moisesi osogá nulali. ³ Echirigá ne suwaba galá nijéwaga olasi mapurigá aboni 'yemi mi ané mapu echí Moisesi osogá nulali. Chopi ketasi olasi mapurigá aboni olá, mapujiti aboni we binera mapurigá echí jaré pagótami echirigá nijéwaga olama, chopi aboni ketásirapé echirigá olá. ⁴ Mapujiti mapalí echí jaré echiyiri binériami echirigá nulé echí auché jaré pagótami olánala, achigórigá ju mapurigá mapalí bilé rijói ne wabé simírami bitéami niráa uché auché jaré pagótami, mapuyénasí aboni ne noguí ketasi oméraama apériya echiyena wabé bitéami muruka. Chopi echí rijói arigá ketásirapé nakí ku'wíranala aboni. ⁵ Echiyiri binériami suwaba echirigá olá mapurigá echí auché jaré pagótami ma riwisáa aboni echirigá oláachi, echalí jeanimea: Echi jaré binériami ne wabé galabé oláami ju. Echijiti echiyiri binériami ayénachó wabé nakí bulugá 'yéna jaré oselí echo'ná aboni kowálachi, ayénachó echo'ná aboni matóchowalachi, mapo'ná osirúami ju jaré ra'íchali, Riosi Ra'íchala osirúami. Ayénachó aboni echijiti ne wabé i'wéali niwá aboni napáchala suwilá nakala. ⁶ Ayénachó aboni echijiti chopi ne bachá niráa muchínali echo'ná omáwiga ko'wáwachi. Ayénachó aboni echijiti chopi ne bacháami muchínali echo'ná pachá ri'obachi napawíkowachi. ⁷ Ayénachó aboni

wabé nakí mapurigá echi auché jaré pagótami ne wabé o'wikeka natipama aboni mapalí si'néami pagótami napawí. Ayénachó aboni wabé nakí mapurigá echi auché jaré pagótami jeanema: ¡We kaniliga, keni binériami! ⁸Chopi ketasi ariwesi 'yemi mapurigá echi auché jaré pagótami 'yemi mi jeanema: ¡Keni Binériami! Mapujiti bilepi ju 'yemi níwala Binériami. Echi Cristo anilíwami bilepi ju 'yemi níwala Binériami. A'lí si'néami 'yemi ritémptami ju. ⁹A'lí ketasi anesi 'yemi bilé rijói jena'í wichimóbachi bitéami jeanigá: ¡Kéta Onó! mapujiti bilepi ju 'yemi Onolá, echi mapu echo'ná ripá riwigachi atí. ¹⁰Ketasi ariwesi mapurigá auché jaré pagótami 'yemi mi anema Binériami niráa, mapujiti echi Cristo anilíwami bilepi ju 'yemi níwala Binériami. ¹¹¡Echi mapu ne bachá ju si'néami echi auché 'yemi yuwa, échiko mapurigá si'néami 'yemi piónawala nílaga! ¹²Mapujiti echi mapu a binói niráa wilako mapurigá walula, échiko chopi mapurigá wabé tabéala niwárami níima. A'lí echi mapu a binói niráa wabé tabéala niwako, échiko walula niráa wilálami níima.

¹³Chopi 'yemi nulalíwami binériami ne wabé risúu olálami níibo, 'yemi Bariseo anilíwami binériami ayénachó. 'Yémitamo ne wabé 'yékami ju, mapujítitamo ketasi ariwé mapurigá echi auché jaré pagótami galá nijéwaga olama mapurigá Riosi nulé aboni. A'lí 'yemi aboni ketasi echirigá nijéwaga olá, nirapé chótamo ariwé mapurigá auché jaré pagótami echirigá nijéwaga olama, mapalí aboni arigá wabé nakí echirigá nijéwaga olánala.

¹⁴Ne wabé risúu olálami níibo 'yemi nulalíwami binériami, 'yemi Bariseo anilíwami binériami ayénachó. 'Yémitamo ne wabé 'yékami ju, mapujítitamo we 'ye echi jaré kunámami kalila, a'lí bichétamo chopi we 'yékaka niráa ra'icha mapurigá Riosi yuwa ra'íchaga niráa. Echijiti 'yémitamo waminabi wabé wi'nijírami níibo.

¹⁵Ne wabé risúu olálami níibo 'yemi nulalíwami binériami, 'yemi Bariseo anilíwami binériami ayénachó. ¡'Yémitamo ne wabé 'yékami ju! Mapujítitamo ne wabé simírami nóchali olá mapurigátamo echirigá ne sébali binérabo bilé rijói mapurigá binói bichíima achigórigá mapurigá 'yémitamo bichíi. Chopi mapalí échiko ma echirigá binératami ju, echalí binói ma niwárami ju waminabi osá chokéami 'yékaka oláami ketasi mapurigá 'yemi niráa, mapurigá echiyiri rijói echijiti pátami níima echo'ná ri'lé wabé chati na'írali mapo'ná ne walú rajá.

¹⁶'Yémitamo ne wabé risúu olálami níibo, mapujítitamo mapurigá ke machíliami niráa ju, chópitamo arigá we nakí bayéranala echi auché jaré pagótami mapu ketasi machí mapo'ná aboni simiba. 'Yémitamo ketasi galá machí Riosi Ra'íchala, chópitamo arigá wabé nakí binéranala echi auché jaré pagótami. A'lí a bilé rijói wepi jeanisáa: Riosi ri'obáwala, mapalí binói bichíwaga aní mapu binói ne bichíwali olama bilé namuti, echalí 'yémitamo aní mapu ketasi arigá 'wérali ju mapu echiyiri rijói ne bichíwali echirigá olama. Chopi a bilé rijói wepi jeanisáa: Echi oro anilíwami wenomí echo'ná ri'obachi nirúami, echalí 'yémitamo aní mapu ne bichíwali arigá 'wérali ju mapu echiyiri rijói ne bichíwali echirigá sébali olama mapurigá binói bichíwaga anili. ¹⁷¡'Yémitamo ke newalite ju! ¡Ayénachótamo mapurigá ke machíriami ju! Mapujiti 'yémitamo aní mapu echi wikabé oro anilíwami wenomí ne wabé simírami galabé ju, ketasi mapurigá echi walubé Juríosi ri'obáwala. A'lí echi wikabé oro anilíwami wenomí chopi galabé ju mapujiti echi oro echo'ná pachá echi walubé Juríosi pagótami ri'obáwalachi muchuwi. ¹⁸A'lí a bilé rijói jeanisáagá: Nijeni ne bichíwali olama bilé namuti, mapujiti echo'ná pachá Juríosi ri'obáwalachi nirúami ripáami mésachi wabé galabé ju. Echalí 'yémitamo aní mapu ketasi arigá 'wérali ju

mapu binói ne bichíwali echirigá olama. Chopi a bilé rijói jeansáagá mapu binói ne bichíwali olama bilé namuti mapujiti echí jaré namuti ne wabé galabé ju mapu echo'ná moba ripáami mésachi muchúwaga 'yárami ju Riosi, echalí 'yémítamo aní mapu ayena arigá 'wérali ju mapu echiyiri rijói ne bichíwali olama mapurigá binói bichíwaga anili. ¹⁹ ¡'Yémítamo ke newalite ju! ¡Ayénachótamo mapurigá ke machíliami ju! Mapujiti echí jaré namuti mapu echo'ná moba ripáami mésachi muchúwaga 'yárami ju Riosi, échiko chopi wabé galabé niwárami ju mapujiti echí ripáami mesa wabé galabé ju. ²⁰ A'lí mapuyíripi ne bichíwaga anesa mapu binói ne bichíwali olama bilé namuti mapujiti echo'ná Juríosi ri'obáwalachi bacháami nirúami ripáami mesa ne wabé galabé ju, échiko echijiti ne bichíwaga ané, chopi binói ayénachó echirigá bichíwaga ané mapujiti echí jaré namuti mapu echo'ná muchúwaga 'yárami ju Riosi ayénachó ne wabé galabé ju. ²¹ A'lí echí jaré pagótami mapu ne bichíwaga ané mapu aboni ne bichíwali olama bilé namuti, mapujiti echí walubé Juríosi pagótami ri'obáwarachi wabé galabé ju, abóni echijiti bichíwaga ané, chopi aboni ayénachó echirigá bichíwaga ané mapujiti echí Walubela Riosi ne wabé galabé ju mapu echo'ná echí walubé Juríosi pagótami ri'obáwalachi bité. ²² A'lí echí jaré pagótami mapu ne bichíwaga ané mapu aboni ne bichíwali olama bilé namuti mapujiti echo'ná ripá riwigachi wabé galabé ju, abóniko echijiti bichíwaga ané. Chopi aboni ayénachó echirigá bichíwaga ané mapujiti echo'ná ripá riwigachi nirúami ripabé wilíami Riosi asíbalachi ne wabé galabé ju. Ayénachó aboni echirigá bichíwaga ané mapujiti echí Walubela Riosi ne wabé galabé ju mapu echo'ná atí.

²³ ¡Ne wabé risíu olárami níibo 'yemi nularíwami binériami, 'yemi Bariseo anilíwami binériami ayénachó! ¡'Yémítamo ne wabé 'yékami ju! Mapujítitamo ne galá tibuka 'ya Riosi biléana rojonárami ibili makói echí jaré galabé sawala ichirúami mapu ikítamo napabú, mapurigá echí bawena anilíwami, echí auché bilé anérero anilíwami ayénachó, echí auché bilé komino anilíwami asíchiko. Chópitamo tarapé nijéwaga olali mapurigá ne wabé simírami 'wérali níili máputamo nijéwaga olabo mapurigá Riosi 'yemi mi nuleli, mapujítitamo ketasi galabé olali, nirapétamo natimali echí auché jaré pagótami, nirapétamo galá bichííli Riosi Ra'íchala. Arigá 'wérali níili máputamo echirigá suwaba nijéwaga olabo, ayénachó máputamo bilé rojonárami 'yabo Riosi, ibili makói echí jaré namuti ichirúami, mapu ikítamo napabú. ²⁴ ¡'Yémítamo mapurigá ke machíliami niráa ju, chópitamo arigá we nakí bayéranala auché jaré pagótami mapu ketasi machí mapo'ná aboni simiba! ¡'Yémítamo sinibí ne galá nijéwaga olá mapurigátamo ke 'me 'wérali nulérami níili máputamo olabo, chópitamo ketasi chirigá nijéwaga olá mapurigátamo ne wabé simírami 'wérali niráa nulérami níili máputamo olabo.

²⁵ Ne wabé risíu olálami níibo 'yemi nulalíwami binériami, 'yemi Bariseo anilíwami binériami ayénachó. ¡'Yémítamo ne wabé 'yékami ju! Mapujítitamo galá kilí niráa ne galá bi'wá echí jaré vaso echo'ná machímana chopi niráa. Ayénachótamo ne galá kilí niráa ne galá bi'wá echí jaré bitoli echo'ná machímína chopi niráa, chópitamo echo'ná pachana 'yemi sulálachi ne buchíami niráa ju echí wabé chati oluławáwami, mapurigá echí chigólawami niráa, auché jaré wikabé namuti chati oluławáwami ayénachó. ²⁶ ¡'Yémi Bariseo anilíwami binériami mapurigá ke machíliami niráa ju! Ne bachá bi'wasi echo'ná pachánala echí vaso, ayénachó echo'ná pachánala echí bitólachi, mapurigá echo'ná machímana ayénachó ne galá bi'wíami níima!

²⁷¡Yémi nulalíwami binériami ne wabé risúu olárami níibotamo, 'yemi Bariseo anilíwami binériami ayénachó! ¡Wabé 'yékami jútamo! 'Yémitamo mapurigá jaréana kalirátachi chu'wechi ju, mapo'ná ne galá rosántami ju echo'ná machímína niráa, mapurigá echí jaré pagótami ne galá ba'yólama, chopi echo'ná pachana ne buchíami ju suwíami ochilá, ne suwaba echí wabé chati júkami ayénachó. ²⁸Echirigá 'yemi achigórigá ne bichíwali galabé olánali chopi mapurigá echí auché jaré pagótami 'yemi mi riwimea echirigá oláachi, mapurigá aboni echirigá mayema máputamo ne galabé oláami ju. Chópitamo echo'ná pachana 'yemi sulálachi niráa ne wabé buchíami niráa ju echí wabé 'yékuluwami jiti, ayénachó echí wabé chati oluwáwami jiti.

²⁹¡'Yémi nulalíwami binériami ne wabé risúu olárami níibo, 'yemi Bariseo anilíwami binériami ayénachó! ¡'Yémitamo ne wabé 'yékami ju! 'Yémitamo arígá kalí niwiwa echo'na moba chu'wechi mapo'ná chu'wirótami níili echí jaré ki'yá piréami Riosi jiti nawésami, ayénachótamo we ba'yora mapo'ná chu'wirótami níili echí auché jaré ki'yá piléami mapu ne wabé galabé oláami níili. ³⁰Ayénachótamo jeaní: A tamujé chabé ki'yá pirerasagá mapalí tamujé 'wénawala piréali, tamujeta ketasi ku'wíribili mapalí aboni ko'yali echí jaré Riosi jiti nawésami. ³¹'Yémitamo echirigá ne bichíwaga nawesa, 'yemi aboni sayéraga, mapu 'yémitamo arígá tanala ju, echí jaré chabénala piréami mapu ko'yali echí jaré Riosi jiti nawésami. ³²¡Jipi káraga olasi 'yemi ne suwaba mapurigá echí jaré 'yemi 'wénawala nakili olánala! ³³¡'Yémi mapurigá sinowi jútamo! ¡Mapurigá sayawi kúchuwala jútamo! Echijiti 'yémitamo ketasi omero galabé olayá. Ayénachótamo echijiti walú kastigo 'yárami níibo echo'ná ri'llé riáblochi mapo'ná walú rajá! ³⁴¡'Yémitamo wabé chati oláami ju! Echijiti Nijeni 'yemi mi yuwa julama jaré wabé galabé machíiami rijói, auché jaré o'wéala Riosi jiti nawésami ayénachó. A'lí bichétamo arígá ko'wiboa jaré aboni. Ayénachótamo echo'ná jaréana kúrsichi michóniga ko'wiboa auché jaré aboni. Ayénachó echo'ná 'yemi ri'obáwalachi 'yémitamo waminá wipisopo auché jaré aboni. Ayénachótamo wabé kichiga a'najátabo auché jaré aboni, jena'í walúlachi jonsa, echo'ná auché jaréana o'wéalachi yénasí. ³⁵Echijítitamo wi'nijírami níibo mapurigá ko'yáami niráa si'néami echí jaré wikabé galabé oláami pagótami, ne si'néami mapu ikí ko'wirúami níili jena'í wíchimóbachi, ki'yá chokichí jonsa mapalí echí galabé oláami Abeli riwéami rijói mi'lílati, wakinana yénasí mapalí echí Sakaríasi riwéami rijói mi'lílati, echí mapu echí Berekíasi riwéami rijói ranala níili. A'lí 'yémitamo mi'yali echo'na machímána echí walubé Juríosi pagótami ri'obáwalachi, echo'ná bacháami mapo'ná echí jaré wikabé namuti ko'yagá 'yárami ju Riosi. ³⁶Ne bichíwali Nijeni 'yemi mi jeané mapu 'yemi jipi piréami pagótami ne wabé 'wi'nijírami níima mapurigá ko'yáami niráa ne si'néami echí jaré galabé oláami pagótami mapu echirigá ko'wirúami níili.

Jesusi wabé natimali echo'ná Jerusalémachi piréami

(Lk. 13:34-35)

³⁷Echalí Jesusi ayénachó jeaneli: ¡Ne wabé risúu olárami níibotamo 'yemi echo'ná Jerusalémachi piréami! 'Yémitamo waminá ko'yá echí jaré Riosi jiti nawésami, ayénachótamo riteti basibuka ko'yá echí auché jaré mapu Riosi júuli 'yemi mi nawésanala. ¡Nijeni wisabé nakili 'yemi mi nisénala mapurigá bilé tolí ranéami we nisé echí jaré binói níwala chulipi, mapalí binói we rakó echí chulipi echo'ná

ri'lé pachá binói analachi! ¡Chopi 'yémitamo ketasi nakili mapurigá Nijé 'yemi nimí nisema! ³⁸ ¡Nibira! 'Yémitamo ma waná chijanárami níibo jena'í 'yemi walúlawachi jonsa. ³⁹ Mapujiti Nijé 'yemi nimí jeané mapu 'yémitamo ma ketasi auchécho tamí riwiboa. Chópitamo arigá tamí riwiboa echalí ne jubá rawé mapalítamo jeaniboa: ¡Riosi ne wabé galabérali je'ná Rijói mapu ma ku nawá mapurigá ne Walubela niráa!

**Jesusi bachá niráa nawésali jeanigá mapu echí walubé Juríosi ri'obáwalachi
káraga najunárami níima riwéali**

(Mr. 13:1-2; Lk. 21:5-6)

24 Allí mapalí Jesusi ku simigá machínali echo'ná pachá echí walubé Juríosi pagótami ri'obáwalachi jonsa, echalí echí jaré mapu Binói binérali mulubéanalí Binói yuwa, mapurigá aboni galá 'nérama Binói Jesusi echí walú ri'obá. ² Allí Jesusi jeaneli: 'Yémitamo galá ritiwá suwaba je'ná walubé ri'obá. Chopi Nijeni ne bichíwali 'yemi mi ané mapu ne suwaba je'ná ri'obá waminá najunárami níima, mapu tarapé bilé rité jena'í tigótami aripima.

Je'ná jerigá ikimea, ke cho sébachi echalí ne jubá rawé

(Mr. 13:3-23; Lk. 21:7-24)

³ Allí mapuyénasí Jesusi isábaga asali echo'ná ripá rabó Olíbochi anilíwachi, echalí echo'ná Binói yuwa mulubéanalí echí jaré mapu Binói binérali. Allí aboni pe waná togá jeaneli: Tamujé tamí ané: ¿Kiríbuko je'ná jerigá ikimea? ¿Churigata galá machiboa mapalí ma ke 'me ayó sébachi níima mapurigá Mujemi ku nawama jena'í wichimóbachi? ¿Churigata galá machiboa mapalí ke 'me ayó níima echalí ne jubá suwibálawachi rawé?

⁴ Echalí Jesusi ku nijewaga jeaneli: Ne galá 'nátaga tibusi 'yemi aboni niráa mapurigá ke wesi 'yemi mi 'yékama. ⁵ Mapujiti pe waminánomí wikabé rijói nolínama mapu ibili niráa wabé 'yékaka jeanimea: ¡Nijé binói ju echí Walubela Cristo! Ayena cho aboni echirigá anigá, ne wabé 'yékama wikabé auché jaré pagótami. ⁶ Echalítamo námabo wikabé sontarsi nakóami ra'ichálawachi. Ayena chótamo námabo wikanáami nakónalawachi. Chopi a aboni tibusi mapurigátamo ketasi majajabo, mapujiti arigá 'wérati ju mapurigá suwaba je'ná jeyiri ne bichíwali ikimea. Chopi echalí abijí ketasi cho níima ne jubá suwibálawachi rawé. ⁷ Mapujiti echalí rawé jaréana walula nulálachi kawírali piréami wabé nakoma, auché jaréana walula nulálachi kawírali piréami sayéraga. Allí jaré o'wéala silíami pagótamawala ne wabé nakoma auché jaré o'wéala silíami pagótamawala sayéraga. Ayena cho wikabé pagótami ne wabé 'lochema. Allí auché jaré wikabé pagótami ne wabé nayükama. Ayena cho wikanáami jena'í wichimóbachi ne wabé nokomea kawí. ⁸ Echalí je'ná jerigá chotama jena'í wichimóbachi piréami pagótami wabé risúu níliya. Chopi auché pe waminánomí aboni waminabi ne wabé simírami risúu nílama.

⁹ Echalí rawé aboni 'yemi mi nijima mapurigátamo ne wabé risúu olárami níibo. Allí aboni 'yemi mi ko'wimea. Allí si'néami echí auché jaré pagótami 'yemi mi echirigá ne wabé kichima mapujítitamo tamí bichíyami ju. ¹⁰ Echalí wikabé ma ketasi tamí galá bichíima. Ayena cho jaré miná nijima auché jaré mapurigá aboni kastigo 'yárami níima. Ayena cho auché jaré a'nagupi ne wabé nakichima. ¹¹ Allí wikabé 'yékaka nawésami nolínama, mapu wabé 'yékama wikabé auché jaré

pagótami. ¹² A'lí mapujiti echalí ne wabé muwéwama echi wabé chati oluwáwami echijiti wikabé pagótami ma ketasi 'me kalema Riosi. ¹³ Chopi si'néami mapu ikí arigá galá bichísama echalí ne jubá rawé yénasí, abóniko galá ku'wíratami níima. ¹⁴ A'lí je'ná Galabé Riosi Ra'íchala galá nawisárami níima ne suníami jena'í wichimóbachi, jeanigá mapu Riosi ne galá nulema echi jaré pagótami. Echalí ma sebama ne jubá suwibálawachi rawé.

¹⁵ Echo'ná Riosi Ra'íchala oselíwalachi osirúami ju mapurigá echi walula Riosi jiti nawésami Ranieli riwéami nawésali echi wabé chati suwibáliami namuti jiti rugá. (Galá níima mapuyíripi machiko oselí 'nénlya, ne galá machisá je'ná jeyiri.) Echijiti mapalí 'yémítamo riwiboa echo'ná wabé galabéalachí atíami echi wabé chati suwibáliami namuti, ¹⁶ echalí 'yemi máputamo echo'ná Juréachi anilíwachi kawírali muchuwi miná júmsasi echo'ná jaréana ripá rabó. ¹⁷ Echalí rawé sébachí arigá 'wéráli níima máputamo wabé yáati miná júmsabo. Echijiti a jaré 'yemi echo'ná 'yemi kalílachi mulubé machímana muchísagá, ketasi auchecho ku mo'wisí echo'ná pachá, jaré namuti úboa, chopi we yáati miná júmsasi. ¹⁸ Echalí a jaré 'yemi echo'ná kawichí nocha 'yénasagá, ketasi ku ro'wisi ku chapiboya 'yemi níwala kimá, chopi we yáati miná júmsasi. ¹⁹ A'lí Jesusi wabé natimaga jeanili: Echalí rawé ne wabé simírami risúu olárami níima si'néami echi jaré muguí mapu ikí pocháami níimako, ayena cho ne si'néami mapu ikí kúuchi kúchuwami níimako. ²⁰ Wabé tansi Riosi mapu ketasi romó níima echalí rawé mapalí 'wéráli níima máputamo miná júmsabo, ayena cho mapu ketasi isábawachi rawé níima. ²¹ Mapujiti echalí rawé jena'í wichimóbachi piréami pagótami ne wabé simírami risúu nílama. A'lí chabénala ke wesi siné echiyena risúu olárami níli, ki'yá chokichí jonsa mapalí Riosi niwali je'ná wichimoba, jipi rawé yénasí. A'lí waminánomí rawé ke wesi auché jaré echiyena risúu olárami níima. ²² A'lí a echi Walubela Riosi ariwésagá mapurigá jena'í wichimóbachi piréami pagótami ne wi'libé bamíbali echiyena risúu olárami níima, echalí ke wesi pagótami tibimi. Chopi Riosi ma nulali mapurigá echi pagótami pe okuáa bamíbali echirigá risúu olárami níima, mapujiti Binói wabé galeli echi jaré pagótami mapu Binói chapili.

²³ Echalí rawé a bilé rijói 'yemi mi jeanésagá: ¡'Nesi, jena'í atí echi Cristo anilíwami mapu Riosi júuli jena'í wichimóbachi! A jeanisáagá kéremá: Echo'ná auché biléana atí echi Cristo anilíwami. ¡Ketasi bichísi echirigá aníami rijói! ²⁴ Mapujiti jaré wabé 'yékami rijói jeanísiya nolínama: ¡Nijé binói ju echi Walubela Cristo anilíwami! A'lí auché jaré wabé 'yékaka jeanimea: ¡Nijé binói ju bilé walubela Riosi jiti nawésami! A'lí aboni arigá wabé omériga olama wikabé namuti mapurigá ke wesi auché jaré pagótami omero olayá. A'lí aboni echirigá ologá we nakimea 'yékanala echi jaré mapu Riosi ma chapili mapurigá Binói níwala. Chopi aboni ketasi omérama 'yékanala echi jaré Riosi níwala. ²⁵ Nijeni echirigá ma 'yemi mi ne bachá niráa aneli ne suwaba mapurigá ne bichíwali ikimea pe waminánomí.

²⁶ Echirigá mapalí jaré 'yemi mi jeanésagá: Galá 'nesi, echi Cristo anilíwami echo'ná auché biléana waná kawichí atí. Echalí ketasi echo'ná simasi mapujiti ketasi bichíwali níima. Ayena cho mapalí jaré 'yemi mi jeanésagá: Echi Cristo echo'ná pachá biléana kalírali atí. Echalí ketasi bichísi echirigá aníachi. ²⁷ Mapujiti mapurigá echo'ná nolírali ne wabé ni'wíka simea echo'ná panina jonsa, echo'ná tu bo'ónala yénasí, echirigá achigórígá Nijeni ku nolínama. Nijeni wilárami níli mapurigá Ku'wíriami niráa.

²⁸Chopi 'yémitamo wabé chati oláami ju, echijiti echí jaré 'yemi sayela ma sisáa, 'yemi mi suwábamiré mapurigá echí jaré wikabé wilú waminá suwama echí jaré namuti suwíami.

Echalí ne jubá rawé Jesucristo riwirúami níima ripá nolírali ku nolínachi

(Mr. 13:24-37; Lk. 21:25-33; 17:26-30, 34-36)

²⁹A'lí waminánomí ma sunisa echalí rawé mapalí jena'í wichimóbachi piréami echirigá ne wabé risíu olárami níima, echalí we rokowama echí rayénali, ayena cho echí michá ma ketasi ratábama. A'lí echí jaré sopolí waminá rrujima, echo'ná ripá jonsa. A'lí ne suwaba echí jaré namuti echo'ná ripá nirúami echirigá waminá nakulíwarami níima. ³⁰A'lí Jesusi jeanili: Nijé Binói wilárami níili mapurigá Ku'wíriami niráa. A'lí echalí ne jubá rawé Nijé Binói riwirúami níima echo'ná ripá nolírali ku nolínachi, wabé omérami niráa. Echalí si'néami pagótami ne suníami jena'í wichimóbachi tibíami wabé o'monama mapalí aboni tamí riwimea echo'ná ripana nolírali ku nolínachi. Echalí Nijeni ne wabé omérami níima, ne wabé Walubela ayena cho. ³¹Echalí rawé Nijeni julama echí jaré keni o'wéala kapitánawa ne wabé iwéami taka napabuma ne si'néami mapu ikí Nijé Binói chapili, ne suníami a'nagú jena'í wichimóbachi piréami, echo'ná wabé 'naka jonsa, echo'ná tu bo'ónala yénasí.

³²Ayena cho Jesusi jeaneli: Ne galá binesi mapurigá Nijeni 'yemi mi irétaga binérama, bilé chuná jiti rugá. Mapujiti mapalí echí chuná chaliwala ma chota súsiya, mapalí ma galá sawará, echalítamo galá machí mapu ma ne mulubé kuwesámaré. ³³Echirigá ayena cho mapalítamo riwiboa echiriga íkíachi suwaba je'ná jeyiri namuti, echalí galá machisí mapu ke 'me ayó suwibama suwaba namuti, ayena cho mapu Nijeni ma ne mulubé sébachi inaro echo'ná mulubé yéachi niráa. ³⁴Ne bichíwali Nijeni 'yemi mi jeané mapu ke cho suwisáa si'néami je'ná pagótami, ne suwaba je'ná jerigá ikimea. ³⁵Echo'ná ripá suwaba káraga suwibama. Jena'í wichimóbachi ayena cho suwaba suwibama. Chopi echí Nijé Ra'íchala ketasi siné suwibama.

³⁶Chopi ke wesi galá machí chu kilíbuko echirigá ikimea. Nibilé wesi galá machí chu yénako níima echalí rawé mapalí echirigá ikimea. Echi jaré Riosi kapitánawala echo'ná ripá riwigachi muchúami nirapé machí. Nijé ketasi cho machí, mápuni birépi Riosi Ranala ju. Chopi echí Nijé Onolá bi'néipi galá machí chu kilíbuko echirigá ikimea. ³⁷Chopi mapurigá níili chabé ki'yá mapalí echí Noé riwéami rijói bitéali jena'í wichimóbachi, echirigá achigórigá níima echalí ne jubá rawé mapalí Nijeni ku nolínama jena'í wichimóbachi. Nijeni wirálami níili mapurigá Ku'wíriami niráa. ³⁸Mapujiti echalí chabé ki'yá rawé mapalí ketasi cho ne ripabé buchili ba'wí ne suníami jena'í wichimóbachi, echalí echí jaré ki'yá piréami pagótami chopi wabé ko'ogá, bajiga muchili. Ayena cho jaré aboni we niwítiya muchili. Auché jaré 'yárami níili mapurigá ukunema. A'lí aboni echirigá olali echalí rawé iyénasí mapalí echí Noé bakili echo'ná pachá echí walubé kalírali ba'wichí moba yénami, arka anilíwami. ³⁹A'lí echí pagótami ketasi cho galá machili mapu echí ba'wí echirigá ne ripabé buchima riwéali. Chopi mapalí ma chótali echirigá buchísiyachi, echalí aboni machili mapu echirigá ikimea riwéali. A'lí ne si'néami aboni miná si'lili echo'ná ba'wírali. A'lí echirigá achigórigá ikimea mapalí Nijeni ke sayiná ku nolínama jena'í wichimóbachi. Nijeni wilálami níili mapurigani Ku'wíriami niráa. ⁴⁰Echalí rawé okuá rijói echo'ná biléana kawichí nochá 'yénama. Echalí bilé ku torúami níima, chopi auché bilé ariwérami níima. ⁴¹Echalí rawé okuá muguí

napawika batuya uchuma. A'lí bilé ku torúami níima, chopi auché bilé ariwérami níima. ⁴² Ne galá 'nigá muchisi 'yemi, mapujítitamo ketasi machí chu kilíbuko Nijeni ku nolínama jena'í wichimóbachi. Nijeni 'yemi Walubélawala ju. ⁴³ Chopi je'ná galá machisí: Echi rijói kalíwami a galá machisáagá mapu chu yénako nawama riwéali echi chigórami, ne bichíwali echi rijói kalíwami ne galá tibumi, a'lí ketasi ariwemi mapurigá binói kalílachi miná chigósarami níimi. ⁴⁴ Echijiti ayena cho ne galá a'láraka muchisi 'yemi, mapujiti Nijeni ke sayiná ku nolínama. A'lí 'yémítamo ketásirapé machiboa chu yénako níima mapalí Nijeni ku nolínama. Nijeni wilárami níili mapurigá Ku'wíriami niráa.

Echi galabé oláami pioni, echi ketasi galá oláami pioni yuwa

(Lk. 12:41-48)

⁴⁵ Echi wabé galá oláami pioni, galabé 'nátami, echi ju mapu echi walubela kalíwami we wilá mapurigá walula nuláami niráa, echi auché jaré echo'ná binói kalílachi piréami yuwa, mapurigá échiko ibili niráa 'yami ko'wáami mapalí ma seba téitali. ⁴⁶ Echalí mapalí echi walubela kalíwami ku nawama, echiyiri pioni ne wabé ganílatami níima mapalí binói riwirúami níima echirigá oláachi. ⁴⁷ Echalí Jesúsi waminabi jeaneli: Ne bichíwali Nijé 'yemi nimí ané mapu echi walubela kalíwami we nulema echi pioni tibúnala ne suwaba Binói níwala namuti. ⁴⁸ Chopi siné káachi echi pioni ketasi galabé oláami níiságá, a'lí échiko a binói niráa jeansáagá: Echi nijé walubélawala ketasi we yáati ku nolínamiré. ⁴⁹ Ayena cho siné káachi chotásagá chi'wana echi auché jaré pióntami, ayena cho chotásagá ko'yá, ayena cho bajiya echi jaré tékuri yuwa, ⁵⁰ echalí rawé ke sayiná ku nolínama echi walubela kalíwami mapalí echi chati oláami pioni ketasi 'nátaga buwé. Echalí rawé ke sayiná ku nolínama mapalí echi pioni ketasi machí chu yénako ku nolínama riwéali. ⁵¹ Echalí echi walubela kalíwami ne walú kastigo 'yama echiyiri pioni. A'lí binói waminá achama echi auché jaré wabé 'yékami yuwa. A'lí echo'ná si'néami aboni ne wabé nalákama, ayena cho ne wabé kilákama aboni ramilá, mapujiti aboni ne wabé risúu olárami níima.

Jesúsi binera echi jaré makói iwé jiti rugá

25 Mapalí Riosi galá nulé jena'í wichimóbachi piréami pagótami, echalí mapuyiri ju mapalí makói iwé natipásiya simíbali echi bilé rijói mapu niwíami níima riwéali. Echalí ibili echi jaré iwé chapigá toli bilé lámpara anilíwami. ² A'lí malí echi jaré iwé galá 'nátami níili, chopi echi auché jaré malí ketasi galabé 'nátami níili. ³ A'lí echi jaré malí ketasi galabé 'nátami, aboni yuwa toli aboni níwala lámpara, chopi aboni ketasi toli echi petróleo anilíwami. ⁴ Chopi echi auché jaré malí galabé 'nátami ayena toli echi petróleo echo'ná aboni níwala limétachi, echi jaré aboni níwala lámpara yuwa. ⁵ A'lí mapalí echi rijói mapu niwíami níima riwéali ketasi we yáati nawali, echalí ne si'néami echi jaré iwé wabé kochináliga, galá kochili.

⁶ A'lí echalí nasipa rokogó jaré o'weli ra'íchami galá námtami níili jeanigá: ¡Galá busuresi! Echi rijói mapu niwíami níima riwéali ma ne mulubé inaro! ¡Echo'ná simíbaga 'yemi, ne galá naripas! ⁷ A'lí ne si'néami echi jaré iwé ma ku muchísaga, galá ku katéwali aboni níwala lámpara. ⁸ Echalí echi jaré ketasi galá 'nátami jeaneli echi auché jaré wabé galabé 'nátami, jeanigá: Pe táo tamujé tamí 'yasi echi

'yemi níwala petróleo, mapujiti tamujé níwala lámpara ma ne cho'wísimi. ⁹Chopi echí jaré galabé 'nátami ku nijéwaga jeaneli: Ne bachá simíbaga 'yemi echí jaré ralinéami yuwa, mapurigá 'yemi aboni galá raliboa. Echirigata ketasi newalebo tamujé, ayena cho 'yemi aboni echirigá galá níwabo. ¹⁰Chopi mapu yénasí aboni echirigá raliboya simíbali, echalí ke sayiná nawali echí rijói mapu niwíami níima riwéali. Echalí binói yuwa mo'wili echo'ná niwíkowachi ne si'néami echí jaré iwé mapu ma galá a'láraga muchili. A'lí echalí ma 'yératami níili echí 'yera.

¹¹Chopi pée wilibeko echí auché jaré ketasi galabé 'nátami iwé ayena cho echo'ná 'yétachi sili. A'lí aboni wabé bayegá jeaneli: ¡Walubela! ¡Walubela! ¡Tamujé tamí irapi! ¹²Chopi echí walula echo'ná pachá jonsa ku nijéwaga jeaneli: ¡Ne bichíwali níjeni 'yemi mi ané mápuni ketasi 'yemi mi machí! ¹³Echalí Jesusi ayena cho jeaneli: Echijiti ne galá 'nagá muchisi si'néami 'yemi, mapujítitamo ketasi machí chu kilóbuko Níjeni ku nawama jena'í wichimóbachi. Nirapétamo machí chu yénako níima echalí rawé mapalini ku nawama. Riosi tamí wilali mapurigá Ku'wíriami niráa.

Jesusi binera echí jaré wabé natéami namuti wenomí jiti rugá

¹⁴Mapujiti mapalí Riosi galá nulé jenalí wichimóbachi piréami pagótami, echalí mapuyiri ju mapalí bilé rijói ne wabé mikabé simináali. Echalí echí rijói bayegá echí jaré binói piónawala, a'lí aboni yuwa tanéwaga 'yali suwaba binói níwala wenomí. ¹⁵Echalí bilé pioni 'yárami níili malí wabé natéami namuti wenomí. Auché bilé ketasi 'me 'nátami 'yárami níili okuá. Auché bilé 'yárami níili pe bilepi. Ibilí niráa echirigá 'yárami níili achigórigá mapurigá aboni ibili 'nátami níili. Echalí echí rijói miná mikabé simili. ¹⁶A'lí echí pioni mapu 'yárami níili echí malí wabé natéami namuti wenomí, échiko ku simigá namuti ralagá, ku ralinéaga galá meli auché jaré malí wabé natéami namuti wenomí. ¹⁷Achigórigá olali echí auché bilé pioni mapu 'yárami níili echí okuá wabé natéami namuti wenomí. Échiko ayena cho meli auché jaré okuá wabé natéami namuti wenomí. ¹⁸Chopi echí mapu pe bilepi 'yárami níili, échiko ku simigá echo'ná wi'yérali joka nasoli echí bilé wabé natéami namuti wenomí.

¹⁹A'lí wabé kinánokuá rawé ma ku nawali echí jaré pióntami walubélawala. Echalí binói nakili bujénala echí jaré pióntami níwala wenomí. ²⁰A'lí echí bilé pioni mapu 'yárami níili echí malí wabé natéami namuti wenomí, échiko nawagá ku pali auché jaré malí. A'lí binói jeaneli: Walubela, mujé tamí 'yali malí wabé natéami namuti wenomí. Nibira, Níjeni namuti ralagá, auchécho ku ralinéaga ma galá meli auché jaré malí wabé natéami namuti wenomí. ²¹Echalí echí binói walubélawala jeaneli: We galá ju mujé galabé pióntami, we galá oláami. Mujemi pe okuáa jiti ma ne galabé olali. Jipi níjeni mi auchécho waminabi wikabé namuti nulema tibúnala. ¡Tamí yuwa pachá simiró, ne wabé kanili! Níjeni mujé Walubélawala ju. ²²A'lí echí auché bilé pioni mapu 'yárami níili okuá wabé natéami namuti wenomí, échiko ayena cho nawagá jeaneli: Walubela, mujé tamí 'yali okuá wabé natéami namuti wenomí. Nibira, níjeni namuti ralagá, auchécho rarinéaga, ma galá meli auché jaré okuá. ²³Echalí echí binói walubélawala jeaneli: We galá ju mujé galabé pióntami, we galá oláami. Mujemi pe okuáa jiti ma ne galabé olali. Jipi níjeni mi auchécho waminabi wikabé namuti nulema tibúnala. ¡Tamí yuwa pachá simiró, ne wabení kanili! Níjé mujé Walubélawala ju. ²⁴A'lí echí auché bilé mapu 'yárami níili pe bilepi wabé natéami namuti wenomí, échiko ayena cho nawagá jeaneli: Walubela,

nijeni mi galá machili mápumi we jiwériga olá tamujé tamí yuwa. Nijeni machí mápumi we sikiré echi turío mapo'ná mujé binói ketasi ichali. Ayena chomi we chapí echi turío, mapo'nami ketasi mosili echi rakala.²⁵ Echijiti nijeni wabé majaga ku simigá, echo'ná wi'yérali joka nasoli echi mujé níwala wabé natéami namuti wenomí. Jena'í atí. ¡Ku togá mujé níwala wenomí!²⁶ Echalí echi pioni walubélawala ku níjewaga jeaneli: Mujé we nasínamí, chati oláami pioni, mujemi galá machili mapu niye we sikilé echi turío mapo'nani ketasi ichali, ayena cho mápuni we chapí echi turío mapo'nani ketasi mosili echi rakala.²⁷ Echijiti galá níili 'yásami echi nijé níwala wabé natéami namuti wenomí, echi jaré wenomí tibúami yuwa, mapurigá mapalini ku nawasa, echalini ku naremi echi nijé níwala wenomí, ayena cho echi mapu waminabi muwéali.²⁸ Echalí echi walula jeanigá nuleli echi auché jaré pagótami echo'ná muchúami: ¡Ku 'yesi echi wabé natéami namuti wenomí! ¡Ayena cho 'yasi echi auché bilé rijói mapu ma niwa makói wabé natéami namuti wenomí!²⁹ Mapujiti mapuyíripi ma wikabé níwako, échiko waminabi auché jaré wikabé 'yárami níima. Chopi mapuyíripi ketasi níwako, échiko káraga 'yérami níima echi pe okuáa mapu binói abijí niwa.³⁰ A'lí echi walubela waminabi jeaneli echo'ná muchúami pagótami: Waminá machíami ne wabé chati rokowárali pasi echi ketasi galabé oláami pioni. ¡Echo'ná binói ne wabé nalama, ayena cho ne wabé ki'lákama binói ramilá!

Ne si'néami pagótami justicia olárami níima

³¹ A'lí mapalí Nijeni ku nolínama, echalí Nijeni ne wabé Walubela níima. Echalí ne si'néami echi jaré o'wéala Riosi kapitánawala ayena cho simea tamí yuwa. A'lí Nijeni asibama echo'ná Nijé níwala ripabé asibálawachi mapurigá ne Walubela niráa. Nijeni wilárami níili mapurigá Ku'wíriami niráa.³² A'lí echo'ná bacháami tamí yuwa napabúrami níima ne si'néami echi jaré pagótami mapu ikí piréali jena'í wichimóbachi ki'yá chokichí jonsa. A'lí Nijeni okoná niráa rojonama ne si'néami aboni, mapurigá bilé rijói namuti niséami galá waná rojuana echi jaré chibá, ayena cho mapurigá binói waná rojuana echi jaré bo'wá.³³ A'lí Nijeni echo'ná watonachi tamí yuwa uchuchama echi jaré bo'wá. Chópini echo'ná o'winachi tamí yuwa uchuchama echi jaré chibá.³⁴ Echalí mapurigá Walubela Silfámi niráa Nijeni jeanema echi jaré echo'ná watona muchúami: Wakiná simasi 'yemi mapu echi Nijé Onolá ma 'yemi mi ne wabé galabélatali. Jipi jonsa echi Nijé Onolá 'yemi mi ne galá nulema, mapurigá Binói 'yemi mi nulema riwéali ki'yá chokichí jonsa, mapalí jena'í wichimóbachi ke cho gayénarami níili.³⁵ Mapujiti Nijeni wabé 'locheli, a'lí bichétamo tamí galá kóoli. A'lí Nijeni ne wabé balámali, a'lí bichétamo tamí 'yali mápuni bajima. A'lí Nijeni si'wina bitéami níili, a'lí bichétamo tamí galá nareli echo'ná 'yemi pirélachi.³⁶ A'lí Nijeni ketasi napáchali, a'lí bichétamo tamí galá napachátali. A'lí Nijeni nayúami níili, a'lí bichétamo tamí 'nébiya sili. A'lí Nijeni bachárami níili echo'ná kumurachi, a'lí bichétamo tamí yuwa 'nébiya sili.³⁷ A'lí echi jaré galabé oláami ku níjewaga jeanema: Walubela, ¿Chu kilíbukota mi riwali 'lochéami, a'lí bicheta mi kóoli? ¿Chu kilíbukota mi riwali balámami, a'lí bicheta mi 'yali mápumi bajima?³⁸ ¿Chu kilíbukota mi riwali si'wina bitéami niráa, a'lí bicheta mi nareli echo'ná tamujé pirélachi? ¿Chu kilíbukota mi riwali ke napáchami, a'lí bicheta mi galá napachátali?³⁹ ¿Chu kilíbukota mi riwali nayúami niráa, echo'ná kumurachi bachárami níisa keremá, a'lí bicheta mi yuwa sili?⁴⁰ A'lí

Nijeni mapurigá Walubela Silámi niráa ku nijéwaga jeanema: Ne bichíwali 'yemi nimí ané mapu átamo echirigá olásagá mapuyíripi bilé Nijé ritémawala yuwa, echalítamo ayena cho echirigá tamí olali.

⁴¹ Echalí Nijeni ayena cho jeanema echi jaré echo'ná o'wina tamí yuwa muchúami, jeanigá: ¡Waminá chakena simíbaga 'yemi wabé chati oláami pagótami! ¡Echo'ná wabé chati sinibí rajáami na'írali simíbaga 'yemi! Echo'ná a'láratami níili mapurigá echi riablo echo'ná pátami níima, echi jaré binói capitánawala ayena cho. ⁴² Mapujiti Nijeni we 'locheli, ali bichétamo ketasi tamí kóoli. A'lí Nijeni ne wabé barámali, a'lí bichétamo ketasi tamí 'yali mápuni bajima. ⁴³ A'lí Nijeni si'wina bitéami níili. A'lí bichétamo ketasi tamí nareli echo'ná 'yemi piréelachi. A'lí Nijeni ketasi napáchami níili, a'lí bichétamo ketasi tamí napacháltali. A'lí Nijeni nayúami níili, ayena choni echo'ná kumurachi bachárami níili, a'lí bichétamo ketasi tamí yuwa 'nébiya sili. ⁴⁴ A'lí aboni ayena cho tamí ku nijéwaga jeanema: Walubela, ¿chu kilíbukota mi riwali 'lochéami niráa, barámami niráa keremá, si'wina bitéami niráa keremá, ke napáchami niráa keremá, nayúami niráa keremá, pachá bachárami niráa keremá, mapalita ketasi mi ku'wírali? ⁴⁵ A'lí Nijeni ku nijéwaga jeanema: Ne bichíwali 'yemi nimí ané mapu a ketásitamo echirigá ku'wírasagá ibili je'ná jaré mapu risúu olárami níili, echarítamo ketasi cho echirigá tamí ku'wírali. ⁴⁶ A'lí je'ná jaré chati oláami waminá simama echo'ná mapo'ná aboni sinibí niráa kastigo 'yárami níima. A'lí echi jaré galabé oláami simama echo'ná mapo'ná aboni sinibí niráa pirélama.

Echi jaré Jesusi sayera a'nagupi katéwali mapurigá Binói mi'lirúami níima

(Mr. 14:1-2; Lk. 22:1-2; Jn. 11:45-53)

26 Allí echalí mapalí Jesusi ma sunili je'ná jerigá ra'íchiya echi wikabé pagótami, echalí Binói waminabi aneli echi jaré mapu Binói binérali jeanigá: ² Yémitamo galá machí mapu jipi jonsa, okuá chi'rigá sebama echi omówali mapalí echi jaré kúuchi bo'wá ko'wíruami níima. Echalí Nijeni nijírami níima mapurigá echi jaré pagótami tamí mi'limea, echo'ná biléana kúrsichi michóniga. Nijeni wilárami níili mapurigá Ku'wíriami niráa. ³ A'lí echalí rawé mapalí Jesusi echirigá ra'íchali, echalí echi jaré o'wéala sacerdote ma napawika muchili echo'ná echi ne walula sacerdote, Kaijasi riwéami bitélachi machímana ri'narátachi. Ayénachó echi auché jaré nulalíwami binérami echo'ná aboni yuwa napawika muchili, echi auché jaré o'wéala ochérami asífchiko. ⁴ Echalí si'néami aboni napawika katéwaga ra'íchali mapu chúrigá 'yékami niráa chapirúami níima echi Jesusi mapurigá Binói miná mi'lirúami níima. ⁵ Chopi aboni a'nagupi jeaneli: Arígá ketásita chapiboa echi Jesusi mapuyénasí abijí omowálawachi rawé ju, mapurigá echi auché jaré wikabé pagótami ketasi ne wabé simírami na'áwama.

Bilé mukí ucheli wabé su'weti júkami aceite echo'ná Jesusi mo'ólachi

(Mr. 14:3-9; Jn. 12:1-8)

⁶ Echalí Jesusi echo'ná Betániachi anilíwachi asali, echo'ná echi Simoni bitélachi, echi mapu chabénala wabé chati cháa nayúami níili. ⁷ A'lí mapalí Jesusi echo'ná ko'yá asali, echalí echo'ná nawali bilé mukí, bilé limeta chapigá, echi mapu rité alabástro anilíwami jiti niwárami níili. A'lí aceite we su'weti júkami, wabé natéami, manili. Echalí echi mukí ne suwaba ro'weli echo'ná Jesusi mo'ólachi. ⁸ A'lí echi jaré mapu Jesusi binérali ma je'ná jerigá 'nénasa, ne wabé na'áwali. Echalí aboni

a'nagupi ra'íchaga jeanili: ¡Baji, je'ná wabé natéami aceite wepi ri'echárami níili! ⁹Mapujiti je'ná aceite ne wabé simírami natéami níili. Ralinéasagá galá níimili, mapurigata ku'wírabo echí jaré wabé tisúwati echí wíkabé wenomí jiti. ¹⁰A'lí Jesusi galá machigá je'ná jerigá aníachi aboni, echalí Binói jeaneli: ¡Ketasi echirigá riwératasí je'ná mukí! ¡Binói echirigá ologá we galabé niráa tamí olali! ¹¹Mapujiti ne sinibí niráa 'yemi mi yuwa muchima jaré we tisúwati pagótami. Chopi Nijeni ketasi 'yemi mi yuwa asimea ne sinibí niráa. ¹²Mapujiti mapalí je'ná mukí tamí ucheli je'ná wabé su'weti júkami jiti, echí binói ne bachá niráa echirigá olali mapurigá echí jaré pagótami tamí uchema mapalí Nijeni ma mukusáa, chu'wirótami níima. ¹³Ne bichíwali 'yemi nimí ané mapu kanápuromí jena'í wichimóbachi mapo'ná je'ná we galabé Riosi Ra'íchala nawisárami níima, echo'ná ayénachó galá irétarami níima mapurigá je'ná mukí olali, mapurigá ne si'néami pagótami galá machimea mapurigá binói galá tamí olali.

Echi Júrasi Jiskarioti nijili Jesusi

(Mr. 14:10-11; Lk. 22:3-6)

¹⁴Echalí bilé rijói, Júrasi Jiskarioti riwéami, echí mapu bilé níili echí jaré makói miná okuá, échiko katéwaga ra'íchali echí jaré o'wéali sacerdote yuwa, ¹⁵a'lí binói jeanigá rukueli: ¿Píritamo tamí 'yabo mapurigá nijeni nijima echí Jesusi, mapurigá 'yémitamo galá chapiboa? A'lí aboni baisá makói chirúlami wenomí plata natéitali. ¹⁶A'lí echalí jonsa echí Júrasi Jiskarioti we 'nátali mapu chu kiríbuko galá níima mapu binói nijima echí Jesusi, mapurigá echí jaré Jesusi sayela chapimea.

Echi Walubela Jesucristo ko'wali echí jaré yuwa mapu Binói binérali

(Mr. 14:12-25; Lk. 22:7-14, 21-23; Jn. 13:21-30)

¹⁷Echalí sébachi níili ne bachá omowálawachi rawé mapalí echí jaré Juríosi pagótami ko'wali echí jaré pani, ke nasówarami echí levadura anilíwami, echí mapu jiti echí pani we galabé niwaliwa. Echalí echí jaré mapu Jesusi binérali, si'néami echo'ná Binói yuwa jeanigá sili: ¿Kumi mi nakí máputa a'lárabo mapurigami ko'mea echí kúuchi bo'wá sapala, jipi omowálawachi rawé? ¹⁸A'lí Jesusi jeaneli: Echo'ná walúlachi simíbaga, bilé rijói yuwa mapu Nijé 'yemi nimí riwírama. Echalí Jeanesi: Echi Binériami mi jeané: Nijé téttawala ke 'me ayó sebama. Jipi rawé, echo'ná mujé bitélachi Nijeni omáwaga ko'mea echí bo'wá sapala awérami, echí jaré mapu Nijeni binérali yuwa. ¹⁹Echalí echí jaré binéami echirigá olali mapurigá Jesusi nuleli aboni. A'lí aboni galá a'lárali mapurigá si'néami aboni omáwaga ko'mea echí bo'wá sapala awérami echalí omowálawachi rawé.

²⁰A'lí ma alfwachi echalí rawé, echalí Jesusi asíbali echo'ná ko'wáwachi echí jaré makói miná okuá yuwa. ²¹A'lí mapalí aboni echo'ná ko'yá muchili, echalí Jesusi jeaneli: Ne bichíwali Nijeni 'yemi mi ané mapu bilé 'yemi tamí nijima mapurigá echí jaré tamí sayérami arigá tamí chapimea. ²²Echalí aboni wabé o'móniga chótali ibili niráa jeanigá: ¿Walubela, acha nijé níimare? ²³A'lí Jesusi ku nijéwaga jeaneli: Echi bilé 'yemi mapu jena'í bilénapi bitólachi tamí yuwa pagueko, échiko tamí nijima. ²⁴Ne bichíwali suwaba tamí yuwa ikimea achigórigá mapurigá tamí jiti rugá osirúami ju echo'ná Riosi Ra'íchala oselíwalachi. Riosi tamí wiláti mapurigá Ku'wíriami niráa. Chopi ne wabé risúu nílama echí rijói mapu tamí nijima mapurigá echí pagótami tamí chapimea. Ne galá níimili echiyiri rijói

ketasi cho ranarúami níisa. ²⁵A'lí echi Júrasi níili mapu nijima riwéali. Échiko ku nijewaga jeanigá rukueli: Binériami, ¿Acha nijé ju mápuni mi nijima riwéali? Echalí Jesusi ku nijewaga jeaneli: ¡Mujemi ne bichíwaga anili mapu mujemi ju! ²⁶A'lí mapuyénasí aboni ko'yá muchili, Jesusi chapigá bilé walú pani, Riosi yuwa ra'íchaga tánali mapurigá galabélata. A'lí Binói rojuánaga 'yali ne si'néami echi jaré mapu Binói binérali. Echalí jeaneli: Chapigá kosí. Je'ná ju Nijé sapala. ²⁷A'lí Jesusi chapili echi vaso mapo'ná maníami níili echi uva anilíwami ba'wila. A'lí ma natétara 'yasa Riosi, si'néami 'yali bajínala. A'lí jeaneli: Si'néami 'yemi galá bajisi je'ná. ²⁸Mapujiti je'ná ju Nijé lalá, echi mapu Riosi bukulíwami niráa bichíwaga anili mapu wikabé pagótami jiti ku'luwárami ju, mapurigá aboni chati olalila ku wikáwarami níima. ²⁹A'lí Nijeni 'yemi mi ané mapu jipi jonsa ketásini waminabi bajima je'ná uva anilíwami ba'wila. Chópini auchécho bajima echalí rawé mapalí Nijeni bukulí bajima si'néami 'yemi yuwa echalí mapalí Nijé Onolá galá nulema jena'í wichimóbachi piréami pagótami.

**Jesusi bachá niráa nawésali jeanigá mapu echi Pegro 'yékaka animea mapu
binóii ketasi machili echi Jesusi**

(Mr. 14:26-31; Lk. 22:31-34; Jn. 13:36-38)

³⁰A'lí mapalí aboni ma nawajili, echalí aboni ku simíbali echo'ná ripá rabó Olíbochi anilíwachi. ³¹A'lí Jesusi jeaneli: Téliko rokogó si'néami 'yémítamo tamí waminá bi'neli ariwebo, mapurigá tamí jiti rugá, je'ná jerigá osirúami ju: Echi bo'wá Niséami mi'lirúami níima, a'lí echi jaré Binói pugula bo'wá waminá chijanárami níima. ³²Chopi mapalí Nijeni ma ku owinsa, echalini bachá simea echo'ná Galiléachi anilíwachi kawírali. A'lí 'yémítamo ayénachó pe wakinana echo'ná simabo. ³³Echalí echi Pegro ku nijewaga jeaneli: ¡A ne si'néami echi auché jaré mi bi'neli ariwésagá, nijeni ketasi siné mi bi'neli ariwema! ³⁴Echalí Jesusi jeaneli: Ne bichíwali Nijé nimí ané mapu jipi rokogó ke cho kusúwachi echi tolí, echalí mujemi baisá chokéami animea mápumi ketasi tamí machí. ³⁵A'lí echi Pegro jeaneli: ¡Arigá ne wabé 'wéralli níisagá mapu nijeni mi yuwa mukumea, ke sineni animea mápuni ketasi mi machí! A'lí ne si'néami echi auché jaré binéami achigórigá anili.

Echo'ná Jechamanichi anilíwachi Jesusi we ra'icha Riosi yuwa

(Mr. 14:32-42; Lk. 22:39-46)

³⁶A'lí Jesusi nawali echo'ná bíléana mapo'ná Jechamanichi anilíwachi níili. Ne si'néami echi jaré mapu Binói binérali ayénachó sili. Echalí Jesusi jeaneli: Jena'í muchisi mapuyénasí Nijeni pe minana simigá ra'ichama Riosi yuwa. ³⁷A'lí Jesusi echo'ná Binói yuwa togá echi Pegro, ayénachó echi okuá Sibiréo tanala, a'lí chótali ne wabé siwega o'mona. ³⁸Echalí Jesusi jeaneli: Nijeni ne wabé simírami o'mona ne sulachí niráa. ¡Echijiti Nijeni ne noguí mukuméaré! Jena'í tibisi. Galá 'nagá muchisi tamí yuwa. ³⁹A'lí pe waminana simigá, Jesusi akaná chukúbaga, Riosi yuwa ra'íchaga jeaneli: Nijé Onolá, a Mujé echirigá nakisáagá, tamí ku'wiro mapurigani ketasi risúu olárami níima. Chopi ketasi tamí olá mapurigá Nijé Binói chopi nakí. Tamí olá mapurigá Mujé Binói nakí.

⁴⁰Echalí pe wakinana ma ku nawagá mapo'ná abijí muchili echi auché jaré mapu Jesusi binérali, echalí Binói jeaneli echi Pegro: ¡'Yémítamo arigá ketasi omérali péé téeli 'nagá muchuwa tamí yuwa! ⁴¹¡Ne galá 'nagá muchisi! Riosi yuwa tániga

ra'ichasi, mapurigátamo ketasi chati olabo mapalí echí riablo 'yemi mi wabé chati olánalama. Ne sulachí niráa 'yémitamo ne wabé galabé olánali, chopi 'yemi aboni ketasi omérámi ju galabé olayá.

⁴² A'lí Jesusi auchecho siné Riosi yuwa jeanigá ra'íchali: Nijé Onolá, a mi arígá nakisáagá mapurigá Nijeni risúu olálami níima, ne suwaba galá olálami nílaga mapurigá Mujé Binói nakí. ⁴³ A'lí Jesusi auchecho siné ku nawagá, auchecho siné riwali we kochigá bitíami, mapujiti aboni ne wabé kochináali.

⁴⁴ A'lí Jesusi ku ariwesa, auchecho siné simili. A'lí baisá chokéami Riosi yuwa ra'íchaga, achigórígá anili. ⁴⁵ A'lí Jesusi ku nawagá mapo'ná bitili echí jaré mapu Binói binérali, echalí jeaneli: Ma kochisí. Ma galá isábasi. ¡Nesi! Ma seba téitali. Nijeni ma nijírami níima mapurigá echí jaré chati oláami pagótami tamí chapimea. Nijeni wilárami níili mapurigá Ku'wíriami niráa. ⁴⁶ ¡Jáasi! Ma simabo. Galá 'nesi. Ma nawali echí mapu tamí nijima.

Jesusi borogá tóratí

(Mr. 14:43-50; Lk. 22:47-53; Jn. 18:2-11)

⁴⁷ Echalí abijí ra'íchachi Jesusi, echo'ná nawali echí Júrasi, echí mapu bilé níili echí auché jaré makói miná okuá yuwa. Ayénachó echí Júrasi yuwa sili wikabé pagótami ripiyá kami, auché jaré kusí kami ayénachó. A'lí si'néami aboni nulélati echí jaré o'wéala sacerdote jiti, echí jaré o'wéala ochérami jiti ayénachó. ⁴⁸ A'lí echí mapu nijili, chabénala niráa, katéwaga jeaneli: Echi mapu nijeni naripama, echí ju. Ne galá chapísí. ⁴⁹ Echalí echí Júrasi echo'ná nawali mapo'ná Jesusi wilili. A'lí binói we yáati jeaneli: ¡Kuira, Binériami! A'lí we kaníriga narépali. ⁵⁰ A'lí Jesusi jeaneli: Apanero, ¿pírimi olámiya nawali? Echalí echí auché jaré ripiyá kami mulubé sigá chapili echí Jesusi. A'lí galá buleli. ⁵¹ Echalí bilé rijói mapu Jesusi yuwa iyénali, chapigá binói níwala wilibé ripiyá, ku machí pali. A'lí echí ripiyá jiti chi'wánaga, ripúnali echí walula sacerdote piónawala nakala. ⁵² Echalí Jesusi jeaneli: Ku nasó mujé níwala ripiyá echo'ná wichibáchalachi, mapujiti si'néami echí jaré mapu ripiyá jiti nakówako, abóniko ayénachó ripiyá jiti mi'lirúami níima. ⁵³ A Nijeni tánasagá echí keni Onó, echalí Binói tamí yuwa ku'wílanaga julama wabé simírami wikabé o'wéala Riosi kapitánawala mapuyénasí 'yémitamo ma ketasi omérabo taraya. ⁵⁴ Chopi a Nijeni echorigá olásagá, echalí ketasi chirigá ikímea mapurigá chabé ki'yá osirúami níili echo'ná Riosi Ra'íchala oselíwalachi mapurigá Nijeni arígá je'ná jerigá chapirúami níima riwéali. ⁵⁵ Echalí Jesusi jeaneli echí pagótami: 'Yémitamo ripiyá toga sili, kusí toga ayénachó, mapurigátamo tamí chapiboa mapurigá Nijé bilé chigórami niráa níisa. Chabé Nijé sinibí rawé 'yemi nimí yuwa binériya asali echo'ná walubé Juríosi riobáwalachi, chopi echalí 'yémitamo ketasi chirigá tamí chapili. ⁵⁶ Chopi suwaba je'ná jeyiri jerigá olárami ju mapurigá ne galá sébali ikímea suwaba mapurigá chabé ki'yá osirúami níili mapu tamí yuwa ikímea riwéali, mapurigá echí jaré ki'yá piréami Riosi jiti nawésami osali.

Echalí biché ne si'néami echí jaré mapu Jesusi binérali, ma ariwesa, miná júmsali.

Jesusi bacháami tólatí echí jaré o'wéala Juríosi yuwa

(Mr. 14:53-65; Lk. 22:54-55, 63-71; Jn. 18:12-14, 19-24)

⁵⁷ Echarí Jesusi chapigá tólatí echo'ná echí ne walula sacerdote Kaijasí riwéami yuwa. A'lí echí jaré nulalíwami binériami, echí auché jaré o'wéala ochérami

ayénachó echo'ná napawika muchili.⁵⁸ Chopi echí Pegro pe 'naka niráa, jubá najátali echo'ná echí ne walula sacerdote kalílachi yénasí. A'lí echo'ná pachá rapirátachi bakigá, echo'ná asíbali echí jaré kapitani yuwa, mapurigá 'nema churigá ikimea.⁵⁹ A'lí echí jaré o'wéala sacerdote, echí jaré o'wéala ochérami ayénachó, echí auché jaré igúsuwami ayénachó, ne si'néami ne wabé wi'nijífinali echí Jesusi. Echijiti aboni bayeli jaré wabé 'yékami rijói mapurigá aboni 'yékaka wi'nijima echí Jesusi mapurigá Binói nijika mi'lirúami níima.⁶⁰ A'lí aboni ke wesi riwali. Chopi wikabé nakili 'yékaka nawésanala, echí Jesusi sayéraga. A'lí ne jubá sili okuá rijói 'yékaka nawésami,⁶¹ mapu jeanili: Je'ná rijói jeanili: Nijeni omero najuna echí walubé Riosi ri'obáwala. Ayénachó nijeni omero bikiyá chírigá auchecho siné ku niwayá.

⁶² Echalí echí ne walula sacerdote wilíbaga jeanigá rukueli: ¿Kéchami bilé namuti nijiyama? ¿Pili ju mapu je'ná jaré mujemi sayéraga nawesa?⁶³ Chopi Jesusi arígá tarapé namuti ku nijéwali. Echalí echí ne walula sacerdote ku nijéwaga jeaneli: Nijeni mi jiwrígá nulé, echí sinibí bitéami Riosi jiti, mápumi tamí ku ruyema: ¿Áchami ju echí Cristo, echí bi'nélipi Riosi Ranala?⁶⁴ Echalí Jesusi jeaneli: Ne bichíwali Nijeni ju. Ayénachó Nijeni 'yemi mi ané mapu waminánomí rawé 'yémítamo tamí riwiboa echo'ná watonachi, echí suwaba omérami Riosi yuwa atfámi. Ayénachótamo tamí riwiboa echo'ná ripá riwigachi nolírali ku nolínachi. Nijeni wilárami níili mapurigá Ku'wíriami niráa.⁶⁵ Echalí echí ne walula sacerdote ne chí'wánali binói napáchala mapurigá ne wabé o'mónami niráa. Ayénachó binói jeanili: ¡Je'ná Jesusi ne wabé chati ra'íchali, Riosi sayéraga! Tamujeta ma ketasi waminabi newalé auché jaré testigo. ¡Nibira, jipi 'yémítamo ma galá námali mapurigá binói wabé chati ra'íchali, Riosi sayéraga!⁶⁶ ¿Churigátamo mayé? A'lí si'néami aboni ku nijéwaga jeaneli: ¡Galá níima miná mi'lirúami níisa!

⁶⁷ A'lí aboni wabé kachípali Jesusi akálachi. Ayénachó aboni sikala wabé kapólaga chiwali echí Jesusi. A'lí auché jaré wabé cho'nali Binói akálachi.⁶⁸ Ayénachó aboni jeaneli: A mujemi níisagá echí Cristo anilíwami, mapu Riosi julama riwéali jena'í wichimóbachi, mujemi galá machimée suwaba namuti. Echijiti tamujé tamí ku ruyé: ¿Chigá níili mapu mi cho'ná?

Echi Pegro 'yékaka anili mapu binói ketasi machili echí Jesusi

(Mr. 14:66-72; Lk. 22:56-62; Jn. 18:15-18, 25-27)

⁶⁹ Echalí echí Pegro echo'ná machímama ri'narátachi asali. A'lí bilé tiwé pióntami echo'ná binói yuwa nawágá jeaneli: Mujemi ayénachó echí Jesusi yuwa iyénali, mapu echo'ná Galiléachi bitéami ju.⁷⁰ Chopi echo'ná bacháami si'néami echí auché jaré yuwa, echí Pegro we 'yékaka jeanili: ¡Ketásini machí mapurigami aní!⁷¹ A'lí mapalí echí Pegro ku machínali echo'ná yéwachi, echalí binói riwirúami níili auché bilé tiwé pióntami jiti. Echalí echí tiwé ayénachó aneli echo'ná muchúami pagótami jeanigá: Je'ná rijói ayénachó asali echí Jesusi yuwa, mapu echo'ná Nasarétachi bitéami ju.⁷² Echalí echí Pegro auchecho siné ne bichíwaga niráa anigá, arígá ne wabé 'yékaka jeaneli: ¡Ketásini machí echí Rijói!⁷³ A'lí pe wilibeko echí auché jaré echo'ná muchúami, echo'ná echí Pegro yuwa mulubéanaga jeaneli: Ne bichíwali mujemi ayénachó echí auché jaré yuwa jumi mapu echí Jesusi binérali, mapujiti mujemi achigórigá ra'icha mapurigá aboni.⁷⁴ Echalí echí Pegro chótali we 'yékaka niráa ra'icha. Chopi binói bichíwaga niráa anili mapu arígá ne bichíwaga ra'íchali. Echalí echí Pegro arígá 'yékaka jeanili: ¡Ketásini machí echí Rijói! A'lí echalí we yáati kusuli

echi tolí.⁷⁵ A'lí echí Pegro binói ku kilí niráa 'nátali mapurigá Jesusi chabénala jeaneli: Ke cho kusúwachi echí tolí, mujemi baisá chokéami we 'yékaka jeanimea mápumi ketasi tamí machí. Echalí echí Pegro ku machí machínaga, ne wabé o'móniga nalali.

Jesusi tólati echí walula silíami Pilato riwéami yuwa

(*Mr. 15:1; Lk. 23:1-2; Jn. 18:28-32*)

27 A'lí echalí ba'alínala rawé bi'yá bijí, ne si'néami echí jaré o'wéala sacerdote napawili, si'néami echí jaré o'wéala ochérami ayénachó. Echalí si'néami aboni a'nagupi katéwaga ra'íchali Jesusi sayéraga, mapujiti aboni wabé nakili mapu echí Jesusi waminá nijírami nílasa, mapurigá Binói mi'lirúami níima. ²Echalí aboni bologá tosá echí Jesusi, echí walula silíami Ponkio Pilato riwéami 'yali.

Echi Júrasi a binói niráa wijaga kusébali

³A'lí echí Júrasi níili mapu nijali echí Jesusi mapurigá echí jaré sotarsi chapimea Binói. Echalí mapalí echí Júrasi riwali mapurigá Jesusi arígá waminá mi'lirúami níima riwéali, echalí binói wabé siwega ku pali echí jaré baisá makói chirúlami wenomí plata, echí jaré o'wéala sacerdote, echí jaré o'wéala ochérami yuwa. ⁴Echalí echí Júrasi jeaneli: ¡Nijeni wabé chati ologá nijili je'ná rijói ke chibisíami, mapurigá Binói waminá mi'lirúami níima! Chopi echí jaré o'wéala sacerdote jeaneli: ¡Tamué ketasita echo'ná así ju! ¡Mujé binói ku katewi! ⁵A'lí echí Júrasi echo'ná pachá walubé Juríosi ri'obáwalachi waminá wichí a'wali echí baisá makói chirúlami wenomí plata. Echalí echí Júrasi ku simigá, a binói niráa wijaga kusébaga mukuli.

⁶Chopi echí jaré o'wéala sacerdote ku bi'nagá echí jaré chirúlami wenomí, a'lí a'nagupi jeaneli: Ketasi risensia ju máputa muchuwabo je'ná wenomí jena'í Riosi ri'obáwalachi wenomí muchuwálachi, mapujiti je'ná wenomí nijírami níili mapurigá bilé rijói waminá mi'lirúami níima. ⁷A'lí mapalí aboni ma a'nagupi katéwaga ra'íchali, echalí aboni ralali bilé kawí echí wenomí jiti, mapurigá echo'ná chu'wirótami níima echí jaré si'wina piréami pagótami, si'néami mapu ikí suwímea riwéali echo'ná walúlachi. ⁸Echijiti echí kawí jípi rawé iyénasí: Kawí léami, anilíwami ju. A'lí echo'ná kawichí níili mapo'ná chabénala echí pagótami echo'ná joka, machí pali echí wicholí, echí sikolí niwalíwami.

⁹Echirigá ne sébali ikili mapurigá echí walula Riosi jiti nawésami Jeramíasi riwéami anili, mapalí je'ná jerigá osali: Aboni chapili echí baisá makói chirúlami wenomí plata, mapu natétarami níili echí Binói jiti mapu echí jaré Israeli pagótami echirigá natéami mayeli. ¹⁰Echalí aboni suwaba nijili echí kawí ralíñala mapo'ná nirúali echí wicholí, sikorí niwalíwami, mapurigá tamí nuleli echí Walubela.

Jesusi wi'nijírami níili bacháami echí Pilato yuwa

(*Mr. 15:2-5; Lk. 23:3-5; Jn. 18:33-38*)

¹¹A'lí Jesusi echo'ná bacháami wilili echí walula silíami yuwa. Echalí echí walula silíami jeanigá rukueli: ¿Acha mujé ju echí jaré Juríosi pagótami walubela silínawala? Echalí Jesusi jeaneli: Mujemi ne bichíwaga aní mapu Nijeni ju. ¹²A'lí echí jaré o'wéala sacerdote, echí jaré o'wéala ochérami yuwa ne wabé wi'nijili echí Jesusi. Chopi Binói tarapé namuti ku nijéwali. ¹³A'lí echí Pilato jeaneli: Mujemi

galá nami mapurigá aboni wikabé namuti rugá mi sayéraga ra'icha. ¹⁴Chopi Jesusi tarapé bilé ku nijéwaga ra'íchali. Echijiti echi walula silíami wabé si'winárigá 'náitali, mapujiti Binói ke bilé namuti ku nijéwali.

Echi Pilato nulali mapurigá Jesusi mi'lirúami níima

(Mr. 15:6-15; Lk. 23:13-25; Jn. 18:38-19:16)

¹⁵ A'lí sinibí bamíbali, echalí omowálawachi sébachi, echi walula silíami ku machí pali bilé Juríosi rijói mapu pachá bachárami níili, mapuyíripi echi auché jaré Juríosi pagótami bilé ku machí pánala risensia tániko. ¹⁶ A'lí echalí pachá bachárami níili bilé wabé chati oláami rijói Barabasi riwéami. ¹⁷ A'lí echalí rawé mapalí echi wikabé pagótami napawika muchili, echalí echi Pilato jeanigá rukueli: ¿Chigá nalínatamo nakí mapu Nijeni ku machí pama? ¿Áchani ku machí pama echi Barabasi riwéami rijói, echi Jesusi kéremá, echi mapu Cristo anérami ju? ¹⁸ A'lí echi Pilato echirigá rukueli mapujiti binói galá machili mapu aboni ne wabé kichiga nijili echi Jesusi.

¹⁹ A'lí mapalí echi Pilato asali echo'ná echi walula silíami asíbalachi, echalí binói upila jeanigá júuli: Ketásirapé chibi olá echi galabé oláami Rijói, mapujítini wabé risúu níili jipi rawé mapalini we rimuli echi Jesusi jiti.

²⁰ Chopi echi jaré o'wéala sacerdote, ayénachó echi jaré o'wéala ochérami 'wérarali aneli echi pagótami mapu echi Barabasi tánama. Ayénachó mapurigá echi Jesusi waminá mi'lirúami níima. ²¹ A'lí echi walula silíami ku nijéwaga jeaneli: ¿Chuyíritamo nakí echi okuá, mapu Nijeni ku machí pama? Echalí aboni jeaneli: ¡Ku machí pa echi Barabasi! ²² Echalí echi Pilato jeaneli: ¿Chuchení olama echi Jesusi, echi mapu Cristo anérami ju? A'lí si'néami aboni o'weli ra'íchaga jeaneli: ¡Echo'ná kúrsichi michónntami nílaga! ²³ A'lí echi walula silíami jeanigá rukueli: ¿Piri chati olali je'ná rijói? Chopi aboni waminabi o'weli ra'íchaga jeaneli: ¡Echo'ná kúrsichi michónntami nílaga! ²⁴ Echalí echi Pilato ma riwisáa mapurigá binói ketasi biyiri niyúrali, chopi mapurigá echi wikabé pagótami waminabi wabé na'áwali, echalí echi Pilato ba'wí jiti paníkali echo'ná bacháami echi wikabé pagótami yuwa. Ayénachó echi Pilato jeanili: Nijeni tarapé chokila ju a je'ná galabé oláami Rijói waminá mi'lirúami níisa. Echijiti nijeni galá paníkali bacháami 'yemi yuwa. ¡Galá machisí mapu 'yémitamo chopi chokila ju! Mapujiti je'ná rijói chopi mi'lirúami níima mapujiti 'yémitamo echirigá nakili. ²⁵ Chopi ne si'néami echi jaré wikabé pagótami ku nijéwaga jeaneli: ¡Tamujé aboni chopi chokila nílabota, mapalí Binói mi'lirúami níima! A'lí echi jaré tamujé kúchuwala ayénachó chokila níima. ²⁶ A'lí echi Pilato ku machí pali echi Barabasi. A'lí ma nulasa mapu echi Jesusi waminá wipisótami níima, a'lí ayénachó nulali mapu Binói echo'ná biléana kúrsichi michóniga mi'lirúami níima.

²⁷ A'lí jaré echi walula silíami sontársawala chapigá toli echi Jesusi echo'ná pachá walú kalírali Betório anilíwachi. A'lí echo'ná pachá ne norigá Jesusi yuwa napawili ne si'néami echi wikabé sontarsi. ²⁸ A'lí mapalí aboni ma káraga 'yeli Binói napáchala, a'lí aboni sitákami kimeli echi Binói mapurigá bilé walula silíami niráa. ²⁹ A'lí aboni bilé so'uwá niwárami koyétali echo'ná Jesusi mo'ólachi. Echalí Binói ayénachó 'yárami níili bilé kusí echo'ná Binói sikálachi watoná, mapurigá bilé walula kusíwami niráa. A'lí aboni wabé tiníchaga niráa, echo'ná bacháami Jesusi yuwa chokóbaga jali. A'lí aboni jeanili: ¡Kuira, Mujé Walubela Juríosi Silínawala!

³⁰ A'lí aboni wabé kachípali echo'ná Binói akálachi, ayénachó echi kusí jiti wipisoli Binói mo'ólachi. ³¹ A'lí mapalí aboni ma sunili echirigá tiníchiya, echalí aboni ku 'yeli echi sitákami napácha. A'lí Binói níwala napacha ku napachátali. Echalí aboni waminá toli echi Jesusi mapurigá Binói mi'lirúami níima echo'ná kúrsichi michóniga.

Jesusi clavo jiti michántami níili echo'ná kúrsichi

(*Mr. 15:21-32; Lk. 23:26-43; Jn. 19:17-27*)

³² A'lí mapalí aboni ma ku 'machínaga simíbali echo'ná walúlachi jonsa, echalí aboni chapili bilé rijói echo'ná Sirénachi anilíwachi bitéami, mapurigá binói matórama echi kursi. ³³ A'lí aboni sili echo'ná Gorótachi anilíwachi mapo'ná anilíwami ju: Chu'wí mo'ólachi. ³⁴ Echalí Jesusi bajínala 'yálati echi uva ba'wila, bilé wabé chipúami owáami nasówaga. Chopi Binói galá machigá, ma ketasi bajínali.

³⁵ A'lí Jesusi echo'ná kúrsichi clavo jiti michónalamí níili, echo'ná Binói sikálachi, Binói ronólachi ayénachó. Echalí echi jaré sontarsi we rijibaka ri'yékali mapu chigá mema riwéali echi jaré namuti Binói níwala napacha. A'lí echirigá olárami níili mapurigá suwaba echirigá galá ikimea achigórigá mapurigá echi walula Riosi jiti nawésami anili, mapurigá bachá niráa je'ná jerigá osirúami níili echo'ná Riosi Ra'íchala oselíwalachi: Aboni chapigá rojuánali suwaba namuti Nijé níwala napacha. A'lí aboni rijibaka ri'yékali mapu chigá mema riwéali Nijé níwala kimila. ³⁶ A'lí echi jaré sontarsi echo'ná muchíbaga, galá tibútali. ³⁷ Echalí echo'ná kúrsichi ripá moba Jesusi mo'ólachi je'ná jerigá osirúami níili, mapurigá Binói je'ná jiti mi'lirúami níima riwéali: Je'ná, echi Jesusi ju, echi Walubela Juríosi Silínawala. ³⁸ Echalí rawé okuá rijói chigórami ayénachó ko'wirúami níili Jesusi yuwa, echo'ná auché jaréana kúrsichi michóniga. Bilé echo'ná watoná kúrsichi michántami níili. Auché bilé echo'ná o'winá kúrsichi michántami níili.

³⁹ A'lí echi jaré pagótami echo'ná simárami, ne mo'ólaga, tiníchaga, ⁴⁰ yóniga jeaneli: ¡Mujé mápumi najunama echi walubé Juríosi pagótami ri'obáwala, mápumi bikiyá chírigá auchecho ku niwama, a binói ku'wira! ¡A mi bi'nélipi Riosi Ranala níisagá, ku rikina echo'ná kúrsichi jonsa! ⁴¹ Echirigá echi jaré o'wéala sacerdote, echi jaré nularíwami binériami ayénachó, echi jaré Bariseo anilíwami binériami ayénachó, echi jaré o'wéala ochérami asichiko, si'néami achigórigá we kichiga tiníchaga jeanili: ⁴² Binói auché jaré ku'wíraga olali, chopi a Binói ketasi omero ku'wíriya. Je'ná, ne bichíwali níisagá tamujé Isaeli pagótami walubela silínawala, galá níima ku rikinsa echo'ná kúrsichi jonsa. ¡Echalíta ne galá bichíibo Binói! ⁴³ Je'ná rijói anili mapu Binói galá bichílico Riosi. Jipi galá níima Riosi ku'wírasa echi Binói, a galá nakisáagá Riosi, mapujiti je'ná rijói jeanili: ¡Nijé bi'nélipi Riosi Ranala juni! ⁴⁴ A'lí echirigá achigórigá kichiga tiníchaga ra'íchali echi okuá chigórami mapu achigórigá kúrsichi michántami níili Jesusi yuwa.

Echi Jesusi ma mukuli

(*Mr. 15:33-41; Lk. 23:44-49; Jn. 19:28-30*)

⁴⁵ A'lí echalí rawé ne wabé rokowáli ne buchuwí jena'í wichimóbachi, nasipa rawé jonsa, ma kisúwachi yénasi. ⁴⁶ A'lí echalí ma pee kisúwachi alíwachi Jesusi o'weli ra'íchaga jeanili: Elí, Elí, ¿lama sabaktani? Mapu Ralámuli ra'íchali niráa, je'ná jerigá aniwáami ju: Keni Riósawa, keni Riósawa, ¿churékulamí tamí bi'neli ariwelí?

⁴⁷ A'lí jaré echo'ná muchúami ma námaga mapurigá Binói ra'íchali, a'lí jeanili: ¡Je'ná Rijói, echi Elíasi bayéchani! ⁴⁸ A'lí bilé aboni we yáati 'maga sa'méchali bilé táchaa bo'osali echo'ná wabé chipúami uva ba'wílachi. A'lí echo'ná biléana kusírali ochogá 'yali echi Jesusi, chunugá bajínala. ⁴⁹ A'lí echi auché jaré jeanili: Ariwesi. 'Nebo acha nolínama echi Elíasi, ku'wírimiya. ⁵⁰ A'lí mapalí Jesusi ma auchecho siné o'weli ra'íchali, echalí ma mukuli njaga Binói aliwala ma.

⁵¹ A'lí echalí echi walubé chiní, we ru'náami, mapuyiri kimá, mapu echo'ná pachá echi walubé Juríosi ri'obáwalachi chukuli, ke sayiná ripana jonsa okoná nasipa chi'wali. A'lí echi kawí wabé nokali. A'lí wikabé rité wabé rapali. ⁵² A'lí wikanáami chu'wétachi ke sayiná ku iráparami níili. A'lí wikabé galá bichíyami pagótami mapu chabé suwili, ma ku o'winali. ⁵³ A'lí mapalí Cristo ma ku owinali, echalí aboni ku 'machínali echo'ná chu'wétachi jonsa. A'lí echo'ná galabé walúlachi sigá, wikabé jiti riwirúami níili.

⁵⁴ A'lí echi walula kapitani, bilé kiento sontarsi nuleámi, ayénachó echi auché jaré binói yuwa muchúami mapu tibuli echi Jesusi, si'néami aboni galá riwisá mapurigá wabé nokali echi kawí, ayénachó riwisá suwaba je'ná jerigá ikíachi, a'lí aboni ne wabé majaga jeanili: ¡Ne bichíwali je'há Rijói bi'nélipi Riosi Ranala níili! ⁵⁵ A'lí echo'ná mikabé 'nagá muchili wiká muguí, echi jaré mapu Jesusi yuwa ku'wíribiya najáitali echo'ná Galiléachi anilíwachi kawírali jonsa. ⁵⁶ A'lí echi María, echo'ná Makatárachi bitéami bilé níili echi auché jaré muguí yuwa. Echi auché bilé María, echi Jakobo, echi José iyela auché bilé níili echi wiká yuwa. Echi Sibireo riwéami rijói kúchuwala iyela ayénachó bilé níili echi jaré yuwa.

Echi Jesusi chu'wirótami níili

(Mr. 15:42-47; Lk. 23:50-56; Jn. 19:38-42)

⁵⁷ A'lí echalí rawé mapalí ma alíwachi níili, echo'ná nawali bilé rijói wabé níwami, José riwéami, echo'ná Arimatéachi bitéami, echi mapu ayénachó Jesusi yuwa binéami níili. ⁵⁸ A'lí je'ná rijói nawali echo'ná mapo'ná echi Pilato asali. A'lí binói tónalaga tánali echi Jesusi mukúami sapala. A'lí echi Pilato nulali 'yánala. ⁵⁹ A'lí echi José chapigá echi mukúami sapala, a'lí bilé bi'wíami chiní kimila jiti kabilí. ⁶⁰ Echalí echi José chu'wirolí Jesusi mukúami sapala echo'ná biléana chu'wechi mapo'ná bukulí iwarárami níili echo'ná ritérali mapurigá risochí niráa. A'lí bilé walú rité jiti 'yérali. Echalí echi José ku simili. ⁶¹ A'lí echo'ná bacháami chu'wechi ayénachó muchili echi María echo'ná Makatárachi bitéami, echi auché bilé María ayénachó.

Jaré sontarsi julálati tibúnala echo'ná chu'wechi mapo'ná Jesusi chu'wirótami níili

⁶² A'lí echalí ba'alínala isábawachi rawé echi jaré o'wéala sacerdote, echi auché jaré Bariseo yuwa, si'néami napawili echo'ná bacháami echi Pilato yuwa. ⁶³ Echalí aboni jeaneli: Walula, tamujeta newalá mapu echi wabé 'yékami Rijói chabé anili mapalí Binói abijí bitéali, mapu Binói ku owínama ma bakiyá chi'rigá, mapalí Binói mi'lirúami níisa. ⁶⁴ Galá níima mujé nulasa echo'ná chu'wechi tibúnala mapu yénasí bikiyá chi'lesa, mapurigá echi jaré mapu Binói binérali ketasi rokogó niráa sigá 'wísama Binói mukúami sapala. Echalí aboni jeanema echi pagótami: ¡Ma ku owinali, mapalí ma mukúami níili! Echalí aboni wabé simírami 'yékama echi pagótami, ketasi mapurigá chabé chokichí. ⁶⁵ Echalí echi Pilato jeaneli: Echo'ná

tibúnala jaré sontarsi. Ku simíbaga, ne galá tibútanarasi echo'ná chu'wechi, mapurigátamo mayé mapu ne 'wéraili ju. ⁶⁶Echalí aboni ku simíbaga júuli echi jaré sontarsi echo'ná chu'wechi tibúnala. A'lí aboni ne galá 'yeli echo'ná chu'wechi yéwalachi, echi walubé rité jiti. Ayénachó aboni echo'ná ritérali noligá uchugá, moba oseli mapurigá ke wesi irápama.

Jesusi ku owínali mapalí ma mukúami níli

(*Mr. 16:1-8; Lk. 24:1-12; Jn. 20:1-10*)

28 A'lí ma simírasa echalí isábawachi rawé, ba'alínala bi'yábijí mapalí ma chi'láali echalí oméachi rawé, echalí echo'ná chu'wechi 'nébiya sili echi María echo'ná Makatárachi bitéami, echi auché bilé María ayénachó. ²A'lí ke sayiná ne wabé nokali echi kawí, mapujiti bilé walula Riosi capitánawala ripá riwigachi jonsa rikínaga, echo'ná nawagá ri'nabuli echi walubé rité echo'ná chu'wechi yéwalachi atíami. A'lí échiko echo'ná moba asíbali. ³A'lí echi walula Riosi capitánawala ne wabé simírami ratábami níli mapurigá echi ukuí ni'wíami niráa. Ayénachó binói napáchala ne wabé rosákami níli mapurigá echi kipalí. ⁴A'lí echi jaré sontarsi tibúami ne wabé majajali echi binói jiti. A'lí aboni echirigá ne wabé sayilúmaga majaga bitíbali mapurigá suwíami niráa.

⁵Echalí echi walula Riosi capitánawala jeaneli echi muguí: Ketasi majasi 'yemi, mapujiti nijeni galá machí máputamo amí echi Jesusi, echi mapu echo'ná kúrsichi clavo jiti michóniga mi'lirúami níli. ⁶¡Binói ketasi te jena'ibi, mapujiti ma ku owínali, mapurigá Binói 'yemi mi bachá niráa aneri mapu ikimea riwéali! Wakiná simíbaga, 'nesi mapo'ná echi Walubela Jesusi rikárami níli. ⁷Wabé sapuka simíbaga ruyébasi echi jaré mapu Binói binérali, mapurigá Binói ma ku owínali. Nibira, Binói 'yemi mi yuwa bachá simea echo'ná Galiléachi anilíwachi kawírali. Echo'nátamo riwiboa echi Binói. Nibira nijeni 'yemi mi ma echirigá ne bichíwaga ruyeli. ⁸Echalí echi 'muguí ne wabé majaga ku simíbali echo'ná chu'wechi jonsa, chopi aboni ayénachó ne wabé kaníli. A'lí aboni ne júmaga ku simíbali, ne bukulíwami niráa ruyébiya echi jaré mapu Jesusi binérali. A'lí mapuyénasí aboni abijí echirigá sírali, ⁹echi Jesusi ke sayiná echo'ná nawagá natépali aboni. Echalí Jesusi jeaneli: ¡Kuiral! ¡Kanílasi! A'lí echi jaré 'muguí echo'ná sigá, bacháami Binói yuwa chokóba jaga wabé walubélaga aneli, Binói ralálachi chapigá. ¹⁰A'lí Jesusi jeaneli: Kestasi majasi. Ma ku simíbaga ruyébasi echi jaré Nijé ritémawala je'ná jerigá mapurigá ne bukulíwami ikili. Jeanesi mapurigá aboni simama echo'ná Galiléachi anilíwachi kawírali. ¡Echo'ná aboni tamí riwimea!

Echi jaré sontarsi wabé 'yékaka nawésali

¹¹A'lí mapuyénasí echi jaré 'muguí echirigá simíbali, echalí echi jaré sontarsi mapu tibuli echo'ná chu'wechi, abóniko echo'ná walúlachi ku ruyébiya sili echi jaré o'wéala sacerdote, ne suwaba mapurigá ikili. ¹²A'lí echi jaré o'wéala sacerdote napawili echi jaré o'wéala ochérami yuwa. A'lí mapalí aboni ma a'nagupi katéwaga ra'íchali, echalí aboni wikabé natétali wenomí echi jaré sontarsi. ¹³Ayénachó jeaneli: Jeanési 'yemi: Echi jaré mapu Jesusi binérali, abóni rokogó niráa sigá 'wísalí Binói mukúami sapala, mapalí tamujeta we kochigá bitili. ¹⁴A'lí echi walula silíami a galá námsagá je'ná jeyiri, echalí tamujeta galá katéwaga anebi echi binói, mapurigá 'yemi ketasi echijiti kastigo 'yárami níbo. ¹⁵Echalí echi jaré sontarsi ma naresa

echi wenomí, echirigá aneli echi jaré pagótami mapurigá aboni nulérami níili. A'lí je'ná echirigá anirúami ne sélá ruyérami níili echi jaré Juríosi pagótami yuwa, echalí rawé jonsa, jipi rawé yénasí.

Jesusi nawésanala júuli echi jaré mapu Binói binérali

(Mr. 16:14-18; Lk. 24:36-49; Jn. 20:19-23)

¹⁶ A'lí echi jaré makói miná bilé binéami ku simíbali echo'ná Galiléachi, echo'ná ripá biléana rabó mapo'ná Jesusi chabénala aneli mapo'ná aboni riwimea riwéali echi Binói. ¹⁷ A'lí mapalí aboni riwali echi Jesusi, echalí aboni bacháami Binói yuwa, wéemi raweka, chokoba jaga walubélag aneli. Chopi jaré ketasi 'me galá bichíili. ¹⁸ Echalí Jesusi echo'ná nawagá jeaneli: Mani 'yárami ju mapurigá Nijeni ne suwaba omérami níima echo'ná ripá riwigachi, jena'í wichimóbachi ayénachó. ¹⁹ Echijiti ku simíbaga 'yemi, galá bichíiraga binérasi ne si'néami echi jaré pagótami, ne suníami jena'í wichimóbachi piréami. A'lí mapalí aboni galá bichíiko, echalítamo ne si'néami pagopo aboni, mapurigá si'néami echi auché jaré pagótami ne galá machimea mapu echi jaré bichiyami galá ku'wíratami ju Riosi Onorúami jiti, echi bilepi Riosi Ranala jiti ayénachó, echi wabé Galabé Riosi Iwigala jiti asíchiko. ²⁰ Ne galá binérasi echi jaré pagótami mapurigá aboni galá nijéwaga olama ne suwaba namuti mapurigá Nijeni 'yemi mi nuleli. Ayénachó ne galá machisí mapurigá Nijeni 'yemi mi yuwa atí sinibí rawé, echalí ne jubá wichimóbachi suwibáluchi rawé yénasí. ¡Echirigá nílaga!

SAN MÁRKOSI

osali je'ná wabé Galabé Ra'íchali

Jesucristo jiti rugá

Echi Juani mapu pagóami níili we nawésali echo'ná biléana waná

(Mt. 3.1-12; Lk. 3.1-9, 15-17; Jn. 1.19-28)

1 Je'ná jerigá chótani echí we Galabé Riosi Ra'íchala osayá. Je'ná Ra'íchali 'yemi mi ruyé echí Walubela Jesucristo jiti nawésaga, mapujiti Binói ju bi'nélipi Riosi Ranala. ²Echi walula Riosi jiti nawésami Isaíasi riwéami je'ná jeanigá osali: Waminá bacháami mapo'nami simírama, echo'ná a'láranala julámani bilé keni kapitánawa.

Échiko bachá nawésama echí jaré pagótami mapurigá aboni mi galá bichíima, echalí mapalí Mujé echo'ná nawama.

³ Bilé rijói o'weli ra'íchaga nawésama echo'ná biléana waná kawichí. Je'ná jeanigá nawésama: Echi Walubela ke sayiná nawama jena'í wichimóbachi.

Alí mapalí bilé walula echirigá nawama, 'yémitamo we galá a'lara echí buwé mapurigá echo'ná galá simírama echí walula.

Jipi, ayena cho galá a'lárasí 'yemi aboni sulálachi, achigórígá mapurigátamo sinibí galá a'lara echí buwé.

⁴ Alí echí Juani echirigá iyénali echo'ná biléana waná kawichí. Binói galá pagoli echí jaré pagótami echo'ná síami. Alí binói bachá niráa we galá nawésali jeanigá mapurigá si'néami aboni ba'wí jiti pagótami níima, ayena cho mapurigá aboni auchecho si'winárígá, ne galabé niráa 'nátaga, ku ro'wima Riosi yuwa, mapurigá Riosi ku wikáwama suwaba mapurigá aboni chati olali. ⁵ Alí ne si'néami echo'ná Juréachi anilíwachi kawírali piréami kipúbiya simíbali echo'ná mapo'ná echí Juani nawesa asali. Alí echo'ná walúlachi Jerusalémachi anilíwachi piréami ayena cho echo'ná sili. Alí echo'ná bakochi Joránachi anilíwachi echí Juani galá pagoli echí si'néami pagótami, mapalí aboni ku rugá nawésali suwaba mapurigá aboni ma chati olali.

⁶ Alí echí Juani echí kameyo anilíwami bo'wala napacha iyénali. Ayena cho bilé wichí puka iyénali. Alí binói ko'wali echí korochi wakichéami; ayena cho ko'wali echí kolimena, echo'ná kawichí nirúami. ⁷Echi Juani ne galá nawésali echí jaré pagótami jeanigá: Echi Walubela pe mulubé jubá tamí yuwa inaro. Nijé ketásini 'me walula ju mapurigá Binói niráa. Ketásini 'me we galá ju mapurigani murubéanama Binói yuwa. Nirapeni galá ju mapurigani akarápatama Binói akalá. ⁸ Alí echí Juani

ayena cho jeanigá nawésali: Nijé 'yemi nimí pagoli ba'wí jiti, chopi echí Walubela 'yemi mi 'yama echí We Galabé Riosi Iwigala.

Echi Jesusi ba'wí jiti pagótami níili

(Mt. 3.13-17; Lk. 3.21-22)

⁹ Alí echalí rawé Jesusi ku simili echo'ná Nasarétachi anilíwachi jonsa. Echo'ná Nasarétachi biléana walúlachi ju, echo'ná Galiléachi anilíwachi kawírali nirúami. Alí Jesusi nawali echo'ná bakochi Joránachi anilíwachi. Alí Juani echo'ná bakochi pagoli echí Jesusi. ¹⁰ Alí mapalí Jesusi ku machínali echo'ná ba'wírali jonsa, alí Binói riwali echo'ná ripá riwigachi, mapurigá we iráparami niráa níili. Alí echí Jesusi we yáati riwali echí Wabé Galabé Riosi Iwigala echo'ná Binóichi moba rikínamí mapurigá bilé makawi niráa. ¹¹ Alí Jesusi galá námali mapalí Riosi, echo'ná ripá riwigachi jonsa, ra'fchaga jeaneli: Mujé ju bilepi keni Raná. Nijé nimí ne wabé galé. Mujemi tamí ne wabé kanírali.

Echi riablo nakili mapu Jesusi we chati olama

(Mt. 4.1-11; Lk. 4.1-13)

¹² Alí echí We Galabé Riosi Iwigala we yáati bayérali echí Jesusi echo'ná biléana waná kawichí. ¹³ Alí Jesusi tibili echo'ná waná kawichí nawosa makói rawé yénasí. Echo'ná kawichí mapo'ná Binói asali jaré jobátami namuti chopi nirúali. Alí echí riablo, Satanasi riwéami, echo'ná nawagá ra'íchali Jesusi yuwa, mapujiti echí riablo wabé nakili mapurigá Jesusi we chati olama, chopi Binói ketasi nijéwali. Alí echí jaré o'wéala Riosi kapitánawala echo'ná sigá we galá ku'wírali.

Jesusi chótali nawesa

(Mt. 4.12-17; Lk. 4.14-15)

¹⁴ Alí mapalí ma bachálati echí Juani, Jesusi nawisásya simili echo'ná Galiléachi anilíwachi kawírali. Alí Binói nawésali echí We Galabé Riosi Ra'íchala, jeanigá mapu Riosi ne galá nulema ne si'néami pagótami. ¹⁵ Alí Binói jeanili: Ma sébali téitali. Ke 'me ayó rawé Riosi ma galá nulema si'néami pagótami. Bukulíwami galabé si'nú niráa 'natasí. Galá bichíssi je'ná Galabé Riosi Ra'íchala.

Jesusi bayeli nawó rijói mapu rochí sirúami níili

(Mt. 4.18-22; Lk. 5.1-11)

¹⁶ Alí Jesusi iyénali echo'ná walú ba'wírali suwé, echo'ná Galiléachi anilíwachi. Echo'ná riwali echí Simoni, echí binói Simoni rijimala, Antresi riwéami ayena cho. Echi mapu aboni we sirúami níili rochí. Echijiti aboni rílé ba'wírali botubuli echí walú chipérámi chiní téitali, mapurigá aboni echirigá chapimea jaré rochí. ¹⁷ Alí Jesusi jeanili: 'Yémítamo rochí sirúami ju. Jipi tamí yuwa najátasi. Nijé 'yemi nimí binérama mapurigátamo galá omérabo binériya echí auché jaré pagótami, mapurigá aboni galá tamí bichíima. ¹⁸ Alí aboni we yáa ariwesa echí walú chipérámi chiní téitali, Jesusi yuwa simíbali.

¹⁹ Echo'ná jonsa, Jesusi pe minana simigá riwali echí Jakobo, echí Juani ayena cho, echí mapu okuánika najirémami níili, echí bilé rijói Sibiréo riwéami kúchuwala. Je'ná okuá najirémami muchili echo'ná pachá biléana walú barko anilíwami. Alí echí barko mapuyiri bilé walubé kajoni niwárami níili, echí mapu echo'ná walú ba'wírali

moba yénali. Alí aboni pachókiya muchili echi walú chipérami chiní tétami, mapujiti aboni echi walú chipérami chiní tétami jiti chapili echi wikabé rochí. ²⁰ Alí Jesusi bayeli echi aboni. Okuánika we yáati ariwesa kepu onó, Sibireo riwéami, Binói yuwa simíbali. Echi Sibireo echo'ná pachá bárkochi tibili, echi jaré binói piónawala yuwa.

Jesusi ku sa'wali bilé rijói mapu we chati riablo aliwala aliwéami níili

(Lk. 4.31-37)

²¹ Alí aboni sili echo'ná walúlachi Kapernaúmachi anilíwachi. Alí echalí isábawachi rawé Jesusi simili echo'ná echi jaré Juríosí anilíwami pagótami ri'obáwalachi. Alí Binói galá binérali echo'ná piréami pagótami. ²² Alí mapalí Jesusi binérali echi pagótami, aboni we galá kilí kipuli, mapujiti Binói ra'íchali mapurigá bilé walula niráa. Ketasi ra'íchali mapurigá echi jaré nulalíwami binériami ra'íchala. Aboni chopi binérali mapurigá echi Moisesi osogá nulali.

²³ Alí echo'ná pachá ri'obachi bilé rijói asali mapu wabé chati riablo aliwala aliwéami níili, mapu o'weli ra'íchaka, ²⁴ jeanili: ¿Churékulami tamujé tamí kumé Mujé Jesusi, Nasarétachi bitéami? ¿Áchami nawali tamujé tamí suwábamiya? Nijé nimí galá machí. Mujé ju echi we galabé Rijói mapu mi Riosi jiti julárami ju. ²⁵ Alí Jesusi we yónali echi we chati aliwá jeanigá: ¡Kilí asá mujé we chati aliwá! ¡Ariwé echi rijói! ²⁶ Alí echi we chati riablo aliwala ne wabé jiwériga sayilúmtali echi rijói. Alí echi we chati aliwá o'weli sinaga, we yáati ku machínali echo'ná pachana echi rijói sulálachi jonsa. ²⁷ Alí si'néami echi jaré pagótami wabé majaga 'nénaga, aboni a'nagupi rukueli jeanigá: ¿Piri ju je'ná? ¿Churigá bukulíwami ra'íchali ju je'ná? Je'ná Jesusi we jiwériga nulé echi jaré we chati riablo aliwala. Alí aboni we galá nijéwa. ²⁸ Alí ne si'néami echo'ná Galiléachi anilíwachi kawírali piréami we yáati ikíali mapurigá Jesusi echirigá wabé jiwériga olali.

Jesusi ku sa'wali echi Pegro wasila

(Mt. 8.14-15; Lk. 4.38-39)

²⁹ Mapalí aboni ku simíbali echo'ná ri'obachi jonsa, alí Jesusi simili echo'ná kalfráli mapo'ná echi Simoni, echi Antresi piréali. Ayena cho napawika simíbali echi Jakobo, echi Juani yuwa. ³⁰ Alí echi Simoni wasila we ínuwa nayú bu'wili. Alí ruyélati echi Jesusi mapurigá echi mukí we nayúami níili. ³¹ Alí Jesusi echo'ná nawagá, echi mukí nayúami sikala chapigá, ku achali. Alí echi mukí we yáati ku sa'wisá, galá ku nigúuraga nóchali.

Jesusi ku sa'wali ne wikabé nayúkami

(Mt. 8.16-17; Lk. 4.40-41)

³² Alí pe alí, ma bokowíachi rayénali, wikabé pagótami echo'ná sili mapo'ná Jesusi asali. Aboni echo'ná pali si'néami mapu ikí echo'ná piréami nayúkami níili. Ayena cho echo'ná pálati echi jaré mapu wabé chati riablo aliwala aliwéami níili. ³³ Alí echo'ná walúlachi piréami ne si'néami napawili echo'ná yéachi mapo'ná Jesusi asali. ³⁴ Alí Jesusi wikabé ku sa'wali echi jaré mapu chibi yiri nayúkami níili. Ayena cho nuleli mapurigá ku machí simama wikabé wabé chati riablo aliwala mapu echo'ná pachana jaré pagótami sulálachi muchili. Alí Jesusi tarapé risénsia 'yali mapu echi jaré chati aliwá ra'ichama, mapujiti aboni galá machili mapu Binói Jesusi bi'nélipi níili Riosi Ranala.

Jesusi nawesa iyénali echo'ná Galiléachi

(Lk. 4.42-44)

³⁵ Alí ba'alínala bi'yá chónachi Jesusi ku asísali. Alí Binói simili echo'ná biléana waná kawichí, mapo'ná Binói ra'íchali Riosi yuwa. ³⁶ Alí pe wilibeko echi Simoni, ayena cho echi auché jaré binói yuwa muchúami jubáami ásaka najátali. ³⁷ Alí ma riwisá echi Jesusi, aboni jeaneli: ¡Ne si'néami pagótami mi ami! ³⁸ Ali Jesusi nijéwaga jeaneli: Ma simabo echo'ná echi auché jaréana mulubé rijówachi, mapurigani nawésama echo'ná piréami pagótami. Nijeni je'ná chopi jiti nawali, mapurigani nawésama echi jaré pagótami. ³⁹ Alí Jesusi ne suníami echo'ná Galiléachi anilíwachi kawírali iyénaga, ne galá nawésali echo'ná suníami echi jaré Juríosi ri'obáwalachi. Alí Binói ku machí a'wali echi jaré we chati riabla aliwala, echo'ná jaré pagótami sulálachi muchúami.

Jesusi ku sa'wali bilé rijói wabé chati sití cha nayúami

(Mt. 8.1-4; Lk. 5.12-16)

⁴⁰ Alí mapo'ná Jesusi asali, echo'ná nawali bilé rijói wabé chati cha nayúami. Echi rijói chokoba wiligá risúu anigá jeaneli: A Mujé nakisáagá, Mujé galá omériami ju mapurigami tamí ku sa'wama. ⁴¹ Alí Jesusi we natimaga chapisá echi nayúami rijói sikala, jeaneli: ¡Nijeni we galá nak! ¡Mami ku sa'wárami níima! ⁴² Alí mapalí Jesusi echirigá aneli, we yáati ku sa'wili echi rijói. Ma ketasi waminabi nayúami níili. ⁴³ Alí Jesusi ku ripóraga echi rijói, ne galá jeanigá nuleli: ⁴⁴ Tarapé wesi ku ruyé mapurigami ku sa'wárami níili. Chopi ku simigá 'nérami echi sacerdote anilíwami rijói mápumi ma ku sa'wárami ju. Alí 'yami echi jaré namuti mapu Moisesi osogá nulali mapu mi 'yama riwéali mapujítimi ma ku sa'wíami ju. Echirigá olá mapurigá echi auché jaré pagótami galá machimea mápumi ma ku sa'wíami ju. ⁴⁵ Chopi echi rijói ku simigá, we yáati chótali si'néami pagótami nawésiya mapurigá Jesusi echirigá ku sa'wali binói. Echijiti Jesusi ma tarapé oméralli machiná niráa iyena nibiléana walúlachi, mapujiti ne wikabé pagótami sinibí ne cha'igá napawili mapo'ná Binói asali, mapujiti si'néami pagótami wabé nakili mapu 'nema echi Binói Jesusi. Echijiti Jesusi we iyénali echo'ná jaréana waná kawichí. Chopi ne suníami piréami pagótami echo'ná sili Binói yuwa.

Jesusi ku sa'wali bilé rijói ke akáanami

(Mt. 9.1-8; Lk. 5:17-26)

2 Alí pée wakinánokuá rawé Jesusi ku nawali echo'ná walúlachi Kapernaúmachi. Alí ne si'néami echo'ná piréami galá ruyélati mapu Binói ku asali echo'ná Binói bitéalachí. ² Alí we yáati wikabé pagótami ne cha'igá napawili echo'ná mapo'ná Jesusi asali, mapuyénasí auché jaré ma ketasi oméralli echo'ná yéachi mulubéana. Alí Jesusi chopi echi We Galabé Riosi Ra'íchala nawésaga ruyeli echi pagótami. ³ Alí nawó rijói echo'ná pali bilé rijói ke akáanami, echi mapu tarapé oméralli asísiya. ⁴ Alí echo'ná pachá kalírali mapo'ná Jesusi asali, aboni tarapé oméralli mo'wiyá, mapujiti ne wikabé pagótami ne cha'igá muchili. Alí ripana kalírali irápaga, wiíti bologá siméralli echi rijói ke akáanami. Echirigá echo'ná pachá rikibuli mapo'ná Jesusi asali. ⁵ Alí Jesusi galá machili mapurigá aboni galá bichíyami níilo, echijiti Binói jeaneli echi rijói ke akáanami: Kení raná, mami galá ku wikawárami ju ne

suwaba mapurigami chati olali. ⁶ Alí echo'ná 'nagá muchili jaré rijói mapu Riosi nulalila binériami níili. Alí aboni je'ná jerigá 'nata muchili: ⁷ ¿Churékula echirigá ra'icha je'ná rijói? Binói ne wabé sayéraga ra'icha echi Walubela Riosi, mapujiti ke wesi rijói galá omero ku wikáwiya echi pagótami chati olalila. Chopi Riosi galá omero ku wikáwiya. ⁸ Alí Binói Jesusi we galá machili echirigá 'nátachi aboni. Alí Binói jerigá rukueli: ¿Churékulátamo echirigá 'nata? ⁹ Alí Jesusi ayena cho jeaneli: Ketasi 'me oméami ju mapurigá Nijeni jeanema je'ná rijói: Mapurigami chati olali, ma galá ku wikawárami ju. Nibilé cho oméami ju mapurigá Nijé jeanema: ¡Ku wilísaga ku simigá! ¹⁰ Alí Jesusi ayena cho jeaneli: Riosi tamí wilali mapurigá Ku'wíriami niráa. Alí Nijeni je'ná jerigá olá mapurigátamo galá machiboa mapurigá Nijé galá omero ku wikáwiya echi pagótami chati olalila. Alí Binói jeaneli echi rijói ke akáanami: ¹¹ Nijé nimí ané: ¡Ku wilísaga, ku chapisá kemi kimá, ku simigá echo'ná kemi bitélachi! ¹² Alí echi rijói ke akáanami we sapú ku wilísali. Alí ku chapigá binói níwala kimá, echo'ná abónichi jonsa ku simili. Alí echi auché jaré echo'ná muchúami ne wabé majaga 'nénaga waminabi walubéraga aneli Riosi jeanigá: ¡Tarapé sineta riwali echirigá omériga oláami bilé rijói!

Jesusi bayeli echi Libí

(Mt. 9.9-13; Lk. 5.27-32)

¹³ Alí Jesusi auché siné simili echo'ná walú ba'wírali suwé. Si'néami pagótami echo'ná sili mapo'ná Binói asali. Alí Binói galá nawésaga binérali echi wikalé pagótami. ¹⁴ Alí mapalí Jesusi ku simili echo'ná jonsa, echo'ná riwali echi Libí riwéami rijói, echi Alibeo riwéami rijói ranala. Alí echi Libí wenomí napabuya asali mapurigá natétama echi walula silíami echo'ná nuláami. Alí Jesusi echo'ná simíraga jeaneli: ¡Tamí najató! Alí echi Libí we sapú wilísaga, echi Jesusi yuwa simili.

¹⁵ Alí echi Libí bayeli echi Jesusi mapurigá Binói echo'ná Libí bitélachi ko'mea. Auché jaré wikalé echi jaré wenomí napabúami ayena cho bayérami níili. Alí wikalé Juríosí anilíwami pagótami ayena cho bayérami níili, echi jaré mapu echi auché jaré Juríosí chati oláami niráa aneli. Je'ná pagótami, si'néami echo'ná napawika ko'yá muchili, echi Walubela Jesusi yuwa. Echi auché jaré mapu Jesusi binérali ayena cho echo'ná muchili, mapujiti wikalé pagótami Jesusi yuwa najátali. ¹⁶ Alí echo'ná muchili jaré Bariseo anilíwami binériami, ayena cho auché jaré rijói mapu Riosi nulalila binériami níili. Je'ná si'néami galá riwali mapurigá Jesusi ko'yá asali echi jaré wenomí napabúami yuwa, ayena cho echi auché jaré yuwa mapu aboni aneli chati oláami niráa. Echijiti aboni jeanigá rukueli echi jaré mapu Jesusi binérali: ¿Churékula echi Jesusi ko'wá, ayena cho bají echi jaré wenomí napabúami yuwa, ayena cho echi auché jaré yuwa mapu chati oláami anérami ju? ¹⁷ Alí Jesusi je'ná jerigá namsa, jeaneli: Echi jaré mapu ketasi nayúkako ketasi newalé bilé óyami. Chopi echi jaré nayúkami ne bichíwali newalé bilé óyami. Nijé ketásini bayémiya nawali echi jaré galabé oláami pagótami. Chópini bayémiya nawali echi jaré chati oláami pagótami.

Jesusi binérali echi jaré pagótami

(Mt. 9.14-17; Lk. 5.33-39)

¹⁸ Alí echi jaré mapu Juani binérali, aboni wi'llibé niráa ketasi ko'wali mapalí aboni chopi Riosi yuwa ra'icha muchili. Echi jaré Bariseo ayena cho achigórígá olali. Alí

siné rawé jaré pagótami jeaneli echí Jesúsi: Echi jaré mapu Juani binérali ketasi ko'wá, wi'libé niráa, mapalí aboni chopí Riosi yuwa ra'icha. Alí echí jaré Bariseo anilíwami binériami ayena cho achigórigá olá. ¿Churékula echí jaré mapu Mujé binérali arigá sinibí wabé ko'wá? ¹⁹Alí Jesúsi jeanigá rukueli: ¿Kecha we ko'mea echí jaré pagótami mapu echí jaré bukulí niwíami yuwa muchuwí? Ayena cho jeaneli: Echi pagótami arigá ko'mea mapalí echí rijói bukulí niwíami abijí echo'ná aboni yuwa atí. ²⁰Chopí pée waminánomí mapalí echí bukulí niwíami ketasi aboni yuwa asimea, echalí aboni wi'libé niráa ketasi ko'mea.

²¹ Alí tarapé wesi pachókama bilé luwíami napacha echí bukulíwami chiní jiti, mapujiti echirigá pachókasuwa, echí bukulíwami pachókarami we téeli nílama, ma wichósuwa. Alí echí luwíami napacha waminabi chi'wama. ²²Nirapé wesi ro'wama echí bukulíwami uva anilíwami ba'wila echo'ná pachana jaréana sití wichí chiwáwalachi. Echirigá olásagá, ma ronínasa, echí uva ba'wila we chi'wanama echí sití wichí chiwáwala. Alí káraga ku'lima echí uva ba'wila, ayena cho echí wichí chiwáwala káraga chi'wama. Echijiti galá níima ro'wasa echí bukulíwami uva ba'wila ke cho ronóami, echo'ná pachana jaréana bukulíwami wichí chiwáwalachi.

Echi jaré binéami mosika kuli turío

(Mt. 12.1-8; Lk. 6.1-5)

²³ Alí siné isábawachi rawé Jesúsi simírali echo'ná mapo'ná turío ichílati, echí jaré mapu Binói binérali yuwa. Alí echí jaré mapu Binói binérali echo'ná simáraga mosika kuli turío. ²⁴Echalí echí jaré o'wéala binériami, Bariseo anilíwami rijói jeanigá rukueli: ¿Churékula echirigá olá echí jaré mapu Mujé binérali? Mapujiti ketasi risensia ju máputa echirigá olabo jipi isábawachi rawé. ²⁵Chopí Jesúsi jeanigá rukueli: ¿Kéchatamo siné 'nénali mapurigá osirúami ju echo'ná Riosi Ra'íchala oselíwalachi mapurigá echí walula Rabiri olali mapalí binói we newaleli ko'wáami, mapalí binói we 'locheli, echí auché jaré binói yuwa muchúami ayena cho? ²⁶Mapujiti echí Rabiri bakili echo'ná pachá Riosi ri'obáwalachi mapalí echí Abiatari riwéami rijói walula sacerdote anilíwami níli. Echalí echí Rabiri ko'wali echí jaré pani mapu echo'ná pachá, Riosi 'yárami níli. Alí ketasi risensia níli mapu echí Rabiri ko'mea. Chopí risensia níli mapu echí jaré sacerdote chopí ko'mea. Alí echí Rabiri arigá kosá ayena cho 'yalí ko'nula echí auché jaré rijói mapu binói yuwa muchili.

²⁷Echalí Jesúsi ayena cho jeaneli: Riosi nuleli echí pagótami mapurigá galá isábama sinibí isábawachi rawé. Riosi ketasi niwali echí pagótami mapurigá chopí echirigá we nójchali ologá, o'wikeka isábama echalí isábawachi rawé. ²⁸Alí Jesúsi ayena cho jeaneli: Echijiti Nijé ayena cho ne Walubela ju echalí isábawachi rawé, mapujiti Riosi tamí wilali mapurigá Ku'wíriami niráa.

Bile rijói wabé nakólami sikéami ku sa'wárami níli

(Mt. 12.9-14; Lk. 6.6-11)

3 Alí Jesúsi auchecho siné bakili echo'ná pachá biléana ri'obachi echí jaré Juríosí ri'obáwalachi. Alí echo'ná pachá asali bilé rijói, echí mapu biléana sikachí wabé nakólami sikéami níli. ²Alí jaré rijói echo'ná pachá muchúami wabé kichiga 'nénali echí Walubela Jesúsi. Aboni jerigá 'náta muchili: ¿Acha galá ku sa'wama echí Jesúsi je'ná rijói, jipi isábawachi rawé? Echirigá aboni ne wabé kichiga wi'nijíinali echí Jesúsi, mapujiti aboni mayeli mapu ketasi risensia níli mapu Jesúsi

ku sa'wama echí rijói echalí isábawachi rawé.³ Alí Jesusi jeaneli echí rijói biléana sikachí nakólami sikéami: ¡Ku wilísaga, wilibá jena'í nasipa tamujé yuwa!⁴ Alí Jesusi jeaniga rukueli echí auché jaré rijói: ¿Churigá 'nalí galá risensia ju máputa galabé olabo jipi isábawachi rawé? ¿Acha risensia keremá máputa chibi yiri olabo? ¿Acha risensia ju máputa ku sa'wabo je'ná rijói? ¿Acha risensia keremá máputa miná milloba je'ná rijói? Alí aboni tarapé biyiri ku nijéwali.⁵ Alí Jesusi we yóniga 'nénali aboni, ayena cho we siweli mapujiti aboni ne wabé biwárami suléami níili. Alí Binói jeaneli echí nakólami sikéami rijói: ¡Wachiná kemi siká! Echalí echí rijói galá ku wachínali binói sikala, mapujiti binói sikála we yáati ma galá ku sa'wárami níili.⁶ Alí echí jaré sayérami rijói Bariseo anilíwami binériami níili. Mapalí aboni ku 'machínali echo'ná ri'obachi jonsa, aboni we yáati nakaréwaga ra'íchali echí auché jaré Erorsi riwéami rijói amígowala yuwa, mapu churigá aboni galá omérroma chapiyá echí Jesusi mapurigá aboni echirigá galá omérroma mi'ayá echí Binói.

Ne wikabé pagótami napawili echo'ná walú ba'wírali suwé

⁷Chopi echí Jesusi ku simili echo'ná walú ba'wírali suwé, ayena cho simíbali echí jaré mapu Binói binérali. Echi wikabé pagótami echo'ná Galiléachi anilíwachi kawírali piréami ayena cho simíbali.⁸ Alí mapalí echí wikabé pagótami galá machili mapurigá Jesusi wikabé namuti wabé omériga olali, mapu ke wesi auché jaré rijói omériali echirigá olayá, alí wikabé pagótami echo'ná Binói yuwa 'nébiya simíbali. Alí wikabé aboni echo'ná Juréachi anilíwachi kawírali jonsa napawíami níili. Auché jaré aboni echo'ná walú bakochi Joránachi anilíwachi kawírali jonsa napawili. Auché jaré aboni echo'ná Iruméachi anilíwachi kawírali jonsa napawili. Auché jaré echo'ná bo'ónala walú bakochi Joránachi anilíwachi kawírali jonsa napawili. Ayena cho auché jaré echo'ná kawírali jonsa napawili mapo'ná mulubé ju echo'ná o'wéalachí Tírochi anilíwachi, Sirónachi anilíwachi.⁹ Alí ne wikabé pagótami echirigá ne cha'igá napawili echo'ná walú ba'wírali suwé mapo'ná Jesusi asali. Echijiti Jesusi nuleli echí jaré mapu Binói binérali mapurigá echo'ná walú ba'wírali suwé uchárami níima bilé barko anilíwami, echo'ná ba'wírali moba iyénamí. Alí Jesusi asináali echo'ná moba bárkochi, mapurigá echí auché jaré wikabé pagótami ketasi rachináma Binói, echo'ná walú ba'wírali suwé atíachi.¹⁰ Echalí rawé Jesusi ku sa'wali wikabé nayúkami, echijiti si'néami mapu ikí echo'ná piréami nayúkami níili ne cha'igá napawili Binói yuwa. Alí ne si'néami echí jaré nayúkami nakili mapu chachema echí Binói, mapurigá echirigá ne ibili niráa ku sa'wárami níima.¹¹ Alí echo'ná mapo'ná Jesusi asali ayena cho sili jaré pagótami mapu wabé chati Riablo aliwala aliwéami níili. Aboni echo'ná bacháami Jesusi yuwa wéemi raweka chokoba jábali. Alí echí wikabé riablo aliwala, echo'ná pachá echí pagótami sulálachi muchúami, o'weli ra'íchali jeanigá: ¡Mujemi ju echí bilepi Riosi Ranala!¹² Alí Jesusi we iwéami ra'ámali echí jaré riablo aliwala, jeanigá mapu aboni ke wesi auché jaré pagótami ruyema mapu Binói echí bilepi Riosi Ranala níili.

Jesusi chapili makói miná okuá rijói mapurigá aboni Binói yuwa 'yénama (Mt. 10.1-4; Lk. 6.12-16)

¹³ Alí Jesusi pe wilibeko echo'ná biléana ripá rabó simigá, echo'ná bayérali echí jaré mapu Binói nakili mapurigá Binói yuwa 'yénama. Alí aboni echo'ná Binói yuwa sili.¹⁴ Alí chapili makói miná okuá, mapurigá aboni Binói yuwa 'yénama, ayena cho mapurigá Binói julama echí Wabé Galabé Riosi Ra'íchala nawisánala.¹⁵ Alí

Jesusi we galá iwébanali echí abóni mapurigá abóni galá oméráma ku sa'wayá echí jaré wikabé nayúkami, ayena cho mapurigá abóni galá oméráma ku machí a'waya echí jaré wabé chatí riabó aliwala mapu echo'ná pachana jaré pagótami sulálachi muchuwi.¹⁶ Alí je'ná ju echí jaré makói miná okuá: Echi Simoni mapu Jesusi ayena cho Pegro riwarali;¹⁷ echí Jakobo ayena cho; echí Juani, echí mapu echí Jakobo rijimala níili, ayena cho. Je'ná okuánika echí Sibireo riwéami rijói kúchuwala níili. Alí Jesusi ayena cho jerigá rijili echí okuánika abóni: Boanesi. Echi mapu je'ná jerigá aniwáami ju: Ukuí ri'óami.¹⁸ Alí echí Antresi bilé níili, echí Jilipi ayena cho, echí Batalomé ayena cho, echí Mateo ayena cho, echí Tomasi ayena cho, echí Jakobo, mapu echí Alibeo riwéami rijói ranala níili ayena cho, echí Tareo ayena cho, echí Simoni echo'ná Kananéachi bitéami ayena cho;¹⁹ echí Júrasi Jiskarioti ayena cho. Alí echí níili mapu pe kinánokuá bayébali echí jaré so'ntarsi mapurigá abóni bogogá chapimea echí Jesusi, mapurigá Binói arigá mi'lirúami niima.

Jaré wabé sayérali echí we Galabé Riosi Iwigala

(Mt. 12.22-32; Lk. 11.14-23; 12.10)

Alí mapalí Jesusi ma sunili chapigá jawa abóni, alí Binói bakili echo'ná biléana kalírali si'neami abóni yuwa.²⁰ Alí auchecho siné ne wikabé pagótami ne cha'igá napawili echo'ná Jesusi yuwa. Echijiti Jesusi, ayena cho echí jaré mapu Binói binéráli ketasi chirigá oméráli ko'yá.²¹ Alí echí jaré Jesusi ritémawala je'ná jerigá machisá, abóni ku toboya sili, mapujiti jeanili: Binói ma ke newalíte nírali.

²² Alí echí jaré nulalíwami binérámi, echo'ná Jerusalémachi jonsa napawíami jeanili: Echi Jesusi níwa echí Bersebubi anilíwami riabó. Binói we riabó chopi suréami ju, echijiti Binói galá omero machí a'waya echí jaré riabó aliwala.²³ Alí Jesusi bayesa echí abóni, irétaga jeaneli: ¿Churigá oméráma echí Satanasi riwéami riabó ku machí púa a binói Satanasi?²⁴ Mapalí biléana walúlachi piréami o'wéala nuláami a'nagupi nasayérasagá, abóni tarapé oméráma waminabi nulayá echo'ná piréami.²⁵ Alí mapalí biléana kalírali piréami a'nagupi nasayérasagá, ketasi oméráma waminabi napawika rijowa.²⁶ Alí echí Satanasi a binói niráa sayérasagá, ma ketasi waminabi walula níima. Chopi a binói niráa suwábaga suwibama.

²⁷ Echi riabó, Satanasi riwéami, mapurigá bilé rijói wabé aparúami ju. Tarapé wesi galá oméráma chigoya echo'ná bilé wabé aparúami rijói bitélachi, mapalí ketasi bachá bulérámi níisa. Chopi bachá bulusáagá, alí echí jaré pagótami galá oméráma chigoya echo'ná echí wabé aparúami rijói bitélachi.

²⁸ Ne bichíwali 'yemi nimí ané mapu Riosi galá omero ku 'wikáwiya ne suwaba mapu ikí echí jaré pagótami chatí olali, ayena cho ne suwaba mapu ikí abóni we chatí ra'íchali.²⁹ Chopi mapuyíripi we chatí ra'íchako echí we galabé Riosi Iwigala sayéraga, échiko tarapé siné ku wikawárami níima, chopi binói ne wabé wi'nijírami níima ne sinibí niráa.³⁰ Alí Jesusi echirigá aneli mapujiti abóni anili mapu Binói Jesusi ne wabé chatí riabó aliwala aliwéami níili.

Jesusi iyela echo'ná Binói yuwa nawali, echí jaré binói ritémawala ayena cho.

(Mt. 12.46-50; Lk. 8.19-21)

³¹ Alí pe wilibeko Jesusi iyela echo'ná nawali, echí jaré binói ritémawala ayena cho. Alí abóni echo'ná machí jaga, auché bilé júuli bayénala echí Jesusi.³² Alí echí jaré mapu echo'ná Jesusi yuwa mulubé noligá muchili jeaneli: Mujé iyela, ayena

cho echí jaré mujé ritémawala ma sisá, echo'ná machí muchuwi. Aboni echo'ná Mujé mi bayé.³³ Chopi Jesusi ku nijéwaga jeaneli: ¿Chigá ju Nijé iyela? ¿Chigá ju Nijé ritémawala?³⁴ Alí galá 'néniga echí jaré mapu Binói yuwa noligá muchili, Binói jeanili: Je'ná jaré mapu tamí yuwa muchuwi, échiko mapurigá Nijé iyela niráa ju, ayena cho mapurigá Nijé ritémawala niráa ju.³⁵ Alí mapu yíripi olako mapurigá Riosi nulá, échiko mapurigá Nijé rijimala nira ju, ayena cho mapurigá Nijé iyela niráa ju.

Bilé rijói turío icháami

(Mt. 13.1-9; Lk. 8.4-8)

4 Alí Jesusi echo'ná walú ba'wírali suwé asagá, auchecho siné chótali nawésiya. Alí echo'ná Binói yuwa ne wikabé pagótami ne cha'igá napawili, Binói ra'íchala kipúbiya. Echijiti Binói asífali echo'ná moba biléana bárkochi mapu echo'ná ba'wichí moba chukuli. Alí echí wikabé pagótami echo'ná ba'wírali suwé muchili.² Alí Jesusi ne wikabé namutí irétaga nawésali echí wikabé pagótami jeanigá:³ Galá námsi je'ná: Bilé rijói chótali turío ichayá.⁴ Alí ma ichisuwa jaré turío echo'ná mulubé buwichí rujuili. Alí echí jaré chuluguí echo'ná sisáa káraga suwali.⁵ Ayena cho auché jaré turío echo'ná biléana rapirúachi rujuili, mapo'ná ke 'mé wi'yéali. Alí echí jaré turío we sapú a'wili mapujiti echo'ná ke 'me wi'yéachi níili.⁶ Chopi mapalí we ratáami rayénali, echalí echí kúuchi turío bukulí a'wíami we yáati wakicheli, mapujiti ketasi cho galá nawarali.⁷ Ayena cho auché jaré turío rujuili echo'ná we kasaléachi. Alí echí kasalá o'weli ochérasha, ko'yali echí turío. Echijiti tarapé rakeli.⁸ Auché jaré turío we galá wi'yéachi rujuisa, galá a'wisá, o'weli ochérasha, ne galá rakeli. Alí jaré turío báisá makóí rakeli. Auché jaré usánsa makóí rakeli. Auché jaré bilé kiento rakeli.⁹ Alí Jesusi jeaneli: 'Yemi máputamo nakeko galá namsi.

Jesusi ruyegá aní mapu churékula Binói irétaga nawésali echí pagótami

(Mt. 13.10-17; Lk. 8.9-10)

¹⁰ Alí pe wilibeko echí wikabé pagótami ma ketasi Jesusi yuwa muchili. Chopi jaré pe okuá pagótami ayena mulubé Binói yuwa 'yénali, echí auché jaré mapu Binói binérali ayena cho. Alí si'néami aboni jeanigá rukueli Jesusi: ¿Churigá aniwáami ju echirigá mapurigami irétaga nawésali?¹¹ Alí Jesusi jeaneli: 'Yémitamo ma galá machíratami ju mapu churigá Riosi nulá, chopi echí auché jaré ketasi cho echirigá machíratami ju. Abóni ketasi cho galá machí mapu churigá Riosi nulá, echijítini Nijé ne suwaba irétaga nawésama echí auché jaré ke cho galá bichiyami.¹² Alí Nijeni irétaga nawésama echí aboni, mapurigá aboni galá 'néniga, arigá ketasi galá machimea mapurigá Nijeni nawesa. Alí aboni echirigá galá námama Nijé Ra'íchala, chopi arigá ketasi galá machimea mapurigá Nijeni binéraga nawesa. Echijiti aboni arigá ketasi bukulíwami nakulíwarami níima, nirapé cho ku wikawárami níima mapurigá aboni chati olali.

Jesusi nawésaga aní mapu churigá aniwáami ju mapurigá Binói binérali

(Mt. 13.18-23; Lk. 8.11-15)

¹³ Alí Jesusi ayena cho jeaneli: ¿Kechátamo machili mapurigá Nijé 'yemi mi irétaga nawésali? ¿Churigá bichétamo gala machiboa suwaba echí auché jaré namutí

mapu Nijé 'yemi nimí irétali? ¹⁴ Echi mapu ichako echi turío, échiko mapurigá bilé rijói Riosi Ra'íchala nawésami niráa ju. ¹⁵ Alí mapurigá ikili echi jaré turío mapu echo'ná buwichí rujuili, achigorigá ikimea echi jaré pagótami mapu bachá niráa galá namsa echi Galabé Riosi Ra'íchala, arigá ketasi we yaa bichíima. Achigórigá ikiméa mapujiti echi riablo we yáati miná 'yema echi Galabé Riosi Ra'íchala mapu aboni ma námali, achigórigá mapurigá echi jaré chuluguí suwaba suwali echi jaré turío echo'ná buwichí rujuíami. ¹⁶ Ali Jesusi ayena cho jeanili: Mapurigá ikili echi jaré turío mapu echo'ná biléana rapirúachi rujuili, echirigá achigórigá ikimea echi jaré pagótami mapu bachá niráa galá kaníliga namsa Riosi Ra'íchala, arigá ketasi galá ne sulachí niráa bichíima. ¹⁷ Abóni achigórigá ju mapurigá echi jaré turío ketasi 'me galá nawéami. Aboni bichíima pe téeli niráa. Chopi mapalí we risúu olárami níima mapujiti echirigá gala bichínali Riosi Ra'íchala, echalí aboni ma ketasi waminabi napawima echi auché jaré bichíyami yuwa, mapujiti ma ketasi waminabi galá bichíima. ¹⁸ Ayena cho mapurigá ikili echi jaré turío mapu echo'ná wabé kasaléachi rujuili, achigórigá ikimea echi auché jaré pagótami, suwaba mapu ikí galá namsa Riosi Ra'íchala, arigá ketasi galá bichíima. ¹⁹ Alí aboni chopi waminabi olama achigórigá mapurigá aboni chabénala olali. Aboni ketasi bukulíwami nakulíwarami níima, chopi wikabé namuti wabé 'nátaga pirélama. Aboni chopi wabé koruma echi wikabé namuti jena'í wichimóbachi nirúami, ayena cho chopi ne wabé kaníliga ologá pirélanali. Echijiti aboni ketasi galá bichífinali Riosi Raíchala. Alí aboni ketasi galá ku'wíratami niima. ²⁰ Alí mapurigá ikili echi jaré turío, echo'ná galabé wi'yérali rujuíami, achigórigá ikimea echi auché jaré pagótami, si'néami mapu ikí galá namsa Riosi Ra'íchala ne galá sulachí niráa bichíima. Aboni ne galá nijéwaga olama mapurigá Riosi nulé, ayena cho waminabi galá bichíiga, wabé galabé ologá pirélama jena'í wichimóbachi. Jaré aboni mapuyiri echi turío ju mapu baisá makói niráa rakeli. Auché jaré mapuyiri echi jaré turío ju mapu usansa makói rakeli mapujiti aboni waminabi galabé olá. Auché jaré mapuyiri echi jaré turío ju mapu bilé kiento rakeli mapujiti aboni waminabi wabé simírami galabé olá.

Echi jaré namuti mapu chiná nasótami ju arigá galá ku riwirúami níima

(Lk. 8.16-18)

²¹ Alí Jesusi ayena cho jeaneli: Tarapé wesi pólaga wilama bilé chopé rajáami echo'ná ri'lé pachá biléana sikolichi, nibilé wilama echo'ná ri'lé pachá biléana jubechi. Chopi si'néami pagótami ripabé ne galá machiná niráa wilama echi chopé rajáami mapurigá aboni echirigá ne galá machílama si'néami mapu ikí mo'wíko echo'ná pachá kalírali. Achigórigá 'wérali ju mapu Riosi Ra'íchala ne galá nawisárami níima mapurigá si'néami pagótami ne galá machimea. ²² Alí suwaba namuti mapu ikí chiná nasótami ju, échiko pe minánomí galá ku riwirúami níima. Alí suwaba echi jaré namuti mapu ikí ke machirúami ju, échiko pe minánomí galá ku machirúami níima. ²³ ¡'Yemi máputamo a nakeko, ne galá namsi!

²⁴ Alí Jesusi ayena cho jeaneli: Suwaba ne galá 'natasi mapurigátamo kipunú. Átamo ne galá 'nátaga kipúsagá, 'yémítamo waminabi galabé machíiami níibo, mapujiti Riosi 'yemi mi waminabi machírama. ²⁵ Mapujiti echi mapu ne galá machiko, waminabi 'yárami níima mapurigá binói waminabi galá machimea. Chopi echi mapu ketasi machiko, arigá 'yérami níima echi mapu binói machili.

Echi turío rakala galá a'wí

²⁶ Alí Jesusi ayena cho jeaneli: Mapalí echí pagótami galá nijéwaga olá mapurigá Riosi nulé aboni, echalí arigá ikimea aboni mapurigá ikí mapalí bilé rijói we ichá echí turío echo'ná wi'yérali. ²⁷ Mapujiti echí rijói rokogó chopí we kochí, alí biché sinibí bi'yá we asísími. Chopí echí turío galá a'wisáa, walú ochero. Alí echí rijói ketasi machí churigá omero echirigá ochériya echí turío. ²⁸ Alí echí turío ne galá raké echo'ná wi'yérali ichisúwa. Alí ne bachá galá ochérasha, muréensa pe wilibeko echo'ná mulalachi galá raké. ²⁹ Alí ma gala rakéachi, echí mapu ichali we yáati sikirema, mapujiti ma galá sébali echí turío sikirékowachi.

Echi mostasa rakala

(Mt. 13.31-32; Lk. 13.18-19)

³⁰ Alí Jesusi jeaneli: Nijeni 'yemi mi irétaga binela mapurigátamo galá machiboa mapu churigá galá nulá Riosi. ³¹ Mapalí Riosi we nulé echí pagótami, mapuyiri echí táchia mostasa anilíwami rakala ju, mapu bilé rijói echo'ná wi'yérali ichá. Mapujiti echí mostasa rakala ne wabé táchia ju, alí auché bilé ne tabéala raká tarapé auché bilé nirú jena'í whichimóbachi. ³² Chopí mapalí ma ichisuwa, galá a'wisáa, walú ochérasha, o'weli otowata. Alí echí o'weli chuluguí echo'ná ri'lé pachá galá kábama.

Mapurigá Jesusi irétaga ra'íchali

(Mt. 13.34-35)

³³ Alí Jesusi echirigá irétaga binérali Riosi Ra'íchala mapuyénasí aboni galá omérali machigá bineya. ³⁴ Binói chopí irétaga niráa ra'íchali echí jaré aboni. Alí mapalí echí jaré mapu Binói binérali waná awínali muchili, alí Binói galá ruyeli aboni mapu churigá aniwáami níili suwaba.

Jesusi ku ra'ámali echí wabé jiwérami iká

(Mt. 8.23-27; Lk. 8:22-25)

³⁵ Echalí rawé ma alíwachi Jesusi jeaneli echí aboni: Ma echo'ná walú ba'wírali bo'ónala simabo. ³⁶ Alí ma ariwesa echí wikabé pagótami, echí jaré binéami echo'ná biléana bárkochi, echo'ná walú ba'wírali moba iyénamichi muchiga, ku simíbali. Alí aboni ayena cho toli echí Walubela Jesusi. Alí ayena cho aboni yuwa ku simíbali auché jaré kúuchi barko, echo'ná walú ba'wírali moba 'yénami. ³⁷ Chopí ke sayiná ne wabé jiwériga ikali. Echijiti echo'ná pachana bárkochi, walú ba'wírali moba yénamichi, ne noguí buchili ba'wí. ³⁸ Alí Jesusi we kochigá bu'wili echo'ná biléana mosobétachi, echo'ná bárkochi jubáami. Alí echí jaré binéami jeanigá ku achali: Binériami, ¿Kéchami tamujé tamí natimá? ¡Ma suwibóaré! ³⁹ Alí Jesusi asísaga ku ra'ámali echí iká. Alí jeaneli echí walú ba'wí: ¡Kilí asagá! Alí echí walú ba'wí we yáati ne galá siwega ku wilíbali. ⁴⁰ Alí Jesusi jeaneli echí jaré mapu Binói binérali: ¿Churékulátamo echirigá majajali? Ayena cho jeanigá rukueli: ¿Churékulátamo ketasi galá bichíili? ⁴¹ Alí aboni ne wabé majajali mapujiti aboni ketasi galá machili churigá Jesusi echirigá omérali ra'ama echí wabé iwéami iká, mapujiti echí iká arigá galá nijéwali, echí walú ba'wí ayena cho.

Jesusi ku sa'wali bilé rijói mapu wabé chati riablo aliwala aliwéami níili

(Mt. 8.28-34; Lk. 8.26-39)

5 Alí aboni sili echo'ná walú ba'wírali bo'ónala mapo'ná Garátachi anilíwachi ju. ² Alí mapalí Jesusi ku machínali echo'ná bárkochi jonsa, we yaa echo'ná nawali bilé rijói mapu wabé chati riablo aliwala aliwéami níili, echi mapu echo'ná jaréana risochí chu'wechi jonsa nawali. ³ Echi rijói echo'ná biléana risochí chu'wechi bitéami níili. Binói ne wabé aparúami níili. Echijiti ke wesi omérali wiya jiti bolagá achayá, nirapé omérali echi jiero wiya jiti bolagá achayá. ⁴ Echo'ná piréami pagótami arigá wisabé bulali echi rijói sikálachi, echi jiero wiya jiti. Ayena cho wisabé echirigá bulali binói ronólachi, chopi binói sinibí wabé omériga ripúnali echi jiero wiya. Echijiti ke wesi galá omérali echi rijói. ⁵ Binói sinibí rawé, sinibí rokogó echo'ná kawichí wabé sinaka iyénali, echo'ná risochí chu'wéchi ayena cho. Alí a binói riteti michoka iyénali.

⁶ Alí echi rijói mikabé jonsa riwisá, we sapú echo'ná Jesusi yuwa 'maga, bacháami wéemi raweka chokoba wilíbali. ⁷ Alí o'weli sinaga jeaneli: ¿Pírimi olama tamí yuwa, Mujé Jesusi? Mujemi echi Riosi ripabé riwigáchi atfami Ranala ju. Wabé nimí tani Riosi jiti, mapurigami ketasi tamí risúu olama. ⁸ Alí binói je'ná jerigá aníli mapujiti Jesusi ma bachá nuleli echi wabé chati riablo aliwala jeanigá: ¡Ku machínaga echo'ná pachana je'ná rijóochi jonsa, mujé wabé chati riablo aliwala! ⁹ Alí Jesusi rukueli echi rijói jeanigá: ¿Chu mi riwé? Alí echi rijói jeaneli: Wikabé sontarsi ni riwé mapujítita wikabé ju. ¹⁰ Alí echi rijói ne wabé risúu anigá tali mapurigá Jesusi ketasi miná waná julama echi jaré wikabé riablo aliwala mapu echo'ná pachana binói rijóochi muchili.

¹¹ Alí echo'ná kawichí wikabé kochi ko'yá uchútali. ¹² Echijiti ne suwaba echi jaré isena riablo aliwala we risúu anigá tali jeanigá: Tamujé tamí echo'ná wikabé kóchichi pachana julá, mapurigata echo'ná pachana mo'wiboa. ¹³ Alí Jesusi echirigá risensia 'yali. Alí echi wikabé wabé chati riablo aliwala we yáati ku 'machínasa, echo'ná pachana echi rijóochi jonsa, we sapú mo'wili echo'ná pachana echi wikabé mapuyena okuá mili kóchichi. Echijiti echi wikabé kochi ke sayiná echo'ná ripá jonsa wabé majaga júmsaga, echo'ná biléana koláachi ri'lена rujuiga, waminá ri'lé ba'wírali silili.

¹⁴ Alí echi jaré kochi mélami we sapú ku simíbali, echo'ná walúlachi piréami suwaba ruyébiya mapurigá ikili. Echo'ná mulubé noligá kawichí piréami ayena cho ruyérami níili. Echijiti wikabé pagótami 'nébiya simíbali mapurigá ikili. ¹⁵ Alí aboni echo'ná sili mapo'ná Jesusi asali. Alí aboni riwali echi rijói mapu chabénala wikabé wabé chati riablo aliwala aliwéami níili. Chopi ma galá ku 'natasa, ma galá ku napacha asali. Echijiti echi wikabé pagótami ne wabé majali. ¹⁶ Alí echi jaré mapu galá riwáliko, galá ruyeli suwaba mapurigá ikili echi rijói jiti mapu chabénala wikabé wabé chati riablo aliwala aliwéami níili. Ayena cho ku ruyeli mapurigá ikili echi wikabé kochi. ¹⁷ Alí si'néami echo'ná piréami pagótami chótali risúu anigá anée mapu echi Walubela Jesusi ma ku simea echo'ná jonsa.

¹⁸ Alí Jesusi auchécho siné 'moli echo'ná ripá moba bárkochi, mapurigá Binói echo'ná asagá ku simea echo'ná aboni kawíwalachi jonsa. Chopi echi rijói mapu chabénala wikabé wabé chati riablo aliwala aliwéami níili, risensia tánali mapurigá binói ayena cho Jesusi yuwa simea. ¹⁹ Chopi Jesusi tarapé risensia 'yasa, jerigá aneli:

Echo'ná kemi bitélachi ku simigá. Ku ruyemi echí jaré kemi ritémawa mapurigá echí Walubela Riosi wabé galá natimaka olali mi yuwa.²⁰ Alí echí rijói ku simisá ruyeli ne si'néami echo'ná makóina o'wélachi piréami mapurigá echí Walubela Jesusi echirigá wabé omériga olali binói yuwa. Alí ne si'néami echo'ná piréami ne wabé 'nátaga kipuli mapalí echí rijói echirigá ruyeli aboni.

Jesusi ku owíntali bílé tiwé ma mukúami

(Mt. 9.18-26; Lk. 8.40-56)

²¹ Alí Jesusi ma ku simili echo'ná biléana bárkochi walú ba'wírali iyénamichi ripá moba asagá. Alí Binói ma nawasa echo'ná auché biléana waná suwé, auchecho siné ne wikabé pagótami napawili Binói yuwa.²² Alí echo'ná nawali bílé rijói Jairo riwéami, echí mapu ayena cho walula níili echo'ná echí jaré Juríosi pagótami ri'obáwalachi. Alí biché echí Jairo riwisáa echí Jesusi, echo'ná bacháami wéemi raweka chokoba wilíbali mapo'ná Jesusi asali.²³ Alí we risúu anigá jeanili: Keni malá ma mukuméaré. Wakiná tamí yuwa simí, Mujé sikala jiti nochogá ku sa'wá, mapurigá binói ketasi mukumea.

²⁴ Alí Jesusi we yáati simili binói yuwa, chopi wikabé pagótami ne cha'lígá najáitali Jesusi yuwa.²⁵ Ayena cho echo'ná inárali bílé mukí mapu we léniga nayúami níili, makói miná okuá bamíbali jonsa.²⁶ Alí echí mukí chabé jonsa ne wabé nayúami níili. Alí wikabé óyami wisabé nakili mapu ówima, chopi tarapé ku sa'wisá, binói waminabi okoli. Alí binói ma káraga suwábali echí jaré binói níwala namuti, echí óyami natétiya.²⁷ Alí mapalí echí mukí námali echí pagótami Jesusi jiti rugá ra'icháchanachi, alí binói, wikabé yuwa, jubáami nawagá nochali Jesusi napáchala.²⁸ Mapujiti binói mukí jerigá 'nátali: Chopi echí Jesusi napáchala nochásagáni, ma galá ku sa'wárami níimani.²⁹ Alí echí mukí ma nochasa echí Jesusi napáchala, ma ke sayiná ketasi waminabi lénali, chopi binói galá machili mapu ma ku sa'wárami níili.³⁰ Alí Jesusi we yáa machili mapurigá Binói echirigá ku sa'wali bílé. Echijiti ku kuwana 'néniga, Binói jeanigá rukueli echí jaré wikabé mapu Binói yuwa najáitali: ¿Chigá nochali tamí napáchala?³¹ Alí echí jaré mapu Binói binérali jeaneli: Mujé galá machí mapu wikabé pagótami mi wabé rachina. ¿Churékulami jeaní: Chigá tamí nochali?³² Chopi Jesusi noligá 'nénali mapurigá galá riwímea chigá nochalo Binói.³³ Alí echí mukí we sayirúmaga majali mapujiti binói galá machili mapurigá ma galá ku sa'wárami níili. Alí binói we yáa bacháami Jesusi yuwa wéemi raweka, chokóbaga wiligá ne bichíwali ku ruyeli suwaba mapurigá ikili.³⁴ Alí Jesusi jeaneli: Mukí, Nijé ma nimí ku sa'wali mapujítimi galá bichíili. We kaníliga ku simigá mapujítimi ma ketasi auché siné echirigá nayuma.

³⁵ Alí Jesusi abijí ra'íchachi, jaré rijói echo'ná sili mapu echo'ná echí Jairo bitélachi jonsa simíbami níili. Aboni jeaneli echí Jairo: Mujé malala ma mukuli. ¿Churékulami waminabi kumé echí Binériami?³⁶ Chopi mapalí Jesusi námali echí jaré echirigá aníachi, Binói jeaneli echí Jairo: ¡Ketasi majá! ¡Chopi galá bichíili!³⁷ Alí Jesusi chopi risensia 'yali mapu Binói yuwa simea echí Pegro, echí Jakobo ayena cho, echí Juani, echí mapu Jakobo rijimala níili, asichiko.³⁸ Alí mapalí Jesusi nawali echo'ná Jairo bitélachi, Binói riwali wikabé pagótami ne wabé buchuwí anigá o'weli nalákachi.³⁹ Alí Jesusi galá machili mapu Binói galá ku owíntama echí tiwé mapu ma mukúami níili. Echijiti Binói jeaneli echí jaré pagótami: ¿Churékulátamo echirigá we buchuwí anigá nalaka? Je'ná tiwé, tamí jiti ketasi mapurigá mukúami

ju, chopi kochíami niráa ju. ⁴⁰ Alí echo'ná muchúami pagótami wabé kachigá tiníchali echirigá aníachi Jesusi. Alí Binói ku machí júuli ne si'néami aboni. Alí binói yuwa bayéraga echi tiwé 'wénawala, ayena cho echi jaré bikiyá Binói yuwa 'yénami, echo'ná pachá bakili mapo'ná echi mukúami tiwé bu'wíli. ⁴¹ Alí Jesusi chapigá echi mukúami tiwé sikala, Binói Jesusi ra'ichaga niráa jeaneli: Talita kumi. Echi mapu Ralámuli ra'ichala niráa, jerigá aniwáami ju: ¡Tiwé, ku asísaga! ⁴² Alí echi tiwé we sapú ku asísali. Ma ketasi mukúami níllasa, galá iyénali mapujiti makói miná okuá bamíbami níili. Alí si'néami echo'ná muchúami pagótami ne wabé majajali. ⁴³ Chopi Jesusi we iwéami nuleli mapu ke wesi ruyema mapurigá echirigá ikili. Alí nuleli mapu ko'wáami yama echi tiwé.

Jesusi ku nawali echo'ná Nasarétachi

(Mt. 13.53-58; Lk. 4.16-30)

6 Alí Jesusi echo'ná jonsa ku simisáa, echo'ná Binói kawíwalachi ku nawali. Echi jaré mapu Binói binérali ayena cho Binói yuwa sili. ² Alí mapalí isábawachi rawé níili, echalí Jesusi chótali nawésiya echo'ná echi jaré Juríosí pagótami ri'obáwalachi. Alí wíkabé pagótami wabé 'nátaga, kilí kipuga, a'nagupi jeanigá rukueli: ¿Churigá galá omero je'ná rijói echirigá ne wabé galá machigá ra'icha, ne suwaba namuti jiti rugá? ¿Churigá galá omero nochogá ku sa'wayá echi jaré nayúkami? ³ Alí aboni a'nagupi jeaneli: Tamujeta galá machí je'ná rijói. Binói echi tábala sipáami ju, echi María ranala. Ayena chota galá machí echi Jakobo, echi José, echi Júrasi, echi Simoni, mapu si'néami je'ná aboni, Binói ritémawala ju. Ayena cho jena'í tamujé yuwa muchuwi Binói a'wayela. Alí echo'ná piréami ketasi bichíili mapu Jesusi bilepi Riosi Ranala níili, mapujiti aboni chabénala táchí káchí galá machili echi Binói. ⁴ Alí Jesusi jeaneli: Ne si'néami pagótami galá o'wiké bilé walula Riosi jiti nawésami, chopi echo'ná binói kawíwalachi piréami ketasi o'wiké, echi jaré binói ritémawala ketasi cho, echi jaré echo'ná binói bitélachi piréami ketasi cho. ⁵ Alí mapalí Jesusi echo'ná Binói kawíwalachi iyénali Binói ketasi omérali wabé omériga olayá, chopi pe okuáa nayúkami ku sa'wali, Binói sikala jiti nochogá. ⁶ Jesusi ne wabé siwega 'nátali mapujiti aboni tarapé bichíili. Alí pe kinana Binói nawésiya iyénali echo'ná ne suníami mulubé noligá rijówachi.

Jesusi júuli nawisánala echi jaré makói miná okuá

(Mt. 10.5-15; Lk. 9.1-6)

⁷ Alí Jesusi bayeli echi jaré makói miná okuá mapu Binói binérali. Echalí okuá niráa nawisánala júulaga, Jesusi ne galá jiwratali mapurigá aboni oméraama ku machí a'waya echi jaré we chati riablo ariwala, echo'ná jaré pagótami sulálachi muchúami. ⁸ Ayena cho nuleli mapurigá aboni tarapé biyiri tomea echo'ná buwichí simiba. Chopi nuleli mapu ibílipi bilé tisola tomea; ayena cho nuleli mapu ketasi tomea nibilé chiwálala, ayena cho mapu ketasi tomea ko'wáami, ayena cho mapu nirapé tomea wenomí. ⁹ Ayena cho Jesusi nuleli mapu wáasi wichila chopi akarasa, ibílipi bilepi napacha napachama. ¹⁰ Ayena cho jeaneli: Mapalítamo chi'libábiya mo'wiboa echo'ná biléana kalírali, echo'ná bilénapi kalírali aripisi mapuyénasítamo ku simiba echo'ná walúlachi jonsa. ¹¹ Alí mapalí biléana piréami ketasi 'yemi mi narésagá, mirapé 'yemi mi námanalaságá, alí mapalítamo ku simabo echo'ná jonsa, ne galá bi'wasi echi napisó mapu ri'leka 'yemi ralálachi chukúbali. Echirigátamo

ku ruyebo mapurigá aboni wabé chati oláami ju. Alí echi we chati oláami pagótami echo'ná Sorómachi anilíwachi piréami, ayena cho echo'ná Gomórachi anilíwachi piréami ne wabé wi'nijírami níima echalí ne jubá suwibáluwachi rawe. Chopi echi jaré pagótami mapu ke námanaliko 'yemi nawésawala ne wabé simírami wi'nijírami níima echalí rawé.¹² Alí aboni ma simasa nawésali mapurigá echi jaré pagótami bukulíwami, galabé niráa ku 'natama.¹³ Alí aboni ayena cho ku machí a'wali wikabé wabé chati riablo aliwala echo'ná pachana echi jaré chati oláami pagótami sulálachi muchúwamichi jonsa, ayena cho aboni akeite uchugá wikabé ku sa'wali echi jaré nayúkami.

Echi Juani mi'lirúami níili

(Mt. 14.1-12; Lk. 9.7-9)

¹⁴ Alí echi walula silíami Erorsi riwéami galá machili je'ná jeyiri, mapujiti kanápuromí piréami pagótami ma galá machili echi Jesusi jiti ra'ichálawachi. Echijiti echi Erorsi echirigá namsa jeanili: Echi Rijói echi Juani níima mapu chabénala pagóami níili. ¡Echiko ma mukúami níili, chopi ma ku owínaliré! ¡Echijiti je'ná binói ne wabé omérica olá! ¹⁵ Alí auché jaré jeanili: Je'ná Rijói echi Elíasi níimalé. Auché jaré jeanili: Bilé walula Riosi jiti nawésami ju, mapurigá echi auché jaré ki'yá piréami Riosi jiti nawésami. ¹⁶ Alí echi Erorsi je'ná jerigá namsa jeanili: Ne bichíwali je'ná rijói echi Juani níimaré, echi mapu nijé chabé nulali ripunánala binói kutálachi. ¡Binói ma mukúami níili, chopi ma ku owínaliré!

¹⁷ Echi Erorsi echirigá anili mapujiti chabénala binói nulali bachánala echi Juani, mapujiti echi Eroríasi riwéami mukí wabé sayérali echi Juani. Alí echi Eroríasi echi Jilipi riwéami rijói upila níili. Alí echi Jilipi, echi binói Erorsi rijimala níili, chopi echi Erorsi arigá chapili echi Eroríasi mapurigá binói upila niráa. Echijiti echi mukí we sayérali echi Juani. ¹⁸ Mapujiti echi Juani jeaneli echi walula Erorsi: Tarapé risensia níili mápumi chapimea kemi rijimá upila mapurigá kemi upí niráa. ¹⁹ Echijiti echi Eroríasi riwéami mukí we kichili echi Juani, ayena cho we nakili mapurigá echi Juani mi'lirúami níima, chopi ketasi oméralli mi'ayá. ²⁰ Mapujiti echi walula Erorsi arigá we galá niralí echi Juani mapujiti binói galá machili mapu echi Juani wabé galabé oláami níili. Echijiti Erorsi galá tibútali echi Juani, mapurigá echi mukí ketasi nulama chibi olánala; ayena cho echi Erorsi galá námali echi Juani nawésawala, chopi ketasi 'me nijéwanali.

²¹ Alí echi mukí Eroríasi riwéami arigá 'nátaga machili mapu churigá mi'lirúami níima echi Juani, mapujiti echi Erorsi walú omáwali echalí rawé sébachi mapalí binói ranálati. Echalí binói ayena cho si'néami bayeli mapu ikí igúsuwami níili echo'ná Galiléachi piréami, echi auché jaré o'wéala ayena cho, echi jaré kapitani ayena cho. ²² Alí echo'ná pachá mapo'ná echi walula omáwali, echo'ná bakili bilé tiwé mapu echi Eroríasi riwéami mukí ranala níili. Echi tiwé we awili mapurigá echi jaré rijói we 'nema. Alí echi Erorsi we kaníliga 'nénali mapalí echi tiwé awili, ayena cho echi auché jaré o'wéala wabé kaníliga 'nénali. Alí echi Erorsi jeaneli echi tiwé: Tamí tani mapu ikí namuti mi nakí. Nijé nimí 'yama. ²³ Ayena cho jeaneli: Ne bichíwali nimí ané: Nijé nimí 'yama suwaba mapu ikimi tamí tani. Ne nasípasí nimí 'yama keremá mapu ikí nijé niwa. Alí nijeni ne wabé níwami ju, mapujítini ne walula silíami ju. ²⁴ Alí echi tiwé machí simigá jeanigá rukueli kepu iyé: ¿Pírini tánama? Alí binói iyela nijéwaga jeaneli: Tani mapurigami 'yárami níima echi

Juani mo'ola, mapujiti nijeni we nakí mapu mi'lirúami níima echi Juani mapu pagóami ju.²⁵ Alí echi tiwé we sapú ku bakili echo'ná pachá mapo'ná echi Erorsi asali. Alí jeaneli: Nijeni nakí mápumi we yáati echo'ná biléana bitólachi achagá, tamí 'yama echi Juani mo'ola, mapu pagóami ju.²⁶ Alí echi walula Erorsi echirigá namsa ne wabé siweli. Chopi mapujiti binói ma echirigá ne bichíwaga niráa aneli echi tiwé, echijiti binói ma ketasi nakili mapu 'yékama. Echijiti binói arigá nulali olánala mapurigá echi tiwé nakili, mapujiti echi auché jaré o'wéala ayena cho galá námali mapurigá echi Erorsi echirigá bichíwaga aneli echi tiwé.²⁷ Alí echi walula Erorsi we yáa júuli bilé sontarsi ripuna 'nolánala echi Juani mo'ola.²⁸ Alí echi sontarsi echo'ná kumurachi simigá ripúnali echi Juani mo'ola. Alí echo'ná biléana bitólachi achagá 'yali echi tiwé. Alí echi tiwé 'yali kepu iyé.²⁹ Alí mapalí echi jaré mapu echi Juani binérali ma galá machisá je'ná jerigá ikíichi, aboni echo'ná sisáa ku chapili echi Juani mukúami sapala. Alí chu'wiróbiya ku toli aboni.

Jesusi kówali malí mili pagótami

(Mt. 14.13-21; Lk. 9.10-17; Jn. 6.1-14)

³⁰ Alí echi jaré mapu Jesusi júuli nawísánala, si'néami ku napawisa Binói yuwa suwaba ku ruyeli mapu ikí namuti aboni olali mapalí aboni nawésiya 'yénali.³¹ Alí Jesusi nijéwaga jeaneli: Auché biléana waná suwé simabo mapurigátamo galá isábabo. Binói echirigá aneli mapujiti wikabé pagótami echo'ná napawísali, alí auché jaré wabé a'yáapi ku simásali. Echijiti echi jaré mapu Jesusi binérali ketasi chirigá omériali ko'yá, mapujiti echi wikabé pagótami we kumeli.³² Alí aboni echo'ná bo'ónala biléana waná kawichí suwé simíbali, echo'ná biléana bárkochi ba'wírali moba iyénamichi muchiga.

³³ Chopi mapalí aboni echirigá ku simíbali, echi wikabé pagótami ne suníami echo'ná o'wéalachí piréami galá riwali mapu Jesusi ayena cho simili, echi jaré mapu Binói binérali yuwa. Echijiti echi wikabé pagótami echo'ná ba'wírali suwé jonsa, wichí jaga jumsa, arigá ne bachá sili echo'ná o'ónala mapo'ná Jesusi Binói nawama riwéali.³⁴ Alí Jesusi nawasa echo'ná waná suwé, we yáati riwali wikabé pagótami echo'ná napawika muchúami. Alí Binói we natimali echi pagótami mapujiti aboni mapurigá wikabé bo'wá níili, mapu tarapé téeli bilé mélami. Echijiti Jesusi wikabé namuti nawésali aboni.³⁵ Alí mapalí ma we alíwachi níili, echi jaré mapu Jesusi binérali, echo'ná sisá mapo'ná Binói asali, jeaneli: Ma we aliwa. Jena'í wabé waná kawichí ju.³⁶ Echijiti ku julá echi wikabé pagótami, mapurigá aboni echo'ná mulubé rijówachi simíbaga ralimea ko'wáami, mapujiti aboni tarapé niwa mapu ko'mea.³⁷ Alí Jesusi jeaneli: ¡'Yemi aboni 'yasi mapurigá ko'mea! Chopi echi jaré mapu Binói binérali jeaneli: Tamujé ketásita omérabo ko'wáami ralayá, mapuyena okuá mili peso natéami, mapurigata 'yabo echiyena wikabé pagótami.³⁸ Alí Jesusi jeanigá rukueli: ¿Chu kíputamo ko'wáami niwa 'yémi? ¡Simíbaga 'nébasi! Alí aboni ma galá machigá jeaneli: Malí kúuchi pani nirú, ayena cho nirú okuá rochí.

³⁹ Alí Jesusi nuleli mapurigá echi wikabé pagótami echo'ná kasaláltali rojuaga muchima.⁴⁰ Alí si'néami aboni echirigá rojuaga muchíbali, bilé ciento niráa, ayena cho malisa makói niráa.⁴¹ Alí Jesusi chapili echi malí pani, ayena cho echi okuá rochí. Alí ripá riwigachi 'nénaga, natétara agá ra'íchali Riosi yuwa. Alí rojuánaga echi malí pani, Binói 'yali echi jaré mapu Binói binérali mapurigá nachútama echi wikabé pagótami; ayena cho rojuánaga nachútali echi okuá rochí ne si'néami

pagótami. ⁴²Alí si'néami echi wikabé pagótami ma kosá, ne galá posali. ⁴³Alí ma sunisa ko'yá, makói miná okuá walírali ku napabuli echi kúuchi pani chi'wáami tibíami, ayena cho echi kúuchi rochí chi'wáami tibíami. ⁴⁴Alí echi pagótami mapu galá posaka ko'wali, mapuyena malí mili rijói níili.

Jesusi echo'ná walú ba'wírali moba wiligá iyénali

(Mt. 14.22-27; Jn. 6.16-21)

⁴⁵Echalí Jesusi we yáati bachá júuli echi jaré mapu Binói binérali mapurigá aboni bachá simama echo'ná bo'ónala walú ba'wírali suwé, mapo'ná Becháirachi anilíwachi níili. Alí aboni echo'ná pachá biléana bárkochi muchiga ku sim'bali. Chopi Jesusi ketasi ku simili aboni yuwa, mapujiti Binói echi wikabé pagótami ripóriya tibili. ⁴⁶Alí Jesusi ma ku ripórasa echi wikabé pagótami, waminá ripá rabó simili, mapurigá Binói bi'neli niráa ra'ichama Riosi yuwa. ⁴⁷Alí mapalí ma we rokogó níili, echi barko pe bukulí echo'ná nasipa walú ba'wírali inárali. Chopi Jesusi we bi'neli asali echo'ná biléana walú ba'wírali suwé. ⁴⁸Alí Jesusi echo'ná mikabé jonsa riwali echi jaré binéami mapu ne wabé risíami níili, mapujiti aboni wabé nóchali, kusí ku'línaga simíriya echi walú barko, echo'ná walú ba'wírali moba iyénami. Chopi echi barko arigá ketasi 'me simili, mapujiti echi iká we ku kuwana rakibuli. Alí echalí bi'yá chónachi Jesusi ba'wichí moba wiligá ináraga nawali echo'ná mapo'ná aboni sírali. Alí Binói waminá bacháami simíranaga olali. ⁴⁹Chopi mapalí aboni riwali Jesusi echo'ná walú ba'wírali moba wiligá inárami, echalí aboni ketasi machili mapu echi Jesusi níilo. Chopi bilé chu'wí mayega, aboni wabé majaga sinákali, ⁵⁰mapujiti si'néamika riwali echi Jesusi echo'ná walú ba'wírali moba wiligá inárami. Alí aboni riwisá, ne wabé majajali, mapujiti aboni ketasi cho machili mapu echi Jesusi níilo, chopi Binói we sapú ra'íchali echi aboni jeanigá: We kanílisi. Nijeni ju. Ketasi majasi. ⁵¹Alí Jesusi echo'ná bárkochi walú ba'wírali moba iyénamichi bakisá, echo'ná pachá, aboni yuwa asíbali. Alí ke sayiná ariweli ikayá. Chopi aboni ne wabé majaga 'nata muchili. ⁵²Alí aboni echirigá ne wabé majali mapujiti aboni ketasi cho machili mapu echi Jesusi ne wabé Walubela níilo. Aboni galá riwali mapalí Binói, pée okuáa ko'wáami chapigá, arigá wabé omériga olali mapurigá ne wikabé muwéwali, mapuyénasí Binói galá omérali ne wikabé pagótami kóoya; chopi aboni arigá ketasi cho machili mapu Jesusi ne suwaba omérami níilo, mapujiti aboni we biwárami suléami níili.

Jesusi ku sa'wali wikabé nayúkami echo'ná Jenesarétachi piréami

(Mt. 14.34-36)

⁵³Alí mapalí aboni miná bo'ónala Jenesarétachi anilíwachi sili, echalí aboni echo'ná suwé buleli echi barko mapurigá echo'ná chukumea. ⁵⁴Alí mapalí aboni ku 'machínali echo'ná bárkochi jonsa, echo'ná piréami pagótami we yáa galá machili echi Jesusi. ⁵⁵Echalí aboni ne suníami mulubé rijówachi júmaga, echo'ná jonsa pali ne si'néami mapu ikí nayúkami níili. Alí ibili nayúami nawoka pálati echo'ná mapo'ná Jesusi asali. ⁵⁶Alí echo'ná mapu ikínomí rijówachi iyénali Jesusi, ayena cho mapu ikínomí o'wéalachí iyénali, ayena cho mapu ikínomí ipó mapo'ná Binói iyénali, echo'ná mulubé buwichí ro'wáratí si'néami mapu ikí nayúkami níili. Alí mapalí Jesusi echo'ná simírama riwéali, aboni risensia tánali mapu ibili niráa

echi jaré nayúkami galá chapimea Jesusi napáchala suwilá. Alí si'néami mapu ikí chapili echi wi'lí napachala suwilá, we yáati ku sa'wárami níili.

Echi jaré namuti chati 'nátali ju, mapu wabé chati sulélatama echi pagótami

(Mt. 15.1-20)

7 Alí jaré o'wéala binériami rijói, Bariseo anilíwami, echo'ná sili mapo'ná Jesusi asali. Ayena cho sili jaré rijói echo'ná Jerusalémachi jonsa simíbami mapu Riosi nulalila binériami níili. ² Alí echi jaré Bariseo anilíwami binériami wabé wi'njili echi jaré mapu Jesusi binérali, mapujiti riwali mapu echi jaré mapu Jesusi binérali, ketasi cho si'winárigá panígasa arigá ko'wali.

³ Mapujiti echi jaré Bariseo anilíwami binériami, ayena cho si'néami echi auché jaré Juríosi pagótami ke siné ko'wali, ketasi bachá niráa wisabé si'winárigá panígasagá. Alí aboni sinibí echirigá olali mapujiti aboni o'wéarawala mapu chabé ki'yá piréami sinibí echirigá olali. ⁴ Echijiti sinibí mapalí echi jaré Juríosi ku sili echo'ná aboni pirélachi, echo'ná auché jaréana rijówachi jonsa, echalí aboni ketasi ko'wali, a ketasi bachá niráa wisabé si'winárigá panígasaga. Alí aboni auché jaré wikabé echiyiri namuti olali mapurigá echi jaré chabé ki'yá piréami o'wéala olali. Alí aboni echirigá sinibí si'winárigá pabákali echi jaré labá, echi jaré sikolí ayena cho, echi jaré basi asíchiko.

⁵ Alí echi jaré Bariseo, ayena cho echi jaré nulalíwami binériami, aboni we rukueli Jesusi jeanigá: ¿Churékula echi jaré mapu Mujé binérali ketasi echirigá olá mapurigá echi jaré chabé ki'yá piréami o'wéala sinibí olali? Aboni ketasi bachá si'winárigá panígasa, arigá we ko'wá.

⁶ Alí Jesusi nijéwaga jeaneli: Echi walula Isaíasi ne bichíwaga nawésali 'yemi jiti rugá, máputamo wabé 'yékaka oláami ju, mapalí binói je'ná jerigá osali:

Je'ná pagótami chumuchí chopi ra'fchaga aní mapu aboni wabé tamí o'wiké.

Chopi aboni arigá ketasi ne sulachí niráa, bichíwaga tamí galé.

⁷ Alí aboni ketasi bichíwali niráa tamí o'wiké,

chopi nawesa mapurigá echi jaré pagótami nulá.

Alí aboni wepi 'yékaka aní mapu Riosi achigórigá nulá.

⁸ Mapujítitamo ma ariweli Riosi nulalila. Jípitamo chopi nijéwaga olá mapurigá jaré pagótami nulá, mapujítitamo wisabé si'winárigá pabaka echi jaré sikolí, ayena chótamo wisabé echirigá pabaka echi jaré basi, ayena chótamo auché jaré echiyiri wikabé namuti olá.

⁹ Alí Jesusi ayena cho jeaneli: 'Yémitamo tarapé o'wiké Riosi nulalila. Chopi 'yémitamo si'winárigá achigórigá olá mapurigá chabé ki'yá jonsa, sinibí olali echi jaré 'yemi pagótamawala. ¹⁰ Alí echi Moisesi je'ná jerigá osali mapurigá osirúami ju echo'ná Riosi Ra'íchala osilíwalachi: Galá o'wiké kemi onó, echi kemi iyé ayena cho. Echi mapu wabé yóniga anéko kepu onó, echi kepu iyé omá, échiko waminá mi'lirúami níima. ¹¹ Chopi 'yémitamo aní mapu galá risensia ju mapu bilé rijói jeanema kepu onó, kepu iyé omá: Mani Riosi 'yali suwaba echi jaré nijé níwala namuti. Echijítini ma ketasi omero waminabi mi ku'wíriya. ¹² Alí bilé rijói echirigá anésagá kepu 'wénawa, alí 'yémitamo aní mapu ma ketasi arigá 'wérali ju mapurigá waminabi ku'wírama kepu onó, kepu iyé omá. ¹³ Alí 'yémitamo echirigá ologá tarapé galabé nirali Riosi Ra'íchala. Chópitamo nijéwaga olá mapurigá echi auché jaré pagótami binela. Echirigátamo auché jaré wikabé chibi yiri namuti olá.

¹⁴Alí Jesusi auchecho siné bayegá echi pagótami, jeaneli: Galá namsi. Ne galá machisí Nijé ra'íchala. ¹⁵Ayena cho jeaneli: Echi pagótami ketasi chirigá chati sulélama mapujiti aboni ko'wá echi jaré ko'wáami mapu ketasi risensia ju mapu aboni ko'mea. Chopi echi pagótami we chati sulela mapujiti aboni wabé nakí mapu chati olama. ¹⁶¡'Yemi máputamo galá nakéami ju, galá namsi!

¹⁷Alí mapalí Jesusi ariweli echi wikabé pagótami, Binói echo'ná pachá kalírali ku bakili. Alí echi jaré mapu Binói binérali we rukueli mapu churigá aniwáami níli mapurigá Binói echirigá irétaga nawésali. ¹⁸Alí Jesusi jeanigá rukueli: ¿Kéchatamo cho galá machili mapurigani irétali? ¿Kéchatamo machí mapu echi ko'wáami mapu ikí bilé rijói ko'wá, ketasi chirigá omero chati suléami niwayá echi rijói? ¹⁹Echi ko'wáami ketasi bakí echo'ná rijói sulálachi, chopi echo'ná binói ropálachi bakisá, echo'ná jonsa we simírama. Echalí Jesusi echirigá anigá ruyeli mapu ne suwaba ko'wáami galá risensia ju mapu ko'mea, mapujiti echi ko'wáami ketasi chati suréami niwá echi pagótami. ²⁰Alí Jesusi ayena cho jeaneli: Echi jaré namuti mapu echo'ná pachana echi jaré pagótami sulálachi jonsa ku machínako, echi chopi ju mapu we chati suléami niwá echi pagótami. ²¹Mapujiti echo'ná pachana echi pagótami sulálachi jonsa ku 'machina echi jaré wabé chati 'nátali. Ne si'néami pagótami chati suléami ju, echijiti echi jaré mapu ma niwíami ju, arígá auché jaré wiká isena yuwa kochí; echijiti echi auché jaré mapu ketasi cho niwíami ju ayena cho wabé chati ologá, wiká yuwa kochí. Echi pagótami wabé chati suléami ju, echijiti aboni wabé nakówaka ko'yáami ju; ²²echijiti aboni we chigórami ju; echijiti aboni wabé korúkami ju; echijiti aboni we chati oláami ju; echijiti aboni we ikaléami ju; echijiti aboni we chati ologá piréami ju; echijiti aboni we nakichika nakawélami ju; echijiti aboni wabé chati ra'íchami ju; echijiti aboni wabé chati 'nátaga nóchama; echijiti aboni wabé nataguésuli ju. ²³Ne suwaba je'ná jeyili wikabé namuti chati oluwáwami ku 'machina echo'ná pachana echi chati oláami pagótami sulálachi jonsa. Echijiti echi pagótami waminabi wabé chati suléami niwárami ju.

Bilé mukí si'wína bitéami galá bichíili echi Jesusi

(Mt. 15.21-28)

²⁴Alí Jesusi ku simisá echo'ná jonsa, echo'ná Tírochi anilíwachi simili, echo'ná Sirónachi anilíwachi ayena cho. Alí echo'ná biléana kalírali bakigá ketasi nakili mapu echo'ná piréami pagótami machimea kumi asalo Binói. Chopi jaré arígá galá machili mapo'ná Binói asali. ²⁵Ayena cho bilé mukí, echo'ná bitéami we yámíti galá machili mapu Jesusi echo'ná asalo. Echi mukí ranala tiwé we chati riablo aliwala aliwéami níli. Echijiti echi mukí echo'ná nawagá, echo'ná bacháami wéemi raweka chokoba wilíbali mapo'ná Jesusi asali. ²⁶Alí echi mukí ketasi Juríosi anilíwami pagótami níli, chopi si'nú ra'íchami níli, ayena cho si'wina bitéami níli. Alí echi mukí wabé risúu anigá tánali mapurigá Jesusi ku machí pama echi riablo aliwala echo'ná pachana echi tiwé sulálachi jonsa. ²⁷Alí Jesusi jeaneli: Echi jaré Juríosi pagótami 'yemi mi ané kochí niráa, mapujítitamo isena pagótami ju. Echijiti ariwé mapu echi jaré mapu Riosi kúchuwala anérámi ju, ne bachá ko'mea. Ketasi risensia ju chapísá echi jaré Riosi kúchuwala níwala ko'wáami, waminá kochí kóoluwa. ²⁸Alí echi mukí ku nijéwaga jeaneli: Ayena, galá ju. Chopi echi kochí, ri'lé pachá mésachi uchútami, arígá galá ko'wá echi kúuchi chi'wáami ko'wáami mapu echi kúuchi kúrowi rujuina. ²⁹Alí Jesusi jeaneli: Ne galami anili. ¡Máa ku simigá! Echi

wabé chati riabla aliwala máa ku machínali echo'ná pachana mujé ranala sulálachi jonsa. ³⁰ Alí echi mukí ma ku nawagá echo'ná binói bitélachi, we yáati riwali ku machínalo echi wabé chati riabla aliwala, chopi echi tiwé echo'ná pétechi bu'wili.

Jesusi ku sa'wali bilé rijói ke námiami, ayena cho ke ra'íchami

³¹ Alí mapalí Jesusi ku simili echo'ná Tírochi anilíwachi jonsa, echo'ná Sirónachi anilíwachi simíraga, ayena cho echo'ná makóina o'wéalachi simírali. Alí Binói ku nawali echo'ná walú ba'wírali suwé Galiléachi anilíwachi. ³² Alí echo'ná pálati bilé rijói ke námiami, mapu ayena cho ke oméríami níili ra'ícha. Alí Jesusi tánalati mapurigá moba nochogá, ku sa'wama. ³³ Alí Jesusi waná bayéraga, pachana echi rijói nakálachi nochali, Binói sikala jiti. Alí kachípaga, sa'liwá jiti ucheli echi rijói cha'méloachi. ³⁴ Alí Jesusi ripá riwigachi 'néniga, we iwiga jeaneli: ¡Ejata! Echi mapu Jesusi ra'íchala niráa, jerigá aniwáami ju: ¡Ku iráparaga! ³⁵ Alí echi rijói we yáati galá ku námali. Ayena cho binói cha'méloachi ma ku sa'wárami níili. Ayena cho ma ku omérali ra'icha. ³⁶ Alí Jesusi ra'ámaga nuleli mapu ke wesi ruyema mapurigá ikili. Chopi mapalí Jesusi waminabi echirigá aneli, echi pagótami waminabi nawésali mapurigá ikili. ³⁷ Alí aboni wabé 'néniga jeanili: Je'ná Jesusi suwaba ne galá olá. ¡Binói galá ku sa'wá echi pagótami mapu ke námiami ju! ¡Ayena cho Binói galá ku ra'icháraga olá echi pagótami mapu ke omérámi ju ra'icha!

Jesusi kowa nawó mili pagótami

(Mt. 15.32-39)

8 Alí echalí rawé wikabé pagótami napawili mapo'ná Jesusi asali, chopi aboni tarapé téeli mapu ko'mea. Echijiti Jesusi bayegá jeaneli echi jaré mapu Binói binérali: ² Wabení natimá je'ná wikabé pagótami mapujiti ma bikiyá chi'leli mapu jonsa aboni tamí yuwa muchuwi. Alí aboni ma ketasi niwa ko'wáami. ³ Alí bicheni ke kóosa, ku julásagá echo'ná aboni pirélachi, jaré aboni ketasi oméráma simiba echo'ná buwichí, mapujiti jaré aboni mikabé jonsa simíbali. ⁴ Alí echi jaré mapu Jesusi binérali jeaneli: ¿Churigata kóobo je'ná wikabé pagótami jena'í mikabé kawichí? ⁵ Alí Jesusi jeanigá rukueli: ¿Chu kipu ko'wáami niwa 'yemi? Alí aboni jeaneli: ¡Chópita niwa kichao kúuchi pani!

⁶ Alí Jesusi nuleli echo'ná muchínala echi wikabé pagótami. Alí Binói chapigá echi kichao kúuchi pani, ma natétara 'yasa Riosi, galá rojuánali. Alí Binói 'yali echi jaré mapu Binói binérali mapurigá aboni nachútaga 'yama echi jaré wikabé pagótami. ⁷ Ayena cho nirúali pe okuáa rochí. Je'ná jiti Jesusi, Riosi yuwa ra'íchaga, natétara 'yasa, ayena cho nurali nachutánala. ⁸ Alí ne si'néami echi wikabé pagótami ma kosá, ne galá posali. Alí ma sunisa ko'yá, kichao walírali buchíami ku napabuli echi kúuchi chi'wáami ko'wáami tibíami. ⁹ Echalí echi pagótami mapu ko'wali, ne wikabé, nawó mili níili. Alí Jesusi ma ripóraga, ku júuli echo'ná aboni pirélachi. ¹⁰ Echalí Jesusi ku bakili echo'ná bárkochi ba'wírali moba yénamichi. Alí echi jaré mapu Jesusi binérali ayena cho Binói yuwa mo'wisá, si'néami echo'ná muchiga, auché biléana ku simíbali mapo'ná Ramanútachi anilíwachi níili.

Echi jaré Bariseo we sayera Jesusi

(Mt. 16.1-4; Lk. 12.54-56)

¹¹ Alí jaré o'wéara binériami Bariseo anilíwami rijói, echo'ná Jesusi yuwa sigá, wabé sayéraga ra'íchali Binói yuwa, mapujiti aboni ketasi bichíili mapu Riosi ne

bichíwali jiwerawa 'yari mapurigá Jesusi ne wabé omériga olama mapurigá ke wesi auché jaré pagótami omero echirigá olayá. Echijiti aboni tánali mapurigá Jesusi we yáati wabé omériga olama sinepi niráa mapurigá aboni echirigá galá machimea acha Binói ne bichíwali echirigá omérali olayá.¹² Alí Jesusi we iwiga jeanili: ¿Churékula je'ná pagótami we taní mápuni Nijé we omériga olama sinepi niráa? Aboni chopi we nakí mapu 'nema Nijé echirigá oláachi.¹³ Alí Jesusi echo'ná ariwesa echi jaré o'wéala binériami Bariseo anilíwami rijói, auchécho ku bakili echo'ná pachá bárkochi, echo'ná walú ba'wírali moba iyénami.

Echi jaré Bariseo wabé 'yékaka binérali

(Mt. 16.5-12)

¹⁴ Alí echi jaré mapu Jesusi binérali ke newalali ko'wáami nutuguéria. Alí aboni pe bilepi pani chopi nutugueka sírali echo'ná bárkochi ba'wírali moba iyénamichi. ¹⁵ (Echi jaré pani echi levadura anilíwami jiti niwaliwa.) Alí Jesusi jeanili: Ne galá 'nesa, a aboni tibusi mapurigátamo miná ariwebo echi jaré Bariseo níwala levadura anilíwami, ayena cho ariwesi echi Erorsi níwala levadura. ¹⁶ Alí echi jaré mapu Jesusi binérali a'nagupi ra'íchaga chótali jeaniyá: Binói echirigá ra'icha mapujítita ketasi wikabé nutuguérali echi jaré pani, mapujítita echi pani echi levadura achigá niwaliwa. ¹⁷ Alí Jesusi galá machili mapurigá aboni mayeli mapu Binói echirigá ra'íchali echi pani jiti rugá; chopi Jesusi echirigá aneli mapurigá aboni ketasi olama mapurigá echi jaré Bariseo ologá binérali, nibilé mapurigá echi jaré Erorsi amígowala binérali. Echijiti Jesusi auchécho siné rukueli jeanigá: ¿Churékulátamo a'nagupi ra'íchaga aní máputamo ketasi wikabé nutuguérali echi pani? Ayena cho rukueli jeanigá: ¿Kéchatamo cho machí mapurigá Nijé wabé omériga olali? ¿Áchatamo echiyena wabé biwárami suléami ju? ¹⁸ ¿Kéchatamo busuchí jiti ritiwá? ¿Nirapéchatamo nakachí jiti nami? ¿Kéchatamo newalá? ¹⁹ Chabé mapalini rojuániga nachútali echi malí pani, echi malí mili rijói koya, ¿chukíputamo walírali ku buchíwaga napabuli, echi kúuchi chi'wáami pani tibíami? Alí aboni jeanili: Echalita buchíwali makói miná okuá walírali. ²⁰ Ayena cho Jesusi jeanili: Alí mapalini rojuániga nachútali echi kichao pani echi auché jaré nawó mili rijói koya, ¿chukíputamo walírali ku buchíwaga napabuli, echi kúuchi chi'wáami pani tibíami? Alí aboni jeanili: Echalita buchíwali kichao walírali. ²¹ Alí Jesusi jeanili: ¿Kéchatamo cho machí mapu Nijeni wabé omérami ju, suwaba namuti olayá?

Jesusi ku sa'wali bilé rijói ke machíliami

²² Alí aboni echo'ná bo'ónala Becháirachi anilíwachi sili. Alí mapo'ná Jesusi asali, echo'ná pálati bilé rijói ke machíliami. Alí echi jaré mapu pali, wabé risúu anigá tánali mapurigá Jesusi, Binói sikala jiti nochogá, ku sa'wama echi rijói. ²³ Alí Jesusi chapigá echi ke machíliami rijói sikala, waná toli echo'ná rijówachi jonsa. Alí Jesusi kachípaga, sa'liwá jiti ucheli echi ke machíliami busílachi. Alí rukueli jeanigá: ¿Áchamo ma galá machili? ²⁴ Alí echi mapu ke machíliami níili, ma ku 'néniga jeanili: ¡Mani ritiwá 'yénami echi pagótami! ¡Chopi nijeni ritiwá mapurigá jaré rojuá 'yénami niráa! ²⁵ Alí Jesusi auchécho siné sikati nochali echi rijói busílachi. Alí echi rijói galá ku 'néniga, ma ne galá machíliami nílagá, suwaba ne machiná riwali. ²⁶ Alí Jesusi, echo'ná binói bitélachi, ku júuli echi rijói, jeanigá: Ketasi simí echo'ná rijówachi, nibilé wesi ruyé mapurigami ikili.

Pegro aní mapu echí Jesusi, Walubela Cristo ju

(Mt. 16.13-20; Lk. 9.18-21)

²⁷Alí Jesusi simili echo'ná jaréana rijówachi mapo'ná mulipi níili echo'ná walúlachi Sesarea Jirípochi anilíwachi. Echi jaré mapu Binói binérali ayena cho simíbali. Alí echo'ná buwichí síraga, Jesusi jeanigá rukueli echí aboni: Echi auché jaré pagótami, ¿Chigá tamí mayé? ²⁸Alí aboni ku nijéwaga jeaneli: Jaré mayé mapu Mujé, echí Juani ju mapu chabénala pagoli echí pagótami. Auché jaré mayé mápumi echí Elíasi ju, mápumi ma ku nawali jena'lí wichimóbachi. Auché jaré mayé mápumi bilé Riosi jiti nawésami ju, mápumi kí'yá bitéali jena'lí wichimóbachi, chopi mápumi ma ku owínali. ²⁹Alí Jesusi jeanigá rukueli: 'Yemi, ¿chigátamo tamí mayé? Alí echí Pegro ku nijéwaga jeaneli: Mujé ju echí Cristo anilíwami. Riosi mi wilali mapurigá Walubela Nigúurami niráa. ³⁰Alí Jesusi we nuleli mapurigá aboni ke wesi echirigá ruyema Binói jiti.

Jesusi bachá niráa jeanigá nawésali mapu Binói mi'lirúami níima

(Mt. 16.21-28; Lk. 9.22-27)

³¹Alí Jesusi chótali jeanigá nawésiya mapu Riosi wilali Binói mapurigá Ku'wíriami niráa. Ayena cho jeanili mapu Binói ne wabé kichiga, risúu olálami níima, echí jaré o'wéala Juríosí jiti. Ayena cho jeanili mapu Binói echirigá wabé kichiga, risúu olárami níima, echí jaré o'wéala sacerdote jiti, ayena cho echí jaré nulalíwami binériali jiti. Alí Binói Jesusi ayena cho jeanili: Echi jaré pagótami tamí mi'limea, chopi mapalini ma mi'lirúami níisa, echalini bikiyá ch'ilígá auchecho siné ku owínama. ³²Alí Jesusi je'ná jerigá ne machiná niráa, ne bichíwaga aneli. Alí echí Pegro pe waná bayéraga jeaneli mapu ketasi 'wérali níima mapurigá Jesusi echirigá olárami níima. ³³Alí Jesusi ku kuwana 'nénali echí auché jaré mapu Binói binérali. Alí Binói jeaneli echí Pegro: ¡Miná waná simigá! ¡Mujé chopi ra'icha mapurigá echí riablo, Satanasi riwéami! ¡Mujé tarapé 'nata mapurigá Riosi 'nata, chópimi 'nata mapurigá echí auché jaré pagótami 'nata!

³⁴Alí Jesusi bayeli echí jaré mapu Binói binérali, echí auché jaré pagótami ayena cho. Alí Binói jeaneli: A jaré 'yemi olánalasagá mapurigá Nijé nakí, ketasi waminabi olasi mapurigá 'yemi aboni chopi nakí. Chopi sinibí rawé nijéwaga olasi mapurigá Nijé 'yemi mi nulema, ayena cho arigá anachasi maparítamo risúu olárami níibo, achigórigá mapurigá Nijé anachama mapalini wabé risúu olárami níima. ³⁵Mapujiti mapuyíripi rijói jena'lí wichimóbachi chopi kaníлага bitélanaliko, échiko chopi miná mukumea. Alí mapuyíripi rijói mapu oláanaliko mapurigá Nijé nakí, ayena cho echí mapu Riosi chopi Ra'íchala jiti bichífinalaga biteko, échiko ne sinibí niráa bitélama. ³⁶Ayena cho jeaneli: A bilé rijói ne suwaba mésagá jena'lí wichimóbachi nirúami namuti, alí arigá miná mukusá, je'ná echiyiri rijói arigá tarapé chirigá ku'wíratami níima suwaba echí jaré wikabé namuti jiti. ³⁷Mapujiti bilé rijói ma mukúami níisa ketasi omérama we yáati auchecho ku bitéliya jena'lí wichimóbachi. Nibilé wesi omérama, a ne suwaba jena'lí wichimóbachi nirúami wenomí jiti natétiya. ³⁸Jena'lí wichimóbachi piréami pagótami wabé chati oláami ju, ayena cho aboni tarapé galá bichíyami ju. Echijiti a bilé rijói tamí jiti riwélasagá, ayena cho riwélasagá Nijé Ra'íchala jiti, Nijé ayena choni riwiíma je'ná jeyiri rijói mapalini ku nawama jena'lí wichimóbachi, echí jaré o'wéala Riosi kapitánawala

yuwa. Riosi tamí wilali mapurigá Ku'wíriami niráa. Alí mapalini ku nawama jena'í wichimóbachi, echalí Nijeni ne wabé Walubela níima mapurigá Nijé Onolá ne wabé simírami Walubela ju.

9 Ayena cho jeaneli: Ne bichíwali 'yemi nimí ané mapu jaré 'yemi jena'í jáwami ketasi cho suwibóatamo, ke cho 'nénasa mapurigá Riosi wabé oméraga nulá.

Jesusi si'nú nakulíwarami níili

(Mt. 17.1-13; Lk. 9.28-36)

²Alí pe kinana, ma simírasachi usani rawé, echalí Jesusi simili echo'ná waná biléana ripabé rabó. Alí Jesusi bayérali echi Pegro, echi Jakobo ayena cho, echi Juani asíchiko. Alí echo'ná bacháami aboni yuwa Jesusi ke sayiná si'nú nakulíwarami níili, ne galabé ratábami niráa. ³Alí Jesusi napáchala we galá ratábami niwárami níili. Ne wabé simírami rosákami níili, ketasi mapurigá kipalí. Alí tarapé wesi jena'í wichimóbachi piréami galá omero echiyena wabé rosákami niwayá. ⁴Echalí ke sayiná okuá rijói echo'ná aboni yuwa jábali, echi mapu Elíasi níili, echi Moisesi ayena cho, mapu chabé ki'yá bachá piréali jena'í wichimóbachi. Alí aboni we ra'íchali Jesusi yuwa. ⁵Alí Pegro jeaneli echi Jesusi: Binériami, ¡Ne wabé galá ju mapurigata jena'í muchuwi! Galá níima jena'í niwásata bikiyá kalí látami. Bilé Mujé níwala níima. Auché bilé echi Moisesi níwala níima. Auché bilé echi Elíasi níwala níima. ⁶Echalí echi jaré Jesusi yuwa binéami ne wabé majajáratami níili. Echijiti echi Pegro ketasi machili churigá ra'íchalo. ⁷Alí echo'ná ke sayiná ne wabé bimoli. Echalí Riosi Binói ke sayiná echo'ná bimolírali jonsa ra'íchaga jeanili: Je'ná ju keni Raná, mápuni wabé galé. ¡Galá namsi Binói ra'íchala! ⁸Echalí we yáati ku kawili echi bimolí. Alí echi jaré binéami we yáati ke wesi riwali echo'ná aboni yuwa jáwami, chopi bi'neli Jesusi riwali echo'ná aboni yuwa wilíami.

⁹Alí mapalí aboni ku tikina sírali echo'ná ripá rabó jonsa, echalí Jesusi ra'ámaga nuleli echi aboni mapu ke wesi ruyema mapurigá aboni riwali echo'ná ripá rabó; chopi nuleli mapurigá aboni echirigá ku ruyema mapalí Binói ma mi'llirúami níisa, auchecho ku owinsa. ¹⁰Echijiti aboni tarapé wesi ku ruyeli, chopi aboni a'nagupi jeanigá rukueli: ¿Churigá aniwáami ju mapurigá Binói aní: Mapalini ma mi'llirúami níisa, auchecho siné ku owínama? ¹¹Alí aboni rukueli jeanigá: ¿Churékula echirigá aní echi jaré nulalíwami binériami mapu echi Elíasi bachá niráa ku nawama jena'í wichimóbachi? ¹²Alí Jesusi ku nijéwaga jeaneli: Ne bichíwali ju mapu echi Elíasi bachá nawagá, ne bukulíwami niwama suwaba namuti; ayena cho jeaneli: Riosi tamí wilali mapurigá Ku'wíriami niráa. Alí tamí jiti rugá osirúami ju echo'ná Riosi Ra'íchala oselíwalachi mapurigani wabé risíu olárami níima, ayena cho mapurigani wabé kichírami níima. ¹³Alí Nijé 'yemi nimí ané mapu ma nawali bilé rijói jena'í wichimóbachi mapu achigórígá jiwériga olali mapurigá echi Elíasi olali chabé ki'yá rawé. Chopi jena'í wichimóbachi piréami o'wéala ma chíbirigá olali echi rijói yuwa ne suwaba mapurigá aboni nakili, echirigá mapurigá bachá niráa osirúami níili echo'ná Riosi Ra'íchala oselíwalachi mapurigá ikimea riwéali binói.

Jesusi ku sa'wali bilé towí mapu wabé chati riablo aliwala aliwéami níili

(Mt. 17.14-21; Lk. 9.37-43)

¹⁴Alí ku tiguínaga echo'ná ripá jonsa, echo'ná ku sili mapo'ná echi auché jaré binéami buwigá muchili. Alí wíkabé pagótami napawika muchili echo'ná echi jaré

binéami yuwa. Echalí jaré nulalíwami binériami wabé na'áwaga ra'íchali echi aboni yuwa.¹⁵ Alí mapalí echi wikabé pagótami riwali Jesusi, si'néami aboni echo'ná júmaga ne wabé kaníliga narépali.¹⁶ Alí Jesusi jeanigá rukueli: ¿Churékulátamo echirigá ra'icha aboni yuwa?¹⁷ Echalí bilé rijói echo'ná wilíami jeaneli: Binériami, nijé nimí 'yébali keni raná, mapu we chati riabla aliwala aliwéami ju, ayena cho ketasi ra'íchami ju.¹⁸ Alí echi wabé chati riabla aliwala wabé jiwériga nulé echi keni raná. Echijiti echi keni raná wabé ronénaga, ramichí ki'lákaka, ri'llé bu'wiba. Echijiti binói tarapé jiwera. Jipi nijeni tánali echi jaré mapu Mujé binérali mapurigá aboni ku machí pama echi we chati riabla aliwala. Chopi aboni ketasi omérali.¹⁹ Jesusi ku nijéwaga jeaneli: ¡Báa! 'Yemi pagótami ketásitamo bichiyami ju. ¿Chu yénasí arigá 'wérali ju mápuni 'yemi yuwa asimea? ¿Chu yénasí echirigani anachama 'yemi jiti, mapujítitamo ketasi bichíi? ¡Wakiná tosí echi towí!²⁰ Alí echo'ná Jesusi yuwa pálati echi towí, echi mapu wabé chati riabla aliwala aliwéami níili. Alí echi riabla aliwala galá riwisá echi Jesusi, ne wabé jiwériga nokérali echi towí. Alí echi towí echo'ná wi'yérali ri'nagápulaga, bu'wíraga, ne wabé ronénali.²¹ Alí Jesusi jeanigá rukueli echi towí onolá: ¿Kilíbuko jonsa je'ná jerigá risúu olárami níili? Alí binói onolá jeaneli: Chabé táaga jonsa.²² Alí echi riabla aliwala wisabé chokéami wabé mi'linálaga, echo'ná na'lírali pasá, echo'ná we rokóochi ba'wírali ayena cho. ¡A mi omérasagá tamujé tamí ku'wíriya, galá tamujé natimaka ku'wiro!²³ Alí Jesusi nijéwaga jeaneli: ¿Kéchami bichíi mapurigani galá omero? Mapalimi galá bichíi Riosi, mujemi galá omérama ne suwaba namuti olayá.²⁴ Alí echi towí onolá we yáati o'weli ra'íchaga jeaneli: ¡Ayénani galá bichíi Riosi! ¡Tamí ku'wiro mapurigani waminabi galá bichíima!

²⁵ Alí mapalí Jesusi riwali wikabé pagótami echo'ná napawísiami, Binói we yáati nuleli echi we chati riabla aliwala mapu echo'ná pachana towírali asali. Alí jeaneli: Mujé we chati riabla aliwala mápumi ke námtega, ke ra'íchami niwá je'ná towí, Nijé nimí nulé: ¡Ku machínaga echo'ná pachana towírali jonsa! ¡Tarapé auché siné ku bakí echo'ná pachana towírali!²⁶ Alí echi we chati riabla aliwala o'weli sinaga, wabé jiwéraga nokérali echi towí. Alí echi riabla aliwala ma ku machínali echo'ná pachana towírali jonsa. Echalí echi towí mapurigá mukúami niráa tibili. Echijiti echi jaré wikabé jeanili: ¡Ma mukúami ju!²⁷ Chopi Jesusi chapigá echi towí sikala, galá ku achali. Alí echi towí galá ku wilíbali.

²⁸ Alí mapalí Jesusi bakili biléana kalírali. Alí Binói echo'ná bi'neli atíachi, echi jaré mapu Binói binérali jeanigá rukueli: ¿Churékula tamujé ketasi galá omérali ku machí paya echi wabé chati riabla aliwala?²⁹ Alí Jesusi jeaneli: Je'ná jeyili riabla aliwala chopi ku machina mapalítamo we tánabo Riosi, ayena cho mapalítamo wi'libé niráa ketasi kopoá ko'wáami, mapurigátamo echirigá Riosi chópitamo yuwa ra'íchabo.

Jesusi auchecho siné nawésaga aní mapu Binói mi'lirúami níima (Mt. 17.22-23; Lk. 9.43-45)

³⁰ Alí echo'ná jonsa ku simasa, echo'ná Galiléachi anilíwachi kawírali simárali. Alí Jesusi ketasi nakili mapu echo'ná Galiléachi piréami machimea mapu Binói echo'ná iyénali.³¹ Mapujiti Jesusi chopi binériya iyénali echi jaré mapu Binói yuwa binéami níili. Alí Binói jeanigá binérali: Riosi tamí wilali mapurigá Ku'wíriami niráa, chópini nijírami níima mapurigá echi pagótami o'wéarawala nurama

tamí mi'línala, chopi mapalini ma mi'lirúami nísa, bikiyá chi'rigá auchecho ku owínamacani.³² Alí aboni tarapé machili churigá aniwáami níli mapurigá Jesusi ra'íchaga anili, ayena cho we majali rukueya.

¿Chigá walula níima tamujé aboni yuwa?

(Mt. 18.1-5; Lk. 9.46-48)

³³ Alí aboni echo'ná Kapernaúmachi anilwachi walúlachi sili. Alí mapalí Jesusi echo'ná pachá kalírali asali, Binói rukueli echi jaré binéami jeanigá: ¿Piri jítitamo rugá ra'íchali mapalítamo echo'ná buwichí sírali? ³⁴ Chopi aboni wabé riwéraga, ketasi ku nijéwanali, mapujiti echo'ná buwichí aboni chopi a'nagupi na'áwaga ra'íchaga sírali, mapujiti ibílipi niráa jerigá 'náitali: Nijé binói ne walula níimani echi auché jaré yuwa. ³⁵ Alí Jesusi echo'ná asíbaga, bayegá echi jaré makói miná okuá binéami, jeaneli: Echi mapuyíripi nakiko mapu ne walula níima echi auché jaré 'yemi yuwa, échiko ne jubá níraga mapurigá chopi ku'wíraga olama si'néami 'yemi yuwa. ³⁶ Alí Jesusi chapigá bilé táchí towí, echo'ná aboni yuwa nasipa achali. Alí echo'ná Binói sikálachi mutuka, jeaneli echi jaré mapu Binói binérali: ³⁷ Echi rijói mapuyíripi kaleko je'ná jeyili kúuchi, mapujiti binói galá tamí bichíi, échiko ayena cho we tamí galé. Alí echi mapu yíripi tamí galeko, ayena cho we galé Riosi, echi mapu tamí júuli jena'í wichimóbachi.

Echi mapu ketasi tamujé tamí sayérako, échiko tamujé tamí yuwa ju

(Lk. 9.49-50; Mt. 10.42)

³⁸ Alí echi Juani jeaneli: Binériami, tamujeta riwali bilé rijói mapu miná machí a'wali echi jaré riablo aliwala echo'ná jaré pagótami sulálachi jonsa mapalí binói we ra'íchaga anili Mujé riwalá. Alí bicheta jeaneli mapu ketasi risensia níli mapurigá binói echirigá olama, mapujiti ketasi tamujé tamí yuwa iyena. ³⁹ Alí Jesusi jeaneli: Ketasi echirigá ra'amasi, mapujiti mapalí bilé rijói galá omero echirigá wabé omériga olayá mapujiti binói galá tamí bichíi, echi yiri rijói ketasi we yáati tamí sayéraga ra'ichama. ⁴⁰ Mapujiti echi mapu ketasi tamujé tamí sayérako, échiko tamujé tamí yuwa ju. ⁴¹ Ne bichíwali 'yemi nimí jeané: Mapuyíripi rijói 'yemi mi pe táchí namuti 'yásagá, mapurigá pe táchí ba'wí niráa bajínala, mapujítitamo Cristo níwala ju, échiko arigá galá ku natétarami níima.

Ketasi galá ju we chati olárasa echi auché jaré pagótami

(Mt. 18.6-9; Lk. 17.1-2)

⁴² Alí Jesusi ayena cho jeaneli: Mapuyíripi rijói we chati olárasagá bilé táchí mapu tamí jiti bichíyami ju, échiko ne wabé simírami chati olá. Ne bachá niráa, ne galá níli echiyiri rijói miná walú ba'wírali pátami nísa, echo'ná binói kutárachi bilé matá jiti burugá, mapurigá binói ketasi echirigá chati oláriami níima echi bilé táchí mapu tamí bichíi. ⁴³ Alí a kemi siká mi chati olárasagá, ¡Miná ripuná! Waminabi ne galá níima, mujé echirigá sikamochi niráa bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigá mi okuá sikeka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁴ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí. ⁴⁵ Alí a kemi ronó mí chati olárasagá,

¡Miná ripuná! Waminabi ne galá níima, mujé echirigá kasimochi niráa bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigami okuá roneka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁶ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí. ⁴⁷ Alí a kemi busí mi chati olárasagá, ¡miná machí pa! Waminabi ne galá níima, mujé echirigá bilénapi buseka bitélasa jena'í wichimóbachi, mapurigami pe minánomí arigá sinibí niráa bitélama echo'ná ripá riwigachi. Alí ketasi galá níima echirigami okuá buseka, arigá echo'ná ri'lé riáblochi pátami níisa, mapo'ná echi walubé na'í, we rajáami, tarapé siné cho'wíami níima. ⁴⁸ Mapujiti echo'ná ri'lé riáblochi nirúami kuchíwali tarapé siné suwí, ayena cho echo'ná nirúami walubé na'í tarapé siné cho'wí.

⁴⁹ Alí ne si'néami 'yemi ne wabé risúu olárami níibo, mapurigátamo waminabi galá bichiyami níibo Riosi. Alí suwaba echi jaré namuti máputamo ko'ogá 'yabo Riosi, ne galá akawarami níima. ⁵⁰ We galá ju echi koná, chopi a echi koná ketasi 'me akáami níisa, ketasi chirigá auchecho siné ku galá akáami niwárami níima. Echijiti ne galabé nílasi 'yemi, achigórigá mapurigá echi koná ne galabé ju, ayena cho kilí rijóilasi a'nagupi.

**Jesusi binérali mapu ketasi risensia ju mapu ku rojuama echi jaré
mapu ma niwíami ju**
(Mt. 19.1-12; Lk. 16.18)

10 Alí Jesusi echo'ná Kapernaúmachi anilíwachi walúlachi jonsa ku simigá, echo'ná Juréachi anilíwachi kawírali ku nawali, ayena cho echo'ná bakochi Joránachi anilíwachi bo'ónala ku nawali. Alí echo'ná piréami auchecho siné napawísachi echo'ná Jesusi yuwa, Binói auchecho siné nawésali echi aboni mapurigá Binói sinibí olali. ² Echalí jaré o'wéala binériami, Bariseo anilíwami rijói echo'ná sisáa, wabé wi'nijífinalaga jeanigá rukueli: ¿Acha risensia ju mapu bilé rijói upéami miná ariwema binói upila? ³ Alí Jesusi ku nijéwaga jeanigá rukueli: ¿Churigá osirúami ju mapurigá echi walula Moisesi 'yemi mi nuleli? ⁴ Alí aboni jeaneli: Echi walula Moisesi risensia nijali mapu bilé rijói arigá ariwema binói upila, mapalí echi rijói bilé osilí jeanigá niwasa mapu binói ma ariweli echi binói upila. ⁵ Alí Jesusi jeaneli: Echi walula Moisesi chopi 'yemi mi echirigá osagá nuleli mapujítitamo wabé biwárami suléami ju. ⁶ Ayena cho jeaneli: Ki'yá chokichí mapalí Riosi niwali ne suwaba namuti, echalí Riosi niwali bilé rijói, miná bilé mukí yuwa. ⁷ Echijiti bilé rijói ariwema kepu onó, kepu iyé omá, alí binói upema kepu upí. ⁸ Alí echi mapu okuá juko, échiko mapurigá bilepi niráa níima. Ma ketasi mapurigá okuá ju, chopi okuánika bilepi niráa ju. ⁹ Echijiti ketasi risensia ju mapu ku rojuama echi jaré mapu ma niwíami ju, mapujiti Riosi ma echirigá napabuli.

¹⁰ Alí mapalí aboni echo'ná pachá biléana kalírali muchili, echalí echi jaré mapu Binói binérali galá rukueli churigá aniwáami níili je'ná. ¹¹ Alí Jesusi jeaneli: Mapuyíripi rijói ariwesa kepu upí, alí auché bilé upésagá, échiko wabé chati siti ólá, mapujiti ma ariwesa echi ne binói upila, auché bilé si'nú mukí yuwa kochí. ¹² Ayena cho bilé mukí ariwesa kepu kuná, alí auché bile yuwa kunésagá, echi mukí ayena cho we chati olá, mapujiti ma ariwesa echi ne binói kunala, auché bilé si'nú rijói yuwa kochí.

Jesusi galabéraga ané echi jaré kúuchi

(Mt. 19.13-15; Lk. 18.15-17)

¹³ Alí jaré pagótami echo'ná pali jaré kúuchi mapurigá Jesusi, Binói sikala nochama echo'ná abónichi. Alí echi jaré mapu Jesusi binérali ra'ámaga aneli echi jaré pagótami mapu ketasi pama echi kúuchi. ¹⁴ Chopi mapalí Jesusi je'ná jerigá námali, echalí Binói yóniga jeaneli: Ariwesi mapu echi kúuchi wakiná tamí yuwa simama. Tarapé kumesi aboni, mapujiti Riosi galá nulé si'néami echirigá bichíyami. ¹⁵ Ne bichíwali Nijé 'yemi nimí jeané: Ne si'néami echi jaré kúuchi galá bichíi Riosi. Alí echi jaré pagótami mapu ketasi echirigá bichíko Riosi, échiko ketasi chirigá Riosi níwala níima. ¹⁶ Echalí Jesusi galá mutuka echi jaré kúuchi, echo'ná moba aboni mo'ólachi nochogá, alí Riosi yuwa ra'íchaga jeaneli: Kení Onó, ne galá nisé je'ná kúuchi.

Bilé rijói wabé níwami

(Mt. 19.16-30; Lk. 18.18-30)

¹⁷ Alí mapalí Jesusi pe minabi simigá inárali, echalí bilé rijói we 'maga nawali echo'ná Binói yuwa. Echi rijói echo'ná bacháami Binói yuwa wéemi raweka chokoba wiligá jeaneli: ¿Churigani ologá bitérama, mapurigá echirigani olasa, ne sinibí bitéami níimani? ¹⁸ Alí Jesusi ku nijéwaga jeanigá rukueli: ¿Churékulami tamí we galabé ané? Riosi bi'nélipi we galabé ju. ¹⁹ Mujé galá machí mapu Riosi je'ná jerigá nulá: Ketasi si'nú mukí yuwa kochí. Ketasi mi'yá auché jaré pagótami. Ketasi chigó. Ketasi ikaleka ra'ichá. Ketasi 'yékaka olá. Galá o'wiké kemi onó, echi kemi iyé omá. ²⁰ Alí echi rijói ku nijéwaga jeaneli: Binériami, nijé sinibini echirigá galá nijéwaga olali, chabé chokichí jonsa mapalini ranálati. ²¹ Alí Jesusi we natimaga 'néniga jeaneli: Bilé namuti ketásimi cho olali. Jipi ku simigá rarinéami suwaba namuti mapu ikí mi niwa. Alí 'yami suwaba echi wenomí echi auché jaré we tisúwati. Echirigami wabé níwami níima echo'ná ripá riwigachi. Alí ne galá bichíiga, tamí najató. ²² Alí echi rijói ne wabé siwega 'nátali mapalí binói námali je'ná jerigá ra'íchachi Jesusi. Echirigá wabé siwega ku simili, mapujiti ne wikabé namuti níwami níili.

²³ Alí Jesusi ne noligá 'néniga jeaneli echi jaré mapu Binói binérali: ¡Ne wabé nóchali ju mapurigá echi jaré wikabé namuti níwami galá nijéwaga olama mapurigá Riosi nulá! ²⁴ Alí echi jaré mapu Jesusi binérali ne wabé chami níлага ikigá 'nátali mapalí aboni námali echirigá ra'íchachi Binói. Alí Jesusi auchecho siné ra'íchaga jeaneli: ¡Kení kúchuwa, ne wabé nóchali ju mapurigá echi jaré wikabé namuti níwami galá nijéwaga olama mapurigá Riosi nulá! ²⁵ Alí echi kameyo anilíwami namuti, walú mapurigá bilé kawé ju. Alí echi kameyo, siné káachi ketasi 'me nóchali ologá simíramiré echo'ná biléana wichárali uchíi iwáachi, chopi ne wabé simírami nóchali ju mapurigá echi jaré wikabé namuti níwami galá nijéwaga olama mapurigá Riosi nulá. ²⁶ Alí aboni je'ná jerigá námaga waminabi ne wabé chami níлага ikigá 'nátaga, a'nagupi jeanigá rukueli: ¿Chigá 'nalina galá ku'wíratami níima? ²⁷ Alí Jesusi 'néniga jeaneli: Echi jaré pagótami ketasi omero je'ná jerigá olayá, chopi Riosi ne galá omero, mapujiti Riosi suwaba namuti galá omérami ju.

²⁸ Alí echi Pegro jeanigá chótali ra'icha: Tamujeta ma ariweli suwaba tamué níwala namuti. Alí bicheta mi yuwa najatáli. ²⁹ Alí Jesusi jeaneli: Ne bichíwali

'yemi nimí jeané: Jaré mapu tamí bichíiko arigá ariwema kepu kalí mapurigá aboni Riosi Ra'íchala chopi nawésiya 'yénama. Echijiti auché jaré ariwema kepu ritémawa, kepu 'wénawa keremá, kepu jubí keremá, kepu kúchuwa keremá. Alí auché jaré echijiti ariwema aboni kawíwala.³⁰ Alí ne si'néami mapuyíripi echirigá olako, aboni jena'lí wichimóbachi abijí pirélaga narema bilé kiento ritémawa niráa. Ayena cho narema bilé kiento iyé niráa. Ayena cho narema bilé kiento kúchuwa niráa. Ayena cho narema bilé kiento kawí niráa. Chopi ayena cho we yóniga, kichiga a'lajátarami níima. Alí waminana ma suwisáa, arigá auchecho ku pirélama ne sinibí niráa.³¹ Chopi wikabé mapu jipi rawé ne bachá o'wéala juko, aboni pe minana we kúuchala níima. Alí wikabé mapu jipi rawé wabé kúuchala juko, aboni ne bachá o'wéala níima.

Jesusi auchecho siné bachá anili mapurigá Binói mi'lirúami níima

(Mt. 20.17-19; Lk. 18.31-34)

³² Alí aboni echo'ná Jerusalémachi burúami moyena sírali. Alí Jesusi bachá inárali echí jaré mapu Binói binérali yuwa. Echalí echí jaré mapu Binói binérali ne wabé majaga najátali Binói yuwa. Alí Jesusi auchecho siné waná rojuánaga echí jaré makói miná okuá, galá ruyeli suwaba mapurigá ikimea riwéali.³³ Alí Jesusi jeaneli: Tamí galá kipusi. Riosi tamí wilari mapurigá Ku'wíriami niráa. Chopi mata moyena echo'ná Jerusalémachi simiba. Echo'ná Nijeni echí jaré o'wéala sacerdote, echí jaré nularíwami binériami 'yárami níima. Alí aboni tamí we wi'nijiga mi'línálama. Ali echo'ná isena pagótamichi nijírami níima, mapurigá aboni tamí mi'limea.³⁴ Alí aboni tamí we tiníchama, ayena cho ne wabé tamí wipisoma, ayena cho ne wabé tamí kachípama. Alí aboni tamí mi'limea. Chopi blikiyá chi'ligá, auchecho ku owínamani.

Echi Jakobo, echí Juani we taní mapu Jesusi olama mapurigá aboni nakí

(Mt. 20.20-28)

³⁵ Alí echí Jakobo, echí Juani napawika sisáa jeaneli: Binériami, tamujeta nakí mapurigami tamujé tamí olíima mapurigata mi tánabo. Alí je'ná okuánika Sibireo kúchuwala níili.³⁶ Alí Jesusi jeanigá rukueli: ¿Churigátamo nakí mapurigani 'yemi mi olíima?³⁷ Alí aboni jeaneli: Tamujé tamí 'ya máputa mi yuwa mulubé muchibo echalí mapalimi wabé walubératami níima. Tamujé tamí 'ya mapu bilé tamujé echo'ná Mujé yuwa watoná asimea, ayena cho mapu auché bilé echo'ná Mujé yuwa o'winá asimea.³⁸ Alí Jesusi jeaneli: 'Yemi tarapétamo machí mapurigátamo tamí tani. ¿Áchatamo anáchaga omérabo mapurigá Nijé anachama mapalini wabé simírami risúu olárami níima? ¿Áchatamo anáchaga omérabo mapurigá Nijé anachama mapalini mi'lirúami níima?³⁹ Alí aboni ku nijéwaga jeaneli: Ayénata galá omérabo. Alí Jesusi jeaneli: Ne bichíwali arigá 'wéralli ju mapu 'yémitamo achigórigá anachabo mapurigá Nijé anachama, ayena cho 'wéralli ju mapurigátamo ko'wirúami níbo, achigórigá mapurigá Nijé binói mi'lirúami níima.⁴⁰ Chopi Nijé ketasi risensia ju mápuni 'yemi mi 'yama máputamo muchibo echo'ná keni watonachi, echo'ná keni o'winachi keremá. Chopi risensia ju mapu echo'ná muchima echí jaré mapu Riosi, aboni jiti, echo'ná ma a'lárali.

⁴¹ Alí echí auché jaré makói, je'ná jerigá namsa, ne wabé na'áwali, echí Jakobo, echí Juani sayéraga. ⁴² Alí Jesusi bayegá echí jaré aboni, jeaneli: 'Yémitamo galá

machí mapurigá echí jaré isena pagótami o'wéalawala ne wabé 'wérali nulé echí pagótami, ayena cho echí jaré aboni silínawala ne wabé 'wérali olá aboni yuwa. ⁴³ Chopi 'yemi tarapé echirigá olasi. Si'winárigá mapu yíripi 'yemi mapu nakiko walula nílanala 'yemi aboni yuwa, échiko galá níima mapurigá pióntami niráa níisa, mapurigá binói chopi ku'wírama echí auché jaré 'yemi. ⁴⁴ Alí mapuyíripi 'yemi máputamo nakiko wabé walula nílanala ne si'néami echí auché jaré 'yemi yuwa, échiko galá níima mapurigá si'néami 'yemi piónawala niráa níisa mapurigá binói chopi ku'wírama echí auché jaré 'yemi. ⁴⁵ Alí Jesusi auchecho siné jeaneli: Riosi tamí wilali mapurigá Ku'wíriami niráa, mapurigani galá ku'wírama echí wikabé pagótami jenaí' wichimóbachi piréami. Nijé ketásini nawali jenaí' wichimóbachi mapurigá echí jaré pagótami chopi tamí ku'wírama. Nijeni nawali mapurigani ku'wírama echí pagótami, ayena cho mapurigani mi'lirúami níima aboni chati olalila jiti, mapurigani echijiti galá omérama ku wikáwiya wikabé pagótami.

Jesusi ku sa'wali bilé rijói ke machíriami

(Mt. 20.29-34; Lk. 18.35-43)

⁴⁶ Alí aboni sili echo'ná Jerikochi anilwachi walúlachi. Alí mapalí Jesusi auchecho ku simiyá inárali echo'ná walúlachi jonsa, echí jaré mapu Binói binérali ayena cho sírali. Auché jaré wikabé pagótami ayena cho sírali. Alí echo'ná mulubé buwichí asali echí Batimeo riwéami rijói, echí mapu ke machíliami níili. Je'ná rijói echí Timeo riwéami rijói ranala níili. Alí echí Batimeo wenomí taa asali, mapujiti ke machíliami níili. ⁴⁷ Alí echí Batimeo anélati mapu echí Jesusi, echo'ná Nasarétachi bitéami echo'ná simira inárali. Alí echí Batimeo chótali o'weli ra'ícha jeanigá: ¡Tamí natimá, Mujé Jesusi! ¡Mujé echí Rabili Ranala ju! ⁴⁸ Alí wikabé pagótami yómiga ra'ámali echí Batimeo mapujiti binói wisabé echirigá o'weli ra'íchali. Chopi echí Batimeo waminabi o'weli ra'íchaga jeanili: ¡Tamí natimá Mujé Jesusi, mápumi echí Rabili Ranala ju! ⁴⁹ Alí Jesusi námaga echirigá ra'íchachi, pe mikabé niráa wil'bali. Alí Binói jeaneli echo'ná mulubé Binói yuwa jáwami: ¡Wakiná bayesi echí rijói! Echirigá aboni jeanigá bayeli echí ke machíliami: ¡Kaníliga wirísaga! ¡Echi Walubela mi bayé! ⁵⁰ Alí echí Batimeo echo'ná ariwesa binói kimala, we yáati pochika wil'sali. Alí binói we yáati mulubéanali Jesusi yuwa. ⁵¹ Alí Jesusi jeaneli: ¿Piri mi nakí mapurigani mi olíima? Alí echí ke machíriami jeaneli: ¡Binériami, tamí ku machíliami niwá! ⁵² Alí Jesusi jeaneli: ¡Ku simigá! Mami galá ku machíliami ju, mapujítimi galá tamí bichíli. Alí echí ke machíliami we yáati ma galá ku omérali 'nénuya, ayena cho wabé kaníliga najáltali Jesusi yuwa echo'ná buwichí inárachi.

Jesusi nawali echo'ná Jerusalémachi

(Mt. 21:1-11; Lk. 19:28-40; Jn. 12:12-19)

11 Alí mapalí aboni ma mulubé sírali echo'ná walúlachi Jerusalémachi anilwachi, echalí mulubé simárali echo'ná rijówachi Betajechi anilwachi, ayena cho mulubé simárali echo'ná Betániachi anilwachi rijówachi. Alí mapalí aboni mulubé simárali echo'ná ripá rabó Olíbochi anilwachi, Jesusi okuá júuli echí jaré mapu Binói binérali, ² jeanigá: Echo'ná mulubé rijówachi simíbaga. Echo'nátamo riwiboa bilé bulito wiira chuktúami, ke cho binéami asiliwa. Botániga, wakiná tosí. ³ A jaré 'yemi mi jeanésagá: ¿Churékulátamo botana echí bulito? Alí bichétamo jeanebo: Echi Walubela Jesusi we risensia taní. Pe téliko ku nijima. ⁴ Alí aboni simasa

riwali echi bulito biléana kalírali machímanamí wíira chukúami, mapo'ná walú burúuli. Alí botánali. ⁵Echalí jaré echo'ná muchúami jeanigá rukueli: ¿Píritamo olá? ¿Churékulátamo ku botana echi bulito? ⁶Alí echi jaré Jesusi yuwa binéami ku nijéwali mapurigá Jesusi bachá niráa aneli. Alí echo'ná muchúami risénsia 'yali mapurigá aboni tomea echi bulito. ⁷Alí aboni pali echi bulito echo'ná mapo'ná Jesusi asali. Echalí aboni kimala jiti pérasa, Jesusi aseli echi bulito. ⁸Alí echo'ná buwichí mapo'ná Jesusi simírama riwéali, wikabé pagótami aboni kimala jiti pérali, ayena cho auché jaré rakú sawala na'línaga pérali. ⁹Echalí echi jaré mapu Jesusi yuwa bacháami sírali, ayena cho echi jaré mapu jubáami sírali, ne si'néami o'weli ra'íchaga jeanili: ¡Tamuje tamí ku'wiro! Wabé galabé ju jená Jesusi mapu echi Walubela Riosi wilali mapurigá Walubela Nigúurami niráa. ¹⁰Wabé galabé ju je'ná Jesusi mapu tamujé tamí nulema achigórigá mapurigá tamujé walúlawala Rabiri riwéami tamujé tamí nuleli. ¡Tamuje tamí ku'wiro, Mujé Riosi echo'ná ripabé riwigachi atíami!

¹¹Alí Jesusi ku nawali echo'ná Jerusalémachi. Alí echo'ná walubé Juríosi ri'obáwalachi bakisá, Binói ne noligá 'néniga riwali suwaba mapu ikí echo'ná ikili. Echo'ná jonsa auchecho ku simili echo'ná Betániachi anilíwachi mapujiti ma we alí níli. Echi auché jaré mapu Binói binériali ayena cho simíbali, Binói yuwa.

Jesusi yónali bilé chuná ke rakéami

(Mt. 21.18-19)

¹²Alí ba'alínala rawé mapalí Jesusi auchecho ku simili echo'ná Betániachi jonsa, echalí Binói ne wabé 'locheli. ¹³Alí pée mikabé riwali bilé chuná, we sawéami. Binói echo'ná simili 'némiya acha rakéami níila echi chuná. Alí echoná nawagá, sawala chopi riwali, mapujiti ketasi cho rakéachi níili. ¹⁴Echalí Jesusi ra'íchaga jeaneli echi chuná: ¡Jipi jonsa ma ke siné raké! Alí echi jaré mapu Jesusi binériali, si'néami galá námali je'ná jerigá ra'íchachi.

Jesusi machí a'wali echi jaré ralinéami echo'ná Riosi ri'obáwalachi jonsa

(Mt. 21.12-17; Lk. 19.45-48; Jn. 2.13-22)

¹⁵Pe wilibeko aboni ku sisáa echo'ná Jerusalémachi, Jesusi ku bakili echo'ná pachá echi walubé Juríosi ri'obáwalachi. Echalí Binói chótali miná machí a'wá echi jaré pagótami mapu echo'ná pachá, namuti ralinea 'yénali, ayena cho ku machí a'wali echi jaré mapu ralali, ayena cho Binói miná na'minali echi jubeli mapo'ná jaré rijói wenomí nakulíwiya muchili, ayena cho Binói miná na'minali echi jubeli mapo'ná auché jaré rijói makawi ralinea muchili. ¹⁶Alí Jesusi tarapé risensia 'yali mapurigá echi pagótami wiká namuti apéraga mo'wama echo'ná pachá nasipa ri'naráatchi walubé Juríosi ri'obáwalachi. ¹⁷Alí Jesusi nawésali jeanigá: Echo'ná Riosi Ra'íchala oselíwalachi, je'ná jerigá osirúami ju: Suníami piréami pagótami jeanimea mapu echo'ná Riosi kalílachi ju, mapo'ná echi pagótami Riosi yuwa ra'ichama; chopi 'yémítamo ma niwali je'ná Riosi kalila mapurigá biléana risochí, chigórami pirélachi niráa.

¹⁸Alí echi o'wéala sacerdote galá námali je'ná jerigá ra'íchachi Jesusi. Echi jaré nulalíwami binériami ayena cho echirigá námali. Echalí ne si'néami aboni a'nagupi ra'íchaga 'nátali mapu churigá aboni galá omérama mi'ayá echi Jesusi. Chopi aboni arigá wabé majali, mapujiti ne si'néami echi auché jaré pagótami sinibí chopi ne

wabé galá kilí kipuga muchili mapalí Jesusi binéraga nawésali. ¹⁹Echalí rawé ma alíwachi Jesusi auchecho ku simili echo'ná walúlachi jonsa.

Echi chuná suwaba wakicheli

(Mt. 21.20-22)

²⁰Alí ba'alínala bi'yá aboni auchecho siné echo'ná ku simáraga riwali echi chuná ma suwaba wakichéami ju. ²¹Alí echi Pegro ku 'nátaga jeaneli: Binériami ¡Nibira! Echi chuná márumpi yóniga aneli, ma suwaba wakicheli. ²²Chopi Jesusi ku nijéwaga jeaneli: Galá bichíisi Riosi. ²³Ne bichíwali 'yemi nimí jeané: Mapuyíripi jeanésagá je'ná walubé kawí chulíchi: ¡Echomí! ¡Miná tu walubé ba'wírali simigáwichimé! Alí mapuyíripi echirigá ne galá sulachí niráa bichíisagá mapu echirigá ne bichíwali ikimea mapurigá binói aneli, ayena ne suwaba ne bichíwali echirigá ikimea. ²⁴Echijiti Nijé 'yemi nimí jeané: Ne suwaba mapu ikítamo tániko Riosi, echirigátamo suwaba ne bichíwali narepo, átamo galá bichíisagá mapu Riosi echirigá 'yemi mi 'yama. ²⁵Alí mapalítamo Riosi yuwa ra'icha jawi, galá ku wikawasi echi auché jaré mapu 'yemi mi sayela, achigórigá mapurigá kétamo Onó, ripá riwigachi atíami, ayena cho ne galá 'yemi mi ku wikawa mapurigátamo we chati olali. ²⁶Mapujiti ketásitamo ku wikawásagá echi auché jaré, ayena cho echi kétamo Onó, ripá riwigachi atíami, ketasi 'yemi mi ku wikawama mapurigátamo chati olali.

¿Chigá mi risensia 'yali mapurigami je'ná jerigá olama?

(Mt. 21.23-27; Lk. 20.1-8)

²⁷Alí aboni echo'ná Jerusalémachi ku sili. Alí Jesusi echo'ná walubé Juríosi ri'obáwalachi iyénachi, echo'ná Binói yuwa sili echi jaré o'wéala sacerdote echi jaré nulalíwami binériami ayena cho, echi jaré o'wéala ochérami ayena cho. ²⁸Alí aboni jeanigá rukueli: ¿Churékulami je'ná jerigá wabé 'wérali olá? ¿Chigá mi risensia 'yali mapurigami je'ná jerigá olama? ²⁹Echalí Jesusi ku nijéwaga jeaneli: Nijé ayena cho 'yemi nimí bilé namuti rukuema. Alí a yémítamo tamí galá ku ruyésagá, echalí Nijé ayena cho 'yemi nimí galá ku ruyema chigá tamí risensia 'yali mapurigani je'ná jerigá olama. ³⁰¿Acha Riosi ripá riwigachi atíami nuleli echi Juani mapurigá binói pagoma echi pagótami? ¿Acha jaré pagótami nuleli, keremá? ¡Tamí ku nijéwasí! ³¹Alí aboni a'nagupi ra'íchaga jeanili: ¿Churigata ku nijéwabo? A tamujeta jeanésagá: Echi Riosi ripá riwigachi atíami nuleli, alí Binói tamujé tamí jeanigá ku rukuema: ¿Churékula bichétamo ketasi bichíili mapurigá echi Juani tamí jiti nawésali? ³²Ayena cho aboni a'nagupi ra'íchaga jeanili: Ketasi galá níimiré tamujé jeanésagá mapu echi jaré pagótami chopí nuleli echi Juani echirigá pagónala, mapujiti ne si'néami pagótami mayé mapu echi Juani ne bichíwali Riosi jiti nawésami níili. Echijiti aboni wabé majali echirigá ku nijéwiya. ³³Alí aboni jeaneli: Ketásita machí chigá nuleli echi Juani, echirigá pagónala. Echalí Jesusi jeaneli: Nijé ketasi cho 'yemi nimí ruyema chigá tamí risensia 'yali mapurigani je'ná jerigá olama.

Jaré pagótami chati oláami

(Mt. 21.33-46; Lk. 20.9-19)

12 Alí Jesusi chótali irétaga ra'icha jeanigá: Bilé rijói ichali wikabé rakéami namuti, uva anilíwami; ayena cho echi rijói we galá 'yérali echo'ná mapo'ná binói ichali echi uva anilíwami, ayena cho ri'lé joka niwali mapo'ná kamíinali,

echi uva rakala ba'wila machí paya, ayena cho echo'ná niwali bilé ripá wilámi kalí, mapurigá echo'ná jonsa galá omériga 'nénama suwaba echo'ná ichirúami. Alí echí uva níwami, jaré pioni tibútasa, auché biléana mikabé simili. ² Alí pe kinana mapalí ma sébali echí uva rakala ripunálawachi, echalí echí uva níwami rijói echo'ná júuli auché bilé binói piónawala, mapurigá rojuana 'nolama mapu ikí binói níwala níima riwéali. ³ Chopi echí auché jaré pióntami mapu echo'ná tibua muchili, chapigá wipisoli echí pióntami mapu julárami níili rojuana 'nolánala. Alí tarapé biyiri 'yasa, ku júuli. ⁴ Alí echí uva níwami rijói, auchecho bilé pioni júuli. Chopi aboni we basibuka, binói mo'ólachi chi'wánali. Alí echirigá wabé chíbirigá olasa, ku júuli. ⁵ Alí pe jubáami auchecho bilé júuli, chopi échiko aboni waminá mi'yali. Alí auchecho siné pe kinana wisabé, wikabé júuli. Alí aboni chi'wánali jaré, ayena cho ko'yali auché jaré. ⁶ Alí abijí tibili bilepi ne jubáwala echí uva níwami ranala, mapu ne wabé galérami níili binói onolá jiti. Alí echí uva níwami ne jubáami júuli echí kepu raná, jeanigá mapu aboni we galá o'wikémiré keni raná. ⁷ Chopi echí jaré pióntami galá riwisá echí ranarúami, aboni a'nagupi jeaneli: Je'ná billepi ju echí uva níwami ranala. Je'ná ju mapu pe minana ne suwaba níwami níima, je'ná wikabé uva ichirúami. Echijiti miná mi'llboa. Alí ne suwaba je'ná ichirúami tamujé níwala níima. ⁸ Alí aboni chapigá mi'yali echí uva níwami ranala. Alí aboni, ma mi'lisáa, echo'ná ichirúamichi jonsa miná machí pali echí mukúami sapara.

⁹ ¿Piri olama echí uva níwami? We yáati nawagá suwábamilé echí jaré chati oláami pióntami. Alí binói tibútama auché jaré galá oláami pióntami, mapurigá aboni we galá nochama echo'ná ichirúachi. ¹⁰ Ayena cho Jesusi jeanigá rukueli: ¿Kéchatamo siné 'nénali echo'ná Riosi Ra'íchala osilíwalachi mapurigá tamí jiti rugá, je'ná jerigá osirúami ju:

Echi Rité mapu echí jaré kalí niwáami miná chakena pali, mapurigá ketasi galabé niráa, je'ná Rité echo'ná sitochi, ma bachá niráa achárami ju;

¹¹ Echi Walubela Riosi je'ná jerigá olali; tamujeta ne galá machí mapurigá Binói echirigá ne wabé jiwériga olali?

¹² Alí echí jaré Juríosi o'wéalawala nakili mapurigá chapigá pachá bachárami níima echí Jesusi, mapujiti aboni galá machili mapu Jesusi echirigá irétaga sayérali echí aboni. Chopi aboni ketasi chirigá chapili, mapujiti aboni wabé majali echí auché jaré pagótami. Alí aboni ma ariwesa ku simíbali.

¿Acha risensia ju natétawa echí walula silíami?

(Mt. 22.15-22; Lk. 20.20-26)

¹³ Alí pe wakinana echo'ná mapo'ná Jesusi asali, jaré o'wéala Bariseo anilíwami binériami julálati, ayena cho julálati echí auché jaré mapu echí walula silíami Erorsi riwéami apanérawala níili. Je'ná pagótami kipúnala julálati Jesusi ra'íchala, mapurigá siné káachi echijiti galá oméraama wi'nijiya echí Jesusi. ¹⁴ Alí aboni echo'ná Jesusi yuwa sisá jeaneli: Tamujeta galá machí mápumi ne bichíwaga ra'íchami ju. Ayena chota machí mápumi ketasi níjewaga olá mapurigá echí jaré pagótami chopi mi nulé, mapujítimi ne si'néami pagótami a'nawí niráa galé. Alí bichemi ne bichíwali galá nawésaga binera mapurigata we galá bichíiga najátabo Riosi yuwa. Echijítita jipi tamujé mi rukué: ¿Acha risensia ju Riosi yuwa máputa wenomí natétabo echí walula silíami Sésara anilíwami? ¿Áchata natétabo? Siné káachi ketasi risensia keremá máputa natétabo. ¹⁵ Alí biché Jesusi galá machili mapurigá

aboni wabé 'yékaka ra'íchali. Echijiti Binói jeanigá rukueli: ¿Churékulátamo nakí mapurigani sayéraga ra'ichama echi walula Sésara? Ayena cho jeaneli: ¡Wakiná tosí bilé wenomí chitúlami mapurigani galá 'nema! ¹⁶ Alí mapalí aboni echo'ná pali, Jesusi 'néniga rukueli: ¿Chigá ju jena'í wenomírali atíami? ¿Chigá riwalá ju echo'ná osirúami? Alí aboni jeaneli: Echi walula Sésara ju. ¹⁷ Alí Jesusi ku nijéwaga jeaneli: Galá natétasi suwaba mapu ikí echi walula Sesara anilíwami taní, chopi ayena cho 'yasi Riosi suwaba mapu ikí Binói taní.

¿Churigá ku o'wínama echi jaré ma suwíami?

(Mt. 22.23-33; Lk. 20.27-40)

¹⁸ Alí jaré Saruseo anilíwami rijói echo'ná sili mapo'ná Jesusi asali. Je'ná aboni we binérali mapu echi pagótami ma suwíami níisa, ketasi auchecho ku o'wínama. Aboni echo'ná sisáa jeanigá rukueli: ¹⁹ Binériami, echi ki'yá bitéami Moisesi tamujé tamí osogá nuleli mapu a bilé rijói mukusáagá, alí echirigá mukugá ariwésagá kepu upí, chopi ketasi kúchuwami níisagá, alí arígá 'wérali ju mapu echi rijói rijimala upema echi mukí kunámami, mapurigá kúchalama. Alí echi jaré kúcharami mapurigá echi mukúami rijimala kúchuwala níima. ²⁰ Alí aboni jeanili: Kichao najirémami níili. Echi bachirúami ne bachá upeli. Alí pe kinana tarapé cho kúcharasa mukuli. ²¹ Alí echi bonirúami echirigá upeli echi mukí, chopi ayena cho tarapé cho kúcharasa mukuli. Alí auché bilé pe jubáwala bonirúami upeli echi mukí. Je'ná ayena cho tarapé kúcharasa mukuli. ²² Echirigá kichao najirémami ibíli yuwa kuneli echi mukí. Alí ibili niráa aboni echirigá tarapé kúcharasa suwili. Ayena cho echi mukí ne jubá mukuli. ²³ Alí echi Saruseo anilíwami rijói jeaneli: Mapalí echi jaré ma suwíami ku o'wínamiré ¿Chigá 'nalí níimará echi mukí kunala? Mapujiti echi jaré kichao rijói ibili niráa upeli echi mukí.

²⁴ Alí Jesusi ku nijéwaga jeaneli: 'Yémítamo wabé 'yékarami ju, mapujítitamo ketasi galá machí mapurigá echo'ná Riosi Ra'íchala Osilíwalachi osirúami ju, ayena cho mapujítitamo ketasi galá machí mapurigá Riosi wabé omérami ju. ²⁵ Alí Jesusi jeaneli: Mapalí echi jaré ma suwíami ku o'wínama, echalí aboni tarapé wesi jubema, nirapé wesi kunema, chopi mapurigá echo'ná ripá riwigachi muchúami Riosi kapitánawala níima.

²⁶ Alí Jesusi ayena cho jeaneli: Echi jaré ma suwíami ne bichíwali ku o'wínama. ¿Kechátamo siné 'nénali mapurigá echo'ná Riosi Ra'íchala Osilíwalachi osirúami ju? Echo'ná osirúami ju mapurigá Riosi, echi Moisesi yuwa ra'íchali echo'ná biléana ku'wíchali rajáamichi jonsa. Echalí Riosi Binói jeaneli echi Moisesi: Nijé ju echi Walubela Riosi, ayena cho Nijé abijí ju echi ki'yá bitéami Abrami Riósawala. Ayena cho Nijé abijí ju echi Isaka Riósawala, echi mapu echi Abrami ranala níili. Ayena cho Nijé abijí ju echi chabé ki'yá bitéami Jakobo Riósawala. Aboni sinibí piré tamí yuwa echo'ná ripá riwigachi. ²⁷ Echi jaré mapu ikí galá bichíiko Riosi, ketasi mapurigá ma suwíami niráa ju, chopi aboni ne sinibí piréami ju, mapujiti aboni galá bichíi Riosi. 'Yémítamo we sil'winárigá bichíi, echijítitamo wabé 'yékarami ju.

¿Chuyiri 'nalí ju mapurigá ne bachá nulá Riosi?

(Mt. 22:34-40)

²⁸ Alí bilé rijói echo'ná nawali mapu Riosi nularila binériami níili. Je'ná rijói galá námali Jesusi ra'icháchanachi echi auché jaré yuwa. Alí ne galá machigá mapurigá

Jesusi ne galabé niráa ku nijéwali, je'ná rijói jeanigá rukueli: ¿Chu yiri 'nalí ju mapurigá ne bachá nulá Riosi? ²⁹ Alí Jesusi jeaneli: Ne bachá niráa Riosi je'ná jerigá nulá: Galá namsi 'yemi Isaeli kúchuwala, echi Walubela tamujé Riósawala echi bilepi bi'nélipi Walubela Riosi ju. ³⁰ Ne sulachí niráa ne wabé galesi echi Walubela kétamo Riósawa. Ayena cho ne suwaba kétamo iwígá niráa ne galá galési Riosi. Ayena cho ne suwaba kétamo 'nátawa niráa ne galá galesi Riosi. Ayena cho ne suwaba kétamo jiweráwa niráa ne galá galesi Riosi. ³¹ Alí Riosi pe jubáami niráa, achigó yiri je'ná jerigá nulá: Ne wabé galé echi auché jaré pagótami, achigórigá mapurigami a mujé binói niráa galé. ³² Alí echi rijói Riosi nulalila binériami jeaneli: Binériami, galá mi ne bichíwaga aní mapu bilepi nirú Riosi, ayena cho mapu tarapé auché bilé nirú. ³³ Ayena chomi ne bichíwaga aní mapu Riosi ne bachá niráa tamujé tamí nulé máputa echirigá ne simírami galebo Binói Riosi ne sulachí niráa, ayena cho ne suwaba keta iwígá niráa, ayena cho ne suwaba keta 'nátawa niráa, ayena cho ne suwaba keta jiweráwa niráa; ayena cho máputa wabé galebo echi auché jaré pagótami achigórigá mapurigata galé a tamujé aboni niráa. Ayena cho ne bichíwali ju máputa ayena echirigá wabé simírami niráa galésagá Riosi, alí bicheta ne bichíwali nijéwaga olabo mapurigá Riosi tamujé tamí nulé. Chopi ayénata wikabé namuti ko'yagá, ikósaga, olásagá mapurigá Riosi ayá, echirigata ketasi chirigá olabo mapurigá Riosi tamujé tamí nulé, a ketásita ne sulachí niráa galésaga Riosi. ³⁴ Alí mapalí Jesusi námali mapurigá echi rijói ne galabé niráa ku nijéwali, alí Jesusi jeaneli: Pée ke 'me ayó ju mapalimi galá nijéwaga bitélama mapurigá Riosi mi nulé. Alí si'néami echi auché jaré ne wabé majali waminabi rukueli.

¿Chigá Ranala ju echi Cristo?

(Mt. 22.41-46; Lk. 20.41-44)

³⁵ Echalí Jesusi echo'ná walubé Juríosi ri'obáwalachi nawésaga jeanigá rukueli: ¿Churékula aní echi jaré nulalíwami binériami mapu echi Cristo anilíwami, echi walula Rabiri riwéami ranala ju? ³⁶ Mapujiti mapalí echi Wabé Galabé Riosi Iwigala galá nuleli echi Rabiri, echalí echi Rabiri binói jeanigá osali:

Echi Walubela Riosi Onorúami aneli echi keni Walubélawa Cristo jeanigá:

Tamí yuwa asagá jena'í keni watonachi, mapuyénasí Nijé nimí jiweratama mapurigami gala omérama si'néami echi jaré mapu ikí mi sayera.

³⁷ Jesusi ayena cho jeaneli: Echi Rabiri binói echirigá anili mapu echi Cristo anilíwami, binói Walubélawala ju. ¿Churigá echirigá kepu raná niráa níima?

Alí echi auché jaré wikabé pagótami wabé kaníliga námali Jesusi nawésawala.

Jesusi we wi'nijí echi jaré rijói nulalíwami binériami

(Mt. 23.1-36; Lk. 11.37-54; 20.45-47)

³⁸ Alí Jesusi nawésaga jeaneli: Ne galabé niráa 'natasi mapurigá echi jaré nulalíwami binériami ketasi 'yemi mi 'yékama. Aboni chopi i'weli napáchaga 'yénanali, ayena cho aboni ne wabé nakí mapu echi auché jaré pagótami sinibí ne wabé o'wikeka narepama. ³⁹ Alí echo'ná aboni ri'obáwalachi, aboni chopi we nakí mapu echo'ná ne wabé galabéalachi muchima, mapurigá o'wéala niráa; ayena cho mapalí aboni bayérami ju ko'núula echo'ná auché jaré pagótami pirélachi, aboni chopi we nakí mapu bachá niráa ko'mea. ⁴⁰ Alí aboni arigá miná 'yesa echi jaré muguí kunámami

kalila, alí echo'ná ri'obachi wi'lí niráa amachika olá, mapurigá echi auché jaré pagótami mayema mapu aboni ne wabé galabé oláami ju. Echijiti aboni waminabi wabé kastigo 'yárami níima.

Bilé mukí kunámami muchuwali wenomí

(Lk. 21.1-4)

⁴¹ Siné rawé Jesusi asali echo'ná pachá walubé Juríosi ri'obáwalachi, echo'ná bacháami mapo'ná echi wenomí muchuwálawachi níili. Alí Binói riwali mapalí echi pagótami echo'ná muchuwali wenomí. Echalí wikabé echi jaré wabé níwami wikabé wenomí muchuwali. ⁴² Alí wabé risúwati mukí kunámami echo'ná nawagá, okuá kúuchi wenomí muchuwali. ⁴³ Alí Jesusi bayegá echi jaré mapu Binói binérali, jeaneli: Ne bichíwali 'yemi nimí ané mapu Nijeni ne wabé simírami nilá mapurigá je'ná wabé risúwati mukí kunámami muchuwali, chópini ketasi 'me simírami nirá mapurigá echi auché jaré wabé níwami muchuwali. ⁴⁴ Mapujiti si'néami echi auché jaré we níwami, abijí wikabé wenomí tibíika muchuwali. Chopi je'ná risúwati mukí kunámami suwaba muchuwali mapu ikí wenomíwaga, binói ko'ogá bitélama riwéali.

**Jesusi bachá niráa nawésali jeanigá mapu echi walubé Juríosi ri'obáwala
suwaba miná najunárami níima riwéali**

(Mt. 24.1-2; Lk. 21.5-6)

13 Alí mapalí Jesusi ku machínali echo'ná pachá walubé Juríosi ri'obáwalachi jonsa, echalí echi bilé mapu Binói binérali, jeaneli: Binériami ¡Nibira! ¡Je'ná ri'obá ne wabé galabé niráa nóchaga niwárami ju! ¡Ne wabé walubé ju! ² Alí Jesusi jeaneli: 'Yémitamo wabé ba'yóriga 'neni je'ná walubé ri'obá, chopi Nijé 'yemi nimí ané mapu ne suwaba waminá najunárami níima. Jena'í tarapé bilé rité tigótami ripima.

Mapurigá ikimea echalí ne jubá rawé

(Mt. 24.3-28; Lk. 21.7-24; 17.22-24)

³ Alí aboni echo'ná ripá rabó Olíbochi anilíwachi simíbali, mapu echo'ná bacháami echi walubé Juríosi ri'obáwarachi ju. Alí mapalí Jesusi echo'ná asíbali, echi Pegro echo'ná Binói yuwa nawali, echi Jakobo ayena cho, echi Juani ayena cho, echi Antresi asíchiko. Alí aboni jeanigá rukueli: ⁴ ¿Kilíbuko je'ná jerigá ikimea? ¿Churigata galá machiboa mapalí ma mulubé sebama echalí mapalí je'ná jerigá suwaba ikimea?

⁵ Alí Jesusi jeaneli: Ne galá tibuka 'natasi 'yemi aboni, mapurigá ke wesi 'yemi mi 'yékama. ⁶ Mapujiti pe minana wikabé ibili niráa nolínama mapu wabé 'yékaka niráa jeanimea: Nijé binói ju echi Walubela Cristo. Alí echirigá anigá, wabé 'yékama wikabé pagótami. ⁷ Chopi ketasi majasi mapalítamo námabo ne wikabé sontarsi nakóami ra'ichálawachi, nirapé majasi mapalítamo námabo wikanáami nakónalawachi, mapujiti arigá 'wéralli ju mapu echirigá ikimea, chopi echalí ke cho sebama echalí ne jubá suwibálawachi rawé. ⁸ Mapujiti bilé walula silíiami kawíwalachi piréami wabé nakoma auché bilé walula silfami kawíwalachi piréami sayéraga. Alí biléana kawírali piréami pagótami wabé nakoma auché biléana kawírali piréami pagótami sayéraga. Alí wikanáami wabé nokomea je'ná kawí. Ayena cho wisabé ne wabé 'lochema jena'í wichimóbachi piréami pagótami. Ayena

cho wikabé pagótami a'nagupi na'áwaga we nakichima. Alí je'ná jerigá chotama jena'í wichimóbachi piréami pagótami we risúu níliya, chopi pe minánomí ne wabé simírami risúu nílama.

⁹Chopi ne galá tibusi 'yemi aboni niráa, mapujiti echí auché jaré pagótami 'yemi mi bologá tomea echo'ná bacháami echí jaré o'wéala yuwa. Ayena cho echo'ná aboni ri'lobáwalachi 'yemi mi wabé wipisoma, ayena cho echí jaré o'wéala 'yemi mi bayegá, ne wabé oyérama mapujítitamo tamí bichiyami ju. Chopi je'ná jerigá ikimea mapurigá 'yémítamo galá omérabo nawésiya Nijé Ra'ichala echí aboni. ¹⁰Alí ke cho sébachi echalí ne jubá rawé, arigá 'wérali ju mapurigá je'ná Galabé Riosi Ra'ichala ne suníami jena'í wichimóbachi piréami pagótami nawésalami níima. ¹¹Alí mapalí echí auché jaré pagótami 'yemi mi bologá tomea echo'ná bacháami echí jaré o'wéala yuwa, echalí ketasi wiká namuti bachá 'natasí mapu churigátamo nijéwaga ra'ichabo. Chopi echalí rawé ra'ichasi mapurigá echí We Galabé Riosi Iwigala 'yemi mi ruyema, mapujiti ketasi 'yemi chopi ju máputamo ra'ichabo, chopi echí We Galabé Riosi Iwigala 'yemi jiti ra'ichama. ¹²Alí echalí rawé jaré nijima aboni ritémawala mapurigá aboni miná ko'wirúami níima. Ayena cho jaré onorúami nijima aboni kúchuwala mapurigá miná ko'wirúami níima. Ayena cho jaré kúcharami wabé sayéraga kepu 'wénawa, miná ko'wimea. ¹³Echalí ne suwaba echí auché jaré pagótami 'yemi mi ne wabé kichima mapujítitamo tamí bichiyami ju. Chopi ne si'néami 'yemi máputamo arigá waminabi galabé bichíbo echalí ne jubá rawé yénasí, 'yémítamo galá ku'wíratami níibo.

¹⁴(Ne si'néami 'yemi máputamo ne galá machí oselí 'nériya, ne galá machisí mapurigá aniwáami ju je'ná jeyiri.) Echi walula Riosi jiti nawésami Ranieli riwéami osali echí bilé namuti wabé chati nosobúami jiti rugá. Alí mapalí 'yémítamo ritíwá je'ná bilé namuti wabé chati nosobúami echo'ná atíami mapo'ná ketasi risensia ju, echalí ne si'néami 'yemi mapu ikítamo echo'ná Juréachi anilíwachi kawírali pireko, ne galá níima miná echo'ná jaréana ripá rabó júmsasa. ¹⁵Echalí rawé sébachi arigá 'wérali níima máputamo miná júmsabo. Echijiti a jaré 'yemi echo'ná 'yemi kalíflachi mulubé muchísgá, ketasi auchecho ku mo'wisí echo'ná pachá kalírali, jaré namuti uboya, chopi we yáati miná júmsasi. ¹⁶Ayena cho a jaré 'yemi waminá jaréana waná kawichí muchísgá, ketasi ku ro'wisi echo'ná kétamo pirélachi, ku chapiboya kétamo kimá. ¹⁷Alí Jesusi wabé natimaga jeanili: Echalí rawé ne wabé simírami risúu olárami níima si'néami muguí mapu ikí pocháami níimako, ayena cho ne wabé risúu olárami níima echí auché jaré muguí mapu kúuchi kúchuwami níimako. ¹⁸Ne wabé tansi Riosi mapurigá ketasi ne wabé rulálama echalí mapalí arigá 'wérali níima máputamo waminá júmsabo. ¹⁹Mapujiti echalí rawé jena'í wichimóbachi piréami ne wabé simírami risúu nílama. Ki'yá chokichí jonsa ke wesi siné echiyena risúu olárami níili, mapu jonsa Riosi niwali je'ná wichimoba. Alí pe minana rawé ke siné auché echiyena risúu olárami níima. ²⁰Chopi a echí Walubela Riosi ariwésagá mapurigá echí jaré jena'í wichimóbachi piréami pagótami ne wi'llibé bamíbali echiyena risúu olárami níima, alí ne si'néami miná suwábarami níimiré. Chopi Riosi ma nulali mapurigá echí pagótami pe téeli bamíbali echirigá risúu olárami níima mapujiti Riosi we natimali echí jaré Binói níwala pagótami mapu ikí Binói chapili.

²¹Echalí rawé a jaré 'yemi mi jeanésagá: ¡Galá 'nesi! ¡Jena'í atí echí Cristo anilíwami! A Jeanesa keremá: ¡Galá 'nesi! Echo'ná biléana atí. Ketasi bichísi echirigá

ra'íchaga aniwáachi.²² Mapujiti jaré wabé 'yékami rijói jeanísiya nolínama: Nijé ju echi Walubela Cristo. Ayena cho nolínama auché jaré wabé 'yékaka nawésami rijói mapu wabé omériga olama wikabé namuti mapu ke wesi auché jaré pagótami omero echirigá olaya. Alí aboni chopi echirigá olama mapujiti aboni we nakimea mapurigá we si'wináriga bichírama echi jaré mapu Riosi ma chapili. Chopi aboni ketasi echirigá oméraama.²³ 'Yemi aboni galá 'nátaga muchisi. Nijé ma suwaba 'yemi nimí bachá niráa aneli.

Jesusi ku nolínama jena'í wichimóbachi

(Mt. 24:29-35, 42-44; Lk. 21:25-36)

²⁴ Alí ma sunisa echalí rawé mapalí jena'í wichimóbachi piréami ne wabé risúu olárami níima, echalí we rokowama echi rayénali, ayena cho echi michá ketasi waminabi rajamea.²⁵ Ayena cho echalí echi sopolí we rujuima echo'ná ripá riwigachi jonsa. Ayena cho ne wabé nokomea suwaba namuti rajáami echo'ná riwigachi nirúami.²⁶ Alí Jesusi ayena cho jeaneli: Riosi tamí wilali mapurigá Ku'wíriami niráa. Ayena cho echalí ne jubá rawé echi pagótami jena'í wichimóbachi piréami tamí galá riwimea echo'ná ripana nolírali inárami. Echalí Nijeni ne wabé omérami níima, ayena choni ne wabé walubératami níima.²⁷ Alí echalí rawé Nijeni julama echi keni o'wéala kapitánawa napabúnala echi jaré pagótami mápuni ma chapili. Alí echi wikabé keni kapitánawa napabuma ne si'néami Nijé níwala pagótami mapu ikí ne suníami jena'í wichimóbachi muchuwi, ayena cho ne si'néami mapu ikí ne suníami echo'ná ripá riwigachi muchuwi.

²⁸ Alí Jesusi ayena cho jeaneli: Nijé 'yemi nimí bilé chuná jiti rugá binéraama: Mapalí echi chuná ma chota sawarásiya, echalítamo galá machí mapu ma mulubé kuwesámire.²⁹ Echirigá ayena cho mapalítamo ritiwá je'ná jerigá ikíachi, echalí ne galá machisí mapu máa mulubé sébachi ju mapalí Nijeni ku nawama.³⁰ Ne bichíwali 'yemi nimí ané mapu ke cho suwisáa je'ná pagótami, suwaba je'ná jerigá ikimea.³¹ Mapu ikita ritiwá echo'ná wabé ripá suwaba suwibama, ayena cho jena'í wichimóba suwaba suwibama; chopi Nijé Ra'íchala tarapé siné suwibama.

³² Chopi ke wesi galá machí chu kilíbuko rawé echirigá ikimea. Echi o'wéala Riosi kapitánawala ripá riwigachi muchúami tarapé machí. Ayena cho Nijé bi'néripi Riosi Ranala ketásini machí. Chopi echi Onorúami bi'nélipi galá machí chu kilíbuko níima.³³ Echijiti 'yemi aboni galá 'nátaga muchisi. Sinibí tibusi aboni niráa. Sinibí tániga ra'ichasi Riosi yuwa, mapujiti 'yémítamo ketasi machí chu kilíbuko sebama echalí rawé.³⁴ Echirigá ikimea mapurigá mapalí bilé wabé níwami rijói mikabé auché biléana si'wina kawírali inámiya simea. Echijiti echi rijói galá nulé ibili niráa binói piónawala, ayena cho ibili niráa 'ya nóchali, ayena cho ne galá nulé echo'ná binói kalílachi tibúami mapurigá ne galá tibuma.³⁵ Echijiti galá 'nátaga muchisi, mapujítitamo ketasi machí chu kilíbuko ku nolínama echi Walubela kalí níwami. 'Yémítamo ketasi machí acha ku nolínama pe alí chónachi, acha ku nolínama nasipa rokogó keremá, acha ku nolínama ba'alí bi'yá tolí kusuwachi keremá, acha ku nolínama ba'alí bi'yá rawéwachi keremá.³⁶ Sinibí galá 'nátaga muchisi mapurigá mapalí Binói ke sayiná ku nolínasa, echalí Binói ketasi 'yemi mi kochigá bitíami riwimea.³⁷ Alí mapurigá Nijé 'yemi nimí ané, echirigani ané ne si'néami pagótami. ¡Galá 'nátaga muchisi!

Jesusi ma chapigá mi'lináalati

(Mt. 26.1-5; Lk. 22.1-2; Jn. 11.45-53)

14 Alí wakiná waniwínara echí Juríosí pagótami omáwala sébachi níili mapalí aboni ko'yali echí jaré kúuchi bo'wá, ayena cho mapalí aboni ko'wali echí jaré pani, ketasi nasówarami echí levadura anilíwami, echí mapujiti echí pani galabé niwaliwa. Echalí rawé echí jaré o'wéala sacerdote, ayena cho echí jaré nulalíwami binériami si'néami wabé sayérali Jesusi. Alí aboni 'yékaka niráa chapinálaga mi'lináali Jesusi. ²Chopi aboni a'nagupi jeaneli: Ketásita chapiboa echí Jesusi mapuyénasí abijí omoálawachi rawé ju, mapurigá echí jaré pagótami ketasi ne wabé simírami na'áwama.

Bilé mukí ucheli Jesusi mo'ólachi

(Mt. 26.6-13; Jn. 12.1-8)

³Alí Jesusi echo'ná Betániachi anilíwachi asali. Echalí echo'ná Simoni bitélachi ko'yá asali, echí mapu chabénala wabé chati cha nayúami níili. Alí bilé mukí echo'ná nawagá, bilé limeta rité niwárami pali, akeite we júkami manífami. Alí echí akeite ne wabé natéami níili, chopi echí mukí ma kasinasa echí rité limeta, suwaba ucheli echo'ná Jesusi mo'ólachi. ⁴Alí jaré echo'ná muchúami wabé na'áwaga jeanili: ¿Churékula echirigá ri'ichárami níili echí wabé su'weti júkami akeite? ⁵Echi akeite ralinéate riwéali, simírami bikiyá mili peso natéami niráa. Rarinéaga, echí jaré we tisúwati ku'wírasa echí wenomí jiti, ne galá níimili. Echirigá aboni a'nagupi ra'íchali echí mukí sayéraga. ⁶Alí Jesusi jeaneli echí jaré aboni: ¡Ariwesi! ¿Churékulátamo we kumé echí mukí? Binói we galabé tamí olali. ⁷Arigá ne sinibí niráa nirúlama jaré wabé tisúwati pagótami jena'lí 'yemi yuwa. Ne sinibí mapalítamo nakí ku'wíranala echí jaré we tisíwati, echarítamo galá omérabo ku'wíriya. Chopi Nijé mápuni 'yemi mi yuwa atí jipi rawé, ketásini ne sinibí niráa 'yemi mi yuwa asimea. ⁸Je'ná mukí ne sébali tamí galabé olali mapuyénasí binói omérabi. Binói bachá niráa tamí wabé su'weti júkami ucheli Nijé sapálachi, mapurigá echí pagótami pe minánomí tamí uchema mapalini ma mukusáa, chu'wirótami níima. ⁹Ne bichíwali 'yemi nimí jeané: Ne suníami jena'lí wichimóbachi, echo'ná kanápuromí mapo'ná je'ná Galabé Riosi Ra'íchala nawisárami níima, echo'ná ibílana ayena cho galá irétarami níima suwaba mapu ikí olali je'ná mukí, mapurigá wikabé pagótami galá machimea mapu churigá binói tamí galabé olali.

Echi Júrasi we nakili njínala Jesusi mapurigá Binói mi'lirúami níima

(Mt. 26:14-16; Lk. 22:3-6)

¹⁰Alí echí Júrasi Jiskarioti riwéami rijói ra'íchamiya simili echí jaré o'wéala sacerdote yuwa. Je'ná rijói katéwaga ra'íchali echí jaré o'wéala yuwa, mapu churigá binói galá omérarama nijiya echí Jesusi, mapurigá aboni echirigá galá chapimea Binói. Echi Júrasi Jiskarioti bilé níili echí jaré makói miná okuá mapu Jesusi binérali. ¹¹Alí echí jaré o'wéala wabé kaníliga námali mapurigá echí Júrasi katéwaga ra'íchali. Alí aboni wenomí 'yabo ruyeli. Echalí jonsa echí Júrasi we 'náatali mapu churigá binói omérarama nijiya echí Jesusi, ayena cho mapu kilíbuko echirigá njíima.

Jesusi ko'wali echí jaré bichiyámi yuwa

(Mt. 26.17-29; Lk. 22.7-23; Jn. 13.21-30; 1 Cor. 11.23-26)

¹² Alí ma sébachi níili echalí bachá rawé mapalí echí jaré Juríosi omáwaga ko'wali echí jaré pani ke nasówarami echí levadula anilíwami, ayena cho mapalí aboni ko'yali echí jaré kúuchi bo'wá. Echalí rawé echí jaré mapu Jesusi binérali jeanigá rukueli: ¿Kumi mi nakí máputa a'lárabo mapurigami ko'mea echí kúuchi bo'wá sapala, jipi omowálawachi rawé? ¹³ Alí Jesusi okuá rijói jeanigá júuli mapu Binói binérali: Echo'ná walúlachi simíbaga. Echo'nátamo riwiboa bilé rijói ba'wí tuka inárami. Echi rijói yuwa simasi. ¹⁴ Echo'ná kalírali mapo'ná echí rijói bakimea, echo'ná echí kalí níwami jeansesi: Echi Binériami mi rukué jeanigá: ¿Chuyiri kalírali ju mapo'nani ko'mea jipi alí omowálawachi rawé, echí jaré mapu Nijé binérali yuwa? ¹⁵ Alí echo'ná kalí níwami 'yemi mi 'nérama bilé walú kalí, ripá okuá anamótami, mapo'ná ma galá pichítami níima. Echo'ná a'lárasí mapurigata kopoá téliko alí. ¹⁶ Alí echí okuá mapu Jesusi binérali ma simasa, echo'ná walúlachi sili. Alí aboni riwali ne suwaba mapurigá Jesusi bachá niráa aneli. Alí echo'ná kalírali aboni a'llárali mapurigá si'néami aboni echo'ná ko'mea echalí omowálawachi rawe.

¹⁷ Alí echalí ma alíwachi Jesusi echo'ná nawali, echí jaré makói miná okuá yuwa. ¹⁸ Alí mapalí aboni echo'ná ko'yá muchili, Jesusi jeaneli: Ne bichíwali 'yemi nimí jeané: Bilé 'yemi mapu tamí yuwa ko'yá atí, échiko tamí sayéraga nijima. ¹⁹ Alí aboni je'ná jerigá namsa, ne wabé o'mónali. Aboni ibili niráa jeanigá rukueli: ¿Acha nijé níimare? Echalí ne si'néami ibili niráa chópirigá rukueli. ²⁰ Alí Jesusi ku nijéwaga jeaneli: 'Yémítamo makói miná okuá ju. Si'néami 'yémítamo tamí yuwa bilénapi bitólachi pakega ko'wá pani; chopi bilé 'yemi arigá tamí nijima mapurigani mi'lirúami níima. ²¹ Nijeni wilárami níili mapurigá Ku'wíriami niráa. Chopi suwaba tamí yuwa ikímea achígorigá mapurigá bachá niráa osirúami níili echo'ná Riosi Ra'íchala oselíwalachi mapurigá ikímea waminánomí. Alí echí rijói mapu tamí nijima, ne wabé risíu nílama. Ne wabé simírami galá níimilé ketasi ranarúami níisa echí rijói.

²² Alí mapuyénasí aboni ko'yá muchili, Jesusi chapili bilé walú pani. Alí ma natétara 'yasa Riosi, rojuánaga nachútali. Alí jeaneli: Chapigátamo kopoá. Je'ná ju Nijé sapala. ²³ Ayena cho Binói chapili bilé baso ne buchíwaga ro'wárami echí uva anilíwami ba'wila. Alí ma natétara 'yasa Riosi, si'néami 'yali bajínala. Echirigá aboni ibili kúuchi niráa bajili. ²⁴ Alí Jesusi ayena cho jeaneli: Je'ná ju Nijé lalá. Echi Nijé lalá 'yemi mi binera mapurigá Nijé ma 'yemi mi aneli, mapurigá Nijé 'yemi mi ku'wírama mapalí Nijé ne wabé léntiga mi'lirúami níima. Alí ne wikabé pagótami galá ku wikawárami níima, mapalí aboni galá bichíima mapu Nijé lalá echí aboni jiti ku 'luwárami ju. ²⁵ Ne bichíwali 'yemi nimí ané mapurigá jipi jonsa ketásini auché siné bajíma echí uva anilíwami ba'wila, chópini bukulíwami bajíma mapalí Riosi ma galá nulá jena'í whichimóbachi.

Jesusi bachá niráa anili mapurigá echí Pegro animea riwéali mapu binói ketasi machili echí Jesusi

(Mt. 26.30-35; Lk. 22.31-34; Jn. 13.36-38)

²⁶ Alí ma nawajisa, aboni echo'ná ripá rabó Olíbochi anilíwachi simíbali. ²⁷ Alí Jesusi jeaneli: Téliko rokogó si'néami 'yémítamo wabé riwélabo tamí jiti, mapurigá

echo'ná Riosi Ra'íchala osilíwalachi tamí jiti rugá, jerigá osirúami ju: Echi bo'wá niséami mi'lirúami níima. Alí echi bo'wá miná wigáami niráa 'yénama.²⁸ Alí ma mukusáa ku owinsa, bachá siméani echo'ná Galiléachi anilíwachi kawírali.²⁹ Alí echi Pegro jeaneli: Ne si'néami echi auché jaré arigá mi jiti riwélasagá, nijeni ke siné riwélama mi jiti.³⁰ Chopi Jesusi ku nijéwaga jeaneli: Ne bichíwali nimí ané mapu jipi rokogó, ke cho osá kusúachi echi tolí, mujemi baisá chokéami 'yékaka animea mápumi ketasi tamí machí.³¹ Chopi echi Pegro wisabé echirigá ne wabé bichíwaga jeaneli: Arigani mi yuwa mi'lirúami níisagá, nijé ketasi 'yékaka animea mápuni ketasi mi machí. Alí echi auché jaré si'néami achigórigá aneli.

Jesusi ra'icha Riosi yuwa

(Mt. 26.36-46; Lk. 22.39-46)

³² Alí aboni echo'ná Jechamanichi anilíwachi sili. Alí Jesusi jeaneli echi aboni: Jena'í muchisi mapuyénasí Nijé pe minana simigá, Riosi yuwa ra'ichama.³³ Alí Jesusi pe minana bacháami bayérali echi Pegro, echi Jakobo ayena cho, echi Juani asíchiko. Alí Jesusi chótali ne wabé siwega o'mona.³⁴ Alí Binói jeaneli: Nijé, ne sulachí niráa, ne wabé simírami o'mona. Mani ne mukuméaré. Jena'í buwesi. Ne galá 'nagá muchisi.³⁵ Alí waminá pe bacháami simigá, Jesusi akaná bu'wíbaga tánali Riosi mapurigá a echirigá nakisáagá Riosi, Binói ketasi risúu olárami nílama. Chopi arigá 'wéráli níili mapurigá Jesusi wabé risúu olárami níima echalí rawé.³⁶ Ayena cho Binói, Riosi yuwa ra'íchaga jeaneli: Kení onó, Mujé ne suwaba omérami ju. A Mujé nakisáagá, tamí ku'wiro mapurigani ketasi risúu olárami níima. Chopi ketasi tamí yuwa olá mapurigá Nijé binói chopi nakí. Ne suwaba tamí yuwa olá mapurigá Mujé Binói chopi nakí.

³⁷ Alí Jesusi ku nawali mapo'ná echi auché jaré buweli. Alí we kochigá bitíami riwali. Echalí Jesusi jeaneli echi Pegro: Simoni, ¿Kochigáchami bu'wí? ¿Kéchami olasa níili, pe téeli niráa ke kochiyá?³⁸ Galá 'nagá buwesi. Sinibí Riosi yuwa tániga ra'ichasi, mapurigátamo ketasi chati olabo mapalí echi riabó 'yemi mi chati olánalamá. Ne bichíwali 'yémítamo sulachi niráa, ne galabé olánali, chopi 'yemi aboni ketasi omérami ju galabé olayá.

³⁹ Alí Jesusi auchecho siné waná simigá, achigórigá ra'íchali Riosi yuwa.⁴⁰ Pe wilibeko auchecho siné ku nawali mapo'ná aboni buweli. Chopi auchecho siné riwali kochigá bitíami, mapujiti aboni ne wabé simírami kochináali. Alí aboni ma busuresa ne wabé riwélaga, tarapé omérali ku nijéwaga ra'íchiya.⁴¹ Alí Jesusi auchecho siné simili Riosi yuwa ra'ichámiya. Echirigá Binói baisá chokéami ku nawagá mapo'ná aboni buweli, echalí jeaneli: ¡Ma galá isábaga kochisí! Ma galá ju, mapujiti ma sébali téitali. Riosi tamí wilali mapurigá Ku'wíriami niráa, chopi echi jaré tamí sayérami ma tamí nijima mapurigá echi auché jaré chati oláami pagótami tamí chapimea.⁴² ¡Jáasi! Ma simabo. Echi mapu tamí nijima ma ne mulubé inaro.

Jesusi borogá tórati

(Mt. 26.47-56; Lk. 22.47-53; Jn. 18.2-11)

⁴³ Alí Jesusi abijí echirigá ra'íchachi, echalí echi Júrasi we yáati echo'ná nawali, echi mapu bilé níili echi jaré makói miná okuá mapu Jesusi binérali; ayena cho wikabé pagótami echi Júrasi yuwa sili. Jaré ripiyá kami níili, auché jaré kusí kami níili, mapujiti aboni chapiboya sili echi Jesusi, mapujiti echi jaré o'wéala sacerdote

echirigá júuli echi Jesusi chapínala. Echi auché jaré nulalíwami binériami ayena cho júuli. ⁴⁴ Alí echi Júrasi echi Jesusi nijímiya nawali, mapurigá aboni echirigá galá chapimea. Echijiti Júrasi bachá niráa galá ruyeli echi auché jaré, jeanigá: Echi mapu nijé naripama, echi níima. Chapigá, ne galá bologá tosí.

⁴⁵ Alí echi Júrasi echo'ná nawagá, mulubé nawíili mapo'ná Jesusi wilili. Alí jeanigá wabé kaníliga narépali: ¡Kuiria! ¡We kaníliga, Mujé tamí binériami! ⁴⁶ Alí echi auché jaré mapu binói yuwa sili, we chapigá echi Jesusi, bologá toli.

⁴⁷ Alí bilé rijói Jesusi yuwa iyénami machí pali kepu ripiyá. Alí biléana nakálachi ripúnali echi bilé walula sacerdote piónawala. ⁴⁸ Alí Jesusi jeaneli echi auché jaré: 'Yémitamo we ripiyá togá sili, kusí ayena chótamo togá sili. ¿Áchatamo tamí echirigá chapiboa mapurigá Nijé bilé chigórami niráa? ⁴⁹ Sinibí rawé Nijé 'yemi nimí yuwa binériya iyénali echo'ná echi walubé Juríosi ri'obáwalachi. Echalí ketásitamo tamí chapili. Chopi jipi rawé ma suwaba je'ná jerigá ikimea mapujiti echo'ná Riosi Ra'íchala osilíwalachi echirigá bachá niráa osirúami níili tamí jiti rugá, mapurigá je'ná jerigá suwaba ikimea riwéali. ⁵⁰ Alí echi jaré mapu Jesusi binérali, ne si'néami miná júmsali. Echirigá Binói bi'neli tibili, echi jaré Binói sayela yuwa.

Bilé ri'malí miná másami

⁵¹ Alí bilé ri'malí Jesusi yuwa najátali, echi mapu chopi bilé kimila napáchami níili. Alí echi auché jaré rijói wabé chapinálaga chapilí binói chiníwala. ⁵² Chopi ariwesa echi chiní kimila, miná machí sapeka másali.

Jesusi ma torúami níili echo'ná bacháami echi jaré o'wéala yuwa

(Mt. 26.57-68; Lk. 22.54-55, 63-71; Jn. 18.12-14, 19-24)

⁵³ Alí Jesusi tólati echo'ná mapo'ná echi ne walula sacerdote asali. Alí echo'ná napawili ne si'néami echi jaré o'wéala sacerdote, echi auché jaré o'weala ochérami ayena cho, echi auché jaré nulalíwami binériami ayena cho. ⁵⁴ Alí echi Pegro pe 'naka niráa jubá najátali mapalí echi Jesusi echo'ná echi jaré o'wéala yuwa pálati. Echirigá echi Pegro echo'ná pachá echi ne walula sacerdote kalílachi ri'narátachi nawagá, echo'ná sokuala asali echi jaré kapitani yuwa. ⁵⁵ Alí echi jaré o'wéala sacerdote ne wabé wi'nijíinali echi Jesusi. Ne suwaba echi auché jaré Juríosi o'wéalawala ayena cho we wínjíinali. Echijiti aboni bayeli jaré wabé 'yékami rijói mapurigá aboni wabé 'yékaka wi'nijima mapurigá Jesusi echijiti miná mi'lirúami níima. Chopi echi jaré rijói arigá ketasi chópirigá a'nawí niráa anili. ⁵⁶ Ne wikabé níili mapu 'yékaka chopi wi'nijili echi Jesusi, chopi ke wesi a'nawí niráa chópirigá wi'nijili.

⁵⁷ Echalí auché jaré jásaga 'yékaka niráa sayéraga wi'nijiri jeanigá: ⁵⁸ Tamujeta námali echi Jesusi jeaníami: Nijeni najunama je'ná walubé Juríosi ri'obáwala mapu echi pagótami jiti niwárami níili. Alí bichéni bikiyá chi'ligá auché bilé ri'obá ku niwama mapu ketasi pagótami jiti niwárami níima. ⁵⁹ Chopi echi jaré abijí ketasi chirigá chópirigá anili.

⁶⁰ Echalí echi ne walula sacerdote wilíbaga, jeanigá rukueli echi Jesusi: ¿Kéchami tarapé tamí ku nijéwama? ¿Acha bichíwali ju echirigá mapurigá aboni mi wabé wi'nijí? ⁶¹ Chopi Jesusi arigá tarapé namuti ku nijéwali. Alí echi walula sacerdote aucheecho siné jeanigá rukueli: ¿Mujecha aní mapu mi echi Wabé Galabé Riosi

Ranala ju, mapu Riosi mi wilali Walubela Nigúurami niráa, echi mapu Cristo anilíwami ju? ⁶²Alí Jesusi ku nijéwaga jeaneli: Ayena, Nijeni ju. Alí 'yémítamo tamí riwiboa echo'ná echi suwaba omérami Riosi watonachi atíami. Ayena cho 'yémítamo tamí riwiboa ripana nolírali inárami, mapalini ku nawama, jena'í wichimóbachi.

⁶³Echalí echi ne walula sacerdote ne wabé chi'wánali binói napáchala mapurigá ne wabé o'mónami niráa. Alí jeanigá rukueli echi auché jaré: ¿Churékuláta waminabi wi'nijibó? ⁶⁴'Yémítamo ma galá námali mapurigá je'ná rijói Riosi sayéraga ra'íchali. ¿Churigátamo aní? Echalí ne si'néami echi jaré o'wéala jeanili mapu galá níima miná mi'lirúami níisa echi Jesusi.

⁶⁵Alí jaré chótali kachípiya Jesusi. Alí ma pólasa Binói busílachi, wabé cho'nali Binói banalachi jeanigá: Tamujé tamí ruyé: ¿Chigá mi cho'nali? Echalí echi jaré kapitani ayena cho cho'nali.

Echi Pegro 'yékaka aní mapu binói ketasi machí echi Jesusi

(Mt. 26.69-75; Lk. 22.56-62; Jn. 18.15-18, 25-29)

⁶⁶Alí echi Pegro echo'ná machí ri'lé ri'narátachi asali, mapalí bilé tiwé, echi ne walula sacerdote yuwa nóchami, echo'ná nawali. ⁶⁷Alí echi tiwé riwisáa echi Pegro echo'ná sokuáliya atíami, jeaneli: Mujé ayena cho echi Jesusi Nasarétachi bitéami yuwa iyénami jumi. ⁶⁸Chopi echi Pegro 'yékaka jeaneli: Tarapeni machí echi Jesusi, nirapeni machí mapurigami aní. ⁶⁹Alí pe wilibeko echi tiwé auchecho siné riwali echi Pegro. Echalí echi tiwé jeaneli echi auché jaré echo'ná muchúami: Je'ná rijói ayena cho echi Jesusi yuwa iyénami ju. ⁷⁰Chopi echi Pegro auchecho siné 'yékaka jeanili mapu binói ketasi machili echi Jesusi. Pe wilibeko echi auché jaré echo'ná muchúami auchecho siné jeaneli echi Pegro: Ne bichíwali mi aboni yuwa iyénami ju. Tamujéta galá machí mápumi echo'ná Galiléachi bitéami ju, mapujítimi achigórígá ra'icha mapurigá echo'ná Galiléachi piréami. ⁷¹Echalí echi Pegro chótali jeanigá ra'icha: ¡Galá níima Riosi tamí kastigo 'yasa, a ketásini bichíwaga anisáagá! Chopi binói arigá we yáati 'yékaka ra'íchali jeanigá: ¡Nijé ketásini machí echi rijói máputamo 'yemi rugá ra'icha! ⁷²Alí we yáati echi tolí osá chokéami kusuli. Alí echi Pegro 'nátaga newalali mapurigá Jesusi bachá niráa jeaneli: Ke cho osá chokéami kusúachi echi tolí, mujemi baisá chokéami 'yékaka animea mápumi ketasi tamí machí. Alí echirigá 'nátaga echi Pegro wabé nalali.

Jesusi tólati echo'ná bacháami echi walula silíami Pilato riwéami yuwa

(Mt. 27.1-2, 11-14; Lk. 23.1-5; Jn. 18.28-38)

15 Alí ba'alnala bi'yábijí echi jaré o'wéala sacerdote napawili echi jaré o'wéala ochérami yuwa, ayena cho echi jaré nulalíwami binériami yuwa, ayena cho ne suwaba echi jaré o'wéala Juríosi yuwa. Echalí aboni bologá togá echi Jesusi, echi walula silíami Pilato riwéami 'yali. ²Alí echi Pilato jeanigá rukueli: ¿Acha mi echi jaré Juríosi pagótami silínawala ju? Alí biché Jesusi jeaneli: Ayena. Ne bichíwali Nijeni ju. ³Alí echi jaré o'wéala sacerdote wikabé namuti jiti ne wabé 'yékaka wi'nijili echi Jesusi. ⁴Alí echi Pilato auchecho siné jeanigá rukueli: ¿Kéchami nijiyama? ¡Nibira! ¡Wikabé namuti jiti mi wi'nijiwa! ⁵Chopi Jesusi tarapé biyiri ku nijéwali. Echijiti echi Pilato ketasi machili piri jiti ke nijéwali.

Echi silíami ma nulá mapu Jesusi mi'lirúami níima

(Mt. 27.15-31; Lk. 23.13-25; Jn. 18.38-19.16)

⁶Alí sinibí bamíbali echalí omowálawachi sébachi echi Pilato ku machí pali bilé Juríosi rijói mapu pachá bachara asali, mapuyíripi echi auché jaré Juríosi bilé ku machí pánala risensia taniko. ⁷Alí echalí rawé bachara asali bilé rijói, Barabasi riwéami. Je'ná rijói bachara asali auché jaré yuwa mapujiti aboni nakówaka ko'yalí auché jaré. ⁸Alí echi pagótami echi Pilato yuwa sigá tánali mapurigá binói ku machí pama bilé Juríosi pachá bachara atíami, mapurigá binói olali sinibí bamíbali. ⁹Echalí echi Pilato jeanigá rukueli: ¿Áchatamo nakí mápuni ku machí pama echi 'yemi Juríosi pagótami níwala Walubela Silíami? ¹⁰Echirigá anili mapujiti binói galá machili mapu echi jaré o'wéala sacerdote chopi wabé kichiga nijili echi Jesusi. ¹¹Alí echi o'wéala sacerdote galá ruyeli echi pagótami mapurigá aboni tama mapurigá bachá ku machí pátami níima echi Barabasi. ¹²Alí echi Pilato jeanigá rukueli: ¿Churigá bichétamo nakiko mápuni olama echi rijói yuwa mapu 'yémítamo echi Walubela Juríosi Silínawala ané? ¹³Echalí aboni o'weli ra'íchaga jeaneli: ¡Kúrsichi michoné! ¹⁴Alí echi Pilato jeanigá rukueli: ¿Churikóriaba? ¿Churigá chati sití olali? Chopi aboni auchecho siné wabé o'weli ra'íchaga jeaneli: ¡Kúrsichi michoné! ¹⁵Alí Pilato ku machí pali echi Barabasi mapujiti binói we nakili mapu echi jaré Juríosi pagótami we kanílama. Alí ma nulasa mapu Jesusi wipisótami níima, ayena cho nulali mapu Binói echo'ná biléana kúrsichi michóniga mi'lirúami niima.

¹⁶Alí jaré sontarsi toli echi Jesusi echo'ná pachá biléana walubé kalírali, Betorio anilíwachi, mapo'ná echi walula silíami bitélachi níili. Echalí ne si'néami echi wikabé sontarsi echo'ná pachá napawili. ¹⁷Alí aboni sitákami chomítawami napachátali echi Jesusi, mapurigá walula silíami niráa. Ayena cho bilé so'uwa niwárami koyétali echo'ná Binói mo'ólachi. ¹⁸Alí aboni chótali o'weli ra'íchaga jeanigá: ¡Kuira, mujé Walubela Juríosi Silínawala! ¹⁹Alí bilé kusí jiti aboni we wipisoli Binói Jesusi mo'ólachi, ayena cho we kachípali. Alí echi jaré sontarsi we tiníchaga, echo'ná bacháami wéemi raweka chokoba jábali. ²⁰Alí ma sunisa echirigá tiníchaga oloyá, aboni ku 'yeli echi pe sitákami chomítuami napacha. Alí a Binói napáchala ku napachátali. Alí pe wilibeko ku machí pálati echi Jesusi, mapurigá Binói mi'lirúami níima, echo'ná kúrsichi michóniga.

Jesusi mi'lirúami níili echo'ná kúrsichi michóniga

(Mt. 27.32-44; Lk. 23.26-43; Jn. 19.17-27)

²¹Alí aboni chapili bilé rijói echo'ná inárami mapurigá matórama echi kursi. Echi rijói echo'ná biléana kawichí jonsa inárami níili, echi mapu Simoni riwéami níili. Alí echi Lijanto onolá níili, echi Rujo ayena cho. ²²Alí echi jaré sontarsi toli echi Jesusi echo'ná mapo'ná Gorótachi anilíwachi níili, mapo'ná je'ná jerigá aniwáwami ju: Chuwí mo'ólachi. ²³Alí Jesusi bajinala 'yálati echi uva anilíwami ba'wila, echi wabé chokówami mira anilíwami namuti nasówarami, mapurigá Binói ke 'me okoma. Chopi ketasi bajili. ²⁴Alí Jesusi echo'ná kúrsichi, klavo jiti, michónalati echo'ná Binói sikálachi, ayena cho echo'ná Binói ronólachi. Echalí echi jaré sontarsi rijibaka ri'yékali mapu chigá mema riwéali echi jaré namuti Jesusi napáchala. ²⁵Alí pe bi'yá ratabáachi níili mapalí Jesusi echo'ná kúrsichi

michónalati. ²⁶Alí echo'ná ripá kúrsichi osirúami níili mapu piri jiti Jesusi echirigá klavo jiti michóntami níili echo'ná kúrsichi. Alí echi osirúami je'ná jerigá aniwáami níili: Je'ná ju echi Walubela Juríosi Silínawala. ²⁷Alí mapalí Jesusi mi'lílati, echalí okuá chigórami ayena cho ko'wirúami níili. Bilé aboni Jesusi yuwa echo'ná auché biléana waná watoná kúrsichi michónarami níili. Echi auché bilé echo'ná biléana o'winá kúrsichi michónarami níili. ²⁸Echirigá ne bichíwali ikili mapurigá echo'ná Riosi Ra'íchala osilíwalachi osirúami níili mapurigá ikimea riwéali, mapujiti je'ná jerigá osirúami ju: Echi jaré pagótami mayeli mapurigá Binói chati oláami níili, mapujiti Binói mi'lirúami níili echi auché jaré chati oláami yuwa.

²⁹Alí echi jaré pagótami mapu echo'ná simárali ne mo'ólaga, ne wabé kichiga ra'íchaga jeaneli: ¡Baji! Mujemi anili mápumi najunama echi walubé Juríosi ri'obáwala, alí bichemi bikiyá chi'rigá ku niwama. ³⁰¡Mujé binói niráa ku ku'wira! ¡Ku rikina echo'ná kúrsichi jonsa! ³¹Alí echi jaré o'wéala sacerdote, ayena cho echi jaré nulalíwami binériami achigórigá tiníchali Jesusi mapalí aboni a'nagupi jeaneli: Je'ná Jesusi auché jaré galá ku'wírarilé. ¡Chopi a binói, ketasi omero a ku ku'wíriya! ³²Jipi ayénata riwiságá ku rikínami echo'ná kúrsichi jonsa, ayénata galá bichíibi mapu je'ná echi Walubela Cristo ju, echi Walubela Juríosi Silínawala niráa. Ayena cho echi jaré okuá mapu Jesusi yuwa achigórigá echo'ná auché jaréana kúrsichi michónarami níili, ayena cho ne wabé chati anigá ra'íchali Binói Jesusi sayéraga.

Jesusi ma mukuli

(Mt. 27.45-56; Lk. 23.44-49; Jn. 19.28-30)

³³Alí mapalí ma nasipa rawé níili, ne suníami echo'ná kawírali ke sayiná ne wabé rukuáwali. Alí ma pe alíwachi galá ku rayénali. ³⁴Echalí echi Jesusi we yaa o'weli ra'íchaga jeanili: Eloi, Eloi, ¿Lama sabatani? mapu je'ná jerigá aniwáami ju: Kení Riósawa, Kení Riósawa, ¿Churékulami tamí bi'neli aliweri? ³⁵Alí jaré echo'ná jáwami echirigá ra'íchami namsa, jeanili: Namsi. Binói echi Elíasi bayé chaní. ³⁶Echalí bilé rijói echo'ná we 'maga, pagueli pe táo bo'osali echo'ná maníiami wabé chokóami ba'wílachi. Alí echo'ná biléana kusírali ochogá 'yalí echi Jesusi chunugá bajínala. Ayena cho echi rijói jeanili: Ariwesi. Galá 'nebo acha nolínama echi Elíasi ku rikibúmiya echo'ná ripá kúrsichi jonsa.

³⁷Alí Jesusi ma o'weli ra'ichasa, alí mukuli. ³⁸Echalí we yámiti echi walú chiní, wabé runáami, mapuyiri kimá, echo'ná pachá echi walubé Juríosi ri'obáwalaachi chukúami, ke sayiná, ripana jonsa nasipa chi'wali. ³⁹Alí echi bilé walula kapitani mapu echo'ná bacháami wilili mapo'ná Jesusi kúrsichi michónalati, je'ná binói riwisáa mapurigá Jesusi echirigá o'weli ra'íchaga mukuli, alí jeanili: Ne bichíwali je'ná rijói Riosi Ranala níili.

⁴⁰Echalí jaré muguí ayena cho echo'ná pe 'naka niráa, 'nagá jali. Bilé, echi María níili, mapu echo'ná Makatálachi anilíwachi bitéali. Auché bilé ayena cho María riwéami níili, echi mapu echi José iyela níili, ayena cho echi Jakobo, echi mapu tabéala anélati, iyela níili. Alí auché bilé mukí Salomé riwéami níili. ⁴¹Alí je'ná muguí Jesusi yuwa ku'wíraga 'yénami níili mapalí Binói echo'ná Galiléachi iyénali. Alí auché jaré wikabé muguí ayena cho echo'ná jali mapu pe chabénala echo'ná ripáami Jerusalémachi ayena cho simíbali Jesusi yuwa.

Jesusi chu'wirótami níili

(Mt. 27.57-61; Lk. 23.50-56; Jn. 19.38-42)

⁴²Echalí ma alíwachi níili. Ayena cho ba'alínala rawé isábawachi rawé níili.
⁴³Echijiti echi José, echo'ná Arimatéachi bitéami, echo'ná nawali echi Jesusi sapala mukúami a'láramiya. Alí echi José ayena cho pe walula níili echi jaré Juríosi yuwa, mapu binói ayena cho we buweli mapurigá Riosi ne galá nulema jena'í wichimóbachi piréami pagótami. Echalí echi José tarapé majaga bakili echo'ná mapo'ná echi walula silíami Pilato riwéami asali. Alí risensia tánali echi Jesusi mukúami sapala, mapuriga ku toMEA. ⁴⁴Echalí echi Pilato ketasi mayeli mapu ma mukúami níili echi Jesusi. Echijiti binói rukuénalaga bayeli echi walula kapitani, acha ne bichíwali mukúami níili. ⁴⁵Mapalí echi walula kapitani aneli mapu Jesusi ma mukúami níili, alí echi Pilato risensia 'yali echi José mapurigá binói toMEA echi Jesusi sapala mukúami. ⁴⁶Echalí echi José ralali bilé chiní kimila we natéami. Alí echo'ná kúrsichi ku rikibuka echi Jesusi mukúami sapala, echi chiní kimila jiti kabika, echo'ná biléana risochí rikali, mapo'ná niwárami níili mapurigá chu'wirówami niráa. Alí echo'ná yéachi 'yérali bilé walú rité jiti. ⁴⁷Alí echi María, echo'ná Makatárachi bitéami galá riwali mapo'ná chu'wirótami níili echi Jesusi. Echi auché bilé María riwéami mukí, echi mapu echi José iyela níili, ayena cho galá riwali mapo'ná chu'wirólati.

Jesusi ma ku owinali

(Mt. 28.1-10; Lk. 24.1-12; Jn. 20.1-10)

16 Alí mapalí ma simírali echalí isábawachi rawé, echalí echi María, echo'ná Makatálachi bitéami, ayena cho echi auché bilé María, echi mapu echi Jakobo iyela níili, ayena cho echi auché bilé mukí, Salomé riwéami, aboni je'ná muguí ralali jaré wabé su'weti júkami namuti mapurigá echi Jesusi sapala mukúami uchema. ²Alí bi'yá bijí echalí oméachi rawé pe bukulí machínachi rayénali echi muguí echo'ná risochí chu'wirótachi sili. ³Alí echo'ná buwichí síraga aboni a'nagupi jeanigá rukueli: ¿Chigá tamujé tamí chakena pásama echi walubé rité, mapu echo'ná risochí chu'wechi 'yéachi 'yératami níili? ⁴Chopi mapalí aboni ma mulubé 'nénali, alí riwali mapu echi walubé rité ma chakena ri'habura atíami níili. ⁵Alí echo'ná pachá risochí mo'wisá, aboni riwali bilé walula Riosi kapitánawala echo'ná watoná atíami, echi mapu wilibé napacha, we rosákami napáchami níili. Echijiti ne wabé majajali echi muguí. ⁶Chopi echi walula Riosi kapitánawala jeaneli: ¡Ketasi majasi! 'Yémitamo amí echi Jesusi echo'ná Nasarétachi bitéami, mapu echo'ná kúrsichi mi'lílati. ¡Binói ma ku owinali! ¡Tarapé te jena'íbi! ¡'Nesi mapo'ná rikálati! ⁷Ku simíbaga ruyébasi echi jaré mapu Binói binérali, echi Pegro ayena cho. Jeanébasi mapu Jesusi Binói 'yemi yuwa bachá siméa echo'ná Galiléachi. Echo'nátamo riwiboa mapurigá Binói bachá niráa 'yemi mi aneli. ⁸Alí echi muguí echo'ná chu'wechi jonsa ne wabé júmaga ku simíbali, mapujiti aboni we sayilúmaga majajali. Alí aboni ke wesi ruyeli mapurigá ikili, mapujiti aboni ne wabé majali.

Echi María echo'ná Makatárachi bitéami bachá riwali ku bitéami niráa echi Jesusi

(Jn. 20.11-18)

⁹Echalí bi'yá oméachi rawé mapalí Jesusi ku owinali, echi María, echo'ná Makatárachi bitéami, bachá riwali ma ku bitéami niráa. Alí echi María níili mapu

Jesusi chabénala niráa ku machí a'wali kichao wabé chati riabla aliwala echo'ná pachana binói María sulálachi jonsa.¹⁰ Alí je'ná María ma riwisáa ku bitéami niráa echí Jesusi, we yáati ku simigá ruyeli echí auché jaré mapu chabénala Jesusi yuwa 'yénali. Alí mapalí echí María echo'ná ku ruyémiya nawali, aboni we siwega nalaka muchili.¹¹ Chopi mapalí aboni námali mapu Jesusi ma ku bitéami níili, ayena cho mapu echí María ma riwali ku bitéami niráa, echalí aboni arigá tarapé bichíili.

Echi okuá mapu Jesusi binérali ma riwali echí Binói ma ku bitéami niráa echo'ná biléana buwichí

(Lk. 24:13-35)

¹² Alí pe wilibeko auché jaré okuá aboni galá riwali ma ku bitéami niráa echí Walubela Jesusi. Echalí aboni riwali mapalí echo'ná biléana buwichí sírali, echo'ná biléana kawichí simiba.¹³ Alí aboni we yáati ku ro'wili echí auché jaré bichíyami ku ruyésiya. Chopi mapalí echirigá ruyélati, echalí aboni ketasi cho bichíili mapurigá Jesusi ma ku bitéami níili.

Jesusi júuli nawesánala echí jaré mapu Binói binérali

(Mt. 28:16-20; Lk. 24:36-49; Jn. 20:19-23)

¹⁴ Alí pe wilibeko Jesusi anchecho siné ke sayiná nawali echo'ná pachá mapo'ná echí jaré makói miná bilé ko'yá muchili. Echalí Binói pée oyérali echí aboni mapujiti aboni ketasi 'me galá bichíyami níili, ayena cho mapujiti aboni we biwárami suléami níili, mapujiti aboni ketasi bichíili echí auché jaré mapu bachá riwisáa, ku ruyeli mapu Jesusi ma ku owínamí níili.¹⁵ Alí Jesusi jeaneli: Ne suníami jena'í wichimóbachi simíbaga nawisasi je'ná galabé Riosi Ra'íchala, mapurigá ne si'néami pagótami galá machimea.¹⁶ Alí echí jaré mapu galá bichíiko, echí mapu pagótami juko omá, echiko galá ku'wíratami níima, chopi echí jaré mapu ketasi bichíiko, echijiti aboni sinibí kastigo 'yárami níima.¹⁷ Alí echí jaré mapu galá bichíiko, aboni galá machirúami níima mapujiti aboni, Nijé iwérawala jiti, ku machí a'wama echí jaré riabla aliwala. Ayena cho galá machirúami níima mapujiti aboni auché si'nú ra'íchali ra'ichama.¹⁸ Alí aboni galá chapimea echí jaré sinowi. Alí a bajisa jaré namuti mukuwáwami, tarapé namuti chibi ikimea. Ayena cho echo'ná echí jaré nayúkamichi a moba nochasa aboni sikala, galá ku sa'wimea echí jaré nayúkami.

Jesusi ku moyénali echo'ná ripá riwigachi

(Lk. 24:50-53)

¹⁹ Alí ma sunisa echirigá ra'icha, echí Walubela Jesucristo echo'ná ripá riwigachi ku torúami níili. Alí Binói ech'ná Riosi yuwa, watonachi asíbali.²⁰ Alí aboni ne suníami wichimóbachi nawisásaya simíbali. Alí echí Walubela Jesucristo echirigá sinibí ku'wírali echí aboni, ayena cho Binói Jesucristo galá machírali echí auché jaré pagótami mapu echí nawisálawami ne bichíwali níili. Binói 'yali mapurigá echí jaré bichíyami wisabé wabé omériga olama mapurigá ke wesi auché jaré pagótami omero olayá. ¡Echirigá nílaga!

SAN LÚKASI

osali je'ná Galabé Ra'íchali

Jesucristo jiti rugá

Lúkasi nakili Riosi Ra'íchala osénala

1 Wikabé echi auché jaré ritémtami ma chótali uchúchaga osoyá ne suwaba namuti jiti, mapurigá ma ikili tamujé tamí yuwa máputa ma galá bichíili Jesucristo niráa. ²A'lí aboni ma suwaba osali achigórigá mapurigá echi auché jaré galá riwali, si'néami mapu ikí chabé chokichí jonsa galá riwali echirigá ikíachi. A'lí aboni mapu echirigá osali, aboni níili mapu wabé ku'wírali, je'ná Galabé Riosi Ra'íchala nawésiya. ³A'lí mujé galabé oláami Tiójilo riwéami, nijeni ayena cho ma ne galá rukugá machili suwaba echi jaré namuti jiti mapurigá ikili chabé chokichí jonsa. ⁴Echijiti jipi nijeni mi jerigá osé mapurigami ne galá machimea mapu suwaba je'ná namuti ne bichíwali ju, achigórigá mapurigami ayena cho ma galá binératami níili.

**Bilé Riosi kapitánawala bachá niráa nawésali jeanigá
mapu echi Juani pe minana ranarúami níima**

⁵Chabé ki'yá mapalí echi Erorsi riwéami rijói ne walula silíami níili echo'ná Juréachi anilíwachi kawírali, echalí bilé rijoy, Sakaríasi riwéami bitéali, echi mapu sacerdote niráa nóchali echo'ná walubé Juríosi ri'obáwalachi. A'lí je'ná Sakaríasi bilé níili echi auché jaré wikabé sacerdote mapu napawika achigórigá olali mapurigá echi ki'yánala bitéami Abíasi riwéami sacerdote olali. A'lí echi Sakariasi upila Elisabeti riwéami níili. Echi Elisabeti onolá ayena cho sacerdote níili, achigorigá mapurigá echi Aroni riwéami rijói ayena cho sacerdote níili chabé ki'yá. ⁶A'lí echi Sakaríasi galabé oláami níili Riosi yuwa, echi Elisabeti ayena cho echirigá galabé oláami níili. Ayena cho okuánika ne galá nijéwami níili suwaba echi Walubela Riosi nulalila. Echijiti ketasi wesi chibi yiri jiti omérali wi'nijiya aboni. ⁷Chopi aboni ketasi kúchuwami níili, mapujiti echi Elisabeti ketasi ranáami níili. Ayena cho echi okuánika aboni ma ne wabé o'chérami níili.

⁸Siné rawé echi Sakaríasi nochama riwéali echo'ná pachá echi walubé Juríosi ri'obáwalachi, echi auché jaré binói yuwa nóchami sacerdote yuwa. ⁹Echalí rawé echi Sakaríasi chapirúami níili echi auché jaré sacerdote jiti, mapurigá binói molémiya bakimea echo'ná ne wabé pachánala echi Walubela Riosi ri'obáwalachi, mapujiti aboni sinibé rawé chapili bilé aboni echirigá olánala. ¹⁰Echalí mapuyénasí echi Sakaríasi echo'ná ne wabé pachánala iyénali echi moliwá molémiya, ne si'néami

echi auché jaré pagótami echo'ná machímana, Riosi yuwa tániga ra'icha jali. ¹¹ A'lí echo'ná pachá ri'obachi ke sayiná wilíbali bilé walula Riosi kapitánawala. A'lí echi Sakaríasi galá riwali echi Riosi kapitánawala echo'ná watonachi wilíami mapo'ná echi moliwá molélachi níili. ¹² A'lí mapalí echi Sakaríasi echirigá riwali echi walula Riosi kapitánawala, echalí binói ne wabé majaga 'nénali. A'lí echi Sakaríasi ketasi machili piri olama. ¹³ Chopi echi walula Riosi kapitánawala jeaneli: ¡Mujé Sakaríasi, ketsi majá! Chopi ne galá bichíi, mapujiti Riosi ma galá námali mapurigami tániga ra'íchali Binói yuwa. Echijiti echi mujé upila, Elisabeti riwéami, ma nawárama bilé taaa towí. A'lí bichemi Juani riwarama. ¹⁴ Echalimi ne wabé kanílama, ayena cho auché jaré wikabé wabé kanílama mapalí echi taaa towí ranarúami níima; ¹⁵ mapujiti echi mujé ranala, ma ochérasha, ne wabé walula níima bacháami Riosi yuwa. Binói tarapé bajima echi uva ba'wila, nibilé bajima auché jaré namuti rikúkuwami. A'lí echi mujé ranala ne galá nulérami níima echi wabé Galabé Riosi Iwigala jiti, echalí jonsa mapalí binói ne bukulí ranarúami níima. ¹⁶ Ayena cho echi mujé ranala galá nawésaga bichírama wikabé echi jaré Isaeali pagótami, mapurigá aboni wikáwali tánama Riosi, ayena cho mapurigá aboni ku ro'wima echi Walubela aboni Riósawala yuwa. ¹⁷ A'lí echi walubela Riosi kapitánawala ayena cho jeaneli: Echi Juani ayena cho bachá niráa nawésama echi pagotami mapalí ma mulubé ke 'me ayó sébachi níima mapurigá echi Walubela nawama jena'í wichimóbachi. A'lí mapurigá echi Elfási ne wabé jiwériga ologá nawésali echi jaré ki'yá piréami pagótami, echirigá echi Juani achigórigá nawésama mapurigá echi jaré 'wéntami galá bichíiga kilí rijóilama aboni kúchawala yuwa, ayena cho mapurigá echi jaré ke nijéwami ku galá nijéwaga olama. A'lí echi Juani echirigá nawésaga ne galá a'lárama echi jaré pagótami mapurigá aboni ne galá bichíima echi Walubela niláa.

¹⁸ A'lí echi Sakaríasi jeanigá rukueli echi walubela Riosi kapitanáwala: ¿Churigá ne bichíwali abijí kúchabota? Nijé ma we chérami ju, ayena cho nijé upila ma wikabé bamíbami ju.

¹⁹ Echalí echi walula Riosi kapitánawala ku nijéwaga jeaneli: Nijeni Gabraeli riwé. Nijeni we nigúurami ju Riosi yuwa. Ayena cho Riosi tamí júuli mi yuwa ra'ichánala, mapurigá nijeni mi ra'ichama je'ná wabé galabé ra'íchali. ²⁰ Chopi jípmi ketasi námami níima, ayena chomi ketasi omérama ra'icha mapuyénasí ma ranarúami níima echi mujé ranala, echi mapu arigá ranarúami níima. Chopi ne suwaba mapurigá nijeni mi aneli arigá achigórigá ikimea mapalí ma echirigá sébachi níima.

²¹ A'lí echo'ná machímana walubé ri'obachi echi wikabé pagótami buwigá muchili echi Sakaríasi mapuyénasí échiko echo'ná pachá ri'obachi iyénali echi moliwá moleya. A'lí echi pagótami wabé majaga 'nátali mapujiti wi'libé niráa echi Sakaríasi ketasi cho ku machínali echo'ná pachá ri'obachi jonsa. ²² Chopi pe wilibeko mapalí echi Sakaríasi ma ku machínali, binói ma ketasi omérali ra'icha. Echalí echi jaré pagótami echo'ná machímana muchúami galá machili mapu Riosi ma galá riwírali echi Sakaríasi jaré wabé omériga ikíami namuti mapalí binói iyénali echo'ná pachá ri'obachi. Mapalí echi Sakaríasi ku machínali binói ne wabé nakili ra'ichánala aboni yuwa, chopi binói ma ketasi omérali ra'icha. Echalí echi Sakaríasi chopi binói sikala jiti jówali, mapujiti binói ma ketasi omérali ra'icha.

²³ A'lí echi Sakaríasi nulérami níili nochánala pe wikabé rawé niráa, echo'ná echi walubé Juríosi ri'obáwalachi. A'lí mapalí binói ma nóchali echikí rawé echalí binói

ku simili echo'ná binói bitélachi. ²⁴A'lí pe kinana echi Sakaríasi upila, Elisabeti riwéami, ma bochátali. A'lí echalí jonsa echi Elisabeti ketasi ku machínali echo'ná pachá binói bitélachi jonsa malí michá iyénasí. Echalí echi Elisabeti chopi je'ná jerigá 'náitali: ²⁵Echi Walubela Riosi ne wabé galabé ju, mapujiti Binly ma tamí 'yali mapurigani raméa bilé tása múchali, mapurigá echi auché jaré pagótami ma ketasi waminabi tamí anema ke ranáami nira.

Bachá niráa nawésarami níili mapu Jesusi ranarúami níima

²⁶A'lí pe wakinánokuá usani michá Riosi júuli kepu capitánoa Gabrieli riwéami echo'ná biléana walúlachi Nasarétachi anilíwachi, echo'ná Galiléachi anilíwachi kawírali nirúami. ²⁷Echalí échiko echo'ná julárami níili bilé mukí 'némiya, echi mapu María riwéami níili. Echi María tarapé siné cho kunéami níili, nirapé cho bilé rijói yuwa kochíami níili. Chopi echi María ma bilé rijói yuwa kunema riwéali, echi mapu José riwéami níili. A'lí echi José bilé níili echi ki'yá bitéami Rabili riwéami rijói kúchala kúchawala niráa. ²⁸A'lí echi walubela Riosi capitánawala bakili echo'ná pachá mapo'ná echi María asali. A'lí echi Riosi capitánawala jeaneli: ¡Kuira! Riosi mi wabé galé. Echi Walubela mi yuwa ju. Echi Walubela Riosi ma mi wabé simírami ku'wírali, ketasi mapurigá Binói ku'wírali echi auché jaré muguí.

²⁹Chopi echi María ne galá riwisáa echi walula Riosi capitánawala, ne wabé majajali, mapujiti binói ma galá námali echirigá ra'íchachi echi walula Riosi capitánawala. Echalí echi María wabé 'nátaga tibili, mapu churigá echirigá kuíraga ra'íchali echi walula Riosi capitánawala. ³⁰Echalí echi walula Riosi capitánawala jeaneli:

María, ketasi majá, mapujiti Riosi mi wabé galé. ³¹Jipi jonsa mujemi ma bocháami níima. A'lí pe minánomí mujemi ranamea bilé tása towí. A'lí bichemi JESUSI riwarama. ³²A'lí echi Jesusi ma ochérasha, ne wabé Walubela níima. Binói anérami níima echi Ripá Riwigachi Atíami Riosi Ranala. A'lí echi Walubela Riosi wilama echi Jesusi mapurigá Walubela silífami niráa, mapurigá Binói arigá nulema echi jaré Israeli pagótami mapurigá aboni Silínawala niráa, achigórigá mapurigá echi walula silífami Rabiri riwéami ayena cho nuleli aboni chabé ki'yá. A'lí echi Rabiri arigá pe ritémtami níili echi Jesusi yuwa. ³³A'lí echi Jesusi ne sinibí niráa echirigá nulema echi jaré Israeli pagótami. Ayena cho Binói ne sinibí niráa aboni silínawala níima.

³⁴Echalí echi María ku nijéwaga jeaneli echi walula Riosi capitánawala: ¿Churigá echirigá ikimea? ¡Nijeni ke wesi siné bilé rijói yuwa napeli!

³⁵A'lí echi walula Riosi capitánawala ku nijéwaga jeaneli: Echi wabé Galabé Riosi Iwigala mi galá omératama, ayena cho echi Ripabé Atíami Riosi mi galá jiwératama, echijiti echi towí mápumi ranamea Riosi níwala níima. A'lí Binói echi bi'nélipi Riosi Ranala anérami níima. ³⁶Ayena cho echi walula Riosi capitánawala waminabi jeaneli: Mujemi pe rijimala ju echi Elisabeti riwéami mukí yuwa. Échiko ma wilárasa ayena cho ranamea bilé tása towí. Chabé jonsa echi Elisabeti ke ranáami anélati. Chopi échiko ma bochátali chabénala usani micha jonsa. ³⁷Mapujiti echi Walubela Riosi ne wabé omérarami ju, ne suwaba namuti olayá.

³⁸A'lí echi María ku nijéwaga jeaneli echi Riosi capitánawala: Nijeni ne suwaba galá nijéwaga olama mapurigá echi Walubela Riosi tamí nulema. Nijeni chopi mapurigá Binói piónawala níima. Ne galá níima Riosi ne suwaba tamí echirigá olasa achigórigá mapurigá mujemi tamí aneli. Echalí echi walula Riosi capitánawala ma ku simili.

Echi Maríia kólamiya simili echi Elisabeti

³⁹ Echalí rawé echi Maríia we sapunú simili echo'ná ripáami wérachi, echo'ná biléana walúlachi mapo'ná echi jaré Jurá kúchala kúchuwala kawíwarachi ju.

⁴⁰ Echalí echi Maríia nawali echo'ná echi Sakaríasi bitélachi. A'lí echo'ná pachá bakigá, echi Maríia kuíraga narépali echi Elisabeti. ⁴¹ A'lí mapalí echi Elisabeti námali echi Maríia echirigá kuíraga narépachi, echalí echi táchá múchali mapu ketasi cho ranarúami níili, arigá ne wabé nokuali echo'ná pachá echi Elisabeti ropálachi; ayena cho echalí echi Wabé Galabé Riosi Iwigala ne galá nuleli echi Elisabeti. ⁴² Echalí echi Elisabeti o'wali ra'íchaga jeaneli echi Maríia: Echi Walubela Riosi ma mi wabé simírami ku'wírali, ketasi mapurigá Binói ku'wírali echi auché jaré muguí; ayena cho Riosi ne wabé simírami ku'wírali echi táchá towí mapu mi ranamea. ⁴³ Ayena cho echi Elisabeti waminabi jeaneli: Nijeni ne wabé kaníili mapujiti mujemi ma tamí 'némiya nawali, mapujiti echi táchá towí mápumi ranamea, échiko nijé Walubélawala níima. ⁴⁴ Ayena cho echi Elisabeti waminabi jeaneli: Ne galani machili je'ná jeyiri mapujiti mapalini bachá niráa gala námali maparimi kuíraga narépaga anili, echalí echi táchá towí ke cho ranarúami, wabé kaníllaga nokuali jena'í pachá nijé ropálachi. ⁴⁵ Mujemi wabé kaníratami ju mapujítimi galá bichíili mapurigá Riosi kapitánawala mi aneli, mapujiti ne suwaba arigá ikimea, achigórigá mapurigá echi walula Riosi kapitánawala mi ne bichíwaga aneli.

⁴⁶ Echalí echi Maríia ku nijéwaga jeanili:

Ne wabeni kaníili pachana nijé sulálachi niráa, echijiti wabeni nakí waminabi walubéraga aneya echi Walubela Riosi.

⁴⁷ Ayena cho echi Maríia jeanili:

Ne wabeni kaníili nijé sulálachi niráa, mapujítini ne galá bichíili Riosi, echi mapu tamí Ku'wíimi ju.

⁴⁸ Mapujiti nijeni mapurigá echi wabé tabéala Binói piónawala ju, chopi Riosi tamí wabé natimali;

echijiti jipi jonsa echalí ne jubá rawé iyénasí, ne si'néami pagótami tamí ne wabé kaníllami anema.

⁴⁹ A'lí echi Maríia ayena cho jeanili:

Ne wabeni kaníili mapujiti echi suwaba omérami Riosi ma ne wabé omériga olali tamí yuwa. Binói ne wabé Galabé ju.

⁵⁰ Ayena cho jeanili:

Echi Walubela Riosi sinibí ne wabé natimama si'néami echi jaré pagótami mapu ikí galá o'wikeko Binói Riosi.

⁵¹ Echi Walubela Riosi ne wabé omériga olali. Binói ma wabé omérali echi jaré mapu ne wabé 'nóchaga níllami ju, aboni sulálachi niráa.

⁵² Ayena cho echi Walubela Riosi ma ku machí a'wali echi jaré mapu o'wéala niráa jawárami níili,

ayena cho Binói auché jaré jáwali mapu kilí oláami níili.

⁵³ Ayena cho echi Maríia jeanili:

Riosi ma galabé niráa kóoli echi jaré wabé 'lochéami,

ayena cho Binói we yiri niráa ku júuli echi auché jaré mapu wabé níwami níili.

⁵⁴ Riosi ma galá ku'wírali echi jaré Binói níwala pagótami, Isaeli anilíwami.

Riosi sinibí natimali aboni.

⁵⁵ Riosi ma tamujé tamí ku'wírali achigórigá mapurigá Binói bichíwaga aneli
echi jaré ki'yá piréami tamujé níwala pagótami.

Chabé ki'yá Riosi echirigá bichíwaga aneli echi Abrami. Echalí Riosi
bichíwaga anili mapurigá Binói sinibí niráa ku'wírama riwéali echi auché
jaré wikabé Abrami kúchala kúchuwala.

⁵⁶ Echalí echi María echo'ná tibili echi Elisabeti yuwa bikiyá michá yénasí. A'lí
ma ku simili echo'ná binói bitélachi.

Ma ranálati echi Juani mapu pagóami níima riwéali

⁵⁷ Mapalí ma sébali echalí rawé mapalí echi Elisabeti ranamea riwéali bilé tách
múchali, echalí binói ranamea bilé tách towí. ⁵⁸ Echalí mapalí si'néami echi jaré
mulubé piréami pagótami galá námali mapurigá Riosi echirigá wabé natimaga
ku'wírali echi Elisabeti, ayena cho mapalí echi auché jaré Elisabeti ritémawala
echirigá námali, echalí ne si'néami aboni ne wabé kaníili binói yuwa.

⁵⁹ Echalí jonsa wakinánokuá osá naó rawé echo'ná sili echi jaré pagótami mapurigá
aboni noligá sikirema echi tách towí, mapurigá echi jaré Juríosi pagótami sinibí
olali. Echalí echi auché jaré pagótami nakili riwaránala echi tách towí, Sakaríasi
niráa, mapurigá binói onolá riwéali. ⁶⁰ Chopi echi tách towí iyela ku nijéwaga jeaneli:
Ketasi echirigá riwarasi. Juani riwéami níima.

⁶¹ Echalí aboni jeanigá rukueli: ¿Churékula echirigá riwéami níima? Tarapé wesi
te 'yemi ritémawala echirigá riwéami.

⁶² A'lí aboni sikati jówaga rukueli echi towí onolá mapu churigá binói nakili
riwaránala, mapujiti binói abijí ke námiami níili, ayena cho ketasi cho omérali
ra'icha. ⁶³ Echalí echi towí onolá, bilé oselí tasa, echo'ná jeanigá osali: Juani riwéami
ju. Echalí si'néami echi auché jaré echo'ná jáwami chopi ne wabé kilí 'nátaga
tibili. ⁶⁴ Echalí we yáati echi Sakaríasi ma ku omérali ra'icha. A'lí binói chótali
jeanigá mapu Riosi ne wabé Walubela ju. ⁶⁵ Echijiti si'néami echi jaré pagótami
echo'ná mulubé piréami ne wabé 'nátaga tibili. Ayena cho si'néami pagótami
echo'ná ripáami wérachi, Juréachi anilíwachi kawírali piréami, a'nagupi rugá wé
ra'íchali mapurigá je'ná jerigá ikili. ⁶⁶ A'lí ne si'néami echi jaré pagótami mapu ikí
galá námali je'ná jerigá ikíachi, abóniko ibili niráa ne wabé kilí 'nátaga muchili.
Echalí aboni a'nagupi jeanili:

Je'ná towí ne wabé walula níimiré mapalí binói ma ochérasha. Aboni echirigá
anili mapujiti si'néami galá machili mapurigá Riosi wabé karigá ku'wírali echi
tách towí.

Echi Sakaríasi ne galá nawesa

⁶⁷ A'lí echi Wabé Galabé Riosi Iwigala ne galá nuleli echi towí onolá, Sakaríasi
riwéami. Echalí binói we ra'íchali mapurigá Riosi 'yali ra'ichánala, mapalí binói
jeanili:

⁶⁸ Ne galá níima ne si'néami pagótami jeanigá mapu echi tamujé Israeli
pagótami Riósawala ne Walubela Riosi ju;
mapujiti tamujé Riósawala ma tamujé tamí ku'wírali máputa Binói níwala
pagótami ju, ayena cho Binói tamujé tamí ma ku wikáwali.

⁶⁹ Echi tamujé Riósawala ma tamujé tamí 'yali bilé wabé omérami
Ku'wíimi.

Échiko bilé ju echí ki'yá bitéami Rabiri riwéami rijói kúchala kúchuwala.

A'lí echí Rabiri riwéami rijói Riosi piópnawala niráa níili.

⁷⁰ Chabé ki'yá Riosi nulali echirigá bichíwaga anénala, mapalí Binói nawésanala júuli echí jaré galabé oláami rijói mapu Binói jiti nawésami níili.

⁷¹ Riosi echirigá tamujé tamí bichíwaga aneli, mapurigá Binói tamujé tamí ku'wírama riwéali mapurigá echí jaré mapu tamujé tamí sayérami ju ketasi tamujé tamí omérama, ayena cho mapurigá echí jaré mapu tamujé tamí wabé kichí, arigá ketasi tamujé tamí omérama.

⁷² Ayena cho Riosi echirigá waminabi tamujé tamí natimali achigórigá mapurigá Binói wabé natimali echí jaré ki'yá piréami tamujé níwala pagótami. Riosi sinibí 'natama mapurigá Binói bichíwaga aneli aboni.

⁷³ Riosi je'ná jerigá ne bichíwaga aneli echí Abrami, echí mapu tamujé onolá niráa níili, mapu chabé ki'yá bitéali:

⁷⁴ Mapu Riosi Binói tamujé tamí ku'wírama riwéali, mapurigá echí jaré tamujé sayera ketasi tamujé tamí omérama, ayena cho mapurigá tamujeta tarapé majaga, galá nijéwaga olabo mapurigá Riosi tamujé tamí nulé.

⁷⁵ Chopi mapurigata galabé níibo, ayena cho mapurigata chopi olabo mapurigá Riosi tamujé tamí nulé ne sinibí mapuyénasíta piré jena'í wichimóbachi.

⁷⁶ Echalí echí Sakaríasi jeaneli echí táchí towí: Mujé mápumi táchí nijé ranala ju, mujemi bilé walula Riosi jiti nawésami anérami níimami, mapujiti echí Walubela Ripá Riwigachi Atfámi Riosi mi julama nawisánala.

A'lí mujemi bachá niráa nawésama echí jaré pagótami, mapurigá aboni galá bichíima echí Walubela Jesucristo, mapalí Binói pe waminánomí galá nawésama aboni.

⁷⁷ Echalí mujemi nawésama echí jaré Binói níwala pagótami mapurigá aboni galá ku'wíratami níima, ayena cho mapurigá aboni chati olalila galá ku wikawárami níima.

⁷⁸ Ne bichíwali ju mapu echí Walubela Riosi echo'ná ripá riwigachi atíami tamujé tamí wabé ku'wírali, mapujiti Binói tamujé tamí wabé natimaka galeli.

Ayena cho Riosi Binói júuli echí Walubela Ku'wíimi mapurigá Binói tamujé tamí machírama suwaba namuti.

A'lí echí rayénali chopi tamujé tamí rayénata sinibí rawé mapurigata galá riwiboa suwaba namuti jena'í wichimóbachi nirúami.

⁷⁹ Jena'í wichimóbachi tamujé chopi mapurigá echo'ná rokowárali niráa piré, ayena chota pe waminánomí arigá suwiboa; chopi echí Walubela Ku'wíimi tamujé tamí galá machíratama mapurigata galá machiboa Riosi Ra'íchala, ayena cho Binói tamujé tamí binérama mapurigata kilí ologá pirélabo.

⁸⁰ A'lí echí táchí towí Juani riwéami galá ochérali. Ayena cho binói galá bichíili Riosi. A'lí echí Juani bitéali echo'ná jaléana waná kawichí, echalí rawé yénasí mapalí ma sébachi níili mapurigá Riosi julama echí binói nawésanala echí jaré Isaeli anilíwami pagótami.

Echi Jesusi ranarúami níili

(Mt. 1:18-25)

2 Echalí ki'yá rawé echí walula silíami Augusto riwéami we nuláami níili ne suníami jena'í wichimóbachi. A'lí échiko nulali mapu ne suníami jena'í wichimóbachi piréami pagótami oserichi ro'ogá tarárami níima. **2** Echalí bamíbali ne chokichí níili mapalí echí walula silíami echirigá nulali taránala si'néami pagótami. Echalí echí Sirénio riwéami rijói walula silíami níili echo'ná Síriachi anilwachi kawírali. **3** Echalí ne si'néami pagótami arigá simíbali echo'ná ibílana aboni o'wéalawalachi mapurigá aboni riwalá echo'ná oselichi osilúami níima.

4 A'lí echí José echo'ná Nasarétachi, echo'ná Galiléachi anilwachi kawírali jonsa simili, echo'ná Juréachi anilwachi kawírali simiyá, echo'ná mapo'ná echí Rabiri riwéami rijói walúlawachi níili, mapo'ná Belenchi anérati, mapujiti binói José bilé níili echí ki'yá bitéami Rabiri kúchala kúchuwala. **5** Echi José echo'ná simili, echí binói upila María riwéami yuwa, mapurigá aboni riwalá ayena cho echo'ná oselichi ro'ogá tarárami níima. A'lí echí María níili mapu chabé jonsa kunema riwéali echí José yuwa. A'lí ma bocháami níili. **6** Echalí rawé mapalí aboni echo'ná Belenchi muchili, ma sébali mapalí echí María ranamea riwéali bilé táchili. **7** A'lí echí María ranali billepi táchili towí 'múchili ne bachá. Echalí jaré chiní kimílachi kabilí. A'lí echo'ná sonórali rikali mapo'ná biléana wáasi sonó kóolachi níili, mapujiti ketasi nirúali mapo'ná aboni pachá muchima echo'ná biléana kalírali pagótami kochílachi.

Jaré Riosi kapitánawala echo'ná sili

8 Echalí ki'yá rokogó echo'ná kawichí mapo'ná mulubé níili echo'ná Belenchi jaré bo'wá niséami galá tibuka muchili echí wikabé aboni pugula bo'wá. **9** A'lí ke sayiná bilé walula Riosi kapitánawala echo'ná moba echí jaré bo'wá niséami yuwa nawali. Echalí ne wabé simírami ratábalí echo'ná ne noligá aboni yuwa mapujiti Riosi ne wabé Walubela ju. A'lí aboni ne wabé majajali. **10** Chopi echí walula Riosi kapitánawala jeaneli: ¡Ketasi majasi! Nijeni 'yemi mi ruyema echí ne galabéala mapurigá bukulí ikili. Je'ná jiti ne si'néami pagótami ne wabé kanílama. **11** Jipi rokogó echo'ná echí Rabiri walúlawalachi ma ranálati bilé táchili towí, echí mapu Walubela Ku'wíimi níima 'yemi pagótami yuwa. Échiko echí Walubela Cristo níima, echí mapu Riosi wilama ruli mapurigá Walubela Ku'wíriyami niráa. **12** 'Yémítamo galá machiboa chuyiri ju echí táchili towí, mapujítitamo galá riwiboa chiní kimílachi kabita bu'wíami, echo'ná biléana sonórali, wáasi kóolachi.

13 Echalí ke sayiná echo'ná pe ripana niráa, wikabé o'wéala Riosi kapitánawala jálábi echí auché bilé Riosi kapitánawala yuwa. A'lí ne si'néami aboni waminabi walubéraga aneli Riosi mapalí aboni jeanili:

14 ¡Waminabi wabé walubélaga anérati nílaga Riosi, echo'ná ripá riwigachi atíami!

¡Kilí pirélasi 'yemi pagótami jena'í wichimóbachi piréami! ¡A'nagupi galesi! Riosi 'yemi mi ne wabé galé.

15 Echalí mapalí echí jaré o'wéala Riosi kapitánawala ma ku simíbali echo'ná ripá riwigachi, echalí echí jaré bo'wá niséami we yáati chótali a'nagupi ra'íchaga jeaniyá: Ma simabo echo'ná Belenchi, je'ná jerigá ikíami 'nébiya, mapurigá tamujé

Walubélawala ma tamujé tamí ruyeli.¹⁶ Echalí aboni we sapú simíbali echo'ná Belenchi. A'lí aboni echo'ná riwali echi María, echi José ayena cho, echi táo towí asichiko, echi mapu echo'ná biléana sonórali wáasi kólachi bu'wíami níili.¹⁷ Mapalí aboni ma riwali echi táo towí, a'lí aboni galá nawésaga ku ruyeli mapurigá echi walubela Riosi kapítánawala ma aneli aboni, echi táo towí jiti rugá.¹⁸ Echalí ne si'néami mapu ikí echirigá námaliko, si'néami we galá kilí 'nátaga kipuli mapurigá echi jaré bo'wá niséami anili.¹⁹ Chopi echi María sinibí, sulachí niráa, 'nátaga newalali ne suwaba echi jaré namuti mapurigá ikili.²⁰ A'lí echi jaré bo'wá niséami ku simíbaga nawésali echi auché jaré pagótami jeanigá mapurigá Riosi ne wabé Walubela ju, mapujiti Binói suwaba galá olali achigórigá mapurigá Binói bachá niráa ruyegá 'néralli aboni mapu ikimea riwéali.

Echi táo towí Jesusi párami níili echo'ná echi warubé Juríosi ri'obáwalachi

²¹ Mapalí ma simírali osá naó rawé, echalí echi jaré Juríosi noligá sikireli echi táo towí, mapurigá aboni sinibí olali echi jaré kúuchi kúrowi yuwa. A'lí echi táo towí Jesusi riwarálati, achigórigá mapurigá echi walubela Riosi kapítánawala bachá niráa aneli echi María, mapalí binói ke cho bocháami níili.²² Ma sébali echalí rawé mapalí aboni ma ku bi'wárami níima riwéali, mapurigá echi Moisesi osogá nulali. Echalí rawé echo'ná Jerusalémachi tólati echi táo towí Jesusi mapurigá Binói echi walubela Riosi 'yárami níima.²³ Echalí echi táo towí 'wénawala echirigá olali mapujiti echi Walubela Riosi echirigá nulali, mapurigá je'ná jerigá osirúami ju echo'ná Riosi Ra'íchala oselíwalachi: Ne si'néami echi jaré kúuchi kúruwi mapu ikí ne bachá niráa, ranarúami níima, mapalí aboni iyela ne bachá niráa ranáli bilé táo, abóniko 'yárami níima echi Walubela Riosi.²⁴ A'lí echi táo towí echirigá tólati echo'ná Jerusalémachi mapalí Binói 'wénawala echo'ná simíbali mapurigá aboni suwaba níjewaga olama mapurigá je'ná jerigá osirúami ju mapurigá jaré namuti 'yárami níima riwéali Riosi: 'Yémitamo ko'ogá 'yabo Riosi okuá makawi echo'ná kawichí nirúami, auché jaré okuá makawi echo'ná bitichí nirúami keremá, mapalí bilé mukí bachá niráa raná bilé táo towí 'múchali.

²⁵ A'lí echalí bilé rijói Simioni riwéami echo'ná Jerusalémachi bitéali. Échiko galabé oláami níili, ayena cho binói galá bichíyami níili Riosi. Ayena cho echi Simioni bichíiga buweli echalí rawé sébachi mapalí echi jaré Israeli anilíwami pagótami galá ku'wíratami níima riwéali. Échiko galá nulérami níili echi wabé galabé Riosi Iwigala jiti.²⁶ A'lí echi Galabé Riosi Iwigala chabénala ma ruyeli echi Simioni mapurigá binói ketasi cho mukumea riwéali, a ketasi cho riwisá echi Cristo, echi mapu echi Walubela Riosi wilama riwéari mapurigá Walubela Ku'wíriami niráa.²⁷ Pe wakinana siné rawé echi Wabé Galabé Riosi Iwigala júuli echi Simioni echo'ná echi walubé Juríosi ri'obáwalachi. Echalí rawé níili mapalí echi táo towí 'wénawala echo'ná pali echi táo towí Jesusi, mapurigá Binói galá olárami níima mapurigá echi jaré Juríosi nulérami níili olánala si'néami echi jaré kúuchi kúrowi yuwa.²⁸ Echalí echi Simioni echo'ná binói sikálachi mutuli echi táo towí Jesusi. A'lí echi Simioni waminabi walubéraga aneli Riosi mapalí binói jeaneli:

²⁹ Kení Walubérawa, nijeni chopi mapurigá Mujé piónawala ju.

Jipi ma ariwé mapuriga nijeni ma galá bichíiga mukumea, mapujítimi ma ne sébali olali mapurigami bachá niráa tamí ne bichíwaga aneli.

³⁰ Mapujiti níjé binói ma galá riwali echi Ku'wíriyami,

³¹ mapu Mujemi wilali mapurigá Binói ku'wírama ne si'néami pagótami.

³² Echi Walubela Ku'wíriyami, ayena cho galá machílama echi auché jaré isena pagótami mapu ketasi Juríosi pagótami ju; ayena cho Binói waminabi o'wéalatama echi jaré Mujé níwala Isaeli anilíwami pagótami.

³³ Echalí echi José, echi Jesusi iyela ayena cho, ne wabé kilí 'nátaga kipuli mapurigá echi Simioni nawésaga anili echi táchia towí jiti rugá. ³⁴ Echalí echi Simioni ne wabé karigá ra'íchali aboni. Binói ayena cho aneli echi Jesusi iyela, María riwéami, jeanigá: Nibira, je'ná táchia towí ma ochérasha ne wabé Walubela níima. Binói jiti wikabé echi jaré Isaeli pagótami miná chakena rujuima. Chopi auché jaré wikabé aboni, Binói jiti ku jawásarami níima. Binói ayena cho jurárami ju mapurigá wikabé pagótami galá machíratami níima. Chopi wikabé arigá wabé kichima echi Binói. ³⁵ Ayena cho echi mujé Ranala galá machírama mapurigá echi jaré pagótami ibili niráa 'nata echo'ná aboni sulálachi niráa; ayena cho mujé binói ne wabé simírami o'monáratami níima mapurigá mapalí bilé wi'libé ripiyá ichesa mujé sulálachi niráa.

³⁶ Echalí rawé bilé mukí Ana riwéami ayena cho asali echo'ná walubé Juríosi ri'obáwalachi. Echi Ana we nawésami níili mapurigá Riosi nuleli binói nawésanala, échiko bilé rijói Janueli riwéami malala níili. A'lí echi Janueli bilé níili echi jaré Aseri aniríwami rojuáami, echi jaré Juríosi pagótami. Echi Ana ne wabé wiláami níili. Chabénala echi Ana wabé tiwé ká kuneli. Echalí jonsa binói bitéali kepu kuná yuwa kichao bamíbali niráa, chopi binói kunala echalí ma mukuli. ³⁷ A'lí echi Ana ma kunámami níili osá nawosa makói miná naó bamíbali jonsa. A'lí echi Ana sinibí rawé, sinibí rokogó asali echo'ná pachá echi walubé Juríosi ri'obáwalachi. Ayena cho echi Ana wi'libé niráa ketasi ko'wali mapalí binói chopi Riosi yuwa tániya asali. ³⁸ Echalí rawé echi Ana ayena cho nawali echo'ná walubé Juríosi ri'obáwalachi mapalí echi táchia towí Jesusi echo'ná pálati. A'lí echi Ana ayena cho we yáati walú natétara 'yalí Riosi, ayena cho binói chótali ra'icha echi táchia towí Jesusi jiti rugá ne si'néami pagótami mapu ikí galá bichiiga buweli mapurigá echo'ná Jerusalémachi piréami galá ku'wíratami níima.

Aboni ku simíbali echo'ná Nasarétachi

³⁹ A'lí aboni echirigá ma sebárali suwaba namuti olayá echi táchia towí yuwa, mapurigá echi jaré Juríosi nulérami níili olánala mapurigá osirúami ju echo'ná echi Walubela nulalila oseríwalachi. A'lí aboni ma ku simíbali echo'ná Galiléachi anilíwachi kawírali, echo'ná aboni walúlawalachi mapo'ná Nasarétachi anilíwachi ju. ⁴⁰ Echalí jonsa echi táchia towí Jesusi galá ochéraga, waminabi jiwérali, ayena cho waminabi wabé 'nátami níili. A'lí Riosi wabé galigá ku'wírali echi binói.

Echi towí Jesusi tibili echo'ná pachá echi walubé Juríosi ri'obáwalachi

⁴¹ Sinibí bamíbali Binói 'wénawala simíbali echo'ná Jerusalémachi mapalí omáwalachi sébachi níili mapalí echi jaré Juríosi omáwaga ko'yali echi jaré kúuchi bo'wá. ⁴² A'lí mapalí echi Jesusi makói miná okuá bamíbami níili, echalí bamíbali si'néami aboni muyénali echo'ná ripáami Jerusalémachi, mapurigá aboni olali sinibí bamíbali echalí omowáluachi rawé sébachi. ⁴³ A'lí ma sunisa echirigá omawa, echalí aboni ma ku simíbali. A'lí echi towí Jesusi echo'ná Jerusalémachi

ripili, chopi echí José ketasi machili mapu Jesusi echo'ná ripili. Echi Jesusi iyela nirapé machili.⁴⁴ Chopi aboni mayeli mapu echí towí Jesusi ayena cho yuwa simili echo'ná buwechí iyénaga, echí auché jaré wikabé pagótami yuwa mapu ku simiba 'yénali. A'lí aboni echirigá pe mikabé 'yénali, siné rawé inárawami niráa. Echalí ma alíwachi aboni ari echo'ná aboni ritémawalachi, echo'ná aboni amígowalachí ayena cho.⁴⁵ Chopi aboni ketasi riwali. A'lí ba'alínala rawé aboni ku ro'wili echo'ná Jerusalémachi echí towí Jesusi ásiya.⁴⁶ A'lí wakinánokuá baikiyá chi'rigá aboni ma riwali echí towí Jesusi echo'ná pachá echí walubé Juríosí ri'obáwalachi atíami. Echalí echí towí Jesusi echo'ná nasipa asali echí jaré nulalíwami binériami yuwa. Echalí Binói galá kipuli aboni nawésawala, ayena cho Binói wikabé namuti rukueli aboni.⁴⁷ Echalí ne si'néami pagótami mapu ikí námali mapurigá echí towí Jesusi echirigá galá machigá ku nijéwali, abóniko anili mapu Binói ne wabé machíami níili. Ayena cho aboni anili mapu Binói sinibí ne wabé simírami galá machigá ku nijéwali.⁴⁸ A'lí mapalí echí Jesusi 'wénawala ma echirigá riwali echí jaré o'wéali yuwa ra'íchachi, echalí aboni ma riwisá ne wabé kilí 'nátali. A'lí Binói iyera jeaneli: Kení raná, ¿churékula mi ketasi tamujé tamí yuwa simili? Kemi onó, nijé ayena cho, wabeta o'móniga 'yénali mi aya.⁴⁹ Echalí Jesusi ku nijéwaga jeaneli: ¿Churékulátamo tamí ali? ¿Kéchatamo machili mapu arigá 'wérali ju mapu Nijeni ologá inama Nijé Onolá olalila?⁵⁰ Chopi aboni ketasi galá machili mapurigá Binói ra'íchaga aneli.

⁵¹ Echalí echí towí Jesusi ma ku simili Binói 'wénawala yuwa. A'lí aboni ku sili echo'ná Nasarétachi. A'lí echí towí Jesusi ne galá nijéwami níili aboni yuwa. A'lí Binói iyela ne sulachí niráa ne galá 'nátali suwaba je'ná namuti jiti.⁵² Echalí echí towí Jesusi waminabi galá ochéraga, waminabi wabé machíami níili. A'lí Riosi ne galá nírali echí Jesusi. Ayena cho echí jaré pagótami ne galá nírali Binói.

Echi Juani mapu pagóami níili we nawésali echo'ná biléana waná kawichí (Mt. 3:1-12; Mr. 1:1-8; Jn. 1:19-28)

3 Mapalí echí walula Tibério ma ne walubela nuráami níili echo'ná Rómachi anilwachi makói miná malí bamíbali jonsa, echalí bamíbali echí Ponkio Pilato ayena cho silíami níili echo'ná Juréachi. Ayena cho echí Erorsi walula silíami níili echo'ná Galiléachi. Echalí echí Erorsi rijimala, Jiripi riwéami, ayena cho silíami níili echo'ná Ituréachi, echo'ná Trakonítachi ayena cho. A'lí echalí bamíbali echí Lisánia riwéami rijói walula silíami níili echo'ná Abilíniachi.² Ayena cho echalí bamíbali echí Anasi, echí Kaijasi o'wéala sacerdote níili echí jaré Juríosí pagótami yuwa. Echalí bamíbali níili mapalí Riosi nawisánala júuli echí Juani, echí Galabé Riosi Ra'íchala. Echi Juani níili echí Sakaríasi ranala. Ayena cho echí Juani bi'neli bitéali echoná biléana waná kawichí.³ Echalí echí Juani nawésasiya simili echo'ná suníami ne noligá rijówachi, echo'ná bakóchi Joránachi anilwachi. Echalí echí Juani nawésali echí pagótami jeanigá mapu aboni ba'wí jiti pagótami níima, ayena cho mapu si'néami aboni si'nú, galabé niráa 'nátaga, ku ro'wima Riosi yuwa mapurigá aboni ku wikawárami níima mapurigá aboni chati olali.⁴ Ne suwaba je'ná jerigá ikili mapurigá echí walula Riosi jiti nawésami, Isaíasi riwéami bachá niráa jeanigá osali:

Bilé rijói o'weli ra'íchaga nawisama echo'ná biléana waná kawichí. Échiko jeanigá nawésama:

Echi Walubela ke sayiná nawama jena'í wichimóbachi. Echijiti ne galá a'lárasí 'yemi aboni sulálachi mapurigátamo ayena cho we galá a'lara echi buwé mapalí bilé walula echo'ná simíraga nawama.

⁵ Echalí ne suníami ri'lé komichi we galá ku buchíwarami níima, ne suníami galá ri'narátami níima mapurigá ipó niráa.

Echalí ne suníami ripabé rabó ayena cho miná najunárami níima; ne suníami galá ri'narátami níima.

A'lí echo'ná suníami wabé nakólami buwichí galá ku wachinárami níima.

Ayena cho ne suníami buwichí wabé charikáachi galá ku a'láratami níima.

⁶ Echalí ne si'néami pagótami galá riwimea echi Ku'wíriami mapu Riosi julama jena'í wichimóbachi.

⁷ Echalí mapalí echi wikabé pagótami simíbali echo'ná waná kawichí mapurigá echi Juani ba'wí jiti pagoma aboni, echalí echi Juani jeaneli: ¡'Yemi pagótami mapurigá jaré sinowi kúchuwala ju máputamo wakiná júmsali mapujítitamo wabé majali! ¿Chigá 'yemi mi ruyeli máputamo waminá júmsabo, mapurigátamo ketasi kastigo 'yárami níibo waminanomí rawé? ⁸ Ne galabé olasi, mapurigátamo echirigá galá 'nérabo echi auché jaré pagótami máputamo ma ne bichíwari ku galabé niráa 'nátaga, ma ku ro'wili Riosi yuwa. Ketasi chopi 'natasi mapu 'yemi aboni we galabé oláami ju, mapujítitamo echi Abrami pagótamawala ju. Nijé 'yemi nimí ané mapu Riosi wabé omérami ju, je'ná wikabé rité nakulíwiya, mapurigá je'ná wikabé rité ma nakulíwasa, wikabé Abrami pagótawala niráa níima. ⁹ Jípiko echi ripulá ma ne echo'ná masana chokilachi uchárami ju; ayena cho ne suwaba masana mapu ikí ketasi galabé rakeko, échiko arígá ripúnaga, echo'ná na'írali pátami níima. Riosi ayena cho achigórigá kastigo 'yama echi jaré pagótami, si'néami mapu ikí ketasi galabé olako.

¹⁰ Echalí echi jaré pagótami jeanigá rukueli: ¿Churigá biché olabo tamujé? ¹¹ A'lí echi Juani ku nijéwaga jeaneli: Galá níima ibili 'yemi máputamo ikí okuá napáchako, pe bilé 'yasa echi auché jaré mapu ketasi bilé niwa. A'lí 'yemi máputamo niwa ko'wáami, galá níima 'yemi kóosa echi auché jaré mapu ketásirapé niwa. ¹² Echalí echo'ná sili jaré rijói mapu wenomí bujea 'yénali, echo'ná nuláami walula silífami 'yánala. A'lí aboni nakili mapu echi Juani ba'wí jiti pagoma ibili aboni. Echalí aboni jeanigá rukueli: Binériami, ¿churigata olabo tamujé? ¹³ A'lí echi Juani jeaneli: Ketasi waminabi simírami niráa nipasi. Chopi ibili niráa nipasi mapurigátamo risénsia nulérami ju. ¹⁴ A'lí jaré sontarsi ayena cho jeanigá rukueli: ¿Churigata olabo tamujé? A'lí echi Juani ku nijéwaga jeaneli: Ketasi wesi majáraga 'yesi aboni níwala namuti. Nibilé wesi 'yékaka wi'nijisi mapurigátamo echirigá 'yebo jaré aboni níwala namuti. Chopi ne galá kanílasi mapurigátamo natéetalawa.

¹⁵ Echalí echi jaré Juríosi pagótami we buwigá muchili mapurigá Riosi julama bilé Walubela Ku'wíriami jena'í wichimobachi, echi mapu Cristo anérami níima riwéali. Echijiti ne si'néami aboni ayena cho je'ná jerigá 'nátaga muchili: ¿Acha echi Juani ju echi mapu Cristo anérami níima? ¹⁶ Chopi echi Juani ku nijéwaga jeaneli echi si'néami pagótami: Nijeni ne bichíwali 'yemi mi pagóli ba'wí jiti. Chopi echi Cristo anilíwami mapu ne bichíwali ke 'me ayó nawama 'yemi yuwa, échiko 'yemi mi 'yama echi Wabé Galabé Riosi Iwigala. A'lí echi Galabé Riosi Iwigala mapurigá na'í niráa nawama jena'í wichimóbachi. Chopi echi Walubela Cristo ne wabé simírami Walubela ju, ketasi mapurigá nijé. Mapujiti nijeni ketasi 'me galabé

oláami ju, mapurigani echijiti omérama ku'wíriya echí Binoy, nibilé mapurigani ku akaráptama Binói akalá.¹⁷ Echi Binói ma galá kasíwama binói níwala turío, ayena cho Binói gará katiwama echí turío echo'ná pachá Binói níwala rikówachi. Echalí Binói waminá ikósama echí kajela echo'ná na'írali mapo'ná tarapé siné cho'wimea. Echirigá ayena cho Riosi achigórigá kastigo 'yama echí jaré chati oláami pagótami, sinéami mapu ikí ketasi ku wikawárami ju.

¹⁸ A'lí echí Juani je'ná jerigá wabé galá nawésali echí pagótami. Ayena cho binói auché jaré wikabé namuti aneli aboni mapalí binói echirigá nawésali echí Galabé Riosi Ra'íchala. ¹⁹ Echi Juani ayena cho ruyeli echí walula silíami Erorsi riwéami mapu ketasi risénsia níili mapu binói chapimea echí Eroríasi riwéami mukí mapurigá binói upila niráa, mapujiti echí mukí chopí echí Jilipi upila níili, echí mapu echí Erorsi rijimala níili. Chopí echí Erorsi arigá chapili echí Jiripi upila mapurigá binói upila niráa. Ayena cho echí Juani ruyeli echí Erorsi mapurigá binói auché jaré wikabé namuti chati olali. ²⁰ Chopí echí Erorsi ketasi wikáwali tánali. A'lí echí Erorsi waminabi chati olali mapalí binói nulali pachá bachánala echí Juani.

Jesusi pagótami níili ba'wí jiti

(Mt. 3:13-17; Mr. 1:9-11)

²¹ Chopí chabé bachánala je'ná jerigá ke cho ikíachi, echalí echí Juani pagoya iyénali echí jaré pagótami. Echalí echí Jesusi echo'ná nawagá ayena cho pagótami níili. A'lí Jesusi abijí Riosi yuwa ra'íchaya wilili mapalí Binói riwali mapurigá echo'ná ripá riwigachi ke sayiná iráparami niráa niili. ²² Echalí echí Wabé Galabé Riosi Iwigala riwirúami níili echo'ná moba echí Jesusi yuwa rikínamí mapurigá bilé makawi niráa. A'lí echí Walubela Riosi echo'ná ripá riwigachi atíami we ra'íchali jeanigá: Mujé ju biley keni Raná. Nijé nimí wabé galé. Mujé tamí wabé ganílatali.

Echi jaré ki'yá piréami Jesusi pagótamawala

(Mt. 1:1-17)

²³ A'lí echalí mapalí echí Jesusi chótali nawésiya, Binói mapuyena baisá makói bamíbami níili. A'lí echí auché jaré pagótami mayeli mapu Jesusi echí José ranala níili, echí mapu Elí ranala níili, ²⁴ échi mapu Matata ranala níili, échi mapu Libí ranala níili, echí mapu Melchí ranála níili, echí mapu Jána ranala níili, echí mapu José ranala níili, ²⁵ echí mapu Matatíasi ranala níili, echí mapu Amosi ranala níili, echí mapu Naúmi ranala níili, echí mapu Islí ranala níili, echí mapu Nagái ranala níili, ²⁶ echí mapu Mata ranala níili, echí mapu Matatíasi ranála níili, echí mapu Semeí ranála níili, echí mapu auché bilé rijói José riwéami ranala níili, echí mapu Jurá ranala níili, ²⁷ echí mapu Juani ranala níili, echí mapu Resa ranala níili, echí mapu Sorobabéli ranála níili, echí mapu Sareteli ranala níili, echí mapu Nería ranala níili, ²⁸ echí mapu Melchí ranala níili, echí mapu Abiri ranala níili, echí mapu Kosami ranala níili, echí mapu Ilmorámi ranala níili, echí mapu Ere ranala níili, ²⁹ echí mapu Jusué ranala níili, echí mapu Elieseri ranala níili, echí mapu Joremi ranala níili, echí mapu Matata ranala níili, ³⁰ echí mapu Libí ranala níili, echí mapu Simioni ranala níili, echí mapu Jurá ranala níili, echí mapu auché bilé baisá rijói José riwéami ranala níili, echí mapu Jonani ranala níili, echí mapu Iliakími ranala níili, ³¹ echí mapu Milea ranala níili, echí mapu Mainani ranala níili, echí mapu Matata ranala níili, echí mapu Natani ranala níili, ³² echí mapu

Rabiri ranala níili, echi mapu Isaí ranala níili, echi mapu Obeli ranala níili, echi mapu Bosi ranala níili, echi mapu Salomoni ranala níili, echi mapu Nasoni ranala níili,³³ echi mapu Aminarabi ranala níili, echi mapu Arami ranala níili, echi mapu Isoromi ranala níili, echi mapu Párisi ranala níili, echi mapu Jurá ranala níili,³⁴ echi mapu Jakobo ranala níili, echi mapu Isaka ranala níili, echi mapu Abrami ranala níili, echi mapu Taré ranala níili, echi mapu Nachori ranala níili,³⁵ echi mapu Serubi ranala níili, echi mapu Rakau ranala níili, echi mapu Paleka ranala níili, echi mapu Eberi ranala níili, echi mapu Sala ranala níili,³⁶ echi mapu Kainani ranala níili, echi mapu Arpásali ranala níili, echi mapu Semi ranala níili, echi mapu Noé ranala níili, echi mapu Lamechi ranala níili,³⁷ echi mapu Matúsara ranala níili, echi mapu Enochí ranala níili, echi mapu Jareri ranala níili, echi mapu Malaleri ranala níili, echi mapu Kainani ranala níili,³⁸ echi mapu Enosi ranala níili, echi mapu Seta ranala níili, echi mapu Arani ranala níili, echi mapu Riosi jiti niwárami níili.

Echi riablo nakili mapurigá Jesusi we chati olama. Chopi Jesusi ketasi chirigá chati olali

(Mt. 4:1-11; Mr. 1:12, 13)

4 Echalí echi wabé Galabé Riosi Iwigala galá nureli echi Jesusi echo'ná Binói sulálachi niráa. A'lí Binói ku simili echo'ná bakochi Joránachi anilfwachi jonsa. A'lí echi wabé Galabé Riosi Iwigala júuli echi Jesusi echo'ná biléana waná kawichí.² Echalí Jesusi echo'ná waná kawichí asali nawosa makói rawé yénasí. Echalí echi riablo echo'ná nawagá ra'íchari Jesusi yuwa mapujiti echi riablo wabé nakili mapurigá Jesusi we chati olama, chopi Binói ketasi nijéwali. A'lí echalí nawosa makói rawé yénasí echi Jesusi ketasi biyili namutí ko'wali. Echijiti pée wakinana ne wabé 'locheli.

³ Echalí echi riablo jeaneli: A mi ne bichíwali echi bilepi Riosi Ranala níisagá, galá nulé je'ná wikabé rité mapurigá wikabé pani nílama, mapurigami galá bosama. ⁴ A'lí Jesusi ku nijéwaga jeaneli: Echo'ná Riosi Ra'íchala oselíwalachi jerigá osirúami ju: Echi pagótami ketasi chopi ko'wáami jiti pirélama, chopi ayena cho arigá 'wéraili ju mapu aboni galá bichíima suwaba Riosi Ra'íchala, mapurigá aboni ne bichíwali sinibí niráa pirélama.

⁵ A'lí echi riablo toli echi Jesusi echo'ná biléana wabé ripabé rabó. A'lí sinepi niráa 'néraili suníami kawichí walula nulálachi jena'í wichimóbachi nirúami. ⁶ Echalí echi riablo jeaneli: Nijé ne wabé omérami ju mapurigá nijeni mi 'yama mapurigami ne walubela nuláami níima ne suníami jena'í wichimóbachi. Nijeni ayena cho wabé omérami ju mapurigá nijeni mi wilama jena'í wichimóbachi mapurigá ne wabé walubela niráa. Echirigá nijé 'yárami níili; ayena cho jipi nijeni ne walubela niráa wilama mapuyíripi rijói mapu nijé binói nakí. ⁷ Echalí echi riablo waminabi jeaneli: Jipi nijé nimí 'yama ne suwaba je'ná walubélala, a mi jena'í bacháami tamí yuwa, wéemi raweka, chokoba wilisáagámi. Nijé nimí wilama wabé walubela niráa, a mi tamí jeanésagá mapu nijé binói wabé simírami walubela ju, ketasi mapurigá mujé. ⁸ Chopi Jesusi ku nijéwaga jeaneli: Waminá waná simigá mujé Satanasi riwéami riablo, mapujiti echo'ná Riosi Ra'íchala oselíwalachi jerigá osirúami ju: Chopi echi bilepi mujé Riósawala chokoba wiligá walubélaga ané mujé;

ayena cho chopi nijéwaga olá mapurigá echi Walubela mujé Riósawala nakí mápumi olama.

⁹ A'lí echi riablo toli echi Jesusi echo'ná Jerusalémachi anilwachi walúlachi. Echalí binói ne wabé ripabé wilali echi Jesusi echo'ná ripá moba echi walubé Juríosi ri'obáwalachi. A'lí echi riablo jeaneli: A mi ne bichíwali echi bi'nélipi Riosi Ranala níisagá, jena'lí ripabé jonsa echo'ná ri'lé pochí, ¹⁰mapujiti Riosi mi galá tibuma mapujiti echo'ná Riosi Ra'íchala oselíwalachi je'ná jerigá osirúami ju:

Riosi nulema echi jaré kepu kapitánawa mapurigá aboni mi ne galá tibuma.

¹¹ A'lí echi riablo waminabi jeaneli:

Ayena cho jerigá osirúami ju:

Echi jaré Riosi kapitánawala mi mutuma echo'ná aboni sikálachi mapurigá mi ketasi chi'wama mujé ralálachi echo'ná biléana ritérali.

¹² Echalí Jesusi ku nijéwaga jeaneli: Ayena cho je'ná jerigá osirúami ju echo'ná Riosi Ra'íchala oselíwalachi:

Ketasi mi nulé mapurigá echi kemi Riósawa chati olama.

¹³ A'lí mapalí Jesusi tarapé chirigá nijéwali mapurigá echi riablo nuleli, echalí echi riablo miná ariweli pe téeli niráa.

Jesusi chótari nawésiya

(Mt. 4:12-17; Mr. 1:14-15)

¹⁴ Echalí Jesusi ku simili echo'ná Galiléachi anilwachi kawírali. A'lí echi Wabé Galabé Riosi Iwigala suwaba nuleli Jesusi. A'lí si'néami pagótami echo'ná noligá Galiléachi piréami ra'íchaga anili mapurigá Jesusi ne wabé Walubela níili. ¹⁵ A'lí Jesusi binéraga nawésali echo'ná suníami echi jaré Juríosi pagótami ri'obáwalachi. Echalí si'néami aboni walubéraga aneli echi Binoy.

Jesusi ku machí pátami níili echo'ná Nasarétachi jonsa

(Mt. 13:53-58; Mr. 6:1-6)

¹⁶ Echalí rawé Jesusi ku simili echo'ná Nasarétachi mapo'ná Binói ochéralli. A'lí echalí isábawachi rawé Jesusi bakili echo'ná pachá echi jaré Juríosi pagótami ri'obáwalachi, mapujiti Binói sinibí echirigá olali, ne sinibí mapalí isábawachi rawé níili. Echalí Jesusi echo'ná nasipa wilíbali mapujiti Binói we nakili echi Riosi Ra'íchala oselíwalachi 'nénala. ¹⁷ A'lí Binói 'yárami níili echi Riosi Ra'íchala oselíwala, mapo'ná osirúami ju mapurigá echi walula Isaási riwéami rijói osali. Échiko walula Riosi jiti nawésami níili. Echalí Jesusi ku ra'lánaga echi oselí, we yáati riwari mapo'ná je'ná jerigá osirúami ju:

¹⁸ Echi Wabé Galabé Riosi Iwigala tamí yuwa pachana atí.

Binói tamí wilali mapurigani galabé nawésama echi Galabé Riosi Ra'íchala, echi jaré wabé tisúwati pagótami.

Echi Wabé Galabé Riosi Iwigala ayena cho tamí júuli ku kanílatamiya si'néami echi auché jaré mapu ikí wabé o'mónami ju sulachí niráa.

Ayena cho Binói tamí júuli ruyénala echi auché jaré mapu pachá mo'wárami niráa ju, mapu aboni ku machí a'wátami níima, ayena cho tamí júuli mapurigá echi auché jaré ke 'machíliami galá ku 'machílatami níima.

Ayena choni julálami níili mapurigani ku'wírama echi jaré mapu wabé risúu olálami níili.

¹⁹ Ayena choni julálami níili mapurigani ruyema si'néami pagótami mapu jipi rawé ma sébachi ju mapalí Riosi ku wikawama si'néami mapu ikí galá bichíima.

²⁰ Echalí Jesusi ma ku romínaga echí oselí, ku 'yali echí oselí tibúami. A'lí Jesusi ku asíbali. Echalí ne si'néami pagótami echo'ná pachá ri'obachi muchúami ne wabé 'nigá muchili echí Jesusi. ²¹ Echalí Jesusi chótali jeaneya: Jipi rawé ma echirigá sébali ikili mapurigá chabé ki'yá bachá niráa osirúami níili tamí jiti rugá, echo'ná Riosi Ra'íchala oselíwalachi. ¡Echirigá ma sébali ikili mapuyénasí 'yémítamo námali Nijé Binói echirigá ra'íchachi! ²² A'lí ne si'néami aboni a'nagupi ra'íchali jeanigá mapu Jesusi wabé galabé oláami níili. Ayena cho aboni ne wabé ba'yóriga 'nátali mapujiti Binói echirigá ne wabé galabé niráa ra'íchali. Chopi aboni ayena cho a'nagupi jeanigá rukueli: ¿Kecha je'ná ju echí José ranala? ²³ A'lí Jesusi ku nijéwaga jeaneli: 'Yémítamo arigá je'ná jerigá tamí jeanebo: ¡Mujé mápumi ku sa'wá echí auché jaré, galá ku sa'wá a mujé binói niráa! Ayena cho 'yémítamo tamí jeanebo: Tamujé ma námali mapurigami wikabé namuti wabé omériga olali echo'ná Kapernaúmachi anilíwachi walúlachi. Jipi, echirigá achigórígá olá jena'í mujé binói kawíwalachi. ²⁴ A'lí Jesusi waminabi nijéwaga jeaneli: Ne bichíwali Nijé 'yemi nimí jeané: Mapalí Riosi júula nawisánala bilé rijoy, echo'ná binói kawíwalachi, echalí echí auché jaré pagótami ketasi galá nilama echí rijói mapurigá bilé walula Riosi jiti nawésami niráa, mapujiti aboni ma galá machili echí rijói chabé jonsa. ²⁵ Ayena cho Jesusi jeaneli: Nijé 'yemi nimí ne bichíwaga ané mapu nirúali wikabé kunámami echo'ná echí jaré Israeli pagótami yuwa mapalí Riosi júuli echí Elíasi riwéami rijói nawésanala aboni. Echalí rawé níili mapalí ketasi ukuli baikiyá bamíbali miná nasipa yénasí. Echalí echo'ná kawírali piréami pagótami ne wabé 'locheli. ²⁶ Chopi echalí rawé Riosi ketasi júuli echí Elíasi echo'ná echí jaré Israeli pagótami pirélachi, jaré Israeli pagótami muguí kunámami yuwa. Chopi Riosi si'wina júuli echo'ná Sarépachi aníliwachi, mapo'ná mulubé ju Sirónachi, mapo'ná bilé mukí kunámami bitéali, echí mapu ketasi Israeli pagótami níili. ²⁷ Ayena cho ne wikabé echí jaré Israeli pagótami wabé chati cha nayúkami níili echalí chabé ki'yá mapalí Riosi júuli nawésanala echí Eliseo riwéami rijoy. Echalí tarapé wesi aboni ku sa'wárami níili, chopi echí Na'amani riwéami rijói ku sa'wárami níili. A'lí échiko ketasi Israeli pagótami níili, chopi binói echo'ná Síriachi anilíwachi kawírali bitéami níili. ²⁸ A'lí mapalí echí pagótami je'ná jerigá námali, echalí ne si'néami aboni mapu ikí echo'ná aboni ri'obáwalachi muchili, ne si'néami ne wabé na'láwali, echí Jesusi sayéraga, mapujiti si'néami aboni Israeli pagótami níili. ²⁹ A'lí si'néami aboni wabé sapú jásaka waminá machí toli echí Jesusi echo'ná aboni walúlawachi jonsa. A'lí echo'ná walúlachi biléana suwé wabé kowata níili. Echijiti aboni toli echí Jesusi echo'ná biléana waná kowata niráa, mapujiti aboni nakili ri'lena pa mapurigá Binói echirigá mi'lirúami níima. ³⁰ Chopi Jesusi nasipa simíraga echo'ná abónichi, arigá ku simili.

Bile rijói wabé chati riablo aliwala aliwéami níili

(Mr. 1:21-28)

³¹ Echalí Jesusi ku rikínali echo'ná Kapernaúmachi anilíwachi mapo'ná biléana walúlachi níili echo'ná Galiléachi anilíwachi kawírali. A'lí Binói we binérali echo'ná piréami pagótami sinibí isábawachi rawé. ³² A'lí echo'ná piréami pagótami wabé

kilí 'nátaga kipuli Jesusi nawésawala mapujiti Binói ra'íchali mapurigá bilé walula niráa.³³ Echalí rawé echo'ná aboni ri'obáwalachi asali bilé rijói mapu wabé chati riabla aliwala aliwéami níili, echi mapu wabé o'weli ra'íchaga³⁴ jeaneli: ¡Tamuje tamí ariwé, Mujé Jesusi mápumi echo'ná Nasarétachi bitéami ju! ¿Churékulami tamujé tamí kumé? ¿Áchami nawali, tamujé tamí suwábamiya? Nijé nimí galá machí. Riosi mi júuli jena'í wichimóbachi.³⁵ Echalí Jesusi we yónaga jeaneli echi riabla ariwala: ¡Cha nakátaro! ¡Ku machínaga echo'ná pachana echi rijói sulálachi jonsa! Echalí echi wabé chati riabla aliwala wabé iwéami rikábali echi rijoy, a'lí we yáati ku machínali echo'ná binói sulálachi jonsa. A'lí tarapé chibi ikili echi rijoy.³⁶ Echalí si'néami echi jaré pagótami wabé majaga a'nagupi jeanigá rukueli: ¿Churigá bukulíwami ra'íchali ju je'ná, mapurigá je'ná rijói we jiweriga nulé echi jaré wabé chati riabla aliwala? ¡Nibira mapurigá echi jaré riabla aliwala we yáati galá nijéwaga ku 'machina echo'ná pachana echi jaré pagótami sulálachi jonsa!³⁷ A'lí ne suníami echo'ná noligá piréami pagótami a'nagupi wabé ra'íchali echi Jesusi jiti rugá.

Jesusi ku sa'wali echí Pegro wasila

(Mt. 8:14-15; Mr. 1:29-31)

³⁸ Echalí Jesusi wilíska ku machínali echo'ná ri'obachi jonsa. A'lí Binói bakili echo'ná Simoni bitélachi. Echalí rawé echi Simoni wasila ne wabé ínuwami nayú bu'wili. Echijiti aboni we yáati tali mapurigá Jesusi ku sa'wama echi mukí.³⁹ Echalí Jesusi echo'ná mulubé yólagá, wabé yónali echi nayulí. A'lí echi mukí we yáati ma galá ku sa'wárami níili. Echalí echi mukí we yáati ku wiliska ku nigúuraga nóchali.

Jesusi ku sa'wali wikabé nayúkami

(Mt. 8:16-17; Mr. 1:32-34)

⁴⁰ Echalí rawé ma bokowíachi rayénali, echo'ná piréami pagótami echo'ná Jesusi yuwa toli echi auché jaré aboni pagótamawala, si'néami mapu ikí nayúkami níili, mapu chubiyiri nayulí níili. Echalí Jesusi echo'ná ibílana abónichi, Binói sikala jiti moba nochogá, galá ku sa'wali si'néami aboni.⁴¹ Ayena cho wikabé echi jaré riabla aliwala ku 'machínali echo'ná pachana jaré pagótami sulálachi jonsa, mapalí Jesusi echirigá nuleli. Echalí echi jaré riabla aliwala we o'weli ra'íchaga aneli echi Jesusi jeanigá: ¡Mujemi ju echi bilepi Riosi Ranala! Chopi Jesusi wabé yóniga aneli mapu echi jaré riabla aliwala ketasi waminabi echirigá ra'ichama, mapujiti aboni galá machili mapu echi Jesusi níili echi Walubela Cristo anilíwami, echi mapu Riosi ki'yá chokichí jonsa julama riwéali jena'í wichimóbachi.

Jesusi we nawésiya iyena echo'ná Galiléachi

(Mr. 1:35-39)

⁴² A'lí ba'alínala rawé bukulí chi'lásiachi Jesusi ku simili echo'ná jonsa, echo'ná biléana waná kawichí simiyá. Chopi echi auché jaré pagótami wabé ali echi Jesusi. A'lí aboni sili echo'ná waná kawichí mapo'ná Jesusi asali. A'lí aboni ketasi nakili mapurigá Jesusi miná waná simea echo'ná abónichi jonsa.⁴³ Chopi Jesusi ku nijéwaga jeaneli: Arigá 'wéraili ju mapurigá Nijeni ayena cho nawésama echo'ná auché jaréana o'wéalachí piréami pagótami, jeanigá mapu Riosi wabé galá nulé si'néami pagótami. Mapujiti Riosi Binói tamí júuli echirigá nawésanala.⁴⁴ A'lí

Jesusi echirigá nawésali echo'ná suníami echi jaré Juríosi pagótami ri'obáwalachi echo'ná Galiléachi anilíwachi kawírali nirúami.

Ne wikabé rochí chapílati

(Mt. 4:18-22; Mr. 1:16-20)

5 Siné rawé mapalí Jesusi echo'ná walú ba'wírali suwé asali mapo'ná Jenesarétachi anilíwachi níili, mapo'ná ayena cho Galiléachi anilíwachi níili, echalí ne wikabé pagótami napawili Binói yuwa mapujiti aboni wabé nakili echi wabé Galabé Riosi Ra'íchala kipúnala. A'lí echalí rawé echo'ná ba'wírali suwé aboni ne cha'iká jábali, mapuyénasí aboni ne noguí rachínali echi Walubela Jesusi. ²Echalí Jesusi riwali okuá bárko anilíwami echo'ná walú ba'wírali suwé uchúami. A'lí ke wesi asali echo'ná pachá bárkochi mapujiti echi jaré rochí sirúami ma tikinsa, echo'ná suwé 'yénali. A'lí aboni echo'ná ba'wechi suwé pagueka achápali echi jaré o'weli tétami namuti mapuyiri jalé chiní. A'lí echi jaré namuti níili mapu aboni echijiti chapili echi wikabé rochí. ³Echalí Jesusi moba asíbali echo'ná biléana bárkochi, echi mapu echi Simoni níwala níili. A'lí Binói tániga aneli echi Simoni mapu pe minana ba'wechi moba uchama echi bárko echo'ná suwé jonsa. A'lí Jesusi echo'na bárkochi asíbaga chótali nawésiya echi wikabé pagótami echo'ná ba'wechi suwé jáwami.

⁴A'lí mapalí Jesusi ma sunili ra'icha, a'lí Binói jeaneli echi Simoni: Pe waminabi wabé rokóachi moba uchá je'ná bárko. Echo'ná ri'lena ba'wírali botobú echi walú tétami namuti mapuyili bilé walú chiní mapurigami chapimea wikabé rochí. ⁵A'lí echi Simoni ku nijéwaga jeaneli: Binériami, bi'yá rokogó, sinibí rokogó tamujeta wabé nóchali. Chópita tarapé bilé rochí chapili. Arigá a Mujémi echirigá nakiságá, nijeni auchecho siné ri'lena botobuma echi walú tétami namuti mapuyiri bilé walú chiní. ⁶Chopi mapalí aboni echirigá ri'lena ba'wírali botobuli echi walú namuti mapuyiri bilé walú chiní, echalí aboni we yáati rakoka chapili ne wikabé rochí, mapuyénasí echi walú namuti mapuyiri chiní ma chótali chi'wásiya. ⁷A'lí aboni sikati jówaga bayeli echi auché jaré apanero mapu echo'ná auché biléana bárkochi muchili, mapurigá si'néami aboni echo'ná sigá ayena cho nigúurama. Echalí echi auché jaré we yáati echo'ná sili. ⁸A'lí si'néami aboni okonáchana bárkochi buchíwali echi rochí, mapuyénasí okuánika bárko ma ne noguí botowili mapujiti ne wabé simírami buchíami níili. ⁹A'lí mapalí echi Simoni Pegro je'ná jerigá riwali, echalí binói echo'ná bacháami Jesusi yuwa chokóbaga wilíbali. A'lí jeaneli: Kení Walubélawa, Mujémi ne wabé simírami Walubela ju, chopi nijeni wabé chati oláami ju. ¡Echijiti galá níima Mujé waminá waná simigá jena'í tamí yuwa jonsa! ¹⁰A'lí echi Simoni echirigá ra'íchali mapujiti binói ne wabé majali, ma riwisáa mapurigá aboni chapili echiyena ne wabé wikabé rochí. Ayena cho echi auché jaré mapu binói yuwa 'yénali, si'néami ne wabé majali mapujiti chabé chokichí jonsa aboni tarapé siné chapili echiyena wikabé rochí. ¹¹Ayena cho achigórígá majali echi Jakobo, echi Juani, echi mapu echi Sibireo kúchuwala níili. Aboni echi Simoni apanérwala níili. A'lí Jesusi jeaneli echi Simoni: ¡Ketasi majá! Jipi jonsa 'yémitamo ketasi waminabi sirubo echi rochí, chópitamo binébo echi auché jaré pagótami mapurigá aboni galá bichíima Nijé Ra'ichala. ¹²A'lí mapalí aboni ku sili echo'ná walubé ba'wechi suwé, echalí aboni echo'ná ariweli echi jaré bárko mapurigá aboni chopi echi Jesusi yuwa najátaga simama.

Jesusi ku sa'wali bilé rijói wabé chati cha nayúami

(Mt. 8:1-4; Mr. 1:40-45)

¹² A'lí siné rawé Jesusi asali echo'ná biléana walúlachi. Echalí rawé echo'ná nawali bilé rijói mapu wabé chati cha nayúami níili. A'lí mapalí echi rijói riwali echi Jesusi, echalí binói chokoba wilíbali echo'ná bacháami Jesusi yuwa. A'lí echi nayúami ri'lé yólaga, we risúu anigá jeaneli: Walubela, Mujemi galá omérami ju tamí ku sa'wayá, ámi galá nakisáagá. ¹³ A'lí Jesusi, Binói sikala jiti nochogá, jeaneli: Nijeni we galá nakí mi ku sa'wamá. ¡Mami galá ku sa'wárami ju! A'lí mapalí Jesusi echirigá aneli echi rijo, echalí we yáati ma galá ku sa'wárami níili. ¹⁴ Echalí Jesusi nuleli echi rijói ketasi wesi ruyénala mapurigá ikili. A'lí Jesusi jeaneli: Chopi simigá echo'ná walubé Juríosi pagótami ri'obáwalachi, mapurigá bilé sacerdote anilíwami rijói galá riwimea mapurigami ma ku sa'wíami ju. Ayena cho 'yami echi jaré namuti mapurigá Moisesi osogá nulali 'yánala, mapujítimi ma ku sa'wíami ju. Ne suwaba echirigá olami mapurigá echi auché jaré pagótami galá machimea mapurigami ma ku sa'wíami ju. ¹⁵ Chopi ne si'néami pagótami arigá waminabi galá ruyérami níili mapurigá Jesusi echirigá wabé omériga olali. Sinibí rawé ne wikabé pagótami napawili echi Jesusi yuwa, mapujiti aboni we nakili Jesusi nawésawala kipúnala, ayena cho mapujiti aboni nakili mapurigá Jesusi ku sa'wama echi jaré aboni mapu ikí nayúkami níili. ¹⁶ Chopi Jesusi echo'ná biléana waná kawichí simigá, Riosi yuwa ra'íchali.

Jesusi ku sa'wali bilé rijói mapu ketasi omérami níili asísiya

(Mt. 9:1-8; Mr. 2:1-12)

¹⁷ Siné rawé Jesusi binériya asali echo'ná pachá biléana kalírali. Echalí ne wikabé pagótami noligá muchili Jesusi yuwa, mapujiti si'néami aboni we kipúnali Binói ra'íchala. A'lí jaré Bariseo anilíwami rijói ayena cho echo'ná muchili, jaré nulalíwami binériami ayena cho. A'lí aboni ne suníami rijówachi echo'ná Galiléachi anilíwachi kawírali jonsa síami níili, ne suníami rijówachi echo'ná Juréachi anilíwachi kawírali jonsa ayena cho, echo'ná Jerusalémachi jonsa asíchiko. Echalí Jesusi wabé omériga ku sa'wali echi jaré nayúkami mapurigá Riosi omératali Binói olayá. ¹⁸ Echalí rawé naó rijói echo'ná pali auché bilé rijói nayúami, echo'ná biléana kimachí rikagá, mapujiti échiko ketasi omérami níili asísiya. A'lí aboni nakili echo'ná pachá kalírali mo'wináliya, mapo'ná Jesusi binériya asali. ¹⁹ Chopi aboni ketasi omérali mo'wiyá, mapujiti echi jaré wikabé pagótami ne wabé cha'iká muchili echo'ná pachá kalírali. Echijiti aboni ripana irápaga simérali, echo'ná biléana kimachí rikagá. Echirigá aboni wiya jiti bulugá, ku wichí pali echi nayúami, echo'ná pachá kalírali mapo'ná Jesusi asali. Echirigá echi nayúami echo'ná bacháami Jesusi yuwa rikálati. ²⁰ A'lí mapalí Jesusi ne galá machili mapurigá aboni galá bichííli mapu Binói we omérami níili ku sa'wayá echi rijói mapu ketasi omérali asísiya, echalí Jesusi jeaneli echi rijo: ¡Rijoy, mami ku wikawárami ju suwaba mapurigami chati olali! ²¹ Echalí echi jaré nulalíwami binériami, echi auché jaré Bariseo anilíwami binériami yuwa, ne si'néami chótali je'ná jerigá 'nátaga: Je'ná rijói mayé mapurigá Binói galá omero ku wikáwiya mapurigá echi jaré pagótami chati olali. Binói chopi wabé sayéraga ra'ícha Riosi, mapujiti Riosi Binói chopi galá omero echirigá ku wikáwiya echi jaré pagótami chati olalila. ²² Chopi Jesusi ne galá machili mapurigá aboni 'nátali. Echijiti

Binói jeanigá rukueli: ¿Churékulátamo echirigá 'nata? ²³Echalí Jesusi ayena cho jeaneli: Ketasi 'me oméami ju mapurigá Nijeni jeanema je'ná rijoy: ¡Mapurigami chati olali mami galá ku wikawárami ju! Nibilé cho 'me oméami ju mapurigá Nijeni jeanema: ¡Ku wilísaga, ku simigá! ²⁴Echalí Jesusi waminabi jeaneli: Riosi tamí wilali mapurigá Ku'wíriami niráa. Chopi Nijeni nakí mapu 'yémítamo ne galá machiboa mapurigá Nijé Binói galá omérámi ju ku wikáwiya jenaí wichimóbachi piréami pagótami chati olalila. Echijiti Nijeni jeané je'ná rijói mapu ketasi omero asísiya: Nijeni mi jeané: ¡Ku wilísaga, ku chapisá kemi kimá, ku simigá echo'ná kemi bitélachi! ²⁵Echalí si'néami aboni galá riwali mapurigá echi rijói we sapú galá ku wilísali. Alí ku chapisá binói kimala, échiko ma galá ku iyénaga, ku simili echo'ná binói bitélachi; ayena cho echi rijói waminabi walubélaga aneli Riosi. ²⁶Ne si'néami echo'ná muchúami pagótami ne wabé kilí 'nátaga 'nénali mapalí Jesusi ku sa'wali echi rijói mapu ketasi omérámi níili asísiya. Echalí aboni ne wabé walubéragera aneli Riosi. Ayena cho aboni ne wabé majaga a'nagupi jeaneli: Jipi rawé tamujeta ma riwali mapurigá echi Jesusi wabé omériga olá mapurigá ke wesi auché jaré pagótami omero olayá.

Jesusi bayeli echi Libí mapurigá échiko inama Binói yuwa

(Mt. 9:9-13; Mr. 2:13-17)

²⁷Pe wilibeko Jesusi ma ku simili echo'ná jonsa. Echalí Binói riwali bilé rijoy, Libí riwéami, mapu wenomí napabúami níili, echi walula silíami natétalawami. Alí Jesusi jeaneli: ¡Tamí najató! ²⁸Echalí echi Libí ma ariwesa suwaba binói nóchala, we yáati wiliska najátali echi Jesusi yuwa.

²⁹Pée wakinánokuá echi Libí bayeli echi Jesusi mapurigá Binói ko'mea echo'ná binói Libí bitélachi. Echalí auché jaré wikabé pagótami ayena cho echo'ná bayérami níili, echijiti echo'ná Jesusi yuwa ko'yá muchili wikabé echi auché jaré mapu wenomí napabúami níili, echi walula silíami natétalawami, ayena cho auché jaré wikabé pagótami Binói yuwa ko'yá muchili. ³⁰Echalí echi jaré Bariseo anilíwami binériami, echi auché jaré nulalíwami binériami ayena cho, si'néami chótali sayéraga ra'icha echi auché jaré yuwa mapu Jesusi binérali. Aboni jeanigá rukueli echi jaré mapu Jesusi binérali: ¿Churékulátamo echirigá ko'wá, ayena chótamo bají echi uva anilíwami ba'wila, echi auché jaré wenomí napabúami yuwa, ayena cho echi auché jaré chati oláami pagótami yuwa? ³¹Chopi Jesusi Binói ku nijéwaga jeaneli: Echi jaré mapu ketasi nayükami ju, aboni tarapé newalé bilé óyami; chopi echi jaré nayükami ne wabé newalé bilé óyami. ³²Nijé ketasi nawali mapurigani bayema echi jaré mapu aboni mayé we galabé oláami ju. Nijeni chopi nawali mapurigani bayema echi jaré chati oláami pagótami, mapurigá aboni ku ro'wima Riosi yuwa, ayena cho mapurigá aboni ku wikáwali tánama.

Jesusi wi'nijírami níili mapujiti echi jaré mapu Binói binérali sinibí we ko'wali

(Mt. 9:14-17; Mr. 2:18-22)

³³Echalí aboni, Jesusi yuwa ra'ichaga, jeaneli: Echi jaré mapu echi Juani binérali wi'libé niráa ketasi ko'wá mapalí aboni chopi Riosi yuwa ra'icha muchuwi. Ayena cho echi jaré mapu tamujé Bariseo anilíwami binérali echirigá achigórígá olá. Chopi echi jaré mapu Mujé binérali sinibí wabé ko'wá, ayena cho aboni sinibí bají echi

uva anilíwami ba'wila.³⁴ Echalí Jesusi ku nijéwaga jeaneli: Ne si'néami pagótami arigá we kaníliga ko'wá, mapalí aboni bilé rijói bukulí niwíami yuwa muchuwi.³⁵ Chopi pée minánomí mapalí echi bukulí niwíami rijói ketasi aboni yuwa asimea, echalí aboni ne bichíwali, wi'llibé niráa ketasi ko'mea, mapalí aboni chopi Riosi yuwa ra'ichaga muchima. Echirigá achigórigá echi jaré mapu Nijé binérali pée minánomí ketasi ko'mea wi'llibé niráa mapurigá aboni chopi Riosi yuwa ra'ichama mapalí Nijeni ketasi aboni yuwa asimea.

³⁶ Echalí Jesusi ayena cho je'ná jerigá irétaga nawésali: Tarapé wesi pée táchí'wanama bilé bukulíwami napacha, auché bilé echi ma luwíami napacha pachókamiya. A echirigá olásagá echi bukulíwami napacha ma chi'wanárami níima, ayena cho echi pachókala ketasi a'nawí níima echi luwíami napacha yuwa. Nijeni bukulíwami niráa binera echi ne bichíwali, echijiti arigá 'wéralli ju máputamo bichíbilo mapurigá Nijeni binera, ketasi mapurigátamo waminabi nijéwaga olabo mapurigá echi auché jaré binériali chabénala niráa 'yemi mi binérali.³⁷ Ayena cho ke wesi ro'wama echi bukulíwami uva ba'wila echo'ná pachana echi jaré sití, ma ocháarami wichí chiwáwalachi. A echirigá olásagá, ayena cho a galá bulésagá echi wichí chiwáwalachi, echalí echi bukulíwami uva ba'wila, ma galá ronínsa, wabé cha'isa, waminá chi'wanama echi jaré ocháarami wichí chiwáwalachi. Echalí echi ba'wila suwaba miná ku'líma. Ayena cho echi wichí chiwálala suwaba miná nosowima.³⁸ Echijiti galá níima ro'wasa echi ne bukulíwami uva ba'wila echo'ná jaréana bukulíwami wichí chiwáwalachi. A'lí a echirigá olásagá, echi ba'wila galá nutétami níima, ayena cho echi jaré wichí chiwálala ketasi miná chi'wama. Echirigá achigórigá ma ketasi waminabi arigá 'wéralli ju mapurigá echi jaré mapu galá bichíiko mapurigá Nijeni binera arigá olama mapurigá echi auché jaré binériali chabénala niráa binélali.³⁹ Ayena cho ma galá bajisa echi bamíbami ba'wila, ke wesi we yáati jubáami nakimea bajínala echi bukulíwami ba'wila; mapujiti si'néami jeaní: Echi bamíbami ba'wila ne wabé simírami galabé ju.

Echi jaré mapu Jesusi binérali mosika kumili echi turío echalí siné isábawachi rawé

(Mt. 12:1-8; Mr. 2:23-28)

6 Allí auché siné isábawachi rawé Jesusi simírali echo'ná mapo'ná echi turío ma galá wáami níili. A'lí echi jaré mapu Jesusi binérali ayena cho simárali. Echalí aboni echi turío mulalá ripúnaga, we mosika kumísya simárali echi turío rakala.² Chopi jaré rijói Bariseo anilíwami binériali jeanigá rukueli aboni: ¿Churékulátamo echirigá olá mapurigá ketasi risénsia ju oluwáwa jipi rawé, mapujiti isábawachi rawé ju?³ A'lí Jesusi ku nijéwaga jeanigá rukueli: ¿Kechátamo siné 'néniga riwali mapurigá osirúami ju echo'ná Riosi Ra'íchala oselíwalachi mapurigá echi Rabiri riwéami rijói olali siné rawé mapalí binói we 'locheli, echi auché jaré mapu binói yuwa 'yénali ayena cho?⁴ Echalí rawé echi Rabiri bakigá echo'ná pachá Riosi ri'obáwalachi, a'lí chapigá ko'wali echi jaré pani mapu Riosi 'yárami níili; echalí binói ayena cho 'yali echi auché jaré rijói mapu binói yuwa 'yénali. A'lí tarapé wesi risénsia níili aboni echi jaré pani ko'mea; chopi echi jaré sacerdote risénsia níili.⁵ Echalí Jesusi ayena cho jeaneli: Riosi tamí wilali mapurigá Ku'wíriami niráa, ayena cho Nijeni ne Walubela ju echalí isábawachi rawé.

Bilé rijói biléana sikachí ke akánami galá ku sa'wárami níili

(Mt. 12:9-14; Mr. 3:1-6)

⁶Ayena cho auché siné isábawachi rawé Jesusi echo'ná pachá echi jaré Juríosi pagótami ri'obáwalachi bakigá, we binérali echi pagótami. Echalí echo'ná pachá ri'obachi asali bilé rijói biléana sikachí watoná ke akánami. ⁷Echalí echi jaré nulalíwami binériali we 'nigá muchili, mapujiti aboni chopi we 'nátaga buwelí acha ku sa'wama Jesusi echi rijói mapu ke akánami níili biléana sikachí. Echalí rawé isábawachi rawé níili, echijiti aboni chopi we wi'nijíinali echi Jesusi, mapujiti aboni mayeli mapu ketasi risénsia níili mapurigá Jesusi ku sa'wama echi jaré nayúkami echalí mapalí siné rawé isábawachi níili. ⁸Chopi Jesusi galá machili mapurigá aboni echirigá 'nata muchili. A'lí Binói jeaneli echi rijói ke akánami biléana sikachí: ¡Ku wirísaga, echo'ná nasipa wilibá! A'lí echi rijói ku wilísaga, echo'ná wilíbali. ⁹Echalí Jesusi jeaneli echi auché jaré pagótami: Sinibí risensia ju máputa we galá olabo mapalí siné isábawachi rawé ju. Ketasi risensia ju máputa wabé chati olabo. Echijiti ayena risensia ju máputa ku sa'wabo echi jaré nayúkami jipi isábawachi rawé, achigórigá mapurigá ketasi risensia ju máputa waminá mi'liboa echi jaré pagótami. ¹⁰Echalí Jesusi galá 'nénali echo'ná noligá Binói yuwa muchúami pagótami. A'lí Binói jeaneli echi rijói ke akánami biléana sikachí: ¡Ku wachiná kemi siká! Echalí binói we yáati wachínali binói sikala. A'lí binói sikala ke sayiná ma galá ku sa'wárami níili. ¹¹Echalí echi jaré nulalíwami binériali ne wabé na'áwali. A'lí aboni chótali a'nagupi ra'íchaga katewa mapu churigá aboni galá omérama echi Jesusi sayériya.

Jesusi chapili makói miná okuá rijói mapurigá Binói julama aboni nawisánala

(Mt. 10:1-4; Mr. 3:13-19)

¹²Echalí rawé Jesusi simili echo'ná biléana ripá rabó, mapurigá Binói echo'ná waná niráa ra'ichama Riosi yuwa. A'lí echalí rokogó Jesusi Riosi yuwa ra'icha chi'lébali. ¹³A'lí ba'alínala rawé bi'yá chi'ráachi Jesusi ku bayeli echi jaré mapu Binói binérali. Echalí Jesusi chapili makói miná okuá aboni mapurigá Binói juláma aboni nawisánala. A'lí Jesusi aneli aboni: Riosi jiti julárami niráa. ¹⁴A'lí je'ná níili echi makói miná okuá: Echi Simoni, echi mapu Jesusi ayena cho Pegro riwarali; echi Antresi ayena cho, echi mapu echi Pegro ríjimara níili; echi Jakobo; echi Juani ayena cho; echi Jilipi; echi Batalomé ayena cho; ¹⁵echi Mateo; echi Tomasi ayena cho; echi auché bilé Jakobo ayena cho, echi mapu echi Alibeo riwéami rijói ranala níili; echi auché bilé Simoni, echi mapu ayena cho Selote anérati; ¹⁶echi Júrasi, echi mapu Jakobo ríjimara níili ayena cho; echi Júrasi Jiskarioti ayena cho, echi mapu pée wakinánokuá bayérali echi jaré sontarsi mapalí aboni bologá chapili echi Walubelá Jesusi.

Echi Walubela Jesusi binérali wikabé pagótami

(Mt. 4:23-25)

¹⁷A'lí Jesusi ku rikínali echo'ná ripá rabó jonsa, ne si'néami aboni yuwa. Echalí Jesusi nawali echo'ná biléana ipó, echi jaré mapu Binói binérali yuwa. A'lí auché jaré wikabé pagótami ayena cho echo'ná napawili. A'lí aboni echo'ná Juréachi anilíwachi kawírali jonsa síami níili, echo'ná Jerusalémachi jonsa ayena cho, echo'ná

tu walú ba'wírali suwé jonsa ayena cho, mapo'ná Tírochi anilwachi ju, Sirónachi anilwachi ayena cho. A'lí si'néami je'ná jaré echo'ná napawili mapurigá aboni galá kipuma Jesusi nawésawala, ayena cho mapurigá Binói ku sa'wama si'néami mapu ikí nayükami níili. ¹⁸ A'lí auché jaré pagótami mapu wabé chati isena riablo aliwala aliwéami níili ayena cho galá ku sa'wárami níili. ¹⁹ A'lí si'néami echí jaré pagótami wabé nakili echí Jesusi nochánala, mapujiti Jesusi wabé omériga ku sa'wali si'néami mapu ikí nocháliko echí Binoy.

Jaré wabé kaníliami ju, chopí auché jaré wabe risúu nílama

(Mt. 5:1-12)

²⁰ Echalí Jesusi galá 'néniga echí jaré mapu Binói binérali, a'lí jeaneli: 'Yemi wabé tisúwati arígá wabé kaníliami ju, mapujiti Riosi 'yemi mi ne gala nulé. ²¹ 'Yemi máputamo jipi ne wabé 'loché, arígá wabé kaníliami ju, mapujiti pe minánomí 'yémitamo arígá ne wabé posáami níibo. A'lí 'yemi máputamo jipi ne wabé nalákako, arígá ne wabé kaníliami ju mapujiti pe minánomí 'yémitamo ne wabé kachiboa.

²² Ayena cho 'yémitamo ne wabé kaníliami níibo mapalí echí auché jaré pagótami 'yemi mi kichima, ayena cho mapalí aboni 'yemi mi waminá machí a'wama echo'ná aboni ri'obáwalachi jonsa. Ayena chótamo kaníliami níibo mapalí aboni 'yemi mi wabé kichiga ra'íchama, ayena cho mapalí aboni 'yemi mi ne wabé kichima mapujítitamo tamí bichiyami ju. ²³ Echalí rawé ne wabé simírami kanílasi 'yemi, mapujiti Riosi 'yemi mi echijiti ne wabé simírami 'yama mapalítamo sebasa echo'ná ripá riwigachi. Chabé ki'yá echí jaré aboni pagótamawala, achigórigá risúu olali echí jaré mapu Riosi jiti nawésali echalí ki'yá rawé.

²⁴ Chopí 'yemi máputamo wikabé namuti niwa, arigátamo ne wabé o'mónami ju, mapujítitamo ma wabé kaníli jena'í whichimbachi, chópitamo ketasi waminabi 'yárami níibo echo'ná ripá riwigachi. ²⁵ A'lí 'yemi máputamo jipi ne galá posáami ju, 'yémitamo pe minánomí ne wabé o'mónami níibo, mapujítitamo ne wabé 'lochébo. Ayena cho 'yemi máputamo jipi ne wabé kaníriga achí, 'yémitamo pe minánomí ne wabé o'mónami níibo, mapujítitamo ne wabé risúu anigá nalákabo. ²⁶ A'lí mapalí ne si'néami echí auché jaré pagótami aniko mapu 'yémitamo ne wabé galabé oláami ju, echalí galá níima 'yemi ne wabé o'monasa, mapujiti echí jaré ki'yá piréami aboni pagótamawala ayena cho we galabé oláami aneli jaré rijói mapu ne wabé 'yékami nawésami níili.

Galá galesi echí auché jaré mapu ikí 'yemi mi kichí

(Mt. 5:38-48; 7:12)

²⁷ A'lí 'yemi máputamo tamí námiko, nijé 'yemi nimí jeané: Galá galesi echí auché jaré mapu ikí 'yemi mi sayera. Wabé galá olasi echí auché jaré mapu ikí 'yemi mi kichí. ²⁸ Ne galabé ra'íchasi echí auché jaré mapu ikí 'yemi mi we chati ra'íchaga ané; ayena cho tansi Riosi mapurigá Binói ku'wírama echí auché jaré, si'néami mapu ikí 'yemi mi wabé risúu olako. ²⁹ A'lí a bilé rijói mi cho'nísáagá echo'ná biléana mujé banalachi, ketasi yona; chopí ayena cho ariwé mapurigá binói mi cho'nimea echo'ná auché biléana mujé banalachi. A'lí a bilé rijói mi 'yésagá kemi kimá, ayena cho ariwé mapurigá binói tomea kemi napacha. ³⁰ Galá kowa mapuyíripi mi tániko. A'lí a bilé rijói mi 'yésagá jaré mujé níwala namuti, ariwé mapurigá binói arígá tomea. Ketasi auchécho ku tani echí jaré mujé níwala namuti. ³¹ Sinibí galabé olasi

echi auché jaré pagótami yuwa, achigórigá mapurigá 'yémítamo wabé nakí mapu aboni sinibí wabé galabé olama 'yemi aboni yuwa.

³² 'Yémítamo ketasi wabé simírami galabé olá, átamo chopi wabé kalésagá echí auché jaré pagótami mapu ikí ayena cho 'yemi mi wabé galé, mapujiti echí jaré chati oláami pagótami ayena cho wabé galé echí auché jaré mapu ikí wabé galé aboni. ³³ Nirapétamo wabé simírami galabé olá, átamo chopi galabé olásagá echí auché jaré pagótami, si'néami mapu ikí ayena cho 'yemi mi galabé olá. Mapujiti echí jaré chati oláami pagótami ayena cho galabé olá echí auché jaré, si'néami mapu ikí galabé olá aboni yuwa. ³⁴ Nirapétamo wabé simírami galabé olá, átamo chopi tanéwasagá echí auché jaré pagótami, si'néami mapu ikí 'yémítamo mayé galá ku kuwana natétama. Mapujiti echí auché jaré chati oláami pagótami ayena cho we tanewi echí auché jaré chati oláami pagótami, si'néami mapu ikí aboni mayé galá ku kuwana natétama. ³⁵ Echijiti galá galesi 'yemi ne si'néami echí auché jaré pagótami mapu ikí 'yemi mi sayera. Ne galabé olasi echí auché jaré pagótami, ayena cho galá tanéwasí echí auché jaré newaléami. A'lí ketasi buwesi mapurigá aboni 'yemi mi ku kuwana natétama. Átamo echirigá olásagá, Riosi Binói 'yemi mi galá ku natétama, ayena cho 'yémítamo ne bichíwali echí Ripá Riwigachi bitéami Riosi kúchuwala níbo, mapujiti Riosi ayena cho wabé galabé olá echí jaré mapu ketasi ku natétara 'ya; ayena cho Binói galabé olá echí auché jaré chati oláami pagótami. ³⁶ Ne galabé natimáami nísi 'yemi, achigórigá mapurigá 'yemi Onolá ne galabé natimáami ju.

Ketasi wi'nijisi auché jaré pagótami

(Mt. 7:1-5)

³⁷ Ketasi wi'nijisi auché jaré pagótami. A'lí Riosi ketasi 'yemi mi wi'nijima. Ketasi anesi mapu auché jaré pagótami wabé sití ju. A'lí Riosi ketasi anema mapu 'yemi mi wabé sití ju. Galá ku wikawasi echí auché jaré pagótami mapu ikí 'yemi mi chati olá, a'lí Riosi ayena cho 'yemi mi ku wikawama. ³⁸ Galá 'yasi echí auché jaré we tisúwati suwaba mapu ikí aboni newalé. A'lí Riosi ayena cho 'yemi mi 'yama suwaba mapu ikí 'yemi aboni newalé. Echalí Riosi 'yemi mi ne wabé simírami niráa 'yama, átamo ayena cho galá 'yásagá echí auché jaré pagótami. Chopi átamo pée okuabi 'yásagá echí auché jaré pagótami, echalí Riosi ayena cho pée okuabi niráa 'yemi mi 'yama.

³⁹ A'lí Jesusi irétaga jeaneli: Bilé rijói ke machíliami ketasi omero bayériya auché bilé rijói ke machíliami. A echirigá olásagá, siné káachi okuánika rujuima echo'ná biléana jochi. ⁴⁰ Echi bilé mapu binératami níli ketasi bachá walula ju echí binériami yuwa mapu ma galá binérali binoy. Chopi mapalí échi ma sébali galá binératami níima, binói ayena cho ma galá machíliami níima achigórigá mapurigá echí binériami mapu ma galá binérali binoy.

⁴¹ Mujemi we galá omero 'nénuya bilé táa namuti busuékowami mapu echo'ná echí auché bilé ritémtami busílachi chukú. Chópitamo ketasi nakí 'nénala echí walú namuti kusí mapu echo'ná mujé binói busílachi bu'wí. Echirigá ayena cho 'yémítamo we wi'nijí auché jaré pagótami mapurigá chati oláami niráa, chópitamo ketásirapé ku ruyé mapu 'yemi aboni waminabi wabé simírami chati oláami ju. ⁴² A'lí bichemi we nakí jeanénala echí auché bilé mujé rijimala: Kení rijimá, tamí risénsia 'ya mapurigá nijeni mi machí pásama echí táa namuti busuékowami mapu echo'ná

mujé busílachi chukú. Chópi mujemi tarapé chirigá omero 'nénia mapurigá bilé walú namuti, mapurigá bilé kusí, arigá bu'wí echo'ná mujé binói busílachi. ¡Mujé chopi wabé 'yékami niráa ju! Ne bachá niráa ku machí pa echí kusí, echo'ná mujé binói busílachi jonsa. Echalimi galá omérama 'nénia mapurigami galá ku machí pama echí táa namuti busuékowami mapu echo'ná mujé rijimala busílachi chukú.

**Mapalí echí jaré masana ma raké, echalí ibili masana galá machirúami níima,
acha galabé ju**

(Mt. 7:17-20; 12:34-35)

⁴³Echi jaré galabé masana chopi raké echí galabé masana rakala, ayena cho echí jaré sití masana chopi raké echí sití masana rakala. ⁴⁴Ibili rakéami namuti galá machirúami níima acha galá ju, mapalí echí rakéami namuti ma galá raké. Echijiti echí jaré chuná ketasi chirigá ripunárami níima echo'ná biléana so'uwalírali; nibilé cho ripunárami níima echí jaré uva anilíwami namuti echo'ná biléana i'lwichalachi. ⁴⁵Echirigá achigórigá ibili rijói galá machirúami níima, acha galabé oláami ju, mapalí echí auché jaré pagótami ma galá machí churigá ologá bité echí rijoy. Bilé wabé galabé rijói arigá wabé galabé olá, mapujiti binói galabé suléami ju; ayena cho auché bilé chati oláami rijói arigá we chati olá mapujiti binói we chati suléami ju. A'lí si'néami pagótami chopi ra'íchaga aní echí jaré namuti, suwaba mapu ikí nirú echo'ná pachana aboni sulálachi niráa; echijiti jaré pagótami ra'icha echí jaré galabé namuti, chopi auché jaré pagótami we ra'icha echí jaré wabé sití namuti.

Arigá 'wérali ju galabé niráa ri'lé bachá tigótami níisa ibili kalí

(Mt. 7:24-27)

⁴⁶Echalí Jesusi waminabi jeanigá rukueli: ¿Churékulátamo wisabé tamí jeané: ¡Walubela! Maparítamo ketasi nijéwaga olá mapurigá Nijé 'yemi nimí ané? ⁴⁷Ayena cho Jesusi jeaneli: Echi jaré pagótami mapu tamí yuwa siko, si'néami mapu ikí galá kipuko Nijé Ra'íchala, ayena cho si'néami mapu ikí galá nijéwaga olako mapurigá Nijeni nulá, ⁴⁸aboni mapuyiri bilé rijói ju mapu we galabé niráa kalirali. Echi rijói wabé ri'lé joka, bachá tigoli echo'ná rapichí. A'lí mapalí echo'ná kalírali walú bu'wíbali ba'wí, echalí echí kalí ketasi najuili mapujiti ne wabé galabé tigótami níili echo'ná rapichí jonsa. ⁴⁹Chopi echí auché jaré pagótami mapu tamí kipuko, echí jaré mapu ketasi nijéwaga olako mapurigá Nijeni nulá, abóniko mapuyiri bilé rijói ju, echí mapu echo'ná wi'yérali moba kalirali, echí mapu ketasi bachá tigoli echo'ná ri'lé rapichí. A'lí echalí mapalí echo'ná walú bu'wíbali ba'wí, echí rijói níwala kalí káraga najuili.

Echi Walubela Jesusi ku sa'wali echí walula sontarsi piónawala

(Mt. 8:5-13)

7 Mapalí Jesusi ma sunili echí pagótami nawésiya, a'lí Binói ku simili echo'ná Kapernaúmachi anilíwachi. ²A'lí echo'ná Kapernaúmachi bitéali bilé walula sontarsi, echí mapu Romano anilíwami pagótami níili. A'lí echí walula sontarsi ne wabé galeli bilé rijói mapu binói piónawala níili. Echalí rawé echí binói piónawala ne wabé nayú bu'wili, echí mapu ma ne mulubé mukumea riwéali. ³A'lí mapalí echí walula sontarsi námali ehi Jesusi jiti ra'ichálawachi, echalí échiko júuli jaré o'wéala ochérami Juríosi echí Jesusi bayénala, mapurigá Jesusi ku sa'wama echí

binói piónawala. ⁴Echalí echi jaré mapu jurárami níili we yáati simíbali echo'ná mapo'ná Jesusi asali. A'lí aboni, Jesusi yuwa mulubéanaga, wabé tániga jeaneli mapu galá níima Jesusi ku'wírasa echi walula sontarsi. ⁵Ayena cho aboni jeaneli: Galá níima mápumi ku'wírama echi walula sontarsi, mapujiti binói ne wabé galé tamujé Juríosi pagótami, ayena cho binói nulali niwánala tamujé ri'obáwala. ⁶Echalí Jesusi ku simili aboni yuwa. A'lí mapalí aboni ma ne mulubé sírali echo'ná echi walula sontarsi bitélachi, echalí echi walula sontarsi jeanigá júuli jaré binói amígowala: ¡Walubela, ketasi nóchali olá! Ketasi arigá 'wérari ju mapu Mujemi bakimea jena'í nijé kalílachi, mapujiti Mujé ne wabé simírami galabé oláami ju, ketasi mapurigá nijé. ⁷Ayena cho echijiti nijé binói ketásini simili mi bayémiya. Jipi, chopi ra'íchaga niráa galá nulá mapurigá echi nijé piónawala ma ku sa'wárami níima. A'lí échiko ne bichíwali ku sa'wímea. ⁸Mapujiti echi jaré nijé o'wéalawala ayena cho tamí we jiwríga nulé. Ayena cho nijeni jiwríga nulé echi auché jaré pée kuchípala sontarsi. Ayena cho mapalini bilé je'ná jerigá ané: ¡Echo'ná auché biléana simigá! Echalí échiko ne bichíwali echo'ná simea. Ayena cho mapalini bilé je'ná jerigá ané: ¡Wakiná simí! Echalí échiko ne bichíwali wakiná simí. Ayena choni echi keni piónawa jerigá anésuwa: ¡Je'ná jerigá olá! Echalí échiko ne bichíwali echirigá olá. Nijeni bichíi mapu Mujé ayena cho wabé omérami ju echirigá nulayá mapurigá ma ku sa'wárami níima echi nijé piónawala mapalimi arigá mikabé niráa atí. ⁹A'lí mapalí Jesusi námali je'ná jerigá aníachi, echalí Binói ne wabé galabé nirali echi rijoy. A'lí Binói aneli echi jaré pagótami Binói yuwa síami, jeanigá: Ne bichíwali Nijé 'yemi nimí jeané: Je'ná rijói mapu si'nú pagótami ju, ne wabé galabé niráa tamí bichíi. Ke wésini riwali 'yemi Israeli pagótami mapu je'ná jerigá ne galabé bichíyami ju. ¹⁰Echijiti Jesusi ketasi simili echo'ná echi walula sontarsi bitélachi. Binói chopi nulali mapurigá echo'ná bitichí bu'wíami pioni ma galá ku sa'wárami níima. A'lí mapalí echi jaré mapu jurárami níili Jesusi bayénala ma ku sili echo'ná echi walula sontarsi bitérachi, echalí aboni riwali mapurigá echi pioni ma galá ku sa'wíami níili.

Jesusi ku owíntali bilé ri'malí mapu ma mukúami níili

¹¹A'lí pe wakinana Jesusi inárali echo'ná biléana walúlachi mapo'ná Naínachi anilíwachi níili. Echalí wikabé mapu Jesusi binérali ayena cho así simíbali Jesusi yuwa, wikabé auché jaré pagótami ayena cho. ¹²A'lí mapalí Jesusi ma ne mulubé inárali echo'ná walúlachi, echalí Binói riwali jaré pagótami mapu bilé mukúami chu'wiróbiya sírali. Échiko bilé ri'malí níili, echi mapu bilepi níili bilé mukí ranala, echi mapu ma kunámami níili. A'lí wikabé auché jaré pagótami ayena cho sírali echi mukí yuwa, echi binói ranala chu'wiróbiya. ¹³A'lí mapalí echi Walubela Jesusi riwali echi mukí, echalí Binói ne wabé galá natimaga jeaneli: ¡Ketasi waminabi nalá! ¹⁴A'lí Jesusi mulubé nawagá nocháli echi kajoni. A'lí echi jaré tóami echo'ná jábali. Echalí Jesusi ra'íchaga jeaneli echi ri'malí mapu ma mukúami níili: ¡Rí'marí! ¡Ku wilísaga! ¹⁵Echalí echi ri'malí mapu mukúami níili, ma ku asiska, ku ra'íchali. A'lí Jesusi echi iyela ku 'yali. ¹⁶A'lí si'néami echo'ná 'yénami ne wabé majali. Ayena cho aboni waminabi walubéлага aneli Riosi, jeanigá mapu bilé walubela Riosi jiti nawésami ma nawali jena'í tamujé yuwa. A'lí aboni ayena cho anili mapu Riosi ma nawagá jena'í wichimóbachi, ma wabé natimali Binói pagótamawala. ¹⁷Echalí ne suníami echo'ná Juréachi anilíwachi kawírali piréami ne galá ikíali mapu Jesusi

je'ná jerigá wabé omériga olali. A'lí ne suníami echo'ná noligá piréami ayena cho echirigá ikíali.

Echi Juani júuli rukuénala echí Jesusi

(Mt. 11:2-19)

¹⁸ A'lí echí jaré mapu echí Juani binérali, aboni galá ruyeli echí Juani ne suwaba je'ná jeyili. Echalí echí Juani bayegá okuá aboni, ¹⁹jeanigá júuli rukuénala echí Jesusi: ¿Áchami ne bichíwali ju echí mapu Riosi wilama riwéali mapurigá Walubela Nigúurami niráa, echí Cristo anilíwami? ¿Acha buwebo mapurigá auché bilé nawama, kéraramá? ²⁰A'lí mapalí echí jaré mapu jurárami níili, ma sili mapo'ná Jesusi asali, echalí aboni jeaneli: Echi Juani mapu pagóami ju, ma tamujé tamí júuli mi yuwa jerigá rukuénala: ¿Áchami ne bichíwali ju echí mapu Riosi wilama riwéali mapurigá Walubela Nigúurami niráa, echí Cristo anilíwami? ¿Ácha buwebo mapurigá auché bilé nawama kérémá? ²¹Chopi echalí rawé mapalí aboni echo'ná sili, echalí Jesusi sinepi niráa ku sa'wali ne wikabé nayúkami mapu wikabé nayulí jiti nayúkami níili. Echalí Binói ayena cho ku sa'wali echí auché jaré nayúkami mapu we chatí nachútaga nayútali auché jaré; ayena cho Binói ku machí a'wali echí jaré chatí riablo aliwala echo'ná jaré pagótami sulálachi jonsa; ayena cho Binói galá ku 'machíliami niwali wikabé auché jaré mapu ke 'machíliami níili. ²²Echalí Jesusi ku nijéwaga jeaneli echí jaré mapu Juani rukuénala júuli: Ma ku simíbaga, ku ruyébasi echí Juani suwaba mapurigátamo riwali jipi rawé, ayena cho suwaba mapurigátamo námali. Galá ku ruyébasi mapurigá echí jaré ke 'machíliami ma galá ku 'machíliami niwálati, ayena cho mapurigá echí jaré ke akánami ma galá ku 'yena, ayena cho mapurigá echí auché jaré wabé chatí cha nayúkami galá ku sa'wárami níili, ayena cho mapurigá echí jaré ke námiamu galá ku námiamu niwálati, ayena cho mapurigá echí jaré suwíami ku o'wíntarami níili, ayena cho mapurigá echí Galabé Riosi Ra'íchala ma galá nawésarami ju echí jaré we tisúwati. ²³Ayena cho Jesusi jeaneli: Ne wabé kaníliami ju ne si'néami echí jaré mapu sinibí galá tamí bichíi.

²⁴ A'lí ma ku simíbali echí jaré mapu echí Juani júuli rukuénala echí Jesusi. Echalí Jesusi chótali ra'ícha echí auché jaré pagótami, echí Juani jiti rugá. A'lí Jesusi jeaneli: 'Yémitamo ne bichíwali echo'ná biléana waná kawichí simíbali mapurigátamo 'nebo echí Juani. Chopi 'yémitamo ketasi echo'ná simíbali mapurigátamo 'nebo bilé rijói mapu ketasi sinibí gala bichíyami níili. Echiyili rijói mapuyiri bilé namuti wilíami ju mapu echí iká jiti nokérami ju, chopi echí Juani ne galá jiwériga bichíyami níili. ²⁵'Yémitamo ketasi echo'ná simíbali mapurigátamo riwiboa bilé rijói wabé galá simati napáchami. 'Yémitamo galá machí mapu echiyiri napáchami rijói chopi muchúwi echo'ná echí jaré o'wéala nuláami walubé kalílachi, mapo'ná ayena cho piré echí jaré mapu chopi wabé nakí kaníliga piréranala sinibí rawé. ²⁶Chopi 'yémitamo ne bichíwali echo'ná simíbali bilé walula Riosi jiti nawésami 'nébiya. Jipi Nijé 'yemi nimí ne bichíwaga ané mapu echí Juani ne wabé simírami walula ju, ketasi mapurigá echí auché jaré o'wéala Riosi jiti nawésami niráa. ²⁷Ne bachá niráa je'ná jerigá osirúami níili echo'ná Riosi Ra'íchala oselíwalachi, echí Juani jiti rugá, mapurigá Riosi jeaneli kepu Raná:

Waminá bacháami mapo'ná Mujemi simírama,
echo'ná Nijeni a'lláranaga julama bilé nawésami.
Échiko bachá nawésama echí jaré pagótami,

jeanigá mapu aboni mi galá narema,
echalí mapalí Mujemi echo'ná nawama.

²⁸Ayenacho Jesusi jeaneli echí jaré pagótami: Nijé 'yemi nimí ané mapu ke wesi auché bilé Riosi jiti nawésami waminabi wabé walubela níli, ketasi mapurigá echí Juani mapu pagóami ju. Chopi echí mapu wabé tabéala ju echí jaré yuwa mapu Riosi galá nulé, échiko arigá bachá walula ju echí Juani yuwa.

²⁹Echalí ne si'néami echí jaré pagótami mapu ikí echí Juani chabénala galá pagoli echo'ná ba'wírali, abóniko ma galá námali Jesusi nawésawala. Ayena cho echí jaré mapu wenomí napabúami níli, echí walula silíami natétanala, si'néami galá námali Jesusi nawésawala. A'lí ne si'néami aboni galá bichíli Riosi. ³⁰Chopi echí jaré Bariseo anilíwami binériami, echí auché jaré nulalíwami binériami ayena cho, si'néami mapu ikí ketasi nakili mapurigá aboni echirigá ba'wí jiti pagótami níima echí Juani jiti, abóniko echirigá wabé kichili mapurigá Riosi we nakili olánala aboni yuwa.

³¹Echalí echí Walubela Jesusi jeaneli: Nijeni 'yemi mi irétaga binérage ruyema je'ná jipi piréami pagótami jiti. ³²Aboni chopi mapuyiri jaré kúrowi ju, mapu echo'ná ri'narátachi ri'yékaka, a'nagupi o'weli ra'íchaga jeaní: Tamujé 'yemi mi tákali echí kusela, chópitamo ketasi awili; ayena cho tamujé 'yemi mi wabé o'móniga nawajili, chópitamo arigá ketasi nalákali. ³³Echalí echí Walubela Jesusi ayena cho jeaneli: Nijé 'yemi nimí echirigá aneli mapujiti chabénala mapalí echí Juani nawali mapu pagóami ju, échiko ketasi ko'wali echí pani nibilé bajili echí uva anilíwami ba'wila. Chopi 'yémítamo arigá jeaní: ¡Echi Juani we riablo aliwala aliwéami ju! ³⁴A'lí Riosi arigá tamí wilali mapurigá Ku'wíriami niráa; chopi mapalí Nijeni nawali 'yemi yuwa, 'yémítamo anili mapu Nijeni we ko'wéami ju, ayena cho mapu Nijeni we bajíami ju echí uva ba'wila. Ayena chótamo anili mapu Nijeni chopi apanero ju echí jaré wenomí napabúami yuwa, ayena cho echí auché jaré yuwa mapu 'yémítamo chati oláami ané. ³⁵Chopi si'néami pagótami galá machíami ju mapu ikí galá bichíli Riosi, ayena cho abóni galá machila auché jaré mapu Riosi ne galá bichíwaga olá.

Jesusi bayérami níli mapu ko'mea

³⁶A'lí bilé rijói Bariseo anilíwami binériami bayeli Jesusi mapurigá ko'mea binói yuwa. Echijiti Jesusi simili echo'ná echí rijói bitélachi. Chopi echalí ki'yá rawé echí pagótami sinibí wabé bitigá niráa ko'wali echo'ná mésachi. ³⁷Echalí rawé mapalí Jesusi echirigá bitigá niráa ko'wali echo'ná kalírali, echalí bilé mukí echo'ná walúlachi bitéami galá machili mapu Jesusi echo'ná ko'yá asali. Echijiti echí mukí echo'ná toga nawali bilé limeta, rité niwárami, echí mapu aceite ne wabé su'weti júkami ro'wárami níli, chopi echí mukí chabénala wabé chati oláami níli. ³⁸Echijiti echí mukí ne wabé o'móniga nalali mapujiti binói ma ketasi nakili waminabi echirigá chati olánala. Echalí echí mukí echirigá ne wabé nalaka, ne wabé simírami ukuénali. A'lí binói ukuénawala we pachuli echo'ná Jesusi ronólachi. A'lí echí mukí ku bi'wali Jesusi ronólachi binói kupala jiti. A'lí echí mukí ne wabé kaníli, echijiti binói chumilá jiti we chu'mili echí Jesusi ronólachi. Ayena cho binói ucheli echí wabé su'weti júkami aceite echo'ná Jesusi ronólachi. ³⁹Echalí echo'ná 'nigá asali echí rijói Bariseo mapu bayeli Jesusi mapurigá ko'mea binói yuwa; chopi mapalí echí rijói galá riwali suwaba je'ná jeyiri, echalí échiko je'ná jerigá

'náitali: Echi mukí ne wabé chati oláami mukí ju. A je'ná Jesusi ne bichíwali Riosi jiti nawésami níisagá, echalí binói ne bichíwali machimé mapu je'ná mukí wabé chati oláami ju; ayena cho machimé mapu ketasi risensia ju mapu echi yiri mukí nochama binói ronólachi. ⁴⁰Chopi Jesusi ku nijéwaga jeaneli; Simoni, bilé namuti nimí anema. Echalí échiko ku nijéwaga jeaneli: Binériami, tamí ané. ⁴¹A'lí Jesusi jeaneli: Okuá rijói wikabé wenomí wikeli mapu echi auché bilé rijói tanéwaga 'yali. A'lí echi bilé je'ná rijói wikeli malí mili peso. A'lí echi auché biléala chopi wikeli malí kiento peso. ⁴²A'lí okuánika tarapé biyiri níwali, echijiti aboni tarapé omérali ku natétiya echi auché bilé rijói tanéwiami. Echijiti echi rijói tanéwiami arigá su'lánaga, okuánika waminá wikáwali suwaba mapu ikí aboni wikali. Echalí Jesusi ayena cho ra'ichaga echi Simoni yuwa, jeaneli: Jipi tamí ku nijéwaga ané mapurigá mujemi mayé: ¿Chuyiri 'nalina je'ná okuá rijói waminabi ne wabé simírami karema echi auché bilé rijói mapu echirigá waminá wikáwaga ariweli suwaba mapu ikí okuánika wikali? ⁴³A'lí echi Simoni ku nijéwaga jeaneli: Nijeni mayé mapu echi rijói mapu waminabi wikabé ku wikawárami níili, ayena cho waminabi wabé simírami galema echi rijói mapu ku wikáwali ne suwaba. Echalí Jesusi jeaneli: Ne bichíwali mi anili. ⁴⁴A'lí Jesusi auchécho galá 'néniga echi mukí, echalí Binói jeaneli echi Simoni: Mujemi galá riwali mapurigá je'ná mukí olali. Chopi mapalí Nijé Binói bakili jena'í pachá mujé kalílachi, echalí mujemi ketasi tamí pabákali ba'wí jiti echo'ná Nijé ralálachi mapurigá tamujé Juríosi pagótami sinibí olá. Chopi je'ná mukí wabé nalaka, ne wabé ukuénali. A'lí binói ukuénawala pachuli echo'ná Nijé ralálachi. Echalí binói ku bi'wali Nijé ralálachi binói kupala jiti. ⁴⁵A'lí mujemi ketasi tamí kaníliga narépali, chopi je'ná mukí chótali wabé kaligá chu'miyá Nijé ralálachi mapalí jonsa Nijeni bachá nawali jena'ibi, mapujiti binói wabé tamí galé. ⁴⁶A'lí mujemi ketasi tamí ucheli echi aceite echo'ná Nijé mo'ólachi. Chopi je'ná mukí tamí ralálachi ucheli echi wabé su'weti júkami aceite jiti. ⁴⁷A'lí Jesusi waminabi jeaneli: Echijiti Nijé nimí ané mapu ma ku wikawárami ju suwaba mapurigá je'ná mukí wabé chati olali, mapujiti je'ná mukí wabé tamí galeli; chopi echi jaré mapu péebi jiti ku wikawárami ju, abóniko péebi niráa tamí galé. ⁴⁸Echalí Jesusi jeaneli echi mukí: Mapurigami chati olali mami galá ku wikawárami ju. ⁴⁹A'lí mapalí echi auché jaré echo'ná ko'yá muchúami je'ná jerigá námari, a'llí aboni je'ná jerigá 'náitali: ¿Churékula echirigá aní je'ná rijói mapu binói galá oméro ku wikáwiya mapurigá auché jaré pagótami chati olali? ⁵⁰Echalí Jesusi jeaneli echi mukí: Mujemi ma galá ku wikawárami ju, mapujítimi galá tamí bichíili. Kaníliga ku simigá echo'ná mujé bitélachi.

Jaré muguí we ku'wírari echi Jesusi

8 A'lí pée wakinánokuá Jesusi nawisásiya simili echo'ná wikanáami o'wéalachí, wikanáami rijówachi ayena cho. A'lí Binói nawisásiya simili jeanigá mapu Riosi ne galá nuléami ju si'néami pagótami yuwa. A'lí echi jaré makói miná okuá mapu Jesusi júuli nawisánala ayena cho así simíbali. ²A'lí jaré muguí ayena cho así simíbali. A'lí aboni níili echi jaré mapu Jesusi chabénala ku sa'wali. Jaré aboni we nayükami níili, chopi Jesusi ma ku sa'wali aboni. Auché jaré aboni wabé chati riablo aliwala ariwéami níili, chopi Jesusi ma ku machí a'wali echi jaré isena riablo aliwala echo'ná aboni sulálachi jonsa. A'lí echi María echo'ná Makatárachi bitéami bilé níili mapu así simili. A'lí echi María níili mapu chabénala echi Jesusi

ku machí a'wáli kichao wabé chati riablo aliwala echo'ná pachana binói sulálachi jonsa.³ Ayena cho echí Juana así simili. Échiko echí Chusa riwéami rijói upila níli, echí rijói mapu walula nigúurami níli echí walula silfámi Erorsi riwéami yuwa. A'lí echí Susana riwéami mukí ayena cho así simili, auché jaré wikabé muguí ayena cho así simíbali, echí jaré mapu aboni níwala namuti galá agá, echirigá ku'wírali echí Jesusi.

Echi turío icháami

(Mt. 13:1-23; Mr. 4:1-20)

⁴A'lí ne wikabé pagótami napawili echí Jesusi 'nchébiya. A'lí aboni echo'ná suníami rijówachi jonsa síami níli. A'lí Jesusi irétaga binérali echí wikabé pagótami jeanigá mapu Riosi Ra'íchala mapuyiri echí jaré turío rakala ju. Echalí Jesusi jeaneli:

⁵Siné rawé bilé rijói ichayá iyénali echí turío. Echalí jaré turío rakala rujuili echo'ná biléana buwichí, mapo'ná echí jaré pagótami we rikeka simárali. A'lí echí jaré chuluguí káraga suwali echo'ná rujuíami turío rakala. ⁶A'lí auché jaré turío rakala rujuili echo'ná biléana rapirúachi mapo'ná ketasi 'me wi'yéali. A'lí ma a'wisáa, suwaba káraga wakicheli mapujiti echo'ná ketasi 'me sa'mili. ⁷A'lí auché jaré turío rakala echo'ná we kasaléachi rujuili, chopi echí kasalá o'weri ochérasa, waminá napolíbanali echí turío. ⁸Chopi auché jaré turío rakala rujuili echo'ná we galabé wi'yérali mapo'ná ma ochérasa wabé galá rakeli. Jaré echí turío rakala bilé kiento niráa rakeli, chopi auché jaré ketasi 'me wiká rakeli. A'lí Jesusi ma je'ná jerigá anesa, echalí Binói ayena cho o'weli ra'íchaga jeaneli: ¡'Yemi máputamo nakeko ne galá namsi mapurigá Nijeni aní!

⁹Pée wilibeko echí jaré mapu Jesusi binérali we rukueli mapu churigá aniwáami níli mapurigá Binói echirigá irétaga binérali echí pagótami. ¹⁰Echalí Jesusi ku nijéwaga jeaneli: Riosi ma 'yemi mi 'yali mapurigá 'yémítamo galá machiboa mapurigá Binói galá nulé echí jaré pagótami, chopi echí auché jaré pagótami ketasi cho galá machí mapurigá Riosi nulé aboni. Echijiti Nijeni irétaga nawesa echí auché jaré pagótami mapurigá aboni galá kipuma Nijé nawésawala, chopi aboni arigá ketasi cho galá machimea echí ne bichíwali, ayena cho mapurigá aboni galá kipuma Nijé nawésawala chopi aboni arigá ketasi cho galá machimea chu aniwáami ju mapurigá Nijeni irétaga binera aboni.

¹¹Chopi mapurigá Nijeni irétaga binérali, je'ná jerigá aniwáami ju: Echi turío rakala mapuyiri Riosi Ra'íchala ju. ¹²A'lí mapurigá ikili echí jaré turío rakala mapu echo'ná biléana buwichí rujuili, echirigá achigórigá ikimea echí jaré pagótami mapu bachá niráa galá namsa echí Riosi Ra'íchala, arigá ketasi we yáati bichíima, mapujiti echí riablo we yáati miná 'yema echí Galabé Riosi Ra'íchala mapu aboni ma námali, achigórigá mapurigá echí jaré chuluguí suwaba suwali echí jaré turío rakala mapu echo'ná buwichí rujuili. A'lí echí riablo chopi echirigá olá mapurigá echí jaré pagótami ketasi galá bichíima Riosi Ra'íchala, ayena cho mapurigá aboni ketasi galá ku wikáwarami níima. ¹³A'lí mapurigá ikili echí jaré turío rakala mapu echo'ná biléana rapirúachi rujuili, echirigá achigórigá ikimea echí jaré pagótami, si'néami mapu ikí bachá niráa galá kaníliga namsa Riosi Ra'íchala, arigá ketasi galá ne sulachí niráa bichíima. Abóniko achigórigá ju mapurigá echí jaré turío mapu ketasi galá nawéami ju. Abóniko pée téeli niráa bichíima, chopi mapalí aboni risúu olálami níima mapujiti aboni echirigá bichíinali Riosi Ra'íchala, echalí

aboni ma ketasi waminabi napawima echí auché jaré bichíyami yuwa, a'lí aboni ma ketasi waminabi galá bichíima. ¹⁴ A'lí mapurigá ikili echí jaré turío rakala mapu echo'ná wabé kasaréachi rujuili, echirigá achigórigá ikimea echí auché jaré pagótami, si'néami mapu ikí galá namsa Riosi Ra'íchala, arigá ketasi galá bichíima. A'lí aboni chopí waminabi ologá pirélama achigórigá mapurigá aboni chabénala ologá piréali. Abóniko ketasi bukulí nakulíwarami níima, mapujiti aboni chopí wikabé namúti wabé nílaga 'nata. Ayena cho aboni chopí wabé koruma echí wikabé namuti jena'í wichimóbachi nirúami. Ayena cho aboni chopí wabé chuwé ologá pirélanala, echijiti aboni ketasi galá bichíinali Riosi Ra'íchala, ayena cho aboni ketasi galá ku'wíratami níima. ¹⁵ A'lí mapurigá ikili echí jaré turío rakala mapu echo'ná galabé wi'yérali ichirúami níili, echirigá achigórigá ikimea echí auché jaré pagótami, si'néami mapu ikí galá namsa Riosi Ra'íchala ne galá sulachí niráa bichíima. Aboni ne galá nijéwaga olama mapurigá Riosi nulé aboni, ayena cho aboni waminabi galá bichíiga, wabé galabé ologá pirélama jena'í wichimóbachi. Echirigá aboni achigórigá ju mapurigá echí jaré turío rakala mapu we galabé rakeli.

Arigá 'wérali ju mapu Riosi Ra'íchala galá nawisárami níima

(Mt. 4:21-25)

¹⁶ Jesúsi ayena cho jeanigá irétaga binérali echí jaré pagótami: Tarapé wesi pólaga rikama bilé chopé rajáami echo'ná ri'lé pachá biléana sikolichi, nibilé cho echo'ná ri'lé pachá biléana jubechi, keremá. Chopí si'néami pagótami ripabé, ne galá machiná niráa rikama echí chopé rajáami, mapurigá echirigá ne galá machírama si'néami mapu ikí mo'wiko echo'ná pachá kalírali. Echirigá achigórigá arigá 'wérali ju mapu Riosi Ra'íchala ne galá nawisárami níima, mapurigá si'néami pagótami ne galá machimea. ¹⁷ A'lí pée waminánomí suwaba namuti ne galá machirúami níima, mapujiti ne suwaba galá machiná niráa riwíratami níima; ayena cho echí jaré namuti mapu ke wesi galá machí jipi rawé, suwaba ne galá riwíratami níima. ¹⁸ Echijiti ne galá námiga bichíisi Nijé Ra'íchala, mapujiti átamo ne galá bichíisagá Nijé Ra'íchala, Nijé 'yemi nimí waminabi galabé binérama. Chopí átamo ketasi galá bichíisagá mapurigá Nijé 'yemi nimí binera, echalí 'yémítamo arigá 'yérami níibo suwaba mapurigá Nijé ma 'yemi nimí binérali.

Echi Jesúsi iyela, echí jaré Jesúsi ritémawala ayena cho, echo'ná sili Jesúsi yuwa

(Mt. 12:46-50; Mr. 3:31-35)

¹⁹ A'lí echí Jesúsi iyela, ayena cho echí jaré Jesúsi ritémawala echo'ná sili Jesúsi yuwa. Chopí aboni tarapé chirigá omérerali mulubé siyá echo'ná Jesúsi yuwa, mapujiti ne wikabé pagótami ne cha'iká noligá muchili Binói yuwa. ²⁰ Chopí bilé rijói jeanigá ruyeli echí Jesúsi: Kemi iyé echo'ná machfámi atí, echí jaré kemi ritémawa ayena cho. Aboni we nakí mi 'nénala. ²¹ Chopí Jesúsi ku nijéwaga jeaneli: Echi jaré mapu galá námiko Riosi Ra'íchala, si'néami mapu ikí galá bichíiga olako mapurigá Riosi ané, abóniko mapurigá Nijé iyela ju, ayena cho abóniko mapurigá nijé ritémawala ju.

Jesúsi ku wilábali echí wabé iwéami iká

(Mt. 8:23-27; Mr. 4:35-41)

²² Siné rawé Jesúsi moka asíbali echo'ná biléana bárkochi, echí auché jaré mapu Binói binérali yuwa. Echalí Jesúsi jeaneli: Echo'ná walú ba'wechi bo'ónala simabo.

A'lí aboni echirigá echo'ná bárkochi muchiga ku simíbali.²³ A'lí mapuyénasí aboni echo'ná nasipa walú ba'wechi 'yénali, echi Jesusi we kochigá bu'wili echo'ná pachá bárkochi. Chopi echo'ná walú ba'wechi ke sayiná ne wabé iwéami ikali, echijiti echo'ná pachá bárkochi ne noguí buchili ba'wí. Echalí echi jaré mapu Jesusi binérali ne wabé majali mapujiti aboni ne noguí suwimea riwéali.²⁴ A'lí aboni we yáati ku busurébanali echi Jesusi. Echalí aboni jeaneli: ¡Binériami, suwibóaréta! Echalí Jesusi ku asiska, ku wilábali echi wabé iwéami iká, echi walú ba'wí ayena cho. A'lí we yáati echi walú ba'wí galá ku kilí siwega wilíbali.²⁵ Echalí Jesusi jeaneli echi jaré mapu Binói binérali: ¿Churékulátamo echirigá majali? ¿Kéchatamo bichíili mapurigá Nijé 'yemi nimí ku'wírama riwéali? Chopi aboni wabé majaga 'nátaga muchili. A'lí aboni chopi a'nagupi rukueli jeanigá: ¿Kecha je'ná Jesusi echi bilepi Riosi Ranala ju? ¡Nibira mapurigá echi wabé iwéami iká wabé yáati ku wilíbali mapalí Binói nuleli ku wilábanala! ¡Nibira mapurigá echi walú ba'wí ayena cho we yáati ku siwega wilíbali!

**Echi bilé rijói echo'ná Garárachi bitéami mapu wabé chati riablo aliwala
ariwéami níili**

(Mt. 8:28-34; Mr. 5:1-20)

²⁶ Pe wilibeko aboni echirigá sébali echo'ná bo'ónala walú ba'wírali mapo'ná Garárachi anilíwachi kawírali ju, echo'ná mapo'ná Galléachi anilíwachi kawírali jonsa waminá bo'ónala ju. ²⁷ A'lí mapalí Jesusi nawali echo'ná suwé, echalí we yáati echo'ná natipámiya nawali bilé rijói echo'ná bitéami, echi mapu wi'llibé bamíbali jonsa wabé chati riablo aliwala aliwéami níili. Échiko we machí sapeka iyénali, ayena cho binói ketasi siné bitéali echo'ná biléana kalírali, chopi binói sinibí bitéali echo'ná jaréana risochí ch'u'wétachi. ²⁸ Chopi mapalí echi rijói riwali echi Jesusi, echalí echo'ná bacháami Jesusi yuwa nawagá, binói we yáati chokoba wilíbali. A'lí o'weli ra'íchaga jeanigá rukueli: ¿Piri mi olama tamí yuwa, Mujé Jesusi, mápumi echi Ripabé Riwigachi Atíami Riosi Ranala ju? ¡Wabé nimí tani mapurigami ketasi tamí risúu olama!²⁹ Chopi echi rijói echirigá anili mapujiti Jesusi ma bachá nuleli echi wabé chati si'nú riablo aliwala ku machínala echo'ná pachana echi rijói sulálachi jonsa. Chabé jonsa echi si'nú riablo aliwala echirigá ne wabé omériga nuleli echi ríjoy, echijiti échiko sinibí wabé chati olali. A'lí echo'ná piréami pagótami we nakili bologá tibú echi ríjoy; ayena cho binói wisabé bulílati binói sikálachi echi jiero wiya jiti, echo'ná binói ronólachi ayena cho. Chopi echi rijói sinibí we ripúnali echi jiero wiya, ayena cho echi riablo aliwala wisabé nuleli echi rijói másanala echo'ná jaréana waná kawírali.³⁰ Echalí Jesusi jeanigá rukueli: ¿Chu mi riwé? A'lí echi rijói jeaneli: Wikabé sontarsi ni riwé. A'lí echi rijói echirigá ku nijéwali mapujiti wikabé isena riablo aliwala muchili echo'ná pachana binói sulálachi. Ali echi wikabé isena riablo aliwala nuleli echirigá ra'íchánala.³¹ Echalí echi jaré isena riablo aliwala we ra'íchaga tánali mapurigá Jesusi ketasi julama aboni echo'ná ri'lé riáblochi, mapurigá aboni ketasi kastigo 'yárami níima.

³² Echalí rawé echo'ná kawichí wikabé kochi ko'yá uchúltali. Echijiti echi wikabé isena riablo aliwala we risúu anigá tali mapurigá echi Jesusi risensia 'yama mapurigá aboni echo'ná pachana echi wikabé kóchichi mo'wimea. A'lí Jesusi risénsia 'yali.³³ Echalí echi wikabé isena riablo aliwala we yáati ku 'machínali echo'ná pachana echi rijói sulálachi jonsa. A'lí aboni we yáati mo'wili echo'ná pachana echi wikabé

kóchichi. Echalí echi jaré wikabé kochi ke sayiná miná júmsali. A'lí ne suwaba echo'ná ripá biléana kowata jonsa ri'lé rujuili echo'ná walú ba'wírali. A'lí ne suwaba si'rili echo'ná ba'wírali.

³⁴A'lí mapalí echi jaré kochi mélami galá riwali echirigá ikíachi, echalí aboni we yáati wabé majaga ku ruyébiya simíbali. A'lí aboni ruyeli echo'ná walúlachi piréami suwaba mapurigá ikili, ayena cho aboni echirigá ruyeli suníami echo'ná mulubé rijówachi piréami. ³⁵Echalí ne si'néami echo'ná piréami pagótami we 'nébiya simíbali mapurigá ikili. A'lí mapalí aboni sili echo'ná mapo'ná Jesusi asali, echalí aboni riwali echi rijói mapu echo'ná pachana binói sulálachi jonsa 'machínali echi wikabé riablo aliwala. Chopi échiko ma galá ku napáchaga, ne galá ku 'nátaga asali echo'ná Jesusi yuwa. Echalí echi jaré pagótami, echirigá riwisá, ne wabé majali. ³⁶Chopi echi jaré pagótami mapu galá riwali echirigá ikíachi, aboni ku ruyeli echi auché jaré pagótami ne suwaba mapurigá echi wikabé isena riablo aliwala ku a'wátami níili echo'ná pachana echi rijói sulálachi jonsa mapu chabénala wikabé chati riablo aliwala aliwéami níili. ³⁷Chopi mapalí echo'ná Garárachi anilíwachi piréami pagótami galá machili mapurigá ikili, echalí si'néami aboni wabé tánali mapurigá Jesusi we yáati ku simea echo'ná aboni kawíwalachi jonsa, mapujiti aboni ne wabé majali. A'lí Jesusi echo'ná bárkochi asíbaga, echirigá ku simili echo'ná jonsa. ³⁸Chopi mapalí Jesusi ke cho ku simili, echalí echi rijói mapu echo'ná pachana binói sulálachi jonsa ma ku 'machínali echi wikabé wabé chati riablo aliwala, échiko ne wabé tánali mapurigá Jesusi risensia 'yama mapurigá binói ayena cho así simea Jesusi yuwa; chopi Jesusi ketasi risensia 'yali. Echalí Jesusi ku ripórali echi rijói jeanigá: ³⁹¡Ku simigá echo'ná kemi bitélachi! Ne suwaba galá ku ruyemi mapurigá Riosi mi ku'wírali. Echalí echi rijói ku simili echo'ná binói bitélachi. A'lí binói galá nawésaga ruyeli si'néami echo'ná noligá piréami mapurigá Jesusi echirigá wabé omériga ku'wírali binoy.

Jesusi ku owíntali echi Jáiro marala mapalí ma mukúami níili

(Mt. 9:18-26; Mr. 5:21-43)

⁴⁰Chopi mapalí Jesusi auchecho ku nawali echo'ná bo'ónala mapo'ná jonsa Binói simili echalí bilyá, a'llí echo'ná piréami pagótami ne wabé kaníriga nareli echi Jesusi, mapujiti si'néami aboni chopi wabé buweli mapurigá Binói echirigá ku nawama echo'ná aboni yuwa. ⁴¹Echalí bilé rijói Jáiro riwéami echo'ná Jesusi yuwa nawali. A'lí echi Jairo ne walula nuláami níili echo'ná echi jaré Juríosí pagótami ri'obáwalachi. Échiko echo'ná nawagá we yáati, wéemi raweka, chokóbaga wilíbali echo'ná bacháami Jesusi yuwa. Echalí binói wabé risúu anigá tánali mapurigá Jesusi we yáati simea echo'ná binói Jairo bitélachi, ⁴²mapujiti binói marala ne wabé nayú bu'wili, ayena cho echi tiwé ma ne mukumea riwéali. A'lí echi Jairo pe bilepi maléali, echi mapu makói miná okuá bamíbami níili; chopi mapalí Jesusi ku simili echi Jairo yuwa, ne wabé wikabé pagótami así simíbali. A'lí echo'ná buwichí echi wikabé pagótami ne wabé cha'igá 'yénali Jesusi yuwa.

⁴³Echalí echo'ná echi jaré wikabé pagótami yuwa ayena cho simili bilé mukí mapu makói miná okuá bamíbali jonsa ne wabé léniga nayúami níili. A'lí echi mukí ma suwaba suwábali binói níwala namuti, echi jaré óyami natétiya, mapu ikí ówali binoy. Chopi ketasi wesi omérali ku sa'wayá echi mukí. ⁴⁴Echalí rawé echi mukí jubáami niráa mulubéanaga Jesusi yuwa, we nochali Binói napáchala

suwilá. A'lí echí mukí ke sayiná ma ku sa'wárami níili, mapujiti binói ma ketasi waminabi lénali. ⁴⁵ A'lí Jesusi we yáati jeanigá rukueli: ¿Chigá tamí nochali? Chopi mapalí ne si'néami aneli mapu ketasi wesi nochali, echalí echí Pegro, echí auché jaré binói apanérawala yuwa, si'néami jeaneli: Binériami, echí wikabé pagótami mi noligá we cha'íraga rachina. ¿Churékulami jeanigá rukue: ¿Chigá tamí nochali? ¡Ne wikabé pagótami ma mi nochárilé! ⁴⁶ Chopi Jesusi jeaneli: Ne bichíwali bilé tamí nochali. Nijeni galá machili mapurigani ne wabé omériga ku sa'wali echí bilé. ⁴⁷ Echalí echí mukí galá machili mapu Jesusi ma galá machilo mapurigá binói mukí olali. Echijiti échiko ne sayilúmaga, wéemi raweka, chokóbaga wilíbali echo'ná bacháami Jesusi yuwa. A'lí ne suwaba ku ruyeli echí Jesusi mapu piri jiti binói nochali Jesusi napáchala suwilá, ayena cho mapu churigá binói we yáati galá ku sa'wárami níili, ayena cho ne si'néami echí auché jaré pagótami echirigá galá námali. ⁴⁸ A'lí Jesusi jeaneli: Mukí, mami ku sa'wárami ju mapujítimi galá tamí bichíli. Ne galá kanílaga ku simigá.

⁴⁹ A'lí Jesusi abijí echirigá ra'íchachi, echalí nawali bilé rijói echo'ná echí Jairo bitélachi jonsa simíami. Échiko jeaneli echí Jairo: Mujé malala ma mukuli. Ketasi waminabi kumé echí Walubela. ⁵⁰ Chopi mapalí Jesusi námali echirigá anéachi, echalí Binói jeaneli echí Jairo: ¡Ketasi majá! Chopi galá tamí bichíli. A'lí mujé malala arigá ku bitélama. ⁵¹ A'lí mapalí Jesusi nawali echo'ná Jairo bitélachi, echalí Binói chopi risénsia 'yali mapu Binói yuwa pachá mo'wimea echí Pegro, echí Jakobo ayena cho, echí Juani ayena cho, echí tiwé 'wénawala asíchiko. ⁵² Echalí ne si'néami echo'ná muchúami pagótami ne wabé o'móniga, o'weli nalákali mapujiti echí tiwé ma mukuli. A'lí Jesusi galá machili mapurigá Binói ku owíntama riwéali echí tiwé mapu ma mukúami níili. Echijiti Binói jeaneli echí jaré pagótami: Ketasi echirigá nalákasi. Je'ná tiwé, tamí jiti, ketasi mapurigá mukúami niráa ju, chopi mapurigá kochíami niráa ju. ⁵³ Chopi aboni we achili mapalí Jesusi echirigá aneli, mapujiti aboni galá machili mapurigá echí tiwé ma mukúami níilo. ⁵⁴ Echalí Jesusi, echí tiwé sikálachi chapigá, o'weli ra'íchaga jeaneli: ¡Tiwé, ku asísaka! ⁵⁵ A'lí ke sayiná echí tiwé auchecho siné ma ku bitéali. A'lí binói we yáati ku wilísalí. Echalí Jesusi nuleli aboni ku kóonala echí tiwé. ⁵⁶ Echalí echí tiwé 'wénawala ne wabé cha nílaga, ne wabé kaníli; chopi Jesusi nuleli aboni ketasi wesi ruyénala mapurigá Binói olali.

Jesusi júuli nawisánala echí jaré makói mina okuá mapu Binói binérali

(Mt. 10:5-15; Mr. 6:7-13)

9 A'lí Jesusi napabuli echí jaré makói miná okuá mapu Binói binérali. A'lí Binói iwératali aboni mapurigá aboni galá oméra ma miná machí a'waya echí jaré isena riablo aliwala echo'ná jaré pagótami sulálachi jonsa. A'lí Jesusi ayena cho we galá iwératali aboni mapurigá aboni galá oméra ma miná machí a'waya echí jaré nayúkami. ² Echalí Jesusi júuli aboni nawisánala mapurigá aboni jeanimea mapu Riosi wabé galá nulé si'néami echí jaré jena'í wichimóbachi piréami pagótami mapu ikí galá bichiyami ju; ayena cho Jesusi júuli aboni ku sa'wánala echí jaré nayúkami. ³ A'lí Jesusi jeaneli aboni: Tarapebi yiri namuti tosí echo'ná buwichí. Nirapé bilé kusí tisola tosí, ni bilé maleta, ni ko'wáami tosí, ni wenomí ketasi cho tosí. A'lí ibili 'yemi chopi bilepi napacha tosí. ⁴ A'lí mapuyíripi kalírali mapo'nátamo mo'wí chi'lebánala, echo'ná bilénapi kalírali ripisi mapuyénasítamo ma ku simabo echo'ná rijówachi jonsa. ⁵ Ayena cho Jesusi jeaneli: A jaré pagótami ketasi 'yemi mi narésagá, a'lí

maparítamo ku simabo echo'ná aboni rijówalachi jonsa, echalí ne galá asáwaga bi'wasi echi napisó, echo'ná 'yémi ralálachi chukúbami. Echirigátamo ku ruyebo echo'ná piréami pagótami mapurigá aboni ketasi galabé olali, mapalí aboni ketasi kipúnali 'yemi nawésawala. ⁶A'lí aboni nawisásiya simíbali echo'ná ne suníami rijówachi. A'lí aboni nawésali echi wabé Galabé Riosi Ra'ichala. Ayena cho aboni ku sa'wali echi jaré nayúkami.

Echi walula silíami Erorsi riwéami we nakili echi Jesusi 'nénala

(Mt. 14:1-12; Mr. 6:14-29)

⁷A'lí echi walula silíami Erorsi riwéami suwaba galá machili mapurigá Jesusi olali. Echalí echi Erorsi wabé 'náitali mapu churigá Jesusi galá oméráli echirigá olayá, mapujiti auché jaré pagótami aneli mapu echi Juani mapu pagóami níili, ma ku owínaliré. Ayena cho aboni aneli mapu echi Jesusi níili echi Juani mapu ma ku owínaliré. ⁸Ayena cho auché jaré pagótami jeanili: Echi Jesusi ju echi ki'yá bitéami Elíasi mapu ma ku nawáliré jena'í wichimóbachi. Auché jaré jeanili: Bilé chabé ki'yá bitéami Riosi jiti nawésami ju, mapu ma ku owínaliré. ⁹Chopi echi Erorsi jeanili: Nijé binói ma nulali kutachí ripunánala echi Juani. Échiko ma mi'lirúami níili. ¿Chigá biché níima je'ná rijoy? Nijeni ma námali mapurigá Binói wikabé namutti wabé omériga olali. A'lí echi walula Erorsi wabé nakili echi Jesusi 'nénala.

Jesusi kówali echi jaré malí mili rijói

(Mt. 14:13-21; Mr. 6:30-44; Jn. 6:1-14)

¹⁰A'lí ma ku sili echi jaré julárami mapu Jesusi chabénala júuli nawisánala. Echalí aboni galá ku ruyeli echi Jesusi suwaba mapu ik'í aboni olali mapalí aboni nawésiya 'yénali. A'lí Jesusi bayéráli aboni echo'ná biléana waná kawichí mapo'ná mulipi ju biléana walúlachi mapo'ná Becháirachi anilíwachi ju. ¹¹Chopi mapalí echi wikabé pagótami galá machili mapo'ná Jesusi siméa olali, echalí aboni ayena cho echo'ná así simíbali. A'lí Jesusi auchécho galá nareli echi wikabé pagótami, ayena cho Binói galá nawésali aboni, jeanigá mapu Riosi ne galá nulé si'néami pagótami mapu ik'í galá bichíyami ju. Echalí Binói ayena cho ku sa'wali echi jaré nayúkami.

¹²Echalí rawé ma alíwachi, echi jaré makói miná okuá mapu Jesusi binéráli, ne si'néami echo'ná Binói yuwa sili. Echalí aboni jeaneli: Ma ku julá echi wikabé pagótami mapurigá aboni echo'ná mulubé rijówachi simíbaga riwimea mapo'ná chi'libama, ayena cho mapurigá aboni echo'ná ralimea ko'wáami, mapujiti jena'í waná kawichí tarapé te ko'wáami. ¹³Chopi Jesusi jeaneli: 'Yemi aboni 'yasi mapurigá aboni galá ko'mea. Echalí echi jaré makói miná okuá jeaneli: Tamujeta chopi pe malipi pani niwa, okuá rochí ayena cho. Echijiti tamujeta ketasi omérabo kóoya je'ná wikabé pagótami, ayena ketasi auchecho siné ku simásagá, auché jaré wikabé ko'wáami raliboya. ¹⁴A'lí echi wikabé pagótami mapuyena malí mili rijói níili. Chopi Jesusi ayena cho jeaneli echi jaré makói miná okuá: Echo'ná rojuaga muchínalasi echi wikabé pagótami, malisa makói iyénasí niráa. ¹⁵A'lí aboni echirigá olali. Ayena cho echi wikabé pagótami echirigá rojuaga muchíbali. ¹⁶Echalí Jesusi chapili echi malí kúuchi pani, echi okuá rochí ayena cho. A'lí Binói 'néniga echo'ná ripá riwigachi, natétara 'yali Riosi. Echalí Jesusi galá rojuániga 'yali echi jaré mapu Binói binéráli, mapurigá aboni nachútama echi jaré wikabé pagótami. A'lí mapalí Jesusi echirigá olali, echalí echi jaré pani wikabé muwéali. ¹⁷A'lí si'néami echi

jaré wikabé pagótami galá ko'wali, ayena cho aboni ne galá posali. A'lí ma sunisa ko'yá, aboni ku napabuli suwaba echi jaré kúuchi chi'wáami ko'wáami mapu ikí tibili. A'lí aboni echirigá galá buchíwali makói miná okuá walírali.

**Echi Pegro galá nawesa mapu Riosi ma wilali echi Jesusi mapurigá Walubela
Ku'wíriami niráa, echi Cristo anilíwami**

(Mt. 16:13-20; Mr. 8:27-29)

¹⁸ Siné rawé Jesusi waminá waná simili mapurigá Binói bi'neli niráa ra'ichama Riosi yuwa. Echalí chopi Binói yuwa muchili echi jaré makói miná okuá mapu Binói binérali. Echalí Jesusi jeanigá rukueli aboni: ¿Churigá aní echi auché jaré pagótami? ¿Chigá tamí mayé mapu Nijé ju? ¹⁹ Echalí aboni ku nijéwaga janeli: Jaré pagótami aní mapu Mujé ju echi Juani mapu pagóami níili, mápumi ma ku owínali mapalí mi ma mi'lirúami níili. Auché jarecho aní mápumi echi Elfasi ju, mápumi ma ku nawali jena'í wichimóbachi. Auché jarecho aní mápumi bilé ki'yá bitéami Riosi jiti nawésami ju, mápumi ma ku owínali. ²⁰ A'lí Jesusi jeanigá rukueli: ¿'Yémítamo, chigá tamí mayé? Echalí echi Simoni Pegro ku nijéwaga janeli: ¡Mujé ju echi Cristo! ¡Riosi mi wilali mapurigá Walubela Ku'wíimi niráa! ²¹ Chopi Jesusi wabé nuleli mapu aboni ketasi wesi je'ná jerigá ruyema.

Jesusi bachá niráa nawesa jeanigá mapu Binoyko mi'lirúami níima

(Mt. 16:20-28; Mr. 8:30-9:1)

²² A'lí Jesusi janeli: Riosi ne bichíwali tamí wilali mapurigá Ku'wíriami niráa. Ayena cho arigá 'wérali ju mapurigani ne wabé risúu olárami níima. A'lí echi jaré o'wéala ochérami Juríosi tamí kichima, echi jaré o'wéala sacerdote ayéna cho, echi jaré nulalíwami binérami asíchiko. A'lí Nijeni arigá mi'lirúami níima, chopi Nijeni baikiyá ch'ilígá auchecho ku owínama.

²³ A'lí Jesusi jeanigá ruyeli si'néami aboni: A jaré 'yemi nakisáagá olánala mapurigá Nijeni nakí máputamo olabo, ketasi waminabi olasi mapurigá 'yemi aboni chopi nakí olánala. Sinibí rawé chopi galá nijéwaga olasi mapurigá Nijé 'yemi nimí nulé, ayena cho arigá anachasi maparítamo risúu olárami níbo, achigórígá mapurigá Nijeni anachama mapalí Nijeni wabé risúu olálami níma.

²⁴ Mapuyíripi rijói chopi kaníлага bitéanalaliko jena'í wichimóbachi, échiko chopi miná mukumea. Chopi mapuyíripi rijói chopi olánaliko mapurigá Nijeni nakí, arigá siné káachi waminá mi'lirúami nísa, échiko ne sinibí niráa ku bitélama.

²⁵ A'lí Jesusi janeli: A bilé rijói ne suwaba mésagá jena'í wichimóbachi nirúami wikabé namuti, chopi a échiko arigá miná mukusáagá, echalí suwaba echi jaré wikabé namuti tarapé ku ku'wírama echi yiri rijoy. ²⁶ Mapujiti mapuyíripi rijói tamí jiti riwélasagá, Nijé Ra'íchala jiti riwélasagá omá, Nijeni ayena cho riwélama echiyiri rijói jiti mapalí Nijeni wabé omériga ku nawama jena'í wichimóbachi mapurigá ne wabé Walubela niráa. Riosi tamí wilali mapurigá Ku'wíriami niráa. A'lí echalí mapalini ku nawama jena'í wichimóbachi, Riosi Onorúami waminabi tamí walubérama, ayena cho echi jaré Riosi kapitánawala tamí walubérama.

²⁷ Ayena cho Jesusi janeli: Nijé 'yemi nimí ne bichíwaga ané mapu jaré 'yemi jena'í jáwami ketasi cho suwibóatamo, átamo ketasi cho riwisáagá mapurigá Riosi ne wabé omériga nulé jena'í wichimóbachi piréami pagótami, si'néami mapu ikí galá bichíyami ju.

Echi Jesusi niwárami níili ne wabé ratábami niráa

(Mt. 17:1-8; Mr. 9:2-8)

²⁸A'lí pe wakinánokuá osá naó rawé yénasí mapalí jonsa Jesusi je'ná jerigá anili, echalí Jesusi moyénali echo'ná biléana wabé ripabé rabó, mapurigá Binói echo'ná ra'ichama Riosi yuwa. A'lí Jesusi ayenacho toli echi Pegro, echi Jakobo ayena cho, echi Juani asícchiko. ²⁹A'lí mapalí Jesusi, Riosi yuwa ra'íchali, echalí Binói akala si'nú nakulíwarami níili. A'lí Binói napáchala ayena cho ne wabé rosákami nakulíwarami níili, ne wabé ratábami ayena cho. ³⁰Echalí ke sayiná echo'ná Jesusi yuwa jábali okuá rijói mapu Binói yuwa ra'íchali. A'lí echi okuá echi Moisesi níili, echi Elíasi ayena cho. Okuánika chabé ki'yánala piréali jena'í wichimóbachi. ³¹Chopi echalí rawé aboni echo'ná ripá riwigachi jonsa síami níili, echijiti okuánika ne wabé ratábami níili. A'lí aboni, Jesusi yuwa, ra'íchaga anili mapu churigá echi Jesusi mi'lirúami níima riwéali echo'ná Jerusalémachi. ³²Echalí echi Pegro ne wabé kochináali, echi auché jaré binói yuwa muchúami ayena cho. Chopi aboni arigá ketasi kochili. Echalí aboni galá riwali mapurigá Jesusi ne wabé ratábami niráa nakulíwarami níili; ayena cho aboni galá riwali echi auché okuá rijói mapu Jesusi yuwa muchili. ³³A'lí mapalí echi okuá rijói ma ku simiba 'yénali echo'ná jonsa mapo'ná Jesusi wilili, echalí echi Pegro jeaneli echi Jesusi: ¡Binériami, ne wabé galá ju mapu tamujeta jena'í muchuwi! Jena'í niwabo bikiyá kalí látami. Bilé kalí Mujé níwala níima, auché bilé echi Moisesi níwala níima, auché bilé echi Elíasi níwala níima. Chopi echi Pegro ne wabé majajáratami níili, echijiti binói ketasi machili mapurigá binói ra'íchaga anili. ³⁴A'lí mapalí echi Pegro abijí echirigá ra'íchali, echalí ke sayiná echo'ná ne wabé simírami bimoli mapu yénasí aboni ma ke machíili. A'lí aboni ne wabé majali mapalí echirigá ikili. ³⁵Echalí Riosi Binói echo'ná bimolírali jonsa ra'íchaga jeanili: Je'ná Jesusi ju keni Raná mápuni ne wabé kalé. Wabé galá namsi Binói Ra'íchala. ³⁶Chopi mapalí Riosi ma sunili echirigá ra'icha, echalí echi bimolí ma ku kawili. A'lí mapalí echi jaré binéami auchecho galá 'nénali, echalí aboni riwali mapu echi Jesusi we bi'neli tibili; chopi echalí rawé aboni ke wesi ku ruyeli mapurigá aboni riwali.

Jesusi machí pali bilé riablo aliwala echo'ná pachá bilé towí sulálachi jonsa

(Mt. 17:14-21; Mr. 9:14-29)

³⁷A'lí ba'alínala rawé mapalí aboni auchecho ku tiguínali echo'ná ripá rabó jonsa, echalí wikabé pagótami simíbali Jesusi natipábiya. ³⁸Echalí bilé rijói echo'ná wikabé pagótamichi inárali mapu o'weli ra'íchaga jeanili: Binériami, ne wabé nimí tani mapurigami ku sa'wama keni raná, mapujiti échiko bilepi ju keni raná. ³⁹Ayena cho binói wabé risíu olárami ju, mapujiti bilé wabé chati riablo aliwala bakí echo'ná pachana binói sulálachi. Echalí echi riablo aliwala ne wabé o'weli sinata echi nijé ranala, ayena cho echi riablo aliwala olá mapurigá echi keni raná wabé umukúsuwami niráa níima mapuyénasí binói ne wabé simírami ronena. A'lí echi wabé chati riablo aliwala sinibí echirigá wabé risíu olá echi nijé ranala; chopi mapalí echi riablo aliwala ma suní ne wabé simírami risíu olayá, echalí échiko ma ariwé echi keni raná. ⁴⁰Jipi nijeni wabé tánali echi jaré mapu Mujé binéráli mapurigá aboni ku machí pama echi riablo aliwala, chopi aboni ketasi oméráli. ⁴¹Echalí Jesusi jeaneli echi jaré mapu Binói binéráli: ¡Mbá! ¡'Yémitamo

ketasi galá bichíyami ju! ¡'Yémitamo chopi wabé nakólaga oláami ju! ¿Kil'buko yénasí arigá 'wérali ju mapu Nijeni 'yemi nimí yuwa asimea? ¿Chu yénasí 'wérali ju mapu Nijeni echirigá anachama mapujítitamo ketasi galá tamí bichíi? Echalí Jesusi jeaneli echi towí onolá: ¡Wakiná to echi mujé ranala! ⁴² Chopi mapalí echi towí murubéanali Jesusi yuwa, echalí echi wabé chati riablo aliwala auchecho siné rikábali echi towí. Echalí echi si'nú aliwá auchecho wabé rikúmtali echi towí. Chopi Jesusi wabé iwéami nuleli echi riablo aliwala mapu ku machínama echo'ná pachana echi towí sulálachi jonsa. A'lí mapalí échiko ma ku machínali, echalí echi towí ma ku sa'wíami níili. A'lí Jesusi auchecho ku 'yali echi onolá. ⁴³ A'lí si'néami echi jaré pagótami chopi wabé 'nátaga muchili mapurigá Riosi ne wabé Walubela ju.

Jesusi auchecho bachá niráa ruyé mapurigá Binói mi'lirúami níima riwéali
(Mt. 17:22-23; Mr. 9:30-32)

A'lí mapuyénasí si'néami pagótami echirigá wabé 'nátali mapurigá Jesusi wabé omériga olali, echalí Jesusi jeaneli echi jaré mapu Binói binérali: ⁴⁴ Ne galá kipusi je'ná jeyili, ayena cho ketasi ku wikawasi mapurigá Nijé 'yemi nimí jeané: Echi auché jaré pagótami tamí bologá tomea mapurigá aboni tamí mi'limea. Nijeni wilárami níili mapurigá Ku'wíriami niráa. ⁴⁵ Chopi echi jaré mapu Jesusi binérali ketasi galá machili mapurigá binói ra'íchaga aneli aboni, mapujiti aboni ketasi 'yárami níili mapurigá aboni echirigá galá machimea; ayena cho aboni wabé majali rukuénala mapu churigá aniwáami níili mapurigá Binói ra'íchaga anili.

¿Chigá 'nalí tamujé ne wabé simírami walula ju?
(Mt. 18:1-5; Mr. 9:33-37)

⁴⁶ Echalí echi jaré mapu Jesusi binérali wabé yáati chótali a'nagupi ra'íchaga nasayérasiya mapalí aboni a'nagupi ra'íchaga rukueli mapu chigá 'nalí aboni ne walula níima echi auché jaré aboni yuwa. ⁴⁷ Chopi Jesusi ne galá machili mapurigá aboni 'nátali. Echalí Binói chapigá bilé táchala towí, echo'ná Binói yuwa achali. ⁴⁸ Echalí Jesusi jeaneli echi jaré mapu Binói binérali: Je'ná towí wabé tabéala ju, chopi átamo tamí kalésagá, arigá 'wérali ju máputamo ayena cho kalebo echiyiri kúuchi. A'lí echi mapu tamí kaleko, échiko ayena cho wabé galé Riosi, mapu tamí júuli jena'í wichimóbachi. Ayena cho Nijé 'yemi nimí ané mapu echi bilé 'yemi mapu waminabi tabéala ju, échiko arigá ne walula ju si'néami echi auché jaré 'yemi yuwa.

Echi mapu ketasi tamujé tamí sayérako échiko tamujé tamí yuwa ju
(Mr. 9:38-40)

⁴⁹ A'lí echi Juani jeaneli: Binériami, tamujeta riwali bilé rijói mapu miná machí a'wali echi jaré riablo aliwala echo'ná jaré pagótami sulálachi jonsa, mapalí binói Mujé riwalá jiti rugá nuleli echi jaré riablo aliwala mapurigá aboni echirigá ku 'machínama. A'lí tamujeta ra'ámali mapu ketasi echirigá olama, mapujiti échiko ketasi tamujé tamí yuwa najata. ⁵⁰ A'lí Jesusi jeaneli: Ketasi echirigá ra'amasi, mapujiti echi mapu ketasi tamujé tamí sayérako, échiko tamujé tamí yuwa ju.

Jesusi pée oyérali echi Jakobo, echi Juani

⁵¹ A'lí mapalí ma sebama riwéali echalí rawé mapalí Jesusi echo'ná ripá riwigachi ku torúami níima, echalí Jesusi tarapé majaga chótali echo'ná Jerusalémachi ku

simiyá. ⁵²A'lí Jesusi echo'ná bacháami a'láranala júuli jaré rijoy. Echalí aboni bachá simíbali echo'ná biléana walúlachi, echo'ná Samáriachi anilwachi kawírali nirúami. A'lí aboni tali bilé kalí mapo'ná Jesusi kochimea riwéali echalí rokogó. ⁵³Chopi echo'ná piréami pagótami tarapé risénsia 'yali mapurigá Jesusi echo'ná kochimea, mapujiti aboni galá machili mapu Binói echi jaré Juríosi pagótami níili, ayena cho mapu Binói echo'ná Jerusalémachi simíami níili. ⁵⁴A'lí echi Jakobo, echi Juani ayena cho, Jesusi yuwa binéami níili. Chopi mapalí aboni riwali mapu echo'ná piréami pagótami ketasi risénsia 'yali mapurigá Jesusi echo'ná kochiméa, echalí aboni we na'awali. Echijiti aboni jeanigá rukueli echi Jesusi: Walubela, ¡kechami nakí máputa nulabo mapu echi na'í rikínama echo'ná ripá riwigachi jonsa, mapurigá aboni káraka suwábarami níima, achigórigá mapurigá echi walula Elfási olali chabé ki'yá rawé? ⁵⁵Echalí Jesusi ku kuwana 'néniga pée oyéraga jeaneli: 'Yémitamo mayé mapu echi Wabé Galabé Riosi Iwigala 'yemi mi nulé echirigá olánala. Chopi 'yémitamo echirigá olánali achigórigá mapurigá echi auché jaré chati oláami pagótami nakí olánala. ⁵⁶Nijeni wilárami níili mapurigá Ku'wíriami niráa. A'lí Nijeni ketasi nawali jena'í wichimóbachi mapurigani suwábama echi jaré pagótami. Chópini nawali mapurigani wabé ku'wírama aboni, ayena cho mapurigani ku wikawama mapurigá aboni chati olali. Echalí si'néami aboni waminá simíbali echo'ná auché biléana rijówachi yénasí, mapurigá aboni echo'ná chi'libama.

Jaré nakili Jesusi yuwa najátanala

(Mt. 8:19-22)

⁵⁷A'lí mapalí aboni echo'ná buwichí sírali, echalí bilé rijói jeanigá jeaneli echi Jesusi: ¡Walubela, nijé nimí sinibí najátama echo'ná kanápuromí mapo'ná mi simea! ⁵⁸Echalí Jesusi ku nijéwaga jeaneli: Echi jaré kiyochi echo'ná iwárali piré; ayena cho echi jaré chuluguí niwa aboni rosolá. Chopi Nijeni ketasi niwa bilé kalí mapo'nani bu'umea. Nijeni wirárami níili mapurigá Ku'wíriami niráa. ⁵⁹Ayena cho Jesusi jeaneli auché bilé rijói jeanigá: ¡Tamí najató! Chopi echi rijói ku nijéwaga jeaneli: Walubela, nijé onolá ke 'me ayó mukuméaré mapujiti ma we ochérami ju. Abijí tamí ariwé mapuyénasí nijeni ma wi'yérali toma echi nijé onolá. Echalí nijé nimí najátama. ⁶⁰Chopi Jesusi jeaneli: Echi jaré pagótami mapu ikí ketasi bichíyami ju, ma mapurigá suwíami niráa ju. Ariwé mapurigá aboni toma echi auché jaré aboni níwala suwíami. Chopi mujé we yáati simigá, nawisá mapurigá Riosi galá nulé echi jaré pagótami mapu ikí galá bichíyami ju. ⁶¹A'lí auché bilecho jeaneli: Walubela, nijeni nakí mi yuwa najátanala, chopi abijí tamí ariwé mapurigani ku simigá, galá ku ripórama echi auché jaré echo'ná nijé bitélachi muchúami. ⁶²Echalí Jesusi jeaneli: Jaré pagótami bachá niráa we nakí Nijé nóchala olayá, chopi aboni ketasi sinibí niráa tamí yuwa nocha mapujiti aboni chopi we 'nata muchuwi mapurigá aboni ma ariweli wikabé namuti. A'lí aboni ketasi galabé nocha Nijé nóchala olayá, achigórigá mapurigá bilé rijói ketasi galá nocha mapalí binói sinibí ku kuwana 'neni mapalí binói wasaraya iyena. Echijiti echiyiri bichíyami ketasi chirigá galabé nocha Nijé nóchala olayá.

Jesusi júuli nawisánala kicháosa makói rijói

10 Pe wakinánokuá echi Walubela Jesusi ayena cho chapili auché jaré kicháosa makói rijói bichíyami, mapurigá Binói nawisánala julama, mapurigá aboni,

okuá niráa bachá simama echo'ná ne suníami o'wéalachí, ayena cho ne suníami ríjówachi mapo'ná Jesusi Binói nawama riwéali. ²Echalí Jesusi janeli aboni: Ne wikabé pagótami ketasi cho galá bichíí Riosi Ra'íchala, chopi Nijeni arigá nakí mapu aboni galá bichíima. A'lí pe okuáa pagótami ju mapu nawesa Riosi Ra'íchala. Echijiti tansi mapurigá echí Walubela Riosi waminabi wikabé nawésanalaga julama, mapurigá echí auché jaré pagótami galá bichííma Riosi Ra'íchala. ³Arigá simíbaga nawisábasi echí Galabé Riosi Ra'íchala. Nijeni 'yemi mi jula mapurigátamo kilí ologá pirélabo mapurigá jaré 'méchuli niráa, chópitamo nawésabo jaré pagótami mapu ne wabé jobátami níima mapurigá echí jaré nalíwali niráa. ⁴Echalí ketasi tosí bilé chiwáwala mapalítamo simabo echo'ná buwichí. Nirapé tosí bilé maleta. Ayena cho galá akarasa, ketasi tosí auché jaré aká. Ketasi wi'libé niráa ra'ichasi, mapalítamo naripabo auché jaré pagótami echo'ná buwichí, chopi we sapú simasi. ⁵Ayena cho mapalítamo chílibábiya mo'wiboa echo'ná jaléana kalírali, we yáati ripórager jeansi echo'ná piréami: Tánabota Riosi mapurigátamo kilí ologá pirélabo. ⁶A'lí a echo'ná muchísagá jaré pagótami mapu we nakí kilí ologá pirélanala, aboni ne galá nijéwaga olama mapurigá 'yémítamo nawésabo aboni. Echalí aboni ne bichíwali galá kilí ologá pirélama, chopi a echí jaré pagótami ketasi nakiságá echirigá kilí ologá pirélanala, echalí abóniko ketasi nijéwaga olama mapurigá 'yémítamo nawésabo aboni. ⁷Ayena cho mapalí jaré pagótami 'yemi mi nalema echo'ná aboni pirélachi, echo'ná bilénapi kalírali tibisi. Galá kosí mapu ikí echo'ná piréami 'yemi mi kowa. Galá níima echirigá ologá, mapujiti galá ju mapu si'néami echí jaré nóchami galá ku natétarami níima. Ketasi simasi echo'ná suníami kalírali echí ko'wáami tásiya. ⁸A'lí echo'ná kanápuromí o'wéalachí mapo'nátamo sebabó mapo'ná echo'ná piréami pagótami 'yemi mi risénsia 'yama tibínala echo'ná aboni kalílachi, echo'ná galá kosí mapu ikí aboni 'yemi mi kowa. ⁹Ayena cho galá ku sa'wasi si'néami echí jaré nayúkami mapu ikí muchuwi echo'ná o'wéalachí. Echalí jeanigá ruyesi echo'ná piréami pagótami: Ke 'me ayó rawé Riosi 'yemi mi galá nulema, átamo galá bichíisagá. ¹⁰Chopi átamo sisáagá echo'ná biléana walúlachi mapo'ná echo'ná piréami pagótami ketásirapé kipúnali 'yemi nawésawala, echalí mapalítamo ku simiba echo'ná jonsa, je'ná jeanigá nawésasi: ¹¹Tamujé ma ku bi'wabo ne suwaba 'yemi walúlawalachi nirúami napisó mapu jena'í tamujé ronólachi chukúbali. Tamujé echirigá olabo mapujiti 'yémítamo ketasi bichíinali tamujé nawésawala. Chopi arigá machisí 'yemi, mapu ma sébali téitali mapalí Riosi we nakí nulénala 'yemi, echo'ná 'yemi sulálachi niráa. ¹²Echalí Jesusi aneli echí jaré mapu Binói júuli nawisánala, jeanigá: 'Yémi nimí ané mapu echalí ne jubá rawé, echo'ná walúlachi piréami pagótami ne wabé simírami walubé kastigo 'yárami níima, chopi echo'ná Sorómachi anilíwachi chati oláami pagótami ketasi 'me walú kastigo 'yárami níima mapurigá aboni.

Jaréana o'wéalachí piréami ketasi bichíili (Mt. 11:20-24)

¹³'Yemi pagótami echo'ná Korasínchi anilíwachi piréami ne wabé risíu olárami nííbotamo, 'yémi pagótami echo'ná Becháirachi anilíwachi piréami ayena cho. Nijeni wisabé wabé omériga ologá iyénali echo'ná 'yémichi, chopi 'yémítamo arigá ketasi tamí bichíili. Chopi a Nijeni echirigá wabé omériga ologá inásagá echo'ná Tírochi anilíwachi, echo'ná Sirónachi anilíwachi ayena cho, mapo'ná we pilé echí

jaré isena pagótami, echalí aboni chabénala niráa ma wikáwali tánami Riosi, ne wabé chajótami napáchaga, ayena cho ne wabé napisó uchérámi níisa, mapujiti aboni ma ne wabé o'mónami níimi mapujiti aboni echirigá chati olali.¹⁴ Echijiti echalí ne jubá rawé 'yémítamo ne wabé simírami walubé kastigo 'yárami níbo, chopi echo'ná Tírochi piréami ketasi 'me kastigo 'yárami níima, echo'ná Sirónachi piréami ketasi cho.¹⁵ A'lí 'yemi echo'ná Kapernaúmachi piréami we mayé máputamo wabé ripabé jawárami níbo. Chópitamo arigá miná ri'lé riáblochi a'wátami níbo.

¹⁶ A'lí Jesusi jeaneli echi jaré kicháosa makoy: Echi jaré mapu galá bichíiko 'yemi nawésawala, aboni ayena cho galá tamí bichí. A'lí echi jaré mapu 'yemi mi we kichiko, aboni ayena cho tamí wabé kichí. A'lí echi jaré mapu tamí kichiko, aboni ayena cho wabé kichí Riosi mapu tamí júuli jena'í wichimóbachi.

Echi jaré kicháosa makói ma ku sili

¹⁷ Echalí pe wakinánokuá echi jaré kicháosa makói ma ku sili. A'lí aboni ne wabé kaníliga jeaneli: ¡Walubela! ¡Tamujeta nuleli echi jaré chati riablo aliwala mapurigá aboni ma ku 'machínama echo'ná echi jaré pagótami sulálachi jonsa, a'lí aboni arigá tamujé tamí nijéwali, mapalita ra'íchali Mujé Riwalá jiti!¹⁸ Echalí Jesusi jeaneli: Nijeni ma riwali echi Satanasi riwéami riablo echo'ná ripá riwigachi jonsa wichíami mapurigá bilé ukuí ni'wíami niráa.¹⁹ Ayena cho Nijé 'yemi nimí jiwratali mapurigátamo arigá omérabo rikeya echi jaré sinowi, echi jaré machila ayena cho. 'Yémítamo arigá omérabo echi riablo, ayena cho binói ma ketasi oméra 'yemi mi chati olíriya.²⁰ Chopi ketasi kanílasi 'yemi mapujiti echi jaré riablo aliwala galá nijewi mapalí 'yémítamo wabé nulé. ¡Chopi wabé kanílasi mapujiti 'yemi riwalá ma osirúami ju echo'ná ripá riwigachi mapurigá Riosi níwala niráa!

Jesusi ne wabé kaníili

(Mt. 11:25-27; 13:16-17)

²¹ Echalí Jesusi ne wabé simírami kaníili, mapujiti echi wabé Galabé Riosi Iwigala ne wabé kaníralati Binoy. A'lí Jesusi, Riosi yuwa ra'íchaga jeaneli: Nijé nimí waminabi wabé walubéraga ané, Mujé Onorúami, mápumi ne wabé Walubela ju echo'ná ripá riwigachi, jena'í wichimóbachi ayena cho, mapujítimi chinásali suwaba je'ná we galabé namuti mapurigá echi jaré wabé 'nátami pagótami ketasi machimea, ayena cho mapurigá echi jaré wabé machíami pagótami ketasi cho machimea. Chópimi je'ná jerigá ma galá riwírali echi jaré kúuchi mapujítimi echirigá nakili.

²² Echalí Jesusi ayena cho jeanigá aneli echi jaré pagótami: Echi keni Onó ma tamí 'yali ne suwaba namuti. Ke wesi galá machí mapu Nijé Binói bi'nélipi Riosi Ranala ju; chopi echi Walubela Onorúami galá machí, ayena cho ke wesi galá machí echi Onorúami, chopi Nijeni galá machí Binoy. Nijeni bi'nélipi Riosi Ranala ju; ayena cho echi jaré pagótami galá machí echi Onorúami, si'néami mapu ikí aboni Nijeni nakili machíranala echi Onorúami.

²³ Echalí Jesusi galá 'néniga jeaneli echi jaré mapu Binói binérali: 'Yémítamo ne wabé kaníliami ju mapujítitamo galá ritiwá suwaba je'ná jeyiri namuti mapurigá Nijeni olá.²⁴ Mapujiti Nijé 'yemi nimí ané mapu wikabé echi jaré ki'yá piréami Riosi jiti nawésami, ayena cho wikabé echi jaré o'wéala silíami ne wabé nakili 'nénala mapurigá 'yémítamo ma riwali mapu Nijeni wabé omériga olali, chopi aboni ketasi chirigá riwali. Ayena cho aboni wabé nakili námanala mapurigá

'yémitamo ma námali mapurigá Nijeni nawésali, chopi aboni arigá ketasi echirigá námali.

**Jesusi irétaga nawésali bilé galabé oláami rijói jiti
rugá, mapu echo'ná Samáriachi bitéami níili**

²⁵Echalí bilé rijói nuralíwami binériami we nakili machinala mapurigá Jesusi binérali. Echijiti echi rijói jeanigá rukueli: ¿Churigani olama mapurigá nijeni galá ku bitélama Riosi yuwa, ne sinibí niráa? ²⁶A'lí Jesusi jeanigá rukueli: ¿Churigá osirúami ju echo'ná Riosi nulalila oselíwalachi? Mujé binói galá machí mapurigá echo'ná osirúami ju. ²⁷Echalí echi rijói nulalíwami binériami ku nijéwaga jeaneli: Ne sulachí niráa ne wabé galesi echi Walubela kétamo Riósawa, ayena cho ne suwaba kétamo iwígá niráa ne galá galesi Riosi, ayena cho ne suwaba kétamo jiwérasha niráa ne galá galesi Riosi. A'lí ne suwaba kétamo 'nátawa niráa ne galá galesi Riosi; ayena cho ne wabé galesi echi auché jaré pagótami achigórigá mapurigami a mujé binói niráa galé. ²⁸Echalí Jesusi jeaneli: Mujemi ne galá ku nijéwaga anili. Echirigami olásagá, a'lí bichemi sinibí bitéami níima.

²⁹Echalí echi nulalíwami binériami we nakigá mapu a binói niráa galabéalamá, a'lí jeanigá rukueli: ¿Chigá biché 'nalina galema echi auché jaré pagótami? ³⁰Jesusi ku nijéwaga jeaneli: Siné rawé bilé rijói rikínaga inárali echo'ná ripáami Jerusalémachi jonsa, echo'ná tu Jerikochi simiyá. Chopi echo'ná buwichí inárami jaré chigórami waminá chapili, echi jaré mapu káraga chigosa echi rijói níwala namuti, waminá 'yeli binói napáchala. A'lí wabé chi'wanasa, echo'ná buwichí ariweli, ma ne noguí mukúami niráa. ³¹Echalí rawé bilé sacerdote anilíwami rijói ayena cho simíraga inárali echo'ná buwichí, echi mapu ma riwisáa echi rijói mapu wabé chi'wanárami níili, arigá ketasi ku'wírali, chopi waminá chakena simírali. ³²Ayena cho echo'ná simírali bilé Levita anilíwami rijói echi mapu echo'ná ri'obachi nóchami níili. Échiko ayena cho mulubéanaga, galá riwali echi rijói mapu chi'wanárami níili. Chopi binói ayena cho chakena simíraga, ketásirapé ku'wíraga, arigá waminá mikabé simili. ³³Chopi bilé rijói echo'ná Samáriachi bitéami ayena cho echo'ná buwichí inárali, echi mapu ma riwisáa echi rijói mapu chi'wanárami níili, ne wabé natimali. ³⁴A'lí echo'ná mulubé binói yuwa nawagá, échiko aceite uchugá ówali mapo'ná chi'wanárami níili. Ayena cho echi uva anilíwami ba'wila uchugá, echalí chiní jiti buleli. A'lí echo'ná binói bukúlachi ripá achagá, echo'ná biléana kalírali tosá, ne galá niseli echalí rawé. ³⁵Ayena cho ba'alínala rawé mapalí echo'ná Samáriachi bitéami rijói ma ku simili, echalí échiko 'yali osámakóy peso echo'ná kalíwami, ayena cho jeaneli: Ne galá tibú je'ná rijoy. A'lí ami waminabi suwábasagá wenomí, nijé nimí ku natétama, auchecho ku nawasa. ³⁶Echalí Jesusi jeanigá rukueli: ¿Churigami mayé? ¿Chu yiri nalina echi jaré bikiyá rijói galá kaleli echi auché bilé rijói mapu chi'wanárami níili? ³⁷Echalí echi nulalíwami binériami ku nijéwaga jeaneli: Nijeni mayé mapu echi mapu ne galá natimali, waminabi galá galeli. A'lí Jesusi jeaneli: Ayena cho ku simigá mujé, achigórigá galéami níлага si'néami echi auché jaré pagótami mapu ikí mujemi natepa.

Jesusi nawali echo'ná echi Marta, echi María pirélachi

³⁸A'lí Jesusi waminabi simigá echo'ná buwichí, echalí sébali biléana rijówachi mapo'ná bilé mukí, Marta riwéami, galá nareli echi Jesusi echo'ná binói bitélachi.

³⁹A'lí echí Marta ayena cho rijiméali binói binirá, echí mapu María riwéami níili, echí mapu mulubé Jesusi yuwa asíbali mapujiti binói we nakili kipúnala Jesusi ra'íchala. ⁴⁰Chopi echí Marta wabé níliami níili, mapujiti binói we nóchali echí ko'wáami niwayá. Echalí echí Marta murubéanaga Jesusi yuwa, jeaneli: Walubela, ¿Kéchami machí mapu echí nijé binilá tamí ariweli mapurigani bi'neli nochama? ¡Jeané mapu tamí ku'wírama! ⁴¹Chopi Jesusi ku nijéwaga jeaneli: Mujé Marta wabemi níliami ju, mapujítimi wikabé namuti nóchali 'nátami ju. ⁴²Chopi bilepi namuti arigá 'wérali ju máputamo olabo. A'lí echí María chopi nakili olánala echí ne galabéala; ayena cho ketasi wesi omérama jiwériga olayá mapuyénasí echí María ma ketasi echirigá binema Nijé Ra'íchala.

Jesusi we binera churigá galá ju Riosi yuwa ra'ícha
(Mt. 6:9-15; 7:7-11)

11 Siné rawé Jesusi, Riosi yuwa, ra'icha asali echo'ná biléana waná. A'lí mapalí Binói ma sunili, echalí bilé mapu Binói binérali je'ná jerigá aneli: Walubela, tamujé tamí binera Riosi yuwa ra'icha, mapurigá echí Juani ayena cho binérali echí auché jaré mapu binói yuwa binéami níili. ²Echalí Jesusi jeaneli: Mapalítamo Riosi yuwa ra'icha, je'ná jerigá anesi: Tamujé Onolá mápumi echo'ná ripá riwigachi atí, waminabi ne wabé galabé anérami nílaga Mujé riwalá. Ne galá nulé Mujé, jena'í wichimóbachi piréami pagótami. Ne suwaba galá olárami nílaga jena'í wichimóbachi, mapurigá Mujemi chopi nakí, echo'ná ripá riwigachi ayena cho. ³Tamujé tamí 'ya echí ko'wáami máputa newalé jipi rawé. ⁴Tamujé tamí ku wikawi mapurigata we chati olali, mapujiti tamujé ayena cho ku wikáwala ne si'néami echí auché jaré mapu tamujé tamí chati olali. Ketasi ariwé Mujé mapu tamujeta chati olántarami níibo. Chopi tamujé tamí ku'wira mapurigata ketasi chati olabo.

⁵Echalí Jesusi ayena cho jeaneli: Siné káachi bilé 'yemi níwasagá bilé amígowa, echí mapu nasipa rokogó jeanigá nawasa echo'ná echí bilé 'yemi bitélachi: Kení amígowa, tamí tanewi bikiyá pani, ⁶mapujiti auché bilé nijé amígowala mikabé jonsa simíami, bukulí nawali echo'ná nijé bitélachi. Chópini ketasi te ko'wáami mapu nijeni kóoma binoy, ⁷echalí Nijeni mayé mapu echí bilé 'yemi echo'ná pachá jonsa ku nijéwaga jeanema: Ketasi tamí kumé. Echi 'yera ma 'yeta wilí. Ayena cho kení kúchuwa ma tamí yuwa bití jena'í pétachi. Ma ketásini omero asísaya, mapurigá nimí 'yama ko'wáami. ⁸Echalí Jesusi waminabi jeaneli: Nijé 'yemi nimí ané mapu échiko ketasi 'yánalaga asísima mapujiti binói amígowala ju, chopi a échiko waminabi tanéwaga kumésagá, echí rijói arigá asísiga 'yama ne suwaba mapu ikí binói amígowala newalé. ⁹Echirigá Nijé 'yemi nimí jeané: Galá tansi Riosi, a'lí Binói 'yemi mi 'yama. Waminabi galá asi, a'lí bichétamo riwiboa. Waminabi bayesi echo'ná yéachi, a'lí echo'ná yéachi 'yemi mi galá iráparami níima. ¹⁰Mapujiti si'néami mapu ikí tániko, ne galá narema; ayena cho si'néami mapu ikí amiko, ne galá riwimea, ayena cho si'néami mapu ikí bayeko echo'ná yéachi, galá iráparami níima. ¹¹Ke wesi 'yemi onorúami arigá 'yama bilé rité mapalí 'yemi kúchawala tani bilé rimé. Nibilé wesi 'yama bilé sinowi, mapalí aboni tani bilé rochí. ¹²Nibilé wesi 'yama bilé machila mapalí aboni tani bilé tolí ka'wala. ¹³A'lí 'yemi máputamo chati oláami ju, arigá machisáagá galabé namuti koya echí jaré 'yemi kúchuwala, echí 'yemi Onolá echo'ná ripá riwigachi atíami waminabi galabé nijima echí Wabé Galabé Riosi Iwigala echí jaré mapu tániko.

**Jesusi wi'nijírami níili mapurigá echí ne walula riablo aliwala omérawala
níwami niráa**

(Mt. 12:22-30; Mr. 3:19-27)

¹⁴ Siné rawé Jesusi ku machí pánalaga olali bilé wabé chati riabla aliwala echo'ná pachá bilé rijói sulálachi jonsa. A'lí echí rijói ke ra'íchami níili mapujiti binói níwali echí wabé chati riabla aliwala; chopi mapalí echí riabla aliwala ma ku machínali, echalí echí rijói ma ku omérari ra'icha. Echalí echí pagótami echijiti wabé walubélaga aneli echí Jesusi, ¹⁵ chopi jaré jeanili: Je'ná Jesusi chopi ku machí a'wasa echí jaré riabla aliwala, echo'ná pachana echí pagótami sulálachi jonsa mapujiti binói níwa echí Bersebubi riwéami walubela riabla aliwala omérawala. ¹⁶ Ayena cho auché jaré we tánali mapurigá Jesusi sinepi niráa wabé omériga olama mapurigá ke wesi auché jaré pagótami omérali olayá, mapurigá Riosi chopi 'yali Binói olánala. Echalí aboni chopi nakili machinala acha Jesusi ne bichíwali omérali echirigá wabé omériga olayá. ¹⁷ Chopi Jesusi galá machili mapurigá aboni 'náitali. Echijiti Binói jeaneli: Mapalí biléana walúlachi piréami a aboni niráa a'nagupi nasayérage, wikanáami niráa rojuasa, echalí echo'ná walúlachi piréami ma ketasi waminabi omérama napawika piréliya mapurigá biléana walúlachi piréami niráa. Ayena cho a bilé rijói kúchuwala a'nagupi nasayérasagá, aboni ma ketasi omérama napawika piréliya mapurigá bilé rijói kúchuwala niráa. ¹⁸ A'lí Jesusi ayena cho jeaneli: Echirigá ayena cho a echí Satanasi riwéami riabla a binói kapitánawala waminá sayérasagá, echalí echí Satanasi ma ketasi waminabi mapurigá bilé walubela níima. Echalí Jesusi waminabi jeaneli: Nijé 'yemi nimí je'ná jerigá aneli, mapujiti 'yémitamo anili mapu Nijeni chopi omero ku machí a'wayá echí jaré riabla aliwala, mapujítitamo aní mapu Nijeni niwa echí ne walula riabla aliwala omérawala. ¹⁹ Chopi a Nijeni echijiti omérasagá ku machí a'wayá echí jaré riabla aliwala, ¿churigá echí 'yemi pagótamawala ayena cho omérama ku machí a'wayá echí riabla aliwala? ¡Echijiti 'yemi aboni pagótamawala echirigá galá machila mapurigá 'yémitamo ne wabé 'yékarami ju maparítamo aní mapu Nijeni niwa echí ne walula riabla aliwala omérawala! ²⁰ Chopi Nijeni ne bichíwali ku machí a'wá echí jaré riabla aliwala, mapujiti Nijeni niwa Riosi níwala omérawala. Echirigá ju mapu Riosi ma galá nulá jená! 'yémichi.

²¹ Mapalí bilé jiwerámi rijoy, bilé wi'lí ripiyá ka, galá tibusa echo'ná binói bitélachi, echalí suwaba binói níwala namuti galá tibútami ju. ²² Chopi siné káachi echo'ná nawásagá bilé chigórami ne wabé simírami jiwerámi, échiko waminá niyúrama. A'lí echí chigórami suwaba 'yema echo'ná kalíwami rijói níwala wi'lí ripiyá, echí mapujiti echí kalíwami rijói tarapé majáami níili. Echalí echí chigórami suwaba 'yesa echo'ná kalíwami níwala namuti, suwaba nachutama mapu ikí binói echirigá chigoka 'wísali.

²³ Echi mapu ketasi tamí yuwa juko, échiko tamí sayérami ju. Ayena cho echí mapu ketasi tamí yuwa napabuko echí auché jaré pagótami, échiko chopi waná chijana echí jaré aboni.

**Echi chati riabla aliwala mapu ku nawáli echo'ná mapo'ná jonsa échiko
machí pátami níili**

(Mt. 12:43-45)

²⁴ Ayena cho Jesusi jeaneli: Mapalí bilé wabé chati riabla aliwala ku machinsa echo'ná pachana bilé rijói sulálachi jonsa, echalí echí riabla aliwala echo'ná auché

jaréana wakichéachi aya iyena mapo'ná binói bitélama, chopi ketasi riwisáa, echalí je'ná jerigá 'natama: Echo'ná nijé bitélachi ku siméani mapo'ná jonsa nijeni bukulí ku machínali.²⁵ Chopi mapalí echi riabla aliwala ku nawá echo'ná pachá echi rijói sulálachi mapo'ná jonsa binói bukulí chabénala ku machínali, echalí binói riwimea echi rijói sulálachi ne galá a'láratami mapurigá bilé kalí ne galá pichítami, ne galá a'lláratami niráa.²⁶ Echalí echi bilé wabé chati riabla aliwala ku simisáa, auché jaré kichao wabé chati riabla aliwala bayérama, mapu waminabi wabé chati oláami níima, ketasi mapurigá binói niráa. Echalí ne si'néami echo'ná pachá echi rijói sulálachi mo'wisáa, echo'ná pirélama. Echirigá ikimea mapu echi rijói waminabi wabé simírami risíu olárami níima, ketasi mapurigá ne bachá rawé.

Echi ne bichíwali kanílawami

²⁷ Chopi mapalí Jesusi je'ná jerigá nawésali, echalí bilé mukí echo'ná echi wikabé pagótami yuwa 'yénami, o'weri ra'íchaga jeaneli: Ne wabé kaníriami ju echi Mujé iyela mapu mi ranali, echi mapu mi chi'írali mapalimi tácháa níili. ²⁸ Chopi Jesusi ku nijéwaga jeaneli: ¡Waminabi ne wabé kaníliami ju si'néami echi jaré mapu ikí galá kipusa Riosi Ra'íchala, echirigá ne galá nijéwaga olako!

Echi jaré chati oláami pagótami we nakili 'nénala mapurigá Jesusi wabé omériga olama mapurigá ke wesi auché jaré pagótami omero olayá

(Mt. 12:38-42; Mr. 8:12)

²⁹ Echalí rawé waminabi wikabé pagótami napawísali echo'ná noligá Jesusi yuwa. A'lí Binói jeanigá nawésali: Je'ná jipi piréami pagótami wabé chati oláami ju. Echijiti aboni chopi taní mapurigá Nijeni wabé omériga olama mapurigá ke wesi auché jaré pagótami omero olayá, mapurigá aboni chopi tamí riwimea echirigá oláachi, chopi Nijeni ketasi echirigá olama bacháami aboni yuwa. Pe minana aboni arigá riwimea tamí yuwa ne wabé omériga oláachi mapurigá olárami níili echi walula Riosi jiti nawésami Jonasi riwéami yuwa.³⁰ Mapujiti achigórigá mapurigá echi jaré ki'yá piréami pagótami echo'ná Nínibichi piréami riwali mapurigá ne wabé omériga olárami níili echi Jonasi riwéami yuwa, echirigá ayena cho je'ná jipi piréami pagótami galá riwimea mapurigá achigórigá wabé omériga olárami níima tamí yuwa. Nijeni wilárami níili mapurigá Ku'wíriami niráa.³¹ Ayena cho Jesusi jeanili: Echalí ne jubá wi'nijíwachi rawé, mapalí je'ná jipi piréami pagótami wi'nijírami níima, echalí echi mukí walula siríami mapu echo'ná mikabé 'naka bitéami níili, arigá wi'nijímiya ku asísima je'ná jipi piréami pagótami. Echalí echirigá ikimea mapujiti echi mukí walula siríami ne wabé mikabé jonsa kipúmiya simili mapurigá echi walula silíami Salomoni riwéami ne wabé machíami niráa nawésali; chopi Nijé mápuni jipi rawé jena'í 'yemi yuwa atí, ne wabé simírami Walubela juni, ketasi mapurigá echi walula silíami Salomoni riwéami. A'lí 'yémítamo arigá ketasi nijewa mapurigá Nijeni 'yemi mi nawesa.³² Ayena cho echalí ne jubá wi'nijíwachi rawé echi jaré ki'yá piréami pagótami mapu echo'ná Nínibichi anilíwachi piréami níili, si'néami wi'nijíbiya ku 'muchísama je'ná jipi piréami pagótami sayériya, mapujiti ne si'néami aboni galá bichísga ku ro'wili Riosi yuwa mapalí echi Jonasi nawésali aboni mapurigá Riosi nuleli nawésanala. Chopi Nijé mápuni jipi rawé 'yemi mi yuwa nawésiya atí, ne wabé simírami Walubela juni ketasi mapurigá echi Jonasi. Chopi 'yémítamo arigá ketasi nijewa mapurigá Nijeni 'yemi mi nawesa.

Bilé na'í rajáami niráa, echo'ná pachana echí pagótami sulálachi nirúami

(Mt. 5:15; 6:22-23)

³³Echalí Jesusi ayena cho nawésaga jeaneli: Tarapé wesi nasoka rikama bilé chopé rajáami, nirapé wesi pólaga rikama echo'ná ri'lé pachá biléana kajónchi, keremá. Chopi si'néami pagótami ripabé ne galá machiná niráa rikama echí chopé rajáami, mapurigá echirigá ne galá machírama si'néami mapu ikí mo'wiko echo'ná pachá kalírali. ³⁴Mujé busila mapurigá bilé na'í rajáami ju, echo'ná mujé sapálachi nirúami. Al'lí mapalí mujé busila ne galabé níisagá, echalí mujemi galá machíliami níima, ayena chomi ne galá kónami níima. Ayena cho Riosi galá machírama echo'ná pachana mujé sulálachi, mapurigami galá machimea Riosi Ra'íchala. Chopi mapalí mujé busila wabé chati níisagá, echalí mujemi mapurigá ke machíliami niráa níima, ayena chomi ne wabé risirúami níima. Echalí Riosi ma ketasi machírama echo'ná pachana mujé sulálachi, echijítimi ketasi galá machimea Riosi Ra'íchala. ³⁵Echijiti ne galá 'nagá tibú mapurigami ketasi rokowáratami níima, chopi mapurigami galá machimea Riosi Ra'íchala. ³⁶Al'lí ami ne suníami echirigá galá rajérami níisagá, ayena cho ami tarapé rukuwáwami níisaga, echalimi ne suwaba galá riwímea mapurigá mapalí bilé na'í rajáami mi we galá rajérama.

Jesusi we oyérali echí jaré Bariseo anilíwami binériami, echí jaré nulalíwami binériami ayena cho

(Mt. 23:1-36; Mr. 12:38-40; Lk. 20:45-47)

³⁷Mapalí Jesusi ma sunili echirigá ra'icha, echalí bilé rijói Bariseo anilíwami binériami we bayeli, binói yuwa ko'wánala echo'ná binói bitélachi. Echalí Jesusi ma echo'ná bakigá, echo'ná mésachi asíbali. ³⁸Chopi echí Bariseo anilíwami binériami rijói ma riwisá mapu Jesusi ketasi bachá niráa wisabé paníkali mapalí ma ko'mea riwéali, mapurigá echí auché jaré Juríosi pagótami sinibí olali, echalí echí Bariseo mayeli mapu echí Jesusi ketasi galabé oláami níili. ³⁹Chopi echí Walubela Jesusi jeaneli: 'Yemi Bariseo anilíwami binériami ne bichíwali mapurigá jaré pagótami ju mapu moba chopí pabaka echí jaré vaso, echí jaré bitoli ayena cho, chopí aboni ketasi pabaka echo'ná pachana. Echirigá achigórigá 'yémítamo chopí wikabé namuti olá mapurigá echí auché jaré pagótami mayema máputamo wabé galabé oláami ju. Chopí echo'ná pachana 'yemi sulálachi niráa, 'yémítamo wabé korúkami ju, ayena chótamo wabé chati oláami ju. ⁴⁰¡'Yémítamo tarapé 'nátami ju! Echi Walubela Riosi mapu niwari ne suwaba namuti, ayena cho galá machí ne suwaba namuti. Riosi galá machí echí jaré namuti mapu echo'ná pachana 'yemi sulálachi nirú. ⁴¹Chopi ne wabé galabé oláami nflasi 'yemi, a'lí bichétamo echirigá ne galá bi'wíami níisa echo'ná pachana 'yemi sulálachi niráa, ayena cho echí jaré namuti mapu machímana nirú ne galá bi'wíami níima.

⁴²¡'Yemi Bariseo anilíwami binériami wabé kastigo 'yárami níibo. 'Yémítamo ibílana makói napawíkami, pe bilé 'yeka 'yátamo Riosi suwaba namuti bawena mapu ikí 'ochera echo'ná 'yemi kawíwalachi. Ayena chótamo ibílana makói napawíkami, pe bilé 'yeka 'yátamo Riosi suwaba namuti ruta anilíwami mapu ikí 'ochera echo'ná 'yemi kawíwalachi. Ayena chótamo echirigá olá suwaba echí auché jaré namuti kilibá yuwa. Chópitamo ketasi chirigá galabé olá echí auché jaré pagótami, mapurigá Riosi 'yemi mi nulé olánala, nirapétamo galéami ju mapurigá

Riosi nakí máputamo galéami níibo. Arigá 'wérali ju máputamo galabé olabo echí auché jaré pagótami, ayena cho máputamo galéami níibo. Chopi ayena cho 'wérali ju máputamo ibílana makói napawíkami, pe bíl 'yeka 'yábotamo Riosi suwaba namuti mapu ikí 'ochera echo'ná 'yemi kawíwalachi.⁴³ ¡'Yemi Bariseo anilíwami binériami wabé kastigo 'yárami níibo! mapujiti 'yémitamo chopi nakí echo'ná ne bacháami, ne wabé galabéalachí, muchíñala echo'ná pachana 'yemi ri'obáwalachi. Ayena chótamo chopi nakí mapu echí auché jaré pagótami 'yemi mi ne wabé walubéraga anega naripama echo'ná walúlachi ri'nalátachi.⁴⁴ ¡'Yemi nulalíwami binériami wabé kastigo 'yárami níibo, 'yemi Bariseo anilíwami binériami ayena cho! ¡'Yémitamo ne wabé 'yékami ju! 'Yémitamo chopi mapuyiri jaláana chu'wéchi ju, mapo'ná ketasi machiná ju. A'lí echí jaré pagótami mapu echo'ná moba rikeka 'yena ketasi machí mapu chu'wechi ju.⁴⁵ Echalí bilé echí jaré nulalíwami binériami ku nijéwaga jeaneli: Binériami, mapalimi je'ná jerigá aní, Mujemi ayena cho tamujé tamí wabé oyera.⁴⁶ Echalí Jesusi jeaneli: ¡'Yémi nulalíwami binériami ayena cho ne wabé kastigo 'yárami níibotamo! mapujítitamo chopi nulé echí auché jaré pagótami olánala ne wikabé namuti mapurigá echí Moisesi nulali. A'lí mapurigá 'yémitamo nulé echí jaré pagótami, mapuyiri jaré wabé bitéami muruka ju, mapu 'yémitamo uché echí auché jaré pagótami, mapuyénasí aboni ma ketasi omérama apeya. Chopi 'yémitamo tarapé chirigá nakí ku'wíranala echí jaré aboni.⁴⁷ ¡'Yémitamo wabé kastigo 'yárami níibo mapujítitamo wabé 'yékaka olá, mapujiti 'yemi pagótamawala níili mapu waminá ko'yali echí jaré ki'yá piréami o'wéala mapu Riosi jiti nawésami níili, chopi jipi rawé 'yémitamo wabé o'wikeka niráa niwá jaré kalí chu'wiróami, mapo'nátamo wabé o'wikeka niráa chu'wiró echí jaré nawésami ochilá.⁴⁸ Echirigá ologá 'yémitamo galá ku ruyé máputamo achigórígá nakili olánala mapurigá echí jaré ki'yá piréami 'yemi pagótamawala olali. Echi jaré aboni ne bichíwali ko'yali echí jaré Riosi jiti nawésami, chopi jipi rawé 'yémitamo we niwá echí jaré kalí chu'wiróami mapo'nátamo chu'wiró echí jaré ki'yá piréami nawésami ochilá.⁴⁹ Echi Walubela Riosi ne galá machili suwaba je'ná jeyiri, echijiti Riosi bachá niráa jeanili: Echo'ná aboni yuwa nawésanalaga julámani jaré o'wéala mapu tamí jiti nawésama, ayena cho aboni yuwa julámani auché jaré o'wéala mapu Riosi jiti julálami anérámi níima. Chopi echí jaré pagótami ko'wimea jaré echí nawésami, ayena cho aboni wabé kichiga a'najátama auché jaré mapu Nijeni echirigá julama nawésanala.⁵⁰ Ne bichíwali Nijé 'yemi nimí ané mapu je'ná jipi piréami pagótami ne wabé wi'nijírami níima mapurigá ko'yáami niráa, mapurigá ko'wílati ne si'néami echí jaré o'wéala Riosi jiti nawésami mapu ikí ko'wirúami níili ki'yá chokichí jonsa mapalí jonsa Riosi niwali je'ná kawí.⁵¹ Aboni echirigá wi'nijírami níima mapurigá mi'yáami niráa mapurigá mi'lílati echí ki'yá bitéami Abeli riwéami rijói echí mapu mi'lírúami níili chabé ki'yá rawé. Ayena cho aboni wi'nijírami níima mapurigá ko'yáami niráa, mapurigá ko'wílati ne si'néami echí auché jaré Riosi jiti nawésami mapu ikí ko'wirúami níili; mapuyénasí mi'lírúami níili echí Sakaríasi riwéami rijoy, echí mapu aboni wakinana mi'yali echo'ná Riosi ri'obáwalachi machímana, echo'ná bacháami mapo'ná echí jaré bo'wá sinibí ko'wirúami níili.

⁵² Echalí Jesusi ayena cho jeaneli: ¡'Yémi nulalíwami binériami ne wabé risúu olálami níibo, mapujiti 'yémitamo galá machili Riosi Ra'íchala osirúami, chópitamo ketasi nakili bichíñala mapurigá Riosi Ra'íchala 'yemi mi binela, tamí jiti rugá.

Nibilé chótamo ariweli mapu echi auché jaré pagótami bichíima, si'néami mapu ikí we nakili bichíinala.

⁵³Chopi mapalí Jesusi je'ná jerigá anili, echalí echi jaré nulalíwami binériami ne wabé na'awali Jesusi sayéraga, ayena cho echi jaré Bariseo anilíwami binériami echirigá na'awali. Echalí si'néami aboni chótali wikabé namuti rukugá, mapujiti aboni we nakili mapu Jesusi jaré namuti sayéraga ku nijewama. ⁵⁴Echalí aboni chopi wabé sayéraga kipuli mapurigá Jesusi nawésali, mapujiti aboni chopi nakili mapurigá aboni galá omérama wi'nijiya echi Jesusi, jaré namuti jiti mapurigá Binói ra'íchali.

Ariwesi echi 'yékalawami

12 Echalí mapalí ne wabé wikabé pagótami napawísali echo'ná Jesusi yuwa, echi pagótami ne wabé rachínaga napawili mapuyénasí aboni a'nagupi rukeli. Echalí Jesusi bachá niráa chótali nawésiya echi jaré mapu Binói binerali jeanigá: Ne galá 'nesa, a aboni tibusi mapurigátamo waminá ariwebo echi jaré Bariseo níwala levadura anilíwami. ¡Ketasi 'yékami níisi mapurigá aboni niráa! ²Mapujiti pe waminánomí galá ku machirúami níima suwaba namuti mapu ikí echi jaré pagótami ketasi nakí ku ruyénala jipi rawé; ayena cho galá ku ruyérami níima ne suwaba mapu echi jaré pagótami chiná niráa olá jipi rawé. ³Echijiti mapurigá 'yémítamo echo'ná rokowárali niráa ra'íchali, ne suwaba echirigá achigórigá galá ku námarami níima echo'ná ne galá machíachi; ayena cho mapurigátamo echo'ná pachá 'yemi kalílachi, nakachí niráa ra'íchali, echirigá achigórigá echi auché jaré pagótami o'wéli ra'íchaga ku nawisama, echo'ná ripá moba 'yemi kalílachi jaga.

Galá bichiíiga majasi Riosi

(Mt. 10:28-31)

⁴Echalí Jesusi waminabi jeaneli: 'Yemi keni apanérawa, Nijé 'yemi nimí jeané: Ketasi majasi echi auché jaré mapu waminá ko'yá pagótami, chopi aboni ketasi omero waminabi olayá. ⁵Chopi Nijé 'yemi nimí bachá niráa ané mapu galá níima máputamo wabé majabo echi Walubela Riosi. Galá majasi Riosi mapujiti Binói galá omero ko'oyá echi jaré pagótami, ayena cho ma ko'wisáa, Binói galá omero echo'ná ri'lé riáblochi a'wá aboni aliwala. Echo'ná ne wabé chati rajá sinibí niráa. Ne bichíwali galá bichiíiga majasi echi Walubela Riosi.

⁶Echi jaré chuluguí ketasi 'me natiguí. Malí kúuchi chuluguí chopi natiguí okuá kentavo, chopi Riosi arígá galá newalá ibili echi jaré kúuchi chuluguí jiti. ⁷Ayena cho suwaba echi wikabé 'yemi kupala, ibili niráa, galá tarárami ju. Echi Walubela Riosi galá machí chu kipu ju. Echijiti ketásirapé majasi 'yemi, mapujiti Riosi mayé mapu 'yémítamo ne wabé simírami natiguí, ketasi mapurigá wikabé kúuchi chuluguí.

Galá ku ruyesi máputamo bichií echi Walubela Jesucristo niráa

(Mt. 10:32-33; 12:32; 10:19-20)

⁸Ayena cho Jesusi jeaneli: Nijeni wilálami níili mapurigá Ku'wíriami niráa; ayena cho Nijé 'yemi nimí ané mapu ne si'néami echi jaré galá bichiýami pagótami mapu ikí ruyeko auché jaré jeanigá mapu aboni tamí jiti bichiýami ju. Nijeni ayena cho ruyema Riosi, echo'ná bacháami echi jaré o'wéala Riosi kapitánawala yuwa, jeanigá mapu si'néami echi yiri ruyéami pagótami Nijé níwala ju. ⁹Chopi ne si'néami mapu

ikí echo'ná pagótamichi aniko mapu aboni ketasi tamí jiti bichíyami ju, Nijeni ayena cho ruyema Riosi, echo'ná bacháami echi jaré o'wéala Riosi kapitánawala yuwa, jeanigá mapu echirigá ruyéami pagótami ketasi Nijé níwala ju.

¹⁰Ayena cho Jesusi jeaneli: Ne bichíwali Nijeni wilálami níili mapurigá Ku'wíriami niráa. A'lí ne si'néami pagótami mapu ikí tamí jiti sayéraga ra'íchako, abóniko arigá ku wikawárami níima, a aboni galá tánsagá wikáwali. Chopi echi jaré mapu ikí wabé chati ra'íchako, echi Wabé Galabé Riosi Iwigala sayéraga, aboni ketasi siné ku wikawárami níima.

¹¹Mapalí echi jaré sayérami 'yemi mi toMEA echo'ná aboni ri'obáwalachi, ayena cho mapalí aboni 'yemi mi toMEA echo'ná bacháami echi jaré o'wéala igúsuwami yuwa, echalí ketasi wabé nílaga 'natasi mapu churigátamo ra'íchaga ku nijiyabo.

¹²Mapujiti echalí rawé echi Wabé Galabé Riosi Iwigala 'yemi mi binérama mapu churigátamo ra'íchaga ku nijiyabo.

Jesucristo binera echi we níwami rijói jiti, echi mapu ketasi 'nátami níili

¹³Echalí echo'ná echi wikabé pagótami yuwa asali bilé rijói mapu Jesusi yuwa ra'íchaga, jeaneli: Binériami, jerigá ané echi keni rijimá, mapu binói tamí yuwa rojonama echi jaré tamujé níwala namuti, mapu tamujé onolá tamujé tamí ariweli.

¹⁴Chopi Jesusi ku nijewaga jeaneli: Ke wesi tamí nuleli mapurigani justicia olama 'yemi najirémami yuwa. Nibilé wesi tamí wilali mapurigá Nijeni rojuánami níima 'yemi yuwa. ¹⁵Ayena cho Jesusi jeaneli: Ne galá 'nátaga pirélasi. Ketasi korukami níisi, mapujiti 'yemi pagótami ketásitamo kanílaga pirélabo, chopi mapujítitamo niwa ne wikabé namuti. ¹⁶Echalí Jesusi irétaga jeaneli: Bilé rijói wabé níwami we ichali echo'ná binói kawíwalachi. A'lí echirigá ichisuwa ne wabé simírami rakeli.

¹⁷Echalí echi wabé níwami rijói jerigá 'nátali: ¿Pírini olama? Jipi ne wabé simírami rakeli, ayena cho ne wabé buchili echo'ná nijé níwala rikówachi, echijiti ketásini niwa mapo'ná nijeni katiwama je'ná wikabé namuti nijé níwala 'wílamí. ¹⁸A'lí binói waminabi je'ná jerigá 'nátali: Mani galá machí mapurigani olama: Mani waminá najuinama echi jaré nijé níwala rikówachi. A'lí nijeni auché jaré waminabi o'wali niwama. Echalí nijeni echo'ná pachá suwaba katiwama echi jaré wikabé namuti nijé níwala 'wírami. Ayena cho echo'ná galá katiwámani karúmati echi auché jaré wikabé nijé níwala namuti. ¹⁹Echalí nijeni jerigá 'natama, nijé binói niráa: Nijeni ma niwa wikabé namuti katiwárami, mapurigani sebárama wikabé bamíbali. Jípini galá isábama. Chopi galá kosáa, walú bajiga, ne wabé kanílamani. ²⁰Chopi Riosi Binói jeaneli echi rijói: ¡Mujemi ke newalite jumi! ¡Jipi rokogó mujemi ma mukumea! Echalí echi wikabé mujé níwala namuti auché bilé si'nú níwala níima.

²¹Echalí Jesusi waminabi nawésaga jeaneli aboni: Echirigá achigórigá ikimea ibili rijói yuwa mapu ikí chopi muwéwako binói níwala namuti jena'í wichimóbachi, chopi ketásirapé namuti níwami ju Riosi yuwa.

Riosi galá tibula echi jaré Binói níwala

(Mt. 6:25-34)

²²Pe wakinana Jesusi jeaneli echi jaré mapu binói binérali: Nijé 'yemi nimí jeané: Ketasi wikabé namuti wabé níraga 'natasi, mapu churigátamo waminabi pirélabo, mapu píritamo kopoa. Nirapé nílaga 'natasi 'yemi aboni jiti, mapu píritamo napachabo. ²³Mapujiti echi ko'wáami arigá ketasi 'me natéami ju, chopi

waminabi wabé simírami natéami ju máputamo waminabi pirélabo. Ayena cho echí chiní arigá ketasi 'me natéami ju, chopi 'yemi aboni waminabi wabé simírami natéami ju. ²⁴ Ne galá 'nesi echí jaré kolachi, mapu ketasi ichá, nirapé siné 'wi. Echi jaré kolachi ketasi kaliwa, nirapé rikowa, chopi Riosi we galá kowa aboni. 'Yemi nimí ané mapu 'yémitamo ne wabé simírami natiguí, ketasi mapurigá echí jaré kolachi. ²⁵ Ke wesi 'yemi ne wabé nílaga 'nátaga, omérama a binói auché pée wi'libé niwayá bilé makali. ²⁶ Átamo ketasi omérasagá 'yemi aboni auché pe wi'llibé niwayá, ¿churékulátamo ne wabé níliami ju echí auché jaré namuti jiti? ²⁷ Ne galá 'nesi mapurigá echí jaré rakó, echo'ná kawichí nirúami, ne galá ba'yóami niráa ochero. Echi jaré rakó ketásirapé nochá, nirapé tema, chopi Nijé 'yemi nimí ané mapu echi walula silfámi Salomoni riwéami ketásirapé echí yena ba'yóami niráa napáchali mapurigá bilé rakó niráa, mapalí binói walubela silíami níili. ²⁸ A'lí a Riosi echirigá ne wabé galá ba'yóami niráa ochébanasagá echí jaré rakó mapu jipi rawé galá jawi echo'ná kawichí, chopi ba'alínala rawé echo'ná na'írali ikósarami níima, ¡Riosi Binói 'yemi mi ne wabé simírami galá napachátama, 'yemi pagótami ke 'me galá bichíyami! ²⁹ Echijiti ketasi wabé nílaga asi mapu píritamo kopoá, mapu píritamo bajibo keremá. ³⁰ Mapujiti echí auché jaré pagótami ke bichíyami ne wabé níriga ama suwaba je'ná jeyiri namuti, chopi 'yémitamo onée echí Onorúami, ripá riwigachi atíami, mapu ne galá machí mapu 'yémitamo we newalé suwaba je'ná jeyiri namuti. ³¹ Chopi ne bachá niráa tansi mapurigá Riosi 'yemi mi ne galá nulema pachana 'yemi sulálachi niráa. Echalí Riosi ayena cho 'yemi mi 'yama suwaba je'ná jeyiri namuti.

Echi jaré bichíyami ne wabé níwami níima echo'ná ripá riwigachi

(Mt. 6:19-21)

³² Tarapé majasi, mapujiti 'yémitamo mapurigá Nijé pugula bo'wá ju, mapu Nijeni galá nisé. 'Yémitamo pée okuáa ju, chopi 'yemi Onolá, echo'ná ripá riwigachi atíami, ne wabé ganílaga nulema 'yemi echo'ná pachá 'yemi sulálachi niráa. ³³ Ralinéasi mapu ikítamo niwa, a'lí galá kówasi echí jaré we tisúwati. Echirigá ologá 'yémitamo ne wabé níwami níbo echo'ná ripá riwigachi, mapo'ná echí jaré namuti ketasi siné suwibama; mapujiti echo'ná ripá riwigachi echí jaré chigórami ketasi omero chigoya, ayena cho echí jaré koséwali ketasi omero suwaba. ³⁴ Mapujiti echo'ná mapo'ná 'yemi níwala galabéala nirú, echo'ná 'yemi aboni ayena chótamo nakiboa muchínalá.

Arigá 'wéráli ju máputa galá kariwesa muchibo mapujiti tamujé Walubélawala ke sayiná ku nolínama jena'í wichimóbachi

³⁵ Ne galá 'nagá muchisi mapurigá jaré galabé oláami pióntami we rajigá buwé, rokogó niráa, mapuyénasí aboni walúlawala ke sayiná ku nolínama, mapujiti Nijeni ayena cho ke sayiná ku nolínama jena'í wichimóbachi. ³⁶ Mapurigá echí jaré galabé oláami pióntami níisi 'yemi. Echi jaré aboni we buwigá muchuwi mapuyénasí aboni walúlawala ku nolínama echo'ná jonsa mapo'ná jaré wabé kaníliga omáwiga niwila. A'lí aboni echirigá buwé mapurigá aboni omérama we yáati ku irápiya mapalí aboni walúlawala ke sayiná ku nawasa, bayema aboni. Echirigá achigórigá galá 'nagá muchisi 'yemi, mapujiti Nijeni ke sayiná ku nolínama jena'í wichimóbachi. ³⁷ Ne wabé kaníliami níima

echi jaré piónatami, si'néami mapu ikí aboni walúlawala echirigá galá 'nagá buwéami riwimea mapalí binói ku nawama. Ne bichíwali 'yemi nimí ané mapu echi walula galá a'láruga, echo'ná ko'wálachi muchínalama aboni. Echalí echi walula binói niráa, echirigá wabé kóoma echi jaré pióntami. Echirigá achigórigá ikimea 'yemi yuwa, átamo galá 'nagá muchúami nísagá mapalí Nijeni ke sayiná ku nolínama jena'í wichimóbachi.³⁸ A'lí a aboni walúlawala ne nasipa rokogó ku nawásagá, ba'alnala bi'yá chónachi keremá, echalí echi jaré pióntami ne wabé kaníliami níima, a aboni walúlawala echirigá ku riwiságá aboni, galá 'nagá muchúami.³⁹ Chopi galá machisí 'yemi je'ná jeyili: A galá machisáagá echi kalíwami mapu chuyénako nawama riwéali echi chigórami, echalí ne bichíwali echi kalíwami ne galá tibumi, ayena cho ketasi ariwemi mapurigá échiko we chigoma echo'ná kalírali.⁴⁰ Echalí Jesusi ayena cho jeaneli: 'Yemi ayena cho echirigá ne galá 'nagá muchisi, mapujiti Nijeni ke sayiná ku nolínama mapalí 'yémitamo ketasi tamí buwema, mapujiti 'yémitamo ketasi machí mapu kilíbuko Nijeni ke sayiná ku nolínama. Nijeni wilárami níili mapurigá Ku'wíriami niráa.

Jaré pióntami galabé oláami ju, chopi auché jaré wabé chati oláami ju

(Mt. 24:45-51)

⁴¹ Echalí echi Pegro jeanigá rukueli: Walubela, ¿áchami chopi tamujé tamí echirigá irétaga ané? ¿Kéchami ayena cho echirigá ané si'néami echi auché jaré pagótami?⁴² Echalí echi Walubela Jesusi jeaneli: Echi wabé galá oláami pioni, galabé 'nátami, echi ju mapu echi walubela kalíwami we wilá mapurigá walula nuláami niráa, echi auché jaré echo'ná binói kalílachi piréami yuwa, mapurigá échiko ibili niráa 'yama ko'wáami mapalí ma seba téitali.⁴³ Ne wabé kaníliami níima ibili pióntami mapu binói walúlawala ma ku nawasa echirigá riwimea, sébali galá oláachi.⁴⁴ Ne bichíwali 'yemi nimí ané mapu echi walula kalíwami ne walula niráa wilama echiyiri pioni, mapurigá échiko galá nuláami níima ne suwaba echi kalíwami rijói níwala namuti.⁴⁵ Chopi a echiyiri pióntami 'natásagá mapu binói walúlawala wabé wi'libeko ku nolínama, echalí siné káachi échiko chotama wabé chíbirigá olísiya echi auché jaré pióntami, echi muguí pióntami ayena cho. A'lí échiko siné káachi chotama walú kosísiya, walú bajísiya mapuyénasí wabé rikuma.⁴⁶ A'lí mapalí echirigá oláami pioni ketasi buwigá asimea, echalí ke sayiná binói walúlawala ku nawama, mapuyena echi pioni ketasi machimea mapu echi binói walúlawala ku nolínama riwéali. Echalí echi walula kalíwami ne wabé kastigo 'yama echi pioni mapujiti échiko ketasi galabé oláami níili.

⁴⁷Echi pióntami mapu ne galá machili mapurigá echi binói walúlawala nuleli, chopi binói ketasi a'lárali mapalí binói walúlawala ke 'mé ayó ku nolínama riwéali, nirapé olali mapurigá binói walúlawala nakili, échiko ne wabé simírali wipisótami níima.⁴⁸ Chopi echi auché bilé pióntami mapu ketasi machili mapurigá binói walúlawala nulali, chopi binói arígá chati olali mapuyénasí binói walú kastigo 'yárami níima riwéali, échiko arígá ketasi 'me wisabé wipisótami niima. Mapujiti mapuyíripi ne wabé simírami 'yárami níili, échiko ayena cho ne wabé simírami ku kuwana tánarami níima; ayena cho mapuyíripi ne wabé simírami naleli, échiko waminabi ne wabé simírami tánarami níima.

**Jaré mapu ketasi bichíima Jesucristo Ra'íchala wabé sayérama echi auché
jaré mapu galá bichíima**
(Mt. 10:34-36)

⁴⁹ Ayena cho Jesusi jeaneli: Nijeni nawésimia nawali jena'í wichimóbachi piréami pagótami, chopi echi jaré mapu ketasi bichíima Nijé Ra'íchala siné káachi wabé na'lwaga sayérama echí auché jaré, si'néami mapu ikí ne galá bichíima. Jipi Nijeni arigá wabé nakí mapurigá Nijeni ma mi'lirúami níima, mapurigá si'néami pagótami ke 'me ayó nawésarami níima Nijé Ra'íchala. Echalí wikabé galá bichíima, chopi siné káachi, echi auché jaré wabé sayérama aboni. ⁵⁰ Arigá 'wér.ali ju mapurigá Nijeni waminá mi'lirúami níima; ayena cho Nijeni wabé risúu nílama mapuyénasí echirigá ikimea. ⁵¹ 'Yémitamo mayé mapu Nijeni nawali jena'í wichimóbachi mapurigá echi jaré pagótami sinibí kilí ologá pirélama, chopi ketásini echijiti nawali, chopi Nijeni nawali mapurigá echi jaré pagótami waminá rojonárami níima. ⁵² Mapujiti jipi jonsa pe waminánomí biléana bitichí piréami, malí we rojonárami níima. Echi bikiyá, echi auché jaré okuá sayérama, ayena cho echi okuá, echi auché jaré bikiyá sayérama, mapujiti echi jaré mapu ketasi tamí bichíima, arigá sayérama echi auché jaré mapu galá tamí bichíima. ⁵³ Jaré onorúami we sayérama echi jaré aboni kúchuwala kíruwi, ayena cho jaré kíruwi we sayérama echi jaré aboni onolá. A'lí jaré muguí 'wéntami we sayérama echi jaré aboni tanala iwé, ayena cho jaré iwé sayérama echi jaré aboni iyela, ayena cho jaré muguí wasirúami wabé sayérama echi jaré aboni mo'olira, ayena cho jaré mo'olítami wabé sayérama echi jaré aboni wasila.

**Jesusi ruyeli aboni mapu churigá aboni machimea mapurigá pe waminana
ikimea riwéali**

(Mt. 16:1-4; Mr. 8:11-13)

⁵⁴ Ayena cho Jesusi jeaneli echi jaré pagótami: Mapalítamo ritiwá echi nolí echo'ná ri'lérui machínami, echalítamo aní mapu ukuméaré. Ayena cho echirigá ke 'me ayó galá ukú. ⁵⁵ Ayena cho mapalí echo'ná ka'yé 'naka jonsa wabé iká, echalítamo aní mapu ne wabé ratálamiré. Ayena cho echalí echirigá wabé ratálama. ⁵⁶ Wabé 'yékami jútamo! 'Yémitamo galá machí mapu churigá ikimea siné rawé mapalítamo ritiwá echo'ná nolírali, ayena cho mapalítamo ritiwá churigá iká. ¿Churékulátamo ketasi ayena cho galá machí mapurigá ikimea pe waminánomí rawé mapalítamo galá ritiwá mapurigá ma chota ikiyá jipi rawé?

Ne galá a'lari echi mujé sayela yuwa

(Mt. 5:25-26)

⁵⁷ ¿Churékulátamo 'yemi aboni ketasi galá 'nátaga nijéwa echi mapu ne wabé galabéala ju? ⁵⁸ Mapalí mujé sayela mi wi'nijíinalaga tomea echo'ná bacháami echi jaré igúsuwami yuwa, galá níima ku katéwasa echi mujé sayela yuwa mapalítamo abijí echo'ná buwichí 'yena echo'ná echi jaré igúsuwami muchílachi simiba. Echirigá olá mapurigá binói ketasi mi wabé wi'nijima echo'ná bacháami echi komisario yuwa, mapujiti echalí echi komisario siné káachi mi nijima echi jaré kapitani yuwa mapurigami pachá bachárami níima echo'ná komurachi. ⁵⁹ Nijé nimí ané mápumi ketasi ku machínama echo'ná

pachá jonsa mapuyénasí mujemi ke cho suwaba natétasagá suwaba mapu ikí aboni mi bujema.

**Arigá 'wérali ju mapu si'néami pagótami si'nú, galabé
niráa 'nátaga, ku ro'wima Riosi yuwa**

13 Echalí rawé jaré rijói echo'ná sisá aneli echi Jesusi mapurigá echi walula siríami Pilato riwéami nulali ko'wínala jaré rijói echo'ná Galiléachi piréami; ayena cho aneli mapu churigá echi jaré rijói ko'wirúami níili mapalí aboni jaré namutí ko'yá 'yénali, echi Walubela Riosi 'yábiya, echo'ná pachá echi walubé Jurfosi ri'obáwalachi.² Chopi Jesusi ku nijéwaga jeanigá rukueli: ¿Áchatamo mayé mapu echirigá ikili echi jaré rijói Galiléachi piréami yuwa mapujiti aboni ne wabé simírami chati oláami níili, ketasi mapurigá echi auché jaré pagótami echo'ná Galiléachi piréami?³ Echalí Jesusi waminabi jeaneli: 'Yemi nimí ané mapu ketasi echirigá níili, chopi a 'yémítamo ketasi si'nú, galabéala niráa 'natásagá, ayena cho átamo ketasi ku ro'wísagá Riosi yuwa, echalí si'néami 'yémítamo achigórigá suwibabo.⁴ Ayena chótamo galá machí mapurigá echi wabé ripabé wilíami kalí echo'ná Siloechi nirúami waminá najuili, ayena cho mapurigá echalí makói miná osá naó rijói waminá mitáchali. ¿Áchatamo mayé mapu echirigá ikili echi jaré rijói yuwa mapujiti aboni ne wabé simírami chati oláami níili, ketasi mapurigá echi auché jaré pagótami echo'ná Jerusalémachi piréami?⁵ Echalí Jesusi waminabi jeaneli: 'Yemi nimí ané mapu ketasi echirigá níili, chopi a 'yémítamo ketasi si'nú, galabéala niráa 'natásagá, ayena cho átamo ketasi ku ro'wísagá Riosi yuwa, echalí si'néami 'yémítamo achigórigá suwibabo.

Echi chuná mapu ke siné rakéami níili

⁶ Echalí Jesusi irétaga niráa jeaneli: Bilé rijói níwali bilé chuná mapu ichirúami níili echo'ná binói kawíwalachi. A'lí echi rijói sinibí bamíbali echo'ná ali echi chuná rakala, chopi ke siné riwali mapujiti ketasi rakéami níili.⁷ A'lí echi chuná níwami ra'íchaga echi binói piónawala yuwa mapu echo'ná nóchami níili, a'lí jeaneli: Nibiria, ma bikiyá bamíbali ju mapalí jonsa nijeni 'ali echi chuná rakala jena'í chunárali, chopi ke siné riwálini. ¡Miná ripuná! mapurigá ma ketasi wilimea jena'í galabé wi'yéachi.⁸ Chopi echo'ná nóchami pioni ku nijéwaga jeaneli: Walula, abijí jipi bamíbali ariwé, mapuyénasí nijeni ne noligá jóraga, ripuka achemá. ⁹Echalí galá rakémiré, chopi a ketasi cho rakésagá, echalí auché biléala bamíbali mujemi nulema ripunánala.

Bilé mukí ku sa'wárami níili siné rawé isábawachi

¹⁰ Siné rawé isábawachi Jesusi binériya asali echi jaré pagótami, echo'ná biléana aboni ri'obáwalachi.¹¹ Echalí rawé echo'ná pachá ri'obachi asali bilé mukí mapu nayúami níili makói miná osá naó bamíbali jonsa. A'lí echi mukí wabé bunaga iyénali, mapujiti bilé wabé chati riablo aliwala chabé jonsa echirigá olali. Echijiti echi mukí tarapé chirigá oméráli ku wachísiya binói niráa.¹² Chopi mapalí Jesusi galá riwali echi mukí, echalí Binói bayegá jeaneli: ¡Mukí, mami galá ku sa'wárami ju! Mami ketasi waminabi echirigá nayúami níima.¹³ Echalí Jesusi moba nochali echi mukí móbachí; ayena cho echi mukí we 'yáati ku sa'wárami níisa, galá ku wachili. A'lí binói chótali waminabi wabé walubéraga aneya Riosi.¹⁴ Chopi echi

walula echo'ná ri'obachi nuláami ne wabé yoli mapujiti Jesusi echirigá ku sa'wali echi mukí echalí rawé mapalí isábawachi rawé nííli. Echijiti echi walula nuláami jeaneli echi pagótami: Usani rawé nirú sinibí tarali mapalí risensia ju máputa galá nochabo. Echijiti echalí usani rawé chopi kiná simasí mapurigátamo ku sa'wárami níibo, chopi ketasi risensia ju máputamo ku sa'wárami níibo mapalí isábawachi rawé ju.¹⁵ Echalí echi Walubela Jesusi ku nijéwaga jeaneli: 'Yémítamo wabé 'yékami ju. 'Yémítamo arigá ku botana echi jaré 'yemi pugula wáasi, echi 'yemi pugula bulito ayena cho, mapalí isábawachi rawé ju, mapurigátamo echo'ná komichi togá, bajírabo ba'wí. Echirigátamo pe nocha mapalí isábawachi rawé ju.¹⁶ Chópitamo arigá aní mapu ketasi risensia ju mapu Nijeni ku sa'wama je'ná mukí jipi rawé mapalí isábawachi rawé ju. Chopi je'ná mukí bilé echi jaré Abrami kúchala kúchuwala ju mapu echi Satanasi riwéami riablo ma je'ná jerigá risúu olali makói miná osá naó bamíbali jonsa. Echijiti Nijeni mayé mapu arigá risensia ju mapu je'ná mukí ku sa'wárami níima jipi isábawachi rawé.¹⁷ A'lí mapalí Jesusi echirigá aneli, echalí si'néami echi jaré Binói sayela wabé riwélaga tibili; chopi ne si'néami echi auché jaré pagótami ne wabé kaníili mapalí aboni riwali mapurigá Jesusi echirigá wabé omériga olali.

Echi mostasa anilíwami rakala

(Mt. 13:31-32; Mr. 4:30-32)

¹⁸ Echalí Jesusi jeaneli: Nijeni 'yemi mi irétaga binéraama mapurigátamo galá machiboa mapu churigá Riosi galá nulá. ¹⁹ Mapalí Riosi we nulé echi pagótami, mapuyíri echi táchia mostasa anilíwami rakala ju mapu bilé rijói ichá echo'ná binói kawíwalachi. Mapujiti echi táchia mostasa rakala ma a'wisáa, ne walubé ocheró, mapurigá bilé masana niráa, mapuyénasí echi churuguí echo'ná mostasa otowálachi rosoroma.

Jesusi irétaga binera echi levadura jiti rugá

(Mt. 13:33)

²⁰ Echalí Jesusi ayena cho irétaga binérali jeanigá: Nijeni 'yemi mi irétaga binéraama mapurigátamo galá machiboa mapurigá Riosi nulé echi pagótami. ²¹ Mapalí Riosi galá nulé echi pagótami, achigórígá ju mapurigá mapalí bilé mukí ma baisá niráa anáwaga echi harina, galá nasówali echi levadura echi harina yuwa mapuyénasí suwaba galá kapótami níima.

Echi pe uchíi yéachi

(Mt. 7:13-14, 21-23)

²² Echalí Jesusi we binérasiya inárali echo'ná Jerusalémachi simiyá, echirigá ologá Binói simírali echo'ná ne suníami o'wéalachí, ayena cho ne suníami rijówachi. A'lí Binói galá binérali Riosi Raíchala. ²³ Echalí bilé rijói jeanigá rukueli: Walubela, ¿Ácha pe okuáa ju echi jaré pagótami mapu galá ku wikawárami níima? Echalí Jesusi ku nijéwaga jeaneli: ²⁴ Mapurigátamo ne 'wérali ologá nakí mo'wináliya echo'ná biléana uchíi yéachi, echirigá achigórígá ne wabé nílaga tansi mapurigátamo ku wikawárami níibo, mapujiti Nijé 'yemi nimí ané mapu pe waminánomí wikabé nakimea mapurigá aboni ku wikawárami níima, chopi echalí aboni ketasi chirigá ku wikawárami níima.

²⁵Mapujiti pe wilibeko mapalí echi Walubela kalí níwami ku wilísaga, 'yérama echo'ná yéachi, echalí 'yémítamo echo'ná machímana jáwami wabé anéraga echo'ná yéachi 'yétachi jeaniboa: ¡Walubela, tamujé tamí irapi! Chopi echi Walubela ku nijéwaga jeanimea: ¡Nijeni ketasi machí 'yemi! ¡Nirapeni machí kúmitamo piréami ju! ²⁶Echalí 'yémítamo jeanebo: Mujemi tamujé tamí galá machí, mapujiti tamujé mi yuwa ko'wali; ayena chota mi yuwa bajili echi uva ba'wila; ayena chomi binériga iyénali echo'ná tamujé walúlachi ri'narátachi. ²⁷Chopi Binói 'yemi mi ku nijéwaga jeanema: Mani 'yemi mi aneli mapu Nijeni ketasi machí kúmitamo piréami ju. Waminá waná simíbaga, si'néami 'yemi we chati oláami pagótami. ²⁸Echalí 'yémítamo wabé nalákabo, ayena chótamo wabé kí'lákabo 'yemi ramilá, mapalítamo riwiboa echo'ná ripá riwigachi muchúami echi Abrami, echi Isaka ayena cho, echi Jakobo ayena cho, ne si'néami echi auché jaré Riosi jiti nawésami ayena cho. Chopi 'yémítamo echo'ná machímana tibibo. ²⁹Echalí rawé ne sunífami a'nagú norigá jonsa sisáa wikabé pagótami kopoya muchíbama echo'ná ripá riwigachi mapo'ná Riosi galá nulé echi pagótami. ³⁰A'lí jaré mapu jipi rawé ne jubá juko, abóniko ne bachá níima echalí rawé; ayena cho jaré mapu jipi rawé ne bachá ju, abóniko ne jubá níima.

Jesusi ne wabé nalali mapalí Binói 'nátlali echo'ná Jerusalémachi piréami jiti
(Mt. 23:37-39)

³¹Echalí rawé echo'ná Jesusi yuwa sili jaré Bariseo anilíwami binériami mapu jerigá aneli: Jena'í jonsa ku simigá, mapujiti echi walula Erorsi mi mi'llináali.

³²Chopi Jesusi ku nijéwaga jeaneli: Echi Erorsi mapurigá bilé kiyoche ju. Ku simíbaga anesi mapurigá Nijeni jeané: Nibira, Nijeni machí a'wasá echi we chati riablo aliwala, ayena choni ne galá ku sa'wá echi jaré nayúkami jipi rawé, ba'alí ayena cho. A'lí waniwí ma sunímani. ³³Chopi arígá 'wéralli ju mapu Nijeni echirigá waminabi sísimá echo'ná Nijé buwilachi jipi rawé, ba'alí ayena cho, waniwí asíchiko, mapujiti arígá 'wéralli ju mapu ibili Riosi jiti nawésami mi'lirúami níima echo'ná Jerusalémachi anilíwachi walúlachi.

³⁴; 'Yemi pagótami echo'ná Jerusalémachi piréami ne wabé risíu olárami níibo! Mapujítitamo we ko'yá echi jaré Riosi jiti nawésami, ayena chótamo we basibuka ko'yá echi jaré mapu Riosi echo'ná 'yemi mi nawésanala júuli. ¡Wisabé chokéami Nijeni nakíli napabúnala 'yemi tamí yuwa, mapurigá bilé tolí ranéami wabé rakó binói níwala chulipi echo'ná ri'lé pachá binói analachi! ¡Chopi 'yémítamo ketasi nakíli! ³⁵; ¡Nibila! 'Yemi ri'obáwara waminá bi'neli ripí. ¡Riosi ma 'yemi mi ariwelí! Ayena cho Nijeni 'yemi nimí ané mapu jipi jonsa 'yémítamo chopi auchecho tamí riwiboa echalí rawé mapalítamo jeaniboa: ¡Ne wabé galabératami ju Je'ná mapu ku nawá mapurigá ne Walubela niráa!

Jesusi ku sa'wali bilé rijói siné rawé isábawachi

14 Siné rawé isábawachi Jesusi ko'meya bakili echo'ná bilé walula Bariseo anilíwami binériami bitélachi. A'lí echalí echi auché jaré Bariseo echo'ná ne wabé kichiga 'nigá muchili. ²Echalí bilé rijói nayúami mapu wabé bahínamí níili, ayena cho echo'ná bacháami Jesusi yuwa asali. ³Echalí Jesusi rukueli echi jaré nulalíwami binériami, echi auché jaré Bariseo anilíwami binériami ayena cho. A'lí jerigá rukueli: ¿Ácha risensia ju mapu Nijeni ku sa'wama bilé nayúami jipi

isábawachi rawé? ⁴Chopi aboni tarapé namuti ku nijéwali. Echalí Jesusi chapigá echí nayúami, gala ku sa'wali. Echalí Jesusi jeaneli echí rijói mapu ma ku simea. ⁵Chopi Jesusi jeaneli echí jaré Bariseo anilíwami binériami: Ibili rijói 'yemi mapu ikí bukélasa bilé bulito, bilé bóisi keremá, mapu echalí siné rawé isábawachi waminá wichisá echo'ná biléana jochi, arigá we yáati ku machí pama mapalí isábawachi rawé ju. Nijeni ayena cho ku sa'wali je'ná rijói jipi isábawachi rawé. ⁶Echalí aboni ketasi chirigá omériali ku nijéwiya.

Echi jaré mapu bayérami níili echo'ná biléana niwíkowachi

⁷Echalí mapalí Jesusi riwali mapurigá echí auché jaré mapu echo'ná bayérami níili chopi echo'ná wabé galabéalachí muchínali, echalí Binói jerigá ruyeli: ⁸Mapalí bilé rijói mi bayesa echo'ná biléana niwíkowachi, ketasi bachá asibá echo'ná ne wabé galabéalachí, mapujiti siné káachi auché bilé rijói waminabi wabé walubela ketasi mapurigá mujé ayena cho bayérami níima. ⁹Echalí echí mapu mi bayeli echo'ná mujé yuwa nolínama, echí auché bilé rijói yuwa mapu waminabi walubela ju. A'lí mi jeanema: ¡Je'ná 'ya mapu binói echo'ná asimea! Echalí mujemi wabé riwéliga siméa echo'ná wabé jubáami asiba. ¹⁰Chopi mapalí mi bayérami ju, echo'ná simigá ne jubáami asibá, mapurigá mapalí nolinsa echí mapu mi bayeli, échiko mi jerigá anema: Kení amígowa, wakiná ne bacháami, asagá. Echalí echí auché jaré echo'ná napawika muchúami galá riwímea mapurigá mujemi echirigá walúlatami níima. ¹¹Mapujiti echí mapuyíripi a binói walubélatako, échiko wabé tabéalatami níima. A'lí echí mapu a binói wabé tabéalatako, échiko arigá walúlatami níima.

¹²Jesusi ayena cho ra'íchali echí rijói mapu Binói bayeli. Echalí Jesusi jeaneli: Mapalí mujemi jerigá wabé galá kóoma echí jaré mapu ikí mi bayé, ketasi chopi bayé echí jaré mujé galabé amígowala, nibilé bayé echí jaré mujé ritémawala, nibilé bayé echí auché jaré mujé pagótamawala, nibilé cho bayé echí auché jaré wabé níwami echo'ná mulubé mujé yuwa piréami, mapujiti si'néami aboni auchecho ku kuwana mi bayema, a'lí bichemi echirigá ku natétarami níima. ¹³Chopi mapalí mujemi we galá kónama ko'wáami, echo'ná chopi bayé echí jaré wabé tisúwati, echí jaré ke akáanami ayena cho, echí jaré sikamochi ayena cho, echí jaré kasimochi ayena cho, echí jaré ke 'machíliami asíchiko. ¹⁴Echalí mujemi ne wabé kaníliami níima mapujiti aboni ketasi omero mi ku kuwana natétiya; chopi Riosi 'yemi mi ku natétama echalí ne jubá rawé mapalí si'néami echí jaré galá oláami pagótami ku o'wínama.

Bilé rijói galá kówali wikabé pagótami

¹⁵Echalí bilé rijói echo'ná atíami, echí Jesusi yuwa ra'íchaga, jeaneli: Ne wabé kaníliami níima ibili rijói mapu ko'mea echo'ná ripá riwigachi mapo'ná Riosi galá nulé echí pagótami. ¹⁶Echalí Jesusi ku nijéwaga jeaneli: Siné rokogó bilé rijói walú omáwaga, walú niwali ko'wáami. A'lí wikabé pagótami bayérami níili. ¹⁷Chopi mapalí ma sébachi níili ko'wáwami, ke wesi echo'ná sili. Echalí echí rijói júuli auchecho bayénala si'néami echí jaré mapu bachá niráa bayérami níili. Echalí binói jeanigá júuli bayénala: ¡We yáa wakiná simasi, mapujiti suwaba ma galá a'láratami ju! ¹⁸Chopi si'néamika ibili niráa chótali ku wikáwali tásiya. Echalí echí bacháwala jerigá aneli: Bukulini ralali bilé kawí ichiwáwami. Jípini 'némiya simea echí kawí. Nijé nimí tani mapurigami tamí wikawama.

¹⁹Auché bilé jerigá aneli: Nijeni bukulí ralali malíana bulí wáasi ibóisi, jípini 'néniga simea machimeya. Nijé nimí tani mápumi tamí wikawama. ²⁰Auché bilecho jerigá aneli: Bukulini niwili. Echijiti nijeni ketasi omero simiyá. ²¹Echalí mapalí echi mapu julárami níili ma auchecho ku nawali, binói suwaba je'ná jerigá ruyeli echi binói walúrawala. Chopi echi walula ne wabé yoga jeaneli: We sapú simigá echo'ná walúlachi ri'narátachi, echo'ná pagótami napawílachi ayena cho, a'lí wakiná bayé echi jaré tisúwati, echi jaré ke akáanami ayena cho, echi jaré sikamochi ayena cho, echi jaré kasimochi ayena cho, echi jaré ke 'machíliami asichiko. ²²Echalí echi pioni jeaneli: Walula, mani galá olali mapurigami tamí nulé, chopi ke cho buchili echo'ná pachá kalírali mapo'ná mujemi omowama. ²³Echalí echi walula jeaneli echi binói piónawala: Auché simigá echo'ná suníami buwichí, kanápuromí mapo'ná echi pagótami 'yena, a'lí ne 'wérali wakiná mo'wá auché jaré mapurigá ne galá buchima echo'ná pachá nijé kalílachi. ²⁴Mapujiti 'yemi nimi ané mapu ke wesi echi jaré pagótami mapu bachá bayérami níili, galá ko'mea echi wabé galabé ko'wáami mapu nijeni a'larali.

**Galá níima máputa ariwebo suwaba echi auché jaré
namuti mapurigata chopi Jesusi yuwa najátabo**

²⁵Echalí rawé wikabé pagótami Jesusi yuwa najátali echo'ná buwichí. A'lí Binói ku kuwana 'néniga jeaneli: ²⁶A bilé tamí bichíinalagá, arigá 'wérali ju mapu échiko wabé tamí galema. Echirigá arigá 'wérali ju mapu binói waminabi tamí galema ketasi mapurigá binói galé kepu onó, kepu iyé ayena cho. Arigá 'wérali ju mapu échiko waminabi tamí galema ketasi mapurigá binói galé kepu upí, kepu kúchuwa ayena cho, kepu ritémawa ayena cho. Ayena cho 'wérali ju mapu échiko waminabi tamí galema ketasi mapurigá binói galé a binói niráa. A'lí a ketasi tamí echirigá galésagá, échiko kétasi omérama tamí yuwa binéami níliya. ²⁷Ayena cho mapuyíripi ketasi arigá anachama mapalí binói risúu olárami níima, achigórigá mapurigá Nijeni arigá anachama mapalini wabé risúu olárami níima, échiko ketasi omérama tamí yuwa binéami níliya. ²⁸Ayena cho ibili 'yemi mapuyíripi niwánali bilé ripabé wilífami kalí, ne bachá niráa galá 'natama chu kipu suwábamilé wenomí echi kalí niwayá, acha binói niwa echikí wikabé wenomí, mapurigá binói galá omérama kayena echi ripá wilífami kalí. ²⁹Mapujiti a binói bachá niráa tigosa, chopi a ketasi omérasagá suniya echi kalí niwayá, echalí si'néami echi auché jaré pagótami echo'ná piréami echirigá riwisáa, chotama binói jiti kachigá ra'icha ³⁰jeanigá: Echi rijói chótali echi ripabé wilífami kalí niwayá, chopi ketásirapé omérali suniya. ³¹Ayena cho ibili walula silífami mapu ikí niwa makói mili sontarsi mapu nakómiya simea, auché bilé walula silífami sayérsiya mapu arigá niwa osá makói mili sontarsi, échiko bachá niráa asibaga, galá 'natama acha binói omérama niyúria echi auché bilé walula silífami sayéria mapu osá makói mili sontarsi yuwa inaro. ³²Chopi a mayésagá mapu binói ketasi omero niyúria, echalí binói jaré katéwami julama ku katewánala echi auché bilé walula silífami yuwa, mapuyénasí échiko abijí mikabé inárachi. ³³Echirigá mapuyíripi 'yémitamo ketasi ariwésagá suwaba echi jaré 'yemi níwala namuti ketasi omero tamí yuwa binéami níliya.

Mapalí echí koná ketasi akáami níisa

(Mt. 5:13; Mr. 9:50)

³⁴Ne galá ju echí koná. Chopi a ketasi galá akáami níisagá, echalí ketasi chirigá galá ku akáami niwárami níima. ³⁵Echiyiri koná ketasi ireke. Echalí echí koná chopi machí pátami níima echo'ná wiýeráli, echo'ná ripúkachi keremá. ¡Si'néami 'yémítamo mapu ikí nakeko, ne galá namsi mapurigá Nijé 'yemi nimí jerigá ané!

Jesusi binera echí bo'wá wikáami jiti rugá

(Mt. 18:10-14)

15 Echalí rawé si'néami echí jaré wenomí napabúami echo'ná mulubé Jesusi yuwa kipúbiya sili. Ayena cho echí auché jaré rijói echo'ná kipúbiya sili, si'néami mapu ikí echí auché jaré Juríosi pagótami aneli chati oláami niráa. ²Echijiti echí jaré Bariseo anilíwami binériami ayena cho echí auché jaré nulalíwami binériami, si'néami echí Jesusi sayéraga ra'íchali. A'lí aboni jeaneli: ¡Echi Jesusi galá narigá echí jaré chati oláami pagótami, ayena cho Binói we ko'wá echí jaré aboni yuwa! ³Chopi Jesusi je'ná jerigá irétaga jeaneli: ⁴Ibili 'yemi mapu ikí bukélasa bilé kiento bo'wá, mapalí bilé bo'wá wikawásá waminá gará tibútaga ariwema echí auché jaré kimakóisa makói miná kimakói echo'ná kawichí, mapuyénasí binói ámiya simea echí mapu wikali, mapuyénasí binói ma ku riwá. ⁵Chopi mapalí ma galá riwá, echalí matochi rikagá binói we kaníraga ku bitichí tomea. ⁶A'lí ma ku nawagá echo'ná bitichí, binói we yáati ku napabuma echí jaré binói amígowala, jeanigá: Tamí yuwa ne wabé kanílasi, mapujítini ma riwali echí bo'wá mapu ma wikáami níili. ⁷Echalí Jesusi jeaneli: 'Yemi nimí ané mapu echirigá achigórígá waminabi ne wabé kanílama echo'ná ripá riwigachi muchúami mapalí bilé chatí oláami rijói ma ku wikáwali tansa, ku ro'wíma Riosi yuwa, ketasi mapurigá mapalí kimakóisa makói miná kimakói pagótami mayé mapu aboni wabé galabé oláami ju, echijiti aboni ketasi nakí ku wikáwali tánala.

Echi wenomí wikáami

⁸Ayena cho mapuyíripi mukí níwasa makói peso plata, chopi a wikáwasa bilé peso, we yáati rajema bilé chopé, ayena cho ne suníami galá pichika echo'ná pachá kalírali, kilí niráa ama mapuyénasí ku riwimea. ⁹Chopi ma galá riwisáa, echí mukí we yáati napabuma echí jaré binói amígowala, a'lí jeanema: Tamí yuwa ne wabé kanílasi, mapujítini ma ku riwali echí bilé peso plata mapu ma wikáami níili. ¹⁰Echalí Jesusi ayena cho jeaneli: 'Yemi nimí ané mapu echí jaré Riosi kapitánawala echo'ná ripá riwigachi muchúami ne wabé kanírama mapalí ibili echí jaré chatí oláami pagótami, wikáwali taga, galá ku ro'wíma Riosi yuwa.

Echi towí mapu suwábali binói onolá níwala namuti

¹¹Jesusi ayena cho jeaneli: Bilé rijói okuá kúrowi kúchuwami níili. ¹²A'lí echí pe tabéala jerigá aneli binói onolá: Kení onó, tamí 'ya echí jaré mujé níwala namuti mapu nijé níwala níimará. Echalí echí onorúami galá rojuániga binói níwala namuti, nasípasi 'yalí echí binói ranala tabéala. ¹³Chopi pe wakinana rawé echí tabéala ranarúami ne suwaba ralinéali echí jaré binói níwala namuti. A'lí ma napabusa binói níwala wenomí, waminá mikabé auché biléana si'wina kawírali simili;

chopi echo'ná bitélaga binói chuwé ologá suwábalí binói níwala wenomí.¹⁴ A'lí mapalí echi tabéala ranarúami ma echirigá suwábalí binói níwala wenomí, echalí echo'ná kawírali piréami pagótami ne wabé simírami 'locheli, ayena cho echi tabéala ranarúami echirigá ne wabé 'locheli.¹⁵ Chopi binói riwali nóchali echo'ná bilé rijói bitélachi echo'ná kawírali bitéami. Echalí echi rijói waminá júuli echi wikabé binói bukula kochi nisénala.¹⁶ Chopi echi tabéala ranarúami arígá ne wabé 'locheli, mapujiti ke wesi 'yali ko'wáami. Echalí binói ne wabé simírami 'lochega, wabé nakili echi rojuí kumugá bosánali mapurigá echi kochi ko'wali.¹⁷ Chopi binói jeriga ku 'nátali: ¡Echo'ná nijé onolá bitérachi ne wikabé pioni nirú mapu galá posaka ko'wá, chopi jena'lí nijeni we lowa!¹⁸ Mani ku simea echo'ná mapo'ná nijé onolá atí, a'lí nijeni jeanema: Kení onó, nijeni we chati olali Riosi sayéraga, ayena choni chati olali mujé sayéraga.¹⁹ Ma ketasi galá ju mapurigá nijeni waminabi mujé ranala nirúa anérámi níima. ¡Tamí niwá mapurigá bilé mujé piónawala nirúa!²⁰ Echalí echi tabéala ranarúami ma ku simigá, pe wakinana ku nawali echo'ná binói onolá bitérachi.

Chopi mapalí echi tabéala ranarúami abijí mikabé 'naka inálachi, echalí echi binói onolá galá riwisáa, arígá ne wabé natimali. Echalí echi onorúami we 'maga natépali, ayena cho wabé kaníliga narépali.²¹ Chopi echi tabéala ranarúami chótali jerigá anésiya: Kení onó, nijeni we chati olali Riosi sayéraga, ayena choni chati olali mujé sayéraga. Ma ketasi galá ju mapurigá nijeni waminabi mujé ranala nirúa anérámi níima.²² Chopi echi onorúami echalí we yáati jeaneli echi jaré binói piónawala jeanigá: We yáati machí pasa echi we galabéala napacha, galá ku napachátasi; ayena cho galá uchesi echi galabé simati chítúlami jiero echo'ná binói makúsualachi, ayena cho galá ku akárasí.²³ Echalí echi onorúami ayena cho jeaneli: Wakiná 'holasa mi'lísí echi bilé bisero wabé sapéami, mapujiti tamujeta ma we kaníliga omáwaga kopoá.²⁴ Mapujiti je'ná kení raná mapurigá mukúami nirúa níili, chopi ma ku bitéami ju. ¡Binói waminá wikáami níili, chopi mata ku riwali! Echalí aboni chótali omáwaga ko'yá.

²⁵ Echalí echi rijói ranala bachirúami echo'ná kawichí iyénali, chopi ma ku mulubé nawagá echo'ná bitichí, échiko we námali echirigá we kaníliga tákawachi.²⁶ A'lí binói bayegá rukueli bilé pioni mapu pili jiti echirigá olali echo'ná pachá bitichí.²⁷ A'lí echi pioni jeaneli: ¡Mujé rijimala ma ku nawali! Echijiti mujé onolá ma nulali mi'línala echi bilé biselo wabé sapéami, mapurigata wabé kaníliga kopoá, mapujiti mujé rijimala ma galá ku nawali.²⁸ Chopi echi bachirúami ne wabé yoga, ketasi nakili bakinála echo'ná pachá bitichí. Echijiti binói onolá ku machínaga, we tánali mapurigá pachá bakimea.²⁹ Chopi echi bachirúami we yóniga ku nijewaga jeaneli echi kepu onó: Mujemi galá machí mapurigá nijeni ma wikabé bamíbali mi yuwa nóchali. Nijeni sinibí ne galá nimí nijewali, chopi mujemi tarapé siné tamí 'yali bilé táchibá mapurigá nijeni kanílaga omáwaga ko'mea echi auché jaré nijé amígowala yuwa.³⁰ Chopi mapalí ke sayiná ku nawali je'ná mujé ranala mapu suwaba suwábalí mujé níwala namuti wikabé chati oláami muguí yuwa bitélaga, jipi mujemi ma mi'yali echi bilé bisero wabé sapéami mapurigá wabé kaníriga omáwaga ko'mea.³¹ Echalí echi onorúami jeaneli: Kení raná, mujemi sinibí tamí yuwa asali, nijé nimí 'yali suwaba mapu ikí mujé newaleli, ayena cho ne suwaba nijé níwala namuti, mujé níwala ju.³² Chopi jipi rawé arígá 'wérali níili mapurigata wabé kaníliga omáwaga kopoá, mapujiti kemi rijimá mapu tamujeta mukúami nirúa mayeli ma galá ku bitéali. Binói ma wikáami níili, chopi tamujéta ma ku riwali.

Echi ketasi galabé oláami tabéala nuláami

16 Echalí Jesusi ayena cho ra'íchaga echi jaré mapu Binói binérali, jeaneli: Bilé rijói walula ne wabé níwami níili. Échiko auché bilé si'nú nuleli mapurigá tabéala nuláami niráa, mapurigá échiko nuláami níima ne suwaba echi walula níwala namuti jiti. Chopi pe wakinana je'ná tabéala nuláami wi'nijírami níili mapurigá suwábami niráa, echi walula níwala namuti. ²Echalí echi wabé níwami rijói bayegá ra'íchali echi tabéala nuláami, jeanigá: ¿Piri ju je'ná mapu echi auché jaré pagótami mi wi'nijí? Jipi ne suwaba níjé níwala namuti ku taraga ma auchécho ku tamí 'ya, mapujiti mujemi ma ketasi waminabi nochama mapurigá tabéala nuláami niráa, níjé níwala namuti jiti. ³Echalí echi tabéala nuláami jerigá 'nátali: ¿Pírini olama jipi? mapujiti keni walúlawa ma ketasi tamí nakiwi mapurigani nochama mapurigá tabéala nuláami niráa. Nijeni ketasi omero iwéami nocha. Ketásini omero wasaraya, nibilé choni omero ichayá, ayena cho nijeni we riwela wepi taga iyena namuti. ⁴Echalí échiko jerigá 'nátali: Mani galá machí mapurigani olama, mapurigá mapalí keni walúlawa ma tamí 'yesa echi nóchali, echalí echi auché jaré pagótami galá tamí risénsia 'yama echo'ná aboni pirélachi. ⁵Allí ibili niráa bayegá echi auché jaré pagótami mapu ikí wikeli echi binói walúlawa jerigá rukueli echi bacháwala: ¿Chu kípumi wiké echi keni walúlawa? ⁶Allí échiko ku níjewaga jeaneli: Nijeni wiké bilé kiento o'wéli sikolichi echi aceite. Echalí echi tabéala nuláami jeaneli: Jena'í oselichi osirúami ju mapu ikí mujemi wiké. ¡We sapú asagá, osá mápumi chopi wikema malisa makói o'weli sikolichi echi aceite! ⁷Pe wilibeko echi tabéala nuláami jeanigá rukueli auché bilé: ¿Mujé, chu kípumi wiké? Allí échiko jeaneli: Nijeni wiké bilé kiento alamuli turío. Echalí echi tabéala nuláami jeaneli: Jena'í oselichi osirúami ju mapu ikí mujemi wiké. ¡We sapú asagá osá mápumi chopi wikema osá naósamakóy alamuli echi turío! ⁸Echalí echi walula ne wabé yónali mapujiti echi tabéala nuláami echirigá 'yékaka olali, chopi echi walula arigá mayeli mapurigá echi tabéala nuláami ne wabé 'nátaga olali. Echalí Jesusi ayena cho jeaneli: Echi auché jaré ke bichiyami pagótami, jena'í wichimóbachi piréami, waminabi wabé 'yékaka bujéami ju ketasi mapurigá echi auché jaré Níjé níwala pagótami, si'néami mapu ikí bichíiko Riosi Ra'íchala.

⁹Echalí Jesusi ayena cho jeaneli: We galá kówasi jaré 'yemi níwala namuti echi auché jaré bichiyami pagótami mapu ikí we newalé. Ketasi chopi napabusí echi wikabé namuti níwalawami jena'í wichimóbachi, mapurigá echi auché jaré chati oláami pagótami we olánali. Allí a 'yémítamo echirigá galá kónami níisagá jena'í wichimóbachi, echalí echi jaré bichiyami mapu 'yémítamo we kówali jena'í wichimóbachi, aboni 'yemi mi wabé kaníliga narépama echo'ná ripá riwigachi, echalí mapalí 'yémítamo galá sebabu echo'ná. ¹⁰Echi jaré mapu ne bichíwali galabé olako mapalí aboni péebi olá, abóniko ayena cho ne bichíwali galabé olama mapalí aboni wabé simírami olá. Allí echi jaré mapu wabé 'yékaka olako mapalí aboni péebi olá, aboni ayena cho wabé 'yékaka olama mapalí aboni wabé simírami olá. ¹¹Echirigá ju mapu átamo ketasi galabé olásagá echi wikabé namuti níwarawami jena'í wichimóbachi nirúami yuwa, mapo'ná echi jaré pagótami wabé chati oláami ju, echalí Riosi ketasi cho 'yemi mi anema Binói kúchuwala niráa. ¹²Ayena cho átamo ketasi galabé olásagá auché jaré pagótami níwala namuti yuwa, 'yémítamo ketasi 'yárami níibo echi jaré namuti níwalawami mapu 'yemi aboni níwala níima.

¹³Ke wesi pióntami omérama nóchiya okuá o'wéala yuwa sinepi niráa. Mapujiti a echirigá olánalasagá, echi pioni biléala kichima siné káachi, echi auché biléala galema kéremá. Siné káachi echi bilé yuwa wabé kaníliga nochama, chopi echi auché bilé yuwa ketasi kaníliga nochama kéremá. Echijiti 'yémitamo ketasi omérabo Riosi níwala nóchali olayá, átamo sinepi niráa echi wikabé namuti níwalawami jiti chopi nóchaga olásagá.

¹⁴Echalí echi jaré Bariseo anilíwami binériami galá námali suwaba je'ná mapurigá Jesusi ra'íchali. Echi jaré aboni wabé korúkami níili wenomí, echijiti aboni we kichiga ra'íchaga sayérali mapurigá Jesusi echirigá nawésali. ¹⁵A'lí Jesusi jeaneli: 'Yémitamo wiká namuti olá mapurigá echi auché jaré pagótami mayema mapu 'yemi aboni wabé simírami galabé oláami ju. Chopi Riosi ne galá machí mapurigá 'yémitamo 'nata echo'ná pachana 'yemi sulálachi niráa. Ayena cho ne galá machisí 'yemi mapu echi Walubela Riosi arigá kichí echi jaré namuti mapu echi pagótami galabé mayé.

**Riosi nulalila galá osirúami níili, chopi Riosi ayena cho nuleli echi
jaré bichiyami pagótami echo'ná pachana aboni sulálachi niráa**

¹⁶Mapuyénasí nawali jena'í wichimóbachi echi Juani mapu pagóami níili, chopi nirúali Riosi nulalila osirúami mapurigá echi Moisesi osali; ayena cho nirúali Riosi Ra'íchala mapurigá echi jaré o'wéala Riosi jiti nawésami osali, chopi mapalí echi Juani nawali, echalí jonsa galá nawésarami níili echi we Galabé Ra'íchali jeanigá mapu Riosi ma galá nulé echi jaré galá bichiyami pagótami echo'ná aboni sulálachi niráa. A'lí mapuyíripi wabé nakiko, échiko galá omero echirigá bichiya. ¹⁷Arigá 'wérali ju mapu suwaba achigórígá ikimea mapurigá osirúami ju echo'ná Riosi nulalila oseríwalachi. Siné káachi ripá riwigachi suwaba suwibama, jena'í wichimóbachi ayena cho, chopi arigá ikimea ne suwaba mapurigá osirúami ju echo'ná Riosi nulalila oselíwalachi.

**Jesusi binera jeanigá mapu echi jaré mapu ma niwíami juko ketasi ku rojuama
(Mt. 19:1-12; Mr. 10:1-12)**

¹⁸Mapuyíripi ku ariwésagá binói upila, a'lí auché bilé yuwa upesa, échiko we chati olá, mapurigá ayena cho chati olá echi mapu niwíami ju mapalí si'nú yuwa kochí. A'lí echi mapu upeko echi mukí ariwérami, échiko ayena cho echirigá we chati olá.

Echi rijói wabé níwami, echi Lázaro ayena cho

¹⁹Bilé rijói wabé simírami níwami níili, echi mapu sinibí ne wabé galá simati napáchali; ayena cho sinibí rawé echi rijói ne wabé galabé ko'wali mapurigá omawa niráa. ²⁰Ayena cho echo'ná bitéali auché bilé rijói mapu ne wabé risúwati níili, echi mapu Lázaro riwéami níili. Échiko ne wabé buchuwíana chánami níili. Ayena cho binói sinibí rawé asali echo'ná echi wabé níwami rijói bitélachi yéwachi machímama. ²¹A'lí je'ná wabé risúwati rijói ne wabé 'locheli, mapuyénasí binói wabé nakili ko'náliya echi jaré wakichéami rimé mojuáami, echo'ná echi wabé níwami rijói bitélachi tibíami. Ayena cho echi jaré kochí echo'ná binói yuwa sisáa, we cha'mili binói chánawalachi. ²²Echalí siné rawé echi wabé risúwati rijói ma mukuli. A'lí echi jaré Riosi kapitánawala toli binói aliwala echo'ná ripá riwigachi mapo'ná echi walula Abrami ma asali Riosi yuwa. A'lí pe wakinana

echi wabé níwami rijói ayena cho mukuli. Echalí binói chu'wirótami níili. ²³A'lí mapalí echi wabé níwami rijói ne wabé chati risúu olárami níili echo'ná ri'lé riáblochi mapujiti binói ketasi bichíyami níili, echalí binói mikabé niráa 'néniga riwali echi walula Abrami echo'ná ripá riwigachi atíami, echi Lázaro ayena cho, mapujiti aboni galá bichíyami níili. ²⁴Echalí echi rijói mapu wabé níwami níili, wabé o'welí ra'íchaga jeaneli: ¡Keni onó Abrami, tamí we natimá! ¡Wakiná julá echi Lázaro, mapurigá binói makúsawala ba'wí jiti sa'méchasa, rorobáchanama níjé cha'mélawala, mapujiti nijeni ne wabé risúu olárami ju jena'í chati na'írali! ²⁵Echalí echi Abrami ku nijéwaga jeaneli: Rijói, galá 'natá mapurigami sinibí nareli echi wabé galabéala mapalimi abijí bitéali. Ayena cho 'natá mapurigá echi Lázaro risúu olárami níili. Chopi jipi rawé echi Lázaro ne wabé kaníratami ju jena'í tamí yuwa, chopi mujemi ma we risúu olárami ju, echo'ná wabé chati na'írali. ²⁶Ayena cho echi Abrami waminabi jeaneli: Suwaba je'ná jerigá ne bichíwali ju, chopi ayena cho tamujé yuwa, 'yemi yuwa nasipa ne wabé simírami ri'lé a'nagú koláatami niwárami ju. Echijiti mapuyíripi nakiko simárama jena'í jonsa echo'ná bo'ónala yénasí, mapo'ná 'yémítamo muchuwi, ketasi chirigá omérama. Nibilé wesi omérama simáriya echo'ná jonsa mapo'ná 'yémítamo muchuwi wakiná yénasí mapo'ná tamujé muchuwi. ²⁷Echalí echi rijói mapu wabé níwami níili, ma ku nijéwaga jeaneli: ¡Mujé Abrami mapurigá níjé onolá ju! ¡Perikó julá echi Lázaro echo'ná keni onó bitélachi! ²⁸Mapujiti abijí echo'ná muchuwi echi jaré malí níjé ritémawala; mapurigá echi Lázaro galá nawésaga ruyema aboni, mapurigá aboni ketasi ayena cho wakiná simama jena'í wabé chati na'írali mapo'ná nijeni ma ne wabé simírami chati risúu olárami ju. ²⁹Chopi echi Abrami ku nijéwaga jeaneli: Aboni ma níwa Riosi Ra'íchala oserúami mapurigá echi Moisesi osali, ayena cho mapurigá echi auché jaré Riosi jiti nawésami osali. ¡Galá níima aboni echirigá galá nijéwaga olasa! ³⁰Chopi echi rijói mapu wabé níwami níili ma ku nijéwaga, jeaneli: Siné káachi aboni ketasi bichíima mapurigá osirúami ju echo'ná Riosi Ra'íchala oselíwalachi, chopi a bilé rijói echo'ná aboni yuwa ku simisáagá mapu ma ku owínali mapalí binói ma mukúami níili, echalí aboni ne bichíwali galá bichíiga ku ro'wima Riosi yuwa, mapurigá aboni ku wikawárami níima. ³¹Chopi echi Abrami ku nijéwaga jeaneli: A aboni ke nakisáagá bichíinala mapurigá osirúami ju echo'ná Riosi Ra'íchala oselíwalachi, mapurigá echi Moisesi osali, echi auché jaré Riosi jiti nawésami ayena cho, echalí aboni ketasi cho bichíima a bilé rijói ku owínsa mapalí binói ma mukúami níili.

Echi riablo sinibí chati olántama echi pagótami

(Mt. 18:6-7, 21-22; Mr. 9:42)

17 Echalí Jesusi ra'íchaga echi jaré yuwa mapu Binói binérali, jerigá ameli: Echi riablo sinibí chati olántama jena'í wichimóbachi piréami pagótami. ¡Chopi arígá wabé risúu olárami níima ibili rijói mapu ikí chati olara auché jaré! ²Ne bachá niráa ne galá níimili bilé rijói waminá walú ba'wírali pátami níisa, echo'ná binói kutálachi bilé matá jiti bulugá, mapurigá échiko ketasi chati olárama echiyiri táká mapu tamí jiti bichíiko. ³Ne galá tibusi 'yemi aboni niráa. A echi kemi rijimá we chati ologá mi sayérasagá, ku galá ra'ámaga ruyé. A'lí a binói galá ku wikáwali tásagá, galá ku wikawi. ⁴Ayena cho a échiko mi we chati ologá sayérasagá kicháosa chokéami siné rawé niráa, ayena cho a binói kicháosa chokéami mi jeanésagá:

Ma ketásini auchecho siné echirigá olama. Echalí galá níima mujemi ayena cho kicháosa niráa ku wikawasa echi binói.

¡Tamujé tamí 'ya mapurigata waminabi gala bichíibo!

⁵Echalí echi jaré mapu Jesusi júuli nawisánala, si'néami je'ná jerigá aneli echi Walubela Jesusi: ¡Tamujé tamí 'yá mapurigata waminabi galá bichíibo! ⁶Echalí echi Walubela Jesusi jeaneli: Je'ná sikómoro anilíwami namuti ne walú ju mapu chulú rojuá, ayena cho echi táchia mostasa anilíwami rakala ne wabé tabéala ju. Chopi Nijé 'yemi nimí ané mapu átamo ne bichíwali pée táchia niráa bichísagá Riosi mapu chulú bilé táchia mostasa rakala, echalí átamo jeanésagá je'ná walubé sikómoro anilíwami: ¡Jena'í jonsa suwaba machínaga, nawala así, echo'ná tu walubé ba'wírali wilimé! ¡Nijeni 'yemi nimí ané mapu je'ná walú namuti mapu chulú bilé rojuá, echalí we yáati 'yemi mi galá ku nijéwaga, ne bichíwali echirigá olama!

Galá níima bilé pioni galá nijéwaga nochasa

⁷A bilé 'yemi níwala pioni we wasaraga nocha inasa, namuti nisea kéremá, mapalí échiko ku nawá echo'ná bitichí, ke wesi 'yemi we yáati jeanema echi pioni jeanigá: ¡Simiró mujé! ¡We yáati asagá, galá ko'wá! ⁸Chópitamo bachá niráa jerigá anema: Bachá galá a'lari mujé mapurigá nijeni galá ko'mea. A'lí pée jubáami mujemi ayena cho ko'mea. ⁹Ayena cho Jesusi jeaneli: Nijeni mayé mapu ke wesi 'yemi ne walubé natétara 'yama mapalí bilé 'yemi níwala pioni echirigá galá nijéwaga olasa mapurigá 'yémítamo nuleli olánala, mapujiti échiko chopi olali mapurigá mujemi nuleli olánala. Binói ketasi waminabi wabé simírami galabé olali. ¹⁰Echirigá achigórigá níima mapalí 'yémítamo ma sébali olali mapurigá Riosi 'yemi mi nulé. Echalí chopi jerigá anesi Riosi: Tamujé ketasi wabé simírami galabé oláami pióntami juta, mapujiti tamujeta chopi olali mapurigá arigá 'wéraili níili mapurigata olabo. A'lí tamujeta ketasi waminabi wabé simírali olali.

Jesusi ku sa'wali makói rijói mapu wabé chati cha nayúkami níili

¹¹Echalí rawé mapalí Jesusi inárali echo'ná Jerusalémachi simiyá, echalí Binói nasipa simírali echo'ná Samáriachi aniliwachi kawírali, echo'ná Galiléachi anilíwachi kawírali yuwa. ¹²A'lí mapalí Jesusi nawama riwéali echo'ná biléana rijówachi, echalí makói rijói wabé chati cha nayúkami natipábiya simasa, echo'ná mikabé 'nagá jábali. ¹³Echalí aboni o'weli ra'íchaga jeaneli: ¡Binériami! ¡Mujé Jesusi, tamujé tamí wabé natimá! ¹⁴Mapalí Jesusi galá riwali echi aboni, echalí Binói jeaneli: ¡Ku simíbaga 'nérasi echi jaré sacerdote mapurigátamo ma ku sa'wárami ju! A'lí mapuyénasí aboni echirigá ku kuwana sírali, echalí aboni ke sayiná ma galá ku sa'wíami níili. ¹⁵Chopi bilé aboni riwisáa mapu binói ma galá ku sa'wárami níili, echalí binói auchecho ku kuwana ro'wili mapo'ná Jesusi inárali, a'lí echi rijói o'weli ra'íchaga ne wabé Walubela aneli Riosi. ¹⁶Ayena cho binói echo'ná bacháami Jesusi yuwa weéemi raweka chokóbaga wiligá ne walú natétara 'yali. A'lí echi rijói echo'ná Samáriachi bitéami níili, échiko ketasi Juríosi pagótami níili. ¹⁷Echalí Jesusi ku nijéwaga jeanili: Makói níili mapu galá ku sa'wárami níili, chopi echi auché jaré kímakói ma ku simíbali. ¹⁸Ke wesi aboni ku ro'wiga, walú natétara 'yali Riosi. Je'ná si'wina bitéami rijói chopi walú natétara 'yali. ¹⁹Echalí Jesusi jeaneli: ¡Wiliska, ku simigá! Mujemi ma galá ku sa'wárami ju mapujítimi tamí bichíili.

Mapurigá Riosi nulema echí pagótami

(Mt. 24:23-28, 36-41)

²⁰Echalí echí jaré Bariseo anilíwami binériami rukueli Jesu mapu chu kil'buko Riosi galá nulema riwéali echí pagótami jena'í wichimóbachi piréami. A'lí Jesu ku nijéwaga jeaneli: Mapalí Riosi galá nulé echí pagótami, 'yémítamo ketásirapé namuti riwiboa. ²¹Nirapétamo jerigá aniboa: ¡Nibila, jena'í Riosi galá nulé echí pagótami! Nirapétamo jeaniboa keremá: ¡Nibila, echo'ná auché biléana Riosi galá nulé echí pagótami! Mapujiti Riosi chopí nulé echí pagótami echo'ná pachana aboni sulálachi niráa.

²²Echalí Jesu jeaneli echí jalé mapu Binói binérali: Waminánomí rawé 'yémítamo ne wabé simírami nakiboa 'nénala auché bilé Nijé rawéwala, chópitamo ketasi riwiboa. Nijeni wilálami níili mapurigá Ku'wíriami niráa. ²³Echalí rawé jaré pagótami 'yemi mi jeanema: ¡Echi Walubela Jesucristo jena'í atí! 'Yémi mi jeanema keremá: ¡Echi Walubela Jesucristo echo'ná auché biléana atí! Chopí ketasi echo'ná simasi, nibilé najátasi echirigá nawésami, mapujiti Nijeni ketasi chiná niráa nawama. ²⁴Mapujiti mapurigá echo'ná ripá nolílali ne wabé ni'wika simí echo'ná panina jonsa, echo'ná tu bo'ónala yénasí, echirigá achigórigá Nijeni ku nolínama echalí ne jubá rawé, Nijé rawéwalachi. Nijeni wirálami níili mapurigá Ku'wíriami niráa. ²⁵Chopi bachá niráa arigá 'wérali ju mapu jipi piréami pagótami tamí wabé risíu olama; ayena cho aboni ketasi tamí narema, mapujiti aboni wabé tamí kichima. ²⁶A'lí mapurigá ikili chabé ki'yá rawé mapalí echí Noé riwéami rijói bitéali, echirigá achigórigá ikimea echalí ne jubá rawé, Nijé rawéwalachi. Nijeni wilálami níili mapurigá Ku'wíriami niráa. ²⁷Echalí rawé echí jaré pagótami jena'í wichimóbachi piréami chopí wabé ko'ogá, bajiga muchili, ayena cho echí jaré rijói we jubeli, ayena cho aboni we risénsia 'yali mapurigá aboni a'mala we ukunema, mapuyénasí sébali echalí rawé mapalí echí Noé bakili echo'ná pachá walubé kalírali, echo'ná walú ba'wírali moba yénami, arka anilíwami. Echalí ne walubé ukugá, suníami jena'í wichimóbachi ne ripabé buchíli ba'wí. A'lí ne si'néami echí jaré pagótami waminá suwili. ²⁸Echirigá ayena cho achigórigá ikili chabé ki'yá rawé mapalí echí Lote riwéami rijói bitéali. Echalí echí pagótami ayena cho chopí wabé ko'wali, wabé bajili, ayena cho aboni wabé ralali, rarinéali ayena cho, ayena cho aboni wepi ichagá nóchali, ayena cho aboni kaliraya nóchali. ²⁹Chopi echalí rawé mapalí echí Lote ma ku machírali echo'ná Sorómachi anilíwachi walúlachi jonsa, echalí rawé echo'ná ripá riwigachi jonsa we rujuili na'l rajáami, echí asújiri anilíwami rajáami ayena cho. Echalí ne si'néami echí jaré pagótami echo'ná piréami suwábarami níili. ³⁰Echirigá achigórigá níima echalí ne jubá rawé mapalí Nijeni ku nolínama jena'í wichimóbachi. Nijeni wilárami níili mapurigá Ku'wíriami niráa.

³¹Echalí rawé sébachi a jaré 'yemi echo'ná 'yemi kalílachi mulubé machímama muchísagá, ayena cho a níwasagá jaré namuti echo'ná pachá kalírali, ketasi auchecho ku mo'wisí echo'ná pachá, jaré 'yemi níwala namuti uboya, chopí we yáati waminá júmsasi. Ayena cho a jaré 'yemi echo'ná kawichí 'yénasagá, ketasi cho ku ro'wisi echo'ná kepu bitichí, chopí we yáati waminá júmsasi. ³²Auchecho galá 'natasi mapurigá chabé ki'yá ikili echí Lote riwéami rijói upila. ³³Mapujiti mapuyíripi chopí kanílaga bitéranaliko jena'í wichimóbachi, échiko arigá waminá mukumea. Chopí mapuyíripi arigá mukusáagá mapujiti binói chopí olánali mapurigá

Nijeni nakí, échiko arigá sinibí niráa ku bitélama. ³⁴A'lí Jesusi waminabi jeaneli: Echalí mapalí Nijeni ke sayiná ku nolínama, echalí okuá napawika kochigá bitíami níima. Echalí Nijeni ke sayiná tomea bilé, chópini ariwema echi auché bilé. ³⁵A'lí okuá mugúí napawika batíu uchútami níima. Echalí Nijeni tomea bilé, chópini ariwema echi auché bilé. ³⁶Ayena cho echalí rawé okuá rijói echo'ná kawichí 'yénami níima. Nijeni ke sayiná tomea bilé, chopi ariwémani echi auché bilé. ³⁷Echalí echi jaré mapu Jesusi binérali we jeanigá rukueli: ¿Walubela, kumi ariwérami níima echi jaré? Chopi Jesusi ku nijéwaga jeaneli: Mapo'ná bilé mukúami namuti bu'wí, echo'ná ayena cho we ko'poya napawima echi jaré wilú. Echirigá ayena cho mapalí echi jaré pagótami ketasi sinibí piréami ju, echalí aboni chopi waminá kastigo 'yárami níima.

Jesusi binera bilé kunámami jiti rugá, bilé walula komisario jiti ayena cho

18 Echi Walubela Jesusi ayena cho je'ná jerigá irétaga binérali echi pagótami, jeanigá mapu arigá 'wérali ju mapu aboni sinibí rawé ra'ichama Riosi yuwa, ayena cho mapu aboni ketásirapé siné ariwema echirigá Riosi yuwa ra'icha. ²Echalí Jesusi jeanigá irétaga ra'ichali: Bilé walula komisario bitéali echo'ná biléana walúlachi, echi mapu ketasi majali Riosi, nibilé cho o'wikeli echi auché jaré pagótami. ³Ayena cho echo'ná bitéali bilé mukí kunámami, echi mapu wisabé echo'ná echi komisario yuwa nawagá jeanili mapu binói kastigo 'yama auché bilé rijói mapu we sayérali binói mukí kunámami. ⁴Echalí wi'llibé rawé iyénasí echi komisario ketasi nakili nijéwanala echi mukí kunámami. Chopi echi mukí abijí waminabi tánali justicia, echijiti pe wakinana echi komisario je'ná jerigá 'nátali: Nijeni ketasi majawá Riosi, nibilé choni o'wiké echi auché jaré pagótami, ⁵chopi mapujiti je'ná mukí kunámami we tamí kumé, nijeni arigá olíma justicia, mapurigá binói ketasi waminabi tamí yuwa nawagá, waminabi wabé simírami tamí kumema. ⁶A'lí echi walubela Jesusi jeanili: Echirigá 'nátali bilé walula komisario mapu ketasi galabé oláami níili. ⁷Nijé 'yemi nimí jeané mapu echi Walubela Riosi ayena cho justicia olíma echi jaré mapu Binói chapili, si'néami mapu ikí Riosi yuwa tániga ra'icha sinibí rawé, sinibí rokogó niráa. Nijé 'yemi nimí ané mapu Riosi ketasi wi'lí sima ku'wíriya aboni. ⁸Ne bichíwali Nijé 'yemi nimí ané mapu Riosi we yáati ku'wírama aboni. Chopi mapalí Nijeni ku nolínama jena'í wichimóbachi, ¿áchani abijí riwimea jaré galá bichíyami pagótami? Nijeni wilárami níili mapurigá Ku'wíriami niráa.

Jesusi binela bilé Bariseo anilíwami binériami jiti bilé wenomí napabúami jiti ayena cho

⁹Ayena cho Jesusi jerigá irétaga binérali echi jaré pagótami mapu aboni chopi niráa we galabé niráa mayeli, chopi aboni ketasi 'me galabé nírali echi auché jaré pagótami. Echalí Jesusi jeaneli: ¹⁰Siné rawé okuá rijói echo'ná walubé Juríosí ri'obáwalachi Riosi yuwa ra'ichábiya simíbali. Bilé aboni echi Bariseo anilíwami binériami níili. Echi auché bilé rijói wenomí napabúami níili. ¹¹Echalí echi bilé rijói mapu Bariseo anilíwami binériami níili, échiko echo'ná ri'obachi wiligá, mapurigá Riosi yuwa ra'ichaga niráa, jeanili: Mujé Riosi, nijé nimí walú natétara 'ya mapujiti nijeni ketasi mapuyiri echi auché jaré pagótami ju. Nijeni ketasi chigórami ju. Nibilé choni chati oláami ju. Nibilé choni isena mugúí yuwa kochí. Nibilé choni chati oláami ju mapurigá je'ná rijói wenomí napabúami. ¹²Ibili tarali nijeni osá

chokéami ketásirapé ko'wá wi'libé niráa, mapalini chopi Riosi yuwa ra'íchaga olá; ayena choni echí makói, bilé 'yeka, 'yani Riosi, suwaba namuti mapu ikí nijeni mé. ¹³Chopi echí wenomí napabúami mikabé 'naka niráa wiligá, ketasi nakili nirapé mapu echo'ná ripá riwigachi 'ninama; chopi binói jerigá anigá we cho'nali binói sulálachi: ¡Mujé Riosi tamí galá natimaga, tamí ku wikawi, mapujiti nijeni we chatí oláami ju! ¹⁴Echalí Jesusi waminabi jeaneli: Nijé 'yemi nimí jeané mapu echí wenomí napabúami rijói ma ku wikawárami níili echalí mapalí binói ku simili, chopi echí Bariseo anilíwami binériami ketasi cho ku wikawárami níili. Mapujiti mapuyíripi a binói niráa walúlawako, échiko arigá wabé tabéalatami níima, chopi mapuyíripi a binói niráa we tabéalatako, échiko arigá walúratami níima.

Echi jaré pagótami pali aboni kúchuwala echo'ná Jesusi yuwa (Mt. 19:13-15; Mr. 10:13-16)

¹⁵Ayena cho jaré pagótami echo'ná pali jaré kúuchi mapurigá Jesusi, Binói sikala jiti, nochama aboni. Chopi echí jaré mapu Jesusi binérali, aboni we ra'ámaga aneli echí pagótami mapu ketasi echirigá pama echí kúuchi. ¹⁶Chopi Jesusi bayegá echí jaré mapu Binói binérali, echalí jeaneli: Ariwesi mapurigá echí jaré kúuchi tamí yuwa simea. Ketásirapé kumesi aboni, mapujiti Riosi we galá nulé si'néami echiyiri bichíyami. ¹⁷A'lí Jesusi waminabi jeaneli: Ne bichíwali Nijé 'yemi nimí jeané: Ne si'néami echí jaré kúuchi galá bichíi Riosi. Chopi echí jaré pagótami mapu ketasi echirigá achigórigá bichíiko Riosi, aboni ketasi chirigá Riosi níwala níima.

Bilé rijói wabé níwami, Jesusi yuwa ra'íchali (Mt. 19:16-30; Mr. 10:17-31)

¹⁸Echalí bilé rijói walula, Jesusi yuwa ra'íchaga, jerigá rukueli: Wabé galabé Binériami, ¿churigani galabé olama mapurigani echijiti sinibí niráa bitérama? ¹⁹A'lí Jesusi ku nijéwaga jeaneli: Mujemi tamí ané mapu Nijeni wabé galabé ju. ¡Ne bichíwali Nijeni galabé ju, mapujiti chopi Riosi bi'néripi wabé galabé ju! ²⁰Mujemi galá machí mapu Riosi je'ná jerigá nulé echí pagótami: Ketasi kochí auché bilé si'nú mukí yuwa. Ketasi wesi mi'yá auché jaré pagótami. Ketasi chigó. Ketasi 'yékaka nawisá, auché jaré sayéraga. Ne galá galé echí kemi onó, echí kemi iyé omá. ²¹Echalí echí rijói ku nijéwaga jeaneli: Nijeni ne galá nijéwaga olali suwaba je'ná jeyiri mapalí jonsa nijeni wabé táo níili. ²²Mapalí Jesusi je'ná jerigá námali, echalí Binói jeaneli: Mujemi ketasi cho olali bilé namuti mapu arigá 'wérali ju oluwwawa: Ma ku rarinéaga suwaba namuti mapu ikimi niwa, echí natigala nachútaga 'ya echí jaré tisúwati. Echalí mujemi wabé níwami níima echo'ná ripá riwigachi. A'lí wakiná simigá tamí najató. ²³Chopi mapalí echí wabé níwami rijói je'ná jerigá námali, echalí binói ne wabé siweli, mapujiti binói ne wabé níwami níili. A'lí binói ketasi nakili 'yánala suwaba echí jaré binói níwala namuti echí jaré tisúwati.

²⁴Mapalí Jesusi riwali mapurigá echí wabé níwami rijói ne wabé siweli, echalí Jesusi jeaneli: ¡Ne wabé nójchali ju mapurigá echí jaré wabé níwami pagótami galá nijéwaga olama mapurigá Riosi nulé! ²⁵A'lí Jesusi waminabi jeaneli: Echi kameyo anilíwami namuti ne walú ju mapurigá bilé kawé niráa, chopi echí kameyo siné káachi ketasi 'me nójchali ologá simíramiré echo'ná biléana wichárali uchíi iwáachi. Chopi ne wabé simírami nójchali ju mapurigá echí jaré wikabé namuti níwami pagótami galá nijéwaga olama mapurigá Riosi nulé. ²⁶Echalí aboni je'ná jerigá namsa

jeanili: ¡A echirigá ne bichíwali níisagá, a'lí ke wesi galá ku wikawárami níima! ²⁷Chopi Jesusi ku nijéwaga jeaneli: Echi jaré pagótami ketasi omero je'ná jerigá olayá, chopi Riosi ne galá omero, mapujiti Riosi suwaba namuti galá omérami ju.

²⁸Echalí echi Pegro jeaneli: ¡Walubela, tamujé ma ariweli ne suwaba tamujé níwala namuti, mapurigata mi yuwa najátali! ²⁹Echalí Jesusi ku nijéwaga jeaneli: Jaré mapu tamí bichíko ne bichíwali ma ariweli kepu kalí mapujiti aboni wabé olánali mapurigá Riosi nulé aboni. Auché jaré ma ariweli kepu 'wénawa mapujiti aboni olánali mapurigá Riosi nulé aboni. Auché jaré echijiti ariweli kepu ritémawa. Auché jaré echijiti pe teli niráa ariweli aboni jubila. Auché jaré echijiti pe teli niráa ariweli aboni kúchuwala. ³⁰Echalí Jesusi ayena cho waminabi jeaneli: Mapuyíripi echirigá olásagá mapujiti binói tamí wabé galé, échiko waminabi wabé simírami narema jena'í wichimóbachi, ayena cho échiko 'yárami níima mapurigá binói ne sinibí niráa bitélama Riosi yuwa echo'ná ripá riwigachi.

Jesusi auchecho siné bachá niráa aní mapu Binói mi'lirúami níima

(Mt. 20:17-19; Mr. 10:32-34)

³¹A'lí Jesusi pe waná bayegá echi jaré makói miná okuá mapu Binói nawésanalaga júuli, echalí jeaneli: Jipi mata echo'ná Jerusalémachi simabo. Echo'ná ma sébali ikimea ne suwaba mapu ikí echi jaré Riosi jiti nawésami bachá niráa tamí jiti rugá osali. Nijeni wilárami níili mapurigá Ku'wíriami niráa. ³²A'lí echo'ná Jerusalémachi piréami pagótami tamí nijima mapurigá echi auché jaré si'wina piréami pagótami tamí kastigo 'yama. A'lí aboni tamí wabé chati anega tiníchama, ayena cho aboni wabé tamí kichiga riwélatama, ayena cho aboni tamí wabé kachípama. ³³A'lí ma tamí wabé cho'nisáa, aboni tamí mi'limea; chopi ma bikiyá chi'rigá Nijeni auchecho ku owínama. ³⁴Echalí aboni tarapé galá machili je'ná jeyili. Aboni nirapé machili churékula Jesusi echirigá ra'íchali, mapujiti aboni ketasi omérali echirigá machiyá.

Jesusi ku sa'wali bilé rijói ke machíliami

(Mt. 20:29-34; Mr. 10:46-52)

³⁵A'lí mapalí Jesusi mulubé inárali echo'ná Jerikochi anilíwachi walúlachi simiyá, echalí bilé ke machíriami echo'ná mulubé buwichí, namuti tása asali. ³⁶A'lí ma namsa echo'ná simárachi echi wikabé pagótami, echalí echi ke machíliami we rukueli mapu piri jiti echirigá simárati. ³⁷Echalí binói jeanélati mapu echi Jesusi, echo'ná Nasarétachi bitéami, echo'ná simíraga inárali. ³⁸Echalí we yáati o'weri ra'íchaga jeaneli: ¡Mujé Jesusi, mápumi echi Rabiri ranala ju, tamí wabé natimá! ³⁹Echalí echi jaré pagótami mapu bacháami sírali, si'néami we yónaga ra'ámali; chopi echi ke machíliami waminabi wabé o'weli ra'íchaga jeaneli: ¡Mujé Rabiri ranala tamí wabé natimá! ⁴⁰A'lí Jesusi echo'ná wilíbaga nurali mapu echi ke machíriami echo'ná párami níima. A'lí mapalí ma echo'ná pálati, echalí Jesusi jeanigá rukueli: ⁴¹¿Churigá mi nakí mapurigá Nijé nimí olama? Echalí echi ke machíriami jeaneli: ¡Walubela, tamí ku machíliami niwá! ⁴²Echalí Jesusi jeaneli: ¡Galá ku 'niná! Mujemi ma galá ku sa'wárami ju mapujítimi galá tamí bichíili. ⁴³A'lí echi rijói mapu ke machíliami níili, we yáati ma galá ku omérali 'nénuya. Echalí binói ne wabé Walubela anega Riosi, we najátali echi Jesusi yuwa echo'ná buwichí. A'lí ne si'néami pagótami je'ná jerigá riwisáa, ne wabé galabéraga aneli Riosi.

Jesusi ripili echo'ná Sakeo bitélachi

19 Echalí Jesusi ma bakisá echo'ná Jerikochi anilíwachi walúlachi, echo'ná simíraga inárali. ²A'lí echo'ná walúlachi bitéali bilé rijói, Sakeo riwéami, mapu ne wabé níwami níili. Ayena cho je'ná rijói ne walula níili echí auché jaré wenomí napabúami yuwa. ³Je'ná Sakeo wabé nakili 'néniga machináriya echí Jesusi, chopi binói tarapé chirigá omérali 'nénija, mapujiti ne wikabé auché jaré pagótami wabé cha'igá, noligá 'yénali Jesusi yuwa. Ayena cho echí Sakeo we téeli níili. ⁴Chopi echí Sakeo echo'ná bacháami we 'maga, ripá moli echo'ná ripá biléana sikómoro anilíwamichi, mapuyiri rojuá. Echi Walubela Jesusi echo'ná simírama riwéali. A'lí echí Sakeo echo'ná ripáami asagá, we nakili 'nénala. ⁵Echalí mapalí Jesusi echo'ná nawali, Binói echo'ná ripá 'néniga, galá riwisáa echí Sakeo, echalí jeaneli: Mujé Sakeo, we sapú ku rikina, mapujiti jipi rawé arigá ju mapu Nijeni ripima echo'ná mujé bitélachi. ⁶Echalí echí Sakeo we sapú ku rikínaga, we kaníлага narépali echí Jesusi. ⁷Chopi mapalí echí auché jaré wikabé pagótami je'ná jerigá riwali, echalí si'néami aboni chótali we sayéraga ra'ícha, mapujiti aboni anili mapu Jesusi ma chilibámiya simili echo'ná bilé wabé chati oláami rijói bitélachi. ⁸Echalí echí Sakeo wilísaga jeaneli echí Jesusi: ¡Nibira keni Walubélawa, nasípasíni 'yama echí jaré tisúwati mapu ikí namuti nijeni niwa! Ayena cho chabénala niráa a nijeni jaré namuti 'yékaka 'yésagá, jipi nijeni auchéchoko ku kuwana 'yama, nawosa chokéami niráa. ⁹A'lí Jesusi jeanili: Jipi rawé ma ku wikawárami níili jena'í kalírali bitéami, mapujiti je'ná rijói ayena cho, bilé echí ki'yá bitéami Abrami pagótuala ju. ¹⁰Ayena cho Jesusi jeanili: Nijeni wilárami níili mapurigá Ku'wíriami niráa, ayena cho Nijeni we ámiya, ku ku'wílimiya nawali echí jaré pagótami mapu ma wikáami níili.

Jesusi binera echí jaré makói namuti wenomí jiti rugá

¹¹Echalí mapuyénasí echí pagótami galá námali je'ná jerigá ra'íchachi Jesusi, echalí Binói auchecho siné irétaga ra'íchali aboni, mapujiti aboni ma ne mulubé sísalí echo'ná Jerusalémachi, ayena cho mapujiti si'néami pagótami mayeli mapu Riosi we yáati nulema riwéali jena'í wichimóbachi piréami pagótami. ¹²Echalí Jesusi jerigá irétaga nawésali: Bilé rijói walula waminá mikabé auché biléana kawírali simili mapurigá binói wirárami níima mapurigá walubela silíami niráa echo'ná binói kawíwalachi, mapurigá mapalí binói ma ku nawasa echo'ná binói kawíwalachi, echí ne walubela nuráami níima. ¹³Chopi mapalí ke cho simili, echí walula bayegá makói echí jaré binói piónownala, ibili niráa 'yali bilé wabé natéami namuti wenomí. A'lí binói jeaneli ibili aboni: Namuti ralagá, auchecho ku raninéaga galá ku mesi auché jaré wenomí, mapuyénasí nijeni ku nawama. ¹⁴Chopi echí auché jaré pagótami echo'ná echí rijói kawíwalachi piréami wabé kichiga auché jaré jubáami jeanigá júuli: ¡Tamujeta ketasi nakí mapurigá je'ná rijói wilárami níima mapurigá tamujé walubela silínawala niráa!

¹⁵Chopi echí rijói arigá wilárami níili mapurigá ne walubela silíami niráa. A'lí binói ma ku nawali echo'ná binói kawíwalachi. Echalí binói bayénala júuli echí jaré makói pioni mapu 'yárami níili echí wenomí, mapurigá binói gala machimea mapu chu kipu meli ibili pioni. ¹⁶Echalí echí bilé mapu bachá nawali, échiko jeaneli: Walula, echí mujé níwala wabé natéami namuti wenomí

ma auché jaré makói muwéali. ¹⁷Echalí echi walula silíami ku nijéwaga jeaneli: We galá juko. Mujé we galabé pióntami jumi. Mami pe okuabi jiti galá bichíwali olali. Jipi nijé nimí wilama walula nuláami niráa echo'ná makóina o'wéalachí. ¹⁸Echalí auché bilecho jeanísiya nawali: Walula, echi mujé níwala wabé natéami namuti wenomí ma auché jaré malí muwéali. ¹⁹A'lí echi walula silíami ayena cho jeaneli: Jipi nijé nimí wilama walula nuláami niráa echo'ná malíana o'wéalachí. ²⁰A'lí auché bilé jeanísiya nawali: Walula, jena'í atí mujé níwala we natéami namuti wenomí, mapu nijeni echo'ná biléana wisibúlachi rakoka katéwali. ²¹Mapujiti nijé nimí ne wabé majali mapujiti mujemi wabé aparúami ju. Mujemi auchecho ku chapí echi jaré namuti mapu mujemi ketasi muchúwali; ayena chomi we 'wi mapo'ná mujemi ketasi ichali. ²²Echalí echi walula silíami jeaneli: ¡Mujé pióntami wabé chati oláami jumi! Mapurigá mujé binói anili, echirigá nijé nimí wi'nijima. Mujemi galá machili mapu nijeni we aparúami níilo; ayena chomi galá machili mapu nijeni ku chapí echi jaré namuti mapu nijé ketasi muchúwali, ayena cho mapu nijeni we 'wí mapo'ná nijeni ketasi ichali. ²³¿Churékula bichemi ketasi nijali echi nijé níwala wabé natéami namuti wenomí, echi jaré wenomí tibúami yuwa? A'lí nijeni ku narema riwéali echi nijé níwala wenomí, ayena cho echi auché jaré mapu muwema riwéali, mapalí nijeni ma ku nawasa echo'ná nijé bitélachi. ²⁴A'lí echi walula silíami jeaneli echi auché jaré echo'ná muchúami: Ku 'yesi echi wabé natéami namuti wenomí. A'lí 'yasi echi mapu ma niwa makói wabé natéami namuti wenomí. ²⁵Chopi aboni jeaneli: ¡Walubela, échiko ma niwa makói wabé natéami namuti wenomí! ²⁶Echalí echi walula silíami ku nijéwaga jeaneli: Echi mapuyíripi wikabé níwako, waminabi auché jaré 'yárami níima. Chopi echi mapuyíripi ketasi wikabé níwako, échiko waminabi 'yérámi níima echi jaré pée okuáa mapu binói abijí niwa. ²⁷Ayena cho echi walula silíami waminabi jeaneli: Wakiná tosí echi jaré nijé sayela mapu ketasi nakili mapu nijé, aboni silínawala níima. ¡Waminá ko'wisí si'néami aboni jena'í bacháami tamí yuwa!

Jesusi ma bakili echo'ná Jerusalémachi

(Mt. 21:1-11; Mr. 11:1-11; Jn. 12:12-19)

²⁸A'lí ma je'ná jerigá anisáa, Jesusi waminabi inárali echo'ná Jerusalémachi simiyá. ²⁹Echalí mapalí Binói ma mulubé sébali echo'ná Betajechi, echo'ná Betániachi ayena cho, mapo'ná mulubé ju echo'ná ripá rabó Olíbochi anilíwachi, echalí Jesusi okuá júuli echi jaré mapu Binói binérali. ³⁰A'lí Jesusi jeaneli: Echo'ná mulubé rijówachi simíbaga. A'lí mapalítamo echo'ná sebasa, 'yémítamo riwiboa bilé bulito wíira chukúami, echi mapu ketasi cho binératami ju. ¡Botánaga, wakiná tosí! ³¹Chopi a jaré 'yemi mi jeanigá rukuésagá: ¿Churékulátamo botana? Echalí Jeanesi: ¡Echi Walubela Jesusi we newalé! ³²Echalí echi jaré mapu Jesusi júuli, echo'ná simíbaga achigórigá riwali mapurigá Jesusi bachá niráa aneli aboni. ³³A'lí mapalí aboni ma botana uchútali echi bulito, echalí echi bulito níwami jeanigá rukueli: ¡Churékulátamo botana echi bulito? ³⁴Echalí echi jaré Jesusi yuwa binéami jeaneli: Tamujeta toboa mapujiti echi Walubela Jesusi we newalé. ³⁵A'lí aboni toli echi bulito echo'ná mapo'ná Jesusi asali. Echalí ma aboni kimala jiti pérasa echi bulito, aboni 'yali echi bulito mapurigá Jesusi asema. ³⁶A'lí

auché jaré pagótami we pérasali aboni kimala echo'ná buwichí mapo'ná Jesusi simírama riwéali echi bulito asigá. ³⁷A'lí Jesusi ma mulubé ripuna simírama riwéali biléana buwichí mapo'ná echo'ná ripá rabó Olíbochi anilíwachi jonsa ko'nana simiwámami ju. Echalí si'néami echi jaré bichiyami mapu Binói yuwa najátali ke sayiná chótali wabé kaníliga o'weli ra'icha anega mapu Riosi ne wabé Walubela ju. A'lí echi jaré bichiyami echirigá ne wabé simírami kaníili mapujiti aboni auchecho newalali mapurigá aboni chabénala riwali mapalí Jesusi wisabé wabé omériga olali mapurigá ke wesi auché jaré pagótami omero olayá. ³⁸Echalí echi jaré bichiyami o'weli ra'íchaga jeanili: ¡Ne wabé galabé ju je'ná Walubela Silíami mapu ma inaro mapujiti echi Walubela Riosi júuli! ¡Ayena cho Riosi 'yama mapurigá Binói pagótamawala kilí ologá pirélama echo'ná ripá riwigachi! ¡Waminabi wabé Walubela nílaga Riosi!

³⁹Echalí jaré Bariseo anilíwami binériami ayena cho echo'ná 'yénali echi auché jaré wikabé pagótami yuwa. Aboni jeanili: Binériami, joyériga ra'amá echi jaré mapu Mujé binérali! ⁴⁰Chopi Jesusi ku nijéwaga jeanili: ¡Nijé 'yemi nimí ané mapu a je'ná jaré ketasi echirigá anisáagá, echalí echi jaré rité o'weli niráa echirigá ra'ichámire!

⁴¹A'lí mapalí Jesusi ma mulubé sébali echo'ná Jerusalémachi anilíwachi walúlachi, ma galá 'néniga echi walúlachi, Jesusi wabé natimaga echo'ná piréami pagótami, wabé nalali. ⁴²Echalí Jesusi jeanili: ¡Ne galabé níimili jena'í Jerusalémachi piréami pagótami machiságá mapurigá Nijeni omérami ju ayá mapurigá aboni kilí ologá pirélama! Jipi rawé jena'ini atí, chopi aboni ketasi machí mapurigá Nijeni ku'wírama riwéali aboni. ⁴³Echalí Jesusi ayena cho jeanili: Waminánomí rawé jena'í Jerusalémachi piréami pagótami ne wabé risíu olálami níima, mapujiti echi jaré aboni sayela ne noligá ripabé tigoma jena'í walúlachi. ¡Echirigá echi jaré aboni sayela ne noligá sigá wabé nakoma jena'í Jerusalémachi piréami sayéraga! ⁴⁴Echalí echi jaré asayela waminá omérama jena'í Jerusalémachi piréami, mapuyénasí wikabé aboni waminá ko'wirúami níima. A'lí je'ná walúlachi suwaba najunárami níima mapuyénasí ketasi ripimani bilé rité tigótami niráa, mapujiti jena'í piréami pagótami ketasi machili mapu Riosi tamí júuli ku'wíranala aboni.

Jesusi ku machí a'wali echi jaré ralinéami echo'ná pachá echi walubé Juríosi ri'obáwalachi jonsa

(Mt. 21:12-17; Mr. 11:15-19; Jn. 2:13-22)

⁴⁵Echalí Jesusi echo'ná pachá echi walubé Juríosi ri'obáwalachi bakisá, chótali miná machí a'waya si'néami mapu ikí echo'ná 'yénali namuti ralinéwa, si'néami mapu ikí namuti ralali ayena cho. ⁴⁶Echalí Jesusi jeanili: Echo'ná Riosi Ra'íchala oselíwalachi je'ná jerigá osirúami ju: Nijé kalílachi ju mapo'ná echi pagótami Riosi yuwa ra'ichama, ¡chopi 'yémitamo ma niwali je'ná Riosi kalila mapurigá biléana risochí, chigórami pirélachi niráa!

⁴⁷A'lí Jesusi sinibí rawé we galá binérali echi pagótami echo'ná pachá echi walubé Juríosi ri'obáwalachi. Chopi echi jaré o'wéala sacerdote, echi jaré nulalíwami binériami ayena cho, echi jaré o'wéala Juríosi ayena cho, si'néami wabé nakili mapu mi'limea echi Jesusi. ⁴⁸Chopi aboni ketasi chirigá mi'yali Jesusi echalí, mapujiti echi auché jaré wikabé pagótami wabé kaníliga námali Jesusi nawésawala.

Jesusi wabé omériga olali

(Mt. 21:23-27; Mr. 11:27-33)

20 Siné rawé Jesusi asali echo'ná pachá echí walubé Juríosi ri'obáwalachi. Echalí Binói binériga nawésali echí wabé Galabé Riosi Ra'íchala echí wikabé pagótami. A'lí ke sayiná echo'ná sili echí jaré o'wéala sacerdote, echí jaré nulalíwami binériami ayena cho, echí jaré o'wéala ochérami Juríosi ayena cho. ²Echalí aboni jeaneli: Tamujé tamí ku ruyé churigami echirigá wabé omériga olá. ¿Chigá mi echirigá 'yali mapurigami echirigá omero olayá? ³Echalí Jesusi ku nijéwaga jeaneli: Nijé ayena cho 'yemi nimí rukuema bilé namuti. Tamí ku nijéwasi. ⁴¿Acha Riosi, echo'ná ripá riwigachi atíami, nuleli echí Juani pagónala echí pagótami? ¿Acha jaré pagótami echirigá nuleli, kérémá? ⁵Chopi aboni chótali a'nagupi ra'íchaga jeanigá: Ata Jeaniságá mapu Riosi nuleli echí Juani pagónala echí pagótami, echalí echí Jesusi Binói tamujé tamí jeanigá rukuema: ¿Churékulátamo ketasi bichíili mapurigá echí Juani tamí jiti rugá nawésali? ⁶Echalí aboni waminabi je'ná jerigá 'nátali: Ata Jeaniságá mapu jaré pagótami nuleli echí Juani pagónala echí pagótami, echalí si'néami pagótami tamujé tamí basibuka ko'wimea, mapujiti aboni mayé mapu Riosi ne bichíwali júuli echí Juani pagónala echí pagótami. ⁷A'lí je'ná jerigá 'nátaga aboni ku nijéwaga jeaneli mapu aboni ketasi machili chigá nuleli echí Juani echirigá pagónala echí pagótami. ⁸Echalí Jesusi ku nijéwaga jeaneli: Nijé ketasi cho 'yemi nimí ruyema chigá tamí 'yali mapurigani je'ná jerigá wabé omériga olama.

Jesusi binera jaré wabé chati oláami nóchami jiti rugá

(Mt. 21:33-44; Mr. 12:1-11)

⁹Echalí Jesusi chótali irétaga ra'ícha echí pagótami, jeanigá: Bilé rijói onorúami ichali wikabé uva anilíwami rakéami namuti echo'ná binói kawíwalachi. A'lí échiko suwaba tanéwaga 'yali auché jaré nóchami, mapuyénasí binói wi'libé iyénali echo'ná auché biléana kawírali. ¹⁰Chopi mapalí ma sébali echí uva rakala ripunálawachi, echalí echí rijói júuli bilé binói piónawala echo'ná echí jaré nóchami yuwa mapurigá échiko galá narema binói níwala uva rakala; chopi echí jaré nóchami we chi'wánaga, yiri ku júuli. ¹¹Echalí echí uva níwami auchecho bilé pióntami júuli. Chopi echí jaré nóchami je'ná ayena cho we chi'wánaga, wabé riwélatasa, yiri ku júuli. ¹²A'lí echí uva níwami auchecho siné auché bilé pióntami júuli. Chopi echí jaré chati oláami nóchami ayena cho waminá chi'wánaga, waminá júuli. ¹³Echalí echí uva níwami ne jubáami niráa jerigá 'nátali: ¿Churigani olama? Jipi nijeni echo'ná julama echí keni raná mápuni ne wabé galé. Aboni gará 'nénasa keni raná, we galigá narémiré. ¹⁴Chopi mapalí echí jaré chati oláami nóchami ma riwali echí uva níwami ranala, echalí aboni a'nagupi jeanili: Je'ná ri'malí ju mapu suwaba je'ná uva níwami níima. ¡Waminá mi'liboa, mapurigá tamujé aboni echirigá níwabo suwaba je'ná ichirúami! ¹⁵Echalí aboni ma ku machí pasa echo'ná ichirúamichi jonsa, waminá mi'yali.

A'lí Jesusi waminabi jeanigá rukueli: Ma ku nawasa echí uva níwami rijói, ¿churigá kastigo 'yama echí jaré chati oláami nóchami? ¹⁶Nijeni mayé mapu echí rijói uva níwami ma ku nolínasa, waminá suwábamiré echí jaré chati oláami nóchami; ayena cho échiko tanéwaga 'yama binói níwala ichirúami auché jaré

galá oláami nóchami. Chopi mapalí echí jaré pagótami námali Jesusi je'ná jerigá ra'íchachi, echalí aboni jeanili: ¡Ketasi echirigá ikigá! ¹⁷Chopi Jesusi galá 'néniga, jeanigá rukueli: ¿Churigá biché aniwáami ju mapurigá osirúami ju echo'ná Riosi Ra'íchala oselíwalachi? Je'ná jerigá osirúami ju:

Echi rité mapu echí jaré kalí niwáami miná chakena pali mapurigá ketasi galabé niráa,
je'ná rité echo'ná sitochi, ma bachá niráa achárami ju.

¹⁸Ayena cho Jesusi waminabi jeanili: Mapuyíripi echo'ná moba je'ná Ritérali wichisáagá, échiko arigá nosobúrami níima, chopi mapuyíripi echo'ná binói móbachí wichisáagá je'ná Rité, échiko waminá suwábarami níima.

¿Acha risénsiya ju máputa wenomí 'yabo echí silíami?

(Mt. 21:45-46, 22:15-22; Mr. 12:12-17)

¹⁹Echalí echí jaré o'wéala sacerdote, echí jaré nulalíwami binériami ayena cho, we yáati nakili bulesa tonáliya echí Jesusi mapujiti aboni galá machili mapu Jesusi echirigá irétaga ra'icha, wabé sayérali aboni. Chopi aboni arigá wabé majali echirigá olayá, mapujiti echí auché jaré pagótami wabé galabé nírali echí Jesusi. ²⁰Echalí aboni júuli auché jaré 'yékami rijói mapurigá aboni kipuma Jesusi nawésawala. Echi auché jaré rijói ne wabé 'yékami níili, chopi aboni olali mapurigá galabé oláami niráa. Echijiti aboni wikabé namuti rukueli. A'lí aboni wabé wi'nijífinalaga kipuli mapalí Jesusi ku nijéwali, mapujiti aboni chopi wabé wi'nijífinali Jesusi echí jaré o'wéala igúsuwami yuwa. ²¹Echijiti aboni jeaneli: Binériami, tamujeta galá machí mapu Mujé sinibí ra'ícha echí ne bichíwali, ayena cho mápumi chopi binera mapurigá echí pagótami galabé olama, ayena chomi ketasi 'yékaka wi'nijí echí auché jaré pagótami, chópimi ne bichíwali binera mapurigá aboni olama mapurigá Riosi nulé aboni. ²²Echijiti tamujé tamí ku nijéwaga ruyé: ¿Acha risénsia ju máputa wenomí napabusa natétabo echí walula silíami Sésara riwéami? Ke risensia kéremá. ²³Chopi Jesusi galá machili mapurigá aboni chopi wabé 'yékaka niráa rukueli, echijiti Binói jeaneli: ²⁴¡Tamí 'nérasi echí wenomí! A'lí mapalí aboni 'yali bilé namuti wenomí, echalí Binói jeanigá rukueli: ¿Chigá cho'orá ju mapu jenalí atí? ¿Chigá riwalá ju jenalí osirúami? Echalí aboni ku nijéwaga jeaneli: Echi walubela silíami Sésara riwéami níwala ju. ²⁵Echalí Jesusi jeaneli: Galá nijéwaga olasi mapurigá echí walubela síríami Sésara anilíwami 'yemi mi nulé, chopi bachá niráa galá nijéwaga olasi mapurigá Riosi Binói 'yemi mi nulé. ²⁶Echijiti aboni ketasi chirigá omérali wi'nijiya echí Jesusi echo'ná echí jaré o'wéala igúsuwami yuwa, mapujiti Binói echirigá ne galabé machíami niráa ku nijéwali. Chopi aboni wabé kilí muchiga 'náltali mapurigá Binói galabé ra'íchaga ku nijéwali. A'lí aboni ketasi bilé namuti waminabi ku aneli.

Jaré rukueli mapu churigá ku o'wínama echí jaré ma suwíami

(Mt. 22:23-33; Mr. 12:18-27)

²⁷Pe wilibeko jaré Saruseo anilíwami binériami echo'ná sili. Abóniko ketasi bichíli mapu echí jaré suwíami ku o'wínama waminánomí rawé. Echijiti aboni jeanigá ra'íchali Jesusi yuwa: ²⁸Binériami, echí walula Moisesi osogá nulali mapu a bilé rijói ketasi cho kúchuwaga mukusáagá, chopi echirigá kunámami niráa ariwésagá echí binói upila, mapu echalí arigá 'wérali ju mapu echí mukúami rijói

rijimala upema echi mukí ariwérami mapurigá binói galá kúchuma. Echalí echi jaré kúuchi anérami níima mapurigá echi mukúami rijimala kúchuwala niráa. ²⁹Chabé tamujé yuwa muchili kichao rijói najirémami. A'lí echi bachirúami galá upeli, chopi tarapé cho kúchasa mukuli. ³⁰Echalí echi osá jubáwala upeli echi mukí kunámami, chopi échiko ayena cho ke cho kúchasa mukuli. ³¹Echirigá achigórigá echi baisáwala ayena cho upeli echi mukí kunámami; ayena cho si'néami echi auché jaré najirémami ibili niráa echirigá upeli echi mukí; ayena cho ibili niráa tarapé cho kúchuwami níisa waminá suwísali. ³²Echalí jubáami echi mukí ayena cho ma mukuli. ³³Echalí echi jaré Saruseo jeanigá rukueli: ¿Chu yili 'nalina upila níima, mapalí echi jaré suwíiami ma ku o'wínasa? Mapujiti si'néami echi jaré kichao najirémami ibili niráa galá upeli echi mukí.

³⁴Echalí Jesusi jeanigá ku nijewali: Jena'í wichimóbachi echi jaré rijói we jubé, ayena cho echi jaré muguí we kuné. ³⁵Chopi si'néami echi jaré rijói mapu ikí auchecho ku o'wíntarami níima mapujiti aboni galá bichiyami ju, aboni ma ketasi auchecho mapurigá jubéami níima echo'ná ripá riwigachi. Nibilé cho mapurigá kunéami níima echi jaré muguí echo'ná ripá riwigachi. Echalí echi jaré rijói ma ketasi 'yama aboni malala mapurigá aboni kunema. ³⁶Mapujiti aboni ketasi chirigá auchecho suwimea, chopi aboni sinibí pirélama achigórigá mapurigá echi jaré o'wéala Riosi kapitánawala sinibí piré. Ayena cho aboni ma Riosi kúchuwala níima, mapujiti aboni ma ku o'wínali mapalí aboni ma suwíiami níili. ³⁷Ayena cho echi Moisesi nawésali jeanigá mapurigá echi jaré mapu ma suwíami ju, pe waminánomí auchecho ku o'wínama. Mapujiti echo'ná Riosi Ra'ichala oselíwalachi mapo'ná osirúami ju mapurigá Riosi ra'ichali echi Moisesi echo'ná mapo'ná bilé ku'wíchalachi we rajinali, echo'ná osirúami ju mapu echi Walubela Riosi abijí Riósawala ju echi Abrami, echi Isaka ayena cho, echi Jakobo asíchiko. ³⁸Ne si'néami echi jaré Riosi níwala pagótami ketasi mapurigá suwíami ju, chopi aboni sinibí piréami ju Riosi yuwa. ³⁹Echalí jaré nulalíwami binériami jeaneli: Binériami, Mujemi ne wabé galabé anili. ⁴⁰Echalí aboni wabé majali waminabi rukuée.

¿Chigá Ranala ju echi Cristo anilíwami?

(Mt. 22:41-46; Mr. 12:35-37)

⁴¹Echalí Jesusi jeanigá rukueli: ¿Churékula echaní jaré mapu echi Cristo anilíwami echi Rabiri ranala ju? ⁴²Mapujiti binói Rabiri je'ná jerigá anili mapurigá osirúami ju echo'ná Riosi Ra'ichala oselíwalachi mapo'ná Salmo anilíwami ju:

Echi Walubela Riosi jeaneli echi nijé Walubélawala:

Jena'í Nijé watonachi asagá,

⁴³Mapuyénasi Nijeni wabé omériga ro'wama echi jaré Mujé sayela echo'ná ri'léami Mujé ralálachi, mapurigami echirigá galá oméraama aboni.

⁴⁴Echalí Jesusi waminabi jeanigá rukueli: ¿Churigá Rabiri ranala níima, mapalí Rabiri binói echirigá ané binói Walubélawala?

Jesusi we wi'nijí echi jaré nulalíwami binériami

(Mt. 23:1-36; Mr. 12:38-40; Lk. 11:37-54)

⁴⁵Ne si'néami echi jaré pagótami galá kipua muchili mapalí Jesusi je'ná jerigá aneli echi jaré mapu Binói binérali: ⁴⁶Ne galabé niráa 'natasí mapurigá echi jaré nulalíwami binériami ketasi 'yemi mi 'yékama. Aboni chopi i'weli napáchaga

'yénanali. Ayena cho aboni ne wabé nakí mapu echí auché jaré pagótami sinibí ne wabé o'wikeka naripama. Ayena cho aboni chopí muchínali echo'ná wabé galabéalachí echo'ná pachá aboni ri'obáwalachi, mapurigá wabé o'wéala niráa. Ayena cho mapalí aboni bayérámi ju ko'núula echo'ná auché jaré pagótami pirélachi, aboni chopí nakí mapu bachá niráa ko'mea.⁴⁷ Chopí aboni ayena cho wabé 'yékaka niráa waminá 'ye echí jaré kunámami kalila. A'lí aboni wi'llibé niráa ra'icha mapurigá Riosi yuwa ra'íchaga niráa. Echijiti aboni waminabi wabé kastigo 'yárami níima.

Echi wabé risúwati kunámami mukí muchúwali wenomí

(Mr. 12:41-44)

21 A'lí Jesusi 'néniga riwali mapurigá echí jaré wabé níwami pagótami wikabé muchúwali wenomí echo'ná wenomí muchuwálachi echo'ná pachá echí walubé Juríosi ri'obáwalachi. ²Echalí binói ayena cho riwali bilé wabé risúwati mukí kunámami mapalí echo'ná muchúwali okuá kentavo. ³Echalí Jesusi jeaneli echí auché jaré: Ne bichíwali 'yemi nimí ané mapu Nijeni ne wabé simírami natéami niráa niralí mapurigá je'ná wabé risúwati mukí muchúwali, chopí Nijeni ketasi 'me niralí mapurigá echí jaré wabé níwami muchúwali. ⁴Mapujiti si'néami echí auché jaré, abijíjí wikabé tibiika echo'ná muchúwali, Riosi ayá. Chopí je'ná mukí ne wabé risúwati níisa, arigá suwaba muchúwali mapu ikí binói níwali, mapurigá namuti ralagá bitélama.

Jesusi bachá niráa nawésaga aní mapu echí walubé Juríosi ri'obáwarachi waminá najuinárami níima

(Mt. 24:1-2; Mr. 13:1-2)

⁵Echalí jaré mapu Jesusi binérali a'nagupi ra'íchali echí walubé Juríosi ri'obáwala jiti rugá mapurigá wabé simati rité jiti niwárami níili, ayena cho mapurigá wabé ba'yóratami níili echí jaré wabé simati namuti jiti mapu echí jaré Juríosi pagótami ma 'yali. A'lí Jesusi jeaneli: ⁶Waminánomí rawé ne suwaba je'ná namuti mapu 'yémítamo ritiwá waminá najuinárami níima. Echalí nibilé rité ripima tigótami niráa.

Je'ná jerigá ikimea ke cho sébachi echalí ne jubá rawé

(Mt. 24:3-28; Mr. 13:3-23)

⁷Echalí aboni jeanigá rukueli: Binériami, ¿chu kilíbuko je'ná jerigá ikimea? Tamujé tamí ruyé mapu churigá tamujeta machiboa mapalí je'ná jerigá ke 'me ayó ikimea.

⁸Jesusi ku nijéwaga jeaneli: Ne galá tibuka 'natasi 'yemi aboni mapurigá ke wesi 'yemi mi 'yékama. Pe waminánomí wikabé ibili niráa nolínama mapu wabé 'yékaka niráa jeanimea: ¡Nijé binói ju echí Walubela Cristo! Ayena cho jeanimea: ¡Ma sébachi ju! Chopí 'yemi ketasi najátasi aboni yuwa. ⁹Ayena cho mapalítamo nami echí pagótami ra'íchachi mapu ne wikabé sontarsi wabé nakowi, ayena cho mapu wikabé pagótami wabé na'awa, echalí ketasi majasi mapujiti arigá 'wérali ju mapu je'ná jerigá bachá ikimea, chopí echalí ketasi cho sébachi níima echalí ne jubá suwibálawachi rawé. ¹⁰A'lí Jesusi waminabi jeaneli: Echalí rawé biléana walula nulálachi kawírali piréami wabé nakoma, auché biléana walula nulúlachi kawírali piréami sayéraga; ayena cho bilé walula silíami pagótamawala wabé nakoma auché bilé walula silíami pagótamawala sayéraga. ¹¹Echalí wikanáami wabé nokomea je'ná kawí, ayena cho wikanáami jena'í wichimóbachi piréami pagótami

ne wabé 'lochema, ayena cho wikabé pagótami wabé nayúkama. A'lí echalí rawé jena'í wichimóbachi piréami wikabé riwimea wabé majajárami namuti echo'ná ripá nolírali, ayena cho auché jaré o'weli namuti 'nératami níima.

¹²Chopi bachá ke cho sébachi je'ná jerigá ikíachi echi jaré 'yemi sayela 'yemi mi waminá chapigá wabé risúu olama. Aboni 'yemi mi bologá tomea echo'ná aboni ri'obáwalachi mapurigátamo kastigo 'yárami níibo. 'Yémítamo pachá mo'wárami níibo, ayena chótamo torúami níibo echo'ná bacháami jaré o'wéala silíami yuwa mapujítitamo tamí bichiyami ju. ¹³Echirigá ikimea 'yemi mi yuwa mapurigátamo galá omérabo Nijé ra'íchala nawésiya echi jaré o'wéala. ¹⁴Chopi ketasi wikabé namuti nílaga 'natasi mapu churigátamo ku nijéwaga ra'íchaga nijéabo echalí rawé. ¹⁵Mapujiti echalí rawé Nijé Binói 'yemi nimí galabé 'natárama mapurigátamo galá ku wiaga ra'ichaba. A'lí ke wesi echi jaré 'yemi sayela galá oméraama 'yemi mi ku nijéwiya. Nibilé wesi oméraama 'yemi mi wi'nijiya, ne bichíwali niráa. ¹⁶Chopi jaré 'yemi waminá nijírami níibo 'yemi aboni 'wénawala jiti mapurigátamo kastigo 'yárami níibo. Auché jaré 'yemi waminá nijírami níibo 'yemi aboni ritémawala jiti mapurigátamo kastigo 'yárami níibo. Auché jaré 'yemi waminá nijírami níibo 'yemi amígwala jiti mapurigátamo kastigo 'yárami níibo, ayena cho jaré 'yemi waminá ko'wirúami níibo. ¹⁷A'lí ne si'néami pagótami jena'í wichimóbachi piréami 'yemi mi wabé kichima mapujiti 'yémítamo tamí bichiyami ju. ¹⁸Arigá nirapé bilé wikama 'yemi kupala, echo'ná 'yemi mol'olachi jáwami. ¹⁹Átamo sinibí niráa galá bichíisagá, 'yémítamo arigá sinibí niráa pirélabo Riosi yuwa.

²⁰A'lí mapalítamo ma ritiwá wikabé sontarsi ne noligá jáwami echo'ná Jerusalémachi anilwachi walúlachi, echalí galá machísí mapu ke me ayó echo'ná walúlachi suwaba waminá suwábarami níima. ²¹Echalí galá níima mapu echi jaré pagótami mapu echo'ná Juréachi anilwachi kawírali muchuwi, arigá waminá ripá rabó júmsama. Ayena cho galá níima mapu echi jaré pagótami mapu echo'ná Jerusalémachi anilwachi muchuwi waminá mikabé júmsama. Ayena cho galá níima mapu echi jaré pagótami mapu echo'ná kawichí 'yena ketasi ku mo'wimea echo'ná walúlachi. ²²Mapujiti echalí rawé echi pagótami ne wabé simírami risúu olárami níima, mapuyénasí suwaba ikimea mapurigá bachá niráa osirúami níili echo'ná Riosi Ra'íchala oseríwalachi mapurigá ikimea riwéali. ²³Echalí Jesusi wabé natimaga jeanili: ¡Echalí rawé echi jaré muguí mapu ikí pocháami níimako ne wabé risúu olárami níima, echi auché jaré muguí mapu kúuchi kúchuwami níimako ayena cho! Mapujiti jena'í Jerusalémachi piréami pagótami ne wabé okótarami níima, ne wabé simírami risúu olárami ayena cho. ²⁴Jaré aboni waminá ko'wirúami níima mapalí aboni wabé nakówako auché jaré pagótami sayéraga. Auché jaré aboni bologá torúami níima echo'ná auché jaréana si'wina kawírali. A'lí echi jaré isena pagótami we nulama mapurigá o'wéala nuláami niráa jena'í Jerusalémachi wi'llibé bamíbali niráa, mapuyénasí Riosi echirigá risénsia 'yama.

Jesucristo ku nolínama jena'í wichimóbachi

(Mt. 24:29-35, 42-44; Mr. 13:24-37)

²⁵Echalí echi rayénali si'wináriga nakulíwarami níima, echi michá ayena cho, echi jaré sopolí asfchiko. A'lí echi pagótami jena'í wichimóbachi piréami wabé majaga ke newalama; ayena cho aboni ne wabé majajárami níima mapujiti ne wabé chati anema echi ba'wí echo'ná ri're suwé mapo'ná walú maní ba'wí; ayena

cho aboni majajárami níima mapujiti ne wabé simírami o'weri chipoma echí walú ba'wí. ²⁶ Echalí echí jaré pagótami jena'í wichimóbachi piréami ne wabé majaga, tarapé chiwikisáa nírama, mapujiti aboni wabé majajáratami níima mapalí aboni wabé 'natama mapu churigá ikimea riwéali jena'í wichimóbachi; ayena cho suwaba namuti echo'ná ripá riwigachi nirúami waminá nakulíwarami níima. ²⁷ Echalí Jesusi waminabi jeaneli: Echi jaré pagótami jena'í wichimóbachi piréami ayena cho tamí riwímea mapalí Nijeni ku nawama ne wabé Walubela niráa, mapujiti waminánomí rawé Nijeni ku nawama echo'ná ripana nolírali jonsa ne wabé ratábami niráa. Nijeni wilárami níili mapurigá Ku'wíriami niráa. ²⁸ A'lí mapalí ma chota je'ná jerigá ikiyá echalí wabé kanílasi. Ayena cho ripabé 'niasi, mapujiti ke 'me ayó 'yémitamo galá ku'wíratami níibo.

²⁹ Echalí Jesusi ayena cho je'ná jerigá irétaga jeaneli: Ne galá 'nesi mapurigá echí jaré chuná ma o'wina sawarásya, echí auché jaré namuti masana ayena cho. ³⁰ Mapalí 'yémitamo ritiwá mapu echí jaré namuti ma o'wina sawaraya, echalí 'yémitamo ma galá machí mapu ke 'me ayó galá kuwisama. ³¹ Echirigá achigórigá mapalí 'yémitamo ma riwiboa mapu je'ná jerigá galá ikí, echalí galá machisí mapu ke 'me ayó Riosi galá nulema jena'í wichimóbachi piréami pagótami.

³² Ne bichíwali 'yemi nimí ané mapu ne suwaba je'ná jerigá sébali ikimea mapalí je'ná jipi piréami pagótami ketasi cho suwí. ³³ Echirigá ne bichíwali ikimea mapujiti echo'ná ripá riwigachi suwaba suwibama, je'ná wichimoba ayena cho suwibama, chopi Nijé Ra'íchala ketasi siné suwibama.

³⁴ Sinibí galá 'nagá muchisi. Ketasi chati olasi mapurigátamo ketasi echijiti wabé biwárami sulélabo, mapujiti átamo waminá tékasagá, ayena cho átamo wabé níliami níisagá, echalítamo wabé nílaga 'natásagá karúmati jiti majáratami níbo mapalí Nijeni ke sayiná ku nolínama jena'í wichimóbachi. ³⁵ Mapujiti echalí ne jubá rawé Nijeni ke sayiná ku nolínama jena'í wichimóbachi. Echalí echí jaré pagótami ne suníami jena'í wichimóbachi piréami ke sayiná kastigo 'yárami níima, achigórigá mapurigá echí jaré namuti kawichí nirúami ke sayiná chapirúami ju echo'ná mapo'ná biléana misúkuwami wilí. ³⁶ Galá 'nagá muchisi; ayena cho sinibí tániga ra'ichasi Riosi yuwa mapurigá ketasi ikimea 'yemi yuwa mapurigá ne bichíwali ikimea echí auché jaré jena'í wichimóbachi piréami pagótami; ayena cho tansi mapurigá 'yémitamo bacháami tamí yuwa jawárami níbo. Nijeni wilárami níili mapurigá Ku'wíriami niráa.

³⁷ Echalí Jesusi sinibí rawé nawésaga binérali echí pagótami echo'ná walubé Juríosi pagótami ri'obáwalachi, chopi sinibí rokogó Binói chi'lébali echo'ná ripá rabó Olíbochi anilíwachi. ³⁸ A'lí ne si'néami echí jaré pagótami bi'yá abijí napawili echo'ná walubé Juríosi pagótami ri'obáwalachi mapurigá aboni galá kipuma Binói nawésawala.

Echi jaré o'wéala Juríosi wabé sayérali echí Jesusi

(Mt. 26:1-5, 14-16; Mr. 14:1-2, 10-11; Jn. 11:45-53)

22 A'lí ma mulubé sébachi níili echalí omowálawachi mapalí echí jaré Juríosi ko'wali echí jaré pani ke nasówarami echí levadura anilíwami echí mapu echí pani galabé niwaliwa. Echalí ayena cho níili mapalí aboni ko'yali echí jaré kíuchi bo'wá. ² Echalí echí jaré o'wéala sacerdote, echí jaré nulalíwami binériami ayena cho, si'néami katéwaga ra'íchali mapu churigá aboni galá omérama mi'ayá

echi Jesusi, chopi aboni arigá majali echi auché jaré pagótami jiti, mapujiti echi auché jaré pagótami echi Jesusi amígowala níili.

³Echalí echi Júrasi galá nijéwali, sulachí niráa, mapurigá echi Satanasi riwéami riabلو nuleli. A'lí echi Júrasi ayena cho Jiskariote rijíkowami níili. Échiko ayena cho bilé níili echi jaré makói miná okuá mapu Jesusi júuli nawisánala. ⁴A'lí echi Júrasi simisáa ra'íchali echi jaré o'wéala sacerdote yuwa, echi auché jaré o'wéala echo'ná walubé Juríosi ri'obáwalachi nuláami ayena cho, mapu churigá binói nijima echi Jesusi echi jaré o'wéala yuwa mapurigá Binói kastigo 'yárami níima. ⁵Echalí echi jaré o'wéala echirigá namsa, we kaníili; ayena cho aboni bichíwaga aneli echi Júrasi mapu wenomí 'yama riwéali. ⁶Echalí echi Júrasi galá nirali mapurigá aboni natétama riwéali. A'lí echalí jonsa echi Júrasi galá machigá 'nátali mapu churigá oméraama nijiya echi Jesusi, echi jaré sontarsi yuwa, mapalí echi wikabé pagótami ketasi Binói yuwa 'yénali.

Jesusi ma ne jubá ko'wali echi jaré mapu Binói binérali yuwa

(Mt. 26:17-29; Mr. 14:12-25; Jn. 13:21-30; 1 Ko. 11:23-26)

⁷A'lí ma sébali echalí omowálawachi rawé mapalí echi jaré Juríosi pagótami ko'wali echi pani, ke nasówarami echi levadura anilíwami. A'lí echi pani chopi galabé niwaliwa echi levadura nasówaga. Echalí omowálawachi ayena cho níili mapalí echi kúuchi bo'wá ko'wílati. ⁸Echalí Jesusi jeanigá júuli echi Pegro, echi Juani: Simíbaga a'lárabasi mapurigá tamujeta kopoá echi kúuchi bo'wá sapala awérami jipi a'lí omowálawachi rawé. ⁹A'lí aboni ku nijewaga jeanigá rukueli: ¿Kúmimi nakí máputa a'lárabo? ¹⁰Echarí Jesusi jeaneli: Maparítamo ma sisáa echo'ná walúlachi, echalítamo natipabo bilé rijói ba'wí matora inárachi biléana sikolíchi. Najátasi echi rijói mapo'ná yénasí bakí biléana kalírali. ¹¹Echalí Jeanesi echo'ná kalíwami: Echi Binériami tamujé tamí júuli mi jeanigá rukuénala: ¿Kumi 'nalí ju echi kalí mapo'ná Nijeni ko'mea jipi a'lí omowálawachi rawé, echi jaré mapu nijé binérali yuwa? ¹²Echalí echo'ná kalíwami 'yemi mi 'nérama bilé walú kalí echo'ná osá anamótami mapo'ná ma galá pichítami níima. Echo'ná galá a'lárasi mapurigá tamujeta kopoá echi taa bo'wá sapala awérami jipi a'lí omowálawachi. ¹³Echalí aboni ku simíbaga riwali achigórigá mapurigá Jesusi echirigá aneli. A'lí aboni galá a'lárali mapurigá si'néami aboni echirigá ko'mea echi taa bo'wá sapala awérami echalí a'lí omowálawachi rawé.

¹⁴A'lí ma alíwachi mapalí ma sébali téitali, echalí Jesusi echo'ná mésachi asíbali ko'meya echi auché jaré yuwa mapu Binói nawésanalaga júuli. ¹⁵Echalí Jesusi jeaneli: ¡Nijeni ne wabé nakili mapurigani ko'mea je'ná bo'wá sapala awérami 'yemi mi yuwa mapalini abijí ke cho mi'lirúami níisa! ¹⁶Mapujiti Nijé 'yemi nimí ané mapu Nijeni ma ketasi auchecho siné omáwaga ko'mea echi taa bo'wá sapala awérami jena'í wichimóbachi. Chopi Nijeni auchecho siné ko'mea echo'ná ripá riwigachi mapalí Riosi ne Walubela Nuléami níima ne si'néami pagótami yuwa, mapalí Nijeni ma mi'lirúami níisa aboni jiti, mapurigá Riosi níwala Méchuli niráa. ¹⁷Echalí Jesusi ma chapísáa bilé vaso echi uva ba'wila ro'wárami, walú natétara 'yali Riosi. A'lí Binói jeaneli echi jaré mapu Binói binérali: ¡Chapigá je'ná, péé kúuchi bajisi ibili 'yemi! ¹⁸Mapujiti Nijé 'yemi nimí ané mápuni ma ketasi auchecho siné bajima echi uva ba'wila jena'í wichimóbachi, chópini auchecho siné bajima echo'ná ripá riwigachi mapalí Riosi ne Walubela Nuléami níima ne si'néami pagótami yuwa.

¹⁹Echalí Jesusi ma chapili echi pani. A'lí natétara 'yasa Riosi, ma rojonasa, 'yali echi jaré aboni. Echalí jeaneli: Je'ná ju Nijé sapala. Nijeni ma mi'lirúami níima mapurigá 'yemi níwala Ku'wíriami niráa. Sinibí je'ná jerigá olasi mapurigátamo galá 'natabo tamí jiti. ²⁰A'lí ma sunisa ko'yá, Binói echirigá ayena cho 'yali echi vaso mapo'ná uva ba'wila ro'wárami níili. Echalí Binói jeaneli: Je'ná uva ba'wila mapurigá Nijé lalá ju. Riosi bukulíwami niráa a'láraga nulali mapurigá Nijeni mi'lirúami níisa, Nijé lalá echirigá ku luwárami níima 'yemi jiti, mapurigátamo ku wikawárami níibo.

²¹Chopi jena'í bilénapi ko'wálachi tamí yuwa atí echi bilé rijói mapu arigá tamí nijima mapurigá echi jaré Nijé sayela tamí chapimea. ²²Echalí Jesusi waminabi jeaneli: Nijeni wilárami níili mapurigá Ku'wíriami niráa. A'lí ne suwaba tamí yuwa ne bichíwali ikimea mapurigá Riosi ki'yá jonsa anili mapu ikimea riwéali. Chopi ne wabé risúu olárami níima echi bilé rijói mapu tamí nijima mapurigani waminá mi'lirúami níima. ²³Echalí aboni chótali a'nagupi rukuée mapu chigá 'nalí bilé aboni echirigá nijima riwéali echi Jesusi mapurigá Binói waminá chapirúami níima.

Aboni we ra'íchaga rukué mapu chigá aboni ne walula níima riwéali

²⁴Echalí echi jaré mapu Jesusi binérali ayena cho a'nagupi ra'íchaga rukueli mapu chigá bilé aboni ne walula níima riwéali echi auché jaré aboni yuwa. ²⁵Chopi Jesusi jeaneli: Echi jaré o'wéala silfámi, echi auché jaré pagótami silínawala, wabé 'wéraili nulé echi jaré pagótami. Ayena cho echi pagótami ané aboni: O'wéala nigúurami niráa. ²⁶Ketasi echirigá níisi 'yemi; chopi galá níima mapu 'yemi walúlawala mapurigá echi wabé tabéala níлага, ayena cho galá níima mapu 'yemi níwala walula nuláami mapurigá nigúurami níлага. ²⁷Mapujiti echi bilé mapu echo'ná ko'wálachi ko'yá atí waminabi walula ju ketasi mapurigá echi auché bilé mapu echo'ná nigúuraga nocha. Chopi Nijeni we nigúuraga nocha 'yemi mi ku'wíriya.

²⁸'Yemi ju máputamo sinibí tamí yuwa 'yénali mapalí Nijeni risúu olárami níili. ²⁹Echijiti Nijé 'yemi nimí 'ya máputamo nulebo auché jaré pagótami mapurigá o'wéala niráa, achígorigá mapurigá Nijé Onolá tamí 'yali mapurigani nulema echi pagótami mapurigá ne Walubela niráa. ³⁰Echijiti 'yémítamo tamí yuwa kopoa, mapalí Nijeni ne Walubela Nuláami níima. A'lí 'yémítamo muchíbabu echo'ná makói miná okuá o'wéala muchíbalachi mapurigátamo justicia olabo echi jaré makói miná okuá rojuaka piréami Isaeli pagótami yuwa.

Jesusi bachá niráa anili mapurigá echi Pegro 'yékaka animea riwéali mapurigá binói ketasi machili echi Jesusi

(Mt. 26:31-35; Mr. 14:27-31; Jn. 13:36-38)

³¹Echi Walubela Jesucristo ayena cho jeaneli: Mujé Simoni galá 'natá mapurigá echi Satanasi riwéami riablo ma risensia tánali mapurigá binói 'yemi mi chati olánalamu. Echi riablo 'yemi mi echirigá risúu olama mapurigá binói galá machimea áchatamo galabé oláami ju. Echirigá ayena cho echi jaré pagótami we kasuwa echi turío mapurigá galabé machínama. ³²Chopi Nijeni we tánali mapurigá Riosi mi waminabi galá bichírama. Echijiti waminánomí mapalí mujemi auchecho ku wikáwali tánama Riosi, echalí ne galá bichíraga nawesa mujé echi auché jaré mujé ritémawala bichíyami. ³³Echi Simoni ku njéwaga jeaneli: ¡Walubela, nijeni sinibí galá bichíima, ani arigá pachá bachárami níiságá mi yuwa echo'ná pachá

kumurachi! ¡Ayena cho nijeni sinibí galá bichíima, arigá 'wérali níisagá mapurigá níjé waminá mi'lirúami níima mi yuwa! ³⁴Chopi Jesusi ku nijewaga jeaneli: ¡Mujé, Pegro, Nijé nimí ané mapu jipi rokogó, we yáa mapalí ke cho kusumea echí tolí, mujemi baisá chokéami 'yékaka animea mápumi ketasi tamí machí!

Ma ne mulubé sébachi níili mapalí Jesusi risúu olárami niima riwéali

³⁵Echalí Jesusi jeanigá rukueli: ¿Áchatamo newaleli bilé namuti mapalí Nijé 'yemi nimí júlaga nuleli máputamo ketasi toboa 'yemi níwala namuti echo'ná chiwáwalachi mapalítamo echo'ná buwichí 'yénali? ¿Áchatamo newaleli mapalítamo ketasi toli 'yemi níwala maleta, mapalítamo ketasi toli auché jaré aká, keremá? Echalí aboni ku nijewaga jeaneli: Ketásita biyiri newaleli. ³⁶Echalí Jesusi jeaneli: Jípiko echí mapu níwako bilé chiwáwala, echo'ná togá binói níwala namuti; ayena cho echí mapu níwako bilé maleta, togá binói níwala wenomí; ayena cho echí mapu ketasi níwako bilé wílibé ripiyá, ma ralinéaga binói kimala, ralá bilé wílibé ripiyá. ³⁷Mapujiti Nijé 'yemi nimí ané mapu arigá 'wérali ju mapurigá sébali ikimea tamí yuwa mapurigá je'ná jerigá osirúami ju tamí jiti rugá echo'ná Riosi Ra'íchala oselíwalachi: Echi jaré pagótami mayeli mapurigá Binói chati oláami níili mapurigá echí auché jaré chati oláami pagótami. Echirigá ikimea mapujiti mapurigá tamí jiti rugá osirúami ju, echirigá arigá ikimea. ³⁸A'lí aboni jeaneli: Walubela, jena'í nirú okuá i'wéli ripiyá. Echalí Jesusi jeaneli: Ma galá sébali ju.

Jesusi ra'icha Riosi yuwa echo'ná Jechamanichi

(Mt. 26:36-46; Mr. 14:32-42)

³⁹A'lí Jesusi ma ku machínali echo'ná walúlachi jonsa. Echalí Binói simili echo'ná ripá rabó Olíbochi anilíwachi mapurigá Binói wisabé olali; ayena cho echí jaré mapu Binói binérali así simíbali. ⁴⁰A'lí mapalí aboni ma sébali echo'ná, echalí Jesusi jeaneli: Riosi yuwa ra'ichasi mapurigá echí riablo ketasi 'yemi mi chati olánalama. ⁴¹Echalí Jesusi pe waná simili mapuyena bilé rijói omero bilé rité basibuka paya. Echalí Binói chokóbaga wiligá Riosi yuwa ra'íchali, ⁴²jeanigá: Keni Onó, a Mujemi nakisáagá, tamí ku'wiro mapurigá Nijeni ketasi risúu olárami níima, chopi ketasi tamí olili mapurigá Nijeni chopi nakí. Arigá tamí olili mapurigá Mujé Binói nakí. ⁴³Echalí bilé walula Riosi capitánawala echo'ná ripá riwigachi jonsa simíami, echo'ná Jesusi yuwa iwébanaga nawali. ⁴⁴Echalí Jesusi ne wabé simírami risúu olárami níili, echijiti Binói waminabi wabé níлага ra'íchali Riosi yuwa. A'lí Jesusi chiliwala mapurigá o'weli la pachútami níili, mapu ne ri'lé wi'yérali yénasí pachuli.

⁴⁵A'lí ma sunisa Riosi yuwa ra'icha, Jesusi ku wilísali. Echalí Binói ku simili echo'ná echí jaré yuwa mapu Binói binérali; chopi Binói riwali aboni we kochigá bitíami mapujiti aboni wabé simírami siweli. ⁴⁶Echalí Jesusi jeaneli: ¿Churékulátamo wepi kochí? Ku muchísaga, Riosi yuwa ra'ichasi, mapurigá echí riablo ketasi 'yemi mi chati olánalama.

Jesusi bogá chapirúami níili

(Mt. 26:47-56; Mr. 14:43-50; Jn. 18:2-11)

⁴⁷Echalí mapalí Jesusi abijí echirigá ra'íchachi, we yáa echo'ná sili wikabé pagótami. A'lí echí Júrasi riwéami mapu bilé níili echí jaré makói miná okuá mapu Jesusi binérali, échiko bayébali echí wikabé pagótami. Echalí binói mulubéanaga

Jesusi yuwa, we nakili nariplánala. ⁴⁸Echalí Jesusi jeaneli: Mujé Júrasi, ¿áchami ne narépaga tamí njima mapurigá Nijé bologá chapirúami níima? Nijeni arigá wilárami níili mapurigá Ku'wíriami niráa. ⁴⁹A'lí echi jaré mapu Jesusi yuwa 'yénali, ma galá riwisáa mapurigá ikimea riwéali, echalí jeanigá rukueli: Walubela, ¿áchata sayéraga nakobo ripiyá jiti? ⁵⁰Chopi bilé aboni arigá chiwali bilé rijói mapu echi ne walula sacerdote piónawala níili. Echirigá echi rijói watoná nakálachi suwaba ripunárami níili. ⁵¹Chopi Jesusi jeaneli: ¡Ariwesi! Ma galá ju. Echalí Jesusi nochogá echi pioni nakálachi, galá ku sa'wali.

⁵²Echalí echi jaré o'wéala sacerdote, ayena cho echi auché jaré o'wéala echo'ná walubé Juríosi ri'obáwalachi nuláami, ayena cho echi jaré o'wéala ochérami Juríosi, si'néami chapiboya sili echi Walubela Jesusi. Chopi Jesusi jeanigá rukueli: ¿Áchatamo ripiyá ka, ayena cho kusí ka sili tamí chapiboya mapurigá Nijé bilé chigórami niráa? ⁵³Ayena cho waminabi jeaneli: Sinibí rawé mapalí Nijé 'yemi nimí yuwa asali echo'ná pachá walubé Juríosi ri'obáwalachi, echalítamo ketasi tamí chapili, chopi jipi ma sébali 'yemi téawala mapalítamo omero olayá mapurigá 'yemi aboni nakí, mapujiti echi wabé chati oluwáwami wabé muweli mapurigá echi rukuwáwami niráa.

Echi Pegro we 'yékaka aní mapu binói ketasi machí echi Jesusi

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴Echalí aboni bologá chapili echi Walubela Jesusi. A'lí aboni bulusá toli echo'ná echi ne walula sacerdote bitélachi. Echalí echi Pegro 'naka niráa jubáami najátali. ⁵⁵A'lí ma sebasa echo'ná echi walula sacerdote bitélachi, aboni ma na'asa echo'ná pachá nasipa ri'narátachi, echo'ná sokuáliya muchíbali. Echalí echi Pegro ayena cho echo'ná sokuáliya asali. ⁵⁶Chopi bilé mukí pióntami riwali echi Pegro echo'ná sokuáliya atíami. Echalí echi mukí galá 'néniga jeanili: Je'ná rijói ayena cho echi Jesusi yuwa 'yénali. ⁵⁷Chopi echi Pegro wabé 'yékaka jeaneli: ¡Mukí, ketásini machí echi Jesusi! ⁵⁸Auché pée wilibeko auché bilé rijói riwisáa jeaneli: ¡Mujé ayena cho aboni yuwa níili! Chopi Pegro ku nijéwaga jeaneli: ¡Rijói, ketásini níili! ⁵⁹Auché pe wabé wilibeko, auché bilecho ne wabé bichíwaga jerigá anili: Ne bichíwali je'ná rijói ayena cho echi Jesusi yuwa asali, mapujiti je'ná rijói ayena cho echo'ná Galiléachi bitéami ju. ⁶⁰Echalí Pegro jeaneli: ¡Rijói, ketásini machí mapurigá mujemi aní! Chopi we yáati we kusuri bilé tolí. ⁶¹Echalí echi Walubela Jesusi ku kuwana 'nénali echi Pegro. Ayena cho Pegro ku 'náatali mapurigá Jesusi bachá niráa jeanigá aneli: Jipi rawé ke cho kusuwachi echi tolí, mujemi báisá chokéami we 'yékaka jeanimea mápumi ketasi tamí machí. ⁶²Echalí echi Pegro ma ku machínaga ne wabé o'móniga nalali.

Jesusi risúu olárami níili

(Mt. 26:67-68; Mr. 14:65)

⁶³Echalí echi jaré rijói mapu chapigá tibuli echi Jesusi, ne wabé chibi ologá tiníchaga, wabé cho'nali echi Binói. ⁶⁴Echalí aboni ma pólaga Jesusi busílachi, waminá chiwali Binói akálachi, jeanigá: A Mujemi níisagá echi Cristo mapu Riosi julama riwéali, mujemi galá machimée suwaba namuti. Echijiti tamujé tamí ku ruyé: ¿Chigá níili mapu mi chiwali? ⁶⁵Ayena cho aboni auché jaré wikabé namuti waminabi wabé chati anigá riwélataga aneli.

**Jesusi pálati echo'ná bacháami ne si'néami echí jaré Juríosi pagótamawala
o'wéalawala**

(Mt. 26:59-66; Mr. 14:55-64; Jn. 18:19-24)

⁶⁶Echalí rawé mapalí ma chi'ráali, echo'ná napawili echí jaré o'wéala ochérami, echí jaré o'wéala sacerdote ayena cho, echí jaré nulalíwami binériami asíchiko. Echalí Jesusi echo'ná bacháami pálati ne si'néami echí jaré o'wéala Juríosi pagótami yuwa. Echalí aboni jeanigá rukueli: ⁶⁷Tamujé tamí ku ruyé: ¿Áchami Mujé ju echí Cristo anilíwami mapu Riosi julama riwéali jena'í wichimóbachi? Echalí Jesusi ku nijéwaga jeaneli: ⁶⁸A Nijé 'yemi nimí jeanésagá mapu Nijé ne bichíwali ju echí Cristo, echalí 'yémítamo ketasi tamí bichíibi; ayena cho a Nijé 'yemi nimí rukuésagá jaré namuti, 'yémítamo ketasi tamí ku nijéwabo. Nibilé cho tamí ku ni'yúbanabo. ⁶⁹Ayena cho Jesusi waminabi jeaneli: ¡Jipi jonsa waminánomí Nijeni echo'ná watonachi echí suwaba omérami Riosi yuwa asimea! ⁷⁰Echalí we yáati si'néami aboni jeanigá rukueli: ¿Mujecha ju echí bilepi Riosi Ranala? Echalí Jesusi ku nijéwaga jeaneli: ¡Ayena Nijeni ju, mapurigá 'yemi aboni ma anili! ⁷¹Echalí aboni we yáati jeanili: ¡Binói we chati ra'íchali Riosi sayéraga! Tamujé ma ketasi newalé auché bilé testigo mapurigá échiko nawésama je'ná Jesusi sayéraga, mapujiti tamujé aboni ma námali mapurigá Jesusi Binói wabé sayéraga ra'íchali Riosi!

Jesusi echo'ná bacháami Pilato yuwa pálati

(Mt. 27:1-2, 11-14; Mr. 15:1-5; Jn. 18:28-38)

23 A'lí ne si'néami aboni jáasga toli Jesusi echo'ná bacháami echí walula silíami Pilato riwéami yuwa, mapu echo'ná Juréachi walula nuráami níili. ²Echalí ne si'néami aboni chótali wi'nijísya Jesusi mapalí aboni jeanili: Tamujeta riwali mapu je'ná rijói wabé na'áwatali tamujé pagótamawala, mapujiti jeaní mapu ketasi risensia ju mapu tamujé natétabo wenomí echí walula silíami Sésara riwéami; ayena cho je'ná rijói aní mapu binói ju echí Cristo anilíwami, mapurigá bilé walubela silíami niráa. ³Echalí echí Pilato jeanigá rukueli: ¿Mujecha ju walubela silíami echí jaré Juríosi pagótami yuwa? A'lí Jesusi ku nijéwaga jeaneli: ¡Ne bichíwali Nijeni ju mapurigá mujemi anili! ⁴Echalí echí walula Pilato ku nijéwaga aneli echí jaré o'wéala sacerdote, echí auché jaré pagótami ayena cho: Nijeni mayé mapu je'ná Rijói ketásirapé chati oláami ju. ⁵Chopi echí jaré pagótami waminabi o'weli jeanigá aneli: Je'ná Rijói sinibí wabé chati binéraga na'áwata echí auché jaré pagótami jena'í Juréachi piréami. Binói chótali binériya echo'ná Galiléachi piréami pagótami, chopi jipi ayena cho ma binériya nawali jena'í Juréachi.

Jesusi echo'ná bacháami echí Erorsi yuwa pálati

⁶Ma namsa je'ná jerigá aníachi, echalí echí Pilato rukueli acha Jesusi echo'ná Galiléachi bitéami níili. ⁷A'lí mapalí jaré aneli mapu ayena echí Jesusi echo'ná Galiléachi bitéami níili, echalí echí Pilato nulali mapurigá Jesusi echo'ná torúami níima mapo'ná echí Erorsi asali, mapujiti echí Erorsi walula silíami níili echo'ná Galiléachi nuláami. A'lí echí Erorsi ayena cho echo'ná Jerusalémachi asali echalí rawé. ⁸A'lí echí Erorsi we kaníli mapalí binói ma riwali echí Jesusi, mapujiti wi'líbé jonsa echí Erorsi wabé 'nénali; mapujiti binói ma we námali wikabé namuti

echi Jesusi jiti ra'ichálawachi, ayena cho echi Erorsi wabé nakili 'nénala mapalí Jesusi wabé omériga olali mapurigá ke wesi auché jaré pagótami omérali olayá. ⁹Echalí echi Erorsi wikabé namuti rukueli, chopi Jesusi ketasi bilé namuti ku nijéwali. ¹⁰A'lí echi jaré o'wéala sacerdote ayena cho echo'ná muchili, echi jaré nulalíwami binériami ayena cho. Echalí aboni waminabi ne wabé nílaga wi'nijili echi Jesusi. ¹¹Echalí echi Erorsi, echi jaré binói sontársawala yuwa, ne wabé chibi olali echi Jesusi. Ayena cho aboni we nakili tiníchanala echi Jesusi, echijiti aboni we napachátali bilé galabé wi'libé napacha mapurigá bilé walubela silíami niráa. Echalí aboni auchecho ku júuli echo'ná mapo'ná echi Pilato asali. ¹²Echalí rawé echi Pilato, echi Erorsi yuwa napawika auchecho galá ku amígowala níili, mapujiti chabénala aboni chopi a'nagupi we nasayérali.

Echi Pilato nulali mapurigá Jesusi waminá mi'lirúami níima

(Mt. 27:15-26; Mr. 15:6-15; Jn. 18:39-19:16)

¹³Echalí echi Pilato napabuli echi jaré o'wéala sacerdote, echi jaré pagótami o'wéalawala ayena cho, echi wikabé pagótami asíchiko, ¹⁴echalí binói jeaneli: 'Yémitamo tamí 'yali je'ná rijói mapurigá we nal'áwatiami niráa echi auché jaré pagótami. Chopi nijeni ma suwaba we rukueli jena'í bacháami 'yemi yuwa, a'lí nijeni ketasi riwali mapu binói chati oláami ju, mapurigá 'yémitamo wikabé namuti wi'nijí. ¹⁵Ayena cho echi Pilato waminabi jeaneli: Echi Erorsi ketasi cho riwali chati oláami niráa, mapujiti echi Erorsi ma auchecho ku kuwana júuli tamujé yuwa. Jipi 'yémitamo ma galá ritiwá mapu je'ná rijói tarapé biyiri chati oláami ju. Echijiti nijeni mayé mapu ketasi 'wérali ju mapu Binói waminá mi'lirúami níima. ¹⁶Nijeni nulama wipisónala. A'lí bicheni ku ni'yúbanama. ¹⁷Mapujiti echalí omowálawachi arigá 'wérali níili mapurigá echi walula silíami ku machí pama bilé Juríosi rijói mapu pachá bachárami níili, mapujiti echi silíami echirigá olali sinibí bamíbali. ¹⁸Chopi si'néami echi jaré wikabé Juríosi pagótami chótali o'weli ra'íchaga jeanigá: ¡Ketásita nakí echi Jesus! ¡Ku machí pa echi Barabasi! ¹⁹A'lí echi Barabasi riwéami rijói pachá kumurachi bachara asali mapujiti binói wabé sayérali echo'ná walúlachi nuláami o'wéala, ayena cho mapujiti binói mi'yali auché bilé rijoy. ²⁰Echalí echi Pilato nakili ku ni'yúbanala echi Jesusi, echijiti binói auchecho ra'íchali echi pagótami. ²¹Chopi aboni auchecho waminabi wabé o'weli ra'íchaga jeanili: ¡Kúrsichi michoné! ¡Kúrsichi michoné! ²²Echalí echi Pilato ma auché baisá chokéami niráa ra'íchali. Échiko jeanigá rukueli: ¿Churékula echo'ná kúrsichi michóntami níima? ¿Churigá chati olali? Nijeni tarapé riwali je'ná rijói chati oláami niráa, mapurigá binói echijiti waminá mi'lirúami níima riwéali. Nijeni nulama wipisónala. A'lí bicheni nulama ku ni'yúbanala. ²³Chopi aboni waminabi o'weli ra'íchaga tali mapurigá Jesusi echo'ná kúrsichi michóniga mi'lirúami níima. A'lí echi jaré o'wéala sacerdote ayena cho echirigá tánali. Echijiti echi Pilato echirigá chopi olali mapurigá aboni nakili. ²⁴Mapujiti binói nulali mapurigá Jesusi echirigá mi'lirúami níima, achigórigá mapurigá aboni nakili. ²⁵Ayena cho echi Pilato nulali ku machí pánala echi Barabasi riwéami rijói mapu echo'ná kumurachi pachá bachárami níili mapujiti échiko wabé sayérali echo'ná walúlachi nuláami o'wéala, ayena cho mapujiti binói mi'yali auché bilé rijoy. Chopi echi Pilato waminá nijili echi Jesusi mapurigá Binói mi'lirúami níima mapurigá aboni nakili.

Jesusi clavo jiti michóntami níili echo'ná kúrsichi

(Mt. 27:32-44; Mr. 15:21-32; Jn. 19:17-27)

²⁶Echalí echirigá towáwachi Jesusi, mapurigá Binói echo'ná kúrsichi michóniga mi'lirúami níima, aboni chapili bilé rijói Simoni riwéami, mapu echo'ná kawichí jonsa inárami níili. Échiko 'wérali anélati mapurigá binói matórama echi wabé bitéami kursi echo'ná jubáami Jesusi yuwa ináraga.

²⁷Echalí rawé ne wikabé pagótami jubáami najátali echi Jesusi yuwa. Wikabé muguí ayena cho jubáami najátaga ne wabé o'móniga nalákali mapujiti Jesusi echirigá mi'lirúami níima riwéali. ²⁸Chopi Jesusi ku kuwana 'néniga jeaneli echi jaré muguí: 'Yemi muguí jena'í Jerusalémachi piréami, ketasi tamí natimaga nalákasi. Chopi 'yemi aboni jiti natimaga nalákasi, echi jaré 'yemi kúchuwala jiti natimaga ayena cho. ²⁹Mapujiti pe waminánomí rawé echi jaré pagótami jeanimea: Echi jaré muguí mapu ketasi tanéami ju, arigá ne wabé kaníliami ju; ayena cho ne wabé kaníliami ju echi jaré muguí mapu ketasi siné ranáami níili; ayena cho kaníliami ju echi jaré mapu ke siné chi'írali echi jaré kúuchi. ³⁰Echalí rawé jena'í wichimóbachi piréami pagótami ne wabé risúu olárami níima, echijiti aboni chotama jeanée echi ripabé rabótami: ¡Wakiná tamujé tamichi moba najusi, mapurigata waminá suwibabo! Ayena cho aboni jeanema echi kúuchi rabótami: ¡Tamujé tamí moba polé! ³¹Mapujiti a Nijeni je'ná jerigá risúu olárami níisagá, echi jaré wabé chati oláami pagótami jena'í Jerusalémachi piréami waminabi wabé simírami chati risúu olárami niima.

³²Echalí rawé okuá wabé chati oláami rijói ayena cho torúami níili Binói Jesusi yuwa, mapurigá aboni ayena cho waminá ko'wirúami níima. ³³Echalí mapalí aboni ma sébali echo'ná biléana mapo'ná Chu'wí Mo'ólachi anilíwachi níili, echalí Jesusi echo'ná biléana kúrsichi, clavo jiti, michóntami níili Binói sikálachi, Binói ronólachi ayena cho. A'lí echi okuá chati oláami rijói echo'ná auché jaréana kúrsichi michóntami níili. Bilé aboni michóntami níili echo'ná biléana kúrsichi Jesusi yuwa watoná wilíami. Echi auché bilé michóntami níili echo'ná auché biléana kúrsichi Jesusi yuwa o'winá wilíami. ³⁴A'lí mapalí aboni echirigá michónsali Jesusi, echalí Binói we yáati Riosi yuwa ra'íchaga jeaneli: ¡Keni Onó, galá wikáwi aboni, mapujiti aboni ketasi machí mapurigá aboni olá! Echalí echi jaré sontarsi, aboni niráa, rojuánali echi jaré namuti Jesusi napáchala, mapalí aboni namuti ri'léchaga olali mapurigá echirigá machimea chigá mema riwéali ibili namuti. ³⁵Echalí echi wikabé pagótami echo'ná 'nígá jali. Ayena cho echi jaré aboni o'wéalawala wabé kichiga tiníchali echi Jesusi mapalí aboni jeanili: Je'ná rijói anili mapurigá binói galá omérali ku'wíriya auché jaré. ¡Jipi galá níima a binói niráa ku'wírasa, a ne bichíwali binói níisagá echi Cristo anilíwami mapu Riosi chapili! ³⁶Echi jaré sontarsi ayena cho wabé chati sití ologá tiníchali echi Jesusi mapalí aboni murubéanaga Binói yuwa, 'yali bajínalá wabé chokóami namuti ba'wila. ³⁷Echalí aboni ayena cho jeaneli: ¡A mujé níisagá echi walubela Juríosi pagótami silínawala, a mujé binói niráa galá ku'wira! ³⁸Ayena cho echo'ná kúrsichi ripá moba mapo'ná Jesusi michóntami níili je'ná jerigá osirúami níili: Je'ná ju echi Walubela Juríosi Silímwawala. Echirigá osirúami níili Griego anilíwami ra'íchala niráa, echi Ebreo anilíwami ra'íchala ayena cho, echi Latini anilíwami ra'íchala asíchiko.

³⁹Echalí bilé echí wabé chatí oláami rijói mapu ayena cho echo'ná auché biléana kúrsichi michóntami níili, échiko wabé chatí anigá jeaneli: ¡A mujé ne bichíwali níisagá echí Cristo anilíwami mapu Riosi julama riwéali, a mujé binói ku ku'wira, tamujé tamí ayena cho ku'wira! ⁴⁰Chopi echí auché biléala jeanigá oyérali: ¿Kéchami majawá Riosi mápumi achigórígá kastigo 'yárami ju mapurigá Binoy? ⁴¹Arigá galá níili mapu tamujé jerigá kastigo 'yárami níibo, mapujiti tamujé chopí echiyena kastigo 'yárami níili, achigórígá mapurigata wabé chatí oláami níili; chopí je'ná rijói tarapé namuti chatí olali. ⁴²Echalí echí rijói jeaneli: ¡Mujé Jesusi, waminánomí rawé galá tamí jiti 'natá, mapalimi ne Walubela Nuráami níima! ⁴³Echalí Jesusi jeaneli: Ne bichíwali nimí ané mapu jípimi tamí yuwa asimea echo'ná ripá riwigachi.

Jesusi ma mukuli

(Mt. 27:45-56; Mr. 15:33-41; Jn. 19:28-30)

⁴⁴A'lí echalí rawé mapalí ma nasipa rawé níili, ke sayiná ne suníami jena'í wichimóbachi we rukuáwali nasipa alíwachi yénasí. ⁴⁵Echi rayénali wabé chónali. Echalí echí walubé runáami namuti mapuyiri bilé kimá tétami mapu echo'ná pachá walubé Juríosi ri'obáwalachi 'yératami niráa chukuli, échiko ke sayiná ne nasipa chi'wali. ⁴⁶A'lí Jesusi o'weli ra'íchaga jeanili: ¡Keni Onó ne galá nisé keni aliwá! A'lí je'ná jerigá anisáa, ma mukuli. ⁴⁷A'lí mapalí echí walula sontarsi riwali suwaba je'ná jerigá mapurigá ikili, echalí binói ne wabé walubela anega Riosi, waminabi jeanili: Ne bichíwali je'ná Rijói ne wabé galabé níili. ⁴⁸Ayena cho si'néami pagótami mapu echo'ná 'nigá muchili, je'ná jerigá riwisáa wabé siwega cho'nagá aboni sulálachi ku simíbali. ⁴⁹Chopi si'néami echí jaré mapu ikí Jesusi amígowala níili, echí jaré muguí ayena cho, si'néami mapu ikí echo'ná Galiléachi jonsa najátali Jesusi yuwa, ne si'néami aboni pe mikabé 'naka, we 'nigá jali je'ná jerigá mapurigá ikili.

Jesusi ma chu'wirótami níili

(Mt. 27:57-61; Mr. 15:42-47; Jn. 19:38-42)

⁵⁰Echo'ná Arimatéachi anilíwachi, echo'ná Juréachi anilíwachi kawírali bitéali bilé galabé oláami rijói mapu José riwéami níili. Échiko bilé níili echí auché jaré o'wéala Juríosi yuwa. ⁵¹Chopi binói bichíiga buweli mapurigá Riosi nulema jena'í wichimóbachi piréami pagótami, echijiti binói ketasi nakili mapurigá Jesusi mi'lirúami níima echo'ná kúrsichi mapurigá echí auché jaré o'wéala Juríosi nulali mi'linala. ⁵²Je'ná rijói simigá mapo'ná echí walula Pilato asali, we risensia tali mapu binói chu'wirómiya tomea echí Jesusi mukúami sapala. ⁵³Echalí ma echo'ná ripá kúrsichi jonsa rikibusa echí Jesusi mukúami sapala, echí José biléana kimílachi kabilí. A'lí echo'ná biléana risochí chu'wirólachi rikali, mapo'ná echo'ná biléana koláachi niwárami níili mapurigá risochí niráa. Echalí ke wesi cho echo'ná chu'wirótami níili. ⁵⁴Echalí ma pe ba'alínala níili isábawachi rawé. ⁵⁵Echalí echí jaré muguí mapu ayena cho Jesusi yuwa sili echo'ná Galiléachi jonsa, aboni ayena cho echo'ná chu'wirólachi sigá galá riwali mapurigá echí Jesusi mukúami sapala echo'ná rikárami níili. ⁵⁶Echalí aboni ku ro'wiga echo'ná bitichí, galá a'lárali jaré wabé su'weti júkami namuti, jaré uchulíwami namuti ayena cho, echí Jesusi mukúami sapala uchénala. Chopí aboni galá isábali echalí isábawachi rawé mapurigá echí jaré Juríosi pagótami nulérami níili.

Echi Walubela Jesusi ku owíñali mapalí ma mukúami níili

(Mt. 28:1-10; Mr. 16:1-8; Jn. 20:1-10)

24 Chopi echalí oméachi rawé, mapu echalí jonsa bilé tarali níima, ne wabé bi'yá echí jaré muguí echo'ná chu'wechi sili, echí wabé su'wéti júkami namuti togá, echí mapu aboni ma a'lárali. Ayena cho auché jaré muguí aboni yuwa simíbali. ²Chopi mapalí aboni ma sébali echo'ná chu'wechi, echalí aboni riwali ma ri'nabura atíami echí walubé rité mapu echo'ná chu'wechi 'yératami níili. ³Echalí echo'ná pachá chu'wechi mo'wisáa, aboni ketasi riwali echí Walubela Jesusi mukúami sapala echo'ná bu'wíami, mapo'ná bachánala rikárami níili. ⁴Echijiti aboni ne wabé majali, chopi aboni waminabi wabé majajali mapalí aboni ke sayiná riwali okuá rijói echo'ná napawika aboni yuwa jáwami, echí mapu ne wabé simírami ratábami napáchami níili. ⁵Echalí echí jaré muguí waminabi wabé majaga, chopi ri'lé wi'yérali 'nénali. A'lí echí okuá o'wéala Riosi kapitánawala jeanigá rukueli: ¿Churékulátamo jena'í chu'wechi amí echí Jesusi mapu ma ku bitéami ju? ⁶Binói ma ketasi te jena'ibi, mapujiti ma ku owíñali. Galá 'nátaga newalasi mapurigá Binói bachánala 'yemi mi aneli mapalí Binói abijí iyénali echo'ná Galiléachi. ⁷Echalí Binói Jesusi 'yemi mi jeaneli mapu arigá 'wérali níili mapu Binói waminá nijírami níima, mapurigá echí auché jaré chati oláami pagótami chapigá mi'limea, echo'ná biléana kúrsichi michóniga, chopi mapurigá Binói bikiyá chi'ligá ku owínama riwéali. Binói wilárami níili mapurigá Ku'wíriami niráa. ⁸Echalí aboni galá 'nátaga newalali mapurigá Binói chabénala aneli. ⁹A'lí echalí mapalí echí jaré muguí ku sili echo'ná walúlachi, echo'ná chu'wechi jonsa, echalí aboni ku ruyeli suwaba je'ná jeyiri echí jaré makói miná bilé mapu chabénala julárami níili nawisánala. Ayena cho echirigá ruyeli echí auché jaré bichiyámi. ¹⁰A'lí echí jaré muguí mapu je'ná jerigá ne bukulíwami niráa ruyeli echí jaré mapu julárami níili nawisánala, aboni echí María, echo'ná Makatárachi bitéami níili, echí Juana ayena cho, echí auché bilé María ayena cho, echí mapu echí Jakobo iyela níili; ayena cho auché jaré muguí aboni yuwa 'yénali. ¹¹Chopi echí jaré makói miná bilé mapu julárami níili nawisánala, aboni mayeli mapu echí jaré muguí chopi mapurigá ke newalite niráa ra'íchali. A'lí aboni ketasi bichíili mapurigá echí jaré muguí nawésali. ¹²Chopi echí Pegro arigá machínaga ne wabé 'maga simili echo'ná chu'wechi. A'lí mapalí binói 'nénali echo'ná pachá, echí chiní kimila chopi riwali echo'ná chakena achárami. Echalí echí Pegro ku simigá, ne wabé 'nátali suwaba je'ná jeyiri jiti mapurigá ikili.

Mapurigá ikili echo'ná Emaúsachi burúami

(Mr. 16:12-13)

¹³Echalí rawé okuá aboni echo'ná biléana rijówachi sírali mapo'ná Emaúsachi anélati, mapo'ná mulubé níili echo'ná Jerusalémachi jonsa, mapuyena makói miná bilé kilometro niráa. ¹⁴Echalí aboni a'nagupi ra'ichásaya sírali suwaba mapurigá ikili. ¹⁵A'lí mapuyénasí aboni echirigá a'nagupi ra'ichásaya sírali, echalí Jesusi Binói echo'ná mulubéanaga, aboni yuwa inárali. ¹⁶Echalí aboni galá riwali mapurigá bilé rijói aboni yuwa iyénali, chopi aboni ketasi omérali machiyá chigá níili, mapujiti Riosi echirigá olali. ¹⁷Echalí Jesusi jeanigá rukueli aboni: ¿Piri ju máputamo echirigá wabé siwega a'nagupi ra'icha mapuyénasítamo jena'í buwichí 'yena? ¹⁸A'lí bilé aboni mapu Klioba riwéami níili, échiko ku nijéwaga jeaneli:

¡Si'néami pagótami galá machí mapurigá ikili jena'í Jerusalémachi bukulí rawé jonsa! ¿Áchami bi'néliju mápumi ketasi machí? ¹⁹Echalí Jesusi jeanigá rukueli: ¿Churigá ikili? A'lí biché aboni jeaneli: Mapurigá ikili echi Jesusi, echi mapu echo'ná Nasarétachi bitéami níili, echi mapu Riosi jiti nawésami rijói níili, echi mapu Riosi yuwa, ayena cho si'néami pagótami yuwa, ne wabé omériga oláami níili, ne wabé omériga ra'íchami ayena cho. ²⁰Bukulí niráa echi jaré o'wéala sacerdote, echi auché jaré tamujé o'wéalawala ayena cho njili echi Jesusi mapurigá Binói wi'nijírami níima, ayena cho mapurigá Binói waminá mi'lirúami níima echo'ná kúrsichi michóniga. ²¹Chopi tamujeta mayeli mapu Binói wilárami níima riwéali mapurigá Walubela Silíami niráa, echi mapu Ku'wíriami níima riwéali tamujé Isaeli pagótami yuwa, mapurigata ketasi waminabi nulélami níibo echi auché jaré isena pagótami jiti. A'lí jipi arigá ma bikiyá chi'lé mapu jonsa je'ná jerigá ikili. ²²Chopi jaré tamujé níwala muguí tamujé tamí majajáraga aneli mapu Binói ma auchecho ku bité, mapujiti echi jaré muguí bi'yá chi'láachi simíbali echo'ná chu'wechi, ²³chopi aboni ketasi riwali Binói Jesusi mukúami sapala. ¡Alí aboni tamujé tamí jeanésiya ku sili mapurigá aboni riwali jaré o'wéala Riosi kapitánawala, echi mapu ruyeli mapu Binói Jesusi ma ku bitéami ju! ²⁴Ayena cho jaré rijói tamujé apanérawala echo'ná chu'wechi simíbali. A'lí aboni achigórigá riwali mapurigá echi jaré muguí anili, chopi aboni ketasi cho riwali echi Jesusi mukúami sapala.

²⁵Echalí Jesusi Binói jeaneli: ¡Báaji! 'Yémitamo tarapé galá 'nátami ju; ayena chótamo wi'libénokuá mapurigátamo galá bichíibo suwaba mapurigá echi jaré Riosi jiti nawésami anili, mapurigá osirúami ju echo'ná Riosi Ra'íchala oselfwalachi. ²⁶¡Arigá 'wérali níili mapu echi Cristo echirigá risíu olárami níimi, mapalí Binói ke cho ne wabé Walubélatami níima! ²⁷Echalí Jesusi chótali binériga ruyé mapu churigá aniwáami ju Riosi Ra'íchala osirúami, ne suníami mapalí Jesusi Binói jiti rugá anirúami ju. Bachá niráa Binói echirigá binériga ruyeli mapurigá echi Moisesi osali, ayena cho Binói binériga ruyeli mapurigá echi auché jaré Riosi jiti nawésami osali.

²⁸Echalí aboni ma sébali echo'ná rijówachi mapo'ná aboni simiba sírali, chopi echi Jesusi olali mapurigá waminabi simíami niráa. ²⁹Chopi aboni 'wérali niráa sulili, jeanigá: Jena'í tamujé tamí yuwa ripí, mapujiti ma we aliwa, ayena cho ma ne mulubé chonámaré. Echalí Jesusi echo'ná pachá bakili mapurigá aboni yuwa ripima. ³⁰A'lí mapalí Jesusi ma ko'yá asali aboni yuwa, echalí Binói chapigá echi pani, ma natétara 'yasa, rojuánaga 'yali mapurigá aboni ko'mea. ³¹Echalí aboni we yáati galá machíliami niwálati, ayena cho aboni ma galá machili mapu Jesusi Binói níilo, chopi Binói ma ke sayiná ke néwikili. ³²Echalí aboni a'nagupi jeaneli: ¿Kéchata ne bichíwali wabé simírami kaníili mapalí Binói tamujé tamí yuwa ra'íchaga inárali echo'ná buwichí, ayena cho mapalí Binói tamujé tamí ra'íchaga ruyeli mapurigá osirúami ju echo'ná Riosi Ra'íchala oselíwalachi?

³³Echalí we yáati aboni ku simíbali echo'ná Jerusalémachi, mapo'ná aboni napawika muchúwami riwali echi jaré makói miná bilé, echi auché jaré aboni apanérawala yuwa. ³⁴Echalí si'néami echo'ná muchúami we yáati jeaneli: ¡Ne bichíwali ma ku owínali echi Walubela Jesus! A'lí je'ná Simoni ma galá riwali. ³⁵Echalí echi okuá ayena cho jeaneli mapurigá ikili echo'ná buwichí, ayena cho

mapu churigá aboni galá machili echí walubela Jesusi mapalí Binói rojuánali echí pani.

Jesusi ke sayiná wilíbali echo'ná echí jaré yuwa mapu Binói binérali

(Mt. 28:16-20; Mr. 16:14-18; Jn. 20:19-23)

³⁶Chopi mapalí aboni abijí je'ná jerigá ra'íchali, echalí ke sayiná Jesusi Binói echo'ná nasipa wilíbali aboni yuwa; ayena cho Binói kuíraga janeli: ¡Kilí niráa ologá pirélasi! ³⁷Chopi aboni wabé majajáratami níili; ayena cho wabé majaga 'nátali mapu aboni riwali bilé aliwá. ³⁸Chopi Jesusi jeanigá rukueli: ¿Churékulátamo echirigá majajáratami ju? ¿Churékulátamo si'winárigá 'nata echo'ná 'yemi sulálachi? ³⁹Galá 'nesi Nijé sikálachi, Nijé ronólachi ayena cho. ¡Nijé Binói juni! Tamí nochogá 'nesi; mapujiti bilé aliwá ketasi sapé, nirapé oché, mapurigátamo tamí ritiwá. ⁴⁰A'lí je'ná jerigá anisáa, Jesusi 'nérali Binói sikálachi, Binói ronólachi ayena cho. ⁴¹Chopi mapuyénasí aboni abijí ke cho galá bichíili mapujiti aboni ne wabé simírami kaníili, ayena cho mapujiti aboni chopí wabé majaga 'nátaga 'nénali, echalí Jesusi jeanigá rukueli: ¿Áchatamo niwa jaré namuti ko'wáami jena'ibi? ⁴²Echalí aboni rojuániga bilé walú Rochí awérami, pe taa 'yali ko'wánala echí Jesusi, pe taa kolimena ayena cho. ⁴³A'lí Jesusi chapigá ko'wali echo'ná bacháami mapo'ná aboni 'nigá jali.

⁴⁴Echalí janeli: Je'ná jerigá mapurigá ikili tamí yuwa, chopí ju mapurigá Nijeni 'yemi mi aneli mapalini abijí 'yemi nimí yuwa asali: Mapu arigá 'wérali níili mapu suwaba ikimea mapurigá tamí jitti rugá osirúami ju echo'ná Riosi Ra'íchala oselíwalachi, mapurigá echí Moisesi osali, ayena cho mapurigá echí jaré o'wéala Riosi jiti nawésami osali, ayena cho mapurigá osirúami ju echo'ná Sálmochi anilíwachi. ⁴⁵Echalí Jesusi galá machírali aboni mapu churigá aniwáami ju suwaba Riosi Ra'íchala mapurigá osirúami ju. ⁴⁶Echalí Jesusi janeli: Echirigá osirúami ju mapu arigá 'wérali níili mapurigá Nijeni wabé risúu orálami níima, ayena cho mapurigá Nijeni mi'lirúami níima, ayena cho mapurigá baikiyá chi'lligá Nijeni ku owínama riwéali, mapalí Nijeni ma mi'lirúami níisa. Nijeni ju echí Walubela Cristo anilíwami mapu Riosi júuli jena'í wichimóbachi. ⁴⁷Ayena cho arigá 'wérali ju mapurigá echí jaré mapu ikí tamí bichíyami ju galá nawésama Nijé Ra'íchala ne si'néami pagótami, ne suníami jena'í wichimóbachi píréami. Arigá 'wérali ju chótaga nawésiya jena'í Jerusalémachi jonsa, chopí ne suníami jena'í wichimóbachi ayena cho nawisárami níima, jeanigá mapurigá ne si'néami pagótami we siwega ku ro'wima Riosi yuwa, mapurigá galá ku wikawárami níima mapurigá aboni chati olali. ⁴⁸'Yémitamo ne galá machí suwaba je'ná jeyiri namuti, echijiti arigá 'wérali ju mapurigátamo we nawisabo. ⁴⁹Nibila, Nijeni julama echo'ná moba 'yémichi echí Wabé Galabé Riosi Iwigala, Echi mapu Nijé Onolá ne bichíwaga aneli mapu nijima riwéali. Chopí jena'í Jerusalémachi tibisi mapuyénasí 'yémitamo 'yárami níibo mapurigátamo wabé omériga olabo mapurigá echí ripá riwigachi atíami Riosi 'yemi mi 'yama riwéali.

Jesusi torúami níili echo'ná ripá riwigachi

(Mr. 16:19-20)

⁵⁰Echalí Jesusi bayérali aboni echo'ná walúlachi Jerusalémachi anilíwachi jonsa, mapuyénasí Betániachi anilíwachi. Echo'ná echí Walubela Jesusi ripá sikéraga, wabé galabéraga aneli aboni. ⁵¹Echalí mapalí Jesusi echirigá galabéraga aneli aboni,

ke sayiná Binói ku simili echo'ná abónichi jonsa. A'lí Binói echo'ná ripá riwigachi torúami níili.⁵² Echalí aboni ma chokoba jaga waminabi walubéraga aneli echí Walubela Jesusi, a'lí aboni ne wabé kanflaga ku simíbali echo'ná Jerusalémachi.⁵³ A'lí aboni sinibí rawé muchili echo'ná echí walubé Juríosi ri'obáwalachi, mapo'ná aboni sinibí wabé galabé aneli Riosi. ¡Echirigá nílaga!

SAN JUAN

osali Je'ná Galabé Ra'íchali

Jesucristo jiti rugá

**Jesucristo mapu Riosi Ra'íchala anérami ju, ma
ranarúami níili jena'í wichimóbachi**

1 Ki'yá chokichí echí Riosi Ra'íchala níili. Echi Riosi Ra'íchala sinibí Riosi yuwa asali. A'lí Echi mapu Riosi Ra'íchala anérami ju, ayénachó Riosi ju.² Je'ná, ki'yá chokichí, Riosi yuwa asali. ³ Je'ná Binói jiti, Riosi niwali ne suwaba namuti. A'lí tarapé biyiri namuti nirú mapu Binói ketasi niwali. ⁴ A'lí Echi mapu Riosi Ra'íchala anérami ju, Échiko we galá 'ya mapurigá echí pagótami sinibí niráa piréami níima. A'lí mapalí echí pagótami ma sinibí niráa piréami ju, echalí aboni ma galá machimea ne galabé ologá piréliya. ⁵ Jena'í wichimóbachi piréami pagótami ne wabé chati oláami ju. Echijiti aboni mapurigá echo'ná rokowárali niráa chopi 'yénami ju. A'lí Echi mapu Riosi Ra'íchala anérami ju, Echi galá machíramiya nawali echí pagótami jena'í wichimóbachi piréami. A'lí echi riablo we nakí mapurigá echí pagótami chopi chati ologá pirélama mapurigá echo'ná rokowárali piréami niráa; chopi binói ketasi omero olayá mapurigá ne si'néami pagótami echirigá olama, mapujiti echí Riosi Ra'íchala arigá machíraga olá si'néami echí jaré mapu ikí nakiko mapu galá bichíima Riosi.

⁶ Riosi chabénala bachá júuli bilé rijói, Juani riwéami, echí mapu pagóami níili. ⁷ Je'ná Juani nawali mapurigá nawésami niráa. Binói nawésali echí auché bilé Rijói jiti, echí mapu galá machíraga olá jena'í wichimóbachi piréami pagótami. Je'ná Juani echirigá nawésali mapujiti binói we nakili mapu ne si'néami pagótami galá bichíima echí auché bilé Rijói jiti. ⁸ Echi Juani ketasi níili echí mapu galá machíraga olá echí pagótami, chopi echí Juani bachá niráa nawali mapurigá binói nawisama echí auché bilé Rijói jiti, echí mapu galá machíraga olá echí pagótami. ⁹ Echalí echí auché Bilé mapu ne bichíwali machíraga olá si'néami pagótami ma nawama riwéali jena'í wichimóbachi.

¹⁰ Je'ná Binói jena'í wichimóbachi asali. A'lí ki'yá chokichí Binói niwali jena'í wichimóbachi, chopi jena'í wichimóbachi piréami pagótami ketasi galá machili echí Binói. ¹¹ Echirigá binói jena'í kepu níwalachi nawali; chopi echí jaré Binói níwala pagótami arigá ketasi nareli echí Binói. ¹² Chopi jaré jena'í wichimóbachi piréami arigá ne galá bichíili echí Binói, echijiti Binói galá 'yali mapurigá aboni niwárami níima Riosi kúchuwala niráa, ne si'néami mapu ikí aboni galá bichíiko Binói riwalá niráa. ¹³ Ne si'néami mapu ikí galá bichíiga naréliko echí Binói, aboni

ma Riosi kúchuwala niráa ranarúami ju. Riosi ma niwali echi aboni mapurigá Binói kúchuwala niráa. A'lí aboni ketasi echirigá ranarúami ju mapujiti aboni chopi echirigá nakili, nirapé mapujiti auché bilé rijói echirigá nakili; chopi ranarúami ju Riosi kúchuwala niráa mapujiti aboni ma galá bichíiga nareli echi Bilé mapu galá machíraga olá echi pagótami.

¹⁴ A'lí Echi mapu Riosi Ra'fchala anérami ju, ma ranarúami níli jena'í wichimóbachi mapurigá echi pagótami kúchuwala ranarúami ju. Je'ná Binói, rijói niráa, bitéali jena'í wichimóbachi, tamujé yuwa. A'lí tamujeta riwali echi Binói ne wabé Walubela niráa, echalí mapalí Riosi Onorúami aneli mapu bi'nélipi Binói Ranala ju, ayénachóta machili mapu Binói ne wabé simírami galéami ju, ayénachó ne wabe simírami bichíwaga ra'íchami niráa. ¹⁵ Echi Juani nawésali echi Binói jiti rugá mapalí o'weli ra'íchaga jeanili: Nijeni 'yemi mi nawésali je'ná Rijói jiti rugá, mapalini jerigá anili: Nijeni ma nawali 'yemi mi nawésisiya, chopi auché Bilé ke 'me ayó ayénachó nawama 'yemi mi nawésisiya. Je'ná Binói waminabi ne wabé simírami Walubela ju ketasi mapurigá nijé, mapujiti Binói ki'yá sinibí bitéali mapalí nijeni ke cho ranarúami níli.

¹⁶ Binói ne wabé simírami galéami ju. Ayénachó Binói tamujé tamí ne wabé simírami galeli. Echirigá Binói wisabé, sinibí niráa tamujé tamí ne wabé ku'wírali. ¹⁷ Echi Moisesi riwéami rijói osali Riosi nulalila mapurigá Riosi Binói nulali, chopi echi Walubela Jesucristo tamujé tamí 'yali mapurigata galéami níibo, ayénachó Binói tamujé tamí 'yali echi ne Bichíwali. ¹⁸ Ke wesi tarapé siné riwali Riosi, chopi echi bi'nélipi Riosi Ranala, echi mapu echo'ná ne mulubé Riosi Onorúami yuwa atí, je'ná Binói, tamujé tamí ne galá machírali echi Onorúami.

Echi Juani ma nawésali Jesucristo jiti rugá

(Mt. 3:11-12; Mr. 1:7-8; Lk. 3:15-17)

¹⁹ Mapalí echi jaré Juríosi echo'ná Jerusalémachi piréami júuli jaré sacerdote anilíwami rijói, ayénachó jaré Libita aniríwami rijói, mapurigá jerigá rukuema echi Juani: ¿Chigá 'nalí walula Riosi jiti nawésami ju mujé? Echalí echi Juani ne bichíwaga nawésali, ²⁰ mapalí binói ne galá machífami niráa jeanili: Nijé ketásini ju echi Walubela Cristo anilíwami, echi mapu Riosi wilali walubela Nigúurami niráa.

²¹ A'lí aboni auchecho siné rukueli jeanigá: ¿Chigá bichemi juko? ¿Áchami ju echi walula Riosi jiti nawésami, Elíasi riwéami, mapu chabé ki'yá bitéali jena'í wichimóbachi? A'lí echi Juani Jeaneli: Ketásini ju. A'lí aboni auchecho siné waminabi jeanigá rukueli: ¿Áchami ju echi auché bilé walula Riosi jiti nawésami máputa we buwé? A'lí Jeaneli: Ketásini ju.

²² A'lí aboni jeanigá rukueli: ¿Chigá bichemi juko? ¿Churigami tamujé tamí ané mujé binói? Wérali ju mapurigata echirigá ne galá ku ruyebo echi jaré o'wéala mapu tamujé tamí júuli.

²³ A'lí Jeaneli: Nijeni ju echi rijói mapu echo'ná biléana waná kawichí nawésaga jeaní: Echi Walubela ke sayiná nawama jena'í wichimóbachi. Echijiti galá a'lárasí 'yemi aboni sulálachi, achigórigá mapurigátamo ayénachó galá a'lara echo'ná buwichí mapalí bile walula echo'ná simírama. Echirigá olasi mapurigá echi walula Riosi jiti nawésami Isaíasi riwéami osogá nulali.

²⁴ A'lí echi jaré mapu echirigá julárami niili, ayénachó o'wéala Bariseo anilíwami binériami níli. ²⁵ A'lí aboni jeanigá rukueli: ¿Churékula bichemi echirigá pagoka

olá echi pagótami, ketásimi echi Walubela Cristo anilíwami nísagá, nirapemí echi Elíasi nísagá, nirapemí echi auché bilé walula nawésami nísagá?

²⁶ A'lí echi Juani ku nijéwaga jeaneli: Nijeni pagola ba'wí jiti, chopí auché Bilé ma 'yemi yuwa atí, mapu 'yémítamo ketasi cho galá machí. ²⁷ Je'ná ju Echi mapu tamí yuwa pe jubá nawá 'yemi mi nawésisiya. Binói ju Echi mapu waminabi ne wabé simírami Walubela ju, ketasi mapurigá níjé. Nijeni ma anili mápuni ketasi 'me galá ju mapurigani mulubéanama echo'ná Binói yuwa, nirapé mapurigani akarápatama Binói akalá.

²⁸ Suwaba je'ná echirigá ikili echo'ná Betábarachi anilíwachi, mapo'ná bo'ónala waná ju echo'ná Joránachi anilíwachi bakochi, mapo'ná echi Juani pagoya asali echi wikabé pagótami.

Jesusi, echi Riosi níwala Méchuli ju

²⁹ A'lí echalí jonsa ba'alínala rawé echi Juani auchecho siné echo'ná iyénali. Echalí binói riwali echi Jesusi echo'ná mulubé nawáachi. A'lí echi Juani jeaneli echi jaré binói yuwa 'yénami: Je'ná Rijói, echi Riosi níwala Méchuli ju, mapu we omériami ju bi'wayá jenaí wichimóbachi piréami chati olalila. ³⁰ Je'ná Rijói ju mapu níjé, echi Binói jiti rugá, chabé 'yemi nimí jeaneli: Auché Bilé ke 'me ayó nawama 'yemi mi nawésisiya, echi mapu waminabi wabé Walubela ju Binói, ketasi mapurigá níjé, mapujiti Binói ki'yá sinibí bitéali mapalini níjé ketasi cho ranarúami níili. ³¹ A'lí níjé ketasini machili echi Binói. Chopí níjé arigá ba'wí jiti pagómuya nawálini, mapurigá echi jaré wikabé Israeli anilíwami pagótami ne galá machimea echi Binói.

³² Ayénachó echi Juani jeanigá nawésali: Nijeni riwali echi Wabé Galabé Riosi Iwigala echo'ná ripá riwigachi jonsa rikínamí mapurigá bilé makawi niráa. A'lí echi Wabé Galabé Riosi Iwigala echo'ná echi Jesusi yuwa moba tibili. ³³ Echalí níjeni ketasi cho machili echi Binói, chopí Riosi mapu tamí júuli ba'wí jiti pagónara echi pagótami, echi Binói tamí bachá niráa jeaneli: Mapalimi riwímea echi Wabé Galabé Riosi Iwigala echo'ná ripá riwigachi jonsa rikínamí, ayénachó mapalimi riwímea echi Riosi Iwigala echo'ná moba tibíami bilé rijói yuwa, echi Rijói níima mapu ne galá 'yama echi Wabé Galabé Riosi Iwigala echi jaré pagótami. ³⁴ Nijeni ma riwali echi Binói; ayénachó níjeni nawésaga aní mapu je'ná Rijói, echi bi'nélipi Riosi Ranala ju.

Jesusi ma chota binériya jaré rijói

³⁵ A'lí echalí jonsa ba'alínala rawé echi Juani auchecho siné echo'ná asali. Echi auché jaré okuá mapu binói binérali ayénachó echo'ná binói yuwa muchili. ³⁶ Echalí echi Juani galá riwisá echo'ná iyénachi echi Jesusi, a'lí jeanili: ¡Echi rijói, echi Riosi níwala Méchuli ju!

³⁷ Echalí echi okuá rijói mapu Juani binérali, ma galá namsa mapurigá echi Juani anili, a'lí aboni jubáami najátaga simíbali mapo'ná Jesusi inárali. ³⁸ A'lí Jesusi ku kuwana 'néniga riwali echi okuá Binói yuwa jubáami náatachi. A'lí jeanigá rukueli: ¿Píritamo amí? Echalí aboni jeaneli: Binériami, ¿kumi bité Mujé?

³⁹ A'lí Jesusi jeaneli: ¡Kiná simíbaga, 'nesi! A'lí echo'ná simasa riwali mapo'ná bitéali. A'lí echalí rawé aboni Binói yuwa tibili, mapujiti ma nasipa alíwachi níili.

⁴⁰ A'lí echi Antresi mapu echi Simoni Pegro rijimala níili, je'ná bilé níili echi okuá mapu galá námali echi Juani echirigá aníachi. Echalí echi okuánika jubáami

najátaga simíbali mapo'mí Jesusi simili. ⁴¹ Je'ná Antresi bachá ári kepu rijimá, echí mapu Simoni riwéami níli. A'lí ma riwisáa jeaneli: ¡Tamujeta ma riwali echí Mesíasi anilíwami! (Echi mapu jerigá aniwáami ju. Echi Walubela Nigúurami Cristo anilíwami.)

⁴² A'lí echí Antresi bayébali echí Simoni echo'ná mapo'ná Jesusi asali. Echalí Jesusi galá 'néniga jeaneli: Mujé, Simoni riwéami ju, echí Jonasi ranala, chopí jípmi Pegro riwéami níima, echí mapu jerigá aniwáami ju: Bilé rité.

Jesusi bayeli echí Jilipi, echí Natanaeli ayénachó

⁴³ Echalí jonsa, ba'lalínala rawé Jesusi simináali echo'ná Galiléachi anilíwachi kawírali. Echalí Jesusi riwali echí Jilipi echí mapu Binói jeaneli: ¡Tamí najató!

⁴⁴ Echi Jilipi echo'ná Becháirachi anilíwachi walúlachi bitéami níli, mapo'ná piréali echí Antresi, echí Pegro ayénachó. ⁴⁵ A'lí echí Jilipi ma riwisáa auché bilé rijói, Natanaeli riwéami, a'lí jeaneli: ¡Tamujé ma riwali echí Rijói mapu echí walula Moisesi, echo'ná Riosi Ra'íchala osilíwalachi osogá anili mapu nawama riwéali! ¡Je'ná ju echí mapu echí auché jaré Riosi jiti nawésami ayénachó osogá anili mapu nawama riwéali! ¡Echi Jesusi ju, echo'ná Nasarétachi bitéami, echí José ranala!

⁴⁶ A'lí echí Natanaeli jeanigá rukueli: ¿Acha nolínama bilé rijói Walubela echo'ná Nasarétachi jonsa? A'lí echí Jilipi chopí jeaneli: ¡Kiná simigá 'ne echí Rijói!

⁴⁷ A'lí mapalí Jesusi riwali echí Natanaeli echo'ná Binói yuwa nawáachi, a'lí Jesusi echí Natanaeli jiti rugá jeanili: ¡Nibila! Wakiná inaro bilé rijói mapu Isaeli pagótami ju, echí mapu ne bichíwali tarapé 'yékami ju.

⁴⁸ A'lí echí Natanaeli echirigá namsa, jeanigá rukueli: ¿Churigami tamí galá machí? A'lí Jesusi jeaneli: ¡Mapalí echí Jilipi ke cho mi bayeli, Nijé ma nimí galá riwali, mapalimi echo'ná ri'lé pachá biléana chunárali asali!

⁴⁹ A'lí echí Natanaeli jeaneli: ¡Binériami, Mujé ju echí bilepi bi'nélipi Riosi Ranala! ¡Mujé ju echí Walubela, tamujé Isaeli pagótami Silínawala!

⁵⁰ A'lí Jesusi ku nijéwaga jeaneli: Mapujiti Nijé nimí aneli mapu nimí riwali echo'ná ri'lé pachá biléana chunárali, ¿áchami galá tamí bichíi jipi? Pée waminana mujemi waminabi wabé simírami o'weli namuti riwiméa ketasi mapurigá je'ná.

⁵¹ A'lí Jesusi jeaneli: Ne bichíwali Nijé nimí jeané: Jipi jonsa pée waminana 'yémitamo galá riwiboa echo'ná ripá riwigachi ma iráparami niráa. Ayénachótamo echalí riwiboa echí jaré Riosi kapitánawala echo'ná ripá moyénaga, ayénachó ku tiguínami mapo'ná Nijé binói asimea, mapujiti Nijé wilálami ju mapurigá Ku'wíriami niráa.

Jaré walú omáwaga niwili echo'ná Kanachi anilíwachi

2 A'lí echalí jonsa wakiná bikiyá ch'ilíinala, echo'ná Kanachi anilíwachi rijówachi, echo'ná Galiléachi anilíwachi kawírali, jaré walú omáwaga niwili. Echalí echí Jesusi iyela ayénachó echo'ná asali. ² A'lí echo'ná bayérami níli echí Jesusi, echí jaré mapu Binói binérali ayénachó. ³ A'lí si'néami echí wikabé mapu bayélati, ibili niráa pée kúuchi niráa 'yálati bajínala, uva anilíwami rakéami namuti ba'wila; chopí mapalí ma suwali echí uva ba'wila, echalí echí Jesusi iyela jeaneli: ¡Ma suwili echí uva ba'wila!

⁴ A'lí Jesusi jeaneli: Mukí, ¿churékulami echirigá tamí ané? Nijé téławala ketasi cho sébali.

⁵Chopi echí Binói iyela jeaneli echí jaré mapu kónaga nachútali: Suwaba olasi mapurigá Binói 'yemi mi anema.

⁶A'lí echo'ná nirúali usani o'weli sikolí rité niwárami, ba'wí ro'olíwami, mapujiti echí jaré Juríosi pagótami echirigá nulérami níli wi kabé namuti pabákanala echí ba'wí jiti. A'lí echí sikolí wabé o'weli níli. Ibili sikolí buchili okuá ba'wí tula, bikiyá ba'wí tula keremá. ⁷A'lí Jesusi jeaneli echí jaré mapu kóniga nachútali: Ba'wí buchíwasi echo'ná usani o'weli sikolichi. A'lí we yámíti we galá buchíwalati. ⁸Echalí Jesusi jeaneli: Jipi ma pe táchí ku tusa 'yasi bajínala echí walula kónami. A'lí echirigá 'yali. ⁹A'lí echí walula kónami pe táchí bajika machili echí ba'wí, chopi ma uva ba'wila niráa nakulíwarami níli. A'lí echí walula kónami ketasi cho machili mapu echí galabé uva ba'wila, ba'wí jiti niwárami níli. Chopi echí auché jaré mapu kóniga nachútali, ne galá machili mapu ba'wí chopi ro'wárami níli echo'ná sikolichi, ayénachó aboni galá machili mapu Jesusi ma wabé omériga ologá, ne suwaba, uva ba'wila niráa nakulíwali. A'lí echí walula kónami echalí ma galá ra'íraga echí uva ba'wila, ba'wí niwárami, echo'ná bayegá echí kunala, bukulí niwíami rijói, ¹⁰jeaneli: Si'néami pagótami bachá nachútaga kona echí wabé galabéala uva ba'wila. A'lí mapalí echí jaré bayérami ma galá bajili, echalí pée jubáami echí pagótami kóniga nachuta echí pée ke 'me galabéala. ¡Chopi mujemi jipi yénasí nuteli je'ná ne wabé galabéala uva ba'wila!

¹¹A'lí Jesusi echo'ná Kanachi anilíwachi, echo'ná Galiléachi anilíwachi asagá, echirigá chótali wabé omériga olayá mapurigá ke wesi auché jaré pagótami omero olayá. Echirigá Jesusi galá machírali echí pagótami mapu Binói ne wabé Walubela ju. A'lí echí jaré mapu Jesusi binérali, galá bichíili Binói niráa.

¹²Echalí jonsa, pée wakinana, Jesusi auchecho siné ku rikínali echo'ná Kapernaúmachi anilíwachi, Binói iyela yuwa, echí jaré Binói ritémawala ayénachó, echí auché jaré mapu Binói binérali ayénachó. A'lí si'neami echo'ná muchili ke 'me wikabé rawé.

Jesusi machí a'wali si'néami mapu ikí ralinea muchili echo'ná pachá walubé Juríosi ri'obáwalachi

(Mt. 21:12-13; Mr. 11:15-18; Lk. 19:45-46)

¹³Echalí ma mulubé sébachi níli echí Juríosi pagótami omáwala mapalí echí kúuchi bo'wá ko'wílati. Echijiti Jesusi auchecho siné ku tuyénali echo'ná ripáami Jerusalémachi. ¹⁴A'lí Jesusi ma ku nawali echo'ná Jerusalémachi. A'lí Binói riwali jaré rijói wáasi ralinea muchúami echo'ná pachá walubé ri'obachi, echí jaré Juríosi pagótami ri'obáwalachi. A'lí auché jaré bo'wá ralinéami ayénachó echo'ná pachá muchili, auché jaré makawi ralinéami ayénachó. A'lí Binói ayénachó echo'ná riwali jaré wenomí nakulíwiya muchúami. ¹⁵A'lí Jesusi bilé wiya wichiwela niwasa, si'néami miná machí a'wali echo'ná ri'obachi jonsa, echí jaré bo'wá ayénachó, echí jaré wáasi ayénachó. A'lí Binói miná rujuñali echí jaré wenomí nakulíwami rijói níwala wenomí; ayénachó Binói miná ri'nabuli aboni níwala jubeli. ¹⁶A'lí Jesusi jeaneli echí jaré makawi ralinéami: ¡Chakena, waminá machí tosí je'ná namutí! ¡Ketasi niwasi je'ná Nijé Onolá kalílachi mapurigá ralinéaluwami kalila niráa!

¹⁷A'lí echí jaré mapu Jesusi binérali, galá 'nátaga machili mapurigá je'ná jerigá osirúami níli echo'ná Riosi Ra'íchala Osilíwalachi: Nijeni ne wabé simírami, ne galá tibula Mujé kalila.

¹⁸ A'lí echi jaré Juríosi jeanigá rukueli: ¿Chigá mi risénsia 'yali mapurigami echirigá 'wéralli olama? ¡Jipi, we yáati wabé omériga olá sinepi niráa, mapurigá ke wesi auché jaré omero olayá! ¡Echirigata galá machiboa mápumi risensia niwa je'ná jerigá 'wéralli oluwáwami olayá!

¹⁹ A'lí Jesusi ku nijéwaga jeaneli: ¡Miná suwaba najunasi je'ná ri'obá, a'lí bicheni bikiyá chi'ligá ku niwama!

²⁰ A'lí echi jaré Juríosi jeaneli: Je'ná walubé ri'obá nawosa makói miná usani bamíbaga niwárami níili. ¿Áchami bikiyá chi'ligá ku niwama Mujé?

²¹ Chopi Jesusi, Binói kepu sapá, mapurigá bilé ri'obá niráa rugá ra'íchali. ²² Echijiti echalí mapalí Jesusi ma mukusá, ku owínali, echalí echi jaré mapu Binói binérali, galá 'nátaga machili mapurigá Binói chabénala je'ná jerigá anigá ra'íchali. Echalí aboni galá bichíili mapurigá osirúami ju echo'ná Riosi Ra'íchala Osilíwalachi; ayénachó aboni galá bichíili mapurigá Jesusi Binói ma aneli echi aboni.

Jesusi galá machí ne si'néami

²³ A'lí mapalí omowálawachi rawé níili, mapalí echi kúuchi bo'wá ko'wílati, echalí rawé Jesusi echo'ná Jerusalémachi asali. Echalí wikabé pagótami bichíili Binói niráa, mapujiti wisabé riwali wabé omériga oláachi Binói, mapurigá ke wesi auché jaré pagótami omero echirigá olayá. ²⁴ Chopi Jesusi Binói mayeli mapu aboni ketasi 'me bichíwaga olali, mapujiti Binói ne galá machili ne si'néami aboni. ²⁵ A'lí Jesusi ketasi newaleli mapurigá auché jaré pagótami jiti ruyérami níima Binói, mapurigá echi pagótami 'nata echo'ná pachana aboni sulálachi niráa, mapujiti Jesusi Binói ne galá machí mapurigá ju echo'ná pachana ibili rijói sulálachi.

Echi Nikoremo Jesusi yuwa ra'ícha

3 A'lí bilé rijói, Bariseo anilíwami binériami, echo'ná asali, echi mapu Nikoremo riwéami níili. Je'ná rijói, echi jaré Juríosi yuwa, walula níili. ² Je'ná rijói, Nikoremo riwéami, rokogó niráa nawali mapo'ná Jesusi asali. A'lí jeaneli: Binériami, tamujeta ne galá machí mapu Riosi Binói mi júuli mapurigami tamujé tamí binérama, mapujiti ke wesi rijói galá omero olayá mapurigami wabé omériga olá, a echi Walubela Riosi ketasi ku'wírasagá binói.

³ A'lí Jesusi ku nijéwaga jeaneli: Ne bichíwali nimí ané: Echi mapuyíripi ketasi auché siné bukulíwami niráa ranarúami juko, échiko ketasi chirigá nijéwaga olá mapurigá Riosi nulé.

⁴ A'lí echi Nikoremo jeaneli: ¿Churigá auchecho siné ranarúami níima bilé rijói, ma ochérami níisa? ¿Acha galá ku bakimea echo'ná pachá kepu iyé ropálachi, mapurigá binói echirigá auchecho siné ku ranarúami níima?

⁵ A'lí Jesusi ku nijéwaga jeaneli: Ne bichíwali nimí ané: Echi mapuyíripi ketasi ba'wí jitu ranarúami juko, ayénachó echi mapuyíripi ketasi Riosi Iwigala jitu ranarúami juko, échiko ketasi chirigá nijéwaga olá mapurigá Riosi nulé. ⁶ Jena'í wichimóbachi ne si'néami pagótami ranarúami ju, kepu 'wénawa kúchuwala niráa, chopi echi jaré mapuyíripi echi Wabé Galabé Riosi Iwigala jitu ranarúami juko, échiko Riosi kúchuwala ju. ⁷ Ketasi we majaga 'natasi mapujiti Nijé nimí aneli mapu arigá 'wéralli ju mapu ne si'néami pagótami auché siné bukulíwami niráa ranarúami níima. ⁸ Echi iká mapu kanápuromí we iká. A'lí bichemi galá nami mapalí echi iká we ané, chopi arigá tarapemi machí kumi jonsa echirigá we iká. Nirapemi machí kumi simigá

iká. Echirigá ju mapalí echi pagótami auché siné bukulíwami niráa ranarúami ju echi Galabé Riosi Iwigala jiti, mapujiti Riosi Iwigala mapurigá echi iká ju.

⁹A'lí echi Nikoremo auchecho siné jeanigá rukueli: ¿Churigá echirigá níima je'ná?

¹⁰Echalí Jesusi jeaneli: Mujé, márumpi walula binériami ju echi wikabé Isaeli pagótami yuwa, ¿kéchami machí je'ná jeyiri namuti? ¹¹Nijé 'yemi nimí ané echi ne bichíwali, ayénachó Nijeni ne galá machí mápuni 'yemi mi ne bichíwaga ra'icha, mapujiti Nijeni ma galá riwali echi jaré namuti mapu Nijé 'yemi nimí ruyegá nawesa; chopi 'yémítamo ketasi bichíi mapurigá Nijé 'yemi nimí nawésaga ané. ¹²Nijeni 'yemi mi aneli jena'í wichimóbachi nirúami namuti jiti. A'lí tarapétamo bichíili. ¿Churigátamo bichíibo, a Nijé 'yemi nimí anésagá echo'ná ripá riwigáchi nirúami namuti jiti?

¹³Tarapé wesi jena'í wichimóbachi piréami echo'ná ripá riwigáchi munasa, jena'í wichimóbachi ku rikinali, mapurigá aboni ne galá nawésama jena'í wichimóbachi piréami mapurigá ju echo'ná ripá riwigáchi. Chopi Nijeni 'yemi mi echirigá ne bichíwaga nawesa mapujítini echo'ná ripá riwigáchi asali. A'lí Nijeni rikinali jena'í wichimóbachi, ayénachóni bité echo'ná ripá riwigáchi. Riosi tamí wilali mapurigá Ku'wíriami niráa. ¹⁴A'lí echi Moisesi echo'ná ripá biléana kusírali uchali bilé namuti mapuyiri sinowi niwárami, mapalí echi wikabé Isaeli pagótami echo'ná biléana waná kawichí 'yénachi, echi wikabé sinowi jiti ikírami níili. Echirigá achigórígá 'wérali ju mapu jena'í wichimóbachi piréami pagótami ayénachó tamí ripá biléana kusírali wijáwaga uchama, ¹⁵mapurigá ne si'néami mapu ikí tamí galá bichíiko tarapé 'wigaga suwimea, chopi sinibí piréami níima.

Echi Walubela Riosi ne wabé galeli jena'í wichimóbachi piréami pagótami

¹⁶Mapujiti echi Walubela Riosi ne wabé galeli jena'í wichimóbachi piréami pagótami. Echijiti njiali bilepi kepu Raná, mapurigá ne si'néami pagótami mapu ikí galá bichíiko echi Binói jiti, ketasi mapurigá suwíami niráa níima, chopi sinibí piréami níima Riosi yuwa. ¹⁷Echi Walubela Riosi ketasi júuli kepu Raná mapurigá wi'nijima jena'í wichimóbachi piréami pagótami. Chopi júuli mapurigá jena'í wichimóbachi piréami pagótami galá ku'wíratami níima echi Binói jiti.

¹⁸Ne si'néami mapu ikí echi Binói jiti bichíiko, ketasi wi'nijírami ju; chopi ne si'néami mapu ikí ketasi bichíiko, ma wi'nijírami ju, mapujiti aboni ketasi bichíili echi bilepi bi'nélipi Riosi Ranala. ¹⁹A'lí ne si'néami mapu ikí ketasi bichíiko, ma wi'nijírami ju, mapujiti ma nawali jena'í wichimóbachi echi Walubela mapu galá machíraga olá echi pagótami. A'lí echi chati oláami pagótami sinibí nakili mapu wabé chati ologá, echo'ná rokowárali niráa chopi 'yénama, mapujiti aboni wabé chati oláami níili. ²⁰A'lí si'néami mapu ikí we chati olako, échiko wabé kichí echi Walubela mapu galá machíraga olá echi pagótami. A'lí aboni ketasi nakí mapu bichíima echi Binói niráa, nirapé mapurigá aboni mulubéanama Binói yuwa, mapujiti aboni ketasi nakí mapu aboni chati olalila galá ku machirúami níima. ²¹Chopi echi auché jaré mapu ne bichíwali galabé olako, aboni ayena mulubéana echi Walubela yuwa mapu galá machíraga olá echi pagótami, mapurigá echi auché jaré pagótami galá machimea mapu echi Walubela Riosi ku'wíraga olá echi jaré aboni yuwa.

Echi Juani auchecho siné nawésali echi Jesusi jiti rugá

²²Pe wakinana Jesusi simili echo'ná Juréachi anilíwachi kawírali, echi jaré mapu Binói binérali yuwa. A'lí Binói echo'ná aboni yuwa asagá, we pagoli echi auché

jaré wikabé pagótami. ²³Ayénachó echi Juani pagoya iyénali echo'ná Enónachi anilíwachi mapo'ná mulubé ju echo'ná Salímachi anilíwachi, mapujiti echo'ná walú ba'wéali. Echalí echi Juani galá pagoli echi wikabé pagótami mapu echo'ná sili. ²⁴Mapujiti echi Juani ketasi cho pachá bachárami níili.

²⁵A'lí echi jaré mapu Juani binérali, auché jaré Juríosi pagótami yuwa, a'nagupi rukugá ra'íchali mapujiti echi jaré Juríosi sinibí niráa wikabé namuti pabákaka olali. ²⁶A'lí ne si'néami aboni echo'ná echi Juani yuwa sigá, jeaneli: Binériami, echi Rijói mapu mujé yuwa asali echo'ná bo'ónala bakochi Joránachi anilíwachi, echi mapu mujé nawésali echi Binói jiti, je'ná Rijói we pagola echi pagótami. A'lí ne si'néami, Binói yuwa sísimi.

²⁷A'lí echi Juani ku nijéwaga jeaneli: Bilé rijói tarapé chirigá omérama wabé omériga olayá, a echi Walubela Riosi ketasi echirigá 'yásagá. ²⁸'Yémítamo aboni ma bachá niráa galá námali mapurigani 'yemi mi aneli mapu nijé binói ketasi ju echi Cristo anilíwami, echi mapu Riosi wirali Walubela Nigúurami niráa, chopi echi Walubela Riosi tamí bachá júuli a'lláranala echi Binói jiti. ²⁹Mapalí bilé rijói bukulí niwíami ju, échiko we kanila mapujiti ma pe bukulí upéami ju. A'lí echi auché bilé mapu echi bukulí niwíami rijói amígowala ju, mapu echo'ná mulubé asagá galá nami echi bukulí niwíami rijói ra'íchala, je'ná binói amígowala echirigá namsa, ayénachó ne wabé kanila. Achigórígá nijé ayénachóni ne wabé kanila jipi. ³⁰Arigá 'werali ju mapu echi Jesusi waminabi ne wabé Walubela niráa níima. Chopi nijeni arigá waminabi tabáala niráa níima.

Echi mapu ripá riwigachi jonsa nawako

³¹Echi mapu ripá riwigachi jonsa nawako, échiko ne Walubela ju si'néami pagótami yuwa. A'lí echi mapu jena'í wichimóbachi bitéami juko, échiko wichimóbachi chopi bitéami ju, ayénachó wichimóbachi nirúami namuti chopi jiti ra'icha. Echi mapu echo'ná ripá riwigachi jonsa nawako, échiko ne Walubela ju si'néami pagótami yuwa. ³²Je'ná Binói mapurigá námiga riwali, je'ná echirigá nawesa, chopi ke 'me wesi bichíi mapurigá Binói nawesa. ³³A'lí echi jaré mapu arígá bichíi mapurigá Binói nawesa, aboni echirigá ne bichíwaga aní mapu Riosi ne bichíwami ju. ³⁴Mapujiti echi mapu Riosi júuliko jena'í wichimóbachi, je'ná Binói wabé galá ra'ícha Riosi Ra'íchala, mapujiti Riosi Onorúami ne suwaba, ne bichíwaga 'yali echo'ná Binóichi echi Wabé Galabé Riosi Iwigala. ³⁵A'lí echi Onorúami we kalé Binói kepu Raná, ayénachó omérawami 'yali ne suwaba namuti jiti. ³⁶Ne si'néami mapu ikí galá bichíiko echi Riosi Ranala jiti, échiko ma sinibí piréami ju. Chopi echi auché jaré mapu ketasi nakiko mapu bichíima Riosi Ranala, échiko ketasi echirigá sinibí piréami níima. Chopi Riosi arigá ne sinibí niráa, ne wabé kastigo 'yama.

Jesusi ra'íchali echo'ná Samáriachi bitéami mukí yuwa

4 A'lí echi jaré Bariseo anilíwami binériami ma námali mapu echi Walubela Jesusi ne wabé simírami wikabé binéraga pagoli, ayénachó námali mapu echi Juani ketasi 'me wikabé binéraga pagoli echi pagótami. ²A'lí Jesusi Binói ketasi pagoli, chopi echi jaré makói miná okuá mapu Binói binérali, aboni wikabé pagoli. ³A'lí mapalí Jesusi je'ná jerigá machisáa, echalí Binói echo'ná Juréachi anilíwachi kawírali jonsa ku simisáa, echo'ná Galileáchi anilíwachi kawírali ku simili.

⁴Echalí echo'ná buwichí ináraga, arigá 'wérali níili mapu echo'ná Samáriachi anilíwachi kawírali simírama. ⁵Echalí rawé Jesusi nawali echo'ná biléana walúlachi echo'ná Samáriachi anilíwachi kawírali nirúami, mapo'ná Sikárachi anilíwachi níili. A'lí echo'ná mulipi níili echí kawí pátami mapu echí Jakobo 'yali binói kepu raná, echí José riwéami. ⁶Echo'ná nirúali biléana jótami, wabé rokóami, mapo'na manili ba'wí, mapu echí Jakobo ki'yá chabénala niwali. Echalí rawé Jesusi echo'ná buwichí ináraga, ma we risisáa, echo'ná mulipi jótachi asíbali. A'lí ma nasipa rawé níili. ⁷Echalí bilé mukí echo'ná Samáriachi bitéami echo'ná nawali, ba'wí túmiya, echí mapu Jesusi jeanigá tánali: Pe risénsia, tamí pée ta ba'wí 'ya mápuni bajima.

⁸Mapujiti echí jaré mapu Jesusi binérali echo'ná walúlachi 'yénali, ko'wáami ralayá. ⁹A'lí echí mukí echo'ná Samáriachi bitéami jeaneli: ¿Churékula mi tamí tani ba'wí bajíwami, mapujítimi Mujé Juríosi pagótami ju? A'lí nijeni jena'í Samáriachi bitéami ju. Echirigá aneli mapujiti echí Juríosi pagóami ketasi nakili echo'ná Samáriachi piréami pagótami yuwa. ¹⁰A'lí Jesusi ku nijéwaga jeaneli: Ayénami machisáagá mapurigá Riosi galabé nijá, ayénachómi machisáagá chigá ju Nijé mapu nimí jeané: Tamí 'ya ba'wí mápuni bajima, echalí ne bichíwali mujemi tamí tánami, a'lí Nijé ayena nimí 'yama echí sinibí bitélowami ba'wí.

¹¹A'lí echí mukí jeaneli: Kení walúlawa, Mujé ketasi te mápumi jiti tuma ba'wí, mapujiti jena'í jochi ne wabé rokóami ju. Mujé, ¿kúmimi niwa echí sinibí bitélowami ba'wí? ¹²Echi ki'yá bitéami Jakobo mapu tamujé tamí 'yali je'ná jótami, mapurigá tamujé onolá níili. Binói jena'í bajili, echí jaré binói kúchuwala ayénachó, binói pugula wáasi ayénachó. ¿Mujecha ne simírami walubela ju ketasi mapurigá echí binói?

¹³A'lí Jesusi ku nijéwaga jeaneli: Mapuyíripi je'ná ba'wí bajisa, auchecho siné ku balámama. ¹⁴Chopi si'néami mapu ikí bajiko mapu Nijé nijima ba'wí, abóniko sinibí ketasi auché siné balámama; chopi echí ba'wí mapu Nijé nijima, pachana aboni yuwa machínama mapurigá biléana bajichi niráa, ayénachó echí jaré mapu bajiko echí ba'wí, sinibí niráa piréami níima.

¹⁵A'lí echí mukí jeaneli: Kení walúlawa, perikó tamí 'ya echí ba'wí, mapurigani ma ketasi siné balámama, mapurigani ayénachó nirapé auché siné jena'í inama ba'wí tuya.

¹⁶A'lí Jesusi jeaneli: Simigá bayémisa kemi kuná, kiná simasi.

¹⁷A'lí echí mukí ku nijéwaga jeaneli: Nijé ketásini kuné. A'lí Jesusi jeaneli: Ne galá mi bichíwaga anili mápumi ketasi kuné, ¹⁸mapujiti mi malí rijói kunéami níili. A'lí echí rijói mápumi jipi kuné, échiko ne bichíwali ketasi mujé kunala ju. Echirigami ne bichíwaga anili.

¹⁹A'lí echí mukí ma je'ná jerigá namsa, jeaneli: ¡Kení Walúlawa, nijeni mayé mapu Mujé ju bilé walula Riosi jiti nawésami! ²⁰Echi jaré ki'yá piréami mapu tamujé 'wénawala 'wénala níili, aboni jena'í ripá rabó chokoba jaga Riosi yuwa ra'ichali, chopi 'yemi Juríosi pagótami aní mapu echo'ná Jerusalémachi chopi ju mapo'ná chokoba jaga Riosi yuwa ra'ichabo.

²¹A'lí Jesusi jeaneli: Mukí, tamí galá bichiwi mapu pe minana ketasi 'wérali níima mapu 'yémitamo munabo jena'í ripá rabó, nirapé máputamo simabo echo'ná Jerusalémachi mapurigátamo waminabi walubéraga anebo echí Onorúami. ²²'Yemi Samáriachi piréami wétamo nakí máputamo chokoba jaga o'wikebo Riosi, chópitamo ketasi machí Riosi. A'lí tamujé Juríosi pagótami ne bichíwagata o'wiké

Riosi, mapujitita tamujé ne galá machí Binói. A'lí Nijé mápuni echí pagótami ku wikáwiami ju, ayénachóni Juríosi pagótami ju.²³ Ma ke 'me ayó echirigátamo ne bichíwaga walubérage anebo Riosi, mapujiti jipi ma nawali téitali mapalí si'néami mapu ikí ne bichíwaga walubérage anema echí Onorúami, aboni echirigá ne galá bichiíga sulachí niráa, waminabi walubérage anema Binói. A'lí Riosi Onorúami we nakí mapu echí pagótami echirigá galá bichiíga waminabi walubérage anema Binói niráa.²⁴ Riosi chopi Iwigá niráa ju. A'lí echí jaré mapu ikí waminabi walubérage anema Riosi, arígá 'wérali ju mapu aboni galá bichiíga, sulachí niráa, echirigá waminabi walubérage anema.

²⁵ A'lí echí mukí jeaneli: Ayénani galá machí mapu echí Mesíasi anilíwami nawama, echí mapu Cristo anilíwami ju. Mapalí Binói ma nawasa, tamujé tamí suwaba namuti ne galá ruyema.

²⁶ A'lí Jesusi jeaneli: Nijé Binói echí Cristo ju, mapu nimí yuwa ra'icha.

²⁷ Echalí we yáati sili echí jaré mapu Jesusi binérali. A'lí aboni we 'néniga 'nátali mapujiti Binói echí bilé mukí yuwa ra'icha asali, chopi arígá tarapé wesi rukueli mapu piri rukueli Binói. Ni bilé wesi rukueli mapu churigá Binói ra'íchali echí bilé mukí yuwa.²⁸ A'lí echí mukí echo'ná ariwesa binói sikolíwala, we yámiti echo'ná walúlachi simisáa, ruyeli echo'ná piréami pagótami, jeanigá:

²⁹ Kiná simíbaga, 'nesi bilé Rijói, echí mapu ne suwaba tamí aneli mapurigá nijeni olali chabé chokichí jonsa. ¿Kecha je'ná níimará echí Cristo anilíwami?

³⁰ A'lí echí si'néami pagótami echo'ná walúlachi jonsa simasa, echo'ná sili mapo'ná Jesusi asali.³¹ A'lí mapuyénasí echí mukí bayémiya simili echo'ná piréami pagótami, echí jaré mapu Jesusi binérali jeaneli: Binériami, ¡Ma ko'wá!

³² A'lí Binói jeaneli: Nijeni niwa bilé ko'wáami mápuni ayena ko'wá, echí mapu 'yémítamo ketasi machí.

³³ A'lí echí jaré mapu Binói binérali a'nagupi jeanigá rukueli: ¿Acha jaré pálíré mapu Binói ko'mea?

³⁴ A'lí Jesusi jeaneli: 'Yémitamo chopi we ko'nali echí ko'wáami; chopi echí Walubela Riosi tamí júuli jenaí wichimóbachi, Binói nójchala olánala, ayénachó Nijeni chopi ne wabé simírami olánali mapurigá Binói tamí nulé. Echijítini ma ketasi ko'nali jipi.³⁵ 'Yémitamo we aní mapu abijí naó michá ju mapuyena ma sebama 'wíwachi, mapalita we nochabo, chopi Nijeni 'yemi mi ané mapu jipi ma sébali Riosi níwala 'wíwachi rawé. Jipi we yáati galá níima we nochasa, Riosi nójchala olayá, mapujiti jipi rawé jaré pagótami arígá galá bichiíma, átamo galá nawísáságá Riosi Ra'íchala. Echirigátamo we napabubo echí jaré pagótami Riosi yuwa, mapurigá echí 'wíami we napabú echí sunú.³⁶ A'lí si'néami mapu ikí echirigá Riosi nójchala ologá 'wiko, ne galá ku natétarami níima, mapujiti we napabuma echí pagótami Riosi yuwa mapurigá aboni sinibí piréami níima. Echirigá echí mapu ichako ne wabé kanílama. A'lí echí mapu 'wiko ayénachó ne wabé kanílama.³⁷ Mapujiti je'ná jerigá ne bichíwali anirúami ju. Bilé rijói chopi we ichá echí talí, a'lí auché bilé si'nú rijói chopi we 'wima echí raká.³⁸ Nijeni 'yemi mi 'wínala niráa júuli echo'ná mapo'ná 'yémítamo ketasi ichali, chopi auché jaré we nójchali Riosi Ra'íchala nawésiya. A'lí 'yémítamo we kaníli mapujítitamo ritiwá mapurigá echí jaré pagótami ma galá bichiíli.

³⁹ A'lí echo'na Samáriachi anilíwachi piréami, wikabé bichiíli echí Jesusi jiti, mapujiti echí mukí jeanigá nawésali: Echi Jesusi ne suwaba tamí aneli mapurigani

olali chabé chokichí jonsa. ⁴⁰ A'lí echo'ná Samáriachi piréami pagótami echo'ná Jesusi yuwa sigá, tániga aneli mapu Binói echo'ná aboni yuwa ripima. A'lí Jesusi echo'ná ripili osá rawé. ⁴¹ A'lí auché jaré wikabé echo'ná Samáriachi piréami galá bichíili mapalí galá námali mapurigá Jesusi Binói nawésaga anili. ⁴² Echalí si'néami aboni jeaneli echí mukí: Jípita ma ne galá bichíili echí Jesusi niráa. Chabé bachánala tamujeta bichíili mapujiti mujemi tamujé tamí nawésali echí Binói jiti rugá, chopi pe wakiná bukulínala tamujeta waminabi galá bichíili mapujiti tamujé aboni ma galá kipuli mapurigá Binói Jesusi anili. Jípita ma galá ne bichíwali machí mapu je'ná Jesusi echí Walubela Cristo anilíwami ju, echí mapu galá ku Wikáwami ju jena'í wichimóbachi piréami pagótami chati olalila.

Jesusi ku sa'wali bilé towí

⁴³ Pe wakinánokuá okuá chi'lligá Jesusi ma ku simili echo'ná Samáriachi anilíwachi jonsa, echo'ná Galiléachi anilíwachi kawírali ku simináliya. ⁴⁴ Echalí ku simili Jesusi echo'ná Galiléachi mapujiti Jesusi Binói jeanili mapu ke wesi walula Riosi jiti nawésami we kalékawami ju binói kawíwalachi piréami pagótami jiti. ⁴⁵ Chopi mapalí Jesusi ku nawali echo'ná Galiléachi anilíwachi kawírali, echalí echo'ná piréami pagótami arigá galá nareli echí Binói, mapujiti aboni chabénala riwali suwaba mapu ikí Jesusi wabé omériga olali echo'ná Jerusalémachi echalí mapalí echí jaré Juríosi pagótami omowábiya ko'yali echí jaré kúuchi bo'wá. Echalí omowálawachi echí jaré Galiléachi piréami ayénachó omowábiya 'yénali echo'ná Jerusalémachi.

⁴⁶ Echalí Jesusi auchecho siné ku nawali echo'ná Kanachi anilíwachi, echo'ná Galiléachi anilíwachi kawírali, mapo'ná chabénala Binói echí ba'wí niwali mapurigá uva anilíwami ba'wila niráa. A'lí echo'ná Kapernaúmachi anilíwachi asali bilé rijói mapu ku'wíriami níili echo'ná nuráami walula silíami yuwa. Echalí echí rijói ranala towí ne wabé nayúami bu'wili. ⁴⁷ A'lí mapalí echí rijói machili mapu echí Jesusi ma ku nawali echo'ná Galiléachi anilíwachi kawírali, echo'ná Juréachi anilíwachi kawírali jonsa simissá, echalí binói 'némiya simili. A'lí risúu anigá tali mapurigá Jesusi ri'lé Kapernaúmachi echo'ná binói bitélachi simigá, galá ku sa'wama binói ranala towí, mapujiti ma ne mulubé mukumea riwéali. ⁴⁸ Echalí Jesusi jeaneli: 'Yémitamo ketasi nakí tamí bichíinala, átamo ketasi bachá riwisáagá mapurigá nijeni wabé omerigá olá, mapurigá ke wesi auché jaré omero olayá.

⁴⁹ Chopi echí rijói walula silíami ku'wíriami jeaneli: ¡Walubela, we yáati tamí yuwa simí, abijí ke cho mukúwachi nijé ranala!

⁵⁰ Chopi Jesusi ku nijéwaga jeaneli: ¡Ma ku simigá echo'ná mujé bitélachi, mapujiti mujé ranala ma ku sa'wili! Echalí echí rijói galá bichíiga mapurigá Jesusi aneli, ma ku simili.

⁵¹ Ba'alínala rawé mapalí echí rijói ma ne mulubé ku nawama riwéali echo'ná binói bitélachi, echalí echí jaré binói piónawala natipábiya simasa jeaneli: ¡Mujé ranala ma ku sa'wili!

⁵² Echalí echí rijói rukueli jeanigá: ¿Chuyénako jonsa chótali ku sa'wiyyá nijé ranala? Echalí aboni jeaneli: Rapako, pe bukulí alíwachi ku sa'wili.

⁵³ A'lí echí rijói onorúami 'nátaga machili mapu echiyénako níili mapalí Jesusi jeaneli: ¡Mujé ranala ma ku sa'wili! Echalí binói we yáati galá bichíili echí Jesusi niráa, ne si'néami echo'ná binói bitélachi piréami ayénachó.

⁵⁴Echalí rawé mapalí Jesusi echirigá ku simili echo'ná Juréachi jonsa, Binói je'ná jerigá olali mapalí Binói ku nawali echo'ná Galiléachi. Echalí je'ná jerigá olá osá sérali mapurigá Jesusi echirigá wabé omériga olali echo'ná Galiléachi mapurigá ke wesi auché jaré omériali olayá.

Jesusi ku sa'wali bilé rijói ke akáanami echo'ná Betéstachi bitéami

5 Echalí pe wakinánokuá echi jaré Juríosi pagótami omáwala níli. Echijiti Jesusi ku simili echo'ná ripáami Jerusalémachi. ²A'lí echo'ná walúlachi ne mulubé echo'ná yéwachi mapo'ná sinibí siméraga mo'wálati wikabé bo'wá, echo'ná nirúali biléana walú jótachi mapo'ná manili ba'wí. Echo'ná echi Ebreo ra'íchala niráa Betéstachi anilíwachi níli, ayénachó echo'ná noligá nirúali maríana kayáaga uchuchárami ³mapo'ná sinibí echo'ná ri'lé pachá bitili wikabé nayükami. Jaré ké machíliami níli; auché jaré ke 'agáanami níli; auché jaré ke omériami níli muchísiya; chopi si'néamika echirigá buwigá bitili mapu chu yénako ke sayiná nokomea echi ba'wí. ⁴Mapujiti pe sinéami káachi bilé walula Riosi kapitánawala echo'ná jótachi nawagá we nokeli echi ba'wí. A'lí ma nokáachi echi ba'wí, echalí echi mapuyíripi bilé nayúami bachá niráa rikíinako echo'ná ba'wírali, échiko we yáati ma galá ku sa'wíami níli mapu chuyíripi nayulí jiti nayúami níliko. ⁵Echo'ná bu'wili bilé rijói echi mapu baisá makói miná osá naó bamíbali jonsa ke akáanami níli. ⁶Mapalí Jesusi riwali echi rijói echo'ná bu'wíami, ma galá machigá mapu wi'libé bamíbali echirigá ke akáanami niráa nílo, echalí Binói rukueli jeanigá: ¿Áchami nakí mápumi ku galá akáanami níima?

⁷Echalí echi rijói ke akáanami ku nijéwaga jeaneli: Kení walubélawa, ke wesi ne mapu tamí bachama echo'ná pachana ba'wírali, mapalí ma nokuá echi ba'wí. Sinibí nijeni chopi nakili bachá bakiñáliya, chopi auché bilé arigá bachá bakí. ⁸Echalí Jesusi jeaneli: ¡Wiliska, ku chapigá kemi perí ma ku simigá! ⁹Echalí we yáati echi rijói ma galá ku akáanami niwálati. A'lí binói ku chapigá kepu perí, ma ku simili. Chopi echalí rawé, isábawachi rawé níli. ¹⁰Echijiti echi jaré Juríosi pagótami jeaneli echi rijói mapu ma ku akáanami niwálati: Jipi, isábawachi rawé ju. ¡Ketasi risensia ju mápumi echirigá tomea kemi perí!

¹¹Chopi echi rijói ku nijéwaga jeaneli: Echi rijói mapu tamí galá ku akáanami niwali, échiko tamí jeaneli: ¡Ku chapigá kemi perí, ma ku simigá!

¹²Echalí echi jaré Juríosi rukueli jeanigá: ¿Chigá ju echi mapu mi jeaneli: Ku chapigá kemi perí, ma ku simigá?

¹³Chopi echi rijói mapu ku galá akáanami niwálati ketasi machili chu riwéami nílo Jesusi, mapujiti echo'ná 'yénali wikabé pagótami. Echijiti Jesusi we yáati waná simili.

¹⁴Pée wilibeko, echo'ná walubé Juríosi ri'obáwalachi, Jesusi auchecho siné riwisá echi rijói, echalí jeaneli: ¡Níbi, jípimi ma galá ku akáanami jumi! ¡Ketasi auché siné chati olá, mapurigami ketasi auché simírami risúu ikimea, ketasi mapurigá chabénala bachá!

¹⁵Echalí echi rijói ku simigá ruyeli echi jaré Juríosi pagótami mapu Jesusi nílo echi mapu galá ku akáanami niwali. ¹⁶Je'ná jiti echi jaré Juríosi pagótami wabé kichiga a'najátaga mi'lináali echi Walubela Jesusi mapujiti Binói ku sa'wali echi rijói mapalí isábawachi rawé níli. ¹⁷Chopi Jesusi jeaneli: Kení Onó jipi isábawachi rawé 'wérali olá. Nijeni ayénachó 'wérali olá jipi isábawachi rawé.

¹⁸ Echijiti echi jaré Juríosi pagótami waminabi wabé mi'lináali echi Jesusi, mapujiti Binói ketasi nijéwaga olali mapurigá echi jaré Juríosi pagótami nulérami níli olánala sinibí isábawachi rawé; ayénachó aboni mi'lináali mapujiti Jesusi Binói anili mapu Binói achigó yiri níli Riosi yuwa, mapujiti Jesusi jeanili: ¡Echi Walubela Riosi nijé Onolá ju!

Riosi Ranala ne wabé Walubela ju

¹⁹ A'lí Jesusi jeaneli: Ne bichíwali Nijé 'yemi nimí jeané: Nijé ju Riosi Ranala, chopi Nijeni ketasi biyiri omero olayá, Nijé Binói chopi niráa. Chópini olá mápuni ritiwá echirigá oláachi Riosi Onorúami. Ne suwaba mapurigá Onorúami olá, echirigá Nijeni ayénachó olá, mapujiti Nijeni Riosi Ranala ju. ²⁰ Riosi Onorúami wabé tamí galé. Nijeni bilepi Riosi Ranala ju. A'lí Riosi Onorúami tamí riwiri ne suwaba mapu ikí Binói olá, chopi pée waminánomí Onorúami tamí riwírama mapurigá Binói waminabi ne wabé simírami omériga olama, mapurigá 'yémitamo ma echirigá riwisáa ne wabé simírami kami nílika ikigá 'natábotamo. ²¹ Mapujiti achigórigá mapurigá echi Onorúami ku o'wíntaga ku akami niwá echi jaré suwíami, echirigá ayénachó Nijeni sinibí piréami niráa niwá si'néami mapu ikí Nijeni nakí echirigá niwayá, mapujiti Nijé bilepi ju Riosi Ranala. ²² A'lí Onorúami ketasi nulá mapu echi pagótami waminá kastigo 'yárami níima; chopi Binói tamí 'yali mapurigá Nijé Binói nulama kastigo 'yánala echi jaré chati oláami pagótami mapujiti Nijeni bilepi Riosi Ranala ju. ²³ Onorúami tamí echirigá 'yali mapurigá ne si'néami pagótami tamí walubéragera anema, achigórigá mapurigá aboni walubéragera ané Riosi Onorúami. Echi jaré mapu ikí ketasi tamí walubéragera aneko, abóniko ketasi cho walubéragera ané Riosi Onorúami, mapujiti Nijeni bilepi Riosi Ranala ju. A'lí Onorúami tamí júuli jena'í wichimóbachi.

²⁴ Echalí Jesusi waminabi jeanili: Ne bichíwali 'yemi nimí jeané: Si'néami echi jaré mapu ikí nijéwaga olako mapurigá Nijeni aní, echi jaré mapu ayénachó galá bichíiko echi Onorúami mapu tamí júuli jena'í wichimóbachi, abóniko ma sinibí piréami ju. A'lí aboni ke siné kastigo 'yárami níima, mapujiti aboni ma ku wikawárami ju. A'lí aboni ma ketasi suwíami niráa níima, chopi sinibí niráa pirélama. ²⁵ Ne bichíwali Nijeni ayénachó 'yemi mi jeané: Jipi ma sébali téitali mapalí echi jaré suwíami tamí námama ra'íchachi, mapujiti Nijeni bilepi ju Riosi Ranala. A'lí si'néami mapu ikí galá nijéwaga bichíiko mapurigá Nijeni aní, abóniko sinibí niráa pirélama. ²⁶ Mapujiti Riosi Onorúami Binói wabé omérami ju iwítiya echi pagótami, ayénachó Onorúami tamí 'yali mapurigá Nijeni galá omérama sinibí piréami niráa niwayá echi jaré pagótami, mapujítini bilepi ju Riosi Ranala. ²⁷ Ayénachó Onorúami tamí nuleli mapurigani justicia olíima echi jaré pagótami mapujiti Binói tamí wilali mapurigá Ku'wíriami niráa. ²⁸ Ketasi majaga 'natasi je'ná jiti, mapujiti pe waminánomí sebama téitali mapalí ne si'néami echi jaré suwíami tamí námama ra'íchachi. ²⁹ Echalí ne si'néami echi jaré suwíami ku o'wínaga buyáma echo'ná chu'wechi jonsa. A'lí echi jaré mapu ikí galá oláliko, abóniko ku o'wínama mapurigá aboni sinibí pirélama Riosi yuwa, chopi echi auché jaré mapu ikí chati oláliko, aboniko ku o'wínama mapurigá aboni sinibí niráa kastigo 'yárami níima.

Echi Jesusi ne bichíwali Walubela ju

³⁰ Echalí Jesusi waminabi jeanili: Nijeni ketasi biyiri omero 'wéráli olayá Nijé Binói niráa; chopi Nijeni sinibí justicia olá mapurigá Onorúami tamí nulé. A'lí Nijeni ne bichíwali olá justicia mapujiti Nijeni ketasi olá mapurigá Nijé Binói nakí, chópini sinibí olá mapurigá Onorúami nakí, echi mapu tamí júuli jena'í wichimóbachi.

³¹ A Nijé Binói bi'nélipi jeansáagá: ¡Nijeni bilepi Riosi Ranala ju! Echalí echi jaré pagótami ketasi bichíima mapurigá Nijeni aní. ³² Chopi auché Bilé nilú mapu tamí jiti nawesa jeanigá mapu Nijeni bilepi Riosi Ranala ju. A'lí Nijeni galá machí mapu Échiko ne bichíwaga nawesa tamí jiti, mapalí Binói ne bichíwaga aní mapu Nijeni bilepi Riosi Ranala ju. ³³ 'Yémítamo jaré júuli echi Juani rukuénala. Echalí echi Juani ne bichíwali niráa nawésali tamí jiti. ³⁴ Chopi Nijeni ketasi newalé mapurigá jaré rijói tamí jiti nawesa jeanigá mapu Nijeni bilepi Riosi Ranala ju. Arigá Nijeni nakí máputamo bichíbo mapurigá echi Juani tamí jiti nawésali, mapurigátamo galá ku wikawárami níibo. ³⁵ Echi Juani ne bichíwali nawésali tamí jiti. Echijiti binói mapurigá bilé namuti walú rajáami niráa níili mapu galá ratábaga rajá echo'ná rokowárali. A'lí 'yémítamo pe téeli niráa we kaníliga kipuli mapurigá echi Juani nawésali. ³⁶ Echi Juani ne bichíwali nawésali tamí jiti rugá mapu Nijeni bilepi Riosi Ranala ju; chopi echi jaré pagótami waminabi galá machíratami ju mapu Nijeni bilepi Riosi Ranala ju, mapujiti Nijeni wabé omériga olá mapurigá Onorúami tamí júuli olánala. ³⁷ A'lí Onorúami mapu tamí júuli, Binói ayénachó tamí jiti nawésali; chopi 'yémítamo ke siné námali Onorúami ra'íchachi, nirapé chótamo riwali chu yíriko Binói. ³⁸ Ayénachó 'yémítamo ketasi bichíili ne sulachí niráa mapurigá Onorúami tamí jiti nawésali, mapujiti 'yémítamo ketasi tamí bichíili. A'lí Onorúami Binói tamí júuli jena'í wichimóbachi. ³⁹ Yémítamo wisabé niráa we galá 'neni Riosi Ra'íchala oselíwalachi, mapujítitamo mayé mapu átamo echirigá bichíisagá mapurigá osirúami ju, echalí 'yémítamo ne sinibí niráa piréami níibo Riosi yuwa. A'lí echo'ná Riosi Ra'íchala oselíwalachi ju mapo'ná ne bichíwali tamí jiti rugá osirúami ju. ⁴⁰ A'lí 'yémítamo ketasi tamí bichíinali mapurigátamo echijiti ne sinibí piréami níibo.

⁴¹ Nijeni ketasi nakí mapurigá jena'í wichimóbachi piréami pagótami echirigá chopi animea mapu Nijeni we galabé rijói ju, mapujiti Nijeni ne bichíwali Riosi Ranala ju. ⁴² A'lí Nijeni galá machí 'yemi, ayénachóni galá machí máputamo ketasi ne sulachí niráa galé Riosi. ⁴³ Nijeni nawali jena'í wichimóbachi mapujiti Nijé Onolá tamí júuli, chopi 'yémítamo ketasi tamí bichíili. A bilecho 'yemi yuwa nawásagá, binói chopi jeanigá mapu bilé walubela ju, echalítamo galá bichíibó echi binói. ⁴⁴ ¿Churigátamo omélabo galá tamí bichíiya? Mapujítitamo a'nagupi niráa o'wéala ané, chópitamo ketasi nakí mapurigá echi bilepi Walubela Riosi 'yemi mi ne bichíwali o'wéalamá. ⁴⁵ Ketasi mayesi mapu Nijeni 'yemi mi wi'nijima echo'ná bacháami Kení Onó yuwa. Echo'ná 'yémítamo chopi wi'nijírami níibo mapujítitamo ketasi bichíili mapurigá echi walula Moisesi osali, mapurigá osirúami ju echo'ná Riosi Ra'íchala oselíwalachi; chópitamo arigá aní máputamo wabé galá njewa echi Moisesi. ⁴⁶ Mapujiti a 'yémítamo galá bichíisagá mapurigá echi Moisesi osali, ayénachótamo tamí galá bichíibi, mapujiti echi Moisesi tamí jiti rugá osali. ⁴⁷ Chopi átamo ketasi galá bichíisagá mapurigá echi Moisesi osali, ¿churigátamo bichíibó mapurigá Nijeni 'yemi mi ané?

Jesusi kowa malí mil rijói

(Mt. 14:13-21; Mr. 6:30-44; Lk. 9:10-17)

6 Echalí ma je'ná jerigá anisáa, echi Jesusi echo'ná walú ba'wírali Galiléachi anilíwachi moba simíraga, ku simili echo'ná bo'ónala suwé. Echo'ná walú ba'wírali ayénachó Tibériachi anélati. ²A'lí ne wikabé pagótami ayénachó jubá najátaga simíbali Jesusi yuwa, mapujiti aboni ma wisabé riwali mapurigá Jesusi wabé omériga olali mapurigá ke wesi auché jaré omero olayá, mapujiti Jesusi chopi chachecha ku sa'wali echi jaré nayúkami. ³Echalí Jesusi simigá echo'ná biléana ripá rabó, echo'ná asíbali echi auché jaré yuwa mapu Binói binérali. ⁴Echalí ma mulubé sébachi níili echi jaré Juríosi pagótami omáwala mapalí echi kúuchi bo'wá ko'wílati. ⁵Echalí rawé Jesusi 'néniga riwali ne wikabé pagótami echo'ná Binói yuwa síami. Echalí Binói rukueli echi Jiripi jeanigá: ¿Kumicheta raliboa wikabé ko'wáami, mapurigá si'néami je'ná wikabé pagótami galá posama?

⁶Chopi Jesusi echirigá rukueli mapu churigá aníla echi Jilipi, mapujiti Jesusi Binói galá machili mapurigá Binói olama. ⁷Echalí echi Jiripi ku nijéwaga jeaneli: ¡Okuá kiento peso natéami ko'wáami ketasi sebama mapurigá ibili aboni pe kúuchi chapimea!

⁸A'lí echi Antresi bilé níili mapu Jesusi binérali, ayénachó binói rijimala níili echi Simoni Pegro. Echi Antresi jeaneli echi Jesusi:

⁹Jena'í atí bilé towí mapu malí kúuchi pani niwa, echi sebara anilíwami niwárami. Échiko ayénachó niwa okuá kúuchi rochí. ¡Chopi echikipi ko'wáami ketasi chirigá sebama mapurigá je'ná wikabé pagótami ko'mea!

¹⁰Echalí Jesusi jeaneli: Jeanesi echi wikabé pagótami mapu ne si'néami jena'í galabé kasaláltali muchíbama. A'lí echo'ná muchíbali wikabé malí mil rijói niráa. ¹¹Echalí Jesusi chapili echi jaré pani. A'lí ma natétara 'yasa Riosi, Binói 'yali echi jaré mapu Binói binérali mapurigá aboni nachútama echi auché jaré wikabé pagótami. Echalí we yáati echi malí kúuchi pani wikabé muweli. A'lí aboni nachútali echi wikabé pagótami echo'ná muchúami. Echalí echi Walubela Jesusi achigórigá olali echi okuá kúuchi rochí yuwa. A'lí echi wikabé pagótami ko'wali suwaba mapu ikí aboni nakili. ¹²Mapalí echi wikabé pagótami ma galá posali, echalí Jesusi jeaneli echi jaré mapu Binói binérali: Ku napabusí echi kúuchi chi'wáami tibíami mapurigá tarapé namuti waminá ri'ichárama.

¹³A'lí ma napabusa, aboni buchíili makói miná okuá walírali echi kúuchi chiwáami mapu tibili mapalí echi wikabé pagótami ma galá posaka ko'wali, mapalí Jesusi bachá 'yali ko'núliya echi malí kúuchi pani sebara niwárami. ¹⁴A'lí ma riwisáa mapurigá Jesusi echirigá wabé omériga olali mapurigá ke wesi auché jaré omero olayá, echalí echi wikabé pagótami jeanili: ¡Ne bichíwali je'ná Jesusi echi Walubela Riosi jiti nawésami ju mapu nawama riwéali jena'í wichimóbachi!

¹⁵Chopi Jesusi galá machili mapurigá aboni ne 'wéralli tonáali, walula silíami niráa wilábiya, echijiti Binói auchecho siné, bi'neli niráa, waminá waná ripá rabó simili.

Jesusi echo'ná walú ba'wírali moba wirigá iyénali

(Mt. 14:22-27; Mr. 6:45-52)

¹⁶Chopi mapalí ma chónachi níili, echalí echi jaré mapu Jesusi binérali ku ri'lena simíbali echo'ná walú ba'wírali suwé. ¹⁷A'lí aboni mo'wili echo'ná pachá biléana

bárkochi ba'wichí moba iyénami. Echalí aboni chótali waminá bo'ómana simiba, echo'ná Kapernaúmachi anilíwachi. Echalí ma we chónachi níili, a'lí Jesusi ketasi cho ku nawali aboni yuwa.¹⁸ Echalí chótali ne wabé iwéami ikayá, echijiti echi walubé ba'wí wabé apulali.¹⁹ A'lí mapalí aboni ma mikabé sírali mapuyena malí kilómetro, usani kilómetro keremá, echalí aboni ke sayiná riwali echi Walubela Jesusi echo'ná walú ba'wírali moba inárami. A'lí Binói mulubéanali echo'ná bárkochi, chopi aboni ne wabé majali.²⁰ Echalí Jesusi jeaneli: Nijeni ju. ¡Ketasi majasi!

²¹ A'lí aboni wabé kaníliga narega, pachá bachali echo'ná bárkochi. Echalí ke sayiná echi barko ma nawali echo'ná suwé mapo'ná aboni sírali.

Echi jaré wikabé pagótami we amí echi Jesusi

²² Ba'alínala rawé echi jaré wikabé pagótami abijí tibili echo'ná walú ba'wírali suwé mapo'ná Jesusi galá kóoli aboni. A'lí aboni galá machili mapurigá echi Walubela Jesusi ketasi así ku similo echi jaré yuwa mapu Binói binérali mapalí aboni ku simíbali echo'ná pachá echi bilepi bárkochi muchiga mapu echo'ná jonsa ku simili.

²³ Chopi mapuyénasí echi jaré pagótami abijí buwigá tibili echo'ná suwé, echalí auché jaré barko, echo'ná Tibériachi jonsa simíbami, ma sébali echo'ná auché biléana pe waná suwé, mapo'ná mulipi níili echo'ná mapo'ná aboni bachánala ko'wali echi jaré pani, mapalí echi Walubela Jesusi ma natétara 'yali Riosi.²⁴ Echalí mapalí echi jaré pagótami riwali mapurigá echi Walubela Jesusi ketasi echo'ná asali, ayénachó mapurigá echi jaré mapu Jesusi binérali ketasi echo'ná muchili, echalí aboni mo'wili echo'ná pachá echi auché jaléana bárkochi. A'lí aboni echo'ná pachá muchiga ku simíbali echo'ná bo'ónala Kapernaúmachi anilíwachi, echi Jesusi ásiya.

Jesusi ju echi ko'wáami mapu sinibí piréami niwá echi jaré pagótami

²⁵ A'lí ma riwisáa echi Walubela Jesusi echo'ná bo'ónala suwé, echalí aboni rukueli jeanigá: Binériami, ¿kilíbukomi nawali jena'ibi?

²⁶ Chopi Jesusi jeaneli: Ne bichíwali 'yemi nimí ané máputamo chopi tamí amí mapujítitamo galá posaka ko'wali. 'Yémitamo ketasi tamí amí mapujítitamo galá machili mapurigá Nijeni wabé omériga olali, mapurigá ke wesi auché jaré omero olayá.²⁷ Ketasi chopi nochasi mapurigátamo mepo echi ko'wáami mapu arigá we yáati suwibama, chopi nochasi mapurigátamo mepo echi ko'wáami mapu sinibí niráa tibima, echi mapu 'yemi mi 'yama mapurigátamo sinibí pirélabo. Riosi tamí wilali mapurigá Ku'wíriami niráa. Nijeni 'yemi mi 'yama echi ko'wáami mapu sinibí tibima, mapujiti Riosi Onorúami echijiti tamí wilali.

²⁸ Echalí aboni rukueli jeanigá: ¿Churigata ologá echirigá olabo suwaba mapurigá Riosi nakí máputa olabo?

²⁹ Echalí Jesusi ku nijéwaga jeaneli: Echi Walubela Riosi chopi nakí máputamo je'ná jerigá olabo: Ne galá tamí bichíisi, mapujiti Riosi Binói tamí júuli jena'í wichimóbachi.

³⁰ Echalí aboni rukueli jeanigá: ¿Pírimi karúmati omero ne wabé omériga olayá, mapurigá auché jaré ketasi omero olayá? Tamujé tamí riwiri, mapurigata galá riwisáa, echalí galata mi bichíibo. ¿Piri ju mápumi echirigá olá?³¹ Tamujé pagótamawala ki'yá piréami galá ko'wali echi maná anilíwami ko'wáami echo'ná waná kawichí, mapurigá jerigá osirúami ju echo'ná Riosi Ra'íchala oselíwalachi: Riosi 'yali mapurigá aboni ko'mea echi ko'wáami mapu ripá riwigachi jonsa rikinali.

³²Echalí Jesusi ku nijéwaga jeaneli: Ne bichíwali Nijé 'yemi nimí jeané: Echi Moisesi ketasi níili mapu 'yemi mi 'yali echi ko'wáami echo'ná ripá riwigachi jonsa. Chopi echi keni Onó ju mapu 'yemi mi 'ya echi ne bichíwali ko'wáami echo'ná ripá riwigachi jonsa. ³³Mapujiti echi ko'wáami mapu Riosi nijá, echi ju mapu ma rikinali ripá riwigachi jonsa. Echi ju mapu galá 'ya mapu jena'í wichimóbachi piréami pagótami sinibí pirélama.

³⁴Echalí aboni jeaneli: ¡Walubela, sinibí tamujé tamí 'ya echi ko'wáami!

³⁵Chopi Jesusi jeaneli: Nijé Binói ju echi ko'wáami mápuni nijá mapurigá echi pagótami sinibí pirélama. Si'néami mapu ikí tamí yuwa siko, tarapé siné 'lochema. Si'néami mapu ikí tamí bichíiko, tarapé siné balámama. ³⁶Chopi mapurigá Nijeni ma 'yemi mi aneli, 'yemi ayénatamo tamí riwali, chópitamo arigá ketasi tamí bichílico. ³⁷Ne si'néami echi jaré mapu ikí Onorúami tamí 'yali, aboni arigá tamí yuwa simea. A'lí ke wesi ku machí a'wámani echi jaré mapu ikí tamí yuwa siko. ³⁸Mapujiti Nijeni echo'ná ripá riwigachi jonsa simisáa nawali jena'í wichimóbachi mapurigani chopi olama mapurigá Onorúami nakí mapu tamí júuli. Nijeni ketasi chopi nawali jena'í wichimóbachi mapurigani olama mapurigá Nijé Binói chopi nakí. ³⁹A'lí Onorúami, mapu tamí júuli, je'ná jerigá nakí: Mapu Nijeni ke wesi wikitayama echi jaré mapu Binói tamí 'yali, chopi mapurigá Nijeni ne si'néami ku o'wíntama echalí ne jubá rawé. ⁴⁰Echi Onorúami mapu tamí júuli, je'ná jerigá nakí: Mapu ne si'néami mapu ikí tamí 'néniga bichílico ne sinibí piréami níima, mapujiti Nijeni bilepi Riosi Ranala ju. A'lí Nijeni ku o'wíntama aboni echalí ne jubá rawé.

⁴¹Echalí echi jaré Juríosi pagótami chótali kichiga ra'icha, echi Jesusi sayéraga, mapujiti Binói jeanili: Nijé Binói ju echi ko'wáami, echi mapu ripá riwigachi jonsa rikinali. ⁴²Echalí aboni a'nagupi ra'íchaga jeanili: ¿Kecha je'ná ju Jesusi, echi José ranara? Tamujeta galá machí binói onolá, binói iyela ayénachó. ¿Churikória echaní mapu binói rikinali echo'ná ripá riwigachi jonsa?

⁴³Chopi Jesusi ku nijéwaga jeaneli: Ketasi echirigá ra'ichasi a'nagupi, tamí sayéraga.

⁴⁴Ke wesi omérama tamí bichiya, a echi Onorúami mapu tamí júuli ketasi galá bichírasagá aboni. A'lí echalí ne jubá rawé Nijeni ku o'wíntama si'néami mapu ikí galá tamí bichílico. ⁴⁵Echo'ná Riosi Ra'íchala oselíwalachi osirúami ju mapurigá echi jaré Riosi jiti nawésami jerigá osali: Riosi si'néami 'yemi mi galá binéraima. Echirigá ju mapu si'néami mapu ikí galá kipuga binéko mapurigá Onorúami binera, abóniko galá tamí bichíima.

⁴⁶Ketasi bichíwali ju mapu jaré ma riwali Onorúami; chopi Nijeni mápuni bilepi Riosi Ranala ju, mapu Riosi tamí júuli jena'í wichimóbachi, Nijeni ma galá riwali Onorúami. ⁴⁷Ne bichíwali 'yemi nimí jeané: Echi jaré mapu tamí bichílico, abóniko ne sinibí piréami ju. ⁴⁸Nijé Binói ju echi ko'wáami mápuni nijá mapurigá echi pagótami sinibí pirélama. ⁴⁹Echi jaré kí'yá piréami 'yemi pagótamawala ko'wali echi maná anilíwami ko'wáami echo'ná biléana waná kawichí, chopi aboni arigá waminá suwili. ⁵⁰Chopi Nijeni 'yemi mi ra'ícha echi ko'wáami jiti rugá mapu ripá riwigachi jonsa rikinali, mapurigá echi jaré mapu ikí ko'wako echi ko'wáami ma ketasi suwimea. ⁵¹Nijé Binói ju echi ko'wáami sinibí bitéami mapu rikinali echo'ná ripá riwigachi jonsa. Si'néami mapu ikí ko'wako je'ná ko'wáami ne sinibí niráa pirélama. A'lí echi ko'wáami mapu Nijeni nijá, Nijé Binói sapala chopi ju. Nijeni 'yama Nijé Binói sapala mapurigá jena'í wichimóbachi piréami pagótami sinibí pirélama.

⁵²Echalí echí jaré Juríosi pagótami a'nagupi rukueli jeanigá: ¿Churigá omérama je'ná rijói tamujé tamí ayá binói sapala mapurigata kopoá mapurigá ko'wáami niráa?

⁵³A'lí Jesusi jeaneli: Ne bichíwali Nijeni 'yemi mi jeané: A ketásitamo kosáagá Nijé sapala, ayénachó a ketásitamo bajísagá Nijé lalá, a'lí bichétamo ketasi sinibí piréami ju. Riosi tamí wilali mapurigá Ku'wíriami niráa. ⁵⁴Si'néami mapu ikí ko'wako Nijé sapala, echí jaré mapu ayénachó bajiko Nijé lalá, abóniko sinibí piréami ju. A'lí Nijeni ku o'wíntama aboni echalí ne jubá rawé. ⁵⁵Mapujiti Nijé sapala echí ne bichíwali ko'wáami ju. A'lí Nijé lalá echí ne bichíwali bajíwami ju. ⁵⁶Si'néami mapu ikí ko'wako Nijé sapala, echí jaré mapu ayénachó bajiko Nijé lalá, abóniko sinibí tamí yuwa piré, ayénachó Nijeni sinibí aboni yuwa bité. ⁵⁷Riosi Onorúami, mapu tamí júuli jena'lí wichimóbachi, sinibí bitéami ju. A'lí Nijeni sinibí bité Binói jiti. A'lí si'néami mapu ikí tamí ko'wako, abóniko ayénachó achigórigá sinibí pirélama tamí jiti. ⁵⁸Nijeni ra'icha echí ko'wáami jiti rugá mapu ripá riwigachi jonsa rikinali. Je'ná ko'wáami ketasi mapurigá echí maná anilwami ko'wáami ju, echí mapu echí jaré 'yemi pagótamawala ki'yá piréami ko'wali, chopi aboni arigá waminá suwili. Jipi si'néami mapu ikí ko'wako je'ná ko'wáami, mapu ripá riwigachi jonsa rikinali, aboniko sinibí niráa pirélama.

⁵⁹Echi Walubela Jesusi je'ná jerigá binéraga nawésali echo'ná Kapernaúmachi mapalí echí jaré Juríosi pagótami napawili echo'ná aboni ri'obáwalachi.

Jesucristo Ra'íchala 'ya mapurigá echí pagótami ne sinibí pirélama

⁶⁰Je'ná jerigá námsa wikabé mapu Jesusi yuwa najátali a'nagupi jeaneli: We nóchali ju máputa echirigá bichíibo mapurigá Binói binera. Ke wesi omérama echirigá njéwiya.

⁶¹Echalí Jesusi Binói galá machili mapurigá aboni echijiti a'nagupi chílawaga ra'íchali. A'lí Binói rukueli jeanigá: ¿Wabéchatamo chati níli je'ná jiti mapurigá Nijeni 'yemi mi aneli? ⁶²¿Churigá bichétamo aniboa átamo tamí riwiságá echo'ná ripá riwigachi ku moyénachi, mapo'nani bachá asali? Riosi tamí wilali mapurigá Ku'wíriami niráa. ⁶³Echi pagótami chopi sinibí pirélama Nijé Iwigala jiti. Aboni ketasi chirigá omérama sinibí pirélya aboni sapala jiti. Nijeni 'yemi mi ne bichíwaga aneli mapu churigáamo omérabo sinibí pirélya. A'lí átamo galá echirigá bichíiságá, 'yémitamo ne bichíwali sinibí pirélabo. ⁶⁴Chopi jaré 'yemi abijí ketasi cho bichíi. Echalí Jesusi echirigá aneli mapujiti chabé chokichí jonsa Binói galá machili chigá níli mapu ke bichíima; ayénachó Jesusi galá machili chigá jiti Binói waminá njírami níima riwéali. ⁶⁵A'lí Jesusi waminabi jeaneli: Echijiti Nijeni 'yemi mi aneli mapu ke wesi omérama tamí bichíiya, a Onorúami ketasi echirigá bichírasagá.

⁶⁶Echalí jonsa wikabé pagótami mapu Jesusi yuwa najátali ma waminá ku ariweli. A'lí aboni ma ketasi 'yénali Binói yuwa. ⁶⁷Echalí Jesusi rukueli echí jaré makói miná okuá binéami jeanigá: ¿'Yémi áchatamo ayénachó waná simánali tamí aliwesa?

⁶⁸Chopi echí Simoni Pegro ku njéwaga rukueli jeanigá: Walubela, ¿chigá bicheta yuwa simabo? ¡Mujé Ra'íchala chopi tamujé tamí 'ya mapurigata sinibí pirélabo! ⁶⁹Ayénachó tamujé ma galá bichíili Mujé niráa. Jípita galá machí mapu Mujemi ju echí Cristo anilwami. Mujemi ju echí bilepi Riosi Ranala.

⁷⁰Echalí Jesusi ku njéwaga jeaneli: Nijé Binói chapili 'yemi máputamo makói miná okuá ju. ¡Chopi arigá bilé rijói 'yemi we sití suléami ju mapurigá echí riabulo niráa!

⁷¹Chopi Jesusi echirigá ra'íchali echi Júrasí Jiskarioti riwéami rijói jiti rugá. Échiko auché bilé rijói, Simoni Jiskarioti riwéami, ranala níili. Echi Júrasí níili mapu waminá nijima riwéali echi Jesusi mapurigá Binói mi'lirúami níima. A'lí Jesusi Binói binérali echi Júrasí. Echi yuwa si'néami makói miná okuá niili mapu Jesusi binérali.

Echi jaré mapu Binói ritémawala niráa níili ketasi bichíili Jesusi niráa

7 Pe wakináokuá echi Walubela Jesusi iyénali echo'ná Galiléachi anilíwachi kawírali. Echalí Binói ketasi nakili inánara echo'ná Juréachi anilíwachi kawírali, mapujiti echo'ná piréami Juríosi pagotami ne wabé mi'llináali echi Binói. ²Echalí ma ne mulubé sébachi níili echi jaré Juríosi pagótami omáwala mapalí rojuá sawala laka muchíwachi níili. ³Echalí echi jaré Jesusi ritémawala jeaneli: Ketasi tibí jena'í Galiléachi, chopi echo'ná Juréachi simigá mapurigá echo'ná piréami pagótami mapu ikí galá bichíi mujé niráa ayénachó riwimea mapurigá mujemi olá. ⁴Mapujiti a bilé rijói nakiságá mapu binói galá machirúami níima echi auché jaré pagótami jiti, échiko sinibí ne machiná niráa olá suwaba namuti mapurigá echi auché jaré pagótami galá riwimea mapurigá binói olá. A mujemi ne bichíwali omérasagá olayá mapurigá ke wesi auché jaré pagótami omero olayá, echirigá olá ne machiná niráa, mapurigá ne si'néami pagótami galá riwimea mapurigami olá.

⁵Echalí aboni echirigá aneli mapujiti aboni echi Jesusi ritémawala ke, arígá ketasi bichíili Binói niráa. ⁶A'lí Jesusi jeaneli: Ke cho abijí séba Nijé téttala; chopi 'yémitamo sinibí olá mapu ikí 'yemi abónitamo nakí. ⁷Jena'í wichimóbachi piréami pagótami ketasi omérroma 'yemi mi kichiya, chopi aboni wabé tamí kichí mapujiti Nijeni ne bichíwaga nawesa aboni jiti rugá, mapu aboni wabé chati oláami ju. ⁸Bachá simíbaga 'yemi echo'ná Jerusalémachi, mapujiti omowálawachi sébachi ju. Nijeni ketasi cho simea, mapujiti Nijé téttala ketasi cho seba.

⁹A'lí ma je'ná jerigá anesa, echi Walubela Jesusi abijí tibili echo'ná Galiléachi anilíwachi kawírali.

Jesusi simili echo'ná Jerusalémachi mapalí omowálawachi sébachi níili mapalí sawá laka muchíwachi níili

¹⁰Chopi pe jubá mapalí echi jaré Jesusi ritémawala ma simíbali echo'ná Jerusalémachi echalí omowálawachi sébachi, echalí Jesusi ayénachó echo'ná simili; chopi Binói ketasi iyénali wikabé pagótami yuwa, echijiti ketasi machirúami níili mapurigá Binói echo'ná iyénali. ¹¹Echalí echi jaré Juríosi pagótami mapu ma echo'ná Jerusalémachi omawa muchili, aboni a'nagupi jeanigá we ali echi Jesusi: ¿Kumi 'nalí iyena echi rijói?

¹²Echalí rawé echo'ná wikabé pagótami napawika muchíwachi jaré wikabé a'nagupi ra'íchali echi Walubela Jesusi jiti rugá. Jarecho jeanili: Echi Jesusi we galabé ju. A'lí auché jaré jeanili: Echi rijói ketasi galabé ju, chopi binói wabé 'yékaka nawésiami ju echi jaré pagótami.

¹³Chopi echalí aboni ke wesi machiná niráa ra'íchali echi Walubela Jesusi jiti rugá, mapujiti si'néami we majali echi jaré o'wéala Juríosi.

¹⁴A'lí ma nasipa sérali sunísiya echi omáwali mapalí echi Walubela Jesusi binéramiya bakili echo'ná pachá echi walubé Juríosi pagótami ri'obáwalachi.

¹⁵Echalí echi jaré Juríosi pagótami wabé kilí kipuli mapalí echi Walubela Jesusi

binéraga nawésali; ayénachó aboni we cha nílaga a'nagupi rukueli: ¿Churigá galá machí je'ná Rijói wikabé karúmati namuti, mapujiti Binói ke siné bineli mapurigá echí auché jaré wabé machíami sinibí we binela?

¹⁶Chopi Jesusi ku nijéwaga jeaneli: Mapurigá Nijeni binela, ketasi Nijé níwala ju. Chopi Echi mapu tamí júuli jena'í wichimóbachi, Echi níwala ju. ¹⁷A'lí a jaré nakisáagá echirigá olánala mapurigá Riosi nakí mapurigá echí pagótami olama, aboni galá machimea acha Riosi Binói tamí júuli echirigá binera echí pagótami, acha Nijé, binói chopi niráa, echirigá binérima kérémá. ¹⁸Mapuyíripi rijói chopi ra'íchaga nawésako mapurigá binói nakí, échiko echirigá olá mapurigá binói walubéragera anérámi níima echí auché jaré pagótami jiti. A'lí mapuyíripi rijói chopi nakiko mapu walubéragera anérámi níima echí bilé mapu bachá náwali, échiko ne bichíwaga ra'íchami ju, ayénachó binói tarapé 'yékami ju.

¹⁹Ne bichíwali ju mapu echí walula Moisesi 'yemi mi 'yali Riosi nulalila osirúami, chopi ke wesi 'yemi ne galá nijéwaga olali mapurigátamo nulérami níili. Jipi, ¿churékulátamo tamí mi'llináali?

²⁰Echalí echí jaré pagótami ku nijéwaga jeaneli: We chati riablo aliwala aliwéami jumi. ¿Chigá biché mi mi'llináali?

²¹Echalí Jesusi jeaneli: Nijeni galabé ologá ku sa'wali bilé rijói echalí mapalí isábawachi rawé níili, echijiti si'néamitamo wabé si'wináriga 'nátali. ²²Chopi echí Moisesi 'yemi mi nuleli noligá sikirénala echí jaré kúuchi kúrowi 'yemi kúchala, a'lí bichétamo arigá noligá sikiré bilé táchí towí mapalí isábawachi rawé ju. (Chopi echí Moisesi ketasi níili mapu bachá niráa echirigá olali, mapujiti echí auché jaré chabé ki'yánala piréami 'yemi pagótamawala bachá niráa echirigá olali.) ²³A'lí a 'yémítamo noligá sikirésagá bilé táchí towí, mapalí isábawachi rawé ju, mapurigátamo echirigá suwaba galá nijéwaga olabo mapurigá Moisesi 'yemi mi osogá nuleli, ¿churékulátamo na'awa tamí yuwa mapujítini ne suwaba ku sa'wali bilé rijói mapalí isábawachi rawé níili? ²⁴Ketasi chuwé wi'nijisi auché jaré. Mapalí 'yémítamo chopi 'nátaga mayé mapu, siné káachi, aboni we chati olá; chopi galá machigá wi'nijisi mapalí 'yémítamo ne bichíwali galá machí mapurigá auché jaré chati olá.

Jesusi nawésaga aní mapu Binói julárami níili Riosi jiti

²⁵Echalí jaré echo'ná Jerusalémachi piréami chótali a'nagupi rukuésiya jeanigá: ¿Kecha je'ná ju echí rijói mapu aya 'yénalati mi'lliboya? ²⁶Jipi jena'í ne machiná niráa nawesa, chopi ke wesi chibi ané. ¿Acha nímilé mapu echí jaré o'wéala ne bichíwali mayé mapu je'ná rijói echí Cristo anilíwami ju? ²⁷Ayénachó aboni a'nagupi jeaneli: Chopi tamujeta galá machí je'ná rijói, mapu kumi bitéami ju. A'lí mapalí echí Cristo anilíwami nolínsa, ke wesi machimea kumi jonsa nawalo.

²⁸Echalí Jesusi nawésaga binérali echí jaré pagótami echo'ná pachá echí walubé Juríosí pagótami ri'obáwalachi; chopi ma kipusa mapurigá aboni a'nagupi anili, echalí Binói o'weli ra'íchaga jeaneli: 'Yémítamo mayé máputamo galá tamí machí, ayénachótamo mayé máputamo galá machí mapu kúmini nalí okuá nawalo. A'lí bichétamo ketasi galá tamí machí, nirapétamo galá machí mapu kúmini nalí okuá nawali, mapujiti Nijeni ketasi olámiya nawali mapurigá Nijé Binói chopi nakí. Nijeni julárami níili jena'í wichimóbachi. A'lí Echi mapu tamí júuli ne bichíwali ju, chopi 'yémítamo ketasi machí Binói. ²⁹Chopi Nijeni galá machí Binói, mapujítini nawali echo'ná jonsa mapo'ná Binói atí. Ayénachó Binói tamí júuli.

³⁰Echalí echí jaré Juríosi pagótami chapináali bologá tonália echí Jesusi; chopi ke wesi chapili mapujiti ketasi cho sébali Binói téitala. ³¹A'lí wikabé pagótami arígá bichíli Jesusi niráa. Echalí aboni jeanili: Je'ná Rijói ne bichíwali ju echí Cristo anilíwami, mapujiti Binói ne wabé omériga olá wikabé namuti, mapurigá auché jaré pagótami ketasi omelo olayá. A'lí echirigá olama riwéali echí Cristo anilíwami.

Echi jaré Bariseo anilíwami binériami júuli jaré kapitani echí Jesusi chapínala

³²Echalí echí jaré Bariseo anilíwami binériami galá námali mapurigá echí auché jaré pagótami anili, Jesusi jiti rugá. Echijiti echí jaré Bariseo, ayénachó echí jaré o'wéala sacerdote, si'néamika napawika katéwaga júuli jaré kapitani, echo'ná walubé Juríosi pagótami ri'obáwalachi jonsa, mapurigá aboni chapisá bologá tomea echí Walubela Jesusi. ³³A'lí echí Walubela Jesusi jeaneli: Pée téeli rawé chopi asiméani 'yemi yuwa. A'lí pée waminánomí Nijeni auchecho ku simea Echi yuwa mapu tamí júuli jena'í wichimóbachi. ³⁴Echalí 'yémítamo tamí abo, chópitamo ketasi tamí riwiboa, mapujiti 'yémítamo ketasi omélabo simiba echo'ná mapo'ná Nijeni asimea.

³⁵A'lí echí jaré Juríosi pagótami chótali a'nagupi niráa rukuée jeanigá: ¿Kumi siméaré je'ná, mapo'ná tamujeta ketasi riwiboa? ¿Acha echo'ná auché jaréana simea, echí auché jaré Juríosi pagótami yuwa, si'néami mapu ikí chijaga piré, echí auché jaré isena Griego anilíwami pagótami yuwa, mapurigá Binói nawésaga binérama echí auché jaré isena pagótami? ³⁶Tamujeta ketasi machí chu aniwáami ju mapurigá Binói tamujé tamí aneli jeanigá: 'Yémítamo tamí abo, chópitamo ketasi tamí riwiboa, mapujiti 'yémítamo ketasi omérabo simiba echo'ná mapo'ná Nijé asimea.

Jesusi nawésali echí sinibí bitéami ba'wí jiti rugá

³⁷Echalí ne jubá rawé omowálawachi, ne wabé simírami walubéala omowálawachi rawé níili. Echalí rawé Jesusi wilísaga, o'weli ra'íchaga jeanili: A jaré 'yemi balámasagá, wakiná tamí yuwa simíbaga bajisi echí ba'wí mapu Nije nijá. ³⁸Mapujiti echo'ná Riosi Ra'íchala oselíwalachi tamí jiti rugá, jerigá osirúami ju: Si'néami mapu ikí tamí bichíiko, echo'ná pachana abónichi jonsa walubé simea ba'wí mapu Nijeni nijá, mapurigá wikanáami bakochi niráa, mapurigá si'néami mapu ikí bajima echí ba'wí, ne sinibí niráa pirélama.

³⁹A'lí je'ná jerigá anisá, Jesusi jerigá anináali mapu si'néami mapu ikí bichíima Binói niráa, galá nalema echí Wabé Galabé Riosi Iwigala echo'ná pachana aboni sulálachi niráa. Echalí rawé Jesusi echirigá anili mapujiti echí Wabé Galabé Riosi Iwigala echalí ketasi cho nawali jena'í wichimóbachi, mapujiti Binói Jesusi ketasi cho wabé walubélatami níili.

Jaré pagótami waná cho 'nátami níili

⁴⁰Echalí jaré echí pagótami echo'ná muchúami je'ná jerigá namsa jeanili: Je'ná Rijói ne bichíwali ju echí Riosi jiti nawésami mapu jena'í wichimóbachi nolínama riwéali.

⁴¹Chopi auché jaré jeanili: ¡Je'ná Rijói echí Walubela Cristo anilíwami ju! Chopi auché jaré jeanili: Je'ná ketasi níimire echí Cristo, mapujiti echí Cristo ketasi echo'ná Galiléachi bitéami níima. ⁴²Mapujiti echo'ná Riosi Ra'íchala oseríwalachi osirúami ju mapurigá echí Walubela Cristo bilé níima echí walula silíami Rabiri

riwéami kúchala kúchuwala; ayénachó osirúami ju mapurigá echi Cristo echo'ná Belénchi ranarúami níima riwéali, mapo'ná echi Rabiri bitéali chabé ki'yá.

⁴³Echalí echi pagótami echirigá wikanáami 'nátaga, waminá rojuali, mapujiti aboni ketasi ne chópirigá bichíili echi Jesusi niráa. ⁴⁴Echalí jaré bologá tonáali echi Jesusi, chopi ke wesi echirigá olali.

Echi jaré o'wéala ketasi bichíili Jesusi niráa

⁴⁵Echalí echi jaré kapitani mapu julárami níili echo'ná walubé Juríosi pagótami ri'obáwalachi jonsa, ma ku sili mapo'ná echi jaré Bariseo, echi jaré o'wéala sacerdote muchili. A'lí echi jaré o'wéala jeanigá rukueli: ¿Churékulátamo ke wakiná pali echi Jesusi?

⁴⁶Echalí echi jaré kapitani ku nijéwaga jeaneli: ¡Ke wesi siné echirigá ra'íchali mapurigá echi Rijói ra'icha!

⁴⁷A'lí echi jaré Bariseo jeanigá rukueli: ¿Áchatamo ayénachó ariweli mapurigá echi Rijói 'yemi mi 'yékama? ⁴⁸¡Ke wesi tamujé o'wéala wala galá bichíili echi Jesusi niráa, nirapé wesi echi jaré Bariseo! ⁴⁹Chopi je'ná jaré pagótami mapu ketasi machiko mapurigá nulárami ju, abóniko wabé si'winárigá bichíiralati.

⁵⁰Echalí echi Nikoremo riwéami rijói, mapu chabénala rokogó niráa 'némiya simili echi Jesusi, échiko bilé níili echi jaré Bariseo echo'ná muchúami. A'lí echi Nikoremo jeaneli echi auché jaré:

⁵¹Tamujé nulalila chopi jiti ketásita omérabo kastigo ayá bilé rijói mapalita ke cho bachá niráa galá rukuésagá, mapurigata galá machiboa mapu piri chati olalo binói.

⁵²Chopi echi auché jaré o'wéala ku nijéwaga jeaneli: ¿Áchami ayénachó echo'ná Galiléachi bitéami ju? ¡Ne galá machigá 'ne mapurigá osirúami ju echo'ná Riosi Ra'íchala oselíwalachi, mapujítimi riwimea mapu ke wesi o'wéala Riosi jiti nawésami echo'ná Galiléachi piréami níili!

Echi chati oláami mukí

⁵³Echalí aboni ibili niráa ku bitichí simíbali.

8 Chopi Jesusi simili echo'ná ripá rabó Olfbochi anilíwachi. ²A'lí ba'alínala rawé bil'yá chi'rásiachi Jesusi auchecho ku nawasa echo'ná Jerusalémachi, auchecho ku bakili echo'ná pachá walubé Juríosi pagótami ri'obáwalachi. Echalí si'néami pagótami mulubéanali Binói yuwa. A'lí Binói echo'ná asíbaga, chótali binériya aboni. ³A'lí jaré nulalíwami binériami, jaré Bariseo yuwa, echo'ná pali bilé chati oláami mukí, echi mapu riwílati si'nú rijói yuwa kochíami. Echalí aboni echo'ná nasipa wilali echi mukí echi jaré echo'ná muchúami yuwa. ⁴A'lí aboni jeaneli echi Jesusi: Binériami, je'ná mukí riwirúami níili si'nú rijói yuwa kochíami. ⁵A'lí echi walula Moisesi tamujé tamí osgá nuleli máputa basibuka ko'wiboa echirigá chati oláami muguí, chopi Mujeru, ¿chumi aní?

⁶Echalí aboni chopi echirigá rukueli mapujiti aboni nakili kipúnala mapu churigá echi Jesusi ku nijéwama riwéali, mapujiti aboni wabé wi'nijíinali echi Jesusi. A'lí Jesusi yólaga ri'lé wi'yérali osali Binói makúsawala jiti. ⁷A'lí mapujiti aboni waminabi rukueli, echalí Jesusi ku wachí wilíbaga jeaneli: Mapuyíripi 'yemi máputamo ke bilé siné chati olali, échiko bachá basibuma echi mukí sayéraga.

⁸Echalí Jesusi auchecho siné ku yólaga, auchecho ri'lé wi'yérali osali. ⁹Chopi aboni wabé 'nátaga tibili mapurigá Jesusi aneli. Echijiti aboni ne wabé wi'nijírami niráa níili

pachana aboni sulálachi niráa, mapujiti ibili we 'nátali mapurigá aboni ayénachó we chati oláami níli. Echalí aboni chótali ibíripi niráa ku buyásiya echo'ná pachá jonsa mapo'ná Jesusi asali. Echi jaré wabé ochérami ne bachá buyásali, echalí echi auché jaré ke 'me ochérami ayénachó ku buyásali, mapuyénasí echi Jesusi bi'neli tibili echi mukí yuwa, mapu ayena echo'ná tibili.¹⁰ Echalí Jesusi ku wilísali. Alí mapalí Binói chopi riwali echi mukí echo'ná wilíami, echalí Binói jeanigá rukueli: Mujé mukí, ¿kumi muchuwi echi jaré mapu mi wi'nijili? ¿Macha ke wesi néwalé mapu mi kastigo 'yánali?

¹¹ A'lí echi mukí jeaneli: Kení Walubélawa, ke wesi ne mapu tamí kastigo 'yánali. Echalí Jesusi jeaneli: Níjeni ketasi cho mi kastigo 'yánali. Ma ku simigá echo'ná mujé bitélachi, chopi ketasi auché chati olá.

Jesusi galá machíraga olá jena'í wichimóbachi piréami pagótami

¹² A'lí Jesusi auchecho siné ra'íchali echi pagótami. Echalí Binói jeaneli: Níjeni we galá machíraga olá jena'í wichimóbachi piréami pagótami. Si'néami mapu ikí olako mapurigá Níjeni aní, aboni machimea galabé ologá piréliya. A'lí aboni ketasi chuwé ologá pirélama mapurigá echi jaré pagótami mapu ketasi machí mapo'ná aboni 'yena, mapurigá echi jaré pagótami mapu we 'yena echo'ná rokowárali niráa.

¹³ Echalí echi jaré Bariseo anilíwami binériami jeaneli: Mujé Binói chopi ra'íchaga aní mápumi we omérami ju echirigá olayá, chopi ketasi bichíwali ju mapurigá mujé mi aní mujé binói jiti rugá.

¹⁴ A'lí Jesusi ku nijéwaga jeaneli: Ayena bichíwali ju mapurigá Níjeni anili mapu Níjeni galá machíraga olá echi pagótami, mapujiti Níjeni galá machí kúmini jonsa nawali; ayénachóni galá machí mapu kúmini simea, chopi 'yémítamo ketasi machí mapu kúmini jonsa nawalo, nirapétamo machí mapu kúmini siméarikó.¹⁵ 'Yémítamo chopi tamí wi'nijí mapurigá jena'í wichimóbachi piréami pagótami 'nátaga wi'nijí auché jaré. A'lí Níjé Binói ketasi wesi wi'nijí.¹⁶ Chopi a Níjeni wi'nijiságá auché jaré, Níjeni ne bichíwali niráa wi'nijima, mapujiti Níjeni ketasi bi'neli niráa wi'nijima, chopi echi Onorúami mapu tamí júuli jena'í wichimóbachi, Échiko tamí yuwa, okuákáta napawika wi'nijibo.¹⁷ Echalí Jesusi waminabi jeaneli: Echo'ná 'yemi nulalila oselíwalachi je'ná jerigá osirúami ju: Mapalí okuá rijói a'naví chópirigá nawisásagá, echalí mapurigá aboni nawesa ne bichíwali ju.¹⁸ Galá ju. Níjé Binói bichíwaga aní mapu Riosi Onorúami tamí júuli jena'í wichimóbachi. Alí Onorúami auché Bilé ju mapu bichíwaga anili mapu Binói tamí júuli.

¹⁹ Echalí echi jaré Juríosi pagótami jeaneli: ¿Kumi atí Mujé Onolá? Chopi Jesusi ku nijéwaga jeaneli: 'Yémítamo ketasi tamí galá machí. Nirapétamo machí echi Níjé Onolá. Átamo tamí galá machisáagá, ayénachótamo machiboi echi Níjé Onolá.

²⁰ Echalí Jesusi je'ná jerigá nawésaga aneli mapuyénasí Binói binérabi echi jaré pagótami echo'ná pachá echi walubé Juríosi pagótami ri'obáwalachi, echo'ná bacháami mapo'ná wenomí muchuwálawachi níli; chopi ke wesi cho bulali mapujiti ketasi cho sébali Binói téttala.

Echo'ná mapo'ná Níjé simea, 'yémítamo ketasi omérabo écho'ná simiba

²¹ A'lí Jesusi auchecho siné jeaneli: Maní ku simea. A'lí 'yémítamo tamí abo, chópitamo waminá suwiboa. A'lí bichétamo ketasi ku wikawárami níibo mapurigátamo chati olali. A'lí echo'ná mapo'ná Níjeni simea, 'yémítamo ketasi omérabo echo'ná simiba.

²²Echijiti echí jaré Juríosi pagótami a'nagupi rukueli jeanigá: ¿Acha mi'limea Binói niráa? Siné káachi Binói echijiti echaní mapu tamujé ketasi omérabo simiba echo'ná mapo'ná Binói simea.

²³Echalí Jesusi jeaneli: 'Yémítamo jena'í ri'lé piréami ju, chopi Nijeni echo'ná ripá riwigachi jonsa nawáami ju. 'Yémítamo chopi jena'í wichimóbachi piréami ju, chopi Nijeni ketasi sinibí niráa jena'í wichimóbachi bitéami níima. ²⁴Echijítini 'yemi mi echirigá aneli máputamo arigá waminá suwiboa, chópitamo ketasi ku wikawárami níbo mapurigátamo chati olali, mapujiti átamo ketasi bichíiságá mapu Nijé ne bichíwali ju echí bilepi Riosi Ranala, echalítamo arigá waminá suwiboa, chópitamo ketasi ku wikawárami níbo mapurigátamo chati olali.

²⁵Echalí echí jaré Juríosi pagótami jeanigá rukueli: Mujé, ¿chigá bichemi juko? Chopi Jesusi ku nijéwaga jeaneli: Mani 'yemi mi galá aneli chabé chokichí jonsa mapu chigani ju Nijé. ²⁶Abijini niwa wikabé namuti mápuni animea 'yemi jiti rugá; ayénachó Nijeni abiji 'yemi mi wi'nijima wikabé namuti jiti, chopi Echi mapu tamí júuli jena'í wichimóbachi ne bichíwaga aní. A'lí Nijeni chopi ané jena'í wichimóbachi piréami pagótami achigórígá mapurigá Nijeni námali aníami Echi mapu tamí júuli.

²⁷Chopi aboni ketasi machili mapu Jesusi ra'íchali echí Onorúami jiti rugá.

²⁸Echijiti Jesusi jeaneli: Nijeni wilárami níili mapurigá Ku'wíriami niráa, chopi mapalítamo tamí ripá uchabo, echalítamo galá machiboa mapu Nijé ne bichíwali ju echí Bilepi Riosi Ranala. Echalítamo ayénachó machiboa mapu Nijeni ketasi biyili olá Nijé Binói chopi niráa, chopi mapurigá Onorúami tamí binérali, echirigani ra'icha. ²⁹Mapujiti Echi mapu tamí júuli, sinibí tamí yuwa atí. Nijé Onolá ketasi tamí bi'neli ariweli, mapujiti Nijeni sinibí olá mapurigá Binói nakí, mapurigá Binói echijiti wabé kanílama. ³⁰A'lí mapalí Jesusi echirigá anili, ne wikabé echí jaré Juríosi pagótami galá bichíili Binói niráa.

Echi jaré Riosi kúchuwala, echí auché jaré chati oláami yuwa

³¹Echalí Jesusi jeaneli echí jaré Juríosi mapu galá bichíili Binói niráa: Átamo sinibí niráa galá bichíiságá mapurigá Nijeni 'yemi mi aneli, echalítamo ne bichíwali tamí yuwa binéami níbotamo. ³²Echalítamo machiboa echí ne bichíwali. A'lí mapalítamo galá machiboa echí ne bichíwali, echalítamo ma ku machí a'wátami niráa níbo, mapurigátamo ma ketasi waminabi nulékowami níbo pióntami niráa.

³³Echalí aboni ku nijéwaga jeaneli: Echi Abrami kúchala kúchuwala chopi juta. Ke wesi, ke siné tamujé tamí nuleli mapurigá pióntami niráa. ¿Churigámi tamujé tamí ané máputa ku machí a'wátami niráa níbo?

³⁴A'lí Jesusi jeaneli: Ne bichíwali 'yemi nimí ané mapu si'néami mapu ikí chati olako, abóniko waminabi echirigá chati olama, a ketasi ku wikawárami níiságá, achigórígá mapurigá 'wérali ju mapu bilé pioni sinibí ne wabé nochama. ³⁵A'lí bilé pioni ketasi mapurigá echí kalíwami rijói ranala ju, chopi echí kalíwami rijói ranala sinibí bité echo'ná kalírali mapujiti échiko echo'ná kalírali bitéami rijói ranala ju.

³⁶A'lí Jesusi waminabi jeaneli: Nijé ne bichíwali bilepi Riosi Ranala ju. A'lí a Nijeni 'yemi mi ku'wíraságá mapurigá ma ketasi 'werali níima mapurigátamo waminabi chati olabo, echalítamo ne bichíwali ketasi waminabi nulérami níbo mapurigá echí riablo piónawala niráa. ³⁷Nijeni galá machí mapu 'yemi echí ki'yá bitéami Abrami kúchala kúchuwala jútamo, chopi 'yémítamo tamí mi'llináali mapujítitamo ketasi bichíili mapurigá Nijé 'yemi nimí aneli. ³⁸Nijé 'yemi nimí nawésaga ruyé

mapurigá Keni Onó tamí 'nérali. A'lí 'yémitamo chopi olá mapurigá 'yemi onolá 'yemi mi aneli.

³⁹ Echalí aboni ku nijéwaga jeaneli: Echi ki'yá bitéami Abrami chopi mapurigá tamujé onolá níli. A'lí Jesusi jeaneli: Átamo ne bichíwali mapurigá echi Abrami kúchala kúchuwala níisagá, a'lí bichétamo olabi mapurigá echi Abrami olali.

⁴⁰ A'lí Nijeni chopi 'yemi nimí bichíwaga ruyeli mapurigá Riosi Binói tamí binérali, chopi 'yémitamo arigá tamí mi'lináali. ¡Echi Abrami ke siné echirigá chati olali!

⁴¹ ¡'Yémitamo achigórigá olá mapurigá olá echi 'yemi onolá! Echalí aboni jeaneli: ¡Tamujeta bilepi niráa, echi Walubela Riosi chótita onée! Tamujeta ketasi ranarúami níili mapurigá bilé mukí ke kunéami bi'neli asagá raná.

⁴² Echalí Jesusi jeaneli: A echi Walubela Riosi ne bichíwali níisagá 'yemi onolá, echalí 'yémitamo galá tamí galebi, mapujiti Nijeni chopi nawali jena'í wichimóbachi mapujiti echi Walubela Riosi tamí júuli. Nijeni ketasi olámiya nawali mapurigá Nijé Binói chopi nakili, mapujiti Riosi Binói tamí júuli. Nijeni mayé máputamo ketasi omero machiyá mapurigá Nijeni 'yemi mi ané? Nijeni mayé máputamo ketasi omero echirigá machiyá mapujítitamo ketasi nakí nijéwiya mapurigá Nijeni 'yemi mi nawésaga aneli. ⁴⁴ 'Yémitamo onée echi riablo. A'lí 'yemi chopi echi riablo níwala jútamo, ayénachótamo chopi nakí olána mapurigá binói nakí. A'lí echi riablo ne wabé nikówami níili ki'yá chokichí jonsa. A'lí binói ke siné bichíwaga olali, nibilé bichíwaga ra'icha. A'lí mapalí echi riablo ne wabé 'yékaka ra'icha, binói chopi echirigá ra'icha mapujiti binói ne wabé 'yékami ju; ayénachó echi riablo ne chokila ju ne suwaba echi 'yékalawami. ⁴⁵ Chopi mapujiti Nijeni ne bichíwaga ra'icha 'yémitamo ketasi tamí bichíi. ⁴⁶ Nijeni ke siné chati olali. Echijiti ke wesi 'yemi galá oméraama riwíliya mapurigá Nijeni chati oláami ju. A'lí ani ne bichíwaga anísaaagá, ¡churékulátamo ke tamí bichíi? ⁴⁷ Ne si'néami mapu ikí Riosi níwala pagótami juko, aboni we galá nakí námanala Riosi Ra'íchala; chopi 'yémitamo ketasi Riosi níwala pagótami ju. Echijiti 'yémitamo ketasi nakí námanala Riosi Ra'íchala.

Echi Walubela Jesucristo arigá sinibí níili mapalí echi ki'yá bitéami Abrami ke cho bitéali

⁴⁸ Echalí echi jaré Juríosi pagótami ku nijéwaga jeaneli: Ayénata ne bichíwali anili mapalita anili mapu Mujemi chati oláami ju, mápumi echo'ná Samáriachi bitéami jumi, ayénachó mápumi wabé chati riablo aliwala aliwéami ju.

⁴⁹ Echalí Jesusi ku nijéwaga jeaneli: Nijeni ketasi we chati riablo aliwala aliwéami ju. Chópini wabé walubélaga ané echi Nijé Onolá. A'lí 'yémitamo ketasi tamí walubélaga ané, chópitamo wabé sití ra'íchali tamí sayéraga. ⁵⁰ A'lí Nijeni ketasi amí mapurigá echi pagótami tamí chopi walubéragera anema, chopi abilecho ju mapu we amí mapurigá Nijé Binói waminabi walubéragera anérami níima. A'lí Échiko ne bichíwali justicia olama. ⁵¹ Ne bichíwali 'yemi nimí jeané: ¡Si'néami mapu yíripi galá nijéwaga olako mapurigá Nijeni aní, abóniko ke siné suwimea!

⁵² Echalí echi jaré Juríosi pagótami jeaneli: ¡Jípita galá machí mápumi we chati riablo aliwala aliwéami jumi! Echi Abrami ma mukuli, ayénachó echi jaré Riosi jiti nawésami ma suwili, chopi mujemi echaní: ¡Mapu yíripi galá nijéwaga olako mapurigá Nijeni aní, abóniko ke siné suwimea! ⁵³ ¡Mujecha waminabi wabé walula ju, ketasi mapurigá echi Abrami echi mapu tamujé onolá niráa niili? A'lí echi

Abrami ma mukuli, ayénachó echí jaré o'wéala Riosi jiti nawésami ma suwili. ¿Chigábichémi mayé mujé binói niráa?

⁵⁴ Echalí Jesusi ku nijéwaga jeaneli: A Nijeni walubéraga anésagá Nijé Binói niráa, echalí ketasi ne bichíwali Walubela níima Nijé; chopi Nijé Onolá ju mapu tamí walubéraga ané. A'lí 'yémítamo aní mapu echí Binói 'yemi Riósawala ju. ⁵⁵ Chopi 'yémítamo ketasi machí Nijé Onolá. A'lí Nijeni galá machí echí Binói, chopi a Nijeni anisáagá mapu Nijé ketasi machí echí Binói, echalí Nijeni ne wabé ikaléami níima, achigórígá mapurigá 'yemi niráa. A'lí Nijeni ne bichíwali galá machí echí Nijé Onolá, ayénachóni galá nijéwaga olá mapurigá Binói tamí ané. ⁵⁶ Echi Abrami 'yemi Juríosi pagótami onolá niráa níili. Échiko ne wabé kaníili mapujiti Nijeni nawama riwéali jena'í wichimóbachi. Ki'yá bachánala echí Abrami galá bichíiga, arigá riwali echalí rawé mapalí Nijeni nawama riwéali jena'í wichimóbachi, echijiti binói ne wabé kaníili.

⁵⁷ Echalí echí jaré Juríosi pagótami we yáati ku nijéwaga jeaneli echí Jesusi: Mujé tarapé cho malisa makói bamíbami ju. ¿Churikória jeaními mapu Mujemi ayena riwali echí ki'yá bitéami Abrami?

⁵⁸ Echalí Jesusi ku nijéwaga jeaneli: Ne bichíwali 'yemi nimí jeané: Chabé kilyá mapalí echí Abrami ke cho bitéali, ne bachá Nijé a sinibí níili, mapujiti Nijeni sinibí bité.

⁵⁹ Echalí aboni chapili rité mapujiti aboni nakili basibuka mi'lináliya echí Jesusi, chopi Binói ke ne ikigá waminá nolowili. A'lí mapo'ná aboni jali nasipa simíraga ku machínali echo'ná walubé Juríosi pagótami ri'obáwalachi jonsa.

**Jesusi galá ku machíliami niwali bilé rijói mapu ke
machíliami níili mapu jonsa ranálati**

9 Siné rawé Jesusi echo'ná walúlachi iyénaga simírali echo'ná biléana mapo'ná Binói riwali bilé rijói mapu ke machíliami níili mapalí jonsa ranálati. ² Echalí echí jaré mapu Jesusi binérali we rukueli jeanigá: Binériami, ¿churékula echirigá ke machíliami niráa ranálati je'ná rijói? ¿Acha níiliré mapujiti binói 'wénawala we chati olali? ¿Acha níili mapujiti binói chati oláiré omá?

³ Chopi Jesusi ku nijéwaga jeaneli: Ketasi echirigá ikili mapujiti binói 'wénawala chati oláami níili, nibilé cho mapujiti binói chati olaami níili; chopi echirigá ikili mapurigá jena'í wichimóbachi piréami pagótami galá riwíratami níima mapurigá Riosi wabé omérígá olama je'ná rijói yuwa. ⁴ Mapuyénasí abijí rawewa arigá 'wérali ju mapurigá Nijeni olama Binói nóchala olayá mapu tamí júuli jena'í wichimóbachi, mapujiti ke 'me ayó wabé rokowama mapalí ke wesi omérama waminabi nochásiya. ⁵ Chopi mapuyénasí Nijeni abijí atí jena'í wichimóbachi, Nijeni galá machíraga olama jena'í wichimóbachi piréami pagótami.

⁶ Echalí Jesusi ma je'ná jerigá anisáa, ri'lé wi'yérali kachípali. A'lí echí sa'liwá jiti wisogá niwali. Echalí Binói ucheli echí wisogá echo'ná echí ke machíliami rijói busílachi. ⁷ Echalí Jesusi jeaneli echí rijói ke machíliami: We yáati simigá echo'ná wi'lé jótachi Siloechi anilíwachi, mapo'ná juláramichi anilíwami ju. Echalí galá basigomi echo'ná maníami ba'wí jiti. A'lí echí ke machíliami echo'ná simigá galá basigoli. A'lí mapalí ku nawali echo'ná jonsa, binói galá ku machíliami níili. ⁸ Echalí echí auché jaré echo'ná piréami, ayénachó echí jaré mapu chabénala riwali mapu

ke machíliami níilo, si'néamika a'nagupi rukueli jeanigá: ¿Kecha je'ná ju echi mapu chabé jonsa wenomí táchas alí?

⁹Echalí jaré jeanili: Ayena, echi ju. Chopi auché jarecho jerigá anili: Ketasi echi ju, chopi echi néchigo yiri ju. Echalí echi rijói binói jeanili: ¡Ayena nijeni ju!

¹⁰Echalí aboni rukueli jeanigá: ¿Churigami galá ku machíili? ¹¹Echalí echi rijói mapu ke machíliami níili ku nijéwaga jeaneli: Echi Rijói mapu Jesusi riwéami ju pee taa wisogá, tamí ucheli busuchí. A'lí tamí jeaneli: Simigá echo'ná wi'lé jótachi Siloechi anilíwachi. Galá basigomi echo'ná maníami ba'wí jiti. Echalí nijeni echo'ná simigá basigoli. A'lí bicheni we yáati galá ku machíili.

¹²A'lí aboni rukueli jeanigá: ¿Kumi atí echi rijói? Echalí binói jeaneli: Ketásini machí.

Echi jaré Bariseo anilíwami binériami wabé rukueli echi rijói mapu ma ku machíliami niwálati

¹³Echalí echi rijói mapu chabénala ke machíliami níili, ma toláti echo'ná bacháami mapo'ná echi jaré o'wéala binériami Bariseo anilíwami muchili. ¹⁴Chopi mapalí Jesusi wisogá niwasa, galá ku machíliami niwali echi rijói, echalí rawé siné isábawachi rawé níili. ¹⁵Echijiti echi jaré Bariseo anchecho siné rukueli echi rijói mapu churigá binói ma ku galá machíili. Echalí echi rijói jeaneli: Echi Jesusi tamí wisogá ucheli nijé busflachi. Echalí nijeni galá basigoli. A'lí jípini ma galá ku machíili.

¹⁶Echalí jaré echi Bariseo anilíwami binériami jeanili: ¡Tamujeta mayé mapu echi rijói mapu echirigá olá ketasi Riosi jiti julárami níili mapujiti binói arigá olá mapalí isábawachi rawé ju! Chopi auché jarecho jeanili: Echi rijói ketásirapé omérama echirigá olayá, a binói wabé chati oláami níisagá, mapujiti ke wesi auché jaré pagótami omero echirigá olayá mapurigá binói olá. Echirigá níili mapu echi pagótami okoná niráa rojuali. Jaré mayeli mapu Jesusi galabé oláami níili, chopi auché jaré mayeli mapu Binói chati oláami níili. ¹⁷Echalí echi jaré Bariseo anchecho siné jeanigá rukueli echi mapu chabénala ke machíliami níili: Muje, ¿churigami aní echi rijói jiti mapu mí ku machíliami niwali? Echalí echi rijói jeaneli: Nijeni mayé mapu échiko Riosi jiti nawésami ju.

¹⁸Chopi echi jaré Juríosi pagótami ketasi nakili bichíinala mapu echi rijói chabénala ke machíliami níili, chopi mapu ma ku machíliami niwálati. Echalí aboni bayeli echi rijói 'wénawala, echi mapu ma ku machíliami niwálati. ¹⁹Echalí jeanigá rukuelati: ¿Acha je'ná ju 'yemi ranala, echi mapu 'yémítamo aní mapu ke machíliami ranarúami níili? ¿Churigá galá ku machíili jipi?

²⁰A'lí echi rijói 'wénawala ku nijéwaga jeaneli: Tamujeta galá machí mapu je'ná ju tamujé ranala, echi mapu ke machíliami ranarúami níili. ²¹Chópita ketasi machí churigá binói galá ku machíili jipi. Nirapeta machí chigá ku machíliami niwali. Binói rukuesi jipi. Ma walú ochérámi ju. Binói niráa suwaba galá nawisama mapu churigá galá ku machíliami niwálati. ²²Echi rijói 'wénawala wabé majaga echirigá aneli mapujiti echi auché jaré Juríosi pagótami ma galá anili mapu a jaré Jeanisáagá mapu echi Jesusi, echi Walubela Cristo anilíwami ju, aboni ma ketasi risénsia níima mapu mo'wimea echo'ná pachá aboni ri'obáwalachi. ²³Echijiti echi rijói 'wénawala echirigá jeaneli: Binói rukuesi. Ma walú ochérámi ju.

²⁴Echalí echi jaré Juríosi auchecho siné bayegá echi rijói mapu chabénala ke machíliami níili, a'lí jeaneli: Ne galá bichíwali tamujé tamí wakiná ku nawisá, mapujiti Riosi mi galá kipú. Tamujeta galá machí mapu echi rijói wabé chati oláami ju.

²⁵A'lí echi rijói ku nijéwaga jeaneli: Nijeni ketasi machí acha chati oláami ju, siné káachi ketasi chati oláami kéremá; chópini bilé namuti gala machí. ¡Chabení ke machíliami níili, chopi jípini galá ku machíliami ju!

²⁶Echalí echi jaré Juríosi auchecho siné rukueli jeanigá: ¿Churigá mi olali echi rijói? ¿Churigá mi ku machíliami niwali?

²⁷Echalí echi rijói mapu chabénala ke machíliami níili ma ku nijéwaga jeaneli: Mani 'yemi mi galá aneli, chópitamo ketasi tamí bichíili. ¿Churékulátamo nakí mápuni auchecho siné 'yemi mi ruyema? ¡Siné káachi 'yémítamo ayénachó najátaga binénali Binói yuwa!

²⁸Echalí aboni wabé na'ágawa, chíbirigá aneli jeanigá: Mujé chopi echi rijói yuwa binéami ju. Chopi tamujeta binéami ju mapurigá echi walula Moisesi osali. ²⁹Tamujeta galá machí mapu Riosi we ra'íchali echi Moisesi yuwa; chopi ketásita machí acha ra'íchali echi Jesusi yuwa. Nirapeta machí kumi jonsa nawali binói.

³⁰Echalí echi rijói ku nijéwaga jeaneli: ¡Je'ná ne wabé bukulíwami ju, mapu 'yémítamo ketasi machí kumi jonsa nawalo echi Jesusi! ¡Chopi echi Jesusi arigá ma tamí ku machíliami niwali! ³¹Tamujeta galá machí mapu Riosi ketasi nijéwaga olá mapurigá echi jaré chati oláami we taní, mapujiti Riosi chopi ku nijéwaga olá mapurigá taní echi auché jaré mapu ikí waminabi walubérage anega, chopi olako mapurigá Riosi Binói nakí. ³²¡Chopi tarapé siné námali mapu auché bilé rijói ku machíliami niwali bilé mapu ke machíliami níili mapu jonsa ranálati! ³³A'lí a echi Jesusi ketasi Riosi jiti julárami níisagá, tarapé omérami echirigá olayá.

³⁴Echalí aboni jeaneli: ¡Mujemi wabé chati oláami níili mapalí jonsa ranáratí, chópimi nakí tamujé tamí binéra! Echalí echi jaré o'wéala Juríosi nulali mapurigá echi rijói ma ke siné auché bakimea echo'ná pachá aboni ri'obáwalachi.

Echi jaré pagótami ketasi omérali machiyá Riosi Ra'íchala

³⁵Echalí Jesusi galá machili mapurigá aboni ma nulali mapu echi rijói ke siné auché bakimea echo'ná pachá aboni ri'obáwalachi. A'lí Jesusi auché riwisáa echi rijói, echalí jeanigá rukueli: ¿Áchami bichíi bilepi Riosi Ranala niráa?

³⁶Chopi echi rijói ku nijéwaga jeaneli: Kení Walubélawa, ¿chigá ju echi Bilepi Riosi Ranala, mapurigá nijeni galá bichíima Binói niráa?

³⁷Echalí Jesusi ku nijéwaga jeaneli: Mujemi ma galá riwali echi Bilepi Riosi Ranala. ¡Nijeni ju, mápuni mi yuwa ra'icha!

³⁸Echalí echi rijói we yáati echo'ná bacháami Jesusi yuwa chokoba wilíbaga jeaneli: ¡Kení Walubélawa, ne galá nimí bichíi!

³⁹Echalí Jesusi jeanili: Nijeni nawali jena'í wichimóbachi mapurigani justicia olama, mapurigá echi jaré ke machíliami galá ku machílama, ayénachó mapurigá echi auché jaré mapu mayeko mapu aboni galá machí suwaba namuti, arigá tibima mapurigá ke machíliami niráa.

⁴⁰ A'lí jaré echí Bariseo anilíwami binériami mapu echo'ná Jesu yuwa muchili, ma je'ná jerigá namsa, echalí jeanigá rukueli: ¿Áchami mayé mapu tamujé ayénachó mapurigá ke machíliami niráa ju?

⁴¹ Echalí Jesusi ku nijéwaga jeaneli: Átamo ne bichíwali ke machíliami nísagá, echalítamo ketasi wi'nijírami níibi, 'yemi chati olalila jiti. Chopi mapujítitamo jeani: Tamujeta ne galá machí, echijiti 'yémítamo abijí wi'nijírami níibo.

Jesu binera echí jaré bo'wá jiti rugá

10 Ne bichíwali Nijéni 'yemi mi jeané: Echi mapu ketasi bakiko ne yéachi niráa, echo'ná walú kalí, bo'wá kalílachi, echí mapu echo'ná chakena ripáami 'moka simira bakiko, échiko we chigórami ju, ayénachó chiná 'wísami ju, ² chopi echí mapu echo'ná ne yéachi niráa bakiko, échiko echí galabé bo'wá niséami ju. ³ Echo'ná bo'wá kalila yéachi tibúami galá irapa mapurigá echí galabé bo'wá niséami bakimea. A'lí suwaba ibili niráa echí jaré bo'wá ne galá machí echí galabé bo'wá niséami ra'íchala, ayénachó echí galabé bo'wá niséami ibílipi niráa bayé mapurigá riwéami niráa binói pugula bo'wá. A'lí suwaba machí a'wasá echo'ná bo'wá kalílachi jonsa. ⁴ A'lí mapalí echí galabé bo'wá niséami ma ku machí a'wasá suwaba binói pugula bo'wá, echalí binói bachá inárama echí jaré bo'wá yuwa. A'lí echí bo'wá jubáami galá najata mapujiti suwaba galá machí echí galabé bo'wá niséami ra'íchala. ⁵ Chopi echí bo'wá ketasi najátama auché bilé si'nú niséami mapu aboni ketasi machí, chopi waminá júmsama echo'ná binóichi jonsa, mapujiti aboni ketasi machí echí si'nú niséami ra'íchala.

⁶ Echalí Jesusi je'ná jerigá irétaga ra'íchali aboni, chopi aboni ketasi machili churigá aniwáami níili mapurigá Binói aneli.

Echi Walubela Jesusi ju echí galabé bo'wá niséami

⁷ Echalí Jesusi auchecho siné ra'íchali jeanigá: Ne bichíwali Nijeni 'yemi mi jeané: Nijé ju mapurigá echí yéachi mapo'ná echí bo'wá mo'wimea. ⁸ Si'néami echí auché jaré mapu bachá niráa síliko, Nijé ke cho nawáachi, aboni we chigórami ju, ayénachó chiná 'wísami ju; chopi Nijé pugula bo'wá ketasi nijéwali mapalí aboni bayeli. ⁹ Nijeni ju echí yéachi. Si'néami mapu ikí tamí jiti mo'wiko, abóniko ku'wíratami níima. A'lí aboni mapurigá echí bo'wá níima mapu sinibí a'lí mo'wigá, sinibí rawé ku 'machínaga, we riwímea kasalá.

¹⁰ Echi chigórami chopi chigoka, ko'ogá, suwábamiya nawá; chopi Nijeni nawali mapurigá echí jaré Nijé níwala pagótami ne sinibí pirélama, ayénachó mapurigá aboni ne wabé simírami kaníliga pirélama.

¹¹ Echalí Jesusi ayénachó jeanili: Nijé ju echí we galabé bo'wá niséami. Nijeni mukumea mapurigani ku'wírama Nijé pugula bo'wá. ¹² Chopi echí mapu pióntami niráa náchako, échiko ma riwisáa inárachi echí nalíwali, we yáati ariwesa echí bo'wá, waminá másimi, mapujiti binói ketasi ne bo'wá niséami ju, ayénachó ketasi ne binói pugula ju echí bo'wá. Echalí echí nalíwali jaré chapísáa, suwaba waminá chijana echí auché jaré bo'wá. ¹³ Echi rijói waminá másimi mapujiti binói chopi mapurigá pióntami niráa náchami ju. Echijiti binói tarapé natimá echí bo'wá.

¹⁴⁻¹⁵ Echalí Jesusi waminabi jeaneli: Nijeni ju echí we galabé bo'wá niséami. A'lí mapurigá Nijé Onolá galá tamí machí, ayénachó mapurigá Nijé galá machí Nijé Onolá, echirigá achigórígá Nijé galá machí Nijé pugula bo'wá, ayénachó nijé pugula

bo'wá galá tamí machí. A'lí Nijeni ariwema mapurigá echí jaré Nijé asayela tamí mi'limea mapurigani echijiti omérama ku'wíriya Nijé pugula bo'wá.¹⁶ Ayénachó Nijeni pugué auché jaré isena bo'wá mapu ketasi napawika mo'wíami ju je'ná bo'wá yuwa. Arigá 'wérali ju mapurigá Nijeni ayénachó wakiná 'nolama echí auché jaré isena bo'wá. Aboni galá tamí nijéwama. A'lí ne suwaba Nijé pugula napawika, bilénapi 'yénama tamí yuwa, mapujiti Nijeni billepi ju echí galabé bo'wá niséami.

¹⁷Onorúami tamí wabé galé mapujiti Nijeni ariwema mapurigá Nijé asayela tamí mi'limea, mapurigani pe waminánomí auchecho siné ku owínama.¹⁸ Tarapé wesi aboni wabé omérami ju tamí mi'ayá, chopi Nijé Binói nakimea mapurigá aboni tamí mi'limea, mapurigani echijiti omérama ku'wíriya Nijé pugula bo'wá. Nijé galá risénsia juni ariwesa mapurigá aboni tamí mi'limea, ayénachóni risénsia ju mapurigani ku owínama mapalini ma mi'lirúami níisa. Nijé Onolá echirigá tamí nuleli.

¹⁹Mapalí echí jaré Juríosi pagótami námali echí Walubela Jesusi je'ná jerigá ra'íchachi, echalí aboni auchecho siné okoná niráa rojuali. ²⁰Echalí wikabé aboni jeanili: Echi Jesusi wabé chati riablo aliwala aliwéami ju, ayénachó ke newalite ju. ¿Churékulátamo galá bichíi mapurigá Binói aní?

²¹Chopi auché jarecho jeanili: Ke bilé wesi omérama echirigá ne galabé niráa ra'icha, a binói wabé chati riablo aliwala aliwéami níisagá. Nibilé wesi chati riablo aliwéami omérama ku machílatiya echí jaré ke 'machíliami.

Echi jaré Juríosi ketasi bichíili Echi Jesusi jiti

²²Echalí echo'ná Jerusalémachi walú omowálati mapujiti omowálawachi sébachi níili mapalí echí jaré Juríosi pagótami sinibí bamíbali echirigá oláli mapu jonsa echí ri'obá ne bukulíwami níili. A'lí echalí rawé we romó níili. ²³Echalí rawé echí Walubela Jesusi echo'ná walú Juríosi pagótami ri'obáwalachi biléana machímana iyénali mapo'ná echí walula silíami Salomoni riwéami níwalachi anélati. ²⁴Echalí echí jaré Juríosi pagótami echo'ná sisáa ne noligá jábaga jeanigá rukueli: ¿Kilíbuko mujemi tamujé tamí anema mapu chigá mi ju Mujé? ¡Ami ne bichíwali níisagá echí Walubela Cristo anilíwami, ne galá tamujé tamí ané!

²⁵A'lí Jesusi ku nijéwaga jeaneli: Mani 'yemi mi ne galá aneli, chópitamo ketasi tamí bichíili. A'lí ne suwaba mapurigá Nijeni wabé omériga olá, mapurigá Nijé Onolá tamí risénsia 'yali olánala, ne suwaba echí Nijé olalila ne machíami niráa 'nera mapu chigá ju Nijé. ²⁶Chopi 'yémítamo ketasi bichíi mapujítitamo ketasi Nijé pugula bo'wá niráa ju, mapurigá Nijeni ma 'yemi nimí aneli. ²⁷Echi jaré Nijé pugula bo'wá ne galá machí Nijé Ra'íchala, ayénachó Nijeni ne galá machí aboni. A'lí aboni galá tamí najata. ²⁸Nijeni 'ya mapurigá aboni ne sinibí pirélama. A'lí aboni ke siné suwímea. Nirapé wesi tamí 'yésama Nijé sikálachi jonsa. ²⁹Nijé Onolá tamí 'yali echí jaré Nijé pugula bo'wá. Echi Nijé Onolá ne bachá bi'nélipi Walubela ju si'néami echí auché jaré yuwa. A'lí ke wesi omérama waminá 'yésia echí Nijé Onolá sikálachi jonsa. ³⁰Echalí echí Walubela Jesusi waminabi jeanili: ¡Nijé, echí Onorúami yuwa, mapurigá billepi niráa juta!

³¹Echalí we yáati echí jaré Juríosi pagótami auchecho siné chapísali rité, mapujiti basibuka mi'lináali echí Walubela Jesusi. ³²Chopi Binói jeanili: Wisabé Nijeni galabé wabé omériga olali echo'ná bacháami 'yemi yuwa, mapurigá Nijé Onolá tamí 'yali mapurigani olama. ¿Chu yiri 'nalí echí wikabé galabé oluwáwami jítitamo tamí basibuka mi'lináali?

³³Echalí echí jaré Juríosi pagótami ku nijéwaga jeaneli: Echi galabé oluwáwami jiti ketásita mi basibuka mi'lboa, chopi mapujiti Mujemi we chati ra'íchali Riosi sayéraga, mapujítimi pe rijói kemu, arigá aní mápumi Riosi ju. ³⁴A'lí Jesusi ku nijéwaga jeaneli: Echo'ná 'yemi nulalí a oselíwalachi osirúami ju mapu Riosi jeanili: 'Yémitamo jaré riosi jútamo. ³⁵A'lí bicheta galá machí mapu Riosi Ra'íchala ne bichíwali ju mapurigá oselichi osirúami ju, echijiti ke wesi pagótami omérroma ne bichíwaga aniyá mapu Riosi Ra'íchala ketasi bichíwali ju. A'lí echo'ná Riosi Ra'íchala oselíwalachi osirúami ju mapu Riosi Binói ra'íchaga aneli jaré riosi niráa echí jaré pagótami mapu galá nareli Binói Ra'íchala. ³⁶A'lí a Riosi tamí chapisáagá mapurigá Binói tamí julama jena'í wichimóbachi, ¿churigátamo galá omero aniyá mapu Nijeni we chati ra'íchali Riosi sayéraga mapujítini anili mapu Nijeni Bilepi Riosi Ranala ju? ³⁷A'lí a Nijeni ketasi achigórigá olásagá mapurigá Nijé Onolá we olá, echalí ketasi tamí bichíisi. ³⁸Chopi a Nijeni ne bichíwali achigórigá olásagá mapurigá Nijé Onolá we olá, echalí galá tamí bichíisi mapujítini echirigá wabé omériga olá, arigátamo ketasi bichíisagá mapurigá Nijeni ra'icha. Echalí 'yémitamo sinepi niráa ne galá machiboa mapurigá Onorúami pachana tamí yuwa ju, ayénachó mapurigá Nijeni Onorúami yuwa ju.

³⁹Echalí echí jaré Juríosi pagótami auchecho siné chapináali echí Jesusi mapurigá bogá tomea, chopi Binói ku simili echo'ná jonsa mapurigá aboni ketasi omérroma chapiyá.

⁴⁰A'lí Jesusi ku nawali echo'ná bakochi, Joránachi anilíwachi bo'ónala suwé. A'lí Binói echo'ná tibili mapo'ná echí Juani chabénala pagó iyénari echí jaré pagótami.

⁴¹Echalí rawé auché jaré ne wikabé pagótami echo'ná bakochi sili 'nébiya echí Jesusi. A'lí echí pagótami jeanili: Ne bichíwali echí Juani ketasi bilé namuti wabé omériga olali mapurigá ke wesi auché jaré omero olayá, chopi suwaba ne bichíwali níili mapurigá echí Juani nawésaga anili je'ná Jesusi jiti rugá.

⁴²A'lí wikabé pagótami galá bichííli Jesusi niráa mapalí Binói echo'ná asali.

Echi Lásaro ma mukuli

11 Echo'ná Betániachi anilíwachi bilé rijói we nayú bu'wili, echí mapu Lásaro riwéami níili. Echo'ná ayénachó piréali echí María riwéami mukí, echí binói rijimala Marta riwéami yuwa. ²A'lí echí María najirémami níili echí Lásaro yuwa mapu we nayú bu'wili; ayénachó echí María níili mapu uchema riwéali echí Walubela Jesusi ralálachi echí wabé su'weti júkami aceite jiti, ayénachó binói kupala jiti ku bi'wama riwéali. ³Echalí rawé echí okuá 'muguí najirémami bilé rijói júuli jerigá anénala echí Walubela Jesusi: Tamujé Walubélawala, echí rijói, Mujé amígowala ne wabé nayulú.

⁴Echalí echí Walubela Jesusi ma je'ná jerigá namsa, jeanili: Echi Lásaro ketasi mukúami tibima je'ná nayulí jiti. Échiko chopi wabé nayulú jipi rawé mapurigá pée waminánomí echí jaré pagótami riwíratami níima mapurigá Riosi ne wabé Walubela ju, ayénachó mapurigá je'ná nayulí jiti aboni riwíratami níima mapurigá Nijé Binói ne wabé Walubela ju. Nijeni biley Riosi Ranala ju.

⁵A'lí Jesusi arigá we galeli echí Marta, echí binói Marta binilá ayénachó, echí Lásaro asíchiko. ⁶Chopi mapalí Jesusi ma anélati mapurigá echí Lásaro echirigá ne wabé nayú bu'wili, echalí Jesusi abiíj osá rawé tibili echo'ná mapo'ná Binói asali. ⁷Chopi wakiná waniwínala rawé Jesusi auchecho ra'íchali echí jaré mapu

Binói binérali. Echalí jeaneli: Ma auchecho ku simabo echo'ná Juréachi anilíwachi kawírali.

⁸Chopi echí jaré mapu Binói binérali jeaneli: ¡Binériami bukulí echo'ná Juréachi piréami Juríosi pagótami wabé nakili mi basibuka mi'lináliya! ¿Áchami auchecho simináali echo'ná?

⁹Echalí Jesusi ku nijéwaga jeaneli: Ibílipi rawé pée téeripi ju. Echijiti echí pagótami chopi we 'yena mapuyénasí abijí rawé ju, mapurigá aboni ne galá machílaga, ketasi turúpama. ¹⁰Chopi a rokogó 'yénasagá aboni we turúpama mapujiti rokogó niráa ketasi galá machí. ¹¹Pe wilibeko Jesusi ayénachó jeaneli: Echi Lásaro, tamujé apanérawala ma kochili, chopi Nijeni ku busurébanama.

¹²Echalí echí jaré mapu Jesusi binérali jeaneli: Keta Walubélawa, a echí Lásaro ma kochíami níisagá, jípiko galá ku sa'wiméaré.

¹³Echalí Jesusi echirigá aneli mapujiti echí Lásaro ma mukúami níili, chopi echí auché jaré mapu Binói binérali we mayeli mapu Binói ra'íchali kochiwáami niráa.

¹⁴Echalí Jesusi ne galá machíami niráa jeaneli: Echi Lásaro ma mukuli. ¹⁵A'lí 'yemi jiti weni kaníli mapujiti Nijeni ketasi echo'ná asali, mapurigá jípitamo galá bichíibo; chopi ma simabo echo'ná echí Lásaro yuwa.

¹⁶Echalí echí Tomasi, echí mapu 'marachi anélati, échiko jeaneli echí auché jaré mapu Jesusi binérali: Mata ayénachó simabo, mapurigata ayénachó Binói yuwa waminá suwiboa.

Echi Jesusi ku o'wíntiami ju, Binói nijá echí sinibí pirélawami

¹⁷Chopi mapalí Jesusi echo'ná nawali, Binói riwali mapu ma naó chi'léami níili mapu jonsa chu'wirólati echí Lásaro. ¹⁸Echo'ná Betániachi anilíwachi ne mulubé ju echo'ná Jerusalémachi yuwa, mapuyena okuá kilómetro miná nasipa niráa. ¹⁹A'lí wikabé echí jaré Juríosi pagótami wabé natimaka 'nésiya sili echí Marta, echí María mapujiti ma mukuli aboni rijimala. ²⁰Chopi mapalí echí Marta galá machili mapu echí Jesusi ma mulubé nawásali, echalí binói natipámiya simili; chopi echí María abijí tibili echo'ná bitichí. ²¹Echalí echí Marta jeaneli Jesusi: ¡Kení Walubélawa, a mi bukulí jena'í asisáagá, ketasi mukumeli keni rijimá! ²²Chopi nijeni galá machí mapu Riosi mi 'yama ne suwaba mapu ikí Mujemi tánsagá.

²³Echalí Jesusi jeaneli: ¡Echi mujé rijimala auchecho ku bitélama!

²⁴A'lí echí Marta jeaneli: Nijeni galá machí mapu binói auchecho ku bitélama echalí ne jubá rawé, mapalí ne si'néami echí jaré suwíami ku 'owínama.

²⁵Echalí Jesusi jeaneli: Nijeni ku o'wíntiami ju, ayénachó Nijeni nijá echí sinibí pirélawami. Si'néami mapu ikí tamí bichíiko arigá ma suwisáagá, auchecho siné ku pirélama. ²⁶Ayénachó ne si'néami mapu ikí abijí piré mapu galá tamí bichíiko, aboni ke siné suwímea. ¿Áchami bichíí je'ná?

²⁷Echalí echí Marta jeaneli: ¡Ayena, keni Walubélawa, nijeni galá bichíí mapu Mujé ju echí Cristo anilíwami, mápumi echí bilepi Riosi Ranala ju, mapu ki'yá chokichí jonsa nawama riwéali jena'í wichimóbachi!

Jesusi we nalali mapujiti echí Lásaro ma mukúami níili

²⁸A'lí echí Marta ma je'ná jerigá anisáa, we yáati ku bitichí simili, echo'ná bayémiya echí binói rijimala, María riwéami. Echalí echí Marta chiná niráa jeaneli: Tamujé tamí Binériami jena'í atí. Binói tamí júuli mi bayénala.

²⁹Echalí we yáati jerigá namsa echí María we sapú wilísaka simili echí Jesusi 'némiya. ³⁰Mapujiti echí Jesusi ke cho nawali echo'ná rijówachi chopí Binói abijí tibili echo'ná mapo'ná echí Marta natépali. ³¹Echalí echí jaré Juríosi pagótami mapu natimásiya sili echí María, abijí echo'ná tibili echí María kalílachi; chopí mapalí aboni riwali mapurigá echí María echorigá we sapu wilísaka ku machínali, echalí aboni jubá najátali mayega mapu echí María echo'ná chu'wechi simea nalámiya.

³²A'lí mapalí echí María nawali echo'ná mapo'ná Jesusi asali, we yáati riwisáa, bacháami chokoba wilígá jeaneli: ¡Keni Walubélawa, a mi bukulí jena'í asisáagá ketasi mukumeli keni ríjimá!

³³Chopi mapalí Jesusi riwali echí María naláachi, ayénachó echí jaré Juríosi pagótami nalákachi, mapu echí María yuwa sili, echalí Binói wabé siwega o'mónali sulachí niráa. ³⁴Echalí Jesusi jeanigá rukueli: ¿Kúmitamo chu'wirolí? A'lí echí jaré pagótami ku nijewaga jeaneli: Walubela, wakiná simigá, galá 'ne mapo'nata chu'wirolí.

³⁵Echalí Jesusi we nalali. ³⁶A'lí echí jaré Juríosi jeanili: ¡Nibira, echí Jesusi ne wabé simírami galeli echí Lásaro!

³⁷Chopi auché jaré aboni jeanili: Je'ná mapu galá ku machíliami niwali echí ke machíliami, ¿kecha o'mérali ku'wíriya echí Lásaro mapurigá ketasi mukumée?

Jesusi ku owíntali echí Lásaro

³⁸A'lí Jesusi auchecho wabé o'mónali mapalí Binói nawali echo'ná chu'wechi. Echo'ná biléana risochí níili. A'lí echo'ná yéachi bilé walú rité 'yératami níili.

³⁹A'lí Jesusi jeaneli: ¡Waminá chakena pasi echí walú rité! Chopí echí Marta mapu rijimala níili echí mapu ma mukuli, échiko jeaneli: ¡Walubela, ma we chatí júlamaré, mapujiti ma naó chi'leli mapu jonsa mukuli!

⁴⁰Echalí Jesusi jeaneli: Ma nimí aneli mapu ami galá bichíisagá mujemi riwimea mapu Riosi ne wabé Walubela ju.

⁴¹Echalí ma chakena pálati echí rité. A'lí Jesusi ripá 'néniga Riosi yuwa ra'íchaga jeaneli: Keni Onó, walú natétara nimi 'ya mapujítimi ma galá tamí kipuli. ⁴²Nijeni galá machí mápumi sinibí tamí kipú, chópini echorigá aní mapurigá jena'í jáwami pagótami ku'wíratami níima, mapurigá aboni bichíima mapu Mujemi tamí júuli jena'í wichimóbachi.

⁴³Echalí ma je'ná jerigá anisáa, Jesusi o'weli ra'íchaga jeanili: ¡Lásaro, wakiná machina! ⁴⁴Echalí we yáati echí mapu mukúami níili ma ku machínali, chopí binói sikálachi abiji chiní jiti bulirúami níili, binói ronólachi ayénachó. A'lí binói mo'ólachi bilé wisibuli jiti bulirúami níili. Echalí Jesusi jeaneli echí auché jaré pagótami: ¡Ma ku botonasi! Ariwesi mapurigá galá ku inama.

Echi jaré Jesusi sayérami a'nagupi galá anili echí Jesusi chapiboya

(Mt. 26:1-5; Mr. 14:1-2; Lk. 22:1-2)

⁴⁵Echalí wikabé echí jaré Juríosi pagótami mapu echí María yuwa 'yénali, ma galá bichíili Jesusi niráa, mapalí aboni riwali mapurigá Jesusi ku owíntali echí Lásaro. ⁴⁶Chopi auché jaré echí Juríosi pagótami 'nébiya simíbali echí jaré Bariseo anilíwami binériami. Echalí aboni ruyeli suwaba mapurigá olali Jesusi. ⁴⁷Echalí echí jaré Bariseo ayénachó echí jaré o'wéala sacerdote bilénapi napawili ne si'néami echí auché jaré o'wéala Juríosi pagótami yuwa. Echalí aboni a'nagupi ra'íchaga

jeanili: ¿Churigá bicheta olabo? ¡Echi Jesusi wikabé namuti wabé omériga olá mapurigá ke wesi auché jaré omero olayá! ⁴⁸ Ata wi'libé rawé echirigá ariwésagá, ne si'néami pagótami bichíima Binói niráa. Echalí, siné káchichi, echi jaré o'wéala Romano nolinsa najunama tamujé ri'obáwala; ayénachó aboni ketasi waminabi tamujé tamí nirama mapurigá o'wéala niráa. ⁴⁹ Echalí bamíbali bilé rijói Kaijasi riwéami ne walubela sacerdote níili. Echalí échiko echo'ná aboni yuwa aságá janeli: 'Yémitamo tarapé galá 'nátami ju, ⁵⁰ nirapétamo machí mapu waminabi galá níima tamujé yuwa mapu pe bilé rijói waminá mukumea, echi auché jaré pagótami jiti, mapurigá ne si'néami tamujé Juríosi pagotami ketasi waminá suwábarami níibo.

⁵¹ Echalí echi Kaijasi ketasi ne binói niráa 'nátaga echirigá anili, chopi mapurigá binói ne walula Riosi sakerdótawala níili echalí bamíbali, echijiti Riosi Binói echirigá ra'ichárali, mapurigá echi Kaijasi jeanimea mapu echi Walubela Jesusi mukumea riwéali ne si'néami echi jaré Juríosi pagótami jiti. ⁵² Ayénachó mapurigá Binói ketasi mukumea riwéali echi jaré Juríosi pagótami chopi jiti, mapujiti Binói ayénachó mukumea riwéali ne si'néami echi auché jaré isena pagótami jiti, si'néami mapu ikí Riosi kúchuwala níili, mapu chijaga piréali ne suníami jena'í wichimóbachi, mapurigá ne si'néami echi jaré Riosi kúchuwala bilepi pagótami niráa níima. ⁵³ Allí echalí rawé jonsa echi jaré Juríosi pagótami o'wéalawala wabé 'nátaga ra'ichali mapu churigá chapisáa waminá mi'lirúami níima echi Jesusi.

⁵⁴ Echijiti Jesusi ma ketasi ne machiná iyénali echo'ná echi jaré Juríosi pagótami ríjowachi; chopi Binói ku simili echo'ná Juréachi anilíwachi kawírali jonsa, echo'ná biléana walúlachi Eparínachi anilíwachi yénasí mapo'ná mulipi ju echi wabé satibótami kawí. Echalí Jesusi echo'ná asali echi jaré mapu Binói binérali yuwa.

⁵⁵ Echalí mulubé sébachi níili echi jaré Juríosi pagótami omáwala mapalí echi kúuchi bo'wá ko'wílati. Echijiti wikabé pagótami ne suníami o'wéalachí piréami muyénsari echo'ná Jerusalémachi simiba. Echalí omowálawachi echi pagótami bachá niráa simíbali mapurigá galá bi'wama aboni niráa, mapurigá echi jaré Juríosi sinibí olali echo'ná walubé aboni ri'obáwalachi. ⁵⁶ Echalí echi wikabé pagótami we ali echi Jesusi echo'ná Jerusalémachi. Ayénachó mapalí aboni echo'ná walubé aboni ri'obáwalachi 'yénali, echalí a'nagupi ra'ichaga rukueli jeanigá: ¿'Yémiru churigátamo maye? ¿Acha nolínamaré omowámiya echi Jesusi? ¡Ke nolínama keremá!

⁵⁷ Echirigá anili mapujiti echi jaré o'wéala sacerdote, echi jaré Bariseo anilíwami binériami ayénachó, ma nulali mapu a jaré machisáagá maponá echi Jesusi asali, we yáa ku rumea mapurigá aboni bogogá chapimea.

Bilé mukí ucheli wabé su'weti júkami aceite echo'ná Jesusi ralálachi

(Mt. 26:6-13; Mr. 14:3-9)

12 Pée bacháñala usani rawé niráa, echalí omowálawachi rawé sebámiachi mapalí echi kúuchi bo'wá ko'wílati, echalí rawé Jesusi simili echo'ná Betániachi mapo'ná echi Lásaro bitéali, echi mapu Jesusi chabénala ku owíntali mapalí echi Lásaro ma mukúami níili. ² Echalí a'lí echo'ná piréami niwali we galabé ko'wáami echi Jesusi kóbiya, echi auché jaré Binói amígowala ayénachó. Echalí echi Marta niwali echi ko'wáami. A'lí echi Lásaro bilé níili mapu Jesusi yuwa ko'yá asali. ³ A'lí echi María mapuyena nasipa litro pali we su'weti júkami aceite mapu wabé natéami níili. Echalí echi María echo'ná Jesusi ralálachi uchesa, kepu kupá jiti ku bi'wali. A'lí echo'ná pachá kalírali buchuwí jubali echi

we su'weti júkami jiti. ⁴A'lí echi Júrasi Jiskarioti bilé rijói Simoni riwéami ranala níili. Échiko bilé níili mapu Jesusi binérali, chopi binói ayénachó níili mapu nijima riwéali echi Jesusi mapurigá echi jaré Binói asayela bologá chapimea. Echalí rawé echi Júrasi jeanili:

⁵¿Churékula ke waminá ralinéalati je'ná wabé su'weti júkami aceite mapuyena bikiyá mili peso natéami niráa, mapurigata galá 'yabo, ku'wírabiya echi jaré wabé tisúwati?

⁶Chopi echi Júrasi ketasi natimáami níili echi jaré tisúwati. Binói echirigá anili mapujiti ne wabé chigórami níili. A'lí mapujiti binói nulérami níili mapútogá inama echi maleta wenomí muchuwala mapu aboni si'néamika níwala níili, binói chiná niráa, sinibí pée o'yó niráa 'wili echo'ná muchuwásarami. ⁷Echalí Jesusi jeaneli echi Júrasi: ¡Ariwé echi mukí! Ketasi waminabi yoni, mapujiti binói bachá niráa tamí ucheli echi wabé su'weti júkami jiti, mapurigá echi pagótami tamí uchema echalí rawé mapalí Nijeni chu'wirótami níima. ⁸Ne sinibí niráa 'yemi mi yuwa muchima jaré pagótami we tisúwati, chopi Nijeko ketásini 'yémi mi yuwa asimea ne sinibí niráa.

Echi jaré Juríosi pagótami ayénachó mi'lináali echi Lásaro

⁹Echalí wikabé echi jaré Juríosi pagótami machili mapu Jesusi echo'ná Betániachi asali. A'lí aboni echo'ná simíbali mapurigá aboni galá 'nema echi Jesusi, ayénachó mapurigá aboni galá 'nema echi Lásaro, echi mapu Jesusi ku owíntali mapalí binói ma mukúami níili. ¹⁰Echalí echi jaré o'wéala sacerdote a'nagupi galá anili ayénachó mi'lináliya echi Lásaro. ¹¹Mapujiti wikabé Juríosi pagótami ma riwisáa echi Lásaro, echalí waminá ariwésali echi jaré o'wéala sacerdote mapurigá aboni chopi bichíima echi Jesusi niráa.

Jesusi ku nawali echo'ná Jerusalémachi

(Mt. 21:1-11; Mr. 11:1-11; Lk. 19: 28-40)

¹²Echalí wikabé pagótami ma bachá niráa simíbali echo'ná Jerusalémachi mapujiti omowálawachi sébachi níili mapalí echi kúuchi bo'wá ko'wílati. A'lí echi pagótami galá machili mapu Jesusi echo'ná walúlachi nawama riwéali ba'alínala rawé. ¹³Echalí echi wikabé pagótami rakú sawala ripúnaga, chapigá simíbali echi Jesusi natipábiya. Echalí aboni o'weli ra'íchaga jeanili: ¡Waminabi wabé Walubela níлага Riosi! ¡Ne wabé galabé ju je'ná Walubela Jesusi mapu Riosi jiti inaro! ¡Wabé galabé ju je'ná Jesusi mapu tamujé Isaeli pagótami silínawala ju!

¹⁴Echalí Jesusi bilé bulito riwisáa, Binói aseli, mapurigá jerigá osirúami ju echo'ná Riosi Ra'íchala oselíwalachi:

¹⁵Ketasi majasi 'yemi pagótami echo'ná Jerusalémachi piréami.

'Nesi mapurigá 'yemi walubela silínawala bilé bulito asigá inaro.

¹⁶Echalí rawé echi jaré mapu Jesusi binérali ketasi machili chu aniwáami níili mapurigá Jesusi olali, chopi pe wakinana mapalí Binói ne wabé walubératami níili, echalí aboni galá ku 'nátaga machili mapu suwaba je'ná jerigá osirúami níili, Binói jiti rugá, echo'ná Riosi Ra'íchala oselíwalachi, ayénachó mapurigá suwaba echirigá olárami níili.

¹⁷Echalí echi jaré pagótami mapu chabénala 'yénali echi Walubela Jesusi yuwa mapalí Binói echo'ná chu'wechi jonsa bayegá ku owíntali echi Lásaro mapu ma

mukúami níili, aboni bachánala ma suwaba galá ku ruyeli echi auché jaré mapurigá aboni riwali echalí rawé.¹⁸ Echijiti echi wikabé pagótami echi Jesusi natipábiya simíbali echalí rawé, mapujiti aboni ma galá machili mapurigá Jesusi echirigá wabé omériga olali, mapurigá ke wesi auché jaré omero olayá.¹⁹ Echalí echi jaré Bariseo anilíwami binériami a'nagupi jeanili: Mátamo galá machí máputamo ketasi 'me 'wérali olá echi Jesusi sayérasiya. Jipi galá 'nesi, ¡ne si'néami pagótami Binói yuwa najata!

Jaré Griego anilíwami pagótami we 'nénali echi Jesusi

²⁰ Echalí omowálawachi rawé jaré Griego anilíwami rijói ayénachó sili echo'ná Jerusalémachi mapurigá amachima echi jaré wikabé Juríosi pagótami yuwa.²¹ Echalí je'ná pe okuá rijói echo'ná sili mapo'ná echi Jiripi asali, echi mapu echo'ná Becháirachi bitéami níili echo'ná Galiléachi anilíwachi kawírali. A'lí aboni jerigá tágica anili: Jesusi 'nébota.

²² Echalí echi Jilipi ku simigá echirigá aneli echi Antresi. A'lí echi Antresi, echi Jilipi yuwa, okuánika napawika simíbali echirigá ruyébiya Jesusi Binói.²³ Echalí Jesusi ku njéwaga jeaneli: Ma sébali téitali mapalí Nijeni wabé walubératami níima. Nijeni wilárami niili mapurigá Ku'wíriami niráa.²⁴ Ne bichíwali Nijeni 'yemi mi ané mapu bilé turío rakala ke ichirúami níisagá ri'lé wi'yérali mapurigá echirigá waminá mukumea, echalí echi bilepi turío rakala galá nutétami níisagá, sinibí bilepi bi'nélipi níima, chopi ma echo'ná wi'yérali ichirúami níisagá, mapurigá echirigá waminá mukumea, echalí pe waminánomí waminabi wikabé rakema.²⁵ Echi jaré mapuyíripi chopi nakiko kaníraga piréranala mapurigá aboni waminabi olama mapurigá aboni nakí, aboni pe waminánomí arígá suwimea; chopi echi auché jaré mapuyíripi ketasi chopi nakiko echirigá kanílaga piréranaliko mapurigá aboni nakí, echi jaré mapuyíripi chopi nakiko waminabi piréranaliko jena'í wichimóbachi mapurigá aboni olama mapurigá Nijeni nakí, abóniko ne bichíwali sinibí pirélama Riosi yuwa.²⁶ A jaré tamí ku'wíranalasagá galá níima abóniko sinibí tamí yuwa najátasa. A'lí mapo'ná Nijeni asimea, echo'ná ayénachó muchima echi jaré tamí ku'wíriami. A'lí a jaré tamí ku'wíranalasagá, aboni o'wélatami níima keni Onó jiti.

Jesusi bachá niráa aní mapurigá Binói mi'lirúami níima

²⁷ Jípini ne wikabé karúmati jiti ne wabé siwega 'nátani. A'lí ¿churigani animea? ¿Áchani jeanimea: Keni Onó tamí ku'wiro mapurigani ketasi risúu olárami níima? Chopi ami je'ná jiti tamí jurásagá jena'í wichimobachi,²⁸ echalí keni Onó, chopi olá mapurigá Mujé Binói waminabi wabé walubéragera anérami níima. Echalí aboni námali mapalí Riosi Binói ripá riwigachi atíami ra'íchaga jeanili: Mani wabé walubéreri Nijé Binói niráa, chópini auchecho siné waminabi wabé walubérarama.

²⁹ Echalí echi jaré pagótami mapu echo'ná námaya jali, we yáati jeanili: ¡Wepi ri'óami níili! Auché jaré jeanili: Bilé walubela Riosi kapitánawala, Binói yuwa ra'íchaliré.

³⁰ Echalí Jesusi jeaneli: Riosi ketasi echirigá ra'íchali mapurigá Nijé bi'neli námama, chopi Binói echirigá ra'íchali mapurigá 'yemi galá námabo.³¹ Jipi jena'í wichimóbachi piréami ma wi'nijírami níima, ayénachó echi mapu walula nuláami ju jena'í wichimóbachi ma waminá machí pátami níima.³² A'lí mapalí Nijeni ri'lé wichí jonsa, ripá kúrsichi uchárami níisa, echalí Nijeni napabuma

jaré ibili pagótami mapu ikí piré ne suníami jena'í wichimóbachi, mapurigá aboni tamí yuwa níima.

³³Echalí Jesusi je'ná jerigá anigá, bachá niráa machírali mapu churigá Binói mi'lirúami níima riwéali. ³⁴Chopi echi pagótami ku nijéwaga jeaneli: Tamujeta wisabé námali 'nékowachi mapurigá osirúami ju Riosi Nulalila, mapu echi Cristo anilíwami ne sinibí niráa bitélama, chopi Mujemi aní mapu Riosi mi wilali mapurigá Ku'wíriami niráa, ayénachó mápumi ripá kúrsichi uchárami níima. ¿Chigami ju Mujé?

³⁵Echalí Jesusi ku nijéwaga jeaneli: Abijí pe téeli niráa Nijeni 'yemi mi yuwa asimea, mapurigani 'yemi mi galá machíraga olama. Echijiti kanílaga 'yensi mapuyéñasí Nijeni abijí 'yemi mi echirigá machíraga olá, mapurigátamo ketasi rokowárali niráa 'yénabo, mapujiti si'lénami mapu ikí rokowárali niráa 'yénako, ketasi machí kumi 'nalí simama. ³⁶Galá tamí bichíísi mapuyéñasí Nijeni abijí 'yemi mi echirigá machíraga olá, mapurigátamo Nijé pagótamawala niráa níibo, ne galá machíratami niráa.

Echalí ma je'ná jerigá anisáa, Jesusi chiná niráa ku simili mapurigá aboni ketasi waminabi riwimea.

**Echi jaré Juríosi pagótami ketasi omérali bichiya Jesusi
niráa, mapujiti aboni rokowárali niráa 'yénali**

³⁷Echalí echi pagótami wisabé riwali Jesusi echirigá wabé omériga oláachi mapurigá ke wesi auché jaré omero olayá, chopi aboni arigá ketasi bichíili Binói niráa. ³⁸Mapujiti echirigá arigá ikimea riwéali mapurigá osali echi walula Riosi jiti nawésami Isaíasi riwéami, mapurigá jerigá osirúami ju echo'ná Riosi Ra'íchala oselíwalachi:

Walubela, ¿chigá galá bichíili mapurigata nawésali?

¿Chigá 'nalí galá riwíratami níili echi Walubela Riosi jiti, mapu Binói Riosi ne suwaba omérami ju?

³⁹Echirigá níili mapu aboni ketasi omérali bichiyya, mapujiti echi Isaíasi ayénachó jerigá osali:

⁴⁰Riosi ke machírali aboni busila.

Ayénachó Binói waminá biwachébanali aboni sulálachi,
mapurigá aboni ma ketasi 'ninama aboni busila jiti,
ayénachó mapurigá aboni ketasi machimea sulachí niráa,
ayénachó mapurigá aboni ma ketasi ku ro'wima echi Walubela Riosi
yuwa,

mapurigá Binói galá ku wikawama aboni.

⁴¹Echi walula Isaíasi je'ná jerigá anili mapujiti binói bachá niráa riwali mapurigá Jesucristo wabé walubératami níima waminánomí, echijiti echi Isaíasi echirigá ra'íchali echi Walubela Jesucristo jiti rugá.

⁴²Echalí wikabé echi jaré Juríosi pagótami arigá galá bichíili Jesusi niráa. Jaré aboni o'wéalawala ayénachó bichíili chopi aboni ketasi machiná niráa anili mapu aboni echirigá bichíili, mapujiti aboni we majali mapurigá echi jaré Bariseo anilíwami binériami echirigá machisáa ma ketasi risénsia nijima riwéali mapurigá aboni waminabi mo'wimea echo'ná echi jaré Juríosi pagótami ri'obáwalachi. ⁴³Echi jaré o'wéala echirigá olali mapujiti aboni ne wabé nakili mapurigá echi auché jaré

pagótami anema aboni waminabi wabé o'wéala niráa, chopi aboni ketasi 'me nakili mapurigá Riosi Binói anema aboni ne wabé o'wéala niráa.

**Echi jaré pagótami ne wabé wi'nijílami níima mapalí
aboni ketasi bichíi Jesucristo Ra'íchala**

⁴⁴ Echalí Jesusi o'weli ra'íchaga jeanili: Si'néami mapu ikí tamí bichíiko, abóniko ketasi tamí bi'nélipi niráa bichíi, chopi aboni ayénachó galá bichíi Riosi Onorúami mapu tamí júuli jena'í wichimóbachi. ⁴⁵ Si'néami mapu ikí tamí ritiwako, aboni ayénachó galá ritiwá Onorúami mapu tamí júuli jena'í wichimóbachi. ⁴⁶ Nijeni mápuni galá machíraga olá echí jaré pagótami, mani nawali jena'í wichimóbachi mapurigá echí jaré mapu ikí tamí bichíiko ma ketasi tibima mapurigá ke machíami niráa. ⁴⁷ A'lí a jaré galá námsagá mapurigá Nijeni ra'icha, chopi a ketasi galá nijiyásagá, Nijeni ketasi ju mápuni wi'nijima aboni, mapujiti Nijeni ketasi wi'nijímiya nawali jena'í wichimóbachi piréami pagótami, chópini nawali mapurigani galá ku wikawama aboni. ⁴⁸ Si'néami mapu ikí tamí kichiga, ketasi nijewaga olako mapurigá Nijeni ra'íchali, aboni arígá ma wi'nijírami ju. A'lí aboni kastigo 'yárami níima echalí ne jubá rawé, mapujiti aboni ketasi nijewaga olali mapurigá Nijeni ra'íchali. ⁴⁹ Mapujiti Nijeni ketasi ra'icha mapurigá Nijé Binói chopi nakí. Echi Nijé Onolá mapu tamí júuli jena'í wichimóbachi, Binói tamí binérali mapu churigani animea, ayénachó mapu churigani binérama echí pagótami. ⁵⁰ A'lí bicheni galá machí mapu Nijé Onolá tamí nuleli echirigá binéranala echí pagótami, mapurigá aboni ne sinibí niráa pirélama. A'lí mapurigá Nijeni ra'icha, echirigani chopi ra'icha mapurigá Onorúami tamí nuleli binéranala.

Jesusi galá pabákali echí jaré mapu Binói binérali ralálachi

13 Echalí rawé níili mapalí ba'alínala sebama riwéali echí jaré Juríosi pagótami omáwala, mapalí aboni ko'yali echí kúuchi bo'wá. A'lí Jesusi galá machili mapu ma mulubé sebásali téitali mapalí Binói ma simea riwéali jena'í wichimóbachi jonsa, mapurigá Binói ku simea Onorúami yuwa. Binói Jesusi sinibí ne wabé galeli echí jaré Binói níwala jena'í wichimóbachi muchúami chopi echalí rawé Jesusi machírali aboni, mapurigá Binói ne wabé simírami galéami níili.

² Echalí echí riablo ma 'natárali echí Júrasí Jiskariote mapurigá binói níjima echí Jesusi mapurigá echí jaré Binói asayela ma mi'limea. A'lí echí Júrasí, echí Simoni Jiskariote riwéami rijói ranala níili. ³ Echalí Jesusi galá machili mapu Binói nawali jena'í wichimóbachi, mapujiti Riosi Binói nawali. Ayénachó Jesusi galá machili mapurigá Binói auchecho ku simea riwéali Riosi yuwa. Ayénachó Binói galá machili mapurigá Onorúami ma wilali Binói ne bachá wilíami Walubela niráa. ⁴ Echalí a'lí mapalí aboni ko'yá muchili, echí Walubela Jesusi ku wilísaga waminá 'yeli bilé wi'llí napacha móbala chukúami. A'lí chapisáa bilé chiní bí'walíwami galá buleli echo'ná Binói umílachi. ⁵ Echalí Binói ro'wali ba'wí echo'ná biléana walú bitólachi. A'lí Binói chótali pabákiya echí jaré mapu Binói binérali ralálachi. Echalí Binói ku wakichébanali echí chiní jiti mapu Binói umílachi buleli.

⁶ Chopi mapalí Jesusi ma pabákama riwéali echí Simoni Pegro ralálachi, echalí échiko jeanigá rukueli: Walubela, ¿Mujéchami pabákama tamí ralálachi?

⁷Echalí Jesusi ku nijéwaga jeaneli: Jipi mujemi tarapé machí mapu churékula Nijeni je'ná jerigá olá, chópimi galá machimea pe waminánomí.

⁸Echalí echí Pegro jeaneli: ¡Nijeni ke siné nimí nakíima mápumi tamí pabákama nijé ralálachi! Chopi Jesusi ku nijéwaga jeaneli: A Nijeni ketasi mi pabákasagá, mujemi ma ketasi oméraoma tamí yuwa níliya.

⁹Echalí echí Simoni Pegro we yáati jeaneli: Kení Walubélawa, ketasi chopi pabaki nijé ralálachi. ¡Ayénachó pabaki nijé sikálachi, nijé mo'ólachi!

¹⁰Echalí Jesusi jeaneli: Mapalí jaré pagótami bukulí 'tíbalikó, echalí chopi 'wérali ju mapu aboni waminá pabákama aboni ralálachi, mapujiti aboni ma galá bi'wíami ju. Alí 'yemi ma galá bi'wíami ju, chopi ketasi ne si'néami.

¹¹Echalí Jesusi echirigá anili mapu ketasi, ne si'néami bi'wíami níili, mapujiti Binói galá machili mapu chigá 'nalí aboni waminá nijima riwéali Binói, mapurigá echí jaré Binói asayela waminá mi'limea.

¹²Pe wilibeko mapalí Jesusi ma sunili pabákiya si'néami aboni ralálachi, echalí Binói auchecho ku napachassa, auchecho asíbali echo'ná mapo'ná aboni ko'yá muchili. Echalí Binói jeaneli: ¿Áchatamo galá machí mapurigá Nijeni 'yemi mi olali?

¹³'Yémitamo sinibí tamí jeané: ¡Binériami! Ayénachótamo tamí jeané: ¡Walubela! Alí ne galá ju máputamo echirigá tamí anebo, mapujiti Nijeni ne bichíwali 'yemi mi Binériami ju, ayénachóni 'yemi Walubélawa ju. ¹⁴A'lí Nijeni mápuni 'yemi mi Binériami ju, ayénachó mápuni 'yemi Walubélawa ju, Nijeni ma 'yemi mi pabákali 'yemi ralálachi. Echijiti galá níima 'yemi aboni ayénachó a'nagupi niráa pabákasa 'yemi aboni ralálachi. ¹⁵Mapujiti Nijeni bachá niráa echirigá olali mapurigá 'yémitamo ayénachó achigórigá olabo mapurigá Nijeni olali. ¹⁶Ne bichíwali Nijeni 'yemi mi ané mapu ke wesi pióntami ne wabé o'wéala ju, chopi echí nuráami mapu galá nulé echí jaré pióntami, échiko waminabi wabé simírami walubela ju, ketasi mapurigá echí jaré pióntami. ¹⁷Átamo galá machisáagá je'ná jeyiri namuti, we kaníliami níbotamo, átamo ayénachó echirigá olásagá.

¹⁸Nijeni ketasi echirigá anili ne si'néami 'yemi jiti rugá. Nijeni galá machí mapu chigá ju echí jaré mapu Nijeni chapili. Chopi arígá 'wérali ju mapu je'ná jerigá ikímea, mapurigá echo'ná Riosi Ra'íchala oselíwalachi osirúami ju jeanigá: Echi mapu tamí yuwa ko'wako, échiko wabé tamí sayérali. ¹⁹Nijeni 'yemi mi echirigá ané ne bachá niráa, ke cho echirigá ikíichi, mapurigá pe waminánomí mapalí ne bichíwali echirigá ikímea, echalítamo ne galá bichíwali mapu Nijeni bilepi Riosi Ranala ju. ²⁰Echalí Jesusi waminabi jeaneli: Ne bichíwali Nijeni 'yemi mi jeané: Si'néami mapu ikí galá narigako echí mapu Nijeni julama aboni yuwa, aboni ne bichíwali tamí narigá; ayénachó si'néami mapu ikí tamí narigako, abóniko ayénachó narigá Onorúami mapu tamí júuli jena'í wichimóbachi.

**Jesusi bachá niráa anili mapu echí Júrasi níili mapu nijima riwéali Binói Jesusi
mapurigá Binói waminá mi'lirúami níima**

(Mt. 26:20-25; Mr. 14:17-21; Lk. 22:21-23)

²¹Ma je'ná jerigá anisáa, Jesusi we siwega o'mónali sulachí niráa. Echalí Binói ne machíami niráa jeaneli: Ne bichíwali Nijeni 'yemi mi ané mapu bilé 'yemi tamí nijima mapurigá echí jaré Nijé sayela tamí mi'limea.

²²Echalí si'néami echí jaré mapu Jesusi binéralli chótali a'nagupi 'nena mapujiti aboni ketasi machili mapu chigá jiti rugá ra'íchali echí Jesusi. ²³Echalí bilé rijói

mapu Jesusi binérali, mulubé niráa Binói yuwa ko'yá asali, echi mapu Jesusi wabé galeli.²⁴ Echalí echi Simoni Pegro kepu siká jiti galá riwírataga ruyeli mapurigá echi rijói galá rukuema Jesusi mapu chigá 'nalí rugá anili.²⁵ A'lí echi rijói mulubé áami chukúbaga mapo'ná Jesusi asali, echalí rukueli jeanigá: Walubela, ¿chigá ju echi?

²⁶ Echalí Jesusi ku nijewaga jeaneli: Pe taa pani pagueka, Nijé 'yama echi mapu tamí nijima mapurigani mi'lirúami níima. A'lí ma pagueka echi pani, we yáati 'yali echi Júrasi Jiskariote, echi mapu Simoni Jiskariote ranala níili.²⁷ A'lí mapalí echi Júrasi ma chapili echi pani, echalí jonsa binói chopi nulérami níili pachana binói sulálachi niráa, echi Satanasi anilíwami riablo jiti. Echalí Jesusi jeaneli echi Júrasi: ¡We yáati olá mapurigami olama!

²⁸ Chopi echi jaré echo'ná ko'yá muchúami ke wesi galá machili mapu churékula Jesusi echirigá aneli.²⁹ Chopi mapujiti echi Júrasi nulérami níili togá inánala aboni níwala wenomí muchuwala maleta, echijiti jaré ibili mayeli mapu Jesusi echirigá aneli mapujiti Binói nakili mapurigá echi Júrasi simea ralimeya karúmati mapu ikí aboni newaleli echalí omowálawachi, mapurigá binói 'yama jaré wenomí echi jaré tisúwati kérémá.³⁰ Chopi mapalí echi Júrasi ma ko'wali echi pani, echalí we yáati binói ma ku machínali echo'ná pachá jonsa, chopi ma wi'libeka rokogó níili.

Echi bukulíwami nulalíwami

³¹ Echalí ma machinsa echi Júrasi, echi Walubela Jesusi jeanili: Jipi jena'í wichimóbachi piréami pagótami ma galá riwíratami ju mapurigá Nijeni ne wabé Walubela ju. Nijeni wilárami níili mapurigá Ku'wíriami niráa; ayénachó Nijeni galá riwílata echi pagótami mapurigá Riosi Onorúami ne wabé Walubela ju.³² A'lí a Nijeni riwírasagá echi pagótami mapurigá Riosi Onorúami ne wabé Walubela ju, echalí Riosi Onorúami galá riwírama echi pagótami mapu Nijeni wabé Walubela ju. A'lí Riosi ke 'me ayó echirigá olama. Nijeni wilárami níili mapurigá Ku'wíriami niráa.³³ Yémitamo mapurigá Nijé kúchuwala niráa ju, chopi Nijeni ma ketasi wi'libé rawé asimea 'yemi yuwa. Pe waminánomí 'yémitamo tamí abo, chopi mapurigá Nijeni ma aneli echi jaré Juríosi pagótami, jipi Nijeni ayénachó 'yemi mi echirigá ané, máputamo ketasi omérabo simiba echo'ná mapo'ná Nijeni simea.³⁴ Bukulíwami niráa Nijeni 'yemi mi jerigá nulé: Máputamo a'nagupi niráa wabé galebo. Achigórigá mapurigá Nijeni 'yemi mi wabé galé, echirigá galesi 'yemi a'nagupi.³⁵ Jena'í wichimóbachi piréami pagótami galá machimea mapu Nijeni 'yemi mi binérali, átamo echirigá a'nagupi galésagá.

Jesusi bachá niráa aní mapu echi Pegro 'yékaka animea mapu binói ketasi machili echi Jesusi

(Mt. 26:31-35; Mr. 14:27-31; Lk. 22:31-34)

³⁶ Echalí echi Simoni Pegro jeanigá rukueli: Kení Walubélawa, ¿kumi mi simea? A'lí Jesusi ku nijewaga jeaneli: Jipi mujemi ketasi oméraama tamí najátaga simiyá echo'ná mapo'ná Nijeni simea, chopi pe waminánomí mujemi ayénachó echo'ná simea.

³⁷ Echalí echi Pegro jeaneli: Kení Walubélawa, ¿churékola nijeni ke oméraama jipi mi najata? ¡Nijeni ma karigá atí mapurigani mukumea mi jiti!

³⁸ Echalí Jesusi ku nijéwaga jeaneli: ¿Áchami ne bichíwali karigá atí mapurigami tamí jiti mukumea? Ne bichíwali Nijeni mi ané mapu jipi rokogó, ke cho kusúwachi echí tolí, mujemi baisá chokéami 'yékaka animea mápumi ketasi tamí machí.

Echi Walubela Jesucristo ju echí Buwé, echo'ná ripá riwigachi burúami

14 Echalí Jesusi jeaneli echí jaré mapu Binói binérali: Ketasi siwesi kétamo sulachí. Galá bichíisi Riosi. Tamí ayénachó galá bichíisi. ²Echo'ná keni Onó bitélachi wikabé kalí nirú. A ketasi echirigá níisagá, Nijeni ma 'yemi mi echirigá anemi, mapujiti Nijeni echo'ná simea, 'yemi pirélachi a'láramiya. ³A'lí mapalí Nijeni ma bachá a'láramiya simisáa 'yemi pirélachi, waminánomí Nijeni auchecho siné ku nolínama mapurigá Nijeni 'yemi mi echo'ná bayérama, mapurigá 'yémítamo ayena echo'ná muchibo mapo'ná Nijeni asimea. ⁴A'lí 'yémítamo galá machí mapo'ná Nijeni simea, ayénachótamo galá machí echo'ná burúami.

⁵Echalí echí Tomasi jeaneli: Walubela, tamujeta ketasi machí kumi mi simea. ¿Churigata biche machiboa echo'ná burúami?

⁶Echalí Jesusi ku nijéwaga jeaneli: Nijeni ju echí buwé echo'ná ripá riwigachi burúami, ayénachó Nijeni ju echí ne bichíwali, ayénachó Nijeni nijá mapurigá echí pagótami sinibí pirélama. A'lí a ketasi tamí jiti simisáagá, ke wesi omérama echo'ná nawayá mapo'ná Onorúami atí. ⁷Átamo tamí machisáagá, ayénachótamo machibói echí keni Onó. A'lí jipi jonsa 'yémítamo galá machí echí keni Onó, mapujítitamo ma tamí riwali.

⁸Echalí echí Jiripi jeaneli: ¡Perikó risensia, tamujeta galá 'nebo Onorúami! Alíkota galá nilabo.

⁹A'lí Jesusi jeaneli echí Jilipi: Mani wi'llibé rawé asali 'yemi mi yuwa. ¿Kéchami cho tamí galá machí? ¡Echi mapu tamí ritiwako, échiko ma ritiwá Onorúami! ¿Churékola echaní mujé: Perikó risensia, tamujeta 'nebo Onorúami? ¹⁰¿Kéchami bichíi mapu Nijé echí Onorúami yuwa ju, ayénachó mapu Onorúami tamí yuwa ju? Echirigá mapurigá Nijé 'yemi mi ra'icha, ketásini echirigá ra'icha, Nijé Binói chopi niráa. Echi Onorúami mapu tamí yuwa pachana Nijé sulálachi atí, Binói wabé omériga olá mapurigá Binói nakí. ¹¹Galá tamí bichíisi mapurigani anili mapu Nijeni echí Onorúami yuwa ju, ayénachó mapu Onorúami tamí yuwa pachana Nijé sulálachi atí. A'lí átamo ketasi galá tamí bichíisagá echí Nijé ra'íchala jiti mapurigá Nijeni ra'íchali, arígá tamí bichíisi mapujiti Nijeni ma wisabé wabé omériga olali mapurigá ke wesi auché jaré omero olayá. ¹²Ne bichíwali Nijeni 'yemi mi jeané: Si'néami mapu ikí tamí bichíiko, abóniko achigórígá wabé omériga olama mapurigá Nijeni olá; ayénachó aboni waminabi simírami wabé omériga olama mapujiti Nijeni simea echo'ná mapo'ná Onorúami atí. ¹³A'lí ne suwaba mapu yíripi 'yémítamo tánsagá Onorúami, mapujítitamo galá tamí bichíi, echirigá Nijeni olama mapurigá echirigá ologá Nijeni riwírama mapu Riosi Onorúami ne wabé Walubela ju. ¹⁴Mapuyíripi 'yémítamo tánsagá Riosi mapujítitamo galá tamí bichíi, echirigani olama Nijé.

Jesusi bichíwaga anili mapu Binói julama echí Wabé Galabé Riosi Iwigala jena'í wichimóbachi

¹⁵ Átamo tamí galésagá, galá nijéwaga olasi mapurigá Nijeni 'yemi mi nuleli. ¹⁶A'lí Nijeni we tánama Onorúami mapurigá Binói 'yemi mi yuwa julama auché Bilé wabé galéami Nigúurami, mapurigá échiko sinibí 'yemi mi yuwa asimea. Échiko echí

Wabé Galabé Riosi Iwigala niima, mapu ne bichíwami ju. ¹⁷Echi auché jaré jena'í wichimóbachi piréami ketasi omérama nalea echi Galabé Riosi Iwigala, mapujiti aboni ketasi oméro 'nénuya, nirapé omero machiyá echi Galabé Riosi Iwigala; chopi 'yémítamo ma galá machí Riosi Iwigala mapujiti Binói 'yemi yuwa atí, a'lí Binói sinibí 'yemi yuwa tibima echo'ná pachana 'yemi sulálachi niráa. ¹⁸Nijé ketasi 'yemi mi awínali waná ariwema. Auchecho sineni ku nolínama mapurigani 'yemi mi yuwa asimea. ¹⁹Pe waminánomí echi auché jaré jena'í wichimóbachi piréami pagótami ma ketasi tamí riwimea, chopi 'yémítamo galá tamí riwiboa. A'lí 'yémítamo sinibí pirélabo mapujiti Nijeni sinibí bitéami ju. ²⁰Echalí rawé 'yémítamo galá machiboa mapu Nijé, echi keni Onó yuwa ju, ayénachótamo machiboa mapu Nijeni 'yemi mi yuwa pachana 'yemi sulálachi atí. ²¹Si'néami mapu ikí ma galá machigá mapurigá Nijeni nulá, a'lí echirigá galá nijéwaga olako, abóniko echirigá ologá ne galá riwírata echi auché jaré mapu aboni ne bichíwali tamí galé. A'lí Keni Onó we galema echi jaré mapu tamí galeko, ayénachó Nijé Binói we galema aboni. A'lí Nijeni echo'ná aboni yuwa nawama mapurigá aboni galá tamí riwimea.

²²Echalí echi auché bilé Júrasí, ketasi echi Jiskarioti, jeaneli: Walubela, ¿churékola tamujé tamí yuwa nawama mapurigá tamujeta mi riwiboa, chópimi ketasi nawama echi auché jaré yuwa, si'néami mapu ikí ketasi mi galeko?

²³A'lí Jesusi ku nijéwaga jeaneli: Si'néami mapu ikí tamí galeko, aboni galá nijéwaga olá mapurigá Nijé aní. A'lí echi keni Onó wabé galema aboni. A'lí echi keni Onó, Nijeni ayénachó, okuaka nolínaga echo'ná pachana aboni sulálachi pirélabo. ²⁴Si'néami mapu ikí ketasi tamí galeko, abóniko ketasi nijéwaga olá mapurigá Nijé aní. A'lí Nijé nawésawala, mapurigátamo jipi galá nama muchuwi, ketasi Nijé Binói nawésawala ju, chopi Onorúami nawésawala ju mapu tamí júuli jena'í wichimóbachi.

²⁵Jipi Nijeni 'yemi mi suwaba je'ná jerigá ané mapuyénasí Nijeni abijí 'yemi mi yuwa atí. ²⁶Chopi pe waminánomí Onorúami tamí jiti julama echi Wabé Galabé Riosi Iwigala echo'ná pachana 'yemi sulálachi, mapurigá echi Galabé Riosi Iwigala 'yemi mi wabé natimaga ku'wírama. Echalí Riosi Iwigala 'yemi mi binérama suwaba namuti; ayénachó Binói 'yemi mi anchecho galá ku machíratama mapu ikítamo ke newalali mapurigá Nijeni 'yemi mi aneli.

²⁷Mani 'yemi mi ripórama, chopi Nijeni 'yemi mi 'ya máputamo kilí niráa ologá pirélabo. A'lí Nijeni ketasi achigórígá nijá, mapurigá echi auché jaré jena'í wichimóbachi piréami 'yemi mi kanílatanali. Ketasi siwesi ketamo sulachí, nirapé majasi. ²⁸'Yemi mátamo námali mapurigá Nijeni 'yemi mi aneli, mapu Nijeni ma ku simea, ayénachó mapu pe waminánomí Nijeni anchecho siné ku nolínama jena'í mapo'ná 'yemi muchuwi. Átamo ne bichíwali tamí galésagá 'yémítamo ne wabé kanílabo, ma machigá mapu Nijeni simea Onorúami yuwa, mapujiti echi Onorúami ne wabé simírami Walubela ju, ketasi mapurigá Nijé. ²⁹Jipi ke cho echirigá ikíichi, Nijeni bachá niráa 'yemi mi aneli mapurigá pe waminánomí ne bichíwali echirigá ikímea, mapurigá echalí ma echirigá ikíichi, 'yémítamo galá tamí bichíibo.

³⁰Ma ketásini waminabi wi'lí ra'ichama 'yemi mi yuwa, mapujiti echi riablo, mapu we nulé jena'í wichimóbachi piréami pagótami, ma mulubé inaro. Chopi Nijeni waminabi wabé simírami omérami ju. Echi Riablo ketasi tamí omérama. ³¹Chopi arigá 'wéráli ju mapu echirigá ikímea, mapurigá jena'í wichimóbachi piréami

pagótami galá machimea mapu Nijeni we galé Onorúami, ayénachó mapurigá aboni galá machimea mapu Nijé we olá mapurigá Onorúami tamí nuleli olánala. Ma jáasi. Mata simabo jena'í jonsa.

Echi uva anilíwami rakéami namuti

15 Echalí Jesusi jeaneli: Nijeni ju echí ne bichíwali uva anilíwami rakéami namuti. A'lí echí Nijé Onorá mapurigá bilé rijói ju echí uva icháami.² A'lí echí keni Onó waminá ripuna ne suwaba echí jaré Nijé níwala uva otowala mapu ikí ketasi galá rakeko. Chopi mapalí echí auché jaré otowala galá rakeko, echí keni Onó waminá 'ye echí jaré wikabé napawika jáwami kúuchi otowala mapurigá ibili galá rakéami otowala echirigá jaré ibili 'yeka galabélatami níima, mapurigá suwaba echí jaré galabé otowala waminabi wikabé rakema.³ 'Yémítamo ma galabératami ju mapurigá echí jaré otowá mapu Nijé Onolá jaré ibili 'yeka galabérali, mapujítitamo echirigá galabélatami níili Nijé Ra'íchala jiti mapalí Nijeni 'yemi mi binérali.⁴ Sinibí tamí yuwa napawika níisi, mapurigá Nijeni sinibí 'yemi mi yuwa napawika ju. Bilé otowá ketasi omérama rakéa bi'neli otowá niráa, a ketasi napawika níisagá echí ronola yuwa. Echirigá achigórigá 'yémítamo ketasi omérabo galabé olayá, átamo ketasi sinibí tamí yuwa napawika níisagá.

⁵ Nijeni ju echí uva anilíwami ronola. A'lí 'yémítamo echí jaré otowala ju. Si'néami 'yémi máputamo sinibí tamí yuwa napawika tibiko mapurigá echí jaré otowala napawika nachuka tibí echí uva ronola yuwa, 'yémítamo ne wabé galabé oláami níibo. A'lí 'yémítamo ketásirapé chirigá omérabo galabé olayá a ketásitamo tamí yuwa níisagá.⁶ A'lí echí auché jaré mapu ketasi napawika tibiko tamí yuwa, abóniko waminá machí a'wátami níima. Echalí échiko waminá suwibama mapurigá echí jaré otowala ripunárami, mapu ma napabuka suwaba na'árami níima.

⁷ Átamo sinibí tamí yuwa napawika níisagá, ayénachó átamo sinibí galá 'natásagá mapurigá Nijeni 'yemi mi binérali, echalí tansi mapuyíripi 'yémítamo nakí, a'lí bichétamo echirigá 'yárami níibo.⁸ Echi keni Onó waminabi wabé Walubela anérami níima mapalí 'yémítamo we galabé olá, ayénachótamo echirigá ologá galá machílatabo echí auché jaré mapu 'yémítamo ne bichíwali tamí yuwa binéami ju.⁹ Nijeni 'yemi mi ne wabé galé achigórigá mapurigá Onorúami tamí wabé galé. Sinibí tamí yuwa níisi, mapujiti Nijeni 'yemi mi echirigá wabé galé.¹⁰ Átamo nijiyásagá mapurigá Nijeni nulá, echalí Nijeni waminabi 'yemi mi galema mapurigani sinibí 'yemi mi galé, achigórigá mapurigá Nijeni sinibí nijéwaga olá mapurigá Kení Onó tamí nulé, a'lí keni Onó sinibí waminabi tamí galé.

¹¹ Nijeni 'yemi mi je'ná jerigá ané mapurigátamo wabé kanílabo tamí yuwa, ayénachó mapurigátamo echirigá waminabi ne wabé simírami kanílabo.¹² Nijeni 'yemi mi je'ná jerigá nulé: Mapurigátamo a'nagupi ne wabé galebo, achigórigá mapurigá Nijé 'yemi mi galé.¹³ Ke wesi waminabi wabé simírami galéami ju ketasi mapurigá bilé rijói mapu ku'wíraga mukuli mapujiti binói wabé galeli binói amígowala.¹⁴ 'Yémítamo Nijé amígowala ju, átamo galá nijéwaga olásagá mapurigá Nijeni 'yemi mi nulé.¹⁵ Mani ketasi 'yemi mi anema pióntami niráa, mapujiti echí jaré pióntami ketasi galá machí mapurigá aboni walúrawala olá. Chopi Nijeni 'yemi mi anema Nijé amígowala niráa mapujiti Nijeni ma 'yemi mi machírali ne suwaba mapu ikí Nijé Onolá tamí aneli.¹⁶ 'Yémítamo ketasi tamí chapili, chopi Nijeni 'yemi mi bachá chapili; ayénachó Nijeni 'yemi mi jáwali mapurigátamo simíbaga, wabé

galabé olabo, achigórigá mapurigá echi jaré otowala ne galabé niráa raké. A'lí Nijeni nakí mapu 'yémítamo chopi olabo mapurigá Riosi 'yemi mi nulé, mapujiti echiyiri oluławami ketasi waminá suwábarami níima. A'lí átamo echirigá olásagá, echi keni Onó 'yemi mi 'yama ne suwaba mapu ikítamo tani, mapujítitamo galá tamí bichíi. ¹⁷Je'ná ju mapurigá Nijeni 'yemi mi nulé: Mapurigátamo a'nagupi ne wabé galebo.

Jena'í wichimóbachi piréami ne wabé kichí echi Jesusi

¹⁸A'lí a 'yemi mi kichísagá jena'í wichimóbachi piréami, galá machisí mapu bachá niráa aboni tamí wabé kichili. ¹⁹Chopi a 'yémítamo achigórigá olásagá mapurigá echi auché jaré jena'í wichimóbachi piréami olá, echalí aboni 'yemi mi wabé galemi, mapujiti aboni ne wabé galé si'néami mapu ikí achigórigá olá mapurigá aboni olá. Nijeni ma 'yemi mi chapili ibili niráa mapalítamo piréali echi auché jaré jena'í wichimóbachi piréami yuwa, echijiti echi auché jaré jena'í wichimóbachi piréami 'yemi mi ne wabé kichí, mapujítitamo ketasi achigórigá olá mapurigá aboni olá. ²⁰Galá newalasi mapurigá Nijeni 'yemi mi jeaneli: Ke wesi pióntami ne wabé o'wéala ju, chopi echi nuláami mapu galá nulé echi jaré pióntami, échiko waminabi wabé walubela ju ketasi mapurigá echi jaré pióntami. A'lí mapujiti aboni ma tamí wabé kichiga a'najátali, echijiti aboni ayénachó 'yemi mi wabé kichiga a'najátama. A'lí mapujiti aboni ketasi tamí nijewali mapurigá Nijeni binérali, echijiti aboni ketasi cho 'yemi mi nijewama mapurigá 'yémítamo binérabo. ²¹A'lí aboni 'yemi mi suwaba je'ná jerigá risúu olama mapujítitamo galá tamí bichíi, mapujiti aboni ketasi machí echi Onorúumi mapu tamí júuli jena'í wichimóbachi.

²²A'lí a Nijeni ketasi nawásagá jena'í wichimóbachi ra'íchamiya aboni, echalí aboni ketasi chokila níima mapurigá aboni ma chati olali; chopi jipi aboni arigá chokila ju, mapurigá aboni chati olali. ²³A'lí si'néami mapu ikí tamí kichíko, aboni ayénachó we kichí echi keni Onó. ²⁴Ayénachó a Nijeni ketasi wisabé wabé omérida olásagá echo'ná bacháami aboni yuwa mapurigá ke wesi auché jaré omero olayá, echalí aboni ketasi wi'nijírami níimi mapurigá aboni chati olali, chopi aboni ma riwali mapurigá Nijeni olali. A'lí aboni arigá tamí wabé kichí, ayénachó aboni wabé kichí echi Nijé Onolá. ²⁵Chopi jipi echirigá ikí mapujiti arigá 'wérali níili mapu echirigá ikimea, achigórigá mapurigá bachá niráa je'ná jerigá osirúumi níili echo'ná aboni nulalila oselíwalachi, jeanigá: Tarapé chibi yiri jiti, aboni wabé tamí kichili.

²⁶Chopi mapalí nolinsa echi ne bichíwami Galabé Riosi Iwigala, echi mapu 'yemi mi wabé ku'wíraga natimama, Échiko 'yemi mi ra'íchama tamí jiti rugá. A'lí Nijeni 'yemi mi yuwa julama echi Galabé Riosi Iwigala mapujiti Onorúumi echirigá tamí nuleli. ²⁷Echalí 'yémítamo ayénachó tamí jiti rugá nawisabo, mapujiti 'yémítamo chabé chokichí jonsa tamí yuwa muchili.

16 Jipi Nijeni 'yemi mi je'ná jerigá ané mapurigátamo ketásirapé siwega 'natabo echalí echirigá ikíichi, chopi mapurigátamo arigá waminabi galá tamí bichíibo. ²Echalí echi jaré Nijé sayela ketasi risénsia 'yama mapurigá 'yémítamo waminabi mo'wiboa echo'ná pachá aboni ri'obáwalachi; ayénachó pe waminánomí mapuyíripi aboni 'yemi mi waminá ko'wisáagá, we mayema mapu aboni chopi olá mapurigá Riosi nakí, mapalí aboni 'yemi mi ko'yá. ³Echalí aboni echirigá olama mapujiti aboni ke siné machili Onorúumi, nirapé tamí

machili. ⁴Chopi Nijeni 'yemi mi je'ná jerigá ané mapurigá mapalí seba echalí rawé 'yémitamo galá 'nátaga newalabo mapurigá Nijeni ma 'yemi mi bachá niráa aneli suwaba je'ná jeyiri.

Mapurigá echí Galabé Riosi Iwigala we olá

Chabé chokichí Nijeni ketasi 'yemi mi je'ná jerigá aneli mapujiti Nijeni 'yemi yuwa asali. ⁵Chopi Nijeni ma ku simea mapurigani Onorúami yuwa asimea, mapu tamí júuli jena'í wichimóbachi. A'lí ke wesi 'yemi tamí rukué mapu kúmini simea. ⁶Chopi 'yémitamo ne wabé o'mónali mapujiti Nijeni 'yemi mi je'ná jerigá aneli. ⁷Nijeni 'yemi mi ne bichíwali jeané: A Nijeni ku simisáagá, waminabi wabé galabé níima 'yemi 'nalina. Mapujiti a Nijeni ketasi ku simisáagá, echalí ketasi nolínama echo'ná 'yemi yuwa echí Wabé Galabé Riosi Iwigala, echí mapu 'yemi mi wabé ku'wíraga natimama; chopi a Nijeni ku simisáagá, echalí Nijeni julama echí wabé Galabé Riosi Iwigala echo'ná 'yemi yuwa. ⁸A'lí mapalí echí Galabé Riosi Iwigala nawasa, échiko we galá machílatama echí jaré pagótami jena'í wichimóbachi piréami mapu aboni we chatí oláami ju; ayénachó machílatama mapurigá Riosi nakí mápu aboni chopi galabé wachíniga ologá pirélama, ayénachó machílatama mapu Riosi pe waminánomí walú kastigo 'yama echí jaré chatí oláami pagótami. ⁹Aboni wabé chatí oláami ju mapujiti aboni ketasi tamí bichíi. ¹⁰A'lí aboni galá machimea mapurigá Nijeni galabé wachíniga ologá bité, mapujiti Nijeni ma ku simea mapo'ná Onorúami atí. A'lí 'yémitamo ma ketasi tamí auchecho riwiboa. ¹¹A'lí aboni galá machimea mapu Riosi walú kastigo 'yama echí jaré chatí oláami pagótami mapujiti echí riablo mapu we nulé jena'í wichimóbachi piréami, ma ne bichíwali wi'nijírami ju.

¹²Nijeni abijí waminabi wikabé namuti 'yemi mi anénali, chopi jípitamo 'yemi ketasi omérabo machiyá. ¹³Pe waminánomí mapalí nolinsa echí ne bichíwali Wabé Galabé Riosi Iwigala, Échiko 'yemi mi binérama suwaba echí ne bichíwali, mapujiti Échiko ketasi ra'ichama mapurigá binói chopi nakí. Echi Wabé Galabé Riosi Iwigala chopi ra'ichama mapurigá Binói gala nami aníachi Onorúami, ayénachó Binói 'yemi mi galá machílatama suwaba mapu ikí ikimea waminánomí. ¹⁴Echi Galabé Riosi Iwigala tamí waminabi walubéraga anema, mapujiti Binói ma tosá Nijé níwala namuti, 'yemi mi machílatama. ¹⁵Ne suwaba namuti mapu ikí Onorúami níwala ju, échiko ne suwaba ayénachó Nijé níwala ju. Echijiti Nijeni anili mapu echí Galabé Riosi Iwigala ma tosá Nijé níwala namuti, 'yemi mi galá machílatama.

Echi jaré mapu o'mónami ju pe waminánomí we kanílatami níima

¹⁶Echalí Jesusi waminabi jeaneli: Pe ke 'me ayó 'yémitamo ma ketasi tamí riwiboa, chópitamo auchecho ke 'me ayó yáati tamí riwibóatamo, mapujiti Nijeni echo'ná simea mapo'ná Onorúami atí.

¹⁷Echalí jaré mapu Jesusi binérali a'nagupi rukueli jeanigá: ¿Chu aniwáami ju je'ná mapurigá Binói tamujé tamí ané? Mapujiti jeaní mapu pe ke 'me ayó tamujeta ma ketasi riwiboa echí Binói, ayénachó máputa auchecho ke 'me ayó yáati ku riwibóata, mapujiti Binói echo'ná simea mapo'ná Onorúami atí. ¹⁸¿Chu aniwáami ju je'ná mapu Binói jeaní mapu ke 'me ayó tamujeta ma ketasi riwiboa Binói? Tamujeta ketasi machí mapu piri jiti Binói echirigá ra'icha.

¹⁹Echalí echí Walubela Jesúsi galá machili mapu aboni echirigá rukuénali. Echijiti Binói jeaneli: Nijeni 'yemi mi aneli mapu pe ke 'me ayó 'yémitamo ma ketasi tamí riwiboa, chopi máputamo auchecho ke 'me ayó, yáati tamí riwiboa. ¿Áchatamo je'ná jiti a'nagupi ra'íchaga rukué? ²⁰Nijeni ne bichíwali 'yemi mi ané mapu 'yémitamo wabé nalákaka o'monabo, chopi echí auché jaré jena'í wichimóbachi piréami pagótami ne wabé kanílama. A'lí mapalí 'yémitamo echirigá o'monabo, pe waminánomí 'yémitamo auchecho wabé ku kanílatami níibo. ²¹Echalí Jesúsi waminabi jeaneli: Mapalí biré mukí ranamea bilé táa binói ranala, echalí echí mukí ne wabé okolá mapujiti ma sébali binói tétawala, chopi ma nawárasha echí táa múchali echalí echí mukí ma ketasi ku newalá mapurigá ne wabé okoli, chopi ne wabé kanílama mapujiti ma ranali binói ranala jena'í wichimóbachi. ²²'Yémitamo ayénachó echirigá achigórigá ne wabé risíu níilaga o'mona jipi, chopi Nijeni auchecho siné 'yemi mi ku riwimea. Echalí 'yemi ne wabé simírami kanílabotamo pachana 'yemi sulálachi niráa, mapuyénasí ke wesi omérama 'yee echí wabé kanílawami.

²³Echalí rawé 'yemi ma ketasi biyiri tamí rukuébotamo. Ne bichíwali Nijeni 'yemi mi jeané mapu Onorúami 'yemi mi 'yama ne suwaba mapu ikítamo taní mapujítitamo tamí bichíi. ²⁴Chopi jipi yénasí 'yémitamo ketasi cho biyiri echirigá tánali Onorúami mapujítitamo tamí bichíi. Jipi jonsa galá tansi echirigá, mapujítitamo ma galá tamí bichíi. A'lí bichétamo echirigá narepo, mapurigátamo ne wabé simírami kanílabo.

Jesucristo ketasi nijéwaga olali mapurigá jena'í wichimóbachi piréami olá, echijiti Binói ma niyúrali

²⁵Echalí Jesúsi waminabi jeaneli: Nijeni 'yemi mi je'ná jerigá irétaga nawésali, chopi pe waminánomí Nijeni ma ketasi 'yemi mi echirigá irétaga nawésama. Echalí Nijeni 'yemi mi ne galá machíami niráa ruyema Onorúami jiti rugá. ²⁶Echalí rawé 'yemi abónitamo we tánabo Onorúami mapujítitamo waminabi galá tamí bichíbo. Echijiti jipi Nijeni ketasi 'yemi mi ané mapu Nijé Binói waminabi tánama Onorúami 'yemi jiti. ²⁷Onorúami Binói 'yemi mi wabé galé, mapujiti 'yémitamo tamí galé, ayénachó mapujítitamo ma galá bichíili mapu Nijeni nawali echo'ná ripá riwigachi jonsa mapujiti Onorúami tamí júuli. ²⁸Mapalí Nijeni nawali jena'í wichimóbachi, Nijeni simili echo'ná ripá riwigachi jonsa, mapo'ná Onorúami atí. Jipi Nijeni ma ku simea jena'í wichimóbachi jonsa mapurigani auchecho ku simea mapo'ná Onorúami atí.

²⁹Echalí echí jaré mapu Jesúsi binérali jeaneli: Jipi Mujemi ne bichíwali galá machíami niráa ra'icha. Mami ketasi chopi irétaga niráa ra'icha. ³⁰Jípita ne galá machí mapu Mujemi galá machíami ju ne suwaba namuti, ayénachóta galá machí mapu ketasi arigá 'wérali ju máputa mi rukuebo bilé namuti, mapujítimi ma bachá niráa galá machí mapurigá tamujeta mi rukuénali. Echijítita ma galá bichíi mápumi simili echo'ná ripá riwigachi jonsa mapo'ná Onorúami atí, mapalimi nawali jena'í wichimóbachi.

³¹Echalí Jesúsi rukueli jeanigá: ¿Áchatamo ne bichíwali echirigá bichíi jipi? ³²Jipi ma ke 'me ayó pe waminánomí 'yémitamo waminá chijanárami níibo. Echalí 'yémitamo ibili niráa a'nagú waná júmsaga, tamí bi'neli ariwebo; chopi Nijeni ketasi bi'neli atí, mapujiti Onorúami sinibí tamí yuwa atí. ³³Nijeni 'yemi mi ané suwaba je'ná jeyiri mapurigátamo galá tamí bichiíiga, sinibí kilí ologá

pirélabo; chopi mapuyénasítamo abijí pilé jena'í wichimóbachi 'yémítamo wabé risúu olárami níibo. Echalí arigá waminabi galá tamí bichíisi mapujiti Nijeni ma niyúrali, mapujiti Nijeni ketasi njéwaga olali mapurigá jena'í wichimóbachi piréami olá.

Jesusi tániga ra'icha Riosi yuwa echí jaré mapu Binói binérali jiti

17 Ma bachá niráa je'ná jerigá anisáa, echalí Jesusi ripá riwigachi 'néniga, Riosi yuwa ra'ichaga jeaneli: Keni Onó ma sébali téitali. Nijeni bilepi Mujé Ranala ju. ¹Jipi ma tamí wabé Walubéraga ané, mapurigá Nijeni ayénachó mi ne wabé Walubéraga anema, mapu Nijeni bilepi Mujé Ranala ju! ²Mapujiti Mujemi tamí wilali mapurigá Walubela niráa, si'néami echí auché jaré pagótami Walubélawala, mapujiti Nijeni bilepi Mujé Ranala ju. A'lí bichemi echirigá tamí wilali mapurigani 'yama mapurigá ne sinibí niráa pirélama si'néami echí jaré mapu ikí Mujemi tamí 'yali. ³A'lí aboni ne sinibí pirélama mapujiti aboni galá mi machí mápumi echí Bilepi ne Bichíwali Riosi ju, ayénachó mapujiti aboni galá tamí machí mápuni Jesucristo ju, mapu Mujemi tamí júuli jena'í wichimóbachi.

⁴Echalí Jesusi, Riosi yuwa ra'ichaga, waminabi jeaneli: Mapuyénasí Nijeni iyénali jena'í wichimóbachi, Nijeni mi wisabé Walubéraga niráa aneli. Ayénachóni ma suwaba galá njéwaga olali mapu ikí Mujemi tamí nuleli olánala. ⁵Keni Onó, jipi auchecho tamí wilá echo'ná Mujé yuwa mapurigá Walubela niráa, achigórigá mapurigani Walubela níili Mujé yuwa ki'yá bachá jonsa, mapalí je'ná kawí ketasi cho niwárami níili.

⁶Mujemi ma chapili jaré jena'í wichimóbachi piréami pagótami, mapurigami tamí 'yama mapurigá Nijé níwala pagótami niráa. A'lí mani ruyeli aboni mapu Mujemi echí ne Walubela Riosi ju. Abóniko Mujé níwala níili, chopi Mujemi tamí 'yali. A'lí aboni galá njéwaga olali mapurigá Nijeni nawésali Mujé Ra'íchala. ⁷Jipi aboni ma galá machí mapu suwaba namuti mápumi tamí 'yali, ne suwaba echo'ná ripá riwigachi jonsa sili mapo'ná Mujemi atí. ⁸Mapujiti Nijeni ma galá nawésali aboni, achigórigá mapurigá Mujemi tamí 'yali nawésanala. A'lí aboni ma galá bichíili mapurigá Nijeni nawésali; ayénachó aboni galá machili mapu Nijeni ne bichíwali nawali echo'ná ripá riwigachi jonsa mapo'ná Mujemi atí, ayénachó aboni ma galá bichíili mapu Mujemi tamí júuli jena'í wichimóbachi.

⁹Nijeni mi tani mapurigami ku'wírama aboni. Ketásini mi tani mapurigá mi ku'wírama echí auché jaré jena'í wichimóbachi piréami. Nijeni mi chopi tani mapurigami ku'wírama echí jaré mapu Mujemi tamí 'yali, mapujiti aboni Mujé níwala ju. ¹⁰Ne suwaba Nijé níwala ayénachó Mujé níwala ju. A'lí Mujé níwala ayénachó Nijé níwala ju. A'lí echí jaré Nijé níwala pagótami o'wélatami ju mapujiti Nijeni ne Walubela ju.

¹¹Nijeni ma ketasi tibí jena'í wichimóbachi. Chopi aboni abijí jena'í tibí. A'lí Nijeni ma ku simea mapurigani Mujé yuwa asimea. Mujé wabé Galabé keni Onó, ne suwaba omérami jumi. Ne galá niseri si'néami echí jaré mapu Mujemi tamí 'yali, mapurigá si'néami aboni bilénapi napawika bichíyami níima, achigórigá mapurigá Nijeni napawika ju Mujé yuwa. ¹²Mapuyénasí Nijeni asali aboni yuwa jena'í wichimóbachi, Nijé sinibí ne galá tibútaga niseli echí jaré mapu Mujemi tamí 'yali, mapujiti Mujemi tamí echirigá oméralati. Ke wesi aboni waminá 'wigali,

chopi echí bilé mapu ma bachá niráa wikáami níili. Échiko arigá wikali, achigórigá mapurigá bachá niráa osirúami níili echo'ná Riosi Ra'íchala oselíwalachi mapu echirigá ikimea.

¹³Jipí Nijé ma simea echo'ná mapo'ná Mujemi atí. Chopi mapuyénasí Nijeni abijí jena'lí wichimóbachi atí, Nijeni je'ná jerigá aní mapurigá aboni ne wabé simírami kanílama, achigórigá mapurigá Nijé ne wabé kanila. ¹⁴Nijeni galá nawésali aboni Mujé Ra'íchala. Chopi echí auché jaré jena'lí wichimóbachi piréami ne wabé kichí echí jaré aboni, mapujiti aboni ketasi chopi jena'lí wichimóbachi piréami ju, achigórigá mapurigá Nijeni ketasi jena'lí wichimóbachi bitéami ju. ¹⁵Nijeni ketasi mi tani mapurigami ma ku tomea echí jaré aboni jena'lí wichimóbachi jonsa, chopi nimí tani mapurigami tibútama aboni mapurigá echí riablo ketasi omérama sayera aboni. ¹⁶Achigórigá mapurigá Nijeni ketasi jena'lí wichimóbachi bitéami ju, echí jaré aboni ketasi cho jena'lí wichimóbachi piréami ju. ¹⁷Ne wabé galabé niráa niwá aboni, mapurigá Mujé níwala pagótami niráa, mapujiti aboni galá bichíi echí ne bichíwali. Mujé Ra'íchala echí ne Bichíwali ju. ¹⁸Mujemi tamí júuli jena'lí wichimóbachi, mapurigani asimea jena'lí wichimóbachi piréami yuwa. Nijeni ayénachó echirigá achigórigá júuli echí jaré aboni, mapurigá aboni muchima echí auché jaré jena'lí wichimóbachi piréami yuwa. ¹⁹Mapujiti Nijeni we galé aboni, echijiti Nijeni waminabi galabé niráa nílini Nijé Binói niráa, mapurigá aboni ayénachó waminabi galabé niwárami níima, mapujiti aboni galá bichíima echí ne bichíwali.

²⁰Nijé ketasi chopi mi tani mapurigami ku'wírama je'ná jaré mapu ikí Mujé níwala ju jipi rawé. Nijé ayénachó tani mapurigami ku'wírama echí auché jaré, si'néami mapu ikí waminánomí galá tamí bichíima, mapalí aboni galá kipuma mapurigá je'ná jaré nawésama. ²¹Nijeni mi tani mapurigá ne si'néami aboni bilénapi napawika bichíyami níima, mapurigá si'néami aboni chopi napawika níima Tamujé yuwa, Mujé Galabé Onorúami, achigórigá mapurigá Mujemi pachana tamí yuwa atí, ayénachó mapurigá Nijeni pachana Mujé yuwa atí. Ayénachóni nakí mapurigá aboni bilénapi napawika bichíyami níima mapurigá echí auché jaré jena'lí wichimóbachi piréami galá bichíima mapu Mujemi tamí júuli jena'lí wichimóbachi. ²²A'lí Nijeni 'yali aboni mapurigá aboni o'wéalatami níima, achigórigá mapurigá Mujemi tamí 'yali mapu Nijé wabé Walubératami níima, mapurigá si'néami aboni bilénapi napawika bichíyami níima achigórigá mapurigá Nijeni Mujé yuwa chopi napawika juta. ²³Nijeni pachana aboni yuwa atí. A'lí Mujemi pachana Nijé yuwa atí, mapurigá si'néami aboni napawika ayénachó bilepi niráa níima, mapurigá echí auché jaré jena'lí wichimóbachi piréami echijiti ne galá machimea mapu Mujemi tamí júuli jena'lí wichimóbachi, ayénachó mapurigá Mujemi ne wabé galé echí jaré napawika bichíyami, achigórigá mapurigami tamí galé.

²⁴Keni Onó, Mujemi tamí 'yali echí jaré aboni. Nijeni wabé nakí mapurigá aboni echo'ná tamí yuwa muchima, mapo'ná Nijeni asimea, mapurigá aboni galá riwimea mapurigá Mujemi tamí wabé walubératali, mapujiti Mujemi sinibí tamí wabé galeli kiyá jonsa mapalí je'ná kawí ketasi cho niwárami níili. ²⁵Mujé galabé oláami Onorúami, jena'lí wichimóbachi piréami pagótami ketasi mi machí, chopi Nijeni mi ne galá machí. A'lí je'ná jaré bichíyami ma galá machí mapu Mujemi tamí júuli jena'lí wichimóbachi. ²⁶Nijeni galá machírali aboni mapu Mujemi echí Bilepi Riosi ju. A'lí abijí Nijeni waminabi echirigá machíratama, mapurigá aboni a'nagupi ne

wabé galema, achigórigá mapurigá Mujemi tamí galeli, ayénachó mapurigá Nijé Binói pachana aboni sulálachi asiméani.

Jesusi bogá tólati

(Mt. 26:47-56; Mr. 14:43-50; Lk. 22:47-53)

18 Ma je'ná jerigá anisáa, echalí Jesusi ku machínali echo'ná pachá jonsa, waminá bo'ónala komichi Setrónachi anilíwachi simiyá. Echo'ná wikabé namuti rojuá olivo anilíwami jali. Echalí Jesusi echo'ná nasipa simili echí auché jaré yuwa mapu Binói binérali. ²A'lí echí Júrasí mapu nijímiya nawali echí Jesusi mapurigá Binói waminá mi'lirúami níima, échiko ayénachó ma bachá ra'éami níili echo'ná, mapujiti chabénala niráa Jesusi wisabé echo'ná napawili echí jaré yuwa mapu Binói binérali. ³Echirigá níili mapu echí Júrasí ayénachó echo'ná nawali, wikabé sontarsi yuwa, jaré kapitani yuwa ayénachó, mapu echo'ná walubé Juríosi ri'obáwalachi tibúami níili. Si'néami aboni echo'ná julárami níili echí jaré o'wéala sacerdote jiti, ayena echí jaré Bariseo anilíwami binériami jiti. Aboni i'wéali ripiyá kami níili, ayénachó chopé rajégami níili, auché jaré karúmati ayénachó. ⁴Echalí Jesusi ma galá machigá suwaba mapurigá ikimea riwéali Binói, bachá natipámiya simigá jeanigá rukueli: ¿Chigátamo amí?

⁵A'lí aboni ku nijéwaga jeaneli: Echi Jesúsita amí, echo'ná Nasarétachi bitéami. Echalí Jesusi Binói ku nijéwaga jeaneli: Nijé ju.

⁶A'lí echí Júrasí mapu echirigá nijiga olali, mapurigá Jesusi waminá mi'lirúami níima, echiko ayénachó echo'ná wi'lili echí jaré sontarsi yuwa. ⁶Chopi mapalí Jesusi jeaneli: ¡Nijé ju! Echalí si'néami echí jaré sontarsi we yáati ri'ná bitíbali. ⁷Echalí Jesusi auchecho siné jeanigá rukueli: ¿Chigá bichétamo amiko? A'lí aboni auchecho nijéwaga jeaneli: Echi Jesúsita amí, echo'ná Nasarétachi bitéami.

⁸A'lí Jesusi ku nijéwaga jeaneli: Mani 'yemi mi aneli mapu Nijé ju. ¡Átamo tamí ásagá, ariwesi mapurigá je'ná jaré waminá ku simama!

⁹Echalí je'ná jerigá ikili mapurigá ne sébali ikimea mapurigá Jesusi Binói bachá niráa jeanili: Echi jaré mapu Onorúami tamí 'yali, ke wesi 'wigali. ¹⁰A'lí echí Simoni Pegro wi'lí ripiyá kami níili. Echalí échiko machí paka echí wi'lí ripiyá, wamina ripúnali bilé rijói, Malko riwéami, nakálachi watoná. Échiko echí walubela sacerdote piónawala níili. ¹¹Chopi Jesusi jeaneli echí Pegro: ¡Echo'ná wichibáchalachi ku wilá echí wi'lí ripiyá! ¿Kéchami mayé mapu arigá 'wérali ju mapu Nijeni risúu olárami níima, achigórigá mapurigá Onorúami bachá niráa nulali mapurigani echirigá olárami níima?

Jesusi pálati echo'ná bacháami echí ne walubela sacerdote yuwa

(Mt. 26:57-58; Mr. 14:53-54; Lk. 22:54)

¹²Echalí echí jaré wikabé sontarsi, aboni walúlawala yuwa, echí jaré Juríosi kapitánawala asichiko, si'néamika chapigá buleli echí Jesusi. ¹³Echalí Jesusi we yáati tólati echo'ná bilé rijói sacerdote Anasi riwéami bitélachi. A'lí echí Anasi auché bilé rijói, Kaijasi riwéami, si'alá níili. A'lí echalí bamíbali echí Kaijasi ne walubela sacerdote níili. ¹⁴Ayénachó echí Kaijasi níili mapu chabénala aneli echí jaré Juríosi mapu waminabi galá níimako mapu pe bilé rijói waminá mukumea si'néami aboni Juríosi pagótami jiti.

Echi Pegro we 'yékaka aní mapu binói ketasi machili echi Jesusi

(Mt. 26:69-70; Mr. 14:66-68; Lk. 22:55-57)

¹⁵ Echalí echi Simoni Pegro, auché bilé yuwa mapu Jesusi ayénachó binérali, okuánika jubáami najátasali echi Jesusi. A'lí echi auché bilé galá machirúami níili echi ne walula sacerdote jiti. Echijiti échiko we yáati bakili echo'ná pachá biléana ri'narátachi, echo'ná nasipa echi ne walula sacerdote bitélachi, mapo'ná Jesusi tólati. ¹⁶ Chopi echi Pegro echo'ná machímana 'yéachi tibili. Echijiti echi auché bilé mapu Jesusi binérali, echi mapu galá machirúami níili echi Anasi riwéami sacerdote jiti, échiko auchecho ku machínaga, galá ra'ichali echi tiwé pióntami yuwa echo'ná yéachi tibúami. Echalí echi bilé mapu Jesusi binérali echo'ná pachá bayérali echi Pegro. ¹⁷ Echalí echi tiwé pióntami echo'ná yéachi tibúami jeanigá rukueli echi Pegro: ¿Kéchami ayénachó Mujé bilé ju mapu je'ná Jesusi binérali? Echalí echi Pegro ku nijéwaga jeaneli: Ketasi nijé ju.

¹⁸ Echalí rokogó ne wabé ruráali, echijiti echi jaré pióntami, echi jaré kapitani yuwa, bachá niráa sawili na'ali. A'lí si'néami aboni echo'ná sokuala jali. Echalí echi Pegro ayénachó echo'ná sokuala wilili aboni yuwa.

Echi ne walula sacerdote we rukué echi Jesusi

(Mt. 26:59-66; Mr. 14:55-64; Lk. 22:66-71)

¹⁹ A'lí echi ne walula sacerdote chótali rukué echi Jesusi mapu chu yiri níili mapu Binói binérali, ayénachó rukueli mapu piri níili mapu Binói binérali echi auché jaré. ²⁰ Echalí Jesusi ku nijéwaga jeaneli: Nijeni sinibí ne machiná niráa nawésali jena'í wichimóbachi piréami pagótami. Nijeni sinibí echirigá nawésaga binérali echi pagótami echo'ná suníami aboni ri'obáwalachi, ayénachó echo'ná echi walubé Juríosí pagótami ri'obáwalachi mapo'ná si'néami aboni napawí. Nijeni ketasi siné chiná niráa nawésali. ²¹ Echalí Jesusi jeanigá rukueli: ¿Churékulami echirigá tamí rukué? Galá rukué echi jaré mapu tamí námali, mapu churigá Nijeni nawésali. Aboni galá machí suwaba mapu ikí Nijeni anili.

²² A'lí mapalí Jesusi je'ná jerigá anili, echalí bilé kapitani echo'ná walubé Juríosí ri'obáwalachi tibúami mapu echo'ná Jesusi yuwa wilili, échiko jeanigá waminá cho'nali: ¿Echirigáchami ku nijewa echi ne walula sacerdote?

²³ Echalí Jesusi ku nijéwaga jeaneli: A Nijeni sití ra'ichásagá, tamí ku ruyé mapu churigá Nijeni sití ra'ichali; chopi a Nijeni arigá galabé niráa ra'ichásagá, ¿churékulami echirigá tamí cho'ná?

²⁴ Echalí echi Anasi nuleli echi jaré sontarsi echirigá bulérami niráa tónala echi Jesusi echo'ná echi Kaijasi yuwa, echi mapu ne walubela sacerdote níili.

Echi Pegro auchecho siné 'yékaka anili mapu binói ketasi machili echi Jesusi

(Mt. 26:71-75; Mr. 14:69-72; Lk. 22:58-62)

²⁵ Echalí yénasí echi Pegro abijí sokuala wilili echo'ná na'írali. A'lí echi auché jaré echo'ná jáwami jeanigá rukueli: ¿Kecha ayénachó bilé ju mujé mapu echi Jesusi mi binérali? Echalí Pegro wabé 'yékaka jeanili: ¡Ketasi nijé ju!

²⁶ A'lí bilé rijói echo'ná wilíami jeanigá rukueli: ¿Kecha nimí riwali echi Jesusi yuwa iyénami echo'ná mapo'ná wikabé namuti rojuá, Olivo anilíwami, jawi? Echi rijói echirigá rukueli mapujiti binói pée rijimala níili echi Malko riwéami rijói,

ayénachó échiko echo'ná iyénali mapalí echi Pegro ripúnali echi Malko nakala. A'lí echi rijói ayénachó echi walubela sacerdote piónawala níili.

²⁷Echalí echi Pegro auchecho siné 'yékaka anili mapu binói ketasi machili Jesusi. A'lí we yáati kusuli bile tolí.

Jesusi tólati echo'ná bacháami echi walula silíami Pilato riwéami yuwa

(Mt. 27:1-2, 11-14; Mr. 15:1-5; Lk. 23:1-5)

²⁸Echalí Jesusi tólati echo'ná echi Kaijasi bitélachi jonsa, echo'ná biléana walubé kalírali yénasí, mapo'ná echo'ná nuráami walula silíami bitélachi níili. Echalí ma ch'illásali, echalí omowálawachi rawé, echijiti echi jaré Juríosi ketasi mo'wili echo'ná pachá echi walula silíami bitélachi mapujiti aboni arigá nakili ko'náliya echi kúuchi bo'wá sapala mapurigá aboni omáwiga olali echalí rawé alí. Chopi echi silíami ketasi Juríosi pagótami níili, echijiti aboni mayeli mapu ma mo'wisáagá echo'ná pachá echi silíami bitélachi, ma ketasi risénsia níimi mapu aboni echirigá omowama echalí rawé. ²⁹Echijiti echi Pilato riwéami silíami waminá machínali echi jaré Juríosi pagotami ra'íchamiya. Echalí echi Pilato jeanigá rukueli: ¿Piri jítitamo wi'nijí je'ná rijói?

³⁰A'lí aboni ku nijéwaga jeaneli: ¡A Binói ketasi chati oláami nísagá, tamujeta ketasi mi 'yabi!

³¹Echalí echi Pilato jeaneli: ¡Aboni niráa ku togá, waminá justicia olábasi 'yemi nulalila jiti! Echalí echi jaré Juríosi pagótami ku nijéwaga jeaneli: Tamujé aboni ketásita justicia olabo, mapujiti tamujé Juríosi pagótami ketasi risensia ju máputa nulabo bilé rijói mi'línala.

³²Aboni echirigá anéli mapujiti arigá 'wéraili níili mapurigá achigórigá ikimea mapurigá Jesusi Binói bachá niráa anili, mapu Binói mi'lirúami níima echo'ná biléana kúrsichi michóniga, achigórigá mapurigá echi jaré Romano anilíwami pagótami sinibí echirigá ko'yali echi jaré chati oláami pagótami. ³³Echalí echi Pilato auchecho siné bakili echo'ná pachá echi walubé kalí binói bitélachi. A'lí auchecho bayegá echi Jesusi, echi Pilato jeanigá rukueli: ¿Mujecha ju echi jaré Juríosi pagótami walubela silínawala?

³⁴Echalí Jesusi ku nijéwaga jeanigá rukueli: ¿Mujecha echirigá tamí rukué mapujiti mujé binói nakí echirigá machináliya? ¿Auché jarecha echirigá mi ruyéliré omá, tamí jiti rugá?

³⁵Echalí echi Pilato ku nijéwaga jeanigá rukueli: ¿Áchami mayé mapu nijeni Juríosi pagótami ju? Echi jaré Mujé pagótamawala níili, echi jaré o'wéala sacerdote ayénachó, mapu wakiná mi nijili, mapurigá nijeni mi kastigo 'yama. ¿Pírimi wabé chati olali?

³⁶Echalí Jesusi ku nijéwaga jeaneli: Nijeni arigá nulama jena'í wichimóbachi mapurigá Walubela silíami niráa. Chópini ketasi achigórigá 'wéraili nulama mapurigá echi auché jaré o'wéala silíami we nulá. A Nijeni echirigá nulásagá, echi jaré mapu tamí bichiyámi ju ma wabé nakomi, tamí ku'wírasiya, mapurigá echi jaré Juríosi pagótami ketasi tamí omérama; chopi Nijeni ketasi 'wéraili nulá mapurigá echi auché jaré o'wéala si'líami jena'í wichimóbachi piréami we nulá.

³⁷A'lí echi Pilato jeanigá rukueli: ¿Echirigacha ne bichíwali bilé walubela silíami jumi? Echalí Jesusi ku nijéwaga jeaneli: Ayena, Nijeni walubela silíami ju, mapurigá mujemi aní. Echijiti Nijeni ranarúami níili jena'í wichimóbachi; ayénachóni nawali

jena'í wichimóbachi mapurigani nawisama echi ne Bichíwali. Si'néami mapu ikí galá nijéwaga olako mapurigá ne bichíwali ju, aboni galá kipú mapurigá Nijeni aní.

³⁸ Echalí echi Pilato jeanigá rukueli: ¿Piri ju echi ne Bichíwali?

Ma nulálati mapurigá Jesusi waminá mi'lirúami níima

(Mt. 27.15-31; Mr. 15.6-20; Lk. 23.13-25)

A'lí ma je'ná jerigá rukuesa, echi Pilato auchecho ku machínali echi jaré Juríosi pagótami yuwa ra'ichámiya. Echalí binói Jeaneli: ¡Nijé ketasi biyiri namuti mapurigá chati oláami niráa, riwálini je'ná rijói! ³⁹ Sinibí bamíbali, jipi omowálawachi sébachi rawé, nijeni ku machí pama pe bilé 'yemi pagótamawala mapu pachá bachara atí. ¿Áchatamo nakí mápuni ku machí pásama echi Walubela, 'yemi Juríosi pagótami silínawala?

⁴⁰ Echalí ne si'néami aboni auchecho o'weli ra'íchaka Jeaneli: ¡Échiko ketasi ku machí pa! ¡Chopi ku machí pa echi Barabasi! A'lí echi Barabasi riwéami rijói we chigórami níili, echijiti pachá bachara asali.

19 Echalí echi Pilato nulali waminá wipisónala echi Jesusi. ² A'lí echi jaré sontarsi so'uwá tega koyétali Jesusi mo'lachi; ayénachó pe sitákami chomítawami napachátali, mapurigá bilé walubela silíami niráa. ³ Echalí si'néami echi jaré sontarsi mulubéanaga Jesusi yuwa tiníchaga Jeaneli: ¡Walubela nílagu mujé walubela Juríosi silínawala! Ayénachó cho'nílati Binói banalachi.

⁴ A'lí echi Pilato auchecho ku machínaga Jeaneli: ¡Galá 'nesi je'ná rijói! Mani auchecho siné ku machí pama, mapurigátamo ne galá machiboa mapu nijeni ketasi biyiri namuti riwali mapurigá chati oláami niráa.

⁵ Echalí Jesusi ku machínali echi so'uwá niwárami koyeka, ayénachó echi pe sitákami chomítuwami napáchaga. A'lí echi Pilato Jeaneli echi jaré pagótami: ¡Jena'í wilí je'ná rijói!

⁶ Chopi mapalí echi jaré o'wéala sacerdote, echi jaré ri'obachi tibúami kapitani galá riwali, echalí si'néami aboni chótali o'weli ra'íchaga Jeaneyá: ¡Echo'ná kúrsichi michoné! ¡Echo'ná kúrsichi michoné! Echalí echi Pilato Jeaneli: 'Yemi togá, echo'ná kúrsichi michónasi, mapujiti nijeni ketasi biyiri riwali mapurigá chati oláami niráa.

⁷ Chopi echi jaré Juríosi pagótami ku nijéwaga Jeaneli: Tamujeta ma nulélati. A'lí mapurigata nulérami níili, arigá 'wérali ju mapurigá je'ná rijói waminá mi'lirúami níima, mapujiti rijói ké, arigá jeaní mapu binói bilepi Riosi Ranala ju.

⁸ Echalí ma je'ná jerigá namsa echi Pilato waminabi wabé majali. ⁹ Echijiti echi Pilato auchecho siné pachá bakigá echo'ná walubé kalírali, jeanigá rukueli echi Jesusi: ¿Kumi jonsa nawali mujé? Chopi Jesusi ketásirapé namuti ku nijéwali.

¹⁰ Echalí echi Pilato jeanigá rukueli: ¿Kéchami tamí ku nijéwama? ¿Kéchami machí mapu nijeni walubela silíami ju, mápuni we omero nulayá mi mi'línala, mápuni ayénachó omero nulayá mi ku machí pánala?

¹¹ A'lí Jesusi ku nijéwaga Jeaneli: ¡Mujemi tarapé omérami tamí sayera, Riosi ke mi echirigá 'yásagá! Echijiti Nijé nimí ané mapu echi rijói mapu tamí nijili mapurigá mujemi tamí kastigo 'yama, échiko waminabi wabé chati oláami ju, ketasi mapurigá mujé.

¹² Echalí jonsa echi Pilato chopi 'nátali mapu churigá omérama ku ni'yúbana echi Jesusi; chopi echi jaré Juríosi pagótami o'weli ra'íchaga Jeaneli: ¡Amí ku ni'yúbanaságá je'ná Jesusi, mujemi ketasi amígowala ju echi ne walubela silíami

echo'ná Rómachi bitéami! Mapujiti mapuyíripi ne walubela silíami níliko, échiko we sayera echi ne walubela silíami echo'ná Rómachi bitéami.

¹³Echalí echi Pilato ma je'ná jerigá namsa, auchecho siné nulali ku machí pánala Jesusi. A'lí echi Pilato asíbali echo'ná mapo'ná echi ne walubela silíami sinibí asíbali, mapo'ná echi Ebreo ra'íchala niráa Gabátachi anilíwachi níili, chopi Ralámuli ra'íchala niráa Rijibétachi anilíwachi ju. ¹⁴Echalí ma nasipa rawé níili. A'lí ba'alínala rawé omowálawachi sébachi níili mapalí echi jaré kúuchi bo'wá ko'wílati. Echalí echi Pilato jeaneli echi jaré Juríosi pagótami jeanigá: ¡Jena'í wilí echi walubela 'yemi silínawala!

¹⁵Chopi si'néami aboni o'weli ralíchaga jeaneli: ¡Waminá milyá! ¡Echo'ná kúrsichi michoné! Echalí Pilato jeaneli: ¿Áchani nulama echo'ná kúrsichi michóniga mi'línala echi walubela 'yemi silínawala? Chopi echi jaré o'wéala sacerdote ku nijewaga jeaneli: ¡Ketásita niwa auché bilé walubela silíami, chopi echi walubela silíami echo'ná Rómachi bitéami!

¹⁶Echalí echi Pilato nijali echi Jesusi mapurigá aboni waminá mi'limea, echo'ná biléana kúrsichi michóniga. A'lí aboni ma waminá toli.

Jesusi clavo jiti michóntami níili echo'ná kúrsichi

(Mt. 27:32-44; Mr. 15:21-32; Lk. 23:26-43)

¹⁷Echalí Jesusi ma matóraga echi Binói níwala kursi, chótali echo'ná biléana simiyá mapo'ná chu'wí mo'ólachi anélati; ayénachó echi Ebreo anilíwami ra'íchala niráa echo'ná Gorótachi anilíwachi níili. ¹⁸Echo'ná echi Walubela Jesusi clavo jiti michóntami níili Binói sikálachi, ayénachó Binói ronólachi, echo'ná biléana kúrsichi. A'lí Binói yuwa auché okuá rijói, ibílana niráa, echo'ná auché okoná kúrsichi echirigá michóntami níili. A'lí Jesusi Binói echo'ná nasipa wilíami kúrsichi michóntami níili. ¹⁹Echalí echi walula Pilato nulali biléana táa tabla osogá uchánala echo'ná ripá kúrsichi kuwálachi. A'lí jerigá osirúami níili: Je'ná ju Jesusi, echo'ná Nasarétachi bitéami, echi Walubela Juríosi Silínawala. ²⁰Echalí wikabé echi jaré Juríosi pagótami galá 'nénali je'ná osirúami, mapujiti echo'ná mapo'ná Jesusi michónalati kúrsichi ne mulubé níili echo'ná Jerusalémachi anilíwachi walúlachi jonsa. A'lí echirigá osirúami níili echi Ebreo ra'íchala niráa, echi Griego ra'íchala niráa ayénachó, echi Latini ra'íchala niráa asíchiko. ²¹Chopi echi jaré o'wéala Juríosi sakerdótawala jeaneli echi walula Pilato: Perikó ketasi echirigá osá: Je'ná ju echi Walubela Juríosi Silínawala. Chopi galá níima je'ná jerigá osisá: Je'ná rijói jeanili: Nijé ju echi Walubela Juríosi Silínawala.

²²Chopi echi Pilato ku nijewaga jeaneli: Echi mápuni osáliko echirigá a tibima.

²³Echalí ma echo'ná kúrsichi michónsa Jesusi, echi jaré sontarsi ma chapigá suwaba namuti Binói níwala chiní, naóana niráa rojuánali mapurigá ibili sontarsi chapimea bilé niráa. A'lí Jesusi níwala wi'lí napacha, moba chukúami, ketasi sútami niili; chopi bilepi niráa amarúami tétami níili ripá jonsa, ri'lé yénasí. ²⁴Echijiti echi jaré sontarsi a'nagupi jeaneli: Ketásita naóana chi'wanabo, chopi galá níima rijibaka niráa ri'yékasa chigá 'nalí chapirá. A'lí echirigá olálati mapurigá ne sébali ikímea mapurigá bachá niráa osirúami níili echo'ná Riosi Ra'íchala oselíwalachi, mapo'ná je'ná jerigá osirúami ju:

Aboni a'nagupi rojuánali suwaba namuti Nijé níwala chiní; ayénachó rijibaka ri'yékali, chigá 'nalí chapilá Nijé níwala wi'lí napacha moba chukúami.

²⁵ A'lí echo'ná mulubé mapo'ná echí kursí wilili mapo'ná Jesusi michóntami níili, echo'ná wilili echí Jesusi iyela, auché bilé mukí yuwa, echí mapu Jesusi iyela rijimala níili, echí mapu ayénachó María riwéami níili, echí mapu echí Kleópasi riwéami rijói upila níili. A'lí auché bilecho mukí, María riwéami, ayénachó echo'ná wilili, echí mapu echo'ná Makatálachi bitéami níili. ²⁶ Echalí mapalí Jesusi riwali echo'ná wilíami echí kepu iyé, Binói ayénachó riwali echí bilé mapu Binói binérali, mapu Jesusi Binói ne wabé galeli, mapu ayénachó echo'ná mulubé wilili Jesusi iyela yuwa. Echalí Jesusi jeaneli kepu iyé: Kení iyé, je'ná rijói mapurigá mujé binói ranala níima.

²⁷ A'lí Jesusi ayénachó jeaneli echí bilé mapu Binói binérali: Echi Nijé iyela ma mapurigá mujé binói iyela níima. A'lí echalí jonsa echí bilé mapu Jesusi binérali, binói galá nareli echí Jesusi iyela echo'ná binói bitélachi mapurigá binói iyela niráa.

Jesusi ma mukuli

(Mt. 27:45-56; Mr. 15:33-41; Lk. 23:44-49)

²⁸ Ma je'ná jerigá anisáa, echalí Jesusi galá machili mapu ne suwaba ma sébali ikili mapurigá bachá niráa osirúami níili echo'ná Riosi Ra'íchala oselíwarachi mapurigá ikimea riwéali. Echijiti Binói jeanili: ¡Weni balami!

²⁹ Echalí echo'ná manili bilé sikolí wabé chokóami uva ba'wila maníami. A'lí echo'ná jáwami we pakeli bilé namuti mapuyili bilé táchá bo'osali echo'ná wabé chokóami uva ba'wílachi. A'lí echo'ná biléana kusírali ochogá, ne chumuchí ucheli mapurigá Jesusi chunugá bajima. ³⁰ Echalí Jesusi ma chunugá bajisa echí we chokóami ba'wila, we yáati jeanili: Suwaba ma sébali ikili. A'lí yóraga, ma mukuli.

Bilé sontarsi waminá chi'wánali Jesusi wachigálachi

³¹ A'lí ba'arínala omowálawachi rawé níili mapalí echí jaré kúuchi bo'wá ko'wílati. Echijiti echí jaré Juríosi pagótami ketasi nakili mapurigá echí bikiá rijói suwíami sapala waminabi echo'ná ripá kúrsichi uchuma mapujiti ba'alínala isábawachi rawé walú omowálawachi níili. Echijiti aboni tánali mapurigá echí Pilato nulama waminá ka'linánala echí jaré bikiyá rijói ronólachi mapurigá aboni we sapú waminá suwíame, mapurigá aboni suwíami sapala we yáati waminá rikibúrami níima mapurigá echí bikiyá suwíami sapala ketasi tibima echo'ná kúrsichi ba'alínala isábawachi rawé. ³² Echijiti echí jaré sontarsi simíbaga ka'línali echí bilé rijói ronólachi mapu ayénachó michónalati echo'ná biléana kúrsichi mapalí Jesusi mi'llílati; ayénachó ka'línali echí auché bilecho rijói ronólachi mapu ayénachó michónalati echo'ná auché biléana kúrsichi. ³³ Chopi mapalí aboni mulubéanalí mapo'ná Jesusi michóntami níili echo'ná auché biléana kúrsichi, aboni riwali mapu Jesusi ma mukúami níili, echijiti aboni ketasi ka'línali echí Walubela Jesusi ronólachi.

³⁴ Chopi bilé sontarsi arigá chi'wánali Jesusi wachigálachi bilé wabé oláami silá jiti. Echalí we yáati walú lénali, ayénachó machínalí ba'wí. ³⁵ Echi rijói mapu je'ná jerigá ruyeko, mapurigá jena'í oselichi osirúami ju, echí ju bilé mapu galá riwali. A'lí binói ne bichíwaga aní. Échiko galá machí mapu binói bichíwaga aní, mapurigá 'yémítamo ayénachó galá bichíibo. ³⁶ Mapujiti je'ná jerigá ikili mapurigá suwaba ne sébali ikimea mapurigá bachá niráa osirúami níili echo'ná Riosi Ra'íchala oselíwalachi mapo'ná jeaní: Aboni ketasi ka'linama ni bilé Binói ochilá. ³⁷ Ayénachó je'ná jerigá osirúami ju echo'ná auché biléana osirúami

echo'ná Riosi Ra'íchala oselíwalachi: Aboni auchecho ku riwimea Echi mapu aboni chi'wánali.

Jesusi chu'wirótami níili

(Mt. 27:57-61; Mr. 15:42-47; Lk. 23:50-56)

³⁸ Ma je'ná jerigá ikisáa, echalí echi José echo'ná Arimatéachi bitéami risénsia tánali echi Pilato, echi Jesusi mukúami sapala ku tomeyea. Echalí echi Pilato risensia 'yali. A'lí echi José echo'ná simigá, waminá toli Jesusi mukúami sapala. Echi José echi Jesusi yuwa binéami níili, chopi échiko chiná niráa bineli mapujiti binói we majali echi auché jaré Juríosi pagótami jiti. ³⁹ Auché bilé rijói Nikoremo riwéami ayénachó ku'wírimiya nawali. Échiko níili mapu chabénala, siné rokogó niráa, ra'ichámiya nawíili Jesusi yuwa. Je'ná Nikoremo pali jaré wabé su'weti júkami namuti, mira anilíwami, echi auché bilé áloe anilíwami nasówaga. Suwaba we bitéami níili mapuyena baisá makói kilo niráa. ⁴⁰ A'lí echi okuá rijói chapigá echi Jesusi mukúami sapala galá kabilí wi'llibé chiní pe táchica chipérami jiti. Echalí aboni ayénachó echirigá kabilí echi jaré su'weti júkami namuti yuwa, echo'ná pachá nasipa chinírali uchugá, mapurigá echi jaré Juríosi pagótami sinibí echirigá olali mapalí aboni chu'wiroli echi jaré suwíami. ⁴¹ A'lí echo'ná mapo'ná echi Walubela Jesusi echo'ná kúrsichi michónntami níili, mulubé niráa jali wikabé namuti rojuá, olivo anilíwami. A'lí echo'ná nasipa nirúali bilé risochí chu'wiróami, bukuli niwárami, mapo'ná ke cho wesi chu'wirótami níili. ⁴² Echo'ná we yáati chu'wirótami níili echi Walubela Jesusi ma mukúami sapala, mapujiti echo'ná ne mulubé níili, ayénachó mapujiti ma we yáati chotama riwéali ba'alínala isábawachi rawé, mapalí echi jaré Juríosi pagótami tarapé risensia níili mapu nochama.

Jesusi ku owínali mapalí ma mukúami níili

(Mt. 28:1-10; Mr. 16:1-8; Lk. 24:1-12)

20 Echalí oméachi rawé, mapalí ne bachá rawé níili echalí tarali, echalí bi'yá abijí chónachi echi María echo'ná Makatálachi bitéami echo'ná risochí chu'wechi simili. Echalí binói riwali mapu echo'ná yéachi ma ketasi 'yératami níili echi walubé rité jiti. ² A'lí echi María wabé 'maga simili echo'ná mapo'ná echi Simoni Pegro asali, echi auché bilé yuwa mapu Jesusi binérali, echi mapu Jesusi wabé galeli. Echalí echi María jeaneli: ¡Ma waminá tólati echi Walubela, echo'ná risochí chu'wechi jonsa! A'lí bichéta ketasi machí kumi 'nalí rikálati.

³ Echalí echi Pegro, echi auché bilé binéami ayénachó, okuánika ku 'machínaga, we yáati simíbali echo'ná risochí chu'wechi. ⁴ Echalí okuánika napawika júmali, chopi echi auché bilé binéami waminabi wabé walínaga 'mali, ketasi mapurigá echi Pegro. Echijiti echi auché bilé binéami ne bachá nawali echo'ná risochí chu'wechi. ⁵ A'lí échiko bunaka 'néniga, galá riwali echo'ná ri'lé pacháami, abijí mapurigá kabítami niráa tibíami, echi wi'llibé chiní pe táchica chipérami, chopi échiko ketasi cho bakili echo'ná pachá. ⁶ A'lí echi Simoni Pegro ayénachó we yáati pe jubáami nawali. Échiko we yáati bakigá echo'ná pachá, ayénachó galá riwali echi wilibé chiní pe táchica chipérami echo'ná tibíami. ⁷ Ayénachó riwali mapurigá echi chiní mapuyiri wisibula, echi mapujiti Jesusi mo'ólachi chulubítalati, ketasi napawika tibili echi auché jaré chiní yuwa, chopi echi wisibula waminá waná kabita achárami tibili. ⁸ Echalí ayénachó pachá bakili echi auché bilé binéami mapu ne bachá nawali echo'ná risochí chu'wechi. Échiko galá

riwisáa echí tách chí chipérámi chiní echirigá tibíami, ne galá bichíili mapurigá Jesusi ne bichíwali ma ku owínami níili. ⁹Mapujiti aboni ketasi cho galá machili chu aniwáami níili mapurigá osirúami níili echo'ná Riosi Ra'íchala oselíwalachi jeanigá mapu echí Walubela Jesusi auchecho siné ku owínama riwéali mapalí ma mukúami níisa. ¹⁰Echalí echí okuá mapu Jesusi binéráli ma ku simíbali echo'ná aboni pirélachi.

**Jesusi Binói ke sayiná mulubé wilíbali echí María echo'ná Makatárachi
bitéami yuwa**
(Mr. 16:9-11)

¹¹Chopi echí María echo'ná risochí chu'wechi machímana we nalaka tibili. A'lí echirigá abijí nalaka binói bunaga 'nénali echo'ná pachá risochí chu'wechi. ¹²Echalí binói riwali okuá o'wéala Riosi capitánawala, ne wabé tosákami napáchami, echo'ná muchúami mapo'ná Jesusi sapala chu'wirólati. Bilé echo'ná asali mapo'ná Jesusi mo'wéraga rikálati, chopí auché bilecho asali echo'ná mapo'ná Jesusi ronéraga rikálati. ¹³A'lí echí okuá Riosi capitánawala jeanigá rukueli: Mukí, ¿churékulami nalagá? Echalí echí María jeaneli: Mapujiti ma waminá toláti echí nijé Walubélawala. Jípini ketasi machí kumi 'nalina rikálati.

¹⁴Chopi ma je'ná jerigá anisáa, echí María we yáati ku kuwana 'néniga ke sayiná riwali Jesusi echo'ná wilíami, chopí echí María ketasi machili mapu Jesusi Binói níili. ¹⁵Echalí Jesusi jeanigá rukueli: Mukí, ¿churékulami nalagá? ¿Chigami amí? Chopí echí María mayega mapu echo'ná tibúami níili, echalí jeaneli: A mujemi níisagá mapu waminá toli, tamí galá ruyé mapo'nami rikali, mapurigá nijeni ku tomea.

¹⁶Echalí Jesusi jeaneli: ¡María! A'lí echí María we yáati ku kuwana 'néniga, Ebreo ra'íchala niráa ra'ichaga, jeaneli: ¡Rabonil! (echí mapu jerigá aniwáami ju: Binériami.)

¹⁷Chopi Jesusi jeaneli: Ketasi cho tamí nochá, mapujiti Nijeni ketasi cho ku moyénali echo'ná ripá riwigachi mapo'ná Nijé Onolá atí. Chopí we yáati ku ruyémiya simigá echí jaré Nijé ritémawala, mapurigá Nijeni ripá munama mapo'ná echí Nijé Onolá atí, echí mapu ayénachó 'yemi Onolá ju. Nijeni munama echo'ná ripá riwigachi mapo'ná Nijé Riósawala atí, echí mapu ayénachó 'yemi Riósawala ju.

¹⁸Echalí echí María echo'ná Makatálachi bitéami we yáati ruyémiya simili echí jaré mapu Jesusi binéráli, mapurigá binói ma galá riwali ku bitéami niráa echí Walubela Jesusi, ayénachó echí María ruyeli mapurigá echí Walubela Jesusi ma je'ná jerigá aneli.

Jesusi Binói ke sayiná mulubé wilíbali echí jaré mapu Binói binéráli yuwa
(Mt. 28:16-20; Mr. 16:14-18; Lk. 24:36-49)

¹⁹Echalí rawé mapalí Jesusi ku owínali, ne bachá rawé níili echalí tarali. Echalí rokogó echí jaré mapu Jesusi binéráli, echo'ná pachá biléana kalírali napawika muchili. A'lí aboni ne suwaba 'yeli echo'ná kalírali 'yéachi mapujiti aboni we majali echí jaré Juríosi pagótami. Echalí Jesusi Binói ke sayiná echo'ná bakigá nasipa aboni yuwa wilíbali. A'lí Binói jeaneli: ¡Kuira! ¡Kilí niráa ologá pirélasi!

²⁰A'lí ma je'ná jerigá anisáa, Binói galá riwílari aboni Binói sikálachi, ayénachó riwírali Binói wachigálachi. Echalí echí jaré mapu Binói binéráli ne wabé kaníli, echirigá galá 'nesa echí Walubela Jesusi. ²¹Echalí Jesusi auchecho siné jeanéli: ¡Kilí niráa ologá pirélasi! Echirigá mapurigá Onorúami tamí júuli jena'í wichimóbachi, echirigá achigórigá Nijeni 'yemi mi jula.

²² A'lí echo'ná abónichi moba púchaga Jesusi jeaneli: ¡Galá naresi echi Wabé Galabé Riosi Iwigala! ²³ Átamo ku wikawásagá mapurigá bilé rijói chati olali, échiko ma galá ku wikawárami ju. Ayénachó átamo ketasi ku wikawásagá mapurigá auché bilecho chati olali, échiko ketasi ku wikawárami ju.

Echi Tomasi galá riwali echi Walubela Jesusi ma ku bitéami niráa

²⁴ Chopi echi Tomasi mapu 'marachi anélati, bilé níili mapu Jesusi binérali, échiko ketasi aboni yuwa asali echalí mapalí Jesusi echo'ná nawali. ²⁵ Pe wakinana echi auché jaré binéami jeaneli: ¡Tamujeta ma riwali ku bitéami niráa echi Walubela Jesusi! Chopi echi Tomasi ku nijéwaga jeaneli: ¡A nijeni ketasi cho riwiságá echo'ná Binói sikálachi, mapo'ná Binói michónalati, ayénachó a nijeni ketasi cho bachásagá nijé makúsawala echo'ná Binói sikálachi iwáachi, mapo'ná clavo jiti michónalati, ayénachó a nijeni ketasi cho bachásagá nijé sikala echo'ná Binói wachigálachi iwáachi mapo'ná Binói chi'wanárami níili, echalí nijeni ketasi chirigá omérama bichíiya!

²⁶ Echalí móbala oméachi rawé ne si'néami echi jaré makói miná bilé mapu Jesusi binérali, auchécho siné napawika muchíli echo'ná pachá kalírali. Echalí echi Tomasi ayénachó echo'ná echi auché jaré aboni yuwa asali. Echalí arigá 'yeta wiláchi suníami yéachi, echi Walubela Jesusi ke sayiná nawagá echo'ná pachá, ne nasipa wilfbali aboni yuwa. A'lí jeaneli: ¡Kuiral! ¡Kilí niráa ologá pirélasi!

²⁷ A'lí Binói we yáati jeaneli echi Tomasi: Jena'í wakiná bachá kemi makúsawa. Ne galá 'né Nijé sikala; ayénachó wakiná bachá kemi siká. Jena'í Nijé wachigálachi pachá bachá, mapo'nani chi'wanárami níili. Ketasi waminabi níili mapurigá ke bichíyami niráa, chopi ne galá bichíi. ²⁸ Echalí echi Tomasi ku nijéwaga jeaneli: ¡Kení Walubelawa, Mujemi keni Riósawa ju!

²⁹ A'lí Jesusi jeaneli: Mujemi tamí bichíi mapujítimi ma tamí riwali, chopi echi auché jaré wabé kaníliami níima mapu ketasi tamí riwisáa, arigá tamí bichíili.

Je'ná jerigá osirúami níili mapurigá jena'í wichimóbachi piréami pagótami galá bichíima Jesucristo niráa

³⁰ A'lí echalí mapalí Jesusi iyénali jena'í wichimóbachi, echi jaré yuwa mapu Binói binérali, echalí chokichí jonsa Binói wisabé wabé omériga olali mapurigá ke wesi auché jaré omero olayá; chopi suwaba ketasi suwaba osílati jena'í oselichi mapurigá Binói wisabé echirigá olali. ³¹ Chopi je'ná mapurigá jena'í osirúami ju, ne suwaba echirigá osirúami níili mapurigá 'yémitamo galá bichíibo mapu echi Jesusi, echi Walubela Cristo anilíwami ju, echi bilepi Riosi Ranala; ayénachó mapurigátamo echirigá bichíiga, ne sinibí piréami níibo, mapujítamo galá bichíi Binói niráa.

Jesusi ke sayiná mulubé wilíbali kichao rijói yuwa mapu Binói binérali

21 Pée wakinánokuá Jesusi anchecho siné ke sayiná mulubé wilíbali echi jaré yuwa mapu Binói binérali. Echalí je'ná jerigá ikili echo'ná walú ba'wirali suwé Tibériachi anilíwachi: ² Echalí napawika muchili echi Simoni Pegro, echi Tomasi mapu 'marachi anélati ayénachó, echi Natanaeli echo'ná Kanachi, echo'ná Galiléachi anilíwachi kawírali bitéami ayénachó, echi okuá Sibireo kúchala ayénachó, auché okuá mapu Jesusi binérali asíchiko. ³ Echalí echi Simoni Pegro jeaneli: Nijeni simea rochí sirúmiya. A'lí echi auché jaré jeaneli: Tamujé ayénachóta

mi yuwa simabo. Echalí aboni simíbaga mo'wili echo'ná biléana bárkochi. Chopi echalí rokogó aboni tarapé bilé rochí chapili. ⁴A'lí ba'alínala bi'yá chónachi Jesusi Binói ke sayiná wilíbali echo'ná walú ba'wírali suwé, chopi echi jaré mapu Binói binérali ketasi machili mapu Binói Jesusi níili. ⁵Echalí Jesusi jeaneli: 'Yemi rijói, ¿quéchatamo jaré machí a'wali rochí? Chopi aboni ku nijéwaga jeaneli: Tarapé bilé.

⁶Echalí Jesusi jeaneli: Echo'ná bárkochi watoná 'nalí pasi echi walú chipérami tétami chiní, echalítamo galá chapiboa. A'lí echirigá pasa, aboni chapili ne wikabé rochí echo'ná pachá echi walú chipérami tétami chiní. Echalí aboni ma ketasi omérali ku machí púa echi chiní, mapujiti echi wikabé rochí ne wabé bitéami níili. ⁷A'lí echi bilé rijói mapu Jesusi binérali, mapu Binói ne wabé galeli, échiko jeaneli echi Pegro: ¡Echi rijói tamujé Walubélawala ju! A'lí mapalí echi Pegro námali mapu echi Walubela níili, echalí binói we yáati ku napachali mapujiti ketasi napacha iyénali. A'lí we yáati waminá ba'wichí pochili mapurigá we yáati simea echo'ná suwé mapo'ná echi Walubela Jesusi wilili. ⁸Chopi echi auché jaré mapu Jesusi binérali arigá sili echo'ná suwé, echo'ná bárkochi ba'wichí moba iyénamichi muchiga, mapujiti mulubé níili, mapuyena bilé kiento metro niráa; ayénachó aboni banílasaga sili echi walú chipérami tétami chiní, ne wikabé rochí rakoka. ⁹A'lí echo'ná wi'yérali suwé sisáa, sawíli na'árami riwali, bilé walú rochí yuwa echo'ná moba, echi pani ayénachó. ¹⁰Echalí Jesusi jeaneli: Wakiná tosí jaré rochí máputamo bukulipi chapili.

¹¹Echalí echi Simoni Pegro 'moka echo'ná bárkochi, echo'ná wi'yérali suwé baníraga pali echi walú chipérami chiní tétami. A'lí ne wabé buchíami níili o'weli rochí. Bilé kiento waminá malisa makói, waminá bikiá níili. A'lí echikí wikabé níisa, arigá ketasi chi'wali echi walú chipérami chiní tétami. ¹²Echalí Jesusi jeaneli: ¡Wakiná simasi, kopo! A'lí echi jaré mapu Binói binérali ke wesi nakili rukuénala mapu chigá níili Binói, mapujiti ne si'néami ma galá machili mapu echi Walubela Jesusi níili. ¹³Echalí Jesusi mulubéanaga aboni yuwa, ma chapigá echi pani, waminá nachútaga 'yali mapurigá aboni ko'mea. Echirigá achigórigá ayénachó nachútali echi rochí.

¹⁴Echalí jonsa mapalí Jesusi ma mukuli, je'ná jerigá ma baisá chokéami níili mapu Binói ke sayiná mulubé wilíbali echi jaré binéami yuwa mapalí Binói ma ku owinali.

Jesusi ra'icha echi Simoni Pegro yuwa

¹⁵Echalí bi'yá mapalí aboni ma sunili ko'yá, echi Walubela Jesusi jeanigá rukueli echi Simoni Pegro: Mujé Simoni, mápumi echi Jonasi ranala ju, ¿áchami waminabi wabé tamí galé, ketasi mapurigá je'ná jaré? Echalí echi Pegro ku nijéwaga jeaneli: Ayena Walubela, Mujemi galá machí mapurigá nijé nimí we galé. Echalí Jesusi jeaneli: Gala ju, ¡kotúrami echi jaré Nijé pugula bo'wá!

¹⁶A'lí Jesusi auchecho siné jeanigá rukueli: Mujé Simoni mápumi echi Jonasi ranala ju, ¿áchami tamí galé? Echalí echi Pegro ku nijéwaga jeaneli: Ayena Walubela, Mujemi galá machí mapurigá nijeni mi galé. Echalí Jesusi jeaneli: ¡Galá nisérami echi jaré Nijé pugula bo'wá!

¹⁷Echalí auchecho baisá chokéami Jesusi jeanigá rukueli: Mujé Simoni mápumi echi Jonasi ranala ju, ¿áchami tamí galé? A'lí echi Pegro we siweli mapujiti ma baisá chokéami rukueli jeanigá: ¿Áchami tamí galé? Echijiti binói jeaneli: Walubela, Mujemi

galá machí ne suwaba namuti. Mujemi ne galá machí mapu nijeni mi galé. Echalí Jesusi jeaneli: ¡Kotúurami echi jaré Nijé pugula bo'wá! ¹⁸Echalí Jesusi waminabi jeaneli: Ne bichíwali Nijeni mi jeané: Mapalimi pée ri'malí níili, mujemi sinibí, binói niráa, napachasa simili kanápuromí mapo'nami nakili, chopi waminánomí mapalimi ma ochérami níima, echalí mujemi a'nagú ka'énalá wachinama mujé sikala. A'lí auché bilé rijói mi napachátasa waminá tomea mapo'nami ketasi nakí simináliya.

¹⁹Echalí Jesusi echirigá aneli mapurigá Pegro galá machimea churigá binói Pegro mi'lirúami níima, mapurigá Riosi Binói echijiti waminabi wabé walubéraga anérami níima. A'lí Jesusi waminabi jeaneli echi Pegro: ¡Tamí najató!

Echi bilé binéami mapu Jesusi wabé galeli

²⁰A'lí echi Pegro ku kuwana 'néniga riwali najátami echi auché bilé rijói mapu Jesusi ayénachó binérali, echi mapu Jesusi wabé galeli. A'lí echi rijói níili mapu mulubé Jesusi yuwa asali echalí rokogó mapalí si'néami aboni napawika ko'yá muchili. Echi níili mapu jeanigá rukueli: Walubela, ¿chigá ju mapu mi nijima mapurigá echi jaré mujé sayela mi mi'limea? ²¹Echalí mapalí Pegro echirigá riwali echi auché bilé binéami, echalí echi Pegro jeanigá rukueli echi Jesusi: Walubela, je'ná rijóirú, ¿churigá ikimea?

²²Echalí Jesusi ku nijéwaga jeaneli: A Nijeni nakisáagá mapu je'ná auché bilé rijói waminabi bitélama echalí rawé yénasí mapalí Nijeni ku nawama, ¿chu chireko mujé? ¡Mujé chopi tamí najató!

²³Echijiti echi auché jaré ritémtami a'nagupi aneli mapu echi bilé rijói mapu Jesusi binérali ke siné mukumea. Chopi Jesusi ketasi anili mapu ke siné mukumea, chopi jeanili: A Nijeni nakisásagá mapu waminabi bitélama echalí rawé yénasí mapalí Nijeni ku nawama, ¿chu chireko mujé?

²⁴Nijé Juani juni mápuni ne galá bichíwaga aní je'ná jaré namuti, ayénachó nijeni osali je'ná jaré namuti. A'lí si'néamita galá machí mapu nijeni ne bichíwali aní.

²⁵A'lí chabénala mapalí echi Walubela Jesusi iyénali jena'í wichimóbachi, Binói wabé simírami wisabé wabé omériga olali mapurigá ke wesi auché jaré omero olayá, chopi ne suwaba mapurigá Binói olali ketasi suwaba osirúami ju jena'í oselichi. A'lí a ne suwaba ibílipi niráa osirúami níisagá, nijeni mayé mapu ne wabé simírami wikabé oselí echirigá osirúami níimi. Echalí suwaba buchimi ne suníami jena'í wichimóbachi echi kúuti ne wabé wikabé oselí jiti, chopi abijí tibimi auché jaré wabé wikabé oselí. A'lí ma ketasi nirúlama ne suníami jena'í wichimóbachi mapo'mí muchuwárami níimi echi auché jaré ne wikabé oselí mapu echirigá osirúami níimi. ¡Echirigá níilaga!

OLÁRAMI

Mapurigá Olali echi Jaré mapu Julárami

Níili Nawisánala

Riosi bachá niráa bichíwaga anili mapu echi Wabé Galabé Riosi
Iwigala nawama riwéali echi jaré napawika bichíiyami yuwa

1 Jipi nimí auchecho siné osé, mujé Tiójilo. Chabénala nijé nimí oseli suwaba namuti jiti rugá mapu ikí Jesusi olali, ayénachó nimí oseli suwaba namuti jiti rugá mapu ikí Binói binérali ne chokichí jonsa. ²Ayénachó nijé nimí oseli echi auché jaré namuti jiti rugá, suwaba mapu ikí ikili echalí rawé yénasí mapalí Jesusi ku torúami níili echo'ná ripá riwigachi. A'lí mapalí Jesusi ke cho echirigá ku torúami níili, echalí Binói chapili echi jaré mapu Binói nakili nawisánala julánala. A'lí echi Galabé Riosi Iwigala ayénachó achigórigá nuleli nochánala aboni. ³A'lí mapalí Jesusi ma mi'lirúami níili, pe kinana Binói ku owíñali. A'lí echalí jonsa, nawosa makói rawé yénasí, Jesusi Binói wisabé niráa ke sayiná wilíbali echo'ná bacháami echi jaré mapu Binói binérali yuwa. A'lí Jesusi echirigá riwíratali aboni mapu Binói ne bichíwali auchecho ku bitéami níili. A'lí Jesusi nawésaga aneli mapu Riosi ne galá nuléami ju echi jaré pagótami. ⁴Chopi mapalí Jesusi abijí iyénali aboni yuwa, echalí Binói nuleli mapurigá aboni ketasi cho waminá si'lwiná simama echo'ná Jerusalémachi jonsa. A'lí Binói jeaneli: Abijí jena'í buwesi mapuyénasí echirigá ikimea mapurigá Nijé Onolá ne bichíwaga anili mapu ikimea riwéali, mapujiti echo'ná Riosi Ra'íchala oselíwalachi osirúami ju mapurigá Riosi bichíwaga anili mapurigá echi Galabé Riosi Iwigala pachana echi jaré bichíiyami yuwa nawama riwéali. A'lí Jesusi Binói ayénachó jeaneli: Nijé ayénachó 'yemi nimí echirigá achigórigá ruyeli. ⁵Ne bichíwali ju mapu echi Juani ba'wí jiti pagoli echi pagótami, chopi ke 'me ayó rawé echi we Galabé Riosi Iwigala 'yemi mi nulema echo'ná pachana 'yemi sulálachi niráa.

Jesusi ku moyénali echo'ná ripá riwigachi

⁶Mapalí echi jaré binéami echo'ná Jesusi yuwa muchili echalí aboni jeanigá rukueli: Walubela, ¿áchami ke 'me ayó rawé katiwama mapurigá echi auché jaré isena pagótami ma ketasi waminabi tamujé tamí nulema, máputa Isaeli pagótami ju? ⁷Echalí Jesusi ku nijéwaga jeaneli: Ketásitamo risénsia ju máputamo machiboa chu kilíbuko echi Walubela Onorúami ne sébali olama mapurigá chopi Binói risénsia niwa mapu olama. ⁸Chopi mapalí echi Wabé Galabé Riosi Iwigala 'yemi mi yuwa moba nawama, echalí Riosi Iwigala 'yemi mi suwaba nulema. A'lí bichétamo jiweratami níibo echo'ná 'yemi sulálachi niráa. A'lí bichétamo ne suníami niráa nawisásiya

simabo Nijé Ra'íchala, chópitamo bachá niráa nawésabo jena'í Jerusalémachi. A'lí bichétamo ayénachó nawésabo ne suníami echo'ná Juréachi anilíwachi kawírali. Ayénachótamo nawésabo echo'ná Samáriachi anilíwachi kawírali. Ayénachótamo nawésabo echo'ná suníami ne wabé mikabéana jena'í wichimóbachi.

⁹A'lí mapalí Jesusi ma sunili je'ná jerigá ra'icha, echalí Binói ke sayiná ku torúami níili echo'ná ripá riwigachi. Chopi aboni abijí wabé 'nigá jali mapuyénasí Jesusi echirigá ku torúami níili. Echalí Jesusi echo'ná ripá riwigachi biléana nolírali ku bokowili. A'lí aboni ma ketasi auchecho siné riwali. ¹⁰Chopi okuá rijói ne wabé tosákami napáchami ke sayiná jábali echo'ná aboni yuwa, mapalí aboni abijí wabé 'nigá jali mapalí Jesusi echirigá ku muyénnali. ¹¹Echalí echi okuá rijói janeli: 'Yemi pagótami, máputamo echo'ná Galiléachi piréami ju, ¿churékulátamo echirigá wabé 'neni echo'ná ripá riwigachi? ¡Je'ná Jesusi mapu jena'í 'yémichi jonsa ku torúami níili echo'ná ripá riwigachi, échiko pe waminánomí achigórigá ku nolínama mapurigátamo riwali ku simíami echo'ná ripá riwigachi!

**Echi Matíasi chapirúami níili mapurigá binói bilé níima
echi auché jaré makói miná bilé yuwa**

¹²Echalí aboni ku simíbali echo'ná ripá rabó jonsa mapo'ná Olíbochi anilíwachi níili, mapo'ná pe mulubé ju echo'ná Jerusalémachi jonsa, mapuyena risénsia níili bilé rijói simea siné isábawachi rawé. A'lí aboni ku sili echo'ná walúlachi Jerusalémachi anilíwachi. ¹³Echalí si'néami aboni echo'ná osánamótami ripá kalírali sili mapo'ná aboni kochili. Echi Pegro níili mapu echo'ná kochili, echi Jakobo ayénachó, echi Juani asíchiko, echi Antresi ayénachó, echi Jilipi asíchiko, echi Tomasi ayénachó, echi Batalomé ayénachó, echi Mateo asíchiko, echi Jakobo ayénachó mapu echi Alibeo riwéami rijói ranala níili, echi Simoni asíchiko mapu ayénachó Selote rijílati, echi Júrasi asíchiko, echi mapu echi Jakobo rijimala níili. ¹⁴Echalí si'néami je'ná sinibí bilénapi niráa Riosi yuwa tániga ra'ichábiya napawili, echi jaré muguí bichiyyami yuwa, echi Jesusi iyela, María riwéami yuwa ayénachó, echi jaré Jesusi ritémawala yuwa asíchiko.

¹⁵A'lí echalí rawé echi jaré mapu galá bichiyyami níili mapuyena bilé kiento miná osá makói níili. A'lí echi Pegro echo'ná nasipa aboni yuwa wiliska janeli: ¹⁶'Yemi ritémtami, arigá 'wérali níili mapu suwaba achigórigá ikimea mapurigá bachá niráa osirúami níili echo'ná Riosi Ra'íchala oselíwalachi. A'lí ki'yánala niráa echi Rabiri riwéami rijói echo'ná osali mapurigá echi Galabé Riosi Iwigala binérali osoyá. A'lí binói osali mapurigá ikimea riwéali echi Júrasi jiti, echi mapu bayérali echi jaré sontarsi mapurigá aboni bogogá chapimea echi Jesusi. ¹⁷A'lí echi Júrasi chabénala tamujé yuwa iyénali. A'lí échiko ayénachó 'yárami níili mapurigá binói achigórigá nochama mapurigá tamujé aboni nocha, Riosi Ra'íchala nawésiya.

¹⁸A'lí echi Júrasi galá natétarami níili mapujiti binói echirigá chati olali. A'lí echi wenomí natétarami chapirúami níili mapurigá biléana uchíi kawí ralirúami níima. Chopi echi Júrasi a binói niráa wijaga, ne nasipa chi'wali. A'lí suwaba 'machínali binói siwala. ¹⁹A'lí mapalí echo'ná Jerusalémachi piréami galá machili je'ná jeyiri, echalí aboni Asélamachi anilíwachi riwali echi kawí. A'lí echo'ná je'ná jerigá anilíwachi ju, Ralámuli ra'íchala niráa: Kawí léami.

²⁰A'lí je'ná jerigá osirúami ju echo'ná Riosi Ra'íchala oselíwalachi, echo'ná Salmo anilíwachi:

Miná bi'neli ariwesi binói bitélachi.

Ke wesi pirélasi echo'ná.

A'lí auché biléana, je'ná jerigá osirúami ju:

Galá níima auché bilé rijói chapisáa binói nóchala.

²¹ Galá níima bilé chapisuwa je'ná jaré rijói bichíiyami mapu chabé chokichí jonsa sinibí rawé 'yénali tamujé yuwa, mapalí echi Walubela Jesusi tamujé tamí yuwa iyénali. ²² A'lí echi rijói nawésami níima tamujé tamí yuwa mapurigá echi walubela Jesucristo ma ku owínali mapalí Binói ma mukúami níili. A'lí echi rijói galá omérama echirigá nawésiya mapujiti binói bilé níima mapu tamujé tamí yuwa iyénali chabé chokichí jonsa mapalí echi Juani galá pagoli echi Jesusi, echalí yénasí mapalí echi Walubela Jesusi ku torúami níili echo'ná ripá riwigachi.

²³ A'lí aboni okuá jáwali mapu aboni yuwa 'yénali. Echi bilé, José riwéami níili, echi mapu Barsabasi rijírami níili. A'lí échiko ayénachó Justo riwéami níili. A'lí echi auché bilé rijói Matíasi riwéami níili. ²⁴ A'lí aboni Riosi yuwa ra'íchaga je'ná jerigá aneli: Walubela Riosi, Mujé bi'nélipi galá machí mapurigá ibili tamujé 'nata pachana tamujé sulálachi niráa. Jipi tamujé tamí galá machili chu yiri 'nalina mi nakí chapínala je'ná okuá rijói. ²⁵ A'lí echi bilé, tamujé tamí yuwa nochama mapurigá mujé tamujé tamí júuli nochánala. A'lí échiko echirigá chapimea echi Júrasí nóchala, mapujiti echi Júrasí achigórigá julárami níili nochánala mapurigá tamujé julárami níili. Chopi echi Júrasí wabé chati olali. Echijiti binói ketasi waminabi julárami níili echirigá nochánala. A'lí echi Júrasí wamí chakena simili, mapo'ná binói kastigo 'yárami níima riwéali, mapujiti échiko chabé chokichí jonsa wabé chati oláami níili. ²⁶ A'lí Riosi galá machírali aboni mapurigá echi Matíasi echirigá chapirúami níima. A'lí echalí jonsa echi Matíasi anérami níili, Riosi jiti julárami niráa, achigórigá mapurigá echi auché jaré makói miná bilé anérami níili.

Echi Wabé Galabé Riosi Iwigala nawali jena'í wichimóbachi

2 A'lí mapalí ma sébali echi jaré Juríosi anilíwami pagótami omáwalachi, echi mapu Pentikostesi anilíwami níili, echalí bilénapi napawika muchili si'néami echi jaré mapu bichíiyami níili Jesucristo niráa. ² A'lí ke sayiná echo'ná ripá riwigachi jonsa, galá námalati mapuyiri bilé wabé iwéami iká. A'lí ne wabé ná chaneli echo'ná pachá kalírali mapo'ná echi jaré bichíiyami muchili. ³ A'lí ke sayiná aboni riwali kúuchi na'í rajáami echo'ná moba ibílana aboni mo'ólachi muchíbami. ⁴ A'lí ke sayiná echi Wabé Galabé Riosi Iwigala galá nuleli ne si'néami aboni echo'ná pachana aboni sulálachi niráa. A'lí ibili aboni chótali bilé si'nú ra'íchali ra'icha, mapurigá echi Wabé Galabé Riosi Iwigala echirigá galá ra'ichárali ibili aboni.

⁵ A'lí echalí rawé jaré Juríosi echo'ná Jerusalémachi napawili, mapu ne suníami jena'í wichimóbachi jonsa auchecho ku sili. A'lí si'néami aboni chopi bichíiyami níili mapurigá echi jaré Juríosi pagótami chopi bichííli. ⁶ A'lí mapalí ke sayiná echirigá ná chaneli, echalí we yáati echo'ná napawili si'néami echi jaré Juríosi pagótami mapu ne wikanáami jena'í wichimóbachi jonsa síami níili. A'lí aboni ne wabé 'nátaga majaga kipuli, mapujiti ibili aboni námali echi jaré bichíiyami ibili niráa ra'íchachi echi auché jaré isena ra'íchali niráa, mapurigá ibili echi jaré wikanáami piréami Juríosi pagótami ra'íchali. ⁷ Echijiti echi jaré wikanáami piréami Juríosi we majaga 'néniga, a'nagupi jeanigá rukueli: ¿Kecha echo'ná Galiléachi piréami ju si'néami je'ná jaré mapu ra'icha? ⁸ ¿Churigata galá nami tamujé ibili

ra'íchala ra'íchachi aboni, echi máputa tamujé ibílika kúuchika ra'íchali? ⁹ Jaré tamujé echo'ná Pátiachi piréami ju. Auché jaré tamujé echo'ná Méliachi piréami ju. Auché jaré tamujé echo'ná Elámachi piréami ju. A'lí auché jaré tamujé jena'í Juréachi piréami ju. Auché jaré tamujé echo'ná Kaparósiachi piréami ju. Auché jaré tamujé echo'ná Póntochi piréami ju. A'lí auché jaré tamujé echo'ná Ásiachi piréami ju. ¹⁰ A'lí auché jaré tamujé echo'ná Príjichi piréami ju. Auché jaré tamujé echo'ná Pampíliachi piréami ju. Auché jaré tamujé echo'ná Ejíptochi piréami ju. Auché jaré tamujé echo'ná Ábrikachi piréami ju, mapo'nata wikanáami piré echo'ná Sirénachi pe waminana. A'lí auché jaré tamujé echo'ná Rómachi piréami ju. A'lí jaré echo'ná Rómachi piréami, Juríosi pagótami niráa ranarúami níili. Auché jaré isena pagótami ju, chopi aboni ma binératami níili bichíiya mapurigá echi jaré Juríosi bichíi. ¹¹ A'lí auché jaré tamujé echo'ná Krétachi piréami ju. Auché jaré tamujé echo'ná Arábiachi piréami ju. Chopi ne si'néamita galá nami echi jaré aboni galá ra'íchachi tamujé aboni ra'íchawala niráa, mapurigá tamujé wikabé isena ra'íchala ra'íchata. A'lí aboni we nawesa jeanigá mapu Riosi ne wabé Walubela ju.

¹² A'lí si'néami echi jaré wikanáami piréami Juríosi ne wabé majali. A'lí aboni tarapé chirigá machili churigá echi jaré Jesucristo jiti bichíiyami galá omérali echirigá ra'icha, echi wikabé isena ra'íchali. Echijiti aboni a'nagupi jeanigá rukueli: ¿Churigá aniwáami ju suwaba je'ná? ¹³ A'lí auché jaré aboni we kachigá jeanili: Aboni chopi we tékuli ju.

Pegro we nawesa echi pagótami

¹⁴ A'lí echi Pegro we yáati wilísali, echi auché jaré makói miná bilé yuwa. A'lí binói o'wali ra'íchaga, jeanigá nawésali echi jaré pagótami: 'Yemi Juríosi pagótami, ayénachó si'néami 'yemi máputamo jena'í Jerusalémachi piré, galá machisí suwaba je'ná jeyiri. Ne galá namsi mapurigá nijé 'yemi nimí anema. ¹⁵ Je'ná wikabé rijói ketasi tékuli ju mapurigá 'yémitamo mayé, mapujiti ke 'me cho rawéwachi ju. ¹⁶ Je'ná jeyiri chopi sébachi ju mapurigá echi walula Riosi jiti nawésami, Joeli riwéami rijói, chabé ki'yá osali mapurigá ikimea riwéali. Échiko je'ná jerigá osali: ¹⁷ Je'ná jerigá aní Riosi:

Echalí ne jubá rawé Nijeni 'yama Nijé wabé Galabé Iwigala mapurigá pachana asimea echo'ná echi jaré pagótami sulálachi.

A'lí echi jaré 'yemi kúchala kúrowi galá nawisama Riosi Ra'íchala niráa, echi jaré 'yemi kúchala iwé ayénachó.

A'lí Nijeni wikabé namuti machíratama echi jaré 'yemi kúchala temali.

A'lí Nijeni 'yama mapurigá echi jaré 'yemi níwala ochérami wikabé namuti rimuma.

¹⁸ A'lí Riosi ayénachó jeaní:

Echalí rawé Nijeni 'yama Nijé wabé Galabé Iwigala mapurigá échiko echo'ná pachana asimea echi jaré pagótami sulálachi, si'néami mapu ikí tamí bichíiga nijéwa.

A'lí aboni galá nawisama Nijé Ra'íchala.

¹⁹ Echalí Nijeni wabé omériga olama karúmati namuti echo'ná ripá riwigachi, mapurigá jena'í wichimóbachi piréami pagótami galá riwimea; ayénachó Nijeni wabé omériga olama jena'í wichimóbachi mapurigá ke wesi pagótami omero echirigá olayá.

A'lí jena'í wichimóbachi Nijeni niwama walú leíname, walú na'í rajáami ayénachó, walú molí asichiko, mapurigá jena'í wichimóbachi piréami pagótami galá machimea mapurigá Nijeni ne Walubela Riosi ju.

²⁰ A'lí ke cho sébachi echalí echi Walubela Riosi walubé rawéwalachi, mapalí Riosi waminabi walubélaga anérami níima, echalí rawé echi rayénali waminá chona wilabama. A'lí echi michá mapurigá lá najítama.

²¹ A'lí si'néami mapu ikí tániko mapurigá echi Walubela Riosi ku'wírama aboni, ne si'néami aboni galá ku wikáwarami níima.

²² Yemi Israeli pagótami, ne galá namsi nijé ra'íchala: Riosi ne galabé nirali echi Jesusi, echi mapu echo'ná Nasarétachi bitéami níili. A'lí mapalí echi Jesusi iyénali echo'ná 'yémichi, Binói ne wabé omériga olali wikabé namuti mapurigá ke wesi pagótami omero echirigá olayá. A'lí Riosi echirigá omératali echi Jesusi mapurigá 'yémitamo ma galá riwisá mapurigá Binói wabé omériga olali, máputamo ne galá bichíbilo mapu echi Jesusi echi bilepi Walubela Riosi Ranala ju. ²³ A'lí mapalí 'yémitamo 'yárami níili echi Jesusi, echalítamo arigá nuleli auché jaré chati oláami pagótami bologá chapigá mi'línala. A'lí aboni arigá mi'yali echi Walubela Jesusi, echo'ná biléana kúrsichi michóniga. A'lí 'yémitamo nakili mapu echirigá olárami níima, chopi Riosi chabé ki'yánala, bachá niráa arigá echirigá 'nátaga katéwali mapurigá echirigá olárami níima. ²⁴ A'lí Riosi arigá ku owíntali echi Walubela Jesusi mapalí Binói ma mukúami níili, mapujiti tarapé chirigá níili mapu echi Jesusi waminabi mukúami niráa níima. ²⁵ A'lí echi Rabiri, echi Jesusi jiti rugá, je'ná jeanigá osali:

Sinibini riwali echi Walubela bacháami tamí yuwa atíami.

A'lí Binói sinibí mulubé tamí yuwa atí mapurigá ke wesi tamí chibi ologá nokératama.

²⁶ Echijiti nijeni ne wabé kaníli sulachí niráa, ayénachóni wabé kanílaga ra'íchali.

A'lí bicheni ayénachó galá bichíiga bitélama rijói niráa,

²⁷ mapujítimi ketasi tamí ariwema mukúami niráa echo'ná chu'wechi.

A'lí bichemi nirapé ariwema mapurigá nijé sapala miná bikamea mapujítimi tamí ne wabé galeli.

²⁸ Mujemi tamí galá machírali mapurigani sinibí niráa bitéami níima.

A'lí bichemi wabé simírami tamí kanílatama mapalimi tamí yuwa iyénama.

²⁹ Pagótami, keni ritémawa: Echi ki'yá bitéami Rabiri riwéami rijói mapurigá tamujé onolá níili, si'néami tamujé Jurfosi pagótami yuwa. A'lí si'néami 'yémitamo galá machí mapurigá echi Rabiri miná mukugá, chu'wirótami níili, mapujiti mulubé tamujé tamí yuwa abijí chukú mapo'ná binói chu'wirólati. ³⁰ Chopi mapalí echi Rabiri abijí bitéali jena'í wichimóbachi, echalí echi Rabiri we nawésami níili mapurigá Riosi nuleli binói nawisánala. Echijiti echi Rabiri ne galá machili mapurigá Riosi ne bichíwaga aneli mapu minánomí Riosi Binói wilama riwéali bilé binói Rabiri kúchala kúchuwala mapurigá Walubela Ku'wíriami niráa. A'lí échiko Cristo anérami níima riwéali. A'lí echi Cristo wilárami níima riwéali mapurigá Binói sinibí niráa nulama Walubela Silíami niráa mapurigá echi Rabiri walula silíami níili. ³¹ A'lí echi Rabiri echirigá bachá niráa machigá nawésali mapurigá echi Cristo

ma mukusáa, ku owínama riwéali. A'lí echi Rabiri ayénachó nawésali mapurigá echi Cristo ketasi ariwérami níima riwéali mukúami niráa, ayénachó mapurigá echi Cristo sapala nirapé bikáami niráa níima riwéali.³² A'lí Riosi ne bichíwali ku owíntali je'ná Jesusi. A'lí si'néami tamujé ne bichíwaga nawesa mapurigata ma riwali echi Binói ma ku bitéami niráa.³³ A'lí echi Jesusi ku torúami níili echo'ná ripá riwigachi. A'lí Binói ma asíbali echo'ná watoná Riosi yuwa, ne Walubela niráa. A'lí Riosi Onorúami ma 'yali echi Jesusi echi Wabé Galabé Riosi Iwigala, mapurigá Riosi bachá niráa bichíwaga aneli mapu Binói echirigá 'yama riwéali. A'lí echi Jesusi ma tamujé tamí 'yali echi Wabé Galabé Riosi Iwigala. Echijiti jípi rawé echi Jesusi iwériga olá ne suwaba je'ná jaré namuti mapu ikítamo galá námiga ritiwá oluwáwachi.³⁴ A'lí echalí rawé echi Rabiri ketasi cho ku torúami níili echo'ná ripá riwigachi. Chopi Rabiri binói jeanigá osali mapurigá osirúami ju echo'ná Riosi Ra'íchala oselíwalachi:

Echi Walubela Riosi je'ná jerigá aneli echi tamujé Walubélawala:

Asagá jena'í keni watonachi,

³⁵ mapuyénasí Nijeni suwaba omérama ne si'néami echi jaré mapu ikí mi asayera.

³⁶ A'lí echi Pegro waminabi jeanigá nawésali: Si'néami 'yemi Isaeli pagótami ne bichíwaga machisí mapurigá Riosi ma wilali echi Jesusi mapurigá Walubela Ku'wíriami niráa, echi mapu Cristo anérami ju. Chopi 'yémítamo nulali echo'ná kúrsichi michóniga mi'línala echi Jesusi.

³⁷ A'lí mapalí echi jaré wikabé pagótami ma námali je'ná jeyiri, a'lí aboni we yáati ne wabé o'mónali sulachí niráa. A'lí aboni jeanigá rukueli echi Pegro, echi auché jaré julárami ayénachó: 'Yemi, tamujé ritémawala, ¿churigá galá níima olásata tamujé?³⁸ A'lí echi Pegro ku njéwaga jeaneli: Si'nú, galabé niráa 'nátaga, wikáwali ku tansi Riosi. Ayénachó ba'wí jiti pagótami níflasi ibili 'yemi máputamo galá bichíi Jesucristo niráa, mapurigá 'yémítamo ma ku wikáwarami níbo mapurigátamo chati olali. A'lí átamo echirigá olásagá, Riosi 'yemi mi 'yama echi Wabé Galabé Riosi Iwigala.³⁹ A'lí Riosi ne bichíwaga anili mapurigá Binói echirigá 'yemi mi 'yama riwéali echi Galabé Riosi Iwigala, átamo galá bichísagá Jesucristo niráa. A'lí Riosi ayénachó bichíwaga anili mapurigá Binói achigórígá 'yama riwéali echi jaré 'yemi kúchuwala, ayénachó mapurigá Binói achigórígá 'yama riwéali wikabé echi auché jaré isena pagótami mapu mikabé niráa muchuwi Riosi yuwa. Ayénachó Riosi achigórígá 'yama riwéali ne si'néami echi auché jaré mapu ikí Riosi Binói nakili bayénala.

⁴⁰ A'lí echi Pegro ayénachó auché jaré wikabé ra'íchaga jeanigá nawésali aboni: Galá bichíysi Jesucristo niráa, mapurigátamo ketasi wi'káami níbo mapurigá echi auché jaré jena'í wíchimóbachi piréami pagótami.⁴¹ A'lí si'néami echi jaré mapu ikí galá bichíiga njéwali mapurigá echi Pegro nawésali, aboni we yáati ba'wí jiti pagótami níili. A'lí echalí rawé echi jaré bichíiyami yuwa muwéwarami níili mapuyena bikiyá mili pagótami, si'néami echi jaré mapu ayénachó ma galá bichíiyami níili.⁴² A'lí si'néami mapu ikí bichíiyami níili, sinibí waminabi galá bichíili mapurigá echi jaré mapu Riosi júuli nawesánala galá binérali aboni. A'lí ne si'néami aboni a'nagupi wabé galigá piréali echi auché jaré bichíiyami yuwa. A'lí sinibí rawé aboni galá napawili mapalí aboni rojuániga ko'wali pe téa pani, ayénachó mapalí aboni Riosi yuwa táníga ra'íchali.

Si'néami echi jaré bichíiyami napawika muchili

⁴³ A'lí ne si'néami pagótami ne wabé majaga 'náitali. A'lí echi jaré mapu julárami níili nawisánala wisabé wabé omériga olali mapurigá ke wesi auché jaré pagótami echirigá omérali olayá. A'lí wikabé auché jaré karúmati 'nératami níili echi pagótami mapurigá aboni galá machimea mapu Riosi ne Walubela ju. ⁴⁴ A'lí si'néami mapu ikí galá bichíliko, aboni napawika muchili. A'lí aboni bilénapi niráa napawika muchúwali ne suwaba aboni níwala namuti mapurigá ke wesi newalema jaré namuti. ⁴⁵ A'lí mapalí jaré mapu bichíiyami níili we newaleli ko'wáami, chiní keremá, a'lí echi auché jaré bichíiyami miná ralinéali aboni níwala namuti, aboni kawíwala ayénachó. A'lí aboni rojuániga nachútali echi wenomí, karúmati natigala, ibili niráa mapu ikí aboni echirigá newaleli. ⁴⁶ A'lí sinibí rawé si'néami aboni napawili echo'ná echi walubé Juríosi ri'obáwalachi. A'lí echo'ná aboni kalílachi aboni rojuániga ko'wali echi pe taa pani, ayénachó aboni a'nagupi galigá, wabé kaníliga ko'wali aboni ko'wámawala. ⁴⁷ A'lí si'néami aboni sinibí rawé waminabi walubélaga aneli Riosi. A'lí si'néami echi auché jaré pagótami ne galabé nirali echi jaré mapu bichíiyami níili Jesucristo niráa. A'lí sinibí rawé echi Walubela waminabi muwéwali aboni yuwa si'néami echi auché jaré mapu galá bichíiga ku wikáwarami níliko.

Bilé rijói ke akáanami ku sa'wárami níili

3 A'lí siné rawé mapuyénako sébali nasipa alíwachi, mapalí Riosi yuwa ra'ichálawachi níili, echalí echi Pegro, echi Juani napawika simíbali echo'ná ripáami echi walubé Juríosi ri'obáwalachi. ² A'lí sinibí rawé bilé rijói párami níili echo'ná walubé ri'obachi, echi mapu ke akáanami níili chokichí mapalí binói ranálati jonsa. A'lí sinibí rawé échiko achálati echo'ná walubé ri'obachi, biléana yéachi mapo'ná Wabé Simati Yéachi anérami níili, mapurigá binói kólige tánama echi jaré pagótami echo'ná mo'wíami. ³ A'lí mapalí echi rijói ke akáanami riwali echi Pegro, echi Juani yuwa, mapalí aboni echo'ná walubé ri'obachi mo'wímea riwéali, echalí binói risúu anigá kólige tánali aboni. ⁴ A'lí echi Pegro, echi Juani ayénachó, galá riwali echi rijói. A'lí echi Pegro jeaneli: ¡Tamujé tamí galá 'ne! ⁵ A'lí echi rijói wabé kaníliga 'nénali aboni, mapujiti binói mayeli mapu aboni kówiga 'yama riwéali jaré wenomí. ⁶ A'lí echi Pegro jeaneli: Tarapeni niwa echi wenomí plata, nirapeni niwa echi wenomí oro. Chopi mápuni njé niwa nimí 'yama. Echi Walubela Jesucristo echo'ná Nasarétachi bitéami. Binói mi jeanigá nulé: ¡Ku wiliska! ¡Ku simigá! ⁷ A'lí echi Pegro chapigá echi rijói sikálachi watonachi, ku wilásali. A'lí we yáati ma galá ku sa'wárami níili echi rijói echo'ná binói ronólachi. ⁸ A'lí echi rijói mapu ke akáanami níili wabé kaníliga pochika wilíbali. A'lí biché binói ma galá ku iyénali. A'lí binói ayénachó bakili aboni yuwa echo'ná pachá echi walubé Juríosi ri'obáwalachi. A'lí binói wabé kaníliga pochika iyénali, jeanigá mapu Riosi ne Walubela ju. ⁹ A'lí si'néami pagótami riwali echi rijói ma galá ku iyénami. A'lí si'néami aboni ayénachó galá námali mapurigá echi rijói waminabi walubélaga aneli Riosi. ¹⁰ A'lí si'néami pagótami galá machili mapu echi níili echi rijói ke akáanami mapu chabénala niráa echo'ná walubé Juríosi ri'obáwalachi yéwalachi kólige taa asali, mapo'ná Wabé Simati Yéachi anérami níili. A'lí si'néami aboni wabé majaga 'náitali mapurigá ikili echi rijói yuwa.

Echi Pegro galá nawésali echí pagótami

¹¹ A'lí echí rijói mapu ma ku sa'wárami níili abijí chapigá iyénali echí Pegro, echí Juani sikálachi mapalí si'néami echí jaré wikabé pagótami wabé júmaga napawili aboni yuwa echo'ná machímana echí walubé Juríosi ri'obáwalachi mapo'ná Salomoni níwalachi anélati. A'lí si'néami echí jaré pagótami ne wabé majaga 'náatali mapujiti aboni riwali mapurigá echí rijói mapu ke akáanami níili ma galá ku sa'wárami níili. ¹² A'lí echí Pegro je'ná jerigá 'néniga jeaneli: 'Yemi Isaeli pagótami, ¿churékulátamo echirigá wabé majaga 'nata? 'Yémitamo tamujé tamí wabé 'néniga jawi mapujítitamo mayé mapu tamujé aboni ku sa'wali je'ná rijói. A'lí 'yémitamo mayé mapu tamujé echirigá omérati mapujítita wabé omérami ju, mapujítita wabé galabé o'wikéami ju Riosi keremá. Chopi tamujé aboni ketasi omérati echirigá auchecho ku iyéntiya je'ná rijói. ¹³ Chopi si'winárigá Riosi Binói ma ku sa'wali je'ná rijói, mapu ke akáanami níili. Échiko ne Walubela Riosi ju. Échiko ayénachó echí jaré ki'yá piréami tamujé pagótamawala Riósawala ju. A'lí Échiko ayénachó echí Abrami níwala Riosi ju, echí Isaka níwala ayénachó, echí Jakobo níwala asíchiko. A'lí jipi rawé Riosi je'ná jerigá ologá, waminabi walubélaga wilali Binói Ranala Jesusi, echí mapu 'yémitamo 'yali echí jaré o'wéala mapurigá Binói miná mi'lirúami níima. A'lí mapalí echí walula silíami Pilato riwéami nakili ku machí pánala echí Jesusi, echalí 'yémitamo ketasi nakili mapu Binói ku machí pátami níima. ¹⁴ Echalí 'yémitamo ketasi nakili mapurigá echí Wabé Galabé Wachínaga Oláami Rijói ku machí pátami níima. 'Yémitamo chopi nakili mapurigá ku machí pátami níima bilé wabé chati oláami rijói, mapu wabé nikóami níili. ¹⁵ A'lí 'yémitamo echirigá miná mi'yali echí Galabé Rijói mapu omérami ju nijáa mapurigá echí pagótami sinibí niráa pirélama. Chopi Riosi ma ku owíntali echí Jesusi, mapalí Binói ma mukúami níili. A'lí tamujé ne bichíwaga nawesa máputa ma riwali echirigá ku bitéami echí Walubela Jesusi. ¹⁶ Tamujé ne galá bichíi echí Walubela Jesucristo Ra'íchala. Echijiti je'ná rijói ma ku sa'wárami níili. 'Yémitamo galá machí mapu je'ná rijói chabénala ke akáanami níili, mapujítitamo echirigá galá machí binói. Tamujé ne galá bichíi Jesucristo Ra'íchala, echijiti je'ná rijói ma ku sa'wárami níili. 'Yémitamo ma galá ritiwá mapurigá binói ma ku sa'wíiami ju.

¹⁷ 'Yemi keni pagótawa, nijeni galá machí mapu 'yémitamo ketasi galá machigá olali, mapalítamo nulali mi'línala echí Walubela Jesusi. A'lí echí jaré 'yemi o'wéala wala nirapé galá machili mapurigá aboni olali, mapalí aboni nulali echirigá olánala. ¹⁸ Chopi Riosi ariweli mapu echirigá olárami níima, mapujiti Riosi Binói chabé ki'yá nulali nawisánala mapurigá echí Cristo arigá wabé risíu olálami níima riwéali. Chopi Riosi arigá wilali echí Cristo mapurigá Walubela Ku'wíriami niráa. A'lí echí jaré Riosi níwala nawésami, chabénala niráa, echirigá nawésali mapalí echí Cristo ketasi cho ranarúami níili jena'í wichimóbachi. ¹⁹ Echijiti ne si'néami 'yemi si'nú galabé niráa 'nátaga ku ro'wisi Riosi yuwa, mapurigá 'yémitamo ku wikáwarami níibo mapurigátamo chati olali. A'lí Riosi sinibí niráa 'yemi mi kanílatama sulachí niráa, ²⁰ mapalí Binói auchecho ku julama echí Walubela Jesusi echo'ná 'yémichi. A'lí Riosi wilali echí Walubela Jesusi mapurigá Walubela Ku'wíriami niráa, echí mapu Cristo anérati ju. A'lí Riosi chabé ki'yá jonsa echirigá julama riwéali echí Cristo, echo'ná 'yemi Juríosi pagótamichi. ²¹ Chopi jipi arigá 'wérati ju mapu echí Walubela Jesucristo asimea echo'ná ripá riwigachi mapuyénasí Riosi a'lárama ne

suwaba namuti. A'lí echi jaré ki'yá piréami Riosi jiti nawésami bachá niráa anili mapu echirigá ikimea riwéali. ²² A'lí echi ki'yá bitéami Moisesi galá nawésali echi jaré ki'yá piréami tamujé pagótamawala jeanigá: Echi Walubela Riosi minánomí wilama bilé 'yemi pagótamawala mapurigá Walubela Riosi jiti Nawésami niráa, mapurigá Binói ayénachó tamí wilali. A'lí arigá 'wérali níima máputamo galá nijéwaga olabo ne suwaba mapu ikí Binói 'yemi mi nuleko, ²³ mapujiti mapuyíripi 'yemi a ketasi galá nijéwaga olásagá mapurigá echi Walubela Riosi jiti Nawésami 'yemi mi nulé, échiko miná mi'lirúami níima. A'lí échiko ma ketasi waminabi asimea echi auché jaré 'yemi pagótamawala yuwa. ²⁴ A'lí ne si'néami echi jaré ki'yá piréami o'wéala Riosi jiti nawésami bachá niráa nawésali jipi rawé jiti rugá. A'lí echi ki'yá bitéami Samueli ne bachá niráa echirigá nawésali. A'lí ne si'néami echi auché jaré Riosi jiti nawésami peé wakinánokuá piréami ayénachó echirigá nawésali. ²⁵ Yémítamo echi jaré o'wéala Riosi jiti nawésami pagótamawala ju. A'lí Riosi galá katéwaga ra'íchali echi jaré ki'yá piréami 'yemi pagótamawala yuwa, mapalí Binói jeaneli echi ki'yá bitéami Abrami jeanigá: Ne si'néami echi jaré pagótami mapu ikí minánomí pirélama jena'í wichimóbachi galá ku'wíratami níima echi bilé Rijói jiti mapu minánomí ranarúami níima, mujé pagótamawala Ranala niráa. ²⁶ A'lí mapalí Riosi ku owíntali Binói Ranala mapalí échiko ma mukúami níili, echalí Riosi bachá niráa júuli Binói Ranala echo'ná 'yémichi mapurigá 'yémítamo galá ku'wíratami níibo, mapurigátamo ketasi waminabi chati olabo, chopi mapurigátamo ibili niráa ku ro'wibo Riosi yuwa.

Echi Pegro, echi Juani wabé wi'nijírami níili

4 A'lí mapalí echi Pegro, echi Juani ayénachó abijí je'ná jerigá ra'íchiya jali echi jaré pagótami, echalí ke sayiná echo'ná aboni yuwa sili echi jaré o'wéala sacerdote echo'ná walubé Juríosi ri'obáwalachi nuláami, echi walula kapitani echo'ná ri'obachi tibúami ayénachó, echi auché jaré Juríosi mapu Saruseo anilíwami níili asichiko. ² A'lí ne si'néami echi jaré o'wéala Juríosi ne wabé na'áwali mapujiti echi Pegro, echi Juani binérali echi jaré pagótami jeanigá mapu ne si'néami echi jaré suwíami waminánomí ku owíntarami níima, mapujiti echi Walubela Jesusi ma ku owínali mapalí Binói ma mukúami níili. ³ A'lí echi jaré o'wéala júuli chapíñala echi Pegro, echi Juani ayénachó. A'lí aboni echo'ná pachá kumurachi mo'wárami níili, ba'alínala rawé yénasí, mapujiti echalí ma we alíwachi níili. ⁴ A'lí ne wikabé echi jaré pagótami galá bichíili mapalí aboni echirigá nawésarami níili echi Galabé Riosi Ra'íchala. A'lí echi jaré rijói mapu bichíili, ne wikabé, mapuyena malí mili rijói níili.

⁵ A'lí ba'alínala rawé echo'ná Jerusalémachi napawili echi jaré Juríosi o'wéalawala, echi jaré o'wéala ochérami ayénachó, echi jaré nulalíwami binériami asichiko. ⁶ A'lí echi Anasi ayénachó echo'ná nawali. Échiko ne walubela sacerdote níili echalí bamíbali. A'lí echi Kaijasi ayénachó echo'ná nawali, echi auché bilé Juani ayénachó, echi Lijanto ayénachó. A'lí ne si'néami echi auché jaré ayénachó napawili mapu ikí ritémtami níili echi walubela sacerdote ritémawala niráa. ⁷ A'lí aboni júuli 'nolánala echi Pegro, echi Juani ayénachó. A'lí echo'ná nasipa abónichi jáwika, jeanigá rukuélati: ¿Chigá 'yemi mi nuleli je'ná jerigá olánala? ⁸ A'lí echi Wabé Galabé Riosi Iwigala ne galá nuleli echi Pegro mapalí binói jeanigá nawésali echi pagótami: 'Yemi Israeli pagótami o'wéalawala, ayénachó 'yemi o'wéala ochérami,

⁹'yémitamo tamujé tamí rukué mapu churigá galabé olírami níili echi bilé rijói mapu ke akáanami níili. A'lí bichétamo tamujé tamí rukué mapu churigá ku sa'wárami níili echi rijói. ¹⁰'Yemi aboni galá ritiwá mapurigá je'ná rijói ma ku sa'wárami níili. A'lí nijé 'yemi nimí ruyée mapu echi Walubela Jesucristo níili mapu iwériga ku sa'wali je'ná rijói. A'lí nijé 'yemi nimí je'ná jerigá ruyée mapurigá ne si'néami echi auché jaré Isaeli pagótami ayénachó galá machimea mapurigá Jesucristo mapu echo'ná Nasarétachi bitéami níili, echirigá iwériga ku sa'wali je'ná rijói. 'Yémitamo nuleli echo'ná kúrsichi mi'línala echi Walubela Jesucristo, chopi Riosi Binói ma ku owíntali Jesucristo mapalí Binói ma mukúami níili. ¹¹'Yémitamo mapurigá jaré rijói kalí niwáami ju mapu miná chakena pali bilé we galabé rité, echi mapu echo'ná ri'lé sitochi bachá tigótami níima riwéali, mapujítitamo achigórigá olali mapalítamo waminá kichili echi Walubela Jesucristo. Échiko wilárami níili mapurigá Walubela Ku'wíriami niráa. ¹²A'lí ke wesi auché bilé rijói galá omero tamujé tamí ku wikáwiya mapurigata chati olali. A'lí Riosi chopi júuli echi Walubela Jesucristo jena'í wichimóbachi mapurigá Binói tamujé tamí ku wikáwama.

¹³A'lí echi jaré o'wéala námali mapurigá echi Pegro, echi Juani echirigá tarapé majaga nawésali. A'lí echi jaré o'wéala wabé 'nátaga muchili mapujiti aboni ketasi machili churigá echi Pegro, echi Juani galá omérali echirigá machíami niráa ra'icha. Echi jaré o'wéala galá machili mapurigá echi Pegro, echi Juani ketasi binératami níili echi jaré nulalíwami binériami jiti. A'lí aboni chopi galá machili mapurigá echi Pegro, echi Juani chabénala echi Jesusi yuwa 'yénami níili. ¹⁴A'lí aboni riwali echo'ná aboni yuwa wilámi echi rijói mapu ma ku sa'wárami níili. A'lí aboni tarapé namuti omérali kastigo 'ayá echi Pegro, echi Juani, mapujiti si'néami pagótami riwali mapu echi rijói ne bichíwali ma ku sa'wárami níili. ¹⁵Chopi echi jaré o'wéala peé teli miná machí júuli echi Pegro, echi Juani echo'ná napawíkowachi jonsa. A'lí echi jaré o'wéala a'nagupi nakaréwaga ra'íchali, ¹⁶jeanigá: ¿Churigata olabo je'ná okuá rijói? Ne si'néami jena'í Jerusalémachi piréami pagótami ma galá machí mapurigá aboni wabé omériga olali mapurigá ke wesi auché jaré pagótami omero olayá, mapalí aboni ku sa'wali echi rijói mapu ke akáanami níili. A'lí tamujeta ketasi omérabo aniyá mapu echirigá ketasi bichíwali ju. ¹⁷Chópita galá ra'ámabo mapurigá jipi jonsa aboni ketasi waminabi je'ná jerigá nawesáma echi auché jaré pagótami, mapurigá echi auché jaré pagótami ketasi bichíima je'ná jerigá nawésalawami. ¹⁸Echalí echi Pegro, echi Juani auchecho siné bayélati. A'lí echi jaré o'wéala wabé ra'ámaga nuleli mapurigá aboni ketásirapé waminabi nawésaga binéraama echi Jesucristo Ra'íchala jiti.

¹⁹Chopi echi Pegro, echi Juani ku nijéwaga janeli: 'Yemi aboni galá 'nátaga machisí, acha risénsia ju Riosi yuwa máputa nijéwaga olabo mapurigá 'yémitamo tamujé tamí nulé, mapalí Riosi Binói si'winárigá tamujé tamí nuléachi. ²⁰Echijiti tamujeta tarapé chirigá ariwebo nawésiya mapurigata ma námali, ayénachó mapurigata ma riwali. ²¹A'lí echi jaré o'wéala bachá niráa galá ra'ámasa echi Pegro, echi Juani, a'lí waminá ku júuli. A'lí echi jaré o'wéala tarapé kastigo 'yalí aboni, mapujiti echi jaré o'wéala wabé majali mapujiti echi auché jaré pagótami, si'néami chopi waminabi walubélaga aneli Riosi, mapujiti Riosi echirigá omératali echi Pegro, echi Juani echiyena wabé omériga olayá mapurigá ke wesi auché jaré pagótami omero olayá, ²²mapujiti echi rijói mapu echirigá wabé omériga ku sa'wárami níili, nawosa makói minárapé bamíbamí níili.

Echi jaré bichíiyami táni mapurigá Riosi waminabi galá bichíiratama aboni

²³ A'lí mapalí echi Pegro, echi Juani echirigá ku julárami níili, echalí aboni we yáati ku simíbali mapo'ná echi auché jaré bichíiyami muchili. A'lí aboni suwaba ku ruyeli mapurigá echi jaré o'wéala sacerdote aneli, ayénachó mapurigá echi jaré o'wéala ochérami aneli. ²⁴ A'lí ma echirigá namsa, ne si'néami aboni napawika jeanigá ra'íchali Riosi yuwa: Tamujé Walubélawala, Mujé bilepi ju Riosi, mápumi niwáli echo'ná ripá riwigachi, je'ná wichimoba ayénachó. Mujé ayénachó niwáli echi walubé ba'wí, ne suwaba namuti mapu ikí nirú asíchiko. ²⁵ Mujé wabé Galabé Iwigala ne galá nuleli echi Rabiri. A'lí echi Rabiri mapurigá Mujé piónawala niráa níili. Echijiti Mujé wabé Galabé Iwigala ne galá nuleli mapalí echi Rabiri jeanigá osali:

¿Churékulá napawisa o'weli sinákaka na'áwali echi wikabé pagótami?

Jenaí wichimóbachi piréami pagótami sinibí wikabé namuti wabé 'yékaka chopi 'nata.

²⁶ A'lí echi jaré o'wéala silíami jenaí' wichimóbachi nuláami si'néami napawika sayérsali echi Walubela Riosi.

A'lí si'néami aboni ayénachó sayérsali echi Cristo mapu Riosi wilali Walubela Ku'wíriami niráa.

Ne si'néami echi jaré pagótami o'wéalawala echirigá yóniga sayérsali Riosi, echi Cristo ayénachó.

²⁷ Mapujiti jenaí' walúlachi ne bichíwali napawili echi walula Erorsi, echi auché bilé walula Pónkio Pilato riwéami ayénachó, echi auché jaré si'wina piréami pagótami ayénachó, echi jaré Isaeli pagótami asíchiko. A'lí ne si'néami aboni napawili echi we galabé Mujé Ranala Jesusi sayérsiya, echi mapu Mujé Binói wilali mapurigá Walubela Ku'wíriami niráa. ²⁸ A'lí aboni echirigá olali ne suwaba mapurigá Mujé Binói ki'yá chokichí jonsa galá 'nátaga katéwali mapurigá olárami níima riwéali wakinánala. ²⁹ Tamujé Walubélawala, jipi galá kipú Mujé mapurigá aboni tamujé tamí sayéraga ra'icha. Tamujé tamí jiwrérita mapurigata sinibí tarapé majaga nawésabo Mujé galabé Ra'íchala, mapujítita chopi mapurigá mujé piónawala niráa ju. ³⁰ Ayénachó tamujé tamí jiwrérita mapurigá tamujé galá omérabo echi jaré nayúkami ku sa'wayá, ayénachó mapurigata omérabo olayá echi jaré karúmati mapurigá ke wesi auché jaré pagótami omero olayá. Tamujé we galá bichíi echi we Galabé Mujé Ranala Ra'íchala. Echijiti echirigá wabé omériga olá Mujé mapurigá aboni galá bichíima tamujé nawésawala. ³¹ A'lí mapalí aboni ma sunili Riosi yuwa ra'icha, a'lí ke sayiná wabé nokali echi kalí echo'ná mapo'ná aboni napawika muchili. A'lí echi Wabé Galabé Riosi Iwigala ke sayiná ne galá nuleli ne si'néami echi jaré bichíiyami. A'lí aboni waminabi galá bichíiga nawésali Riosi Ra'íchala.

**Echi jaré bichíiyami rojuánaga nachútali aboni níwala namuti
echi auché jaré wabé tisúati bichíiyami yuwa**

³² A'lí echi jaré bichíiyami si'néami chópirigá 'nátali; ayénachó aboni a'nagupi galeli. A'lí ke wesi aboni mayeli mapu echi jaré namuti aboni níwala, mapurigá aboni níwala chopi níili. A'lí ke wesi aboni newaleli, mapujiti ibili aboni a'nagupi kóliga olali. ³³ A'lí jaré aboni julárami níili nawisánala. A'lí aboni wabé galá bichíiga waminabi nawésali echi auché jaré pagótami jeanigá mapu echi Walubela Jesusi ma ku owínali mapalí Binói ma mukúami níili. A'lí Riosi wabé galigá ku'wírali

ne si'néami echí jaré bichíiyami.³⁴ A'lí ke wesi aboni newaléami níili, mapujiti si'néami echí jaré bichíiyami mapu ikí níwali jaré kawí, jaré kalí keremá, aboni miná ralinéali ne suwaba.³⁵ A'lí aboni 'yali suwaba echí natigala echí jaré o'wéala mapu julárami níili nawisánala. A'lí biché aboni rojuániga nachútali echí jaré tisúati bichíiyami mapurigá ke wesi newalema.

³⁶ A'lí echo'ná aboni yuwa asali bilé rijói José riwéami echí mapu aboni ayénachó Benabé rijili (echí mapu je'ná jerigá aniwáami ju: Binói we kanílatiyami ju echí auché jaré.) A'lí echí José ku'wírali echo'ná walubé Juríosi ri'obáwalachi mapujiti binói bilé níili echí jaré Levita anilíwami. A'lí echí José ranarúami níili echo'ná Chíprechi anilíwachi kawírali, echo'ná nasipa walubé ba'wechi nirúami kawí.³⁷ A'lí je'ná José ralinéali bilé kawí binói níwala. A'lí binói 'yali ne suwaba echí kawí natigala echí jaré bichíiyami mapu julárami níili nawisánala, mapurigá aboni echirigá rojuániga nachútama echí jaré bichíiyami mapu wabé tisúati ju.

Echi Ananíasi, echí Sajira, we chati olali

5 Chopi echalí auché bilé rijói Ananíasi riwéami, binói upila Sajira riwéami yuwa, aboni ayénachó ralinéali bilé kawí.² Chopi je'ná rijói ketasi echirigá 'yali ne suwaba echí kawí natigala echí auché jaré mapu julárami níili nawisánala. Je'ná rijói wabé 'yékaka ologá, pe okuabi 'yali, chopi binói nakili mapurigá aboni mayema mapu binói ne suwaba nijili. A'lí binói upila ayénachó galá machili suwaba je'ná jeyiri.³ A'lí echí Pegro jeaneli: Mujé, Ananíasi, ¿churékulami nijéwaga olali mapurigá echí Satanasi riwéami riablo mi nuleli? Mujé chopi wabé 'yékali echí Wabé Galabé Riosi Iwigala mapalimi arígá tamujé tamí 'natárali mapurigami ne suwaba 'yali echí kawí natigala, chópimi pe okuabi nijali.⁴ Ke cho ralinéasa echí kawí, ¿kecha mujé níwala níili? A'lí ma ralinéarami níisa, ¿kecha mujé níwala níili echí kawí natigala? ¿Churékulá mi 'náitali mapurigami echirigá 'yékaka olama? Mujé ketasi chopi tamujé tamí 'yékali, chópimi ayénachó wabé 'yékaka olali Riosi Binói.⁵ A'lí echí Ananíasi je'ná jerigá namsa, we yáati miná bu'wíbaka mukuli. A'lí si'néami pagótami ne wabé majali mapu ikí je'ná jerigá námaliko.⁶ A'lí jaré témalí echo'ná 'nígá muchili. A'lí aboni we yáati jaska, bilé chiní kimílachi kabili echí mukúami. A'lí aboni togá chu'wirolí.

⁷ A'lí pe wilibeko echí Ananíasi upila nawagá, echo'ná pachá bakili mapo'ná aboni muchili. A'lí échiko ketasi cho machili mapurigá ikili kepu kuná.⁸ A'lí echí Pegro jeaneli: Tamí ruyée ne bichíwaga, ¿áchatamo echikí niráa ralinéali echí 'yemi níwala kawí? A'lí echí mukí ku nijéwaga jeaneli: Ayena, echikí niráata ralinéali.⁹ A'lí echí Pegro jeaneli: ¿Churékulátamo echirigá nakaréwali mapurigátamo 'yékabo echí Walubela Riosi Iwigala? Echo'ná machíami ku sira echí jaré mapu ma chu'wirolí mujé kunala. ¡Jipi ma ayénachó mi chu'wiroma!¹⁰ A'lí echí mukí we yáati echo'ná bacháami bu'wíbaka mukuli. A'lí echí jaré témalí pachá mo'wisá riwali echí mukí ma mukugá bu'wíami. A'lí aboni ayénachó machí paka, binói kunala yuwa chu'wirolí.¹¹ A'lí ne wabé majali si'néami mapu ikí napawika bichíiyami níili, ayénachó ne si'néami echí auché jaré mapu ikí je'ná jerigá námaliko.

Echi jaré bichíiyami wikabé namuti omériga olali mapurigá ke wesi auché jaré pagótami omérali olayá

¹² A'lí echí jaré mapu julárami níili nawisánala, aboni ayénachó 'yárami níili mapurigá aboni wikabé namuti wabé omériga olama mapurigá echí auché jaré

pagótami echirigá galá riwimea. A'lí si'néami mapu ikí galá bichíili, abóniko sinibí napawili echo'ná echi walubé Juríosí ri'obáwalachi machímanamí mapo'ná echi Salomoni níwalachi anérami níili.¹³ A'lí echi auché jaré pagótami mapu ke cho galá bichíiyami níili ketasi galá napawili echi jaré bichíiyami yuwa, mapujiti aboni ne wabé majali. Chopi echi auché jaré pagótami arígá we galá nirali echi jaré bichíiyami.¹⁴ A'lí wikabé pagótami chótali bichíisiya echi Walubela Jesucristo niráa. A'lí wikabé rijói echirigá galá bichíili, wikabé muguí ayénachó.¹⁵ A'lí echi jaré pagótami machí buwánali echi jaré nayúkami. A'lí echo'ná machímana perichi ro'wálati, echo'ná kimachí ayénachó, mapurigá echi Pegro káluala moba simíraga ku sa'wama jaré aboni.¹⁶ A'lí ne wikabé pagótami napawili echo'ná Jerusalémachi. A'lí aboni ne suníami echo'ná mulubé o'wéalachi jonsa síami níili. A'lí ne si'néami aboni echo'ná pali echi auché jaré mapu ikí nayúkami níili, ne si'néami mapu ikí we chati riablo aliwala aliwéami níili ayénachó. A'lí echi jaré mapu julárami níili nawisánala galá ku sa'wali echi jaré nayúkami, ayénachó Binói ku machí a'wali echi jaré riablo aliwala echo'ná echi jaré pagótami sulálachi jonsa, ne si'néami mapu ikí riablo aliwala aliwéami níili.

Echi Pegro, echi Juani sayériga a'najátarami níili

¹⁷ A'lí echi ne walula sacerdote ke 'me niraka kichili echi jaré Jesucristo niráa bichíiyami mapu julárami níili nawisánala. A'lí ne si'néami echi auché jaré Juríosí mapu ikí Saruseo anilíwami níili, aboni ayénachó chópirigá oláami níili mapurigá echi ne walula sacerdote. A'lí ne si'néami aboni echijiti wabé na'waga kichili echi jaré Jesucristo niráa bichíiyami.¹⁸ A'lí aboni bologá togá echi jaré mapu julárami níili nawisánala, a'lí echo'ná pachá kumurachi mo'wali.¹⁹ Chopi rokogó niráa bilé walubela Riosi kapitánawala echo'ná kumurachi ku irápaga, machí u'luli aboni, jeanigá:²⁰ Auchecho ku simíbaga echo'ná walubé Juríosí ri'obáwalachi. Echo'ná pachá jaga ne galá nawésasi echi auché jaré pagótami mapurigá aboni galá omérama bukulíwami niráa ku piréliya Jesucristo yuwa.²¹ A'lí je'ná jerigá ma namsa, ba'alínala bi'yá aboni anchecho mo'wili echo'ná pachá echi walubé Juríosí ri'obáwalachi. A'lí aboni anchecho binériga nawésali echi jaré pagótami.

A'lí mapuyénasí echi jaré bichíiyami echirigá ologá 'yénali, echalí echi ne walula sacerdote, echi auché jaré binói apanérawala yuwa, nulali napabúnala ne si'néami echi jaré Juríosí mapu ikí o'wéala níili. A'lí aboni júuli jaré kapitani 'nolánala echi jaré bichíiyami mapu pachá mo'wárami níili echo'ná kumurachi.²² A'lí mapalí echi jaré kapitani ma sili echo'ná kumurachi, echalí aboni tarapé riwali echo'ná pachá echi jaré mapu echo'ná mo'wárami níili. A'lí echi jaré kapitani wabé 'nátaga ku simíbali, je'ná jeyiri ku ruyébiya:²³ Ne bichíwalita riwali ne galá 'yeta wilífami echo'ná kumurachi. Ayénachóta riwali echi jaré tibúami mapu echo'ná yéachi tibuya muchili. Chopi mapalita galá irápali, tarapé wésita riwali echo'ná pachá.²⁴ A'lí mapalí echi walula sacerdote je'ná jerigá námali, echi auché bilé walula echo'ná ri'obachi nuláami ayénachó, echi auché jaré o'wéala sacerdote asíchiko, echalí si'néami aboni tarapé machili churigá echirigá ikili. A'lí aboni chopi jeanigá 'nátaga muchili: ¿Jipi, churigá waminabi echirigá ikiméará?²⁵ A'lí echalí bilé rijói echo'ná nawagá jerigá aneli: Echi jaré rijói mapu 'yémitamo echo'ná pachá kumurachi mo'wali, jipi aboni echo'ná pachá echi walubé Juríosí ri'obáwalachi nawésiya jawi echi auché jaré pagótami.²⁶ A'lí echi walula echo'ná ri'obachi nuláami ku simili echo'ná echi

walubé Juríosi ri'obáwalachi, echi jaré binói kapitánawala yuwa. A'lí aboni ku bayénoali echi jaré bichíiyami mapu echo'ná nawésiya jali. A'lí echi jaré kapitani tarapé chibi olali echi jaré bichíiyami, mapujiti echi jaré wikabé pagótami ne galá nirali echi jaré bichíiyami. A'lí echi jaré kapitani ne wabé majali, mayega mapurigá echi pagótami riteti basibuma riwéali, a aboni chibi olásagá echi jaré bichíiyami.²⁷ A'lí echi jaré bichíiyami ma 'nolásuwa, a'lí biché aboni echo'ná bacháami jawálati echi jaré o'wéala Juríosi yuwa. A'lí echi walula sacerdote jeaneli:

²⁸ Tamujé ma 'yemi mi wabé iwéami nuleli máputamo ma ketasi waminabi nawésabo Jesucristo Ra'íchala, chopi ne suníami jena'í Jerusalémachi 'yémitamo arigá waminabi nawésali mapurigá 'yemi aboni galá bichíi. A'lí bichétamo chopi nakí nawisánala mapu tamujé aboni nulali mi'línala echi Rijói. ²⁹ A'lí echi Pegro, ayénachó echi auché jaré mapu julárami níili nawisánala, aboni ku njéwaga jeaneli: Arigá 'wérali ju mapu tamujé bachá niráa galá njéwabo mapurigá Riosi tamujé tamí nulé, chopi ketasi arigá 'wérali ju máputa njéwaga olabo mapurigá 'yemi pagótami tamujé tamí si'lwinárigá nulé. ³⁰ Echi Walubela Riosi, echi jaré ki'yá piréami tamujé pagótamawala Riósawala ju. Échiko ku owíntali echi Walubela Jesucristo, echi mapu 'yémitamo echo'ná biléana kúrsichi ochogá mi'yali. ³¹ Chopi Riosi ne wabé ripabé wilali echi Jesucristo. A'lí Riosi echo'ná watoná Binói yuwa wilali echi Jesucristo mapurigá Walubela niráa. A'lí Jesucristo wilárami níili mapurigá Walubela Ku'wíriami niráa mapurigá 'yemi Juríosi pagótami galá ku'wíratami, níibo, átamo galá bichíisagá, ayénachó átamo ku ro'wísagá Riosi yuwa mapurigátamo ku wikáwarami níibo mapurigátamo chati olali. ³² Tamujé 'yemi mi ne bichíwaga nawesa je'ná jaré namuti jiti rugá. A'lí echi Wabé Galabé Riosi Iwigala ayénachó achigórigá nawesa mapujiti Échiko galá bichíira echi jaré pagótami. A'lí Riosi ma 'yali mapurigá echi Galabé Riosi Iwigala pachana asimea echo'ná echi jaré pagótami sulálachi, si'néami mapu ikí galá njéwaga olako mapurigá Riosi nulá.

³³ A'lí mapalí echi jaré o'wéala je'ná jerigá námali, a'lí aboni ne wabé na'áwaga ko'wináali echi jaré bichíiyami mapu julárami níili nawisánala. ³⁴ Chopi echalí rawé bilé rijói Gamalieli riwéami ayénachó kusíwami níili echi auché jaré o'wéala yuwa. Échiko we Bariseo níili, ayénachó binói binériami níili Riosi nulalila. A'lí ne si'néami echi jaré Juríosi pagótami ne galá nírali echi Gamalieli. Échiko echo'ná aboni yuwa wiliska, nulali peé téeli niráa ku machí a'wánala echi jaré mapu julárami níili nawisánala. ³⁵ A'lí echi Gamalieli nawésali echi auché jaré o'wéala jeanigá: 'Yemi Israeli pagótami, ne galá majaga 'natasi mapu churigátamo kastigo 'yabo je'ná jaré rijói. ³⁶ Mapujiti 'yémitamo ne galá newalá mapurigá chabénala bilé rijói Teúrasi riwéami a binói niráa nakili walubela nílanala. A'lí mapuyena naó kiento rijói ayénachó nakili mapu echi Teúrasi aboni walúlawala níima; chopi echi rijói miná mi'lirúami níili. A'lí echi jaré naó kiento si'néami suwaba miná chijáami níili. A'lí tarapé namuti biyiri ikili. ³⁷ A'lí pe wakinana mapalí ne si'néami pagótami oselichi ro'ogá tarárami níili, echalí auché bilé rijói, Júrasi riwéami, echo'ná Galiléachi bitéami níili. A'lí échiko ayénachó a binói niráa nakili walubela nílanala. A'lí wikabé pagótami ayénachó nakili wilánala echi rijói mapurigá aboni walúlawala niráa. Chopi échiko ayénachó mi'lirúami níili. A'lí suwaba miná chijali echi jaré mapu binói yuwa níili. ³⁸ A'lí echi Gamalieli waminabi jeaneli: Ariwesi je'ná jaré rijói. Ketasi waminabi ra'íchaga anesi aboni, mapujiti a je'ná binéraga oluwáwami chopi jaré pagótami níwala níisagá, a'lí peé minánomí suwaba suwaba

suwábarami níima.³⁹ Chopi a je'ná binéraga oluwáwami Riosi níwala níisagá, a'llí 'yémítamo ketasi omérabo suwábiya. Galá 'nátaga olasi mapurigátamo ketasi sayéraga olabo, siné káachi, Riosi Binói.

⁴⁰ A'lí si'néami echí jaré o'wéala galá nírali mapurigá binói aneli. A'lí aboni ku bayeli echí jaré mapu julárami níili nawisánala. A'lí echí jaré o'wéala nulali wipisónala echí jaré mapu julárami níili nawisánala. A'lí echí jaré o'wéala waminabi wabé jiwéami nuleli aboni mapurigá aboni ma ketasi waminabi nawisama Jesucristo Ra'íchala niráa. A'lí pe wilibeko echí jaré nawésami ku julárami níili echo'ná aboni pirélachi. ⁴¹ A'lí echí jaré mapu Riosi júuli nawisánala ma ku simíbali echo'ná echí jaré o'wéala napawílachi jonsa. A'lí aboni galá kaníili mapujiti Riosi ma galá nírali mapurigá aboni echirigá wabé riwélatarami níima mapujiti aboni galá bichíili Jesucristo niráa. ⁴² A'lí aboni tarapé siné ariweli binéraga nawésiya Jesucristo Ra'íchala; chopi sinibí rawé aboni galá nawésali echo'ná echí jaré Juríosi pagótami ri'obáwalachi, echo'ná ibílana kalíflachi ayénachó.

Kichao rijói jawárami níili mapurigá nigúurami niráa

6 Allí echalí rawé mapalí wikabé muweli echí jaré napawika bichíiyami, echalí echí jaré bichíiyami mapu Griego anilíwami ra'íchami níili a'nagupi nakaréwaga ra'íchali echí auché jaré bichíiyami yuwa mapu Ebreo anilíwami ra'íchami níili mapujiti echí jaré Griego ra'íchami níwala muguí kunámami ke 'me nirárami níili sinibí rawé mapalí echí ko'wáami nachutárami níili. ² A'lí echí jaré makói miná okuá mapu julárami níili nawisánala, aboni bayeli echí auché jaré wikabé napawika bichíiyami, a'lí jeaneli: Ketasi galá ju mapu tamujeta ariwebo je'ná Riosi Ra'íchala nawésalawami mapurigata nachútaga chopi nochabo echí ko'wáami. ³ Yemi ritémawa, echijiti echo'ná 'yémichi jawasi kichao galabé 'nátami rijói. A'lí bichétamo chopi jawabo kichao rijói mapu ne galá nulérami ju echí Wabé Galabé Riosi Iwigala jiti, ayénachótamo chopi jawabo echí jaré mapu galá nirárami ju echí auché jaré pagótami jiti. ⁴ A'lí tamujeta chopi tániga ra'ichabo Riosi yuwa, ayénachóta nawisabo echí wabé Galabé Riosi Ra'íchala. ⁵ A'lí echí wikabé pagótami bichíiyami ne galá nírali mapurigá aboni anili. A'lí aboni wilali echí Siteba. A'lí echí Siteba galá bichíiyami níili, ayénachó binói galá nulérami níili echí Wabé Galabé Riosi Iwigala jiti. A'lí aboni ayénachó jáwali echí Jilipi, echí Prókoro ayénachó, echí Nikanori riwéami ayénachó, echí Timoni riwéami ayénachó, echí Paramena riwéami ayénachó, echí Nikolasi asíchiko. A'lí echí Nikolasi ketasi Juríosi pagótami níili. Échiko echo'ná Antiokíachi bitéami níili. Chabénala chótali bichíiya mapurigá echí jaré Juríosi bichíi, chopi ma galá bichíiyami níili Jesucristo niráa. ⁶ A'lí echí jaré kichao párami níili echo'ná bacháami echí jaré yuwa mapu Riosi júuli nawisánala. A'lí echí jaré julárami tánali Riosi mapurigá Binói ku'wírama echí jaré kichao, echí nójchali olayá. A'lí echí jaré julárami sikati moba uchúchaga jáwali echí jaré kichao mapurigá nigúurami niráa, mapurigá aboni nachútama echí ko'wáami. ⁷ A'lí wikabé echí jaré sacerdote mapu ke 'me o'wéala níili, abóniko ayénachó bichíili Jesucristo niráa.

Echi Siteba chapirúami níili

⁸ A'lí Riosi ne galá omératali echí Siteba mapurigá binói wikabé karúmati wabé oméravamí olama bacháami echí auché jaré pagótami yuwa. A'lí echí auché

jaré pagótami ketasi chirigá machili churigá echi Siteba omératali echirigá olayá, chopi Riosi echirigá omératali Siteba mapujiti Riosi Binói wabé galeli echi Siteba. ⁹A'lí jaré rijói chótali sayéraga ra'icha echi Siteba. A'lí jaré aboni biléana Juríosi ri'obáwalachi napawika bichíiyami yuwa níili mapo'ná anélati echi jaré ku machí a'wátami ri'obáwalachi. A'lí auché jaré aboni echo'ná Sirénachi anilwachi kawírali piréami níili, auché jaré echo'ná Alejanríachi piréami níili, auché jaré echo'ná Silísiachi anilwachi kawírali piréami níili, auché jaré echo'ná Ásiachi anilwachi kawírali piréami níili. ¹⁰Chopi aboni tarapé omératali niyúraga ra'íchiya echi Siteba yuwa, mapujiti echi Wabé Galabé Riosi Iwigala ne galá nuleli echi Siteba. A'lí binói echijiti ne galá machíami niráa ra'íchali. ¹¹A'lí echi jaré wikabé rijói mapu sayérami níili echi Siteba, abóniko natétali auché jaré mapurigá aboni 'yékaka jeanigá nawisama: Tamujeta ne bichíwali námali echi Siteba Riosi nulalila sayéraga ra'íchami, mapurigá osirúami ju echo'ná Moisesi oselíwalachi. Ayénachóta námali echi Siteba Riosi sayéraga ra'íchami. ¹²A'lí aboni echirigá na'áwatali echi auché jaré pagótami, echi jaré o'wéala ochérami ayénachó, echi jaré nulalíwami binériami asíchiko. A'lí ne si'néami aboni echirigá ne wabé na'áwaga, ne wabé iwéami echirigá chapigá toli echi Siteba echo'ná mapo'ná ne si'néami echi jaré Juríosi o'wéalawala muchili. ¹³Ayénachó jaré 'yékami rijói bayélati, echi mapu 'yékaka niráa jeanili: Je'ná rijói tarapé ariwé sayéraga ra'icha je'ná wabé galabé ri'obá, nirapé ariwé echi Riosi nulalila sayériya. ¹⁴A'lí aboni ayénachó 'yékaka niráa jeanili: Tamujé wisabé námali je'ná rijói jeaníami: Mapu echi Jesusi mapu echo'ná Nasarétachi bitéami níili suwaba najunama je'ná walubé ri'obá; ayénachó mapurigá echi Jesusi suwaba miná nakulíwama mapurigá echi chabé ki'yá bitéami Moisesi riwéami rijói tamujé tamí nuleli olánala. ¹⁵A'lí ne si'néami echi jaré o'wéala echo'ná muchúami galá 'néniga riwali mapurigá echi Siteba akálachi ne wabé ratábali mapuyiri bíle walubela Riosi kapitánawala akalá niráa.

Echi Siteba ne bichíwaga nawésali

7 A'lí echi ne walubela sacerdote jeanigá rukueli echi Siteba: ¿Acha ne bichíwali ju mapurigá aboni mi sayéraga aní? ²A'lí echi Siteba ku nijéwaga, je'ná jerigá nawésali: 'Yemi pagótami mapurigá keni ritémawa ju. Galá namsi mapurigá nijé 'yemi nimí nawesáma: Echi Abrami mapurigá tamujé Juríosi pagótami onolá níili. A'lí echi Abrami ne galá riwali Riosi mapalí binói bitéali echo'ná Mesopotámiachi anilwachi kawírali, mapalí binói Abrami ke cho simili bitélsiya echo'ná Aránachi anilwachi. ³Echalí Riosi jeaneli echi Abrami: Waminá simigá jena'í mujé kawíwalachi jonsa, mapo'ná si'néami mujé ritémawala piré; chopi waminá simigá echo'ná auché biléana kawírali mapo'ná Nijé nimí bayérama. ⁴A'lí echi Abrami ku simili echo'ná Mesopotámiachi anilwachi kawírali jonsa mapo'ná piréali echi jaré Kaleo anilwami pagótami. A'lí binói simírali echo'ná Aránachi anilwachi walúlachi mapo'ná binói wi'llibé bitéali. A'lí echi Abrami onolá miná mukuli. A'lí Riosi wakiná pali echi Abrami mapurigá binói bitélama jena'í kawírali mapo'ná 'yemi Juríosi pagótami abijí piré jipi rawé yénasí. ⁵Chopi echalí Riosi tarapé cho 'yali jena'í kawírali mapurigá echi Abrami níwala niráa. Nirapé pe uchíi 'yali mapuyénasí echi Abrami abijí bitéali; chopi Riosi ne bichíwaga aneli mapu ne suwaba jena'í kawírali 'yárami níima riwéali echi jaré Abrami kúchala kúchuwala, ma mukusáa echi Abrami. A'lí mapalí Riosi echirigá aneli echi Abrami, echalí echi Abrami tarapé bíle cho kúchuwami níili.

⁶A'lí Riosi ayénachó aneli echi Abrami mapu binói kúchala kúchuwala echo'ná biléana si'wina kawírali piréami niráa níima wi'llibé bamíbali niráa. A'lí Riosi ayénachó aneli echi Abrami mapu binói kúchala kúchuwala mapurigá pióntami niráa niwárami níima, ayénachó mapu aboni ne wabé risúu olárami níima naó kiento bamíbali yénasí. ⁷Chopi Riosi ayénachó jeaneli echi Abrami: Nijeni arígá walú kastigo 'yama echi auché jaré pagótami mapu echirigá risúu olama echi jaré mujé kúchala kúchuwala. A'lí echi jaré wikabé mujé kúchala kúchuwala ku 'machínama echo'ná kawírali jonsa. A'lí aboni pirélama jena'í kawírali mapurigá Nijé pagótamawala niráa. ⁸A'lí Riosi ne bichíwaga aneli echi Abrami mapu binói kúchala kúchuwala mapurigá Riosi pagótamawala niráa níima riwéali. A'lí Riosi echijiti nuleli mapu ne si'néami echi Abrami kúchala kúchuwala kúruwi noligá sikirétami níima. A'lí echi Abrami echi Isaka onolá níili. A'lí osá naó rawé yénasí sébachi echi Abrami noligá sikireli echi táa towí Isaka riwéami. A'lí echi Isaka, ma ochérasha, echi Jakobo onolá níili, echi mapu ayénachó echirigá noligá sikirétami níili. A'lí echi Jakobo, ma ochérasha, kúchali echi jaré makói miná okuá binói kúchuwala kúruwi. A'lí aboni, ma 'ochérasha, mapurigá 'wéntami niráa níili echi jaré Israeli pagótami yuwa. A'lí ne si'néami echi jaré Abrami kúchala kúchuwala kúruwi echirigá noligá sikirétami níili.

⁹A'lí echi jaré Jakobo kúchuwala kúruwi mapurigá tamujé Israeli pagótami 'wénawala niráa níili. A'lí aboni wabé kichiga, miná ralinéali aboni rijimala, José riwéami, mapurigá binói si'wina torúami níima echo'ná Ejíptochi anilíwachi kawírali; chopi Riosi sinibí galá tibúltali echi José. ¹⁰A'lí Riosi galá ku'wírali echi José mapalí binói risúu olárami níili. A'lí Riosi ayénachó 'yali echi José mapurigá Binói wabé 'nátami níima. A'lí Riosi ayénachó olali mapurigá echo'ná Ejíptochi nuláami walula silíami, Baraoni anilíwami, ne wabé galá nirama echi José. Echijiti echi Baraoni wilali echi José mapurigá walula nuláami echo'ná Ejíptochi anilíwachi kawírali. Ayénachó echi José wilárami níili mapurigá walula nuláami niráa echo'ná walubé binói Baraoni kalílachi. ¹¹A'lí ne wabé lowálati suníami kawírali echo'ná Ejíptochi anilíwachi, echo'ná Kanánachi anilíwachi ayénachó. A'lí echo'ná piréami pagótami echijiti ne wabé tisúati níili. A'lí echi jaré tamujé pagótamawala, echalí ki'yá piréami, tarapé riwali ko'wáami. ¹²Chopi mapalí echi Jakobo námali mapu ayena nirúali turío echo'ná Ejíptochi anilíwachi kawírali, echalí echi Jakobo echo'ná júuli echi jaré binói kúchuwala kúruwi, echi turío ralínala. A'lí aboni tamujé aboni pagótamawala níili mapu ki'yá piréali. Echalí níili mapalí aboni bachá niráa simíbali echo'ná Ejíptochi. ¹³A'lí mapalí aboni osánala chokéami echo'ná simíbali, echalí echi jaré José ritémawala galá machili echi José. A'lí echi walula silíami Baraoni riwéami ayénachó echirigá galá machili echi auché jaré José ritémawala. ¹⁴A'lí echi José echalí nulali echo'ná Ejíptochi anilíwachi pánala binói onolá, Jakobo riwéami, echo'ná Kanánachi jonsa. A'lí echi José ayénachó nulali echo'ná pánala echi auché jaré Jakobo kúchuwala, echi jaré wikabé Jakobo apalóchawala ayénachó. A'lí si'néami aboni mapuyena kicháosa makói miná malí níili. ¹⁵A'lí echi Jakobo echirigá simili bitelasiya echo'ná Ejíptochi anilíwachi kawírali. A'lí echi Jakobo echo'ná mukuli. A'lí echi jaré Jakobo kúchuwala ayénachó echo'ná suwili. A'lí aboni tamujé pagótamawala níili mapu echalí ki'yá piréali. ¹⁶A'lí pe wakinánokuá jaré aboni sapala suwíami echo'ná Sikémachi anilíwachi ku torúami níili, mapo'ná echo'ná Kanánachi anilíwachi kawírali níili. A'lí aboni echo'ná biléana risochí

chu'wirótami níili mapo'ná echí Abrami chabé ki'yá ralali. A'lí echí jaré Amora riwéami rijói kúchuwala echo'ná Sikémachi piréami níili mapu ralinéali echo'ná risochí. A'lí echí Abrami galá natétali aboni, winomíwala jiti.

¹⁷A'lí chabé ki'yánala Riosi ma ne bichíwaga aneli echí Abrami mapurigá Riosi Binói 'yama riwéali echo'ná Kanánachi anilíwachi kawírali mapurigá echí jaré Abrami kúchala kúchuwala kawíwala niráa. A'lí mapalí ma mulubé sébachi níili mapurigá Riosi echirigá 'yama riwéali, echalí echí jaré Abrami pagótamawala ne wabé wikabé níili, chopi aboni abijí echo'ná Ejíptochi muchili. ¹⁸A'lí echo'ná Ejíptochi anilíwachi kawírali auché bilé si'nú rijói ma wilárami níili mapurigá walubela silíami niráa. A'lí échiko tarapé siné machíami níili echí José. ¹⁹A'lí je'ná walubela silíami ne wabé 'yékali echí jaré tamujé pagótamawala echalí chabé ki'yá piréami. A'lí échiko ne wabé risíu olali echí jaré tamujé pagótamawala. A'lí binói wabé iwéami nuleli aboni miná waná ariwénala si'néami echí jaré aboni kúuchi kúchuwala kúruwi mapurigá aboni miná suwimea. ²⁰A'lí echalí rawé echí Moisesi ranálati. A'lí Riosi ne wabé galeli echí táchí towí Moisesi. A'lí echí táchí towí 'wénawala ne galá ochébanali binói echo'ná aboni kalílachi bikiyá michá yénasí. ²¹Chopi mapalí arígá 'wérati níili mapurigá aboni miná waná ariwema echí táchí towí, echalí echí walubela silíami Baraoni riwéami malala arígá wabé galigá chapili echí táchí towí. A'lí ne galá ochébanali echí towí mapurigá binói ranala niráa. ²²Echijiti echí Moisesi wabé galá binératami níili ne suwaba mapurigá echo'ná Ejíptochi piréami pagótami echirigá galá binéami níili.

²³A'lí mapalí echí Moisesi nawosa makói bamíbami níili, echalí binói wabé nakili ku 'nénala echí jaré binói pagótamawala, echí jaré Isaeli anilíwami pagótami.

²⁴A'lí echí Moisesi riwali mapalí bilé rijói Ejíptochi bitéami ne wabé risíu olali auché bilé rijói mapu echí bilé Moisesi pagótamawala níili. A'lí echí Moisesi we nakili ku'wíranala echí bilé rijói mapu risíu olárami níili; ayénachó echí Moisesi we nakili kastigo 'yánala echí bilé rijói Ejíptochi bitéami mapu wabé risíu olali echí auché bilé rijói, echijiti echí Moisesi wabé yoga miná mi'yali echí rijói echo'ná Ejíptochi bitéami. ²⁵A'lí echí Moisesi echirigá olali mapujiti binói mayeli mapu echí auché jaré binói pagótamawala, Isaeli anilíwami, ne galá machímea riwéali mapurigá Riosi júuli binói Moisesi echí jaré Isaeli pagótami ku'wíranala; chopi aboni ketasi machili echirigá. ²⁶A'lí ba'línala rawé echí Moisesi auchecho siné echo'ná nawali echí jaré Isaeli pagótami yuwa. Echalí echí Moisesi riwali mapu okuá aboni na'ágawa nakówali. A'lí echí Moisesi ra'ámaga jeaneli: Pagótami, 'yemi ritémtami jútamo. ¿Churékulátamo echirigá a'nagupi wabé na'ágawa nakowa? ²⁷A'lí echí mapu wabé kichiga olali echí auché bilé, échiko tarapé nírali echí Moisesi, chopi wabé kichiga jeaneli: ¡Mujé ketasi wilárami níili mapurigá tamujé silínowala niráa, mapurigami echijiti tamujé tamí wi'nijima! ²⁸Rapako mujemi mil'yali bilé Ejíptochi bitéami rijói. ¿Áchami ayénachó tamí echirigá mi'linali? ²⁹A'lí mapalí Moisesi je'ná jerigá námali, a'lí binói ne wabé majaga, miná 'másali. A'lí binói echo'ná biléana si'wina kawírali, Mariánachi anilíwachi simili, mapo'ná binói wi'libé rawé bitéali. A'lí binói ma upesa, okuá kúruwi kúchali.

³⁰A'lí ma simírasa nawosa makói bamíbali, echo'ná biléana waná kawichí mapo'ná mulubé ju echo'ná ripá rabó Sinaíchi anilíwachi, echo'ná siné rawé Riosi Binói ke sayiná ra'íchali echí Moisesi yuwa, mapo'ná echí Moisesi riwali biléana ku'wíchalachi rajínami. ³¹Echalí echí Moisesi ne wabé majaga 'nénali

echi ku'wíchali rajáami, mapujiti tarapé suwíbali rajina. Chopi ke sayiná echí Moisesi galá námali mapalí echí Walubela Riosi Binói ra'íchaga jeanili: ³²Nijé ju Riosi, echí jaré ki'yá piréami 'yemi pagótamawala Riósawala. Nijé ju echí Abrami Riósawala, echí Isaka Riósawala ayénachó, echí Jakobo Riósawala asíchiko. Echalí echí Moisesi ne wabé sayilúmaga majajali; ayénachó binói echijiti ketasi oméráli waminabi 'néniya. ³³Echalí echí Walubela Riosi Jeaneli: ¡Akarapi! mapujiti jena'í mapo'namí wilí, wabé galabéalachí ju, mapujiti Nijé Binói jena'í atí. ³⁴Echalí Riosi waminabi jeaneli: Nijeni ne bichíwali riwali mapurigá echí jaré Nijé níwala Israeli anilíwami pagótami ne wabé simírami risú olárami níili echo'ná Ejíptochi anilíwachi kawírali; ayénachó Nijeni námali aboni ne wabé o'weli ri'íkami. Jipi Nijeni ma rikinali ku'wírimiya echí jaré aboni. Echalí Riosi waminabi jeaneli echí Moisesi: Wakiná simí. Nijé nimí julama echo'ná Ejíptochi kawírali.

³⁵Echirigá níili mapu echí Walubela Riosi wilali echí Moisesi mapurigá nigúurami niráa, mapurigá binói ku'wírama echí jaré Israeli pagótami, chopi aboni chabénala niráa wabé kichiga jeaneli echí Moisesi: ¡Mujé ketasi wilárami níili mapurigá tamujé silínawala niráa, mapurigami echijiti tamujé tamí wi'nijima! Chopi Riosi echirigá wilali echí Moisesi mapalí Riosi Binói ra'íchali echí Moisesi echo'ná echí ku'wíchali rajáamichi. ³⁶Je'ná binói Moisesi ku machí a'wali echí jaré ki'yánala piréami tamujé pagótamawala echo'ná Ejíptochi anilíwachi kawírali jonsa; ayénachó echí Moisesi 'yárami níili mapurigá binói wabé oméríga olama mapurigá ke wesi auché jaré pagótami oméráli olayá. Binói echirigá olali echo'ná Ejíptochi, echo'ná walú ba'wírali Sitánachi anilíwachi ayénachó, echo'ná waná kawírali ayénachó mapo'ná echí jaré Israeli pagótami 'yénali nawosa makói bamíbali. ³⁷Je'ná Moisesi binói jeaneli echí jaré Israeli pagótami: Waminánomí rawé echí Walubela Riosi wilama bilé 'yemi ritémawala mapurigá Walubela Nawésami, achigórígá mapurigá Riosi tamí wilali. ¡Echalí ne galá nijéwaga olasi mapurigá echí Walubela Nawésami 'yemi mi anema! ³⁸Je'ná Moisesi ayénachó níili mapu echo'ná waná kawichí iyénali nawosa makói bamíbali niráa, echí jaré tamujé pagótamawala yuwa. Binói níili mapu Riosi Binói ra'íchali echo'ná ripá rabó, Sinaíchi anilíwachi. Echi Moisesi iyénali echí jaré ki'yánala piréami tamujé pagótamawala yuwa, si'néami mapu ikita Israeli pagótami ju. Échiko ayénachó nareli Riosi Ra'íchala, echí sinibí pirélawami nawésala niráa, mapurigá binói echirigá tamujé tamí 'yama.

³⁹Chopi echí jaré tamujé pagótamawala ki'yánala piréami wabé kichiga ketasi nakili nijéwiya echí Moisesi, chopi aboni nakili ku ro'wínala echo'ná Ejíptochi anilíwachi kawírali. ⁴⁰Echalí aboni jeaneli echí Arón: Tamujeta nakí mápumi tamujé tamí niwílala bilé namuti niwárami mapuyiri bisero niráa máputa amachíkabo, mapurigá echí namuti máputa amachika, tamujé tamí bayérama, mapujítita ketasi machí chu ikili echí Moisesi, echí mapu tamujé tamí wakiná bayérali, echo'ná Ejíptochi jonsa. ⁴¹Echalí aboni niwáli bilé namuti mapuyiri bisero; ayénachó aboni amachika niráa ko'yali jaré namuti echí bisero niwárami 'yánala. Echirigá aboni o'wikeli echí bisero mapurigá aboni riósawala niráa. Ayénachó aboni echirigá wabé kanílaga o'wikeli echí namuti mapu aboni niwáli. ⁴²Echalí Riosi ariweli mapurigá aboni chopi bichíima mapurigá aboni nakili, mapurigá aboni amachíkama echí rayénali, echí michá ayénachó, echí wikabé sopolí asíchiko. Echirigá ikili mapurigá chabé ki'yánala je'ná jerigá osirúami níili echo'ná Riosi Ra'íchala oselíwalachi:

⁴³ 'Yemi Israeli pagótami ketasi tamí waminabi walubélaga aneli mapalítamo wikabé namuti ko'yali, mapuyénasítamo echo'ná waná kawichí 'yénali nawosa makói bamíbali niráa.

⁴³ Si'winárigá 'yémítamo chopi o'wikeka toli bilé namuti niwárami, Moloka kalila anilíwami, máputamo amachíkali mapurigá 'yemi riósawala niráa;

ayénachótamo o'wikeka toli auché bilé namuti niwárami mapuyiri bilé sopolí niráa, echi mapu 'yémítamo aneli 'yemi riósawala niráa, Rempa anilíwami.

Echalítamo chopi amachika o'wikeli echi jaré namuti mapu 'yemi aboni niwáli. Echalí Riosi Binói 'yemi mi jeaneli: Echijiti Nijé 'yemi nimí julama waminabi waná mikabé echo'ná Babilóniachi.

⁴⁴ Echalí mapalí tamujé pagótamawala chabé ki'yánala piréami 'yénali echo'ná waná kawichí, aboni niwáli bilé ri'obá, karúmati teka niwárami, mapo'ná aboni nisérali echi okuá o'weli chibérami rité mapo'ná Riosi nulalila osirúami níili. A'lí suwaba echi ri'obá achigórigá niwárami níili mapurigá Riosi aneli echi Moisesi; mapujiti bachá niráa Riosi nuleli niwánala echi ri'obá, achigórigá mapurigá Riosi Binói 'nérali echi Moisesi. ⁴⁵ Echirigá níili mapu echi jaré tamujé pagótamawala abijí niwáli echi ri'obá, karúmati teka niwárami, mapalí aboni sili jena'í kawírali echi Josué riwéami yuwa, mapujiti echi jaré aboni kúchala kúchuwala echirigá nisérali wi'libé bamíbali niráa. A'lí mapalí tamujé pagótamawala wakiná sili aboni chapili auché jaré pagótami kawíwala, mapujiti Riosi echirigá ku machí a'wali auché jaré chati oláami pagótami, mapurigá echi jaré ki'yánala piréami tamujé pagótamawala echo'ná pirélama. A'lí echi ri'obá jena'í tibili mapuyénasí echi walula Rabiri riwéami rijói bitéali. ⁴⁶ Echi Walubela Riosi wabé galeli echi Rabiri. Échiko we nakili niwánala bilé walubé ri'obá mapo'ná Riosi Binói bitélama riwéali. A'lí echi Rabiri riwéami rijói pagótamawala waminabi walubélaga aneli Riosi ki'yá chokichí jonsa mapalí echi Jakobo riwéami rijói bitéali, echi mapu ayénachó waminabi walubélaga aneli Riosi. ⁴⁷ Chopi Riosi ketasi risénsia 'yali mapu echi Rabiri niwama Riosi ri'obáwala. Wakinánokuá echi Rabiri ranala, Salomoni riwéami, níili mapu galá niwáli Riosi ri'obáwala.

⁴⁸ A'lí echi ripabé atíami Walubela Riosi ketasi chopi bité echo'ná pachá jaréana ri'obachi, pagótami jiti niwárami, mapujiti je'ná jerigá osirúami ju echo'ná Riosi Ra'íchala oselíwalachi, mapo'ná echi walula Riosi jiti nawésami je'ná jerigá osali, mapurigá Riosi Binói jeanili:

⁴⁹ ¡Nijé ne suníami buchuwiína atí!

A'lí jena'í ripá riwigachi chopi mapurigá Nijé walubélawala ripabé asíbalachi ju, mapo'ná Nijeni asiba mapurigá Walubela Nuláami niráa; ayénachó echo'ná ri'lé wichimóbachi ju mapo'ná Nijeni isaba Nijé ralálachi mapurigá Walubela Nuláami niráa;

ayénachó echi Walubela Riosi jeanigá rukueli:

¿Churigá bichemi niwama bilé ri'obá mapo'ná Nijeni echo'ná pachá bitélama?

¡Ketasi arigá 'wérali ju mapurigá Nijeni níwama mapo'nani pachá bitélama, mapujiti Nijeni ne buchuwiína atí!

⁵⁰ Ayénachó Riosi jeanili: Nijé Binói niwáli ne suwaba namuti mapu ikí nirú.

⁵¹ Echalí echí Siteba binói waminabi jeaneli: 'Yémitamo sinibí ne wabé biwárami suléami níili. Ayénachó 'yémitamo ketasi nakili bichíinala Riosi Ra'íchala. Echirigá 'yémitamo achigórígá ju mapurigá echí auché jaré ke bichíiyami pagótami. 'Yémitamo sinibí wabé sayera echí Wabé Galabé Riosi Iwigala, achigórígá mapurigá echí auché jaré 'yemi pagótawala chabénala olali. ⁵² Echi jaré chabénala piréami 'yemi pagótawala arigá risúu olali si'néami echí jaré Riosi jiti nawésami rijói. 'Yemi pagótawala arigá ko'yali echí auché jaré mapu Riosi bachá júuli ruyénala, mapurigá echí Galabé Oláami Cristo nolínama riwéali jena'í wichimóbachi; chopi pe bukulfi, mapalí Jesucristo jena'í iyénali, 'yemi aboni wabé wi'nijili Binói echo'ná bacháami echí jaré o'wéala yuwa, ayénachótamo mil'yalí echo'ná kúrsichi michóniga. ⁵³ Echi jaré o'wéala Riosi kapitánawala 'yemi mi 'yali Riosi nulalila, chópitamo ketasi nijéwaga olali mapurigá Riosi 'yemi mi nuleli.

Echi Siteba mi'lirúami níili

⁵⁴ Echalí mapalí echí pagótami je'ná jerigá námali, aboni ne wabé simírami na'áwali; ayénachó aboni ne wabé na'áwaga ki'lákali aboni ramilá, echí Siteba sayéraga. ⁵⁵ Chopi echí Siteba galabé nulérami níili echí Wabé Galabé Riosi Iwigala jiti. Echalí binói echo'ná ripá riwigachi 'nénaga, galá riwali mapurigá Riosi ne wabé simírami ratábami ju; ayénachó binói riwali echí Walubela Jesusi echo'ná ripá riwigachi Riosi yuwa watoná atfámi. ⁵⁶ Echalí echí Siteba jeanili: Galá 'nesi. Nijeni ritiwá echo'ná ripá riwigachi mapurigá iráparami niráa; ayénachóni ritiwá echo'ná Riosi yuwa watoná atíami echí Walubela Jesusi. Échiko wilárami níili mapurigá Ku'wíriami niráa. ⁵⁷ Chopi aboni na'ómali kepu nakálachi mapujiti aboni ketasi nakili waminabi kipuma mapurigá echí Siteba ra'íchali. Echalí si'néami aboni ne wabé o'weli sinaka, ne wabé na'áwaga chapili echí Siteba. ⁵⁸ Echalí aboni echo'ná walúlachi jonsa machí pali echí Siteba. A'lí binói waminá basibúlati. A'lí bachá niráa echí jaré rijói mapu echirigá basibuli, aboni bujesa aboni kimala, a bilé ri'malí tibútali, echí mapu Saulo riwéami níili. ⁵⁹ Chopi abijí echirigá riteti basibúkowachi, echalí echí Siteba, Jesucristo yuwa ra'íchaga, jeaneli: ¡Walubela Jesusi, ma ku chapí nijé aliwala! ⁶⁰ Echalí echí Siteba ma chokoba wiligá, o'weli ra'íchaga jeaneli: ¡Walubela Jesusi, ketasi wi'nijí je'ná jaré rijói mapujiti aboni je'ná jerigá chati olá! Echalí ma je'ná jerigá anisáa, echí Siteba waminá mukuli, mapujiti binói echirigá basibúlati.

Echi Saulo wabé risúu ologá a'najátali echí jaré napawika bichíiyami

8 Echalí echí Saulo ayénachó wabé nakili mapurigá echí Siteba echirigá mi'lirúami níima. Echalí rawé jonsa echí jaré napawika bichíiyami echo'ná Jerusalémachi piréami ne wabé risúu ologá a'najátarami níili wi'libé rawé niráa. A'lí ne si'néami echí jaré napawika bichíiyami echirigá waminá chijanárami níili ne buchuwíami echo'ná Juréachi anilíwachi kawírali, ne buchuwíami echo'ná Samáriachi anilíwachi kawírali ayénachó. Echalí echí jaré makói miná okuá mapu julárami níili nawisánala, aboni chopi ripili echo'ná Jerusalémachi. ² A'lí jaré galabé bichíiyami rijói chu'wirolí echí Siteba. Echalí aboni wabé nalákali mapujiti aboni mayeli mapu binói wabé galabé oláami níili.

³ Echalí echí Saulo abijí wabé risúu ologá suwábanali echí jaré napawika bichíiyami. Échiko ne buchuwímana kalírali bakigá, chuwé baníraga, waminá toli echí

jaré bichíiyami rijói, echi jaré bichíiyami muguí ayénachó. Echalí aboni pachá mo'wárami níili.

Echi we galabé Riosi Ra'íchala nawisárami níili echo'ná Samáriachi

⁴Chopi echi jaré bichíiyami mapu ikí ma chijanárami níili echo'ná Jerusalémachi jonsa, aboni galá nawésali Riosi Ra'íchala chuwé wikanáami mapo'ná aboni sírali. ⁵Echalí echi Jilipi riwéami rijói echo'ná biléana walúlachi, echo'ná Samáriachi anilwáchi kawírali simigá, galá nawésali echo'ná piréami echi Cristo jiti rugá. ⁶Ayénachó si'néami echo'ná piréami pagótami galá kilí kipuga napawili mapalí echi Jilipi echirigá nawésali. Echalí aboni ayénachó riwali mapurigá echi Jilipi wikabé namuti wabé omériga olali mapurigá ke wesi auché jaré oméralli olayá. ⁷Mapujiti binói ku machí a'wali wikabé wabé chati riabla aliwala echo'ná pachana echi jaré pagótami sulálachi jonsa, ayénachó echi jaré riabla aliwala ne sinákaka ku 'machínali. A'lí echi Jilipi ku sa'wali auché jaré wikabé mapu ketasi oméralli muchísiya, auché jaré wikabé ke akáanami ayénachó. ⁸Echijiti si'néami echo'ná walúlachi piréami ne wabé kaníili.

⁹Chopi echo'ná bitéali bilé rijói, Simoni riwéami, echi mapu chabénala olali mapurigá sukurúami niráa. Echirigá binói we 'yékali echo'ná Samáriachi piréami pagótami, jeanigá mapu binói bilé walula níili. ¹⁰Ne si'néami pagótami echo'ná Samáriachi piréami ne galá bichíili mapurigá echi Simoni olali. Echi jaré kuchípala echirigá bichíili, echi auché jaré o'wéala ayénachó. A'lí aboni jeanili: Je'ná Simoni ne wabé walula ju mapujiti Riosi Binói 'yali mapurigá binói echirigá ne wabé walula níima. ¹¹Ne si'néami echo'ná piréami galá nijéwaga olali mapurigá echi Simoni aneli, mapujiti willibé jonsa binói wabé 'yékali aboni, mapalí binói olali mapurigá sukurúami niráa. ¹²Chopi mapalí echo'ná piréami galá bichíili mapurigá echi Jilipi nawésali, jeanigá mapu Riosi galá nulema si'néami pagótami mapu ikí bichíima Jesucristo niráa, echalí echi jaré rijói ba'wí jiti pagótami níili, echi jaré muguí ayénachó. ¹³Echalí echi Simoni binói bichíili; ayénachó binói ba'wí jiti pagótami níili. Echalí jonsa echi Simoni chótali echi Jilipi yuwa iyena mapujiti binói ne wabé nakili achigórigá olánala mapurigá echi Jilipi wabé omériga olali.

¹⁴Echalí echi jaré makói miná bilé mapu Riosi júuli nawisánala abijí tibili echo'ná Jerusalémachi. Chopi mapalí aboni námali mapu echo'ná Samáriachi piréami ma galá bichíili Riosi Ra'íchala, echalí aboni echo'ná júuli echi Pegro, echi Juani ayénachó. ¹⁵A'lí mapalí aboni sili echo'ná Samáriachi, echalí aboni tánali Riosi mapurigá echi jaré bichíiyami galá 'yárami níima echi Wabé Galabé Riosi Iwigala. ¹⁶Mapujiti echalí echi Wabé Galabé Riosi Iwigala ketasi cho nawali echo'ná moba nibilé abónichi. Echalí aboni chopi ba'wí jiti pagótami níili mapujiti aboni bichíili echi Walubela Jesusi niráa. ¹⁷Echalí echi Pegro, echi Juani yuwa galá moba nochali echi jaré bichíiyami. A'lí aboni ma nareli echi Wabé Galabé Riosi Iwigala.

¹⁸A'lí mapalí echi Simoni riwali mapurigá echi Wabé Galabé Riosi Iwigala nawali echo'ná moba echi jaré bichíiyami, mapalí echi jaré julárami nochali aboni sikala jiti, echalí echi Simoni wenomí natétanali. ¹⁹A'lí jeaneli: Ayénachó tamí 'ya je'ná jiwerawami mapurigá ayénachó mapuyíripi nijeni echo'ná moba abónichi nochasa, keni siká jiti, aboni ayénachó galá narema echi Wabé Galabé Riosi Iwigala. ²⁰Echalí echi Pegro jeaneli: ¡Galá níima echi mujé níwala wenomí waminá suwibasa mujé yuwa, mapujítimi mayé mapurigami omero ralayá wenomí jiti, echi jaré namuti

mapu Riosi chopi kóniga nijá! ²¹ ¡Mujemi ketasi echo'ná así ju, nirapé cho risénsia ju mapurigami je'ná jerigá olama, mapujiti mujemi ketasi galá bichíi sulachí niráa mapurigá Riosi nakí! ²² ¡Waminá ariwé je'ná chati oluwáwami mapurigá mujemi we chati olá! ¡Wikáwali táni Riosi! Siné káachi Riosi mi ku wikáwama mapurigami chati 'nátali echo'ná mujé sulálachi niráa. ²³ Mapujiti nijeni machí mapu mujemi wabé ne chipúlaga kichíimi jumi, ayénachó mujemi ketasi ariwénali chati olayá, mapujiti echí riabلو mi wabé nulé echirigá chati olánala.

²⁴ Echalí echí Simoni ku nijéwaga jeaneli: ¡Tansi echí Walubela Riosi mapurigá tarapebi yiri tamí yuwa echirigá ikimea mapurigátamo anili!

²⁵ Echalí mapalí echí jaré mapu julárami níili nawisána ma sunili echirigá ruya echo'ná walúlachi piréami pagótami, echalí aboni ayénachó nawésali Riosi Ra'íchala auché jaréana wikanáami rijówachi echo'ná Samáriachi anilwachi kawírali. A'lí pe wakinana aboni ku sili echo'ná Jerusalémachi.

Echi Jilipi ra'icha bilé rijói yuwa echo'ná Etiopíachi bitéami

²⁶ Pe wakinana bilé Riosi capitánawala jeanigá ra'íchali echí Jilipi: Wiliska, echo'ná tu kalyé simigá, mapo'ná Jerusalémachi jonsa burú, echo'ná tu Gásachi anilwachi burúami, mapo'ná biléana waná kawichí ju mapo'ná ke wesi piré. ²⁷ Echalí echí Jilipi echirigá wiliska simili. A'lí echo'ná buwichí binói riwali bilé rijói echo'ná Etiopíachi anilwachi bitéami. Echi rijói nigúurami níili echo'ná Etiopíachi nuláami mukí yuwa, mapujiti echí mukí walula silíami níili echo'ná kawírali, a'lí je'ná rijói níili mapu tibúltali echí walula silíami mukí níwala wenomí. A'lí je'ná rijói echo'ná Jerusalémachi iyénali mapujiti binói wabé nakili chokoba wiligá waminabi walubélaga anénala Riosi. ²⁸ Échiko ma ku kuwana inárali, echo'ná binói kawíwalachi ku simiyá, echo'ná biléana karro anilwami, kawé baníralachi moba asagá. Echalí echí rijói 'néniga inárali Riosi Ra'íchala oselíwalachi mapurigá osali echí Riosi jiti nawésami rijói Isaíasi riwéami. ²⁹ Echalí echí Wabé Galabé Riosi Iwigala ra'íchaga jeaneli echí Jilipi: Mulubéanaga simigá echí carro yuwa. ³⁰ A'lí mapalí echí Jilipi mulubéanali echí carro yuwa, echalí binói námali mapurigá echí rijói oselí 'néniga ra'íchali mapurigá osali echí Riosi jiti nawésami, Isaíasi riwéami. Echalí Jilipi jeanigá rukueli: ¿Áchami galá machí mapurigami 'neni echo'ná oselichi? ³¹ Echalí echí rijói ku nijéwaga jeanigá rukueli: ¿Churigá bicheni machimea? mapujiti ke wesi rijói tamí ruyée mapu churigá aniwáami ju. A'lí echí rijói bayegá aneli echí Jilipi mapurigá ripá mosa asagá así simea binói yuwa. ³² Echo'ná Riosi Ra'íchala oselíwalachi mapo'ná echí rijói 'nénali, je'ná níili:

Binói waminá torúami níili milliboya mapurigá echí jaré pagótami milliboya
to bilé bo'wá;

ayénachó mapurigá echí jaré bo'wá ketasi kusú mapalí echí jaré sikáami we
chapí, echirigá ayénachó Binói tarapé ku nijéwaga ra'íchali.

³³ Binói tarapé chati oláami níili, chopi Binói arigá wabé risúu olárami níili.

Echirigá Binói ketasi justicia olálati. Échiko ketásirapé kúchali, chopi Binói
waminá mi'lirúami níili.

³⁴ Echalí echí rijói ku nijéwaga jeaneli echí Jilipi: Perikó tamí ruyée: ¿Chigá 'nalina jiti rugá echirigá osali echí walula Riosi jiti nawésami? ¿Acha binói jiti echirigá rugá osali? ¿Acha auché bilé jiti rugá osali, keremá? ³⁵ Echalí echí Jilipi chótali ra'icha mapurigá osirúami ju echo'ná oselichi mapo'ná echí rijói 'nénali. A'lí Jilipi

ayénachó suwaba galá ruyeli mapurigá osirúami ju echi Walubela Jesusi jiti rugá echo'ná ne suníami Riosi Ra'íchala oselíwalachi.³⁶ Alí echirigá 'yénaga echo'ná buwichí, aboni sébali biléana mapo'ná walú ba'wéali. Echalí echi rijói jeaneli: Nibira, jenaí walú ba'wé ¿Kecha galá níima mapurigá nijé ba'wí jiti pagótami nísa?³⁷ Echalí echi Jilipi jeaneli: Ami ne galá bichíisagá, ne sulachí niráa, ne galá níma. Echalí echi rijói ku nijéwaga jeaneli: ¡Galani bichíi mapu echi Walubela Jesucristo bi'nélipi ju Riosi Ranala!³⁸ Echalí echi rijói nulali uchábanala echi karro anilíwami. A'lí okuánika ri'lé tiguinali echo'ná ba'wechi yénasí. Echalí echi Jilipi ba'wí jiti pagoli echi rijói.³⁹ Mapalí aboni ma ku 'machínali echo'ná ba'wírali jonsa, echalí echi Wabé Galabé Riosi Iwigala ke sayiná 'wísali echi Jilipi. A'lí echalí jonsa echi rijói ketasi waminabi riwali echi Jilipi, chopi echi rijói wabé kaníliga ku simili echo'ná buwichí mapo'ná binói inárali.⁴⁰ Chopi echi Jilipi ke sayiná auché biléana mikabé nawali mapo'ná Asótochi anilíwachi ju. A'lí echo'ná jonsa binói nawesa inárali ibílana rijówachi simíraga echo'ná Sesaréachi anilíwachi walúlachi yénasí.

Echi Saulo galá bichiiga ku ro'wili echi Walubela Jesucristo yuwa

(Hch. 22:6-16; 26:12-18)

9 Echalí echi Saulo abijí wabé yóniga ra'íchali jeanigá mapu binói we yáati ko'wimea echi jaré bichíiyami, si'néami mapu ikí galá bichíili echi Walubela Jesucristo niráa. Echijiti echi Saulo 'nésiya simili echi ne walula sacerdote.² A'lí echi Saulo oselí osirúami risénsia tali mapurigá binói simea echo'ná Ramáskochi anilíwachi walúlachi, mapurigá echo'ná suníami echi jaré Juríosí ri'obáwalachi binói 'yasa chapimea si'néami echi jaré Jesucristo jiti bichíiyami, mapurigá binói bologá tomea echiyiri bichíiyami echo'ná Jerusalémachi, mapurigá ibili aboni waminá kastigo 'yárami níma. Ayénachó echi Saulo wabé nakili echirigá bologá tónala echi jaré muguí bichíiyami, achigórigá mapurigá binói nakili bologá tónala echi jaré rijói bichíiyami.³ Chopi echi Saulo abijí inárachi echo'ná buwichí, mapalí binói ma mulubé inárali echo'ná Ramáskochi anilíwachi walúlachi simiyá, echalí ke sayiná ne wabé simírami ratábali echo'ná ripá riwigachi jonsa ne noligá binói yuwa.⁴ Echalí echi Saulo we yáati akaná chukúbali; ayénachó binói námali bilé Ra'íchami mapu je'ná jerigá anili: Mujé Saulo, ¿churékulami wabé tamí kichiga a'najata?

⁵ Chopi echi Saulo ku nijéwaga jeanigá rukueli: ¿Chigá ju Mujé Walubela? Echalí echi Ra'íchami ku nijéwaga jeaneli: ¡Nijé ju Jesusi mapu mujemi tamí wabé kichiga a'najata! Mujemi a binói niráa ne wabé okota, achigórigá mapurigá echi bóisi mapu ku kuwana sayéraga rité mapalí bilé rijói kusiti iché echo'ná ralálachi.

⁶ Echalí echi Saulo ne wabé sayilúmaga majaga jeanigá rukueli: Walubela, ¿churigami nakí mapu nijeni olama? Echalí echi Walubela Jesusi jeaneli: Wiliska, echo'ná walúlachi simigá. Echo'ná mujemi ruyérami níima mapurigá 'wérali ju mapu mujemi olama.

⁷ Echalí echi auché jaré rijói mapu Saulo yuwa sírali echo'ná buwichí, si'néami ne wabé majajali mapujiti aboni galá námali ra'icháchanachi echi Walubela Jesusi, chopi aboni ke wesi riwali.⁸ A'lí echi Saulo ku wilísali, chopi ku 'néniga tarapé machíili. Echijiti echi auché jaré, chapigá binói sikálachi, echo'ná Ramáskochi pali.⁹ A'lí echo'ná Ramáskochi asagá, echi Saulo ketasi omérali 'néniya, bikiyá rawé yénasí. Echalí binói tarapé namuti ko'wali, nirapé bajili ba'wí.

¹⁰ A'lí bilé rijói bichíiyami bitéali echo'ná Ramáskochi echi mapu Ananíasi riwéami níili. Échiko rimuga niráa riwali echi Walubela Jesucristo. Echalí echi Walubela bayegá jeaneli: ¡Ananíasi! ¹¹ Echalí echi Ananíasi ku nijéwaga jeaneli: ¡Walubela, jena'ini atí! ¹¹ Echalí echi Walubela waminabi jeaneli: Wiliska simigá echo'ná biléana ri'narátachi mapo'ná Watoná anilíwachi ju. A'lí echo'ná echi Júrasi riwéami rijói bitélachi rukué acha echo'ná atí bilé rijói, echo'ná Társochi bitéami, echi mapu Saulo riwéami ju. Echi Saulo tamí yuwa we táníga ra'icha. ¹² Ayénachó echi Saulo rimuga niráa ma riwali mapurigá mujé Ananíasi echo'ná nawama, mapurigami moba nochama mujé sikala jiti, mapurigá echi Saulo auchecho galá ku machíliami níima.

¹³ A'lí je'ná jerigá namsa, echi Ananíasi ku nijéwaga jeaneli: Walubela, wikabé ma tamí ruyeli mapurigá echi rijói chati olá. Aboni tamí ruyeli mapurigá binói ne wabé risúu olali echi jaré bichíiyami echo'ná Jerusalémachi piréami, si'néami mapu ikí galá bichíi Mujé niráa. ¹⁴ Ayénachó echi Ananíasi waminabi jeaneli: ¡Jipi echi Saulo ma nawali jena'í mapujiti echi jaré o'wéala sacerdote wakiná júuli mapurigá binói bologá tomea mo'wámiya si'néami tamujé máputa galá bichíiga, mi yuwa táníga ra'icha!

¹⁵ Chopi echi Walubela jeaneli: Arigá simigá, mapujiti Nijeni chapili echi Saulo mapurigá binói tamí jiti ra'íchama echi auché jaré isena pagótami, aboni o'wéalawala ayénachó, echi jaré Isaeli pagótami asíchiko. ¹⁶ Ayénachó echi Walubela jeaneli: Nijeni machírama echi Saulo mapu chu yena binói ne wabé risúu nílama mapujiti binói tamí galá bichíi.

¹⁷ Echalí echi Ananíasi simigá bakili echo'ná kalírali mapo'ná echi Saulo asali. A'lí binói sikala jiti moba nochogá jeaneli: Rijimala Saulo, echi Walubela Jesusi tamí júuli mapurigami auchecho ku machíliami níima, ayénachó mapurigami galá nulérami níima echi Wabé Galabé Riosi Iwigala jiti. Echi Walubela Jesusi Binói níili mapu mujemi riwali echo'ná buwichí mapo'nami inárali.

¹⁸ Echalí we yáati jaré namuti mapuyiri rochí kajela rujuili echo'ná echi Saulo busílachi jonsa, ayénachó binói ke sayiná ma galá ku machíliami níili. Echalí binói ku wilísali; ayénachó binói ba'wí jiti pagótami níili. ¹⁹ A'lí mapalí echi Saulo ma ko'wali, echalí binói galá ku jiweráli. A'lí binói wikabé ch'iléli echo'ná piréami bichíiyami yuwa.

Echi Saulo chota Riosi Ra'íchala nawésiya

²⁰ Echalí echi Saulo chótali Riosi Ra'íchala nawésiya echo'ná buchuwiámi echi jaré Juríosí pagótami ri'obáwalachi; ayénachó echi Saulo nawésali jeanigá mapu echi Jesusi bilepi ju Riosi Ranala. ²¹ Echalí echi jaré pagótami mapu ikí námali echi Saulo echirigá nawésami, si'néami ne wabé cha nílagá 'nátaga jeanigá rukueli: ¿Kecha je'ná rijói ju mapu wabé risúu olali echo'ná Jerusalémachi piréami bichíiyami, si'néami mapu ikí galá bichíiga, Jesusi yuwa táníga ra'íchali? ¿Kecha binói níili mapu ayénachó jena'í nawali mapurigá binói bologá tomea echi jaré echiyiri bichíiyami echo'ná echi jaré o'wéala sacerdote yuwa?

²² Chopi echi Saulo waminabi ne galá bichíiga nawésali Riosi Ra'íchala. Echirigá echi Saulo galá machírali echi jaré pagótami mapu echi Jesusi níili echi Cristo anilíwami, mapu Riosi julama riwéali jena'í wichimóbachi. Echijiti echi jaré Juríosí echo'ná Ramáskochi piréami ma ke newalárali.

Echi Saulo miná ni'yúsali

²³ A'lí mapalí ma simírali wi'libé rawé echí jaré Juríosi pagótami a'nagupi niráa ra'íchaga, a'láraga anili mapurigá aboni waminá mi'limea echí Saulo. ²⁴ Chopi echí Saulo ruyérami níli mapurigá aboni echirigá mi'lináali binói. Echalí aboni sinibí rawé, sinibí rokogó, echo'ná buwichí iwigá muchili, mapujiti aboni echirigá mi'lináali echí Saulo mapalí binói ku machínama riwéali echo'ná walúlachi jonsa. ²⁵ Chopi echí auché jaré bichíiyami, rokogó niráa, simérali echí Saulo echo'ná ripáami echo'ná walúlachi noligá tigótachi. A'lí aboni echo'ná biléana walubé walírali achagá, wiya jiti bulugá, ri'lé wichí rikibuli echo'ná machímama. A'lí echí Saulo echirigá ku simili echo'ná jonsa.

Echi Saulo ku nawali echo'ná Jerusalémachi

²⁶ Echalí mapalí echí Saulo ku nawali echo'ná Jerusalémachi, binói we nakili napawínala echí auché jaré bichíiyami yuwa; chopi si'néami aboni ne wabé majali mapujiti aboni ketasi mayeli mapu echí Saulo ne bichíwali galá bichíiyami níli. ²⁷ A'lí echí Benabé bayéraga toli echí Saulo echo'ná echí jaré makói miná bilé yuwa mapu julárami níli nawisánala Riosi Ra'íchala. Echalí echí Benabé aneli aboni mapurigá echí Saulo galá riwali echí Walubela Jesusi echo'ná buwichí, ayénachó mapurigá echí Walubela Jesusi ra'íchali binói Saulo yuwa; ayénachó binói aneli aboni mapurigá echí Saulo tarapé majaga nawésali Jesucristo Ra'íchala echo'ná Ramáskochi. ²⁸ Echalí echí Saulo echo'ná Jerusalémachi tibili. A'lí binói sinibí iyénali echí auché jaré yuwa mapu julárami níli nawisánala. ²⁹ Echalí echí Saulo wabé galá bichífiga nawésali Jesucristo Ra'íchala, mapalí binói ra'íchali echí jaré Juríosi yuwa, si'néami mapu ikí Griego anilíwami ra'íchami níli. Chopi aboni wabé nakili mi'lináliya echí Saulo. ³⁰ Chopi mapalí echí jaré wikabé bichíiyami galá machili mapurigá echí auché jaré echirigá mi'lináali echí Saulo, echalí aboni toli echí Saulo echo'ná auché biléana, Sesaréachi anilíwachi. A'lí echo'ná jonsa aboni júuli echí Saulo echo'ná Társochi anilíwachi.

³¹ Echalí suníami piréami napawika bichíiyami echo'ná Juréachi anilíwachi kawírali piréami ma ketasi waminabi kichiga a'najátarami níli, chopi si'néami aboni waminabi wabé galá bichíili Riosi Ra'íchala. A'lí echirigá ayénachó ikili echí auché jaré napawika bichíiyami echo'ná Galiléachi anilíwachi kawírali piréami yuwa, echí auché jaré yuwa ayénachó, si'néami mapu ikí piréali echo'ná Samáriachi anilíwachi kawírali.

Echi Enéasi riwéami rijói galá ku sa'wárami níli

³² Echalí mapalí echí Pegro echo'ná suníami piréami ritémtami pirélachi 'nénuya iyénali, echalí binói ayénachó 'némiya simili echo'ná Lírachi piréami ritémtami.

³³ Echo'ná Lírachi echí Pegro riwali bilé rijói, Enéasi riwéami, echí mapu tarapé omériali wilísaya. Échiko chopi bu'wíami níli echo'ná biléana pechi chabé osá naó bamíbali jonsa. ³⁴ Echalí Pegro jeaneli: ¡Mujé Enéasi! ¡Echi Walubela Jesucristo mi galá ku sa'wá! ¡Ku wilísika, ku a'lari kemi peri! Echalí echí Enéasi we yáati galá ku wilísali. ³⁵ A'lí si'néami pagótami echo'ná Lírachi piréami riwali mapurigá echí rijói ma galá ku sa'wárami níli. Si'néami pagótami echo'ná Sarónachi piréami ayénachó echirigá riwali. Echalí ma ariwesa mapurigá aboni chabénala bichíili, si'néami aboni galá bichíili echí Walubela Jesucristo niráa.

Bilé mukí mukúami, ku owíntarami níili

³⁶Echalí rawé echo'ná Jópechi anilíwachi bitéali bilé mukí bichíiyami echí mapu Tabita riwéami níili, chopi echí Griego anilíwami ra'íchali niráa, échiko Rorka riwéami níili. Je'ná mukí sinibí galabé ologá iyénali, ayénachó binói sinibí ku'wírali echí jaré tisúati pagótami. ³⁷Echalí rawé echí mukí nayúnaga mukuli. A'lí echí auché jaré bichíiyami ma pabákasa echí mukúami sapala, echalí echo'ná biléana kalírali, osá a'namótachi rikali. ³⁸Echo'ná Lírachi anilíwachi mulubé níili echo'ná Jópechi anilíwachi jonsa, mapo'ná echí Pegro asali. A'lí mapujiti echí jaré bichíiyami echo'ná Jópechi piréami galá machili mapu echí Pegro echo'ná Lírachi asali, echijiti aboni okuá rijói jeanénala júuli: ¡We yáati wakiná Jópechi simí! ³⁹Echalí echí Pegro we yáati ku simili aboni yuwa. A'lí mapalí binói nawali echo'ná Jópechi, echalí binói echo'ná pachá tólati mapo'ná echí mukúami mukí bu'wili. Echalí ne si'néami echí jaré tisúati kunámami mugú ne nalákaka 'nénali ayénachó aboni 'nérali echí wikabé napacha, echí wikabé sipucha ayénachó, suwaba mapu ikí echí Rorka riwéami mukí niwáli mapalí abijí bitéali. ⁴⁰Chopi echí Pegro si'néami machí a'wasa, echalí chokóbaga wiligá tániga ra'íchali Riosi yuwa. A'lí galá 'néniga echí mukúami mukí, echí Pegro jeaneli: ¡Mujé Tabita, ku asísaka! Echalí echí mukí mapu mukúami níili, auchecho ku bitéali. A'lí ma ku 'néniga, galá riwali echí Pegro. Echalí echí mukí ku asísali. ⁴¹Echalí echí Pegro chapigá echí mukí sikala, galá ku wilásali. Echalí ma ku bayégá echí auché jaré ritémtami, echí jaré mugú kunámami ayénachó, a'lí binói riwírali echí Rorka ma ku bitéami niráa. ⁴²Echalí ne si'néami pagótami echo'ná Jópechi piréami ruyélati mapu je'ná jerigá ikili; ayénachó wikabé aboni galá bichíili echí Walubela Jesucristo niráa. ⁴³A'lí echí Pegro wikabé chi'leli echo'ná Jópechi, mapo'ná binói tibili echo'ná bilé rijói bitélachi, echí mapu Simoni riwéami níili, echí mapu baketa niwáami níili.

Pegro bayérami níili echo'ná Kornelio bitélachi

10 Echo'ná Sesaréachi anilíwachi walúlachi bitéali bilé rijói Kornelio riwéami, echí mapu walula sontarsi níili, mapu ayénachó nuléami níili bilé kiento kuchípala sontarsi, echí jaré mapu kala napawika niráa, Italiano anilíwami níili. ²A'lí echí Kornelio, binói upila ayénachó, binói kúchuwala asíchiko, si'néami galá majaga o'wikeli Riosi. A'lí binói sinibí galá kówali mapu ikí newaleli echí jaré Juríosi pagótami, ayénachó binói sinibí Riosi yuwa tániga ra'íchali. ³Siné rawé ma peé ko'náanachi rayénali, echí Kornelio rimuga niráa galá riwali mapu bilé walula Riosi kapitánawala nawagá echo'ná pachá mapo'ná binói asali, echalí jeaneli: ¡Kornelio!

⁴Echalí echí Kornelio ne wabé majaga 'néniga, jeanigá rukueli: ¿Pírimi nakí mujé walubela? Echalí echí walula Riosi kapitánawala jeaneli: Riosi ma galá námali mapurigami Binói yuwa tániga ra'íchali, ayénachó Riosi galá nirali mapurigami kówaga olali echí jaré newaléami. ⁵¡Jipi julá jaré rijói echo'ná Jópechi, bilé rijói Simoni riwéami wakiná bayénala, echí mapu ayénachó Pegro riwarárami ju! ⁶Échiko echo'ná auché bilé rijói Simoni riwéami kalílachi atí. Echi rijói baketa niwáami ju, ayénachó echo'ná mulubé walú ba'wírali suwé kaliwa. Echi Simoni Pegro mi galá anema mapurigá arigá 'wérali ju mápumi olama.

⁷Mapalí echí walula Riosi kapitánawala ku simili, echalí echí Kornelio bayeli okuá binói piónawala, ayénachó bayeli bilé sontarsi mapu galá bichíiyami níili

Riosi, echi rijói mapu echí Kornelio mayeli mapu galabé oláami níili. ⁸Echalí echi Kornelio galá suwaba ruyesa mapurigá ikili, a'lí echo'ná Jópechi júuli.

⁹Ba'línala rawé mapalí je'ná jaré rijói echo'ná buwichí 'yénali, mapalí ma ne mulubé sébachi níili echo'ná Jópechi, echalí ne nasipa rawé níili. A'lí echo'ná mapo'ná echi Pegro tibili, binói ripá moba kalírali 'moli, Riosi yuwa ra'ichámiya. ¹⁰Echalí echi Pegro we 'lochega, ne wabé ko'náali, chopi mapuyénasí echi jaré muguí abijí a'lárali ko'wáami, echi Pegro we kochinálaga rimuli. ¹¹Echalí echi Pegro rimuga riwali mapu echo'ná ripá riwigachi iráparami niráa níili; ayénachó rimuga riwali mapu echo'ná ripá riwigachi jonsa rikírali bilé namuti mapurigá bilé ne walubé chipérämi chiní mapu echo'ná naóana suwilachi bologá, ri'lé wilýerali rikibúrami níili. ¹²A'lí echo'ná walubé chipérämi chinírali moba nirúali ibili niráa suwaba namuti naó ronéami jena'í wichimóbachi nirúami, suwaba namuti ibili niráa echi jaré sinowi ayénachó, suwaba namuti ibili niráa echi jaré o'weli chuluguí ayénachó. ¹³Echalí echi Pegro galá námali mapalí echi Walubela echo'ná ripá riwigachi atíami ra'ichaga jeaneli: ¡Mujé Pegro, wiliska ko'wigá jaré namuti, galá ko'wá! ¹⁴Chopi echi Pegro ku nijéwaga jeaneli: ¡Walubela, ketásini echirigá ko'mea, mapujiti nijeni ke siné ko'wá echi we chati sitíi namuti mapu ketasi risénsia ju ko'mea! ¹⁵Echalí echi Walubela auchecho ra'ichaga jeaneli: ¡Ketasi ané mujé mapu we sitíi ju echi jaré namuti, suwaba mapu ikí Riosi ma galá bi'wali! ¹⁶Je'ná jerigá ikili baisá chokéami niráa. Echalí echi walubé chipérämi chiní auchecho ku torúami níili echo'ná ripá riwigachi.

¹⁷A'lí mapuyénasí echi Pegro abijí we 'nátaga asali mapu churigá aniwáami níili mapurigá binói rimuga riwali, echalí echi jaré rijói mapu echi Kornelio júuli ma sébali echo'ná yéachi, mapo'ná aboni rukueli acha echi Simoni kalílachi níili. ¹⁸Ayénachó ma sébachi echo'ná yéachi aboni o'weli ra'ichaga rukueli acha echo'ná asali bilé rijói, Simoni riwéami mapu ayénachó Pegro riwéami níili. ¹⁹A'lí mapalí echi Pegro abijí 'nátaga asali mapurigá binói rimuga riwali, echalí echi Wabé Galabé Riosi Iwigala jeaneli: ¡Bikiyá rijói mi amí! ²⁰¡Wiliska ku rikina! Tarapé majaga simigá aboni yuwa, mapujiti Nijeni júuli aboni. ²¹Echalí echi Pegro ku rikínaga nawali echi jaré rijói yuwa mapu echi Kornelio jiti julárami níili. A'lí Pegro jeaneli: Nijeni ju mapu 'yémitamo amí. ¿Piri jítitamo sili? ²²Echalí aboni ku nijéwaga jeaneli: Echi walula kapitani Kornelio riwéami tamujé tamí júuli. Échiko galá bichíwaga oláami ju, ayénachó binói galá majaga walubélaga ané Riosi, ayénachó echi jaré Juríosí wabé galé echi binói Kornelio. Bukulí bilé walula Riosi kapitánawala nawagá binói yuwa, jeaneli mapurigá mi bayema echo'ná binói bitélachi, mapurigá binói námama mapurigami anema. ²³A'lí echi Pegro echo'ná pachá kalírali mo'wali. Echalí aboni echo'ná chi'llébali echi Pegro yuwa.

A'lí ba'línala rawé echi Pegro ku simili aboni yuwa. Echalí auché jaré ritémrtami echo'ná Jópechi piréami ayénachó apanéraga simíbali. ²⁴Waniwíala rawé aboni auchecho ku sili echo'ná Sesaréachi. Echalí echi Kornelio buwé asali, ayénachó buwé muchili jaré echi Kornelio ritémawala, jaré binói galabé amígowala ayénachó, si'néami mapu ikí binói bachá bayeli. ²⁵A'lí mapalí echi Pegro nawali echo'ná Kornelio bitélachi, echalí echi Kornelio naripámiya machírali, ayénachó binói echo'ná bacháami Pegro yuwa, wéemi raweka, chokoba wilíbali, wabé walubélaga anémiya. ²⁶Chopi echi Pegro jeanigá wilásali: ¡Wiliska! Ketasi echirigá tamí walubélaga ané, mapujiti nijeni ayénachó rijói ju mapuyiri mujé niráa.

²⁷Echalí echí Pegro echí Kornelio yuwa ra'íchaga, echo'ná pachá kalírali bakili. Echo'ná pachá binói riwali wikabé pagótami napawika muchúwami. ²⁸Echalí echí Pegro jeaneli: 'Yémitamo galá machí mapu nijeni bilé Juríosi rijói ju, ayénachótamo machí mapu tamujé Juríosi pagótami mayé mapu ketasi risénsia ju mapu bilé Juríosi rijói napawika 'yena 'yemi isena pagótami yuwa, nibilé mapurigá bilé Juríosi rijói bakimea jena'í pachá 'yemi pirélachi. Chopi Riosi bukulí tamí ruyeli mapu ketasi galá ju mapu nijeni we chati sitíi anema auché jaré pagótami, nibilé mapurigá nijeni animea mapu ketasi risénsia ju mapu nijeni bakimea echo'ná aboni pirélachi. ²⁹Echijiti mapalítamo tamí bayeli, nijeni ketasi anigá, we yáati wakiná simili. Jipi tamí ruyesi: ¿Piri jítitamo tamí bayeli?

³⁰Echalí echí Kornelio ku nijéwaga jeaneli: Ma naó rawé simírali, achigórigá mapuyénako jipi, mapalí nijeni jena'í pachá nijé kalílachi asali. Echalí alíwachi nijeni wi'libé niráa tarapé namuti kosá, chópini Riosi yuwa ra'icha asali. Echalí ke sayiná bacháami tamí yuwa wilíbali bilé walula Riosi kapitánawala, echí mapu ne wabé simírami ratábami napáchami níili. ³¹A'lí echí walula Riosi kapitánawala tamí jeaneli: Mujé Kornelio, Riosi ma galá námali mapurigami Riosi yuwa ra'íchali, ayénachó Riosi galá machí mapurigami karúmati kówaga olali echí jaré wabé tisúati. ³²Jipi julá jaré rijói echo'ná Jópechi, bilé rijói Simoni riwéami wakiná bayénala, echí mapu ayénachó Pegro riwarárami ju! Echiko echo'ná auché bilé rijói, Simoni riwéami, kalílachi atí. Echi Simoni baketa niwáami ju, ayénachó binói echo'ná mulubé walú ba'wírali suwé kaliwa. Echi Simoni Pegro mi galá ra'íchama mapalí binói wakiná nolínasa. ³³Echirigá nijeni we yáati júuli mi bayénali. Jípita we kaníli mapujítimi ma nawali, ayénachó Riosi galá machí máputa jena'í napawika muchuwi mapurigata galá kipubo suwaba mapu echí Walubela Riosi mi nuleli tamujé tamí ruyénala.

Pegro galá nawesa echo'ná Kornelio bitélachi

³⁴Echalí echí Pegro ra'íchaga jeaneli: Maní galá machí mapu Riosi ne bichíwali galé echí auché jaré isena pagótami, achigórigá mapurigá Binói galé echí jaré Israeli pagótami, mapujiti Riosi si'néami chopi ayiri niráa olá echí auché jaré isena pagótami yuwa, achigórigá mapurigá Binói olá tamujé Israeli pagótami yuwa. ³⁵Ayénachó Riosi galá naré mapuyíripi pagótami mapu galá bichíiga majá Binói Riosi, si'néami mapu ikí galabé olako. ³⁶Riosi júuli jaré rijói nawesáala echí jaré wikabé Israeli pagótami, jeanigá mapurigá echí jaré pagótami jena'í wichimóbachi piréami galá kilí niráa ologá pirélama mapalí aboni galá bichíima Jesucristo niráa, echí mapu ne Walubela ju si'néami pagótami yuwa. ³⁷'Yémitamo ma galá machí mapurigá echí Walubela Jesusi olali echo'ná ne suníami mapo'ná echí jaré Juríosi pagótami piré. Binói chótali echirigá olayá echo'ná Galiléachi anilíwachi kawírali, pe wakinana mapalí echí Juani ma nawésali mapurigá si'néami pagótami wikáwali tánaga ku ro'wima Riosi yuwa, ayénachó mapurigá aboni ba'wí jiti pagótami níima. ³⁸'Yémitamo galá machí mapurigá Riosi 'yalí mapurigá echí Jesusi echo'ná Nasarétachi bitéami wabé omériga nulérami níima echí Wabé Galabé Riosi Iwigala jiti. Ayénachótamo machí mapurigá echí Jesusi sinibí galabé ologá iyénali, ayénachó mapurigá Binói ku sa'wali si'néami echí jaré pagótami mapu ikí nayúkami níili mapujiti echí riablo echirigá wabé risúu olali. Echi Jesusi galá omérali echirigá olayá mapujiti Riosi sinibí Binói yuwa níili.

³⁹ A'lí tamujeta galá riwali suwaba mapu Jesusi olali ne suníami echo'ná Juréachi anilwachi kawírali, echo'ná Jerusalémachi anilwachi walúlachi ayénachó, echijítita nawesa echi jaré pagótami. A'lí echi Walubela Jesusi echo'ná biléana kúrsichi michóniga mi'lirúami níili. ⁴⁰ Chopi Riosi ku owíntali echi Jesusi ma bikiyá chi'lligá, ayénachó Riosi galá olali mapurigá tamujé riwiboa echi Jesusi ma ku bitéami niráa. ⁴¹ Echalí ketasi ne si'néami pagótami riwali echi Walubela Jesucristo, chopi tamujeta galá riwali. Chabénala Riosi tamujé tamí chapili mapurigata galá riwiboa echi Walubela Jesucristo ma ku bitéami niráa, mapurigata galá bichíiga nawésabo echi auché jaré pagótami. A'lí ayénachó ko'wali Binói yuwa mapalí Binói ma ku bitéami níili mapalí Binói chabénala mukúami níili. ⁴² Ayénachó Binói tamujé tamí júuli nawesánala echi pagótami mapurigata ruyebo aboni mapurigá Riosi wilali je'ná Jesusi mapurigá Binói justicia olama si'néami pagótami yuwa mapu ikí abijí piréami níima jena'í wichimóbachi echalí ne jubá rawé, ayénachó mapurigá Binói justicia olama si'néami pagótami yuwa mapu ikí ma suwíami níima echalí ne jubá rawé. ⁴³ Ayénachó echi jaré ki'yá piréami Riosi jiti nawésami, ne si'néami echi Jesusi jiti rugá osali, jeanigá mapu si'néami pagótami mapu ikí galá bichíiko Binói Jesusi niráa, abóniko galá ku wikáwarami níima mapurigá aboni chati olali.

**Echi Wabé Galabé Riosi Iwigala nawali pachana jaré pagótami
sulálachi mapu ketasi Juríosi pagótami níili**

⁴⁴ A'lí mapalí echi Pegro abijí echirigá ra'íchali, echalí ke sayiná echi Wabé Galabé Riosi Iwigala nawali echo'ná pachana si'néami aboni sulálachi mapu ikí námali mapurigá echi Pegro nawésali. ⁴⁵ Echalí echi jaré galá bichíiyami Juríosi pagótami mapu echi Pegro yuwa sili, si'néami ne chami nílaga ikili mapujiti echi Galabé Riosi Iwigala nawali echo'ná pachana echi auché jaré isena pagótami sulálachi, mapu ketasi Juríosi pagótami níili. ⁴⁶ Mapujiti echi jaré Juríosi námali mapalí echi jaré isena pagótami mapu ikí bichíili we ra'íchali auché jaré isena ra'íchali mapu ketasi níili aboni ra'íchala niráa, ayénachó echi jaré isena pagótami echirigá ra'íchaga wabé walubélaga aneli Riosi. ⁴⁷ Echalí Pegro jeanili: Galá risénsia ju mapurigá aboni ba'wí jiti pagótami níima, mapujiti aboni ma niwa echi Wabé Galabé Riosi Iwigala achigórígá mapurigá tamujé niwa. Ke wesi omérama aniyá mapu ketasi risénsia ju mapurigá aboni echirigá pagótami níima. ⁴⁸ Echalí echi Pegro nulali mapurigá aboni ba'wí jiti pagótami níima mapujiti aboni ma galá bichíili Jesucristo niráa. A'lí mapalí aboni ma echirigá pagótami níili, aboni tánali echi Pegro mapurigá binói echo'ná aboni yuwa tibima pe teli rawé.

**Echi Pegro galá ruyeli echi jaré napawika bichíiyami
echo'ná Jerusalémachi piréami**

11 A'lí echi jaré mapu Riosi júuli nawisánala, si'néami galá námali mapurigá echi auché jaré isena pagótami ayénachó galá bichíili Riosi Ra'íchala. A'lí echi jaré ritémtami echo'ná Juréachi anilwachi kawírali piréami ayénachó echirigá námali. ² A'lí mapalí echi Pegro ma ku nawali echo'ná Jerusalémachi, echalí echi jaré Juríosi pagótami mapu galá bichíiyami níili, aboni we sayéraga, yóniga ra'íchali echi Pegro yuwa, ³jeanigá: ¿Churékulami bakili echo'ná auché jaré isena pagótami kalflachi, mapurigami ko'mea aboni yuwa?

⁴A'lí echi Pegro galá ku ruyeli ne suwaba namuti mapu ikí ikili chabénala chokichí jonsa, mapalí jonsa binói chótali nawésiya echi auché jaré isena pagótami. Echalí binói jeaneli:

⁵Chabé nijeni Riosi yuwa ra'icha asali echo'ná Jópechi anilíwachi walúlachi. Echalí nijeni kochináliga rimuga riwali bilé namuti mapurigá bilé walubé chiní, mapu naóana suwilachi boglág, ripá riwigachi jonsa, ri'lé wi'yérali rikibúrami níili. A'lí mulubé tamí yuwa nawali. ⁶A'lí mapalí nijeni galá 'nénali echo'ná pachana, nijeni riwali karúmati naó ronéami namuti jena'í wichimóbachi nirúami, jaré jobátami namuti ayénachó, jaré sinowi ayénachó, jaré o'weli i'nika 'yénami namuti ayénachó. ⁷Echalí nijeni námali bilé Ra'íchami mapu tamí jerigá aneli: Pegro, wiliska, jaré je'ná namuti mi'agá, galá ko'wá. ⁸Chopi nijeni jeaneli: Walubela ketasi ko'méani, mapujiti nijeni ke siné ko'wali echi jaré sitíi namuti mapu ketasi risénsia ju mápuni ko'mea. ⁹Echalí echi Ra'íchami auchecho siné tamí ra'íchali echo'ná ripá riwigachi jonsa mapalí tamí jeaneli: ¡Ketásimi chati sitíi ané echi jaré namuti mapu Riosi ma galá risénsia nulali mapu 'yemi pagótami ko'mea! ¹⁰A'lí je'ná jerigá baisá chokéami olálami níili. Echalí suwaba karúmati ku torúami níili echo'ná ripá riwigachi. ¹¹Echalí we yáati bikiyá rijói sili echo'ná kalírali mapo'ná nijeni asali. Aboni echo'ná Sesaréachi jonsa julárami níili tamí bayénala. ¹²A'lí echi Wabé Galabé Riosi Iwigala tamí nuleli mapurigani tarapé majaga simea aboni yuwa. Echalí je'ná usani ritémtami ayénachó tamí yuwa simíbali. A'lí si'néami tamujé mo'wili echo'ná bilé rijói bitélachi, ¹³echi mapu tamujé tamí ruyeli mapurigá binói riwali bilé walula Riosi kapitánawala echo'ná pachá binói bitélachi wilíami, echi mapu jeaneli: Jaré rijói julá echo'ná Jópechi, wakiná bayénala auché bilé rijói Simoni riwéami, echi mapu ayénachó Pegro rijíkowami ju. ¹⁴Échiko mi ruyema mapu churigá mujemi galá ku wikáwarami níima, mujé upila ayénachó, mujé kúchuwala asíchiko. ¹⁵A'lí mapalí nijeni chótali ra'íchiya, echalí echi wabé Galabé Riosi Iwigala echo'ná moba abónichi nawali, achigórigá mapurigá moba tamujé yuwa nawali chabé chokichí. ¹⁶Echalí nijeni 'nártali mapurigá echi Walubela Jesusi jeanili: Echi Juani ne bichíwali ba'wí jiti pagoli echi pagótami, chopi 'yémítamo pagótami níibo echi wabé Galabé Riosi Iwigala jiti. ¹⁷A'lí mapujiti Riosi echirigá 'yali echi wabé Galabé Riosi Iwigala echo'ná abónichi, achigórigá mapurigá Binói tamujé tamí 'yali máputa galá bichíili echi Walubela Jesucristo niráa, echijiti nijeni ketasi nakili sayéranala Binói Riosi.

¹⁸A'lí mapalí echi jaré bichíiyami echo'ná Jerusalémachi piréami je'ná jerigá námali, echalí aboni ketasi waminabi sayéraga ra'íchali. Chopi aboni waminabi walubélaga aneli Riosi mapalí aboni jeanili: ¡Ne bichíwali Riosi ayénachó 'yali mapurigá echi auché jaré isena pagótami ayénachó omérama ku ro'wiya Riosi yuwa, mapurigá aboni ne sinibí piréami níima!

Echi jaré napawika bichíiyami echo'ná Antioquíachi piréami

¹⁹Mapalí echi Siteba mi'lílati echalí echi jaré Juríosi ke bichíiyami ayénachó chótali risúu ologá a'najátasiya echi auché jaré mapu galá bichíili Jesucristo niráa. Echijiti jaré bichíiyami mikabé júmsali echo'ná Jinísiachi anilíwachi yénasí. Auché jaré júmsali echo'ná Chíprechi anilíwachi kawírali. Auché jaré júmsali echo'ná Antioquíachi anilíwachi walúlachi. A'lí aboni chopi nawésali Riosi Ra'íchala echi auché jaré Juríosi echo'ná piréami. Aboni ketasi nawésali echi auché jaré isena

pagótami. ²⁰Chopi jaré aboni echo'ná Chíprechi piréami níili. Auché jaré aboni echo'ná Sirénachi anilíwachi piréami níili. Echalí mapalí aboni sili echo'ná Antiokíachi anilíwachi walúlachi, aboni ayénachó ra'íchali echi auché jaré isena pagótami mapu ketasi Juríosi níili. Echalí aboni galá nawésali echi Walubela Jesucristo Ra'íchala echi auché jaré isena pagótami, mapurigá aboni galá bichíiga ku wikáwarami níima. ²¹A'lí echi Walubela 'yali jiwérawala mapurigá aboni ne galabé nawesáma Riosi Ra'íchala. Echijiti wikabé pagótami echo'ná Antiokíachi piréami ma ariweli mapurigá aboni chabénala bichíiga olali, a'lí aboni galá bichíili echi Walubela Jesucristo niráa.

²²A'lí mapalí echi jaré napawika bichíiyami echo'ná Jerusalémachi piréami je'ná jerigá námali, echalí aboni júuli echi Benabé echo'ná Antiokíachi. ²³A'lí mapalí echi Benabé echo'ná nawali, echalí binói riwali, mapurigá Riosi ma galá ku'wírali echi jaré aboni. Echijiti echi Benabé ne wabé kaníli. A'lí binói galá ruyeli si'néami mapurigá aboni ne sulachí niráa sinibí galá bichíima echi Walubela Jesucristo niráa. ²⁴Mapujiti echi Benabé we galabé rijói níili. Binói galá bichíiyami níili, ayénachó binói galá nulérami níili echi wabé galabé Riosi Iwigala jiti. Echalí rawé wikabé pagótami galá bichíiga muweli echi Walubela Jesucristo yuwa.

²⁵A'lí pe wakinánokuá echi Benabé simili echo'ná Társochi anilíwachi walúlachi, echi Saulo ásiya. A'lí ma riwisáa, echo'ná Antiokíachi bayébali. ²⁶A'lí aboni echo'ná muchili bilé bamíbali yénasí, echi jaré napawika bichíiyami yuwa. Echalí aboni galá binérali wikabé pagótami. A'lí echo'ná Antiokíachi níili mapo'ná echi jaré bichíiyami ne bachá niráa Kristiano anélati.

²⁷Echalí rawé jaré rijói, Riosi jiti nawésami, echo'ná Jerusalémachi jonsa simasa, echo'ná Antiokíachi simíbali. ²⁸A'lí bilé aboni Agabo riwéami níili. Échiko ne nasipa wil'baga, echi auché jaré bichíiyami yuwa, ne galá nawésaga ruyeli mapurigá echi wabé Galabé Riosi Iwigala binérali binói. A'lí echirigá nawésaga jeanili mapu ne wabé nirúlama 'lówali ne suníami jena'í wichimóbachi. A'lí echirigá ne bichíwali ikili mapalí echi Kláurio riwéami ne walubela silíami níili jena'í wichimóbachi. ²⁹Echalí echi jaré napawika bichíiyami echo'ná Antiokíachi piréami, ibili niráa nakili wenomí 'yánala echi jaré ritémtami echo'ná Juréachi piréami, mapuyena ibili aboni omérama 'ayá. ³⁰A'lí aboni echirigá olali; ayénachó aboni júuli echi Benabé echi Saulo yuwa, echi wenomí 'yánala echi jaré o'wéala ochérami bichíiyami echo'ná Juréachi piréami.

Echi Jakobo waminá mi'lirúami níili, ayénachó echi Pegro pachá bachárami níili

12 Echalí rawé echi walula silíami Erorsi riwéami nulali risíu ologá a'najátanala jaré mapu napawika bichíiyami níili. ²Échiko nulali wi'lí ripiyá jiti mi'línala echi Jakobo, echi mapu Juani rijimala níili. ³A'lí galá machisá mapu echi auché jaré Juríosi wabé kaníili mapujiti binói echirigá nulali mi'línala echi Jakobo, echalí echi Erorsi ayénachó nulali bulínala echi Pegro. Je'ná jerigá ikili echalí omowálawachi rawé mapalí ko'wálati echi jaré pani ke nasówarami echi levadura anilíwami mapu echijiti galabé niwaliwa echi pani. ⁴A'lí mapalí echi Pegro ma echirigá bologá pálati, echalí echi walula Erorsi nulali pachá kumurachi bachánala; ayénachó nuleli naóana niráa rojonárami sontarsi, naó niráa, echi Pegro tibúnala. A'lí echi Erorsi we nakili mapu pe waminánomí ku machí paka mi'limea echi Pegro, bacháami echi wikabé Juríosi pagótami yuwa, mapalí aboni

ma sunisa echirigá omáwiya.⁵ Echirigá echi Pegro ne galá tibútarami níili echo'ná pachá kumurachi achagá, chopi echi auché jaré napawika bichíiyami sinibí wabé tániga ra'íchali Riosi yuwa, echi Pegro jiti.

Riosi ku machí pali echi Pegro echo'ná pachá kumurachi jonsa

⁶Echalí rokogó mapalí echi walula Erorsi ma ku machí pama riwéali echi Pegro ba'alínala niráa, mapurigá échiko ma mi'lirúami níima echo'ná bacháami echi wikabé pagótamichi, echalí rokogó echi Pegro kochigá bu'wili echo'ná nasipa okuá sontarsi yuwa, ayénachó binói galá bulérami níili okuá jiero wiya jiti. A'lí auché jaré sontarsi we galá tibuka jali echo'ná kumurachi yéachi. ⁷Echalí we yáati bilé walula Riosi kapitánawala ke sayiná wilíbali echo'ná pachá kumurachi, ayénachó echo'ná pachá ne wabé ratábali mapurigá walú rajáami niráa. Echalí echi walula Riosi kapitánawala echo'ná Pegro wachigálachi nochogá, busurébanaga jeaneli: ¡We sapú ku asísaka! Echalí echi jaré jiero wiya we yáati rujuili echo'ná Pegro sikálachi jonsa. ⁸A'lí echi walula Riosi kapitánawala jeaneli: ¡We yáa ku pusa, galá akarasa! A'lí mapalí Pegro echirigá olali, echalí echi walula Riosi kapitánawala jeaneli: ¡Galá napachasa, tamí najató!

⁹Echalí echi Pegro najátaga echi walula Riosi kapitánawala, waminá machínali echo'ná kumurachi jonsa. A'lí binói ketasi machili acha bichíwali níili mapurigá echi walula Riosi kapitánawala olali, chopi mayeli mapu rimúkowami niráa níili mapurigá binói riwali. ¹⁰A'lí mapalí aboni ma simárali mapo'ná bachá tibúami jali echi jaré sontarsi, echalí aboni ayénachó simárali mapo'ná okoná niráa tibúlati. A'lí aboni sili echo'ná jiero 'yétachi mapo'ná ma echo'ná machímana ri'narátachi simiwáami níili. Echalí echi 'yera bi'neli niráa irápatali. Echalí aboni ku 'machínali echo'ná kumurachi jonsa. A'lí mapalí aboni ma pe téelimi sírali, echalí echi walula Riosi kapitánawala ma waminá bi'neli ariweli echi Pegro. ¹¹A'lí echi Pegro ma galá ku 'nátaga jeaneli: Jípini galá machí mapu echi Walubela Riosi ne bichíwali júuli kepu kapitánawa tamí ku ku'wíranala mapurigá echi walula Erorsi ketasi tamí mi'limea, echi jaré Juríosi pagótami ketasi cho.

¹²A'lí je'ná jerigá 'nataса, echi Pegro simili echo'ná echi María bitélachi, echi mapu echi Juani iyela níili. A'lí echi Juani ayénachó Marko ayénachó riwéami níili. A'lí echo'ná kalírali ne wikabé echi jaré bichíiyami napawika muchili, Riosi yuwa ra'icha. ¹³A'lí mapalí echi Pegro chanérali echo'ná machímana yéachi, echalí bilé tiwé Rore riwéami 'némiya machínali mapu chigá níili. ¹⁴Chopi mapalí echi tiwé galá machili echi Pegro ra'íchala, echalí binói ketasi we yáati irápali, chopi ne wabé kaníлага echo'ná pachá ku 'mali, ku ruyésiya mapu echi Pegro ma wilili echo'ná machímana yéachi. ¹⁵Echalí aboni jeaneli: ¡Mujé ke newalite ju! Chopi binói waminabi aneli mapu ne bichíwali níili. Echalí aboni jeaneli: ¡Ketasi echi Pegro ju, chopi bilé walula Riosi kapitánawala níima, echi mapu echi Pegro tibúami ju! ¹⁶Chopi mapalí aboni abijí echirigá ra'íchali, echalí echi Pegro waminabi chanérali echo'ná yéachi. A'lí mapalí aboni ma irápali, echalí ma riwisáа echi Pegro, aboni ne wabé majajali. ¹⁷Chopi echi Pegro, binói sikala jiti ra'ámaga, mapurigá ketasi ra'icháma, a'lí ruyeli mapurigá echi Walubela Riosi ku machí pali binói echo'ná pachá kumurachi jonsa. A'lí waminabi jeaneli: Je'ná jerigá ruyesi echi Jakobo, echi auché jaré ritémtami ayénachó. Echalí binói ku machínaga, auché biléana simili.

¹⁸Chopi mapalí ma rawéawali echí jaré sontarsi ne wabé majaga buchuwí anili mapujiti aboni ketasi chirigá machili chu ikili echí Pegro. ¹⁹A'lí echí walula Erorsi júuli ánala echí Pegro, chopí ketasi riwali. Echalí ma galá rukugá echí jaré sontarsi mapu tibúami níili, a'lí nulali mapurigá aboni waminá ko'wirúami níima, mapujiti echí Pegro ma ku 'másali. Pe wakinánokuá echí Erorsi ku simili echo'ná Juréachi jonsa. A'lí echo'ná Sesaréachi anilíwachi walúlachi bitélamiya simili.

Echi Erorsi ma mukuli

²⁰Echalí rawé echí walula Erorsi wabé yoli echo'ná Tírochi piréami sayéraga, echo'ná Sirónachi piréami sayéraga ayénachó. Chopí si'néami aboni anili mapu galá níima ku katiwasa binói yuwa, mapujiti aboni kawíwalachi piréami sinibíralali echí ko'wáami echo'ná echí Erorsi kawíwalachi. Echalí aboni bachá niráa katéwali echí Blasto riwéami rijói yuwa, echí mapu walula nigúurami níili echí Erorsi yuwa. A'lí aboni echirigá katéwaga ra'ichánali echí Erorsi yuwa. ²¹Echalí siné rawé echí walula Erorsi bayeli aboni napawínala. A'lí wabé simati napáchaga mapurigá walubela silfámi niráa, echí walula Erorsi asíbali echo'ná binói níwala walula asíbalachi. Echalí binói galá ra'íchali aboni. ²²A'lí echí wikabé pagótami galá kipuga, o'weli ra'íchaga jeanili: Je'ná mapu ra'icha ketasi bilé rijói ju, chopí bilé riosi ju!

²³Echalí we yáati bilé walula Riosi kapitánawala wabé nayútali echí Erorsi mapujiti binói ketasi anili mapu Riosi waminabi simírami wabé Walubela ju. Echalí echí Erorsi we yáati mukuli mapujiti kúuchi mapuyiri sa'í jiti suwálati.

²⁴Chopi waminabi wikabé pagótami bichííli Riosi Ra'íchala. A'lí aboni ne suníami 'yénali Riosi Ra'íchala nawésiya. ²⁵A'lí mapalí echí Benabé, echí Saulo ma sunili aboni nóchala echo'ná Jerusalémachi, echalí aboni ku sili echo'ná Antiokíachi, ayénachó bayegá echí Juani, echí mapu ayénachó Marko riwéami níili.

Echi Benabé echí Saulo ma chota nawésiya

13 A'lí echí jaré napawika bichíiyami echo'ná Antiokíachi piréami wikabé níili. Jaré aboni o'wéala Riosi jiti nawésami níili. Auché jaré Riosi Ra'íchala binériami níili. Je'ná jaré Benabé níili, echí Simoni ayénachó, echí mapu Chókami anélati, echí Lukio ayénachó, echí mapu echo'ná Sirénachi anilíwachi kawírali bitéami níili, echí Manaeni ayénachó, echí mapu echí walula silfámi Erorsi yuwa ochébanarami níili, echí Saulo ayénachó. ²Siné rawé mapalí je'ná malí rijói Riosi yuwa ra'icha muchili, ayénachó mapalí aboni ketásirapé namuti ko'wali wi'llibé niráa, echalí echí wabé Galabé Riosi Iwigala jeaneli: Echo'ná auché jaréana julasi echí Benabé, echí Saulo, mapurigá aboni echo'ná nawésiga nochama mapurigá Nijeni bayeli aboni. ³A'lí mapalí aboni ma Riosi yuwa ra'íchali, ayénachó mapalí ma wi'llibé niráa ketasi ko'wali, echalí aboni nochali kepu siká jiti moba echí Benabé, echí Saulo mo'ólachi. A'lí ripórali echí okuá mapurigá aboni nawesásia simama.

Echi jaré mapu julárami níili, galá nawesa echo'ná Chíprechi anilíwachi kawírali

⁴Pe wakinánokuá echí Benabé, echí Saulo ma echirigá julásuwa echí wabé Galabé Riosi Iwigala jiti, a'lí simíbali echo'ná tu walú ba'wírali suwé, Selúsiachi anilíwachi. A'lí echo'ná jonsa, ba'wichí simáraga, echo'ná biléana bárkochi muchiga, aboni simíbali echo'ná Chíprechi anilíwachi kawírali, echo'ná nasipa walubé ba'wírali

nirúami. ⁵A'lí ma sisáa echo'ná Salamínachi anilíwachi suwé walúlachi, echalí aboni chótali nawésiya echi we galabé Riosi Ra'íchala echo'ná suníami echi jaré Juríosi pagótami ri'obáwalachi. A'lí echi Juani ayénachó aboni yuwa simili mapurigá nigúurami niráa.

⁶A'lí ne buchuwiana a'nagú 'yénaga echo'ná nasipa walubé ba'wírali nirúami kawírali, echalí aboni sili echo'ná Pájochi anilíwachi walúlachi. A'lí echo'ná aboni riwali bilé rijói Juríosi, echi mapu Barjesusi riwéami níili. Échiko sukurúami níili, ayénachó wabé 'yékaka nawésami níili. ⁷A'lí echi sukurúami echi silíami yuwa iyénali mapu echo'ná bitéami níili. Echi silíami Serjio Paulo riwéami níili, echi mapu ne wabé galá 'nátami rijói níili. Echalí echi silíami júuli bayénala echi Benabé, echi Saulo ayénachó, mapujiti binói we nakili Riosi Ra'íchala námanala. ⁸Chopi echi sukurúami ayénachó Elima riwéami níili. Échiko wabé sayérali mapurigá aboni nawésali. Echijiti binói ketasi nakili mapurigá echi silíami galá bichíima. ⁹Echalí echi Saulo mapu ayénachó Pablo riwéali ne galá nulérami níili echi wabé Galabé Riosi Iwigala jiti. Échiko ne busuchí niráa 'néniga echi sukurúami, ¹⁰jeaneli: ¡Mujé we 'yékami ju! ¡We chati oláami jumi! ¡Riablo ranala jumi! ¡Mujemi we sayérami ju suwaba echi galabé oluwáwami! Riosi buwilá ne galá wachíami ju, chopi mujemi we binera mapurigá echi pagótami ketasi najátama echo'ná Riosi yuwa, mapujítimi binera mapurigá Riosi Ra'íchala ketasi bichíwali ju. ¿Kéchami siné ariwema echirigá binériya? ¹¹Jipi biché echi Walubela Riosi mi kastigo 'yama. Jipi jonsa mujemi pe wi'libé ke machíiami níima, ayénachómi pe wi'libé ketasi omérama 'néniga echi rayénali. A'lí echalí we yáati echi rijói ke machíiami niwálati. A'lí binói iyénali mapurigá echo'ná wabé rokowárali niráa. Echijiti binói nakili ánalá bilé mapu sikachí niráa banírama, mapujiti tarapé machíili. ¹²A'lí mapalí echi silíami riwali mapu echirigá ikili, echalí binói ne galá bichíili echi Walubela Jesucristo niráa, mapujiti binói we galabé mayeli mapurigá echi Pablo binériga nawésali echi Walubela Riosi Ra'íchala.

**Echi Pablo, echi Benabé galá nawesa echo'ná Antiokíachi,
echo'ná Pisíriachi anilíwachi kawírali**

¹³A'lí echi Pablo, echi auché jaré binói apanérawala ayénachó, auchecho mo'wili echo'ná biléana bárkochi mapurigá echo'ná muchiga simama echo'ná Pájochi jonsa auché biléana suwé Pérjechi anilíwachi yénasí. A'lí aboni echirigá sili echo'ná Pampíliachi anilíwachi kawírali, chopi echi Juani waná simigá echo'ná abónichi jonsa, echo'ná Jerusalémachi ku simili. ¹⁴A'lí pe wakinánokuá aboni simárali echo'ná Pérjechi jonsa, echo'ná auché biléana Antiokíachi anilíwachi yénasí, echo'ná Pisíriachi anilíwachi kawírali. A'lí echalí isábawachi rawé aboni mo'wisáa muchíbali echo'ná pachá echi jaré Juríosi pagótami ri'obáwalachi, echo'ná nirúami. ¹⁵Echalí mapalí echo'ná ri'obachi nuláami o'wéala ma sunili o'weli ra'íchaga 'néniga pe okuá mapurigá osirúami ju echo'ná Riosi nulalila oselíwalachi, ayénachó echo'ná mapo'ná osali echi jaré Riosi jiti nawésami, echalí aboni júuli jeanénala echi Pablo, echi Benabé: 'Yemi ritémtami átamo nakisáagá pe okuá ra'íchali ruyénala echi pagótami, jipi nawésasi.

¹⁶Echalí echi Pablo wiliska, binói sikala jiti niráa ra'ámaga jeaneli: 'Yemi Isaeli pagótami galá kipusi mapurigá nijé 'yemi nimí anema, si'néami 'yemi máputamo galá majá Riosi ayénachó: ¹⁷Chabé ki'yá mapalí echi jaré ki'yá piréami tamujé

pagótamawala abijí si'wina niráa piréali echo'ná Ejíptochi anilíwachi kawírali, echalí echi Walubela Riosi, tamujé Isaeli pagótami Riósawala, chapili aboni mapurigá wikabé muwema, ayénachó mapurigá aboni Riosi níwala pagótami níima. A'lí pe wakinánokuá Riosi wabé omériga ologá ku machí a'wali aboni echo'ná kawírali jonsa. ¹⁸ A'lí mapalí aboni 'yénali echo'ná waná kawichí nawosa makói bamíbali niráa echi Walubela Riosi arigá anáchali mapurigá aboni wabé si'winárigá olali. ¹⁹ A'lí Riosi suwaba suwábali kicháona rojuáami wikabé pagótami echo'ná Kanánachi anilíwachi kawírali piréami mapurigá Binói echirigá omérama 'ayá aboni kawíwala echi jaré chabé ki'yá piréami tamujé pagótamawala. ²⁰ Wakinánokuá Riosi ayénachó galá nuleli aboni naó kiento miná malisa makói bamíbali niráa, mapalí Binói júuli aboni yuwa jaré o'wéala nuláami. A'lí aboni nuleli echi Isaeli pagótami mapuyénasí nawali echi walula Riosi jiti nawésami, Samueli riwéami. ²¹ Echalí echi jaré tamujé pagótamawala tali bilé walula silíami mapurigá aboni echi jiti nulérami níima. A'lí Riosi 'yali echi Saulo, echi Siso riwéami rijói ranala, mapurigá echi aboni silínawala níima nawosa makói bamíbali yénasí. Échiko bilé níili echi jaré Benjamini pagótamawala. ²² Echalí pe wakinánokuá Riosi miná 'yeli echi Saulo mapurigá aboni silínawala. A'lí Riosi wilali echi Rabiri mapurigá aboni silínawala niráa; ayénachó Riosi echijitti jeanili: Mani riwali echi Rabiri, echi Isaí ranala. Échiko bilé rijói ju mapu suwaba galá olama mapurigá Nijeni nakí. ²³ A'lí echi Jesusi bilé níili echi binói Rabiri kúchala kúchuwala, ayénachó Riosi wilali echi Jesusi mapurigá Binói ku wikáwama echi jaré Isaeli pagótami, mapurigá Riosi Binói bichíwaga aneli chabé ki'yá. ²⁴ Chopi chabénala mapalí Jesusi ke cho chótali binériya echi pagótami, echalí echi Juani bachá niráa nawésali si'néami echi jaré Isaeli pagótami. Echalí echi Juani aneli mapurigá aboni ba'wí jiti pagótami níima, ayénachó mapurigá aboni galá ologá, ku ro'wima Riosi yuwa. ²⁵ A'lí mapalí echi Juani ma ne mulubé sebárali binói téttala, echalí jeanili: 'Yémitamo mayé mapu nijeni ju echi Cristo, chopi ketásini ju. Binói pe waminánomí nolínama. Binói waminabi galabé oláami ju ketasi mapurigá nijé. Nijeni ketasi galá ju echi Cristo akalá akarápiya.

²⁶ 'Yemi ritémawala máputamo Abrami pagótamawala ju, 'yemi máputamo galá bichiíga majá Riosi, 'yémitamo ma nawésarami ju je'ná galabé nawésawala, máputamo ku wikáwarami níbo átamo galá bichiiságá. ²⁷ Mapujiti echi jaré pagótami echo'ná Jerusalémachi piréami ketasi machili chigá níili echi Jesusi. A'lí aboni o'wéalawala ketasi cho machili. Nibilé cho machili aboni mapurigá osirúami ju echo'ná Riosi Ra'íchala oselíwalachi mapurigá osali echi jaré Riosi jiti nawésami, mapurigá o'weli ra'íchaga 'nékowami ju echo'ná aboni ri'obáwalachi sinibí isábawachi rawé. Echijitti aboni arigá olali mapurigá chabé ki'yá bachá niráa osirúami níili mapurigá echirigá ikimea riwéali. A'lí aboni echirigá olali mapalí aboni aneli mapu echi Walubela Jesusi waminá mi'lirúami níima echo'ná kúrsichi. ²⁸ Ayénachó tarapé biyiri riwisáa mapurigá echi Walubela Jesusi echijitti waminá mi'lirúami níima riwéali, echalí aboni arigá tánali echi Pilato mapurigá Jesusi waminá mi'lirúami níima. ²⁹ A'lí mapalí aboni echo'ná kúrsichi michóniga mi'yali echi Jesusi, echalí aboni echirigá sunili suwaba olayá Binói mapurigá bachá niráa Binói jiti rugá osirúami níili echo'ná Riosi Ra'íchala oselíwalachi mapurigá ikimea riwéali. Echalí echo'ná ripá kúrsichi jonsa ku wichí paka, a'lí echo'ná biléana risochí chul'wirólati. ³⁰ Chopi Riosi ku owíntali echi Jesusi, mapalí Binói ma mukúami níili. ³¹ A'lí echalí

jonsa, wikabé rawé yénasí echi Jesusi wisabé ku riwirúami níili echi jaré jiti mapu chabénala niráa Binói yuwa simíbali echo'ná Jerusalémachi, mapalí aboni echo'ná Galiléachi jonsa simíbali. A'lí echi jaré aboni ju mapu jipi rawé echi Jesusi jiti galá nawésaga ruyée echi auché jaré pagótami.³² Ayénachó tamujé ma 'yemi mi ruyée je'ná galabé ra'íchali, mapurigá echi jaré ki'yá piréami tamujé pagótamawala ne bichíwaga anélati mapurigá ikimea riwéali.³³ Jipi rawé Riosi ma echirigá sébali olali tamujé jiti máputa aboni kúchala kúchuwala ju, mapujiti Riosi ma ku owíntali echi Jesusi mapurigá ayénachó bachá niráa osirúami níili echo'ná Riosi Ra'íchala oselíwalachi, echo'ná okoná Sálmochi anilíwachi, mapo'ná je'ná jerigá aní: Mujé ju Keni Raná. Jipi Nijé nimí wilali mapurigá si'néami pagótami machimea mapu Mujé bilepi ju Nijé Ranala.³⁴ Chabénala niráa Riosi ne bichíwaga aneli mapu ku owíntama riwéali echi Jesusi, mapalí Binói ma mukúami níisa, mapurigá Binói sapala ketasi bikamea. Echalí Riosi Binói je'ná jerigá anili mapurigá osirúami ju echo'ná Riosi Ra'íchala oselíwalachi: Nijé 'yemi nimí wabé ku'wírama mapurigá Nijeni bichíwaga aneli mapurigani ku'wírama riwéali echi Rabiri.³⁵ Echijiti ayénachó echi Rabiri jeaní: Mujemi ketasi ariwema mapurigá echi Galabé Mujé Ranala sapala waminá bikamea. Echirigá osirúami ju echo'ná auché biléana Riosi Ra'íchala oselíwalachi, Sálmoni anilíwachi.³⁶ Chabé ki'yá mapalí echi Rabiri biteáli jena'í wichimóbachi binói ne bichíwali ku'wírali echi auché jaré pagótami jena'í wichimóbachi piréami mapurigá Riosi nuleli olánala. Echalí binói ayénachó chu'wirótami níili echo'ná mapo'ná echi auché jaré binói pagótamawala chu'wirótami níili. A'lí binói sapala waminá bikali.³⁷ Chopi echi Walubela Jesusi sapala ketasi bikali, mapujiti Riosi ku owíntali Binói.³⁸ Galá machisí 'yemi pagótami mapurigá tamujé 'yemi mi ruyée, mapu Riosi chopi ku wikawa mapurigá 'yemi chati olali mapujiti je'ná Jesusi mukuli 'yemi chati olalila jiti.³⁹ Ayénachó ne si'néami echi jaré mapu ikí echi Jesusi jiti bichíko ne galá ku wikáwarami ju ne suwaba aboni chati olalila jiti. Chopi aboni ketasi chirigá ku wikáwarami níili mapujiti aboni galá nijéwaga olali mapurigá echi Moisesi osogá nulali.⁴⁰ Echijiti ne galá bichíisi 'yemi, mapurigá ketasi echirigá ikimea 'yemi yuwa mapurigá echi jaré o'wéala Riosi jiti nawésami anili mapalí je'ná jerigá osali:

⁴¹ Galá 'nesi 'yemi máputamo wabé tiníchiami ju. We cha níлага, galá majaga suwisi;

mapujiti Nijé, mápuni Walubela Riosi ju, ne wabé simírami si'winárigá olama echalí mapalí 'yémítamo piré jena'í wichimóbachi.

Echijiti 'yemi ketasi bichíwali mayébotamo mapurigá Nijeni echirigá wabé omériga olama, mapalí auché jaré arigá 'yemi mi ruyée.

⁴² A'lí mapalí echi Pablo ku simili echo'ná echi jaré Juríosi pagótami ri'obáwalachi jonsa, echi auché jaré binói apanérawala ayénachó, echalí echi auché jaré isena pagótami mapu ketasi Juríosi pagótami níili, arigá we tánali mapurigá wakinánala isábawachi rawé aboni ayénachó galá nawésarami níima mapurigá echi Pablo nawésali Riosi Ra'íchala.⁴³ Chopi mapalí echi pagótami ma ku simíbali echo'ná echi jaré Juríosi pagótami ri'obáwalachi jonsa, ne wikabé echi jaré Juríosi pagótami galá bichíiga najátali echi Pablo, echi Benabé yuwa. Echalí wikabé echi auché jaré isena pagótami mapu chabénala chopi bichíiga olali mapurigá echi jaré Juríosi olali, ma galá bichíiga mapurigá echi Pablo echi Benabé nawésali, ayénachó galá najátali aboni yuwa. Echalí echi Pablo, echi Benabé galá ruyeli mapu aboni sinibí

galá bichíima, ayénachó mapu aboni sinibí galá bichíiga 'natama mapurigá Riosi ne wabé simírami galéami ju.

⁴⁴ A'lí wakinana bilé tarali, echalí isábawachi rawé, ne noguí si'néami napawili echo'ná walúlachi piréami, Riosi Ra'íchala kipúbiya. ⁴⁵ Chopi mapalí echi jaré Juríosi pagótami riwali mapu echiyena ne wikabé pagótami napawili echi Pablo nawésawala kipúbiya, echalí aboni ne wabé na'awali. A'lí aboni chótali echi Pablo nawésawala sayera; ayénachó aboni ne wabé sitíi aneli echi Pablo. ⁴⁶ Echalí echi Pablo, echi Benabé tarapé majaga jeaneli: Arigá 'wérali níili máputa bachá niráa 'yemi mi nawésabo Riosi Ra'íchala, 'yemi máputamo Juríosi pagótami ju. Chópitamo ma ketasi nakili bichíinala, ayénachótamo ketasi mayeli mapu galá níima máputamo sinibí niráa pirélabo Riosi yuwa. Echijiti jípita galá nawésabo echi auché jaré isena pagótami mapu ketasi Juríosi ju. ⁴⁷ Mapujiti echi Walubela Riosi echirigá tamujé tamí nuleli mapurigá je'ná jerigá osirúami ju echo'ná Riosi Ra'íchala oselíwalachi mapurigá Riosi je'ná jerigá anili:

Nijé nimí wilali mapurigá rajéami niráa, mapurigami galá rajéelama ne si'néami echi auché jaré isena pagótami jena'lí wichimóbachi piréami.

Ayénachó mapurigami nawésaga ruyema ne buchuwíami jena'lí
wichimóbachi piréami mapurigá aboni ku wikáwarami níima a galá
bichísagá Nijé Ra'íchala.

⁴⁸ A'lí echi jaré isena pagótami je'ná jerigá namsa, ne wabé kaníili. Echalí aboni chótali jeanísiya mapu echi Walubela Jesucristo Ra'íchala ne wabé galabé níili; ayénachó si'néami aboni galá bichíili mapu ikí Riosi bachá niráa machili mapu aboni galá bichíima riwéali, mapurigá aboni sinibí niráa pirélama. ⁴⁹ Echirigá galá nawisárami níili echi Walubela Jesucristo Ra'íchala ne suníami echo'ná kawírali. ⁵⁰ Chopi echi jaré Juríosi na'áwataga bayeli jaré o'wéala amachíami muguí, echi jaré o'wéala igúsuwami echo'ná walúlachi nuláami ayénachó, mapurigá ne si'néami aboni sayéraga, kichiga a'najátama echi Pablo, echi Benabé, mapurigá aboni ku machí a'wátami níima echo'ná kawírali jonsa. ⁵¹ A'lí echi Pablo, echi Benabé suwaba bi'wali echo'ná walúlachi nirúami napisó echo'ná aboni ronólachi chukúbami. Echirigá ologá aboni galá 'nérali mapurigá echo'ná piréami ketasi galabé oláami níili mapujiti aboni ketasi bichíili echi Pablo, echi Benabé nawésawala. A'lí echi Pablo, echi Benabé auché biléana simíbali, echo'ná Ikóniachi anilíwachi walúlachi. ⁵² Chopi echi jaré galá bichíiyami ne wabé kaníili, ayénachó aboni galá nulérami níili echi Wabé Galabé Riosi Iwigala jiti.

Echi Pablo, echi Benabé we 'yena echo'ná Ikóniachi

14 Echo'ná Ikóniachi anilíwachi walúlachi echi Pablo, echi Benabé napawika mo'wili echo'ná pachá echi jaré Juríosi pagótami ri'obáwalachi. A'lí aboni wabé galabé niráa nawésali Riosi Ra'íchala mapuyénasí wikabé echi jaré Juríosi pagótami ne galá bichíili, ne wikabé echi auché jaré isena pagótami ayénachó mapu ketasi Juríosi níili. ² Chopi echi auché jaré ke bichíiyami Juríosi pagótami ne wabé na'áwatali echi auché jaré isena pagótami, mapuyénasí aboni chopi 'nátali mapu echi jaré bichíiyami ritémptami wabé chati oláami níili. ³ A'lí ne suwaba je'ná jerigá ikíachi, echi Pablo, echi Benabé arigá echo'ná tibili pe wi'libé rawé niráa. Echalí aboni tarapé majaga nawésali Riosi Ra'íchala mapujiti aboni galá bichíili echi Walubela Jesucristo niráa. A'lí echi Walubela ayénachó 'yali mapurigá aboni

wisabé wabé omériga olama mapurigá ke wesi auché jaré pagótami omero olayá. A'lí aboni echirigá 'yárami níili mapurigá echi auché jaré pagótami galá machimea mapu aboni ne bichíwali nawésali mapalí aboni anili mapu Riosi ne wabé galéami ju. ⁴A'lí echo'ná walúlachi piréami pagótami okoná rojuáami níili. Jaré aboni bichíili mapurigá echi jaré Juríosi nawésali, chopi auché jaré bichíili mapurigá echi Pablo, echi Benabé nawésali.

⁵Echalí echi jaré Juríosi pagótami nakaréwaga ra'íchali echi auché jaré isena pagótami yuwa, echi jaré aboni igúsuwala yuwa ayénachó, mapurigá echi Pablo, echi Benabé wabé chibi olárami níima, ayénachó mapurigá aboni basibuka ko'wirúami níima. ⁶Chopi echi Pablo, echi Benabé ma galá ikfisa mapurigá echi jaré pagótami olánali, echalí aboni echo'ná Lístrachi anilíwachi walúlachi júmsali, echo'ná Rérbechi anilíwachi walúlachi ayénachó, echo'ná Likaóniachi anilíwachi kawírali, echo'ná auché jaréana noligá kawírali ayénachó. ⁷Echo'ná aboni ayénachó nawésali echi Galabé Riosi Ra'íchala.

Pablo riteti basibúrami níili echo'ná Lístrachi

⁸Echo'ná Lístrachi bitéali bilé rijói ke akáanami mapu tarapé omérali simiyá. Échiko chopi echo'ná asali mapujiti ke akáanami níili binói ronólachi chabé chokichí jonsa mapalí binói ranálati. A'lí échiko tarapé siné iyénali. ⁹Je'ná rijói galá kipúu asali mapurigá echi Pablo nawésali. Echalí echi Pablo galá 'nesa, riwali mapurigá echi rijói ne galá bichíiyami níili. Echijiti echi Pablo galá machili mapurigá echi rijói galá bichíili mapu Riosi ku sa'wama riwéali echi binói. ¹⁰A'lí echi Pablo o'weli ra'íchaga jeaneli: ¡Ne wachí wilíbaga! Echalí echi rijói we yáati pochika, auchecho wachí wilíbaga, galá ku iyénali. ¹¹A'lí echo'ná piréami pagótami mayeli mapu wikabé nirúali riosi. Echijiti ma riwisáa mapurigá echi Pablo olali, echalí aboni o'weli ra'íchaga jeaneli: ¡Je'ná jaré riosi mapuyiri rijói niráa ma tiguinali jena'í tamujé yuwa! Chopi aboni echirigá ra'íchaga anili echo'ná Likaóniachi piréami ra'íchala niráa. ¹²A'lí echo'ná piréami pagótami jeanili mapu echi Benabé bilé riosi níili, echi mapu aboni aneli Júpite niráa; ayénachó aboni jeanili mapu echi Pablo auché bilé riosi níili echi mapu aboni aneli Merkúrio niráa. A'lí aboni echirigá anili mapujiti echi Pablo we nawésaga ra'íchali. A'lí aboni mayeli mapu echi Merkúrio riwéami riosi wabé ra'íchami níili. ¹³A'lí echo'ná walúlachi mapo'ná echo'ná piréami sinibí simáraga sili mapalí aboni ku sili echo'ná aboni walúlawachi, echo'ná wilili aboni ri'obáwala mapo'ná aboni sinibí amachika o'wikeli aboni riósawala, echi mapu aboni aneli Júpite niráa. Echalí echi walula echo'ná aboni ri'obáwalachi nuláami, echo'ná pali jaré wáasi, wikabé siwáchali ayénachó. A'lí si'néami aboni nakili o'wikénala echi Pablo, echi Benabé, mapurigá jaré aboni riósawala niráa. Echalí aboni nakili ko'wináliya echi jaré wáasi, echi Pablo, echi Benabé 'yábiya, mapujiti aboni mayeli mapu echi Pablo, echi Benabé jaré aboni riósawala níili. ¹⁴Echi Benabé, echi Pablo, echi Walubela Riosi jiti julárami níili. A'lí mapalí aboni galá machili mapurigá echi pagótami olánali, echalí aboni we chi'wánali aboni napáchala mapurigá ne wabé o'mónami niráa. Echi Pablo, echi Benabé ketasi nakili mapurigá aboni o'wikérami níima echi pagótami jiti, mapurigá Riosi niráa. Echijiti echo'ná nasípomí ujúmaga echi wikabé pagótamichi aboni o'weli ra'íchaga jeaneli: ¹⁵Pagótami, ¿churékulátamo echirigá olá? Tamujeta ayénachó pagótami ju, mapuyiri 'yemi aboni. Tamujeta chopi nawésibya sili máputamo ariwebo je'ná

jaré namuti mapu ketasi 'yemi mi ku'wira; ayénachóta 'yemi mi ruyée máputamo bichíibo echí sinibí bitéami Riosi, echí mapu niwáli echo'ná ripá riwigachi, jena'í wichimóbachi ayénachó, echo'ná walubé ba'wí ayénachó, ne suwaba namuti echo'ná nirúami ayénachó.¹⁶ Chabé ki'yá Riosi ariweli mapurigá si'néami jena'í wichimóbachi piréami pagótami olama mapurigá aboni nakili.¹⁷ Chopi Riosi arígá 'nérali echí pagótami mapu Binói, echí Walubela Riosi níli, mapujiti Riosi sinibí galabé olali echí pagótami. Riosi sinibí njá echí ukuí, ayénachó njá mapurigá echí pagótami 'wima karúmati namuti. Echirigá Riosi sébali tamujé tamí 'ya máputa kopoá, ayénachó máputa echijiti galá kanílabo.¹⁸ Chopi echí Pablo, echí Benabé echirigá nawésaga, perikó ariwéráli mapurigá echí pagótami ketasi ko'wimea echí jaré namuti, mapurigá aboni echirigá o'wikema echí Pablo, echí Benabé mapurigá jaré riosi niráa.

¹⁹ Echalí echo'ná Lístrachi sili jaré Juríosi pagótami, echo'ná Antiokíachi jonsa simíbami, echo'ná Ikóniachi jonsa simíbami ayénachó. A'lí echí jaré Juríosi ne wabé na'awatali echo'ná Lístrachi piréami pagótami, echí Pablo sayériga. Echalí aboni mi'linálaga basibuli echí Pablo. A'lí mayega mapu echí Pablo ma mi'lirúami nílo, aboni machí banírali echí Pablo echo'ná aboni walúlawachi jonsa.²⁰ Chopi mapalí echí auché jaré napawika bichíiyami noligá jábali mapo'ná echí Pablo bu'wili, echalí ke sayiná echí Pablo ku wilísali. A'lí binói auchecho ku simili echo'ná walúlachi. A'lí ba'alínala rawé binói ku simili echo'ná Réfbechi anilíwachi walúlachi, echí Benabé yuwa.

²¹ A'lí mapalí aboni ma nawésali echí Galabé Riosi Ra'íchala echo'ná walúlachi, mapo'ná aboni wikabé pagótami galá bichíírali, echalí aboni echo'ná Lístrachi ku simíbali, echo'ná Ikóniachi ayénachó, echo'ná Antiokíachi ayénachó.²² A'lí echo'ná ibílana aboni waminabi wabé nílaga bichíírali echí jaré mapu ma galá bichííli; ayénachó aboni aneli mapurigá sinibí waminabi galá bichííma. A'lí aneli mapu arígá 'wéráli ju máputa wabé risíu olárami níbo echí jaré ke bichíiyami jiti mapalita sébali olá mapurigá Riosi tamujé tamí nulé.²³ A'lí echo'ná ibílana napawika bichíiyamichi echí Pablo, echí Benabé galá chapigá jáwali jaré rijói mapurigá o'wéala ochérámi niráa. A'lí wi'llibé niráa ketasi kosá, echalí aboni tánali mapurigá echí Walubela Riosi galá tibútama echí jaré mapu ikí galá bichííli Riosi.

Echi Pablo, echí Benabé auchecho ku sili echo'ná Antiokíachi echo'ná Síriachi anilíwachi kawírali

²⁴ Pe wakinánokuá aboni simárali echo'ná Pisíriachi anilíwachi kawírali. A'lí aboni sili echo'ná Pampíliachi anilíwachi kawírali.²⁵ A'lí echo'ná Pampíliachi anilíwachi kawírali aboni galá nawésali Riosi Ra'íchala echo'ná walúlachi Pérguchi anilíwachi. A'lí aboni ku simíbali echo'ná walú ba'wírali suwé Atáliachi anilíwachi.²⁶ A'lí echo'ná jonsa pachá biléana bárkochi muchiga, echo'ná walú ba'wírali moba simáraga, aboni ku sili echo'ná bo'ónala Antiokíachi anilíwachi. Echo'ná níli mapo'ná jonsa aboni chabénala simíbali, mapalí jonsa aboni chótali nawésabiya simiba. Chabénala mapalí aboni echirigá simíbali, echí auché jaré ritémtami echo'ná piréami bachá niráa tánali mapurigá Riosi sinibí wabé galigá ku'wírama mapuyénasí aboni echirigá nawesa 'yénama. Chopi aboni ma ku sili mapujiti ma sébali nawésali Riosi Ra'íchala echo'ná buchuwiána mapo'ná aboni 'yénali.²⁷ A'lí mapalí aboni ma ku sili echo'ná Antiokíachi, echalí aboni napabuli echí auché

jaré napawika bichíiyami ritémtami. A'lí ne galá ku ruyeli ne suwaba namuti mapu ikí Riosi olali aboni yuwa; ayénachó ruyeli mapurigá echi Walubela Riosi galá bichírali echi auché jaré isena pagótami mapu ketasi Juríosi pagótami níili mapurigá aboni ayénachó galá bichíima Riosi Ra'íchala.²⁸ A'lí echi Pablo, echi Benabé echo'ná tibili wi'libé rawé echi auché jaré bichíiyami yuwa.

Echi jaré napawika bichíiyami napawili echo'ná Jerusalémachi

15 Echalí rawé echo'ná Antiokíachi sili jaré Juríosi rijói echo'ná Juréachi anilíwachi kawírali jonsa simíbami. A'lí abóniko chótali binérasiya echi jaré ritémtami bichíiyami jeanigá mapu arigá 'wéralli níili mapurigá aboni noligá sikirétami níima, achigórigá mapurigá echi Moisesi nuleli ki'yá echi jaré Juríosi pagótami; ayénachó binérali mapu a ketasi echirigá noligá sikirétami níisa, echalí aboni ketasi chirigá ku wikáwarami níima riwéali.² Echalí echi Pablo, echi Benabé waminá sayéraga ra'íchali echi auché jaré rijói yuwa mapujiti aboni ketasi nakili mapurigá echi auché jaré echirigá binérama echi pagótami. A'lí echi Pablo, echi Benabé jawálati, auché jaré yuwa mapurigá si'néami aboni echo'ná Jerusalémachi ra'ichábiya simama echi auché jaré o'wéala yuwa mapu Riosi nawesánala júuli. Ayénachó aboni ra'icháma riwéali echi jaré o'wéala ochérami yuwa, si'néami mapu ikí echo'ná Jerusalémachi piréami napawika bichíiyami o'wéalawala níili.

³ Echalí echi jaré napawika bichíiyami echo'ná Antiokíachi piréami ripórali echi Pablo, echi Benabé, echi auché jaré ritémtami mapu aboni yuwa jawálati ayénachó. A'lí si'néami aboni echo'ná Jinísiachi anilíwachi kawírali simárali, echo'ná Samáriachi anilíwachi kawírali ayénachó. A'lí echo'ná buchuwímana mapo'ná aboni 'yénali, aboni nawésaga ruyeli echi pagótami mapurigá echi auché jaré isena pagótami ma suwaba ariweli mapurigá aboni chabénala ologá piréali, mapurigá aboni sinibí waminabi galá bichíima Riosi. A'lí ne si'néami echi jaré galá bichíiyami ritémtami ne wabé kaníili mapalí aboni je'ná jerigá námali.⁴ A'lí mapalí echi Pablo echi Benabé ma sili echo'ná Jerusalémachi, echalí echo'ná piréami napawika bichíiyami ne galá nareli aboni, echi jaré o'wéala mapu Riosi júuli nawisánala ayénachó, echi jaré o'wéala ochérami ayénachó. A'lí echi Pablo, echi Benabé ne galá nawésaga ruyeli suwaba mapurigá Riosi galá olali aboni yuwa.⁵ Chopi jaré Bariseo anilíwami binériami ma galá bichíiyami níili Jesucristo niráa. Je'ná jaré jaska jeanili: Arigá 'wéralli ju mapu echi jaré isena pagótami ayénachó noligá sikirétami níima, si'néami mapu ikí bichíili Jesucristo niráa, ayénachó 'wéralli ju máputa nulebo aboni ne suwaba galá nijéwaga olánala mapurigá echi walula Moisesi osogá nulali.

⁶ Echalí echi jaré mapu Riosi júuli nawisánala ma napawili echi auché jaré o'wéala ochérami bichíiyami yuwa, mapurigá si'néami a'nagupi ra'íchaga galá katewama chuyiri 'nalí olárami níima.⁷ A'lí mapalí aboni ma a'nagupi niráa pe wi'libé ra'íchali, echalí echi Pegro wiliska jeanili: Keni ritémawa, 'yémitamo ma galá machí mapurigá chabénala Riosi tamí wilali, mápuni bilé níili 'yemi napawika bichíiyami yuwa, mapurigá nijeni bachá niráa galá nawesáma echi jaré isena pagótami mapurigá aboni galá bichíima echi Galabé Riosi Ra'íchala.⁸ Echi Walubela Riosi ne galá machí mapurigá echi jaré pagótami 'nata echo'ná pachana aboni sulálachi niráa. A'lí Riosi Binói ma galá 'néralli mapurigá Binói galá nirali echi jaré isena pagótami, si'néami mapu ikí galá bichíili, mapujiti

Riosi ma 'yali aboni echi Wabé Galabé Riosi Iwigala achigórigá mapurigá Binói ayénachó tamujé tamí 'yali chabénala mapalita galá bichíili. ⁹Echalí Riosi achigórigá olali aboni yuwa mapurigá Binói olali tamujé tamí yuwa mapujiti Riosi Binói ayénachó galá bi'wali aboni sulálachi mapalí aboni galá bichíili. ¹⁰Jipi biché, ¿churékulátamo ke bichíili mapurigá Riosi Binói olali echi auché jaré isena pagótami yuwa, si'néami mapu ikí galá bichíili? 'Yémitamo chopi we nakí mapurigá echi jaré isena pagótami galá nijéwaga olama wikabé namuti mapurigá tamujé pagótamawala nulérami níli. A'lí echi jaré ki'yánala piréami tamujé pagótamawala ketasi omérali echirigá nijéwaga olayá; ayénachó tamujé aboni ketasi omérali echirigá nijéwaga olayá. ¹¹Si'winárigá tamujeta mayé máputa tarapé yiri natétaga ma ku wikáwarami ju, chopi mapujítita ma galá bichíili echi Walubela Jesucristo niráa, ayénachóta mayé mapu aboni ayénachó ku wikáwarami ju mapujiti aboni echirigá bichíili.

¹²Echalí ne si'néami aboni ne galá kilí kipuga muchili. A'lí echi Pablo, echi Benabé nawésaga ruyeli mapurigá aboni wikabé namuti wabé omériga olali echo'ná echi jaré isena pagótami pirélachi, mapurigá ke wesi auché jaré pagótami omero olayá; ayénachó aneli mapu Riosi echirigá 'yali mapurigá aboni oméraama echirigá oloyá. ¹³A'lí mapalí si'néami echi auché jaré ma sunili ra'icha, echalí echi Jakobo jeaneli: Kení ritémawa, galá tamí kipusi. ¹⁴Echi Simoni Pegro ma 'yemi mi nawésaga ruyeli mapurigá Riosi bachá nawíili echi jaré isena pagótami yuwa; ayénachó mapurigá Riosi chapili jaré aboni mapurigá binói níwala niráa. ¹⁵Echirigá achigórigá osali echi jaré mapu Riosi jiti nawésami níli. Aboni je'ná jerigá osali:

¹⁶Riosi jeaní: Waminánomí Nijeni ku nawama mapurigani ku'wírama echi jaré Rabiri kúchala kúchuwala.

Jipi ke wesi aboni waminá nulá mapurigá walubela silíami niráa; chopi Nijeni wilama Bilé echi jaré Rabiri kúchala kúchuwala mapurigá ne Walubela niráa.

¹⁷Echirigani olama mapurigá ne si'néami echi auché jaré isena pagótami ayénachó nakimea tamí bichíinala mapurigá ne Walubela niráa, ayénachó mapurigá ne suníami piréami pagótami mapu ikí tamí bichíima riwéali, ma galá tamí bichíima.

¹⁸Echi Walubela Riosi echirigá aní. Ki'yá chokichí jonsa Binói galá machírali echi jaré pagótami suwaba je'ná jeyiri.

¹⁹Echalí echi Jakobo waminabi jeaneli: Echijiti nijeni aní máputa ketasi kumebo echi jaré isena pagótami, si'néami mapu ikí ma ariwesa mapurigá aboni chabénala niráa bichíiga piréali, ma galá bichíili echi Walubela Riosi. ²⁰Jipi chópita osebo mapurigá aboni ketasi ko'mea echi sapá mapu bachá niráa wijáwaga uchárami níli echo'ná mulubé echi jaré amachíkalawami namuti yuwa, mapurigá echi jaré ke bichíiyami pagótami sinibí o'wikeka olá; ayénachó osebo mapurigá ke wesi rijói kochimea bilé mukí yuwa mapu ketasi binói upila ju, ayénachó mapu ke wesi mukí kochimea bilé rijói yuwa mapu ketasi binói kunala ju, ayénachó osebo mapurigá aboni ketasi ko'mea bilé namuti sapala mapu kusébanaga mi'lirúami níli, ayénachó mapurigá aboni ketasi ko'mea echi jaré namuti lalá. ²¹Mapujiti echo'ná suníami o'wéalachí, echo'ná echi jaré Juríosi pagótami ri'obáwalachi, sinibí isábawachi rawé aboni galá 'néniga nawesa mapurigá echi walula Moisesi chabé ki'yá osogá nulali mapurigá aboni olama.

²²Echalfí echi jaré o'wéala mapu Riosi júuli nawisánala, ayénachó echi jaré o'wéala ochérami, ayénachó ne si'néami echi jaré napawika bichíiyami echo'ná Jerusalémachi piréami ma chapili jaré aboni mapurigá echi Pablo, echi Benabé yuwa simama echo'ná Antiokíachi. Echirigá julárami níili echi Júrasi mapu ayénachó Barsabasi riwéami níili, echi Sila ayénachó, echi okuá mapu bachá o'wéala níili echi auché jaré ritémtami yuwa. ²³A'lí aboni tórataga julálati bilé oselí mapu je'ná jerigá anigá osirúami níili:

Tamujé máputa Riosi jiti julárami níili nawisánala, ayénachó tamujé o'wéala ochérami, ayénachó si'néami tamujé napawika bichíiyami jena'í Jerusalémachi piréami, si'néamita 'yemi mi ripora, 'yemi máputamo ketasi Juríosi pagótami ju, si'néami 'yemi máputamo tamujé ritémawala ju, echo'ná Antiokíachi piréami, ayénachó echo'ná Síriachi anilíwachi kawírali piréami, ayénachó echo'ná Silísiachi anilíwachi kawírali piréami. ²⁴Tamujé ma galá machili mapu jaré rijói jena'í tamujechi jonsa simíbami ma 'yemi mi ra'íchaga kumeli, ayénachó aboni 'yemi mi ke newalábanali mapujiti aboni 'yemi mi aneli mapu arigá 'wérati ju máputamo noligá sikirétami níibo, ayénachó máputamo suwaba galá nijéwaga olabo mapurigá nulalíwami ju, mapurigá echi walula Moisesi osogá nulali, chopi tamujeta ketasi echirigá anénala júuli. ²⁵Echijiti ma galá 'nátaga, a'nagupi ra'íchaga, galata nirali máputa jawabo okuá rijói tamujé yuwa 'yénami, mapurigá aboni ayénachó simama echo'ná 'yemi mi 'nébiya, tamujé ritémawala, echi Benabé, echi Pablo yuwa, mapu tamujeta wabé galé. ²⁶A'lí echi Benabé, echi Pablo, ma wisabé 'yénali Jesucristo Ra'íchala nawésiya, mapalí aboni echijiti ne noguí ko'wirúami níima riwéali. ²⁷Echirigata ma echo'ná 'yemi yuwa julabo echi Júrasi, echi Sila ayénachó. Aboni 'yemi mi galá ra'íchaga ruyema suwaba je'ná jeyiri. ²⁸A'lí echi Wabé Galabé Riosi Iwigala tamujé tamí galá 'natárali mapalí tamujeta galá nirali máputa ketasi 'yemi mi waminabi wikabé namuti nulebo, chopi máputa 'yemi mi nulebo je'ná namuti mapu arigá 'wérati ju máputamo galá nijéwaga olabo: ²⁹Ketasi kopoá echi sapá mapu bachá niráa wijáwaga uchárami níili echo'ná mulubé echi jaré amachíkalawami namuti yuwa, mapurigá echi jaré ke bichíiyami pagótami sinibí o'wikeka olá. Nibilé cho kopoá echi jaré namuti lalá. Nibilé cho kopoá echi jaré namuti mapu kusébanaga ko'wirúami níili. Ke wesi rijói si'nú mukí yuwa kochimea mapu ketasi binói upila ju. Nibilé wesi mukí si'nú rijói yuwa kochimea mapu ketasi binói kunala ju. A'lí átamo je'ná jerigá galá nijéwaga oláságá, echalítamo galá oláami níibo. ¡Ne galabé ologá pirélasi!

³⁰A'lí mapalí aboni ma echirigá julárami níili, echalí aboni ku simíbali echo'ná Antiokíachi. A'lí ma sisáa, aboni si'néami napabuli echi jaré napawika bichíiyami echo'ná Antiokíachi piréami. A'lí we yáati 'yali echi oselí osirúami. ³¹A'lí mapalí echo'ná Antiokíachi piréami ritémtami galá 'neli mapurigá osirúami níili, echalí aboni echijiti wabé kanílatami níili. ³²A'lí echi Júrasi, echi Sila ayénachó we galá nawésami níili Riosi Ra'íchala. Echijiti aboni wabé galá kanílataga, waminabi bichírali echi jaré ritémtami mapalí aboni nawésali Riosi Ra'íchala. ³³A'lí echi Júrasi, echi Sila pe wi'libé rawé tibili echo'ná Antiokíachi, chopi echo'ná piréami ritémtami ma ku ripórali aboni, mapalí aboni anili mapu ma ku simama riwéali echo'ná Jerusalémachi, echi jaré ritémtami yuwa mapu chabénala júuli aboni nawesánala. ³⁴Chopi echi Sila waminá 'nátaga, arigá nakili mapu binói echo'ná aripima. ³⁵A'lí echi Pablo, echi Benabé ayénachó echo'ná Antiokíachi tibili. Echalí aboni waminabi galabé nawésaga binérali echi Walubela Jesucristo nawésawala. A'lí auché jaré wikabé echo'ná Antiokíachi piréami ritémtami ayénachó echirigá nawésaga binérali.

Pablo auchecho siné osáala 'yénali Riosi Ra'íchala nawésiya

³⁶ Pe wakinánokuá echi Pablo aneli echi Benabé jeanigá: Ma auchecho simabo 'nébiya acha galá ju echi jaré ritémtami echo'ná suníami o'wéalachí piréami mapo'ná tamujeta chabénala nawésiya 'yénali echi Walubela Jesucristo Ra'íchala. ³⁷ Echalí echi Benabé nakili echi Juani tonáliya aboni yuwa, echi mapu ayénachó Marko riwéami níili. ³⁸ Chopi echi Pablo ketasi galá nirali mapurigá echi Marko así torúami níima aboni yuwa, mapujiti chabénala echi Marko ma ariwesa aboni, echalí ku ro'wili echo'ná Pampíliachi anilíwachi kawírali jonsa. Echalí binói ketasi waminabi simili aboni yuwa mapalí aboni 'yénali Riosi nóchala olayá. ³⁹ A'lí echi Pablo, echi Benabé a'nagupi we ra'íchali, chopi arigá ketasi galá a'lárali. Echalí aboni a'nagú rojuali. A'lí echi Benabé arigá toli echi Marko. Echalí aboni echo'ná walubé ba'wírali moba simáraga, echo'ná biléana bárkochi muchiga echo'ná Chíprechi simíbali. ⁴⁰ Chopi echi Pablo chapili echi Sila mapurigá binói yuwa simea. A'lí mapalí echi auché jaré napawika bichíiyami ma Riosi yuwa ra'íchaga, tánali mapurigá Riosi wabé galigá ku'wírama okuánika, echalí echi Pablo, echi Sila ma ku simíbali. ⁴¹ A'lí aboni simárali echo'ná Síriachi anilíwachi kawírali, ayénachó echo'ná Silísiachi anilíwachi kawírali. Echalí aboni waminabi bichílataga simárali echi jaré napawika bichíiyami kanápuromí piréami mapo'ná aboni simíbali.

Echi Timoteo, echi Pablo, echi Sila yuwa apanéraga simili

16 Pe wakinana echi Pablo, echi Sila sili echo'ná Rérbechi anilíwachi walúlachi, echo'ná Lístrachi anilíwachi walúlachi ayénachó. Echo'ná aboni riwali bilé ri'malí, Timoteo riwéami, echi mapu ne galá bichíiyami níili Jesucristo niráa. A'lí echi Timoteo iyela Juríosi pagótami níili, ayénachó galá bichíiyami níili Jesucristo niráa, chopi echi Timoteo onolá si'nú pagótami níili. ² Ne si'néami echi jaré ritémtami echo'ná Lístrachi piréami sinibí anili mapu echi Timoteo we galá oláami níili. Echo'ná Ikóniachi piréami ritémtami ayénachó echirigá anili. ³ Echalí echi Pablo nakili mapu echi Timoteo ayénachó simea binói yuwa; chopi Pablo nuleli mapurigá noligá sikirétami níima. Echirigá nuleli olánala mapurigá echi jaré Juríosi pagótami echo'ná piréami ketasi sayérama echi Timoteo, mapujiti ne si'néami aboni galá machili mapu binói onolá ketasi Juríosi pagótami níili. ⁴ A'lí echo'ná ibílana o'wéalachí mapo'ná echi Pablo, echi Sila simárali, echo'ná aboni nawésaga ruyeli echi jaré ritémtami ne suwaba mapurigá echi jaré o'wéala echo'ná Jerusalémachi piréami oseli ruyénala. A'lí echi jaré o'wéala mapu Riosi júuli nawisánala Binói Ra'íchala, aboni níili mapu echirigá oseli ruyénala echi jaré ritémtami, ayénachó níili echi auché jaré o'wéala ochérami mapu echirigá oseli ruyénala. ⁵ Echirigá níili mapu suníami piréami napawika bichíiyami waminabi galá bichíili Riosi Ra'íchala, ayénachó sinibí rawé auché jaré galá bichíisali Jesucristo niráa. A'lí sinibí rawé niráa, auché jaré galá bichíiga muwésali echi jaré napawika bichíiyami.

Pablo rimuga niráa riwali bilé rijói echo'ná Maseróniachi bitéami

⁶ A'lí echi Wabé Galabé Riosi Iwigala ketasi nakíili mapurigá echi Pablo, echi Sila nawesáma Riosi Ra'íchala echo'ná Ásiachi anilíwachi kawírali. Echijiti aboni simárali echo'ná Príjiachi anilíwachi kawírali, echo'ná Kalásiasi anilíwachi kawírali ayénachó. ⁷ A'lí aboni sili echo'ná mapo'ná ne noligá chótali Mísiasi anilíwachi

kawírali ayénasí. A'lí echo'ná jonsa aboni auché biléana kawírali Bitíniachi anilíwachi simánali. Chopi echi Wabe Galabé Jesusi Iwigala ketasi risénsia 'yali mapurigá aboni echo'ná simama. ⁸ A'lí mulubé mapo'ná yénasí suwiba echo'ná Mísiachi anilíwachi kawírali, echo'ná mulubé simáraga, aboni tiguinali echo'ná biléana walú ba'wírali suwé, Tróachi anilíwachi, mapo'ná wabé sili echi o'weli barko anilíwami, echo'ná walú ba'wírali moba 'yénami. ⁹ A'lí mapalí aboni echo'ná muchili, echi Pablo rimuga niráa riwali bilé rijói echo'ná Maseróniachi anilíwachi kawírali bitéami mapu jeanigá taga bacháami wilíbali: Wakiná Maseróniachi simiró. Tamujé tamí ku'wiro. ¹⁰ A'lí mapalí echi Pablo echirigá rimuga riwali, echalí tamujé we yáati kariweli echo'ná Maseróniachi simábiya, mapujítita ne bichíwali mayeli mapu Riosi echirigá tamujé tamí bayeli mapurigata galá ra'íchabo echo'ná piréami pagótami echi Galabé Riosi Ra'íchala.

Echi Pablo, echi Sila echo'ná Jilípochi 'yénali

¹¹ A'lí echo'ná Tróachi jonsa tamujeta mo'wili echo'ná pachá biléana bárkochi echo'ná walú ba'wírali moba simíami. A'lí echo'ná muchiga tamujeta ne wachínaga simíbali echo'ná biléana kawírali, Samotrásiachi anilíwachi, echo'ná nasipa walú ba'wírali nirúami. A'lí bicheta ba'alínalá rawé echo'ná Niápolichi anilíwachi sili. ¹² A'lí bicheta echo'ná jonsa, waminá bo'ónala Jilípochi anilíwachi sili, mapo'ná ne bachá walúlachi níili echo'ná Maseróniachi anilíwachi kawírali nirúami. Ayénachó echo'ná Jilípochi biléana walúlachi níili mapo'ná echi jaré Romano anilíwami pagótami we nulali. A'lí bicheta echo'ná muchili pe wi'libé rawé. ¹³ Pe wakinana siné isábawachi rawé tamujeta echo'ná walúlachi jonsa machímana simíbali echo'ná bakochi yénasí, mapo'ná jaré Juríosi pagótami Riosi yuwa ra'íchábiya napawili. A'lí bicheta echo'ná muchíbaga, nawésali Riosi Ra'íchala echi jaré muguí mapu ikí echo'ná napawili. ¹⁴ A'lí bilé mukí, Líria riwéami, echo'ná asali. Échiko echo'ná auché biléana, Tiatírachi anilíwachi bitéami níili, ayénachó binói ralinewa iyénali we sitákami chomítuami chiní. Je'ná mukí bichíili Riosi mapurigá echi jaré Juríosi pagótami bichíili; chopi mapalí binói galá námali Riosi Ra'íchala mapurigá echi Pablo nawésali, echalí Riosi 'yali mapurigá binói galá bichíima mapurigá echi Pablo nawésali. ¹⁵ Echalí echi Líria ba'wí jiti pagótami níili, ne si'héami binói kúchuwala ayénachó. A'lí binói tamujé tamí jeaneli: Átamo mayésagá mapurigá nijeni galá bichíiyami ju echi Walubela Jesucristo niráa, jipi echo'ná nijé bitélachi tibisi. A'lí binói echirigá we 'wéralli anili máputa atibibo.

¹⁶ Siné rawé mapalita simiba sírali echo'ná mapo'ná echi pagótami Riosi yuwa ra'íchábiya napawili, echalí tamujeta natépali bilé tiwé pióntami, echi mapu wabé chati riablo aliwala aliwéami níili. A'lí echi tiwé bachá niráa machírali echi pagótami mapurigá ikímea riwéali waminánomí. Echijiti echi jaré rijói mapu echi tiwé níwami níili wabé meli wenomí, mapujiti auché jaré pagótami galá natétali mapurigá echi tiwé animea mapurigá ikímea riwéali pe waminánomí. ¹⁷ Je'ná tiwé najáitali echi Pablo yuwa. Ayénachó tamujé tamí najáitali. A'lí o'weli ra'íchaga jeanigá iyénali: Je'ná jaré rijói echi Ripabé Atíami Riosi piónawala ju. Aboni 'yemi mi nawésaga ané mapu churigá 'yémitamo ku wikáwarami níibo. ¹⁸ A'lí echi tiwé wi'libé rawé echirigá olali mapuyénasí echi Pablo wabé kumérami níili. Echalí binói ma ku ro'wiga ra'íchali echi wabé chati riablo aliwala jeanigá: Nijé nimí nulé mápumi we yáati ku machínama echo'ná pachana echi tiwé sulálachi jonsa, mapujiti echi Walubela

Jesucristo waminabi wabé simírami jiwérámi ju, ketasi mapurigá mujé. Echalí we yáati echi riablo aliwala ma ku machinali echo'ná pachana echi tiwé sulálachi jonsa.

¹⁹ A'lí mapalí echi jaré rijói, echi tiwé níwami, ma galá machili mapu echi tiwé ma ketasi waminabi mema riwéali wenomí, mapujiti binói ma ketasi omérali bachá niráa 'nériya mapurigá waminánomí ikimea riwéali, echalí aboni chapigá banírali echi Pablo, echi Sila echo'ná kumurachi mapo'ná echo'ná nuláami igúsuwami muchili. ²⁰ A'lí echirigá pásawa bacháami echi jaré komisario yuwa, echalí jeaneli: Je'ná jaré Juríosi rijói wabé tamujé tamí na'awata máputa jena'í walúlachi piré. ²¹ Aboni wabé nawésaga binera mapu tamujeta wabé si'winárigá olabo; chopi ketasi risénsia ju máputa echirigá olabo, mapujítita Romano anilíwami pagótami ju. ²² Echalí echo'ná piréami pagótami ne wabé simírami na'awali echi Pablo, echi Sila sayéraga. A'lí echi jaré komisario nulali aboni napáchala 'yesa, kusiti wipisónala. ²³ A'lí ma wisabé wabé wipisosa, echalí echo'ná pachá kumurachi mo'wálati, ayénachó echo'ná kumurachi tibúami wabé nulélati galabé niráa tibúnala. ²⁴ A'lí mapalí echo'ná kumurachi tibúami je'ná jerigá nulélati, echalí binói echo'ná biléana waná wabé pachánala mo'wali; ayénachó ma mo'ogá aboni ralala echo'ná naóana kusí iwarátachi, echirigá cha'íbanaga muchúwali.

²⁵ Chopi ne nasipa rokogó echi Pablo, echi Sila Riosi yuwa ra'icha muchili; ayénachó aboni we kaníliga nawajili Riosi nawajíwala. A'lí echi auché jaré echo'ná mo'wárami galá kipua muchili. ²⁶ Echalí ke sayiná ne wabé jiwéami nokuali kawí, mapuyénasí echo'ná kumurachi ne wabé nokuali ri'lé tigótamichi jonsa, ayénachó echalí we yáati irápatali suwaba echo'ná kumurachi 'yerala, ayénachó echi jiero wiya, echi mapujiti si'néami bulérami níili, suwaba ke sayiná ku botali. ²⁷ Echalí echo'ná kumurachi tibúami we yáati ku busureli. A'lí mapalí binói riwali mapu ma irápara jali suwaba echo'ná kumurachi yéachi, echalí binói machí paga binói níwala wi'llibé ripiyá, a binói mi'lináali, mapujiti binói mayeli mapu echi jaré mapu pachá mo'wárami níili ma waminá júmsali. ²⁸ Chopi echi Pablo o'weli ra'íchaga jeaneli: ¡Ketasi mi'yá binói niráa! ¡Si'néamita abijí jena'í muchuwi! ²⁹ Echalí echo'ná kumurachi tibúami ma tasa bilé na'í rajérami, wabé 'maga bakili echo'ná pachá kumurachi. A'lí echo'ná bacháami echi Pablo echi Sila yuwa wabé sayilúmaga chokóbaga wilíbali. ³⁰ Echalí we sapú ku machí a'waga, jeanigá rukueli: Kení amígowa, ¿chúrigani olama mapurigá nijeni galá ku wikáwarami níima? ³¹ Echalí aboni ku njéwaga jeaneli: Galá bichíi echi Walubela Jesucristo niráa, a'lí bichemi galá ku wikáwarami níima; ayénachó echi auché jaré echo'ná mujé bitélachi piréami ku wikáwarami níima a echirigá galá bichíisagá. ³² A'lí aboni galá nawésaga ruyeli Riosi Ra'íchala; ayénachó aboni echirigá nawésali ne si'néami echo'ná binói bitélachi muchúami. ³³ A'lí echalí a rokogó niráa, echo'ná kumurachi tibúami galá ku bi'wali aboni ripogálachi mapo'ná aboni wabé wipisótami níili. A'lí echi rijói we yáati ba'wí jiti pagótami níili, si'néami echo'ná binói bitélachi muchúami ayénachó. ³⁴ Echalí echi rijói bayérali aboni echo'ná pachá binói bitélachi. A'lí ne galá kówali. Echalí echi rijói ma galá kaníili, echi auché jaré echo'ná binói bitélachi piréami ayénachó, mapujiti si'néami ma galá bichíili Riosi.

³⁵ Ba'alínala bi'yá echi jaré komisario júuli echi jaré kapitani jeanénala echo'ná kumurachi tibúami mapu ku machí a'wama echi Pablo, echi Sila. ³⁶ Echalí echo'ná kumurachi tibúami jeaneli echi Pablo: Echi jaré komisario tamí nuleli 'yemi mi ku machí a'wánala. Echijiti 'yémitamo ma risénsia ju máputamo we kaníliga ku

simabo. ³⁷Chopi echi Pablo jeaneli: Tamujé Romano anilíwami pagótami ju, chopi echi jaré o'wéala komisario arigá nulali mapu tamujé waminá wipisótami níibo mapalí aboni ketasi bachá niráa tamujé tamí justicia olasa. A'lí aboni tamujé tamí pachá mo'wali. Jipi aboni tamujé tamí we chiná niráa ku machí a'wánali. Ketásita echirigá ku 'machínabo, chopi ariwebo mapu aboni niráa wakiná nolínama mapurigá aboni tamujé tamí ku machí a'wama. ³⁸Echalí echi jaré kapitani echirigá ku ruyeli echi jaré o'wéala komisario. A'lí echi komisario ne wabé majali mapalí aboni machili mapu echi Pablo, echi Sila, Romano pagótami níili. ³⁹Echalí echi jaré komisario sili echo'ná kumurachi. A'lí aboni wabé tánali mapurigá echi Pablo, echi Sila ku wikáwama mapujiti aboni pachá mo'wárami níili mapalí echi jaré komisario ketasi bachá niráa justicia olasa. Echalí ma ku machí a'wali echi Pablo, echi Sila. A'lí echi jaré komisario risúu anigá tánali mapurigá echi Pablo, echi Sila, ma ku simama echo'ná walúlachi jonsa. ⁴⁰A'lí echi Pablo, echi Sila ma ku buyasa echo'ná pachá kumurachi jonsa, echalí aboni sili echo'ná echi Líria riwéami mukí bitélachi. A'lí ma galá 'nesa echi auché jaré ritémptami, aboni galá nawésaga ruyeli mapurigá waminabi galá bichíima. A'lí ma ku simíbali.

Echo'ná Tesalónachi piréami ne buchuwí anigá na'áwali

17 Echo'ná jonsa echi Pablo, echi Sila simárali echo'ná Anpípolichi anilíwachi, echo'ná Apolóniachi anilíwachi ayénachó. A'lí aboni sili echo'ná walúlachi Tesalónachi anilíwachi mapo'ná nirúali bilé ri'obá, echi jaré Juríosi pagótami ri'obáwala. ²Echijiti echi Pablo bakili echo'ná echi jaré Juríosi pagótami ri'obáwalachi mapurigá binói galá nawesáma Riosi Ra'íchala, mapurigá binói sinibí olali kanápuromí mapo'ná binói iyénali. A'lí bikiyá tarali yénasí, sinibí isábawachi rawé echi Pablo galá nawésali aboni. ³Echalí echi Pablo galá machírataga ruyeli mapurigá osirúami ju echo'ná Riosi Ra'íchala oselíwalachi mapu arigá 'wérati níili mapurigá echi Walubela Jesucristo wabé risúu olárama nílasa, waminá mi'lirúami níima; ayénachó mapu ma mukúami níisa, Binói auchecheo siné ku owínama. A'lí echi Pablo jeaneli: Je'ná Jesusi, echi mapu nijé 'yemi nimí nawésali Binói jiti, je'ná ju echi Walubela Cristo. ⁴Echalí jaré Juríosi pagótami galá bichíili Jesucristo niráa. A'lí aboni galá napawili echi Pablo, echi Sila yuwa, ayénachó bichíili wikabé echi auché jaré isena, Griego anilíwami pagótami, mapu chabé jonsa bichíili Riosi mapurigá echi jaré Juríosi pagótami bichíili. A'lí wikabé muquí mapu peé bachá o'wéalatami níili, ma galá bichíili Jesucristo niráa.

⁵Echijiti echi auché jaré Juríosi pagótami mapu ketasi bichíiyami níili Jesucristo niráa, abóniko ne wabé kichili echi Pablo, echi Sila. Echalí aboni napabuka bayérali jaré chati oláami rijói mapu wepi 'yénami níili. A'lí si'néami aboni ne wabé na'áwatáli echo'ná walúlachi piréami pagótami, echi Pablo, echi Sila sayéraga. Echalí echi wikabé pagótami ne wabé na'áwaga, ne buchuwí anigá, chuwé mo'wili echo'ná echi Jasoni riwéami rijói bitélachi. Aboni we ali echi Pablo, echi Sila, mapurigá aboni ku machí a'waga, chibi olama. ⁶Chopi ketasi riwisáa echi Pablo, echi Sila, echo'ná pachá kalírali, echalí aboni chuwé banírali echi Jasoni, auché jaré ritémptami ayénachó. A'lí aboni tólati mapo'ná echi jaré igúsuwami echo'ná nuláami muchili. Echalí si'néami wabé o'weli ra'íchaga jeaneli: ¡Je'ná jaré rijói mapu ma wabé na'áwataga kumeli buchuwíana jena'í wichimóbachi piréami pagótami, ayénachó ma sili jena'ibi! ⁷A'lí aboni waminabi jeanili: Echi Jasoni

ma galá nareli aboni, echo'ná binói bitélachi. A'lí ne si'néami je'ná jaré wabé sayéraga olá, echi walubela silíami Sésara riwéami nulalila sayéraga. Aboni chopi nawésaga aní mapu auché bilé nirú walubela silíami, echi mapu Jesusi riwé.⁸ A'lí je'ná jerigá namsa, echo'ná piréami pagótami ne wabé buchuwi anigá na'áwali, echo'ná piréami o'wéala igúsuwami ayénachó.⁹ Chopi echi Jasoni echi auché jaré yuwa bichíwaga aneli echi jaré igúsuwami mapurigá aboni ketasi na'áwatama echi pagótami; ayénachó aboni nijili wenomí jeanigá mapu aboni ketasi ku chapimea echi wenomí, a aboni ne bichíwali na'áwasagá echi pagótami. Echalí echi jaré igúsuwami perikó ni'yúbanali.

Echi Pablo, echi Sila 'yénali echo'ná Beréachi anilíwachi

¹⁰ Echalí we yáati rokogó niráa echi jaré ritémntami júuli echi Pablo, echi Sila echo'ná auché biléana walúlachi, Beréachi anilíwachi. A'lí mapalí echi Pablo, echi Sila ma sili echo'ná Beréachi, echalí aboni simíbali echo'ná echi jaré Juríosi pagótami ri'obáwalachi. ¹¹ Alí echo'ná Beréachi piréami Juríosi pagótami waminabi wabé galá ra'íchaga galéami níili, ketasi mapurigá echo'ná Tesalónachi piréami pagótami, mapujiti echo'ná Beréachi piréami ne wabé galá kaníliga kipuli mapurigá echi Pablo, echi Sila nawésali. Ayénachó aboni sinibí rawé 'yasa, galá 'neli mapurigá osirúami ju Riosi Ra'íchala, mapujiti aboni nakili machiboya acha bichíwali níili mapurigá echi Pablo, echi Sila nawésaga aneli. ¹² Echirigá níili mapu wikabé Juríosi pagótami, echo'ná Beréachi piréami, ne galá bichíili Jesucristo niráa. Jaré echi auché jaré isena Griego anilíwami pagótami ayénachó bichíili. A'lí jaré mapu echirigá bichíili peé bachá o'wélapala níili. Jaré aboni muguí níili, auché jaré rijói níili. ¹³ Chopi mapalí echi jaré Juríosi pagótami echo'ná Tesalónachi piréami galá machili mapurigá echi Pablo nawésaga iyénali Riosi Ra'íchala echo'ná Beréachi, echalí aboni echo'ná simasa ne wabé buchuwi anigá na'áwatali echi jaré Beréachi piréami mapu ikí ke cho bichíili Riosi Ra'íchala. ¹⁴ Chopi echi jaré ritémntami we yáati júuli jaré rijói echi Pablo bayéranala echo'ná mikabé walú ba'wírali suwé; chopi echi Sila, echi Timoteo abijí tibili echo'ná Beréachi. ¹⁵ A'lí echi jaré rijói toli echi Pablo echo'ná Aténachi anilíwachi walúlachi. A'lí mapalí aboni ku ro'wili echi Pablo ku kuwana júuli jeanénala echi Sila, echi Timoteo mapurigá aboni ayénachó we yáati simama echo'ná Aténachi mapo'ná Pablo asali.

Pablo echo'ná Aténachi iyena

¹⁶ A'lí mapuyénasí echi Pablo abijí buweli mapurigá echi Sila, echi Timoteo ayénachó sebama echo'ná Aténachi, echalí echi Pablo ne wabé siweli mapujiti riwali mapurigá echo'ná walúlachi piréami pagótami wabé amachíkiami níili wikabé karúmati niwárami. ¹⁷ Echijiti echi Pablo we nawésaga ra'íchali echi jaré Juríosi pagótami yuwa, echo'ná aboni ri'obáwalachi; ayénachó ra'íchali echi auché jaré isena pagótami yuwa, si'néami mapu ikí anili mapu aboni Riosi yuwa ra'íchaga waminabi walubélaga aneli, achigórigá mapurigá echi jaré Juríosi pagótami olali. A'lí echi Pablo sinibí rawé we ra'íchali echi auché jaré yuwa, si'néami mapu ikí sili echo'ná ri'narátachi mapo'ná echo'ná piréami napawili. ¹⁸ Echalí jaré rijói chótali echi Pablo yuwa ra'ichásiya. Jaré aboni binéami níili mapurigá echi jaré Epikúrio anilíwami pagótami binérali. Auché jaré binéami níili mapurigá echi auché jaré Estoiko anilíwami binérali. A'lí jaré aboni jeanili: ¿Churigá tamujé tamí anema

je'ná rijói mapu wabé ra'íchaga aní echirigá? Auché jaré jeanili: ¡Je'ná rijói we nawésami ju auché jaré isena riosi jiti rugá! A'lí aboni echirigá anili mapujiti echí Pablo we nawésali Jesucristo jiti rugá, ayénachó mapujiti binói ruyeli mapurigá echí jaré suwíami auchecho ku o'wínama waminánomí rawé.¹⁹ Echalí Pablo bayéralati echo'ná Areópagochi anilíwachi, mapo'ná echo'ná Aténachi piréami o'wéala sinibí galá rugá nawésali. A'lí jeanélati: Tamujé tamí ruyée mapu churigá aniwáami ju je'ná mapurigami bukulíwami binera echí pagótami.²⁰ Mapujiti mujemi tamujé tamí wiká karúmati si'winárigá ané. A'llí bicheta we nakí máputa galá machiboa churigá aniwáami ju suwaba.²¹ A'lí aboni echirigá anili mapujiti echo'ná Aténachi piréami pagótami, ayénachó echí jaré si'wina piréami pagótami mapu echo'ná muchili, ne si'néami chopi nakili námanala jaré bukulíwami namuti. A'lí aboni we nakili a'nagupi ruyénala echí jaré bukulíwami namuti.

²² Echalí echí Pablo echo'ná Areópagochi nasipa aboni yuwa wilíbaga jeaneli: 'Yemi pagótami jena'í Aténachi piréami nijeni ritiwá mapu 'yémítamo ne wabé amachíkiami ju wikabé karúmati.²³ Mapujiti mapalí nijeni 'néniga simírali echo'ná wikanáami mapo'ná 'yémítamo wabé amachika olá, echalí nijeni riwali biléana mapo'nátamo we amachike, mapo'ná je'ná jerigá osirúami ju: ¡Jena'ita amachike bilé riosi mapu ketasi machirúami ju! A'lí je'ná bilé Riosi mapu 'yémítamo ketasi machigá, arigátamo galá amachike, je'ná echí Walubela Riosi ju, mapu nijé 'yemi nimí ruyée echí Binói jiti.²⁴ Echi Walubela Riosi mapu niwáli jena'í wichimóbachi, echí mapu ayénachó niwáli suwaba namuti mapu jena'í wichimóbachi nirú, échiko ne Walubela ju echo'ná ripá riwigachi, ayénachó ne Walubela ju jena'í wichimóbachi. A'lí echí Walubela Riosi ketasi chopi bité echo'ná jaléana ri'obachi mapu echí pagótami niwáli.²⁵ Ayénachó echí Walubela Riosi ketasi newalé nibilé namuti mapu echí pagótami niwá. Echi Binói ju mapu si'néami tamujé tamí 'ya máputa pirélabo jena'í wichimóbachi, ayénachó máputa galá iwipo. Echi Walubela Riosi ju mapu tamujé tamí 'ya suwaba namuti.²⁶ Ayénachó echí Walubela Riosi chopi léami niráa niwáli ne si'néami pagótami mapu ikí nirú jena'í wichimóbachi, mapurigá aboni pirélama ne suníami jena'í wichimóbachi. Echi Walubela Riosi ayénachó bachá niráa machigá nulali mapalí ibili niráa pirélama riwéali, ayénachó Binói bachá niráa machigá nulali mapo'ná ibili niráa pirélama riwéali jena'í wichimóbachi.²⁷ A'llí echí Walubela Riosi muchúwali echí pagótami jena'í wichimóbachi mapurigá aboni galá aga machimea Binói Riosi. Chopi ne bichíwali Riosi ketasi mikabé atí tamujé yuwa.²⁸ Mapujiti Binói Riosi jítita piré jena'í wichimóbachi, ayénachó Binói jítita 'yena. A'lí Riosi jítita olá ne suwaba mapu ikita olá. A'lí jaré 'yemi níwala o'wéala osáami achigórígá anili, mapalí aboni jeanigá osali: Tamujeta Riosi kúchuwala ju.²⁹ Ata ne bichíwali Riosi kúchuwala níisagá, echijítita ketasi mayebo mapu echí Walubela Riosi mapurigá bilé namuti amachíkalawami niráa ju. Mapujiti echí jaré amachíkalawami namuti chopi echí wabé natéami oro anilíwami jiti niwárami ju. Auché jaré amachíkalawami namuti echí wabé natéami plata anilíwami jiti niwárami ju. Auché jaré chopi rité jiti niwárami ju. A'lí ibili amachíkalawami namuti chopi niwárami ju mapurigá jaré pagótami 'nátaga nakili.³⁰ Echalí kí'yánala rawé Riosi ketasi kastigo 'yali echí pagótami, mapujiti aboni ketasi cho machili Binói Ra'íchala. Chopi jipi rawé Riosi nulé ne si'néami pagótami, ne suníami jena'í wichimóbachi piréami mapurigá aboni si'nú bukulíwami galabé 'natama, ayénachó mapurigá aboni chopi olama mapurigá Binói nakí.³¹ Mapujiti Riosi ma galá téitali

bilé rawé mapalí si'néami jena'í wichimóbachi piréami pagótami ibili niráa ne galá justicia olárami níima, mapujiti Riosi ma nuleli bilé Rijói mapu suwaba namuti ne galá machigá, justicia olíima echi pagótami. A'lí Riosi ma ne bichíwaga machírali si'néami pagótami mapurigá Binói ma chapili echi bilepi rijói, mapujiti Riosi Binói ma ku owíntali echi bilé Rijói mapalí échiko ma mukúamí níili.

³² Chopi mapalí echi pagótami námali echi Pablo jeanéachi mapurigá echi jaré suwíami ku o'wínama riwéali, echalí jaré aboni waminá tiníchali echi Pablo. A'lí auché jaré jeaneli: Galá níima auché sineta mi kipubo je'ná ra'íchali. ³³ Echalí echi Pablo waminá ariwesa, ku simili echo'ná abónichi jonsa. ³⁴ Chopi jaré galá bichíili mapurigá echi Pablo nawésali. A'lí bilé rijói, Rionísio riwéami, echirigá bichíili. Échiko bilé níili echi jaré o'wéala yuwa mapu sinibí napawili echo'ná Ariópagochi anilíwachi; ayénachó bilé mukí, Rámari riwéami, galá bichíili; auché jaré pe okuáa ayénachó bichíili.

Pablo iyena echo'ná Koríntochi

18 Pe wilibeko, je'ná jerigá ma simírasa, echi Pablo ma ku simili echo'ná Aténachi jonsa. A'lí binói simili echo'ná auché biléana walúlachi Koríntochi anilíwachi. ² Echo'ná Koríntochi echi Pablo riwali bilé rijói Juríosi, echi mapu Akila riwéami níili, echi mapu echo'ná auché biléana Póntochi anilíwachi kawírali bitéami níili. Echalí ke 'me wikabé rawé níili mapalí jonsa echi Akila nawali echo'ná Koríntochi, echo'ná Itáliachi anilíwachi kawírali jonsa simisá. A'lí echi binói upila, Priskila riwéami ayénachó binói yuwa nawali. A'lí arigá 'wérati níili mapu aboni ku simama echo'ná Itáliachi jonsa, mapujiti echi walula silfami, Kláurio riwéami, we nulali mapurigá si'néami Juríosi pagótami waminá simama echo'ná Rómachi anilíwachi walúlachi jonsa. A'lí echi Pablo echo'ná aboni pirélachi simili 'nésiya. ³ A'lí echi Pablo galá machíami níili achigó yiri olayá mapurigá aboni náchali, mapujiti aboni teka niwáami níili echi jaré o'weli chibérami mapuyiri kalí niwalíwami. Echijiti echi Pablo echo'ná aboni yuwa tibili, mapujiti binói nakili napawika nochama aboni yuwa. ⁴ A'lí sinibí isábawachi rawé echi Pablo simili echo'ná echi jaré Juríosi pagótami ri'obáwalachi mapo'ná binói bichíiraga ra'íchali echi jaré Juríosi pagótami yuwa, ayénachó echi auché jaré isena yuwa mapu echo'ná napawili.

⁵ A'lí mapalí echi Sila, echi Timoteo ma sili echo'ná Koríntochi, echo'ná Maseróniachi anilíwachi kawírali jonsa simasa, echalí echi Pablo chótali ne galá bichíiga nawésiya Riosi Ra'íchala; ayénachó binói ne galá machíami niráa ruyeli echi jaré Juríosi pagótami, echo'ná Koríntochi piréami, jeanigá mapu echi Jesu ne bichíwali níili echi Walubela Cristo anilíwami. Mapujiti echi jaré Juríosi ayénachó mayeli mapu Riosi julama riwéali echi Walubela Cristo anilíwami jena'í wichimóbachi. ⁶ Chopi echi jaré Juríosi chótali wabé chati anigá sayérasiya mapurigá echi Pablo nawésali. Echalí binói wabé asápali binói napáchala. A'lí echirigá ologá, echi Pablo galá machírali echi jaré Juríosi pagótami mapurigá binói ma ariwema riwéali echi aboni. Ayénachó echi Pablo jeaneli: 'Yemi aboni chópitamo chokila níibo, átamo ketasi siné ku wikáwarami níisagá mapurigátamo chati olali. Nijé ma 'yemi nimí galá nawésali Riosi Ra'íchala, chópitamo ketasi bichíinali. Echijiti nijeni ketasi chokila níima, átamo ketasi siné ku wikáwarami níisagá. A'lí jipi jonsa nijeni chopi nawesáma echi auché jaré isena pagótami, mapu ketasi Juríosi ju. ⁷ Echalí echi Pablo

ma ku machínali echo'ná echi jaré Juríosi pagótami ri'obáwalachi jonsa. A'lí binói echo'ná bilé rijói kalílachi simili, echi mapu Justo riwéami níli. A'lí echi Justo galá bichíyami níli Riosi, ayénachó echo'ná binói bitélachi jonsa pe mulubé níli echo'ná echi jaré Juríosi pagótami ri'obáwalachi. ⁸ A'lí echi Krispo riwéami rijói ne galá bichíili Jesucristo niráa, binói upila, echi jaré binói kúchuwala ayénachó. A'lí echi Krispo ne bachá walula níli echo'ná echi jaré Juríosi pagótami ri'obáwalachi. A'lí ne wikabé pagótami echo'ná Koríntochi piréami galá námaga mapurigá echi Pablo nawésali, ne galá bichíili; ayénachó aboni ba'wí jiti pagótami níli.

⁹ A'lí siné rokogó mapalí echi Pablo kochigá rimuli, echalí binói námali echi Walubela Jesucristo mapalí Binói ra'íchaga niráa jeaneli: ¡Ketasi majá! Arigá waminabi nawesá Nijé Ra'íchala. Ketásirapé majá echirigá nawésiya. ¹⁰ Mapujiti Nijé sinibí nimí yuwa atí. Echijiti ke wesi omérama mi risúu olayá. Nijeni niwa wikabé pagótami jena'í walúlachi piréami mapu galá tamí bichíi. ¹¹ Echalí echi Pablo echo'ná Koríntochi anilíwachi walúlachi tibili bilé bamíbali waminá nasipa. A'lí binói we galá binériga nawésali echo'ná piréami, echi Galabé Riosi Ra'íchala.

¹² Chopi mapalí echi Kalioni riwéami rijói ne walula silíami níli echo'ná Akáyachi anilíwachi kawírali, echalí rawé echi jaré Juríosi pagótami echo'ná piréami ne wabé na'áwali echi Pablo sayériya. A'lí aboni chapigá banírali echi Pablo echo'ná mapo'ná echo'ná piréami igúsuwami muchili. ¹³ Echalí aboni jeaneli echi silíami: Je'ná rijói we bichíiraga nawesa si'néami pagótami, jeanigá mapurigá aboni si'winárigá o'wikema Riosi; chopi a echirigá olásagá, aboni we sayérama echi nulalíwami. ¹⁴ Echalí echi Pablo ma ku nijéwaga ra'icháma riwéali, chopi echi Kalioni we yáa jeaneli echi jaré Juríosi: A jaré karúmati chibi yiri oluwáwami níisagá, a jaré namuti wabé simírami chati oluwáwami mapurigá nakówami niráa níisagá, echalí galá níima mapurigá nijé 'yemi nimí justicia olíimi, 'yemi Juríosi pagótami, achigórígá mapurigá tamujé nulérami ju. ¹⁵ A'lí 'yémitamo chopi wiká karúmati namuti jiti ra'ichánali, ayénachótamo jaré riwá jiti katéwaga ra'ichánali, echi 'yemi nulalila jiti omá. Echijiti 'yemi aboni niráa galá a'lárasi, mapujiti nijeni ketasi nakí justicia olánala je'ná jaré namuti jiti. ¹⁶ Echalí echi walula silíami waminá chakena júuli ne si'néami echi jaré Juríosi pagótami echo'ná justicia oluwáwamichi jonsa. ¹⁷ A'lí ne si'néami echi auché jaré isena Griego anilíwami pagótami waminá chapigá, wisabé chiwali echi Sóstini riwéami rijói, echi mapu ne walula níli echo'ná echi jaré Juríosi pagótami ri'obáwalachi. A'lí aboni echirigá chiwali echi Sóstini echo'ná bacháami echi walula silíami Kalioni riwéami yuwa; chopi echi Kalioni ketasi chocila mayeli suwaba je'ná jeyiri jiti.

Echi Pablo auchecho ku nawali echo'ná Antioquía, chopi pe wakinánokuá binói auchecho ku simili echo'ná wikanáami iyénaga, Riosi Ra'íchala nawésiya

¹⁸ Echalí echi Pablo abijí echo'ná Koríntochi aripili wi'llibé rawé; chopi pe wakinana, ma ripórasa echi jaré ritémtami, binói echo'ná pachá biléana bárkochi asagá, echo'ná ba'wichí moba simíraga ku simili, echo'ná Síriachi anilíwachi kawírali simiyá. A'lí echi Priskila, echi Akila ayénachó simíbali. Chopi ke cho simiyá, mapalí echi Pablo echo'ná walú ba'wírali suwé, Senkréachi anilíwachi asali, echalí binói nulali suwaba siknala binói mo'ola. A'lí binói echirigá ologá machírali mapurigá binói ma sunili olayá mapurigá binói bachá niráa ne bichíwaga aneli Riosi mapu binói olama riwéali. ¹⁹ A'lí mapalí aboni sili echo'ná Ejésochi anilíwachi walúlachi,

echalí echi Akila, echi Priskila echo'ná tibili. A'lí echi Pablo simili echo'ná echi jaré Juríosi pagótami ri'obáwalachi. A'lí binói galá binéraga nawésali Riosi Ra'íchala echi jaré Juríosi pagótami echo'ná napawíami.²⁰ Echalí echi jaré Juríosi we tániga aneli echi Pablo mapurigá binói auché pe wi'libé rawé tibima echo'ná aboni yuwa; chopi binói ketasi nakili.²¹ Echalí echi Pablo ku ripórali aboni. A'lí jeaneli: Arigá 'wéraili juni mápuni asimea echo'ná Jerusalémachi pe waminánomí rawé mapalí omowálawachi sébachi níima. Chopi a Riosi nakisáagá, mápuni ku nawama 'yemi mi yuwa, echalí pe waminánomí nijeni ne bichíwali ku nawama 'yemi mi 'némiya. A'lí echi Pablo echo'ná Ejésochi jonsa ku simili, echo'ná pachá biléana bárkochi asagá.

²² Chopi auchecho ku nawasa echo'ná bo'ónala walú ba'wírali suwé, Sesaréachi anilíwachi, echalí echi Pablo ku machínali echo'ná bárkochi jonsa. A'lí echo'ná ripáami Jerusalémachi ku simili. Echalí ma narepasa echo'ná piréami ritémtami, a'lí echi Pablo waminá tu Antioquíachi ku simili.²³ A'lí mapalí echi Pablo ma wikabé rawé yénasí asali, echo'ná Antioquíachi, echalí binói auchecho siné ku simili echo'ná jonsa. Echalí binói echo'ná Kalásiasiachi anilíwachi kawírali, ibílana rijówachi simírasagá, waminabi galá nawésaga bichírali echi jaré mapu ma galá bichíili Jesucristo niráa, echo'ná Príjichi anilíwachi kawírali ayénachó.

Echi Apolo we nawesa echo'ná Ejésochi

²⁴ Echalí rawé echo'ná Ejésochi nawali bilé rijói Juríosi, Apolo riwéami, echi mapu echo'ná Alejantríachi anilíwachi bitéami níili. A'lí echi Apolo we galá nawésami níili; ayénachó binói suwaba we galá machili Riosi Ra'íchala osirúami.²⁵ A'lí echi Apolo péebi machili mapurigá tamujé Walubélawala Jesucristo nulá olánala. Echalí binói tarapé majaga nawésali Jesucristo jiti rugá, ayénachó binói ne galá machíiami niráa binérali Jesucristo jiti. Chopi echalí echi Apolo chopi machíiami níili mapurigá echi Juani chabé chokichí binéraga nawésali mapalí binói galá pagoli echi jaré pagótami.²⁶ Echalí rawé echi Apolo tarapé majaga owíinali nawésiya echo'ná pachá echi jaré Juríosi pagótami ri'obáwalachi. Chopi mapalí echi Priskila, echi Akila galá námali echirigá nawésachi, echalí aboni waná bayéraga, waminabi galá binérali echi Apolo, mapurigá binói ne galá machimea mapurigá Riosi tamujé tamí nulé olánala.²⁷ A'lí mapalí echi Apolo nakili echo'ná Akáyachi anilíwachi kawírali simínala, echalí echi auché jaré ritémtami galá ku'wírali; ayénachó aboni oseli echo'ná Akáyachi piréami ritémtami, jeanigá mapu aboni ne galá narema echi Apolo. A'lí mapalí echi Apolo ma nawali echo'ná Akáyachi, binói waminabi bichíiralí si'néami mapu ikí Riosi ma we kaligá bichíiralí.²⁸ Mapujiti echi Apolo ne galá nawésaga machírali si'néami pagótami mapu ketasi ne bichíwami níili mapurigá echi jaré Juríosi bichíili. Echalí echi Apolo ne machiná niráa machírali echi pagótami mapu echi Jesusi ne bichíwali níili echi Walubela Cristo anilíwami, mapujiti echi Apolo ne machiná niráa nawésali mapurigá osirúami ju echo'ná Riosi Ra'íchala oselfíwalachi; echijitti aboni ketasi omérali 'yékaka ra'icha.

Echi Pablo echo'ná Ejésochi iyena

19 Mapuyénasí echi Apolo echo'ná Koríntochi asali, echalí echi Pablo wikanáami echo'ná ripáami wérachi simíraga, ma ku nawali echo'ná tu Ejésochi anilíwachi walúlachi. A'lí binói echo'ná riwali jaré rijói mapu bichíiyami níili Riosi.² Echalí echi Pablo jeanigá rukueli: *¿Áchatamo nareli echi Wabé Galabé*

Riosi Iwigala mapalítamo bichíili? A'lí aboni ku nijéwaga jeaneli: ¡Nirapeta siné námali je'ná, mapu nirú bilé Wabé Galabé Riosi Iwigala! ³Echalí echi Pablo jeanigá rukueli: ¿Churigátamo pagótami níili ba'wí jiti? A'lí aboni ku nijéwaga jeaneli: Tamujeta chopi pagótami níili mapurigá echi Juani pagoli. ⁴A'lí echi Pablo jeaneli: Echi Juani galá pagoli echi pagótami ba'wí jiti, mapalí aboni si'nú, galabé niráa 'náitali, ayénachó mapalí aboni ma ku ro'wili Riosi yuwa. Chopi echi Juani ayénachó jeaneli mapu aboni galá bichíima echi auché Bilé mapu pe waminánomí nolínama riwéali. Je'ná jerigá aniwáami níili mapu aboni galá bichíima echi Jesusi jiti, echi mapu Walubela Cristo ju. ⁵A'lí mapalí aboni ma námali je'ná jeyiri, echalí aboni aneli echi Pablo mapurigá binói ayénachó pagoma aboni, mapujiti aboni ma galá bichíili echi Walubela Jesusi niráa. ⁶A'lí mapalí echi Pablo, binói sikala jiti, nochali echo'ná abónichi, echalí echi Wabé Galabé Riosi Iwigala nawali echo'ná pachana aboni sulálachi. A'lí aboni chótali isena ra'íchali ra'icha, ayénachó aboni we galá nawésali Riosi Ra'íchala, mapurigá Riosi Binói 'yali nawisánala. ⁷A'lí echi jaré rijói mapuyena makói miná okuá níili.

⁸Echalí echi Pablo sinibí tarali, bikiyá michá yénasí iyénali echo'ná echi jaré Juríosi pagótami ri'obáwalachi, mapo'ná binói tarapé majaga nawésali echi jaré pagótami echo'ná piréami. A'lí binói galá bichíiranali aboni mapurigá Riosi we galá nulema riwéali jena'í wichimóbachi piréami pagótami. ⁹Chopi jaré aboni waminabi wabé biwárami suléami níilasali, a'lí aboni ketasi nakili bichíinala Riosi Ra'íchala. A'lí aboni wabé chati aneli echi Wabé Galabé Riosi Ra'íchala, mapalí aboni ra'íchali echi auché jaré pagótami yuwa. Echalí echi Pablo waminá waná simili echo'ná abónichi jonsa. Ayénachó binói waminá auché biléana bayérali echi jaré mapu ma galá bichíili Jesucristo niráa. A'lí echo'ná mapo'ná echi Pablo bayérali aboni, biléana eskuélachi níili, bilé rijói Tirano riwéami níwala. A'lí echi Pablo echo'ná galá nawésali Riosi Ra'íchala sinibí rawé. ¹⁰A'lí echi Pablo sinibí echirigá olali, okuá bamíbali yénasí. Echijiti ne si'néami echi jaré Juríosi pagótami echo'ná Ásiachi anilíwachi kawírali piréami galá námali echi Walubela Jesucristo Ra'íchala. Ayénachó si'néami echi auché jaré isena pagótami galá námali.

¹¹Ayénachó Riosi 'yali mapurigá echi Pablo wikabé namuti wabé omériga olama mapurigá ke wesi auché jaré omérali olayá. ¹²A'lí mapalí echi Pablo echirigá wabé omériga olali, echalí echi auché jaré pagótami toli echi jaré wisibuli, echi auché jaré namuti Pablo napáchala ayénachó, suwaba mapu ikí nachútarami níili echi Pablo jiti, a'lí moba uchélati echi jaré nayúkami. A'lí je'ná jiti ne si'néami echi jaré nayúkami ku sa'wili, ayénachó echi jaré chati isena riablo aliwala ma ku 'machínali echo'ná pachá aboni sulálachi jonsa. ¹³Echalí jaré Juríosi pagótami mapu mikabé wikanáami 'yénami níili ayénachó ku machí a'wánali echi jaré chati isena riablo aliwala echo'ná pachá echi jaré pagótami sulálachi jonsa. A'lí aboni ayénachó nakili echi Walubela Jesusi riwalá jiti ra'íchaga ku machí a'wánala echi jaré riablo aliwala, chopi aboni ketasi galá bichíiyami níili Jesucristo niráa. Echalí aboni nuleli echi jaré riablo aliwala jeanigá: ¡Nijé 'yemi nimí nulé máputamo ma ku 'machínabo echo'ná pachá echi pagótami sulálachi jonsa, mapujiti echi Jesusi riwalá ne wabé omérámi ju, echi mapu echi Pablo we nawesa Binói jiti! ¹⁴Echirigá olali echi kichao rijói mapu bilé Juríosi rijói, Iseba riwéami, kúchuwala níili. Échiko ne walula níili echi auché jaré sacerdote yuwa. ¹⁵Chopi mapalí aboni echirigá olánali, echalí echi wabé chati riablo aliwala ku nijéwaga jeaneli: Galani machí

echi Jesusi, ayénachóni machí echí Pablo, chopi 'yemi, ¿chigátamo ju? ¹⁶A'lí ma echirigá anisáa, echalí echí rijói mapu we chati riabó aliwala aliwéami níili, ne wabé 'maga ko'wísali echí kichao najirémami. Échiko galá omérali si'néami echí jaré aboni, ayénachó binói ne wabé jiwériga chibi olísali si'néami aboni, mapuyénasí aboni ne wabé chi'wanárami niráa, machí sabélaga, ku júmsali echo'ná kalírali jonsa. ¹⁷A'lí ne si'néami echí jaré Juríosi pagótami echo'ná Ejésochi piréami ne galá ikíli suwaba je'ná jeyiri, ne si'néami echí auché jaré isena pagótami ayénachó. Echijiti si'néami pagótami ne wabé majali, ayénachó aboni waminabi walubélaga aneli echí Walubela Jesucristo. ¹⁸Ayénachó wikabé echí jaré mapu galá bichíili Jesucristo niráa, suwaba ku nawésali mapurigá aboni chabénala wabé chati ologá piréali. ¹⁹Ayénachó wikabé mapu chabénala bachá niráa, wabé olali mapurigá sukurúami niráa, ma galá bichíili Jesucristo Ra'íchala. Echalí jonsa aboni ma ketasi waminabi olánali mapurigá sukurúami niráa; ayénachó aboni pali aboni níwala oselí, mapo'ná aboni bineli sukurúami niráa. A'lí suwaba waminá ikósali echo'ná bacháami si'néami echí auché jaré pagótami yuwa. A'lí ma taraga suwaba echí jaré oselí natigala, echalí aboni riwali mapurigá suwaba wabé natéami níili, mapuyena malisa makói mili peso plata natéami niráa. ²⁰Echirigá níili mapu waminabi wikabé pagótami bichíili echí Walubela Riosi Ra'íchala. A'lí si'néami pagótami riwali mapu Riosi Ra'íchala ne wabé omérami níili.

²¹A'lí pe wakinánokuá, je'ná jerigá ma ikisáa, echalí echí Pablo we simináali echo'ná Maseróniachi anilíwachi kawírali, echo'ná Akáyachi anilíwachi kawírali ayénachó, mapurigá binói galá 'nema echo'ná piréami bichíiyami. A'lí binói ayénachó nakili echo'ná Jerusalémachi simináliya; ayénachó binói jeanili: Pe waminánomí mapalini ma echo'ná Jerusalémachi asisáa, echalí arigá 'wérali juni mapurigani ayénachó simea echo'ná Rómachi anilíwachi. ²²A'lí echí Pablo bachá júuli okuá rijói, binói yuwa nigúurami, mapurigá aboni bachá simama echo'ná Maseróniachi anilíwachi kawírali. Echi Timoteo, echí Erasto níili mapu julálati, chopi echí Pablo binói abijí pe wikabé rawé ripili echo'ná Ásiachi anilíwachi kawírali.

Wikabé pagótami echo'ná Ejésochi piréami ne wabé na'árami níili

²³Echalí rawé wikabé pagótami echo'ná Ejésochi piréami ne wabé na'áratami níili, mapujiti auché jaré wikabé galá bichiisali Riosi Ra'íchala. ²⁴A'lí bilé rijói, Remétrio riwéami, níili mapu ne wabé na'áwatali echí auché jaré pagótami. Échiko echí plata anilíwami jiti niwagá ralinéwami níili wikabé kúuchi mapuyiri ri'obá, achigó yiri mapurigá echí walubé ri'obá mapu echo'ná nirúali, mapo'ná echo'ná Ejésochi piréami níwali echí Riana anilíwami amachíkalawami namuti. A'lí echí Remétrio we galá natétiami níili echí auché jaré binói yuwa náchami mapu echí jaré namuti niwáami níili. ²⁵Echalí échiko si'néami napabuli echí auché jaré mapu binói yuwa náchali; ayénachó napabuli auché jaré achigó yiri náchami, echo'ná piréami. A'lí jeaneli: 'Yémitamo galá machí máputa je'ná jiti náchaga ne wabeta galá mebo. ²⁶Chopi 'yémitamo ma galá machí mapurigá je'ná Pablo nawésaga aní. 'Yémitamo ma námali mapurigá binói anili, mapu echí jaré amachíkalawami namuti mapu jaré rijói jiti niwárami níili, ketasi tamujé Riósawala ju. A'lí binói ma bichírali wikabé pagótami, ketasi chopi jena'í Ejésochi piréami, chopi ayénachó binói bichírali wikabé pagótami ne suníami Ásiachi anilíwachi kawírali piréami. ²⁷Je'ná jerigá ketasi galá ju, mapujiti siné káachi tamujeta wikawabo tamujé náchala.

A'lí siné káachi ma ketasi waminabi o'wikérami níima echí walula Riana anilíwami amachíkalawami namuti mapu si'néami jena'í Ásiachi piréami galá amachike, ne suníami jena'í wichimóbachi piréami ayénachó.

²⁸ A'lí mapalí ma námali je'ná, echalí aboni ne wabé na'áwali. A'lí aboni wisabé niráa o'weli ra'íchaga jeanili: ¡Arigá wabé walubela nílaga echí Riana, mapu tamujé jena'í Ejésochi piréami níwala ju! ²⁹ A'lí si'néami pagótami echo'ná walúlachi piréami ne buchuví echirigá anigá na'áwasali. A'lí aboni chapili echí Kayo riwéami rijói, echí Aristarko riwéami ayénachó, mapu echo'ná Maseróniachi anilíwachi kawírali piréami níili. Okuánika echí Pablo yuwa 'yénami níili. Echalí echo'ná piréami pagótami chapigá banírali echí okuá rijói echo'ná kumurachi mapo'ná ne si'néami echo'ná piréami pagótami napawísali. ³⁰ A'lí echi Pablo ayénachó nakili echo'ná kumurachi nawánala, mapurigá binói galá ra'íchama echí pagótami, chopi echí auché jaré bichíiyami ketasi nakíili mapurigá binói simea. ³¹ Ayénachó jaré o'wéala echo'ná Ásiachi anilíwachi kawírali nuláami echí Pablo amígowala níili. Echalí aboni jaré júuli ruyénala echí Pablo mapurigá binói ketasi simea echo'ná mapo'ná echí pagótami napawili. ³² Chopi mapuyénasí echirigá ikili, echalí echo'ná mapo'ná echí wikabé pagótami napawili, jaré wanacho niráa ra'íchaga sinákali. A'lí auché jaré wabé si'winá cho anigá sinákali, mapujiti echí wikabé pagótami ne buchuví anigá na'áwali; chopi wikabé simírami ketásirapé machili mapu piri jiti napawili aboni. ³³ Ayénachó echo'ná 'yénali jaré Juríosi pagótami mapu ketasi bichíiyami níili Jesucristo niráa. Aboni chapili bilé rijói Alejandro riwéami mapurigá binói ra'íchaga anema echí auché jaré pagótami echo'ná Ejésochi piréami mapu jaré Juríosi pagótami arigá ketasi bichíiyami níili Jesucristo niráa, mapurigá echí Pablo bichíili. Echalí echi Alejandro, binói sikala jiti ra'ámaga aneli mapu kilí jama, mapujiti binói nakili ra'íchama echí wikabé pagótami mapurigá aboni ketasi waminabi sayérama echí jaré Juríosi pagótami. ³⁴ Chopi mapalí aboni machili mapu bilé Juríosi rijói níili, echalí si'néami, sinepi niráa, wi'libé niráa wisabé ra'íchaga sinákali jeanigá: ¡Arigá wabé walubela nílaga echí Riana, mapu tamujé jena'í Ejésochi piréami níwala ju!

³⁵ A'lí mapalí echo'ná walúlachi bitéami komisario perikó kilí, ke anigá, jawábali echí wikabé pagótami, echalí binói jeaneli: 'Yemi pagótami jena'í Ejésochi piréami, ne si'néami jena'í wichimóbachi piréami pagótami galá machí mapurigá tamujé jena'í Ejésochi piréami galá tibuta echí walubela Riana ri'obáwala, ayénachó mapurigata tibuta echí Riana anilíwami amachíkalawami namuti, echí mapu echo'ná ripá riwigachi jonsa rikiinali. ³⁶ A'lí mapujiti ke wesi omero aniyá mapu je'ná jerigá ketasi bichíwali ju, echijiti galá kilí muchisi. Ketasi bilé namuti olasi mapalítamo ketasi cho bachá niráa ne galá 'nata. ³⁷ Mapujiti je'ná rijói máputamo wakiná pali ketasi biyiri chati olali, nibilé chati anigá ra'íchali echí 'yemi níwala amachíkalawami namuti sayéraga. ³⁸ A'lí a echí Remétrio, ayénachó echí auché jaré binói yuwa nóchami nakísáagá wi'nijínala echí auché jaré, galá níima wi'nijisa echo'ná bacháami echí jaré o'wéala komisario yuwa mapalí aboni justicia olama. Echalí aboni galá omérama echirigá wi'nijiya echí auché jaré mapu aboni sayela ju. ³⁹ Chopi a tásagá aboni auché si'nú namuti, galá níima suwaba katiwasa mapalí ne si'néami pagótami napawí. ⁴⁰ A'lí jipi rawé siné káachita wabé wi'nijírami níibo mapurigá nakówami niráa mapujiti je'ná jerigá ma ikili. A'lí tarapebi yiri nirú mapurigá tamujé omérabo ku ruyée, mapalí echí jaré o'wéala tamujé tamí rukuema

mapu piri jítita je'ná jerigá buchuwí anigá na'áwaga napawili jipi rawé.⁴¹ A'lí ma je'ná jerigá anisáa, echi walula komisario ku ripórali echi wikabé pagótami.

**Echi Pablo iyénali echo'ná Maseróniachi anilíwachi kawírali,
echo'ná Krésiachi anilíwachi kawírali ayénachó**

20 A'lí mapalí ma ku kilírali echi wikabé pagótami buchuwí aníami, echalí echi Pablo bayegá galá nawésali echi jaré bichíiyami. A'lí binói ne galá matochi cho'nogá nari pasa, ma ku simili, echo'ná Maseróniachi anilíwachi kawírali simiyá.² A'lí echi Pablo buchuwímana 'némiya iyénali echo'ná Maseróniachi anilíwachi kawírali piréami bichíiyami. Ayénachó binói galá ruwigá nawésali echi jaré bichíiyami. A'lí pe wakinánokuá binói nawali echo'ná Krésiachi anilíwachi kawírali.³ A'lí mapalí echi Pablo ma bikiyá micheli echo'ná asagá, echalí binói nakili ku simínala echo'ná bo'ónala Síriachi anilíwachi kawírali, echo'ná pachá biléana bárkochi asagá, ba'wichí moba 'yénami. Chopi mapalí binói ke 'me ayó bakimea riwéali echo'ná bárkochi, echalí binói ruyérami nílii mapurigá echi jaré Juríosi wabé kichiga mi'llináali echi binói, echo'ná bárkochi inárachi. Echijiti echi Pablo anili mapu binói wichí wiligá ku simea, echo'ná Maseróniachi anilíwachi kawírali auchecho siné ku simíraga.⁴ A'lí auché jaré ritémtami ayénachó apanériga simíbali echi Pablo yuwa. Echi Sópate riwéami rijói mapu echo'ná Beréachi bitéami nílii ayénachó simili, echi Aristarko, echi Sekunto ayénachó, okuánika mapu echo'ná Tesalónachi piréami nílii. A'lí echi Kayo ayénachó simili, echi mapu echo'ná Rérbechi bitéami nílii. A'lí echi Timoteo ayénachó simili, echi Tíkiko ayénachó, echi Trójimo ayénachó, okuánika mapu echo'ná Ásiachi piréami nílii.⁵ A'lí je'ná ritémtami bachá simíbali echo'há walúlachi Tróachi anilíwachi yénasí, mapo'ná aboni buwigá muchili mapuyena tamujeta echo'ná sili.⁶ A'lí mapalí ma simírali echalí omowálawachi rawé mapalí echi jaré Juríosi pagótami ko'wali echi pani, ketasi nasówarami echi levadura anilíwami, echalí tamujé ku simíbali echo'ná Jilípochi jonsa, echo'ná pachá biléana bárkochi muchiga. A'lí tamujeta malí chi'lligá sili echo'ná Tróachi mapo'ná aboni buwigá muchili. A'lí bicheta echo'ná muchili kichao rawé.

Pablo we nawesa echo'ná Tróachi piréami bichíiyami

⁷ A'lí echalí tarali, ne bachá rawé, echo'ná Tróachi piréami galá bichíiyami we napawili mapurigá aboni rojuániga ko'mea echi pani. A'lí echi Pablo galá binérali aboni; chopi mapujiti ba'alínala rawé binói ma ku simea riwéali, echijiti echi Pablo ne wabé wi'libé ra'íchali, ne nasipa rokogó arigá.⁸ Echalí echi jaré bichíiyami napawika muchili echo'ná pachá biléana kalírali wabé ripabé mapo'ná wikabé na'í rajáami nirúali.⁹ Echalí bilé ri'malí, Eútiko riwéami echo'ná ripabé asali mapo'ná biléana yéachi nílii. A'lí échiko ne wabé kochili mapujiti echi Pablo wi'libé niráa ra'íchali. A'lí mapujiti echi ri'malí we kochili, echijiti binói echo'ná ripabé bisiánamótami kalírali jonsa ri'lé wichíbali. A'lí ma mukúami ku mutúlati.¹⁰ Echalí echi Pablo ku ri'lé rikinali mapo'ná echi ri'malí bu'wili. A'lí binói echo'ná moba bunaga niráa, chukúbali. A'lí binói jeaneli echi auché jaré ritémtami: Ketasi majasi. ¡Binói ma ku bitéami ju!¹¹ A'lí echi Pablo auchecho ku ripá simili echo'ná kalírali. Echalí binói ma rojonasa, ko'wali echi pani, echi auché jaré ritémtami yuwa. A'lí ma kosáa, binói pe wi'libé niráa ra'íchali, ma chi'láachi yénasí. Echalí

binói ma ku simili echo'ná jonsa.¹² A'lí echi ri'malí ma ku bitéami tólati. Echijiti ne si'néami echi auché jaré ritémtami ne wabé kanílatami níili.

Mapurigá aboni simíbali echo'ná Tróachi jonsa echo'ná Milétachi yénasí

¹³ Echalí tamujeta bachá simíbali, echo'ná pachá biléana bárkochi muchiga, ba'wichí moba iyénami, echo'ná Asónachi anilwachi yénasí, mapurigata echo'ná ku napawipo echi Pablo yuwa, mapujiti binói echirigá tamué tamí aneli, mapujiti binói nakili wichí wiligá simínala echo'ná yénasí.¹⁴ A'lí mapalita natépali echi Pablo echo'ná Asónachi, echalí binói bakili echo'ná bárkochi tamué yuwa. A'lí bicheta ba'wichí moba simíbali echo'ná Mitilénachi anilwachi yénasí.¹⁵ A'lí bicheta echo'ná jonsa ku simíbaga, ba'alínala rawé tamujeta mulubé suwé simárali echo'ná Chíochi anilwachi kawírali, echo'ná nasipa walubé ba'wírali nirúami. A'lí bicheta ba'alínala rawé sili echo'ná Sámochi anilwachi suwé mapo'ná echi barko chukúbali. Echalí rokogó tamujeta chi'lébali echo'ná biléana mapo'ná Trojílioichi anilwachi níili. A'lí ba'alínala rawé tamujeta sili echo'ná Milétachi anilwachi.¹⁶ Echalita ketasi sili echo'ná Ejésochi mapujiti echi Pablo ketasi nakili mapu wikabé chi'lema echo'ná Ásiachi anilwachi kawírali. Binói chopi nakili mapu we yáati nawama echo'ná Jerusalémachi mapujiti binói nakili echo'ná asináliya mapalí sebama riwéali echi jaré Juríosi pagótami omawala omowálawachi, Pentikostesi anilwami, a echirigá omérataságá binói.

Echi Pablo galá nawesa echo'ná Ejésochi piréami napawika bichíiyami o'wéala ochérami

¹⁷ Echalí mapalí echi Pablo asali echo'ná Milétachi, binói júuli bayénala echo'ná Ejésochi piréami napawika bichíiyami o'wéala ochérami.¹⁸ A'lí mapalí aboni echo'ná binói yuwa sili, echalí echi Pablo jeaneli: 'Yémitamo galá machí mapu chúrigani sinibí olali 'yemi yuwa, echalí ne chokichí rawé jonsa mapalini nawali jena'lí Ásiachi anilwachi kawírali.¹⁹ Echalí mapalí nijeni 'yemi yuwa asali nijeni sinibí rawé chopi olali mapurigá echi Walubela Jesucristo nakí. Nijeni sinibí wabé kaligá olali, chópini ayénachó wabé nalaka iyénali mapujítini ne wabé risúu olárami níili mapujiti echi jaré Juríosi pagótami tamí wabé risúu olánali.²⁰ Chopi nijeni tarapé siné ariweli 'yemi mi nawésiya suwaba echi Galabé Riosi Ra'íchala, mapurigátamo galá ku'wíratami níbo. A'lí nijeni sinibí echirigá 'yemi mi nawésali echo'ná wikabé pagótami napawílachi, ayénachóni sinibí 'yemi mi nawésali awínala niráa, echo'ná pachá 'yemi aboni pirélachi.²¹ A'lí nijeni 'yemi mi nawésali, 'yemi máputamo Juríosi pagótami ju, máputamo si'nú, galabé niráa 'natabo, ayénachó máputamo ku ro'wibo Riosi yuwa, ayénachó máputamo galá bichíibo echi Walubela Jesucristo niráa. A'lí bicheni echirigá achigórigá nawésali 'yemi máputamo auché jaré isena pagótami ju, 'yemi máputamo ketasi Juríosi pagótami ju.²² Jípini arigá simea echo'ná Jerusalémachi, mapujiti echi wabé galabé Riosi Iwigala echirigá tamí nulé; chópini ketasi machí mapu chúrigani risúu olárami níima echo'ná.²³ Chopi nijeni machí mapurigá echo'ná suníami o'wéalachí mapo'nani iyénali, echi jaré ritémtami echo'ná piréami nulérami níili echi Wabé Galabé Riosi Iwigala jiti mapurigá aboni tamí anema mápuni pachá bachárami níima, ayénachó mápuni wabé risúu olárami níima, ani ku simisáagá echo'ná Jerusalémachi.²⁴ Chópini tarapé majáratami níili mapujiti aboni echirigá tamí aneli. Nirapeni mayé mapu arigá 'wérali ju mapu nijé binói waminabi bitélama jena'lí

wichimóbachi. Chópini nakí mapurigani galá kanílaga sunima nijé nóchala, ayénachó mapurigani suwaba olama mapurigá echi Walubela Jesucristo tamí nuleli, mapurigani nawesáma echi Galabé Riosi Ra'íchala jeanigá mapu Riosi ne wabé galéami ju.

²⁵Ayénachó jipi nijeni ne bichíwali mayé mapu ke wesi 'yemi auchecho siné tamí ku riwiboa. Nijeni 'yemi mi nawésali echi Wabé Galabé Ra'íchali, jeanigá mapu Riosi ne galabé nuléami ju echi jaré pagótami, chópitamo ma ketasi auchecho siné tamí riwiboa. ²⁶Echijiti jipi nijeni 'yemi mi ne bichíwaga ané mapu Riosi ketasi tamí wi'nijima a bilé 'yemi ketasi galá bichísagá Riosi Ra'íchala. ²⁷Mapujiti nijeni sinibí 'yemi mi nawésaga ruyeli ne suwaba mapurigá Riosi nakí máputamo olabo. Sinibini suwaba galá nawésali Riosi Ra'íchala. Ke sineni majaga ichípali. ²⁸Echijiti ne galá 'nátaga tibusi 'yemi aboni niráa. Ayénachó galá 'nátaga tibusi ne si'néami echi auché jaré napawika bichíiyami, mapujiti echi Wabé Galabé Riosi Iwigala ma 'yemi mi nuleli tibúnala aboni, mapurigátamo galá nisebo si'néami echi auché jaré mapu ikí galá bichíi echi Walubela Jesucristo niráa. Echi Wabé Galabé Riosi Iwigala ma 'yemi mi nuleli tibúnala ne si'néami echi auché jaré napawika bichíiyami, mapujiti Jesucristo ma ku ralali aboni, mapalí a Binói nijali, mapurigá Binói lalá ma ku'luwárami níili. ²⁹Mapujiti nijeni galá machí mapurigá mapalí nijeni ma ku simisá, echalí auché jaré nolínama suwábanala jena'í piréami napawika bichíiyami, mapurigá echi wabé jobátami nalíwali wabé suwaba echi jaré bo'wá. ³⁰Ayénachó pe waminánomí jaré 'yemi arigá wabé nakimea 'yékaka binéranala echi auché jaré 'yemi. A'lí echi jaré ketasi binéraama echi ne bichíwali, mapujiti aboni wabé nakimea mapu si'néami 'yemi galá bichíiyami arigá bichíima mapurigá aboni wabé 'yékaka nawesa. ³¹Echijiti galá 'nátaga tibusi 'yemi aboni. Ne galá 'natasi mapurigá bikiyá bamíbali yénasí, sinibí rawé, ayénachó sinibí rokogó, nijeni sinibí ne nalaka niráa 'yemi mi galá nawésaga ruyeli ibili niráa.

³²A'lí jipi, 'yemi keni ritémawa, nijeni chopi nakí mapurigá Riosi 'yemi mi ku'wírama, ayénachó máputamo bichíibo mapurigátamo nawésarami níili jeanigá mapu Riosi ne wabé galéami ju, mapujiti echi Galabé Riosi Ra'íchala wabé omérami ju 'yemi mi waminabi galá bichíiriya. A'lí átamo echirigá bichíisagá, echalítamo napabúrami níbo ne si'néami echi auché jaré yuwa mapu ikí Riosi wabé galabérali mapalí aboni galá bichíili Jesucristo niráa. ³³Nijeni ketasi siné koruli ni bilé 'yemi níwala wenomí, nirapeni koruli nibilé 'yemi níwala napacha. ³⁴Si'winárigá 'yémítamo galá machí mapurigá nijé wabé nóchali nijé binói sikala jiti, mapurigani echirigá mema echi jaré namuti mapu ikini newaleli, ayénachó mapurigani echirigá mema suwaba mapu ikí newaleli echi auché jaré mapu tamí yuwa muchili. ³⁵Sinibí nijé 'yemi nimí binérali mapurigata echirigá nochabo, ayénachó mapurigata ku'wírabo echi auché jaré, si'néami mapu ikí newaléami ju; ayénachóni 'yemi mi binérali máputamo galá 'natabo mapurigá echi Walubela Jesucristo jeanili: Waminabi wabé kaníliami ju echi mapu galá kowa auché jaré, ketasi mapurigá echi mapu wepi chopi naré.

³⁶A'lí ma je'ná jerigá anisáa, echalí echi Pablo chokoba wilíbali, ne si'néami aboni yuwa. A'lí si'néami aboni tániga ra'íchali Riosi yuwa. ³⁷A'lí ne si'néami aboni echi Pablo matóchawala cho'nogá, we nalákaka, wabé kaligá, natimaka ripórali. ³⁸Echalí aboni ne wabé o'mónali mapujiti echi Pablo bachá jeaneli: 'Yémítamo ma ketasi auchecheo siné tamí riwiboa. A'lí ne si'néami aboni apanéraga simíbali echi Pablo yuwa echo'ná bárkochi yénasí.

Pablo iyena echo'ná Jerusalémachi

21 Echo'nata ariwesa echí jaré ritémtami, mata mo'wili echo'ná bárkochi. A'lí bicheta ba'wichí moba simáraga ne wachínaga simíbali echo'ná Kósachi anilíwachi uchíi kawírali, echo'ná walú ba'wírali nasipa nirúami. A'lí bicheta ba'alínala rawé sili echo'ná Rórachi anilíwachi kawírali echo'ná walú ba'wírali nasipa nirúami. A'lí bicheta echo'ná jonsa sili echo'ná Pátarachi anilíwachi walúlachi. ²Echo'ná Pátarachi tamujeta riwali auché bilé barko echo'ná Jenísiachi anilíwachi kawírali simíami. Echalita echo'ná pachá mo'wisáa ku simíbali. ³A'lí bicheta ba'wichí moba simáraga riwali echí walú kawí Chíprechi anilíwachi echo'ná nasipa walú ba'wírali nirúami. A'lí mikabé simáraga o'winata ariwesa sili echo'ná Síriachi anilíwachi kawírali. A'lí bicheta sébali echo'ná walú ba'wírali suwé mapo'ná Tírochi anilíwachi walúlachi níili, mapujiti echo'ná bárkochi nóchami echo'ná suwé ku wichí ariwema riwéali jaré namuti muruka. ⁴A'lí bicheta ma riwisá echí jaré echo'ná piréami ritémtami bichíiyami, echalita echo'ná tibili aboni yuwa kichao rawé yénasí. A'lí aboni ayénachó ruyérami níili echí Wabé Galabé Riosi Iwigala jiti mapurigá aboni anema echí Pablo mapu ketasi galá níima mapurigá binói ku simea echo'ná Jerusalémachi. ⁵Chopi ma simírasa kichao rawé, echalita ma ku simíbali. A'lí ne si'néami echo'ná piréami bichíiyami rijói pe téeli niráa tamujé yuwa apanéraga 'yénali mapalita ku simíbali echo'ná walúlachi jonsa, echo'ná bárkochi ku simiba. Echalí aboni jubila ayénachó simíbali, aboni kúchuwala ayénachó. A'lí echo'ná walú ba'wírali suwé satérali si'néamita chokoba jábaga ra'íchali Riosi yuwa. ⁶A'lí ma a'nagupi matochi cho'nogá ripóraga, tamujeta echo'ná bárkochi mo'wili. A'lí aboni ku bitichí simíbali.

⁷A'lí bicheta echo'ná Tírochi jonsa ku simasa, echo'ná Tolemáirachi anilíwachi 'yénasáta sili. Echirigata ma sunili ba'wichí moba echo'ná pachá bárkochi 'yena. A'lí mata naripasa echo'ná piréami napawika bichíiyami, echo'nata aboni yuwa tibili pe bilé rawé. ⁸Ba'alínala rawé tamujeta ma ku simíbali echí Pablo yuwa. Echalita sili echo'ná Sesaréachi anilíwachi walúlachi. Echo'nata mo'wili echí Jilipi bitélachi, echí mapu we nawésami níili Riosi Ra'íchala. Échiko ayénachó bilé níili echí auché jaré kichao nigúurami yuwa, riákono anilíwami. A'lí bicheta echo'ná tibili binói yuwa. ⁹A'lí echí Jilipi naó maléali, ke cho kunéami. A'lí naóanika ayénachó we nawésami níili Riosi Ra'íchala. ¹⁰A'lí mapalita ma echo'ná pe wi'llibé rawé muchili, echalí echo'ná nawali bilé rijói Riosi Ra'íchala nawésami, echo'ná Juréachi jonsa simíami, echí mapu Agabo riwéami níili. ¹¹A'lí echí Agabo tamujé tamí 'nésiya nawali. Echalí binói ma 'yesa echí Pablo níwala pula, a binói ronólachi buleli, a binói sikálachi ayénachó. A'lí jeanili: Echi Wabé Galabé Riosi Iwigala jeaní mapu echo'ná Jerusalémachi, echí jaré Juríosi pagótami je'ná jerigá bulema je'ná pula níwami rijói. A'lí aboni waminá nijima echí binói mapurigá echí auché jaré si'wina piréami pagótami risúu olábiya tomea. ¹²A'lí mapalita ma je'ná jerigá námali, echalita wabé risúu anigá aneli echí Pablo mapurigá ketasi simea echo'ná Jerusalémachi. A'lí echí auché jaré echo'ná Sesaréachi piréami ayénachó achigórigá aneli. ¹³Echalí echí Pablo ku nijéwaga jeaneli: ¿Churékulátamo echirigá nalákaka, tamí o'monára sulachí niráa? Tarapé chiré mápuni arigá bulirúami níisa echo'ná Jerusalémachi. Nirapé chiré mápuni arigá mi'lirúami níisa mapujítini bichíi echí Walubela Jesucristo niráa. ¹⁴A'lí mapujítita ketasi omérali echirigá anée mapurigá

echi Pablo ketasi simea, echalita waminá ariweli jeanigá: Galá níima mapurigá olárami níisa mapurigá echí Walubela Jesucristo chopí nakí.

¹⁵ A'lí pe willibeko je'ná jerigá ma ikisáa, echalita ma kariwesa simíbali echo'ná Jerusalémachi. ¹⁶ Echalí jaré ritémtami echo'ná Sesaréachi piréami ayénachó apanéraga simíbali tamujé yuwa. Ayénachó aboni yuwa iyénali bilé rijói Manasoni riwéami mapu chabé bachánala echo'ná Chíprechi bitéami níili, chopí échiko ma bitéami níili echo'ná Jerusalémachi. A'lí wi'llibé bamíbali jonsa échiko galá bichíiyami níili Jesucristo niráa. A'lí bicheta echo'ná echí rijói bitélachi chi'lébali.

Pablo 'némya simili echí Jakobo

¹⁷ Mapalita ma sili echo'ná Jerusalémachi, echalí echo'ná piréami ritémtami wabé kaníliga tamujé tamí nareli. ¹⁸ A'lí ba'alínala rawé echí Pablo simili echí Jakobo 'némya. Echalí tamujeta ayénachó simíbali. A'lí echí auché jaré o'wéala ochérami bichíiyami echo'ná Jerusalémachi piréami ayénachó echo'ná muchili echí Jakobo yuwa. ¹⁹ Echalí echí Pablo galá narépali si'néami aboni. A'lí binói ibílipi niráa ruyeli suwaba namuti mapurigá Riosi olali echí auché jaré isena pagótami yuwa, mapalí binói nawésali aboni echí Galabé Riosi Ra'íchala, si'néami mapu ikí ketasi Juríosi pagótami níili. ²⁰ A'lí mapalí aboni echirigá námali, echalí aboni waminabi wabé walubélaga aneli Riosi. A'lí aboni jeaneli echí Pablo: Galá ju rijimala, chópimi ma galá machí mapu wikabé simírami Juríosi pagótami ma galá bichíili Jesucristo niráa. A'lí ne si'néami aboni 'wérali aní mapu arigá 'wérali ju máputa nijéwaga olabo mapurigá echí Moisesi osogá nulali. ²¹ A'lí aboni ruyérami níili mapurigá mujemi binera si'néami echí auché jaré Juríosi pagótami si'wina piréami, jeanigá mapurigá aboni ma ketasi nijéwaga olama mapurigá Moisesi osogá nulali, ayénachó mápumi aní mapu ma ketasi 'wérali ju mapurigá aboni noligá sikirema echí jaré aboni kúchuwala kúruwi, nibilé mapurigá aboni waminabi olama mapurigá tamujé pagótamawala sinibí olali. ²² ¿Jipi churigata olabo? Ne bichíwali echí wikabé pagótami napawima mapujiti aboni námama mapurigami ma ku nawali. ²³ Galá níima mujemi je'ná jerigá olasa, mapurigá tamujé mi ané: Jena'í tamujé yuwa muchuwi naó rijói mapu arigá olánali mapurigá aboni chabénala aneli Riosi mapurigá aboni ne bichíwali olama. ²⁴ Jipi mujé binói yuwa bayéraga togá echí jaré naó rijói. A'lí mujé a binói niráa ayénachó ne galá bi'wá mapurigá aboni olama, achigórigá mapurigá si'néami echí jaré Juríosi pagótami olá echo'ná aboni ri'obáwalachi. Mujé binói suwaba natéti mapu ikí aboni newalé. Mujé binói arigá ralá echí jaré bo'wá mapu ko'wirúami níima. A'lí aboni galá omérama sikayá aboni kupala, mapurigá echí jaré Juríosi olá mapalí aboni ma suní olayá mapurigá aboni ne bichíwaga aneli Riosi mapu aboni olama. A'lí ne si'néami echí jaré Juríosi pagótami galá machimea mapu ketasi bichíwali níili mapurigá aboni ruyérami níili mapurigá mujemi olá, chopí mapurigá mujé ayénachó ne galá nijéwaga olá mapurigá Moisesi osogá nulali. ²⁵ Chopí mata oseli echí auché jaré isena pagótami, si'néami mapu ikí galá bichíiyami ju Jesucristo niráa. A'lí bicheta jeanigá oseli mapu tamujeta mayé mapu ketasi 'wérali ju mapurigá aboni je'ná jerigá nijéwaga olama, chopí mapurigá aboni ketasi ko'mea echí sapá mapu bachá niráa wijáwaga uchárami níili echo'ná mulubé echí jaré amachíkalawami namuti yuwa; ayénachó mapurigá aboni ketasi ko'mea echí lá. Nirapé mapurigá aboni ko'mea echí jaré namuti sapala mapu kusébanaga ko'wirúami níili. A'lí bicheta oseli mapurigá

echi jaré rijói mapu ma jubéami ju ketasi kochimea auché jaré isena muguí yuwa, ayénachó mapurigá echi jaré muguí ketasi kochimea auché jaré isena rijói yuwa mapu ketasi aboni kunala ju.

**Echi Pablo chapirúami níili echo'ná pachá echi
walubé Juríosi pagótami ri'obáwalachi**

²⁶Echalí echi Pablo binói yuwa bayérali echi naó rijói. A'lí ba'alínala rawé binói chótali a binói niráa bi'wayá, si'néami aboni yuwa, mapurigá echi jaré Juríosi pagótami we olá echo'ná aboni ri'obáwalachi. Echalí we yáati echi Pablo ruyémiya bakili echo'ná pachá ri'obachi mapu kicháopi rawé niráa aboni ma sunima riwéali echirigá bi'wayá, ayénachó mapu echalí ibili aboni nijima riwéali echi jaré namuti mapu arigá 'wérali níili mapurigá aboni nijima. ²⁷Chopi mapalí ma mulubé suwibama ariwéali kichao rawé, echalí jaré Juríosi pagótami echo'ná Ásiachi anilíwachi kawírali piréami ma riwisá echi Pablo echo'ná pachá echi walubé Juríosi ri'obáwalachi, echalí aboni buchuwí anigá na'áwatali si'néami echi auché jaré Juríosi pagótami. A'lí si'néami aboni chapili echi Pablo. ²⁸A'lí aboni o'weli ra'íchaga jeanili: j'Yemi Israeli pagótami tamujé tamí ku'wíras! Ma mi'llboa je'ná rijói mapu ne suníami iyena na'áwitiya si'néami pagótami, jeanigá mapurigá aboni tamujé tamí sayérama máputa Juríosi pagótami ju; ayénachó binói we sayéraga binera Riosi nulalila, ayénachó binói we binera je'ná ri'obá sayéraga. A'lí jipi ayénachó binói ma bayébali jaré isena pagótami jena'í pachá Riosi ri'obáwalachi. A'lí binói echirigá ne wabé sití niwáli je'ná wabé galabé Riosi ri'obáwalachi. ²⁹Echalí aboni echirigá anili mapujiti chabénala aboni riwali echi Pablo echo'ná walúlachi iyénachi echi Trójimo riwéami rijói yuwa, echi mapu echo'ná Ejésochi bitéami níili. A'lí aboni mayeli mapu echi Pablo ma bayébali echi Trójimo echo'ná pachá echi walubé Juríosi ri'obáwalachi, chopi ketasi bichíwali níili. ³⁰Echalí ne si'néami pagótami echo'ná walúlachi piréami ne wabé buchuwí anigá na'áwaga, ne wabé sapú júmaga napawísali. A'lí ma chapigá echi Pablo, aboni wichí rikagá banírali echo'ná ri'obachi machímama. A'lí we yáati ku'yélati echo'ná ri'obachi yéachi. ³¹A'lí aboni wabé yáati nakili mi'lináliya echi Pablo, chopi echalí we yáati ruyérami níili echi walula mapu wikabé sontarsi nuléami níili mapurigá ne si'néami pagótami echo'ná Jerusalémachi piréami echirigá ne wabé buchuwí anigá na'áwatalami níili. ³²Echalí echi ne walula wikabé sontarsi nuléami we yáati napabuli wikabé binói níwala sontarsi, jaré aboni kapitánawala yuwa. A'lí si'néami aboni wabé sapú júmaga sili echo'ná mapo'ná echi wikabé pagótami napawili. A'lí mapalí echi wikabé pagótami riwali echo'ná síami echi ne walula wikabé sontarsi nuléami, echi wikabé kuchípala sontarsi yuwa, echalí aboni wabé majaga, we yáati ariweli echirigá wabé risúo ologá cho'nali echi Pablo. ³³Echalí echi ne walula wikabé sontarsi nuléami mulubé nawali mapo'ná echi wikabé pagótami waminá mi'llinálaga cho'nali echi Pablo. Echalí binói nulali chapigá bulínala echi Pablo okuá jiero wiya jiti. A'lí binói rukueli mapu chigá níili, ayénachó rukueli mapu piri olali. ³⁴Chopi echi wikabé pagótami o'weli sinákaka buchuwí anili. Jaré o'weli ra'íchaga anili mapu echi Pablo wabé chati oláami níili, chopi auché jaré o'weli ra'íchaga si'winárígá cho anili. Echijiti echi ne walula wikabé sontarsi nuléami ketasi omérali ne galá machíami niráa nama mapujiti echi wikabé pagótami echirigá ne o'weli niráa buchuwí anili. Echijiti binói nulali tónala echi Pablo echo'ná pachá walubé kalírali, echi wikabé

sontarsi pirélachi. ³⁵Chopi mapalí aboni echirigá togá sili echo'ná ripáami mapo'ná teka simárawa echo'ná walubé kalírali mo'wiyá, echalí arigá 'wérali níili mapurigá echí jaré sontarsi mutútaga tomea echi Pablo mapujiti echi wikabé pagótami wabé chapinálaga jubáami chibi nokuísali. ³⁶Mapujiti si'néami aboni echirigá jubáami najátaga, o'weli ra'íchaga jeanili: ¡Waminá mi'lisi!

Echi Pablo ni'yúanalaga ra'íchali bacháami echi wikabé pagótami yuwa

³⁷Echalí mapalí aboni maá pachá bachánala járali echi Pablo echo'ná walubé kalírali, echalí echi Pablo rukueli echi walula wikabé sontarsi nuléami jeanigá: ¿Acha risénsia ju mapu nimí pe téeli ra'íchama? Echalí echi walula wikabé sontarsi nuléami ku nijéwaga jeanigá rukueli: ¿Áchami machí echi jaré Griego anilíwami ra'íchala ra'icha? ³⁸¿Kéchami ju mujé echi rijói echo'ná Ejíptochi anilíwachi kawírali bitéami, echi mapu chabénala we sayérali echi jaré igúsuwami jena'í nuláami? ¿Kéchami mujé níili mápumi echo'ná biléana waná kawichí bayérali echi jaré naó mili rijói, si'néami aboni mapu wabé nakówami níili? ³⁹Echalí echi Pablo ku nijéwaga jeaneli: Ketásini ju. Nijeni bilé Juríosi rijói ju, mápuni echo'ná Társochi anilíwachi walúlachi ranarúami níili. Echijiti nijeni chopi bitéami ju echo'ná biléana wabé walúlachi echo'ná Silísiachi anilíwachi kawírali nirúami. Jipi nimí táni mapurigami tamí risénsia 'yama mapurigani ra'íchama echi wikabé pagótami. ⁴⁰Echalí echi walula wikabé sontarsi nuléami risénsia 'yali. A'lí Pablo echo'ná mapo'ná tega simárawa wilíbaga, binói sikala jiti ra'ámaga kilí jawábali echi wikabé pagótami. A'lí mapalí aboni ma kilí jábali, echalí echi Pablo, echi Ebreo anilíwami ra'íchala ra'íchaga jeaneli:

22 ¹Yemi keni ritémawa, ayénachó 'yemi máputamo o'wéala ochérami ju, ne galá kipusi mapurigá nijé 'yemi nimí ku nimíkaka ra'íchama. ²A'lí mapalí aboni námali mapurigá binói ra'íchali echi Ebreo ra'íchala niráa, echalí aboni waminabi wabé kilí jábali. A'lí Pablo jeaneli: ³Nijeni we Juríosi pagótami ju. Nijé ranarúami níili echo'ná Társochi anilíwachi, echo'ná Silísiachi anilíwachi kawírali, chópini jena'í Jerusalémachi ochérali. A'lí echi Gamalieli riwéami rijói tamí binérali suwaba Riosi nulalila. Echirigani galá bineli suwaba tamujé pagótamawala nulalila. Sinibini ne sulachí niráa nakili olánala mapurigá Riosi nakí, achigórigá mapurigá ne si'néami 'yemi ayénachó nakí olánala jipi rawé. ⁴Chabénala nijeni wabé risúu olánalaga a'najáltali si'néami echi auché jaré mapu ikí bichíili echi Walubela Jesucristo niráa. Nijeni wabé ko'winálaga kichili aboni, ayénachó nijeni bologá toli echi jaré rijói, ayénachó echi jaré muguí, je'ná jerigá bichíiyami, mapurigá aboni pachá mo'wárami níima echo'ná kumurachi. ⁵Echi ne walula sacerdote galá omérama ruyée, ne si'néami echi auché jaré o'wéala ochérami ayénachó, mapurigá aboni oselí osogá tamí 'yali risénsia tamujé pagótamawala yuwa echo'ná Ramáskochi piréami. A'lí nijeni echo'ná ásiya simili si'néami echi jaré mapu ikí bichíiyami níili Jesucristo niráa, mapurigani bologá pama jena'í Jerusalémachi, mapurigá aboni kastigo 'yárami níima.

Echi Pablo ruyée mapu churigá binói galá bichíili Jesucristo niráa

(Hch. 9:1-19, 26:12-18)

⁶A'lí mapalí nijeni echo'ná buwichí inárali, mapalini ma mulubé nawama riwéali echo'ná Ramáskochi, echalí nasipa rawé yena, ke sayiná ne noligá tamí yuwa ne

wabé ratábali echo'ná ripá riwigachi jonsa. ⁷Echalí nijeni ri'lé wichí bu'wíbaka námali bilé Walubela Ra'íchami mapu tamí jeaneli: Mujé Saulo, ¿churékulami tamí wabé kichiga a'najata? ⁸Echalí nijeni ku nijéwaga rukueli: ¿Chigami ju Mujé Walubela? A'lí Binói tamí jeaneli: Nijé ju Jesusi, echo'ná Nasarétachi bitéami. Mujemi tamí wabé kichiga a'najata. ⁹A'lí echí auché jaré mapu tamí yuwa sírali, ne bichíwali riwali mapalí echirigá ne wabé ratábali. Echalí aboni ne wabé majajali, chopí aboni ketasi námali echí Walubela Ra'íchami mapu tamí yuwa ra'íchali. ¹⁰Echalí nijeni ku nijéwaga jeanigá rukueli: Walubela, ¿pirí 'nalina galá níima mapurigá nijeni olama? A'lí echí Walubela Jesucristo tamí jeaneli: Ma ku wiliska, waminá Ramáskochi simigá. A'lí echo'ná mi ruyérami níima ne suwaba mapurigami nulérami níima olánala. ¹¹A'lí mapalí nijeni riwali echirigá ne wabé simírami ratábami, echalí nijeni tibili mapurigá ke machíliami niráa, echijiti arigá 'wérali níili mapurigá echí auché jaré tamí yuwa sírami tamí sikachí chapigá banírali echo'ná Ramáskochi yénasá.

¹²A'lí echo'ná asali bilé rijói Ananíasi riwéami echí mapu ne wabé galá nijéwami níili Riosi nulalila. A'lí ne si'néami echí auché jaré Juríosi pagótami echo'ná Ramáskochi piréami sinibí anili mapu echí Ananíasi wabé galabé oláami rijói níili. ¹³Echalí echí Ananíasi tamí 'némiya nawali, a'lí binói tamí jeaneli: Rijimala Saulo, ¡ma ku galá machílaga! A'lí echalí nijeni we yáati galá ku machíli, ayénachóni ma galá ku 'nénali echí binói. ¹⁴Echalí echí Ananíasi tamí jeaneli: Chabé ki'yá jonsa echí Walubela tamujé pagótamawala Riósawala, mi chapili mapurigami galá machimea mapurigá Binói nakí mapurigami olama. Echi Walubela Riosi ayénachó mi chapili mapurigami galá riwímea echí Walubela Jesucristo, mapu ne wabé galabé oláami ju, ayénachó mapurigami galá námama mapurigá echí Walubela mi ra'íchama. ¹⁵Mapujítimi Binói jiti ruwigá nawesáma ne suníami jena'í whichimóbachi piréami pagótami. Echirigami suwaba ruyema mapurigami riwali, ayénachó mapurigami námali. ¹⁶Jipi ma galá ju. ¡Ku wiliska! Nijeni ma mi pagoma ba'wí jiti. ¡Táni mapurigá echí Walubela Jesucristo mi ku wikáwama mapurigami chati olali!

Echi Pablo ruyée mapurigá binói julárami níili nawesánala echí auché jaré isena pagótami mapu ketasi Juríosi níili

¹⁷A'lí mapalini ku nawali echo'ná Jerusalémachi, echalini Riosi yuwa ra'ichámiya bakili echo'ná pachá echí walubé Juríosi pagótami ri'obáwalachi. Echalí Riosi tamí riwírali echí Walubela Jesucristo. ¹⁸Echalí echí Walubela Jesucristo tamí jeaneli: ¡Wabé sapú ku simigá jena'í Jerusalémachi jonsa, mapujiti jena'í piréami ketasi bichíúima mapurigá mujemi tamí jiti rugá nawesa! ¹⁹Echalí nijeni jeaneli: Walubela, aboni galá machí mapurigá nijeni echo'ná ne suníami aboni ri'obáwalachi iyénali mapurigani echo'ná pachá kumurachi togá mo'wama si'néami mapu ikí galá bichíúli Mujé niráa, ayénachó aboni galá machí mapurigani wipisoli echí jaré bichíiyami. ²⁰A'lí chabénala echí Mujé piónawala, Siteba riwéami, we nawésali Mujé Ra'íchala, chopí mapalí binói mi'lirúami níili, echalí nijé binói ayénachó echo'ná wilili, ayénachó nijeni nakili mapurigá echí binói waminá mi'lirúami níima. Echalí nijeni tibili aboni kimala, mapalí aboni basibuka mi'yali echí binói. ²¹Chopi echí Walubela Jesucristo tamí jeaneli: Arigá ku simigá, mapujiti Nijé nimí ne wabé mikabé julama, mapurigami nawesáma echí auché jaré isena pagótami, mapu ketasi Juríosi ju.

Echi walula wikabé sontarsi nuléami nulali bulénala echi Pablo

²² A'lí echi wikabé pagótami galá kilí kipuli echalí yénasí; chopi mapalí Pablo ra'íchali echi auché jaré isena pagótami jiti rugá, echalí ne si'néami echi jaré Juríosi pagótami chótali o'weli ra'íchaga jeanigá: ¡Mi'llisí echi rijói! ¡Ketasi galá ju mapurigá waminabi bitélama! ²³ Chopi mapujiti aboni waminabi wabé buchuwí anigá sinákasali, ayénachó mapujiti aboni wabé ripá a'wali aboni napáchala, ayénachó mapujiti ripá pali echi wi'yé wabé napisóami, ²⁴ echijiti echi ne walula wikabé sontarsi nuléami ma nulali pachá bachánala echi Pablo echo'ná pachá walubé kalírali, echi wikabé sontarsi piréelachi. Ayénachó nulali waminá wipisónala echi Pablo, mapurigá binói ku rumea mapurigá binói chati olali, ayénachó mapu piri jiti echi wikabé pagótami echirigá ne wabé simírami na'áwali binói sayéraga. ²⁵ A'lí mapalí aboni ma bologá achali wipisópiya, echalí echi Pablo jeaneli bilé pe tabéala nuláami sontarsi echo'ná wilíami: ¿Áchatamo risénsia ju máputamo chuwé wipisopo bilé rijói Romano pagótami, mapalítamo nirapé cho bachá niráa justicia olasa? ²⁶ Chopi ma je'ná jerigá namsa, echi pe tabéala nuláami sontarsi simigá jeaneli echi ne walula wikabé sontarsi nuléami jeanigá: ¡Ne galá 'natá mapurigami olama, mapujiti echi rijói Romano anilíwami pagótami ju! ²⁷ Echalí echi walula wikabé sontarsi nuléami mulubéanaga echi Pablo yuwa jeanigá rukueli: ¿Acha bichíwali ju mapu mujé Romano pagótami ju? A'lí echi Pablo jeaneli: Ayena. ²⁸ Echalí echi ne walula wikabé sontarsi nuléami jeaneli: Nijeni wikabé wenomí natétali mapurigani anérami níima Romano pagótami niráa. A'lí echi Pablo jeanili: Chopi nijeni Romano pagótami ju, mapujiti njé 'wénawala ayénachó Romano pagótami níili. ²⁹ A'lí ma je'ná jerigá namsa, echalí echi jaré mapu wipisoma riwéali echi Pablo, ma ariweli echi binói. A'lí echi ne walula wikabé sontarsi nuléami we majali mapalí binói ma machili mapurigá echi Pablo echi Romano pagótami níili, mapujiti echi walula sontarsi bachá niráa nulali bulénala echi Pablo, mapalí binói ke cho bachá niráa justicia olárami níili.

Echi Pablo pálati echo'ná bacháami mapo'ná echi jaré o'wela ochérami Juríosi napawili

³⁰ A'lí ba'alínala rawé echi ne walula wikabé sontarsi nuléami pe téeli niráa auchecho ku botánali echi Pablo; ayénachó binói nulali napabúnala echi jaré o'wéala sacerdote, ayénachó ne si'néami echi auché jaré o'wéala ochérami Juríosi. Echalí binói echo'ná pali echi Pablo. A'lí echo'ná bacháami echi jaré o'wéala ochérami Juríosi yuwa nasipa wilali, mapujiti binói nakili ne bichíwali machináliya mapujiti aboni echirigá wi'njili echi Pablo.

23 A'lí echi Pablo ne galá 'néniga echi jaré o'wéala ochérami Juríosi, echalí jeaneli: 'Yemi Juríosi pagótami, nijeni sinibí galabé ologá bitéali jipi rawé yénasí. Riosi galá machí mápuni bi'wíami ju sulachí niráa. ² Echalí echi ne walula sacerdote Ananíasi riwéami wabé yoga nuleli echi auché jaré mapu echo'ná mulubé echi Pablo yuwa jali mapurigá Pablo chumulachi cho'nimea. ³ A'lí echi Pablo ku njéwaga jeaneli: ¡Riosi ayénachó mi cho'nimea! ¡Mujé wabé 'yékami ju! ¡Mujé chópimi echo'ná atí mapurigami tamí justicia olama mapurigá nulérami ju echo'ná Riosi nulalila oselíwalachi, chópimi we sayérali Riosi nulalila mapalimi echirigá nulali tamí cho'nínala! ⁴ Echalí echi auché jaré echo'ná muchúami jeaneli: ¿Echirigáchami wabé

sitii ra'íchaga ané echi ne walubela Riosi sacerdótawala? ⁵A'lí echi Pablo ku nijéwaga jeaneli: 'Yemi keni pagótawa, nijeni ketasi machili mapu binói echi ne walubela sacerdote níili, mapujiti jerigá anigá osirúami ju echo'ná Riosi Ra'íchala oselíwalachi: Ketásimi chati sitii ra'íchaga ané bilé walula, mujé pagótawala walúlawala.

⁶Echalí echi Pablo galá machili mapu jaré aboni echi Saruseo anilíwami níili, chopi auché jaré echi Bariseo anilíwami níili. Echijiti echi Pablo echo'ná nasipa aboni yuwa o'weli ra'íchaga jeaneli: 'Yemi keni pagótawa, nijeni Bariseo ju, mapurigá nijé 'wénawala ayénachó Bariseo anilíwami binériami níili. Jípini wi'nijírami ju mapujítini galá bichíiga buwé mapurigá echi jaré suwfíami ku o'wínama echalí ne jubá rawé. ⁷Chopi mapalí echi Pablo je'ná jerigá anili, echalí echi jaré Bariseo chótali a'nagupi nasayéraga ra'icha echi auché jaré Saruseo anilíwami yuwa. Echirigá echi wikabé pagótami mapu napawika muchili, arigá okoná rojuali. ⁸Mapujiti echi jaré Saruseo aní mapu echi jaré suwfíami ketasi ku o'wínama, ayénachó mapu ke nirú Riosi kapitánawala, nirapé echi jaré aliwá; chopi echi auché jaré Bariseo galá bichíi suwaba je'ná jerigá. ⁹Echalí ne si'néami echi wikabé pagótami buchuwi anigá o'weli ra'íchali. A'lí jaré nulalíwami binériami echo'ná muchili mapu echi jaré Bariseo yuwa níili. Aboni jaska jeanili: Je'ná rijói ketásirapé namuti chati olali. Chopi, siné káachi bilé aliwá binói yuwa ra'íchaliré, bilé walula Riosi kapitánawala keremá. Echijiti ketasi sayérabo je'ná rijói, mapujiti siné káachi Riosi echirigá nuléliré. A'lí tamujé ketásita nakí mapu Riosi sayérabo.

¹⁰A'lí echi wikabé pagótami wi'libé niráa echirigá a'nagupi nasayéraga ra'íchali mapuyénasí echi walula wikabé sontarsi nuléami we majali, mayega mapu echi Pablo suwaba waminá chi'wanárami níima, echi wikabé pagótami jiti. Echijiti echi walula nulali mapurigá jaré wikabé sontarsi párami níima, mapurigá aboni ku machí paka tomea echi Pablo echo'ná nasipa echi wikabé pagótamichi jonsa, ayénachó mapurigá echi Pablo auchecho ku torúami níima echo'ná pachá walubé kalírali echi wikabé sontarsi pirélachi. ¹¹Ba'alínala rokogó echi Walubela Jesucristo echo'ná Pablo yuwa ke sayiná wilíbaga jeaneli: Waminabi galá bichíi mujé Pablo. Mapujiti mapurigami nawésali tamí jiti rugá jena'í Jerusalémachi, echirigá ayénachó 'wérali ju mápumi tamí jiti nawesáma echo'ná Rómachi anilíwachi walúlachi.

Jaré we mi'lináali echi Pablo

¹²Ba'alínala rawé jaré Juríosí rijói aboni galá anigá ra'íchali echi Pablo mi'liboa rugá. Echalí aboni a'nagupi jeaneli: Ketásita cho kopoá, nirapeta cho bajibo, a keta cho mi'lísáagáta echi Pablo. ¡Galá níima Riosi tamujé tamí ko'wisáa, ata ketasi mi'lísáagá echi Pablo! ¹³A'lí echi jaré mapu je'ná jerigá ne bichíwaga anili, nawosa makói rijói waminá simírami níili. ¹⁴Echalí aboni echo'ná simíbali mapo'ná echi jaré o'wéala sacerdote muchili, ayénachó mapo'ná echi auché jaré o'wéala ochérami muchili. A'lí aboni jeanili: Tamujeta ne bichíwaga anili máputa ketasi kopoá ke cho mi'lísáagáta echi Pablo. Ayénachó jeanílita mapu a ketásita bichíwali echirigá olásagá, galá níima mapu Riosi tamujé tamí ko'wimea. ¹⁵Jipi 'yemi, echi auché jaré o'wéala Juríosí yuwa, si'néami anébasi echi ne walula wikabé sontarsi nuléami mapu ba'alí 'yemi mi machí pásama echi Pablo echo'ná bacháami 'yemi yuwa, mapurigá 'yemi aboni kilí niráa waminabi wikabé namuti rukuébotamo. Chopi tamujé ma karigá muchibo mapurigata waminá mi'liboa echi Pablo echo'ná buwichí, mapalí binói ke cho nawama echo'ná 'yémichi.

¹⁶Chopi bilé ri'malí, echi Pablo kulíchala, ma namsa mapurigá echi jaré rijói echirigá mi'lináali echi Pablo, échiko simigá echo'ná pachá walubé kalírali, echi wikabé sontarsi pirélachi, echirigá ruyeli echi Pablo. ¹⁷Echalí echi Pablo bayegá pe bilé echi o'wéala sontarsi jeaneli: Bayéraga je'ná ri'malí echo'ná mapo'ná atí echi ne walula wikabé sontarsi nuléami, mapujiti binói ruyema bilé namuti. ¹⁸Echalí echi walula sontarsi bayérali echo'ná mapo'ná echi ne walula wikabé sontarsi nuléami asali. A'lí jeaneli: Echi Pablo mapu pachá bachárami ju tamí bayegá aneli mápuni pama je'ná ri'malí mi yuwa mapujiti mi ruyema bilé namuti. ¹⁹A'lí echi ne walula wikabé sontarsi nuléami binói sikálachi chapigá, waná bayéraga jeanigá rukueli: ¿Pírimi tamí ruyénali? ²⁰Echalí echi ri'malí jeaneli: Ne si'néami echi jaré Juríosi ma galá anigá ra'íchali jeanigá mapu aboni mi tánama mapu ba'alí mujemi ku machí pama echi Pablo echo'ná si'néami echi jaré o'wéala Juríosi napawíkowachi, mapurigá aboni waminabi rukuema echi Pablo. ²¹Chopi ketasi echirigá bichífiga olá mujé, mapujiti nawosa makói waminá simírami rijói ju mapu ma galá kariwesa chakena ichípaga buwema. A'lí aboni ma bichíwaga anili mapurigá aboni ketasi auchecho siné ko'mea, nirapé auchecho siné bajima, a ketasi cho mi'lisáagá echi Pablo. Aboni ayénachó anili mapu galá níima Riosi tamujé tamí ko'wisáá, ata ketasi echirigá mi'lisáagá echi Pablo. A'lí jipi aboni chopi buwigá muchuwi mapuyénasí mujemi ku nijéwama. ²²A'lí echi walula wikabé sontarsi nuléami ku ripórali echi ri'malí, ayénachó jeaneli mapu ketasi wesi ku ruyema mapurigá binói je'ná jerigá aneli.

Echi Pablo julárami níili echi walula silíami Pélisi riwéami yuwa

²³Echalí echi walula wikabé sontarsi nuléami bayegá nuleli okuá echi auché jaré o'wéala sontarsi kariwénala okuá kiento sontarsi wichí jaga simíbami, ayénachó nuleli kariwénala auché jaré kicháosa makói sontarsi kawé asigá simíbami, ayénachó nuleli kariwénala auché jaré okuá kiento sontarsi silá kámi, mapurigá si'néami karigá muchima, mapurigá si'néami echo'ná Sesaréachi anilwachi walúlachi simama echalí pe téeli chonásachi. ²⁴Ayénachó nuleli kariwénala jaré kawé, mapurigá echi Pablo ayénachó kawé asigá simea. A'lí echi walula wikabé sontarsi nuléami we nulali mapurigá echi Pablo ne galá kaníliga torúami níima echo'ná mapo'ná echi walula silíami Pélisi riwéami asali. ²⁵A'lí echi ne walula wikabé sontarsi nuléami ayénachó bilé oselí tóraga júuli, jerigá anigá osirúami:

²⁶Nijé, Kláurio Lísia mi osé, mujé wabé galabé walula silíami Pélisi riwéami. We galá kaníliga mujé. ²⁷Bukulí echi jaré Juríosi pagótami chapili je'ná rijói. A'lí mapalí aboni we mi'linálaga olali, echalí nijeni ku ku'wírali, echi wikabé sontarsi bayegá, mapujítini machili mapu je'ná rijói Romano pagótami níili. ²⁸Echalí nijeni we nakili machináliya, ne bichíwali niráa, mapu piri jiti aboni ne wabé wi'nijili je'ná rijói. Echijiti nijeni toli binói echo'ná bacháami mapo'ná ne si'néami echi jaré aboni o'wéalawala muchili. ²⁹Chópini galá machigá riwali mapurigá aboni wabé wi'nijili je'ná rijói mapujiti binói ketasi nijéwami níili jaré aboni nulalila, chopi binói tarapé chati oláami níili mapurigá binói echijiti waminá mi'lirúami níima riwéali. Nibilé cho chati oláami níili mapurigá binói echijiti pachá bachárami níima. ³⁰Chopi nijeni ruyélati mapurigá echi jaré Juríosi ma galá tétali mi'liboya. Echijiti nijeni júuli echo'ná mi yuwa; ayénachóni aneli echi jaré wi'nijíami mapurigá aboni echo'ná bacháami mi yuwa sayéraga animea echi mapujiti aboni sayéraga wi'nijí echi binói. ¡Ariósibá!

³¹ Echalí echi wikabé sontarsi, rokogó niráa, chapigá toli echi Pablo echo'ná Antípachi anilíwachi walúlachi mapurigá aboni nulélati. ³² Ba'alínala rawé echi jaré okuá kiento sontarsi wichí jaga simíbami echo'ná jonsa ku ro'wisa, ku kuwana simíbali echo'ná walubé kalírali, wikabé sontarsi pirélachi; chopi echi auché jaré sontarsi kawé aséami waminabi simíbali echi Pablo yuwa. ³³ A'lí ma sebasa echo'ná Sesaréachi, aboni galá 'yali echi oselí echi walula silíami; ayénachó nijali echi Pablo. ³⁴ Echalí ma 'nesa echi oselí, echi walula silíami rukueli mapu chu anilíwachi kawírali bitéami níili echi Pablo. A'lí ma machigá mapu echo'ná Silísiachi anilíwachi kawírali bitéami níili, ³⁵ echalí jeaneli: Nijé nimí justicia olama mapalí ma nolinsa echi jaré mapu mi wi'nijí. A'lí nulali mapurigá echi Pablo galá tibútami níima echo'ná pachá walubé kalírali echi walula silíami Erorsi riwéami bitélachi.

**Pablo ku nimika ra'íchali echo'ná bacháami echi
walula silíami Pélisi riwéami yuwa**

24 Pe kinana malí rawé echi ne walubela sacerdote Ananíasi riwéami ma nawali echo'ná Sesaréachi, auché jaré o'wéala yuwa. A'lí bilé rijói Tértulo riwéami ayénachó nawali, echi mapu suwaba ra'íchali galá katéwaga wi'nijíami níili. Echalí aboni sili echo'ná echi walula silíami yuwa, mapujiti aboni we wi'nijífinali echi Pablo. ² A'lí mapalí echi Pablo echo'ná pálati, echalí echi Tértulo wabé wi'nijiga ra'íchali echi Pablo sayéraga echo'ná bacháami echi walula silíami Pélisi riwéami yuwa. Echalí jeaneli: Walú natétara mi 'yabo mujé walula silíami mapujítita mujé jiti wabé galabé kilí piré. Ayénachó jipi ne suwaba namuti galá katéwami ju, mapujiti mujemi ne wabé galá machíami ju. ³ Ne sinibita walú natétara mi 'yabo, mujé wabé galabé oláami Pélisi, mapujítita sinibí, ne suníami niráa nareli suwaba je'ná jeyiri mapu mujemi olali. ⁴ Jípita ketasi nakí máputa wi'llibé niráa mi kumebo, echijítita risénsia táni mapurigami tamí kipuma, pe téeli niráa, mapujítimi wabé galabé ju. ⁵ Mapujítita galá machigá riwali mapurigá je'ná Pablo ne wabé nikumea ju, mapujiti wabé sitíi ra'íchami ju; ayénachó binói sinibí okoná niráa rojuana echi jaré Juríosí pagótami, ne suníami jena'lí wichimóbachi piréami, mapurigá aboni chopi a'nagupi we nasayérama. A'lí je'ná Pablo ne chokila ju echi jaré si'wina waná bichíiyami yuwa, echi jaré mapu Nasareno anélati. ⁶ Ayénachó je'ná Pablo we sitíi niwánali echi walubé tamujé ri'obáwala. Echijiti tamujeta waminá chapili. A'lí nakita kastigo 'yánala, mapujiti echirigá osirúami ju echo'ná tamujé nulalila oselíwalachi. ⁷ Chopi echi ne walula wikabé sontarsi nuléami, Lísia riwéami, echo'ná nawagá arigá niyúraga, tamujé tamí 'yésali. ⁸ Ayénachó echi walula Lísia tamujé tamí aneli máputa jena'lí simabo, mapurigata mi yuwa ra'ichabo, si'néami mapu ikita nakili wi'nijiya echi Pablo. Jipi mujé binói galá omérama rukueya echi Pablo. Echirigami galá ne bichíwali miráa machimea suwaba mapujítita wi'nijí echi binói. ⁹ Echalí echi auché jaré Juríosí pagótami echo'ná muchúami ayénachó anili mapu suwaba je'ná jerigá ne bichíwali níili.

¹⁰ A'lí echi walula silíami binói niráa jówaga riwírali mapurigá echi Pablo ma ra'icháma. Echalí echi Pablo jeaneli: Nijeni wabé kanili mapujiti jípini pe ku nimika ra'icháma bacháami mi yuwa, mapujítini machí mapurigami walula silíami níili je'ná Juríosí pagótami yuwa, wikabé bamíbali yénasí jonsa. ¹¹ Jipi mujé binói galá omérama machiyá mapu chopi makói miná okuá rawé yena ju mapalí jonsa nijeni ku nawali jena'lí Jerusalémachi mapurigani Riosi yuwa ra'icháma echo'ná

pachá echi walubé Juríosi pagótami ri'obáwalachi. ¹²A'lí aboni ketasi tamí riwali auché jaré yuwa a'nagupi nasayéraga ra'íchami. Nirapé tamí riwali na'áwitiyami echi jaré pagótami echo'ná pachá echi walubé Juríosi ri'obáwalachi. Nirapé tamí riwali na'áwitiyami echi pagótami echo'ná pachá auché jaréana ri'obachi, nibilé echo'ná auché jaréana, jena'lí walúlachi. ¹³A'lí aboni ketasi omero mi bichíriya mapurigá ne suwaba ne bichíwali ju mapurigá aboni tamí wi'niji. ¹⁴Chopi nijé nimí je'ná jerigá ané mápuni galá bichíiga waminabi walubélaga ané echi Walubela Riosi mapurigá nijé 'wénawala ayénachó waminabi walubélaga aneli echi Binói. A'lí echi jaré Juríosi aní mapu nijeni si'winárigá oláami ju, mapujítini bichíi echi Walubela Jesucristo niráa, chópini arígá bichíi ne suwaba mapurigá osirúami ju echo'ná Riosi nulalila oselíwalachi, ayénachó mapurigá osirúami ju echo'ná echi jaré Riosi jiti nawésami oselíwalachi. ¹⁵Ayénachó nijeni bichíiga buwé mapurigá Riosi waminánomí auchecho ku o'wíntama echi jaré suwíami, achigórigá mapurigá aboni ayénachó bichíiga buwé. Echalí Riosi ku o'wíntama echi jaré galabé oláami, echi auché jaré chati oláami ayénachó. ¹⁶Echijiti nijeni sinibí wabé nakí galabé ologá bitélanala, mapurigá nijé binói galá bi'wíami sulélama, ayénachó mapurigani ketasi wi'nijírami níima Riosi jiti, nibilé cho echi jaré pagótami jiti.

¹⁷Pe wi'libé bamíbali jonsa nijeni iyénali echo'ná auché jaréana kawírali, chopi bukulini ku nawali jena'lí nijé kawíwalachi mapurigani kóoma echi jaré we tisúati, ayénachó mapurigani waminabi walubélaga anema Riosi, echo'ná pachá walubé Juríosi ri'obáwalachi. ¹⁸A'lí nijeni echirigá ologá, ne galá bi'wali nijé binói niráa. Echalí jaré Juríosi pagótami echo'ná Ásiachi anilíwachi kawírali piréami tamí riwali echo'ná pachá walubé Juríosi pagótami ri'obáwalachi. Chopi aboni ketasi tamí riwali wikabé pagótami yuwa iyénami, nibilé cho tamí riwali na'áwitiyami echi auché jaré pagótami. ¹⁹Echi 'nalí galá níima mapu jena'lí sisáa mapurigá aboni tamí wi'nijima, a jaré namuti jiti tamí wi'nijinalaságá. ²⁰Ayénachó galá níima je'ná jaré jena'lí muchúami galá rusá acha tamí riwali jaré namuti chati oláami, mapalini asali echo'ná bacháami si'néami echi jaré o'wéala Juríosi napawílachi. ²¹Chopi siné káachi aboni animea mápuni chati olali, mapalini echo'ná nasipa aboni yuwa wiligá o'weli ra'íchaga jeaneli: ¡Jipi 'yemi chópitamo tamí wi'nijí mapujítini galá bichíi mapurigá echi jaré suwíami auchecho ku o'wínama waminánomí rawé!

²²Echalí echi walula silíami Pélisi riwéami je'ná jerigá namsa ma ketasi nakili justicia olama echalí rawé. Binói ma galá machili mapurigá echi jaré napawika bichíiyami galá bichíili Jesucristo niráa. Echalí binói jeaneli: Mapalí ku nawasa echi ne walula wikabé sontarsi nuléami, Lísia riwéami, echalini waminabi galá rukugá machimea ne suwaba 'yemi ra'íchala. ²³Echalí echi Pélisi nuleli echi tabéala nuláami sontarsi mapurigá echi Pablo abijí pachá kumurachi tibima, chopi nuleli mapurigá Pablo galá ku'wíratami níima; ayénachó risénsia 'yali mapurigá echi jaré Pablo amígowala 'nébiya simea echo'ná pachá kumurachi, ayénachó mapurigá aboni galá kóoma echi Pablo.

²⁴Pe wakinana, ma wi'libé rawé, echi Pélisi auchecho siné nawali echo'ná Sesaréachi. Echalí binói upila ayénachó nawali. A'lí binói upila Rusila riwéami, Juríosi pagótami níili. Echalí echi Pélisi auchecho siné bayeli echi Pablo mapurigá binói galá ra'icháma aboni yuwa, Jesucristo bichíilawami jiti rugá. ²⁵Chopi mapalí echi Pablo ra'íchali jeanigá mapurigá galá níima mapu echi pagótami ne wabé galabé wachínaga olama, ayénachó mapurigá aboni ketasi chuwé olama, ayénachó

mapurigá Riosi kastigo 'yama echalí ne jubá rawé, echalí echi Pélisi ne wabé majali. A'lí jeaneli: ¡Jipi ma ku simigá! Pe minana mapalí nijeni galá ikira, echalí nimí auchecho siné bayema.²⁶ Ayénachó echi Pélisi mayeli mapu echi Pablo wenomí nijima, mapurigá binói ku machí pátami níima. Echijiti echi Pélisi wisabé bayeli echi Pablo mapurigá binói yuwa ra'icháma.

²⁷Echirigá olali okuá bamíbali yénasí; chopi echalí echi Pélisi ma ku machínali walula silíami niráa. A'lí echi Pórso Jesto riwéami 'nalí wilálati. A'lí echi Pélisi we nakili kanílatama echi jaré Juríosi pagótami, echijiti binói ariweli echi Pablo echo'ná pachá kumurachi, pachá bachárami niráa.

Pablo párami níili bacháami echi walula silíami Jesto riwéami yuwa

25 Echalí echi Jesto nawali echo'ná Sesaréachi mapurigá binói wilárami níima walula silíami niráa. A'lí pe wakinana, bikiyá chi'ligá, binói ku simili echo'ná Sesaréachi jonsa, echo'ná ripáami Jerusalémachi simiyá.² Echo'ná echi jaré o'wéala sacerdote, ayénachó echi auché jaré o'wéala Juríosi pagótami si'néami we tali mapurigá echi Pablo kastigo 'yárami níima.³ Echalí aboni wabé tali mapurigá echi Pablo ku torúami níima echo'ná Jerusalémachi. Chopi aboni nakili auché jaré julánala mapurigá echo'ná buwichí mi'limea echi Pablo.⁴ A'lí echi Jesto ku nijéwaga jeaneli mapu echi Pablo pachá bachara asali echo'ná Sesaréachi, ayénachó anili mapurigá binói Jesto ke 'me ayó ayénachó echo'ná ku simea.⁵ A'lí echi Jesto ayénachó jeaneli: Echijiti galá níima si'néami 'yemi máputamo ikí bachá o'wéalapala juko, ayénachó tamí yuwa simasa echo'ná Sesaréachi. A'lí a echi rijói ne bichíwali chati oláami níisagá 'yémitamo galá omérabo wi'nijiya echi binói.

⁶Echalí echi Jesto chopi tibili echo'ná Jerusalémachi pe osá naó rawé, pe makói rawé keremá. A'lí binói ku simili echo'ná Sesaréachi. A'lí ba'alínala rawé echi Jesto asífali echo'ná mapo'ná echi jaré o'wéala sinibí muchili. A'lí binói nulali mapurigá echi Pablo echo'ná párami níima.⁷ A'lí mapalí echi Pablo echo'ná nawali, ne si'néami echi jaré o'wéala Juríosi echo'ná Jerusalémachi jonsa simíbami binói yuwa mulubéanaga ne nolébali. Echalí aboni wabé wi'nijili echi Pablo mapurigá wikabé namuti wabé chati oláami niráa, chopi aboni ketasi omérali ne bichíwali aniyá mapurigá echi Pablo echirigá chati oláami níili.⁸ Echalí echi Pablo ne galá ku nimika jeaneli: Nijeni tarapé siné chati ologá sayérali echi jaré Juríosi pagótami nulalila, nirapé choni echirigá sayérali echi walubé aboni ri'obáwala, nirapé choni sayérali echi ne walubela silíami echo'ná Rómachi bitéami.⁹ Chopi echi Jesto we nakili kanílatama echi jaré Juríosi pagótami, echijiti binói jeanigá rukueli echi Pablo: ¿Áchami nakí mápumi ku simea echo'ná Jerusalémachi, mapurigá nijeni mi justicia olíima echo'ná, wikabé karúmati jiti, mapurigá aboni mi wi'nijí?¹⁰ Echalí Pablo ku nijéwaga jeaneli: Jenalíni wilí bacháami mi yuwa mápumi wilárami ju justicia olánala, echi ne walubela silíami echo'ná Rómachi bitéami jiti. Galá níima mapurigami we yáati tamí justicia olíima. Mujé binói ne galá machí mapurigani tarapé chati olali echi jaré Juríosi pagótami sayériya.¹¹ A nijeni ne bichíwali ne wabé simírami chati oláami níisagá, echalí galá níima mapurigani echijiti mi'lirúami níima. Ayénachó a echirigá ne bichíwali níisagá, nijeni arigá animea mapurigami tamí mi'limea. Chopi a ketasi bichíwali níisagá echi jaré karúmati namuti mapujiti echi jaré Juríosi pagótami tamí wi'nijí, echalí ke wesi risénsia niwa mapurigá aboni tamí nijima echi jaré Juríosi pagótami yuwa. ¡Echijiti nijeni taní mapurigá echi

ne walubela silíami echo'ná Rómachi bitéami tamí justicia olíima! ¹²Echalfí echi Jesto ma ra'ichasa echi jaré o'wéala yuwa mapu binói yuwa ku'wíriami níili, a'lí jeaneli: Galá ju. Mujemi taní mapurigá echi ne walubela silíami echo'ná Rómachi bitéami mi justicia olíima. Nijé nimí julama echo'ná Rómachi, echi ne walubela silíami yuwa.

Pablo pálati echo'ná bacháami echi walula silíami Agripa riwéami yuwa

¹³Pe wakinana echi walula silíami Agripa riwéami simili echo'ná Sesaréachi echi Jesto naripámiya. Echi Berenise riwéami mukí ayénachó simea. ¹⁴A'lí aboni echo'ná tibili pe wi'llibé rawé. Echalfí echi Jesto ruyeli echi walula Agripa mapurigá echi Pablo pachá bachárami níili. Echalí echi Jesto jeaneli: Jena'í bilé rijói pachá bachara atí mapu echi Pélisi echo'ná achali. ¹⁵A'lí mapalini asali echo'ná Jerusalémachi, echi jaré o'wéala sacerdote, ayénachó echi auché jaré Juríosi pagótami o'wéalawala si'néami tamí tánali mapurigani nulama mi'línala echi rijói. ¹⁶Chopi nijeni ku nijéwaga aneli mapu tamujé Romano pagótami ketásite echirigá nulá mi'línala bilé rijói mapalita ketasi cho bachá niráa justicia olasa, ayénachóta bachá niráa bayé echi jaré wi'nijíami mapurigá echi auché bilé mapu wi'nijírami ju ne galá riwimea aboni, mapurigá echi mapu wi'nijírami ju galá omérama ni'yúriya, a ketasi ne bichíwali chati oláami níisagá. ¹⁷Echijiti mapalí aboni sili jena'í, ba'alínala rawé niráa, nijeni we yáati asíbaga mapo'ná echi jaré igúsawami muchiba, echalini nulali echo'ná pánala echi rijói. ¹⁸Chopi echi jaré mapu echo'ná sili wi'nijísia echi rijói ketasi wi'nijili mapurigá wabé chati oláami niráa mapurigá nijeni mayeli. ¹⁹Chopi mapalí aboni ra'íchali echi rijói sayéraga, echalí aboni chopí ra'íchali wiká karúmati namuti jiti rugá, mapurigá echi jaré Juríosi pagótami chopí bichíili. Ayénachó aboni sayéraga ra'íchali bilé rijói, Jesusi riwéami, jiti rugá, echi mapu ma mukuli. Chopí echi Pablo aní mapu echi Jesusi ma ku bitéami ju. ²⁰Echalí nijeni ketasi machili mapu chúrigani justicia olama echiyiri karúmati namuti jiti. Echijiti nijeni rukueli echi Pablo acha binói nakimea echo'ná Jerusalémachi simiyá, mapurigani echo'ná asagá justicia olíima binói, je'ná karúmati namuti jiti. ²¹A'lí echi Pablo tali mapurigá binói chopí justicia olárami níima echi ne walubela silíami Augusto riwéami jiti, echo'ná Rómachi bitéami. Echijiti nijeni nulali mapurigá echi Pablo pachá bachara asimea mapuyénasí nijeni omérama echo'ná Rómachi jula. ²²Echalí echi Agripa jeaneli echi Jesto: Nijeni ayénachó nakí echi rijói ra'íchala kipúnala. A'lí echi Jesto ku nijéwaga jeaneli: Ba'alimi galá kipuma.

²³Ba'alínala rawé mapalí echi walula Agripa nawali, echi Berenise riwéami mukí yuwa, echalí aboni wabé níлага, o'wéala niráa mayega mo'wili echo'ná walubé kalírali, wikabé o'wéala sontarsi yuwa, echi jaré o'wéala echo'ná walúlachi piréami ayénachó. Echalfí echi Jesto nulali echo'ná pánala echi Pablo. ²⁴Echalí echi Jesto jeaneli echi Agripa riwéami: Mujé walubela silíami, ayénachó 'yemi o'wéala, si'néami máputamo jena'í tamujé yuwa muchuwi: Jena'ítamo ritiwá je'ná rijói. Ne wikabé echi auché jaré Juríosi pagótami echo'ná Jerusalémachi piréami ma tamí yuwa ra'íchali je'ná rijói sayériga, wikabé jena'í Sesaréachi piréami ayénachó. Ne si'néami aboni sinibí tamí ané mapu galá níima mapurigá binói miná mi'lirúami níima. ²⁵Chopi nijeni mayé mapurigá binói tarapebi yiri chati oláami níili, echijítini mayé mapu ketasi galá níima mapurigá binói waminá mi'lirúami níima. A'lí mapujiti je'ná rijói tali mapurigá binói justicia olárami níima echi ne

walubela silíami, Augusto riwéami jiti, echo'ná Rómachi bitéami, echijiti nijeni mayeli mápuni echo'ná julama echi walubela silíami yuwa.²⁶ Chopi mapujítini ketasi machí mapu piri jitini wi'nijiga osema echi ne walubela silíami, je'ná rijói sayéraga, echijítini ma machí pali jena'í bacháami 'yemi yuwa mapurigátamo galá rukuebo. A'lí bachá niráa nijeni nakí mapurigá mujemi walubela Agripa ne galá rukuema, mapurigá nijé echalí galá machimea mapurigani osogá wi'nijima je'ná rijói echi ne walubela silíami yuwa.²⁷ Mapujiti nijeni mayé mapurigani ke newalite niráa níima, ani echo'ná náwalasagá bilé rijói mapurigá binói pachá bachárami níima, ani ketasi ruyésagá mapurigá echi rijói chati olali.

**Echi Pablo ni'yúranalaga ra'íchali bacháami echi
walubela silíami Agripa riwéami yuwa**

26 Echalí echi walubela silíami Agripa riwéami jeaneli echi Pablo: Ma galá ju mapu mujé binói niráa ni'yúraga ra'ícháma. Echalí echi Pablo, binói sikala o'wínaga, jeaneli:² Nijeni ne wabé kaníili mapujítini ni'yúraga ra'ícháma bacháami mujé yuwa, mujé walubela silíami Agripa riwéami, mapujiti jípini ni'yúraga ra'ícháma echi wikabé namuti jiti mapurigá echi jaré Juríosi pagótami tamí sayéraga ra'íchali.³ Nijeni echirigá wabé kaníili mapujiti mujé ne galá machí ne suwaba mapurigá tamujé Juríosi pagótami bichíiga olá, ayénachó mapurigata a'nagupi we ra'íchaga aní. Echijiti nimí wabé táni mapurigami ne galá kilí tamí kipuma.

**Pablo galá suwaba ru mapurigá binói ologá bitéali mapalí
binói ketasi cho bichíiyami níili Jesucristo niráa**

⁴ Ne si'néami echi jaré Juríosi pagótami ne galá machí mapu chúrigani ologá bitéali aboni yuwa chabé chokichí jonsa mapalí jónsaní taaa níili, echo'ná nijé kawíwalachi, echo'ná Jerusalémachi ayénachó.⁵ Ne si'néami echi jaré Juríosi pagótami ayénachó galá machí mapurigá nijeni wabé nóchali ologá bitéali mapurigá bilé Bariseo niráa; ayénachó aboni galá omérama echirigá ku ruyá, a aboni echirigá nakisáagá. A'lí echi jaré Bariseo waminabi ne wabé simírami nóchali ologá piré, ketasi mapurigá echi auché jaré Juríosi pagótami.⁶ A'lí jipi nijeni wabé wi'nijírami ju mapujítini we bichíiga buwé mapurigá Riosi waminánomí ku o'wíntama echi jaré suwíami, achigórigá mapurigá Riosi Binói bichíwaga aneli echi jaré chabé ki'yá piréami tamujé pagótawala mapurigá Binói olama riwéali.⁷ A'lí ne si'néami echi jaré makói miná okuá rojuáami, tamujé Isaeli anilíwami pagótami, ne si'néamita bichíiga buwé mapurigá Riosi echirigá ku o'wíntama echi jaré suwíami. Echijítita waminabi walubélaga ané Riosi, ayénachóta sinibí rawé chopi olá mapurigá Binói nakí, sinibí rokogó ayénachó. A'lí nijé nimí ané, mujé walubela Agripa, mapu echi jaré Juríosi tamí wi'nijí jipi rawé, chopi mapujítini echigá bichíiga buwé.⁸ ¿Churékulátamo mayé mapu Riosi ketasi omero ku o'wíntiya echi jaré suwíami?

Pablo suwaba ru mapurigá binói risúu ologá najáltali echi jaré galá bichíiyami

⁹ Nijé binói chabénala niráa mayeli mapu arigá 'wéralli níili mapurigani wikabé namuti olama echi Jesusi sayéraga, mapu echo'ná Nasarétachi bitéami níili.¹⁰ A'lí echirigani olali echo'ná Jerusalémachi. A'lí mapalí echi jaré o'wéala sacerdote tamí risénsia 'yali, echalini echo'ná pachá kumurachi mo'wali wikabé echi jaré galá

bichíiyami. A'lí mapalí jaré aboni waminá ko'wirúami níli, echalí nijé ayénachó nakili mapurigá aboni echirigá ko'wirúami níima. ¹¹ Ayénachóni wisabé chokéami echirigá kastigo 'yali echi jaré bichíiyami, mapujítini nakili mapurigá aboni animea mapu ma ketasi waminabi bichíima Jesucristo niráa. Echirigani olali echo'ná ne suníami echi jaré Juríosi pagótami ri'obáwalachi. Ayénachóni ne wabé simírami yoga kichili aboni, mapuyénasíni wabé risúu ologá a'najátali aboni echo'ná jaréana si'wina o'wéalachí yénasí.

Echi Pablo auchecho siné galá nawésali mapurigá binói bachá bichíili

Jesucristo niráa

(Hch. 9:1-19, 22:6-16)

¹² A'lí bicheni echirigá olánaraga simili echo'ná Ramáskochi anilíwachi walúlachi, mapujiti echi jaré o'wéala sacerdote tamí wilali mapurigá walula niráa, mapurigani echirigá risúu ologá a'najátama echi jaré bichíiyami. ¹³ Chopi nimí ané, mujé walubela silíami, mapu echo'ná buwichí, ne nasipa rawé niráa, nijeni riwali ne wabé simírami ratábami echo'ná ripá riwigachi jonsa, ketasi mapurigá echi rayénali. Echalí tamí yuwa ne noligá ratábali, ayénachó echi auché jaré yuwa mapu tamí yuwa sírali. ¹⁴ Echalí si'néamita wichí bitíbali. A'lí nijeni námali bilé Walubela Ra'íchami mapu tamí jeaneli, echi Ebreo ra'íchala jiti jeanigá: Saulo, Saulo, ¿churékulami tamí a'najátaga kichí? Mujemi wabé risúu olá echi jaré mapu tamí bichíi, chópimi arigá binói niráa wabé okota, mapurigá echi bóisi olá mapalí ku kuwana sayériga rité echi kusí wéchala. ¹⁵ Echalini jeanigá rukueli: ¿Chigami ju, Walubela? A'lí echi Walubela ku nijéwaga tamí jeaneli: Nijé ju Jesucristo. ¡Mujemi arigá tamí we a'najátaga kichí! ¹⁶ Ku wiliska, mapujiti nijé ke sayiná nimí yuwa nawali mapurigami tamí ku'wírama, ayénachó mapurigami ku nawisama mapurigami riwali jipi rawé. Ayénachóni nakí mapurigami ku nawisama mapurigá Nijé nimí riwírama waminánomí rawé, mapalini auchecho siné ke sayiná nawama mi yuwa. ¹⁷ Nijé nimí ku'wírama mapurigá echi jaré Juríosi pagótami ketasi mi mi'limea, echi auché jaré isena ketasi cho. Jipi nimí julama echo'ná echi auché jaré isena pagótami yuwa, mapurigami nawesáma aboni. ¹⁸ Echirigá Nijé nimí julama echi jaré isena pagótami yuwa, mapurigami binérama echi ne bichíwali, mapurigá aboni ma ketasi waminabi chuwe olama mapurigá echi riablo nulá, chopi mapurigá aboni wabé galabé ologá nijéwama mapurigá Riosi nulá. Echalí mujemi nawesáma mapurigá aboni galá tamí bichíima, mapurigá aboni echirigá ku wikáwarami níima, ayénachó mapurigá aboni wabé ku'wíratami níima, ne si'néami echi auché jaré yuwa mapu ikí Riosi ma galabérali, mapujiti aboni ma galá tamí bichíili.

Echi Pablo galá nijéwaga olali mapurigá Riosi nuleli

¹⁹ Echirigá mujé walubela silíami Agripa riwéami, nijeni ne galá nijéwaga olali mapurigá echi Walubela Jesucristo tamí riwírali echo'ná ripá riwigachi jonsa.

²⁰ Mapujítini ne bachá niráa galá nawésali echo'ná Ramáskochi piréami, jeanigá mapurigá aboni bukulíwami, si'nú niráa, galabé 'natama, ayénachó mapurigá aboni ku ro'wima Riosi yuwa. Ayénachóni aneli mapu ne galabé ologá pirélama, mapurigá echi auché jaré pagótami echijiti galá machimea mapu aboni ma galá bichíiga ku ro'wili Riosi yuwa. A'lí pe waminánomí nijeni ayénachó echirigá nawésali

echo'ná Jerusalémachi piréami, ne suníami echo'ná Juréachi anilíwachi kawírali piréami ayénachó, echi auché jaré isena pagótami ayénachó, si'néami mapu ikí ketasi Juríosi pagótami ju. ²¹A'lí mapujítini echirigá nawésali, echijiti echi jaré Juríosi pagótami echo'ná aboni ri'obáwalachi jonsa tamí chapisáa, tamí waminá mi'lináali. ²²Chopi Riosi tamí ku'wírali. Echijiti jipi yénasí nijeni abijí galá bichiúga olá, Riosi Ra'íchala nawésiya. Weni nawesa si'néami pagótami. Nijeni nawesa echi jaré kuchípala, ayénachóni nawesa echi jaré o'wéala. A'lí bicheni chopi nawésaga ruyée mapurigá osirúami ju echo'ná Riosi Ra'íchala oselíwalachi mapurigá echi walula Moisesi osali mapurigá ikimea riwéali, ayénachó mapurigá echi auché jaré Riosi jiti nawésami osali mapurigá ikimea riwéali. ²³Weni nawesa jeanigá mapu arigá 'wéralli níili mapurigá echi Walubela Jesucristo mi'lirúami níima. Ayénachóni nawesa jeanigá mapu arigá 'wéralli níili mapu ma mi'lisuwa Jesucristo, echalí Binói ne bachá ku owínama, mapalí echi auché jaré suwíami ketasi cho ku owínama riwéali. Ayénachóni nawesa jeanigá mapu Jesucristo ne bachá niráa nawesáma riwéali echi ne bichíwali Riosi Ra'íchala, tamujé Juríosi pagótami, ayénachó echi auché jaré isena pagótami.

Echi Pablo galá nawésali echi walula silíami Agripa riwéami

²⁴Echalí mapalí echi Pablo je'ná jerigá we ni'yúranaga ra'íchali, echalí echi Jesto ke sayiná o'weli ra'íchali jeanigá: ¡Mujé Pablo, ketasi newalite jumi! ¡Mami ke newalite níili, mapujítimi sinibí wabé 'nénali oselí! ²⁵Chopi echi Pablo ku nijéwaga jeaneli: Nijeni ketasi echiyiri ke newalite ju, mujé walula silíami Jesto riwéami. Si'winárigá mapu níje nimí ané, ne bichíwali ju. ²⁶Ayénachó jenaí atí echi walubela silíami Agripa riwéami, echi mapu galá machí je'ná jaré namuti. Echijiti nijeni tarapé majaga ra'icha bacháami echi binói yuwa, mapujiti nijeni galá machí mapu binói ayénachó ma galá machí suwaba je'ná namuti, mapujiti suwaba mapu ikí echi Walubela Jesucristo olali, Binói echirigá ne machiná niráa olali, mapurigá si'néami pagótami galá machimea. ²⁷Mujé walula silíami Agripa riwéami, ¿acha mi bichíi mapurigá echi jaré Riosi jiti nawésami anili, mapurigá osirúami ju echo'ná Riosi Ra'íchala oselíwalachi? Nijeni galá machí mápumi galá bichíi. ²⁸Echalí echi Agripa ku nijéwaga jeaneli: Mujemi mayé mápumi pe nawésaga tamí bichírama mapurigá níje binói ayénachó bichiúma Jesucristo niráa. ²⁹A'lí echi Pablo jeaneli: Ne wabé galá níima mapurigami galá bichiúma ani péebi mi nawésasagá, ayénachó galá níima mapurigami bichiúma ani wi'llibé niráa mi nawésasagá. Nijeni nakí mapurigá ne si'néami 'yemi mapu tamí kipú jipi rawé achigóngá bichiúyami níima mapurigá nijeni bichiú. Chópini ketasi nakí máputamo bulérami níibo mapurigá nijeni bulérami ju je'ná jiero wiya jiti.

³⁰A'lí mapalí echi Pablo ma je'ná jerigá anili, echalí echi walula silíami Agripa riwéami ma ku wilísali, echi walula silíami Jesto riwéami ayénachó, echi Berenise ayénachóni, ne si'néami echi auché jaré o'wéala echo'ná muchúami asíchiko. ³¹Echalí si'néami aboni pe waná simíbaga, a'nagupi ra'íchaga jeanili: Je'ná rijói tarapebi yiri chati olali. Echijiti ketasi 'wéralli ju mapurigá binói waminá mi'lirúami níima, nirapé mapurigá binói pachá bachárami níima. ³²Echalí echi Agripa jeaneli echi Jesto: Chabénala galá níili máputamo ku botonasa je'ná rijói, a binói ketasi tásagá mapurigá echi ne walubela silíami echo'ná Rómachi bitéami justicia olíima.

Echi Pablo julárami níili echo'ná Rómachi

27 Echalí echi jaré o'wéala nulali julánala echi Pablo echo'ná Rómachi anilíwachi, echo'ná Itáliachi anilíwachi kawírali. A'lí nijé ayénachó simili. Echalí bilé walula Kapitani, Julio riwéami, chapisáa toli echi Pablo, echi auché jaré bulírawami yuwa. A'lí echi Julio bilé níili echi auché jaré wikabé kapitani yuwa, echi ne walula silíami, Augusto riwéami kapitánawala. ²A'lí bicheta echirigá ku simíbali, echo'ná pachá biléana bárkochi muchiga, mapu echo'ná biléana walubé ba'wírali suwé, Aramítiochi anilíwachi jonsa simíami níili. Echalí echi barko ma ku simea riwéali, echo'ná jaréana suwé simíraga, echo'ná Ásiachi anilíwachi kawírali. A'lí echi Aristarko riwéami rijói, echo'ná Tesalónachi anilíwachi bitéami, ayénachó simili, tamujé tamí yuwa. A'lí echo'ná Tesalónachi anilíwachi biléana walúlachi ju, echo'ná Maseróniachi anilíwachi kawírali nirúami. ³Ba'alínala rawé tamujeta sébali echo'ná Sirónachi anilíwachi suwé. Echalí echi walula kapitani, Julio riwéami, ne galá natimali echi Pablo. Echijiti risénsia 'yali mapurigá echi Pablo 'némiya simea echi jaré binói amígowala, echo'ná piréami, mapurigá binói galá kóorami níima. ⁴A'lí mapalita ku simíbali echo'ná Sirónachi jonsa, echalí ne wabé iwéami ikáli, echi barko ku kuwana rakibuya. Echijítita watoná niráa simárali echo'ná Chíprechi anilíwachi kawírali, echo'ná nasipa walubé ba'wírali nirúami, mapujiti echo'ná watoná ketasi 'me ikáli. ⁵A'lí echo'ná walubé ba'wichí moba simíbaga, tamujeta simárali echo'ná bacháami mapo'ná Silísiasihi anilíwachi kawírali ju, echo'ná Pampíliachi anilíwachi ayénachó. Echalita sili echo'ná Mírachi anilíwachi walúlachi, echo'ná Lísiachi anilíwachi kawírali. ⁶Echo'ná echi walula kapitani riwali auché bilé barko echo'ná Alejantríachi jonsa simíami, echi mapu echo'ná Itáliachi anilíwachi kawírali simea riwéali. A'lí binói tamujé tamí muchúwali echo'ná pachá mapurigata waminabi simabo echo'ná Rómachi simiba.

⁷A'lí peta wi'llibé chi'leli echo'ná bárkochi kilí 'yena, mapujiti echi wabé iwéami iká ku kuwana rakibuli. A'lí bicheta perikó sébali echo'ná Nírochi anilíwachi. A'lí mapujiti echi we iwéami iká abijí we kuwana ikáli, echijítita bacháami simárali echo'ná Salomónachi anilíwachi, mapurigata mulubé simárabó echo'ná Krétachi anilíwachi kawírali echo'ná nasipa walubé ba'wírali nirúami. ⁸A'lí bicheta wabé nójchali ologá, mulubé suwé simárali mapuyénasíta sébali biléana nasipa uchírachi suwé mapo'ná Galabé Uchírachi anélati. A'lí echo'ná mulubé níili biléana walúlachi Laséachi anilíwachi.

⁹Peta wi'llí waminá 'yénali. A'lí ma ketasi galá níili mapurigata waminabi 'yénabó echo'ná bárkochi muchiga, mapujiti ma ne mulubé romosama riwéali mapalí sinibí wabé iwéami ikamea. Echijiti echi Pablo galá ruyeli aboni, ¹⁰jeanigá: 'Yemi pagótami, nijeni mayé máputa nosobúrami níibo, ayénata waminabi jenaí bárkochi 'yénasagá. Siné káachi je'ná barko waminá nosobúrami níimíré. A'lí suwaba namuti uchérachi waminá botuwisa wikámíré Ayénachó tamujé aboni siné káachi waminá suwibábiré. ¹¹Chopi echi walula kapitani waminabi galá nijéwali mapurigá echi barko simíriami anili, ayénachó mapurigá echi barko níwami anili, chopi binói ketasi nijéwali mapurigá echi Pablo anili. ¹²A'lí ketasi galá níili mapurigata echo'ná tibibo echalí romó, echijiti ne noguí si'néami mayeli mapu galá níima waminá simasa echo'ná jonsa, echo'ná Jenísiasihi anilíwachi simiba, echo'ná Krétachi anilíwachi kawírali, galá omérasagá echo'ná seba. Si'néamita nakili mapurigata

echo'ná Jenísiachi muchibo echalí romó mapujiti echo'ná suwé we galabéalachí níili mapujiti echo'ná ketasi 'me iwéami ikáli.

Ne wabé iwéami ikáli echo'ná moba walubé ba'wírali

¹³Echalí chótali mikabé 'naka jonsa pe kilí niráa ikagá. Echijiti aboni mayeli mapu ma galá níili mapurigata waminabi simabo. Echalita ku simíbali, mulubé suwé simáraga echo'ná walubé kawírali Krétachi anilfwachi. ¹⁴Chopi pe wilibeko ne wabé iwéami ikáli, echi barko ku kuwana rakibuka. Echalí mikabé 'nalika panina jonsa ne wabé iwéami ikáli. ¹⁵A'lí ku kuwana rakibúrami níili echi barko. Echalita arigá ketasi omérali bacháami simiba, mapujiti echi wabé iwéami iká wabé kuwana ku nitápali. Echijítita ariweli mapurigá echi iká chopi jiti chuwé torúami níima echi barko. ¹⁶A'lí bicheta echo'ná kolí kuwana simárali biléana uchíi kawírali echo'ná nasipa walú ba'wírali nirúami mapo'ná Kláurachi anilfwachi níili. Echo'ná ketasi 'me iwéami ikáli. Echijítita ne wabé nójiali ologá omérali echo'ná ripá walubé bárkochi paya echi auché bilé ták barko mapu jubáami banagá inárali echi walubé barko. ¹⁷A'lí ma ripá moba echo'ná walubé bárkochi pasa echi auché bilé ták barko, echalí aboni o'weli wiya jiti, ri'lé pacháami siméraga, iwébanaga nasipa buleli echi walú barko mapurigá ketasi waminá nosowima. Echalí aboni we majali mapurigá echi barko echo'ná satérali torúami níima, mapo'ná Sírtachi anilfwachi ju. Echijiti aboni ma ku ko'ná pali echi walubé chiní mapu ripá ra'laka chukuli mapurigá echi barko waminá rakibúrami níima echi iká jiti. Aboni echirigá olali mapurigá echi barko ma ketasi 'me rakibúrami níima echi iká jiti. Echalí jonsa echi barko chopi chuwé torúami níili echi iká jiti. ¹⁸Ba'alínala rawé abijí ne wabé chati iwéami ikáli. Echijítita chótali ri'lé ba'wichí a'waya echi wikabé namuti muruka echo'ná bárkochi nirúami, mapurigá ketasi 'me bitéami níima echi barko. ¹⁹A'lí waniwínala rawé ayénachóta chapigá waminá a'wali echo'ná ba'wírali ne suwaba echi auché jaré namuti mapu echo'ná bárkochi nirúali, suwaba mapu ikí echi barko newaleli. ²⁰Echalí ne wikabé rawé jonsa ketasi riwirúami níili echi rayénali, nibilé cho echi sopolí. A'lí abijí waminabi wabé chati iwéami ikáli, echijiti tamujé ma ketasi mayeli máputa ku ku'wíratami níibo riwéali.

²¹Chopi mapujítita ma wikabé rawé jonsa tarapé namuti ko'wali, echalí echi Pablo, echo'ná aboni yuwa nasipa wiligá jeaneli: Pagótami, galá níimili 'yémitamo galá tamí nijéwasagá, mapalini 'yemi mi aneli máputamo ketasi simabo echo'ná Krétachi jonsa, mapurigata ketasi je'ná jerigá risúu olárami níibi, ayénachó mapurigá je'ná barko ketasi waminá nosobúrami níimi. ²²Chopi jipi ketasi siwesi, mapujiti ke wesi 'yemi suwiboa, chopi je'ná barko ne bichíwali waminá nosobúrami níima. ²³Mapujiti bi'yá rokogó ke sayiná tamí yuwa wilíbali bilé walubela Riosi kapitánawala, mapujiti nijeni echi Walubela Riosi níwala ju, ayénachóni galá bichífiga olá mapurigá Binói tamí nulé. ²⁴Echalí echi walubela Riosi kapitánawala tamí jeaneli: Ketasi majá, mujé Pablo, mapujiti arigá 'wérali ju mapu mujemi nawama echo'ná bacháami echi ne walubela silíami yuwa, echo'ná Rómachi bitéami. A'lí Riosi ku'wírama ne si'néami echi auché jaré mujé yuwa simíbami, echo'ná bárkochi muchúami, mapurigá ke wesi aboni waminá suwimea. A'lí Riosi chopi echirigá olama mapujiti mujé binói Riosi níwala ju. ²⁵A'lí echi Pablo waminabi jeanili: Echijiti 'yemi pagótami, ne galá ku kanílasi, mapujiti nijeni galá bichíi Riosi; ayénachó bichíwali mayeni mapu echirigá ikimea, achigórigá mapurigá echi walubela Riosi kapitánawala tamí aneli.

²⁶Chópita arigá waminá a'wátami níibo echo'ná biléana kawírali jena'í nasipa walubé ba'wírali nirúami.

²⁷A'lí mapalita ma echirigá 'yénali okuá tarali yénasí, echalí siné rokogó echi barko iyénali echo'ná moba walubé ba'wírali mapo'ná Átriachi anilíwachi níili. Echalí echi barko abijí chuwé torúami níili echi wabé iwéami iká jiti; chopi ne nasipa rokogó niráa, echi jaré barko simíriami mayeli máputa ma mulubé sírali echo'ná biléana wi'yéráli suwé. ²⁸Echalí echo'ná bárkochi nóchami bilé namutí ri'lena ba'wichí pasa, galá téitali mapu chu 'yena rokóami níili echi ba'wí. Echalí aboni riwali mapurigá báisá makói miná usani metro sébali ri'lena ba'wichí. A'lí pe waminá bacháami simíbaga aboni auchecho téitali echo'ná ri'lena ba'wichí. Echalí aboni riwali mapu chopi osá makói miná kichao metro níili. ²⁹Echalí wabé majaga mapu echo'ná biléana ritérali wichibama riwéali echi walú barko, echijiti echi jaré bárkochi nóchami echo'ná jubáami bárkochi jonsa, jiero wiya jiti bulesa echo'ná ri'lena ba'wírali a'wali naó jiero wabé bitéami mapurigá echi barko ketasi simea waminá bacháami. A'lí aboni chopi wabé majaga 'nátaga buweli mapurigá we yáa rawé nílama. ³⁰A'lí echi jaré bárkochi nóchami nakili mapurigá aboni we yáati waminá ariwema echi barko. Echijiti aboni auchecho siné chótali ri'lé ba'wichí paya echi auché bilé taa barko. Echalí aboni olali mapurigá auché jaré jiero wíiga a'wápiya echo'ná bacháami, chopi aboni arigá nakili echo'ná taa bárkochi waminá suwé simánala. ³¹Chopi echi Pablo galá machili mapurigá aboni oláni, echijiti binói ruyeli echi walula kapitani, echi jaré sontarsi ayénachó, jeanegá: A je'ná jaré bárkochi nóchami ketasi ripásagá jena'í pachá bárkochi, mapurigá aboni tamujé tamí ku'wírama, echalí ne si'néamita waminá suwibábiré. ³²Echalí echi jaré sontarsi waminá ripúnali echi taa barko wíila. Echalí echi taa barko echo'ná ripá jonsa ri'lé ba'wichí wichigá, suwaba nosowili.

³³A'lí mapalí ma chi'lásali, echalí echi Pablo aneli ne si'néami echo'ná bárkochi muchúami mapu galá níima peé kúuchi kosá. Echalí binói jeaneli: Ma okuá tarali yénasí ju mapalí jonsa 'yémitamo tarapé kochili, nirapé chótamo ko'wali. ³⁴Echijiti 'yemi nimí ané máputamo peé kúuchi kopoá, mapurigátamo galá ku jiwrábo, mapujiti átamo ke jiwrárasagá, jaré 'yemi waminá suwibóaré, chopi nijeni mayé mapu ke wesi 'yemi waminá suwiboa, nirapétamo péebi chi'wanárami níbo. ³⁵A'lí ma jerigá anisáa, echi Pablo chapigá bilé walú pani, natétara 'yali Riosi, echo'ná bacháami si'néami aboni yuwa. A'lí ma kúuchi rojonasa echi pani, echi Pablo chótali ko'yá. ³⁶Echalí si'néami echi auché jaré ayénachó we kaníliga ko'wali. ³⁷A'lí bicheta si'néami pagótami echo'ná bárkochi muchúami okuá kiento miná kicháosa makói, miná usani níili. ³⁸Echalí ma bachá posasa, tamujeta ke 'me bitéami niráa niwáli echi barko, mapujítita echo'ná ba'wichí a'wali mapu ikí tibili echi turío.

Echi barko waminá botuwili

³⁹A'lí mapalí ma galá chi'lali, echalí echi jaré bárkochi nóchami ketasi machili echo'ná kawírali, mapu chu anilíwachi níili; chopi aboni echo'ná riwali biléana suwé nasipa, mapo'ná galabéalachí níili, mapujiti we satérali níili echo'ná suwé. Echalí aboni nakili echo'ná suwé uchábanala echi barko, a galá omérasagá. ⁴⁰A'lí echi jaré wabé bitéami jiero bulirúami suwaba ripúnaga, echo'ná ri'lé ba'wírali ariweli. Ayénachó aboni ku botánali echi jaré namutí mapu echijiti aboni peé ku ro'wínaga simírali echi barko. A'lí echi walubé mapuyiri chiní niwárami, aboni

ku ripá ochogá ra'lánali mapurigá echí barko waminá bacháami rakibúrami níima echí we iwéami iká jiti. Echalí echí barko echo'ná kawírali suwé mulubé suwénsali. ⁴¹ Chopi echí barko waminá wichíbali echo'ná biléana suwé mapo'ná okoná napawika wabé jiwériga simili echí walubé ba'wí. Echalí echí walú barko abijí we iwéami chukuli echo'ná satérali mapujiti echo'ná bacháami echí barko cho'olá tótaga chukuli echo'ná satérali mapuyénasí ma ketasi nokuali; chopi echo'ná jubá okuá echí barko ma suwaba nosubúrami níili mapujiti echí walubé ba'wí ne wabé jiwéami apulaka wichíbali.

⁴² Echalí echí jaré sontarsi nakili waminá ko'wináliya si'néami echí jaré echo'ná bárkochi muchúami mapu ikí bulírawami níili, mapurigá ke wesi aboni waminá júmsama, echo'ná ba'wichí akeka simáraga. ⁴³ Chopi aboni kapitánawala ketasi risénsia 'yali, mapujiti binói ketasi nakili mapurigá echí Pablo waminá mi'lirúami níima. Chopi echí kapitani nulali mapu yíripi machiko akeka iyena bachá akeka simama echo'ná suwé. ⁴⁴ Ayénachó nulali mapurigá echí auché jaré mapu ke machiko akeka 'yena, arigá ripá moba jaréana táblachi uchuka simama, ripá moba auché jaréana karúmatachi uchuka keremá, suwaba namuti mapu ikí echo'ná bárkochi mojuali. A'lí echirigá ologá ne si'néami galá sébali echo'ná wilyérali suwé.

**Pablo nawali echo'ná biléana uchíi kawírali echo'ná nasipa
walubé ba'wírali nirúami, Máltachi anilíwachi**

28 A'lí mapalí si'néami mata galá akami sébali echo'ná suwé wi'yérali, echalita machili mapu echo'ná kawírali piréami tamujé tamí ne wabé galá kaligá natimali. Echalí aboni walú na'ali mapujiti ne wabé ruláami romówali. A'lí tamujé tamí bayeli mapurigá si'néamita galá sokuálabo. ³ Echalí echí Pablo wikabé chaliwá napabura atíami chapisáa, echo'ná na'írali achali; chopi bilé sinowi chaliwátali ratálaga machínali. Echalí echí sinowi echo'ná Pablo sikálachi uchuka wijáa chukuli. ⁴ Echalí echí jaré pagótami echo'ná piréami ma riwisáa echí sinowi echirigá wijáa chukúami echo'ná Pablo sikálachi, echalí aboni a'nagupi jeanili: Je'ná rijói wabé nikówami níliré. Échiko ketasi mukuli echo'ná walú ba'wírali, chopi Riosi ketasi ariwema mapurigá waminabi bitélama, mapujiti we yáati mukuméaré. ⁵ Chopi echí Pablo echo'ná na'írali asáwaga pali echí sinowi. A'lí binói tarapé chibi ikili. ⁶ Echalí si'néami echí jaré pagótami echo'ná jáwami chopi buwelí mapurigá echí Pablo we yáati walú bajínama; ayénachó aboni mayeli mapu binói ke sayiná mukuméaré. A'lí pe wi'libé niráa buwigá, aboni riwali mapu tarapé chibi ikili. Echalí aboni si'winárigá 'nátaga jeanili: ¡Bilé riosi ju!

⁷ Echo'ná mulipi bitéali echí walula silíami echo'ná kawírali nuláami, echí mapu Públito riwéali. Échiko tamujé tamí galá natimaka nareli echo'ná binói bitélachi, ayénachó tamujé tamí galá kóoli bikiyá rawé yénasí. ⁸ Echalí rawé echí Públito onolá wabé ratáliami nayú bu'wili, ayénachó ne wabé witabúuga nayuli. Echalí echí Pablo 'némiya simili. A'lí ma Riosi yuwa ra'ichasa, moba nochogá, galá ku sa'wali. ⁹ A'lí mapalí Pablo je'ná jerigá olali, echalí echí auché jaré nayúkami echo'ná uchíi kawírali piréami ayénachó echo'ná sisáa, galá ku sa'wárami níili. ¹⁰ A'lí echo'ná piréami tamujé tamí ne wabé natimaka o'wikeli. A'lí mapalita ku simíbali echo'ná jonsa, echalí aboni tamujé tamí wikabé karúmati namuti kóoli, suwaba mapu ikí tamujé newaleli mapurigata kaníliga ku simabo.

Pablo nawali echo'ná Rómachi anilíwachi

¹¹ A'lí ma wi'llibé, bikiyá michá muchisa echo'ná uchíi kawírali, echalita ma simíbali echo'ná pachá auché biléana bárkochi muchiga. A'lí echi auché bilé si'nú barko echo'ná chukuli sinibí echalí romó. Echi barko echo'ná Alejantríachi jonsa simíami níili. A'lí echi barko 'Marachi riwéami níili. ¹² Echalí jonsa tamujé sili echo'ná biléana galabé suwé mapo'ná Sirakúsachi anilíwachi walúlachi níili. Echo'nata tibili bikiyá rawé. ¹³ Echo'ná jonsa tamujeta mulubé suwé simáraga sili echo'ná Réjiochi anilíwachi. A'lí ba'alínalá rawé mikabé okuá 'naka ikáli. Echalí jonsa okuá ch'iligá, tamujeta sili echo'ná auché biléana suwé Puteólichi anilíwachi. Echo'nata ariweli echi barko mapurigata wichi jaga simabo. ¹⁴ Echo'ná Puteólichi tamujeta riwali jaré ritémktami galá bichíiyami. Aboni tamujé tamí aneli máputa echo'ná aboni yuwa tibibo pe bilé tarali. A'lí pe kinana tamujeta simíbali echo'ná Rómachi simiba. ¹⁵ Echalí echi jaré ritémktami bichíiyami echo'ná Rómachi piréami ma galá machili mapu tamujeta echo'ná buwichí sírali. Echijiti aboni simíbali tamujé tamí natipásiya echo'ná buwichí. Jaré aboni sili echo'ná Ápiochi anilíwachi yénasí. A'lí auché jaré sili echo'ná Bikiyá Tabérnachi anilíwachi yénasí. A'lí mapalí Pablo riwali echi jaré ritémktami, echalí binói walú natétara 'yalí Riosi. Ayénachó binói galá ku kaníli. ¹⁶ A'lí mapalita sili echo'ná Rómachi, echalí echi walula kapitani ma nijili echi jaré bulirúami mapurigá echo'ná atíami walula sontarsi pachá mo'wama. Chopi echi Pablo risénsia 'yárami níili mapurigá binói waná bitélama bilé sontarsi yuwa, echi mapu arigá tibuli bulirúami niráa.

Pablo galá nawesa echo'ná Rómachi

¹⁷ Pe wakinana bikiyá chi'lígá mapalí jonsa echi Pablo nawali echo'ná Rómachi, echalí binói júuli bayénala si'néami echi jaré o'wéala Juríosi pagótami echo'ná Rómachi piréami. A'lí mapalí aboni napawili echo'ná mapo'ná Pablo bitéali, echalí binói nawésaga jeaneli: 'Yemi Juríosi pagótami, nijé tarapeni sayérali echi jaré Juríosi pagótami echo'ná Jerusalémachi piréami. Nirapeni sayérali mapurigá olali echi jaré ki'yá piréami tamujé Juríosi pagótamawala. Chópini arigá waminá nijírami níili echi jaré Romano anilíwami pagótami yuwa mapurigá bulírawami niráa. ¹⁸ Chopi mapalí aboni galá tamí rukueli, echalí aboni nakili tamí ku botonánala mapujiti aboni riwali mapurigani tarapé chati oláami níili; ayénachó aboni anili mapurigani echijiti ketasi mi'lirúami níima. ¹⁹ Chopi echi jaré Juríosi pagótami echo'ná piréami arigá ketasi nakili mapurigá nijeni echirigá ku botonárami níima. Echijiti arigá 'wéralli níili mapu nijeni tánama mapurigá echi ne walubela silíami jena'í Rómachi bitéami tamí justicia olíima, chópini ketasi nakili mapurigani wi'nijima echi auché jaré nijé pagótamawala. ²⁰ Echijiti nijeni 'yemi mi bayeli mapurigani 'yemi mi 'nesa, yuwa ra'icháma, mapujiti nijeni ayénachó buwé echalí rawé sébachí mapalí echi jaré suwíami ku o'wínama, achigórigá mapurigá 'yemi Isaeli pagótami ayénachó buwé. Echijiti nijeni jipi bulérami ju je'ná jiero wiya jiti. ²¹ Echalí aboni jeaneli: Ke wesi echo'ná Juréachi anilíwachi piréami tamujé tamí oseli mujé jiti rugá. Nibilé wesi echi auché jaré Juríosi pagótami echo'ná Juréachi jonsa síami tamujé tamí ruyeli jeanigá mapu mujemi chati oláami ju. ²² Tamujeta nakí mapurigami tamujé tamí ruyema mapu ikí mujemi 'nata, mapujítita machí mapu suníami piréami pagótami we sayéraga ra'icha je'ná bukulíwami bichíluwami sayéraga.

²³ A'lí siné rawé téitali mapu echalí aboni napawima. Echalí rawé sébachi wikabé echi jaré Juríosi pagótami napawili echo'ná mapo'ná echi Pablo bitébagá asali. Echalí rawé bi'yá jonsa, pe alíwachi yénasí echi Pablo nawésali aboni jeanigá mapurigá Riosi ne galá nulema jena'í wichimóbachi piréami pagótami. Echalí echi Pablo we nakili bichííranala aboni suwaba namuti mapu Jesusi jiti rugá osirúami ju echo'ná Riosi Ra'íchala oselíwalachi mapo'ná osali echi Moisesi, ayénachó mapo'ná osali echi auché jaré Riosi jiti nawésami. ²⁴ Jaré aboni galá bichíili mapurigá echi Pablo nawésaga binérali, chopi auché jaré ketasi bichíili. ²⁵ Echalí mapalí aboni ketasi a'nawí chópirigá 'nártali, jaré ibili chótali ku simásiya. Echalí echi Pablo jeaneli: Echo'ná echi walula Riosi jiti nawésami Isaíasi riwéami oselíwalachi osirúami ju mapurigá echi Wabé Galabé Riosi Iwigala chabénala niráa galá aneli echi binói Isaíasi. Mapujiti echi Wabé Galabé Riosi Iwigala jeaneli mapurigá binói Isaíasi ruyema echi auché jaré ki'yá piréami tamujé Juríosi pagótawala, jeanigá:

²⁶ Ku simigá mujé, galá ané je'ná pagótami jeanigá: 'Yémitamo sinibí galá námabo, chopi ketásitamo galá machiboa máputamo nami.

Ayénachó 'yémitamo sinibí galá 'nebo, chopi arígá ketasi galá riwibóatamo.

²⁷ Mapujiti 'yemi sulálachi ma wabé biwacheli. Ayénachó 'yémitamo ketasi galá nami.

Ayénachó 'yémitamo ma kupili 'yemi busila mapurigátamo ma ketasi riwiboa 'yemi busila jiti,

ayénachó mapurigátamo ma ketasi námabo 'yemi nakala jiti.

Ayénachó 'yemi ketasi galá machí sulachí niráa, nirapétamo ku ro'wí Riosi yuwa mapurigá Binói 'yemi mi ku sa'wama.

²⁸ Echalí Pablo binói jeaneli: Galá machisí 'yemi Juríosi pagótami mapu jipi jonsa Riosi tamí julama nawesánala echi auché jaré isena pagótami, je'ná Galabé Riosi Ra'íchala, mapurigá aboni galá ku'wíratami níima. Echalí echi jaré isena pagótami ne galá nijewaga námama.

²⁹ Chopi mapalí echi Pablo je'ná jerigá aneli echalí echi jaré Juríosi pagótami wabé a'nagupi ra'íchaga ku simíbali.

³⁰ A'lí echi Pablo echo'ná tibili ne okuá bamíbali yénasí, echo'ná mapo'ná binói taga biteka asali. Echalí binói galá nareli si'néami mapu ikí binói 'nébiya sísalí.

³¹ Ayénachó echi Pablo ne galá bichíiga nawésali Riosi Ra'íchala, jeanigá mapurigá Riosi galá nulema jena'í wichimóbachi piréami pagótami, ayénachó binói binérali echi Walubela Jesucristo jiti rugá. Echalí ke wesi aneli mapurigá echi Pablo ketasi echirigá nawisama Riosi Ra'íchala.

Osirúami
mapurigá San Pablo oseli echo'ná
RÓMACHI PIRÉAMI

Echi Pablo osé echo'ná Rómachi piréami napawika bichíyami

1 Nijé, Pablo, 'yemi mi osé mápuni Jesucristo piónawala niráa ju. Echi Walubela Riosi tamí chapili, mapurigá Binói tamí julama nawisánala je'ná We Galabé Riosi Ra'íchala.

²Chabé ki'yá jonsa Riosi ne bichíwaga anili mapu nijímorúli Binói Galabé Ra'íchala, mapujiti echí jaré o'wéala Riosi jiti nawésami echirigá osali echo'ná Riosi Ra'íchala oselíwalachi. ³A'lí je'ná we Galabé Riosi Ra'íchala echí bilepi Riosi Ranala jiti rugá aní, echí mapu tamujé Walubélawala Jesucristo ju. A'lí mapurigá rijói niráa, echí Walubela Jesucristo bilé níili echí walula Rabiri riwéami rijói kúchala kúchawala, wabé kinánomí kúcharatami. ⁴Chopi echí Wabé Galabé Riosi Iwigala 'néráli mapu Jesucristo níili echí bilepi wabé omérámi Riosi Ranala, mapujiti Jesucristo auchecho ku owínali mapalí Binói ma mukúami níili. ⁵A'lí Jesucristo tamujé tamí ne wabé kaleli. A'lí Binói tamujé tamí nawésanalaga júuli, mapurigata nawésabo Jesucristo Ra'íchala, mapurigá Jesucristo waminabi walubélaga anérámi níima, ayénachó mapurigá echí jaré pagótami ne buchuwiana jena'í wichimóbachi piréami galá bichiíga waminabi walubélaga anema Binói Jesucristo niráa. ⁶A'lí 'yemi ayénachótamo ma galá bichiíli echí auché jaré aboni yuwa, mapujiti Riosi ayénachó 'yemi mi bayeli mapurigátamo Jesucristo níwala níibo.

⁷Nijé 'yemi nimí osé si'néami máputamo echo'ná Rómachi anilíwachi piré. 'Yémitamo ne wabé galérami ju Riosi jiti, ayénachótamo bayérami níili mapurigátamo Riosi níwala pagótami níibo. Nijé, Pablo, nakí mapurigá Riosi, tamujé Onolá, ayénachó echí Walubela Jesucristo, 'yemi mi wabé galigá ku'wírama mapurigátamo ne galá kilí ologá pirélabo.

Echi Pablo nakí echo'ná Rómachi siminala

⁸Ne bachá niráa nijeni walú natétara 'ya echí keni Riósawa mapujítitamo ma galá bichíli Riosi. Ayénachó echí Walubela Jesucristo echirigá walú natétara 'ya, mapujiti ne suníami wichimóbachi piréami ma galá ruyérami ju mapurigá 'yémitamo echirigá galá bichíyami ju. ⁹A'lí nijeni galá o'wiké Riosi mapujítini galá bichií keni sulachí niráa. Echijítini we nawesa je'ná we Galabé Ra'íchali, Riosi Ranala jiti rugá. A'lí Riosi Binói galá machí mapurigani sinibí newalá 'yemi mi jiti, mapalini Riosi yuwa tániga ra'icha. ¹⁰A'lí bichéni sinibí we tani Riosi mapurigá nijé, siné káachi,

arigá omérama simigá 'neya 'yemi, a Binói echirigá nakisáagá.¹¹ Mapujiti nijé 'yemi nimí ne wabé 'nénali, mapurigani 'yemi mi binérama mapurigá echi Wabé Galabé Riosi Iwigala ayénachó tamí binérali, mapurigátamo echijiti waminabi galabé bichiyami níibo.¹² Echirigani nakí mapurigá tamujeta a'nagupi waminabi wabé kanílatabo, mapalini echo'ná 'yemi mi yuwa asimea, mapujítita ne galá bichíi ibílana, mapujiti nijeni galá bichíi Jesucristo niráa, ayénachó 'yémítamo achigórigá galá bichíi.

¹³ Kení ritémawa, nijeni nakí máputamo machiboa mapurigá nijeni wisabé echo'ná simináali 'yemi mi 'némiya. Chopi jipi yénasí nijeni ketasi cho omérali simiyá. Ne wabeni simináali mapurigani 'yemi mi nawésaga waminabi bichírama mapurigani nawésaga bichírali echi auché jaré isena pagótami mapu ketasi Juríosi pagótami ju.¹⁴ Arigá 'wéralli ju mapu nijeni nawésama echi jaré galá machíami pagótami, ayénachó 'wéralli ju mapu nijeni nawésama echi jaré galá pénamí pagótami, ayénachó 'wéralli ju mapu nijeni nawésama echi auché jaré ke binéami pagótami.¹⁵ Echirigá nijeni ma gáliga atí mapurigani ayénachó 'yemi mi nawésama echi Galabé Riosi Ra'íchala, 'yemi máputamo echo'ná Rómachi pilé.

Riosi wabé omérami ju ku wikáwiya si'néami mapu ikí bichíima je'ná Galabé Riosi Ra'íchala

¹⁶ A'lí nijeni ketasi riwela nawesa je'ná Galabé Riosi Ra'íchala, mapujiti Riosi ne wabé omérami ju ku wikáwiya ne si'néami pagótami mapu ikí bichíima Binói Ra'íchala. A'lí echi jaré Juríosi mapu bichíima ne bachá ku wikawárami níima, a'lí echi jaré isena pagótami mapu bichíima achigórigá ku wikawárami níima.¹⁷ Mapujiti je'ná Galabé Riosi Ra'íchala tamujé tamí ruye mapu Riosi tamujé tamí ku wikawa mapalita chopi galá bichíi, mapurigá echo'ná Riosi Ra'íchala oselíwalachi je'ná jerigá osirúami ju:

Echi jaré mapu Riosi ku wikawa mapujiti aboni ma galá bichíi, abóniko galá bichíiga pirélama.

Jena'í wichimóbachi piréami pagótami ne wabé chati oláami ju

¹⁸ A'lí galata machí mapu echi Walubela Riosi, ripá riwigachi atíami, arigá julama Binói o'wéala kapitánawala walú kastigo 'yánala ne si'néami pagótami mapu ikí ketasi galá bichiyami ju Binói Riosi, ayénachó ne si'néami mapu ikí chati oláami ju. Echi jaré aboni ketasi ariwé mapurigá echi auché jaré pagótami galá machimea echi ne bichíwali Riosi Ra'íchala, mapujiti aboni chopi wabé chati oláami ju.

¹⁹ A'lí echi jaré pagótami ma galá machí suwaba máputa omero machiyá, Riosi jiti machiwáwami, mapujiti Riosi Binói ma galá machírali aboni ne suwaba.²⁰ A'lí ke wesi pagótami galá ritiwá Riosi. Chopi ki'yá chokichí jonsa, mapuyénasí Riosi gayénali je'ná wichimoba, echi pagótami galá omérali machiyá mapu ayena nirú bilé Walubela Riosi mapu sinibí wabé omérami ju, mapujiti si'néami pagótami galá riwali echi jaré namuti, suwaba mapu ikí Riosi Binói niwali. A'lí echi pagótami arigá ketasi bichíili Riosi, echijiti aboni we wi'nijílami ju.²¹ A'lí echi jaré pagótami ne galá machili mapu ayena nirú bilé Riosi. Chopi aboni ketasi waminabi walubélaga aneli Binói, mapurigá ne Walubela Riosi niráa. A'lí aboni ketasi natétala 'yali Riosi,

nirapé galabé 'náitali. Chopi sulachí niráa, aboni waminabi wabé chati olánali. ²² A'lí mapalí aboni ne wabé machíami niráa mayega ríchaka, a'lí aboni arigá tarapé newalite ju. ²³ A'lí aboni ketasi waminabi walubéraga ané echi Walubela sinibí bitéami Riosi, mapurigá ne Walubela Riosi niráa. Aboni chopi walubéraga ané echi jaré amachíkalawami namuti mapu niwárami ju mapuyiri suwíami pagótami niráa. Ayénachó jaré amachíkalawami namuti niwárami ju mapuyiri echi jaré o'weli namuti i'nika 'yénami niráa. Auché jaré amachíkalawami namuti niwálami ju mapuyiri sinowi niráa. A'lí auché jaré niwárami ju mapuyiri echi jaré naó ronéami namuti niráa.

²⁴ Echijiti Riosi waminá ariweli echi jaré pagótami mapurigá aboni ne wabé chati chuwé olama mapurigá aboni chopi nakili olánala. A'lí aboni echirigá ne wabé chati olali a'nagupi echi mapu wabé riwéalawami ju. ²⁵ A'lí aboni ketasi bichíili echi ne bichíwali Riosi Ra'íchala, chopi aboni bichíili echi wabé 'yékalawami. Echijiti aboni chopi amachili echi jaré namuti mapu Riosi niwali, chopi aboni ketasi ne bichíwali waminabi walubéraga aneli Riosi. A'lí chopi galá ju mapurigá Riosi Binói waminabi walubéraga anérámi níima ne sinibí niráa. ¡Echirigá níлага!

²⁶ Echijiti Riosi ariweli mapurigá aboni ne wabé chati sití riwélawami olama, mapuyénasí echi jaré mugúi a'nagupi siwinárigá chati ologá pireráma. ²⁷ A'lí echi jaré rijói achigórigá ariweli echi jaré mugúi napuya. A'lí aboni chopi wabé simírami nakili si'winárigá chati olánala auché jaré rijói yuwa. A'lí aboni arigá kastigo 'yárami ju echo'ná aboni sapálachi niráa, mapujiti aboni ne wabé chati si'winárigá olali. ²⁸ A'lí aboni ma ketasi nakí bichíinala mapu ayena nirú bilé Riosi. Echijiti Riosi ariweli mapurigá aboni ne wabé chati sití si'winárigá 'natama, ayénachó mapurigá aboni chopi ne wabé chati chuwé olama. ²⁹ A'lí aboni olá ne suwaba chati oluwáwami. A'lí aboni wisabé chuwé bilétari yuwa kochí. Ayénachó aboni si'winárigá ne wabé chati sití olá. A'lí aboni we koruka auché jaré níwala namuti. A'lí aboni sinibí ne sébali echirigá wabé chati olá. A'lí aboni ne wabé korúkami ju. Ayénachó aboni we ko'yá auché jaré pagótami. A'lí aboni wabé na'áwami ju. Ayénachó aboni ne wabé 'yékami ju. Aboni sinibí ne sébali wabé chati olá. Ayénachó aboni wabé 'yékaka chuwé ra'íchami ju. ³⁰ Ayénachó aboni ne wabé chati ra'icha echi auché jaré jiti rugá. A'lí aboni ne wabé kichí Riosi. A'lí aboni tarapé galá nijewa, chopi ne wabé nóchaka ra'íchami ju. A'lí aboni chopi 'nata muchuwi mapu churigá karúmati chati olama. A'lí aboni ketasi nijéwiyami ju aboni 'wénawala. ³¹ A'lí aboni tarapé machí echi ne bichíwali, nirapé bichíwaga ra'icha. A'lí aboni tarapé galéami ju, nirapé machíami ju ku wikáwiya auché jaré. A'lí aboni tarapé natimáami ju. ³² A'lí aboni galá machí mapurigá Riosi nulali. Ayénachó aboni machí mapu Riosi suwaba suwábama echi jaré mapu je'ná jerigá chati olako. Chopi aboni arigá waminabi achigórigá wabé chati olá. Ayénachó aboni ne wabé kanila mapalí auché jaré achigórigá chati olá.

Echi Walubela Riosi ne bichíwaga wi'nijí echi jaré pagótami

2 Echijiti 'yemi Juríosi pagótami arigá achigórigá chokila ju, átamo wi'nijísagá echi auché jaré mapurigá chati oláami niráa. ¿Chu chiré mapuyíripi 'yémítamo níisagá? Átamo wi'nijísagá echi auché jaré mapurigá chati oláami niráa, arigátamo a aboni niráa echirigá wi'nijí, mapujiti 'yemi máputamo wabé wi'nijí echi auché jaré, 'yemi aboni achigórigá chati olá mapurigá echi auché jaré chati olá. ² A'lí

bicheta galá machí mapu Riosi ne bichíwaga wi'nijí echí auché jaré je'ná jerigá chatí oláami.³ Yemi máputamo wabé wi'nijí echí auché jaré je'ná jerigá chatí oláami, chopí yémítamo achigórigá chatí olá mapurigá aboni olá, ¿kéchatamo machí mapu Riosi ayénachó walú kastigo 'yama 'yemi aboni, achigórigá mapurigá Binói walú kastigo 'yama echí auché jaré chatí oláami?⁴ ¿Áchatamo kichí Riosi mapujiti Binói sinibí ne wabé galabé ju, ayénachó mapujiti Binói sinibí ne wabé natimáami ju? ¿Kéchatamo machí mapu Riosi ne wabé galéami ju? Echijiti Riosi ketasi we yáati 'ya kastigo, chopí Binói kilí niráa buwé mapurigá echí chatí oláami pagótami tánama wikáwali.⁵ Yémítamo ne wabé biwárami suléami ju. A'lí bichétamo ketasi wikáwali tánali Riosi. Echijítitamo ne walubé kastigo 'yárami niibo echalí ne jubá wi'nijíwachi rawé. Echalí ne si'néami pagótami galá machínea mapurigá Riosi ne bichíwaga wi'nijima echí jaré chatí oláami pagótami.⁶ Mapujiti echalí rawé Riosi ne bichíwaga niráa wi'nijima si'néami pagótami. A'lí Riosi ibili niráa kastigo 'yama, achigórigá mapurigá ibili aboni chatí olá. ⁷A'lí Riosi galá 'yama mapurigá sinibí niráa pirélama si'néami echí jaré mapu waminabi olísako galabé olayá, ne si'néami echí jaré mapu ikí nakináliko mapu aboni muchima echo'ná ripá riwigachi, mapurigá Riosi wabé o'wélatama aboni, ayénachó mapurigá aboni sinibí niráa pirélama.⁸ Chopí Riosi ne wabé 'yoka, wabé kastigo 'yama si'néami echí jaré mapu ikí sayérako Binói Riosi, ne si'néami mapu ikí ketasi nijéwaga olánaliko echí ne Bichíwali, si'néami mapu ikí chopí nijéwaga olánaliko echí wabé chatí oluwáwami.⁹ A'lí ne si'néami echí jaré pagótami mapu ikí chatí olako ne wabé chatí risúu olárami níima. Ayénachó aboni ne wabé o'monáratami níima. A'lí echí jaré Juríosi pagótami mapu chatí olako ne bachá echirigá risúu olárami níima. A'lí echí auché jaré pagótami mapu ketasi Juríosi ju, si'néami mapu ikí chatí olako, ayénachó echirigá risúu olárami níima.¹⁰ Chopí si'winárigá, Riosi 'yama mapu echo'ná ripá riwigachi sinibí niráa pirélama si'néami echí jaré mapu galabé olako. A'lí Riosi ne wabé o'wélatama aboni. Ayénachó Riosi 'yama mapurigá aboni kilí ologá pirélama. A'lí echí jaré Juríosi pagótami mapu galabé olako, ne bachá echirigá 'yárami níima. A'lí echí auché jaré isena mapu ketasi Juríosi ju, si'néami mapu ikí galabé olako, ayénachó echirigá 'yárami níima.

¹¹ Mapujiti Riosi sinibí chopí a yiri nirá si'néami echí jaré mapu chatí olako. Ayénachó Binói sinibí chopí a yiri nirá si'néami echí auché jaré mapu galabé olako. ¹² A'lí si'néami echí jaré pagótami mapu ikí ketasi machíliko mapurigá Riosi nulari, echí jaré mapu arigá chatí oláliko, abóniko arigá echirigá waminá 'wigama. A'lí si'néami echí auché jaré pagótami mapu ikí ma galá machíliko mapurigá Riosi nulari, echí jaré mapu arigá chatí oláliko, abóniko arigá kastigo 'yárami níima mapujiti aboni ketasi nijéwami níili mapurigá Riosi nulari. ¹³ Mapujiti Riosi ketasi narema echí jaré pagótami mapu chopí nami mapurigá Binói nulá. Riosi chopí galá narema echí jaré mapu galá nijéwaga olako mapurigá Binói nulari. ¹⁴ A'lí echí jaré isena pagótami, si'néami mapu ikí ketasi Juríosi pagótami ju, abóniko ketasi nulérami níili mapurigá Riosi nuleli echí jaré Juríosi. Chopí mapalí aboni, sulachí niráa, arigá galabé olako mapurigá Riosi nuleli olánala echí jaré Juríosi, echalí aboni arigá nijéwami ju Riosi nulalila mapalí aboni arigá ketasi echirigá nulérami níili. ¹⁵ A'lí mapalí aboni echirigá galabé olá, echalí aboni galá machira mapu Riosi nularila osirúami niráa ju echo'ná pachana aboni sulálachi niráa, echijiti aboni galá nijéwaga olá mapurigá Riosi nakí. A'lí aboni galá machí mapalí aboni chatí

olá, echijiti aboni we o'mónami ju. A'lí aboni ayénachó galá machí maparí aboni galá olá, echijiti aboni galá kanílama,¹⁶ echalí ne jubá rawé mapalí Riosi nulema Jesucristo justicia olínala ne si'néami echi jaré pagótami jena'í wichimóbachí piréami. Echalí ayénachó Binói galá ku machírama ne suwaba mapu ikí echi jaré pagótami chiná niráa oláliko. Nijé Pablo, je'ná jerigá nawesa echi Galabé Riosi Ra'íchala.

Echi walula Moisesi we nuleli echi jaré Juríosi

¹⁷A'lí 'yémítamo aní máputamo we Juríosi pagótami ju, ayénachótamo mayé mapu Riosi 'yemi mi narema mapujítitamo galá nijéwaga olá mapurigá Moisesi 'yemi mi nuleli. Ayénachótamo ne wabé nóchaga nátami ju mapujítitamo Riosi níwala pagótami ju. ¹⁸A'lí bichétamo galá machí suwaba mapu Riosi nakí mapurigátamo olabo. Ayénachótamo ne galá nirá suwaba echi ne wabé galabéala, mapujítitamo galá binératami ju mapurigá echi Moisesi nulali olánala. ¹⁹A'lí bichétamo bichíwali niráa mayé máputamo galá machí echi auché jaré pagótami bayériya, si'néami mapu ikí ketasi galá machí Riosi buwilá. Ayénachótamo mayé máputamo galá machí binériya echi auché jaré pagótami mapu ketasi machí Riosi Ra'íchala, si'néami mapu ikí echijiti mapurigá ke 'machíliami niráa ju, echo'ná rokowárali niráa 'yénami. ²⁰A'lí 'yémítamo mayé máputamo galá omérami ju binériya echi auché jaré ke machífami pagótami. Ayénachótamo mayé máputamo omérami ju binériya echi jaré ke pénami pagótami. A'lí mapujítitamo ma galá machí Riosi nulalila osirúami, echijítitamo omero machiyá ne suwaba machiwáwami, ayénachótamo omero machiyá echi ne Bichíwali. ²¹A'lí 'yemi máputamo nakí binérana la echi auché jaré pagótami, ¿churékulátamo ketasi bilé namuti biné 'yemi aboni? 'Yémítamo we nawesa jeanigá mapu ketasi risénsia ju chigólawa, chopi 'yemi aboni arigá we chigó. ²²A'lí 'yémítamo we nawesa jeanigá mapu ketasi risensia ju chuillé bilétali yuwa kochiwawa, chopi 'yemi aboni arigá echirigá chuillé jarétari yuwa we kochí. A'lí bichétamo we kichí echi jaré amachíkarawami namuti, chopi 'yemi aboni arigá we chigó echo'ná jaréana amachíkalawami namuti ri'obáwalachi nirúami namuti. ²³A'lí 'yemi Juríosi pagótami ne wabé nóchaga natami ju mapujítitamo galá machí Riosi nulalila, chópitamo ketasi walubéraga ané Riosi, mapujítitamo ketasi galá nijéwaga olá mapurigá Riosi nulali. ²⁴Echo'ná Riosi Ra'íchala oselíwalachi je'ná jerigá osirúami ju: Echi auché jaré isena pagótami mapu ketasi Juríosi pagótami ju, aboni wabé chati ra'icha, Riosi riwalá sayériga, mapujiti aboni ritiwá mapurigá 'yemi Juríosi ketasi galá nijéwaga olá mapurigá 'yemi Riósawala 'yemi mi nuleli.

²⁵Ne bichíwali we galá ju mapurigá 'yemi Juríosi pagótami ma noligá sikirétami ju, átamo ne suwaba galá nijéwasagá mapurigá Riosi nulali. Chopi átamo ketasi suwaba galá nijéwasagá mapurigá Riosi nulali, a'lí bichétamo achigórigá oláami níibó mapurigá echi auché jaré isena pagótami mapu ketasi noligá sikirétami ju. ²⁶A'lí a echi auché jaré pagótami mapu ketasi cho noligá sikirétami ju ne suwaba galá wachínaga olásagá mapurigá Riosi nulali, echalí aboni ma machirúami níima mapurigá ma noligá sikirétami niráa, mapalí aboni arigá ketasi cho noligá sikirétami níisa. ²⁷A'lí echi auché jaré isena pagótami ketasi noligá sikirétami ju echo'ná aboni sapálachi niráa. Chopi a aboni galá nijéwaga olásagá mapurigá Riosi nulali, echalí aboni galá omérama wi'nijiya 'yemi Juríosi pagótami máputamo ketasi nijéwaga olá mapurigá Riosi 'yemi mi nuleli. Chopi 'yemi Juríosi pagótami arigá noligá

sikirétami ju, ayénachótamo niwa Riosi nulalila osirúami niráa. ²⁸A'lí echi jaré pagótami mapu ne bichíwali Juríosi anilíwami pagótami ju, abóniko ketasi echirigá ju chopi mapujiti aboni 'wénawala echirigá Juríosi anilíwami pagótami níli. A'lí echi jaré pagótami mapu ne bichíwali Riosi pagótamawala niráa ju, abóniko ketasi echirigá ju chopi mapujiti aboni noligá sikirétami níli echo'ná aboni sapálachi niráa. ²⁹Si'winárigá echi jaré pagótami mapu ne bichíwali Riosi pagótamawala ju, abóniko chopi echirigá ju mapujiti aboni ma galá bi'wíami ju echo'ná pachana aboni sulálachi niráa. Ayénachó echi jaré pagótami mapu ne bichíwali noligá sikirétami niráa ju, aboni chopi echirigá ju pachana aboni sulálachi niráa. Aboni galá bi'wíami ju echo'ná pachana aboni sulálachi niráa mapujiti aboni galá bichíili Riosi. Aboni ketasi echirigá bi'wíami ju mapujiti aboni we nijéwaga olá mapurigá oselichi osirúami ju jaré nulalíwami. Chopi aboni galá bi'wíami ju mapujiti echi Galabé Riosi Iwigala echirigá bi'wali. A'lí Riosi anema mapurigá echi pagótami ne galá oláami ju, chopi echi auché jaré pagótami siné káachi, ketasi anema mapu echiyiri pagótami galá oláami ju.

3 ¿Churigá biché waminabi wabé ku'wíratami níli echi jaré Juríosi pagótami? ¿Churigá biché ku'wíratami níli aboni, mapujiti aboni ma noligá sikirétami níli? ²Echi jaré Juríosi pagótami ne wabé ku'wíratami níli wikaná niráa. Ne bachá niráa aboni ku'wíratami níli mapujiti Riosi 'yali aboni Binói Ra'íchala tibúnala. ³A'lí jaré Juríosi pagótami arigá ketasi galá bichíili Riosi Ra'íchala. Echijiti, ¿acha 'yékami ju Riosi, chopi mapujiti jaré Juríosi pagótami ketasi bichíili Binói Ra'íchala? ⁴Tarapé chirigá ju. Si'winárigá Riosi ne bichíwami ju. A'lí Riosi ne suwaba olá mapurigá ne bichíwali nirátiré, arigá si'néami pagótami wabé ikaléami níisa. Echirigá ju achigórigá mapurigá echo'ná Riosi Ra'íchala oselíwalachi je'ná jerigá osirúami ju:

Mujé Riosi machirúami níima mapurigá ne wabé bichíwami niráa.

Ayénachó Mujé Riosi we ni'yúrama mapalí jaré pagótami mi wi'nijima.

⁵A'lí tamujé pagótami jena'í wichimóbachi piréami we chati oláami ju. A tamujé chopi waminábi machírasagá mapu Riosi ne galabé wachínaga oláami ju, ¿piri bicheta aniboa? ¿Acha chati olama Riosi mapalí Binói tamujé tamí kastigo 'yama? (Jípini chopi ra'icha mapurigá echi auché jaré pagótami sinibí ra'icha.) ⁶Riosi tarapé chirigá chati oláami ju, mapujiti a Riosi chati oláami níisagá, ¿Churigá biché omérama Riosi wi'nijiya echi jaré chati oláami pagótami jena'í wichimóbachi piréami?

⁷Jaré pagótami aní mapu nijé binói wabé 'yékami ju. A'lí a Riosi bichílawala abijí waminabi walubératami níisagá mapujiti nijé binói, siné káachi, chopi 'yékami ju, ¿churékula tamí wi'nijí Riosi mapurigá chati oláami niráa? ⁸Echi jaré pagótami aní mapu nijé binói jeaní: ¿Kéchata waminabi chati sití olabo, mapurigá echi ne wabé galabéala chopi nílama? Chopi nijéni ketasi echirigá aní. Echi auché jaré chopi tamí sayera mapalí aboni echirigá aní. We galá níima wi'nijflawa echiyiri ra'íchami pagótami.

Ne si'néami tamujé ma chati olali

⁹¿Churigá bicheko? ¿Acha tamujé Juríosi pagótami ne wabé simírami galabé ju, ketasi mapurigá echi auché jaré pagótami? Tarapeta chirigá ju, mapujiti mata wi'nijili ne si'néami tamujé Juríosi pagótami mapurigá chati oláami niráa,

achigórigá mapurigata wi'nijili si'néami echí auché jaré pagótami mapurigá chati oláami niráa. Ne si'néami pagótami we chati oláami ju, echijiti ne si'néami we wi'nijírami ju.¹⁰ Echo'ná Riosi Ra'íchala oselíwalachi je'ná jerigá osirúami ju:

Ke wesi nirú galabé wachínaga oláami pagótami. Nirapé pee bilé nirú.

¹¹ Ke wesi galá machí echí ne bichíwali. Ke wesi galá bichíinali Riosi.

¹² Ne si'néami pagótami waminá chakena simíbaga, ma ariweli Riosi. Ne si'néami pagótami ma chati olali. Ke wesi galabé olá. Nirapé bilé nirú galabé oláami.

¹³ A'lí aboni ne wabé 'yékaka ra'icha. Echijiti echo'ná aboni rinílachi ne wabé chati sití ju, mapuyiri biléana ch'u'wechi iráparami niráa.

A'lí echo'ná aboni rinílachi nirú echí ne wabé chati sití, mapuyiri echí wabé chati sinowi níwala veneno niráa.

¹⁴ Aboni chopí wabé chati sití ra'icha, ne wabé na'álawami niráa.

¹⁵ Aboni chopí ne wabé ko'winali auché jaré pagótami.

¹⁶ A'lí aboni sinibí ne wabé risúu olá echí auché jaré pagótami, ayénachó aboni sinibí ne wabé riwélawami olá.

¹⁷ A'lí aboni ketasi machí kilíi kaníliga piréliya.

¹⁸ A'lí aboni tarapé siné 'nata mapu galá níima we majawíwa Riosi jiti.

¹⁹ A'lí bicheta galá machí mapurigá Riosi nuleli echí jaré pagótami. A'lí aboni echirigá nulérami níili mapurigá ne suwaba pagótami ketasi nijéwaga ku ra'ichama. Ayénachó aboni echirigá nulérami níili mapurigá suníami jena'í wichimóbachi piréami pagótami galá machimea mapurigá aboni ne wabé chati oláami, Riosi sayérami ju.²⁰ A'lí ke wesi sébali galá wachínaga olá mapurigá Riosi tamujé tamí nuleli. Ke wesi galá nijewa mapurigá Riosi nulá, echijiti Riosi ke wesi nalé mapurigá galabé oláami niráa. A'lí Riosi nulalila chopí tamujé tamí machiná machira mapurigá chati oláami niráa.

Echi jaré pagótami chopí ku'wíratami níima mapalí aboni galá bichíi

²¹ Chopí jipi rawé tamujeta ma galá machí mapu Riosi ne bichíwali tamujé tamí nalé mapalita arigá ketasi galá nijéwami níisata mapurigá Binói nulali. Kilyá chokichí jonsa echo'ná Riosi nulalila oselíwalachi arigá osirúami níili mapurigá Riosi echirigá narema riwéali echí pagótami. Ayénachó echo'ná echí jaré Riosi jiti nawésami oselíwalachi echirigá osirúami níili.²² A'lí Riosi echirigá ne bichíwali naré echí pagótami mapalí aboni galá bichíi. Riosi echirigá naré ne si'néami pagótami mapu ikí galá bichíi Jesucristo niráa, mapujiti ne si'néami pagótami chopí a yiri ju Riosi yuwa.²³ Mapujiti ne si'néami pagótami ma chati olali. A'lí ke wesi ne sébali galabé olali. Echijiti Riosi ke wesi riwali galá wachínaga oláami niráa, mapurigá Riosi Binói ne galabé wachínaga oláami ju.²⁴ Chopí Riosi ne wabé galabé ju, echijiti Binói tamujé tamí naré, mapalita arigá tarapé bilé yiri namuti nateta, mapujiti Binói tamujé tamí ku wikáwali chopí mapujiti tamujeta ma galá bichíili Jesucristo niráa.²⁵ A'lí Riosi ma nijali echí Walubela Jesucristo mapurigá Binói mi'lirúami níima, mapurigá Binói echirigá kastigo 'yárami níima, mapujiti si'néami echí auché jaré pagótami ma chati olali. A'lí Riosi echirigá olali mapurigá Binói ma ketasi waminabi 'yóratami níima mapujiti echí jaré pagótami wabé chati olali. Chopí arigá 'wérali ju mapurigá echí jaré pagótami galá bichíima mapurigá echí Walubela Jesucristo

léniga mukuli suwaba aboni chati olalila jiti. A'lí Riosi echirigá ologá machírali mapurigá Binói ne wabé galabé wachínaga olali mapalí Binói kilí ologá ketasi cho kastigo 'yali echi jaré pagótami mapu chabé chokichí jonsa chati olali.²⁶ A'lí Riosi je'ná jerigá olali mapurigá jipi rawé yénasí galá machirúami níima mapu Binói Riosi ne galabé wachínaga oláami ju, ayénachó Riosi je'ná jerigá olali mapurigá galá machirúami níima mapurigá Binói ne galá wachínaga olá mapalí Binói galá nalé si'néami echi jaré mapu ikí galá bichíiko Jesucristo niráa.

²⁷ ¿Churékula bicheta we nóchaga 'natami níibo? Ketásita biyiri niwa mapurigata echijiti nóchami níibo. ¿Churékula? ¿Kéchata nóchami níibo mapujítita galá nijéwaga olá mapurigá Riosi tamujé tamí nuleli? Tarapé chirigá. Tamujé chopi ku'wíratami ju mapujítita galá bichíili Riosi. ²⁸Echijítita galá machí mapu Riosi naré echi jaré pagótami mapalí aboni galá bichíi Riosi Ra'íchala. Ayénachó Riosi echirigá naré aboni mapalí aboni siné káachi ketasi galá nijéwaga olali mapurigá Binói Riosi nulali, chopi Riosi galá naré aboni mapalí aboni galá bichíyami ju.

²⁹ ¿Acha echi Walubela Riosi chopi echi jaré Juríosi pagótami Riósawala ju? ¿Kecha ayénachó Riósawala ju echi auché jaré isena mapu ketasi Juríosi pagótami ju? Ayena, echi Walubela Riosi ayénachó Riósawala ju echi jaré isena pagótami mapu ketasi Juríosi ju. ³⁰Mapujiti chopi bilepi nirú Riosi. A'lí echi bilepi Riosi galá narema si'néami echi jaré bichíyami pagótami mapujiti aboni galá bichíi Riosi. Echirigá echi bilepi Riosi galá narema echi jaré Juríosi pagótami mapu ikí galá bichíima, achigórigá mapurigá Binói ayénachó narema echi jaré isena pagótami, si'néami mapu ikí galá bichíima. ³¹ ¿Áchata siné káachi ke natéami niráa nilabo Riosi nulalila mapalita echirigá bichíi Jesucristo niráa? ¡Tarapé chiriga! Chópita si'winárigá waminabi ne galá iwéraga wilata echi nulalíwami.

Echi Abrami galá bichíyami níili Riosi

4 Echi Abrami mapurigá tamujé onolá níili, chabé ki'yánala bitéami, si'néami mapu ikita Juríosi anilíwami pagótami ju. ¿Piri bicheta aniboa mapu echi Abrami riwali? ²Mapujiti a Riosi narésagá echi Abrami, ne galá wachínaga oláami niráa, chopi mapujiti echi Abrami binói, siné káachi, ne wabé galabé oláami níili, echalí echi Abrami we nóchaka 'natami níima riwéali, chopi echi Abrami ketasi chirigá ne bichíwali nóchaka 'natami níima bacháami Riosi yuwa, mapujiti ke wesi omero, binói niráa galabé olayá mapuyénasí Riosi echijiti galá narema echi binói, galabé wachínaga oláami niráa. ³Chopi echo'ná Riosi Ra'íchala oselíwalachi je'ná jerigá osirúami ju: Echi Abrami galá bichíili Riosi, echijiti Riosi galá nareli echi Abrami, chopi mapujiti binói galá bichíili. ⁴A'lí a bilé rijói we nochásagá, echalí binói galá natétarami níima. Chopi binói natétawala ketasi 'yárami níima mapurigá kólami niráa, chopi 'yárami níima mapurigá wikérami niráa, mapujiti echi rijói ma galá nóchali. ⁵Chopi a echi pagótami mapu ketasi omero galabé olayá arigá galá bichíisagá echi Walubela Riosi mapu galá ku wikawa echi jaré chati oláami pagótami, echalí Riosi galá narema aboni, mapujiti aboni galá bichíyami níima Riosi. ⁶A'lí echi walula Rabiri riwéami rijói echirigá achigórigá anili mapu ne wabé galá kaníflatami ju echi jaré pagótami, si'néami mapu ikí Riosi galá naré mapujiti aboni galá bichíi, mapalí aboni arigá ketasi wabé galabé oláami ju. ⁷Echi Rabiri je'ná jerigá anili, mapurigá echo'ná Riosi Ra'íchala oselíwalachi je'ná jerigá osirúami ju:

Ne wabé kanílatami ju echi jaré mapu Riosi ku wikawa suwaba mapurigá aboni chati olali. Ne wabé kaníratami ju si'néami echi jaré mapu ikí Riosi ketasi kastigo 'ya, aboni chati olalila jiti, chopi Riosi ku wikawa abomi mapujiti aboni galá bichíi.

⁸ Ne wabé kanílatami ju echi jaré rijói, si'néami mapu ikí echi Walubela Riosi ketasi wi'nijí aboni chati olalila jiti.

⁹ ¿Acha chopi echirigá kanílatami níima echi jaré Juríosi mapu noligá sikirétami ju? ¿Acha ayénachó echirigá kanílatami níima echi auché jaré isena pagótami mapu ketasi noligá sikirétami ju? Mata anili mapurigá jerigá osirúami ju echo'ná Riosi Ra'íchala oselfíwalachi: Echi Abrami galá bichíili Riosi, echijiti Riosi galá nareli echi Abrami, chopi mapujiti binói galá bichíili. ¹⁰ ¿Churé biché echirigá narétami níili? ¿Acha echirigá narétami níili mapalí binói ma noligá sikirétami níili? ¿Acha echirigá narétami níili mapalí binói ketasi cho noligá sikirétami níili, keremá? Echi Abrami ketasi echirigá narétami níili mapalí binói ma noligá sikirétami níili, chopi chabénala echirigá narétami níili, mapalí binói ketasi cho noligá sikirétami níili. ¹¹ Chabé ki'yá echi Abrami galá bichíili Riosi. A'lí pe wakinana echi Abrami noligá sikirétami níili, mapurigá echirigá 'nératami níima mapurigá Riosi ma galá nareli echi Abrami mapujiti binói chabénala jonsa galá bichíili Riosi, mapalí Binói Abrami ketasi cho noligá sikirétami níili. A'lí echirigá ikili mapurigá echi Abrami, onorúami niráa níima si'néami echi jaré galá bichíyami yuwa, mapalí aboni arigá ketasi noligá sikirétami níisa. Ayénachó echirigá ikili mapurigá aboni ayénachó echirigá narétami níima Riosi jiti, mapujiti aboni ma galá bichíili Riosi. ¹² Ayénachó echirigá ikili mapurigá echi Abrami ayénachó onorúami niráa níima echi jaré noligá sikirétami Juríosi pagótami yuwa, si'néami mapu ikí aboni achigórigá galá bichíyami níili mapurigá echi Abrami galá bichíili mapalí binói abijí ketasi cho noligá sikirétami níili.

Echi Abrami galá bichíili Riosi, echijiti ne bichíwali ikili mapurigá Riosi bachá niráa bichíwaga aneli mapu ikimea riwéali

¹³ A'lí Riosi ne bichíwaga aneli echi Abrami mapurigá binói narema riwéali je'ná wichimoba mapurigá binói níwala niráa, echi jaré binói kúchuwala níwala ayénachó. Chopi Riosi ketasi echirigá aneli mapujiti echi Abrami siné káachi galá nijéwaga olali mapurigá Riosi nulali. A'lí Riosi echirigá aneli echi Abrami mapujiti Binói Riosi bachá niráa nareli echi Abrami mapurigá Binói ranala niráa, mapujiti echi Abrami galá bichíili Riosi. ¹⁴ A'lí a echi jaré mapu galá nijéwaga olá mapurigá Riosi nulali, aboni chopi narésagá je'ná wichimoba mapurigá aboni níwala niráa, a'lí ¿churékuláta waminabi bichíibo Riosi? Mapujiti a echirigá ne bichíwali níisagá, a'lí mapurigá Riosi ne bichíwaga anili, ma nakúbarami ju. ¹⁵ A'lí Riosi ne bichíwali kastigo 'yama riwéali mapujiti echi jaré pagótami ketasi nijéwaga olali mapurigá Riosi nuleli aboni. Chopi mapalí echi jaré pagótami ketasi cho nulérami níili, echalí ke wesi ke nijéwali echi nulalíwami, mapujiti echalí ketasi cho nirúali echi nulalíwami.

¹⁶ Echijiti chopi echi jaré galá bichíyami pagótami narema je'ná wichimoba mapurigá aboni níwala niráa. Echirigá ne bichíwaga anérami níili ne si'néami echi jaré pagótami mapu echi Abrami kúchuwala niráa ju, chopi mapujiti Riosi ne wabé galéami ju. A'lí echi jaré Juríosi pagótami mapu Riosi jiti nulérami níili, aboni echirigá ne bichíwaga anérami níili. Ayénachó echi auché jaré pagótami mapu galá

bichíi Riosi achigórigá mapurigá echí Abrami galá bichíili, aboni ayénachó echirigá ne bichíwaga anérami níili. Echijiti echí Abrami mapurigá ne si'néami tamujé onolá niráa ju,¹⁷bacháami Riosi yuwa, mapujiti echí Abrami bachá niráa galá bichíili Riosi, mapurigá je'ná jerigá osirúami ju echo'ná Riosi Ra'íchala oselíwalachi: Nijé nimí onorúami niráa wilali wikabé auché jaré pagótami yuwa. Échiko je'ná jerigá aniwáami ju: Riosi aneli echí Abrami tamujé onolá niráa mapujiti binói bachá niráa galá bichíili Riosi, a'lí wabé wakinana tamujé ayénachó bichíili Riosi. A'lí Riosi Binói ju mapu galá ku owínta echí jaré ma suwiámi. Ayénachó Riosi galá machí mapurigá waminánomí galá ikimea, mapalí echirigá ketasi cho bichíwali ikí.

¹⁸A'lí mapalí echí Abrami arigá ketasi cho kúchawami níili, mapalí binói ne wabé simírami ochérami níili, ayénachó mapalí binói upila ne wabé simírami wiláami níili, echalí echí Abrami galá bichiíiga buweli mapurigá binói arigá kúchama, ayénachó mapurigá binói kúchuwala ne wikabé muwema. A'lí echí Abrami echirigá galá bichíili mapujiti Riosi bachá niráa jeaneli: Echikí ne wikabé níima echí jaré mujé kúchala kúchuwala. ¹⁹A'lí echí Abrami galá bichíili mapu binói arigá kúchama riwéali, mapalí binói wikabé bamíbami, ne noguí bilé kiento bamíbami níili. A'lí echalí binói upila, Sara riwéami, ayénachó wabé simírami wiláami níili. Echalí aboni tarapé bilé cho kúchuwami níili, nibilé kúchuwami níima riwéali mapujiti aboni echirigá ma wabé ochérami níili. ²⁰A'lí echí Abrami arigá ne galá bichíili mapurigá Riosi bachánala ne bichíwaga aneli. A'lí binói sinibí waminabi galá bichíili, ayénachó waminabi walubéragera aneli Riosi. ²¹A'lí echí Abrami ne galá bichíili mapu Riosi ne wabé omérami ju suwaba namuti olayá mapurigá Binói bachá niráa ne bichíwaga aneli mapurigá Binói olama riwéali. ²²Echijiti Riosi galá nareli echí Abrami ne galá wachínaga oláami niráa mapujiti binói echirigá galá bichíili Riosi.

²³A'lí je'ná mapurigá osirúami ju mapu Riosi echirigá nareli echí Abrami mapujiti binói galá bichíili, je'ná jerigá ketasi chopí echí Abrami jiti rugá osirúami níili, ²⁴chopí ayénachó tamujé tamí jiti rugá osirúami níili, mapujiti Riosi ayénachó galá tamujé tamí naré, galá wachínaga oláami niráa, mapujítita galá bichií. Mapujiti tamujé ayénachó galá bichií echí Riosi mapu ku owíntali tamujé Walubélawala Jesucristo mapalí Binói ma mukúami níili. ²⁵A'lí Jesucristo nijírami níili mapurigá Binói mi'lirúami níima, mapurigá Binói echirigá narema tamujé níwala kastigo, mapujiti si'néami tamujé ma chati olali. A'lí Jesucristo ku owíntarami níili mapurigá tamujé echijiti narétami níbo mapurigá Riosi kúchuwala niráa.

Riosi tamujé tamí nareli mapujítita galá bichíili Jesucristo miráa

5 A'lí mapalí Riosi ma tamujé tamí nareli mapujítita galá bichíili Jesucristo niráa, echalí Riosi ma ketasi waminabi yóratami níili mapujítita we chati olali, mapujiti echí tamujé Walubélawala Jesucristo mukuli tamujé chati olalila jiti. ²A'lí echí Walubela Jesucristo tamujé tamí mulubéantali Riosi yuwa mapujítita galá bichíili. Echijiti Riosi tamujé tamí wabé kaligá ku'wírali. A'lí Riosi waminabi tamujé tamí ku'wírama. Ayénachóta wabé kanila mapujítita bichií mapu tamujé aboni ayénachó o'wélatami níbo Riosi yuwa echalí mapalí Riosi waminabi wabé walubélaga anérami níima. ³A'lí bicheta ketasi chopí echijiti kanfila. Ayénachóta wabé kanila mapalita wabé risíu olárami ju mapujítita gala bichií Riosi Ra'íchala. A'lí bicheta galá kanila echirigá mapujítita galá machí mapu Riosi chopí ariwé mapurigata echirigá risíu olárami níbo mapurigata waminabi galá kilí ologá

pirélabo. ⁴A'lí mapujítita sinibí echirigá kilí ologá piré, echijiti Riosi tamujé tamí ané galabé oláami niráa. A'lí mapalí Riosi tamujé tamí echirigá ané, echalita chopi mayé mapu Riosi sinibí waminabi wabé tamujé tamí ku'wírama. ⁵A'lí mapalita echirigá galá bichiyami ju, a'lí bicheta ketasi riwélatami níbo, mapujiti Riosi tamujé tamí ne wabé simírami galeli. Echijiti tamujé ne sulachí niráa, ne wabé simírami galebo a'nagupi, mapujiti Riosi tamujé tamí 'yali echi Wabé Galabé Riosi Iwigala, mapurigá echo'ná pachana tamujé sulálachi asimea.

⁶A'lí mapalita ketasi omérabo riwéali tamujé aboni niráa ku'wíriya mapujítita chati oláami níli, echalí Jesucristo mukuli si'néami tamujé chati oláami pagótami jiti, mapalí echalí ma sébali Binói téawala. ⁷Ne bichíwali peerikó mukumea bilé rijói auché bilé rijói jiti. A'lí siné káachi peerikó mukumea auché bilé galabé oláami rijói jiti. Chopi siné káachi bilé rijói arigá ketasi majama mukuyá auché bilé ne wabé simírami galabé oláami rijói jiti. ⁸Chopi Riosi tamujé tamí machírali mapurigá Binói tamujé tamí ne wabé simírami galeli, mapujiti Jesucristo mukuli tamujé tamí jiti mapuyénasíta abijí wabé chati oláami níli. ⁹A'lí Riosi ma tamujé tamí nareli mapujiti Jesucristo mukuli tamujé tamí jiti, echijiti jipi waminabi bichíwali ju mapu Jesucristo ketasi ariwema mapurigata kastigo 'yárami níbo echalí ne jubá wi'nijíwachi rawé. ¹⁰A'lí mapalí tamujé abijí sayérali Riosi mapujítita abijí chati olali, echalí Riosi Binói ku katéwali tamujé yuwa, mapujiti Riosi 'yali echi bilepi Binói Ranala mapurigá Binói mi'lirúami níima tamujé chati olalila jiti. Echijiti jipi mapalí Riosi ma ku katéwali tamujé yuwa, waminabi ne wabé bichíwali ju mapurigata ku wikawárami níbo mapujiti echi bilepi Riosi Ranala auchecho ku bité. ¹¹Je'ná jeyiri ne bichíwali ju, ayénachó ne bichíwali ju máputa ne wabé kaníla Riosi yuwa mapujítita galá bichí Jesucristo niráa, echi mapu tamujé Walubélawala ju, mapujiti Jesucristo mukuli tamujé chati olalila jiti, mapurigá Riosi echijiti omérama ku katéwiya tamujé yuwa.

**Echi ne bachá bitéami rijói, Arani riwéami, bachá niráa chati olali, chopi
echi Walubela Jesucristo mukuli echi jaré pagótami chati olalila jiti**

¹²A'lí echi ne bachá bitéami rijói, Arani riwéami, ne bachá niráa chati olali. Echijiti pe wakinana echi Arani ma mukuli. Echalí jonsa Riosi riwali mapu ne si'néami pagótami ma chati oláami níima riwéali, echijiti Riosi nulali mapu ne si'néami pagótami suwisama. A'lí echalí jonsa ne si'néami pagótami arigá suwísimi mapujiti ne si'néami chati olali. ¹³A'lí chabé ki'yáñala mapalí Riosi ketasi cho we nuleli echi pagótami, echalí chokichí jonsa echi jaré wichimóbachi piréami pagótami arigá chati olali. Chopi Riosi ketasi wi'nijili echi pagótami mapujiti Binói ketasi cho we nuleli aboni, mapurigá Binói we nuleli echi Arani ki'yá chokichí. ¹⁴A'lí echi Arani ki'yá chokichí bitérali, chopi echi Moisesi wakinana bitéali mapalí Riosi ma we nuleli echi pagótami. A'lí ki'yá chokichí jonsa ne si'néami pagótami arigá suwísalí, wakinana mapalí bitéali echi Moisesi yénasí, mapujiti si'néami chati olali. Chopi echi auché jaré pagótami ketasi achigórígá chati olali mapurigá echi Arani chati olali, mapujiti echi Arani ketasi nijéwali mapurigá Riosi nuleli binói. Echirigá echi Arani we chati olali, chopi echi Walubela Jesucristo nolínama riwéali jena'í wichimóbachi. A'lí Jesucristo ketasi chati olali mapurigá echi Arani chati olali, chopi Binói sébali galabé wachínaga olali suwaba mapu ikí echi Arani ketasi sébali galabé wachínaga olayá.

¹⁵Echi Arani we chati olali mapalí binói ketasi njéwali mapurigá Riosi bachá niráa nuleli. Echijiti wikabé pagótami ma suwili mapujiti echi bilepi bachá bitéami rijói chótali chati olayá. Chopi Riosi waminabi wabé galabé olali ketasi mapurigá echi Arani olali. Echijiti wikabé pagótami ku'wíratami níili, mapujiti Riosi njiali echi bilepi Binói Ranala mapurigá echi Walubela Jesucristo waminá mukugá narema echi kastigo, echi auché jaré pagótami chati olalila jiti. A'lí Jesucristo echirigá olali mapurigá mapu ikí echi jaré pagótami galá bichíisagá, galá ku wikawárami níima, mapalí aboni arigá ketasi bilé namuti yiri 'yali Riosi. ¹⁶Ketasi galá níili mapu echi bilepi bachá bitéami rijói chati olali, chopi Riosi arigá ne wabé galabé olali mapalí Binói njiali echi bilepi Binói Ranala. Echi Arani bachá niráa chótali chati olayá, echijiti si'néami pagótami ma chati olali, ayénachó ne si'néami ma wi'nijírami ju mapurigá chati oláami niráa. Chopi Riosi waminabi wabé galabé olali, mapujiti Binói njiali echi bilepi Binói Ranala mapurigá si'néami mapu ikí galá bichíisagá Jesucristo niráa, galá narétami níima Riosi jiti. A'lí Riosi arigá echirigá naré echi jaré aboni mapu wikabé namuti chati olali, mapalí aboni arigá ketasi bilé namuti yiri 'yali Binói. ¹⁷A'lí ne si'néami pagótami suwimea riwéali mapujiti echi bilepi bachá bitéami rijói chati olali. Chopi echi jaré galá bichíyami pagótami sinibí pirélama, o'wéala niráa, echo'ná ripá riwigachi, ne si'néami mapu ikí Riosi wabé galigá naré mapalí aboni arigá ketasi bilé namuti yiri 'ya Riosi. A'lí aboni chopi echirigá pirélama mapujiti echi bilepi Walubela Jesucristo mukuli aboni chati olalila jiti.

¹⁸Ki'yá chokichí echi Arani echirigá chati olali, a'lí ne si'néami pagótami echirigá kastigo 'yárami níima riwéali, mapujiti echi bilepi rijói bachá niráa chótali chati olayá. Chopi echi Walubela Jesucristo ne wabé galabé olali, a'lí ne si'néami pagótami mapu ikí bichíiko, ne galá narétami níima mapujiti echi bilepi Jesucristo mukuli echi jaré pagótami chati olalila jiti. A'lí Riosi galá nírali mapurigá Jesucristo olali. ¹⁹Echirigá níili mapu ne wabé wikabé pagótami echirigá wabé chati oláami niráa niwárami níili mapujiti echi bilepi rijói ketasi njéwali Riosi. A'lí ne wikabé pagótami ayénachó galá narétami níima Riosi jiti, mapurigá ku wikawárami niráa, mapujiti echi bilepi Jesucristo ne galá njéwali Riosi.

²⁰A'lí Riosi wikabé namuti nureli echi pagótami mapurigá aboni galá machimea mapu chu yena wabé chati oláami níili aboni. Chopi mapuyénasí echi pagótami waminabi machili mapu chu yena wabé chati oláami níili aboni, echalí Riosi chopi wabé simírami galigá, waminabi nakili mapurigá echi pagótami ku wikawárami níima. ²¹A'lí suwaba je'ná jerigá echirigá ikili mapurigá Riosi galá omérama tamujé tamí ku'wíriya, mapujiti achigórigá mapurigá si'néami pagótami chopi suwimea riwéali mapujiti ne si'néami chati olali, echirigá ayénachó Riosi omérama tamujé tamí nareya mapurigá Binói níwala niráa, mapujiti Binói ne wabé galabé galéami ju. A'lí Riosi echirigá tamujé tamí 'yali mapurigata sinibí pirélabo mapujiti tamujé Walubélawala Jesucristo mukuli tamujé chati olalila jiti.

Echi jaré bichíyami ma suwíami niráa ju mapurigá aboni ma
ketasi waminabi chati olama, chopi aboni ma ku piréami niráa ju
Jesucristo yuwa mapurigá aboni ma wabé galabé olama

6 ¿Chu bicheta aniboa? ¿Áchata waminabi 'yénabo echirigá chati olayá, mapurigá Riosi Binói chopi waminabi wabé galigá tamujé tamí ku wikawama?

² ¡Tarapé chirigá! Tamujé ma suwíami niráa ju mapurigata ma ketasi waminabi 'yénabo echirigá chati olayá. ¿Churigá bicheta abijí waminabi echirigá chati ologá pirélabo? ³ ¿Kéchatamo machí mapu tamujé ma suwíami niráa ju, ne si'néami máputa Jesucristo yuwa napabúrami níili mapalita ba'wí jiti pagótami níili? Mapujiti tamujeta riwirúami níili mapurigá ma suwíami niráa, Jesucristo yuwa, mapalita ba'wí jiti pagótami níili. ⁴ A'lí mapujítita ba'wí jiti pagótami níili, Riosi tamujé tamí riwali mapurigá ma chuwigótami niráa Jesucristo yuwa. Echalita ma suwíami niráa níili mapurigata auchecho ku owíntarami níibo mapurigata bukulíwami niráa ku pirélabo jena'lí wichimóbachi, achigórigá mapurigá Jesucristo ku owíntarami níili mapalí Binói ma mukúami níili, mapalí echi Walubela Onorúami wabé omériga ku owíntali echi Walubela Jesucristo.

⁵ Mapujiti Jesucristo yuwa napawika suwíami niráa níisagá, mapurigá Binói ayénachó mukúami níili, ne bichíwali tamujeta ayénachó Jesucristo yuwa napawika ku owíntarami níibo, achigórigá mapurigá Binói ku owíntarami níili. ⁶ Galata machí mapu tamujé aboni ayénachó ko'wirúami niráa níili mapurigata chabénala chati oláami níili. A'lí tamujeta echirigá olárami níili mapurigata ma ketasi waminabi chati ologá pirélabo, mapujiti ma ketasi arigá 'wérali níili mapurigata waminabi echirigá chati olabo, mapurigá echirigá nulérami níisata. ⁷ Mapujiti ma ketasi arigá 'wérali ju mapurigá waminabi chati olama echi jaré mapu ikí ma suwili. ⁸ A'lí mapujítita ma echirigá suwili, Jesucristo yuwa, tamujeta galá bichíi máputa ayénachó auchecho ku pirélabo Binói yuwa. ⁹ Mapujiti galata machí mapu Jesucristo ma ketasi auché siné mukumea, mapujiti Binói sinepi ma ku owínali, mapalí Binói ma mukúami níili. Jipi echi mukuwáami ma ketasi waminabi omérama echi Binói. ¹⁰ A'lí mapalí Jesucristo mukuli, Binói sinepi niráa mukuli ne si'néami echi auché jaré pagótami chati olalila jiti. A'lí Jesucristo ma ketasi auché siné mukumea, chopi jipi rawé Binói sinibí niráa waminabi walubéraga anée bité Riosi. ¹¹ 'Yemi achigórigá galá 'natasi mapurigátamo ma suwíami niráa ju, mapurigátamo ma ketasi waminabi chati olabo. Chopi ayénachó galá 'natasi mapurigátamo ma ku piréami niráa ju tamujé Walubélawala Jesucristo yuwa, mapurigátamo jipi chopi waminabi walubéraga anée pirélabo Riosi.

¹² Echijiti ma ketasi waminabi chati olasi mapurigá 'yemi aboni chopi nakí chati olánala, mapujiti 'yémítamo arigá pe waminana suwiboa. A'lí ma ketasi arigá 'wérali ju máputamo waminabi chati olabo. ¹³ Ketasi waminabi nijéwaga olasi mapurigá 'yemi aboni chopi chati olánali. Si'winárigá galá nijéwaga olasi mapurigá Riosi chopi nakí máputamo olabo, mapujiti 'yémítamo ma suwíami niráa níili, chópitamo ma bukulíwami auchecho ku piré. Echijiti 'yasi Riosi 'yemi aboni niráa mapurigátamo chopi ne galá wachínaga olabo. ¹⁴ A'lí ma ketasi arigá 'wérali ju mapurigá 'yémítamo waminabi chati olabo, mapujiti 'yémítamo ma ketasi waminabi nulérami ju mapurigátamo arigá nijéwabo echi nulalíwami mapurigátamo echijiti galabé wachínaga oláami anérami níibo. Chopi Riosi jípiko 'yemi mi ne wabé galigá nulé.

**Si'néami mapu ikí ma galá bichíyami ju ma ketasi nulérami ju mapurigá
pióntami niráa, mapurigá aboni chopi waminabi chati olama**

¹⁵ ¿Churigá biché níima? ¿Áchata waminabi chati olabo, chopi mapujítita ma ketasi waminabi nulérami ju echi nulalíwami jiti? ¿Áchata waminabi chati olabo

chopi mapujiti jipi Riosi tamujé tamí we galigá nulé? ¡Tarapé chirigá! ¹⁶ Yémitamo galá machí mapu átamo niwásagá mapurigá pioni niráa, echalí arigá 'wéralli níima máputamo galá nijéwabo echi auché bilé rijói mapu 'yemi mi nulema. Ayénachótamo echi rijói piónawala niráa níibo. Achigórigá mapalítamo chati olá, echalí pe waminana arigá 'wéralli níima máputamo chopi waminabi wabé chati olabo. Echalítamo chopi mapurigá nulérami níibo, mapurigá pioni niráa, mapurigátamo waminabi chati olabo. A'lí bichétamo echijiti chopi waminá suwiboa. A'lí 'yemi máputamo galá nijewa Riosi, 'yémitamo mapurigá Riosi piónawala niráa ju, mapujiti Riosi 'yemi mi nareli mapujítitamo ma galá bichiíli. A'lí bichétamo galá wachínaga ologá pirélabo. ¹⁷ Nijeni walú natétara 'ya Riosi mapujiti 'yémitamo, sulachí niráa ma galá bichiíga nijéwali mapurigá nijé 'yemi mi binérali. Chópitamo chabénala wabé chati oláami níili; echalítamo chopi nijéwali mapurigá echi riablo nakili mapurigátamo wabé chati olabo. ¹⁸ A'lí mapalí ma ketasi waminabi 'wéralli níili mapurigá 'yémitamo waminabi nijéwaga olabo mapurigá echi riablo 'yemi mi nuleli chati olánala, echalí jonsa Riosi 'yemi mi niwali wabé galá wachínaga oláami niráa. A'lí bichétamo chopi nijéwaga olá mapurigá Riosi 'yemi mi nulé echirigá wachínaga olánala. ¹⁹ Jipi nijeni chopi ra'icha mapurigá echi jaré pagótami ra'icha mapurigá 'yémitamo waminabi galá machiboa: Chabénala 'yémitamo chopi chuwé olali mapurigá echi riablo 'yemi mi nuleli chati olánala, echijítitamo mapurigá echi riablo piónawala níili. Chopi jipi galá nijéwaga olasi mapurigá Riosi 'yemi nulé galabé wachínaga olánala mapurigátamo echirigá níibo Riosi piónawala niráa.

²⁰ Chabénala mapalí yénasítamo wabé chati ologá 'yénali, echalítamo echi riablo piónawala niráa níili. Echalí 'yémitamo mayeli mapu tarapé 'wéralli níili máputamo wachínaga ologá pirélabo. ²¹ Echalí 'yémitamo tarapé ku'wíratami níili mapujítitamo echirigá chati ologá 'yénali. A'lí jípitamo chopi wabé riwela echiyiri chati oluławami jiti. ¡Si'néami echi jaré pagótami mapu ikí echirigá ologá piré chopi waminá suwimea sinibí niráa! ²² Chopi jipi ma ketasi arigá 'wéralli ju mapurigá 'yémitamo waminabi chati ologá pirélabo mapurigá echi riablo piónawala niráa. Jípitamo ma galá bichiíga nijewa Riosi mapurigá Riosi piónawala niráa. Echijítitamo ne bichíwali ku'wíratami ju, mapujiti jípitamo galá ologá piré mapurigá Riosi nakí, ayénachó echalí ne jubá rawé 'yémitamo 'yárami níibo mapurigátamo sinibí niráa pirélabo. ²³ A'lí si'néami echi jaré chati oláami pagótami chopi waminá suwimea sinibí niráa. Si'néami aboni echirigá ku natétarami níima mapujiti aboni ma chati olali, chopi Riosi tamujé tamí we kólami niráa 'ya mapurigata sinibí niráa pirélabo, echi tamujé Walubélawala Jesucristo yuwa.

**Echi jaré mapu ikí bichiíko Jesucristo niráa ma ketasi
waminabi nulérami ju echi nulalíwami jiti**

7 Keni ritémawa, 'yémitamo galá machí Riosi nulalila, echijítitamo gala machí mapu chopi mapuyénasí echi pagótami abijí pireko, echalí arigá 'wéralli ju mapu aboni galá nijéwaga olama mapurigá aboni nulérami ju. ² Mapujiti nulárami ju mapurigá echi jaré muguí kunéami arigá napabúrami ju aboni kunala yuwa mapuyénasí aboni kunala abijí piré, chopi siné káachi waminá suwisáagá aboni kunala, a'lí echi jaré muguí ma ketasi waminabi echirigá nulérami níima. ³ A'lí a bilé mukí auché bilé si'nú rijói yuwa napésagá mapuyénasí abijí bité echi binói

kunala, echalí echi mukí wabé chati olá mapujiti si'nú rijói yuwa bité. Chopi siné káachi waminá mukusáagá binói kunala, echalí echi mukí ma ketasi napéami niráa níima echi rijói yuwa mapu binói kunala níili. A'lí echalí echi mukí ketasi chati olama, arigá napésagá auché bilé si'nú rijói.

⁴Keni ritémawa galá bichíyami, 'yémitamo ma achigórigá suwili mapalí Jesucristo mukuli echo'ná kúrsichi. A'lí bichétamo ma ketasi waminabi nulérami ju echi nulalíwami jiti. Chópitamo ma risensia niwa mapurigátamo auché bilé si'nú rijói yuwa napawipo. A'lí echi máputamo yuwa napawipo, échiko echi Walubela Jesucristo ju mapu ma ku owínali mapalí Binói ma mukúami níili. A'lí bichétamo echijiti chopi galabé olabo mapurigá Riosi nakí máputamo olabo. ⁵A'lí mapuyénasí tamujeta chopi abijí chati ologá piréali mapurigá tamujé aboni nakili olánala, echalita chopi nakili waminabi chati olánala suwaba mapu ikí Riosi tamujé tamí nuleli máputa ketasi olabo. A'lí mapujítita echirigá chati olali tamujeta chopi waminá suwiboa riwéali. ⁶Chopi jipi tamujeta ma suwíami niráa ju, mapurigata ma ketasi waminabi nulérami níibo mapurigá oselichi osirúami ju echi nulalíwami, mapurigata chabénala arigá nulérami níili. A'lí jípita risensia niwa mapurigata bukulíwami niráa waminabi walubérage anebo Riosi, mapujiti echi Wabé Galabé Riosi Iwigala tamujé tamí 'yali mapurigata bukulíwami niráa ku pirélabo. Jípita ma waminabi walubéraga ané Riosi, chónita ma ketasi waminabi nulérami ju mapurigá ki'yá jonsa oselichi osogá nulárami níili.

Nijeni chati oláami ju pachana nijé sulálachi niráa

⁷¿Churigá biché aniboa? ¿Acha chati oluwwáwami ju echi nulalíwami? ¡Tarapé chirigá! Chopi nijeni chabénala ketasi machili mápuni chati oláami níili. Chopi mapalini galá machili Riosi nulalila, echalini galá machili mapurigani chati oláami níili. Mapujiti nijé tarapé machimea riwéali mapurigá wabé chati oluwwáwami ju echi korúkowami, a ketasi je'ná jeanigá nulárami níiságá: Ketasi korú echi auché jaré pagótami níwala namuti. ⁸Chopi echi chati koruwáwami tamí yuwa wabé muwéali mapujítini nulérami níili mapurigani ketasi echirigá chati olama. A'lí mapujítini arigá chati oláami níili, a'lí mapalini nulérami níili mapurigani ketasi koruma auché jaré pagótami níwala namuti, echalini arigá ne wabé koruli, mapujiti mapalita tarapé namuti cho nulérami ju, mapurigata ketasi chati olabo, echalita ketasi 'me nakí chati olánala. ⁹Chabénala mapalini ketasi cho machili Riosi nulalila, echalini arigá we kaníliga bitéami níili. Chopi mapalini galá machili Riosi nulalila, echalini galá machili mapurigani chati oláami níili, a'lí bicheni mapurigá mukúami niráa níili bacháami Riosi yuwa. ¹⁰A'lí echi nulalíwami tamujé tamí 'yárami níili, mapurigata echijiti sinibí niráa pirélabo, yénata suwaba echirigá galá nijéwasagá mapurigata nulérami níili. Chopi echi nulalíwami jiti arigani mi'lirúami niráa níili, mapujítini ketasi galá nijéwali mapurigani nulérami níili. ¹¹Chabé nijeni mayeli mápuni arigá sinibí bitélama riwéali mapujítini galá nijéwali echi nulalíwami. Chopi echalí nijeni we 'yékarami níili, mapujiti nijé binói we chati oláami níili. Echalí nijeni mapurigá mukúami niráa níili bacháami Riosi yuwa, mapujiti mapalí nijeni galá machili Riosi nulalila, echalini chopi waminabi chati olali.

¹²A'lí suwaba Riosi nulalila ne bichíwali wabé galabé ju. Ayénachó ne galabé wachínaga oláami ju mapurigata ketasi korúkabo echi auché jaré pagótami níwala namuti. ¹³Echirigá nijeni ma galá machili mapurigá Riosi nulá, chopi nijeni ketasi

mapurigá mukúami níili bacháami Riosi yuwa echijiti. Echalí Riosi nulalila tamí machírali mapurigá nijeni wabé chati oláami níili. A'lí mapalini nulérami níili mapurigá nijeni ketasi chati olama, echalí nijeni chopi nakili waminabi chati olánala, echijiti nijeni mapurigá mukúami niráa níili bacháami Riosi yuwa.

¹⁴ A'lí galata machí mapurigá echí nulalíwami tamujé tamí ku'wírama mapurigata galá bichiíbo sulachí niráa. Chopi nijeni we chati olá mapujítini echirigá chati oláami ju. Nijeni we chati olá mapurigá nulérami niráa níisa echirigá chati olánala. ¹⁵ A'lí nijeni ketasi machí mapu churékulani je'ná jerigá olá, mapujítini ketasi galabé olá mapurigani ayena galabé olánali. Chopi nijeni we olá echí wabé chati oluwáwami mápuni arigá we kichí. ¹⁶ A'lí a nijeni chopi oláságá mapurigani arigá ketasi nakí olánala, echalini galá machí mapurigá echí nulalíwami ne wabé galabé ju. ¹⁷ Echirigá nijeni arigá wabé chati olá mapujítini echirigá chati oláami ju pachana níje sulálachi niráa, chópini ketasi nakí echirigá chati olánala. ¹⁸ A'lí nijeni galá machí mapu níje binói, mapurigá rijói niráa, ketasi omero galabé olayá. Nijeni ayena ne galabé olánali, chópini ketasi omero galabé olayá. ¹⁹ A'lí nijeni arigá ketasi olá echí galabé oluwáwami mapurigani olánali. Chópini waminabi olá echí we chati oluwáwami, echí mapurigani ketasi nakí olánala. ²⁰ A'lí a nijeni chati oláságá mapurigá nijeni ketasi nakí olánala, echalini echirigá chati olá mapujítini chati oláami ju pachana níje sulálachi niráa, chópini ketasi nakí echirigá chati olánala.

²¹ A'lí tamí yuwa je'ná jerigá ikí: Mapalí nijé binói nakí galabé olánala, echalí ketásini omero galabé olayá, mapujítini chati oláami ju pachana nijé sulálachi niráa. ²² Chopi sulachí niráa nijeni arigá ne wabé galé Riosi nulalila. ²³ A'lí nijeni machí mapurigá nijé binói ketasi omero galabé olayá. Nijeni ne bichíwali we nakí galabé olánala, chopi nijé arigá chati oláami ju pachana nijé sulálachi niráa. Echijiti nijeni mapurigá nulérami niráa ju echirigá chati olánala.

²⁴ ¡Ne wabení o'mona nijé! Nijé binói wabé chati olá, echijítini chopi waminá mukumea sinibí niráa. ¿Chigá tamí ku'wírama mapurigani ketasi waminabi chati olama? ²⁵ ¡Nijeni ne walú natétara 'ya Riosi mapujiti tamujé Walubélawala Jesucristo tamí ku'wírama mapurigani ketasi waminabi echirigá chati ologá bitélama! Echirigá ju mapurigá nijé binói ne galá nakí nijéwanala Riosi nulalila, chopi nijeni arigá chati olámi ju pachana nijé sulálachi niráa. Echijiti nijé binói abijí chati olá mapurigá echirigá nulérami niráa nísisani.

Echi jaré galá bichíyami chopi galabé ologá piré
mapurigá echi Wabé Galabé Riosi Iwigala nulé

8 Echijiti echi jaré mapu ikí Jesucristo níwala pagótami ju, ma ketasi waminabi wi'nijírami ju mapurigá chati oláami niráa. Jipi echi jaré aboni ma ketasi chati ologá piré mapurigá aboni chati olánali pachana aboni sulálachi niráa. Chopi aboni galabé ologá piré mapurigá echi Wabé Galabé Riosi Iwigala nulé.² Mapujiti echi Wabé Galabé Riosi Iwigala ma tamí 'yali mapurigani sinibí niráa bitélama, mapujítini Jesucristo níwala ju. A'lí echi Wabé Galabé Riosi Iwigala ma tamí bukulíwami ku niwali mapurigani ma ketasi chati ologá bitélama, ayénachó mapurigani ma ketasi mukúami níima sinibí niráa.³ A'lí jena'í wichimóbachi piréami pagótami ketasi omérali suwaba galá nijewa Riosi nulalila mapurigá echi Moisesi osogá 'yali aboni, mapujiti aboni chati oláami níili pachana aboni sulálachi niráa. Echijiti Riosi ketasi omérali narea aboni mapurigá galá oláami niráa. Chopi Riosi ma galá naré echi

jaré pagótami mapu ikí galá bichíi Jesucristo niráa. Chabé ki'yá Riosi júuli echi bilepi Binói Ranala mapurigá Binói bitélama jena'í wichimóbachi mapurigá rijói niráa. A'lí Riosi walú kastigo 'yali echi Walubela Jesucristo chopi mapujiti echi auché jaré pagótami wabé chati olali. A'lí Riosi echirigá wi'nijili echi auché jaré pagótami mapurigá chati oláami niráa, chopi Binói arigá 'yali aboni kastígowala echi bilepi Binói Ranala. ⁴A'lí Riosi je'ná jerigá olali mapurigá tamujé galá omérabo wachínaga olayá mapurigá echi Moisesi tamujé tamí nuleli. A'lí tamujé ma ketasi ologá piré mapurigá tamujé aboni chopi olánali. Jípita chopi ologá piré mapurigá echi Wabé Galabé Riosi Iwigala tamujé tamí nulé.

⁵A'lí echi jaré mapu sinibí ologá piré mapurigá aboni chopi nakí olánala, aboni ayénachó sinibí achigórigá 'nata mapurigá jena'í wichimóbachi piréami pagótami chopi 'nata. A'lí echi jaré mapu ologá pireko mapurigá echi Wabé Galabé Riosi Iwigala nulé, abóniko ayénachó chopi 'nata mapurigá echi Wabé Galabé Riosi Iwigala nulé aboni olánala. ⁶A'lí echi jaré mapu sinibí 'nátako mapurigá echi jaré pagótami chopi nakí olánala, aboni ma suwíami niráa ju mapujiti aboni ketasi galá 'nata. A'lí echi jaré mapu 'nátako mapurigá echi Wabé Galabé Riosi Iwigala nulá olánala, aboni kilí ologá pirélama sulachí niráa, ayénachó aboni sinibí niráa pirélama Riosi yuwa. ⁷A'lí echi jaré mapu chopi 'nátako mapurigá echi jaré pagótami chopi nakí olánala, abóniko ne wabé sayela Riosi, mapujiti aboni ketasi nijéwaga olá mapurigá Riosi nulá. A'lí aboni ketasi omero echirigá nijéwaga olayá. ⁸Echijiti echi jaré mapu chopi olako mapurigá aboni nakí olánala, abóniko ketasi omero olayá mapurigá Riosi nakí mapu aboni olama.

⁹Chopi 'yémítamo ma ketasi olá mapurigá 'yemi aboni nakí olánala, chópitamo olá mapurigá echi Wabé Galabé Riosi Iwigala 'yemi mi nulé. Mapujiti echi Wabé Galabé Riosi Iwigala ma bité echo'ná pachana 'yemi sulálachi niráa. A'lí a bilé ketasi níwaságá Jesucristo Iwigala, échiko ketasi Jesucristo níwala ju. ¹⁰A'lí Jesucristo ne bichíwali pachana 'yemi sulálachi bité. Chopi 'yémítamo arigá suwíami niráa ju mapujítitamo chati olali. Chopi 'yemi aliwala galá ku piréami ju mapujiti Jesucristo ma 'yemi mi naleli Binói níwala niráa. ¹¹Riosi níili mapu ku owíntali echi Walubela Jesucristo mapalí Binói ma mukúami níili. A'lí mapujiti Riosi Iwigala pachana 'yemi sulálachi bité, echijiti Binói Riosi mapu ku owíntali Jesucristo, ayénachó 'yemi mi galá ku iwébanatama 'yemi aboni niráa, mapu arigá pe waminana suwibóatamo 'yemi aboni sapala niráa. A'lí Riosi echirigá 'yemi mi iwébanatama mapujiti Binói Iwigala pachana 'yemi yuwa bité.

¹²Echirigá arigá 'wérali ju máputa chopi ologá pirélabo mapurigá echi Galabé Riosi Iwigala tamujé tamí nulé olánala. Ketasi 'wérali ju máputa waminabi ologá pirélabo mapurigá tamujé aboni chopi nakí olánala. ¹³Mapujiti átamo olásagá mapurigá 'yemi aboni chopi nakí olánala, echalí 'yémítamo arigá suwiboa pe waminánomí. Chopi átamo galá nijéwasagá echi Wabé Galabé Riosi Iwigala, echalítamo ketasi waminabi olabo mapurigá 'yemi aboni chopi nakí olánala. A'lí bichétamo sinibí niráa pirélabo.

¹⁴A'lí ne si'néami echi jaré mapu galá nulélami ju echi Galabé Riosi Iwigala jiti, échiko Riosi kúchuwala ju. ¹⁵'Yemi bichíyami ma 'yárami níili echi Galabé Riosi Iwigala echo'ná pachana 'yemi sulálachi niráa, chópitamo ketasi echirigá 'yárami níili mapurigátamo auchecho ne wabé majaga pirélabo, echi riablo piónawala niráa. Jipi echi Wabé Galabé Riosi Iwigala ma 'yemi mi 'yali mapurigátamo Riosi

kúchuwala níibo. Echijítitamo jeanigá anebo Riosi: ¡Mujemi ju keni Onó! ¹⁶A'lí echí Wabé Galabé Riosi Iwigala tamujé tamí ne bichíwaga ané máputa Riosi kúchuwala ju. Ayénachó tamujé aboni galá machí pachana tamujé sulálachi niráa máputa ma Riosi kúchuwala ju. ¹⁷A'lí mapujítita ma Riosi kúchuwala ju, Riosi ayénachó tamujé tamí 'yama ne suwaba Binói níwala wabé galabéala, achigórigá mapurigá Riosi 'ya echí Walubela Jesucristo. Mapujiti ata risúu olárami níisagá jena'í wichimóbachi, mapurigá Jesucristo risúu olárami níili, a'lí biché tamujeta ayénachó o'wélatami níibo Jesucristo yuwa, mapurigá Binói wabé walubélatami níima.

¹⁸A'lí nijeni mayé mapu ketasi ne wabé simírami ju mapurigata risúu olálamí ju jena'í wichimóbachi, chopi ne bichíwali waminabi ne wabé simírami níima mapurigata o'wélatami níibo waminánomí rawé. ¹⁹A'lí ne suwaba namuti Riosi jiti niwárami níili, chopi ne suwaba echí jaré namuti we 'nénariga niráa buwé mapurigá echí jaré Riosi kúchuwala echirigá ne wabé o'wélatami níima. ²⁰A'lí ne suwaba namuti mapu Riosi niwali pe wakinana nosobúrami níili. Chopi echí jaré namuti ketasi aboni niráa nosowili, mapujiti Riosi Binói nosobuli. A'lí Riosi ayénachó aneli mapu waminánomí rawé ne suwaba auchecho siné ku a'lláratami níima. Echijiti suwaba namuti buwée niráa tibili mapurigá suwaba echirigá ku a'lláratami níima. ²¹Mapujiti suwaba echí jaré namuti mapu ikí Riosi niwali ne bichíwali achigórigá ku a'lláratami níima mapurigá echí jaré namuti ma ketasi waminabi suwigá bikamea. A'lí suwaba echí jaré namuti o'wélatami níima achigórigá mapurigá echí jaré Riosi kúchuwala ayénachó ne wabé o'wélatami níima. ²²A'lí bicheta galá machí mapu jipi rawé iyénasí ne suwaba echí jaré namuti mapu Riosi niwali ne bichíwali napawika niráa wabé okoka risúu níili, mapurigá ne wabé okolá bilé mukí mapalí we okoka ramamea bilé tása. ²³A'lí echí jaré namuti mapu Riosi niwali ketasi chopi risúu níili, mapujiti tamujé ayénachó wabé risúu níili máputa ma bachá niráa nareli echí Wabé Galabé Riosi Iwigala. A'lí mapujítita ma niwa Riosi Iwigala, echijítita galá machí máputa suwaba ku'wíratami níibo pe waminánomí. A'lí bicheta echirigá wabé okoka buwé mapurigá tamujeta galá 'nératami níibo, Riosi kúchuwala niráa, echalí mapalí tamujeta, sapá niráa, suwaba ku galabéaratami níibo. ²⁴A'lí bicheta ma ku'wíratami níili mapuyénasita abijí echirigá buweli. Chopi mapalita ma ritiwá echí máputa buweli, échiko ma ketásita waminabi buwebo. ²⁵Chopi ata buwésagá echí jaré namuti máputa ketasi cho ritiwá, echalí arigá 'wérali ju máputa waminabi kílí niráa buwebo mapuyénasita ma riwiboa.

²⁶Echirigá ayénachó echí Wabé Galabé Riosi Iwigala tamujé tamí we ku'wila, mapujítita ketasi 'me galá bichiyami ju. Echijítita siné káachi ketasi machí mapu piri galá níima máputa tánabo Riosi. Echalita chopi ri'líga niráa ra'icha, chopi echí Galabé Riosi Iwigala echalí arigá tániga ra'icha Riosi yuwa tamujé tamí jiti. ²⁷A'lí Riosi tamujé tamí ne galá machí sulachí niráa. Ayénachó Riosi galá machí churigá nakí ra'ichánala echí Wabé Galabé Riosi Iwigala. Mapujiti Riosi Iwigala chopi taní mapurigá echí jaré Riosi níwala pagótami wabé ku'wíratami níima, achigórigá mapurigá Riosi Binói ayénachó nakí.

Echi jaré galá bichiyami sinibí wabé simírami na'úrami ju

²⁸A'lí bicheta galá machí mapu ne suwaba namuti mapu ikí ikimea, ne suwaba galá ku'wírama echí jaré mapu galá galeko Riosi, si'néami echí jaré mapu Riosi ma bayeli mapurigá Binói bachá niráa 'nátali. ²⁹A'lí ki'yá chokichí jonsa Riosi

rojuánaga chapili echí jaré mapu Binói Riosi chabénala jonsa ma galá machili. A'lí Riosi echirigá chapili mapurigá aboni ne wabé galabé niwárami níima mapurigá Binói Riosi Ranala niráa, mapurigá echí Walubela Riosi Ranala bachirúami niráa níima, echí auché jaré wikabé ritémtami yuwa.³⁰ A'lí Riosi ayénachó bayeli si'néami mapu ikí Binói rojuánaga chapili ki'yá chokichí jonsa, mapurigá aboni Riosi níwala níima. A'lí Riosi ayénachó galá nareli echí jaré mapu Binói echirigá bayeli. A'lí Riosi ayénachó wabé o'wéalatali echí jaré mapu Binói galá nareli.

³¹ Echijítita chopi waminabi walubéraga anebo Riosi. Echi Walubela Riosi tamujé tamí ne wabé galé, echijiti ke wesi galá omérama tamujé tamí sayériya. ³² A'lí Riosi tamujé tamí 'yali kepu Raná, mapujiti Riosi arigá njiali Binói Ranala mapurigá echí Walubela Jesucristo arigá mi'lirúami níima si'néami tamujé chati olalila jiti. Jipi níjeni mayé mapu Riosi ayénachó tamujé tamí 'yama ne suwaba echí jaré namuti mapu ikita newalé, mapujiti Binói ma tamujé tamí 'yali kepu Raná, mapurigá echí Walubela Jesucristo kastigo 'yárami níima tamujé aboni chati olalila jiti. ³³ Ke wesi galá omérama wi'nijiya echí jaré mapu Riosi ma chapili mapurigá Binói níwala níima, mapujiti Riosi Binói ma galá nareli echí jaré aboni. ³⁴ Ke wesi omérama nulayá kastigo 'yánala echí jaré mapu Riosi ma chapili. Echi Walubela Jesucristo ju mapu ma mukuli aboni chati olalila jiti. Ayénachó echí Walubela Jesucristo echo'ná Riosi yuwa ku watoná atí mapu ne wabé omérami ju. Jipi echí Walubela Jesucristo wabé tani Riosi mapurigá tamujé bichíyami galá ku'wíratami níibo. ³⁵ Ke wesi omérama olayá mapurigá Jesucristo ma ketasi waminabi tamujé tamí galema. Ke wesi omérama tamujé tamí waná rojuna mapurigá Jesucristo ketasi waminabi tamujé tamí galema. Echi Walubela Jesucristo abijí tamujé tamí galema mapalita wabé risúu olálami ju. Ayénachó Binói tamujé tamí galema mapalita ne wabé kumérami ju. Ayénachó tamujé tamí galema mapalí auché jaré tamujé tamí wabé kichiga a'najata. Ayénachó Binói tamujé tamí galema mapalita ne wabé lowa, ayénachó mapalita ketasi niwa chiní. A'lí echí Walubela Jesucristo ayénachó tamujé tamí galema mapalita ne noguí ko'wirúami níibo, ayénachó mapalita suwaba suwábarami níisata, siné káachi. ³⁶ Mapurigá echo'ná Riosi Ra'íchala oselíwalachi je'ná jerigá oserúami ju:

Sinibí rawé tamujé nijírami ju mapurigata ko'wirúami níibo mapujítita mujé níwala ju.

Echi auché jaré sinibí tamujé tamí ku'unali mapurigá jaré bo'wá
ku'uqwáwami niráa.

³⁷ Chopi tamujé galá bichíyami arigá ne wabé simírami nayúrami ju, ne suwaba je'ná jeyiri namuti arigá ikfáchi, mapujítita galá bichíi echí Walubela Jesucristo, echí mapu tamujé tamí ne wabé galeli. ³⁸ Echijiti níjeni ne bichíwali mayé mapu tarapé bilé namuti galá omérama olayá mapurigá Riosi ma ketasi waminabi tamujé tamí galema. Mapalita suwiboa Riosi abijí tamujé tamí galema. Ayénachó mapalita abijí waminabi pirélasagá Riosi abijí tamujé tamí galema. A'lí echí jaré o'wéala Riosi kapitánawala ketasi omérama olayá mapurigá Riosi ketasi waminabi tamujé tamí galema. A'lí auché jaré o'wéala aliwá ketasi cho omero. Nibilé cho omérama echí jaré namuti mapu jipi rawé ikimea, nibilé cho echí jaré mapu waminánomí rawé ikimea, chopi Riosi sinibí tamujé tamí wabé galema. ³⁹ A'lí echí jaré echo'ná wabé ripabé riwigachi muchúami ketasi omero echirigá

olayá, nibilé omero echí auché jaré echo'ná ri'libé riáblochi muchúami. A'lí Riosi tarapebi yiri namuti niwali mapu galá omérama olayá mapurigá Riosi ma ketasi waminabi tamujé tamí galema, mapurigá tamujé Walubélawala Jesucristo tamujé tamí galé.

Riosi chapili echí jaré Isaeli pagótami mapurigá aboni, Binói níwala pagótami níima

9 Nijé Pablo, 'yemi nimí ne bichíwali je'ná jerigá ané mapujítini bichíyami ju echí Walubela Jesucristo niráa. A'lí bicheni ketasi 'yemi mi 'yéka, chópini galá machí sulachí niráa mápuni bichíwali aní. A'lí echí Wabé Galabé Riosi Iwigala ayénachó echirigá tamí machira mápuni bichíwali aní. ²Nijeni ne wabé o'mona. Ayénachó sulachí niráa nijeni sinibí ne wabé siwega 'nata, ³mapujiti nijeni nakinali mapu nijé binói sinibí niráa kastigo 'yárami níima, ayénachó mapurigani waná rojonárami níima, mapurigani ketasi asimea echí Walubela Jesucristo yuwa, a echijiti galá ku'wíratami níisagá echí jaré nijé pagótawala, mapu nijé ritémawala niráa ju. ⁴A'lí echí jaré nijé pagótawala echí Isaeli kúchawala kúchala wakinana kúcharami ju. A'lí Riosi chabé ki'yá jonsa chapili aboni mapurigá Binói kúchawala niráa. A'lí aboni wisabé riwali Riosi walubélawala. A'lí Riosi wisabé katéwaga ra'íchali aboni yuwa. Ayénachó Riosi júuli echí walula Moisesi Riosi nulalila osogá nulénala echí jaré nijé pagótawala. A'lí aboni binératami níili Riosi yuwa ra'ichánala echo'ná pachá echí walubé Juríosi pagótami ri'obáwalachi. Ayénachó Riosi wikabé namuti bichíwaga aneli aboni, mapurigá Binói Riosi 'yama riwéali aboni. ⁵A'lí echí jaré chabé ki'yá piréami makói miná okuá Isaeli riwéami rijói kúchuwala mapurigá aboni 'wénawala níili chabé ki'yá piréami niráa. A'lí echí Walubela Jesucristo, rijói niráa, bilé aboni pagótamawala níili. A'lí echí Walubela Jesucristo ne Walubela Riosi ju ne suwaba namuti yuwa. A'lí echí Walubela Jesucristo waminabi walubélaga anérami níima ne sinibí niráa. ¡Echirigá nílaga!

⁶A'lí je'ná jerigá aniwáami ju mapu ma arigá ikili mapurigá Riosi chabé ki'yá bichíwaga aneli echí Isaeli riwéami rijói, mapujiti jaré echí Isaeli anilíwami pagótami ketasi ne bichíwali mapurigá echí Isaeli riwéami rijói kúchawala kúchala wakinana kúcharami ju. ⁷A'lí Riosi ketasi aneli ne si'néami echí jaré Juríosi pagótami mapurigá ne bichíwali Abramí kúchuwala kúchala wakinana kúcharami. Mapujiti echí Abramí okuá kúrowi kúchami níili. A'lí Riosi jeaneli echí Abramí: Chopi echí jaré Isaka kúchuwala kúchala mapurigá mujé binói kúchuwala kúchala niráa níima. ⁸A'lí je'ná, jerigá aniwáami ju: Ke wesi Riosi kúchuwala niráa ju chopi mapujiti aboni ranarúami níili Juríosi pagótami niráa. A'lí chopi echí jaré mapu auchecho siné ranarúami juko, mapujiti aboni galá bichíili mapurigá Riosi ne bichíwaga aneli, aboni ne bichíwali echí Abramí kúchuwala kúchala niráa ju. ⁹A'lí chabé ki'yá Riosi ne bichíwaga aneli echí Abramí jeanigá: Minánomí mapalí ma sébachí ju mapurigá Nijé nimí aneli, echalí Nijé nimí ku'wírama, a'lí mujé upila, Sara riwéami, ne bichíwali rahamea bilé taa towí.

¹⁰A'lí je'ná ketasi suwaba ju. Echi okúa Rebeka tanala bilepi rijói oneli, mapujiti echí Isaka oneri, echí mapu Abramí nolá níili. ¹¹⁻¹³A'lí mapalí echí okuá Rebeka tanala ke cho ranarúami níili, echalí mapalí aboni ke cho chatí olali, nibilé cho galabé olali, echalí Riosi jeaneli echí Rebeka: ¡Echi bachirúami echí binói bonilá piónawala niráa níima! A'lí je'ná jerigá chopi a yiri ju mapurigá je'ná jeanigá

osirúami ju echo'ná Riosi Ra'íchala oselíwalachi: Weni galigá chapili echi Jakobo, chopi Nijeni ketasi chapili echi Esaú. A'lí echirigá machirúami níili mapurigá Riosi galá bayegá chapí echi jaré mapuyíripi Binói Riosi nakí chapinala, arigá ke newalagá mapu churigá aboni olá.

¹⁴ ¡Chopi tamujeta arigá ketasi aniboa mapu Riosi ketasi galabé wachínaga olali! ¹⁵ Mapujiti Riosi bachá niráa janeli echi Moisesi: Galá galémani echi jaré mapuyíripi Nijé nakí galénala, ayénachó Nijeni galá natimama echi jaré mapuyíripi Nijeni nakí natimánala. ¹⁶ A'lí echirigá ketasi aniwáami ju mapurigá tamujé ku'wíratami níibo mapujiti tamujé aboni chopi echirigá nakí, nibilé cho mapujiti tamujé aboni siné káachi we galá oláami ju. Chópita ku'wíratami níibo mapujiti Riosi tamujé tamí ne wabé natimá. ¹⁷ A'lí echo'ná Riosi Ra'íchala oselíwalachi je'ná jerigá osirúami ju mapurigá Riosi aneli echi walula silíami echo'ná Ejíptochi anilíwachi kawírali nuláami, jeanigá: Nijé nimí wilali mapurigá walula silíami niráa mapurigá Nijé Binói galá machirúami níima, ne Walubela Riosi niráa, ne suníami jena'í wichimóbachi piréami pagótami jiti, ayénachó mapurigá Nijé riwalá galá machirúami níima ne suníami jena'í wichimóbachi piréami jiti. ¹⁸ Echirigá ne bichíwali ju mapu Riosi galá natimá echi jaré pagótami mapuyíripi Binói nakí natimánala. Ayénachó ne bichíwali ju mapu Riosi ariwema mapurigá jaré pagótami we biwarama sulachí niráa, si'néami mapu ikí Riosi Binói chopi nakí echirigá ariwénala.

¹⁹ A'lí 'yemi pagótami siné káachi tamí jeanema: Echirigá nfiságá, ¿churékula tamujé tamí wi'nijima Riosi mapurigá chati oláami niráa? ¡Mapujiti tamujé pagótami chopi omérabo olayá mapurigá Riosi echirigá risensia 'ya! ²⁰ Chopi 'yemi pagótami ¿chigátamo nirá mayé 'yemi máputamo echirigá sayéraga ra'icha echi Walubela Riosi? Mapujiti Riosi tamujé tamí niwali achigórigá mapurigá echi jaré pagótami we niwá echi jaré sikolí. A'lí echi sikolí ketasi omérama ku kuwana rukueya echi mapu niwali: ¿Churékulátamo tamí je'ná jerigá niwali? ²¹ A'lí echi sikolí niwáami galá omérama echi wicholí; mapujiti chapigá echi wicholí binói niwá bilé sikolí mapu echi galabéala chopi manimea. Ayénachó pe wakinana binói chapimea echiyiri wicholí, a'lí binói niwama auché bilé sikolí mapu chopi echi wabé sití manimea.

²² ¿Chu chiré? Echi Walubela Riosi ayénachó omero natimáa echi jaré chati oláami pagótami, mapujiti Binói Riosi ne wabé galéami ju. A'lí Riosi galá machí mapu echi jaré chati oláami pagótami arigá kastigo 'yárami níima, ayénachó mapurigá aboni waminá suwábarami níima, chopi Binói Riosi arigá wabé natimá aboni. ²³ A'lí Riosi echirigá olali mapujiti Binói tamujé tamí natimali. Ayénachó Binói nakili mapu tamujé machiboa mapu Binói ne wabé Walubela Riosi ju. A'lí ki'yá chokichí jonsa Riosi tamujé tamí chapili mapurigata ayénachó echirigá o'wélatami níibo mapurigá Binói ne wabé Walubela ju. ²⁴ A'lí Riosi Binói tamujé tamí bayeli ibili niráa mapurigata galá bichíyami níibo. A'lí tamujé bichíyami jaré ibili Juríosi pagótami ju. Ayénachó tamujé bichíyami jaré ibili isena pagótami ju, chopi Binói Riosi tamujé tamí bayeli si'néami niráa. ²⁵ A'lí echo'ná Riosi Ra'íchala oselíwalachi mapo'ná echi Oséasi riwéami Riosi jiti nawésami rijói osali, je'ná jerigá osirúami ju mapurigá Riosi Binói jeanili:

Nijeni anema mapurigá Nijé pagótawala niráa echi jaré mapu chabénala
ketasi nijé pagótawala níili.

Ayénachóni anema ne wabé galérami niráa echi jaré mapu chabénala Nijeni
ketasi galeli.

²⁶ A'lí echo'ná mapo'ná Nijeni jeaneli echo'ná piréami:

'Yemi ketasi Nijé pagótawala ju.

Pe waminánomí echo'ná piréami pagótami echí Sinibi Bitéami Riosi kúchuwala anérámi níima.

²⁷ A'lí echí walula, Isaíasi riwéami, Riosi jiti nawésami rijói je'ná jerigá rugá anili echí jaré Isaeli anilfwami pagótami jiti: Echi jaré Isaeli pagótami a ne wabé wikabé níisagá mapu ikí echí kúuchi saté echo'ná tu walú ba'wírali suwé nirúami, arígá chopi pe okuá aboni galá ku'wíratami níima. ²⁸ Mapujiti echí Walubela Riosi we sapú kastigo 'yama si'néami jena'í wichimóbachí piréami mapu ikí ketasi galá bichiyami ju, achigórigá mapurigá Binói bachá niráa anili. ²⁹ Mapurigá binói Isaási bachá niráa jeanili mapurigá je'ná jerigá osirúami ju echo'ná Riosi Ra'íchala oselíwalachi:

Echi Walubela Riosi chabénala niráa, a ketasi tamujé tamí 'yásagá jaré kuchi, tamujé mata kali suwiboli mapurigá suwaba suwábarami níili

echo'ná walúlachi Sorómachi anilfwachi piréami,

ayénachó mapurigá suwaba suwábarami níili echo'ná walúlachi, Gomórachi anilfwachi piréami.

³⁰ ¿Churigá biché aniboa? Je'ná jerigá aniboa: Mapu echí jaré isena pagótami mapu chabénala ketasi nakili mapurigá Riosi narema aboni mapurigá Binói kúchuwala niráa, ma galá narétami níili Riosi jiti. A'lí aboni echirigá narétami níili chopi mapujiti aboni ma galá bichíili Riosi. ³¹ Si'winárigá echí jaré Isaeli pagótami chopi nijéwanali Riosi nulalila mapurigá echí Moisesi osali. Aboni mayeli mapu echirigá ologá aboni narétami níima riwéali Riosi jiti. Chopi aboni ketasi chirigá omérali echirigá nijéwiya mapurigá nulárami níili. ³² ¿Churékula biché ketasi omérali aboni nijéwiya? Aboni ketasi omérali nijéwiya mapujiti aboni ketasi galá bichíili Riosi, mapurigá echirigá bichíiga aboni galá narétami níima Riosi jiti. A'lí aboni chopi nakili mapurigá aboni narétami níima mapujiti aboni echirigá nijéwanali mapurigá nulárami níili. A'lí aboni ketasi omérali echirigá nijéwiya. Echijiti aboni ketasi narétami níili, chopi aboni chakena turúpali echí "turúpuluwami Rité" jiti, ³³ mapurigá je'ná jeanigá osirúami ju echo'ná Riosi Ra'íchala oselíwalachi mapurigá Riosi Binói jeanili:

Echo'ná Nijé walúlawalachi Nijeni wilama bilé Walubela Nuráami echí mapu mapurigá bilé turúpuluwami Rité níima.

A'lí wikabé pagótami ketasi galá bichíima echí Walubela, echijiti aboni waminá turúpama, mapujiti echí Walubela mapurigá bilé turúpuluwami Rité níima aboni yuwa. Chopi ne si'néami echí jaré pagótami mapu ikí galá bichíima echí Walubela, aboni ketasi o'monáratami níima.

10 Keni ritémawa, ne sulachí niráa, nijeni ne wabé nakí, ayénachóni sinibí támí Riosi mapu echí jaré Isaeli pagótami ku wikawárami níima mapurigá aboni chati olali. ² A'lí nijeni ne bichíwaga ruwigá aní mapu aboni ne wabé nakí nijéwanala Riosi, chopi aboni arígá ketasi galá nijewa Riosi, mapujiti aboni ketasi cho galá machí Riosi Ra'íchala. ³ Mapujiti aboni ketasi machí mapu Riosi tamujé tamí naré, mapurigá Binói níwala niráa, mapalita galá bichíi echí Walubela Jesucristo niráa. Chopi aboni nakí mapu aboni narétami níima mapujiti aboni nijéwanali Riosi nulalila mapurigá Moisesi osali. A'lí aboni ketasi nakili bichíinala echí Walubela Jesucristo mapurigá aboni echijiti narétami níima mapurigá Riosi níwala niráa. ⁴ Mapujiti jipi Riosi ke wesi galá wachínaga oláami ané chopi mapujiti aboni galá

nijéwaga olá mapurigá aboni nulérami ju. Chopi Binói ne bichíwali galá wachínaga oláami ané si'néami echí jaré mapu ikí bichíiko Jesucristo niráa. A'lí Jesucristo wabé omérga olá mapurigá ne si'néami echí jaré mapu ikí bichíiko Binói niráa, ma galá narétami níima mapurigá Riosi níwala pagótami niráa.

⁵ A'lí wikabé pagótami chopi nakí mapurigá Riosi narema aboni Binói níwala niráa mapujiti aboni mayé mapu aboni ne galá nijewa Riosi nulalila mapurigá echí Moisesi osali, chopi echí Moisesi binói je'ná jerigá osali: Chopi echí jaré mapu ikí ne suwaba galá nijéwaga olá mapurigá nulárami ju, abóniko echijiti sinibí niráa pirélama. (Alí ke wesi omérali echirigá ne suwaba galá nijéwaga olayá mapurigá Riosi nulali.) ⁶ Chopi auché jaré galá bichíi mapurigá Riosi narema aboni chopi mapujiti aboni galá bichíi Jesucristo niráa. A'lí aboni jiti rugá echí Moisesi je'ná jerigá osali: Ketasi 'natasi echo'ná 'yemi sulálachi jeanigá: ¿Chigá moyénama echo'ná ripá riwigachi? (Echirigá níima mapurigá ku wichí rikíntama Jesucristo, mapurigá Binói galá ku'wírama aboni.) ⁷ Nibilé cho jeanigá 'natasi: ¿Chigá rikíntama echo'ná ne wabé rillibé mapo'ná muchuwi echí jaré suwíami? (Echirigá níima mapurigá ku moyéntama Jesucristo echo'ná chu'wechi jonsa.) ⁸ A'lí je'ná jerigá aniwáami ju: Echi jaré pagótami galá omérama bichíya sulachí niráa. Ayénachó aboni omérama ku rugá nawesa mapu aboni echirigá bichíi. A'lí tamujé je'ná jerigá nawesa mapalita aní mapu Riosi galá narema mapurigá Binói níwala pagótami niráa ne si'néami mapu ikí galá bichíima Jesucristo niráa. ⁹ Mapujiti átamo bichíisagá sulachí niráa mapu Riosi ku owíntali echí Walubela Jesucristo mapalí Binói ma mukúami níili, ayénachó átamo ku rugá nawésasagá mapu Jesucristo 'yemi Walubélawala ju, a'lí bichétamo galá ku wikawárami níibo mapurigátamo chati olali. ¹⁰ Mapujiti mapalítamo sulachí niráa galá bichíibo Jesucristo niráa, ayénachó mapalítamo ku rugá nawesa mapu Jesucristo 'yemi Walubélawala ju, echalí Riosi 'yemi mi narema mapurigá Binói níwala pagótami niráa, ayénachó Riosi 'yemi mi ku wikawama suwaba mapurigátamo chati olali.

¹¹ A'lí echo'ná Riosi Ra'íchala oselíwalachi je'ná jerigá osirúami ju: Ke wesi o'monáratami níima mapuyíripi bichíiko Jesucristo niráa. ¹² A'lí Riosi yuwa echí jaré Jurfosi pagótami chopi a yiri ju echí auché jaré isena pagótami yuwa. A'lí echí Walubela Riosi ne Walubela ju ne si'néami pagótami yuwa. Ayénachó Riosi ne wabé ku'wírama echí jaré mapu ikí tániko Binói Riosi. ¹³ Mapujiti echo'ná Riosi Raíchala oselíwalachi je'ná jerigá osirúami ju: Galá ku wikawárami níima ne si'néami echí jaré pagótami mapu ikí tániko mapurigá echí Walubela Jesucristo ku wikawama aboni. ¹⁴ Chopi ¿churigá tánama mapurigá echí Walubela Jesucristo ku wikawama aboni mapalí aboni ketasi cho bichíi Jesucristo niráa? A'lí ¿churigá bichíima aboni echí Walubela Jesucristo niráa, mapalí aboni ketasi cho námali Binói jiti nawésawala? A'lí ¿churigá námama mapalí ke wesi nawésasa aboni? ¹⁵ A'lí ¿churigá nawésama aboni mapalí ketasi wesi cho julasa aboni nawésanalá? A'lí echo'ná Riosi Ra'íchala oselíwalachi je'ná jerigá osirúami ju: ¡Echi auché jaré pagótami ne wabé kaníriga narema echí jaré mapu nawésaga 'yena jeanigá mapu Riosi wabé kaligá ku'wírama jena'í wichimóbachi piréami pagótami, mapujiti aboni chopi nawésaga 'yénama echí Galabé Riosi Ra'íchala.

¹⁶ Chopi jaré pagótami ketasi bichíiga nijewa echí We Galabé Riosi Ra'íchala. A'lí echirigá ikili mapurigá echí Isaíasi bachá niráa jeanili mapurigá jerigá osirúami ju echo'ná Riosi Ra'íchala oselíwalachi: ¡Walubela, pe okuá ju mapu galá bichíili

mapurigá tamujé nawésali! ¹⁷Chopi echirigá bichíwali ju mapu echi jaré pagótami bichíima mapalí aboni galá námama Jesucristo jiti nawésarami.

¹⁸Chopi nijé 'yemi nimí jerigá rukué: ¿Kecha si'néami echi jaré Israeli pagótami ma námalaré Riosi Ra'íchala? Ne bichíwali si'néami aboni ma námali Riosi Ra'íchala, mapujiti je'ná jerigá osirúami ju echo'ná Riosi Ra'íchala oselíwalachi:

Echi jaré Riosi jiti nawésami ra'íchala ma galá námtami níili echo'ná suníami jena'í wichimóbachi.

Ayénachó aboni nawésawala ma galá námtami níili echo'ná ne buchuwiina jena'í wichimóbachi.

¹⁹Chópini auchecho jerigá rukué: ¿Acha bichíwali ju mapu echi jaré Israeli pagótami ketasi cho machí je'ná jeyiri? Ketasi echirigá ju, mapujiti aboni galá machí mapurigá je'ná jerigá osirúami ju echo'ná Riosi Ra'íchala oselíwalachi mapalí echi Moisesi osali mapurigá Riosi jeanili:

Nijeni we galá olima echi auché jaré isena pagótami, echijiti 'yemi Israeli pagótami ne wabé kichima aboni.

Nijeni we galá olima echi auché jaré isena pagótami mapu ketasi galá machí Nijé Ra'íchala, a'lí 'yémítamo echijiti ne wabé na'áwabo.

²⁰A'lí pe wakinana echi Isaíasi ayénachó arigá je'ná jerigá osali mapurigá Riosi jeanili:

Echi jaré isena pagótami mapu chabénala ketasi galá tamí machináali, aboni ma galá tamí machili.

A'lí Nijeni ma nawali echo'ná echi auché jaré yuwa mapu chabénala ketasi tamí ali.

²¹Ayénachó echi jaré Israeli pagótami jiti rugá echi Isaíasi je'ná jerigá osali mapurigá Riosi Binói jeanili: Nijeni sinibí niráa we bayé jaré pagótami mapu ketásirapé njewa. Chopi aboni wabé tamí sayérami ju.

Echi jaré pe okuá Israeli pagótami mapu ma galá ku'wíratami ju

11 A'lí jípini je'ná jerigá 'yemi nimí rukué: ¿Acha Riosi ma waminá ariweli echi jaré Binói pagótamawala Israeli anilíwami? ¡Ketasi chirigá! Nijé Pablo bilé ju echi jaré Israeli pagótami. Ayénachóni bilé ju echi jaré Abrami kúchala kúchuwala niráa. Ayénachó nijé bilé ju echi Benjamini anilíwami rojuáami. A'lí Riosi ma tamí ku'wírali. ²Chabé ki'yá jonsa Riosi aneli echi jaré Israeli pagótami Binói níwara pagótami niráa. A'lí jípi Riosi ketasi chirigá ariweli aboni. ¿Kechátamo machí 'yemi mapurigá osirúami ju echo'ná Riosi Ra'íchala oselíwalachi echi Elíasi jiti rugá? Mapujiti echi Elíasi wabé wi'nijili echi jaré Israeli pagótami mapalí binói jeaneli Riosi: ³Keni Walubélawa, aboni ma ko'yali si'néami echi auché jaré Mujé jiti nawésami rijói. Ayénachó aboni ma najúnali echi jaré Mujé ri'obáwala. A'lí nijeni bi'neli ripili mápuni Mujé jiti nawesa, chopi aboni ayénachó tamí mi'lináali. ⁴Chopi Riosi ku nijéwaga je'ná jerigá aneli: ¡Abijí tamí yuwa tibí kichao mili rijói, ibili niráa, mapu ke cho bacháami chokoba jaga o'wikeli echi Ba'ali anilíwami amachíkarawami namuti! ⁵A'lí nijé Pablo 'yemi nimí ané mapu jípi rawé achigórígá abijí tibí jaré Israeli pagótami mapu Riosi ne wabé galigá chapili mapurigá Binói níwala pagótami niráa. ⁶A'lí Riosi ketasi tamujé tamí chapili mapujiti tamujé aboni, siné káachi, ne wabé galabé olali. Chopi Riosi ne bichíwali tamujé tamí chapili

chopi mapujiti Binói tamujé tamí wabé galeli, mapujiti Riosi ne bichíwali ne wabé galéami ju.

⁷ Je'ná jerigá ikili: Echi jaré wikabé Israeli pagótami sinibí nakili mapurigá Riosi ku'wírama aboni, chopi aboni ketasi ku'wíratami níili, mapujiti aboni ketasi galá bichíili Riosi Ra'íchala. A'lí echi jaré pe okuá mapu Riosi chapili mapurigá Binói níwala niráa, aboni ayena ku'wíratami níili. A'lí echi auché jaré mapu ketasi ku'wíratami níili, aboni chopi waminá biwáratami níili, sulachí niráa. ⁸ Echirigá ikili mapurigá je'ná jerigá osirúami ju echo'ná Riosi Ra'íchala oselíwalachi: Riosi 'yali mapurigá aboni ketasi galá machimea Binói Ra'íchala, mapujiti aboni ketasi nakili bichífinala. Echirigá Riosi 'yali mapurigá aboni ketasi ritema aboni busila jiti, ayénachó mapurigá aboni ketasi námama aboni nakala jiti. A'lí echi jaré Juríosi pagótami echirigá ju jipi rawé yénasí. ⁹ Ayénachó echi Rabiri jeaní (mapurigá osirúami ju echo'ná Riosi Ra'íchala oselíwalachi):

Echi jaré Juríosi pagótami wabé kaníliga omawa mapujiti aboni mayé mapu Riosi wabé kanira aboni yuwa,

chopi ketasi echirigá ju, mapujiti aboni wabé chati oláami ju.

A'lí aboni waminá suwábarami níima mapurigá jaré namuti misútami niráa.

¹⁰ ¡Galá níima mapurigá aboni we busugachi niráa nílama, mapurigá aboni ma ketasi riwimea!

¡Galá níima aboni sinibí niráa bunárami níisa mapurigá ne wabé uchérami niráa!

Mapurigá ku'wíratami níili echi auché jaré isena pagótami mapu ketasi Juríosi níili

¹¹ Jipi nijeni jerigá rukuema: ¿Acha ma sinibí niráa miná ariwérami níima echi jaré Juríosi pagótami mapujiti aboni we chati ologá chakena niráa rujuili? ¡Ketasi chirigá níima! Si'lwinárigá jipi rawé echi auché jaré isena pagótami ma galá nawésarami ju Riosi Ra'íchala mapujiti echi jaré Juríosi pagótami mapu bachá niráa nawésarami níili ketasi nakili nijéwanala. A'lí echi auché jaré isena pagótami galá bichífiga ku'wíratami níili, mapurigá echi jaré Juríosi pagótami echijitti ayénachó nakimea bichífinala pe waminánomí. ¹² Jípita ma riwali mapurigá echi auché jaré jena'í wichimóbachi piréami pagótami ku'wíratami níili mapujiti echi jaré Juríosi echirigá chati olali. Ayénachóta riwali mapurigá echi auché jaré isena pagótami ku'wíratami níili mapujiti echi jaré Juríosi pagótami echirigá ke bichíiga, chakena niráa rujuili. Echijítita mayé mapu echi auché jaré isena pagótami, ne suníami jena'í wichimóbachi piréami, waminabi ne wabé simírami ku'wíratami níima waminánomí mapalí ne si'néami echi jaré Juríosi pagótami galá bichífima Jesucristo niráa.

¹³ A'lí 'yemi isena pagótami, nijeni 'yemi mi je'ná jerigá ané: Riosi ma tamí nawésanalaga júuli, mapurigani 'yemi mi nawésama máputamo ketasi Juríosi pagótami ju. Echijítini mayé mapu ne wabé simírami 'wérali ju mapurigani ne bichíwali 'yemi mi echirigá nawésama Riosi Ra'íchala. Ayénachó nijeni sinibí ruyé echi jaré Juríosi pagótami mapurigá Riosi tamí júuli nawésanala 'yemi isena pagótami. ¹⁴ Echirigani olá mapurigá jaré nijé binói pagótamawala, siné káachi, achigórigá nakimea bichífinala mapurigá 'yemi isena pagótami ma galá bichíili. A'lí nijeni waminabi echirigá olama mapurigá auché jaré Juríosi pagótami arigá ku'wíratami níima. ¹⁵ Mata riwali mapurigá echi auché jaré isena pagótami jena'í

wichimóbachi piréami ma ku wikawárami níili Riosi jiti mapujiti Binói ketasi omérali nareya echi jaré Juríosi pagótami mapurigá Binói níwala pagótami niráa. Echijítita mayé mapu echi auché jaré isena pagótami waminabi ne wabé simírami ku'wíratami níima waminánomí rawé mapalí echi jaré Juríosi pagótami ma galá narétami níima Riosi jiti. Echalí ne wabé simírami galabé níima, mapujiti achigórigá níima mapurigá echalí rawé mapalí echi jaré suwíiami auchecho ku pirélama.¹⁶ A'lí echi jaré Israeli pagótami aní mapu echi bilé rimé mapu ne bachá niráa uchaliwa, sinibí Riosi níwala ju. Echijiti bichíwali ju mapu ne suwaba echi batusí ayénachó Riosi níwala ju. A'lí echi jaré kí'yá piréami bachá jáwami Israeli pagótami Riosi níwala níili, echijiti waminánomí rawé echi auché jaré wikabé aboni kúchala kúchuwala ayénachó Riosi níwala níima. A'lí bicheta ayénachó achigórigá aniboa mapalí bilé olivo anilíwami rakéami namuti nawala Riosi níwala ju, echalí ne suwaba echi olivo otowala ayénachó Riosi níwala ju. A'lí echi jaré wikabé Israeli pagótami arigá mapuyiri Riosi níwala olivo anilíwami rakéami namuti ju.

¹⁷A'lí echi jaré Juríosi pagótami mapurigá binói otowala níili echi olivo anilíwami rakéami namuti yuwa. Chopi jaré aboni waminá ripunárami niráa níili mapujiti aboni ketasi bichíili Jesucristo niráa. A'lí 'yemi máputamo ketasi Juríosi pagótami ju, echo'ná nachúcharami níili mapurigá isena otowá niráa echo'ná olívochi. A'lí bichétamo echirigá sébali otowá níriya echo'ná bilénapi nawéamichi echi auché jaré olivo otowala yuwa, mapurigá ne bichíwali galabé olivo otowala niráa, mapujítitamo ma achigórigá narema riwéali mapurigá Riosi bichíwaga aneli echi Abrami mapu binói 'yárami níima riwéali.¹⁸ Echijiti 'yemi isena pagótami máputamo ma galá bichíili Jesucristo niráa, ketasi mayesi máputamo waminabi simírami galabé ju ketasi mapurigá echi jaré Juríosi pagótami mapu ayénachó galá bichíili. Átamo echirigá mayésagá, jipi galá ku 'natasi mapurigátamo isena otowá niráa nachúcharami níili echo'ná bilénapi nawéamichi echi ne bichíwali olivo otowala yuwa. A'lí 'yemi ketasi ju máputamo iwébanata echi galabé olivo nawala, chopi si'winárigá echi galabé olivo nawala 'yemi mi galá iwébanata.

¹⁹A'lí 'yemi isena pagótami siné káachi tamí jeanema: Ne bichíwali ju, chopi echi jaré olivo otowala waminá ripunárami níili mapurigá tamujé echo'ná galabé olívochi nachútarami níbo.²⁰ Galá ju, chopi echi jaré Juríosi pagótami waminá 'yérami níili mapurigá jaré otowá ripunárami niráa, mapujiti aboni ketasi galá bichíili. A'lí 'yemi echo'ná galabé olívochi nachúcharami niráa níili mapujítitamo ayena galá bichíili. Echijiti ketasi nóchaga 'nátami níisi, chopi aboni niráa galá tibútasi máputamo sinibí galá bichíyami níbo.²¹ Mapujiti Riosi waminá 'yeli echi jaré Juríosi mapujiti aboni ketasi galá bichíili, achigórigá mapurigá echi jaré olivo otowala waminá ripunárami níili. A'lí Riosi 'yemi mi waminá 'yema 'yemi isena pagótami, átamo ketasi galá bichíisagá.²² Galá 'natasi mapurigá Riosi ne wabé galabé ju, chopi Riosi ayénachó kastigo 'yama echi jaré ke bichíyami pagótami. Riosi waminá 'yeli echi jaré pagótami mapu ketasi bichíili, achigórigá mapurigá echi jaré otowá waminá ripunárami níili, a'lí aboni chakena niráa rujuili. Chopi Riosi ne wabé galabé níili 'yemi mi yuwa máputamo galá bichíili, chopi arigá 'wérali ju máputamo waminabi bichíibo mapurigá Binói 'yemi mi ku'wírama. Mapujiti átamo ketasi waminabi galá bichíisagá 'yémitamo ayénachó waminá 'yérami níbo, achigórigá mapurigá echi jaré otowá waminá ripunárami níili.²³ A'lí a echi jaré Juríosi pagótami ayénachó galá bichíisagá, echalí aboni ayénachó narétami

níima, mapujiti Riosi wabé omérami ju auchecho ku nachútiya aboni mapurigá echi jaré otowá niráa.²⁴ Mapujiti a 'yemi máputamo ketasi Juríosi pagótami ju waminá ripunárami níisagá echo'ná biléana chakena nirúami olívochi jonsa, a'lí átamo si'winárigá nachútarami níisagá echo'ná echi galabé olívochi, a'lí Riosi waminabi omérami ju ku nachútiya echi jaré Juríosi, mapujiti aboni ju echi ne bichíwali olivo otowala niráa. A'lí Riosi auchecho ku nachútalama aboni echo'ná aboni níwala olivo.

**Pe waminánomí si'néami echi jaré Juríosi pagótami ku
wikawárami níima mapurigá aboni chati olali**

²⁵ Keni ritémawa nijeni nakí máputamo je'ná jerigá galá machiboa, mapurigá chabénala ketasi cho galá machirúami níili, mapurigátamo ketasi mayebo mapu 'yemi aboni ne wabé simírami machíami niráa ju. Nijeni nakí máputamo machiboa mapurigá jaré echi Isaeli pagótami ne wabé biwarali aboni sulálachi. A'lí aboni chopi echirigá biwáratami níima mapuyénasí suwaba mo'wimea echi jaré isena pagótami, si'néami mapu ikí galá bichíima riwéali.²⁶ A'lí mapalí ma echirigá ikisá, echalí ne sinéami echi jaré Isaeli pagótami ku'wíratami níima, mapurigá echo'ná Riosi Ra'íchala oselíwalachi je'ná jerigá osirúami ju:

Echi Walubela Ku'wíriami nawama echo'ná Riosi walúlawalachi Siónachi anilíwachi jonsa, a'lí Binói ku wikawama ne suwaba mapurigá echi Jakobo kúchala kúchuwala chati olali.

²⁷ Ayénachó Riosi Binói jeaní:

Je'ná jerigá katiwámani aboni yuwa echalí mapalí Nijeni ku wikawama aboni chati olalila.

²⁸ Jipi rawé echi jaré Juríosi pagótami wabé sayera Riosi mapujiti aboni ketasi bichíili Binói Ra'íchala. Chopi mapalí aboni ketasi bichíili, echalí 'yemi isena pagótami nawésarami níili Riosi Ra'íchala. A'lí 'yémitamo galá bichíili. Chopi Riosi arigá ne wabé galé echi jaré Isaeli pagótami mapujiti Binói chabé ki'yá jonsa chapili echi jaré aboni 'wénawala ki'yánala piréami mapurigá Binói níwala pagótami niráa.²⁹ A'lí Riosi ketasi auchecho ku 'yema echi kónawami mapu Binói ma njiali. Chopi mapalí Riosi sinepi niráa bayé echi pagótami mapurigá aboni Binói níwala níima, a'lí Riosi sinibí niráa echirigá bayé aboni.³⁰ 'Yemi isena pagótami máputamo ketasi Juríosi pagótami ju chabénala tarapé nijéwami nilitamo Riosi. Chopi jipi rawé Riosi arigá 'yemi mi natimá mapalí echi jaré Juríosi pagótami ma ketasi nijéwali Binói Riosi.³¹ Jipi echi jaré Juríosi pagótami ketasi nijéwali Riosi, achigórigá mapurigá 'yemi isena pagótami chabénala ketasi nijéwali. A'lí echirigá ikili mapurigá Riosi ayénachó wabé natimaga ku wikawama aboni, achigórigá mapurigá Binói 'yemi mi ne wabé natimaga ku wikáwali.³² Mapujiti Riosi ariweli mapurigá ne si'néami pagótami achigórigá ketasi galá nijéwami níima. Chopi Riosi ne wabé natimá ne si'néami pagótami. Ayénachó Binói ku wikawama ne si'néami mapu ikí wikáwali tánama.

³³ ¡Riosi ne suwaba namuti machíami ju, ne wabé simírami 'nátami ayénachó! Tamujé jena'í wichimóbachi piréami ketásita omero ku irétaga ruyá mapurigá Riosi nakí olánala. Nibilé chota omero machiyá mapurigá Binói sinibí galabé ju.³⁴ Mapujiti ke wesi ne sébali galá machili mapurigá echi Walubela Riosi 'nátali. Ke wesi galá oméralli binériya echi Walubela Riosi.³⁵ Nibilé wesi oméralli bachá niráa

ayá jaré namuti echí Walubela Riosi, mapurigá echijiti aboni pe waminana ku natétarami níima. ³⁶ Mapujiti Riosi nijá suwaba namuti. A'lí suwaba namuti Riosi jiti niwárami níili. Ayénachó suwaba namuti niwárami níili mapurigá Riosi níwala níima. ¡Echijiti ne walubéraga anérami nílaga Riosi ne sinibí niráa! ¡Echirigá níflaga!

Galá níima máputa galá bichíiga pirélabo Riosi

12 Kení ritémawa 'yemi nimí ané mapu Riosi ne wabé galabé natimáami ju. Echijiti 'yemi nimí risúu anigá taní máputamo aboni niráa 'yabo Riosi, galá akami niráa. A'lí bichétamo echirigá galá 'yárami níibo Riosi mapurigá Riosi echijiti galá kanílama. A'lí we galá níima máputamo echirigá bichíibo Riosi sulachí niráa. ² A'lí ma ketasi ologá pirélasi mapurigá echí auché jaré jena'í wichimóbachi piréami ologá piré. Chopi si'winárigá ne galabé 'natasí mapurigátamo echirigá ne wabé galabératami niráa pirélabo. A'lí bichétamo echirigá galá machiboa chuyiri ju mapurigá Riosi nakí máputamo olabo. Echirigátamo machiboa chuyiri ju echí ne wabé galabéala. Ayénachótamo machiboa chuyiri ju mapu Riosi echijiti ne wabé kaníila. Ayénachótamo machiboa chuyiri ju echí mapu ne wabé sébali galabératami ju.

³ Riosi ne wabé galigá tamí júuli mapurigá níjeni 'yemi mi nawésama Binói wabé Galabé Ra'íchala. Echijiti níjeni si'néami 'yemi mi ané mapu ke wesi 'yemi waminabi wabé simírami o'wéala niráa 'natabo 'yemi aboni niráa. Chopi galá níima ibili 'yemi ne galá bichíwali 'natasí mapujiti Riosi 'yali ibili niráa mapurigátamo bichíibo Jesucristo niráa. ⁴ A'lí ibili niráa tamujé sapala wikanáami niráa nachukámi ju. Chopi tamujé ronola ketasi achigórígá oláami ju mapurigá tamujé sikala. Nibilé cho tamujé busila achigórígá oláami ju mapurigá tamujé nakala. ⁵ Achigórígáta ju tamujé máputa napawika bichíí Jesucristo niráa. Ne bichíwali ibili niráa tamujeta wikabé niráa ju, chopi Jesucristo yuwa, si'néami tamujeta arígá a'nagupi napawíkami niráa ju, mapurigá bilepi rijói sapala, mapurigá Jesucristo sapala niráa.

⁶ A'lí Riosi tamujé tamí 'yali mapurigata ibili niráa si'nárigá olabo, mapurigá Binói nakili ibili tamujé tamí 'yánala. Echijiti galá níima ibili niráa sébali galá olasa mapurigá Riosi 'yali ibili olánala. Echijiti a Riosi tamujé tamí 'yásagá mapurigata nawisabo Binói Ra'íchala, galá níima máputa ne sébali galá nawisabo mapurigá Riosi tamujé tamí bichírali. ⁷ A'lí a Riosi tamujé tamí 'yásagá mapurigata omérabo ku'wíriya echí auché jaré, galá níima máputa ne galabé niráa ku'wírabo aboni. A'lí echí mapu galá machiko binériya Riosi Ra'íchala, galá níima échiko sinibí echirigá binérasa. ⁸ A'lí echí mapu galá machí kanílatiya echí auché jaré, galá níima échiko sinibí niráa echirigá olasa. A'lí echí mapu kóríma níjako, galá níima si'néami chópirigá 'yasa. A'lí echí mapu galá machiko nuleya echí auché jaré pagótami, galá níima échiko sinibí galabé 'nátaga nulasa. A'lí echí mapu omérako kówiya echí jaré wabé tisúwati, galá níima échiko wabé kaníliga niráa kówasa.

Galá níima mapu echí jaré mapu ikí bichíí Jesucristo niráa sinibí galabé ologá pirélama

⁹ Ne galá galesi a'nagupi ne sulachí niráa. Chopi ne wabé kichisi suwaba chati oluwáwami. Sinibí ne galabé olasi. ¹⁰ Sinibí galá níima 'yemi a'nagupi galesa mapurigá ritémktami niráa, ne wabé galéami. Ayénachó galá níima 'yemi ibili niráa

nakisá mapu echi auché jaré ritémtami ne bachá o'wéalatami níima. Ayénachó galá níima máputamo a'nagupi galá nilabo.

¹¹ Ne galá jiwerási 'yemi. Ketasi nasinákuli níisi. Ne sulachí niráa galá nakigá nochasi, echi Walubela Jesucristo nóchala olayá.

¹² Ne galá kaníliga pirérasi mapujítitamo galá bichíí mapu Riosi 'yemi mi ku'wírama. Sinibí kilí niráa anachasi mapalítitamo risúu olálami ju. Ne sinibí niráa táníga ra'ichasi Riosi yuwa.

¹³ Sinibí ku'wírasí echi auché jaré mapu ikí bichiyami ju Jesucristo niráa, mapalí aboni wabé newaléami ju. Sinibí galá naresi echi auché jaré pagótami mapu ikí kólasiya 'yena echo'ná 'yemi pirélachi.

¹⁴ Galabé anesi echi jaré mapu 'yemi mi wabé chati chibi olá. Riosi yuwa táníga ra'ichasi mapurigá Riosi galá ku'wírama aboni. Ketasi chopi tansi mapurigá Riosi kastigo 'yama echi jaré aboni.

¹⁵ Ne galá kanílasi echi auché jaré pagótami yuwa mapu ikí ne galá kanílami ju. Chopi ayénachó natimaga nalákasi echi auché jaré pagótami yuwa mapu ikí nalákami ju.

¹⁶ A'nagupi ne galá karigá pirélasi. Ketasi nóchaga 'nátami níisi. Chopi mapurigá echi jaré tabéala niráa níisi. Ketasi mayesi mapu 'yemi aboni ne wabé machíami ju.

¹⁷ Ketasi ku kuwana nimíkasi echi auché jaré mapu arigá 'yemi mi risúu olá. Chopi sinibí ne galabé olasi si'néami echi auché jaré pagótami yuwa. ¹⁸ Ne suwaba galabé niráa olasi mapu ikítitamo omero mapurigátamo echijiti ne galá kilí ologá pirélabo si'néami echi auché jaré pagótami yuwa. ¹⁹ Keni ritémawa, ne wabé galérami, ketasi ku kuwana nimisi mapalí auché jaré 'yemi mi risúu olá. Chopi aliwesi mapurigá Riosi kastigo 'yama echi auché jaré chati oláami, mapujiti je'ná jerigá osirúami ju echo'ná Riosi Ra'íchala oselíwalachi: Echi Walubela Riosi jeaní: Chopi Nijeni kastigo 'yama echi jaré chati oláami. Nijeni sinibí ku natétama, kastigo agá. ²⁰ Ayénachó je'ná jerigá osirúami ju: A mujé sayérawala wabé 'lówami nírasagá, ne galá kowi mujé. A'lí biché a wabé balachéami nírasagá, galá 'ya ba'wí mapurigá bajima, mapujítimi je'ná jerigá olíiga, ne wabé riwélatama echi binói. ²¹ Ketasi ariwesi mapurigá echi chati oluwáwami 'yemi mi suwaba waminá omérama. Chopi si'winárigá sinibí ne wabé galabé ologá, suwaba waminá omérasi 'yemi echi chati oluwáwami.

13 Galá níima mapu si'néami pagótami ne galá nijéwama echi jaré aboni o'wéalawala, mapujiti Riosi Binói nijali mapurigá echi jaré o'wéala arigá o'wéala niráa níima jena'í wichimóbachi. Ayénachó Riosi jáwali si'néami echi jaré o'wéala mapu ikí nirú jena'í wichimóbachi nuláami. ² A'lí echi jaré mapu echirigá sayérami ju echi jaré o'wéala, aboni ayénachó sayera Riosi nulalila. A'lí aboni kastigo 'yárami níima mapujiti aboni echirigá sayérali echi jaré o'wéala. ³ Mapujiti echi jaré o'wéala ketasi majáriami ju echi jaré galabé oláami yuwa, chopi ayena wabé majáriami ju echi auché jaré chati oláami yuwa. Átamo ketasi nakisáagá máputamo majáratami níibo echi jaré o'wéala jiti, sinibí galabé ologá pirélasi 'yemi. A'lí echi jaré o'wéala 'yemi mi galabé oláami anema. ⁴ Mapujiti echi jaré o'wéala Riosi jiti jawárami níili mapurigá aboni 'yemi mi ku'wírama. Chopi átamo chati olásagá, a'lí bichétamo ne bichíwali majabo, mapujiti si'néami echi jaré o'wéala ne wabé o'wéala niráa jawárami níili mapurigá aboni echirigá omérama kastigo ayá echi jaré chati oláami. A'lí Riosi Binói echijiti jáwali aboni. ⁵ Echijiti arigá 'wérali ju máputamo ne galá nijéwabo echi jaré o'wéala mapurigátamo ketasi kastigo

'yárami níibo, ayénachó mapujítitamo ma galá machí mapu ne galá ju echirigá níjéalawa. ⁶Ayénachó 'yémítamo sinibí echijiti níjí wenomí mapalí echi jaré 'yemi o'wéalawala 'yemi mi taní, mapujiti echi jaré 'yemi o'wéalawala chopi olá Riosi nóchala mapalí aboni ne bichíwali nulé echi pagótami mapurigá Riosi nakí.

⁷Echijiti galá níjisi ne suwaba mapu ikí 'yemi o'wéalawala 'yemi mi nulé níjinala. Ayénachó ne galá níjewasi echi jaré 'yemi o'wéalawala. ⁸Ke bilé namuti yiri wikesi echi auché jaré. Chopi sinibí a'nagupi wabé galesi, mapujiti echi mapu sinibí galá galeko echi auché jaré, échiko echirigá ma galá olali mapurigá Riosi nulali olánala. ⁹Chabé ki'yá Riosi je'ná jerigá nulali: Ketásitamo chuwé bilétari yuwa kochisí. Ketásitamo wesi miliisí. Ketásitamo chigosí. Ketásitamo 'yékaka ra'ichiasi. Ketásitamo korusi echi auché jaré níwala namuti. A'lí bichétamo sinibí galá níjewami níibo ne suwaba Riosi nulalila mapalítamo galá níjewa je'ná bilepi nulalíwami: Ne galá galé echi auché jaré pagótami achigórigá mapurigami galá galé a mujé binói niráa. ¹⁰Echi jaré mapu galá galéami juko ketásirapé risúu olá echi auché jaré pagótami. Ayénachó echi jaré mapu galá galeko echi auché jaré pagótami, échiko echirigá sébali níjewaga olá mapurigá Riosi nulali.

¹¹Ayénachó suwaba je'ná jeyiri jiti galá machisí 'yemi mapu jipi rawé ma we muweli echi chati oluwáwami. Echijiti ma sébachi ju mapurigata ku galá machíami niráa 'natabo, mapurigá bilé kochíami ma ku busuréami niráa, mapujiti jipi rawé waminabi ne wabé mulubé ju mapalí echi Walubela Jesucristo ku nawama jena'í wichimóbachi. Echijiti ma waminabi ne wabé mulubé ju echalí rawé mapalí tamujé bichíyami suwaba ku'wíratami níibo, ketasi mapurigá chabé rawé mapalí jonsa tamujeta bachá niráa bichííli Jesucristo niráa. ¹²Echirigá ma wabé wi'libeko rokogó niráa ju. Chopi ke 'me ayó ch'ilimea. Echijiti ma galá níima máputa ariwebo ne suwaba chati oluwáwami mapurigá jena'í wichimóbachi piréama pagótami chiná niráa olá rokogó niráa. Galá níima mapu tamujeta wabé jiwréabo Jesucristo yuwa, echirigá chapigá ne suwaba mapu Riosi tamujé tamí 'ya mapurigata sontarsi niráa nakobo echi chati oluwáwami sayéraga, mapujítita ketasi rokowárali niráa 'yena, chónpita echo'ná galá rayénachi niráa 'yena echi Walubela Jesucristo yuwa. ¹³Echijiti galá níima mapu tamujé bichíyami sinibí galabé ologá pirélabo mapurigá galá ju echo'ná ne galabé rayénachi niráa 'yénaluwa. Ketásita tékaka pirélabo, nibileta chati chuwé ologá omowabo. Ketásita chuwé bilétari yuwa kochiboa, nibileta chati chuwé olabo. Ketasi nakobo auché jaré yuwa, nibileta korupo auché jaré níwala namuti, nibileta korupo mapurigata o'wéalatami níibo mapurigá echi auché jaré o'wéala. ¹⁴Si'winárigá sinibí ariwesi mapurigá echi Walubela Jesucristo 'yemi mi binérama galabé ologá pirélatiya. A'lí ketasi waminabi 'natasi mapu churigátamo chati chuwé olabo mapurigá 'yemi aboni chopi nakí olánala.

Ketasi sayérasí echi auché jaré 'yemi ritémawala

14 'Yemi napawika bichíyami galá naresi echo'ná 'yémichi echi auché jaré mapu ketasi cho galá bichíyami ju, chopi ketasi ariwesi mapu aboni binéraga nawésama, mapujiti aboni ketasi cho ne galá bichíyami ju. ²Mapuré jaré pagótami bichíí mapu galá ju ne suwaba chibi yiri namuti ko'wawa. Chopi auché jaré ketasi cho 'me galá binératami ju Riosi Ra'íchala. Aboni chopi ko'wá echi jaré namuti kilibá. Aboni ketasi ko'wá echi sapá. ³A'lí 'yemi máputamo suwaba chibi yiri ko'wako, ketasi kawélasi echi auché jaré mapu ikí ketasi ko'wá jaré namuti.

A'lí 'yemi máputamo ketasi ko'wako jaré namuti nibilé kawélasi echi auché jaré mapu ne suwaba chibi yiri ko'wako, mapujiti Riosi Binói ma galá nareli echi auché jaré ritémktami.⁴ A'lí ¿chigátamo mayé 'yemi máputamo we kawela echi auché jaré mapu si'nú piónawala ju? Echi auché jaré ritémktami chopi Riosi piónawala niráa ju. A'lí Riosi chopi anema mapu echi jaré Binói piónawala galá olá, mapu aboni ketasi galá olá keremá. Ayénachó Riosi Binói ne galá omérabi ju olílya mapurigá Binói piónawala echirigá ne galabé olama.

⁵ Auché biléana cho jerekó: Jaré pagótami ne wabé omérabi niráa mayé jaré ibili rawé. Chopi auché jaré mayé mapu ne suwaba rawé chopi a yiri ju. Galá níima ibili echi jaré ritémktami aboni niráa ne galá machisá mapurigá aboni sinibí olá mapurigá Riosi nakí.⁶ Echi jaré mapu wabé omérabi niráa mayé isini rawé, aboni echirigá olá mapurigá echi Walubela Riosi waminabi walubéraga anérabi níima. A'lí echi auché jaré mapu ketasi wabé omérabi niráa mayé echalí isini rawé, aboni ayénachó echirigá olá mapurigá echi Walubela Riosi achigórígá waminabi walubéraga anérabi níima. A'lí echi jaré mapu ne suwaba chibi yiri namuti ko'wako, abóniko echirigá olá mapurigá echi Walubela Riosi echirigá waminabi walubéraga anérabi níima, mapujiti aboni walú natétara 'ya Riosi. A'lí echi auché jaré mapu ketasi ko'wako jaré namuti, aboni ayénachó echirigá olá mapurigá echi Walubela Riosi ayénachó achigórígá waminabi walubéraga anérabi níima. Ayénachó aboni walú natétara 'ya Riosi.

⁷Mapujiti ke wesi tamujé aboni ikí ikita piré. Nibilé wesi tamujé aboni ikí ikita suwiboa. ⁸A'lí waminabi pirélasagá, tamujeta chopi ologá pirélabo mapurigá echi Walubela Riosi nakí máputa olabo. A'lí ata suwiságá, tamujé chopi suwiboa mapurigata echi Walubela Riosi yuwa muchibo. A'lí mapuyénasita abijí piré, ayénachó mapalita ma suwisá, tamujé sinibí niráa echi Walubela Riosi níwala ju. ⁹Mapujiti echi Walubela Jesucristo waminá mukuli, ayénachó Binói auchecho ku owínali mapurigá Binói ne Walubela níima echi jaré suwfámi yuwa, ayénachó echi auché jaré abijí piréami yuwa.

¹⁰Chopi 'yemi ¿churékulátamo wi'nijí echi auché jaré 'yemi ritémawala? ¿Churékulátamo ke 'me nirá echi auché jaré 'yemi ritémawala? Mapujiti arigá 'wérali ju mapu ne si'néami tamujé echo'ná bacháami echi Walubela Jesucristo yuwa jábabota waminánomí rawé, mapurigá Binói galá machíratama tamujé olalila mapurigata ibili niráa olali. ¹¹Mapujiti je'ná jerigá osirúami ju echo'ná Riosi Ra'íchala oselíwalachi:

Echi Walubela Riosi jeaní: Nijeni ne bichíwali sinibí niráa bitélama.

Ayénachó ne bichíwali ju mapu ne si'néami pagótami bacháami tamí yuwa chokoba jábama, waminánomí rawé.

A'lí ne si'néami aboni ne machiná niráa rumea mapu Nijeni ne Walubela Riosi ju.

¹²Echirigá ne wabé 'wérali ju mapu tamujé ibili niráa ku ruyebo Riosi mapu churigata ologá piréali tamujé aboni.

Ketasi chati olírasí echi auché jaré ritémktami

¹³Echijiti ma ketasi galá níima máputa a'nagupi wi'nijibo. Chopi si'winárigá sinibí ne suwaba galá 'nátaga olasi mapurigátamo ke siné chati olírabo echi auché jaré 'yemi ritémawala, nibilé cho mapurigátamo binérabo aboni chati oláriya. ¹⁴A'lí

nijeni machí mapu galá risénsia ju máputa kopoá ne suwaba chibi yiri ko'wáami mapu ikí nirú. A'lí bicheni je'ná jerigá ne bichíwali mayé mapujítini galá bichiyami ju echí Walubela Jesucristo niráa. Chopi a bilé rijói mayésagá mapu bilé ko'wáami ketasi risensia ju ko'wáwa, echalí ne bichíwali ketasi risensia níima mapurigá echí ko'mea echiyiri ko'wáami. ¹⁵ A'lí a jaré mujé ritémawala we o'monáratami níiságá mapujiti mujé arigá ko'wá bilé ko'wáami mapu aboni ketasi risensia ju ko'wawa, echalimi ketasi galigá olá mapalimi ko'wá echiyiri ko'wáami. Echijiti ketasi biyiri olasi mapurigá auché jaré echijiti arigá waminá 'wigama, chopi mapujiti mujemi wabé ko'nali echiyiri ko'wáami, mapujiti echí Walubela Jesucristo arigá mukuli echí jaré aboni chati olalila jiti. ¹⁶ Echijiti ketasi biyiri olasi 'yemi mapurigá echí auché jaré pagótami echijiti chati sití ra'ichama echí jaré namuti jiti mapu 'yémitamo galá bichíiga olá. ¹⁷ Mapujiti ketásita muchibo echo'ná ripá riwigachi mapo'ná Riosi galá nulá atí chopi mapujítita ko'wá echí wabé galabéala, nibiré cho mapujítita bají echí we galabéala. Chópita echo'ná muchibo mapujiti echí Wabé Galabé Riosi Iwigala tamujé tamí 'yali mapurigata ne galá wachínaga oláami níibo, ayénachó mapurigata galá kilí ologá pirélabo, ayénachó mapurigata galá kanílabo. ¹⁸ A'lí Riosi Binói ne wabé kaníila mapalí echí pagótami je'ná jerigá ologá bichíiko echí Walubela Jesucristo niráa. Ayénachó echí jaré pagótami jena'í wichimóbachi piréami we galá nirá echí jaré bichiyami mapu je'ná jerigá ologá bichiyami ju.

¹⁹ A'lí galá níima máputa waminabi echirigá olísabo mapurigata echijiti galá kilí ologá pirélabo, ayénachó mapurigata waminabi galabé bichíirabo a'nagupi. ²⁰ Chopi ketasi waminá ri'yéchasi echí mapu Riosi Binói olali, mapujiti a 'yémitamo kosáagá echí jaré namuti mapu echí auché jaré mayé mapu ketasi risénsia ju mapu aboni ko'mea echiyiri, echalí aboni ayénachó siné káachi ko'mea echiyiri, chopi aboni echirigá kosáagá we chati olama mapujiti aboni mayé mapu ketasi risensia ju ko'wáwa echiyiri. Ne bichíwali ju mapu ne suwaba ko'wáami galá ju ko'wawa, chopi 'yémitamo arigá chati olá mapalítamo ko'wá echí jaré namuti mapu auché jaré mayé mapu ketasi risensia ju mapu aboni echiyiri ko'mea, mapujítitamo echirigá ko'ogá olílabo mapurigá echí auché jaré echirigá chati olama. ²¹ Ne galá níima 'yemi ketasi kosá sapá, nibilé bajisa suguí, nirapé bilé namuti kumératasa mapurigá bichíi echí auché jaré 'yemi ritémawala, nibilé mapurigátamo chakena a'wapo aboni. Chopi sinibí ne suwaba galá olasi mapurigátamo waminabi galá bichíirabo echí auché jaré 'yemi ritémawala. ²² Mapurigá 'yémitamo ma galá bichíi, echirigá waminabi ne galá bichíisi mapurigá Riosi 'yemi mi bichíirali. Ne wabé kanírama echí jaré pagótami mapu ne galá bichíiga olako ne suwaba mapu ikí aboni olá. ²³ Chopi si'néami echí jaré mapu ikí ko'wáko jaré namuti mapu aboni mayé mapu ketasi risensia ju ko'wáwa echiyiri, aboni we chati ologá ko'wá, mapujiti aboni ketasi galá bichíiga ko'wá. A'lí ne suwaba mapu ikí echí jaré pagótami ketasi galá bichíiga olako, échiko chati oluwáwami niráa ju echí pagótami yuwa.

Galá níima ibili niráa tamujé galá kanílatasa echí auché jaré pagótami

15 A'lí galá níima tamujé máputa ma galá bichiyami ju, waminabi kilí niráa bichíirasa echí auché jaré mapu ketasi cho bichíi mapu aboni galá omero ko'wá ne suwaba namuti. Galá níima tamujé waminabi ku'wílasa aboni. Ketasi galá níima tamujé olasa mapurigá tamujé aboni chopi nakí olánala. ² Galá níima ibili tamujé galá kanílatasa echí auché jaré, ne suwaba galabé oluwáwami

jiti, mapurigá aboni ne bichíwali ku'wíratami níima, ayénachó mapurigá aboni echijiti waminabi galá bichíllatami níima. ³Mapujiti echi Walubela Jesucristo Binói tarapé cho chopi olali mapurigá Binói nakili olánala. Chopi si'winárigá ikili Binói yuwa mapurigá echo'ná Riosi Ra'íchala oselíwalachi je'ná jerigá osirúami ju mapurigá echi Walubela Jesucristo jeaneli echi Riosi Onorúami jeanigá: Echi jaré chati oláami pagótami mapu mi wabé cha anigá ra'íchali, aboni ayénachó echirigá achigórigá tamí wabé cha anigá ra'íchali. ⁴Mapujiti ne suwaba mapu ikí chabé ki'yá osirúami níili echo'ná Riosi Ra'íchala oselíwalachi, ne suwaba echirigá osirúami níili mapurigá tamujeta echijiti binératami níibo mapurigata waminabi galá bichíibo mapu Riosi ne bichíwali tamujé tamí ku'wírama achigórigá mapurigá Binói bachá niráa anili mapu tamujé tamí ku'wírama riwéali. A'lí bicheta echirigá bichíibo mapujiti Riosi Ra'íchala tamujé tamí binera mapurigá Riosi tamujé tamí wabé natimá, ayénachó mapurigá galá níima máputa kilí niráa buwebo mapuyénasí suwaba echirigá ikimea, mapurigá bachá niráa osirúami níili. ⁵A'lí echi Walubela Riosi ju mapu 'yemi mi 'ya máputamo echirigá kaníraga buwebo. Echijiti nijeni nakí mapu Riosi 'yemi mi ku'wírama mapurigátamo waminabi a'nagupi wabé galigá pirélabo mapujititamo Jesucristo yuwa ju. ⁶Mapurigátamo si'néami napawika chópirigá waminabi walubéraga anebo Riosi, echi mapu Onolá ju echi tamujé Walubélawala Jesucristo.

Echi auché jaré isena pagótami nawésarami níili echi Galabé Riosi Ra'íchala

⁷Echirigá galá galigá naresi a'nagupi, achigórigá mapurigá echi Walubela Jesucristo ayénachó ma tamujé tamí nareli, mapurigá Riosi echijiti waminabi walubéraga anérami níima. ⁸Mapujiti nijeni 'yemi nimí ané mapu echi Walubela Jesucristo we ku'wírimiya nawali echi jaré Juríosi pagótami. Echalí Jesucristo echirigá ologá 'nérali mapu Riosi ne wabé bichíwaga ra'íchami ju, mapujiti Binói Jesucristo ne sébali olali mapurigá Riosi chabé ki'yá bachá niráa aneli echi jaré ki'yá piréami tamujé Juríosi pagótawala mapu echirigá ne bichíwali olárami níima riwéali. ⁹Echi Walubela Jesucristo ayénachó echirigá olámiya nawali mapurigá echi auché jaré isena pagótami, mapu ketasi Juríosi ju, ayénachó waminabi walubéraga anema Riosi, mapujiti Binói ne wabé natimáami ju, mapurigá je'ná jerigá osirúami ju echo'ná Riosi Ra'íchala oselíwalachi:

Echijiti nijeni inama mi waminabi walubéraga aneya echo'ná echi auché jaré isena pagótami yuwa.

Ayénachó nijeni ne wabé galá nawajiga, nimí waminabi walubéraga anema.

¹⁰A'lí echo'ná auché biléana Riosi Ra'íchala oselíwalachi je'ná jerigá osirúami ju: Ne wabé kaníslasí si'néami 'yemi auché jaré isena pagótami echi jaré Riosi níwala pagótami yuwa.

¹¹A'lí auché biléana je'ná jerigá anirúami ju:

'Yemi máputamo ketasi Juríosi pagótami ju, ne wabé walubéraga anesi echi Walubela Riosi.

'Yemi si'néami pagótami anesi mapu Riosi ne wabé Walubela ju.

¹²Ayénachó echo'ná Riosi Ra'íchala oselíwalachi echi walula Isaíasi chabé ki'yánala je'ná jerigá osali:

Waminánomí rawé nawama bilé ranarúami mapu echi Isaí riwéami rijói ranala níima.

A'lí Binói mapurigá bilé Súami níima echo'ná biléana masánachi.

A'lí échiko Walubela niráa wilárami níima echi auché jaré isena pagótami yuwa.

A'lí aboni galá bichíima Binói niráa.

¹³ A'lí tamujeta galá bichíi mapurigá Riosi waminabi tamujé tamí ku'wírama. Echijiti nijeni nakí mapu Riosi 'yemi mi wabé kanílatama, ayénachó mapurigá Riosi 'yemi mi 'yama mapurigátamo kilíi ologá pirélabo, mapujítitamo galá bichíi Binói. A'lí Riosi echirigá 'yemi mi 'yama mapurigátamo echijiti abijí waminabi galá bichíibo, mapujiti echi Wabé Galabé Riosi Iwigala 'yemi mi jiwrata.

¹⁴ Kení ritémawa, nijeni ne galá machí mapu 'yémítamo ne wabé galabé oláami ju, ayénachó máputamo ne wabé galá machíami ju suwaba namuti, ayénachó máputamo galá machí a'nagupi ruyegá binériya. ¹⁵ Chópini arígá 'yemi mi tarapé majaga je'ná jerigá oseli mapurigátamo sinibí ne galá 'natabo je'ná namuti jiti. Ayénachó nijeni je'ná jerigá olali mapujiti Riosi echirigá ne wabé galigá tamí júuli nawésanala je'ná Wabé Galabé Ra'íchali. ¹⁶ A'lí Jesucristo tamí nuleli mapurigani nawésama Riosi Ra'íchala echo'ná echi auché jaré isena pagótamichi. Echijítini we iyena Binói Ra'íchala nawésiya mapurigá jaré echi auché jaré isena pagótami arígá bichíima, mapurigá aboni anchecho ku 'yárami níima Riosi, mapurigá echi jaré Juriosi ayénachó 'yali jaré namuti Riosi. A'lí Riosi echijiti ne wabé kaníila, mapujiti echi Wabé Galabé Riosi Iwigala ma ku galabéatali echi jaré mapu ikí galá bichíi Jesucristo niráa.

¹⁷ Echirigá nijeni galá bichíyami ju echi Walubela Jesucristo niráa, echijiti nijeni wabé galá nirá mapurigani echirigá nocha Riosi nóchala olayá. ¹⁸ Mapujiti nijeni ketasi omero ku ruyá mapu nijé binói wabé 'wérati olali, chópini galá machí mapurigá echi Walubela Jesucristo tamí jiti olali mapurigá echi auché jaré isena pagótami galá nijewami níima Riosi. A'lí echi Walubela Jesucristo echirigá olali mapalí nijeni nawésali Binói Ra'íchala, ayénachó mapalí nijeni galabé ologá bitéali echo'ná echi auché jaré isena pagótami yuwa. ¹⁹ Echalí echi Walubela Jesucristo ne wabé omériga olali mapurigá ke wesi pagótami omero olayá, mapalí Binói tamí 'yali mapurigá nijeni echirigá wabé omériga olama echi Wabé Galabé Riosi Iwigala iwérawala jiti. A'lí nijeni echirigá ne sébali nawésali mapurigá Jesucristo ku wikawama echi jaré mapu ikí galá bichíima Binói niráa. A'lí echo'ná Jerusalémachi nijeni chótali echirigá nawésiya. A'lí bicheni ne suníami echirigá nawésali waminá wabé mikabé Ilírikochi anilíwachi kawírali yénasí. ²⁰ Echirigá nijeni sinibí ne wabé nakili mapurigani nawésama echi We Galabé Riosi Ra'íchala echo'ná kanápuromí mapo'ná echo'ná piréami pagótami tarapé siné cho námali nawésalawami echi Walubela Jesucristo riwalá jiti, mapurigani echirigá ketasi chopi nawésama mapo'ná auché jaré bachá niráa chótali echirigá nawésiya. ²¹ Chopi mapu galá ikimea mapurigá echo'ná Riosi Ra'íchala oselíwalachi je'ná jerigá osirúami ju:

Echi jaré mapu ikí chabénala ke siné ruyérami níili Binói jiti nawésalawami, aboni pe waminánomí galá bichíima.

A'lí echi jaré mapu chabénala ke siné námali ko Binói jiti ruwáwami, aboni pe waminánomí ne galá machimea Binói jiti nawésalawami.

Echi Pablo wabé nakili echo'ná Rómachi siminala

²² Echijiti wisabé mapalini wabé nakili echo'ná Rómachi anilíwachi siminala mapurigani 'yemi mi 'nema, echalí ketásini omérati mapujítini auché jaréana

wikanáami iyénali. ²³Chopi jipi mapujítini ne sébali nawésali ne suníami echo'ná auché jaréana kawichí, ayénachó mapujítini chabénala jonsa wabé nakili 'yemi mi yuwa asinala, ²⁴echijítini mayé mapurigani ke 'me ayó echo'ná Rómachi simírama 'yemi mi 'nésiya mapalini echo'ná Espányachi anilíwachi kawírali simea. A'lí pe waminana mapalini ma kaníliga 'nesa 'yemi, a'lí bicheni mayé mapurigátamo 'yemi tamí ku'wírabo mapurigani kaníliga nawama echo'ná Espányachi. ²⁵Chopi jípini echo'ná Jerusalémachi simea, jaré wenomí togá, echi jaré achigórigá bichiyami ritémtami echo'ná piréami 'yámiya. ²⁶Mapujiti echi auché jaré galá bichiyami ritémtami echo'ná Maseróniachi anilíwachi kawírali piréami, ayénachó echi auché jaré jena'í Akáyachi anilíwachi kawírali piréami ma galá 'nátaga napabuli pe wikabé wenomí, echi jaré wabé tisúwati ritémtami echo'ná Jerusalémachi piréami 'yábiya. A'lí nijeni simea echo'ná Jerusalémachi echi wikabé wenomí togá. ²⁷A'lí aboni ne galá mayeli je'ná jerigá olayá, chopi aboni ne bichíwali echirigá wikelí echi jaré Juríosi ritémtami. Mapujiti chabénala echi jaré Juríosi bichiyami bachá niráa nawésali Riosi Ra'íchala echi auché jaré isena pagótami, echijiti jipi galá níima echi jaré isena pagótami wenomí agá ku'wírasa echi jaré wabé tisúwati Juríosi, suwaba mapu ikí galá bichiyami ju. ²⁸Echirigá mapalini ma sunisa je'ná jerigá olayá, ma sunisa echi wenomí ayá aboni, echalí nijeni simea echo'ná Espányachi anilíwachi kawírali. A'lí 'yemi nimí 'nésama echarí mapalini echo'mí Rómachi simírama. ²⁹A'lí nijeni ne bichíwali mayé mápuni 'yemi mi wabé galá kanflatama mapalini nawama echo'ná 'yemi yuwa, mapujítini 'yemi mi galá nawésama Jesucristo nawésawala.

³⁰Chopi 'yemi nimí tani mapurigátamo tamí yuwa napawika olabo, mapurigátamo sinibí tánabo Riosi mapurigá Binói tamí waminabi ku'wírama. A'lí nijeni echirigá tani mapujítitamo ayénachó galá bichiyami ju echi Walubela Jesucristo niráa, ayénachó mapujítitamo wabé galéami ju mapurigá echi Wabé galabé Riosi Iwigala tamujé tamí 'ya. ³¹Echirigá tansi Riosi mapurigá Binói tamí ku'wírama mapurigá echi jaré ke bichiyami pagótami echo'ná Juréachi piréami ketasi tamí mi'límea. Ayénachó tansi mapurigá echi jaré ritémtami echo'ná Jerusalémachi piréami ne galá nalema je'ná wenomí mápuni aboni 'yánalaga to. ³²Ayénachó tansi Riosi, mapurigá a nakisáagá Binói, nijeni galá kaníliga nawama echo'ná 'yemi mi 'némiya. Ayénachó mapurigani galá isábama mapalini 'yemi mi yuwa atí. ³³Nijeni ne wabé nakí mapurigá echi ne wabé kilí oláami Riosi ne si'néami 'yemi mi yuwa nílama. ¡Echirigá nílaga!

Echi Pablo ripora jaré ritémtami

16 'Yemi nimí tani mapurigátamo ku'wírabo echi mukí, tamujé rijimala, Jebe riwéami, echi mapu sinibí wabé nigúurali echi jaré napawika bichiyami ritémtami yuwa echo'ná Senkréachi anilíwachi piréami. ²Ne galá naresi je'ná mukí, Jebe riwéami, mapujiti binói galá bichiyami ju Jesucristo niráa. Echirigá galá níima olásatamo mapujítitamo napawika bichiyami ritémtami ju binói yuwa. Echirigá ne galá ku'wírasi je'ná mukí Jebe riwéami, ne suwaba namutu mapu ikí newalé binói, mapujiti je'ná mukí sinibí auché jaré wikabé galá ku'wírali. A'lí binói tamí ayénachó we ku'wírali.

³Galá ripórasi echi Prisila, echi Akila ayénachó. Aboni nijé apanérawala ju mapujítita napawika náchali, Jesucristo náchala olayá. ⁴Chabénala aboni tarapé majaga olali tamí ku'wíriya mapuyénasí aboni ne noguí ko'wirúami níli. Echirigá

nijeni ne walú natétara 'ya aboni jiti. Ayénachó si'néami echi auché jaré isena pagótami mapu ikí napawika bichíyami ritémptami ju, aboni ayénachó walú natétara 'ya echi Prisila, echi Akila jiti. ⁵ Ayénachó ripórasi echi auché jaré ritémptami, si'néami mapu ikí napawiko echo'ná echi Prisila, echi Akila kalílachi. Ayénachó galá ripórasi echi Epeneto riwéami rijói, echi mapu nijé apanérawala ju, mápuni ne wabé galé. Echi Epeneto ne bachá níili Jesucristo niráa bichíyami, echo'ná Akáyachi anilíwachi kawírali piréami pagótami yuwa. ⁶ Ayénachó galá ripórasi echi María, echi mukí mapu ne wabé nóchali Jesucristo nóchala olayá echo'ná 'yemi yuwa. ⁷ Ayénachó ripórasi echi Anróniko riwéami rijói, echi Júniasi riwéami rijói asíchiko. Okuánika ayénachó echo'ná Társochi piréami níili, mapo'ná nijeni ochérali. Aboni o'wéala niráa ju echi auché jaré nawésami yuwa, mapu Riosi júuli nawésanala. A'lí okúanika ne bachá bichíili Jesucristo niráa, mapalí nijeni ketasi cho bichíyami níili.

⁸ Ayénachó ripórasi echi Ampíliasi riwéami rijói, echi mapu nijé apanérawala ju mápuni ne wabé galé, mapujítita napawika galá bichíyami ju echi Walubela Jesucristo niráa. ⁹ Galá ripórasi echi Urbano riwéami rijói, echi mapu tamujé apanérawala ju, mapujítita napawika nocha Jesucristo nóchala olayá. Ayénachó ripórasi echi Estákisi riwéami rijói, echi mapu nijé apanerawala ju mápuni ne wabé galé. ¹⁰ Ayénachó ripórasi echi Apélisi, echi mapu wisabé 'néralli echi auché jaré pagótami mapurigá binói galá bichíi Jesucristo niráa. Ayénachó ripórasi echi jaré bichíyami echo'ná Aristóbolo bitélachi muchúwami. ¹¹ Ne galá ripórasi echi Erorioni riwéami rijói mapu ayénachó echo'ná Társochi bitéami ju. Ayénachó ripórasi echi jaré echo'ná Narsiso bitélachi muchúami, si'néami mapu ikí galá bichíyami ju echi Walubela Jesucristo niráa. ¹² Galá ripórasi echi okuá muguí bichíyami, echi Trijena riwéami, echi Trijosa riwéami ayénachó. Aboni okuánika ne wabé nóchali, echi Walubela Jesucristo nóchala olayá. Ayénachó ripórasi echi mukí, tamujé rijimala Pérsila riwéami, echi mapu tamujeta we galé. Échiko ayénachó ne wabé nóchali echi Walubela Jesucristo nóchala olayá. ¹³ Ayénachó ne galá ripórasi echi Rujo riwéami rijói mapu ne galabé bichíyami ju echi Walubela Jesucristo niráa. Ayénachó ripórasi echi Rujo iyela, echi mukí mapu ayénachó sinibí mapurigá nijé iyela niráa níili. ¹⁴ Ne galá ripórasi echi Asínirito, echi Jelegónite, echi Érmesi, echi Patróbasi, echi Érmesi; ayénachó ripórasi echi auché jaré ritémptami mapu aboni yuwa muchuwi echo'ná. ¹⁵ Ayénachó ripórasi echi Jilólogo, echi Julia ayénachó, echi Nereo ayénachó, echi Nereo wayela asíchiko, echi Olímpasi ayénachó. Ne galá ripórasi ne si'néami echi auché jaré napawika bichíyami ritémptami mapu echo'ná aboni yuwa muchuwi.

¹⁶ Ne si'néami 'yemi a'nagupi we galigá ripórasi, mapujiti ne si'néami echi auché jaré napawika bichíyami ritémptami ne suníami jena'í wichimóbachi piréami 'yemi mi wabé ripora.

¹⁷ Kení ritémawa 'yemi nimí wabé taní mapurigátamo ne galá machiboa chigá ju echi jaré mapu 'yemi mi wikanáami rojuana. Ayénachó galá machísí chigá ju echi auché jaré mapu 'yemi mi chakena u'lúnali mapurigátamo ketasi waminabi galá bichíibo. ¡Waminá ariwesi echiyiri oláami rijói! Mapujiti echirigá oluwáwami ne wabé sayela mapurigátamo bachá niráa binératami níili. ¹⁸ Mapujiti je'ná echirigá oláami pagótami ketasi galá olá mapurigá tamujé Walubélawala Jesucristo nakí. Aboni chopí olá mapurigá aboni nakí. Ayénachó aboni ne wabé 'yeka echi auché

jaré pagótami mapu ketasi galá binératami ju. A'lí aboni ne wabé su'wérígá niráa ra'icha, chopi aboni arigá echirigá ne wabé 'yékami ju. ¹⁹Ne si'néami echi auché jaré pagótami ma galá machí mapurigá 'yémítamo galá nijéwaga bichíili Jesucristo niráa. Echijiti nijeni ne wabé kaníili, ayénachóni nakí mapu 'yémítamo sinibí we yáati galabé oláami níibo, mapurigátamo ke siné chati olabo. ²⁰A'lí echi Walubela Riosi 'yemi mi 'ya mapurigátamo kilí ologá pirélabo, ayénachó echi Walubela Riosi ke 'me ayó rikema echi riablo, Satanasi riwéami. Echalí Riosi echirigá niyúraga ayénachó rikábama echi Satanasi echo'ná ri'léami 'yemi aboni ralálachi niráa. Nijé Pablo nakí mapurigá echi tamujé Walubélawala Jesucristo sinibí 'yemi mi wabé ku'wírama.

²¹'Yemi mi ripora echi Timoteo, echi mapu tamí yuwa nóchami ju. Echi Lúsio ayénachó 'yemi mi ripora, echi Jasoni ayénachó, echi Sosípato ayénachó. Si'néami aboni nijé ritémawala ju.

²²Nijé, Térasio riwéami ayénachóni 'yemi mi ripora echi Walubela jiti. Nijeni ku'wíriami ju echi Pablo je'ná oselí osayá.

²³Echi Kayo riwéami rijimá 'yemi mi ripora. Nijé Pablo we kochí jena'í binói bitélachi. A'lí binói ayénachó risensia 'ya ne si'néami echi auché jaré napawika bichíyami. Ayénachó 'yemi mi ripora echi Erasto riwéami, echi mapu walula wenomí tibúami ju jena'í walúlachi piréami yuwa. Ayénachó echi Kuarto riwéami rijimá 'yemi mi ripora.

²⁴Nijé ne wabení nakí mapurigá echi tamujé Walubélawala Jesucristo si'néami 'yemi mi ku'wírama. ¡Echirigá nílaga!

²⁵A'lí jípita waminabi wabé walubéraga anebo echi Walubela Riosi mapu ne galá omérami ju 'yemi mi waminabi jiwrata, achigórigá mapurigá nijeni sinibí aní mapalini nawesa echi Wabé Galabé Jesucristo Ra'íchala. A'lí je'ná jeyiri chopi a yiri ju mapurigá Riosi ma machírali, mapurigá ki'yá chokichí jonsa ketasi siné machíratami níili, mapalí jonsa je'ná wichimoba niwárami níili. ²⁶Chopi jipi je'ná jeyiri ma galá machíratami ju Riosi Ra'íchala jiti, mapurigá osirúami ju echi jaré Riosi jiti nawésami oselíwalachi mapurigá echi sinibí bitéami Riosi ki'yá chokichí jonsa nulali. A'lí je'ná jeyiri ma galá machirúami ju mapurigá ne si'néami pagótami galá nijéwaga bichíima.

²⁷Echi bilepi Walubela Riosi bi'néliju ne wabé galá machíami niráa. Nijé Pablo nakí mapu ne wikabé pagótami sinibí waminabi walubéraga anema Riosi mapujiti aboni galá bichíyami níima Jesucristo niráa. ¡Echirigá nílaga!

Bachá osirúami
mapurigá San Pablo oseli echo'ná
KORÍNTOCHI PIRÉAMI

Echi Pablo osé echo'ná Koríntochi piréami napawika bichiyami

1 Nijé, Pablo, 'yemi nimí osé. Echi Walubela Jesucristo tamí bayeli mapurigá Binói tamí julama nawisánala mapurigá Riosi Binói nakili. Jipi echi rijimala Sóstini riwéami ayénachó tamí yuwa atí.² Nijeni 'yemi nimí osé, 'yemi máputamo napawika bichiyami ju Riosi, echo'ná Koríntochi anilíwachi piréami, si'néami mapu ikítamo Riosi níwala pagótami ju, mapujítitamo napabúrami niráa ju Jesucristo yuwa. A'lí echi Walubela Riosi ma 'yemi mi bayeli mapurigátamo galabé ologá pirélabo, achigórigá mapurigá Binói bayeli echi auché jaré kanápuromí piréami napawika bichiyami ritémtami mapu ikí Jesucristo riwalá jiti tániga ra'íchako Riosi yuwa. A'lí echi Walubela Jesucristo tamujé Walubélawala ju, achigórigá mapurigá Binói ne Walubela ju echi jaré aboni yuwa.³ Nijeni wabé nakí mapurigá Riosi, tamujé Onolá, echi Walubela Jesucristo ayénachó, 'yemi mi wabé kaligá ku'wírama, ayénachó mapurigá 'yemi mi 'yama mapurigátamo ne galá kilí ologá pirélabo.

Jesucristo wabé ku'wírali echi jaré bichiyami

⁴Nijeni sinibí walú natétara 'ya Riosi mapujiti 'yémítamo ma galá ku'wíratami níili mapujítitamo ma galá bichíili echi Walubela Jesucristo. ⁵A'lí mapujítitamo ma napabúrami ju echi Walubela Jesucristo yuwa, echi Walubela Riosi Onorúami ma 'yemi mi ne wabé simírami 'yali suwaba mapu ikítamo newalebo echo'ná 'yemi sulálachi, mapurigátamo ne wabé galá machíami níibo, ayénachó mapurigátamo sinibí ra'íchami níibo suwaba echi ne wabé galabéala. ⁶Jipi ne bichíwali echirigá ikili 'yemi yuwa mapurigá nijeni 'yemi nimí bachá niráa aneli mapalini 'yemi nimí nawésali Jesucristo nawésawala, mapujiti 'yémítamo ma galá bichíili. ⁷Echirigátamo galá 'yárami ju suwaba mapu ikí Riosi nijá, mapurigátamo ketasi biyiri newalebo, echo'ná pachana 'yemi sulálachi, mapuyénasítamo buwé mapurigá echi tamujé Walubélawala Jesucristo ku nawama jena'í wichimóbachi. ⁸A'lí Binói 'yemi mi tibútama mapurigátamo galá bichiyami níibo echalí ne jubá rawé iyénasí, mapurigátamo ketasi biyiri jiti wi'nijírami níibo echalí mapalí Jesucristo ku nawama. ⁹Echi Walubela Riosi sinibí ne bichíwali olá mapurigá bachá niráa bichíwaga anisá. A'lí Binói Riosi ju mapu 'yemi mi bayeli mapurigátamo Binói Ranala, Jesucristo amígowala níibo, echi mapu tamujé Walubélawala ju.

Jaré bichiyami a'nagupi sayerali

¹⁰ Keni ritémawa, nijeni 'yemi mi tani máputamo si'néami a'nagupi ra'íchaga galá ku katiwabo, mapurigátamo ketásirapé a'nagupi nasayérami níibo, mapujiti echí Walubela Jesucristo we nakí máputamo echirigá ku katiwabo. Ketasi galá ju máputamo a'nagupi nasayérabo, chopi galá níima máputamo a'nagupi wabé kaligá pirélabo, mapurigá si'néamitamo chópirigá niráa 'natabo, ayénachó máputamo si'néamika bilénapi chópirigá wabé kanílabotamo. ¹¹ Keni ritémawa, 'yemi nimí je'ná jerigá ané mapujiti jaré echí Kloé riwéami rijói kúchuwala ma tamí ruyeli mapurigá jaré 'yémitamo we a'nagupi na'awa. ¹² Echijiti nijeni 'yemi mi ané mapu ibili 'yemi si'winárigá niráa anítamo, mapujiti jaré 'yemi jeaní: Nijeni echí Pablo yuwa ju. Auché jaré jeaní: Nijeni echí Apolo yuwa ju. A'lí auché jaré jeaní: Nijeni echí Pegro yuwa ju. A'lí auché jaré cho jeaní: Nijé echí Cristo chopi yuwa ju. ¹³ Chopi nijeni 'yemi mi jeanigá rukué: ¿Acha echí Walubela Jesucristo wikanáami niráa rojonárami ju? ¡Ketasi chirigá! ¿Áchatamo mayé mapu nijé Pablo echo'ná biléana kúrsichi michóntami níili 'yemi chati sitíi olalila jiti? ¡Ketásini níili! ¿Acha nijé 'yemi nimí pagoli ba'wí jiti, nijé binói riwalá jiti rugá? Nijeni ketasi echirigá olali. ¹⁴ Nijeni walú natétara 'ya Riosi mapujítini ketasi pagoli ne wikabé 'yemi. Chópini pagoli echí Krispo riwéami rijói, echí Kayo riwéami ayénachó. ¹⁵ Nijé echirigá natétara 'ya, mapujiti ke wesi 'yemi omero echijiti jeaniyá mapu nijeni pagoli 'yemi, nijé binói riwalá jiti rugá. ¹⁶ Ayénachó nijeni pagoli echí jaré Sitéjana riwéami rijói kúchuwala, chopi nijeni ketasi newalá áchaní pagoli auché jaré. ¹⁷ Mapujiti Jesucristo ketasi tamí pagónala júuli, chopi tamí nawisáanalaga júuli echí Wabé Galabé Riosi Ra'íchala. A'lí Jesucristo ketasi nakili mapu nijeni wikabé ra'íchali ne wabé 'nátami, wabé náchaga ra'íchami niráa nawisama. Chopi Binói nakili mapurigani galá machíami niráa nawisama Binói nawésawala, mapurigani chopi waminabi walubélaga anema Binói Jesucristo, mapujiti Binói tamí jiti mukuli echo'ná kúrsichi.

Riosi wabé omériami ju ku wikáwiya echí pagótami mapujiti Jesucristo mukuli aboni chati sitíi olalila jiti

¹⁸ Mapujiti echí jaré pagótami mapu chopi waminá 'wigáami níima mapujiti aboni ketasi bichíinali Riosi Ra'íchala, abóniko chopi mapurigá ke newalite niráa mayé tamujé nawésawala, mapalita nawesa jeanigá mapu Jesucristo mukuli echo'ná kúrsichi tamujé chati sitíi olalila jiti. Chopi tamujé bichiyami, máputa ma ku wikawárami ju, tamujeta galá machí mapu echirigá nawésali, echí wabé galabé Riosi omérawala ju, ¹⁹ mapurigá echo'ná Riosi Ra'íchala oselíwalachi je'ná jerigá osirúami ju:

Riosi jeaní: Olíimani echí jaré wabé machíami pagótami mapurigá aboni ma ketasi waminabi echirigá machíami niráa níima.

A'lí bicheni mapurigá tarapé natéami niráa nílama mapurigá echí jaré wabé 'nátami pagótami we 'nata.

²⁰ Echijiti, ¿chu chirékola, aboni wabé machíami niráa mayesa? ¿Chu chireko, aboni we binériami níisa? ¿Chu chireko, aboni we ra'íchami níisa jena'í wichimóbachi nirúami namuti jiti rugá? Echi Walubela Riosi ma galá 'nérali mapu aboni ke newalite niráa ju, mapujiti aboni ketasi ne bichíwali galá machíami niráa ju. ²¹ Echi Walubela

Riosi ne galá machí suwaba namuti mapurigá Binói olá. A'lí Riosi galá 'nátaga olali mapurigá jena'í wichimóbachi piréami ketasi omérama galá machiyá Binói Riosi, aboni 'nátala chopi jiti. A'lí Riosi chopi nakili ku wikawánala echi jaré mapu ikí galá bichíimako Binói Ra'íchala, mapalí aboni nawésarami níima. Chopi echi auché jaré ke bichíyami arigá ke newalite niráa mayé echi Galabé Riosi Ra'íchala.

²² A'lí echi jaré Juríosi pagótami chopi taní mapu wikabé namuti wabé omériga olárami níima mapurigá ke wesi auché jaré pagótami omero olayá. A'lí echi auché jaré Griego anilíwami pagótami chopi nakí mapu aboni ne wabé machíami níima.

²³ Chopi tamujeta we nawesa Jesucristo jiti rugá, mapurigá Binói echo'ná kúrsichi michóniga mi'lirúami níili. A'lí echi jaré Juríosi pagótami chopi mayé mapu je'ná nawésalawami wabé riwélawami ju. A'lí echi auché jaré isena pagótami chopi mayé mapu je'ná nawésalawami mapurigá ke newalite niráa ju. ²⁴ Chopi si'néami echi jaré Juríosi pagótami mapu ikí Riosi bayeli, ayénachó si'néami echi auché jaré isena pagótami mapu ikí Riosi bayeli, ne si'néami aboni galá machí mapu echi Walubela Riosi wabé omérami ju ku wikáwiya echi pagótami mapujiti Jesucristo mi'lirúami níili echo'ná kúrsichi. A'lí Riosi Binói ne galá machili mapurigá echi jaré pagótami chopi ku wikawárami níima mapujiti echi Walubela Jesucristo mukuli aboni chati sitíi olalila jiti.

²⁵ A'lí jena'í wichimóbachi piréami pagótami mayé mapu Riosi nawésawala mapurigá ke newalite nawésalawami ju, chopi echi Riosi nawésawala arigá waminabi wabé simírami galá machíami ju, ketasi mapurigá echi jaré namuti mapu echi pagótami machí. Ayénachó aboni mayé mapu Riosi ketasi jiwera, mapujiti echi bilepi Riosi Ranala waminá mukuli echo'ná kúrsichi, chopi Riosi arigá waminabi wabé simírami jiwerami ju, ketasi mapurigá echi jaré pagótami mayé.

²⁶ Nibira, keni ritémawa, Riosi 'yemi mi bayeli mapurigátamo Binói níwala níbo, chopi pe okuáa 'yemi wabé galá machíami ju mapurigá echi auché jaré jena'í wichimóbachi piréami mayé, ayénachó pe okuáa 'yémitamo o'wéala niráa ju, ayénachó pe okuáa 'yémitamo echi jaré o'wéala kúchuwala jútamo.

²⁷ A'lí echi auché jaré jena'í wichimóbachi piréami pagótami 'yemi mi ke newalite niráa ané. Chopi Riosi arigá 'yemi mi chapili, 'yemi máputamo ke newalite niráa anérami ju, mapurigá Binói Riosi 'yemi jiti wabé riwélatama echi auché jaré mapu ne wabé machíami niráa mayé aboni niráa. Ayénachó Riosi 'yemi mi chapili, 'yemi máputamo ketasi 'me o'wéala niráa ju, mapurigá Binói Riosi 'yemi jiti wabé riwélatama echi auché jaré mapu ne wabé o'wéala niráa mayeli aboni niráa.

²⁸ Echirigá Riosi ma chapili echi jaré pagótami mapu ke 'me nirárami ju jena'í wichimóbachi. Ayénachó Binói chapili echi jaré mapu wabé kichírami ju echi auché jaré pagótami jiti, ayénachó Binói chapili echi jaré mapu wabé tabéala niráa nirárami ju mapurigá echi auché jaré mapu wabé o'wéala niráa mayé aboni niráa arigá waminá suwábarami níima.

²⁹ A'lí Riosi echirigá olali mapurigá ke wesi pagótami jena'í wichimóbachi piréami omérama ne wabé nóchami 'nataga níliya, bacháami Riosi yuwa.

³⁰ Chopi Riosi Binói ma 'yemi mi napabuli echi Walubela Jesucristo yuwa. Ayénachó Riosi tamujé tamí 'yali mapurigata ne wabé galá machíami níbo, mapujiti echi Walubela Jesucristo ne wabé galá machíami ju. Echijiti Riosi ma tamujé tamí nareli mapurigá Binói níwala niráa, ne wabé galabé oláami mapurigá Binói nakí, mapujiti tamujeta ma bichíili Jesucristo niráa. Echijiti Riosi ayénachó ma tamujé tamí ku wikawali mapurigata chati oláami níli.

³¹ Echirigá galá níima chopi ikisáa mapurigá je'ná jerigá osirúami ju echo'ná Riosi Ra'íchala oselíwalachi: A jaré 'yemi nakisáagá

máputamo nóchaga 'natami níbo, chopi galá níima echirigá nóchaga natami níisa mapujiti echi Walubela Jesucristo 'yemi Walubélawala ju.

Pablo nawesa jeanigá mapu Jesucristo echo'ná kúrsichi michóniga mi'lirúami níili

2 ¹'Yemi keni ritémawa, chabénala mapalini bachá nawali echo'ná 'yemi mi yuwa mapurigani 'yemi mi nawésama echi ne bichíwali Riosi Ra'íchala, echalí nijeni ketasi 'yemi mi ne wabé nóchaga 'nátaga niráa nawésali, nirapeni 'yemi mi ra'íchali mapurigá bilé walubela niráa, mapurigátamo echijiti wabé ba'yórabo nijé ra'íchala. ²Echalí mapalini iyénali echo'ná 'yémichi nijeni chopi nakili mápuni ra'icháma echi Walubela Jesucristo Ra'íchala. Echalini sinibí nawésali jeanigá mapu Jesucristo echo'ná kúrsichi michóniga mi'lirúami níili tamujé chati sitíi olalila jiti. ³Echalini tarapé jiwerámi níili nijé binói niráa, mapalí nijeni echo'ná 'yemi mi yuwa asali, chópini wabé sayilúmaga majali. ⁴Ayénachó mapalini 'yemi mi nawésali Riosi Ra'íchala, echalí nijeni nakili mápuni 'yemi mi bichírama chopi mapujítini ra'íchali echi Walubela Riosi jiweráwala jiti, mapurigá echi Wabé Galabé Riosi Iwigala tamí nuleli. Echalí nijeni ketasi nakili mápuni chopi 'yemi mi nawésaga bichírama mapurigá echi jaré wabé machíami pagótami ne wabé nóchaga 'nátaga nawesali. ⁵A'lí nijeni nakili mápuni 'yemi nimí echirigá nawésama mapurigá 'yémítamo galá bichíibo chopi mapujiti echi Walubela Riosi 'yemi mi echirigá bichíiratali. Chopi nijeni ketasi nakili mapu 'yémítamo chopi bichíibo mapujiti nijeni, siné káachi, 'yemi mi ne wabé machíami niráa nawésama.

Echi pagótami chopi omero machiyá Riosi mapalí echi Wabé Galabé Riosi Iwigala machírali

⁶Chopi tamujeta arígá ne wabé machíami niráa ra'íchata echi jaré mapu ma galá bichíyami ju echi Walubela Jesucristo niráa. Chópita ketasi echirigá wabé machíami niráa ra'icha mapurigá jena'í wichimóbachi piréami chopi wabé machíami niráa ra'icha. Nirapeta wabé machíami niráa ra'icha mapurigá echi jaré o'wéala jena'í wichimóbachi nuláami we ra'icha, echi jaré mapu si'néamika pe waminánomí chopi waminá suwimea. ⁷Chopi tamujeta bachá niráa nawesa echi wabé Galabé Riosi Ra'íchala, mapujiti Riosi suwaba namuti galá machíami ju. Chopi chabénala echi jaré pagótami ketasi cho machili Riosi Ra'íchala, mapujiti Binói ketasi cho 'yalí Binói Ra'íchala osirúami niráa. A'lí ki'yá chokichí jonsa, mapalí Riosi bukulí gayénali je'ná kawí, Binói Riosi arígá sinibí 'nátali mapu churigá Binói tamujé tamí ku wikawama. ⁸A'lí ke wesi jena'í wichimóbachi piréami o'wéala galá machili je'ná mapujiti a galá machiságá, echalí aboni ketásirapé echo'ná kúrsichi michónami echi Walubela Jesucristo, echi mapu ne wabé simírami Walubela ju. ⁹Chopi ne bichíwali ju mapurigá je'ná jerigá osirúwami ju echo'ná Riosi Ra'íchala oselíwalachi:

Echi Walubela Riosi ma katéwali wikabé ne wabé simírami galabé namuti,

echi jaré pagótami 'yánala, si'néami mapu ikí galá galeko Binói Riosi.

A'lí echi pagótami ke siné cho riwali echiyiri ne wabé simírami galabé namuti.

A'lí aboni nisiné námali echiyiri ne wabé simírami galabé namuti jiti

ruwáwami, ayénachó aboni ke siné 'nátali echiyiri ne wabé simírami galabé namuti jiti.

¹⁰Chopi Riosi ma tamujé tamí machírali echiyiri galabé namuti, mapujiti echi wabé Galabé Riosi Iwigala ma tamujé tamí machírali ne suwaba, mapujiti Riosi Iwigala

ne galá machí suwaba namuti. A'lí echí Galabé Riosi Iwigala galá machí suwaba mapurigá Riosi Binói ne wabé machíami niráa 'nata.

¹¹ Mapujiti ke wesi rijói galá machí mapurigá 'nata echí auché bilé rijói, chopí echí binói rijói ne galá machí mapurigá 'nata binói. Echirigá ayénachó ke wesi pagótami galá machí mapurigá 'nata Riosi, chopí echí Wabé Galabé Riosi Iwigala galá machí.

¹² A'lí tamujeta ketasi chati 'nata mapurigá echí auché jaré jena'í wichimóbachi piréami 'nata. Chópita ma nareli echí Wabé Galabé Riosi Iwigala mapurigata galá machiboa ne suwaba mapu ikí Riosi tamujé tamí wabé galigá 'yali. ¹³ A'lí bicheta ayénachó sinibí je'ná jeyiri namuti jiti ruwigá ra'icha, mapurigá echí Wabé Galabé Riosi Iwigala ma tamujé tamí binérati. Chópita ketasi we nóchami niráa 'nátaga ra'icha, mapurigá tamujé aboni siné káachi chopí wabé 'nátami níliréta. A'lí bicheta echirigá irétaga ruyé suwaba echí Galabé Riosi Iwigala níwala namuti echí jaré galá bichíyami pagótami mapu ma níwako echí Wabé Galabé Riosi Iwigala.

¹⁴ A'lí echí jaré pagótami mapu ketasi cho níwa echí Wabé Galabé Riosi Iwigala, abóniko ketasi omero galá machiyá echí Wabé Galabé Riosi Iwigala níwala namuti, mapujiti aboni chopí mapurigá ke newalite namuti niráa mayé. A'lí aboni tarapé chirigá omero machiyá, mapujiti echí Wabé Galabé Riosi Iwigala níwala namuti chopí ju. A'lí aboni ketasi níwa echiyiri Wabé Galabé Riosi Iwigala. ¹⁵ Si'winárigá echí jaré bichíyami mapu ma níwako echí Wabé Galabé Riosi Iwigala, abóniko galá omero machiyá suwaba namuti, acha galabé ju. A'lí echí auché jaré pagótami ketasi chirigá machí churigá echí jaré bichíyami galá omero echirigá machiyá. ¹⁶ A'lí echo'ná Riosi Ra'íchala oselíwalachi je'ná jerigá osirúami ju: Ke wesi galá machili mapurigá echí Walubela Riosi 'nátali. Ke wesi galá omero binériya Binói Riosi. ¡Chopi tamujé máputa ma níwa echí Wabé Galabé Riosi Iwigala, tamujeta arígá omero 'nata achigórígá mapurigá echí Walubela Jesucristo 'nata!

Tamujeta napawika nocha, Riosi nóchala olayá

3 Echijiti 'yemi keni ritémawa, nijeni ketasi omérali 'yemi mi ra'íchiya mapurigá 'yemi galabé nijéwami niráa níusatamo echí Wabé Galabé Riosi Iwigala niráa. Chopí nijeni 'yemi mi ra'íchali mapurigá 'yemi tarapé cho bichíyami niráa níusatamo. Ayena nijeni 'yemi mi ra'íchali mapurigá 'yemi wabé kúuchi niráa níusatamo, mapujítitamo ketasi waminabi bineli echí Walubela Jesucristo níwala namuti, mapalí jónsatamo bachá niráa bichííli. ² Nijeni 'yemi mi ke 'me oméami niráa nawésali, mapujítitamo ketasi cho galá sébali binératami níili Riosi Ra'íchala. Ayénachó echí jaré muví achigórígá we 'ya echí leche bajínala echí jaré aboni kúchuwala kúuchi, mapujiti echí jaré kúuchi ketasi omero ko'yá echí auché jaré ko'wáami biwárami. A'lí 'yemi achigórígá ketasi omérali machiyá echí we oméami binékowami, nibilé chótamo omero machiyá, jípi rawé yénasí. ³ Mapujiti 'yémitamo abijí achigórígá olá mapurigá echí auché jaré pagótami ke bichíyami. Sinibí mapuyénasítamo a'nagupi korúkaka kichí, 'yémitamo abijí achigórígá olá mapurigá echí auché jaré pagótami, ayénachó mapuyénasítamo a'nagupi na'awa, ayénachó mapuyénasítamo ketasi a'nagupi we galé. ⁴ Mapujiti a bilé 'yemi jeanisáagá: Nijeni echí Pablo yuwa ju. A'lí a auché bilé 'yemi jeanisáagá: Nijeni echí Apolo yuwa ju, echalítamo achigórígá olá mapurigá echí auché jaré pagótami ke bichíyami we olá.

⁵ Nijeni ju Pablo, a'lí echí Apolo nijé apanérawala ju. Tamujeta ketasi a aboni niráa o'wéalata, chópita Riosi piónawala niráa ju, máputa 'yemi mi nawesa Riosi

Ra'íchala. A'lí 'yémitamo echijiti galá bichíili Jesucristo niráa. Tamujé ibili chopi olali mapurigá echí Walubela Riosi tamujé tamí júuli olána. ⁶Chabénala mapalí níjeni bachá niráa 'yemi mi nawésali echí Wabé Galabé Riosi Ra'íchala, echalí níjeni ichali echí talí. A'lí mapalí echí Apolo 'yemi mi waminabi binérali Riosi Ra'íchala, echalí binói mapurigá ba'wí ro'wéami niráa níili echo'ná mapo'ná echí talí ichirúami níili. Chopi echí Walubela Riosi ju mapu galá ochérata echí ichirúami, ayénachó Binói ju mapu galá bichíirata echí jaré pagótami. ⁷Echirigá ne bichíwali ju mapu echí icháami ketasi 'me biyiri olá. Nibilé 'me biyiri olá echí ba'wí ro'wéami. Chopi Riosi Binói wabé omériga olá mapurigá echí ichirúami galá ochérama. ⁸A'lí echí icháami chopi a yiri ju echí ba'wí ro'wéami yuwa, chopi ibili niráa arigá ku natétarami níima mapurigá nóchali aboni. ⁹Tamujeta chopi napawika nóchami ju Riosi nóchala olayá. A'lí 'yémitamo mapurigá biléana ipó niráa ju mapo'ná Riosi we icháami ju.

Ayénachó 'yémitamo mapurigá biléana walubé kalí niráa ju mapo'ná Riosi kaliraka nocha. ¹⁰Echi Walubela Riosi tamí wabé galigá 'yali mapurigani galá machíami niráa nochama Riosi kalila niwayá, mapalini nawésaga binera Binói Ra'íchala. Echirigá níjeni ma ri'lé bachá tigoli, chopi auché jaré rijói ripánala moba ma o'wíñali nóchasiya, Riosi kalila niwayá. Ne wabé galá níima, ibili niráa ne galá 'natasa mapu churigá aboni nocha echirigá kaliraya, Riosi kalila niwayá. ¹¹Mapujiti ma ri'lé bachá tigótami ju Riosi kalila, mapujiti Jesucristo Binói ju mapurigá echí ri'lé bachá tigótachi. Echijiti ke wesi omero auchecho si'winárigá ri'lé bachá tigoya. ¹²Chopi auché jaré wikabé ma echirigá kaliraya niráa nocha echo'ná tigótachi niráa, Riosi nóchala olayá. Jaré we galá nocha echí wabé natéami echo'ná tigoya niráa, mapurigá echí wabé natéami oro anilíwami niráa tigoya, echí auché bilé wabé natéami plata anilíwami niráa tigoya keremá, ayénachó auché jaré echo'ná nocha echí jaré wabé natéami rité wabé ba'yóami niráa tigoya keremá. Chopi auché jaré ketasi 'me galá nocha, a'lí aboni ayénachó echo'ná tigótachi tigoka nocha, echí kúuchi tábala niráa ro'wayá, echí kasalá niráa keremá, echí sonó niráa keremá, chopi aboni nóchala echirigá ketasi galá ju. ¹³Mapujiti mapurigá ibili echirigá nóchali, Riosi nóchala olayá, suwaba ne galá machirúami níima echalí ne jubá wi'nijíwachi rawé. Echalí ne suwaba mapurigá ibili olali ne galá 'nératami níima, echo'ná walú na'írali ikósaga, acha galabé nochárami níili. ¹⁴A'lí echalí abijí ketasi ikótaka tibísagá, echo'ná na'írali mapurigá echí bilé rijói nóchaga tigoli echo'ná tigótachi, echalí echí bilé rijói galá ku natétarami níima, mapurigá binói echirigá we galabé nóchaga olali. ¹⁵Chopi a suwaba ikótasagá mapurigá echí bilé rijói nóchaga kalirali echo'ná tigótachi, echalí échiko ayena suwaba wikama, chopi echí binói rijói arigá ku'wírami níima, chopi mapurigá bilé rijói miná ni'yúami niráa echo'ná biléana kalí ikótachi jonsa.

¹⁶¿Kéchatamo machí mapu 'yémitamo echí ne bichíwami ri'obá, Riosi ri'obáwala niráa ju? ¿Kéchatamo machí mapu echí Wabé Galabé Riosi Iwigala echo'ná pachana 'yemi mi yuwa bíté? ¹⁷A'lí a bilé rijói suwábasagá echí Riosi ri'obáwala, echalí Riosi Binói miná suwábama echí rijói, mapujiti echí Riosi ri'obáwala ne wabé galabératami ju. A'lí 'yemi aboni jútamo echí ne bichíwali Riosi ri'obáwala mapujítitamo galá bichíyami ju.

¹⁸¡Ke wesi 'yemi 'yékasi a aboni niráa! Chopi a jaré 'yemi ne wabé machíami niráa mayésagá, mapurigá echí auché jaré jena'í wichimóbachi piréami we machíami niráa

mayé aboni niráa, galá níima mapurigátamo tarapé namuti machíami niráa níbo. Echalí Riosi omérama 'yemi mi ne bichíwali wabé galá machíami niráa niwayá. ¹⁹ Mapujiti mapurigá jena'í wichimóbachi piréami ne wabé machíami niráa mayé, echirigá Riósiko chopi mapurigá ke newalite niráa mayé. A'lí echo'ná Riosi Ra'íchala oselíwalachi je'ná jerigá osirúami ju: Riosi wabé omériga olá mapurigá echi jaré wabé machíami arigá waminá omératami níima, chopi mapujiti aboni echirigá ne wabé machíami niráa mayé aboni niráa. ²⁰ Ayénachó echo'ná je'ná jerigá osirúami ju: Echi Walubela Riosi galá machí mapu echi jaré wabé machíami pagótami 'nátala ketasi galá ju. ²¹ Echijiti ke wesi 'yemi wabé nóchaga nátami nílasi chopi mapujítitamo nijéwaga olá mapurigá bilé rijói jena'í wichimóbachi bitéami 'yemi mi nulé, mapujiti ne si'néami echi jaré galabé oláami bichíyami 'yemi ritémawala ju. ²² Nijé, Pablo, 'yemi rijimala juni, echi Apolo ayénachó 'yemi rijimala ju, echi Pegro ayénachó. A'lí echi Walubela Riosi tamujé tamí 'yali mapurigata pirélabo jena'í wichimóbachi, echijiti suwaba galá ju. Chopi ata suwiságá, echalita sinibí niráa ku pirélabo echo'ná ripá riwigachi, echijiti ne suwaba galá níima. Jipi tamujeta galá bichíiga piré Riosi jena'í wichimóbachi, echijiti suwaba galá ju. Waminánomí rawé tamujeta sinibí niráa pirélabo Riosi yuwa echo'ná ripá riwigachi, echijiti ne suwaba galá níima. ²³ ¿Ke chi're echirigá mapuyíripi ikisáagá? 'Yémitamo arigá echi Walubela Jesucristo níwala ju. A'lí echi Walubela Jesucristo Riosi níwala ju.

Echi jaré o'wéala bichíyami Riosi jiti julárami níili nawisánala

4 Echirigá galá níima 'yémitamo galá machiságá mapu tamujé máputa Riosi jiti julárami níili nawisánala chopi ku'wíriami niráa juta echi Walubela Jesucristo yuwa. Binói tamujé tamí nuleli binéranala echi pagótami suwaba echi jaré namuti Riosi Ra'íchala mapu ikí ketasi cho machirúami níili. ² A'lí mapujítita echirigá julárami níili, arigá 'wérali ju máputa ibili niráa ne galá binérabo echi pagótami mapurigá tamujé Walubélawala tamujé tamí nuleli. ³ Chopi nijé binói ketasi ne 'me nirá mapurigá 'yémitamo tamí mayé. Nirapeni ne 'me nirá mapurigá auché jaré o'wéala pagótami tamí mayé. A'lí nijeni ketasi cho aní mapu nijé binói galabé olá, nibilé choni aní mapu nijé binói ketasi galabé olá. ⁴ Nijeni mayé mápuni galá nijéwami níili echi Walubela Jesucristo, chopi nijeni ketasi galá machí suwaba namuti, echijiti nijeni ketasi omero jeaniyá mápuni ne bichíwali galá nijéwami níili. Echi Walubela Jesucristo Binói chopi ne bichíwali galá machí áchani galá nijéwami níili, áchani ketasi galá nijéwami níili, keremá. ⁵ Echijiti ketasi we yáati wi'nijisi 'yemi echi auché jaré. Chopi buwesi mapurigá echi Walubela Jesucristo ku nawama, mapujiti Binói ne galá ku machírama ne suwaba namuti mapu ikí echo'ná rokowárali niráa ketasi cho machirúami ju. Echalí Jesucristo Binói ne suwaba galá ku machiná niráa machírama mapurigá echi jaré pagótami 'nátaga olánali pachana aboni sulálachi niráa. A'lí echi Walubela Riosi anema mapu ibili mapu ikí galabé oláliko, ne bichíwali galabé oláami ju.

⁶Keni ritémawa, nijeni chopi echirigá ra'íchali nijé binói jiti, ayénachó echi Apolo jiti, mapurigátamo binebo ke wesi pagótami wabé o'wéala niráa mayée, chopi mapurigátamo achigórígá 'natabo mapurigá osirúami ju echo'ná Riosi Ra'íchala oselíwalachi. Ayénachó mapurigátamo ketasi wabé nóchami 'nátami níbo mapujiti echi bilé tamujé 'yemi mi binéralli, nirapé mapurigátamo kichibo echi auché bilé tamujé máputa ketasi 'yemi mi binéralli. ⁷Mapujiti ke wesi pagótami mi waminabi

wabé simírami galabérali, ketasi mapurigá echi auché jaré pagótami. A'lí echi Walubela Riosi chopi ju mapu mi 'yali ne suwaba namuti mapu ikí mi níwa. A'lí a Riosi Binói mi 'yásagá ne suwaba, ¿churékula bichemi wabé nóchaga 'nátami ju, mapurigá mujé binói riwala niráa?

⁸Mapurigátamo ne wabé níwami niráa, mapurigátamo ma níwasa ne suwaba mapu ikítamo níwanali. 'Yémitamo ma ne wabé o'wéala niráa mayé, chópitamo mayé mapu tamujé ketasi 'me o'wéala niráa ju. ¡Ne galabé níimili máputamo ne bichíwali ne wabé o'wéala niráa níisatamo, mapurigá tamujé ayénachó péebi niráa o'wéalatabo 'yemi yuwa! ⁹Riosi tamujé tamí júuli nawisánala, chopi nijeni mayé mapu Riosi tamujé tamí ariweli mapurigata ne jubáami niráa níbo. Tamujeta chopi ju mapurigá jaré pagótami mapu waminá ko'wirúami níima riwéali. A'lí tamujeta chopi echirigá ariwérami ju mapurigá echi auché jaré pagótami jena'í wichimóbachi piréami ne wabé 'nátaga, echirigá tamujé tamí 'nema, echi jaré o'wéala Riosi kapitánawala ayénachó. ¹⁰Tamujeta mapurigá ke newalite niráa nirárami juta, mapujítita ne wabé galé echi Walubela Jesucristo. A'lí 'yémitamo mayé máputamo ne wabé galá machí echi Walubela Jesucristo níwala namuti. Ayénachó tamujeta nirárami ju mapurigá tarapé jiwerámi niráa, chopi 'yémitamo mayé máputamo wabé jiwerámi niráa ju. A'lí echi auché jaré pagótami 'yemi mi ne wabé galabé nirá, chopi aboni tamujé tamí wabé kichí. ¹¹A'lí jipi rawé iyénasí tamujeta ne wabé 'locheli, ayénachóta ne wabé balámali, ayénachó we risúu níilita chiní jiti. A'lí echi auché jaré pagótami tamujé tamí we risúu olá. A'lí bicheta ketasi níwa mapo'nata pirélabo. ¹²Ayénachó arigá 'wérali ju mapu tamujeta sinibí ne wabé risigá nochabo, mapurigata ko'ogá pirélabo. A'lí echi auché jaré pagótami tamujé tamí ne wabé chati anigá ra'icha, chopi tamujeta sinibí galabélaga ra'íchaga ku nijewa. A'lí tamujeta ne wabé risúu olárami ju, chópita arigá ne wabé kanílaga anacha. ¹³A'lí aboni wabé kichiga tamujé tamí ra'íchiami ju, chopi tamujeta kilí ruwigá ku ra'icha aboni yuwa. A'lí jipi yénasí aboni tamujé tamí tarapé natéami niráa mayé, mapurigá echi ripuka niráa, mapu echi pagótami we waminá machí pa.

¹⁴A'lí nijé, Pablo, ketasi 'yemi mi je'ná jerigá osé chopi mapurigani 'yemi mi riwératama. Nijeni wabé nakí mapu 'yémitamo suwaba namuti jiti galá ruyératami níbo, mapurigá nijé kúchuwala niráa, mápuni ne wabé galé. ¹⁵Mapujiti átamo níwasagá makói mili niráa binérami mapu 'yemi mi we binera echi Walubela Jesucristo jiti rugá, arigátamo ketasi wikabé niráa oné, mapujiti 'yémitamo galá bichíili Jesucristo niráa, echalí mapalí nijeni 'yemi mi nawésali Riosi Ra'íchala. Echijiti nijeni mapurigá 'yemi onolá ju, mapujítini 'yemi mi echirigá bichírali mapalini 'yemi mi nawésali Riosi Ra'íchala. ¹⁶Echijiti 'yemi nimí ne wabé tani máputamo sinibí achigó yiri olabo mapurigá nijeni olá.

¹⁷Ayénachó echijiti jipi nijeni julama echi Timoteo echo'ná 'yemi mi yuwa. Echi binói mapurigá nijé ranala niráa ju, mapu nijeni wabé galé, mapujiti binói ne galá bichíyami ju Jesucristo niráa. Echalí mapalí echi Timoteo echo'ná nawama, binói 'yemi mi auchecho nawésama jeanigá mapurigá nijeni sinibí ologá bité mapurigá Jesucristo jiti bichíyami niráa, achigórigá mapurigá nijé binói echo'ná kanápuromí iyénaga, echirigá binéraga nawesa echi jaré napawika bichíyami. ¹⁸Chopi jaré 'yemi ma ne wabé nóchaga níli, mapujítitamo mayé mapu nijeni ke siné nawama echo'ná 'yemi 'némiya. ¹⁹Chopi nijeni arigá ke 'me ayó simea echo'ná 'yemi mi yuwa, a echi Walubela Riosi tamí echirigá risénsia 'yásagá. Echalí nijeni galá machimea

churigá omériga olá echí jaré 'yemi máputamo ne wabé nóchaga 'nátami ju, chópini ketasi 'me galabé nilama mapurigá echí jaré ra'íchaga aní. ²⁰ Mapujiti echí jaré pagótami ketasi ne bichíwali galá nijéwaga olá mapurigá Riosi nulá mapalí aboni chopi we ra'íchaga aní mapu aboni echirigá nijéwaga olá. A'lí aboni ne bichíwali galá nijéwami níima mapalí aboni ne bichíwali galá omériga olama achigórígá mapurigá Riosi nulá. ²¹ ¿Churigá bichétamo nakí 'yemi echo'ná Koríntochi piréami? ¿Áchatamo nakí mapu nijeni 'yemi mi yónama, mapalini nawama echo'ná 'yemi mi yuwa? ¿Áchatamo nakí keremá mapu nijeni kilí ologá, wabé galigá 'yemi mi yuwa nawama? Átamo nakisáagá mapu nijeni chopi 'yemi mi we karema, echalí galá níima máputamo galá nijéwami níibo Riosi.

**Echi Pablo nulá mapurigá kastigo 'yárami níima
echí bilé rijói mapu wabé chati olali**

5 ¡Galá machirúami ju mapu bilé rijói 'yemi máputamo bichíyami ju, ma chapili mapurigá binói upila niráa echí mukí mapu binói onolá upila níili, echí jubá móbala asíbami! Echirigá oluwáwami ne wabé simírami wabé chati sitíi ju. A'lí echí auché jaré ke bichíyami pagótami mapu ketasi cho machí Riosi, abóniko ke siné risénsia 'ya mapu auché jaré aboni echiyena wabé chati sitíi olama. ² ¡Chopi 'yemi napawika bichíyami abijí ne wabé nóchaga 'nátami niráa jútamo, mayega máputamo ne wabé galá oláami ju! ¡Si'winárigá waminabi wabé galá níimili máputamo ne wabé o'mónami níisatamo mapujiti bilé rijói 'yemi echirigá chati sitíi olali! Ayénachó galá níimili mapu echirigá chati oláami rijói waminá machí pátami níisa, echo'ná echí auché jaré 'yemi napawika bichíyamichi jonsa. ³ A'lí nijeni ne bichíwali ketasi echo'ná 'yemi yuwa atí jipi rawé, chópini we 'nata mapurigá 'yemi mi yuwa atigá nijé. A'lí bicheni echirigá ma galá 'nátaga wi'nijili echí rijói mapu je'ná jerigá wabé chati sitíi olali, achigórígá mapurigá nijeni ne bichíwali 'yemi mi yuwa atigá niráa. ⁴ Jipi si'néami napawisi 'yemi mapurigá Jesucristo jiti bichíyami niráa. A'lí echalí nijeni we 'natama 'yemi jiti, ayénachó echí Walubela Jesucristo Iwigala wabé omériga ku'wírama 'yemi mapurigátamo galá 'nátami níbo. ⁵ Galá níima mapu echiyiri chati sitíi oláami rijói ma ketasi risénsia 'yárami níima waminabi napawínala echí auché jaré 'yemi napawika bichíyami yuwa. A'lí mapalí echí rijói galá machí mapu echí Satanasi riwéami riabulo chopi ju mapu we nakí mapu binói waminabi echirigá chati sitíi olama, echalí echí binói rijói siné káachi ma ketasi nakimea echirigá chati sitíi olánala. A'lí ma wikáwali tansa, échiko ketasi waminabi nakimea chati sitíi olánala, ayénachó binói galá ku wikawárami níima sulachí niráa, mapurigá binói sinibí bitélama Jesucristo yuwa mapalí Binói ku nawama jenaí' wichimóbachi.

⁶ Ketasi galá ju mapu 'yémítamo wabé nóchaga 'nátami níisa, mayega máputamo wabé galabé oláami ju, mapuyénasí bilé rijói 'yemi echirigá chati sitíi olá. ¿Kéchatamo newalá mapurigá jerigá osirúami ju echo'ná Riosi Ra'íchala oselíwalachi: Echo'ná biléana batusírali bukulíwami nasípomí acheso pe taa batusí ma chokóami, echalí ne suwaba chokólama? ⁷ A'lí echí chati sitíi oluwáwami mapurigá echí batusí chokóami niráa ju, echijiti suwaba waminá 'yesi echí chati oluwáwami echo'ná 'yemi sulálachi jonsa, mapurigátamo ma ketasi waminabi chati sitíi oláami níbo. Echalítamo chopi we galá bi'wíami niráa níbo, mapurigá echí galabé batusí, ke achérami niráa echí chokóami levadura anilíwami, mapurigá echí jaré pani mapu

tamujé Juríosi pagótami walú omáwaga ko'wá. A'lí 'yémitamo ma ne bichíwali bi'wíami ju, mapujiti Jesucristo Binói mi'lirúami níili 'yemi chati sitíi olalila jiti. A'lí Jesucristo mapurigá echi bo'wá niráa ju mapu tamujé Juríosi pagótami mi'yagá ko'wá sinibí mapalita echirigá walú omawa.⁸ Echirigá galá níima mapu si'néamita ne galá bichiiga, wabé galabé olabo. Echalita mapurigá echi jaré Juríosi pagótami níibo mapu omáwaga ko'wali echi jaré pani ke nasówarami echi wabé chokóami levadura anilwami. Chopi ketasi galá níima máputa chati sitíi olabo, mapujiti a echirigá oláságá, echalita níibo mapurigá echi jaré pagótami mapu echo'ná galabé bukulíwami batusírali pe táa chokóami batusí achésuwa.

⁹Chabénala nijeni bachá niráa 'yemi mi oseli jeanigá máputamo ketasi yuwa 'yénabo echiyiri pagótami yuwa mapu we chuwé bilétari yuwa kochíami ju.¹⁰ Nijeni ketasi 'yemi mi ané máputamo arigá waná rojuabo, mapurigá 'yémitamo ma ke siné ra'íchabo echi auché jaré jena'í wichimóbachi piréami mapu echirigá chati sitíi ologá, chuwé bilétari yuwa kochiko. Nirapen 'yemi mi ané máputamo ketasi ra'íchabo echi jaré wabé korúkami pagótami, nirapé máputamo ketasi ra'íchabo echi jaré chigórami, nirapé máputamo ketasi ra'íchabo echi jaré mapu chokoba jaga ra'íchami ju echi jaré amachíkalawami namuti. Mapujiti mapurigátamo ke siné ra'íchabo echi auché jaré chati sitíi oláami pagótami, echalí arigá 'wérali níimi mapu 'yémitamo ma ketasi waminabi pirélabo jena'í wichimóbachi.¹¹ Chopi nijeni 'yemi mi oseli jeanigá máputamo ketasi napawipo auché bilé yuwa mapuyíripi aniko mapu galá bichíyami rijimá ju, mapu arigá chati sitíi ologá chuwé bilétari yuwa kochíami juko, nirapé máputamo napawipo auché bilé yuwa mapu wabé korúkami ju, nirapé máputamo napawipo auché bilé yuwa mapu wabé rikúami ju, nirapé máputamo napawipo auché bilé yuwa mapu chigórami ju. Nijeni 'yemi mi aneli mapu ketasi galá ju mapu 'yémitamo kopoá echirigá chati sitíi oláami ritémtami yuwa keremá.¹²⁻¹³ Mapujiti ketasi risénsia ju mapurigá nijeni wi'nijima echi auché jaré ketasi cho galá bichíyami. Echi Walubela Riosi chopi wi'nijima echiyiri. Chopi arigá 'wérali ju mapu 'yémitamo 'wi'nijibo echi jaré mapu ikí napawiko 'yemi napawika bichíyami yuwa, si'néami mapu ikí arigá chati sitíi oláami ju. Echijiti waminá chakena julasi echi chati sitíi oláami rijói echo'ná 'yemi napawika bichíyamichi jonsa.

Ketasi a'nagupi wi'nijisi bacháami echi jaré ke bichíyami o'wéala yuwa

6 Mapalí bilé 'yemi, auché bilé rijimala yuwa, a'nagupi nasayéraságá, ¿kéchatamo riwélabo echo'ná mapo'ná echi jaré ke bichíyami igúsuwami muchuwi siyá, mapurigá aboni 'yemi mi justicia olfíma? Waminabi galá níimi, 'yemi aboni niráa katiwasa, bacháami echi auché jaré galá bichíyami ritémtami yuwa.² ¿Kéchatamo machí mapu 'yemi napawika bichíyami pe waminánomí justicia olama echi auché jaré jena'í wichimóbachi piréami yuwa? A'lí átamo echirigá oméraságá justicia olayá echi auché jaré jena'í wichimóbachi piréami yuwa, ¿kéchatamo omero echi jaré kúuchi namuti jiti katewa echi auché jaré 'yemi napawika bichíyami ritémawala yuwa?³ ¿Kéchatamo machí mapu tamujé napawika bichíyami pe waminánomí justicia olabo echi jaré o'wéala Riosi kapitánawala yuwa? A'lí ata echirigá oméraságá justicia olayá echi jaré Riosi kapitánawala yuwa, nijeni mayé máputa waminabi galá omero justicia olayá jena'í wichimóbachi piréami ritémtami

yuwa. ⁴A'lí echo'ná 'yemi napawika bichíyami yuwa, a jaré 'yemi echirigá a'nagupi sayérasagá, ¿churékulátamo justicia tani echi jaré igúsuwami ke bichíyami yuwa, mapu ketasi siné napawíami ju echi jaré 'yemi napawika bichíyami yuwa? ⁵Nijeni ne bichíwali 'yemi mi je'ná jerigá ané chopi mapurigani 'yemi mi echirigá pe riwélatama. ¿Kecha pe bilé rijói 'yemi we galá machíami niráa ju, mapu arigá galá machimea justicia olayá 'yemi mi yuwa máputamo si'néami galá bichíyami ritémptami ju? ⁶¿Churékula bichétamo a'nagupi sayéraga justicia tani echi jaré ke bichíyami igúsuwami yuwa?

⁷Ne bichíwali 'yémitamo ketasi galá olá mapalítamo echirigá a'nagupi sayéraga nakichí. ¿Churékulátamo ketasi bachá ariwebo mapurigá echi auché jaré arigá 'yemi mi chati sitíi risúu olama? ¡Arigá waminabi galabé níimili máputamo ariwebo mapurigá echi auché jaré 'yemi mi waminá bujema 'yemi níwala namuti! ⁸Si'winárigá 'yémitamo risúu olá echi auché jaré, ayénachótamo waminá 'ye auché jaré níwala namuti. Siné káachitamo waminá 'ye 'yemi aboni ritémawala níwala namuti.

⁹⁻¹⁰¿Kéchatamo machí mapu echi jaré chati sitíi oláami pagótami ketasi chirigá mo'wimea echo'ná ripá riwigachi mapo'ná Riosi galabé nuláami ju? Ketasi siné ariwesi mapurigá 'yémitamo 'yékarami níibo. Echi jaré chati sitíi oláami chuwé bilétari yuwa kochíami pagótami ketasi chirigá mo'wimea echo'ná ripá riwigachi mapo'ná Riosi galabé nuláami ju. Echi jaré amachíkalawami namuti o'wikéami ketasi cho echo'ná mo'wimea. A'lí echi auché jaré ma niwíkami wikabé chuwé yuwa kochíwami ketasi cho echo'ná mo'wimea, echi jaré rijói mapu auché jaré rijói yuwa chati sitíi ologá napawí mapurigá napéami niráa ketasi cho echo'ná mo'wimea. A'lí echi jaré chigórami ketasi cho echo'ná mo'wimea, echi jaré ne wabé korúkami pagótami ketasi cho echo'ná mo'wimea, echi jaré tékuri ketasi cho echo'ná mo'wimea, echi auché jaré ne wabé simírami chati sitíi ra'íchami ketasi cho mo'wimea, echi auché jaré wabé su'wé anigá 'yékaka 'yésiami nibilé cho mo'wimea. ¹¹A'lí chabénala jaré 'yemi je'ná jerigá chati sitíi oláami níilitamo, chopi mátamo ku bi'wíami niráa niwárami níili. 'Yémitamo ma 'yali aboni niráa, mapurigátamo Riosi níwala pagótami níibo. A'lí Riosi ma 'yemi mi nareli mapurigá Binói níwala mapujítitamo ma bichíili Jesucristo niráa, ayénachó mapujiti tamujé Riósawala Iwigala 'yemi mi echirigá bichírali.

Tamujé sapala arigá Riosi níwala ju

¹²Jaré pagótami aní mapu aboni risénsia níwa mapurigá aboni olama ne suwaba mapu ikí aboni chopi nakí olánala. Ne bichíwali ju, chopi siné káachi jaré namuti mapu aboni nakiko olánala ketasi galá ju oluwawa. Ayena, ne bichíwali ju mapu ibili risénsia níwa mapurigá aboni olama mapurigá aboni nakí olánala, chopi ketasi galá níima mapu aboni chuwé chibi yiri ologá pirélama, mapurigá echi riablo nulé. ¹³Ne bichíwali ju mapu Riosi tamujé tamí 'yali echi jaré namuti ko'wáami mapurigata galá kosá posabo tamujé ropálachi niráa. A'lí Riosi tamujé tamí 'yali tamujé ropala mapurigata galá kosá pirélabo jena'í wichimóbachi. Chopi waminánomí Riosi arigá suwábama tamujé ropala, achigórigá mapurigá Binói suwábama echi jaré namuti ko'wáami. A'lí ketasi bichíwali ju mapu tamujé niwárami níili mapurigata chopi we chati sitíi ologá chuwé bilétari yuwa kochiboa. Tamujeta niwárami níili mapurigata galá bichíiga waminabi walubéraga anebo echi Walubela Riosi. Ayénachó Binói tamujé tamí niwáli mapurigata kaníliga pirélabo jena'í wichimóbachi. ¹⁴A'lí mapurigá

Riosi ma ku owíntali echi Walubela Jesucristo mapalí Binói ma mukúami níili, echirigá Binói achigórigá wabé jiwériga tamujé tamí ku owíntama waminánomí rawé mapalita ma suwíami ju.

¹⁵ ¿Kéchatamo machí mapu ne suwaba 'yemi sapala, bilepi sapá niráa ju, napawika echi Walubela Jesucristo yuwa, mapurigá Binói Jesucristo sapala niráa? Echijiti ketasi chírigá galá níima mapurigá bilé rijói 'yemi arigá bilepi sapá niráa nílatama bilé chati sitíi oláami mukí yuwa mapu si'néami yuwa kochigá nóchami ju; mapujiti si'néami 'yemi bichiyami ma bilepi sapá niráa ju echi Walubela Jesucristo yuwa. ¹⁶ ¿Siné káachi kéchatamo machí je'ná? Mapuyíripi rijói kochisáagá echiyiri chati sitíi oláami mukí yuwa, échiko ma niwárami ju bilepi sapá niráa echi chati sitíi oláami mukí yuwa. Mapujiti echo'ná Riosi Ra'íchala oselíwalachi je'ná jerigá osirúami ju: Okuánika mapurigá bilepi sapá niráa níima. ¹⁷ Chopi mapalí echi jaré pagótami galá bichíiga napawí echi Walubela Jesucristo yuwa, echalí aboni ibili niráa achigórigá bichiyami ju mapurigá echi Walubela Jesucristo niráa.

¹⁸ Echijiti ketasi siné chuwé bilétari yuwa kochisi. A'lí mapalí echi jaré pagótami si'winárigá chati sitíi olá, echalí aboni arigá ketasi sayera aboni sapala niráa; chopi mapuyíripi mapu ikí chuwé bilétari yuwa kochisáagá, échiko ne wabé chati olá, binói sapala sayéraga. ¹⁹ ¿Kéchatamo machí mapu ibili 'yemi bichiyami sapala mapurigá biléana ri'obá ju, echi Wabé Galabé Riosi Iwigala ri'obáwala niráa? A'lí echi Galabé Riosi Iwigala pachana 'yemi yuwa bité, mapujiti Riosi echirigá njiali. Echijiti 'yémitamo ma ketasi 'yemi aboni níwala ju. ²⁰ Echi Walubela Riosi ma 'yemi mi ralali, ne wabé simírami niráa natétaga, mapujiti Binói njiali echi bilepi Binói Ranala mapurigá Binói Jesucristo echo'ná kúrsichi michóniga mi'lirúami níima, 'yemi chati sitíi olalila jiti. Echijiti galá níima máputamo sinibí waminabi walubéraga anebo Riosi mapuyénasítamo piré jena'lí wichimóbachi. Sinibí galabé ologá pirélasi mapurigá Riosi nakí, ayénachó galá bichíisi Riosi echo'ná 'yemi sulálachi niráa, mapujiti 'yemi sulala Riosi níwala ju, ayénachó 'yemi sapala Binói níwala ju.

Echi Pablo galá ruyé echi jaré bichiyami mapu churigá galá níima niwíkowa

7 A'lí mapurigátamo tamí rukugá oseli, nijeni 'yemi mi ku nijéwaga jeané: Ne bichíwali galá níima mapurigá bilé rijói ketasi upesa, ² chopi mapujiti wikabé pagótami arigá chuwé bilétali yuwa kochí, echijiti galá níima ibili rijói 'yemi níwasa kepu upí. Achigórigá galá níima ibili mukí 'yemi níwasa kepu kuná. ³ Galá níima ibili rijói jubéami pirélasa aboni jubila yuwa mapurigá niwíami niráa, ayénachó galá níima ibili muguí kunéami pirélasa aboni kunala yuwa mapurigá niwíami niráa. ⁴ A'lí echi jaré muguí kunéami ketasi níwami ju aboni sapala, chopi echi jaré mukí kunéami sapala arigá aboni kunala níwala ju. Echirigá achigórigá echi jaré rijói jubéami ketasi níwami ju aboni sapala, chopi echi jaré rijói jubéami sapala arigá aboni jubila níwala ju. ⁵ Galá risénsia 'yasi a'nagupi, chopi pe okuá rawé niráa, mapalítamo okuánika siné káachi galá mayé, echalí ketasi risénsia 'yasi, mapurigátamo echalí chopi Riosi yuwa ra'ichabo. A'lí pe waminana galá níima máputamo auchecho siné a'nagupi napawipo mapurigá echi Satanasi riwéami riabolo ketasi 'yemi mi chati chatíi olánatama mapujítitamo wi'llibé rawé jonsa ketasi a'nagupi napawili.

⁶ A'lí nijeni echirigá risénsia 'ya mapalini suwaba je'ná jerigá 'yemi mi ané, chopi nijeni ketasi 'yemi mi echirigá ané mapurigá bilé nulalíwami niráa níisa.

⁷Nijé binói arigá nakí mapurigá ne si'néami echi jaré galá bichiyami rijói ketasi jubéami nílasa, achigórigá mapurigá nijeni ketasi upéami ju. Chopi Riosi Binói 'ya ibili niráa mapurigá aboni pirélama. Jaré ne bichíwali 'yárami ju mapurigá aboni jubema, chopi auché jaré ketasi 'yárami ju mapurigá aboni jubema.

⁸A'lí nijeni ané echi jaré ke cho niwíkami, echi jaré kunápami ayénachó, mapu galá níima aboni ke niwíami niráa nílasa, achigórigá mapurigá nijeni ketasi niwíkami ju. ⁹Chopi a bilé 'yemi ke kanílaságá echirigá bi'neli niráa iyena, arigá galá níima mapu échiko arigá upema, mapujiti waminabi galá níima mapurigá échiko arigá upesa, ketasi mapurigá binói sinibí wabé nílaga inánama bilé mukí yuwa napawínala.

¹⁰Chopi nijeni nulé echi jaré ma niwíkami mapu echi jaré muguí kunéami ketasi ariwema aboni kunala. A'lí nijeni ketasi chopi echirigá nulé, chopi echi Walubela Jesucristo ju mapu echirigá we nulá. ¹¹A'lí a bilé mukí arigá waminá ariwésagá binói kunala, ketasi galá níima mapu echi mukí auchecho ku kunema auché bilé rijói yuwa. Chopi galá níima échiko auchecho ku katéwasa binói kunala yuwa. Ayénachó echirigá achigórigá galá níima mapurigá echi jaré rijói jubéami ketasi waminá ku ariwema aboni jubila.

¹²A'lí nijeni je'ná jerigá ané echi auché jaré: A bilé rijói bichiyami níwasagá kepu upí mapu ketasi cho bichiyami ju, a'lí a echi mukí arigá waminabi nakisáagá echi rijói bichiyami yuwa kuneña niráa bitélanala, echalí ketasi risénsia ju mapu echi rijói bichiyami waminá ariwema binói upila. Echi Walubela Jesucristo ketasi echirigá nulali mapurigá nulalíwami niráa, chopi nijeni mayé mapu galá níima mapu nijeni echirigá binérama. ¹³A'lí a bilé mukí bichiyami níwasagá kepu kuná mapu ketasi cho bichiyami ju, a'lí a echi rijói arigá waminabi nakisáagá echi mukí yuwa upeka niráa bitélanala, echalí ketasi risénsia ju mapu echi mukí miná ariwema binói kunala. ¹⁴Galá níima mapurigá echi mukí bichiyami waminabi kuneña bitélama echi rijói ke bichiyami yuwa mapujiti Riosi sinibí nirá mapu aboni ma galá niwíami niráa ju, mapujiti echi mukí galá bichiyami ju. Ayénachó galá níima mapurigá echi rijói galá bichiyami waminabi upeka bitélama echi mukí ke bichiyami yuwa, mapujiti Riosi sinibí nirá mapu aboni ma galá niwíami niráa ju, mapujiti echi rijói galá bichiyami ju. Si'winárigá níisagá, echalí echi jaré 'yemi kúchuwala achigórigá níima mapurigá echi jaré ke bichiyami pagótami kúchuwala niráa, chopi jipi 'yemi kúchuwala arigá ne bichíwali ma Riosi níwala ju. ¹⁵Chopi a echi rijói upéami ke bichiyami arigá wabé nakisáagá ku ariwénala kepu upí mapujiti echi mukí galá bichiyami ju, echalí arigá ku ariwé. Ayénachó a echi mukí kunéami ke bichiyami wabé nakisáagá ku ariwénala kepu kuná mapujiti echi rijói galá bichiyami ju, echalí arigá ku ariwé. Echirigá ikisáagá, galá níima mapu echi mukí galá bichiyami waminá risénsia 'yasa ku rojuánala, ayénachó mapurigá echi rijói galá bichiyami waminá risénsia 'yasa ku rojuánala, mapujiti Riosi chopi tamujé tamí bayeli mapurigata kilí ologá pirélabo. ¹⁶Mapujiti mujé mukí kunéami ketasi galá machí áchami arigá omérama galá bichíiriya echi mujé kunala. Ayénachó mujé rijói upéami ketasi galá machí áchami arigá omérama galá bichíiriya echi mujé upila.

¹⁷Chopi arigá chúbirigá níisa, galá níima mapurigá ibili niráa 'yemi waminabi achigórigá galabé náchali ologá pirélasa mapurigátamo olali bachánala mapalí Riosi ketasi cho 'yemi mi bayeli mapurigátamo bichíibo Jesucristo niráa. Ayénachó

galá níima máputamo waminabi nóchaga pirélasa mapurigá Riosi 'yemi mi 'yali mapurigátamo olabo. Nijeni echirigá nulé ne suníami piréami napawika bichíyami. ¹⁸ A'lí a Riosi bayésagá bilé rijói mapurigá échiko galá bichíima Jesucristo niráa, mapalí echi bilé ma noligá sikirétami ju, echalí galá níima mapu échiko abijí echirigá tibisa. Ayénachó a Riosi bayésagá auché bilé mapalí échiko ketasi cho noligá sikirétami ju, echalí ketasi galá níima mapu échiko noligá sikirétami níima. ¹⁹ Mapujiti tarapé chiré noligá sikirétami níilawa, nirapé chiré ketasi noligá sikirétami níilawa, chopi ne bichíwali arigá 'wérali ju máputa suwaba galá nijéwaga olabo mapurigá Riosi nakí máputa olabo. ²⁰ Echirigá galá níima mapu 'yémítamo ibili niráa abijí achigórígá galabéala nóchali ologá pirélasabo mapurigátamo galabéala nóchali ologá piréali bachánala mapalí Riosi ketasi cho 'yemi mi bayeli mapurigátamo bichíibo Jesucristo niráa. ²¹ Ami pióntami niráa níisagá chabénala mapalí Riosi mi bayeli, ¿chu chireko? Abijí echirigá nochasa. Chopi ami omérasagá ku machíniya, galá níima mápumi ku machinsa. ²² Mapujiti a bilé rijói bachá niráa nakisáagá bichíinala Jesucristo niráa mapalí binói abijí pióntami niráa ju, ¿chu chireko? Mapujiti ma galá bichíisagá, échiko ma ketasi chopi mapurigá pióntami niráa níima, chopi galá bichiña ku'wírama echi Walubela Jesucristo yuwa jena'í wichimóbachi. Ayénachó echirigá achigórígá bichíwali ju mapu a bilé rijói bachá niráa nakisáagá bichíinala Jesucristo niráa mapalí binói ketasi pióntami niráa ju, echalí échiko ma Jesucristo piónawala niráa ju. ²³ Riosi ma 'yemi mi ku ralali, ne wabé simírami niráa natétaga; mapujiti Binói ma nijali echi Bilepi Binói Ranala mapurigá mi'llirúami níima echo'ná kúrsichi, 'yemi chati sitíi olalila jiti. Echijiti ma ketasi waminabi ariwesi mapurigá echi auché jaré pagótami 'yemi mi nulema chati sitíi olánala, mapurigá aboni piónawala niráa. ²⁴ Kení ritémawa, ibili niráa bacháami Riosi yuwa waminabi echirigá achigórígá nóchaga pirélasi mapurigátamo nóchali chabénala mapalítamo ketasi cho bayérami níili.

²⁵ A'lí echi Walubela Jesucristo ketasi cho tamí 'yali mapu churigani nulema echi auché jaré ke cho niwíami. Chopi nijeni 'yemi mi arigá ruyema mapurigani mayé nijé. A'lí galá níima mapu 'yémítamo echirigá galá tamí nijéwabo, mapujiti echi Walubela Jesucristo wabé tamí natimaka júuli mapurigani olama Binói nóchala. ²⁶ A'lí nijeni galá mayé mapurigá echi jaré rijói ke cho jubéami arigá ketasi jubesa, mapujiti jipi tamujeta ne wabé risúu olárami ju. ²⁷ Echijiti ami ma upéami níisagá, ketasi ariwé kemi upí; chopi ami ketasi cho upéami níisagá, ketasi amí bilé upí. ²⁸ Chopi ami arigá niwíisagá, mujemi ketasi chati sitíi olá. A'lí a bilé tiwé niwíisagá, échiko ketasi cho chati sitíi olá. Chopi echi jaré mapu ikí niwiko arigá wabé risúu nílama, jena'í wichimóbachi piréliya. A'lí nijeni nakí mapu 'yémítamo ketasi echirigá risúu níliami níibo.

²⁹ 'Yemi kení ritémawa, nijeni nakí 'yemi mi je'ná jerigá anénala: Pe téelibi tibí máputa pirélabo jena'í wichimóbachi, echijiti jipi jonsa galá níima mapu echi jaré ma jubéami arigá 'wérali niráa olasa Riosi nóchala olayá, mapurigá ketasi cho jubéami niráa. ³⁰ A'lí echi jaré pagótami sinibí wabé o'mona mapalí jaré aboni ritémawala ma suwí, chopi galá níima máputa arigá waminabi kaníliga olabo, Riosi nóchala olayá, mapurigá ketasi o'mónami niráa. Ayénachó galá níima mapu echi jaré mapu ikí wabé kaníliga omáwako arigá sinibí 'wérali olama, Riosi nóchala olayá, mapurigá ketasi omáwami niráa. Ayénachó galá níima mapu echi jaré mapu ikí wikabé namuti ralako arigá ologá pirélama mapurigá ketasi níwami niráa echi

jaré wikabé namuti. ³¹Ayénachó galá níima mapu echi jaré pagótami mapu wabé kanílgá piré jena'í wichimóbachi arigá ologá pirélama mapurigá je'ná wichimoba kichíiami niráa, mapujiti je'ná wichimoba máputa ritiwá jipi rawé, arigá miná suwibásimi.

³²Nijeni ketasi nakí mapu 'yémítamo wikabé namuti nílaga, wabé 'nata muchibo, mapujiti echi rijói bichíyami mapu ke cho upéami ju chopi 'nata echi Walubela Riosi jiti, mapu churigá binói rijói olama mapurigá echi Walubela Riosi nakí. ³³A'lí echi mapu ma upéami juko we 'nata jena'í wichimóbachi nirúami namuti jiti, ayénachó mapurigá piri jiti wabé kanílatama binói upila. ³⁴A'lí echi jaré muguí kunéami ketasi chópirigá 'nata echi auché jaré ke cho kunéami yuwa, mapujiti echi jaré muguí ke cho kunéami chopi wabé 'nata echi Walubela Jesucristo níwala namuti jiti, mapurigá aboni sapala chopi echi Walubela Jesucristo níwala níima, ayénachó mapurigá aboni aliwala Binói níwala níima. Chopi echi jaré muguí ma kunéami wabé 'nata jena'í wichimóbachi nirúami namuti jiti, mapu piri jiti aboni wabé galá kanílatama aboni kunala.

³⁵Nijeni 'yemi mi je'ná jerigá ané mapurigá 'yémítamo echijiti waminabi ku'wíratami níibo, chópini ketasi je'ná jerigá aní mapurigátamo ketasi kaníлага pirélabo. Nijeni chopi nakí máputamo galabé ologá pirélabo, ayénachó máputamo sinibí galá bichíiga olabo mapurigá echi Walubela Jesucristo nakí.

³⁶Chopi a bilé rijói mayésagá mapu arigá waminabi galá níima mapu bilé tiwé, binói malala, arigá kunesa, mapujiti echi tiwé ma we ochérsimí, echalí galá níima echi onorúami 'yasa echi tiwé mapurigá kunema. Arigá risénsia ju mapu aboni niwima. A'lí ketasi chati sitíi oluwáwami ju echirigá niwíkowami. ³⁷Chopi a bilé rijói ne sulachí niráa mayésagá mapu ketasi galá níima mapu binói malala kunema, échiko ayénachó galá olá mapujiti binói ketasi nakí mapu binói malala kunema, a'lí ke wesi auché jaré bachá niráa 'wérali ané mapu echi tiwé ketasi kunéami níima. ³⁸A'lí echi mapu risénsia 'yako mapu binói malala arigá kunema, échiko galá olá, chopi echi mapu ketasi risénsia 'yako mapu binói malala kunema, échiko waminabi galabé olá.

³⁹A'lí echi jaré muguí kunéami arigá nulérami ju mapurigá aboni pirélama kepu kuná yuwa mapuyéñasí aboni kunala abijí piré. Chopi waminá suwisáagá aboni kunala, echalí echi jaré muguí risénsia níwa mapuyíripi rijói yuwa kunesa, chopi a galá bichíyami níisagá echi Walubela Jesucristo niráa. ⁴⁰Chopi nijeni mayé mapu aboni waminabi kanílama a ketasi auchecho ku kunesa, ayénachóni mayé mapu echi Wabé Galabé Riosi Iwigala echirigá tamí binera.

**Echi Pablo galá ruyé echi ko'wáami jiti rugá, echi mapu
'yárami níili echi jaré amachíkalawami namuti**

8 Jipi nijeni 'yemi nimí osé echi ko'wáami jiti rugá, echi mapu ma 'yárami níili echi jaré amachíkalawami namuti. Tamujé máputa galá bichíyami ju, ne bichíwali ne galá machí suwaba je'ná jeyiri namuti jiti. Echijiti siné káachi, tamujeta we nóchami 'nátami níibi, chopi waminabi galabé níima máputa wabé galebo Riosi, echalita waminabi nakiboa galá bichiinala Binói. ²A'lí a jaré mayésagá mapu aboni wabé machíiami ju, echalí aboni arigá ketásirapé galá machíiami ju mapurigá machisátiré. ³Chopi a jaré galá galésagá Riosi, echalí Riosi Binói ne galá machí aboni.

⁴Nijeni 'yemi mi osé echí jaré ko'wáami jiti rugá, echí mapu ma 'yárami níili echí jaré amachíkalawami namuti. Ne bichíwali ju mapu echí jaré amachíkalawami jena'í wíchimóbachi nirúami ketásirapé tamujé tamí ku'wíriami ju, ayénachó bichíwali ju mapu bilepi chopi nirú Walubela Riosi. ⁵Chopi a nirúlasagá echo'ná ripá riwigachi auché jaré mapu riosi niráa anérami ju, ayénachó a nirúrasagá jena'í wíchimóbachi auché jaré mapu riosi niráa anérami ju, ayénachó a wíkabé nirúrasagá mapu echirigá o'wéala riosi niráa anérami ju, ⁶tamujé bichíyami arígá galá machí mapu bilepi chopi nirú Riosi, echí mapu echí Walubela Onorúami ju. A'lí Riosi Onorúami niwáli ne suwaba namuti mapu ikí nirú. Ayénachó Binói tamujé tamí niwáli mapurigata Binói niwála níibo. Ayénachó bilepi chopi nirú ne wabé Walubela, echí mapu echí Walubela Jesucristo ju. A'lí suwaba namuti mapu ikí nirú, Binói jiti niwárami níili, ayénachó echí Walubela Jesucristo tamujé tamí iwítali.

⁷Chopi jaré mapu ketasi galá binératami ju ketasi cho galá machí je'ná jeyiri, mapujiti aboni chabénala niráa chokoba jaga o'wikeli echí jaré amachíkalawami namuti. Echijiti jipi mapalí aboni ko'wá echí jaré ko'wáami mapu bachá niráa 'yárami níili echí jaré amachíkalawami namuti, echalí aboni mayé mapu aboni echirigá ologá abijí we o'wiké echí amachíkalawami namuti. A'lí aboni galá machí mapu ketasi galá ju echirigá o'wikewa, echijiti aboni mayé mapu wabé chati sitíi oluławámi ju echirigá ko'wawa. ⁸¿Ke chi're a tamujeta arígá kosáagá echí ko'wáami, o ke kosáagá omata? Echi Walubela Riosi tamujé tamí arígá narema ata galá bichíisagá Jesucristo niráa, chopi ata kosáagá echí ko'wáami ketásita waminabi galabératami níibo, nibileta waminabi chati sitíi oláami niráa niwárami níibo ata ketasi kosáagá. ⁹Chopi ne galá 'nátaga olasi mapurigá echí auché jaré ketasi chati sitíi olánalami níima, mapujiti 'yémítamo arígá risénsia níwa mapurigátamo kopoa echiyiri ko'wáami, chopi echí auché jaré ketasi cho 'me galá binératami ju mapurigá 'yemi niráa, echijiti aboni mayé mapu chati sitíi oluławámi ju ko'wawa echiyiri ko'wáami. ¹⁰Mapujiti a mujé mápumi galá machí suwaba je'ná jeyiri, arígá asibásami ko'meya echo'ná biléana mapo'ná jaré amachíkalawami namuti muchuwi, alí a bilé rijimala ke 'me galá binératami mi riwisá echo'ná ko'yami, echalí echí bilé rijimala, siné káachi, ayénachó nakimea ko'náliya echí ko'wáami mapu bachá niráa 'yárami níili echí jaré amachíkalawami namuti, chopi arígá echí binói yuwa, we chati sitíi oluławámi níima. ¹¹A'lí a echirigá ikisáagá, mujé mápumi we galá machíami ju, arígá miná si'wina u'luma echí bilé mujé rijimala mapu ketasi 'me galá binératami ju, mapurigá échiko waminá wíkama. Chopi echí Walubela Jesucristo ayénachó mukuli echí bilé rijimala jiti. ¹²Echirigá biché mapalí 'yémítamo sayera mapurigá bichí echí auché jaré ritémtami mapu ke 'me galá binératami ju, echalítamo echirigá ologá we chati sitíi olá, echí Walubela Jesucristo Binói sayériga. ¹³Echijiti a nijeni echirigá chati sitíi olíratasagá auché jaré nijé ritémawala, mapujiti nijeni arígá ko'wá jaré ko'wáami mapu aboni ketasi risénsia niráa mayé, echalí waminabi galá níima mapu nijeni ke siné kosáa echí sapá, mapurigani ketasi echirigá chati sitíi olíratama echí auché jaré ritémtami.

Echi Pablo julárami níili nawisánala Riosi Binói jiti

9 Ne bichíwali ju mapu Riosi Binói tamí júuli nawisánala Binói Ra'íchala. Echijiti nijeni risénsia níwa mapurigani echirigá nawisama, achigórigá mapurigá echí auché jaré mapu Riosi júuli nawisánala ayénachó risénsia níwa. A'lí nijeni ne galá

machíami niráa riwali echi Walubela Jesucristo mapu tamujé Walubélawala ju. Ayénachó 'yemi aboni galá bichíyami ju jipi rawé mapujiti nijeni 'yemi mi echirigá galá nawésali, echi Walubela Jesucristo nóchala olayá. ²A auché jaré mayésagá mapu Riosi ketasi tamí júuli nawisánala, 'yémítamo ne bichíwali niráa, galá machí mapu Riosi Binói echirigá tamí júuli, mapujiti 'yémítamo galá bichíili Jesucristo niráa mapalí nijeni 'yemi mi nawésali, echijiti 'yémítamo ne galá machí mapu bichíwali ju mapu Riosi tamí júuli echirigá nawisánala.

³Nijeni je'ná jerigá ku nijewa echi jaré mapu tamí sayéraga ra'íchako: ⁴Nijeni ne bichíwali risénsia níwa mapurigani ko'mea echi jaré namuti ko'wáami mapu ikini newalé, ayénachó mapurigani bajima echi jaré bajíwami mapu ikini newalé. ⁵Ayénachó nijeni risénsia níwa mapurigani upema bilé mukí galá bichíyami, ayénachóni risénsia níwa mapurigá nijeni así bayérama mapalini nawésiya iyena, achigórigá mapurigá echi auché jaré olá mapu Riosi ayénachó júuli nawisánala, ayénachó mapurigá echi Walubela Jesu ritémawala olá, ayénachó mapurigá echi Pegro olá. ⁶A'lí echi auché jaré mapu Riosi nawisánala júuli, abóniko ayena risénsia níwa mapu aboni ketasi wabé nóchaga ko'mea, chopi echi auché jaré ritémrtami bichíyami sinibí 'ya aboni echi jaré namuti mapu ikí aboni newalé, mapujiti aboni chopi nócha Riosi Ra'íchala nawesa. Echijiti nijeni, echi Benabé yuwa, ¿kéchata ayénachó achigórigá risénsia níwa, máputa ketasi nochabo mapurigata mepo echi ko'wáami, chopi máputa nawesa 'yénabo Riosi Ra'íchala? ⁷Mapujiti ke wesi echi jaré sontarsi waminabi nochama, sontarsi niráa, a ke siné natétarami nísiságá. Ayénachó si'néami echi jaré rijói mapu ikí ichá echi jaré uva anilíwami rakéami namuti arigá pe waminánomí ko'mea echi uva rakala. Echirigá achigórigá echi jaré chibá mélami arigá wisúnaga bajima echi leche. ⁸A'lí ketasi bichíisi mapu nijé binói chopi 'nátali je'ná mapurigani aní, achigórigá mapurigá echi jaré pagótami sinibí we 'nata, mapujiti echi walula Moisesi achigórigá osogá nulali. ⁹Mapujiti je'ná jerigá osirúami ju echo'ná Riosi nulalila oselíwalachi mapurigá echi Moisesi osali: Ketásitamo cho'ojojíbo echi jaré bóisi mapu rimisoka mosokí echi turío, chopi ariwesi mapurigá pe taa ko'mea echi turio sawala. A'lí ketasi echirigá nulárami níili mapujiti Riosi chopi wabé natimá echi jaré bóisi. ¹⁰Chopi Riosi echirigá anili mapurigá tamujé ayénachó echijiti galá ruyérami níibo mapu churigata olabo. A'lí suwaba je'ná jerigá osogá nulárami níili mapurigá tamujé galá ku'wíratami níibo, mapujiti echi jaré mapu wasarako, ayénachó echi auché jaré mapu mosita echi turío, si'néamika buwé mapurigá ibili niráa narema jaré pe wikabé turío. ¹¹A'lí tamujeta we nóchali echo'ná 'yémichi, Riosi nóchala olayá. Chopi a tamujé echirigá we nóchaga ichisáagá echi Galabé Riosi Ra'íchala echo'ná 'yémichi, ¿kéchatamo mayé mapu ayénachó galá níima mapurigá 'yémítamo tamujé tamí 'yasa jaré namuti máputa newalé? ¹²A'lí a 'yémítamo echirigá 'yásagá echi auché jaré nawésami, ¿kecha waminabi galá níimili máputamo ayénachó tamujé tamí echirigá 'yasa?

Chopi tamujeta ke siné 'yemi mi bujeli echi jaré namuti. Arigata 'locheka niráa 'yena, mapurigata ketasi 'yemi mi kumebo, chónpita nakí mapurigá echi Wabé Galabé Jesucristo Ra'íchala waminabi nawisárami níima. ¹³'Yémítamo galá machí mapu echi jaré sacerdote anilíwami rijói, echo'ná walubé Juríosi pagótami ri'obáwalachi nóchami sinibí galá ko'ogá piré echi jaré ko'wáami mapu echo'ná ri'obachi Riosi 'yárami ju. Echirigá 'yémítamo galá machí mapu aboni galá risénsia ju chapigá ko'wawa jaré sapá, echi jaré namuti sapala mapu ko'yagá 'yárami ju Riosi echo'ná

ri'obachi.¹⁴ A'lí echí Walubela Riosi echirigá achigórigá nulali mapurigá echi jaré mapu ikí nawésaga 'yénako echi Galabé Riosi Ra'íchala ayénachó galá 'yárami níima mapu ikí aboni newalé, mapujiti aboni chopi echirigá nawésaga nocha.¹⁵ Chopi nijeni ke siné chapili echiyiri namuti, nibilé choni 'yemi mi osogá tani jipi máputamo echirigá tamí 'yabo. Si'winárigá nijeni chopi nakí 'yemi mi nawésanala echi Galabé Riosi Ra'íchala, tarapé 'yemi mi bujega 'yemi níwala namuti. A'lí a 'wérali níisagá mapurigá nijeni 'yemi mi bujema jaré 'yemi níwala namuti, bachá niráa galá níimi waminá mukusá nijé.

¹⁶ A'lí nijeni ketasi mayé mapu galá níima mapurigani wabé nójchaga 'nátami níima mapujítini nawesa echi Galabé Riosi Ra'íchala, mapujiti nijeni nawesa mapujiti arígá 'wérali ju mapurigani echirigá nawisama echi Galabé Riosi Ra'íchala. ¡Alí nijeni arígá ne wabé o'mónami níimi, ani ketasi echirigá nawisásagá!¹⁷ Echijiti a nijeni chopi nawisásagá Riosi Ra'íchala mapujiti njé binói echirigá nakí nawisánala, echalini ma ku natétarami ju. Chopi ani nawisásagá Riosi Ra'íchala mapujiti arígá 'wérali ju mapurigani echirigá nawisama, echalini chopi echirigá olá mapujiti echi Walubela Riosi Binói tamí júuli echirigá nawisánala.¹⁸ Echirigá biché nijeni galá ku natétarami ju chopi mapujítini ne wabé simírami kanila mapalini galá omero nawésiya echi Galabé Riosi Ra'íchala, arígá tarapé biyiri napagá. Nijeni arígá risénsia níwa mápuni nipama, mapujítini chopi nocha echi Galabé Riosi Ra'íchala nawésiya, chópini ke siné echirigá nipama.

¹⁹ Echirigá nijeni ke wesi yuwa pióntami niráa ju, chópini arígá pióntami niráa nocha ne si'néami pagótami yuwa, echi Wabé Galabé Riosi Ra'íchala nawésiya, mapurigani echirigá bichírama auché jaré wíkabé pagótami echi Walubela Jesucristo niráa.²⁰ Echirigá mapalí nijeni iyena echi jaré Juríosi pagótami yuwa, nijeni auchecho siné achigó yiri olá mapurigá aboni olá, mapurigani echirigá ologá arígá bichírama jaré aboni Jesucristo niráa. Echalí nijeni je'ná jerigá olá: Mapalini iyena echi jaré Juríosi yuwa mapu sinibí arígá galá níjewaga olá mapurigá echi walula Moisesi osogá nulali, echalí nijeni ayénachó echirigá achigórigá níjewaga olá, mapurigani echirigá ologá arígá galá bichírama aboni Jesucristo niráa. Chopi ne bichíwali ma ketasi arígá 'wérali ju mapurigá nijeni echirigá galá níjewaga olama mapurigá echi Moisesi osogá nulali.²¹ Chopi si'winárigá mapalí nijeni iyena echi auché jaré isena pagótami yuwa, mapu ketasi nulérami níili echi walula Moisesi jiti, echalini ketasi níjewaga olá mapurigá Moisesi osogá nulali, mapurigani echirigá ologá galá bichírama echi jaré isena pagótami Jesucristo niráa. Chopi ne bichíwali arígá 'wérali ju mapurigá nijeni galá níjewaga bitélama echi Riosi nulalila, mapujiti echi Walubela Jesucristo ma tamí nuléami ju.²² A'lí mapalí nijeni iyena echi auché jaré yuwa mapu ke cho 'me galá bichíyami ju, echalí nijeni auchecho siné achigórigá 'nata mapurigá nijeni 'nátali chabénala mapalini bachá niráa bichíili. A'lí nijeni echirigá 'nata mapurigani arígá galá bichírama aboni, Jesucristo niráa. Echirigá aniwáami ju mapu nijeni achigórigá 'nátama mapurigá ibili 'nata mapu ikí nijeni yuwa ra'icha, mapurigani siné káachi arígá ku'wírama jaré, mapurigá aboni ku wíkawárami níima.²³ A'lí nijeni suwaba je'ná jerigá olá mapurigá echi Galabé Riosi Ra'íchala waminabi nawisárami níima, ayénachó mapurigá nijeni ne wabé kanílama achigórigá mapurigá kanílatami níima si'néami echi auché jaré mapu ikí galá bichíimako njé nawésawala.

²⁴ "Yémitamo ma galá machí mapurigá echí jaré júmami ne si'néami wabé iwéami niráa jumi, a'lí chopí bilié ju mapu meko, mapuyíripi bachá nawako. Echirigá ayénachó galá níima mapu 'yemi bichíyami waminabi galá bichísisa, mapurigá wabé iwéami júmami niráa, mapurigátamo galá mepo suwaba mapu ikí echí Walubela Riosi 'yemi mi 'yama. ²⁵ Ne si'néami echí jaré mapu ikí nakiko echirigá wabé walínaga júmanala, abóniko ke bilé namuti biyiri olá, echí jaré namuti mapu nayúrama aboni. A'lí aboni echijiti ketasi olá wikabé auché jaré namuti mapurigá aboni chopí galá omérama meya echirigá ujúmaka. A'lí echí jaré mapu ikí meko chopí narema bilé nijíwami mapu ke 'me wilibé niráa nirúlama, chopí tamujé bichíyami galá jiwríga olata mapurigata galá mega narepo echí ne wabé galabéala mapu ke siné waminá suwibama. ²⁶ A'lí nijé binói echirigá ne wabé ménalaga 'mawáni mapurigá echí jaré ujúmami niráa, chópini ketasi wepi 'mawáni. Ayénachó nijeni ne wabé jiwríga olá mapurigá echí jaré nachóami niráa, chópini ketasi wepi nichó mapurigá bilé rijói mapu bi'neli wepi nichó, echí iká cho'náa. ²⁷ A'lí nijeni ne wabé jiwríga nulé a nijé binói niráa. Nijeni ketasi olá mapurigá nijé binói chopí nakí olánala, mapujitini we majá mapurigá nijé binói, siné káachi, ketasi 'me nilaga, miná machí pátami níima, mapalí nijeni arigá ma galá binérali echí auché jaré.

Ketasi o'wikesi echí jaré amachíkalawami namuti

10 Nijeni nakí mapu 'yemi ritémtami galá machiboa mapurigá echí jaré tamujé Juríosi pagótami, chabé ki'yá piréami, ne si'néami ri'léami biléana nolírali 'yénali, ayénachó si'néami aboni echo'ná nasipa walubé ba'wírali Sitákamichi anilíwachi simárali, waminá bo'ónala simiba. ² Echalí ne si'néami echí jaré tamujé pagótamawala echirigá napabúrami níili echí walula Moisesi yuwa echo'ná nolírali, ri'lé wichí, ayénachó aboni echirigá napabúrami niráa níili echí Moisesi yuwa mapalí echí walú ba'wírali nasípasí rojonárami níili mapurigá aboni nasipa simárama wichí jaga niráa. ³ Ayénachó si'néami aboni chopí a yiri ko'wali echí ko'wáami mapu Riosi 'yali ripá riwigachi jonsa. ⁴ A'lí si'néami aboni chopí a yiri bajili echí ba'wí mapu Riosi 'yali echo'ná biléana walubé ritérali jonsa machí pásaga. A'lí echí walubé rité mapurigá echí Walubela Jesucristo niráa níili, a'lí Binói aboni yuwa asali echo'ná waná kawichí. ⁵ Chopí ne noguí si'néami aboni arigá ketasi olali mapurigá Riosi nakili. Echijiti aboni ariwérami níili echo'ná waná kawichí mapuyénasí si'néami echí jaré mapu ikí ketasi olali mapurigá Riosi nakili arigá waminá suwili.

⁶ A'lí ne suwaba je'ná jeyiri echirigá ikili aboni yuwa mapurigá tamujeta echijiti galá binératami níibo mapurigata ketasi nakiboa chati sitíi olánala mapurigá echí jaré aboni we chati sitíi olali. ⁷ Echijiti ketasi chokoba jaga o'wikesi echí jaré amachíkalawami namuti, mapurigá jaré aboni olali, mapurigá je'ná jerigá osirúami ju Riosi Ra'líchala oselíwalachi: Echi jaré Israeli pagótami kopoya muchíbali, ayénachó aboni bajíbiya muchíbali. A'lí aboni waminá jásaga ne sitila nokuísali echirigá omáwaga. ⁸ A'lí ketasi galá níima mapu tamujeta chuwé bilétari yuwa kochisá, mapurigá jaré aboni olali. A'lí echijiti, sinepi rawé niráa, waminá suwábarami níili osá makói miná bikiyá mil pagótami. ⁹ Nibilé cho galá níima mapu tamujeta sayéraga ra'ichabo echí wabé galabé oláami Walubela Riosi, mapurigá jaré aboni olali. Echalí rawé aboni waminá suwili mapujiti echí jaré sayawi uchuli. ¹⁰ Nibilé siné sitila anigá ra'ichiasi Riosi sayéraga mapurigá

jaré aboni arigá olali. A'lí bilé walula Riosi capitánawala echijiti waminá ko'yali echi jaré aboni.

¹¹ A'lí ne suwaba je'ná jeyiri ikili tamujé pagótamawala, chabé ki'yá piréami. A'lí ne suwaba echirigá osirúami níili echo'ná Riosi Ra'íchala oselíwalachi mapurigá tamujeta jipi ne jubáami rawé piréami echijiti galá ruyératami níibo mapurigata ketasi echirigá chati sitíi olabo. ¹² Echirigá biché galá níima mapu ne si'néami mapu ikí ne galá bichiyami niráa mayeko, sinibí ne galá tibusá mapurigá aboni ketasi chakena niráa rujuiga, ma ketasi waminabi galá bichíima. ¹³ A'lí echi riablo sinibí 'yemi mi chati sitíi olánali achigórígá mapurigá binói chati sitíi olami ju si'néami echi auché jaré pagótami jena'l' wichimóbachi piréami, chopi echi Walubela Riosi sinibí 'yemi mi ku'wírama. A'lí Riosi ketasi ariwema mapurigá echi riablo 'yemi mi ne wabé simírami chati sitíi olánalama mapuyénasí arigá 'wérali níima máputamo echirigá chati sitíi olabo. Chopi mapalítamo echirigá chati sitíi olánarami níibo, echalí Riosi 'yemi mi wabé ku'wírama mapurigátamo ketasi echirigá chati sitíi olabo. Echalí 'yémitamo galá omérabo echirigá ni'yúriya mapurigátamo ketasi echirigá chati sitíi olabo.

¹⁴ Echijiti 'yemi keni ritémawa mapu nijeni ne wabé galé, tarapé siné chokoba jaga o'wikesi echi jaré amachíkalawami namuti. ¹⁵ Nijeni 'yemi mi echirigá ra'icha, mapujiti 'yémitamo ma galá machíami jútamo. Echijiti ne galá 'natasi mapurigá nijeni 'yemi mi je'ná jerigá ané. ¹⁶ Mapalí tamujeta napawí echi Walubela Jesucristo ko'wámawala kopoya, ayénachó mapalita bají echi uva anilíwami ba'wila, tamujeta sinibí galabéraga ané echi ba'wila, ayénachóta walú natétara 'ya Riosi. Echalita echirigá olá mapujítita a'nagupi napawíkami ju, ritémtami niráa, mapujiti echi Walubela Jesucristo lalá ku'lluwárami níili tamujé jiti mapalí Échiko a Binói nijali mapurigá clavo jiti michóniga mi'lirúami níima echo'ná kúrsichi. Ayénachó mapalita kúuchi rojuániga ko'wá echi pani, echalita echirigá olá mapujítita bilénapi niráa a'nagupi napawíkami ju, ritémtami niráa, mapujiti echi Walubela Jesucristo nijali Binói sapala mapalí Binói clavo jiti michóniga, mi'lirúami níili echo'ná kúrsichi. ¹⁷ Tamujé napawika bichiyami arigá ne wikabeta ju, chopi echi pani mapu si'néamita ko'wá, bilepi pani niráa ju. Echijiti tamujé máputa wikabé ju, arigá bilepi niráa juta, echi Walubela Jesucristo yuwa.

¹⁸ Galá 'natasi echi wikabé Isaeli anilíwami pagótami jiti. Echi jaré aboni mapu arigá ko'wako echi jaré namuti sapala mapu echo'ná aboni ri'obáwalachi ko'ogá 'yárami ju Riosi, abóniko a'nagupi napabúrami niráa ju mapujiti aboni echirigá ko'wá echi sapá mapu 'yárami ju Riosi. ¹⁹ Nijeni ketasi nakí aninala mapu echi jaré amachíkalawami namuti tamujé tamí ku'wírami ju, nibilé choni nakí aninala mapu echi sapá, mapu bachá niráa 'yárami níili echi jaré amachíkalawami namuti, ne wabé simírami galabé ju, ketasi mapurigá mapuyíripi echi auché jaré sapá. ²⁰ Chopi nijeni 'yemi mi ané mapu wikabé pagótami ketasi galá machí Riosi. A'lí mapalí aboni arigá ko'ogá 'ya jaré namuti, aboni chopi 'ya echi namuti sapala echi jaré o'wéala chati sitíi oláami aliwá, echi riablo níwala. Abóniko ketasi 'ya echi namuti sapala echi Walubela Riosi niráa. A'lí biché nijeni ketasi nakí mapu 'yémitamo echirigá o'wikebo echi jaré o'wéala chati sitíi oláami aliwá, echi riablo níwala. ²¹ Ketasi risénsia ju mapu 'yémitamo bajibo echi Walubela Jesucristo níwala uva ba'wila, mapalítamo ayénachó arigá bají echi jaré bajíwami mapu bachá niráa 'yárami níili echi jaré o'wéala wabé chati sitíi oláami aliwá. Nibilé cho risénsia ju mapu 'yémitamo kopoá echi Walubela Jesucristo níwala ko'wáami mapalítamo arigá ayénachó ko'wá echi

ko'wáami mapu bachá niráa 'yárami níili echi jaré wabé chati sitíi oláami aliwá.
 22 Ketasi galá níima mapu 'yémítamo 'yóratabo echi Walubela Riosi. 'Yemi ketasi waminabi wabé simírami jiwerámi jútamo, ketasi mapurigá Riosi niráa.

23 Ne bichíwali ju mapurigá echi jaré pagótami ralíchaga aní, mapu galá risénsia ju mapu ibili olama mapurigá ibili nakí olánala, chopi jaré namuti máputa galá omero olayá ketasi tamujé tamí ku'wírama. Ne bichíwali ju mapu ibili galá omero olayá mapurigá ibili nakí olánala, chopi jaré namuti máputa galá omero olayá ketasi tamujé tamí ku'wírama mapurigata waminabi galá bichíisabo Riosi. 24 Galá níima mapu ibili 'yemi chopi 'wéralli olasa mapurigá echi auché jaré pagótami bachá niráa ku'wíratami níima. Ketasi bachá niráa echirigá olasi mapurigá 'yemi aboni chopi ku'wíratami níbotamo.

25 'Yémítamo galá risénsia níwa máputamo kopoá mapuyíripi sapá mapu ikí echi pagótami 'yemi mi raliguíwa. Galá kosí echi sapá, ketásirapé rukuesa acha bachá niráa 'yárami níili echi sapá echi jaré amachíkalawami namuti. 26 Echirigá galá kosáa echi sapá, mapujiti je'ná kawí echi Walubela Riosi níwala ju, ayénachó suwaba namuti jenalí wichimóbachi nirúami echi Riosi níwala ju.

27 A'lí a bilé rijói ketasi cho bichíyami 'yemi mi ko'nula bayésagá, a'lí átamo arigá nakisáagá simigá ko'nula binói yuwa, echalí galátamo kopoá suwaba mapuyíripitamo kólawa. Echalí ketasi rukuesi acha 'yárami níili echi jaré amachíkalawami namuti. 28 Chopi a jaré 'yemi mi jeanésagá: Je'ná sapá bachá niráa 'yárami níili echi jaré amachíkalawami namuti, echalí ketásirapé kosí, mapurigá echi rijói mapu 'yemi mi echirigá aneli ketasi chati sitíi olánalatami níima, mapujiti echi rijói mayé mapu ketasi risénsia ju ko'wawa echiyiri sapá. 29 Echijiti nijeni 'yemi mi ané máputamo ketasi kopoá. 'Yémítamo arigá risénsia níwa máputamo kopoá, chopi echi auché bilé rijói mayé mapu ketasi risénsia ju ko'wawa.

A'lí siné káachi jaré 'yemi jeanígátamo rukuébiré: ¿Churékula biché ketasi galá risénsia ju máputa kopoá tamujé, chopi mapujiti auché bilé ketasi galá risénsia niráa mayé? 30 Mapujiti a tamujeta walú natétara 'yásagá Riosi mapalita ko'wá, ¿churékula bicheta wi'nijírami niráa níibo mapalita echirigá ko'wá, mapalita ma bachá niráa arigá walú natétara 'yali Riosi? 31 Galá ju echirigá, chopi átamo kosáagá jaré ko'wáami, átamo bajísagá jaré bajíwami keremá, átamo olásagá auché jaré namuti keremá, ne suwaba mapu ikítamo olá, sinibí ne galabé niráa olasi ne suwaba, mapurigá echi Walubela Riosi echijiti waminabi walubéragera anérami níima. 32 Ke wesi chati sitíi olírasi 'yemi. Ketasi chati sitíi olírasi echi jaré Juríosi pagótami. Nibilé cho chati sitíi olírasi echi auché jaré pagótami mapu ketasi Juríosi ju. Nibilé cho chati sitíi olírasi echi jaré napawika bichíyami. 33 Nijé binói niráa chópini nakí galabé olánala suwaba mapu ikí nijeni olá, mapurigá si'néami echi auché jaré pagótami ne suwaba jiti galá kanílama mapu ikí nijeni olá. Nijeni ketasi 'wéralli olá mapurigá nijé binói chopi kaníliami níima, chópini 'wéralli olá mapurigá echi auché jaré kaníliami níima, mapurigá aboni galá ku wikawárami níima.

11 Sinibí echirigá galabé niráa olasi 'yemi, mapurigá nijeni sinibí olá, mapujiti nijeni achigórigá olá mapurigá echi Walubela Jesucristo olali.

Echi Pablo ruyé mapurigá echi jaré muguí chulubima

2 Kení ritémawa 'yemi nimí ané galabé oláami niráa, mapujítitamo sinibí galá 'nata tamí jiti, ayénachó mapujítitamo sinibí galá nijewa mapurigá nijeni 'yemi mi nuleli. 3 Chopi nijeni nakí máputamo galá machiboa mapu Jesucristo ne Walubela

ju ibili rijói yuwa. A'lí echi rijói upéami ne walula ju echi mukí, binói upila yuwa, achigórigá mapurigá Riosi ne Walubela ju, Jesucristo yuwa. ⁴A'lí a bilé rijói chulubísagá mapalí échiko Riosi yuwa tániga ra'íchako, echo'ná nasipa echi auché jaré napawika bichíyamichi yuwa asagá, ayénachó a echi rijói echirigá chulubísagá mapalí binói nawésako Riosi Ra'íchala keremá, échiko echirigá ologá we riwélatami níima bacháami Riosi yuwa. ⁵Chopi a bilé mukí ketasi chulubísagá mapalí échiko Riosi yuwa tániga ra'íchako echo'ná nasipa echi auché jaré napawika bichíyamichi yuwa asagá, ayénachó a bilé mukí ketasi chulubísagá mapalí binói nawésako Riosi Ra'íchala, echalí échiko ayénachó we riwélatami níima bacháami Riosi yuwa, mapujiti echalí echiyiri mugú achigó yena riwélawami olá mapurigá bilé mukí olá mapu suwaba sikí kepu kupá. ⁶A'lí a bilé mukí ketasi chirigá chulubísagá mapalí Riosi yuwa tániga ra'íchako echo'ná nasipa echi auché jaré napawika bichíyamichi yuwa asagá, echalí waminabi galá níimi echi mukí suwaba sikiresa binói kupala. Chopi a echi pagótami wabé riwéluwami niráa mayésagá mapurigá bilé mukí echirigá suwaba sikiresa binói kupala, echalí waminabi galá níima mapurigá echi jaré mugú echirigá chulubisa. ⁷Chopi ketasi galá níima mapu echi jaré rijói echirigá chulubima mapalí aboni Riosi yuwa ra'icha, mapujiti echi jaré rijói ne noguí mapuyiri Riosi niráa niwárami níili. Ayénachó echi jaré rijói pe o'wéala niráa niwárami níili, chopi Riosi ne wabé simírami Walubela ju. A'lí echi jaré mugú ke 'me o'wéala niráa ju, chopi echi jaré rijói we o'wéala niráa niwárami níili echi jaré mugú yuwa. ⁸Mapujiti mapalí Riosi niwáli echi bachá bitéami ríjoy, échiko ketasi niwárami níili biléana mukírali jonsa. Chopi mapalí Riosi niwáli echi bachá bitéami mukí, échiko ayena niwárami níili echi bachá bitéami rijói wachígala jiti. ⁹A'lí echi rijói ketasi niwárami níili mapurigá binói 'yárami níima echi mukí. Chopi echi mukí ayena niwárami níili mapurigá binói 'yárami níima echi ríjoy. ¹⁰Echijiti galá níima mapu echi mukí galá chulubisa mapurigá binói echirigá galá 'nérاما echi auché jaré pagótami mapu echi binói kunala walula ju binói mukí yuwa, ayénachó mapurigá echi jaré o'wéala Riosi kapitánawala echirigá 'nératami níima. ¹¹Chopi mapalita napawika bichíyami ju Jesucristo niráa, echalí echi jaré rijói we newalé echi jaré mugú, ayénachó echi jaré mugú we newalé echi jaré ríjoy. ¹²A'lí mapurigá ne bichíwali ju mapu echi ne bachá bitéami mukí niwárami níili echi ne bachá bitéami rijói wachígala jiti, echirigá ayénachó ne bichíwali ju mapu jipi echi jaré rijói arigá mugú tanala ju, chopi Riosi arigá Niwáami ju ne si'néami pagótami.

¹³'Yemi aboni galá ruwigá anisí: ¿Acha risénsia ju mapu echi jaré mugú Riosi yuwa ra'icháma mapalí aboni ketasi chulubíkami níisa? ¹⁴Echi Walubela Riosi niwáli suwaba namuti mapu ikí nirú. A'lí ma galá machirúami ju mapu wabé riwélawami ju i'weli kupélasa bilé ríjoy. ¹⁵Chopi galabé nirárami ju a bilé mukí i'weli kupélasa, mapujiti Riosi 'yali echi jaré mugú mapurigá aboni i'weli kupélama, mapurigá aboni mo'ólachi buchuwí na'óami níima. ¹⁶Chopi a jaré nakisáagá sayéraga ra'ichánala mapujiti aboni ketasi nakí echirigá nijéwaga olánala, galá níima mapu aboni ne galá machisá mapu nijeni echirigá mayé, ayénachó mapu echi auché jaré napawika bichíyami ritémtami sinibí echirigá nulé mapu echi jaré mugú echirigá chulubima.

**Jaré ketasi galabé oláami níisa, arigá ko'wali echi
Walubela Jesucristo níwala ko'wáami**

¹⁷Jipi nijeni 'yemi mi je'ná jerigá osé, chópini ketasi omero 'yemi mi galabé oláami ané, mapujiti mapalítamo napawí, echi Walubela Jesucristo níwala ko'wáami

kopoya, echalí 'yémitamo ketasi galabé oláami níisa arigá ko'wá. Echijítitamo ketasi waminabi galabératami ju, chópitamo waminabi chati sitíi nira. ¹⁸ Mapujiti bachá niráa níjeni 'yemi mi ané máputamo ketasi galabé olá mapalí 'yémitamo napawí, echi Walubela Jesucristo níwala ko'wáami kopoya, mapalí 'yémitamo abijí ketasi a'nagupi wabé galé, chópitamo wikanáami niráa rojuáami ju. Auché jaré tamí ané máputamo echirigá rojuáami ju. Ayénachó níjeni mayé máputamo ne bichíwali echirigá wikanáami niráa rojuáami ju. ¹⁹ Arigá 'wérali ju mapu 'yémitamo waminá rojuáami níibo, mapujiti jaré 'yemi galabé bichíyami ju, chopi auché jaré ketasi galabé bichíyami ju. A'lí s'i'néami mapu ikí galabé oláami bichíyami ju Jesucristo niráa, abomi arigá a'nagupi napawima mapurigá aboni galá machirúami níima, Jesucristo jiti bichíyami niráa. ²⁰ Yémitamo echirigá rojuáami ju, echijiti mapalítamo napawí echi Walubela Jesucristo ko'wáami kopoya, echalí 'yémitamo ketasi galabé ologá ko'wá. ²¹ Mapujiti mapalítamo echirigá napawika ko'wá, echalítamo ibili niráa chuwé bachá uchúpaga we ko'wá. ¡Alí mapuyénasí jaré ketasi nachiwika, we 'lochega tibí, a'lí auché jaré arigá waminá teka! ²² Ibili 'yemi aboni ayénatamo níwa kalí mapo'nátamo galá ko'wá, ayénachó mapo'nátamo galá bají echi uva ba'wila. Chopi mapalítamo je'ná jerigá ketasi galabé ologá ko'wá echi Walubela Jesucristo níwala ko'wáami, echalí 'yémitamo ne wabé chijuna echi auché jaré napawika bichíyami. Ayénachó 'yemi we riwéeli 'yátamo echi auché jaré mapu ketasi biyiri namuti níwa. ¿Churigá bicheni 'yemi mi anema? ¡Níjeni ketasi omero 'yemi mi anée galabé oláami niráa mapalítamo je'ná jerigá olá!

Echi Walubela Jesucristo níwala ko'wáami

(Mt. 26:26-29; Mr. 14:22:25; Lk. 22:14-20)

²³ Mapujiti echi Walubela Jesucristo Binói tamí binérali je'ná jerigá achigórigá mapurigá níjeni 'yemi mi binérali: Mapurigá echalí rokogó mapalí echi Walubela Jesucristo níjírami níili, echalí bachá niráa Binói chapili echi pani echo'ná Binói sikálachi niráa. ²⁴ A'lí ma natétara 'yasa Riosi, echalí Binói kúuchi niráa rojuánali echi pani. A'lí Binói jeaneli echi jaré mapu Binói binérali, jeanigá: ¡Chapigá kosáa! Je'ná pani Nijé sapala ju, echi mapu 'yemi chati sitíi olalila jiti wikanáami niráa chi'wanárami níima. Sinibí je'ná jerigá olasi, mapurigátamo galá 'natabo tamí jiti. ²⁵ Echirigá ayénachó, ma sunisa ko'yá, echi Walubela Jesucristo chapili bilé vaso echi uva anilíwami ba'wila ro'wárami. A'lí jeaneli: Je'ná ba'wila achigó yiri ju mapurigá Nijé lalá niráa. Nijé lalá ma ku 'luwárami níima 'yemi chati sitíi olalila jiti. Echijiti Riosi 'yemi mi ku wikawama achigórigá mapurigá Binói bachá niráa bukulíwami niráa a'láraka aneli echi jaré pagótami. Ne sinibí mapalítamo bají je'ná ba'wí, ne galá 'natasi tamí jiti. ²⁶ Mapujiti Níjeni 'yemi Walubélawala ju, a'lí mapuyénasí Níjeni ku nolínama, ne sinibí mapalítamo ko'wá je'ná pani, ayénachó ne sinibí mapalítamo bají je'ná ba'wí, 'yémitamo echirigá ologá we nawésaga ruyebo echi auché jaré mapu Níjeni ma mukuli 'yemi chati sitíi olalila jiti.

Mapu churigá kopoa echi Walubela Jesucristo níwala ko'wáami

²⁷ Echirigá biché mapuyíripi ketasi galabé ologá ko'wako je'ná pani mapurigá Riosi echijiti waminabi walubélaga anérami níima, ayénachó mapuyíripi ketasi echirigá galabé ologá bajiko je'ná uva ba'wila, échiko wabé chati sitíi olá, echi Walubela Jesucristo sapala sayéraga, Binói lalá sayéraga ayénachó. ²⁸ Echijiti galá níima

mapu ibili 'yemi bachá niráa je'ná jerigá 'natasa: ¿Áchani galabé ologá ko'wá echi Walubela Jesucristo níwala ko'wáami? ¿Áchani galabé ologá bají je'ná uva ba'wila? A'lí átamo ketasi ne bichíwali galabé oláami níisagá, echalí galá níima wikáwali tansa Riosi. A'lí risénsia níima máputamo kopo, ayénachó máputamo bajibo echi uva ba'wila. ²⁹ Mapujiti átamo chati sitíi ologá kosáagá, ayénachó átamo chati sitíi ologá bajísagá, mapujítitamo ketasi galá machigá 'nata mapu je'ná pani chopi a yiri ju Nijé sapala yuwa, mápuni 'yemi Walubélawala ju, echalítamo pe waminánomí kastigo 'yárami níibo mapujítitamo echirigá ko'wali, ayénachó mapujítitamo echirigá bajili. ³⁰ Echijiti ayénachó wikabé 'yemi we nayulú, ayénachó wikabé 'yemi echijiti ketasi 'me jiwerámi jútamo. A'lí auché jaré echijiti ma waminá suwili. ³¹ Chopi a ibili tamujé bachá niráa je'ná jerigá galá machigá 'natásagá: ¿Áchata galabé ologá ko'wá echi Walubela Jesucristo níwala ko'wáami? Echalí ata ne bichíwali galabé ologá kosáagá, a'lí ketasi arigá 'wérati níima mapu echi Walubela Riosi echirigá tamujé tamí kastigo 'yama. ³² Chopi mapalí echi Walubela Riosi ritiwá mapu tamujé bichíyami arigá we chati sitíi olá, echalí Binói tamujé tamí kastigo 'ya, mapurigá tamujeta ketasi ne walú kastigo 'yárami níibo echalí ne jubá rawé, mapurigá echi auché jaré ke bichíyami pagótami jená lí whichimóbachi piréami echirigá sinibí niráa kastigo 'yárami níima.

³³ Echirigá galá níima, keni ritémawa, máputamo ibili niráa buwebo mapurigá echi auché jaré bachá ko'mea, mapalítamo napawí, echi Walubela Jesucristo níwala ko'wáami kopoya. ³⁴ A'lí a jaré 'yemi we 'lochésagá, galá níima abóniko bachá kosá echo'ná aboni pirélachi, mapurigá ketasi arigá 'wérati níima mapu Riosi 'yemi mi kastigo 'yama mapujítitamo ketasi galabé ologá ko'wá echi Walubela Jesucristo níwala ko'wáami. A'lí nijeni galá katiwama echi auché jaré ra'íchali mapalini echo'ná simea 'yemi mi 'némiya.

Echi Wabé Galabé Riosi Iwigala njá mapurigá ibili echi jaré bichíyami galá omérama olayá jaré namuti Riosi nóchala

12 Keni ritémawa, nijeni nakí mapu 'yémitamo galá machiboa mapurigá echi Wabé Galabé Riosi Iwigala 'yemi mi, ibili niráa, 'ya mapurigátamo galá oméraboo olayá jaré namuti Riosi nóchala.

² 'Yémitamo we galá machí mapurigá chabénala mapalítamo ketasi cho bichíili Jesucristo niráa, echalítamo 'yékarami níili; echijítitamo chokoba jaga o'wikeli echi jaré amachíkalawami namuti mapu ketasi omérami ju ra'icha. ³ Echijiti jipi nijeni nakí mapu 'yémitamo galá machiboa mapu a bilé rijói jeansáagá: ¡Jesucristo wabé sití ju! Echalí echiyiri rijói ketasi chirigá nulérami ju echi Wabé Galabé Riosi Iwigala jiti; ayénachó ke wesi rijói omero jeaniyá: ¡Jesucristo ne Walubela ju! a ketasi nulérami níisagá echirigá animala echi Wabé Galabé Riosi Iwigala jiti.

⁴ A'lí echi Wabé Galabé Riosi Iwigala galá omero ayá mapurigá echi jaré wikabé bichíyami galá omérama wiká karúmati, auché jaré si'winárigá nocha, Riosi nóchala olayá. A'lí bilepi ju echi Wabé Galabé Riosi Iwigala mapu echirigá 'ya mapurigá aboni nochama. ⁵ A'lí wiká karúmati nirú máputa galá oméraboo olayá, echi Walubela Jesucristo nóchala, chopi echi Walubela Jesucristo bilepi ju mapu tamujé tamí nulé Binói nóchala olánala. ⁶ A'lí Riosi 'ya mapurigá echi jaré bichíyami wiká karúmati si'winárigá olama, chopi echi Walubela Riosi bilepi ju mapu suwaba echirigá olá pachana si'néami echi jaré bichíyami yuwa. ⁷ A'lí Riosi Binói 'ya ibili echi jaré

bichíyami pagótami mapurigá echi Wabé Galabé Riosi Iwigala galá olama pachana aboni sulálachi niráa, mapurigá echi auché jaré napawika bichíyami pagótami ayénachó galá ku'wíratami níima.⁸ Mapujiti Riosi 'ya jaré bichíyami mapurigá echi Wabé Galabé Riosi Iwigala jiti aboni galá omérama ruyée mapu churigá Riosi omero ku wikáwiya echi jaré pagótami, ayénachó Riosi 'ya auché jaré bichíyami mapurigá aboni omérama galá machíami niráa binériya Riosi Ra'íchala.⁹ A'lí echi Wabé Galabé Riosi Iwigala Binói 'ya mapurigá auché jaré ne galá bichíima mapu Riosi ayena ne bichíwali olama achigórigá mapurigá Binói bichíwaga aní mapu olama. A'lí auché jaré 'yárami ju mapurigá aboni galá omérama ku sa'wayá echi jaré nayúkami.¹⁰ A'lí auché jaré bichíyami 'yárami ju mapurigá aboni galá omérama wíkabé namuti olayá mapurigá ke wesi auché jaré pagótami omero olayá. Auché jaré bichíyami 'yárami ju mapurigá aboni omérama ruyée echi auché jaré pagótami mapu Riosi Binói jíuli echirigá ruyénala aboni. Auché jaré bichíyami 'yárami ju mapurigá aboni galá omérama machiyá chu yiri níima echi ne bichíwali Galabé Riosi Iwigala, ayénachó chu yiri níima echi jaré isena sití riablo aliwala. Auché jaré 'yárami ju mapurigá aboni omérama isena ra'íchali ra'icha. A'lí auché jaré 'yárami ju mapurigá aboni omérama galá ruyée mapu churigá aniwáami ju mapurigá echi auché jaré ra'íchali, isena ra'íchali niráa.¹¹ Chopi echi Bilepi Galabé Riosi Iwigala ju mapu echirigá olá suwaba je'ná namuti, ayénachó echi Galabé Riosi Iwigala we 'ya mapurigá ibili olama achigórigá mapurigá echi Galabé Riosi Iwigala Binói nakí 'yánala.

**Si'néami echi jaré bichíyami, napawika Jesucristo
yuwa, mapurigá bilepi rijói sapala niráa ju**

¹² Echi Walubela Jesucristo, si'néami echi jaré bichíyami yuwa, mapurigá bilepi rijói sapala ju, mapujiti echi rijói sapala arígá bilénapi niráa nachuka, wikaná rojuáami ju. ¹³ Mapujiti mapalita bichíili Jesucristo niráa, echalí echi bilepi Wabé Galabé Riosi Iwigala bilénapi niráa napabuli si'néami tamujé, echi Walubela Jesucristo yuwa, mapurigá bilé rijói sapala bilénapi nachúkami ju. Echirigá ne si'néami tamujé bichíyami bilénapi napabúrami níili, pagótami niráa. Chopi jaré tamujé echi Juríosi pagótami ju, a'lí auché jaré tamujé echi Griego anilíwami pagótami ju. A'lí jaré tamujé pióntami niráa ju, chopi auché jaré tamujé ketasi pióntami ju. A'lí ne si'néami tamujé mapu ikita galá bichíili Jesucristo niráa, ma galá nareli echi bilepi Galabé Riosi Iwigala.

¹⁴ A'lí echi bilepi rijói sapala bilénapi nachuka, arígá wikanáami niráa rojuáami ju. Echirigá ketasi bilepi niráa ju, chopi wikanáami niráa rojuáami ju. ¹⁵ A'lí a echi rijói ralala, siné káachi, jeansáagá: Nijeni ketasi bilé siká ju, echijiti nijeni ketasi napawíkami ju je'ná rijói sapala yuwa. Echalí mapalí arígá jeansáagá mapu ma ketasi echirigá napawíkami ju, echalí echi ralá ne bichíwali abijí napawíkami ju echi bilé rijói sapala yuwa. ¹⁶ A'lí a echi rijói nakala, siné káachi jeansáagá: Nijeni ketasi napawíkami ju je'ná rijói sapala yuwa, mapujiti nijeni ketasi ju bilé busí. Echijiti mapalí arígá jeansáagá mapu ma ketasi echirigá napawíkami ju, echalí echi naká ne bichíwali abijí napawíkami ju echi rijói sapala yuwa. ¹⁷ Mapujiti a ne suwaba echi rijói sapala, busí chopi níisagá, ¿churigá námama? A'lí a ne suwaba, naká chopi níisagá, ¿churigá sáama?¹⁸ Chopi echi Walubela Riosi ibili niráa ma galá napabuka uchúchali echi jaré wikaná rojuáami mapurigá bilepi niráa katiwárami

níima echi rijói sapala, mapurigá Binói Riosi chopi nakili.¹⁹ Mapujiti a ne suwaba echi rijói sapala bilepi busí chopi níisagá, ¿churigá biché gála bilé rijói sapala níima?²⁰ Echirigá ne bichíwali ju mapalí echi rijói sapala wikaná rojuáami ju, arigá binói sapala bilepi sapá chopi ju.

²¹ Echijiti echi rijói busila ketasi omero jeanée echi rijói sikala: Ketasi nimí newalé. A'lí echi rijói mo'ola ketasi cho omero jeanée echi rijói ronola: Ketásini 'yemi mi newalé.²² Chopi si'winárigá tamujeta waminabi newalé ibili echi jaré rojuáami, tamujé sapálachi nachuka rojuáami, suwaba mapu ikí tamujeta siné káachi mayé mapu ke 'me jiwerámi ju.²³ Ayénachóta waminabi tibuta echi jaré tamujé aboni sapálachi nachuka rojuáami mapu tamujeta siné káachi ketasi 'me nirá. Ayénachóta we galá pola echo'ná jaréana mapo'ná ketasi risénsia ju máputa machiná sapélama.²⁴ Chópita mayé mapu ketasi arigá 'wérali ju pólasa auché jaréana. A'lí Riosi echirigá suwaba napabuka katéwali echi rijói sapala, bilepi niráa, mapurigá echi jaré nachuka rojuáami máputa ke 'me niralí, arigá waminabi tibútarami níima.²⁵ A'lí Riosi echirigá olali mapurigá echi jaré wikanáami nachuka rojuáami galá napawíkami níima, bilepi rijói sapala niráa, mapurigá echi jaré nachuka rojuáami ketasi waminá rojuama, chopi mapurigá ibili niráa a'nagupi nagúurama.²⁶ A'lí a wabé okósagá echo'ná biléana bilé rijói sapálachi nachuka rojuáami, a'lí ayénachó we okoma ne suwaba echi rijói sapala. A'lí a walubératami níisagá pe biléana echo'ná bilé rijói sapálachi nachuka rojuáami, ayénachó ne suwaba echi rijói sapala napawika kanílama.

²⁷ A'lí si'néami 'yemi bichíyami echi Walubela Jesucristo sapala niráa jútamo, mapurigá bilepi rijói sapala niráa. A'lí ibili 'yemi mapurigá biléana nachúkami rojuáami ju Binói sapala niráa.²⁸ A'lí Riosi echirigá jáwali jaré mapurigá aboni nochama, o'wéala niráa, echo'ná echi auché jaré napawika bichíyami yuwa. Ne bachá Riosi echirigá jáwali echi jaré o'wéala mapu nawésanalaga julárami níili ne suníami jena'í wichimóbachi. Pe jubáami Riosi ayénachó echirigá jáwali jaré o'wéala mapu sinibí ruwigá nawésali echi auché jaré pagótami achigórígá mapurigá Riosi Binói 'yali aboni nawésanala. Auché Riosi jáwali echi jaré binériami mapu galá binera Riosi Ra'íchala, ayénachó Riosi jáwali auché jaré mapu wikabé karúmati olá mapurigá ke wesi auché jaré pagótami omero olayá. Ayénachó Riosi jáwali echi jaré mapu galá ku'wiro auché jaré pagótami. A'lí Riosi ayénachó jáwali echi jaré mapu we galá nuléami ju echi auché jaré napawika bichíyami. Ayénachó Riosi jáwali echi auché jaré mapu 'yárami níili mapurigá aboni galá omérama ra'icha isena ra'íchali.²⁹ Ketasi ne si'néami echi jaré napawika bichíyami julárami níili nawisánala ne suníami jena'í wichimóbachi. Ketasi ne si'néami galá nawésami ju achigórígá mapurigá Riosi 'ya aboni nawisánala. Ketasi ne si'néami galá binériami ju Riosi Ra'íchala. Ketasi ne si'néami wikabé karúmati oláami ju mapurigá ke wesi auché jaré omero olayá.³⁰ Ketasi ne si'néami 'yárami ju mapurigá aboni galá omérama ku sa'wayá echi jaré nayükami. Ketasi ne si'néami 'yárami ju mapurigá aboni omérama isena ra'íchali ra'icha. Ketasi ne si'néami 'yárami ju mapurigá aboni galá omérama ku ruyée mapurigá echi auché jaré anili, mapalí aboni ra'íchali isena ra'íchali niráa. Ne bichíwali ju mapu Riosi ketasi 'ya mapurigá si'néami echi jaré bichíyami chopi yiri olama.³¹ Echirigá sinibí galá nakigá tansi 'yemi mapurigá Riosi 'yemi mi 'yama echi ne wabé simírami galabéala, chopi jipi nijeni 'yemi

mi ruyema mapu churigá 'yémítamo omérabo waminabi galabé olayá, mapujiti waminabi galabé ju mapurigátamo a'nagupi wabé galebo.

Echi wabé galelíwami

13 Mapujiti a tamujeta galá omérasagá wikabé isena ra'íchali ra'icha, ayénachó a tamujeta galá omérasagá ra'icha mapurigá echí jaré o'wéala Riosi kapitánawala ra'icha, chopi a tamujeta ketasi we galéami níisagá, echalí tamujeta chopi wepi ni'yókaka ra'íchami níibota, mapurigá bilé kampoli wabé anéami, ayénachó mapurigá bilé jielo wabé jiwéraga anéami. ²Ayénachó a tamujeta galá omérasagá ruwigá nawesa echí auché jaré pagótami achigórigá mapurigá Riosi Binói tamujé tamí 'ya nawésanala, ayénachó a tamujeta galá machisáagá suwaba echí jaré namuti mapu Riosi ketasi cho machírali echí auché jaré pagótami, ayénachó a tamujeta ne galá machífami níisagá suwaba karúmati namuti, ayénachó a tamujeta ne galá bichiyami níisagá Riosi mapuyénasí tamujeta galá omérabo echo'ná chakena achayá echí jaré ripabé chulítami, chopi a tamujeta ketasi wabé galéami níisagá, echalí tamujeta arigá tarapé biyiri níibo. ³A'lí a tamujeta ne suwaba nachútaga kóosagá karúmati tamujé níwala namuti echí jaré wabé tisúwati pagótami, ayénachó a tamujé aboni niráa nijísagá kere, mapurigata waminá ikósarami níibo mapurigá echí pagótami waminabi bichíima Riosi Ra'íchala, chopi a tamujeta ketasi wabé galéami níisagá, echalí tamujeta arigá tarapebi yiri níibo.

⁴Echi mapuyíripi wabé galeko auché jaré, échiko kilí ologá iyénami ju. A'lí échiko wabé galabé oláami ju, chopi tarapé korúkami ju, nibilé níliami ju, ni bilé cho 'nóchaka 'nátami ju. ⁵A'lí echi mapu yíripi wabé galéami ju, ketasi chuwé olá, nibilé chibi síami ju. Échiko ketasi mayé mapu binói ne bachá walubela ju. Ayénachó echí mapu wabé galéami ju ketasi yóami ju, nirapé kichíami ju echí auché jaré. ⁶A'lí echi mapu wabé galéami ju, ketasi kanila mapalí auché jaré chati sitíi olá, chopi échiko ne wabé kanila mapalí auché jaré galabé olá. ⁷A'lí mapalí echi jaré wabé galéami arigá wabé risúu olárami ju, echalí aboni suwaba galá anacha, ayénachó aboni sinibí bichíi echí ne galabéala, ayénachó aboni sinibí kilíi buwé, mayega mapu Riosi ku'wírama aboni.

⁸A'lí mapalí echi jaré pagótami ne bichíwali wabé galéami juko, echalí aboni sinibí niráa echirigá galéami níima. A'lí pe waminánomí ma ketasi waminabi 'wérali níima mapu jaré ruwigá nawésama auché jaré achigórigá mapurigá Riosi Binói 'ya aboni nawisánala; ayénachó echalí ketasi waminabi 'wérali níima mapu jaré ra'icháma isena ra'íchali, ayénachó ketasi waminabi 'wérali níima máputa galá machiboa suwaba karúmati namuti. ⁹Mapujiti jipi tamujeta chopi péebi machíiami ju; ayénachóta péebi machigá nawesa echí Galabé Riosi Ra'íchala, mapujítita ketasi ne suwaba galá machí. ¹⁰Chopi pe waminánomí mapalita ma galá machiboa suwaba namuti, echalita ma ketasi mapuyiri péebi niráa machíiami níibo.

¹¹Chabénala mapalita kúuchi níili, echalita chopi ra'íchali mapurigá a ra'icha kúuchi, ayénachóta chopi 'nátali mapurigá a kúuchi niráa, mapujítita ketasi cho newalali; chopi mapalita ma o'welí níili, echalita ma ketasi waminabi olali mapurigá echí kúuchi niráa. ¹²Echirigá ju mapu jipi rawé tamujé bichiyami ketasi 'me galá machíiami niráa ritíwá echí jaré Riosi níwala namuti, chótita ritíwá mapurigá echo'ná biléana sitíi sipéechi, ke machíiami niráa. A'lí echalí mapalita Jesucristo yuwa muchuwi tamujeta ne galá machíiami niráa riwiboa ne suwaba.

Jipi tamujeta ketasi 'ne suwaba machí, chopi echalita ne suwaba galá machiboa, achigórigá mapurigá Riosi tamujé tamí ne galá machí.¹³ Echirigá ju mapu echi jaré mapu ikí galá bichíyami juko, abóniko sinibí niráa bichíima. Ayénachó echi jaré mapu ikí kilí niráa buwé mapurigá Riosi ku'wírama; abóniko sinibí echirigá kilí buwema, mapurigá Binói waminabi echirigá ku'wírasama. Ayénachó echi jaré mapu ikí ne bichíwali galéami juko, abóniko sinibí niráa galéami níima. Chopi ne wabé simírami galá ju máputa echirigá wabé galéami níibo.

Riosi 'yali mapurigá jaré pe télipi ke sayiná galá omérali ra'icha isena ra'íchali

14 Waminabi ne wabé galéami nílasi 'yemi. Sinepi niráa chopi nakisí mapu Riosi 'yemi mi 'yama mapurigátamo omérabo olayá mapurigá echi Wabé Galabé Riosi Iwigala 'yemi mi 'yama olánala. Ne bachá niráa nakisí mapurigátamo omérabo ruwigá nawésiya echi auché jaré pagótami mapurigá Riosi Binói 'yemi mi 'yama nawesánala.² Mapujiti mapuyíripi pe téeli echirigá ke sayiná omérako auché jaré isena ra'íchali niráa ra'icha, jaré ne bichíwali ra'íchali jiti rugá mapu ke cho galá machirúami ju echi auché jaré pagótami jiti, échiko chopi Riosi ra'íchiami ju, mapujiti echi jaré pagótami ketasi machí echi yiri ra'íchali. Alí mapu binói echirigá aniko, echi Wabé Galabé Riosi Iwigala echirigá galá ra'ichárali, chopi binói ra'icha jaré namuti jiti rugá mapu echi auché jaré pagótami ketasi cho machí.³ Chopi echi mapu galá omérako nawésiya echi auché jaré pagótami mapurigá Riosi Binói 'ya nawesánala, échiko ayena galá ra'icha echi jaré pagótami, mapurigá aboni waminabi galá bichíima, sulachí niráa; ayénachó mapurigá aboni waminabi we nílama, Riosi nóchala olánala; ayénachó mapurigá aboni ne wabé kaníratami níima.⁴ Alí echi mapu echirigá ke sayiná omérako pe télipi niráa ra'íchiya echi auché jaré isena ra'íchali, binói waminabi galá bichírama, binói chopi niráa. Chopi echi mapu galá nawésako mapurigá Riosi 'ya binói nawisánala, échiko waminabi galá bichírama echi auché jaré napawika bichíyami.

⁵ Alí nijeni ne bichíwali nakí mapu 'yémitamo ayena, galá omérabo ke sayiná, pe télipi niráa, ra'icha echi jaré isena ra'íchali. Chópini waminabi ne wabé nakí mapurigátamo galá omérabo nawésiya echi auché jaré pagótami, achigórigá mapurigá Riosi 'yemi mi 'yama nawesánala; mapujiti waminabi wabé galabé ju máputamo echirigá nawésabo echi auché jaré pagótami, ketasi mapurigátamo echirigá ke sayiná, pe télipi niráa, ra'ichabo echi auché jaré isena ra'íchali, átamo ketasi suwaba galá machíami niráa ku ruyésagá mapurigátamo echirigá anili, mapurigá echi jaré napawika bichíyami echijiti waminabi galá bichíima.⁶ Echijiti 'yemi, keni ritémawa, a nijeni chopi 'yemi mi ra'íchasagá jaré isena ra'íchali mapalini echo'ná iyena, 'yemi mi 'neya, ¿churigani 'yemi mi galá binérama echirigá? Mapujiti nijeni chopi 'yemi mi galabé niráa binera mapalini 'yemi mi galá machíami niráa ra'íchaga binera, achigórigá mapurigá Riosi Binói tamí binérali; ayénachó mapalini 'yemi mi galá machíami niráa ra'íchaga binera echi ne Bichíwali; ayénachó mapalini 'yemi mi galá machíami niráa ra'íchaga nawesa achigórigá mapurigá Riosi Binói tamí 'yali nawésanala; ayénachó mapalini 'yemi mi galá machíami niráa ra'íchaga binera mapu churigátamo galá bichiúga pirélabo.

⁷ Echi jaré namuti tákowami tarapé akami ju. Alí mapalí echi jaré pagótami ketasi galá machisáagá simeya echi jaré namuti mapu ikí tákowami ju, echalita tarapé omérabo machiyá mapu chuyiri taguí aboni.⁸ Ayénachó mapalí echi bilé sontarsi we

taguí echi korneta anilíwami mapurigá binói echirigá bayema nakónala echi auché jaré sontarsi, a'lí a binói ketasi galá machíami niráa simésagá, echalí ke wesi galá karigá muchima mapurigá nakoma.⁹ Ayénachó 'yemi yuwa achigórigá cho níima, mapujiti átamo auché jaré isena ra'íchali ra'ichásagá, echalítamo wepi ra'íchami níibo, mapujiti ke wesi omérama machiyá mapurigátamo aní.¹⁰ Ne bichíwali ju mapu wikabé isena ra'íchali nirú jena'í wichimóbachi, ayénachó bichíwali ju mapu ibili niráa echirigá wikabé isena ra'íchami pagótami galá machí aboni ra'íchala, mapu churigá aniwáami ju.¹¹ Chopi a nijeni ketasi machisáagá echi si'nú ra'íchali mapalí jaré pagótami tamí ra'icha, echalí nijeni mapurigá isena pagótami niráa níima echirigá ra'íchami pagótami yuwa, ayénachó echirigá ra'íchami pagótami we isena niráa níima tamí yuwa.¹² A'lí mapujiti 'yémítamo wabé nakí mapurigá Riosi 'yemi mi omératama mapurigátamo galá omérabo olayá Riosi nóchala, galá níima máputamo bachá niráa ne galá nakisá mapurigá Riosi 'yemi mi 'yama mapurigátamo omérabo waminabi binériya echi jaré napawika bichíyami, ne galá machíami niráa.

¹³ Echirigá galá níima mapu ibílipi mapu ikí echirigá ra'íchako si'nú ra'íchali niráa, ayénachó tánama Riosi mapurigá Binói 'yama mapu échiko ayénachó galá omérama ku ruyá mapu churigá aniwáami ju echi ra'íchali.¹⁴ Mapujiti a nijeni si'nú ra'íchali ra'ichásagá mapalini Riosi yuwa ra'icha, echalini ne bichíwali ra'icha Riosi yuwa, chópini tarapé machimea mapu pírini ra'icha nijé.¹⁵ ¿Churigá 'nalí galá níima mapurigá nijeni olama? Nijeni ra'icháma Riosi yuwa echi jaré isena ra'íchali niráa, chopi ayénachó nijeni ra'icháma Riosi yuwa mapu echi jaré pagótami galá omérama machiyá, ayénachó nijeni kanílaga nawajima isena ra'íchali niráa mapurigá Riosi kipuma. Chopi nijeni ayénachó nawajima echi jaré Riosi nawajíwala mapu echi jaré pagótami galá 'nátaga machimea.¹⁶ Mapujiti a mujemi chopi si'nú ra'íchali ra'ichásagá mapalimi waminabi walubélaga ané Riosi, mapurigá mujé binói 'nata echo'ná mujé sulálachi niráa, echalí echi auché jaré ke galá binératami pagótami ketasi omérama machiyá mapurigami aní. Echijiti aboni ketasi omérama jeaniyá mapu aboni mi yuwa, a'nawí, chópirigá 'nata mapalí mujemi Riosi yuwa ra'íchaga, walú natétara 'ya.¹⁷ Mapujiti mapurigá mujemi aní mapalimi echirigá natétara 'ya Riosi, arígá we galabé níisa, echi auché jaré mapu mi kipuma ketasi waminabi bichíiratami níima, mapujiti aboni ketasi machimea mapurigá mujemi animea, si'nú ra'íchali niráa.¹⁸ Nijeni walú natétara 'ya Riosi mapujítini ne simírami niráa ra'icha echi auché jaré isena ra'íchali, ketasi mapurigá 'yemi si'néami.¹⁹ Mapalí echi jaré wikabé bichíyami napawima nijeni waminabi nakimea nawésaga ra'ichánala pe okuáa ra'íchali mapu galá machirúami níima, ketasi echi makói mili isena ra'íchali mapu ke wesi machimea; mapujiti nijeni chopi galá omérama binériya auché jaré mapalí aboni galá machiko nijé ra'íchala.

²⁰ Kení ritémawa ketasi 'natasi mapurigá echi jaré kúuchi niráa. Chopi echi jaré kúuchi ketasi cho chati sití oláami ju, echijiti achigórigá oláami níisi 'yemi mapurigá echi jaré kúuchi, chopi sinibí ne galá machigá 'nátami níisi mapurigá echi jaré mapu ma ochérami ju.²¹ Echo'ná Riosi nulalila oselíwalachi je'ná jerigá osirúami ju mapurigá echi Walubela Riosi jeaní: Nijeni ra'ichálama auché jaré si'wina piréami pagótami mapurigá aboni ra'íchama je'ná Juríosi pagótami, isena ra'íchali niráa, chopi je'ná Juríosi nirapé echirigá galá tamí nijéwama.²² Echirigá ju mapu jaré bichíyami 'yárami ju mapurigá aboni ke sayiná, pe télipi niráa, ra'íchako isena

ra'íchali niráa, mapurigá echi auché jaré ke cho bichíyami pagótami echijiti galá machimea mapu Riosi ne wabé Walubela ju. Chopi echi jaré bichíyami ketasi echirigá 'yárami ju mapurigá aboni echirigá ralíchama, isena ra'íchali niráa, echi auché jaré ma galá bichíyami pagótami. A'lí auché jaré bichíyami 'yárami ju mapurigá aboni nawésama echi jaré napawika bichíyami pagótami achigórigá mapurigá Riosi Binói 'ya nawisánala, chopi mapurigá echi jaré napawika bichíyami waminabi galá bichíima; chopi echiyiri bichíyami ketasi echirigá 'yárami ju mapurigá aboni nawésama echi jaré ke bichíyami pagótami.²³ A'lí mapalí si'néami 'yemi napawí, echalí a si'néami 'yemi sinepi niráa ra'ichásagá echi jaré isena ra'íchali, a'lí a echo'ná 'yemi yuwa mo'wiságá jaré mapu ketasi cho galá binératami ju, jaré ke cho bichíyami kéréma, echalí aboni jeanimea mapu 'yémítamo ke newalite níilasali.²⁴ Chopi a si'néami 'yemi galá machíami niráa nawisásagá mapurigá Riosi Binói 'yemi mi nulé nawisánala, a'lí a echo'ná 'yemi yuwa bakiságá bilé mapu ketasi cho bichíyami ju, mapu ketasi cho galá machiko Riosi Ra'íchala, echalí échiko we yáati machimea mapurigá binói we chati sitíi oláami ju. A'lí échiko we siwega 'natama mapujiti binói echirigá chati sitíi oláami ju, mapalí binói echirigá kipusa mapurigá 'yémítamo newesa Riosi Ra'íchala.²⁵ Echirigá echi rijói ku newaláma suwaba chati oluwáwami mapurigá binói olali, mapurigá chinásarami ju echo'ná pachana binói sulálachi niráa. Echalí binói chokoba wilíbaga galá bichiiga, walubélaga anema Riosi, ayénachó jeanimea mapu Riosi ne bichíwali 'yemi yuwa atí.

Ne suwaba kilí niráa wachínaga olasi

²⁶ Keni ritémawa, 'yémítamo sinibí je'ná jerigá olá: Mapalí 'yemi bichíyami napawí, jaré 'yemi we nakí nawajíñala jaré Riosi nawajíwala. Auché jaré we nakí binéranala echi auché jaré. Auché jaré we nakí ku ruyénala bilé namuti mapu Riosi 'yemi mi machírali. A'lí auché jaré we nakí ra'ichánala jaré isena ra'íchali. A'lí auché jaré we nakí ku ruyénala mapu churigá aniwáami ju suwaba mapu echirigá anirúami níili, isena ra'íchali niráa. Galá ju máputamo olabo ne suwaba, chopi arigá 'wérali ju mapu echi auché jaré napawika bichíyami arigá waminabi galá bichíratami níisa, ne suwaba jiti mapu ikítamo olá.²⁷ Chopi a jaré 'yemi isena ra'íchali ra'ichásagá, galá níima chopi okuá echirigá ra'ichasa siné napawíkowachi, pe bikiyá keremá. A'lí sinibí galá níima ibílipi niráa echirigá ra'ichasa. Ayénachó arigá 'wérali ju mapu jaré galá ku ruyema mapu churigá aniwáami ju mapurigá anirúami níili.²⁸ Chopi a ke wesi télasagá mapu galá omero ku ruyá mapurigá aniwáami ju echiyiri ra'íchali, echalí ketasi galá níima máputamo echirigá ra'ichabo echi jaré isena ra'íchali mapalítamo si'néamika napawí. Chopi galá níima ibílipi waná binói bi'neli niráa ra'ichasa echi jaré isena ra'íchali Riosi yuwa chopí.²⁹ Echirigá ayénachó galá níima echi auché jaré yuwa mapu galá nawesa Riosi Ra'íchala achigórigá mapurigá Riosi Binói 'ya aboni nawisánala. Galá níima mapu chopi okuá echirigá nawisama siné napawíkowachi, pe bikiyá keremá. A'lí galá níima echi auché jaré 'yemi chopi kilí kipuga 'natasa acha galá ju mapurigá nawisálawa.³⁰ A'lí a auché bilé rijói echo'ná atíami, Riosi jiti machíratami níisagá bilé namuti, echalí galá níima mapu echi mapu nawésako risénsia 'yasa mapurigá echi auché biléala ra'icháma.³¹ Echirigá 'yemi máputamo ikí Riosi jiti 'yárami ju nawisánala Binói Ra'íchala galátamo omérabo newesa ibílipi niráa, mapurigá ne si'néami 'yemi napawika bichíyami galá binebo, ayénachó mapurigá si'néamítamo waminabi kanílabo.³² A'lí galá níima

mapu echí jaré mapu ikí nawesa Riosi Ra'íchala achigórigá mapurigá Riosi Binói 'ya nawisánala, sinibí we galá nijéwiyami níima Riosi, a Riosi nurésagá auché bilé bachá ra'ichánala.³³ Mapujiti Riosi tamujé tamí 'ya máputa galá kilí 'nátami níbo, ketasi mapurigá buchuwí aníami níbo.

A'lí mapurigá si'néami echí auché jaréana piréami achigórigá bichíyami ritémrtami sinibí nulá olánala³⁴ ketasi risénsia ju mapu echí jaré muguí bichíyami nawisama echo'ná napawíkowachi, mapalí si'néami 'yemi bichíyami napawí. Chopi galá níima mapurigá aboni galá nijéwami níima echí jaré ríjoy, achigórigá mapurigá nulárami ju echo'ná Riosi nulalila oselíwalachi.³⁵ A'lí a echí jaré muguí nakisáagá binénala jaré namuti, galá níima rukuesa aboni kunala, echo'ná aboni pirélachi, mapujiti ketasi galá níima mapurigá bilé mukí ra'icháma echo'ná napawíkowachi mapalí ne si'néami echí jaré napawika bichíyami ritémrtami napawika muchuwi.

³⁶ 'Yemi aboni niráa galá machisí mapu je'ná Galabé Riosi Ra'íchala ketasi 'yemi aboni ra'íchala ju; ayénachó machisí mapu ketasi 'yemi chópitamo ju mapu ma galá bichíili Riosi Ra'ichala.³⁷ A'lí a jaré 'yemi mayésagá máputamo we omero nawésiya mapurigá Riosi 'yemi mi 'ya nawisánala, ayénachó a jaré 'yemi mayésagá mapu echí Wabé Galabé Riosi Iwigala 'yemi mi ne suwaba galá machira echí ne Bichíwali, galá níima mapu 'yémítamo machiboa mapu nijé binói nulérami níili echí Walubela Jesucristo jiti, 'yemi mi je'ná jerigá osénala.³⁸ Chopi a jaré ketasi mayésagá mapu nijeni ne bichíwali nulérami níili echí Walubela Jesucristo jiti mapalini 'yemi mi je'ná jerigá oseli, echalí galá níima mapu echí auché jaré 'yemi galá machiboa mapu Riosi ketasi níili mapurigá echirigá 'natárali echí jaré.

³⁹ Echirigá biché, 'yemi keni ritémawa, arígá 'wérati nakisí mapu Riosi 'yemi mi 'yama mapurigátamó omérabo nawésiya achigórigá mapurigá Binói 'yemi mi 'yama nawisánala; chopi ketasi anesi echí auché jaré mapu ketasi risénsia ju mapu ra'icháma echí auché jaré isena ra'íchali.⁴⁰ Chopi mapalítamo napawí, sinibí kilí niráa wachínaga olasi suwaba mapu ikítamo olabo.

Mapurigá Jesucristo ku owinali

15 Jipi, 'yemi keni ritémawa, nijeni nakí máputamo sinibí galá 'natabo echí we Galabé Riosi Ra'íchala jiti, mapurigá nijeni ma 'yemi mi nawésali, ayénachó mapurigá 'yémítamo galá bichíili. A'lí bichétamo abijí ne wabé galá bichíi.² Ayénachótamo ma ku wikawárami ju, mapujítitamo galá bichíili echí Wabé Galabé Riosi Ra'íchala, átamo sinibí echirigá galabé niráa bichíisagá, achigórigá mapurigá nijeni 'yemi mi nawésali.

³ Mapujiti bachá niráa nijeni 'yemi mi binérati achigórigá mapurigá nijeni binératami níili. Echirigá nijeni 'yemi mi binérati mapu echí Walubela Jesucristo mukuli tamujé chati sitíi olalila jiti, achigórigá mapurigá osirúami ju Riosi Ra'íchala oselíwalachi.⁴ Ayénachó mapu Binói waminá ch'u'wirótami níili, ayénachó mapu Binói bikiyá chí'resa ku owinali mapurigá osirúami ju Riosi Ra'íchala oselíwalachi.⁵ Ayénachó mapu echí Pegro galá riwali echí Walubela Jesucristo auchecho ku bitéami niráa. Ayénachó mapu pe wakinánokuá echí auché jaré mapu ikí julárami níili nawisánala, ayénachó riwali echí Binói ma ku bitéami niráa.⁶ A'lí pe wakinánokuá, simírami malí kiento ritémrtami bichíyami, sinepi niráa galá riwali echí Walubela Jesucristo auchecho ku bitéami niráa. Pe wikabé aboni abijí piré, chopi jaré ma suwili.⁷ Pe wakinánokuá echí Jakobo ayénachó riwali echí Walubela Jesucristo

auchecho ku bitéami niráa. Auchecho pe wakinánokuá si'néami echi jaré mapu ikí julárami níili nawisánala auchecho siné riwali echi Walubela Jesucristo ma ku bitéami niráa.

⁸Echirigá ne si'néami echi auché jaré bachá niráa galá riwali echi Walubela Jesucristo ma ku bitéami niráa, chopi nijeni ayénachó, ne jubáami niráa, echirigá riwali echi Walubela Jesucristo. Echalí nijeni mapurigá mukúami niráa níili, mapalini arigá bitéali, mapujiti wi'llibé bamíbali jonsa nijeni wabé chati sitíi oláami níili. ⁹Ne bichíwali Riosi tamí júuli nawisánala, chopi nijeni ketasi wabé simírami galabé ju mapurigani echijiti walula Riosi jiti nawésami anérami níima, mapujiti mapalini ke cho bichíili, nijeni wabé risúu ologá a'najátili echi auché jaré mapu napawika bichíyami níili Riosi. ¹⁰Chopi jípi nijeni Riosi jiti julárami ju mapujiti Riosi Binói tamí wabé ku'wírali. Allí Riosi ne wabé simírami tamí ku'wírali mapurigani ne wabé simírami nochama, Binói nóchala olayá, ketasi mapurigá si'néami echi auché jaré nóchali. Chopi ketasi nijé binói chopi níili mapu echirigá olali, mapujiti Riosi tamí ku'wírali mapurigani echirigá olama. ¹¹Chopi ¿ke chi're a nijé níisagá mápuni echirigá nóchali? ¿Ke chi're a aboni níisagá, kérémá? Arigata echirigá nawésali echi Galabé Riosi Ra'ichala. Allí 'yémítamo ma galá bichíili echirigá mapurigátamo nawésarami níili.

Mapurigá echi jaré suwíami ku o'wínama

¹²Chopi ata nawisásagá mapu echi Walubela Jesucristo ku owíuali mapalí Binói ma mukúami níili, ¿churigá biché aní jaré 'yemi mapu echi jaré ma suwíami ketasi chirigá ku o'wínama? ¹³Mapujiti a ke siné ku o'wínasagá echi jaré suwíami, echalí echi Walubela Jesucristo Binói ketasi cho ku owínamili. ¹⁴Ne bichíwali ju mapu echi Walubela Jesucristo ma ku owíuali mapalí Binói ma mukúami níili. Chopi a ketasi bichíwali níisagá mapu Jesucristo ku owíuali, echalí tarapé natéami níima mapu tamujeta nawesa, nibilé cho natéami níimi mapu 'yémítamo ma galá bichíili Jesucristo niráa. ¹⁵Allí a ketasi echirigá ku owínamí níisagá echi Walubela Jesucristo, echalí tamujé ne wabé 'yékaka nawésami níibota, Riosi sayéraga, mapujítita ma nawésali jeanigá mapu Riosi ma ku owíntali echi Walubela Jesucristo. Chopi a ne bichíwali níisagá mapu Riosi ke siné ku owíntama echi jaré suwíami, echalí ketasi bichíwali níimi mapu Riosi ma ku owíntali echi Walubela Jesucristo. ¹⁶Mapujiti a ke siné ku o'wínsagá echi jaré suwíami, echalí ketasi bichíwali níimi mapu echi Walubela Jesucristo ma ku owíuali. ¹⁷Allí a ketasi ku owínamí níisagá echi Walubela Jesucristo, echalí tarapé natéami níima mapurigátamo ma galá bichíili. Echalítamo ketasi ku wikawárami níibo mapurigátamo wabé chati sitíi olali. ¹⁸Ayénachó a echirigá ne bichíwali níisagá, echalí echi auché jaré bichíyami mapu ma waminá suwili, si'néami ma 'wigáami níimi, si'néami mapu ikí bichíili Jesucristo niráa. ¹⁹Ne bichíwali ju mapu echi Walubela Jesucristo tamujé tamí ku wíkawáli mapalita galá bichíili Binói niráa. Chopi a Jesucristo ketasi ne bichíwali tamujé tamí echirigá ku Wikawámi níisagá ne sinibí niráa, echalí ne jubá rawé ayénasí, echalí tamujeta wepi risúu olárami níibota jípi rawé, mapalí auché jaré tamujé tamí risúu olá mapujítita anili máputa echirigá bichíili Jesucristo niráa. Ayénachó a echirigá ne bichíwali níisagá, echalí galá níima mapu echi auché jaré pagótami tamujé tamí ne wabé natimama, mayega máputa ke newalite ju.

²⁰Chopi ne bichíwali ju mapu echi Walubela Jesucristo ma ku owíntarami níili, mapalí Binói ma mukúami níili. A'lí achigórigá mapurigá echi jaré Juríosi pagótami sinibí ne bachá niráa 'yali Riosi jaré karúmati 'wlami, echirigá ayénachó echi Walubela Jesucristo ma ku 'yárami níili Riosi, ku owínami niráa; chopi waminánomí ne si'néami echi jaré bichiyami ayénachó 'yárami níima Riosi ma ku o'wínami niráa. ²¹Echirigá mapurigá jipi ne si'néami pagótami jenaí wichimóbachi piréami arigá suwí, mapujiti echi bilepi Arani riwéami ne bachá bitéami ríjoy, bachá niráa chati sitíi olali; echirigá ayénachó si'néami mapu ikí bichiyami ju Jesucristo niráa, waminánomí auchecho ku o'wínama, mapujiti echi bilepi Jesucristo ma ku owínali. ²²A'lí mapurigá si'néami pagótami waminá suwí mapujiti ne si'néami aboni echi Arani kúchuwala kúchala niráa ju; echirigá ayénachó ne si'néami pagótami mapu ikí echi Walubela Jesucristo níwala ju, arigá auchecho siné ku pirélama waminánomí. ²³Chopi ibílipi niráa ku owíntarami níima mapurigá aboni 'yárami níima Riosi. Echi Walubela Jesucristo ne bachá niráa ma ku owíntarami níili, a'lí Binói ku 'yárami níili Riosi mapurigá echi 'wlami mapu ne bachá niráa 'yárami níili Riosi. A'lí si'néami echi jaré Jesucristo níwala pagótami galá ku owíntarami níima waminánomí, mapalí echi Walubela Jesucristo ku nolínama. ²⁴Echalí níima echi ne jubá rawé. Echalí echi Walubela Jesucristo ma ketasi ariwema mapu echi jaré o'wéala nuláami jenaí wichimóbachi piréami waminabi echirigá nulama; chopi auchecho ku 'yama mapu echi Walubela Riosi Onorúami echirigá Walubela Nuláami níima suwaba namuti yuwa. ²⁵Mapujiti arigá 'wérali ju mapu echi Walubela Jesucristo wabé nulama mapurigá ne Walubela niráa, mapuyénasí Riosi Onorúami ma galá ni'yura, mapuyénasí ne si'néami echi jaré Jesucristo sayérami waminá suwaba omératami níima. ²⁶Ayénachó echi mukuwáami tamujé tamí ne wabé sayérami ju, chopi ne jubáami niráa, echi Walubela Jesucristo suwaba waminá suwábama echi mukuwáami, mapurigata ma ketasi waminabi suwiboa. ²⁷Echo'ná Riosi Ra'íchala oselíwalachi osirúami ju mapu Riosi 'yali mapurigá Jesucristo Walubela Nuláami níima ne suwaba namuti yuwa. Echirigá ketasi aniwáami ju mapu Jesucristo nuláami níima Riosi Onorúami yuwa, mapujiti Riosi Onorúami ju mapu echirigá 'yali mapu Jesucristo ne Walubela Nuláami níima. ²⁸A'lí echalí ne jubá rawé mapalí si'néami echi Walubela Jesucristo sayera waminá omératami níima, echalí echi Binói Walubela Jesucristo, mapu echi Bilepi Riosi Ranala ju, auchecho ku 'yama mapurigá Riosi Onorúami arigá ne Walubela níima suwaba yuwa, mapujiti Riosi Onorúami ju mapu ki'yá chokichí wilali echi Binói Jesucristo mapurigá Walubela niráa, ne suwaba namuti yuwa. Echirigá echi Bilepi Walubela Riosi suwaba omérarami níima suwaba yuwa. ²⁹Chopi mapalí bilé ke ba'wí jiti pagótami mukusáagá, echalí jaré 'yemi 'nalítamo pagó. ¿Churékulátamo echirigá olá? Mapujiti a bichíwali níisagá mapu echi jaré ma suwíami ke siné ku o'wínama, ¿churékulátamo echirigá 'yemi 'nalítamo pagó, mapalí echi mukúami ke pagótami káachi?

³⁰Sinibí rawé echi jaré ke bichiyami pagótami tamujé tamí ko'wináli mapujítita we nawesa jeanigá mapu Jesucristo ma ku owínali, chopi a ne bichíwali níisagá mapu echi jaré ma suwíami ke siné ku o'wínama, ¿churékuláta waminabi nawisabo Jesucristo jiti rugá, a jaré echijiti tamujé tamí echirigá ko'winálasagá? ³¹Keni ritémawa ne bichíwali ju mapu sinibí rawé nijeni ne noguí mi'lirúami ju, chopi ayénachó bichíwali ju mapu nijeni ne wabé kanila 'yemi jiti, mapujítitamo ma galá bichíili Jesucristo niráa. ³²Jaré rijói ne wabé jobátami jenaí Ejésochi piréami

tamí ne wabé sayérali mapujiti nijeni nawesa Jesucristo jiti rugá, chopi nijeni arigá nawesa mapujítini galá bichíi mapu Jesucristo ma ku owínali. Chopi a ne bichíwali nísagá mapu echi jaré suwfámi ke siné ku o'wínama, echalí Jesucristo ketasi cho ku owínami níima, a'lí chopi galá níimi olasa mapurigá jaré pagótami jeaní: ¡Ma walú kopoá, ayénachó ma walú bajibo, mapujiti siné káachi ba'alita suwibóiré!

³³Chopi ketasi ariwesi 'yemi mapurigátamo echirigá 'yékarami níibo. Ne bichíwali ju mapurigá je'ná jerigá anirúami ju: Átamo sinibí 'yénasagá echi auché jaré chati sitíi oláami pagótami yuwa, echalí 'yémítamo ketasi waminabi galabé ologá 'yénabó. ³⁴Auchecho siné ne galá wachínaga, kilí ologá pirélasi. Ketasi waminabi chati sitíi olasi. Jaré 'yemi ketasi cho galá bichíili Riosi. Nijeni 'yemi mi je'ná jerigá ané mapurigátamo we riwélabo.

¿Churigá ku o'wínama echi jaré suwíami?

³⁵Chopi siné káachi jaré je'ná jerigá rukuema: ¿Churigá ku o'wínama echi jaré suwíami? ¿Chuyiri ku sapélama aboni? ³⁶Mapu echirigá rukueko, échiko mapurigá ke newalite ju, mapujiti 'yémítamo galá machí mapurigá echi jaré raká chopi galá a'wí mapalí ma ichirúami ju echo'ná wi'yérali, mapo'ná echi raká waminá bikamea mapurigá mukúami niráa. ³⁷Mapuyíripi raká mapu ichirúami ju, echi a ku bukulíwami ochérama. Chopi chokichí niráa echi raká bi'neli chopi ichirúami níili, a echi turío rakara nísagá, a auché jaré isena kéremá. ³⁸Riosi Binói 'ya ibili raká mapu churigá ochérama mapurigá Binói nakí. A'lí ibili raká anchecho siné achigórigá ochera. ³⁹Chopi ketasi ne suwaba namuti chopi a yiri sapéami ju, mapujiti echi pagótami sapala bilepi sapá ju, a'lí echi jaré namuti sapala auché bilé si'nú sapá ju, ayénachó echi jaré chuluguí sapala auché bilé si'nú ju, ayénachó echi jaré rochí sapala auché bilé si'nú ju. ⁴⁰Echirigá echi jaré echo'ná ripá riwigachi muchúwami ayena sapé, achigórigá mapurigá si'néami jena'í wichimóbachi piréami ayénachó sapé. A'lí echi jaré ripá riwigachi muchúami sapala ne wabé simati ju, chopi jena'í wichimóbachi piréami sapala si'winárigá simati ju. ⁴¹A'lí echi rayénali waminabi ne wabé simírami rataba ketasi mapurigá echi michá, ayénachó waminabi ne wabé simírami rataba ketasi mapurigá echi jaré sopolí. A'lí jaré sopolí waminabi simírami rataba ketasi mapurigá auché jaré sopolí. ⁴²Ayénachó echirigá ikimea echi jaré suwíami yuwa, mapalí aboni anchecho ku o'wíntarami níima. Chabénala mapalí aboni waminá suwili, echalí aboni sapala chu'wirótami níili, mapujiti we yáati bikamea riwéali. Chopi waminánomí mapalí aboni ku o'wíntarami níima, echalí aboni ma ketasi anchecho siné suwíamea. ⁴³Echalí chabénala aboni sapala chu'wirótami níili mapurigá chijúntami niráa; chopi waminánomí auché ku o'wíntarami níima, ne wabé simírami ba'yóami, ne wabé ratábami niráa. Echalí chabénala aboni sapala chu'wirótami níili mapujiti ma suwíami níili, chopi waminánomí aboni sapala ku o'wíntarami níima ne wabé simírami jiwérámi niráa. ⁴⁴Echalí chabénala aboni chu'wirótami níili mapurigá suwíami sapala niráa; chopi waminánomí aboni ku o'wíntarami níima, auché si'nú nakulíwarami mapurigá aliwá niráa, chopi arigá sapéami níima. Tamujeta arigá sapé mapuyénasíta piré jena'í wichimóbachi, chónita ayena anchecho isena niráa sapélabo echo'ná ripá riwigachi, aliwá niráa.

⁴⁵Je'ná jerigá ayénachó osirúami ju Riosi Ra'íchala oselíwalachi: Echi bachá wilíami rijoy, Arani riwéami, galá akami niráa niwárami níili. Chopi echi bukulí

ne jubáala nawáami Rijoy, Jesucristo riwéami, ayénachó sapéami níili mapurigá echí Arani. A'lí echí Walubela Jesucristo achigó yiri ju mapurigá echí Wabé Galabé Riosi Iwigala, ayénachó Binói njá mapurigá si'néami mapu ikí bichíiko Binói niráa ne sinibí niráa pirélama.⁴⁶ Chopi ne chokichí echí pagótami ketasi mapurigá aliwá niráa ju, chopi sapéami ju mapurigá jena'í wichimóbachi piréami niráa. A'lí waminánomí echí jaré galá bichíyami pagótami mapurigá aliwá niráa níima, chopi arigá sapéami níima.⁴⁷ Echi rijoy, ne bacháwala, chopi jena'í wichimóbachi nirúami wi'yé jiti niwárami níili; chopi echí Rijói osáwala, echí Walubela Jesucristo ju, echo'ná ripá riwigachi jonsa nawáami.⁴⁸ A'lí jena'í wichimóbachi piréami pagótami sapala achigó yiri ju mapurigá echí bachá wilfami rijói sapala, echí mapu wi'yé jiti niwárami níili. Chopi si'néami pagótami mapu ikí echo'ná ripá riwigachi piréami níima, aboni achigó yiri sapélama mapurigá echí Walubela Jesucristo, mapu echo'ná ripá riwigachi jonsa nawáami ju.⁴⁹ Echirigá mapurigá jipi tamujeta achigó yiri ju mapurigá echí rijói wi'yé jiti niwárami, echirigá ayénachó waminánomí tamujeta achigó yiri níibo mapurigá echí Rijói ripá riwigachi jonsa nawáami.

⁵⁰ Keni ritémawa nijeni nakí 'yemi mi anénala mapu ke wesi omérama mo'wiýá echo'ná ripá riwigachi, abijí achigó yiri sapéami níisagá mapurigá jena'í wichimóbachi piréami niráa; mapujiti tamujé sapala mapu arigá waminá suwibama ketasi omérama mo'wiýá echo'ná ripá riwigachi mapo'ná ne suwaba ke siné suwibama.⁵¹ Chopi nijeni nakí mapu 'yemi bichíyami galá machibóatamo je'ná jerigá mapu echí auché jaré ke bichíyami pagótami ketasi machí: Mapu tamujé mapu ikita bichíyami ju Jesucristo niráa, ketasi ne si'néamita waminá suwiboa, chopi echalí ne jubá rawé si'néami tamujeta we yáati auché isena nakulíwarami níibo⁵² mapurigá siné kupuchaga. Mapujiti echalí ne jubá rawé mapalí ke sayiná ne wabé anema Riosi níwala korneta anilíwami, echalí echí jaré Jesucristo jiti bichíyami mapu ikí suwíami níima, echalí ke sayiná ku o'wíntarami níima, mapurigá aboni ke siné auchecho siné suwimea. A'lí tamujé bichíyami máputa abijí pireko echalí ne jubá rawé, si'néamita auché isena galabéala niráa nakulíwarami níibo.⁵³ Jipi tamujeta arigá suwí, a'lí tamujé sapala arigá waminá bikáami ju, chopi arigá 'wérali ju máputa auché isena nakulíwarami níibo, mapurigata sinibí niráa pirélabo.⁵⁴ A'lí echalí ne jubá rawé tamujé sapala mapu ketasi sinibí niráa nirúlama riwéali, mapu arigá suwíiami niráa niwálati, ma bukulíwami ku nakulíwarami níima mapurigata ke auché siné suwiboa. Echalí ne bichíwali ikimea mapurigá osirúami ju Riosi Ra'íchala oselíwalachi jeanigá: Echi mukuwáwami ma suwábarami ju, mapujiti tamujeta ma ne sinibí niráa pirélabo.⁵⁵ Echijiti echí mukuwáwami ketasi waminabi tamujé tamí suwírama, nibilé waminabi tamujé tamí omérama.⁵⁶ Echi mukuwáwami chopi tamujé tamí suwira mapujítita ma chati sitíi olali. A'lí echí chati sitíi oluwáwami tamujé tamí omero mapujiti Riosi bachá niráa tamujé tamí nuleli máputa ketasi echirigá chati sitíi olabo, mapurigá osirúami ju echo'ná Riosi nulalila oselíwalachi.⁵⁷ Chopi walubé natétara 'yárami níлага Riosi, mapujiti Binói tamujé tamí 'ya mapurigata na'yúrabo, mapujiti echí Walubela Jesucristo tamujé tamí jiti mukuli.

⁵⁸ Echijiti 'yemi keni ritémawa, sinibí echirigá ne galá bichíísi Jesucristo niráa. Ke siné ariwesi echirigá bichíya. Sinibí waminabi wabé nochasi echí Walubela Jesucristo nóchala olayá, mapujiti 'yémítamo galá machí máputa ke siné wepi nocha, mapalita nocha echí Walubela Jesucristo nóchala olayá.

**Jaré ritémtami bichíyami napabuli wenomí echi auché
jaré ritémtami ne wabé tisúwati 'yábiya**

16 Galá níima mapu 'yémítamo napabubo wenomí echi auché jaré we tisúwati napawika bichíyami yábiya. Sinibí echirigá galá olasi 'yemi achigórigá mapurigá nijeni nuleli echi auché jaré napawika bichíyami echo'ná Galásiachi anilwachi kawírali piréami: ² Sinibí oméachi rawé ibili niráa 'yemi waminá waná rojuana muchuwasi jaré wenomí echo'ná 'yemi aboni pirélachi, echi mapu Riosi a'líwami níima, echi jaré tisúwati napawika bichíyami 'yánalaga. Echi jaré 'yemi mapu wikabé méliko waminabi wiká 'yama, chopi echi jaré mapu ke 'me méliko ayénachó pe okuáa 'yama. A'lí echirigá muchuwasi echo'ná 'yemi aboni pirélachi, mapuyénasí nijeni echo'ná nawá 'yemi napawika bichíyami yuwa. Echalítamo galá omérabo we yáati napabuya ne suwaba, mapurigátamo tamí tórataga julabo, echi jaré tisúwati napawika bichíyami 'yánalaga, ayénachó echalítamo ketasi nójchali olabo napabuya mapalí nijeni echo'ná nawá. ³ A'lí mapalí nijeni ma nawasa, echalí julámani echi jaré mapuyíripi 'yémítamo chapiboa mapurigá aboni echo'ná Jerusalémachi toMEA echi wenomí máputamo napabuli echi auché jaré ritémtami wabé tisúwati 'yábiya. Echalí nijeni ayénachó bilé oselí osémani echi jaré napawika bichíyami ritémtami echo'ná Jerusalémachi piréami. ⁴ A'lí a 'wéralli níisagá mapurigá nijeni ayénachó así simea, echalí aboni tamí yuwa simama.

Echi Pablo nawésiya iyénali

⁵ Pe waminánomí nijeni simea echo'ná 'yémichi mapalini ma simírasa echo'ná Maseróniachi anilwachi kawírali, mapujiti arígá 'wéralli ju mápuni bachá niráa echo'ná Maseróniachi simírama. ⁶ A'lí nijeni 'yemi mi yuwa tibímire pe téeli rawé. Siné káachi nijeni echo'ná asagá simíramiré jipi romó. Echalí 'yémítamo omérabo tamí ku'wíriya mapalí nijeni auchecho simea echo'ná auché jaréana mapo'ná 'wéralli níima mapo'nani simea. ⁷ Echirigá jipi nijeni ketasi pe téeli niráa 'yemi mi 'nénali mapalini echo'ná simírama, echo'ná Maseróniachi simiyá, mapujítini 'yemi mi yuwa pe wi'llié asinali, a echi Walubela echirigá tamí risénsia 'yásagá. ⁸ Chópini abijí jena'í Ejésochi tibima mapuyénasí seba echi jaré Juríosi anilwami pagótami omáwala, Pentikostesi anilwami, ⁹ mapujiti jena'í Ejésochi nijeni galá omero echi Walubela Jesucristo nójchala olayá. A'lí wikabé galá bichíima, chopi auché jaré wikabé tamí wabé sayera.

¹⁰ A'lí a echi Timoteo nawásagá echo'ná 'yemi yuwa, galá olasi mapurigá binói galá kanílama mapuyénasí echo'ná 'yemi yuwa atí, mapujiti echi Timoteo we galá olá echi Walubela Jesucristo nójchala, achigórigá mapurigá nijeni olá. ¹¹ Chopi ke wesi 'yemi ketasi 'me nílasi echi Timoteo. Si'winárigá galá ku'wírasi mapurigá binói kaníлага iyénaga wakiná simea tamí 'némíya, mapujiti nijeni jena'í buwigá atí mapurigá binói ke 'me ayó nawama, echi auché jaré ritémtami ayénachó mapu binói yuwa 'yena.

¹² Nijeni we tánali echi Apolo riwéami rijimala mapurigá binói echo'ná simea 'yemi mi 'némíya, echi auché jaré ritémtami yuwa. Chopi jipi binói ketasi nakili siminala. Pe waminánomí binói echo'ná simea, mapalí binói galá omero.

¹³Ne galá 'nátaga muchisi. Sinibí galá bichíysi Jesucristo niráa. Tarapé majaga, sinibí 'wérali olasi mapurigá Binói nakí. ¹⁴Ne galá galigá olasi ne suwaba mapu ikítamo olá.

¹⁵Keni ritémawa, 'mátamo galá machí mapu echi Sitéjana riwéami rijimala, binói upila yuwa, binói kúchuwala yuwa, échiko ne suwaba níili mapu ne bachá niráa bichíyi Jesucristo niráa, echo'ná Akáyachi piréami pagótami yuwa, ayénachótamo machí mapurigá aboni sinibí ne galá ku'wírali echi auché jaré napawika bichíyami ritémtami. ¹⁶A'lí nijeni ayénachó nakí máputamo galá nílalo echiyiri ritémtami, ayénachó galá nílasi si'néami echi auché jaré mapu ikí ku'wíriami ju, ayénachó si'néami mapu ikí nocha, Jesucristo nóchala olayá. ¹⁷Nijeni wabé kanili mapujiti ma sili echi Sitéjana, echi Portunato riwéami yuwa, echi Akáiko riwéami yuwa, mapujiti aboni ma tamí wabé ku'wírali, chopi 'yémitamo ketasi omériali tamí ku'wíriya, mapujítitamo ketasi tamí yuwa piréali. ¹⁸Aboni ma tamí ne wabé kaníflatali nijé aliwálachi niráa, ayénachó chabénala niráa aboni ma 'yemi mi kaníflatali aliwá niráa. Sinibí ne galá nilasi echi yiri ritémtami.

¹⁹Echi jaré napawika bichíyami ritémtami jena'í Ásiachi anilíwachi kawírali piréami 'yemi mi wabé ripora. Echi Akila riwéami rijói, binói upila Prisila riwéami ayénachó 'yemi mi wabé ripora. Ayénachó echi auché jaré ritémtami mapu sinibí napawí echo'ná echi Akila bitélachi 'yemi mi wabé ripora, mapujítitamo ayénachó napawika bichíyami ju echi Walubela Jesucristo niráa. ²⁰Ayénachó 'yemi mi ripora si'néami echi jaré ritémtami jena'í muchúami. Ibili niráa a'nagupi wabé galigá ripórasi 'yemi.

²¹Nijé, Pablo, 'yemi nimí je'ná jerigá ripóragera osé, nijé binói sikala jiti.

²²Galá níima mapu si'néami pagótami mapu ikí ketasi galésagá echi Walubela Jesucristo, waminá wi'nijírami níisa. ¡Mujé, tamujé Walubélawala Jesucristo, we yáati ku nawá jena'í wichimóbachi!

²³Nijeni nakí mapurigá echi Walubela Jesucristo 'yemi mi wabé ku'wírama.

²⁴Ayénachóni nakí máputamo galá machiboa mapurigá nijeni 'yemi mi ne wabé galé, si'néami máputamo galá bichíyami ju Jesucristo niráa. ¡Echirigá nílag!

Osá Osirúami
mapurigá San Pablo oseli echo'ná
KORÍNTOCHI PIRÉAMI

Echi Pablo auchecho siné osé echí jaré napawika bichíiyami ritémtami

1 Nijé, Pablo, 'yemi mi osé. Echi Walubela Jesucristo tamí júuli nawisánala mapurigá Riosi Binói nakili. Echi rijimala Timoteo mapu tamí yuwa atí, ayénachó 'yemi mi ripóraga náwala. Alí nijeni 'yemi mi osé, ne si'néami 'yemi napawika bichíiyami máputamo Riosi níwala ju, echo'ná Koríntochi anilíwachi walúlachi piréami. Ayénachóni 'yemi mi osé ne si'néami 'yemi napawika bichíiyami echo'ná ne suníami nolígá piréami, echo'ná Akáyachi anilíwachi kawírali. ²Nijeni ne wabé nakí mapu Riosi, tamujé Onolá, ayénachó echí Walubela Jesucristo, 'yemi mi ku'wírama, ayénachó mapu 'yemi mi 'yama mapurigátamo sinibí we galá kilí ologá pirélabo.

Echi Pablo ne wabé risúu olárami níili

³Galá níima mapu tamujeta waminabi walubélaga anesa Riosi, echí mapu tamujé Walubélawala Jesucristo Onolá ju, mapujiti echí Walubela Riosi Onorúami ju mapu tamujé tamí ne wabé natimá, ayénachó Binói sinibí tamujé tamí ku kanílata mapalita o'mona. ⁴Mapujiti Riosi sinibí tamujé tamí wabé galá ku kanílata mapalita wabé risúu olárami ju, mapurigá tamujeta ayénachó galá omérabo ku kanílatiya echí auché jaré, si'néami mapu ikí risúu olárami ju. Alí tamujeta echirigá ku kanílatabo aboni, achigórigá mapurigá Riosi ma tamujé tamí ku kanílatali. ⁵Mapujiti tamujé máputa julárami níili nawisánala Jesucristo Ra'íchala ne bichíwali wabé risúu olárami ju mapujítita bichíi Jesucristo niráa, chopi echí Walubela Jesucristo Binói ne wabé simírami risúu olárami níili. Echijiti tamujeta ayénachó ne wabé simírami ku kanílatami juta mapujiti Jesucristo Binói tamujé tamí ne wabé ku kanílata. ⁶Echijiti mapalí tamujé nawésami arigá ne wabé risúu olárami juta, Riosi chopi ariwé mapurigata echirigá risúu olárami níibo, mapurigá tamujé echijiti binebo churigata omérabo 'yemi mi ku kanílatiya pe waminana, mapalí siné káachi, 'yémítamo ayénachó risúu olárami níibo, ayénachó mapurigata omérabo 'yemi mi ku'wíriya mapurigátamo ne galá machiboa Riosi. Mapujiti mapalí Riosi tamujé tamí ku kanílata, Binói echirigá olá mapurigata omérabo 'yemi mi ku kanílatiya pe waminana. Echalí 'yémítamo galá omérabo kilí ologá anacha, mapalítamo risúu ologá a'najátarami níibo, achigórigá mapurigá tamujeta risúu olárami ju jipi rawé. ⁷Tamujeta mayé mapu 'yémítamo sinibí waminabi galá bichíisabo Jesucristo niráa.

Echijítita ayénachó mayé mapu achigórigá mapurigá 'yémítamo ayénachó risúu olárami ju, mapurigá tamujeta risúu olárami níili, echirigá ayénachó Riosi 'yemi mi ku kaníflata, achigórigá mapurigá Binói tamué tamí ku kaníflatali.

⁸Keni ritémawa nijeni nakí mapu 'yémítamo galá machiboa mapu churigá nijeni ne wabé risúu olárami níili mapalini echo'ná Ásiachi anilíwachi kawírali iyénali, mapujiti echalini ne wabé simírami risúu olárami níili. Echalini ne noguí ma ketasi omérali anacha mapalini echirigá risúu olárami níili, ayénachóni mayeli mapurigá nijeni ma ketasi waminabi bitélama jena'í wichimóbachi. ⁹Echalini mayeli mapurigani we yáati mi'lirúami níima, chopi ne suwaba je'ná jerigá ikili mapurigá nijeni ma ketasi waminabi mayema mápuni galá omero ku'wíriya njé binói niráa. Chópini mayema mapu Riosi tamí ku'wiro, Echi mapu galá ku o'winta echi jaré suwíami. ¹⁰Ne bichíwali Riosi tamí ku'wírali mapurigani ketasi echirigá mi'lirúami níima, mapujiti echi auché jaré ne wabé tamí mi'llináali. A'lí Riosi abijí jipi rawé tamí ku'wira, ayénachóni bichíi mapu Riosi waminabi tamí echirigá ku'wírama ¹¹a 'yémítamo Riosi yuwa tániga ra'ichásagá tamí jiti, ayénachó a wikabé auché jaré ritémtami echirigá Riosi yuwa tániga ra'ichásagá tamí jiti, a'lí waminana rawé ne wabé wikabé ritémtami ayénachó walú natétara 'yama Riosi, ma riwisáa mapurigá Binói ne bichíwali tamí ku'wiro.

Echi Pablo ruyé echo'ná Koríntochi piréami mapu piri jiti binói ke cho nawali echo'ná abónichi

¹²A'lí nijeni sinibí ne wabé kanila mapujítini, binói niráa ne galá machí mapu nijeni sinibí galabé ologá iyénali jena'í wichimóbachi, ayénachó mapurigani tarapé 'yékami níili. Chopi ne bachá niráa nijeni ne wabé kanila mapujítini echirigá galabé ologá iyénali echo'ná 'yémichi. A'lí Riosi Binói níili mapu tamí wabé galigá ku'wírali mapurigani omérama echirigá galabé ologá bitéllya, chopi ketasi níili echi wabé machiwáwami mapu nijeni wabé machili, mapu tamí echirigá galabé ologá bitératali. ¹³A'lí sinibí mapalini 'yemi mi osé, echalí chópini osé echi jaré namuti mapu 'yémítamo galá omérabo machiyá mapu churigá aniwáami ju, mapalítamo 'neni echi oselí. A'lí nijeni we nakí mapurigátamo ne sébali galá machiboa ne suwaba ¹⁴mapu ikítamo chopi péebi niráa machí jipi rawé, mapurigá echalí rawé mapalí echi Walubela Jesucristo ku nolínama, 'yémítamo wabé kanílabo tamí jiti mapujítini 'yemi mi nawésali Riosi Ra'íchala. Echalí nijeni echirigá achigórigá kanílama 'yemi jiti mapujítitamo galá bichíili njé nawésawala.

¹⁵A'lí echirigá mayega, nijeni 'náitali mapurigani bachá niráa echo'ná simea, 'yemi mi 'némiya, mapurigá 'yémítamo echirigá osá chokéami kanílabo mapujiti nijeni 'yemi mi 'nema osá chokéami. ¹⁶Echirigá nijeni 'náitali mapurigani echo'ná simírasama, 'yemi mi 'nésiya, mapalini simea echo'ná Maseróniachi anilíwachi kawírali. Ayénachóni mayeli mapu pe waminánala mapalini wakiná ku simea echo'ná Maseróniachi jonsa, echalini auchecho siné 'yemi mi 'nésama. Echirigá 'yémítamo galá omérabo tamí ku'wíriya mapalí nijeni waminabi simea echo'ná Juréachi anilíwachi kawírali. ¹⁷Chopi nijeni ketasi cho omérali echirigá olayá. Echijiti, ¿áchatamo mayé mapu nijeni arigá ketasi simináali echo'ná 'yemi mi 'nésiya, mapalini arigá anili mápuni echo'ná simea? Nijeni ketasi olá mapurigá auché jaré pagótami jena'í wichimóbachi piréami olá, mapalí aboni wepi aní mapu churigá aboni olama, chopi aboni arigá we yáati 'nata mapu ketasi ne bichíwali

echirigá olama.¹⁸ A'lí Riosi Binói galá machí mapu nijeni ketasi wepi 'yemi mi ané, jeanigá: Ayena, mapalini arigá nakí jeanénala: Ketasi.¹⁹ Mapujiti tamujeta 'yemi mi nawésali Jesucristo jiti rugá, echi Walubela Riosi Ranala. Nijé, Pablo, echirigá 'yemi mi nawésali, echi Silbano ayénachó, echi Timoteo. A'lí echi Walubela Jesucristo sinibí ne bichíwaga ra'íchali. Binói ke siné 'yékaka ra'íchali, ketasi mapurigá echi jaré 'yékami pagótami ra'icha mapu wepi jeaní: Ayena ne bichíwali ju, chopi aboni we yáati 'nata mapu ketasi bichíwali ju.²⁰ Mapujiti ne suwaba mapu ikí Riosi bachá niráa ne bichíwaga anili, ma ne suwaba sébali echirigá ikili, mapujiti echi Walubela Jesucristo ma julárami nílila jena'í wichimóbachi, a'lí Binói sébali olali mapurigá Riosi bachá niráa bichíwaga anili mapu olárami níima. Echijiti mapalita Riosi yuwa ra'íchaga, waminabi walubélaga ané Binói Riosi, echalita ma sunisa jeaní: Echirigá nílaka, echi Walubela Jesucristo jiti.²¹ A'lí Riosi Binói ju mapu sinibí tamujé tamí waminabi bichfirata Jesucristo niráa, achigórigá mapurigá Binói ayénachó 'yemi mi bichíirata. Ayénachó Riosi ju mapu tamujé tamí chapili mapurigata nochabo Binói nóchala olayá.²² A'lí Riosi ma tamujé tamí bawirali, pachana tamujé sulálachi niráa, mapurigata Binói níwala níibo. Ayénachó Riosi tamujé tamí 'yali echi Wabé Galabé Riosi Iwigala mapurigá bitélama pachana tamujé sulálachi, mapurigata echijiti galá machiboa máputa ne bichíwali sinibí niráa pirélabo Riosi yuwa waminánomí.

²³ Echi Walubela Riosi galá machí mapu nijeni ke cho nawali echo'ná Koríntochi 'yemi mi 'némiya, mapujiti nijeni ketasi chopi nakili mapurigá nijeni 'yemi mi yónama mapalini echirigá 'yemi mi yuwa nawá. A'lí je'ná jerigá mapurigá nijeni aní, ne bichíwali ju. Echijiti galá níima Riosi Binói tamí wi'nijisa, a ketasi echirigá bichíwali níisagá.²⁴ Ketasi bichíwali ju mapu nijeni sinibí nakí 'yemi mi nulénala mapu churigátamo olabo, mapurigá Jesucristo jiti bichíiyami niráa. Nijeni chopi nakí máputamo waminabi kanílabo, mapujítini galá machí máputamo ma galá bichíi Jesucristo niráa.

2 A'lí echirigá 'nátaga, nijeni ketasi nakili auché siminala 'yemi mi 'némiya, mapujiti nijeni ketasi nakí mapu nijeni 'yemi mi o'monáratama, chopi ani echo'ná 'yemi yuwa nawásagá, abijí 'wérali níimi mápuni 'yemi mi oyérama mapujítitamo ketasi cho galá níjewaga olali mapurigá nijeni 'yemi mi osogá nuleli.² A'lí a nijeni 'yemi mi oyérasagá, echalí nijeni ne bichíwali 'yemi mi o'monáratiyami níimi. A'lí 'yemi aboni arigá jútamo mapu tamí galá ganíflata, chopi a nijeni 'yemi mi oyérasagá, nijeni 'yemi mi o'monáratiyami níimi.³ Echijiti nijeni 'yemi mi pe oyéraga oseli, mapujiti nijeni ketasi siminali echo'ná 'yemi mi 'némiya, chopi mapurigá 'yémítamo tamí waminabi o'monáratama, mapujiti chopi galá níima 'yemi tamí kaníflatasá. A'lí nijeni ne bichíwali mayeli mapu a nijeni kaníliami níisagá, echalí ne si'néami 'yemi ayénachó galá kaníliami níibitamo.⁴ Chabénala mapalí nijeni 'yemi mi echirigá oseli, echalí arigá 'wérali níili mápuni echirigá 'yemi mi oyéraga osema; chopi nijeni echijiti arigá ne wabé o'monáratami níili sulachí niráa, ayénachó nijeni we nalali. A'lí echalí nijeni ketasi chopi echirigá oseli mapurigani 'yemi mi o'monáratama, mapujiti nijeni chopi nakili máputamo galá machiboa mapurigá nijeni 'yemi mi ne wabé galé.

Pablo nulá mapu aboni ku wikawama echi rijói mapu chabénala wabé chati olali

⁵ Echo'ná 'yémichi atí bilé rijói mapu chabénala wabé chati sitíi olali. A'lí échiko echijiti ne wabé simírami o'monáratali ne si'néami tamujé, mapujiti nijeni wabé

o'monáratami níili, achigórigá mapurigá 'yémitamo ayénachó o'monáratami níili. Chopi echi rijói ma wikáwali tali, echijiti nijeni ketasi nakí máputamo waminabi kastigo 'yabo echi rijói. ⁶Mapujiti chabénala mapalí si'néami 'yémitamo napawili, echalítamo ma galá sébali kastigo 'yali echi rijói. ⁷Echijiti jipi galá níima máputamo ku wikawabo echi rijói, ayénachó máputamo auchecho ku kanílatabo, mapurigá échiko ketasi ne wabé simírami o'monama. ⁸Echijiti 'yemi nimí ané máputamo auchecho ne wabé galebo echi rijói, mapurigá binói galá machimea mapu chu yena 'yémitamo galéami jú. ⁹Chabénala nijeni 'yemi mi oseli suwaba je'ná jiti, mapurigani galá machimea áchatamo ne bichíwali nakí olánala mapurigá nijeni 'yemi mi nuleli. ¹⁰Jipi galá machisí mapu a 'yémitamo ku wikawásagá jaré, echalí nijeni ayénachó ku wikawama. Mapujiti a nijeni ku wikawásagá auché jaré, echalí nijeni ku wikawa aboni, mapurigá 'yémitamo waminabi binératami níibo echirigá ku wikáwiya auché jaré, mapujiti nijeni julárami níili echi Walubela Jesucristo jiti. ¹¹A'lí tamujeta ketasi nakí mapu echi riablo, Satanasi riwéami, tamujé tamí 'yékama, mapujítita galá machí mapurigá wabé 'yékaka olá echi riablo.

Pablo ketasi kanila asali echo'ná Tróachi

¹²A'lí mapalí nijeni nawali echo'ná Tróachi anilíwachi mapurigani echo'ná nawisama echi Wabé Galabé Jesucristo Ra'íchala, echalí nijeni risensia 'yárami níili mapurigani galá nochama, echi Walubela Jesucristo nóchala olayá. ¹³Chopi nijeni arigá ketasi kaníili sulachí niráa, mapujítini ketasi riwali echi tamujé rijimala Tito riwéami echo'ná Tróachi. Echijiti ma ripórasa echo'ná piréami, nijeni waminabi simili echo'ná Maseróniachi anilíwachi kawírali simiyá.

¹⁴Chopi nijeni sinibí walú natétara 'ya echi Walubela Riosi mapujiti Binói nijiali mapurigá echi Walubela Jesucristo niyúrama, echi chati sitíi oluwáwami sayéraga. Ayénachó Riosi 'yá mapu tamujé bichíiyami echirigá nayúrabó mapujítita najata echi Walubela Jesucristo yuwa, ayénachó Riosi tamujé tamí 'yá mapurigata galá machíami niráa nawésabo si'néami pagótami echi Galabé Riosi Ra'íchala. A'lí echirigá ologá tamujeta ayénachó ju mapurigá bilé wabé su'weti júkami moluwá niráa, mapu wikanáami mikabé galá jubá. ¹⁵Echi Walubela Jesucristo mapurigá echi wabé su'weti júkami moluwá niráa ju Riosi yuwa, mapujiti Riosi ne wabé kanila Jesucristo jiti. Ayénachó tamujé Jesucristo jiti bichíiyami mapurigá echi wabé su'weti júkami moluwá niráa juta, Riosi yuwa, mapujiti Jesucristo tamujé tamí yuwa atí. Echijiti echi auché jaré mapu ikí ayénachó galá bichíiyami ju, aboni galá machimea mapu Jesucristo tamujé tamí yuwa atikó. Ayénachó echi auché jaré mapu ikí waminá 'wigáami níima, abóniko ayénachó galá machimea mapu Jesucristo tamujé tamí yuwa atikó. ¹⁶Echijiti Riosi ayénachó kanila tamujé bichíiyami jiti, mapalita we nawesa Jesucristo jiti rugá. A'lí mapalí echi auché jaré mapu ikí waminá 'wigáami níimako echirigá namsa tamujé nawésawala, echalí aboni galá 'natáma mapurigá aboni chopi waminá 'wigáami níima sinibí niráa. Chopi mapalí echi auché jaré galá bichíiyami echirigá namsa tamujé nawésawala, echalí aboni kaníliga 'natáma mapurigá aboni sinibí piréami níima Riosi yuwa. Echijiti ne wabé 'wérali ju mapu tamujeta waminabi nawisabo Riosi Ra'íchala, chopi ke wesi galá omero echirigá nawésiya, a Riosi Binói ketasi omératasagá. ¹⁷A'lí tamujeta ketasi 'yékaka niráa nawesa Riosi Ra'íchala, ketasi mapurigá auché jaré mapu we nakulíwaga, wabé 'yékaka niráa nawesa. Si'winárigá tamujeta ne galá

bichíwali niráa nawesa echí Galabé Riosi Ra'íchala, mapurigá Riosi tamujé tamí júuli nawisánala. Echijiti tamujeta bacháami Riosi yuwa ne galabé niráa nawesa mapurigá Jesucristo níwala pagótami niráa.

Riosi bukulíwami a'láraga nuleli echí pagótami

3 A'lí mapalí nijeni je'ná jerigá ra'icha, nijeni ketasi nakí mapu 'yémítamo chopi mayebo mapu nijeni ne wabé simírami galabé nawésami ju, chopi arigá ketasi 'wérali ju mapu auché jaré 'yemi mi osogá ruyema mapu nijeni ayena ne wabé galabé nawésami ju. Nibilé cho 'wérali níima mapu 'yémítamo osogá ruyebo auché jaréana piréami mapu nijeni echirigá galabé nawésami ju, chopi echí auché jaré mapu 'yékaka nawésako, arigá sinibí echirigá olá. ²Ketasi 'wérali ju echirigá osesa echí auché jaréana piréami mapujiti 'yemi aboni mapurigá nijé oselíwala niráa jútamo, mapujiti 'yémítamo ma bukulíwami galabé niráa nakulíwarami jútamo, mapujítitamo ma galá bichíili nijé nawésawala. A'lí 'yémítamo echirigá osirúami niráa níili echí auché jaré pagótami alíwami, mapurigá aboni galá omérama machigá 'nénuya mapurigá nijeni nawesa, mapalí aboni galá riwimea mapurigá 'yemi bichíyami ma bukulíwami niráa galabé ologá piré. A'lí 'yémítamo echirigá osirúami niráa jú pachana 'yemi sulálachi niráa. ³Echirigá 'yémítamo ibili niráa mapurigá bilé oselí osirúami niráa ju, echí mapu echí Walubela Jesucristo Binói osali, echí mapu nijeni 'ya echí auché jaré pagótami. Chópitamo ketasi ju mapurigá bilé oselí, echí tinta jiti osirúami, mapujítitamo osirúami niráa níili echí Wabé Galabé Sinibí Bitéami Riosi Iwigala jiti. Nibilé chótamo echo'ná biléana chipérami ritérali niráa osirúami jútamo, chópitamo osirúami niráa níili pachana echí jaré pagótami sulálachi niráa.

⁴A'lí bicheni galá bichíi mapu je'ná jerigá ne bichíwali ju, mapujítini ne galá bichíi Riosi, echí Walubela Jesucristo jiti. ⁵A'lí nijé, binói chopi niráa, ketasi wabé omériami ju Riosi nóchala olayá. Si'winárigá nijeni chopi omero Riosi nóchala olayá mapujiti Riosi Binói tamí galá omérata. ⁶Mapujitti Riosi Binói tamí galá omératali Binói nóchala olayá, achigórígá mapurigá Binói bukulíwami niráa bichíwaga anili. Mapujitti Riosi nulalila mapurigá echí walula Moisesi osali, chopi tamujé tamí binérali máputa arigá waminá suwiboa mapujítita ketasi omérali sébali galabé nijéwaga olayá mapurigata echirigá nulérami níili; chopi jipi tamujeta galá omero olayá mapurigá Riosi tamujé tamí nulé mapujiti Riosi ma tamujé tamí 'yali Binói Wabé Galabé Iwigala mapurigata echijiti sinibí niráa pirélabo.

⁷Chabé ki'yá echí walula Moisesi 'yárami níili Riosi nulalila, echo'ná okuá rité chibéramichi osirúami. A'lí Riosi ne wabé simírami ratábami níili mapalí echirigá 'yali, echijiti echí Moisesi cho'olá ayénachó ne wabé ratábali mapalí Riosi yuwa asali. A'lí pe kinánala echí auché jaré Isaeli anilíwami pagótami ketasi omérali ne wachínaga 'nénuya echí Moisesi cho'olá, mapujiti echirigá ne wabé ratábali, pe téeli niráa. A'lí jena'í wichimóbachi piréami pagótami chopi suwí mapujiti aboni ketasi galá nijéwaga olá mapurigá aboni echirigá nulérami níili. Chopi a echiyena ratábasagá mapalí echí nulalíwami 'yárami níili, ⁸waminabi ne wabé simírami galabé ju jipi rawé mapalí echí Wabé Galabé Riosi Iwigala echo'ná pachana echí jaré bichíyami sulálachi bité. ⁹A'lí jena'í wichimóbachi piréami pagótami chopi wi'nijírami ju echí nulalíwami jiti. Chopi a ne walubela níiságá echí nulalíwami, a'lí ne wabé simírami walubela niráa ju echí Wabé Galabé Riosi

Ra'íchala nawisálawami jeanigá mapu Riosi tamujé tamí wé galá naré mapalita galá bichíi Jesucristo niráa.¹⁰ Mapujiti echi nulalíwami mapu chabénala ne walubela niráa níili, ma ketasi 'me walubela niráa ju, mapujiti echi Wabé Galabé Jesucristo Ra'íchala nawisálawami ne wabé simírami walubela niráa ju.¹¹ A'lí a ne walubela niráa níisagá echi nulalíwami mapu ketasi sinibí niráa nirúami níili, a'lí ne wabé simírami walubela niráa ju echi Wabé Galabé Jesucristo Ra'íchala nawisálawami, mapujiti Jesucristo Ra'íchala ke siné suwibama.

¹² A'lí mapujiti tamujeta echirigá ne galá bichíi, echijiti tamujeta sinibí tarapé majaga we nawesábo echi Galabé Jesucristo Ra'íchala.¹³ Chopi tamujeta ketasi olá mapurigá echi Moisesi olali, mapujiti échiko waminá na'ómali binói cho'olá, bilé wisibula jiti, mapurigá echi auché jaré Isaeli anilíwami pagótami ketasi riwimea echi ratábawala waminá cho'wíami, mapujiti binói cho'olá ketasi sinibí niráa echirigá ratábami níima riwéali. Si'winárigá tamujeta ne galá machíami niráa nawesa Jesucristo Ra'íchala.¹⁴ Echalí ki'yánala echi jaré Isaeli pagótami ketasi galá machili mapu churigá aniwáami ju Riosi Ra'íchala. A'lí jipi yénasí echi jaré jipi piréami Isaeli pagótami ketasi cho galá machí mapu churigá aniwáami ju, mapalí aboni kipugú 'nékowachi Riosi nulalila oselíwala, mapu chabé ki'yá osirúami níili. Jipi rawé yénasí aboni 'nátawala abijí mapurigá na'omárami niráa ju, mapurigá echi Moisesi cho'olá na'omárami níili. Echijiti aboni ketasi cho omero galá machiyá mapu churigá aniwáami ju Riosi Ra'íchala. A'lí aboni chopi galá machimea mapalí aboni ma ne galá bichíi Jesucristo niráa.¹⁵ Mapujiti jipi rawé yénasí mapalí echi jaré Isaeli pagótami galá kipugú Riosi Ra'íchala oselíwala 'nékowachi, mapurigá osali echi Moisesi, echalí aboni arigá ketasi galá bichíi, mapujiti aboni 'nátawala abijí mapurigá na'omárami niráa ju. Echijiti aboni ketasi cho omero machiyá mapu chu aniwáami ju Riosi Ra'íchala.¹⁶ Chopi a bilé aboni arigá ne galá bichíisagá echi Walubela Jesucristo niráa, echalí binói 'nátawala ma ketasi waminabi echirigá na'omárami niráa níima, chopi échiko ma galá omérama machiyá mapu churigá aniwáami ju Riosi Ra'íchala.¹⁷ Mapujitti echi Walubela Jesucristo mapurigá echi Galabé Riosi Iwigála niráa ju. A'lí mapalí echi Walubela Jesucristo Iwigala pachana jaré pagótami sulálachi atí, echalí aboni ma ketasi waminabi nulérami ju echi nulalíwami jiti.¹⁸ Echijiti si'néami tamujé bichíyami galá machiná niráa 'yena. Ma ketasi waminabi na'omárami niráa ju tamujé cho'olachi, ketasi mapurigá echi Moisesi cho'olá niráa. Chópita ne galá 'nérabo echi auché jaré pagótami mapu Jesucristo ne wabé Walubela ju, achigórígá mapurigá bilé sipéjo wabé galá rataba echi rayénali jiti. A'lí echi Walubela Riosi Iwigala echirigá sinibí tamujé tamí waminabi nakuliwa mapurigá echi Walubela Jesucristo niráa. A'lí bicheta echirigá sinibí waminabi o'wéalatami níibo mapurigá Binói ne Walubela ju. A'lí echi Walubela Jesucristo Binói mapu je'ná jerigá olá, arigá mapurigá echi Wabé Galabé Riosi Iwigala niráa ju.

4 Echijiti tamujé nawésami ke siné ariwebo Riosi nóchala olayá, mapujiti Riosi Binói ne wabé natimaga tamujé tamí júuli nawisánala Binói Ra'íchala.² Chopi tamujeta ke siné chiná niráa 'yena. A'lí bicheta ma ariweli suwaba riwélagá oluwáwami, ayénachóta ketasi 'yékaka olá, nibileta nawesa jeanigá mapu Riosi Ra'íchala si'winárigá ju. Chopi tamujeta sinibí nawesa echi ne Bichíwali Riosi Ra'íchala. A'lí bicheta echirigá olá mapurigá si'néami 'yemi galá omérabo machiyá, bacháami Riosi yuwa, mapu tamujeta ne bichíwali olá Riosi nóchala.³ Chopi a

tamujé nawésawala, mapurigata sinibí nawesa Riosi Ra'íchala, abijí ketasi cho machirúami níisagá, ne galá machíami niráa, echalí echi jaré pagótami mapu waminá 'wigáami níima, abóniko chopi ju mapu echirigá ke machíami niráa mayé tamujé nawésawala.⁴ Chopi mapujiti aboni ketasi bichíyami ju Riosi, echijiti aboni ma ke 'nátami niráa niwálati echi riablo jiti, mapujiti echi riablo walula nuláami ju si'néami echi jaré ke bichíyami pagótami jena'lí wichimóbachi piréami yuwa. Echijiti echi jaré pagótami mapu ikí ke bichíinali ma niwálati mapurigá busugachi niráa, mapurigá aboni ketasi machimea mapu Jesucristo ne Wabé Walubela ju. Echijiti aboni ketasi bichíi echi Walubela Jesucristo jiti nawésawala. A'lí echi Walubela Jesucristo chopi ayiri ju Riosi Onorúami yuwa.⁵ A'lí mapalí tamujeta nawesa echi pagótami, tamujeta ketasi siné nawesa jeanigá mapu tamujé aboni ne wabé o'wéala ju, chópita sinibí aní mapu echi Walubela Jesucristo ne Wabé Walubela ju, ayénachóta aní mapu tamujé chopi mapurigá 'yemi piónawala niráa ju, mapujítita ne wabé galé echi Walubela Jesucristo.⁶ Ki'yá chokichí mapalí wabé rokowárali níili, echalí echi Walubela Riosi arigá nulali mapu galá rayenama jena'lí wichimóbachi, ayénachó echi Bilepi Walubela Riosi níili mapu ma ne galá rayéntali pachana tamujé sulálachi niráa, si'néami mapu ikí galá bichíyami juko, mapurigata galá machiboa mapu Riosi ne wabé Walubela ju, mapujítita ma ne galá bichíi Jesucristo mapurigá riwala niráa.

Echi jaré Riosi níwala pagótami galá bichiiga piré

⁷A'lí tamujé máputa julárami ju nawisánala je'ná ne Wabé Galabé Riosi Ra'íchala, ketasi 'me jiwerámi niráa ju, mapujiti tamujé chopi wi'yé jiti niwárami niráa ju, mapurigá echi jaré sikolí niráa. Echirigá tamujeta ne galá machila echi auché jaré jena'lí wichimóbachi piréami pagótami mapu echi Walubela Riosi chopi ju mapu tamujé tamí omérata auché isena galabé niráa nakulíwitiya echi jaré pagótami mapu ikí galá bichíi tamujé nawésawala, mapujiti tamujé aboni chopi niráa ketásirapé omériami ju echirigá nakulíwiya.⁸ Tamujé nawésami sinibí ne wabé sayératami ju, chopi Riosi sinibí tamujé tamí ku'wira. Wisabé ne wabé nílaka 'nata mapujítita wabé kumérami ju, chopi Riosi ke siné tamujé tamí ariwé.⁹ Echi auché jaré ke bichíyami pagótami arigá tamujé tamí risú ologá a'najata, chopi Riosi sinibí tamujé tamí yuwa atí. A'lí echi jaré tamujé sayela wisabé tamujé tamí omero, chópita ketasi waminá suwábarami ju.¹⁰ Kanápuromí mapo'nata simiba, Riosi Ra'íchala nawésiya, ne sinibí rawé tamujé ne noguí ko'wirúami niráa ju, mapurigá Jesucristo mi'lirúami níili, mapurigá ayénachó galá machirúami níima mapu echi Sinibí Bitéami Walubela Jesucristo pachana tamujé tamí yuwa bité.¹¹ Echirigá sinibí rawé mapu tamujé nawésami abijí piré jena'lí wichimóbachi, echi jaré tamujé sayela wabé tamujé tamí ko'winali, mapujítita bichíyami ju Jesucristo niráa. A'lí echirigá chopi ikí mapurigá galá machirúami níima mapu echi Walubela Jesucristo sinibí bité pachana tamujé tamí yuwa, máputa arigá waminá suwísimi.¹² Echirigá ju mapu tamujé nawésami sinibí ne noguí suwí, mapurigá 'yémítamo arigá sinibí niráa pirélabo.

¹³Echo'ná Riosi Ra'íchala oselíwalachi je'ná jerigá osirúami ju: Nijeni galá bichíili, echijítini nawésali. Echirigá achigórigá tamujeta ayénachó galá bichíili Jesucristo niráa. Echijítita we nawesa Binói Ra'íchala.¹⁴ Mapujiti tamujeta galá machí mapu echi Walubela Riosi Onorúami mapu ma ku owíntali echi Walubela Jesucristo,

ayénachó tamujé tamí ku owíntama echí Walubela Jesucristo yuwa. A'lí Binói tamujé tamí ku tomea, echí auché jaré 'yemi napawika bichíyami ritémtami yuwa, echo'ná ripá riwigachi mapo'ná Binói sinibí atí.¹⁵ A'lí nijeni je'ná jerigá wabé risúu olárami níili, chopi mapurigá 'yémítamo waminabi ku'wíratami níibo, mapurigá a wikabé echirigá ku'wíratami níisagá Riosi jiti, echalí wikabé ayénachó walú natétara 'yami Riosi, mapurigá Binói echirigá waminabi walubélaga anérami níima.

¹⁶Echijiti nijeni sinibí waminabi galá bichísimí Riosi, mapujiti jipi nijé sapala arígá waminá suwibásimí, chopi nijé aliwala arígá bukulíwami niráa niwárami nílasimí sinibí rawé. ¹⁷Mapujiti tamujé bichíyami arígá galá omero anacha mapurigata risúu olárami ju jena'í wichimóbachi, mapujítita ketasi wi'llibé niráa echirigá risúu olárami níibo. A'lí ayénata galá anachásagá mapalita risúu olárami ju jena'í wichimóbachi, a'lí waminánomí tamujeta sinibí niráa ne wabé simírami o'wéalatami níibo Riosi yuwa echo'ná ripá riwigachi. ¹⁸A'lí tamujé bichíyami ketasi 'me nirási echí jaré namuti mapu galá machiná ritiwíwami ju jena'í wichimóbachi. Chopi ne wabé galá nirási echí jaré Riosi níwala namuti mapu ke siné ritiwíwami ju jena'í wichimóbachi; mapujiti echí jaré namuti mapu galá machiná ritiwíwami juko ketasi wi'llibé nirúlama, chopi echí jaré Riosi níwala namuti mapu ke siné ritiwíwami juko, échiko ne sinibí niráa nirúlama.

5 Jipi rawé tamujé sapala chopi mapurigá jaré kalí niráa ju mapo'ná tamujé aliwala piré jena'í wichimóbachi, mapu ketasi sinibí niráa nirúlama. Chopi si'néami mapu ikita galá bichíi Jesucristo niráa galata machí mapalí tamujé sapala waminá suwibásagá, echalí tamujé ibili niráa nakulíwarami níibo, mapurigá bukulíwami galabéala niráa sapélabo echo'ná ripá riwigachi. Echalí ayénachó tamujé sapala bukulíwami mapurigá jaré bukulíwami kalí niráa níima mapo'ná tamujé aliwala sinibí niráa pirélama echo'ná ripá riwigachi, mapu ne sinibí niráa nirúlama. A'lí Riosi Binói chopi ju mapu tamujé tamí echirigá bukulíwami niráa nakulíwama, mapujiti ke wesi pagótami omero tamujé tamí echirigá ku nakulíwitiya. ²A'lí ne bichíwali ju mapuyena tamujé aliwala abijí piré jena'í tamujé sapálachi, mapurigá pachá jaréana kalírali niráa jena'í wichimóbachi nirúami, jípita ne wabé risúu aní, mapujítita chopi nakí mapu tamujé aliwala ku simama echo'ná ripá riwigachi, mapurigá echo'ná ripá riwigachi tamujé aliwala auchecho ku pirélama echo'ná tamujé sapala bukulíwamichi, mapu echo'ná ripá riwigachi nirúlama. ³Echalí tamujé aliwala auchecho bukulíwami galabéala niráa sapélama echo'ná ripá riwigachi, mapurigá tamujé aliwala ketasi chopi mapurigá aliwá niráa tibima. ⁴A'lí jipi mapuyena tamujé aliwala abijí piré jena'í wichimóbachi, tamujé sapálachi niráa, mapurigá pachá jaréana kalírali niráa, jípita abijí wabé risúu aní, ayénachóta risúu olárami ju. A'lí biché ketasi bichíwali ju mapu tamujeta we nakí suwinala, mapurigá tamujé aliwala ma ketasi waminabi pirélama jena'í tamujé sapálachi niráa. Si'winárigá tamujeta chopi nakí mapu tamujé aliwala echirigá bukulíwami galabéala niráa sapélama, mapurigata ma ketasi auchecho siné suwiboa, chopi máputa bukulíwami niráa ku pirélabo ne sinibí niráa. ⁵A'lí echi Walubela Riosi chopi ju mapu tamujé tamí a'lárali mapurigá tamujé aliwala echirigá bukulíwami sapélaga pirélama ne sinibí niráa. Ayénachó Riosi Binói tamujé tamí 'yali echi Wabé Galabé Riosi Iwigala, mapurigata echijiti galá machiboa máputa ne bichíwali sinibí niráa pirélabo Riosi yuwa waminánomí.

⁶A'lí tamujeta sinibí echirigá galá bichiiga piré, mapujiti tamujeta galá machí mapuyena tamujé aliwala abijí piré jena'í wichimóbachi, tamujé sapálachi niráa, echalí tamujeta ke cho bukulíwami galabéala sapé. A'lí tamujé aliwala ketasi cho piré echo'ná tamujé bukulíwami sapálachi niráa, mapurigá pachá jaré kalírali niráa, mapujiti tamujeta ke cho muchuwi echi Walubela Jesucristo yuwa, echo'ná ripá riwigachi. ⁷Echijiti tamujeta ayénachó sinibí galá bichiiga piré, mapujítita galá bichií Jesucristo niráa. Ketásita achigórigá bichií mapurigá echi auché jaré pagótami mapu chopi ritiwá echi jaré namuti jena'í wichimóbachi nirúami. ⁸A'lí tamujé bichiýami tarapé majawá, chópita waminabi wabé nakí mapu tamujé aliwala ku simama echo'ná ripá riwigachi, mapo'ná echi Walubela Jesucristo atí, ketasi mapu tamujé aliwala waminabi pirélama jena'í wichimóbachi tamujé sapálachi niráa. ⁹Echijiti tamujé nawésami sinibí ne wabé nakí máputa ne wabé galabé ologá kanílatabota echi Walubela Jesucristo echalí ne jubá rawé mapalí Binói ku nolínama, abijita pirélasagá, ma suwíami níisagá keremá. ¹⁰Mapujiti arigá 'wérali ju mapu waminánomí ne si'néami tamujé bichiýami, ibili niráa, bacháami jábabó echi Walubela Jesucristo yuwa, mapurigá Binói tamujé tamí justicia olíima. Echalí ibílipi niráa 'yárami níibo achigórigá mapurigata olali jena'í wichimóbachi, mapalí tamujé aliwala abijí piréali jena'í tamujé sapálachi niráa. Echalí rawé echi jaré mapu galabé olali, arigá 'yárami níima echi wabé galabéala; chopi echi auché jaré mapu ketasi 'me galabé oláliko, ketasi 'yárami níima echi galabéala.

Jesucristo tamujé tamí 'ya máputa kilí ologá pirélabo

¹¹Echijiti nijeni machí mapu galá ju máputa ne galá bichiiga majabo echi Walubela Jesucristo, mapurigá chopi galá nijéwaga olabo mapurigá Binói nakí. ¹²Jipi nijeni ketasi nakí auchécho siné 'yemi mi anénala mapu nijé binói ne wabé galabé ju. Chopi nijeni arigá nakí ne wabé galabé oláala, mapurigá 'yémítamo omérabo galabé niráa ra'icha, tamí jiti rugá. Echirigá 'yémítamo omérabo ku kuwana ra'íchiya echi auché jaré pagótami mapu wabé nójaga 'nátami ju, aboni chopi niráa, mapalí auché jaré mayé mapu aboni galabé oláami ju, chopi pachana aboni sulálachi niráa, arigá ketasi galabé ju. ¹³Mapujiti a nijeni ke newalite níisagá, chópini echirigá ju mapurigá Riosi waminabi walubélaga anérámi níima. A'lí a nijeni galá 'nátami níisagá, chópini echirigá ju mapurigá 'yémítamo waminabi ku'wíratami níibo. ¹⁴Arigá 'wérali ju mapu nijeni galá bitélaga olá achigórigá mapurigani sinibí olá, mapujiti echi Walubela Jesucristo tamujé tamí ne wabé galé. A'lí bicheni ma ne bichíwali mayé mapu echi Bilepi Walubela Jesucristo mukuli ne si'néami tamujé tamí jiti. Echijiti ne si'néami tamujé mapu ikita galá bichiíko ma mapurigá suwíami niráa juta bacháami Riosi yuwa. ¹⁵Ne bichíwali ju mapu echi Walubela Jesucristo mukuli ne si'néami echi jaré pagótami jiti, mapurigá echi jaré mapu ikí galá bichiiga pireko, ma ketasi olama mapurigá aboni chopi nakí mapujiti echi Walubela Jesucristo mukuli aboni jiti, ayénachó ku owíñali, mapurigá aboni sinibí olama mapurigá Binói chopi nakí. ¹⁶Echijiti jipi jonsa nijeni ma ketasi 'natama jena'í wichimóbachi piréami pagótami jiti, mapu chu yena o'wéala ju aboni. Chabénala nijeni ayena achigórigá 'nátali echi Walubela Jesucristo jiti mapurigá echi auché jaré ke bichiýami pagótami 'nata Binói jiti, chopi jipi nijeni ma galá bichií Jesucristo niráa, echijítini ma ketasi 'nata Binói jiti mapurigá echi auché jaré 'nata Binói jiti. ¹⁷Ayénachó echirigá ju mapu ibílipi mapu ikí napawíkami niráa juko

Jesucristo yuwa, mapujiti aboni galá bichíi Binói niráa, aboni ma ketasi waminabi olá mapurigá chabénala olali, chopi jipi aboni suwaba ma ku si'nú, bukulíwami niráa, ne wabé galabé olá.

¹⁸ A'lí Riosi suwaba je'ná jerigá olá, ayénachó Riosi ju mapu tamujé tamí ku niwáli mapurigá Binói amígowala niráa, mapujiti echi Walubela Jesucristo mukuli tamujé tamí jiti. A'lí Riosi ayénachó tamujé tamí nawesánala júuli mapurigá echi auché jaré pagótami galá bichíima, mapurigá aboni ayénachó echijiti ku niwárami níima Riosi amígowala niráa. ¹⁹ Echirigá ne bichíwali ju mapu Riosi wabé nakili mapu echi jaré pagótami jena'í wichimóbachi piréami ku niwárami níimi Binói amígowala niráa. Echijiti Riosi júuli echi Walubela Jesucristo mapurigá Binói mukumea si'néami aboni chati sitíi olalila jiti. A'lí Riosi tamujé tamí nawesánala júuli, mapurigá jena'í wichimóbachi piréami galá bichíiga, anchecho ku niwárami níima Riosi amígowala niráa. ²⁰ Echirigá ne bichíwali ju mapu echi Walubela Jesucristo Binói tamujé tamí júuli mapurigata nawésabo jena'í wichimóbachi piréami pagótami. Echijiti mapalí tamujeta 'yemi mi nawesa, tamujeta 'yemi mi ruyé achigórigá mapurigá Riosi Binói nakí 'yemi mi ruyénala. Echijiti jipi tamujeta wabé nílaka 'yemi mi jeané: Galá bichísi Jesucristo niráa, mapurigátamko ku niwárami níibo Riosi amígowala niráa, achigórigá mapurigá echi Walubela Jesucristo nakí. ²¹ A'lí echi Walubela Jesucristo ke siné chati sitíi olali, chopi Riosi arigá walú kastigo 'yali echi Walubela Jesucristo, tamujé chati sitíi olalila jiti, mapurigá Binói chati sitíi oláami niráa. A'lí Riosi echirigá olali mapurigá a tamujé galá bichíiga, napawíkami níisagá echi Walubela Jesucristo yuwa, echalí Riosi tamujé tamí niráma ne galabé wachínaga oláami niráa, achigórigá mapurigá Jesucristo galabé wachínaga oláami ju.

6 Echirigá biché mapurigá keni apanérawa niráa, máputa napawika nocha Riosi nóchala olayá, nijeni 'yemi mi ruyé máputamo sinibí waminabi galabé bichíisabo Jesucristo niráa, mapujiti echi Walubela Riosi wabé galabé ologá, ma 'yemi mi wisabé niráa ku'wírali. ² Mapujiti Riosi Ra'íchala oselíwalachi je'ná jerigá osirúami ju mapurigá Riosi Binói jeaní:

Mapalí nijeni nakili, Nijeni 'yemi mi galá kipuli.

Echalí mapalí 'yémítamo wikáwali tali, echalí Nijeni ne bichíwali 'yemi mi ku wikáwali.

Jipi rawé Riosi wabé nakí kipúnala echi jaré pagótami wikáwali táami. Jipi rawé Riosi wabé nakí mapu ku wikáwama echi jaré pagótami.

³ A'lí tamujeta ke wesi kumé, mapurigá ke wesi sayéraga ra'icháma tamujé nóchala jiti. ⁴ Si'winárigá tamujé nawésami chopi nakí máputa suwaba galabé olabo, mapurigá si'néami pagótami galá machimea mapu tamujé, Riosi piónawala niráa jú. Echijiti tamujeta sinibí kilí niráa anacha mapalí tamujeta risúu olárami ju, ayénachó mapalita we newalé ko'wáami, ayénachó mapalita ketasi omero Riosi nóchala olayá mapujiti auché jaré pagótami tamujé tamí wabé kumé. ⁵ Mapujiti echi auché jaré wisabé tamí wipisoli, ayénachó aboni wisabé tamí pachá bachali. Ayénachóni wisabé wabé risúu olárami níili mapalí wikabé pagótami sinepi niráa ne wabé buchuwi anigá na'áwali tamí sayéraga. Ayénachóni wisabé wabé iwéami nóchali. Ayénachóni wisabé tarapé kochili rokogó. Ayénachóni wisabé ne wabé 'locheli. ⁶ Yémítamo galá machí mapu nijeni ne bichíwali Riosi piónawala niráa ju, mapujiti nijeni sinibí ne wabé galabé ologá bité. Ayénachótamo echirigá machí mapujiti nijeni galá machíami ju echi ne Bichíwali, ayénachó mapujítini sinibí galabé

kilí oláami niráa jú. Ayénachótamo galá machí mapu nijeni Riosi piónawala niráa ju mapujítitamo galá machí mapu echi Wabé Galabé Riosi Iwigala pachana tamí yuwa atí, ayénachó mapujítitamo machí mapu nijeni sinibí 'yemi mi wabé galé. ⁷Ayénachótamo galá machí mapu nijeni ne bichíwali Riosi piónawala ju, mapujiti nijeni sinibí 'yemi mi nawesa echi ne Bichíwali, ayénachó mapujítitamo ritiwá mapu Riosi wabé omériga olá tamí yuwa. A'lí nijeni sinibí galá wachínaga olá mapalini nocha, Riosi nóchala olayá, ayénachó mapalini ni'yúraga ra'icha mapujiti auché jaré wabé sayera nijé nawésawala. ⁸Sinéami káachi echi auché jaré pagótami tamí we galá nirá, chopi auché siné káachi aboni tamí wabé chijuna. Sinéami káachi aboni galá ra'icha tamí jiti, chopi auché siné káachi aboni wabé chati sití ra'icha tamí jiti rugá. Sinéami káachi echi auché jaré aní mapu nijeni wabé 'yékaka ra'íchami ju, chopi auché siné káachi aboni aní mapu nijeni chopi ra'icha echi ne Bichíwali. ⁹Sinéami káachi aboni tamí olá mapurigá ke machirúami niráa, chopi auché siné káachi tamí olá mapurigá galá machirúami niráa. Sinéami káachi nijeni arigá ne noguí mi'lirúami ju, chópini abijí waminabi bitélasimi. Sinéami káachi nijeni kastigo 'yárami ju, chópini ketasi mi'lirúami niráa ju. ¹⁰Auché jaré tamí o'monárasagá, nijeni arigá sinibí we kanila. Nijeni wabé risúwati ju, chópini we olá mapurigá auché jaré ritémtami ne wabé níwami níima echo'ná ripá riwigachi. A'lí nijeni ketasi biyiri níwa, chópini arigá níwa ne suwaba echi wabé galabéala mapu Riosi tamí 'ya.

¹¹ 'Yemi ritémtami echo'ná Koríntochi piréami, nijeni ne wabé galigá 'yemi mi galá machíami niráa oseli ne suwaba mapurigani 'náitali pachana nijé sulálachi niráa. ¹²Nijeni ne bichíwali 'yemi mi ne wabé galé, chopi 'yémítamo ke 'me tamí galé. ¹³Jipi nijeni 'yemi mi ne wabé galigá ruyé, mapurigá nijeni ne bichíwali 'yemi onolá niráa, máputamo tamí wabé galebo achigórigá mapurigá nijeni 'yemi mi galé.

**Echi jaré napawika bichíyami mapurigá echi Walubela Riosi ri'obáwala ju,
mapujiti echi Wabé Galabé Riosi Iwigala bité echo'ná pachana aboni sulálachi**

¹⁴Ketasi ne sinibí napawika 'yénsi echi auché jaré ke bichíyami pagótami yuwa. Echirigá ologá 'yémítamo mapurigá wáasi, biléana bulirúami niráa níbotamo, mapalí bilé wáasi ke galá simí. A'lí 'yemi galabé wachínaga oláami, ketasi galá ju máputamo sinibí napawíkami níbo echi auché jaré wabé chati sití oláami yuwa, mapujiti 'yémítamo ketasi achigó yiri ju aboni yuwa, achigórigá mapurigá echo'ná rayénachi ketasi chopi a yiri ju echi rukuáwami yuwa. ¹⁵Echi Walubela Jesucristo ketasi ne bilénapi chópirigá 'nata echi riablo yuwa. A'lí echi jaré Jesucristo jiti bichíyami nibilé cho bilénapi chópirigá olá echi auché jaré ke bichíyami yuwa. ¹⁶Echi Walubela Riosi ke siné risensia 'yalí mapu echi jaré amachíkalawami namuti nirúlama echo'ná pachá echi walubé Riosi ri'obáwalachi, mapujiti Riosi nakí mapu Binói chopi waminabi walubélaga anérami níima. A'lí Riosi nibilé cho risensia 'ya mapu 'yemi napawika bichíyami chokoba jaga o'wikebo echi jaré amachíkalawami namuti, mapujiti Riosi Binói pachana bité echo'ná 'yemi sulálachi, echijiti si'néami 'yemi napawíkami mapurigá Riosi ri'obáwala niráa jútamo, echijiti galá níima máputamo chopi chokoba jaga waminabi walubélaga anebo echi Walubela Riosi, mapurigá Riosi Binói 'yemi jiti rugá jeanili:

Nijeni echo'ná aboni yuwa yénaga bitélama.

A'lí Nijeni aboni Riósawala níima.

A'lí aboni Nijé níwala pagótami níima.

¹⁷Echijiti Riosi ayénachó tamujé tamí jeané mapurigá je'ná jerigá osirúami ju:

Ku 'machínasi echo'ná echi auché jaré chati sitíi oláami pagótamichi jonsa. Ayénachó Riosi tamujé tamí jeané:

Echo'ná abónichi jonsa waminá waná rojuasi.

A'lí ke siné chokoba jaga o'wikesi echi jaré amachíkalawami namuti.

Echalí Nijeni 'yemi mi narema mapurigá Nijé níwala pagótami niráa.

¹⁸A'lí Nijeni níima 'yemi Onolá,

ayénachó 'yemi níbotamo Nijé kúchuwala. Echirigá aní echi Walubela Riosi, echi mapu ne suwaba omérami ju.

7 Echirigá biché 'yemi nijé ritémawala mápuni ne wabé galé, galá 'natasí mapurigá Riosi tamujé tamí je'ná jerigá bichíwaga aneli. Galá níima ariwesa suwaba chati sitíi oluwáwami. Ketasi galá ju máputa chati sitíi olabo, nibilé cho galá ju máputa chati sitíi 'natabo. Chopi galá níima máputa ne galá nijéwabo Riosi, mapurigata chopi olabo mapurigá Binói nakí, mapujítita bichíi mapu Riosi chopi ne Walubela ju.

Echo'ná Koríntochi piréami napawika bichíyami we o'mónali mapurigá Riosi nakili

²'Yemi echo'ná Koríntochi piréami ritémrtami arigá tamí galá galesi. Nijeni ke wesi 'yemi mi risúu olali. Ke wésini 'yemi mi chati sitíi olírali mapurigátamo echirigá chati sitíi oláami níibo. Ke wésini 'yemi mi 'yékali. ³Ketásini 'yemi mi echirigá ané mapurigátamo wi'nijírami níibo, mapujiti bachá niráa mani 'yemi mi aneli mapu nijeni sinibí 'yemi mi ne wabé galema, waminábita pirélasagá jena'í wichimóbachi, ma suwiságá keremá. ⁴Nijeni ne wabé ganíli mapujiti 'yémitamo ma galá bichíili Jesucristo niráa, ayénachóni mayé mapu 'yémitamo waminabi galá bichíisabo. A'lí bicheni echirigá ne wabé kanila mapalini arigá ne wabé risúu olárami ju.

⁵A'lí mapalí jonsa nijeni nawali jena'í Maseróniachi anilíwachi kawírali, echi Timoteo yuwa, tamujeta tarapé cho galá isábali. Si'winárigá tamujeta ne wabé kumérarni níili ne suníami mapo'nata 'yénali, mapujiti echi auché jaré ke bichíyami pagótami sinibí tamujé tamí sayérali, a'lí bicheta ne bichíwali wabé majali sulachí niráa. ⁶Chopi Riosi tamujé tamí ku kanílatali mapujiti tamujé tamí yuwa nawali echi Tito, mapujiti Riosi chopi ju mapu galá omero ku kanílatiya echi jaré mapu ikí o'mónami ju. ⁷Echalí Riosi ne bichíwali tamujé tamí ku kanílatali mapujiti echi Tito echirigá tamujé tamí yuwa nawali, ayénachó mapujiti echi Tito binói tamujé tamí kanílatali, achigórigá mapurigá 'yemi aboni chabénala niráa galá kanílatali echi binói Tito. Echi binói Tito tamujé tamí aneli mapu churigá 'yémitamo tamujé tamí ne wabé 'nénali, ayénachó mapu chuyena 'yemi ne wabé o'mona mapujiti tamujeta risúu olárami ju, ayénachó mapurigá 'yémitamo sinibí tamujé tamí jiti 'nata. A'lí nijeni waminabi wabé kanílali suwaba je'ná jiti.

⁸Chabénala nijeni arigá 'yemi mi o'monáratali mapalini bachá niráa 'yemi mi oseli, chopi jipi rawé nijeni arigá kanila mapujítini echirigá olali. Chabénala nijeni o'mónali, mapujiti echi oselí 'yemi mi o'monárali pe téeli niráa. ⁹Chopi jipi rawé nijeni echijiti galá kanila, chopi nijeni ketasi echirigá ganila mapujiti 'yémitamo o'monáratami níili. Nijeni chopi ganila mapujiti 'yémitamo wikáwali tánali Riosi, mapalítamo echirigá o'monáratami níili. Echirigátamo chopi o'monáratami níili mapurigá Riosi nakili, a'lí nijeni echirigá ketasi wepi 'yemi

mi kumeli.¹⁰ Mapujiti mapalita o'monáratami ju mapurigá Riosi nakí, echalita wikáwali tani Riosi mapurigata ku wikáwarami níibo. A'lí waminánomí tamuje chopi waminabi kanílabo mapujítita echirigá wikáwali tánali. Chopi mapalí echi auché jaré ke bichiyami pagótami jena'í wichimóbachi piréami o'monáratami ju, echalí aboni we o'mona mapujiti we chati sitíi olá, chopi aboni arigá ketasi wikáwali tani Riosi, echijiti aboni chopi waminá suwimea.¹¹ Yémitamo ne bichíwali o'monáratami níili mapurigá Riosi nakili. A'lí jípitamo galá machí mapurigá ikili mapujítitamo echirigá o'monáratami níili. Echalí mapalítamo echirigá o'monáratami níili 'yémitamo wabé chati sitíi oláami niráa niráli echi bilé rijói mapu chati sitíi olali. Ayénachó echalítamo nakili tamí ku ruyénala mapurigátamo olali. Ayénachótamo na'awatarami níili mapujiti echi bilé echirigá chati sitíi olali. Ayénachótamo ne wabé majali mapujiti bilé 'yemi echirigá chati sitíi olali. A'lí bichétamo auchecho siné nakili tamí 'nénala. Ayénachótamo nakili kastigo 'yánala echi bilé rijói 'yemi mapu echirigá chati sitíi olali. Echijiti jipi nijeni galá machí mapu echi auché jaré 'yemi ketasi chokila jútamo mapurigá echi bilé rijói chati sitíi olali.¹² Echirigá biché chabénala mapalí nijeni 'yemi mi oseli echi oselí, nijeni ketasi echirigá oseli echi auché bilé jiti mapu chati sitíi olali. Nibilé choni 'yemi mi echirigá oseli echi auché bilé jiti mapu sayératami níili. Chópini 'yemi mi echirigá oseli mapurigá 'yemi aboni, bacháami Riosi yuwa, galá ku 'natabo mapu chu yena 'yémitamo ne bichíwali tamí wabé galé.¹³ Echijiti nijeni ma ku ganílatami ju mapujiti 'yémitamo auchecho siné ma ku 'nátali mapurigátamo ne bichíwali tamí galé.

Chopi nijeni ayénachó kaníli mapujiti echi Tito wabé ganílatami níili 'yemi jiti, mapujiti si'néami 'yemi galá kanílatali echi binói.¹⁴ Echirigá nijeni ketasi 'yékali chabénala mapalini aneli echi Tito mapu nijeni mayeli mapu 'yémitamo ne galá bichiyami níili. Chopi achigórígá mapurigá nijeni sinibí 'yemi mi galá ne bichíwaga aneli, echirigá ayénachó ne bichíwali níili mapurigá nijeni aneli echi Tito, mapalini aneli mapu nijeni mayé mapu 'yémitamo galá bichiyami ju.¹⁵ A'lí echi Tito 'yemi mi waminabi ne wabé galé sinibí mapalí binói 'nata mapurigá si'néami 'yémitamo ne galá nijewali suwaba mapurigá binói 'yemi mi nuleli, ayénachó mapurigátamo wabé galigá nareli echi binói, mapujítitamo we majali Riosi.¹⁶ Nijeni ayénachó ne wabé ganila mapujiti nijeni mayé mapu 'yémitamo ne bichíwali olabo suwaba mapurigá nijeni 'yemi mi nulema.

Wikabé niráa 'yánalaga

8 Jipi, 'yemi keni ritémawa, nijeni nakí 'yemi mi ruyénala mapurigá Riosi ne wabé galigá ku'wírali echi auché jaré napawika bichiyami echo'ná Maseróniachi anilíwachi kawírali piréami mapurigá aboni galá olama mapurigá Binói nakili.² Aboni ne wabé risúu olárami níili mapalí aboni ne wabé kumérami níili echi auché jaré ke bichiyami pagótami jiti. Chopi aboni arigá ne wabé kaníli. Echijiti aboni ne wabé tisúwati ke, arigá wikabé niráa 'yali, mapurigá ne wabé níwami niráa, echi auché jaré wabé tisúwati ritémtami ku'wíriya.³ A'lí nijeni 'yemi mi ne bichíwaga ruyé mapurigá aboni ne wabé kanílaga 'yali mapuyena aboni galá omérali ayá, ayénachó aboni arigá waminabi ne wabé simírami 'yali, mapalí aboni arigá ketasi 'me níwali.⁴ Echalí aboni tamí wabé tánali mapurigani risensia 'yama mapurigá aboni ayénachó napabuka náwalama wenomí, echi auché jaré wabé

tisúwati ritémtami 'yánala. ⁵A'lí nijeni mayeli mapu aboni ayena 'yama riwéali wenomí, chopi aboni waminabi ne wabé simírami galabé namuti 'yali, ketasi mapurigá nijeni mayeli, mapujiti aboni bachá niráa 'yali aboni sulala echi Walubela Jesucristo, mapurigá aboni chopi olama mapurigá Binói nakí. A'lí pe jubáami aboni galá tamí 'yali aboni niráa mapurigá aboni omérama nagúura Riosi nóchala olayá, mapurigá echi Walubela Jesucristo nakili. ⁶Echijiti jipi nijeni aneli echi Tito mapurigá binói echo'ná 'yemi yuwa ma suwaba sunima napabuya echi wenomí mapu binói chabénala chótali napabuya, mapujiti 'yemi echo'ná Koríntochi piréami ne wabé galigá 'yabo riwéali wenomí, echi auché jaré wabé tisúwati ritémtami 'yánalaga náwalama. ⁷A'lí 'yémítamo sinibí wabé simírami galá olá suwaba mapu ikítamo olá. Echirigátamo simírami galá bichiyami ju, ayénachótamo simírami galá binériami ju Riosi Ra'íchala. Ayénachótamo simírami galá machíami ju. Ayénachótamo simírami wabé nílaka nakí ku'wíranala auché jaré. Ayénachótamo ne wabé simírami tamujé tamí galé. Jipi ayénachó galá níima máputamo simírami niráa 'yabo wenomí, echi auché jaré wabé tisúwati ritémtami 'yánala.

⁸Nijeni ketasi 'yemi mi echirigá wabé 'wérali niráa nulé. Chópini 'yemi mi echirigá ané mapurigátamo galá machiboa mapurigá auché jaré ritémtami wabé kaníliga 'yali wenomí, echi auché jaré wabé tisúwati ritémtami 'yánalaga. Echirigátamo galá machiboa áchatamo ne bichíwali galá galema 'yemi. ⁹Mapujiti 'mátamo galá machí mapurigá echi Walubela Jesucristo sinibí ne wabé galéami níli. Kil'yá chokichí jonsa Binói ne suwaba namuti níwami níli mapu ikí nirúali, chopi wakinánokuá Binói ne wabé risúwati nílinali, mapujiti Binói 'yemi mi ne wabé galigá ku'wíranali, mapurigá 'yémítamo niwárami níbo ne wabé simírami níwami niráa echo'ná ripá riwigachi.

¹⁰Nijeni 'yemi mi je'ná jerigá ruyé mapurigátamo waminabi ku'wíratami níbo. Chabé, bilé bamíbali jonsa, 'yémítamo galá o'wíñali wenomí napabuya, echi auché jaré wabé tisúwati ritémtami 'yánalaga. Echalítamo chótali we ganíлага ayá. ¹¹Jipi waminabi echirigá nokíisi kaníliga napabúsiya echi wenomí mapuyénasítamo sunibo. Galá níima ibili niráa 'yemi arigá kaníliga 'yasa jaré wenomí, suwaba mapu ikí ibilitamo omero njaa. ¹²Mapujiti a bilé rijói ne bichíwali nakisáagá 'yánala Riosi jaré wenomí, echalí Riosi arigá kaníliga narema mapalí echi bilé rijói galá 'ya mapuyénasí binói níwami ju. A'lí Riosi ketasi taní echi jaré namuti máputa ketasi níwa.

¹³A'lí nijeni ketasi 'yemi mi je'ná jerigá ané mapurigá 'yémítamo ne wabé tisúwati niráa tibibo, mapujítitamo ku'wírali echi auché jaré. ¹⁴Chopi nijeni 'yemi mi je'ná jerigá ané mapurigá ne si'néami 'yemi napawika bichiyami chopi ikí níwabotamo. Jipi 'yemi echo'ná Koríntochi piréami wabé simírami níwa. Echijiti jipi 'yemi galá omero ku'wíriya echi auché jaréana piréami ritémtami mapu jipi rawé we newalé ko'wáami, chopi waminánomí auché siné káachi, echi jaré aboni waminabi simírami níwamiré, mapuyena 'yemi aboni wabé newaréami níibirétamo. Echalí aboni galá omérama ku ku'wíriya 'yemi, mapalítamo newalebo ko'wáami. Echirigá ne si'néami 'yemi napawika bichiyami ku ne a'nawí chopi ikí níwabotamo. ¹⁵Mapurigá echo'ná Riosi Ra'íchala oselíwalachi je'ná jerigá osirúami ju: Echi mapu we simírami napabúliko echi ko'wáami mapu Riosi 'yali ripá riwigachi jonsa, arigá ketasi simírami níwali. A'lí echi mapu pe okuáa napabúliko arigá ketasi auché newaleli.

Echi Tito galabé oláami níili

¹⁶Chopi nijeni walú natétara 'ya Riosi mapujiti Binói 'yali mapurigá echí Tito 'yemi mi galema achigórigá mapurigá nijeni 'yemi mi wabé galé. ¹⁷Mapujiti echí Tito galá nijéwali mapalí nijeni aneli mapu echo'ná 'yémichi simea, echí wenomí napabúbiya. Chopi mapujiti binói ayénachó 'yemi mi wabé galé, echijiti binói we nílaka simináali echo'ná 'yémichi simiyá.

¹⁸A'lí echí binói Tito yuwa, ayénachóni jula auché bilé rijimala mapu we galá nigúraga nocha echí Galabé Riosi Ra'íchala nawésiya, echí mapu si'néami echí auché jaré napawika bichíyami sinibí galabé oláami niráa ané. ¹⁹A'lí ketasi chopi ju mapu aboni galabé oláami ané je'ná rijimala, chopi aboni ayénachó chapili echí binói mapurigá tamujé tamí yuwa inama mapalita rojuániga nachútalo echí wenomí, echí jaré tisúwati, mapurigá echí Walubela Jescristo waminabi walubélaga anérámi níima, ayénachó mapurigá galá 'nératami níima mapu 'yemi aboni we galigá oláami jútamo. ²⁰Echirigata galá tibupo mapurigá ke wesi omérama tamujé tamí wi'nijiya, jeanigá máputa ketasi galá nachuta echí wenomí máputa napabú 'yena. ²¹Mapujiti tamujeta sinibí nakí máputa suwaba namuti galabé wachínaga niráa olabo, bacháami echí Walubela Jesucristo yuwa, ayénachó ne galá wachínaga niráa bacháami echí auché jaré pagótami yuwa.

²²Ayénachóta jula auché bilé rijimala aboni yuwa, echí máputa ma wisabé niráa riwali ne wabé galá galigá nóchami niráa, wikabé namuti jiti. A'lí jipi binói waminabi wabé galigá nochama 'yemi yuwa, mapujiti binói mayé mapu 'yémítamo ne wabé galá oláami jútamo. ²³A'lí a auché jaré 'yemi mi rukuésagá echí Tito jiti rugá, echalí Jeanesi mapu echí Tito nijé apanérawala ju, mapu binói tamí yuwa nóchami ju, mapu 'yemi mi ku'wírama. A'lí a rukuésagá echí auché okuá ritémítami jiti rugá, echalí Jeanesi mapu aboni julárami níli echí auché jaréana piréami napawika bichíyami jiti, ayénachó mapurigá aboni chopi waminabi walubélaga ané echí Walubela Jesucristo. ²⁴Echijiti galá 'nérasi mapurigátamo ne bichíwali galá galé je'ná okuá ritémítami. Echirigátamo ayénachó 'nérabo ne si'néami echí auché jaréana piréami napawika bichíyami mapu nijeni bichíwaga anili mapalini wabé nílaka niráa ra'íchali 'yemi jiti rugá.

Echo'ná Koríntochi piréami napawika bichíyami napabuka 'yali wenomí echí auché jaréana piréami wabé tisúwati ritémítami

9 Nijeni mayé mapu ketasi 'me 'wérali ju mapurigá nijeni 'yemi mi osema jeanigá máputamo napabubo wenomí echí auché jaréana piréami wabé tisúwati ritémítami 'yánala, ²mapujítini galá machí mapurigátamo arigá nakí echirigá 'yánala. Echijiti nijeni we nóchaga niráa 'nátaga ra'íchali 'yemi jiti mapalini ruyeli echí auché jaré napawika bichíyami echo'ná Maseróniachi anilwachi kawírali piréami mapurigá 'yémítamo echo'ná Akáyachi anilwachi kawírali piréami arigá we nakili 'yánala echí wenomí, chabénala bamíbali jonsa. Echijiti ne noguí si'néami aboni ayénachó nakili echirigá 'yánala wenomí, achigórigá mapurigá 'yémítamo olali. ³Jipi nijeni jula je'ná bikiyá ritémítami 'yemi mi ruyénala mapurigátamo ne bichíwali olabo mapurigá nijeni ma echirigá wabé nóchaga 'nátaga niráa ruyeli echí auché jaré mapu 'yémítamo nakili olánala. Echirigani jula aboni mapurigá 'yémítamo we yáati napabubo echí wenomí,

mapurigá nijeni ma ruyeli echi auché jaré mapu 'yémitamo 'yabo riwéali. ⁴Galá níima 'yemi echirigá bachá niráa napabusa echi wenomí, mapurigá nijeni ketasi riwélatami níima waminánomí mapalí nijeni echo'ná simea 'yemi mi 'némiya; ayénachó mapurigá 'yémitamo ketasi cho riwélatami níibo, a tamí yuwa sisá jaré echo'ná Maseróniachi piréami ritémtami; mapujiti a echirigá ikisáagá, echalí 'yémitamo ne wabé riwélatami níibo átamo ketasi cho ma napabúrami níwasagá echi wenomí, mapujiti nijeni ma ruyeli aboni mapu 'yémitamo wabé nakili 'yánala, chabé bamíbali jonsa. ⁵Echijiti nijeni arigá 'wérali mayeli mápuni bachá julama je'ná bikiyá ritémtami 'yemi mi echirigá ruyénala, ayénachó mapurigá aboni 'yemi mi ku'wírama echi wenomí napabuya máputamo chabé jonsa anili nijibo ruyá. Echirigá nijeni bachá niráa júuli aboni mapurigá 'yémitamo bachá niráa ne wabé galigá napabubo echi wenomí, mapurigá ketasi 'wérali níima máputamo napabubo mapalí nijeni ma echo'ná nawá, mapurigá nijeni 'yemi mi nuléla niráa.

⁶Je'ná jerigá galá 'natasi 'yemi: Echi rijói mapu pe uchíi ichako, ayénachó pe okuáa 'wima. A'lí echi mapu wi'libé ichako, ayénachó wikabé 'wima. ⁷Galá níima ibili niráa 'yemi 'yasa mapu ikítamo ne sulachí niráa galá nakí 'yánala, chopi ketasi risirúami niráa níisi. Wabé galigá 'yasi. Ketasi chopi 'yasi mapurigá 'wérali nulérami niráa, mapujiti Riosi wabé galé echi jaré mapu ikí wabé kaníliga nijáami. ⁸A'lí echi Walubela Riosi ne wabé omérami ju 'yemi mi ne wabé simírami ku'wíriya, mapurigátamo sinibí níwabo suwaba echi jaré namuti mapu ikí 'yemi aboni newalebo, ayénachó mapurigátamo auché jaré waminabi níwabo máputamo omérabo ayá, mapurigátamo echirigá galabé ologá ku'wírabo auché jaré. ⁹Mapurigá echo'ná Riosi Ra'íchala oselíwalachi je'ná jerigá osirúami ju:

Echi galabé oláami rijói wikabé namuti 'ya echi auché jaré wabé tisúwati pagótami.

Échiko sinibí ne wabé natimáami ju.

¹⁰A'lí echi Walubela Riosi mapu we nijá echi raká ichiwáami, Echi mapu ayénachó nijá echi ko'wáami máputa ko'wá, Échiko ayénachó 'yemi mi ne wabé simírami 'yama mapurigátamo galá omérabo ku'wíriya echi jaré tisúwati ritémtami, mapurigá 'yemi galabé olalila wikabé niráa muwema. ¹¹Echirigá 'yémitamo ne bichíwali karúmati níwami níibo, mapurigátamo omérabo wikabé ayá echi auché jaré wabé newaléami. A'lí mapalí tamujeta nachútalo echi wenomí máputamo náwalabo 'yánala echi jaré tisúwati ritémtami, echalí aboni walú natétara 'yama Riosi. ¹²Mapujiti mapalita echirigá 'yánalaga olá, echalí tamujeta ketasi chopi 'ya echi jaré namuti mapu ikí newalé echi jaré napawika bichíyami ritémtami, chótita ayénachó olá mapurigá aboni wisabé walú natétara 'yama Riosi. ¹³Ayénachó aboni waminabi walubélaga anema Riosi, mapalítamo echirigá wabé galigá kóobo aboni, mapujiti echalí ne galá machirúami níima mapu 'yémitamo galá nijewaga olá mapurigá echi Walubela Jesucristo 'yemi mi nulé, mapujiti 'yémitamo echirigá ne sébali 'ya aboni, echi auché jaré tisúwati ayénachó. ¹⁴A'lí aboni ayénachó Riosi yuwa ra'icháma, 'yemi jiti tániga, mapujiti aboni 'yemi mi ne wabé galema, mapujiti Riosi Binói echirigá wabé galigá olali máputamo galabé oláami níibo. ¹⁵Walú natétara 'yabo Riosi mapujiti Binói tamujé tamí ne wabé simírami 'yali, mapuyénasíta tarapé chirigá omero ku ruyá mapu chu yena ne wabé simírami ju!

Riosi Binói nawisánalaga júuli echí Pablo

10 Nijé, Pablo, 'yemi mi ne wabé tani máputamo galá nijéwaga olabo mapurigá nijeni 'yemi mi ané, mapujiti nijeni nulérami níli echí wabé natimáami, ne wabé galéami Walubela Jesucristo jiti, echí mapu sinibí ne wabé galabé oláami ju. Alí jaré 'yemi aní mapu nijeni ne wabé kilí oláami ju mapalini echo'ná 'yemi mi yuwa atí, chopi mapu nijeni 'yemi mi ne wabé aparúami niráa osé mapalini echo'ná mikabé atí. ² Jipi nijeni nakí máputamo galá tamí nijéwabo, mapurigá waminánomí mapalini echo'ná 'yemi mi yuwa nawá, echalí ketasi 'wérali níimi mapu nijeni aparúami niráa sayérama echí jaré 'yemi mapu ikí aniko mapu nijeni 'yékaka olá, mapurigá echí auché jaré ke bichíyami pagótami olá. Nijeni ketasi echirigá 'yékaka olá, echijiti nijeni ne bichíwali sayéraga ra'íchama echí jaré 'yemi echirigá aníami. ³ Ne bichíwali ju mapu tamujé bichíyami wepi pagótami chopi ju. A'lí mapalí tamujeta we sayera echí chati sitíi oluwáwami, echalí tamujeta ketasi nakowa mapurigá echí auché jaré ke bichíyami pagótami jena'í wíchimóbachi we nakowa. ⁴ Mapujiti mapalí tamujé bichíyami sayera echí chati sitíi oluwáwami, echalí tamujeta ketasi karúmati ripiyá jiti nakowa, chópita arigá we jiwériga sayera echí chati sitíi oluwáwami mapurigá Riosi tamujé tamí jiwérata. ⁵ A'lí echí auché jaré ke bichíyami pagótami sinibí we sayera echí ne Bichíwali, ayénachó aboni sayéraga olá mapurigá echí auché jaré pagótami ketasi galá bichíima Riosi. Chopi tamujé bichíyami arigá galá bichíiga na'ura echiyiri chati sitíi oluwáwami. A'lí tamujeta sinibí galabé niráa 'nata mapurigata sinibí galá nijéwami níbo mapurigá Jesucristo tamujé tamí nulé, ayénachóta galá bichiírabo echí auché jaré pagótami Jesucristo niráa, mapurigá aboni ketasi waminabi echirigá chati sitíi 'hatáma mapurigá aboni sinibí ne wabé náchaga 'nátaga chati sitíi 'nátali. ⁶ A'lí echalí mapalí nijeni galá machimea chigá 'yemi ne galá sébali ne galá nijewa echí Walubela Jesucristo, echalí nijé binói arigá kastigo 'yama echí auché jaré mapu ketasi galá nijéwako.

⁷ 'Yémitamo chopi ritiwá echí jaré namutí mapu ikí ne machiná nirú, chopi galá níima máputamo machiboa suwaba echí ne Bichíwali. A'lí a bilé rijói ne bichíwali mayésagá mapu binói Jesucristo níwala ju, galá níima échiko galá machisá mapu nijé binói ayénachó achigórígá Jesucristo níwala juni. ⁸ Nijeni 'yemi mi ne bichíwali niráa waminabi ne 'wérali ané mapu Riosi Binói tamí júuli 'yemi mi ruyénala mapurigátamo olabo. Echijiti nijeni tarapé riwela, mapujiti echí Walubela Riosi ne bichíwali tamí júuli echirigá ruyénala. A'lí nijeni je'ná jerigá olá mapurigá 'yémitamo waminabi galá bichiíbo, ketasi mapurigátamo waminá 'wigáami níbo. ⁹ Nijeni ketasi nakí mapu 'yémitamo mayebo mapu nijeni chopi 'yemi mi oseli mapujiti nijeni 'yemi mi wabé majáranali. ¹⁰ Jaré 'yemi jeaní mapu nijeni 'yemi mi ne wabé jiwériga nulé mapalini 'yemi mi osé, chopi mapu nijé binói arigá tarapé jiwérámi niráa juni. A'lí aboni ketasi galabé niráa mayé nijé ni'ogala. ¹¹ Chopi galá níima mapu si'néami mapu ikí echirigá aniko ne galá machimea mapu achigórígá mapurigani 'yemi mi jiwériga nulé mapalini 'yemi mi osé mikabé jonsa, echirigá ayénachó nijeni achigórígá ne wabé jiwériga olama mapalini 'yemi yuwa asimea.

¹² Nijeni ketasi wabé náchaga 'nátaga niráa jeanimea mapu nijé binói achigó yiri ju echí auché jaré yuwa mapu ikí aniko mapu aboni chopi niráa ne wabé galabé ju. Nibilé choni náchaga 'nátaga niráa jeanimea mapu nijeni waminabi wabé galabé ju ketasi mapurigá aboni, mapujiti si'néami echirigá ra'íchami chopi mapurigá ke

newalite niráa ra'icha, ayénachó aboni ke newalite niráa ju mapalí aboni mayé waminabi galabé oláami ketasi mapurigá auché jaré.¹³ Nijeni ke bilé cho mayema mapu arigá 'wérali ju mapu njé binói wikanáami simea Riosi Ra'íchala nawisásiya, mapo'ná Riosi Binói ketasi cho tamí júuli, mapujiti Riosi chopi ju mapu tamujé tamí ané mapuyénasíta simabo, Binói Ra'íchala nawisásiya. A'lí Riosi Binói arigá ma tamí risenia 'yali mapurigani sebama echo'ná Koríntochi, 'yemi pirélachi yénasí.¹⁴ Echijiti mapalí nijeni 'yemi mi je'ná jerigá nulé, echalí nijeni chopi olá mapurigá Riosi tamí nuleli, mapujiti Riosi chabénala niráa tamí nuleli 'yemi mi nawésanala. A'lí nijeni níli mápuni ne bachá nawali echo'ná 'yémichi echi we Galabé Jesucristo Nawésawala nawisásiya.¹⁵ A'lí nijeni ke siné nílama mapurigá njé níwala niráa echi nóchali mapu auché jaré ritémtami chopi nóchaga olali. Si'winárigá nijeni arigá mayé mapu 'yémítamo abijí waminabi galá bichíisabo. A'lí nijeni omérama waminabi nocha echo'ná 'yémichi. Chopi nijeni ke siné nochama mapo'ná Riosi ketasi cho tamí júuli nochánala.¹⁶ Nijeni mayé mapu pe waminánomí nijeni auché jaréana simea, mapurigani ayénachó nawisáma Riosi Ra'íchala echo'ná 'yémichi jonsa, auché jaréana we mikabé wamináami, chópini ke siné chopi nochama echo'ná mapo'ná auché jaré ritémtami we nocha, Riosi nóchala olayá, nibilé choni nílama mapurigá njé níwala niráa echi nóchali mapu auché jaré ritémtami nóchaga olali.

¹⁷ A jaré wabé nóchaga 'nátaga nílanalasagá, galá níima mapu aboni chopi nóchami níisa mapujiti echi Walubela Jesucristo galabé oláami niráa aboni.¹⁸ A'lí mapuyíripi rijói aníko mapu binói niráa we galabé oláami ju, échiko ketasi ne bichíwali galabé oláami ju.

Echi Pablo ne bichíwali Riosi jiti jurálami níili

11 ¡Galá níimi 'yémítamo tamí waminabi kipusa, átamo arigá mayésagá mapu nijeni ke newalite niráa ra'icha! ¡Arigá tamí galá kipusi!¹ Mapujiti nijeni wabé nílika, ketasi nakí mapu echi riablo 'yemi mi 'yékama. A'lí Riosi Binói echirigá tamí 'natárali, mapujiti nijeni ne bichíwaga anili mapu nijeni 'yemi mi 'yama echi Walubela Jesucristo mapurigátamo Binói níwala níbo. Echijiti nijeni ne wabé nakí mápuni ne bichíwali 'yemi mi 'yama echi Walubela Jesucristo, mapujiti 'yémítamo mapurigá bilé tiwé ju, mapu ke cho bilé rijói yuwa kochíami, mapu nijeni 'yama kunénala bilepi Rijói yuwa, echi mapu echi Walubela Jesucristo ju.² Chopi nijeni wabé majawá mapujítini mayé mapu siné káachi 'yémítamo ariwebo mapurigá echi riablo 'yemi mi 'yékama achigórigá mapurigá echi binói riablo, mapurigá sinowi nílaka, ne wabé 'yékali echi bachá bitéami mukí, Eva riwéami. A'lí echirigá ikisáa 'yemi 'nátala chakena ulútami níima, mapurigátamo ma ketasi waminabi galebo echi Walubela Jesucristo ne sulachí niráa.³ Mapujiti a auché jaré 'yemi mi auché si'winárigá nawésasagá ketasi mapurigá nijeni galabé niráa 'yemi mi nawésali echi Walubela Jesucristo jiti rugá, echalítamo arigá ne galá kipugú. Ayénachó mapalí auché jaré 'yemi mi nawesa jeanigá máputamo narepo auché bilé si'nú iwigá, ketasi mapurigá echi Wabé Galabé Riosi Iwigala máputamo ma nareli chabénala niráa, ayénachó mapalí auché jaré 'yemi mi si'winárigá nawesa ketasi mapurigátamo nawésarami níli Riosi Ra'íchala chabé chokichí, echalítamo arigá ne galá kipugú.⁴ Nijeni mayé mapu njé binói ketásirapé tabéala niráa ju, echi auché jaré yuwa, mapu 'yémítamo o'wéala nawésami niráa mayé.⁵ A'lí a nijeni ra'ichásagá mapurigá

bilé ke binératami niráa, nijeni arigá ne galá machíami ju. Nijeni sinibí 'yemi mi echirigá 'nérali, ne suwaba namuti jiti mapu ikí nijeni olali.

⁷Nijeni ke siné 'yemi mi bujeli mapalí nijeni 'yemi mi nawésali echí Galabé Riosi Ra'íchala. Si'winárigá nijeni chopí binói niráa tabéatali mapurigá 'yémítamo waminabi o'wéalatami níbotamo. ⁸Áchatamo mayé mapu galá níimili nijeni arigá 'yemi mi bujesa echalí? ⁹Echalí nijeni bujela niráa nareli wenomí mapu echí auché jaréana piréami napawika bichiyami ritémtami tamí 'yali, mapurigani nawésiya ináma Riosi Ra'íchala echo'ná 'yémichi, mapujiti nijeni nareli mapu ikí aboni tamí 'yali mapurigani omérama nocha echo'ná 'yémichi, Riosi Ra'íchala nawésiya. ¹⁰A'lí chabénala nijeni we newaleli mapalini echo'ná 'yemi yuwa asali. Chopí nijeni ke wesi 'yemi mi tánali jaré namuti. Echalí echí auché jaré napawika bichiyami ritémtami echo'ná Maseróniachi anilwachi kawírali jonsa síami tamí 'yali echí jaré namuti mapu nijeni newaleli. Echalfí nijeni ketásirapé namuti 'yemi nimí bujeli, mapujítini ketasi nakili mapu 'yémítamo echirigá bujérami níbotamo. Nibilé choni nakí máputamo echirigá bujérami níbo waminánomí. ¹¹A'lí achigórigá mapurigá nijeni galá machí echí ne bichíwali Jesucristo Ra'íchala, echirigá nijeni ne bichíwali mayé mapu ke wesi tamí omérama nulée mápuni echirigá bujema wenomí mapalini nawesa Riosi Ra'íchala. Chopí nijeni sinibí ne bichíwali níliami níima mapurigani tarapé namuti 'yemi mi bujema, mapalini 'yemi mi nawesa echí Galabé Riosi Ra'íchala, 'yemi pagótami echo'ná ne suníami Akáyachi piréami. ¹²A'lí nijeni echirigá aní mapujítini 'yemi mi ne wabé galé. Echi Walubela Riosi galá machí mapu nijeni 'yemi mi ne wabé simírami galé. ¹³A'lí nijeni waminabi sisama olayá mapurigani sinibí olá mapurigá echí auché jaré nawésami mapu 'yémítamo Riosi jiti julárami niráa mayé ketasi omérama waminabi echirigá nóchaga 'nátaga niráa jeaniyá mapu aboni achigórigá oláami ju mapurigá nijeni olá. Mapujiti abóniko ketasi ne bichíwali Riosi jiti julárami níli, chopí aboni sinibí 'yékaka olá mapurigá 'yémítamo mayebo mapu aboni ne bichíwali Jesucristo jiti julárami ju nawisánala. ¹⁴Chopi mapurigá aboni echirigá olako, arigá galá machirúami ju, mapujiti echí Satanasi riwéami riablo binói ayénachó echirigá 'yékaka olá mapurigá echí pagótami mayema mapu binói ne bichíwali bilé wabé ratábami walula Riosi kapitánawala ju. ¹⁵Echijiti echí jaré pagótami mapu arigá nijéwaga olá mapurigá echí riablo nulé, abóniko we nakí wabé 'yékaka olánala, mapurigá echí auché jaré pagótami mayema mapu aboni ne bichíwali galabé oláami ju. Chopí echalí ne jubá rawé echí jaré aboni arigá kastigo 'yárami níima achigórigá mapurigá aboni wabé chati sitfi olali.

Echi Pablo wisabé ne wabé risúu olárami níli

¹⁶Auchecho siné nijeni 'yemi mi jeané mapu ke wesi 'yémítamo mayesi mapu nijeni ke newalite niráa ju. ¡Chopi átamo arigá mayésagá mapu nijeni echirigá ke newalite ju, arigá ariwesi mapu nijeni 'yemi mi pe ra'íchama mapurigá bilé ke newalite niráa, mapurigá nijeni ayénachó pe nóchaga 'nátami nílama! ¹⁷Echi Walubela Jesucristo ketasi tamí nuleli mapurigani 'yemi mi jerigá ra'íchama, chópini ke newalite niráa ra'icha mapalí nijeni aní mápuni nóchaga 'nátami niráa nílama. ¹⁸A'lí mapalí wikabé auché jaré ne wabé nóchaga niráa ra'icha mapujiti aboni ne wabé simírami o'wéala niráa mayé, nijeni ayénachó nóchaga niráa ra'icháma ¹⁹mapujiti 'yémítamo risensia 'ya mapu echí jaré ke newalite 'yemi mi

ra'íchama, chópitamo arigá mayé mapu 'yemi aboni ne wabé simírami machíami niráa ju. ²⁰ Ayénachótamo ariwé mapu echi jaré 'yékaka nawésami 'yemi mi wabé jiwériga nulema mapurigá aboni piónawala niráa, ayénachó mapurigá aboni waminá suwábama 'yemi níwala namuti. Ayénachótamo ariwé mapu aboni 'yemi o'wéalawala niráa niráma, ayénachó mapurigá aboni 'yemi mi ke 'me nirama, ayénachó mapurigá aboni 'yemi mi waminá cho'himea. ²¹ Ketasi galá níima mapu nijeni wabé riwélama mapujiti nijeni ke siné omérali echirigá olayá.

Chopi mapalí echi auché jaré we nóchaga 'nátaga ra'icháma, nijeni ayénachó nóchaga 'nátaga ra'icháma, chopi mapurigá ke newalite niráa. ²² Echi auché jaré 'yékaka nawésami nóchaga aní mapu aboni Ebreo anilíwami ra'íchami ju. Nijeni ayénachó Ebreo ra'íchami ju. Aboni nóchaga aní mapu Israeli anilíwami pagótami ju. Nijeni ayénachó ju. Aboni nóchaga aní mapu echi Abrami kúchala kúchuwala ju. Nijeni ayénachó bilé Abrami kúchala kúchuwala ju. ²³ Aboni nóchaga aní mapu aboni echi Walubela Jesucristo piónawala niráa ju. Nijé 'nalí waminabi simírami galabé pioni ju, Jesucristo piónawala niráa, chópini ra'icha mapurigá ke newalite mapalini echirigá aní. Nijeni waminabi wabé simírami nóchali, Jesucristo nóchala olayá, ketasi mapurigá aboni. A'lí mapujiti nijeni we nawésali Jesucristo Ra'íchala nijeni waminabi wisabé wipisótami níili ketasi mapurigá aboni. Nijeni simírami wisabé pachá bachárami níili mapujítini nawésali Jesucristo jiti rugá, ketasi mapurigá aboni, ayénachó nijeni wisabé ne noguí mi'lirúami níili. ²⁴ A'lí mapujiti nijeni nawésali Jesucristo jiti rugá, echi jaré Juríosi pagótami malisa chokéami tamí wisabé wipisoli, baisá makói miná kimakói yénasí niráa. ²⁵ Auché siné baisá chokéami ayénachó nijeni wipisótami níili kusí jiti. Auchecho siné nijeni wisabé basibúrami níili mapuyénasí nijeni ne noguí mi'lílati. Allí baisá chokéami mapalí nijeni ripá moba iyénali jaréana bárkochi asagá, echalí ibili echi jaré barko ri'lé botowili. A'lí sinepi nijeni tibili echo'ná walú ba'wírali moba bilé rawéwali, waminá bilé rukuwáwali. ²⁶ Wisabeni wabé mikabé iyénali, Riosi Ra'íchala nawésiya. A'lí echo'ná wikanáami bakochi, wisabeni ne noguí u'lúsali. Wisabeni ne noguí mi'lirúami níili jaré chigórami jiti. Ayénachó echi jaré Juríosi pagótami wisabé tamí mi'llináali mapujítini echirigá nawésali Jesucristo Ra'íchala. A'lí echi auché jaré isena pagótami ayénachó wisabé tamí mi'llináali mapujítini echirigá nawésali. Echirigá nijeni wisabé ne noguí mi'lirúami níili echo'ná jaréana o'wéalachí, echo'ná jaréana waná kawichí ayénachó. Echo'ná walú ba'wírali nijeni wisabé ne noguí si'lili. Ayénachó nijeni wisabé ne noguí suwábarami níili echi auché jaré jiti mapu 'yékaka aní mapu ritémptami niráa ju. ²⁷ Wisabeni wabé nóchali, Riosi nóchala olayá. Ayénachóni wisabé wabé kumérami níili. Wisabé rokogó ketásini kochili. Wisabeni ne wabé 'locheli, ayénachóni wisabé balámali. A'lí wisabé tarapeni ko'wali, mapalini chopi Riosi yuwa ra'íchaga olánali. A'lí wisabeni wabé wacheli, ayénachó wisabé ketásini 'me níwali napachala.

²⁸ Nijeni je'ná jerigá ne wabé kumérami níili chabé jonsa, ayénachóni sinibí rawé ne wabé 'nátali echi auché jaré suníami piréami napawika bichiyami ritémptami jiti, mapu churigá 'yéneré. ²⁹ A'lí a bilé rijimala ketasi 'me galá bichiyami níiságá, echalí nijé binói ne wabé natimaga nakimea ku'wíranala echi rijimala. A'lí a bilé lijimala ketasi waminabi bichíiságá mapujiti auché jaré pagótami ke bichíiratali, echalí nijeni ne wabé yoma. ³⁰ Riosi Binói tamí machírali mapurigá nijeni ketasi 'me jiwérámi juni. A'lí a 'wéráli níiságá mapu nijeni nóchami níima, echalí nijeni

chopi echirigá nóchami níima mapujiti Riosi echirigá tamí machírali mápuni ketasi 'me jiwérami ju nijé binói niráa.³¹ Echi Walubela Riosi mapu tamujé Walubélawala Jesucristo Onolá ju, Échiko galá machí mapu nijeni ketasi 'yékaka aní. Ne wabé galá níima mapu echi Walubela Riosi sinibí waminabi walubélaga anérami níima.³² Chabénala mapalí nijeni echo'ná Ramáskochi anilíwachi walúlachi asali, echi ne walula silíami echo'ná bitéami Arétasi riwéami níili. Echalí echi pe tabéala silíami echo'ná bitéami nulali galabélaga iwénala echo'ná walúlachi yéachi, mapujiti tamí wabé chapináali.³³ A'lí echo'ná walúlachi ne noligá tigótami níili ne wabé ripabé niráa. Chopi nijeni arigá ku machínali echo'ná walúlachi jonsa, mapujiti echi auché jaré ritémtami echo'ná biléana wabé ripabé uchíi yéachi jonsa tamí ri'lena, machímana niráa simérali, wiya jiti bulugá, echo'ná biléana ne wabé walubé walichi achagá. A'lí nijeni waminá 'másali mapurigá echi silíami ketasi tamí chapimea.

Riosi rimútaga riwírali echi Pablo wikabé namuti

12 Mapalí nijeni ne wabé nóchaga ra'íchali mapujítini echirigá wisabé wabé risúu olárami níili, echalini ketasi 'yemi mi waminabi bichírali mapu Riosi ne bichíwali tamí júuli nawisánala. Waminabi galá níimili mapu nijeni 'yemi mi anema mapurigá echi Walubela Jesucristo tamí rimútaga riwírali wikabé galabé namuti, ayénachó mapurigá Binói wisabé tamí machírali wikabé namuti mapu echi auché jaré pagótami ketasi cho machí.² Nijé, Pablo, galá bichíi Jesucristo niráa. Chabénala nijeni torúami níili echo'ná ripá riwigachi mapo'ná Riosi atí. Ma makói miná naó bamíbali ju mapalí jonsa nijeni torúami níili. Chopi nijeni ketasi galá machí áchaní auchérígá, nijé sapala, torúami níiliré, nijé aliwala chopi torúami níiliré omá, Riosi Binói chopi ne galá machí churigá ikili.³ Chopi nijeni ne bichíwali torúami níili echo'ná ripá riwigachi. A'lí nijeni ketasi machí acha nijé sapala así tólatiré, acha nijé aliwala chopi tólatiré omá. Riosi Binói chopi galá machí.⁴ Echalí nijeni ne bichíwali tólati echo'ná ripá riwigachi mapo'nani galá námali wikabé namuti mapu echi auché jaré jena'í wichimóbachi piréami pagótami ketasi cho machí. A'lí tarapé risensia ju mapu nijeni echirigá ruyema aboni.⁵ Siné káachi nijeni omérama nóchami níliya mapujiti Riosi echirigá tamí olírali. Chopi nijeni tarapé nóchami níima echi jaré namuti jiti mapu nijé binói olali. A'lí a nijeni nóchami níisagá, chópini echirigá níimani mapujiti Riosi ma tamí machírali mapurigá nijé binói tarapé jiwérami ju.⁶ A'lí a nijeni arigá nakisáagá ra'ichánala jeanigá mapu nijé binói ne wabé galabé oláami ju, echalí nijeni chopi bichíwaga ra'íchami níima, mapujiti nijeni ne bichíwali galabé oláami ju. Chopi nijeni ke siné ra'icha jeanigá mapu nijé binói galabé oláami ju, mapurigá ke wesi mayema mapu nijé waminabi galabé oláami ju, ketasi mapurigá aboni ritiwá mapu nijeni galabé olá, ayénachó mapurigá ke wesi mayema mapu nijé waminabi galabé ra'íchami ju ketasi chopi mapurigá aboni kipugú tamí galabé ra'íchaga aníachi.

⁷ A'lí Riosi ne bichíwali echirigá tamí riwírali echi jaré ne wabé simírami galabéala namuti, chopi mapurigá nijeni ketasi echijiti ne wabé nóchami níima, Riosi ariweli mapurigá echi Satanasi riwéami riablo tamí ne wabé risúu olama. Echalí nijeni ne wabé okoli, mapurigá bilé rijói ne wabé okolá mapalí bilé wi'llí so'uwá jiti so'wí.⁸ A'lí baisá chokéami nijeni wabé tánali echi Walubela Jesucristo mapurigá tamí 'yema echi okolíwami.⁹ Echalí echi Walubela Jesucristo tamí ku nijéwaga jeaneli: Nijeni mi ne wabé simírami galé. Echi chopi sébali ju. A'lí ketasi arigá 'wérali ju

mapu Nijeni mi waminá 'yema echí okolíwami, mapujiti mapalí mujemi ketasi jiwérami ju, echalí mujemi waminabi galá machí mapu Nijé Binói ne wabé omérami ju. Echijiti nijé, Pablo, ne wabé kaníli. Nijé binói we nóchami ju mapujiti nijeni tarapé jiwérami ju, mapurigá echí Walubela Jesucristo we omériga olama pachana tamí yuwa.¹⁰ Echijiti nijeni sinibí echirigá kanila mapalini ketasi jiwérami ju, ayénachó mapalí auché jaré pagótami tamí wabé sitila ané, ayénachó mapalini ne wabé newaléami ju. Ayénachó nijeni arigá kanili mapalini a'najátarami ju, ayénachó mapalini risúu olárami ju mapujítini bichíi Jesucristo niráa. A'lí bicheni echirigá kanila mapujiti mapalini tarapé jiwera, echalí echí Walubela Jesucristo tamí waminabi jiwérataga olá.

**Echi Pablo sinibí 'náitali echí jaré napawika bichíyami
jiti echo'ná Koríntochi piréami**

¹¹ Nijeni mapurigá ke newalite niráa níili, mapalini echirigá we nóchaga ra'íchali nijé binói chopi jiti rugá. Echalí arigá 'wérali níili mapurigani echirigá nóchaga ra'ícháma mapujiti 'yémítamo ketasi nakili tamí nijéwanala. Galá níima 'yemi 'nalítamo galá ra'íchása tamí jiti rugá, mapujiti nijeni tarapé tabéala niráa ju echí auché jaré yuwa mapu 'yémítamo o'wéala nawésami ané, arigani tarapebi yiri níisagá, mapurigá 'yémítamo tamí ané.¹² Chabénala mapalí nijeni wabé kaligá nóchali echo'ná 'yémichi, echalí 'yémítamo galá machíratami níili mapu nijeni ne bichíwali Riosi jiti julárami níili, mapujiti Riosi tamí omératali mapurigani wikabé galabéala karímati, chibi yirítere olama mapurigá ke wesi auché jaré pagótami omérali olayá.¹³ A'lí nijeni ke siné 'yemi mi ke 'me nírali, chópini sinibí mayeli mapu 'yémítamo chopi a yiri jútamo echí auché jaréana piréami napawika bichíyami yuwa. A'lí nijeni ke siné risensia 'yali mapurigá 'yémítamo tamí 'yabo wenomí. Siné káachi galá níimi nijeni 'yemi mi bujesa wenomí, mapujiti echí auché jaréana piréami napawika bichíyami sinibí tamí 'yali wenomí mapalini newaléami níili. ¡Tamí ku wikawasi mapujítini ketasi nareli 'yemi níwala, níjírami niráa, achigórigá mapurigani nareli echí auché jaréana piréami ritémtami níwala!

¹⁴ Jipi nijeni galá kariwé mapurigani auchecho siné baisáala simea echo'ná 'yemi 'némiya. A'lí nijeni ketasi biyiri 'yemi mi bujema, mapujiti ketásini nakí echí jaré 'yemi níwala namuti, chópini nakí mapurigá 'yémítamo galá galebo Riosi, mapujiti ketasi arigá 'wérali ju mapu echí jaré kúcharami napabuma wenomí echí jaré aboni 'wénawala 'yábiya, chopi 'wérali ju mapu echí jaré 'wéntami 'nalí napabuma, aboni kúchuwala 'yábiya. A'lí 'yémítamo mapurigá nijé kúchuwala niráa ju.¹⁵ Echijiti nijeni wabé kaníliga suwábama nijé níwala namuti 'yemi mi ku'wíriya. Ayénachóni ne wabé kaníliga nochama mapuyénasíni mukumea mapurigá 'yémítamo galá bichíibo Jesucristo niráa, mapurigá 'yemi aliwala ku pirélama Riosi yuwa sinibí niráa. Chópini mayé mapalí nijeni 'yemi mi waminabi galé, echalí 'yémítamo ke 'me tamí galé.

¹⁶ 'Yémítamo galá machí mapu nijeni ketasi nareli 'yemi níwala wenomí níjíwami, chopi jaré 'yemi arigá mayé mapu nijeni 'yékaka olali mapurigá 'yémítamo bichíibo nijé nawésawala.¹⁷ Nijeni ketasi echirigá 'yékaka olali, nibilé cho 'yemi mi 'yékali echí auché jaré mapu nijeni júuli echo'ná 'yémichi.¹⁸ A'lí nijeni jeaneli echí Tito mapu binói echo'ná 'yémichi simea, ayénachó binói yuwa júulini echí auché bilé rijimala. ¿Acha 'yemi mi 'yékali echí Tito? Nijeni mayé mapu binói sinibí achigórigá

olali mapurigá nijeni olá. ¿Kecha bichíwali ju mapu tamujé sinibí a'nawí chópirigá ologá 'yénali?

¹⁹ Siné káachi 'yémítamo mayé iré omá mapu nijeni wepi je'ná jerigá aní niyúramiya, chopi ketasi echirigá ju. Nijeni we bichíwaga ra'icha bacháami Riosi yuwa, mapurigá Jesucristo bichíyami niráa. A'lí suwaba mapu ikí nijeni aní, echirigani aní mapurigá 'yémítamo waminabi bichísabo, mapujítitamo nijé ritémawala niráa ju mápuni ne wabé galé. ²⁰ A'lí nijeni we majá mapurigá siné káachi nijeni 'yemi mi riwimearé ketasi galabé oláami niráa, mapurigá nijeni nakí máputamo chopi galabé oláami níibo mapalí nijeni nawá echo'ná 'yémichi. Ayénachóni majá mapurigá siné káachi 'yémítamo tamí riwiboa yóami niráa, mapujiti arigá 'wérali ju mapurigá nijeni yónama echí jaré 'yemi mapu chati sitíi olako. Echirigá nijeni wabé majá mapurigá siné káachi nijeni 'yemi mi riwimea we chuwe nakówami niráa, we korúkami keremá, wabé chati sitíi na'awami keremá, aboni o'wéala niráa nílanalami keremá, chati sitíi ra'íchaga ruyéami keremá, chiná sayéraga ra'íchami keremá, we nóchami keremá, we chati sitíi chuwe oláami keremá. ²¹ Ke 'me ayó nijeni echo'ná nawama 'yemi mi 'némiya, chopi nijeni we majawá mapurigá echí Walubela Nijé Riósawala tamí riwélatama 'yemi jiti, ayénachó mapurigá echirigá 'wérali níima mapu nijeni we nalama wikabé 'yemi jiti, si'néami 'yemi mapu ikítamo chabé jonsa wabé chati sitíi olali, chópitamo abijí ketasi cho ariweli echirigá mapurigátamo wabé chati sitíi olali, mapujiti jaré wabé simírami chati sitíi olali, ayénachó jaré chuwe bilétari yuwa kochili, ayénachó jaré wabé simírami chati sitíi chuwe olali.

**Pablo galá nulé echo'ná Koríntochi piréami mapu aboni
galabé olama, ayénachó Pablo ripora aboni**

13 Jipi ma baisáala ju mapu nijeni echo'ná 'yemi mi 'némiya simea. Jípini justicia olama. A'lí suwaba namuti ra'íchali chopi galá katiwárami níima mapalí okuá testigo chópirigá anisá, bakiyá keremá. ² Chabénala mapalini osáala niráa iyénali, echalí nijeni aneli mapu echí jaré chati sitíi oláami arigá justicia olírami níima. Jipi mapalini mikabé atí, nijeni auchecho siné echirigá ané echí jaré chati sitíi oláami. Ayénachóni jerigá ané ne si'néami 'yemi: Mapalini auchecho siné nawama echo'ná 'yemi mi 'némiya, echalí nijeni ne bichíwali ne galá wachínaga olama justicia. Ayénachóni arigá kastigo 'yama echí jaré mapu ikí chati sitíi olali. ³ Echalítamo ne bichíwali machiboa mapu nijeni chopi ra'icha mapurigá Jesucristo tamí nulé ra'ichánala. A'lí echí Walubela Jesucristo sinibí wabé omériga olá mapalí Binói 'yemi mi ku'wíra. Binói sinibí wabé omériga 'yemi mi olíima justicia. ⁴ Bichíwali ju mapu echí Walubela Jesucristo arigá clavo jiti michántami níili echo'ná kúrsichi mapurigá tarapé jiwerárami niráa, chopi jipi rawé Jesucristo sinibí ku bité, Riosi jiweráwala jiti. A'lí jipi rawé nijeni ayénachó tarapé jiwerárami niráa ju mapurigá Binói tarapé jiwerárami níili, chópini bukulíwami niráa ku bité Binói yuwa, Riosi jiweráwala jiti, mapurigani 'yemi mi ku'wírama.

⁵ 'Yemi aboni galá machisí áchatamo ne bichíwali galá bichíyami ju Jesucristo niráa. 'Yemi aboni niráa ne galá machigá 'natasi: ¿Áchatamo galá bichíyami ju? ¿Kéchatamo machí mapu Jesucristo echo'ná pachana 'yemi yuwa áti? A ketasi pachana 'yemi yuwa asisáagá, 'yémítamo ketasi ne bichíwali galá bichíyami ju. ⁶ A'lí nijeni mayé mapu átamo echirigá 'natásagá, echalítamo galá machiboa mapu nijeni ayénachó ne galá bichíyami ju Jesucristo niráa. ⁷ A'lí nijeni Riosi yuwa

ra'íchaga tánama mapu 'yémitamo tarapebi yiri chati sití olabo. Chópini ketasi echirigá tánama chopi mapurigá anirúami níimi mapu nijé binói galabé olali, Riosi nóchala olayá. Nijeni chopi echirigá tánama Riosi mapurigá 'yémitamo ne bichíwali galabé oláami níibo. ¡Ke chiré nijeni ketasi galá nóchami anérami nísagá! ⁸ Mapujiti nijeni tarapebi yiri omero, echi ne bichíwali Riosi Ra'íchala sayéraga olayá. Chópini ayena galá omero olayá mapurigá echi ne bichíwali Riosi Ra'íchala galá machirúami níima. ⁹ Echijítini we kaníla mapalí ketasi 'wérali ju mapu nijeni 'yemi mi oyérama. Nijeni chopi nakí mapu 'yémitamo waminabi galá bichíyami níibo Jesucristo niráa, ayénachóni taní Riosi mapu 'yémitamo ne sébali galabé oláami níibo. ¹⁰ Jípini bachá niráa 'yemi mi je'ná jerigá osé, mapalini ketasi cho echo'ná simea 'yemi mi 'némiya, mapurigá mapalini echo'ná 'yemi yuwa nawama, echalí ketasi arigá 'wérali níima mapurigá nijeni 'yemi mi oyérama. Mapujiti echi Walubela Jesucristo tamí nuleli mapurigani 'yemi mi waminabi bichíratama, chopi ketasi tamí nuleli mapurigani chopi 'yemi mi wabé oyéraga majajárama, mapujiti echi Walubela Jesucristo chopi nakí mapurigátamo waminabi galá bichíyami níibo.

¹¹ Jipi 'yemi keni ritémawa, nijeni nakí máputamo wabé kanílabo. Sinibí waminabi galabé oláami nílasi. Ke siné o'monási. Si'néami chopi a yiri 'nátaga pirélasi. Ketasi nakosi a'nagupi. Echalí echi Walubela Riosi mapu tamujé tamí 'ya máputa wabé galéami níibo, máputa sinibí a'nagupi kaligá chópirigá 'natabo, echi Walubela Riosi sinibí 'yemi mi yuwa asimea. ¹² A'nagupi ne wabé galigá naripasi. ¹³ Ne si'néami echi jaré galá bichíyami ritémtami jena'lí piréami galá ripóragera náwalasi.

¹⁴ Nijeni ne wabé nakí mapu echi Walubela Jesucristo 'yemi mi waminabi ku'wírama, ayénachó mapu Riosi Onorúami 'yemi mi waminabi galema, ayénachó mapu si'néami 'yémitamo a'nagupi waminabi ganílatabo, mapujítitamo níwa echi Wabé Galabé Riosi Iwigala. ¡Echirigá níima!

Osirúami

mapurigá San Pablo oseli echo'ná

GALÁSIACHI PIRÉAMI

Pablo osé echo'ná Kalásiachi piréami napawika bichiyami

1 Nijé ju Pablo. Riosi tamí nawésanala júuli. Ke wesi pagótami tamí echirigá júuli. Nibilé wesi rijói tamí wilali nawésami niráa. Chopi Jesucristo Binói tamí nawesánala júuli. A'lí Riosi Onorúami achigórigá tamí júuli. A'lí echi Onorúami níili mapu ku owíntali echi Walubela Jesucristo mapalí Binói ma mukúami níili. ²Nijé 'yemi nimí je'ná jerigá osé. A'lí si'néami echi jaré ritémtami tamí yuwa muchúwami ayénachó 'yemi mi ripora, 'yemi echo'ná Kalásiachi anilíwachi kawírali piréami, si'néami mapu ikítamo napawika bichiyami ju. ³Ne wabeni nakí mapurigá Riosi Onorúami, ayénachó echi Walubela Jesucristo, anawika 'yemi mi wabé ku'wírama mapurigátamo ne galá kilí 'nátaga ologá pirélabo. ⁴A'lí echi Walubela Jesucristo a Binói niráa nijali mapurigá Binói mi'lirúami níima. A'lí je'ná jerigá olali mapurigá Binói galá omérama ku wikáwiya tamujé chati olalila, ayénachó mapurigá Binói omérama tamujé tamí ku'wíriya mapuyénasíta piré jena'lí wichimóbachi, mapo'ná auché jaré pagótami sinibí wabé chati oláami ju. A'lí echi Walubela Jesucristo suwaba echirigá olali achigórigá mapurigá echi Onorúami, tamujé Riósawala nakili. ⁵¡Sinibí ne wabé walubélaga anérami nílaka Riosi! ¡Echirigá níima!

Ketasi nirú auché bilé si'nú nawésala echi pagótami ku'wíriami

⁶Nijeni ne wabé cha níraga 'nata mapujiti 'yémítamo ma we yáati ariwénali Riosi bichiya. A'lí Riosi bukulí 'yemi mi bayeli mapujiti Jesucristo 'yemi mi ne wabé galé. Chopi jípitamo nakí máputamo si'nú nawésala bichíbo, mayega mapurigátamo siné káachi echijiti ku'wíratami níibo. ⁷Chopi tarapé nilú auché bilé si'nú nawésami 'yemi mi ku'wíriami. Jipi auché jaré pagótami 'yemi mi wabé kumé. Abóniko ketasi binera echi Galabé Riosi Ra'íchala, mapujiti aboni ketasi 'yemi mi ruyé mapurigá echi Walubela Jesucristo wabé omérami ju 'yemi mi ku'wíriya. ⁸Chopi tamujé ma 'yemi mi binérali mapurigá Jesucristo bilepi ju tamujé tamí Ku'wíriami. Jipi a auché jaré siné káachi 'yemi mi auché si'winárigá nawésasagá, galá níima sinibí niráa kastigo 'yárami níisa echirigá nawésami, mapujiti aboni ketasi nawésami ju echi ne Bichíwali. Ayena siné káachi a tamujé aboni 'yemi mi auché si'winárigá nawésasagá, galá níima tamujé aboni arígá sinibí niráa walú kastigo 'yárami níisa. A'lí a bilé walula Riosi kapitánawala ripá riwigachi jonsa simíami, siné káachi 'yemi mi auché si'winárigá nawésasagá, ayénachó galá níima échiko sinibí niráa

walú kastigo 'yárami níisa. ⁹Mani 'yemi mi bachá niráa jerigá aneli. A'lí jípini auchecho siné 'yemi mi achigórigá jeané: Jipi a bilé rijói siné káachi 'yemi mi sayéraga nawésasagá mapurigátamo ma bichíili, galá níima sinibí niráa kastigo 'yárami níisa echirigá nawésami, mapujiti échiko ketasi nawesa jeanigá mapu Jesucristo bilepi ju 'yemi mi ku'wíriami.

¹⁰A'lí mapalini je'ná jerigá aní, nijeni ketasi chopi jerigá aní mapurigá echí jaré pagótami tamí galá nilama, chópini jerigá aní mapurigá Riosi Binói tamí galá nilama. Nijeni ketasi chopi nakí kanílatanala echí jaré pagótami, mapujiti ani chopi kanílatasagá echí jaré pagótami, echalí nijeni ma ketasi mapurigá Jesucristo piónawala niráa níima.

Echi Pablo rugá osá mapu churigá binói Riosi jiti julárami níili nawésanala

¹¹Chopi 'yemi ritémtami ne galá machisí je'ná jeyiri: Mapalí nijeni 'yemi mi nawesa jeanigá mapu Jesucristo bilepi ju tamujé tamí Ku'wíriami, echirigá nawésala ketasi chopi jaré pagótami 'nátala ju. ¹²Mapujiti ke wesi pagótami tamí 'yali mapurigani echirigá nawésama. Nibilé wesi pagótami tamí echirigá binérali. Chopi echí Walubela Jesucristo Binói echirigá tamí machírali.

¹³'Yémítamo ma galá námalaré mapu churigá nijeni olali chabéanokuá mapalini chopi bichíili mapurigá echí auché jaré Juríosi pagótami bichíi. Ayénachótamo ma galá machí mapurigani ne wabé yóniga a'najáltali echí jaré Riosi níwala napawika bichíyami pagótami. Echalini suwaba suwábanali aboni. ¹⁴A'lí echalí mapalini abijí bichíili mapurigá echí jaré Juríosi pagótami bichíi, echalini ne wabé simírami machífami níili echirigá amachiya mapurigá aboni olá. Chopi auché jaré nijé pagótamawala, achigó yiri mapurgá nijé, ketasi echirigá simírami machífami níili. Ayénachó nijeni wabé simírami níliami níili mapurigani waminabi bichíima mapurigá echí jaré ki'yá piréami nijé pagótamawala bichíili, ayénachó mapurigani karúmati olama mapurigá aboni sinibí olali. ¹⁵Chopi echí Walubela Riosi chabé ki'yá tamí galá machigá chapili, mapalí nijeni ke cho ranarúami níili. A'lí Binói ne wabé galigá tamí bayeli mapurigani galá bichíima. A'lí mapalí Binói echirigá nakili, ¹⁶echalí Riosi tamí galá machírali mapurigani galá machimea echí bilepi Riosi Ranala, mapurigá nijeni galá omérama nawésiya echí auché jaré isena pagótami mapu ketasi Juríosi ju, jeanigá mapurigá echí bilepi Riosi Ranala ku wikáwami ju mapurigá echí pagótami chati sitíi olá. Chopi mapalí je'ná jerigá ikili, echalí nijeni ketasi rukuésiya simili echí auché jaré pagótami yuwa. ¹⁷Nibilé cho simílini echo'ná ripáami Jerusalémachi anilíwachi walúlachi mapurigá nijeni 'nema echí auché jaré o'wéala mapu Riosi bachá niráa júuli nawésanala, nibilé cho mapurigani rukuema aboni jaré namuti. Chopi nijeni we yáati simili echo'ná auché biléana waná kawichí, Arábiachi anilíwachi. A'lí pe wakinánokuá nijeni auchecho siné ku nawali echo'ná Ramáskochi.

¹⁸Echalí nijeni ketasi we yáati simili echo'ná Jerusalémachi. Chopi ma simírasa baikiyá bamíbali, echalí nijeni echo'ná simili. Echalí jonsa nijeni machili echí Pegro. A'lí bicheni chopi makói miná malí rawé asali binói yuwa. ¹⁹Echalini ayénachó riwali echí Jakobo, echí mapu pe rijimala níili echí Walubela Jesusi. Chópini ketasi wesi riwali echí auché jaré o'wéala mapu Riosi nawésanala júuli. ²⁰Nijeni 'yemi mi ne bichíwaga ané mapu ne bichíwali ju mapurigá nijeni 'yemi mi osé. A'lí Riosi Binói galá machí mapu nijeni 'yemi mi ne bichíwaga ané.

²¹Echalí jonsa pe wakinánokuá nijeni simili echo'ná Síriachi anilíwachi kawírali, echo'ná Silísiachi anilíwachi kawírali ayénachó. ²²Echalí echi auché jaré echo'ná Juréachi anilíwachi kawírali piréami mapu ikí napawika bichíyami níli Jesucristo niráa, ke wesi cho tamí machili. ²³Echalí aboni chopi námali je'ná jerigá ra'icháluaichi: Echi rijói mapu chabénala tamujé tamí ne wabé a'najátaga kichili, échiko jipi we nawesa iyena echi galabé Jesucristo Ra'íchala. Chopi chabénala binói wabé kichiga suwábanali si'néami mapu ikí je'ná jerigá bichíli. ²⁴A'lí aboni chopi waminabi walubéraga aneli Riosi, mapujiti nijeni ma galá bichíyami níli Jesucristo niráa.

**Echi auché jaré o'wéala mapu Riosi bachá niráa júuli
nawésanala, ma galá nareli echi Pablo**

2 A'lí wakinánokuá ma sebárasa makói miná naó bamíbali, echalini auchecho siné simili echo'ná Jerusalémachi echi Benabé yuwa. Echalini echi Tito ayénachó bayérali. ²Echalini chopi echo'ná simili mapujiti Riosi Binói tamí machírali mapurigani echo'ná simea. A'lí nijeni pe waná rojuánaga nawésali echi jaré mapu o'wéala níli echi auché jaré napawika bichíyami yuwa. Nijeni ne galá irétaga nawésali echi Galabé Riosi Ra'íchala achigórígá mapurigá nijeni sinibí nawésaga ruyé echi auché jaré isena pagótami mapu ketasi Juríosi ju. A'lí bicheni echirigá olali mapujiti nijeni ketasi nakili mapurigá njé nawésala waminá sití anérami níima. ³A'lí echi Tito mapu tamí yuwa iyénali ketasi Juríosi pagótami níli. Chopi echi jaré napawika bichíyami Juríosi pagótami o'wéala arigá ketasi nuleli mapurigá echi Tito noligá sikirétami níima mapurigá echi jaré Juríosi pagótami sinibí olá. ⁴Chopi jaré 'yékami rijói arigá nakili mapurigá echi Tito noligá sikirétami níima. A'lí echi jaré aboni ketasi ne bichíwali galá bichíyami ritémtami níli. Aboni chopi wabé 'yékaka niráa mo'wili tamujé bichíyami yuwa mapujiti aboni machináali mapu churigá tamujé risensia níwa mapurigata ma ketasi nijéwaga olabo mapurigá echi auché jaré Juríosi pagótami sinibí olá, mapujiti tamujeta ma galá bichíili echi Walubela Jesucristo niráa. A'lí aboni chopi we nakili mapurigata auchecho siné nulérami níbo echi wikabé namuti nijéwaga olánala. ⁵Chopi tamujeta ketásirapé risensia 'yali mapurigá echi jaré aboni nuláma echirigá noligá sikirénala echi Tito. Tamujeta chopi nakili mapurigá 'yémitamo waminabi nawésarami níbo echi wabé Galabé Riosi Ra'íchala jeanigá mapurigátamo galá ku wikawárami níbo, átamo chopi galá bichíiságá echi Walubela Jesucristo niráa.

⁶Chopi echi jaré o'wéala napawika bichíyami echo'ná Jerusalémachi piréami ketasi tamí bukulíwami ku ruyeli mapurigani si'winárigá nawésama. Abóniko ne bichíwali o'wéala níli echo'ná piréami napawika bichíyami yuwa, chopi nijeni arigá ketasi 'me nírali aboni, mapujiti Riosi Binói ketasi galabé nirá bilé rijói chopi mapujiti echi rijói walula ju echi jaré pagótami yuwa. ⁷Echalí echi jaré o'wéala ketasi tamí bukulíwami ruyeli mapurigani si'winárigá nawésama echi pagótami, chopi aboni galá machili mapurigá Riosi tamí nuleli mapu nijeni nawésama echi jaré isena pagótami echi Galabé Riosi Ra'íchala achigórígá mapurigá chabé chocichí Riosi nuleli echi Pegro mapurigá binói nawésama echi jaré Juríosi pagótami. ⁸Mapujiti echi Walubela Riosi echirigá júuli echi Pegro mapurigá binói nawésama echi jaré Juríosi pagótami. A'lí echi Binói Riosi ayénachó achigórígá tamí júuli mapurigá nijeni nawésama echi auché jaré isena pagótami.

⁹Echijiti echi Jakobo, echi Pegro ayénachó, echi Juani asíchiko, si'néamika galá machili mapurigá Riosi wabé galigá tamí wilali mapurigá nijeni nawésama echi auché jaré isena pagótami. A'lí mapujiti aboni o'wéala niráa níili echi auché jaré napawika bichíyami yuwa, aboni ne wabé galigá tamujé tamí narépali mapurigá aboni ritémawala niráa. Echalí aboni tamí echirigá narépali, echi Benabé ayénachó. A'lí aboni anili mapu galá níima mapurigá tamujé nawésabo echi auché jaré isena pagótami, chopi aboni anili mapurigá aboni nawésama echi jaré Juríosi pagótami. ¹⁰Chopi aboni ayénachó tamujé tamí tánali mapurigata sinibí galá natimapo echi jaré wabé tisúwati pagótami. A'lí nijeni sinibí echirigá, achigórigá nakili olánala.

Echi Pablo oyérali echi Pegro echo'ná Antiokíachi

¹¹Chopi pe waminánomí mapalí nijeni simili echo'ná Antiokíachi anilíwachi, echalí echi Pegro ayénachó echo'ná nawali. Echalí nijeni pe oyéraga aneli mapurigá binói ketasi galabé ologá iyénali. ¹²Mapujiti chabénala niráa echi Pegro sinibí kaníliga ko'wali echi jaré isena pagótami yuwa echo'ná Antiokíachi piréami. Chopi pe kinánala mapalí jaré Juríosi pagótami echo'ná sili, mapu echi Jakobo jiti julárami níili echo'ná Jerusalémachi jonsa, echalí echi Pegro waminá waná simigá, ma ketasi nakili mapu ko'mea echi jaré isena pagótami yuwa, mapujiti binói we majali echi jaré Juríosi jiti, mapujiti echi jaré Juríosi pagótami sinibí anili mapu ketasi risensia níili mapurigá aboni napawika ko'mea echi auché jaré isena pagótami yuwa. ¹³Echalí ne si'néami echi jaré Juríosi pagótami echo'ná piréami mapu ikí bichíyami níili Jesucristo niráa ayénachó achigórigá 'yékaka olánali mapurigá echi Pegro olali. A'lí echi Benabé ayénachó echirigá olali. ¹⁴A'lí mapalí nijeni riwali mapu aboni ketasi ne galá wachínaga lyénali mapurigá echi ne bichíwali Galabé Riosi Ra'íchala tamujé tamí binera, echalí echo'ná bacháami si'néami pagótamichi, nijeni wiriska jeaneli echi Pegro: Mujé binói Juríosi ju, chópimi sinibí ologá bité mapurigá echi auché jaré isena pagótami niráa. A'lí mujemi ketasi ologá bité mapurigá echi jaré Juríosi niráa. ¿Churékula bichemi arigá we nulé echi jaré isena pagótami mapurigá aboni wikabé namuti ologá pirélama achigórigá mapurigá echi auché jaré Juríosi pagótami sinibí ologá piré?

¹⁵A'lí tamujé Juríosi mapu jónsata ochérali Juríosi pagótami níili. Ayénachó tamujé Juríosi sinibí aní mapurigá tamujeta ketasi chati sitíi oláami ju, chópita we chati sitíi oláami niráa ané echi auché jaré isena pagótami. ¹⁶Jipi tamujeta galá machí mapu ke wesi pagótami galá narétami níima Riosi jiti chopi mapujiti aboni galá nijéwaga olá mapurigá echi Moisesi nulali. Galata machí mapu Riosi chopi naré echi jaré mapu ikí galá bichíi Jesucristo niráa. Echijiti tamujeta ayénachó ma galá bichíili Jesucristo niráa, mapurigata echijiti galá narétami níbo. Chópita ketasi mayé mapurigata narétami níbo mapujítita siné káachi ne suwaba galá nijéwaga olásate mapurigá Moisesi osogá nulali. Mapujiti Riosi ke wesi naré chopi mapujiti aboni galá nijéwaga olá mapurigá echi Moisesi osogá nulali.

¹⁷A'lí tamujeta ayénachó nakí mapu Riosi tamujé tamí narema mapujítita ma galá bichíili Jesucristo niráa. Echijítita ma ketasi wikabé namuti nijéwaga olá mapurigá echi Moisesi osogá nulali. A'lí echi auché jaré Juríosi pagótami echijiti tamujé tamí wabé chati sitíi oláami ané. ¿Acha bichíwali ju mapu echi Walubela Jesucristo echirigá tamujé tamí niwá wabé chati sitíi oláami niráa, mapurigá echi auché jaré Juríosi pagótami aní? ¡Ketasi chirigá ju! ¹⁸Chopi áni auchecho nakisáagá

mapurigani nijéwaga olama suwaba mapurigá Moisesi osogá nulali, mapurigani echijiti narétami níima Riosi jiti, echalini chopi riwirúami níima mapurigá ke nijéwami niráa mapurigá echi Moisesi osogá nulali.¹⁹ Mapujiti nijeni ma ketasi wikabé namuti nijéwaga olá mapurigani echijiti narétami níima Riosi jiti. Echijiti nijeni mapurigá mukúami niráa ju echi nulalíwami jiti, mapujítini ketasi omérali olayá suwaba mapurigá Moisesi osogá nulali. Chopi jipi nijeni ologá bité mapurigá Riosi nakí.²⁰ A'lí nijeni ma mukúami niráa ju achigórigá mapurigá echi Walubela Jesucristo mukúami níili mapalí Binói michónarami níili echo'ná kúrsichi. Mani ketasi bité nijé binói niráa, chopi echi Walubela Jesucristo jipi tamí yuwa pachana bité. A'lí mapurigani arigá bité, rijói niráa, echirigani chopi bité mapujítini galá bichííli echi Walubela Riosi Ranala, mapujiti echi Walubela Jesucristo a Binói niráa nijali mapurigá mi'lirúami níima nijé chati sitíi olalila jiti, mapujiti Binói tamí wabé galeli.²¹ Nijeni sinibí we nakí bichíinala echi Walubela Riosi, mapujiti Riosi chopi ne wabé galabé ju. Ketasi bichíwali ju mapu Riosi naré echi pagótami chopi mapujiti aboni ne suwaba galá nijéwaga olá mapurigá echi walula Moisesi osogá nulali. Mapujiti a Riosi ne bichíwali echirigá narésagá echi pagótami, echalí nijeni mayemi mapu echi Walubela Jesucristo tarapebi yiri jiti mukuli, chopi Binói ne bichíwali mukuli tamujé chati sitíi olalila jiti, mapurigata galá bichíiga ku wikawárami níima.

**Echi pagótami galá ku wikawárami níima mapalí aboni galá
bichíi. Chopi aboni ketasi ku wikawárami níima mapalí aboni
chopi galá nijéwaga olá mapurigá Moisesi nulali**

3 ¡'Yemi echo'ná Kalásiachi piréami ritémtami mapurigá ke newalite niráa jútamo! ¿Chigá 'yemi mi 'yékali mapurigátamo ma ketasi bichíibo echi ne bichíwami Riosi Ra'íchala nawésawala? Chabé jonsa tamujeta 'yemi mi ne galá machíami niráa nawésali jeanigá mapu echi Walubela Jesucristo echo'ná kúrsichi michóniga mi'lirúami níili mapujiti tamujé aboni ne wabé chati sitíi oláami níili.²² Je'ná chopi tamí ku nijéwaga ruyesi 'yemi: ¿Áchatamo nareli echi Wabé Galabé Riosi Iwigala echo'ná pachana 'yemi sulálachi niráa chopi mapujítitamo we galá olali mapurigá echi walula Moisesi osogá nulali? Nijeni galá machí máputamo nareli chopi mapujítitamo galá bichííli mapurigá tamujeta 'yemi mi nawésali, jeanigá mapu echi Walubela Jesucristo echo'ná kúrsichi michóniga mi'lirúami níili tamujé chati sitíi olalila jiti.²³ ¡'Yémitamo abijí mapurigá ke newalite niráa ju! Chabénala 'yémitamo chótali bichiya mapujítitamo nareli echi Wabé Galabé Riosi Iwigala echo'ná pachana 'yemi sulálachi niráa. Jipi, ¿áchatamo mayé máputamo ne sébali galá bichíyami níibo chopi mapujítitamo galá nijéwaga olama mapurigá Moisesi osogá nulali?²⁴ Nijeni mayé mapu 'yémitamo tarapé biyiri bineli chabénala mapalí echi auché jaré 'yemi pagótamawala 'yemi mi wabé chati sitíi risúu ologá a'najáitali, mapujítitamo bichííli Jesucristo niráa! ¡Ne galá níimili, a péebi binésagátamo!²⁵ Mapalí Riosi 'yemi mi 'yali Binói Wabé Galabé Iwigala, ayénachó mapalí Riosi wabé omériga olá echo'ná 'yémichi, mapurigá ke wesi pagótami omero olayá ¿churékula echirigá olá? Ne bichíwali ju mapu Riosi ketasi echirigá olá chopi mapujiti 'yémitamo suwaba galá nijéwaga olá mapurigá Moisesi osogá nulali. Riosi echirigá olá mapujítitamo ma galá bichííli mapurigátamo nawésarami níili echi Galabé Riosi Ra'íchala.

⁶Echi ki'yá bitéami Abrami galá bichíili Riosi, echijiti Riosi galá nareli echi Abrami mapurigá bilé Binói ranala niráa. ⁷Echijiti 'yemi Juríosi pagótami galá machisí je'ná jeyiri: Echi jaré pagótami mapu ikí galá bichíiko Jesucristo niráa, abóniko mapurigá echi ne bichíwali Abrami kúchala kúchuwala niráa ju, mapujiti aboni galá bichíi achigórigá mapurigá echi Abrami bichíili. ⁸Echo'ná Riosi Ra'íchala oselíwalachi ne bachá niráa osirúami níili mapurigá Riosi narema riwéali echi jaré isena pagótami mapalí aboni galá bichíima Riosi niráa. Echijiti Riosi bachá niráa ruyeli echi Abrami je'ná galabé ra'íchali mapalí jeaneli: Ne si'néami echi jaré isena pagótami mapu ikí tamí bichíima galá ku'wíratami níima mapujiti mujemi bachá niráa tamí bichíili. ⁹Echirigá ne bichíwali ju mapu echi jaré pagótami mapu ikí galá bichíiko Riosi, si'néami ma galá ku'wíratami ju achigórigá mapurigá echi ki'yá bitéami Abrami ku'wíratami níili mapalí binói galá bichíili Riosi.

¹⁰Si'winárigá ne si'néami echi jaré pagótami mapu ikí nakiko mapu Riosi narema aboni, mapujiti aboni galá nijéwaga olako mapurigá echi Moisesi osogá nulali, abóniko arigá ketasi echirigá narétami níima, chopi aboni walú kastigo 'yárami níima. Mapujiti ke wesi pagótami galá omérali ne sébali galá nijéwaga olayá mapurigá echirigá nulárami níili. Mapujiti echo'ná Riosi nulalila oselíwalachi je'ná jerigá osirúami ju: Ne si'néami echi jaré pagótami mapu ikí ketasi ne sébali nijéwaga olako mapurigá osirúami ju echo'ná Riosi nulalila oselíwalachi, abóniko chopi walú kastigo 'yárami níima. ¹¹Echijiti ne bichíwali ju mapu Riosi ke wesi naré, chopi mapujiti aboni galá nijéwaga olako mapurigá echi Moisesi osogá nulali. Mapujiti echo'ná Riosi Ra'íchala oselíwalachi je'ná jerigá osirúami ju: Riosi chopi naré echi jaré mapu ikí galá bichíiko Binói Riosi. A'lí aboni sinibí piréami níima. ¹²A'lí si'néami echi jaré pagótami mapu ikí chopi nakiko mapurigá Riosi narema aboni mapujiti aboni galá nijéwaga olánali mapurigá Moisesi osogá nulali, abóniko arigá ketasi galá bichíi Riosi. Mapujiti echo'ná Riosi nulalila oselíwalachi je'ná jerigá osirúami ju, mapurigá echi Moisesi osogá nulali: Chopi mapalí echi pagótami ne suwaba galá nijéwaga olako mapurigá aboni nulárami ju, echalí aboni echijiti sinibí pirélama.

¹³Chopi Jesucristo tamujé tamí ku'wírali mapurigata ma ketasi chati sitíi oláami anérámi níibo mapujítita ketasi sébali galá nijéwaga olali mapurigá Moisesi osogá nulali. Mapujiti Jesucristo Binói wabé chati sitíi oláami anérámi níili mapalí Binói michóntami níili echo'ná kúrsichi, ne si'néami tamujé chati sitíi olalila jiti, mapurigá je'ná jerigá osirúami ju echo'ná Riosi Ra'íchala oselíwalachi: Ne wabé chati sitíi oláami anérámi ju mapuyíripi rijói, echo'ná biléana kúrsichi michóntami níisa. ¹⁴A'lí je'ná jerigá olárami níili mapurigá echi jaré isena pagótami ayénachó ku'wíratami níima mapalí aboni galá bichíima Jesucristo niráa, achigórigá mapurigá Riosi bachá niráa bichíwaga aneli echi ki'yá bitéami Abrami mapu si'néami echi jaré isena pagótami ku'wíratami níima riwéali binói Abrami jiti, mapujiti echi Walubela Jesucristo arigá mapurigá echi Abrami kúchala kúchuwala níili. A'lí Binói Jesucristo arigá ku'wírama riwéali si'néami pagótami mapu ikí bichíima Binói niráa. Ayénachó echirigá olárami níili mapurigá ne si'néamita mapu ikí galá bichíibo riwéaliko, echirigá galá narepo echi Wabé Galabé Riosi Iwigala mapurigá Riosi Binói bachá niráa ne bichíwaga anili mapurigá Binói tamujé tamí 'yama riwéali.

Riosi ketasi naré echi jaré pagótami mapu galá nijéwaga olá mapurigá Moisesi osogá nulali, chopi Binói ayena naré echi jaré mapu ikí galá bichíiko

¹⁵ "Yemi keni ritémawa nijeni 'yemi mi anema mapurigá echi jaré pagótami olá: Mapalí bilé rijói siká achesa biléana oselichi mapo'ná osirúami ju jeanigá mapu pe waminánomí echi bilé rijói ne bichíwali olama bilé namuti, echalí jonsa ke wesi auché jaré pagótami omero aniyá mapu echi rijói ketasi echirigá anili. Nibilé wesi omero aniyá mapu echi rijói ayénachó nakili mapu auché jaré namuti ayénachó olárami níima, mapujiti ketasi echirigá osirúami níili echo'ná oselichi. ¹⁶ A'lí Riosi Binói echirigá ne bichíwaga aneli echi Abrami jeanigá mapu piri Binói Riosi 'yama riwéali echi Abrami. Ayénachó Riosi ne bichíwaga aneli echi Abrami mapu piri Binói Riosi 'yama riwéali echi bilepi Abrami kúchala kúchuwala mapu nolínama riwéali, echi mapu ne Walubela níima riwéali. Chopi ketasi jerigá osirúami ju mapu Riosi echirigá bichíwaga aneli mapu piri Binói Riosi 'yama riwéali echi jaré wikabé Abrami kúchala kúchuwala, chopi jerigá osirúami ju: Nijeni je'ná jerigá 'yama echi bilepi mujé kúchala kúchuwala. A'lí nijé Pablo 'yemi mi ané mapu echi bilepi Abrami kúchala kúchuwala, échiko echi Walubela Jesucristo ju. ¹⁷ A'lí mapurigá nijeni aní, je'ná jerigá aniwáami ju: Riosi chabé ki'yá, bachá niráa, ne bichíwaga aneli echi Abrami mapu churigá Binói Riosi olama riwéali. A'lí Riosi Binói waminabi wabé bichíwaga aneli mapu Binói echirigá olama riwéali. Chopi echalí jonsa wakinánala naó kiento waminá baisá makói bamíbali echi walula Moisesi osogá nuleli echi pagótami. A'lí mapurigá echi Moisesi osogá nulali ketasi chirigá omero olayá mapurigá echi pagótami ariwema mapurigá Riosi Binói bachá niráa bichíwaga aneli echi Abrami, mapujiti Riosi arígá abijí olama mapurigá Binói ne bichíwaga aneli echi Abrami mapu Binói Riosi olama riwéali. ¹⁸ A'lí a tamujé narésagá echi jaré namuti mapu Riosi tamujé tamí kóntami niráa 'ya chopi mapalita galá sébali olabo mapurigá echi walula Moisesi osogá nulali, a'lí ma ketasi kóntami niráa níima. Chopi Riosi bachá niráa ne bichíwaga aneli echi Abrami mapurigá Binói we kóntami niráa 'yama riwéali suwaba.

¹⁹ A'lí ¿piri jiti echirigá nulérami níili echi pagótami, mapurigá echi walula Moisesi osogá nuleli? Aboni pe wakinana echirigá nulérami níili, mapurigá aboni echijiti galá machimea mapurigá aboni we chati sitíi oláami níili. A'lí Riosi chopi nakili mapurigá aboni echirigá nulérami níima mapuyénasí Binói Riosi Ranala nawama riwéali jena'í wichimóbachi. Mapujiti Riosi bichíwaga aneli echi Binói Ranala mapu Binói Riosi kóntami niráa 'yama riwéali echi Wabé Galabé Riosi Iwigala. A'lí echi jaré o'wéala Riosi kapitánawala níili mapu ruyeli echi Moisesi mapu churigá binói osimea riwéali Riosi nulalila. Echirigá níili mapu echi Moisesi chopi julárami níili ruyénala echi pagótami mapu churigá Riosi nuleli aboni. ²⁰ Chopi mapalí Riosi bichíwaga aneli echi Abrami, echalí Riosi Binói ra'íchali echi Abrami yuwa, mapujiti Riosi bilepi ju. A'lí ketasi 'wérali níili mapurigá Riosi julama auché bilé echi Abrami yuwa ra'ichánala.

**Riosi nulalila ketasi sayéraga aní echi jaré namuti mapu
Riosi bachá niráa ne bichíwaga aneli echi Abrami**

²¹ ¿Acha bichíwali ju mapu Riosi nulalila sayéraga aní echi jaré namuti mapu Riosi bachá niráa ne wabé bichíwaga aneli echi Abrami? Ketasi chirigá ju, mapujiti a

tamujé 'yárami níisagá mapurigata sinibí piréami níibo mapujítita galá nijéwaga olali mapurigá Moisesi osogá nulali, echalí ne bichíwali chopi 'wéralli níima mapurigata galá nijéwaga olabo mapurigá Moisesi osogá nulali.²² Chopi Riosi Ra'íchala osirúami je'ná jerigá aniwáami ju: Mapu si'néami pagótami jena'í wichimóbachi piréami we chati sitíi oláami ju. Abóniko arigá we chati sitíi olá, echijiti si'néami aboni kastigo 'yárami níima. Chopi echí jaré mapu ikí galá bichíiko Jesucristo niráa, abóniko ku wikawárami níima mapujiti aboni 'yárami níima mapurigá Riosi bachá niráa bichíwaga aneli echí Abrami mapu Binói 'yama riwéali.

²³ Chopi chabénala mapalita ke cho bichíili Jesucristo niráa, echalita sinibí arigá we chati sitíi ologá piréali. Echalí tamujé ketasi omérali galá nijéwaga olayá mapurigá echí Moisesi osogá nulali. Echijítita we yáati galá bichíili mapalita nawésarami níili Jesucristo Ra'íchala.²⁴ A'lí mapuyénasí echí Walubela Jesucristo nawali jena'í wichimóbachi tamujé chopi nulérami níili mapurigá Riosi nulalila osirúami tamujé tamí nulé. Echalí tamujé tamí nulérami níili mapurigá jaré kúuchi nulérami ju bilé tiwé pioni jiti, mapujiti echí jaré kúuchi ketasi cho ochérami ju, nibilé cho galá machíami ju. A'lí bicheta echirigá tibútarami níili mapuyénasí echí Walubela Jesucristo nawali, mapurigá mapalita ma galá bichíisibo Binói niráa, echalita ma galá narétami níibo Riosi jiti mapurigá Binói kúchuwala niráa.²⁵ Chopi tamujeta ma galá bichíili echí Walubela Jesucristo niráa, mapu ma nawali jena'í wichimóbachi. Echijiti tamujeta ma ketasi waminabi tibútarami ju mapurigá echí jaré kúuchi niráa. Ayénachó tamujeta echijiti ma ketasi chopi nijéwaga olabo mapurigá echí Moisesi chabénala niráa osogá tamujé tamí nuleli.

²⁶ Mapujiti ne si'néami 'yemi mapu ikítamo bichíili Jesucristo niráa, mátamo Riosi kúchuwala ju, mapujítitamo ma napawíkami niráa ju echí Walubela Jesucristo yuwa.²⁷ A'lí ne si'néami 'yemi máputamo pagótami níili echí Wabé Galabé Riosi Iwigala jiti mapurigátamo echirigá napabúrami níibo Jesucristo yuwa, 'yémítamo ma nakulíwarami niráa ju mapurigátamo ne galabé níibo achigórígá mapurigá Jesucristo ne wabé galabé ju.²⁸ Echijiti ne si'néami 'yemi bichíyami chopi a yiri ju. ¿Chu chireko arigá Juríosi pagótami níisa, echí auché jaré isena kérémá? ¿Chu chireko arigá pióntami níisa, echí jaré nuláami kérémá? ¿Chu chireko arigá rijói níisa, echí jaré mugúi kérémá? Mapujiti si'néami 'yemi bichíyami ne napawíkami, mapurigá bilepi niráa ju, mapujítitamo ma napabúrami níili echí Walubela Jesucristo yuwa.²⁹ A'lí mapujítitamo ma Jesucristo níwala jú, echijítitamo ne bichíwali echí Abrami kúchala kúchuwala niráa jútamo. A'lí mapurigá Riosi ne bichíwaga anili mapu Binói 'yama riwéali echí Abrami, echirigá 'yémítamo ayénachó achigórígá narepo.

4 Mapurigá nijeni aní, je'ná jerigá aniwáami ju: Bilé bachá wilíami towí ranarúami sinibí suwaba narema binói onolá níwala namuti, mapalí binói onolá ma mukusá. Chopi a echí onorúami ma mukusá mapuyénasí echí towí abijí we táchia níisa, echalí échiko nulérami níima auché jaré jiti, achigórígá mapurigá echí jaré pióntami ayénachó nulérami ju. Chopi echí towí arigá we níwami ju ne suwaba echí jaré namuti mapu binói onolá níwala níili.² Echalí auché jaré echo'ná binói kalílachi nóchami we tibútama echí towí. Ayénachó aboni we nulema echí towí mapuyénasí ma sebama tétili mapurigá binói onolá bachá niráa aneli, mapalí echí towí ne bichíwali narema riwéali ne suwaba echí jaré wikabé namuti mapu binói onolá níwala níili.³ Echirigá achigórígá ikili tamujé tamí yuwa. Chabénala

mapalita ke cho bichíili Jesucristo niráa, echalita arigá mapurigá echi jaré kúuchi níili. Echalita chopi 'nátali, suwaba echi jaré namuti jiti, achigórigá mapurigá echi auché jaré jena'í wichimóbachi piréami sinibí 'nátaga piré.⁴ Chopi mapalí ma sébali téitali, echalí Riosi júuli kepu Raná jena'í wichimóbachi. Echalí echi bilepi Riosi Ranala ranarúami níili mapurigá bilé tása niráa, mapalí bilé mukí ranali. A'lí echi bilepi Riosi Ranala ranarúami níili mapurigá bilé Juríosi pagótami niráa, echijiti arigá 'wérali níili mapurigá Binói galá nijéwami níima Riosi nulalila.⁵ Echalí arigá 'wérali níili mapu si'néami tamujé echirigá nijéwaga olabo mapurigá echi walula Moisesi osogá nulali. Chopi echi bilepi Riosi Ranala tamujé tamí ku'wíramiya nawali, mapurigata ma ketasi waminabi echirigá nulérami níibo, chopi mapurigá Riosi tamujé tamí narema mapurigá Binói kúchuwala niráa.

⁶ A'lí Riosi júuli echi bilepi Binói Ranala Iwigala echo'ná pachana si'néami 'yemi bichíyami sulálachi, mapurigá echirigá 'nératami níima mapu 'yémítamo ne bichíwali Riosi kúchuwala niráa ju. A'lí echi Wabé Galabé Iwigá echo'ná pachana 'yemi sulálachi bitélaga, wabé kanílaga jeané echi Walubela Riosi: ¡Mujemi keni Onó ju!⁷ Echirigá ibili 'yemi bichíyami ma Riosi kúchuwala niráa ju. Mátamo ketasi mapurigá pióntami niráa ju. A'lí mapujítitamo Riosi kúchuwala niráa ju, echijiti Riosi ayénachó 'yemi mi 'yama ne suwaba Binói níwala namuti, mapujiti Jesucristo 'yemi mi ku'wírimiya mukuli.

Echi Pablo wabé galigá nakili mapurigá ibili bichíyami waminabi galá bichíima

⁸ Chabénala mapalí 'yémítamo ketasi cho machili echi Walubela Riosi, echalítamo sinibí ne wabé nílaga chokoba jaga o'wikeli echi jaré amachíkalawami namuti mapu ketasi mapurigá Riosi niráa ju.⁹ Jipi 'yémítamo ma galá machí Riosi, chopi waminabi galabé níimili jeanigá mapu echi Walubela Riosi ma 'yemi mi galá machí, mapurigá Binói kúchuwala niráa. Echijiti jipi ¿churékulátamo auchecho chopi nakí echi wikabé sití namuti nijéwaga olánala, mapurigátamo chabénala nulérami níili, mapalítamo abijí echirigá wabé nílaga ologá piréali, mapalítamo arigá ketasi echijiti ku'wíratami níili?¹⁰ 'Yémítamo abijí wabé nakí wisabé omowánala mapujítitamo mayé mapurigá Riosi echijiti wabé kanílama. Echijítitamo abijí sinibí wabé omawa echalí jaré michá sébachi, wisabé omowálawachi sébachi ayénachó, jaré bamíbali sébachi asíchiko.¹¹ Weni majaga newalá 'yemi jiti, mapujítini mayé mapu siné káachi nijeni wepi nójiali, echalí mapalini 'yemi mi nawésali Riosi Ra'íchala, mapujiti siné káachi 'yémítamo ketasi galá bichíiliré.

¹² Keni ritémawa 'yemi nimí tani mapurigátamo sinibí olabo mapurigá nijeni olá. Nijeni ma ketasi nijéwaga olá mapurigá Moisesi osogá nulali, mapurigá echi auché jaré Juríosi pagótami sinibí nijéwaga olá. A'lí chabé chokichí 'yémítamo nibilé cho echirigá nijéwaga olali mapujítitamo ketasi Juríosi pagótami níili. A'lí echalí chabénala mapalí nijeni 'yemi mi bachá niráa nawésali, echalítamo ketasi tamí kichili, chopi jípitamo we tamí kichínali.¹³ A'lí 'yémítamo we galá machí mapurigá chabé chokichí nijeni nawésimiya tibili Riosi Ra'íchala echo'ná 'yémichi mapujítini nayúami níili.¹⁴ Echalini wabé risúu níili mapujítini echirigá nayúami níili. Chopi 'yémítamo ketasi tamí kichili mapujítini echirigá nayúami níili. Si'winárigá 'yémítamo sinibí tamí galá nareli mapurigá nijeni bilé Riosi kapitánawala niráa níisa. ¡Ayena 'yémítamo ne galabé niráa tamí nareli mapurigá nijeni níisa Jesucristo Binói, kéremá!¹⁵ Echalí chabé chokichí 'yémítamo ne wabé kaníli mapalini bachá niráa

'yemi mi nawésali Riosi Ra'íchala. Chopi jipi ¿churékulátamo ma ketasi echirigá kanila tamí jiti? Nijeni ne bichíwali rugá aní mapu chabé chokichí 'yémítamo ne wabé tamí galeli. Ayénachótamo we nakili tamí ku'wíranala. ¡Echalítamo a ne abónitamo machí a'wápo 'yemi aboni busila kéremá, tamí 'yábiya, átamo echirigá omérásagá tamí ku'wíriya! ¹⁶ Jipi ¿áchatamo mayé mapu nijeni 'yemi mi sayéraga olali mapujiti nijeni 'yemi mi ruyeli echi ne bichíwali?

¹⁷Echi jaré Juríosi pagótami echo'ná Jerusalémachi jonsa simírami wikabé namuti olá mapurigá 'yémítamo we galebo echi jaré aboni, chopi aboni echirigá arígá wabé 'yékaka olá mapujiti aboni chopi we nakí máputamo si'winárigá bichíibo. A'lí aboni chopi nakí 'yemi mi bichíiranala achigórigá mapurigá aboni bichíi, mapurigátamo ma ketasi waminabi bichíibo mapurigá tamujé Riosi jiti nawésami 'yemi mi binérali. ¹⁸Ne bichíwali we galabé ju máputa galebo auché jaré pagótami, chopi mapurigata ku'wírabo aboni. Nijeni ayénachó we nakí mapu 'yémítamo sinibí tamí galebo, ketasi chopi mapalini echo'ná 'yemi yuwa atí. ¹⁹¡'Yemi mapurigá nijé kúchuwala niráa jútamo! Ayénachó nijeni we okolá sulachí niráa mapalini 'nata máputamo ketasi galá bichíi. Nijeni wabé simírami echirigá okolá mapalini echirigá 'nata, achigórigá mapurigá bilé mukí wabé okolá mapalí ranamea bilé tää múchali. Ayénachó nijeni waminabi echirigá okoma sulachí niráa mapuyénasí echi Walubela Jesucristo ne bichíwali bitélama echo'ná pachana 'yemi sulálachi, mapurigá 'yémítamo ne galabé oláami níibo mapurigá Jesucristo ne wabé galabé ju. ²⁰Nijé ne bichíwali nakili mápuni echo'ná 'yemi mi yuwa asimea jipi rawé, mapurigá nijeni 'yemi mi wabé galigá ra'íchama, mapujítini sinibí wabé níliga 'nata 'yemi jiti.

Pablo binera echi Agara riwéami mukí jiti rugá, echi Sara riwéami ayénachó

²¹¡'Yemi máputamo chopi waminabi nijéwaga olánali mapurigá Moisesi osogá nulali, tamí ku nijéwaga anesi je'ná jeyiri: ¿Kéchatamo siné námali mapurigá aniwáami ju mapurigá echi Moisesi osogá nulali? ²²Mapujiti jerigá aniwáami ju: Mapu echi Abrami okuá kúrowi kúchuwami níli. A'lí echi bilé, echi pióntami mukí ranala níli. A'lí echi auché bilé binói Abrami a upila ranala níli. A'lí Abrami upila ketasi nulérami níli mapurigá pióntami niráa. ²³A'lí echi towí mapu echi pióntami mukí ranala níli chopi ranarúami níli mapurigá si'néami echi auché jaré kúuchi ranarúami ju. Chopi echi auché bilé towí mapu ne Abrami upila ranala níli, échiko chopi ranarúami níli mapujiti Riosi ne bachá niráa bichíwaga anili mapu binói echirigá ranarúami níima riwéali. A'lí binói Abrami upila ketasi pióntami niráa níli. ²⁴A'lí ne suwaba je'ná jerigá irétaga niráa anirúami níli, mapujiti osá chocéami níli mapalí Riosi ne bichíwaga anili mapurigá Binói olama riwéali, a'lí echi okuá mukí jerigá ju mapurigá echi okoná ra'íchali mapurigá Riosi bichíwaga ra'íchali. A'lí Riosi bachá niráa echirigá bichíwaga ra'íchali echo'ná ripabé rabó Sinaíchi anilfwachi mapalí Riosi Binói aneli echi Moisesi mapurigá osogá nulema echi jaré Juríosi pagótami. A'lí je'ná bilé bichíwaga ra'íchali mapurigá echi Agara riwéami mukí niráa ju. A'lí ne si'néami echi jaré pagótami mapu chopi nijéwaga olá mapurigá echi Moisesi echirigá osogá nuleli, abóniko we pióntami niráa ju mapurigá echi Agara we pióntami níli, mapujiti arígá 'wérali ju mapu aboni ne suwaba galá nijéwaga olama mapurigá echi Moisesi osogá nulali. ²⁵A'lí echi Agara riwéami mukí nulérami níli mapurigá pióntami niráa. Chopi echi jaré Juríosi

pagótami ayénachó nulérami níili echo'ná ripá rabó, Sinaíchi anilíwachi, mapujiti biléana ripá rabó ju echo'ná Arábiachi anilíwachi kawírali nirúami, mapo'ná echi jaré Juríosi pagótami nulérami níili mapurigá echi Moisesi osogá nuleli. Ayénachó echo'ná walúlachi Jerusalémachi piréami Juríosi pagótami nulérami ju mapurigá echi Moisesi osogá nuleli. Echijiti aboni arigá nulérami ju mapurigá pióntami niráa, mapujiti arigá 'wérali ju mapurigá aboni galá nijéwaga olama achigórigá mapurigá echi Moisesi osogá nuleli.²⁶ Chopi si'néami tamujé bichíyami ma ketasi nulérami ju mapurigá pióntami niráa, mapujiti tamujé chopi piréami ju echo'ná bukulíwami walúlachi Jerusalémachi anilíwachi mapu echo'ná ripá riwigachi jonsa nawáami ju.²⁷ A'lí je'ná jerigá osirúami ju echo'ná Riosi Ra'íchala oselíwalachi: ¡Wabé kanili mujé mukí ke ranáami, mápumi ke kúchuwa! ¡Ne wabé ganíliga siná mujé mukí mápumi ke siné ranali bilé tása! Mapujiti ne wikabé simírami kúchuwami níima echi mukí mapu ku pátami níili, ketasi mapurigá echi mukí kunéami.

²⁸ 'Yemi keni ritémawa, nijeni je'ná jerigá 'yemi mi ané: Tamujé bichíyami ne bichíwali achigórigá juta mapurigá echi Isaka níili, mapujiti tamujé ayénachó Riosi tanala ju mapujiti Riosi bachá niráa ne bichíwaga anili máputa Binói kúchuwala níibo mapujítita galá bichíibo riwéali. A'lí Riosi ayénachó bachá niráa ne bichíwaga anili mapu echi Isaka ranarúami níima riwéali mapurigá echi Abrami ranala niráa. ²⁹ A'lí echalí rawé echi biléala towí mapu chopi ranarúami níili mapurigá si'néami echi auché jaré ranarúami juko, échiko we kichiga a'najáitali echi auché bilé mapu Riosi Iwigala jiti ranarúami níili. A'lí echirigá achigórigá olárami ju jipi rawé yénasí, mapujiti echi jaré ke bichíyami abijí we kichiga a'najata echi auché jaré galá bichíyami. ³⁰ Chopi ¿churigá anirúami ju echo'ná Riosi Ra'íchala oselíwalachi? Je'ná jerigá aní: Miná machí pa echi pióntami mukí, echi binói ranala ayénachó. Mapujiti echi pióntami mukí ranala ketasi níwami níima echi jaré mujé níwala namuti. Chopi níwami níima echi auché bilé mujé ranala, echi mapu mujé binói upila ranala ju, echi mukí mapu ketasi pióntami niráa ju. ³¹ 'Yemi keni ritémawa echirigá ju mapu tamujé bichíyami ketásita mapurigá echi pióntami mukí kúchuwala niráa ju. Chopi tamujé mapurigá echi auché bilé mukí kúchuwala niráa ju, echi mapu ketasi pióntami niráa níili.

Ketasi waminabi nijéwaga olasi mapurigá pióntami niráa suwaba mapu echi Moisesi osogá nulali

5 Echi Walubela Jesucristo ma tamujé tamí ku machí a'wali mapurigata ma ketasi waminabi nijéwaga olabo mapurigá pióntami niráa, suwaba mapu echi Moisesi osogá nulali. Echijiti ketasi waminabi echirigá nijéwaga olasi 'yemi bichíyami, nibilé auchecho siné chotasi echirigá nijéwaga olayá mapurigá echi Moisesi osogá nulali, mapujítitamo ma ketasi echirigá nulérami ju, mapurigá pióntami niráa, mapurigátamo waminabi echirigá nijéwaga olabo.

² ¡Galá tamí kipusi! Nijé, Pablo, 'yemi mi ané mapu átamo chopi nakisáagá máputamo noligá sikirétami níibo mapurigátamo echijiti ku'wíratami níibo, echalítamo tarapé chirigá ku wikawárami níibo, mapujiti átamo echirigá olásagá 'yémitamo ketasi galá bichíi echi Walubela Jesucristo niráa. ³ Ayénachó wikabé rijói noligá sikirétami nílanaliko mapujiti aboni mayé mapu aboni echijiti ku wikawárami níima. Chopi nijeni nakí auchecho siné jerigá ruyénala ibili aboni: Arigá 'wérali ju máputamo ayénachó ne suwaba galá nijéwaga olabo mapurigá

echi Moisesi osogá nulali. Chópitamo ketasi chirigá omero echirigá nijéwaga olayá.⁴ Mátamo ariweli echi Walubela Jesucristo si'néami 'yemi máputamo mayé máputamo ku wikawárami níibo chopi mapujítitamo galá nijéwaga olá mapurigá echi Moisesi osogá nulali. Mátamo chakena niráa rujuíli, mapujiti 'yémitamo ketasi bichíi mapu Riosi 'yemi mi ku'wírama chopi mapujiti Binói 'yemi mi wabé galé.⁵ Chopi tamujeta galá bichíyami ju, ayénachóta ma níwa echi Wabé Galabé Riosi Iwigala, echijítita galá bichíiga buwé mapurigá Riosi tamujé tamí narema mapurigá Binói kúchuwala niráa.⁶ A'lí mapujítita ma napawíkami niráa ju Jesucristo yuwa, echijítita ketasi waminabi ku'wíratami ju mapalita noligá sikirétami níisa. Nirapeta waminabi ku'wíratami ju, mapalita siné káachi ketasi noligá sikirétami níisa. Chópita ku'wíratami ju mapujítita ne galá bichíi Jesucristo niráa. Ayénachó mapujítita echirigá bichíiga wabé galigá pirélabo echi auché jaré pagótami.

⁷Chabénala niráa 'yémitamo chótali wabé galabé ologá piréliya. Chopi jipi ¿chigá 'yemi mi ariwérali mapurigátamo ma ketasi waminabi nijéwabo echi ne bichíwali?⁸ Je'ná si'nú bichíluwami ketasi Riosi níwala ju. Chopi echi Walubela Riosi ju mapu 'yemi mi ne wabé galigá bayé.⁹ We chati sitíi oluławáwami ju máputamo ma ketasi nijewa echi ne Bichíwali. A'lí echi chati sitíi oluławáwami mapurigá echi levadura anilíwami ju. Galá newalasi mapurigá pe taa achésuwa echi levadura, a'lí ne suwaba echi batusí waminá walú níflama.¹⁰ Nijeni mayé mapu echi Walubela Jesucristo ketasi ariwema mapu 'yémitamo si'winárigá 'natabo. Chopi Riosi Binói kastigo 'yama echi rijói mapu 'yemi mi chakena a'wasá, ke chiré mapuyíripi níisa.

¹¹Keni ritémawa a nijeni siné káachi abijí nawésasagá jeanigá mapu echi pagótami ku'wíratami níima mapalí aboni noligá sikirétami níisa ¿churékulani abijí we kichiga a'najátuwa? Mapujiti ani echirigá nawésasagá, echalí aboni ma ketasi tamí kichimi, mapujiti aboni chopi tamí wabé kichí mapujiti nijeni we nawesa jeanigá mapu echi Walubela Jesucristo chopi mi'lirúami níili echo'ná kúrsichi mapurigá Binói echijiti omérama ku wikáwiya mapurigá si'néami echi jaré pagótami wabé chati sitíi olali.¹² ¡Chopi ne galá níimi a aboni niráa sikiresa ne si'néami echi auché jaré mapu ikí 'yemi mi 'wéralli ané máputamo arigá noligá sikirétami níibo!

¹³Keni ritémawa, Riosi ma 'yemi mi bayeli mapurigátamo ma ketasi waminabi nulérami níibo echi wikabé namuti olayá mapurigá echi Moisesi osogá nulali. Chopi jipi mapalítamo ma ketasi waminabi echirigá nulérami ju, ketasi chuwé olasi mapurigá 'yemi aboni chopi nakí olánala. Chopi si'winárigá sinibí ne galá nagúurasi a'nagupi, mapujítitamo ne wabé galé a'nagupi.¹⁴ Mapujiti 'yémitamo ne sébali galá nijéwabo suwaba echi auché jaré Riosi nulalila mapalítamo galá nijéwabo je'ná bilepi nulalíwami: Galá galé mujé echi auché jaré pagótami, achigórigá mapurigami we galé a mujé binói niráa.¹⁵ Chopi a 'yémitamo a'nagupi nakówaga, ayénachó átamo a'nagupi suwábanalasagá mapurigá echi jaré jobátami namuti olá, echalí ne galá 'nénasi mapurigátamo ketasi a'nagupi ko'wiboa.

Galá níima máputa chopi olabo mapurigá echi Wabé Galabé Riosi Iwigala tamujé tamí nulé

¹⁶Nijeni 'yemi mi je'ná jerigá ané: Sinibí ne galá nijéwaga olasi mapurigá echi Wabé Galabé Riosi Iwigala 'yemi mi nulé, echalítamo ma ketasi chopi waminabi olabo mapurigá 'yemi aboni chopi nakí olánala.¹⁷ Mapujiti mapalítamo chuwé olá

mapurigá 'yemi aboni chopi nakí olánala, echalítamo echirigá ologá ne wabé sayera echí Wabé Galabé Riosi Iwigala. A'lí echí Wabé Galabé Riosi Iwigala ayénachó wabé sayera echiyiri oluwáwami. A'lí je'ná okuánika echirigá a'nagupi nasayera. A'lí 'yémítamo echijiti ketasi omero galabé olayá mapalítamo nakí echirigá galabé olánala.¹⁸ Chopi átamo suwaba galá nijéwaga olásagá mapurigá echí Wabé Galabé Riosi Iwigala 'yemi mi nulé, echalí ma ketasi 'wérali ju máputamo nijéwaga olabo mapurigá echí Moisesi osogá nulali.

¹⁹ A'lí ne galá machirúami ju mapurigá echí pagótami chati sitíi olá mapurigá aboni chopi nakí olánala, mapujiti jaré mapu ma niwfíami ju arígá chuwé bilétari yuwa kochí, a'lí auché jaré mapu ketasi cho niwfíami ju arígá wabé chati sitíi ologá, chuwé bilétari yuwa kochí. Ayénachó aboni wabé chati sití ologá wikabé namuti we chuwé olá.²⁰ A'lí aboni ketasi galá o'wiké echí bilepi Walubela Riosi, chopi aboni chokoba jaga o'wiké echí jaré amachíkalawami namuti mapu jaré pagótami jiti niwárami níili. Ayénachó jaré aboni wabé sukurúami ju. A'lí jaré aboni wabé sayérami ju, ne wabé nakóami ayénachó. A'lí auché jaré ne wabé korúkami ju. A'lí aboni péebi jiti we yáati wabé na'awa. A'lí aboni sinibí chopi olá mapurigá aboni nakí olánala. A'lí aboni a'nagupi nakichiga chopi wikanáami niráa rojuá.²¹ A'lí echí pagótami a'nawí wabé kolükami ju. Ayénachó jaré aboni we nakówaga ko'yáami ju. A'lí aboni we bajiga tékami ju. Ayénachó aboni we koruka ko'wéami ju. A'lí echí pagótami sinibí waminabi echirigá chuwé olá. A'lí aboni wikabé auché jaré je'ná jeyiri chati sití namuti ayénachó olá. Echijiti nijeni 'yemi mi je'ná jerigá ané mapurigá nijeni 'yemi mi chabénala ruyeli: Mapu echí jaré echirigá oláami pagótami ketasi chirigá mo'wimea Riosi yuwa echo'ná ripá riwigachi mapo'ná Riosi sinibí niráa galá nulema Binói pagótamawala.

²² Chopi mapalí echí jaré galá bichíyami pagótami galá nulérami ju echí Wabé Galabé Riosi Iwigala jiti, echalí aboni ne wabé galé a'nagupi, ayénachó aboni sinibí galá ganila, ayénachó aboni ne galá kilí ologá piré. A'lí mapalí aboni echirigá nulérami ju echí Wabé Galabé Riosi Iwigala jiti, echalí aboni sinibí kilí buwé mapurigá Riosi chopi ku'wírama aboni. Ayénachó aboni we natimáami níima. Ayena cho aboni we galabé oláami níima. Ayénachó aboni sinibí galá bichíyami níima Riosi.²³ A'lí aboni tarapé nóchami níima, tarapé machiná niráami niráa. Nibilé cho chuwé oláami níima aboni. A'lí sinibí risensia ju mapu echí jaré pagótami echirigá oláami níima, mapujiti echí nulalíwami ketasi sayera echiyiri oluwáwami.²⁴ A'lí echí jaré Jesucristo níwala pagótami ma bichíwaga anili mapu aboni ma ketasi olama mapurigá aboni chopi nakí olánala. Echirigá suwaba mapurigá aboni chopi nakili olánala ma mi'lirúami niráa níili, mapurigá echo'ná biléana kúrsichi, clavo jiti michóntamí niráa, achigórígá mapurigá Jesucristo Binói mi'lirúami níili. Echirigá aboni ma ketasi chopi olá mapurigá aboni nakí. A'lí aboni nirapé waminabi echirigá olánlí.²⁵ A'lí mapujiti echí Wabé Galabé Riosi Iwigala ma tamujé tamí 'yalí mapurigata bukulíwami niráa pirélabo, ayénachó galá níima máputa risensia 'yabo mapurigá echí Galabé Riosi Iwigala tamujé tamí binéraama mapu churigata ologá pirélabo.

²⁶ Ketasi galá níima mapu tamujeta wabé nóchaga, machiná niráami níibo, mapujiti echí auché jaré ketasi kanílama mapalita echirigá olá. Nibilé galá ju máputa we koruka níliami níibo, nirapé mapurigata korúkabo echí auché jaré níwala namuti.

A'nagupi ku'wírasi

6 ¹'Yemi keni ritémawa máputamo galabé olá mapurigá echí Wabé Galabé Riosi Iwigala 'yemi mi binera, a bilé bichíyami, siné káachi, chati sití olásagá, echalí galá níima máputamo ku'wírabo echí chati sití oláami rijimala mapurigá binói wikáwali tánama Riosi, mapurigá binói echirigá ku wikawárami níima, ayénachó mapurigá binói auchecho galá ologá inama. Chopi galá níima máputamo kilí niráa, ne galá 'nátaga echirigá olabo, mapurigá 'yemi ketasi ayénachó echirigá chati sití olántarami níibo. ²Sinibí ku'wírasi echí auché jaré mapu ikí risúu olárami ju. Echirigá ologá 'yémitamo sinibí galá njéwaga olabo mapurigá Jesucristo nulali.

³Mapujiti echí rijói mapu a binói mayeko wabé walula niráa, mapalí binói arígá ketasi biyiri ju, échiko chopi a binói niráa ne wabé 'yeka. ⁴We galá níima ibili niráa echirigá we galá machigá 'natasa mapurigá ibili olá. A'lí mapalí bilé rijói echirigá mayé mapu binói galabé olá, echalí binói niráa echijiti we kanílama. A'lí echí rijói ketasi chopi echirigá kanílama mapalí binói mayé mapu binói waminabi galabé olá, ketasi mapurigá echí auché jaré. ⁵Mapujiti ibili niráa ku 'yárami níima achigórigá mapurigá aboni olali.

⁶Galá níima mapu si'néami echí jaré mapu ikí binératami juko echí Galabé Riosi Ra'íchala sinibí 'yasa echí jaré namuti mapu ikí newalé echí binériami mapu galá binera aboni echí Galabé Riosi Ra'íchala.

⁷Ketasi 'yékarami niráa nílasi 'yemi. Ke wesi pagótami wi'libé niráa chuwé kachigá kalema Riosi, mapujiti Riosi ke 'me ayó kastigo 'yama echí jaré pagótami. A'lí mapurigá ibili rijói olá, echirigá binói rijói achigórigá olárami níima. Ayénachó mapu ikí talí bilé rijói ichá, echirigá achigórigá echí binói rijói auchecho ku 'wima. ⁸A bilé rijói wabé chuwé chati sití olásagá mapurigá binói chopi nakí olána, échiko chopi ichá echí wabé chati sití jena'í wíchimóbachi. Ayénachó échiko 'wima echí wabé chati sití, mapujiti echalí ne jubá rawé binói chopi 'yárami níima mapu sinibí niráa mukúami níima. Chopi a bilé rijói galabé olásagá mapurigá echí Wabé Galabé Riosi Iwigala nakí mapurigá binói olama, échiko chopi ichá echí wabé galabé jena'í wíchimóbachi. Ayénachó échiko 'wima echí wabé galabé, mapujiti echalí ne jubá rawé binói 'yárami níima echí sinibí niráa bitélawami. ⁹Echirigá ketasi galá níima máputa ariwebo echí ne wabé galabé olayá, mapujiti pe waminana, ma sébachi tétili, tamujeta galá ku natétarami níibo, ata sinibí niráa galá bichísagá. A'lí bicheta echirigá 'wibo echí ne wabé galabéala. ¹⁰Echirigá galá níima mapu tamujeta galabé olabo echí auché jaré pagótami ne sinibí mapalita echirigá omero. A'lí ne bachá niráa galá níima máputa galabé olabo echí jaré ritémtami galá bichíyami Jesucristo niráa.

Echi Pablo galá ruyé echí jaré bichíyami ayénachó ku ripora aboni

¹¹Galá 'nesi mapurigá njé, Pablo, je'ná pe okuá 'yemi mi oseli ne o'weli niráa osirúami. Nijé binói sikala jiti nijeni 'yemi mi jerigá oseli. ¹²Si'néami echí jaré mapu wabé nakiko mapurigá 'yémitamo noligá sikirétami níibo, abóniko chopi echirigá nakí mapurigá aboni echijiti we galérami níima echí auché jaré ke bichíyami pagótami jiti. Ayénachó aboni echirigá nakí mapurigá aboni ketasi wabé risúu ologá a'najátarami níima mapurigá bichíyami niráa, mapurigá Jesucristo, aboni jiti, miná mi'lirúami níili echo'ná kúrsichi. ¹³A'lí echí jaré mapu ikí mayeko mapu

arigá 'wérali ju máputamo noligá sikirétami níibo, abóniko arigá ketasi ne sébali galá nijéwaga olá mapurigá echí Moisesi osogá nulali. Chopi aboni wabé nakí mapu 'yémítamo echirigá noligá sikirétami níibo, mapurigá aboni echijiti wabé nóchami níima, chopi mapujiti aboni 'yemi mi arigá 'wérali aneli mapurigátamo echirigá noligá sikirétami níibo.¹⁴ A'lí nijeni ketasi chirigá nakí mapurigá nijé binói echirigá nóchami níima. Chópini ayena a nócha mapujiti tamujé Walubéluala Jesucristo ma tamí jiti mukuli echo'ná kúrsichi. Jipi je'ná wichimoba tamí yuwa ma tarapé natiguí, mapujiti je'ná wichimoba tamí yuwa mapurigá mi'lirúami niráa níili mapalí Jesucristo mi'lirúami níili echo'ná kúrsichi. A'lí nijeni ayénachó echo'ná kúrsichi niráa michóniga mi'lirúami ju mapurigani ma ketasi waminabi galema je'ná wichimoba.¹⁵ A'lí Jesucristo yuwa tarapé natiguí mapurigata siné káachi ketasi noligá sikirétami níisa, nirapé natiguí mapurigata siné káachi ketasi noligá sikirétami níisa. Chopi wabé natikí mapu ma bukulíwami ku niwárami níisate, pachana tamujé sulálachi niráa.¹⁶ A'lí nijeni nakí mapu Riosi 'yemi mi 'yama mapurigátamo kilí ologá pirélabo, ayénachó mapurigá Riosi 'yemi mi ne wabé natimama, ne si'néami mapu ikítamo je'ná jerigá ologá bichíyami ju, ne si'néami mapu ikítamo echi ne bichíwali Riosi níwala pagótami ju.

¹⁷ ¡Jipi waminana jonsa, nijé Pablo ketasi nakí mapurigá echi jaré pagótami tamí waminabi kumema! Nijeni wikanáami niráa bawéami juni, mapo'nani wisabé wabé wipisótami níili mapujítini bichíyami níili Jesucristo niráa, echirigá nijeni ma bawirárami niráa ju mapurigá Jesucristo níwala niráa.

¹⁸ 'Yemi keni ritémawa, nijeni we nakí mapurigá echi Walubela Jesucristo si'néami 'yemi mi galá ku'wírama. ¡Echirigá níima!

OSIRÚAMI

Mapurigá San Pablo oseli echo'ná

EJÉSOCHI PIRÉAMI

Pablo osé echo'ná Ejésochi piréami

1 Nijé Pablo, Riosi jiti julárami níili nawisánala mapurigá Binói chopi nakili. Nijeni 'yemi mi je'ná jerigá osé, si'néami 'yemi echo'ná Ejésochi piréami mapu ikítamo galá bichíyami ju Jesucristo niráa, si'néami mapu ikítamo echijiti ma galabéala ku niwálami ju.

²Wabeni nakí mapurigá echí Walubela Riosi, tamujé Onolá, sinibí 'yemi mi ku'wírama, ayénachó mapurigá echí Walubela Jesucristo 'yemi mi ku'wírama, ayénachóni nakí máputamo 'yárami níibo mapurigátamo sinibí kilfí ologá pirélabo.

Riosi tamujé tamí ganílatali mapujítita bichíi Jesucristo niráa

³Galá níima mapu si'néamita waminabi walubélaga anebo Riosi, echí mapu echí Walubela Jesucristo Onolá ju, mapujiti Riosi ma tamujé tamí ku'wírali mapujítita galá bichílì Jesucristo niráa; ayénachó Binói tamujé tamí 'yali mapurigata sinibí niráa kanílabo echo'ná ripá riwigachi, mapujítita napawíkami ju Jesucristo yuwa.

⁴Ki'yá chokichí mapalí Riosi ke cho niwáli je'ná kawí, echalí Binói tamujé tamí chapili mapurigata galabératami níibo, mapujítita galá bichílì riwéali Jesucristo niráa, mapurigata bacháami Riosi yuwa jábabó, Binói níwala niráa, tarapé chati sitíi oláami. ⁵Echalí jonsa Riosi echirigá bachá niráa galá machigá suwaba mapu iki ikimea riwéali, echijiti tamujé tamí chapili mapurigata Binói kúchuwala níibo mapujítita echirigá bichílì riwéali Jesucristo niráa, wabé wakinana. A'lí Riosi echirigá olali achigórigá mapurigá Binói nakili olánala ki'yá chokichí jonsa.

⁶Tamujeta sinibí waminabi walubélaga ané Riosi, mapujiti Binói ne wabé Walubela ju, ayénachó mapujiti Binói ne wabé simírami galabé ju. Echijiti Riosi tamujé tamí ne wabé ku'wírali mapalita napabúrami níili echí bilepi Riosi Ranala yuwa, echí mapu Riosi Binói ne wabé galé. ⁷Riosi ayénachó tamujé tamí ne wabé simírami galé, echijiti echí bilepi Riosi Ranala ma tamujé tamí ku wikáwali, mapujiti Binói wabé léntaga mi'lirúami níili tamujé chati sitíi olalila chopi jiti. Echijiti Jesucristo omérali tamujé tamí ku wikáwiya suwaba mapu ikita chati sitíi olali.

⁸A'lí Riosi ne sébali tamujé tamí machírali mapu chuyena Binói tamujé tamí ne wabé galé, ayénachó Riosi tamujé tamí 'yali mapurigata ne sébali galá machíami níibo, mapurigata galá machiboa ne suwaba namuti. ⁹Ayénachó Riosi ma tamujé tamí machírali suwaba mapu ikí Binói nakili olánala, chopi chabé ki'yá jena'í

wichimóbachi piréami pagótami ketasi cho machili suwaba je'ná jeyiri.¹⁰ A'lí mapurigá Riosi nakili olánala, suwaba ne bichíwali echirigá olárami níima echalí mapalí ma sébali téitali, mapujiti Riosi wilama Jesucristo ne Walubela Nuláami niráa, mapurigá Jesucristo ne Walubela níima jena'í wichimóbachi, echo'ná ripá riwigachi ayénachó.

¹¹ A'lí mapujiti tamujé napabúrami níibo riwéráli Jesucristo yuwa, echijiti Riosi tamujé tamí chapili chabé ki'yánala mapurigá tamujeta 'yárami níibo mapurigá Binói tamujé tamí 'yama waminánomí. A'lí ne suwaba je'ná jerigá olárami níima achigórígá mapurigá Riosi bachá niráa 'nátaga nakili olánala, mapujiti Riosi sinibí suwaba olá achigórígá mapurigá Binói galá mayé.¹² A'lí Riosi echirigá olali mapurigá tamujé máputa ne bachá niráa bichíili Jesucristo niráa, sinibí ne wabé galabé ologá pirélabo, mapurigá Riosi echijiti waminabi walubélaga anérami níima, mapujiti Riosi ne wabé Walubela ju.¹³ Ayénachó 'yémítamo echirigá napabúrami níili Jesucristo yuwa mapalítamo galá námiga bichíili echí ne Bichíwali Riosi Ra'íchala, jeanigá máputamo ku wikawárami níibo átamo bichíisagá Jesucristo niráa. Echalítamo ayénachó bawirárami niráa níili Riosi jiti, mapujiti Riosi 'yemi mi 'yali echí Galabé Riosi Iwigala mapurigá Binói bachá niráa bichíwaga anili mapu 'yama.¹⁴ A'lí Riosi echirigá tamujé tamí 'ya echí Wabé Galabé Riosi Iwigala mapurigata ne galá machiboa máputa ne bichíwali narepo ne suwaba echí galabéala mapu Riosi tamujé tamí 'yama waminánomí, mapalí Binói ma sebárama ku wikáwiya si'néami mapu ikí Binói níwala pagótami níima. A'lí Riosi echirigá olama mapurigá Binói echijiti sinibí waminabi walubélaga anérami níima, mapujiti Riosi Binói ne wabé Walubela ju.

**Pablo tani mapu Riosi 'yama mapurigá echí jaré
bichíiyami ne wabé galá machíami níima**

¹⁵ Echijiti mapalí jonsa nijeni námali mapurigá 'yémítamo echirigá ne galá bichíili Jesucristo niráa, ayénachó mapurigátamo ne wabé galé si'néami echí auché jaré mapu ikí Riosi níwala ju,¹⁶ echalí jonsa nijeni ke siné ariwé walú natétara ayá Riosi, sinibí mapalini Riosi yuwa tániga ra'icha si'néami 'yemi jiti.¹⁷ Nijeni sinibí tani mapurigá Riosi 'yemi mi 'yama mapurigátamo ne galá machíami níibo, mapurigá Riosi Iwigala 'yemi mi machíratama, mapurigátamo ne wabé galá machiboa Riosi Ra'íchala, mapurigátamo waminabi galá machiboa Binói Riosi, echí mapu Jesucristo Riósawala ju, echí mapu ayénachó echí Walubela Onorúami ju.¹⁸ Nijeni ayénachó tani mapurigá Riosi 'yemi mi ne galá machírama, mapurigátamo ne galá machiboa mapu Riosi tamujé tamí bayeli mapurigata galá bichíyami níibo, ayénachó mapurigata buwebo mapurigá Riosi tamujé tamí wabé o'wéalatama waminánomí, ayénachó mapu Riosi tamujé tamí 'yama echí ne wabé simírami galabéala, ne wabé walubela, mapujítita Binói níwala ju.¹⁹ Ayénachóni tani máputamo galá machiboa mapu chu yena Riosi ne wabé simírami oméríami ju, ayénachó máputamo machiboa mapu Riosi Binói ne wabé oméríga olá pachana tamujé sulálachi, si'néami mapu ikita ma galá bichíili Jesucristo niráa. A'lí Riosi echirigá achigórígá ne wabé simírami oméríga olali,²⁰ mapalí Binói ku owíntali Jesucristo mapalí ma mukúami níili, ayénachó mapalí Binói achábali Jesucristo echo'ná watonachi Binói Riosi yuwa, echo'ná ripá riwigachi.²¹ Echalí Riosi ne wabé simírami walubéráli Jesucristo, ketasi

mapurigá echi auché jaré silíami jena'í wichimóbachi piréami. Riosi ne wabé walubérali Jesucristo, ketasi mapurigá echi auché jaré wabé o'wéala, nibilé cho mapurigá echi jaré wabé omérami, nibilé cho mapurigá echi jaré o'wéala nuláami. Echirigá Riosi ne wabé simírami walubérali Jesucristo ketasi mapurigá mapuyíripi echi auché jaré o'wéala mapu ikita o'wéala niráa mayé jipi rawé, nibilé cho mapurigá mapuyíripi echi jaré o'wéala mapu nirúlama waminánomí.²² Echalí Riosi echirigá ne wabé simírami walubérali Jesucristo mapurigá Binói ne Walubela níima suwaba namuti yuwa, ayénachó Riosi wilali Jesucristo mapurigá ne bachá Walubela níima si'néami echi jaré napawika bichíyami yuwa.²³ A'lí ne si'néami echi jaré napawika bichíyami, ne napawika Jesucristo sapala niráa ju, mapujiti Jesucristo bité pachana si'néami aboni sulálachi, ayénachó Jesucristo echirigá ne buchuwiina kanápuromí atí.

Riosi ne wabé karigá ku wikáwali echi jaré bichíyami

2 Riosi ma 'yemi mi 'yali mapurigátamo sinibí niráa pirélabo Jesucristo yuwa, mapalítamo abijí suwíami niráa níili mapujítitamo ne wabé chati sitíi olali.² Chabénala 'yémítamo echirigá chati sitíi ologá piréali mapujítitamo chopi chati sitíi olali achigórigá mapurigá echi auché jaré ke bichíyami pagótami jena'í wichimóbachi piréami chati olá, ayénachó mapurigá echi riablo nulá olánala, echi mapu walula niráa nulá echo'ná ikárali. A'lí echi riablo ju mapu ketasi nijiyárate echi jaré pagótami, si'néami mapu ikí ketasi nijéwiyami ju Riosi.³ Chabénala si'néami tamujé achigórigá chati sitíi ologá piréali mapurigá aboni abijí olá. Echalita chopi olali mapurigá tamujé aboni nakili chati sitíi olánala, mapujítita we chati sitíi suléami níili, ayénachóta wabé chati sitíi 'nátami níili. Echijiti echalí galá níimili mapu Riosi tamujé tamí walubé kastigo 'yami, achigórigá mapurigá Binói ne walubé kastigo 'yama echi auché jaré chati sitíi oláami pagótami.⁴ Chopi Riosi ne wabé simírami natimáami ju, ayénachó Binói ne wabé simírami tamujé tamí galeli,⁵ echijiti Binói tamujé tamí 'yali mapurigata sinibí niráa pirélabo Jesucristo yuwa. A'lí Riosi echirigá tamujé tamí 'yali mapalí tamujeta suwíami niráa níili mapujítita abijí wabé chati sitíi ologá piréali. Echijiti jipi 'yémítamo chopi ku wikawárami ju mapujiti Riosi ne wabé simírami Galabé ju.⁶ A'lí Riosi ayénachó tamujé tamí ku owíntali Jesucristo yuwa, ayénachó tamujé tamí muchuwábali echo'ná ripá riwigachi, Jesucristo yuwa.⁷ A'lí Riosi je'ná jerigá olali mapurigá waminánomí Binói galá omérama machíriya echi pagótami mapu Binói ne wabé simírami galéami ju, ayénachó mapu Binói ne wabé Galabé ju, mapujiti Binói júuli Jesucristo tamujé tamí ku'wíramiya.⁸ Riosi 'yemi mi ne wabé simírami galeli, echijiti mapalítamo galá bichíili Jesucristo niráa, 'yémítamo ku wikawárami níili mapurigátamo chati sitíi olali, chópitamo ketasi echirigá ku wikawárami níili mapujítitamo galabé olali aboni niráa, mapujiti Riosi Binói 'yemi mi ku wikáwali mapujiti Binói ne wabé galéami ju.⁹ A'lí Riosi ke wesi ku wikáwa chopi mapujiti aboni galabé olá. Echijiti ketasi galá ju mapu echi jaré pagótami nóchama.¹⁰ Riosi tamujé tamí niwáli. A'lí mapujítita galá bichíili, Riosi tamujé tamí napabuli Jesucristo yuwa, echijiti Riosi ayénachó tamujé tamí galabé niráa ku niwáli, mapurigata chopi galabé oláami níibo, achigórigá mapurigá Riosi Binói bachá niráa tamujé tamí a'lárali mapurigata echirigá galabé oláami níibo.

Tamujé galá kilí ologá piré mapujítita bichíi Jesucristo niráa

¹¹ Echijiti galá ku 'natasi mapu churigátamo ologá piréali chabénala. 'Yémitamo ketasi Juríosi anilíwami pagótami ju. Echi jaré Juríosi sinibí noligá sikiré si'néami aboni kúchuwala kúrowi, echijiti echí jaré Juríosi 'yemi mi ané ke noligá sikirétami niráa. ¹² Echalí 'yémitamo ketasi Jesucristo yuwa níili. 'Yémitamo mapurigá isena pagótami níili echí jaré Isaeli pagótami yuwa. Echalítamo ketasi cho galá machili Riosi Nulalila mapurigá Riosi nuleli echí jaré Isaeli pagótami, chabé ki'yá jonsa. Nibilé chótamo machili Riosi Ra'íchala mapurigá Binói bichíwaga anili mapu julama echí bilepi Binói Ranala jena'í wichimóbachi. Echalí 'yémitamo chopi 'wigáami niráa piréali, ayénachótamo ketasi machili Riosi Ra'íchala mapujítitamo ketasi Riosi yuwa níili. ¹³ Chopi jipi 'yémitamo ma napawíkami ju Jesucristo yuwa, echijiti 'yemi máputamo chabénala mikabé niráa muchili, ma mulubéantarami níili Riosi yuwa, mapujiti Jesucristo wabé léntaga mi'lirúami níili 'yemi chati olalila jiti. ¹⁴ Jesucristo chopi ju mapu tamujé tamí 'ya máputa kilíi ologá pirélabo. Chabénala 'yémitamo mapurigá auché jaré isena pagótami níili tamujé Juríosi pagótami yuwa, chopi Jesucristo ma tamujé tamí ku niwáli mapurigá bilénapi napawíkami pagótami niráa, si'néami 'yemi isena yuwa. Echirigá Jesucristo Binói ma ku katéwali mapurigata ketasi waminabi a'nagupi nakichibo. Echijiti Jesucristo ma suwábalí echí mapu tamujé tamí okoná niráa rojuánali, mapurigá biléana tigótami niráa. ¹⁵ Mapujiti mapalí Jesucristo waminá mi'lirúami níili, echalí Binói ma nakúbali echí nulalíwami, mapurigá echí jaré pagótami nulérami níili wikabé namuti olánala. A'lí mapalí echí jaré pagótami echirigá okoná niráa rojonárami níili, echalí Jesucristo auché si'nú bukulíwami pagótami niwáli, napawíkami Binói Jesucristo yuwa. Echirigá olali Jesucristo mapurigata omérabo kilíi ologá piréliya Binói yuwa. ¹⁶ A'lí mapalí Jesucristo echirigá clavo jiti michóniga mi'lirúami níili echo'ná kúrsichi, echalí Binói olali mapurigá ma ketasi 'wérali níima mapurigá okoná rojuáami pagótami a'nagupi na'áwama; ayénachó Binói 'yali mapurigá si'néami pagótami galá omérama kilíi ologá piréliya Riosi yuwa, mapujiti Jesucristo bilénapi napawíkami pagótami niwáli, si'néami echí jaré mapu ikí galá bichíiko Binói Jesucristo.

¹⁷ Echijiti Jesucristo jena'í wichimóbachi nawagá nawésali echí Galabé Riosi Ra'íchala mapurigá si'néami pagótami galá bichíiga kilíi ologá pirélama. Echalí Binói 'yemi mi nawésali máputamo mikabé niráa muchili Riosi yuwa, ayénachó Binói echirigá nawésali echí jaré Juríosi pagótami mapu mulubé niráa muchima Riosi yuwa. ¹⁸ Mapujiti mapalita bichíi Jesucristo niráa, echalí si'néamita, ibili niráa, mulubéana Riosi Onorúami yuwa, ata Juríosi níisagá, ayénachó ata auché isena níisagá, mapalí echí Bilepi Wabé Galabé Riosi Iwigala tamujé tamí bayé. ¹⁹ Echijiti, Riosi yuwa, 'yémitamo ma ketasi mapurigá isena pagótami niráa ju, máputamo jena'í kawírali piré mapo'ná ketasi 'yemi aboni kawíwala ju; chópitamo echo'ná ripá riwigachi piréami níibo, achigórígá mapurigá si'néami echí auché jaré Riosi níwala pagótami echo'ná chopi piréami níima, achigórígá mapurigá Riosi Binói bachá niráa bichíwaga anili, mapujiti 'yémitamo ma Riosi kúchuwala ju. ²⁰ Ayénachó 'yémitamo mapurigá biléana walubé kalí ju, mapujítitamo ibili niráa napawíkami ju Jesucristo yuwa, achigórígá mapurigá wikabé rité napawika bilénapi tigótami ju echo'ná biléana kalírali. A'lí ibili bichíyami mapurigá rité niráa tigótami ju echo'ná Riosi kalílachi. Echi kalí bachá ri'lé niráa tigótami níili mapalí echí jaré

bachá bichíili, si'néami mapu ikí Jesucristo bachá niráa júuli nawisánala, ayénachó mapalí echi auché jaré ki'yánala piréami galá bichíili, si'néami mapu ikí Riosi jiti nawésami níili. A'lí Jesucristo Binói sinibí bachá niráa ju, echijiti Jesucristo mapurigá echi Galabé Rité ju, echi mapu bachá niráa tigótami níili echo'ná sitochi. ²¹ Echirigá Jesucristo mapurigá echi ri'lé bachá tigótami niráa ju. A'lí echo'ná moba echi walubé kalí waminabi ri'iná sísimí, ne suwaba galá tigótami niráa, mapuyénasí biléana walubé ri'obá níima. Riosi ri'obáwala niráa, napawika echi Walubela Jesucristo yuwa. ²² Echirigá 'yemi galá bichiyami ritémtami, napawika Jesucristo yuwa, ne si'néamitamo napawika tigótami niráa ju, ne si'néami echi auché jaré galá bichiyami yuwa, mapurigá ne si'néamitamo biléana walubé galí niráa níibo, mapo'ná Riosi Binói bité, Binói Wabé Galabé Iwigala niráa.

**Pablo julárami níili nawésanala echi Galabé Riosi
Ra'íchala echi auché jaré isena pagótami**

3 Echijiti nijé, Pablo, sinibí tániga ra'icha Riosi yuwa. Jipi nijeni jena'í pachá bachara atí mapujítini bichíi Jesucristo niráa. A'lí je'ná jerigá ikili mapurigá 'yémitamo waminabi ku'wíratami níibo, si'néami máputamo ikí ketasi Juríosi pagótami ju. ² Yémitamo ma galá machibói mapurigá Riosi ne wabé galabé ologá tamí júuli 'yemi mi nawésanala echi Galabé Riosi Ra'íchala. ³ Mapujiti Riosi Binói ma tamí machírali mapurigá Binói nakí olánala, achigórigá mapurigá nijeni bachánala 'yemi mi pe okuáa ra'íchali oseli. Chopi ki'yá chokichí jonsa Riosi ke wesi auché jaré echirigá machírali. ⁴ A'lí mapalítamo 'neni mapurigá nijeni 'yemi mi oseli, echalítamo galá omérabo machiyá mapu nijeni ma galá machí suwaba mapu ki'yá chokichí jonsa ketasi machirúami níili, Jesucristo jiti rugá. ⁵ Chabénala ke wesi je'ná jerigá machíratami níili, chopi jipi bukulí Riosi je'ná jerigá machírali echi jaré galabé oláami nawésami mapu Jesucristo jiti julárami níili nawisánala. Ayénachó Riosi echirigá machírali echi auché jaré nawésami, si'néami mapu ikí Riosi jiti nawésami níili. A'lí Riosi echirigá machírali si'néami aboni mapalí echi Galabé Riosi Iwigala echirigá machírali. ⁶ A'lí echi mapu ki'yá chokichí jonsa ketasi machirúami níili Jesucristo jiti rugá, suwaba je'ná jerigá ju: Mapu Riosi ayénachó narema echi auché jaré isena pagótami mapurigá Binói kúchuwala niráa mapalí aboni galá bichíi echi Wabé Galabé Riosi Ra'íchala, achigórigá mapurigá Riosi narema echi jaré Juríosi mapalí aboni galá bichíi. Ayénachó je'ná jerigá ju: Mapu ne si'néami mapu ikí bichíiko bilénapi niráa napawíkami ju, ayénachó mapu ne si'néami echi jaré isena mapu ikí bichíiko achigórigá bichíwaga anérami ju, mapurigá Jesucristo bichíwaga aneli echi jaré Juríosi. ⁷ A'lí Riosi Binói wabé omériga ologá tamí wilali mapurigani nocháma je'ná Galabé Riosi Ra'íchala nawésiya, chopi nijé binói ketasi echirigá oláati riwéalini, mapujiti chabénala nijeni wabé chati sitíi oláami níili. ⁸ Nijeni waminabi ne wabé tabéala ju, ketasi mapurigá echi auché jaré kuchípala, si'néami mapu ikí Riosi níwala ju. Chopi Riosi arigá galá tamí nírali mapalí Binói wabé galigá tamí júuli nawésanala echi jaré isena pagótami je'ná Wabé Galabé Riosi Ra'íchala, jeanigá mapu Jesucristo ne wabé simírami galéami ju, mapuyénasí jena'í wichimóbachi piréami pagótami ketasi omero machiyá mapu chu yena ne wabé simírami galéami ju. ⁹ Echirigá Riosi tamí nuleli mapurigani galá machírama si'néami pagótami mapu churigá Binói Riosi nakili olánala. A'lí echi Walubela Riosi mapu niwáli suwaba namuti mapu ikí nirú, Échiko ki'yá chokichí jonsa ketasi cho

machírali jena'í wichimóbachi piréami pagótami mapurigá Binói nakili olánala, chopi jipi bukulí jonsa tamí echirigá machírali.¹⁰ A'lí je'ná jerigá ikili mapurigá, jipi jonsa, si'néami mapu ikí napawika bichiyami ju Jesucristo niráa ne galá machírama echi jaré o'wéala Riosi kapitánawala, echo'ná ripá riwigachi nuláami, mapu echi Walubela Riosi ne wabé simírami machíami ju ne suwaba namuti.¹¹ A'lí Riosi je'ná jerigá olali achigórigá mapurigá Binói sinibí nakili olánala. Chabé ki'yá Riosi nijali Jesucristo, echi mapu tamujé Walubélawala ju, mapurigá Jesucristo mi'lirúami níima jena'í wichimóbachi.¹² A'lí mapujiti Jesucristo echirigá mukuli tamujé chati sitíi olalila jiti, jípita galá omérabo mulubéaniya Riosi yuwa, mapujítita ma ketasi majawá, mapujítita galá bichíi Jesucristo niráa.¹³ Echijiti nijeni 'yemi mi ne wabé tani máputamo sinibí waminabi ne wabé nílaka bichfisabo, ayénachó máputamo ketasi ariwebo bichiisiya chopi mapujiti nijeni wabé risúu olárami ju, mapujiti nijeni 'yemi mi nawésali Riosi Ra'íchala. Nijeni chopi echirigá risúu olárami ju mapurigá 'yémítamo echijiti waminabi galá bichíibo Jesucristo niráa.

Jesucristo ne wabé simírami galéami ju

¹⁴ A'lí je'ná jiti nijeni sinibí chokóbaga wiliba bacháami echi Walubela Jesucristo Onolá yuwa, mapurigani táníga ra'icháma Binói yuwa.¹⁵ Echi Walubela Riosi niwáli ne si'néami pagótami mapu ikí nirú jena'í wichimóbachi, ayénachó ne si'néami mapu ikí nirú echo'ná ripá riwigachi. Echijiti tamujeta Onorúami niráa ané Riosi. A'lí echijiti si'néami rijói mapu ikí kúchuwami ju ayénachó onorúami anérámi ju.¹⁶ Nijeni sinibí tani Riosi mapurigá Binói 'yemi mi wabé iwébanama pachana 'yemi sulálachi niráa, echi Wabé Galabé Riosi Iwigala jiti; mapurigátamo omérabo galabé ologá piréliya, mapujiti Riosi Binói ne wabé Walubela ju, ne wabé Omériami ayénachó.¹⁷ Nijeni echirigá tani mapurigá Jesucristo bitélama echo'ná pachana 'yemi sulálachi, mapurigátamo sinibí waminabi galá bichfisabo, ayénachó mapurigátamo ne wabé galéami níibo. Echalítamo níibo mapurigá echi wabé jiwérami okó, wabé ri'lé nawéami, echi mapu ketasi waminá na'mini.¹⁸ Echalítamo galá omérabo machiyá, ne si'néami echi auché jaré galá bichiyami pagótami yuwa mapu chuyena ne wabé simírami galéami ju echi Walubela Jesucristo. Mapujiti mapurigá je'ná kawí ne wabé simírami wi'lé ju, ne wabé simírami wi'llí ayénachó, echirigá achigórigá echi Walubela Jesucristo ne wabé simírami galéami ju. Ayénachó mapurigá echi walú ba'wí ne wabé simírami ri'lé ju, ayénachó mapurigá echi sopolí ne wabé simírami ripabé muchuwi, echirigá achigórigá echi Walubela Jesucristo ne wabé simírami galéami ju.¹⁹ Echirigani tani mapurigátamo galá machiboa mapu chuyena ne wabé simírami galéami ju echi Walubela Jesucristo; ayénachóni tani mapurigá Riosi Binói bitélama pachana 'yemi sulálachi, mapurigá Binói 'yemi mi nulema suwaba mapu ikítamo olabo. Ne bichíwali ju mapu echi Walubela Jesucristo tamujé tamí ne wabé simírami galé, chótita ke siné omérabo ne gáliga machiyá mapu chuyena galéami ju Binói.

²⁰ Jipi jonsa nijeni nakí mapu Riosi waminabi walubélaga anérámi níima, mapujiti Riosi ne wabé omériami ju, ne wabé simírami niráa olayá, suwaba namuti máputa tani tamujé, ayénachó mapurigata chopi 'nata tamujé, mapujiti Binói echirigá ne wabé omérga olá pachana tamujé tamí yuwa.²¹ ¡Nijeni nakí mapu ne si'néami echi jaré napawika bichiyami ritémtami sinibí niráa waminabi walubélaga anema Riosi, ne sinibí, mapujiti Jesucristo ne wabé simírami Walubela ju! ¡Echirigá níima!

**Echi Wabé Galabé Riosi Iwigala bilénapi niráa
napabú si'néami mapu ikí galá bichíiko**

4 Echijiti nijé mápuni jena'í pachá bachara atí, arigá 'yemi mi taní máputamo sinibí galabé ologá pirélabo, mapujiti galá níima mapu echirigá olama ne si'néami pagótami mapu ikí ma bayérami níliko bichiinala, mapurigá 'yémítamo ayénachó bayérami níli. ²Tarapé nóchami nísi, chopi sinibí wabé galesi echí auché jaré pagótami. Sinibí galá kilíi ologá pirélasi echí auché jaré yuwa. Sinibí wabé galigá 'natasi mapu churigátamo omérabo ganílatiya echí auché jaré. ³Sinibí bilénapi niráa bichísi, achigórigá mapurigá echí Wabé Galabé Riosi Iwigala 'yemi mi binera, mapujítitamo napabúrami niráa ju, mapujiti Riosi ma 'yemi mi 'yali mapurigátamo galá kilíi ologá pirélabo. ⁴Ne si'néami echí jaré mapu ikí bichíyami ju Jesucristo niráa, si'néami bilénapi niráa napawíkami ju mapurigá bilepi rijói sapala niráa, ayénachó bilepi nirú echí Wabé Galabé Riosi Iwigala, mapurigá Riosi ayénachó ma 'yemi mi bayeli mapurigátamo bichiíbo máputamo ku'wíratami nííbo echí Bilepi Walubela Jesucristo jiti. ⁵Bilepi Walubela Jesucristo nirú, ayénachó bilepi galabé Bichiílawami nirú, ayénachó bilénapi pagókowami nirú. ⁶Ayénachó bilepi Riosi nirú, echí mapu Onorúami ju, si'néami Onolá, mapujiti Riosi niwáli si'néami pagótami. A'lí Riosi ne Walubela ju ne si'néami pagótami yuwa, ayénachó Binói nóchaga olá pachana echí jaré bichíyami ritémtami sulálachi, ayénachó Riosi pachana si'néami aboni yuwa atí.

⁷Chopi Riosi tamujé tamí ibili niráa 'yali mapu churigata omérabo nochá, Binói nóchala olayá, achigórigá mapurigá Jesucristo Binói tamujé tamí 'yali mapurigata nochabo. ⁸Echijiti je'ná jerigá osirúami ju echo'ná Riosi Ra'íchala oselíwalachi:

Jesucristo echo'ná ripá riwigachi ku moyénali, ayénachó Binói tóli wikabé
echí jaré mapu pachá mo'wárami niráa níli.

A'lí Binói Jesucristo 'yali ibili echí jaré bichíyami mapu churigá nocháma,
Binói nóchala olayá.

⁹¿Churigá aniwáami ju mapu ku moyénali? Je'ná jerigá aniwáami ju: Jesucristo ayena bachá niráa ne wabé ri'libé biléana waná rikíñali mapo'ná muchuwi echí jaré suwíami aliwala. ¹⁰A'lí Binói mapu echo'ná wabé ri'libé rikíñali, ayénachó ne wabé ripabé ku moyénali, echo'ná ne wabé ripabé riwigachi, mapurigá Binói Jesucristo sinepi niráa ne suníami niráa asimea. ¹¹A'lí Jesucristo ibili niráa 'yali mapurigata omérabo olayá mapurigá Binói nakí máputa olabo. Echirigá Jesucristo júuli echí jaré makói miná okuá nawésami mapurigá aboni nawisáma Riosi Ra'íchala, ayénachó 'yali mapurigá auché jaré nawisáma mapurigá Riosi Binói 'yali mapu aboni nawisáma, ayénachó 'yali mapurigá auché jaré nawisama Riosi Ra'íchala mapurigá si'néami mapu ikí bichiíko ku wikawárami níima, ayénachó 'yali mapu auché jaré galá nisema echí jaré Riosi níwala pagótami, ayénachó mapurigá auché jaré galá binérama Riosi Ra'íchala. ¹²Echirigá Jesucristo a'lárali echí jaré Binói níwala pagótami mapurigá aboni galá omérama olayá Binói nóchala, mapurigá echí jaré napawika bichíyami waminabi galá bichíyami níima. Ne si'néami aboni bilénapi niráa napawíkami ju, mapurigá bilepi rijói sapala niráa. A'lí je'ná jerigá aniwáami ju: Echi Jesucristo sapala waminabi ochérasama mapalí ibili echí jaré napawika bichíyami waminabi galá bichiíssama, ¹³mapuyénasí ne si'néami tamujé, máputa napawika bichíyami ju, bilénapi chópirigá bichíyami

níibo; ayénachó mapuyénasí ne si'néamita ne sébali galá machiboa echí Walubela Riosi Ranala. Echalita ne sébali galá binératami níibo echí ne Bichíwali, mapurigá Jesucristo Binói ne sébali galá machífami ju suwaba namuti.¹⁴ Echalita ma ketasi mapurigá echí jaré kúuchi niráa níibo, mapujiti echí jaré kúuchi we 'yáati auché si'nú 'nata, ayénachó aboni arigá bichíi mapalí jaré pagótami auché si'nú niráa 'yékaka binera aboni. Echiyiri pagótami wabé machíami ju 'yékaka binériya, mapurigá tamujé napawika bichíiyami arigá bichíibo echí mapu ketasi bichíwali ju.¹⁵ Waminabi galá níima máputamo ne wabé galigá ra'ichábo echí ne Bichíwali, ayénachó máputamo waminabi nokuísabo Jesucristo yuwa, mapujítita napawíkami niráa ju mapurigá bilepi rijói sapala niráa. A'lí Jesucristo ne Walubela ju tamujé tamí yuwa, mapurigá echí bilepi rijói mo'ola ne bachá niráa ju, suwaba binói sapala yuwa.¹⁶ A'lí Jesucristo echirigá bilénapi niráa napabú ne si'néami echí jaré napawika bichíyami, mapurigá bilepi rijói sapala ne suwaba bilénapi niráa napawíkami ju. Echi bilepi rijói sapala wikanáami niráa rojuáami ju, chopi ne suwaba arigá bilénapi wabé iwéami nachúkami ju. A'lí mapalí ne suwaba echí jaré kúuchi rojuáami galá ju, echalí echí rijói galá kaníla. Echirigá ayénachó mapalí ibili echí jaré napawika bichíyami a'nagupi galéami ju, echalí ne si'néami ne wabé kaníila.

Jesucristo tamujé tamí 'ya mapurigata auché si'nú galabéala niráa pirélabo

¹⁷ Je'ná jerigá ju mapu nijeni 'yemi mi ané, ayénachó mapu nijeni 'yemi mi wabé nulé, mapujiti echí Walubela Jesucristo je'ná jerigá nakí: Mapu 'yémítamo ma ketasi chati sitíi ologá pirélabo, ketasi mapurigá olá echí auché jaré mapu ikí ketasi machí Riosi. Aboni wabé chati sitíi olá achigórigá mapurigá aboni ma wabé chati sitíi 'nata.¹⁸ Aboni ketasirapé machí echí ne Bichíwali. A'lí aboni ketasi auché si'nú galabéala niráa piré, mapujiti aboni ma biwárali aboni sulálachi; echijiti aboni ketasi machí galabé ologá piréliya.¹⁹ Aboni tarapé te riwéalawami, chopi aboni chuwé, olá karúmati ne wabé simírami chati sitíi oluwáwami.²⁰ Chopi echí Walubela Jesucristo ketasi echirigá 'yemi mi binérali, mapurigátamo echirigá olabo,²¹ mapujiti ne bichíwali ju mapu 'yémítamo ma námali jaré nawésachi Jesucristo jiti rugá. Ayénachó bichíwali ju mapu 'yémítamo ma binératami níili echí ne Bichíwali, mapurigá Jesucristo Binói ju echí ne Bichíwali.²² Chabénala si'néami 'yémítamo chati sitíi ologá piréali, mapalítamo ketasi cho bichíili Jesucristo niráa. Jípitamo siné káachi abijí nakí chati sitíi olánala, mapujiti si'néamita abijí chati sitíi suléami ju, chopi tamujé máputa bichíi Jesucristo niráa, ma auché si'nú galabéala niráa niwárami ju. Echijiti waminá ariwesi mapurigátamo chabénala chati sitíi ologá piréali, mapujiti echiyiri oluwáwami ne wabé simírami chati sitíi ju. A'lí jípitamo chopi echirigá chati sitíi olá mapalítamo 'yékarami ju, mapujítitamo nakí chati sitíi olánala.²³ Galá níima mapu 'yémítamo auché si'nú galabéala niráa niwárami níibo echo'ná 'yemi sulálachi, ayénachó mapurigátamo si'nú ne wabé galabéala niráa 'natabo.²⁴ Ayénachó galá níima máputamo si'nú ne wabé galabéala niráa ku nakulíwarami níibo, mapurigátamo chopi galabé ologá pirélabo, achigórigá mapurigá Jesucristo tamujé tamí 'yalí máputa pirélabo. Echi Walubela Riosi wabé nakí mapurigata echirigá galabé ologá pirélabo. A'lí si'néami mapu ikí echirigá olako, abóniko ne bichíwali galabé wachínaga ologá piré.

²⁵ Echijiti ma ketasi 'yékaka ra'ichasi, chopi ibílipika ne bichíwaga ra'ichasi echi auché jaré yuwa, mapujiti si'néami tamujé bilénapi niráa napawíkami ju, mapu ikita bichiyámi ju Jesucristo niráa.

²⁶ A'lí átamo na'áwasagá, ketasi ne wabé simírami na'áwasí mapuyénasí chati sitíi oluwáwami níima. A'lí nirapé bilé rawé archesi na'awa, ²⁷ mapujiti átamo echirigá wi'libé niráa na'áwasagá, siné káchitamo echirigá ariwebo mapurigá echi riablo 'yemi mi wabé chati sitíi olírama.

²⁸ 'Yemi máputamo chabénala wabé chigórami níliko, waminá ariwesi chigówami. Jipi jonsa galá nochasi 'yemi aboni sikala jiti, mapurigátamo galá mepo venomí. Echirigátamo níwabo máputamo galá omérabo ayá echi auché jaré wabé tisúwati.

²⁹ Ke siné sitírarigá ra'ichasi, chopi sinibí wabé galabé niráa ra'ichasi, mapurigá echi auché jaré mapu ikí námiko 'yemi ra'íchachi waminabi galá bichiyámi níima Riosi, ayénachó mapurigá aboni waminabi wabé kanílama sulachí niráa. ³⁰ Ketasi o'monáratasi echi Wabé Galabé Riosi Iwigala, chopi sinibí galá nijéwasi mapurigá Riosi Iwigala 'yemi mi nulé, mapujiti 'yémítamo 'yárami níili echi Galabé Riosi Iwigala mapurigá echi auché jaré pagótami galá machimea mapu 'yémítamo Riosi níwala pagótami ju. A'lí bichétamo echijiti tibútarami níbo echalí ne jubá rawé yénasí, mapalí Riosi 'yemi mi ne sébali ku'wírama.

³¹ Ke siné chijúnaga kichisi auché jaré, nibilé siné yónasi. Ke siné a'nagupi na'áwasí, nibilé siné chaati sitíi ra'ichási echi auché jaré pagótami. Waminá ariwesi suwaba chati sitíi oluwáwami. ³² Chopi si'winárigá sinibí wabé galabé oláami nísi. Sinibí a'nagupi wabé natimasi, ayénachó a'nagupi ku wikáwasi, achigórígá mapurigá Riosi 'yemi mi ku wikáwali mapujítitamo bichíili Jesucristo niráa.

Galá níima mapu Riosi kúchuwala chopi galabé ologá pirélama

5 'Yémítamo ma Riosi kúchuwala ju, ayénachó Riosi Binói 'yemi mi wabé galé, echijiti galabé oláami nísi, mapurigá Riosi galabé oláami ju. ² A'nagupi ne wabé galigá pirélasi, achigórígá mapurigá Jesucristo tamujé tamí ne wabé galeli, ayénachó mapurigá Jesucristo ne wabé galigá, a Binói niráa nijali mapurigá waminá mi'lirúami níima tamujé chati sitíi olalila jiti. Chabé ki'yá echi jaré Juríosi pagótami ko'wagá 'yalí Riosi echi jaré méchuli. A'lí Riosi echirigá ganíliga ku wikáwali aboni chati sitíi olalila, chopi Riosi tamujé tamí waminabi ne wabé ganíliga ku wikawa mapujiti Jesucristo mi'lirúami níili tamujé chati sitíi olalila jiti.

³ 'Yémítamo Riosi níwala pagótami ju, echijiti ketasi chati sitíi chuwé olasi. Ke siné chuwé bilétari yuwa kochisí, nibilé siné si'winárigá chati sitíi chuwé olasi, nibilé korusi auché jaré níwala namuti. Ke siné a'nagupi kaníliga ra'ichasi echiyiri chati sitíi oluwáwami jiti rugá. ⁴ Nibilé siné kaníliga ra'ichasi echiyiri wabé riwéluami oluwáwami jiti rugá, mapujiti echiyiri oluwáwami ne wabé riwéluami ju. Ke siné sitíragá ra'ichasi, nibilé chuwé ra'ichasi; mapujiti echirigá ra'ichálawami ketasi galá ju, chopi sinibí galabé niráa ra'ichasi, walú natétara agá Riosi. ⁵ 'Yémítamo ma galá machí mapu echi jaré chuwé bilétari yuwa kochíami, ke wesi echo'ná Jesucristo yuwa muchima mapo'ná Binói wabé Walubela Nuláami níima, mapo'ná Riosi Onorúami ayénachó we nulá. Nibilé wesi chati sitíi chuwé oláami echo'ná Binói yuwa muchima, nibilé wesi mapu wabé korúkami ju auché jaré níwala namuti (mapujiti echiyiri korúkami achigórígá chati sitíi oláami ju mapurigá echi jaré mapu ikí wabé o'wiké echi jaré amachíkalawami namuti.) ⁶ Ketasi ariwesi mapu auché

jaré 'yemi mi 'yékama, mapalí aboni ke newalite niráa ra'icha. Riosi ne bichíwali ne walubé kastigo 'yama si'néami echi jaré pagótami mapu ikí echirigá wabé chati sitíi chuwé olako, echi jaré mapu ikí ketasi nijewa Riosi nulalila. ⁷Tarapé siné echirigá chati sitíi olasi 'yemi, mapurigá aboni chati sitíi olá.

⁸Chabénala niráa 'yémitamo ne wabé chati sitíi ologá piréali, mapurigá echo'ná rokowárali piréami niráa, chopi jípitamo Jesucristo yuwa napabúrami ju, echijititamo echo'ná galá rayénachi niráa piréami ju. Sinibí ne wabé galabé olasi mapurigá echo'ná galá rayénachi piréami niráa. ⁹Mapujiti echi Wabé Galabé Riosi Iwigala wabé omériga olá pachana 'yemi sulálachi niráa, mapurigátamo ne wabé galabé níibo, ne wabé bichíwaga ra'íchami ayénachó, ne wabé galabé wachínaga oláami ayénachó. ¹⁰Sinibí we nakisí binénala mapurigá echi Walubela Jesucristo we nakí, mapu 'yémitamo olabo. ¹¹Tarapé siné olasi echi wabé chati sitíi oluwáwami, mapu echi auché jaré pagótami we olá, si'néami mapu ikí echo'ná rokowárali niráa piréami ju, mapujiti echiyiri chati sitíi oluwáwami ketasi 'yemi mi ku'wírama. Si'winárigá, waminabi galá níima mapu 'yémitamo sinibí wabé galabé ologá pirélabo. Echalí 'yémitamo machírabo echi auché jaré pagótami mapu echi chati sitíi oluwáwami ne wabé simírami chati sitíi ju. ¹²Mapujiti wabé riwéluami ju echi wikabé chati sitíi oluwáwami jiti rugá ra'ichálawa, suwaba mapu ikí aboni we chiná niráa chati sitíi olá. ¹³Chopi mapalí suwaba namuti ne galá rayéntami ju, echalí suwaba galá machirúami níima, mapujiti mapalí galá rayena echalí suwaba namuti galá machiná niráa riwirúami ju. ¹⁴Echijiti je'ná jerigá osirúami ju jena'í Riosi Ra'íchala oselíwalachi:

¡Ku busuré mujé mápumi kochíami niráa ju!

¡Ku owíni mujé mápumi mukúami niráa ju!

A'lí Jesucristo mi galá machírama echi ne Bichíwali.

¹⁵Echijiti sinibí galá 'natasi mapu churigátamo ologá pirélabo. Ketasi ologá pirélasi mapurigá echi auché jaré mapu ke galá machíami ju, chopi sinibí galabé ologá pirélasi mapurigá echi jaré galá machíami niráa. ¹⁶We yaa galabé olasi suwaba máputamo omero, Riosi nóchala olayá, mapujiti waminánomí rawé 'yémitamo wabé risúu olárami níibo. ¹⁷Echijiti sinibí ne wabé galabé 'nátami níisi. Sinibí nakisí machinália mapurigá echi Walubela Jesucristo nakí máputamo olabo. ¹⁸Ketasi tégasí, mapujiti átamo tégasagá 'yémitamo chopi waminabi chati sitíi olísabo, mapuyénasítamo sinibí niráa kastigo 'yárami níibo. Si'winárigá sinibí galá nijéwaga olasi mapurigá echi Galabé Riosi Iwigala 'yemi mi nulé. ¹⁹Wisabé a'nagupi ruwigá kaníliga ra'ichasi Riosi Ra'íchala, mapurigá osirúami ju echo'ná Sálmochi anilíwachi, ayénachó a'nagupi nawajisi echi we galabé Riosi nawajíwala. Sinibí echirigá wabé kaníliga nawajiga, waminabi walubélaga anesi echi Walubela Jesucristo. ²⁰Sinibí niráa walú natétara 'yasi echi Walubela Riosi Onorúami, suwaba namuti jiti, mapujítitamo galá bichíi Jesucristo niráa.

A'nagupi ne galá nijiyasi

²¹A'nagupi ne galá nijiyasi si'néami 'yemi bichíyami, achigórígá mapurigátamo galá o'wiké Riosi.

²²'Yemi 'muguí kunéami ne galá nijéwasi 'yemi aboni kunala chopi, achigórígá mapurigátamo galá nijewa echi Walubela Jesucristo. ²³Mapujiti echi rijói upéami walula ju binói upila yuwa, achigórígá mapurigá Jesucristo ne Walubela ju si'néami

echi jaré napawika bichíyami ritémtami yuwa. Ayénachó Jesucristo ku Wikáwami ju echi jaré napawika bichíyami. A'lí ne si'néami echi jaré napawika bichíyami, ne napawika niráa, Jesucristo Binói sapala niráa ju.²⁴Chopi achigórígá mapurigá echi jaré napawika bichíyami galá nijéwami ju Jesucristo, echirigá ayénachó 'yemi 'muguí kunéami ne galá nijéwasi 'yemi aboni kunala chopí, suwaba mapu ikí aboni 'yemi mi nulé.

²⁵Galá níima mapu ibili rijói jubéami galá galesa aboni jubila chopí, achigórígá mapurigá Jesucristo wabé galeli echi jaré napawika bichíyami ritémtami. Echijiti Jesucristo a Binói niráa nijali mapurigá waminá mí'lirúami níima, aboni chati sitíi olalila jiti. ²⁶A'lí biché Jesucristo echirigá olali mapurigá Binói omérama galabératiya echi jaré napawika bichíyami, ayénachó mapurigá Binói omérama bi'wayá aboni, echi ba'wí jiti, ayénachó mapujiti aboni galá bichíi Binói Ra'íchala, ²⁷mapujiti Jesucristo nakí mapu ne si'néami echi jaré napawika bichíyami bacháami Binói yuwa jábama waminánomí, wabé o'wéalatami niráa, tarapé wi'nijírami mapurigá chati sitíi oláami niráa, mapurigá aboni chopi Riosi níwala níima, ne wabé galabé oláami niráa. ²⁸Echirigá achigórígá galá níima mapu echi rijói upéami galá galesa binói upila, mapujiti mapalí bilé rijói we galé binói upila, echalí échiko ayénachó a binói niráa we galé. ²⁹Mapujiti ke wesi kichí binói sapala, chopi si'winárigá ibili galá ko'ogá, we galá tibuta aboni sapala. A'lí Jesucristo echirigá achigórígá galá tibuta echi jaré napawika bichíyami, ³⁰mapujiti si'néami echi jaré napawika bichíyami, ne napawika niráa, mapurigá echi Jesucristo sapala niráa ju. Echirigá si'néami tamujé bichíyami, echo'ná Binói sapálachi nachuka, wikanáami rojuáami niráa juta, mapurigá Binói sapala niráa, ayénachó mapurigá Binói ochilá niráa. ³¹Je'ná jiti bilé rijói ariwema kepu onó, kepu iyé omá, a'lí upema bilé mukí yuwa, a'lí okuánika mapurigá bilepi niráa níima. ³²Je'ná jerigá ketasi galá machirúami ju, chopi arigá wabé galabé ju. Nijeni 'yemi mi ané mapu je'ná jerigá Jesucristo jiti rugá aniwáwami ju, ayénachó echi jaré napawika bichíyami jiti rugá aniwáwami ju. ³³Chopi ayénachó je'ná jerigá aniwáwami ju: Mapu galá níima mapu ibili 'yemi wabé galá galema 'yemi aboni jubila achigórígá mapurigátamo a aboni niráa wabé galé. Ayénachó galá níima mapu echi jaré 'muguí galá o'wikesa aboni kunala.

6 'Yemi kúchatami ne galá nijéwasi 'yemi 'wénawala, mapujítitamo galá bichíyami ju Jesucristo niráa. Ne galá wachínaga oluwáwami ju máputamo echirigá nijéwabo. ²Riosi je'ná jerigá 'yemi mi nulé: Galá o'wiké kemi onó, echi kemi iyé ayénachó. A'lí biché mapalí Riosi 'yemi mi echirigá nuleli, echalí ne chokichí, ne bachá níili mapalí Binói ayénachó bichíwaga anili máputamo wabé ku'wíratami níibo, átamo galá nijéwaságá bilé nulalíwami mapurigá Binói 'yemi mi nuleli. ³Mapujiti echalí Riosi je'ná jerigá ne bichíwaga anili: 'Yémitamo ne wabé kanlíiami níibo, ayénachótamo wi'llibé bamíbali pirélabo jena'í wichimóbachi, átamo galá o'wikésagá 'yemi 'wénawala.

⁴'Yemi 'wéntami ketasi chuwé yóniga na'áwatasi echi jaré 'yemi kúchuwala, chopi galá nijéwiyami ochébanatasi, ne galá ruwigá mapurigá galá bichíyami níima Jesucristo niráa.

⁵'Yemi pióntami galá majáami niráa, ne galá o'wikeka nijéwasi echi jaré nuláami mapu 'yemi mi nulé jena'í wichimóbachi, achigórígá mapurigá galá nijéwiya niráa echi Walubela Jesucristo. ⁶Sinibí ne galá nijéwaga olasi suwaba mapu ikí aboni 'yemi mi nulé. Ketasi chopi echirigá olasi mapalí aboni 'yemi mi ritiwá, chopi

sinibí ne wabé nílaka galá nijéwaga olasi mapujiti Riosi echirigá nakí. ⁷Sinibí echirigá wabé nílaka nochasi, mapurigá echi Walubela Jesucristo nóchala olayá niráa, ketasi mapurigá jaré pagótami nóchala olayá. ⁸Mapujiti 'yémítamo ma galá machí mapurigá echi Walubela Jesucristo galá ku natétama ibili niráa, achigórigá mapurigá ibili galá olali. Ayénachó Binói galá natétama echi jaré pioni mapu galá olako, achigórigá mapurigá Binói galá natétama echi jaré nuláami mapu galá olako.

⁹'Yemi nuláami máputamo níwa pioni, sinibí achigórigá galabé niráa olasi 'yemi piónawala yuwa, ke siné majáraga. Galá ku 'natasi mapurigá Jesucristo ne Walubela ju echi jaré pioni yuwa, achigórigá mapurigá Binói ayénachó Walubela ju 'yemi yuwa. A'lí Jesucristo echo'ná ripá riwigachi atí, chopi Binói sinibí galabé nirá echi jaré pióntami, achigórigá mapurigá Binói galabé nirá 'yemi nuláami.

Echi jaré napawika bichíyami ritémtami we sayera echi riablo

¹⁰Jipi 'yemi napawika bichíyami ritémtami, waminabi galá bichíisasi echi Walubela Jesucristo niráa, mapujítitamo napawíkami ju Binói yuwa, ayénachó Binói suwaba omérami ju. ¹¹Galá bichíiga chapisí suwaba mapu ikí Riosi 'yemi mi 'ya mapurigátamo omérabo nayúriya, echi riablo sayériya, mapurigátamo ketasi waminá omératami níibo mapalí echi riablo 'yemi mi 'yékama. ¹²Mapujiti tamujeta ketasi sayera auché jaré pagótami, chópita sayera echi wabé chati sitíi oláami riablo, echi jaré wikabé binói níwala o'wéala chati sitíi oláami aliwá ayénachó, suwaba mapu ikí ma waminá a'wátami níili echo'ná ripá riwigachi jonsa, suwaba mapu ikí jipi rawé o'wéala niráa nulá jena'í wichimóbachi mapo'ná jaré pagótami wabé simírami chati sitíi oláami ju, mapurigá echo'ná rokowárali piréami niráa. ¹³Echijiti galá bichíiga chapisí suwaba mapu ikí Riosi 'yemi mi 'ya, mapurigátamo omérabo sayériya echi riablo mapu wabé chati sitíi oláami ju, mapujiti jipi rawé echi riablo we nuláami ju jena'í wichimóbachi. A'lí mapalítamo sayera echi riablo, sinibí galá bichíyami níisi Riosi. ¹⁴Ne sinibí echirigá galá bichíyami níisi echi ne Bichíwali. A'lí bichétamo galá kariwérami níibo mapurigá echi jaré sontarsi kariwérami ju mapalí aboni galá iwéami púkami ju. Ayénachó sinibí galá wachínaga oláami níisi. Echalítamo ku'wíratami níibo mapurigá echi riablo ke omérama 'yemi mi suwábiya, achigórigá mapurigá echi jaré sontarsi ku'wíratami ju mapalí aboni jiero napáchami ju mapurigá aboni ketasi chi'wánarami níima auché jaré jiti. ¹⁵Ne galá kariwesi mapurigátamo nawisabo echi Galabé Riosi Ra'íchala, mapurigá echi jaré pagótami galá bichíiga kilíi ologá pirélama. Echirigá kariwesi achigórigá mapurigá echi jaré sontarsi galá kariwé mapalí aboni galá akará. ¹⁶Ne bachá niráa sinibí galá bichíisi Riosi, echalítamo galá ku'wíratami níibo mapurigá echi riablo ketasi omérama 'yemi mi suwábiya, mapujiti échiko 'yemi mi wabé sayera achigórigá mapurigá echi jaré sontarsi sayéraga a'wasá echi jaré owá rajáami, chopi mapalítamo galá bichíi Riosi, echalítamo omero niyúriya echi Riablo sayériya, achigórigá mapurigá echi jaré pagótami waminá cho'wá echi naí rajáami mapu sontarsi a'wali. ¹⁷Galá bichíisi Jesucristo niráa mapurigátamo ku wikawárami níibo mapurigátamo chati sitíi olali. Echalítamo sinibí niráa ku'wíratami níibo, mapurigá echi riablo ke siné omérama 'yemi mi suwábiya. Echalítamo ku'wíratami níibo mapurigá echi jaré sontarsi ku'wíratami ju mapurigá aboni ketasi chiwárami níima mo'ochí, mapalí aboni jiero niwárami ko'yáchami ju. Sinibí galá bichíisi Riosi Ra'íchala mapurigátamo omérabo, echi riablo sayériya; mapujiti Riosi Ra'íchala

mapurigá bilé wabé oláami wi'llibé ripiyá niráa ju mapu echí Wabé Galabé Riosi Iwigala 'yemi mi 'ya mapurigátamo omérabo echirigá nayúriya.¹⁸ Sinibí echirigá olasi, sinibí niráa ra'íchaga Riosi yuwa, mapurigá echí Wabé Galabé Riosi Iwigala 'yemi mi binera. Sinibí mapurigá galá 'nagá muchúami niráa níisi. Ke siné ariwesi echirigá Riosi yuwa ra'icha, chopi sinibí tansi Riosi mapurigá si'néami echí jaré Riosi níwala pagótami galá ku'wíratami níima.¹⁹ Ayénachó tansi Riosi tamí jiti, mapurigá Riosi tamí 'yama mapurigani galá omérama nawesa Binói Ra'íchala, ayénachó mapurigani tarapé majaga nawisáma. Echirigá tansi mapurigani galá omérama machíratiya echí jaré pagótami echí Galabé Riosi Ra'íchala, mapu ketasi cho galá machirúami ju, mapurigá aboni ku wikawárami níima, a galá bichísagá.²⁰ Riosi echirigá tamí júuli mapurigani ra'icháma Binói jiti, mapurigani echirigá nawisama Riosi Ra'íchala. Echijiti jípini jena'í pachá bachara atí. Arigá tansi Riosi mapurigá nijeni galá omérama nawesa Riosi Ra'íchala, mapurigá galá níima mápuni nawisama, tarapé majáami niráa.

Ne jubáami niráa echí Pablo ku ripora jaré ritémtami

²¹ Echi Tíkiko riwéami rijimala 'yemi mi ruyema mapu churigá atikó nijé, ayénachó mapu pírini olayá atí.²² Echijiti nijeni júuli echí Tíkiko echo'ná 'yémichi, mapurigá binói 'yemi mi ruyema mapu churigá atí nijé, mapurigátamo echijiti waminabi kaníratami níibo.

²³ Nijeni ne wabé nakí mapu Riosi Onorúami, ayénachó echí Walubela Jesucristo galá 'yama mapurigá echí jaré napawika bichíyami galá kilii ologá pirélama, ayénachó mapurigá aboni galá galéami níima, ne galá bichíyami ayénachó.²⁴ Ayénachóni nakí mapurigá Riosi ne wabé ku'wírama si'néami mapu ikí sinibí niráa galeko tamujé Walubélawala Jesucristo, si'néami mapu ikí ke siné ariwé echirigá galé. ¡Echirigá níima!

Osirúami

Mapurigá San Pablo Oseli echo'ná

JILÍPOCHI PIRÉAMI

Echi Pablo oseli echí jaré napawika bichíyami echo'ná Jilípochi piréami

1 Nijé, Pablo, 'yemi mi osé. Echi Timoteo ayénachó tamí yuwa atí. Tamujé echí Walubela Jesucristo piónawala ju. Jipi nijeni 'yemi mi je'ná jerigá osé, 'yemi echo'ná Jilípochi piréami, si'néami máputamo Riosi níwala pagótami ju, ne si'néami máputamo Jesucristo yuwa napawíkami niráa ju. Ayénachóni 'yemi mi osé, 'yemi o'wéala ochérami, ayénachó 'yemi nagúurami, riákono anilwámi. ²Nijeni nakí mapu echí Walubela Riosi Onorúami, ayénachó echí Walubela Jesucristo, 'yemi mi ne wabé ku'wírama, ayénachó mapu 'yemi mi 'yama mapurigátamo galá kilí ologá pirélabo.

Pablo táni mapurigá Riosi ku'wírama echí jaré bichíyami

³Nijeni ne walú natétara 'ya keni Riósawa ne sinibí mapalini 'nata 'yemi jiti. ⁴A'lí ne sinibí mapalini Riosi yuwa ra'icha, echalí nijeni ne wabé kaníliga táni mapurigá Riosi waminabi ku'wírama si'néami 'yemi; ⁵mapujiti chabé ne chokichí jonsa, tamujeta ne napawika nóchali, echí Wabé Galabé Riosi Ra'íchala nawésiya, jipi yénasí. ⁶A'lí nijeni ne bichíwali mayé mapu echí Walubela Riosi mapu chabénala chótali 'yemi mi galabératiya mapalí jónsatamo bachá niráa bichíili, ayénachó waminabi sísama 'yemi mi echirigá galabératiya echalí rawé yénasí mapalí echí Walubela Jesucristo ku nolínama. ⁷A'lí we galá ju mapu nijeni echirigá 'natáma mapu Riosi waminabi sísama 'yemi mi galabératiya, mapujiti nijeni 'yemi mi ne wabé galé. A'lí Riosi 'yemi mi ne wabé ku'wira, achigórígá mapurigá Binói tamí ku'wira mapalini pachá bachárami ju, ayénachó mapalini párami níima echo'ná mapo'ná echí jaré o'wéala muchuwi, mapurigani galá ra'icháma jeanigá mapu arígá galá ju bichílawa echí Galabé Riosi Ra'íchala, mapujiti ne Bichíwali ju. ⁸A'lí echí Walubela Riosi ne galá machí mapu chuyena nijeni ne wabé galé 'yemi si'néami, mapurigá echí Walubela Jesucristo tamí 'ya mapurigani 'yemi mi ne wabé galema, mapujiti Binói ne wabé galéami ju. ⁹A'lí nijeni táni Riosi mapurigá 'yémítamo waminabi ne wabé galéami níibo, ayénachó máputamo wabé galá machíami níibo, mapurigátamo galá machiboa suwaba namuti, ¹⁰ayénachó mapurigátamo machiboa mapu chuyiri 'nalí ju echí ne wabé galabéala, mapurigátamo sinibí nakiboa olánala echí mapu galabé ju. A'lí echirigá ologá 'yémítamo sinibí omérabo ne wabé galabé ologá piréliya. A'lí waminánomí mapalí Jesucristo ku nolínama 'yémítamo tarapé

chati sití oláami níibo, nirapétamo wi'nijírami níibo mapurigá chati sití oláami niráa.¹¹ A'lí Jesucristo 'yemi mi 'yama mapurigátamo sinibí echirigá ne wabé galabé ologá pirélabo, mapurigá Riosi Binói sinibí waminabi walubélaga anérámi níima, mapurigá si'néami pagótami machimea mapu Riosi ne wabé Walubela ju.

Nijeni chopi bité mapurigani olama mapurigá Jesucristo nakí

¹² Yemi keni ritémawa, nijeni wabé nakí mapurigá 'yémitamo galá machiboa mapu echí Wabé Galabé Riosi Ra'íchala arigá waminabi wabé nawisárami níili mapujiti nijeni wisabé ne wabé risíu olárami níili mapalini echirigá nawésali.¹³ Mapujiti ne si'néami echí jaré sontarsi jena'í walubé kalírali, echí ne walubela silíami bitélachi tibúami, si'néami galá machí mapu nijeni chopi jena'í pachá bachárami ju mapujítini bichíi echí Walubela Jesucristo niráa. Si'néami echí auché jaré pagótami ayénachó echirigá machí.¹⁴ Echijiti ne noguí si'néami echí jaré ritémrtami ayénachó waminabi wabé nílaga nakili nawisánala Riosi Ra'íchala, ayénachó aboni tarapé majaga echirigá nawésali, mapujiti aboni waminabi galá bichíili echí Walubela Jesucristo niráa.¹⁵ Bichíwali ju mapu jaré aboni we ra'icha Jesucristo jiti rugá, chopi mapujiti aboni wabé sulíami ju, ayénachó mapujiti aboni tamí we kichí; chopi auché jaré ritémrtami ne bichíwali galá bichíiga nawesa Jesucristo jiti rugá, mapurigá auché jaré pagótami ayénachó galá bichíima.¹⁶ Jaré aboni chopi nawesa Jesucristo jiti rugá mapujiti aboni wabé nakí mapu anérámi níima o'wéala nawésami niráa. Abóniko ketasi nakí mapu echí auché jaré pagótami bichíima Jesucristo niráa; aboni chopi nakí mapurigá nijeni waminabi kumérami níima, mapalini jena'í pachá bachárami ju.¹⁷ Chopi auché jaré ritémrtami wabé galigá nawesa echí Galabé Riosi Ra'íchala, mapujiti aboni ne galá machí mapu nijeni jena'í pachá bachárami ju mapujítini galá bichíiga nawesa Riosi Ra'íchala mapurigá echí auché jaré pagótami ku wikawárami níima, a galá bichíisagá.¹⁸ Chopi nijeni arigá kanila mapalí jaré ritémrtami nawesa Jesucristo jiti rugá. ¿Chu chireko a jaré chopi echirigá nawisásagá mapujiti aboni wabé nakí mapurigá aboni niráa anérámi níima o'wéala nawésami? Nijeni ayénachó wabé kanila mapalí auché jaré nawesa chopi mapujiti aboni nakí mapu echí pagótami galá bichíisa ku wikawárami níima. A'lí nijeni sinibí waminabi kanílasama mapalí echí ritémrtami arigá nawesa Jesucristo jiti rugá,¹⁹ mapujiti nijeni galá machí mapu je'ná jiti suwaba chopi ne galá ikímea tamí yuwa, mapujiti 'yémitamo sinibí táni Riosi mapurigá tamí waminabi ku'wírama, ayénachó mapujiti echí Galabé Jesucristo Iwigala sinibí tamí ku'wira.²⁰ A'lí nijeni ne wabé nakí mapurigani tarapé riwélama, chopi mapurigani sinibí omérama ne galá bichíiga ra'icha echí We Galabé Riosi Ra'íchala, mapurigá echí auché jaré pagótami, tamí riwisá mapurigani galabé olá, arigá waminabi galá machimea mapu nijeni chopi omero echirigá galabé olayá mapujiti echí Walubela Jesucristo echirigá tamí olira. A'lí nijeni sinibí echirigá nakili, ayénachóni echirigá nakí jipi yénasí, áni waminabi bitélasagá, áni waminá mi'lirúami níisagá, keremá.²¹ Mapujiti áni waminabi bitélasagá, nijeni chopi nakimea olánala mapurigá Jesucristo nakí mapurigani olama. A'lí áni waminá mi'lirúami níisagá, nijeni ne wabé simírami narema, mapujítini Jesucristo yuwa asímea.²² Chopi áni waminabi bitélasagá jena'í wichimóbachi, echalí nijeni waminabi omérama echí Walubela Jesucristo nóchala olayá. Echijiti nijeni ketasi machí chuyiri waminabi galabé níima.²³ Nijeni nakí mapurigani waminabi olama Jesucristo nóchala olayá, chópini ayénachó nakí

mapurigani waminá mukumea, mapurigani asimea echí Walubela Jesucristo yuwa echo'ná ripá riwigachi, mapujiti echirigá waminabi wabé galabé níima. ²⁴Chopi si'winárigá waminabi 'wérali ju mapurigá níjeni waminabi bitélasama jena'í wichimóbachi, mapurigani 'yemi mi waminabi binérama Riosi Ra'íchala. ²⁵A'lí mapujiti níjeni je'ná jerigá ne bichíwali mayé, echijítini galá machí mapu níjeni abijí ripima 'yemi yuwa, mapurigani 'yemi mi ku'wírama mapurigátamo waminabi nokuísabo olayá mapurigá Jesucristo chopi nakí, ayénachó mapurigátamo waminabi kaníлага bichíibo Jesucristo niráa. ²⁶Echirigá níjeni auchecho siné echo'ná 'yemi yuwa asimea, mapurigá 'yémitamo ne wabé kanílabo mapujítitamo galá bichíyami ju Jesucristo niráa. ²⁷Sinibí ne wabé galabé ologá pirélasi, achigórigá mapurigátamo binératami níili galabé olánala, mapalítamo nawésarami níili Jesucristo Ra'íchala. A'lí níjeni nakí mapu ne si'néamitamo sinibí ne napawika niráa waminabi galá bichíisabotamo, ayénachó mapu si'néamitamo sinibí ne napawika nochabo mapurigá echí auché jaré pagótami galá nawésarami níima echí Galabé Riosi Ra'íchala. Níjeni nakí máputamo sinibí echirigá oláami níbo, áni echo'ná nawásagá 'yemi mi 'nénala, ayénachó a auché jaré tamí ruyésagá, 'yemi jiti rugá, mapalini mikabé atí. ²⁸Chopi ketasi biyiri jiti majasi mapalí auché jaré 'yemi mi sayera. A'lí bichétamo echirigá ologá riwírabo mapurigá echí jaré 'yemi sayela ma waminá 'wigáami ju, chópitamo ayénachó riwírabo mapurigá Riosi 'yemi mi ma ku wikáwali. ²⁹Mapujiti 'yémitamo 'yárami ju mapurigátamo galá bichíibo Jesucristo niráa, ayénachótamo 'yárami ju mapurigátamo risúu olárami níbo, mapujítitamo echirigá galá bichíi Jesucristo niráa. ³⁰'Yémitamo chabénala niráa ma riwáli mapurigá níjeni wabé ni'yúraga olali, Riosi nóchala olayá, ayénachó jípitamo abijí ruyérami ju mapurigá níjeni echirigá ni'yúraga olá.

Jesucristo ne Walubela níisa arigá a Binói niráa tabéatali

2 Jesucristo 'yemi mi nílatali mapurigátamo ne galá bichíibo; ayénachó 'yémitamo wabé kanila mapujiti Jesucristo 'yemi mi wabé galé. A'lí jípitamo níwa echí Wabé Galabé Jesucristo Iwigala, ayénachótamo a'nagupi ne wabé natimaka galé. ²Echijiti ne galá sébali tamí kanfratasi 'yemi. Sinibí bilénapi chópirigá ologá pirélasi. A'nagupi wabé galesi, ne napawika chópirigá ologá, bilénapi niráa 'nátaga. ³Sinibí galabé olasi ibili 'yemi, ketasi mapurigá wabé níliami niráa. Ketasi bilé nóchami níisi, chopi sinibí mapurigá kuchípala niráa mayesi. Galá níima mapurigá ibili 'yemi sinibí mayesa mapu echí auché jaré waminabi o'wéala ju, ketasi mapurigá 'yemi niráa. ⁴Ke wesi 'yemi sinibí nakíami níisi echí wabé galabéala chopi; ayénachó nakisí mapurigá echí auché jaré ritémtami narema echí wabé galabéala.

⁵Sinibí achigórigá 'nátami níisi 'yemi, mapurigá echí Walubela Jesucristo galabé 'nátali. ⁶Mapujiti Jesucristo, echí Walubela Riosi yuwa, chopi a yiri níili, chopi Binói ketasi 'wérali olali mapurigá sinibí niráa achigó yiri níima Riosi yuwa. ⁷Chopi mapalí Jesucristo nawali jena'í wichimóbachi táa múchali niráa, echalí Binói pe okuáa bamíbali niráa ariweli Binói walubélawala, mapujiti Binói iyénali jena'í wichimóbachi mapurigá pióntami niráa. ⁸A'lí mapalí Jesucristo iyénali mapurigá Rijói niráa, echalí Binói abijí waminabi tabéala niráa niírali, mapujiti Jesucristo a Binói niráa njiali mapurigá mil'lirúami níima. A'lí Jesucristo ne wabé mil'lirúami níili, biléana kúrsichi michóniga. ⁹Echijiti Riosi wilali Jesucristo mapurigá ne wabé simírami Walubela niráa, mapurigá Jesucristo ne bachá Walubela níima, si'néami

echi auché jaré o'wéala yuwa.¹⁰ A'lí Riosi echirigá olali mapurigá echalí ne jubá rawé ne si'néami pagótami jena'í wichimóbachi tibíami bacháami Jesucristo yuwa chokoba jábama mapalí aboni námiko Binói Jesucristo riwalá, ayénachó mapurigá si'néami pagótami echo'ná ripá riwigachi muchúwami echirigá olama, ne si'néami echí auché jaré pagótami ayénachó, si'néami mapu ikí waminá 'wigaga suwíliko.¹¹ Echalí ne si'néami pagótami machimea mapu Jesucristo ne bachá Walubela ju, ayénachó si'néami aboni jeanimea mapu Binói ne Walubela ju. A'lí Riosi Onorúami echirigá waminabi walubélaga anér ami níima.

Echi jaré napawika bichiyámi ne galá machira echí ne Bichíwali

¹² Echijiti 'yemi, keni ritémawa mápuni ne wabé galé, achigórigá mapurigátamo sinibí galá tamí nijewáli, jipi ayénachó galá tamí nijewási mapalí nijeni 'yemi mi ané máputamo kilí ologá, galá majaga, sinibí galabé ologá pirélabotamo, mapujiti Riosi ma 'yemi mi ku wikáwali. Jipi waminabi echirigá olasi mapalí nijeni mikabé atí, achigórigá mapurigátamo olali chabénala mapalini echo'ná 'yemi yuwa asali.¹³ A'lí echí Walubela Riosi chopi ju mapu 'yemi mi echirigá galabé oliri, ayénachó Binói sinibí 'yemi mi ku'wira mapurigátamo echirigá galabé olabo, mapujiti Riosi wabé nakí máputamo echirigá galabé oláami níibo.¹⁴ Sinibí ne suwaba galabé olasi. Tarapé ni'yókami níisi, nibilé siné chuillé na'láwami niráa.¹⁵ Mapurigátamo ketasi riwirúami níibo chati sitíi oláami niráa, chopi mapurigátamo Riosi kúchuwala níibo, tarapé chati sitíi oláami, mapuyénasítamo wabé galabé ologá piré jena'í wichimóbachi, mapo'ná echí auché jaré pagótami wabé chati sitíi oláami ju, wabé sitíi 'nátami ayénachó. A'lí mapuyénasí 'yémítamo echirigá galabé ologá piré, echalítamo galá machírabo echí ne Bichíwali jena'í mapo'ná echí auché jaré chati sitíi oláami pagótami mapurigá echo'ná rokowárali niráa chopi piré. A'lí bichétamo galá ratábami niráa níibo jena'í rokowárali, mapurigá echí wíkabé sopolí ne galá ratábami ju.¹⁶ Ayénachótamo galá nawisabo echí we Galabé Riosi Ra'íchala. A'lí echalí mapalí echí Walubela Jesucristo ku nolínama, nijeni ne wabé kanílama mapujiti 'yémítamo galá bichiyámi níili. Echalí nijeni machimea mapu nijeni galabé ologá bitéali, ayénachó mápuni ketasi 'wepi nóchali mapalini 'yemi mi nawésali echí Galabé Riosi Ra'íchala, mapujiti 'yémítamo galá bichiíli.¹⁷ A'lí mapujítitamo echirigá galá bichiíli, echijiti 'yémítamo aboni niráa 'yalí Riosi, mapurigátamo chopi olabo mapurigá Riosi Binói nakí. A'lí nijeni arigá waminá mi'lirúami níisagá mapujítini ayénachó chopi nakí olánala mapurigá Riosi nakí, echalini arigá ne wabé kanílama, ayénachóni nakí mapu 'yémítamo galá kanílubo tamí yuwa.¹⁸ ¡Echirigá ne wabé kanílasi 'yemi, achigórigá mapurigá nijeni wabé kanila!

Pablo julánali echí Timoteo echo'ná Jilípochi, echí Epajorito ayénachó

¹⁹ A'lí echí Walubela Jesucristo echirigá nakisáagá, nijeni mayé mapu ke 'me ayó nijeni julama echí Timoteo echo'ná 'yemi mi 'nénala, mapurigani wabé kanílama mapalí binói ku nawasa tamí ku ruyema mapu 'yémítamo galabé ologá piré.²⁰ A'lí je'ná Timoteo achigórigá 'nátami ju mapurigá nijeni 'nata, ayénachó binói ne wabé nakí mapu 'yémítamo ne bichíwali waminabi ku'wíratami níibo. A'lí ke wesi auché bilé nirú tamí yuwa nóchami mapu achigórigá galabéala 'nátami ju.²¹ Mapujiti ne si'néami echí auché jaré chopi nakí olánala mapurigá aboni nakí. A'lí ke wesi nakí olánala mapurigá Jesucristo nakí mapu aboni olama.²² Chopi 'yémítamo ma galá

machí mapurigá echí Timoteo sinibí galabé ologá bitéali, ayénachó mapurigá binói sinibí tamí ku'wírali je'ná Galabé Riosi Ra'íchala nawésiya, achigórigá mapurigá bilé towí, wabé galá ku'wira binói onolá.²³ Nijeni mayé mapu ke 'me ayó nijeni echirigá julama echí Timoteo echo'ná 'yemi mi 'nénala, mapalini ma galá machí churigani ikimea nijé;²⁴ chopi nijeni ayénachó mayé mapu echí Walubela Jesucristo tamí ku'wírama mapurigá ke 'me ayó nijé binói ayénachó omérama echo'ná simiyá 'yemi mi 'némiya.

²⁵ Chopi nijeni mayé mapu arigá 'wérali ju mápuni ayénachó echo'ná julama echí rijimala Epajorito riwéami, echí mapu tamí yuwa nóchami ju, echí mapu ayénachó achigórigá 'wérali olá, Riosi nóchala olayá. A'lí binói Epajorito ju mapu 'yemi aboni chabénala wakiná júuli mapurigá binói tamí ku'wírama.²⁶ Echi Epajorito ne wabé 'nénali si'néami 'yemi ritémrtami echo'ná Jilípochi piréami, ayénachó binói sinibí 'yemi chopi jiti 'nata, mapujiti binói galá machí mapu 'yémitamo ma ruyérami níili mapurigá binói we nayúami níili.²⁷ A'lí ne bichíwali ju mapu echí Epajorito ne wabé nayúami níili; ayénachó binói ne noguí mukuli; chopi Riosi ma ne wabé natimaka ku sa'wáli. A'lí Riosi echirigá ologá ayénachó tamí wabé natimali, mapurigani ketasi ne wabé simírami o'monáma, mapujiti nijeni arigá we o'mona wiká karúmati jiti, chopi a ne bichíwali mukusáagá echí Epajorito, echalí nijeni ne wabé simírami o'monámili.²⁸ Echijiti nijeni waminabi wabé nakí julánala echí Epajorito echo'ná 'yémichi, mapurigá 'yémitamo auchecho ku riwisáa, ne wabé kanílabotamo, ayénachó mapurigá nijeni auchecho ku kanílama.²⁹ Galá kaníliga ku naresi echí Epajorito, mapujiti bilé rijimala ju, galá bichíyami niráa echí Walubela Jesucristo. Ne sinibí galá nilasi echí auché jaré ritémrtami, si'néami mapu ikí achigórigá galabé oláami ju, mapurigá echí Epajorito olá,³⁰ mapujiti binói ne noguí mukuli mapalí ne wabé simírami nóchali Jesucristo nóchala olayá. Echalí binói arigá ne wabé nakili tamí ku'wíranala, mapalí binói ketasi 'me kaníliami níili, mapujiti echirigá nayúami níili. Echalí binói echirigá nóchali tamí ku'wíriya, mapujiti ke wesi echí auché jaré 'yemi omérati tamí ku'wíriya, mapujítitamo we mikabé muchúwami níili.

Echi Pablo galá omérati wachínaga ologá bitéliya mapujiti galá bichíili Jesucristo

3 Jipi, 'yemi keni ritémawa, ne wabé kanílasi mapujítitamo ma galá bichíili echí Walubela Jesucristo niráa. Tarapé nóchali ju mapurigani 'yemi mi auchecho siné osema achigórigá mapurigani chabénala 'yemi mi oseli. A'lí 'yémitamo galá ku'wíratami níibo átamo echirigá galá bichíisagá.² Galá tibusi 'yemi aboni niráa, mapurigá echí auché jaré si'winárigá nawésami rijói ketasi 'yemi mi 'yékama. Abóniko wabé nakówami ju, mapurigá kochí niráa, ayénachó aboni wabé chati sitíi oláami ju. A'lí aboni chopi nakí mapurigá 'yémitamo noligá sikirétami níibo.³ Chopi tamujeta galá bichíiga o'wiké Riosi, iwigala niráa; ayénachóta wabé kanila mapujítita Jesucristo níwala ju. Tamujeta galá bichíyami ju Riosi, chópita ketasi mayé mapu echí jaré pagótami ku wikawárami níima, chopi mapujiti aboni noligá sikirétami ju.⁴ Chopi a echirigá nakisáagá nijé, siné káachini mayemi mapu nijé binói ku wikawárami níima mapujítini galabé olali. A jaré mayésagá mapu aboni ku wikawárami níima mapujiti aboni we galá oláami ju, nijeni wabé simírami echirigá galá oláami níili, chópini galá machí mapu nijeni ketasi ku wikawárami níili mapujítini echirigá galabé oláami níili, chópini ne bichíwali ku wikawárami

níili mapujítini galá bichíili. ⁵Nijeni noligá sikirétami níili ma osá naó rawé chi'lesa, mapalí jónsani nawáli. Nijeni Isaeli anilíwami pagótami ju, ayénachóni bilé ju echí jaré Benjamini kúchala kúchuwala. Nijeni Ebreo ra'íchami ju, mapurigá nijé 'wénawala ayénachó Ebreo ra'íchami níili. A'lí nijeni sinibí galá nijéwali echí nulalíwami, mapujítini níili binériami, Bariseo anilíwami. ⁶Echalí chabénala nijeni ne wabé níлага olánali ne suwaba mapu echí Moisesi osogá nulali, ayénachóni wabé kichiga a'najáitali echí jaré napawika bichíyami ritémptami, si'néami mapu ikí bichíyami níili Jesucristo niráa. A'lí mapujítini galá nijéwali echí nulalíwami, echijiti ke wesi echí jaré Juríosi pagótami tamí chibi aneli. ⁷Chabénala nijeni mayeli mapu suwaba je'ná jeyiri tamí ku'wíriami níili, chopi mani galá bichíili Jesucristo niráa, echijítini mayé mapu suwaba echí jaré namuti mápuni echirigá nijéwaga olali tarapé tamí ku'wírali, ayénachóni ma ariweli echiyiri namuti mapurigani chopi bichíima Jesucristo niráa. ⁸Echirigani ma tarapé natéami niráli suwaba echiyiri namuti mapurigani chabénala olali. Jipi nijeni chopi machinala echí Walubela Jesucristo, mapujítini mayé mapu suwaba echiyiri namuti mápuni chabénala olali tarapé natéami niráa ju, mapurigá ripuka niráa. Chopi ne wabé simírami galabé ju máputa bichíbo Jesucristo niráa, ayénachó máputa Binói níwala níbo. Echijiti nijeni ma ariweli suwaba echí jaré namuti mápuni chabénala olali. ⁹Jipi nijeni chopi nakí mapurigani Jesucristo yuwa riwirúami níima, ne galabé wachínaga oláami niráa, mapujiti Riosi tamí echirigá 'yama, mapujítini ma galá bichíili Jesucristo niráa. Chopi nijeni ketasi echirigá galá wachínaga oláami níima, mapujiti nijé binói nijéwaga olali mapurigá Moisesi osogá nulali. ¹⁰Nijeni chopi nakí mápuni waminabi galá machimea Jesucristo, ayénachó mápuni níwama Binói níwala omérawala, achigórigá mapurigá Binói wabé omériami níili mapalí ku owíñali, mapalí ma mukúami níili. Ayénachóni nakí mápuni risíu olárami níima mapurigá Jesucristo risíu olárami níili, ayénachó mápuni mukumea mapurigá Binói mukuli, ¹¹mapujítini nakí mápuni auchecho ku owínama echalí mapalini ma mukúami níima.

Echi Pablo galá bichíiga bitéali mapurigá binói auchecho ku owínama waminánomí

¹²Nijé ketasi nakí aninala mápuni ma sebárali suwaba je'ná jeyiri, mapujiti nijeni ketasi cho sebárali echí ne wabé Galabéala. Arigani bacháami minabi inara mapurigani sebárama echí ne wabé Galabéala, mapujiti Jesucristo bachá niráa tamí ku wíkawali mapurigani echirigá 'yárami níima. ¹³Keni ritémawa, nijé binói ketasi aní mápuni ma sebárali echí ne wabé Galabéala, chópini arigá 'wéraili olá mapurigani ma ketasi auchecho ku 'natama suwaba echí jaré namuti jiti mápuni ma olali. Jípini 'wéraili olá mapurigani sebárama ne suwaba mapu Riosi tamí 'yama waminánomí, ¹⁴mapurigani sunima suwaba nóchali mapu Riosi tamí 'yali mapurigani olama, ayénachó mapurigani narema echí wabé Galabéala mapu Riosi tamí 'yama, mapujiti echí Walubela Riosi echo'ná ripá riwigachi atíami tamujé tamí 'yama echí ne wabé Galabéala, mapujítita Jesucristo níwala ju. ¹⁵Galá níima mapu ne si'néami tamujé mapu ikita sébali galá bichíyami juko ayénachó je'ná jerigá 'natasa. A'lí a jaré 'yemi si'winárigá 'natásagá bilé namuti jiti, echalí Riosi ayénachó 'yemi mi machírama mapu nijeni ne bichíwali aní. ¹⁶Chopi arigá galá níima máputa waminabi galá bichíiga olabo, achigórigá mapurigata ma galá bichíili. ¹⁷'Yemi keni ritémawa sinibí achigórigá galabé olasi mapurigá nijeni olá,

ayénachó olasi mapurigá echi auché jaré ritémrtami olá, si'néami mapu ikí chopi olá mapurigá tamujeta binérali aboni.¹⁸ Mapujiti wikabé 'yena Jesucristo kúrsuwala sayériya. Je'ná jerigá aniwáami ju: Abóniko chopi sayéraga nawesa jeanigá mapu Jesucristo ketasi mukuli echi pagótami chati sitíi olalila jiti. Chabénala nijeni wisabé 'yemi mi je'ná jerigá aneli, ayénachóni abijí ne ukuénaga 'yemi mi echirigá ruyé.¹⁹ Echalí ne jubá rawé abóniko waminá suwábarami níima. Abóniko ketasi o'wiké echi Walubela Riosi, chopi aboni chuwé olá mapurigá aboni chopi nakí olánala. A'lí abóniko ne wabé nóchami ju, chopi galá níima mapu aboni ne wabé riwélasa. Abóniko chopi wabé koruka 'nata jena'í wichimóbachi nirúami namuti jiti.²⁰ Chopi tamujé bichiyami mata níwa risensia máputa echo'ná ripá riwigachi piréami níbo. A'lí jípita buwé mapurigá echo'ná ripá riwigachi jonsa ku nolínama echi Walubela Jesucristo, echi mapu tamujé tamí Ku'wíriami ju.²¹ Échiko si'nú bukulíwami ku galabéala niráa niwáma tamujé sapala mapu arigá risúwati, pe omérami ju; mapurigá tamujé sapala ku galabé niwárami níima, achigórígá mapurigá Jesucristo galabéala sapala, echo'ná ripá riwigachi nirúami. A'lí Jesucristo echirigá ne wabé omériga olama mapujiti Binói ne Walubela ju, suwaba namuti yuwa.

Sinibí wabé kanílasi mapujítitamo bichíi echi Walubela Jesucristo

4 Echijiti 'yemi keni ritémawa sinibí waminabi nokuísi ne galá bichíisiya. Nijeni 'yemi mi ne wabé galé; ayénachóni ne wabé nakí 'yemi mi 'nénala, mapujiti 'yémítamo galá bichíili Jesucristo niráa, mapalí nijeni 'yemi mi nawésali Riosi Ra'íchala. Echirigá 'yémítamo tamí 'yárami níili mapurigá níjé natétawami niráa.²² Nijeni we táni mapurigá echi okuá muguí, echi Eboria riwéami, echi Síntike riwéami, a'nagupi auchecho galá ku kanílaga chópirigá 'natama, mapujiti okuánika galá bichiyami ju Jesucristo, mapurigá ritémrtami niráa.²³ Ayénachó nijeni mi táni, mujé mápumi galá bichíiga nóchami ju tamí yuwa, mápumi galá ku'wírama je'ná okuá muguí mapu galá bichiyami ju Jesucristo, mapurigá ritémrtami niráa. Abóniko ma wabé tamí ku'wírali mapalini iyénali echi Galabé Riosi Ra'íchala nawésiya, achigórígá mapurigá echi Klemente riwéami rijói ayénachó tamí ku'wírali, ayénachó mapurigá echi auché jaré ritémrtami tamí wabé ku'wírali. Ne si'néami aboni riwalá ma osirúami ju echo'ná Riosi oselíwalachi mapurigá aboni ne sinibí niráa pirélama.

⁴ Sinibí ne wabé kanílasi mapujítitamo echi Walubela Jesucristo níwala ju. Auchecho siné nijeni 'yemi mi jerigá ruyé: ¡Ne wabé kanílasi! ⁵ Sinibí ne wabé galigá olasi suwaba mapu ikítamo olá, mapurigá echi auché jaré pagótami 'yemi mi machimea mapurigá ne galá galéami niráa. ¡Echi Walubela Jesucristo ke 'me ayó ku nolínama jena'í wichimóbachi!

⁶ Tarapebi yiri jiti siwega 'natasi 'yemi, chopi sinibí Riosi yuwa ra'íchaga tansi mapurigá Binói 'yemi mi ku'wírama; ayénachó sinibí walú natétara 'yasi. ⁷ Echalí Riosi 'yemi mi 'yama máputamo sinibí kilí ologá pirélabo. A'lí bichétamo ketasi omérabo machiyá mapu churigá Riosi echiyena ne wabé simírami 'yemi mi ku'wira, chopi Binói 'yemi mi echirigá tibútama sulachí niráa, ayénachó Binói 'yemi mi 'yama máputamo sinibí galabé niráa 'natabo.

Galá 'natasi echi galabéala 'nalina

⁸ Keni ritémawa, ne jubáami niráa nijeni 'yemi mi ané máputamo suwaba chopi 'natabo echi ne Bichíwali 'nalina, ayénachó 'natasi suwaba echi ne wabé

galabéala 'nalina mapu galabé nirárami ju, ayénachó chopi 'natasi suwaba mapu wachínaga oluwáwami ju. Sinibí 'natasi suwaba mapu ketasi chati sitíi oluwáwami ju, ayénachó 'natasi suwaba echi jaré namuti 'nalina mapu Riosi echijiti sinibí galá kanila, ayénachó 'natasi ne suwaba 'nalina mapu machirúami ju galabéala niráa. Echirigá sinibí 'natasi suwaba echi galabéala 'nalina, suwaba mapu Riosi Binói galabéala niráa ané. ⁹Sinibí galabé ologá pirélasi achigórigá mapurigá nijeni 'yemi mi binérali, achigórigá mapurigá nijeni 'yemi mi nuleli máputamo olabo, ne suwaba máputamo námali tamí ra'íchachi, ne suwaba mapu ikítamo riwali tamí oláachi. Jipi jonsa ne suwaba echirigá galabé olasi, a'lí echi Walubela Riosi mapu 'yemi mi 'yali mapurigátamo sinibí galá kilí ologá pirélabo, Échiko sinibí 'yemi mi yuwa níima.

Echo'ná Jilípochi piréami náwali jaré wenomí echi Pablo 'yánala

¹⁰Nijeni ne wabé kanila mapurigá bichíyami niráa echi Walubela Jesucristo, mapujiti 'yémitamo ma auche echo siné ku 'nátali tamí jiti. Nijeni ke siné mayeli mapu 'yémitamo ketasi tamí jiti 'natabo, mapujítini galá machí máputamo ketasi omérali tamí ku'wíranalaga náwala, mapujiti chabé jonsa ke wesi simili echo'ná 'yémichi jonsa, jena'í yénasí. ¹¹Nijeni ketasi aní mápuni ne wabé newalé jaré namuti, mapujiti nijeni ma bineli mápuni sinibí kanílama echi jaré namuti chopi jiti mapu ikini níwa. ¹²Nijeni galá machí risúwati niráa bitéliya, ayénachóni machí ne simírami niráa níwaga bitéliya. Nijeni sinibí kaníлага bité mapalini ne suwaba níwa, ayénachó mapalini ne wabé 'loché. Echirigá nijeni sinibí galá kanila mapalini tarapé namuti níwa, achigórigá mapurigani kanila mapalini wikabé simírami níwa. ¹³Nijeni galá omero anacha mapuyíripi tamí yuwa ikí, mapujiti Jesucristo tamí jiwerata. ¹⁴Chopi 'yémitamo arigá ne wabé galabé olali mapalítamo náwala tamí ku'wíranala.

¹⁵'Yemi napawika bichíyami ritémtami echo'ná Jilípochi piréami ne galá machí mapu ke wesi auché jaré ritémtami tamí ku'wírali mapalí nijeni chótali nawésiya Riosi Ra'íchala, mapujiti chabénala mapalí echo'ná Maseróniachi anilíwachi kawírali jonsa nijeni waminá bacháami auché jaréana nawisásiya simili, echalí 'yémitamo chopi náwali tamí ku'wíranala, mapujítitamo galá kaníli mapalí nijeni 'yemi mi nawésali Riosi Ra'íchala. ¹⁶Chabé mapalí nijeni abijí echo'ná Tesalónachi anilíwachi walúlachi asali, echalí 'yémitamo náwali tamí ku'wíranala. A'lí ketasi sinepi chopi níili mapalítamo echirigá náwali tamí 'yánalaga echi jaré namuti mapu nijeni newaleli. ¹⁷Nijeni ketasi chopi nakí mapu 'yémitamo tamí 'yabo jaré 'yemi níwala namuti. Nijeni nakí mapu 'yémitamo waminabi wabé níwami níibo Riosi yuwa, mapujítitamo echirigá ku'wírali mapurigá Riosi Ra'íchala waminabi nawisárami níima. ¹⁸Mapujiti nijeni ma nareli suwaba mapu ikí nijeni newalé. Mani nareli echi jaré namuti mapu 'yémitamo náwali tamí ku'wíranala, echi Epajorito tórataga. Jípini ne wabé simírami níwa. A'lí Riosi Binói ne wabé kaníili mapujiti 'yémitamo echirigá tamí ku'wírali, achigórigá mapurigá Binói kaníli mapalí echi jaré Juríosi pagótami ikósaga 'yali echi wabé simírami júkami moluwá. ¹⁹A'lí echi Walubela níjé Riósawala ne wabé simírami 'yemi mi 'yama suwaba mapu ikítamo newalé, achigórigá mapurigá Binói ne wabé simírami níwami ju echo'ná ripá riwigachi, Jesucristo yuwa. ²⁰¡Sinibí niráa waminabi walubélaga anérami níлага Riosi, tamujé Onolá! ¡Echirigá níima!

Pablo ku ripora echí jaré napawika bichíyami

²¹Nijeni náwali walú ripóranala ne si'néami echí jaré napawika bichíyami ritémtami, mapujítita Jesucristo níwala ju. ²²Ne si'néami echí jaré Riosi níwala pagótami jena'í Rómachi piréami ayénachó 'yemi mi ripóraga náwali. A'lí ne bachá niráa 'yemi mi ripóraga náwali echí jaré ritémtami mapu echo'ná echí ne walula silíami kalílachi nóchami ju. ²³Nijeni wabé nakí mapu echí Walubela Jesucristo sinibí ne wabé galigá ku'wírama si'néami 'yemi. ¡Echirigá níima!

Osirúami

mapurigá San Pablo oséli echo'ná

KOLÓSACHI PIRÉAMI

Echi Pablo osé echo'ná Kolósachi piréami napawika bichíyami

1 Nijé, Pablo, 'yemi mi osé je'ná oselí. Nijeni julárami ju nawisánala echi Galabé Riosi Ra'íchala mapurigá Riosi Binói nakí. Ayénachó echi rijimala Timoteo tamí yuwa atí. ²Nijeni je'ná jerigá 'yemi mi osé máputamo echo'há Kolósachi anilíwachi piréami ju, si'léami máputamo ikí Riosi níwala pagótami ju, mapujítitamo galá bichíi Jesucristo niráa. Wabeni nakí mapu echi Walubela Riosi, tamujé Onolá, 'yemi mi wabé ku'wírama, ayénachó mapu Binói 'yemi mi 'yama mapurigátamo kilí ologá pirélabo.

Echi Pablo tani mapurigá Riosi ku'wírama echi jaré bichíyami

³Ne sinibí mapalí tamujeta Riosi yuwa ra'íchaga tani mapurigá Binói 'yemi mi ku'wírama, tamujeta walú natétara 'ya echi Walubela Riosi, echi mapu tamujé Walubélawala Jesucristo Onolá ju. ⁴Tamujeta ma námali mapurigá 'yémítamo ma wabé galá bichíili Jesucristo niráa. Ayénachóta námali mapurigátamo ne wabé galé si'léami echi auché jaré Riosi níwala pagótami. ⁵A'lí 'yémítamo echirigá galé aboni mapujítitamo galá bichíiga buwé mapurigátamo narepo ne suwaba echi galabéala mapu Riosi 'yemi mi 'yama echo'ná ripá riwigachi. A'lí bichétamo echirigá bichíiga buweli chabé jonsa mapalí jónsatamo bachá niráa námali echi ne bichíwali galabé Riosi Ra'íchala. ⁶A'lí je'ná Galabé Riosi Ra'íchala mapu nawisárami níili echo'ná 'yémichi ayénachó ma nawisárami ju ne suníami jena'lí wichimóbachi. A'lí mapurigá 'yémítamo wabé galabératami níili mapalítamo galá bichíili echirigá nawisálawami jeanigá mapu Riosi ne bichíwali 'yemi mi wabé galé, jipi ayénachó auché jaré pagótami wikanáami piréami echirigá achigórígá bichísimi. A'lí aboni ayénachó echirigá achigórígá galabératami níili. ⁷A'lí bichétamo bachá niráa binératami níili Riosi Ra'íchala mapalí echi Epájasi riwéami rijimala 'yemi mi nawésali. A'lí echi Epájasi Jesucristo piónawala ju ne galá bichíyami niráa, mapurigá tamujé ayénachó Jesucristo piónawala ju. A'lí ne si'léamita ne wabé galé echi Epájasi mapujiti binói ne galá nawésami ju Jesucristo Ra'íchala. ⁸A'lí echi Epájasi ma tamujé tamí ruyeli mapurigá 'yémítamo a'nagupi galéami ju, ritémtami niráa, mapurigá echi Wabé Galabé Riosi Iwigala 'yemi mi echirigá olírali.

⁹Echijiti tamujeta sinibí táni mapurigá Riosi 'yemi mi ku'wírama. A'lí bicheta echirigá tánali echalí rawé jonsa mapalita bachá námali máputamo galá bichíyami níili. A'lí bicheta we tani Riosi máputamo ne sébali galá machiboa suwaba mapu

Riosi Binói nakí máputamo olabo. Ayénachóta tani mapu Riosi 'yemi mi 'yama mapurigátamo ne galá machíami níibo, ayénachó mapurigátamo galá 'nátami níibo, achigórigá mapurigá Riosi Binói galá 'nátami ju.¹⁰ A'lí bicheta tani máputamo sinibí galabé ologá 'yénabo mapurigá galá níima oluwawa mapujiti 'yémítamo echi Walubela Jesucristo níwala ju. Ayénachóta tani máputamo sinibí ne suwaba galá olabo mapurigá Riosi nakí máputamo olabo, ayénachó máputamo sinibí ne sébali olabo echi ne wabé galabé oluwáwami. Ayénachóta tání máputamo sinibí rawé binebo waminabi galabé machiyá Riosi.¹¹ Ayénachóta tani mapu Riosi 'yemi mi waminabi galá bichíratama, mapujiti Binói echi ne wabé jiwérämi Walubela Riosi ju. Echalítamo wabé kaníflaga pirélabo, ayénachótamo galá omérabo kilí ologá anacha mapurigátamo risúu olárami ju, ayénachótamo arígá ne wabé kanílabo sulachí niráa.¹² Ayénachóta tani mapu 'yémítamo sinibí walú natétara 'yabo echi Riosi Onorúami, mapu tamujé tamí ku'wírali mapurigata galá omérabo narée suwaba echi galabéala níjíwami mapu Riosi tamujé tamí 'yama, achigórigá mapurigá si'néami echi auché jaré Riosi níwala pagótami ayénachó narema echo'ná ripá riwigachi, mapo'ná sinibí ne wabé ratábami niráa rayénama.¹³ A'lí echi riablo ne wabé omériami ju tamujé tamí sayera. Chabénala mapalita ketasi cho machili Riosi, echalí echi riablo tamujé tamí oméráli, chopi jipi mapujítita galá bichíiga níjewa Riosi, jipi Riosi tamujé tamí muchúwali echo'ná mapo'ná echi bilepi Riosi Ranala we Nuláami ju, echi mapu Riosi ne wabé galé.¹⁴ A'lí echi bilepi Riosi Ranala tamujé tamí ku'wírali mapalí Binói miná mi'lirúami níili tamujé chati sitíi olalila jiti. Echirigá Binói tamujé tamí ku wikáwali suwaba mapurigata chati sitíi olali.

Riosi 'yali mapurigá echi jaré pagótami oméraama kilí ologá pirélya Binói yuwa, mapujiti echi bilepi Riosi Ranala wabé léniga mukuli aboni jiti echo'ná kúrsichi

¹⁵ A'lí echi Walubela Riosi Onorúami ke ritiwíwami ju. Chopi echi bilepi Riosi Ranala arígá nawali jena'í wichimóbachi mapurigá Rijói niráa. A'lí echi Bilepi Jesucristo chopi a yiri ju echi Walubela Riosi Onorúami yuwa, chopi Jesucristo mapurigá Rijói niráa niílali. A'lí echi Bilepi Riosi Ranala sinibí bitéali chabé chokichí mapalí ke cho niwárami níili suwaba echi jaré namuti mapu ikí nirú.¹⁶ A'lí echi Walubela Riosi nuleli echi bilepi Binói Ranala niwánala ne suwaba namuti mapu ikí nirú echo'ná ripá riwigachi, ayénachó ne suwaba namuti mapu ikí nirú jena'í wichimóbachi. Echirigá echi bilepi Riosi Ranala niwáli ne suwaba echi jaré namuti mapu ikí ke machiná nirú, ayénachó Binói niwáli ne suwaba echi auché jaré namuti mapu ikí galá machiná nirú. Ayénachó Binói niwáli ne si'néami echi jaré o'wéala Riosi kapitánawala, ne si'néami mapu ikí pée o'wéala ju mulubé Riosi yuwa, ayénachó ne si'néami mapu ikí o'wéala ju tamujé pagótami yuwa. Echirigá ne suwaba namuti niwárami níili Jesucristo jiti, ayénachó ne suwaba niwárami níili mapurigá Jesucristo níwala níima.¹⁷ A'lí echi Walubela Jesucristo sinibí niráa bitéali ki'yá chokichí mapalí ketasi cho niwárami níili echi jaré namuti mapu ikí nirú. A'lí biché Binói sinibí jiwérataga olá mapurigá ne suwaba namuti ketasi miná suwibama.¹⁸ Ne suwaba je'ná jerigá ne bichíwali ju. Chopi ayénachó bichíwali ju mapu echi Walubela Jesucristo ne Walubela ju si'néami echi jaré napawika bichíyami yuwa achigórigá mapurigá bilé rijói mo'ola ne bachá niráa ju suwaba echi rijói sapala yuwa. Mapujiti ne si'néami echi jaré napawika bichíyami, ne napawika niráa, mapurigá bilepi rijói niráa ju, chopi Jesucristo ne

Walubela ju si'néami aboni yuwa, mapurigá echi bilé rijói mo'ola niráa. Ayénachó Jesucristo 'ya mapurigá echi jaré napawika bichíyami galá bichíiga pirélama. Ayénachó Jesucristo ne bachá níili mapu Binói ku owíuali mapalí ma mukúami níili, mapurigá Binói echijiti ne Walubela níima ne suwaba yuwa.¹⁹ Mapujiti echi Walubela Riosi Binói ne suwaba nakili bitéranala echo'ná pachana Jesucristo yuwa. ²⁰ Ne si'néami pagótami wabé sayérali Riosi, chopi Riosi ketasi nakili mapu echi pagótami echirigá waminabi sayérama Binói. Echijiti Riosi nijali echi bilepi kepu Raná mapurigá Binói Jesucristo mukumea echi jaré pagótami chati sitíi olalila jiti, echo'ná biléana kúrsichi michónataga. Echirigá ne si'néami pagótami mapu ikí bichíima Jesucristo niráa, galá ku kanílama Riosi yuwa. A'lí Riosi nakili mapu ne si'néami pagótami jena'í wichimóbachi piréami echirigá ku kanílama Binói yuwa, ne si'néami pagótami echo'ná ripá riwigachi muchúami ayénachó. Echijiti Jesucristo mukuli echo'ná kúrsichi, aboni chati sitíi olalila jiti.

²¹ Chabénala 'yémítamo ketásirapé machili Riosi. Echalí 'yémítamo sinibí wikabé namuti wabé chati sitíi olali. Echirigátamo chopi wabé chati sitíi 'nátaga sayérali Riosi echo'ná 'yemi sulálachi niráa. Jipi Riosi ma 'yemi mi ku kanílatali Binói yuwa, mapurigátamo ne wabé galigá pirélabo Riosi yuwa. ²² A'lí Riosi je'ná jerigá olali mapujiti Binói Ranala, echi Walubela Jesucristo, rijói niráa wabé léniga mukuli echo'ná kúrsichi, mapurigá Riosi echijiti galá omérama 'yemi mi wéemi raweka jawaba bacháami Binói Riosi yuwa, Binói níwala niráa, tarapé chati sitíi oláami, nirapé wi'nijírami niráa. ²³ A'lí bichétamo pe waminánomí echirigá jawábarami níbo átamo ne bichíwali ne wabé galá bichíyami níisagá Jesucristo niráa. Ayénachó átamo ne sinibí echirigá achigórigá galá bichísisagá, ayénachó átamo ke siné ariwésagá bichísiya mapu Riosi sinibí 'yemi mi waminabi ku'wírama. Mapujiti mátamo bichíili echirigá nawisálawami mapurigá ayénachó nawisárami ju ne suníami jena'í wichimóbachi. A'lí níjé Pablo ayénachó ku'wira echirigá nawesa.

²⁴ Jipi níjeni arigá wabé kanila mapalí echi jaré ke bichíyami pagótami tamí risúu olá mapujítini 'yemi mi nawesa Riosi Ra'íchala. A'lí níjeni echirigá kanila mapujítini echirigá péebi niráa risúu olárami ju, mapurigá Jesucristo Binói waminabi wabé simírami risúu olárami níili mapalí Binói waminá mi'lirúami níili echi jaré Binói pagótamawala chati sitíi olalila jiti. A'lí si'néami echi jaré napawika bichíyami, ne napawika niráa ju, mapurigá Binói Jesucristo sapala niráa ju. ²⁵ A'lí Riosi tamí wilali mapurigani nawésama echi jaré napawika bichíyami. Echirigá Riosi tamí nawesánala júuli mapurigani 'yemi mi echirigá ku'wírama, mapurigani ne suwaba, ne sébali niráa, 'yemi mi nawésama Riosi Ra'íchala. ²⁶ Ayénachó tamí nawesánala júuli mapurigani galá machírama echi jaré pagótami mapurigá echi Walubela Riosi Ranala pachana bitélama echi jaré bichíyami pagótami sulálachi niráa. Chopi chabé ki'yá, ne wabé wikabé bamíbali jonsa, je'ná jerigá ketasi cho machirúami níili jena'í wichimóbachi piréami jiti. Chopi jipi Riosi ma 'yali mapurigá Binói níwala pagótami galá machimea ne suwaba je'ná jeyiri. ²⁷ A'lí Riosi nakili mapu echi jaré Binói níwala pagótami galá machimea mapurigá Binói Riosi wabé omériga olama riwéali echi jaré isena pagótami yuwa mapu ketasi Juríosi ju. A'lí Riosi je'ná jerigá olánali: Binói nakili mapu echi Walubela Jesucristo bitélama echo'ná pachana 'yemi sulálachi niráa. A'lí bichétamo echijiti bichíiga buwebo mapurigátamo wabé o'wéalatami níbo Jesucristo yuwa waminánomí.

²⁸A'lí tamujeta sinibí galá nawesa Jesucristo jiti rugá. A'lí tamujeta echirigá galá ruwigá binera ne si'néami pagótami mapurigá aboni galá machimea Riosi Ra'ichala, ayénachó mapurigá aboni galá bichíima Jesucristo niráa, mapurigá aboni napabúrami níima Jesucristo yuwa. ²⁹A'lí bicheni sinibí echirigá nawésaga nochá mapurigá echí Walubela Jesucristo Binói tamí wabé omériga jiwérata.

2 A'lí nijeni wabé nakí mapu 'yémítamo galá machiboa mapu chu yena 'nata nijé 'yemi jiti. Ayénachó nijeni wabé tani Riosi 'yemi jiti, ayénachóni tani echí auché jaré napawika bichíyami jiti echo'ná Laoriséachi anilíwachi piréami, si'néami mapu ikí ketasi cho tamí ritiwako. ²Ayénachóni nakí mapu si'néami aboni ne galá kanílatami níima sulachí niráa, mapurigá aboni a'nagupi ne wabé galema. Ayénachóni nakí mapu aboni sinibí ne galá bichíiga pirélama Jesucristo niráa, ayénachó mapurigá aboni ne bichíwali galá machíami níima mapurigá aboni galá machimea echí wabé galabéala mapu chinátami niráa níili, mapujiti kí'yá rawé Riosi ketasi cho machiná niráa riwírali echí Walubela Jesucristo jena'í wichimóbachi, chopí chabé bukulí rawé jonsa Binói ma machiná niráa riwírali. ³Mapujiti echí jaré pagótami chopí ne galá 'nátami níima, ayénachó aboni chopí ne galá machíami níima mapalí aboni ne galá machí echí Walubela Jesucristo. ⁴A'lí nijeni 'yemi mi je'ná jerigá ané mapurigátamo ketasi bichíibo mapalí auché jaré wabé simati ra'íchami 'yemi mi nakí 'yékanala. ⁵Jípini ketasi echo'ná 'yemi yuwa atí, chópini arígá sinibí wabé 'nata 'yemi jiti. Echijitini wabé kanila mapalini nami mapu 'yémítamo arígá we galá olá, mapurigá galá ju máputamo olabo. Ayénachó nijeni wabé kaníili mapalini nami mapu 'yémítamo sinibí waminabi galá bichíisimi Jesucristo niráa.

⁶Echijiti mapurigá 'yémítamo ma galá bichíiga nareli echí Walubela Jesucristo echo'ná pachana 'yemi sulálachi niráa, echirigá achigórigá galá níima máputamo sinibí ne galabé ologá napawika pirélasa Binói yuwa. ⁷Ayénachó galá níima máputamo waminabi galá bichíibo Jesucristo niráa achigórigá mapurigátamo binératami níili. Ayénachó galá níima máputamo sinibí walú natétara 'yabo Riosi. Echalítamo ne bichíwali galá jiwériga bichíyami níibo, mapurigá echí walú rojuá wabé jiwérámi ju, mapujiti wabé jiwéraga nawéami ju.

Echi jaré bichíyami bukulíwami niráa ku piré mapujiti aboni galá bichíi Jesucristo niráa

⁸Ne galá tibútasi 'yemi aboni niráa, mapurigá echí jaré 'yékaka nawésami ketasi 'yemi mi 'yékama, mapujiti aboni ne wabé 'yékaka niráa ra'icha. A'lí aboni chopí ra'icha achigórigá mapurigá aboni 'yékaka niráa 'nata, ayénachó mapurigá echí auché jaré ke bichíyami pagótami sinibí 'nata, jena'í wichimóbachi nirúami namuti jiti.

⁹A'lí echí Walubela Jesucristo arígá achigó yiri ju echí Walubela Riosi Onorúami yuwa, chopí Jesucristo ayénachó Rijói ju. ¹⁰A'lí 'yemi galá bichíyami ma sebárali suwaba echí ne wabé galabéala, mapujiti 'yémítamo ma napabúrami ju echí Walubela Jesucristo yuwa. A'lí Binói Jesucristo waminabi ne wabé simírami Walubela ju, ketasi mapurigá echí auché jaré o'wéala iwigá. ¹¹Echi jaré Juríosi pagótami sinibí noligá sikirela echí jaré aboni kúchuwala echo'ná aboni sapálachi niráa, mapurigá aboni isena niráa níima echí auché jaré pagótami yuwa. Chopí 'yemi galá bichíyami arígá wabé galabératami níili echo'ná pachana 'yemi sulálachi niráa mapalítamo napabúrami níili Jesucristo yuwa, mapurigátamo isena níibo echí auché jaré ke

bichíyami pagótami yuwa. A'lí bichétamo chopi echirigá galabératami níili echo'ná pachana 'yemi sulálachi mapalítamo ku wikawárami níili ne suwaba máputamo chati sitíi olali, ne suwaba mapu ikí 'yémítamo chati sitíi olánali 'yemi sapálachi niráa. A'lí echi Walubela Jesucristo 'yemi mi echirigá galabératali mapalítamo galá bichíili Binói niráa.¹² A'lí mapalí 'yemi bichíyami ma pagótami níili echo'ná ba'wírali, echalí 'yémítamo echi Walubela Jesucristo yuwa chu'wirótami niráa níili echo'ná ba'wírali. A'lí bichétamo ayénachó ku owíntarami niráa níili echi Walubela Jesucristo yuwa echalí mapalítamo ku 'machínali echo'ná ba'wírali jonsa, mapujítitamo bachá niráa galá bichíili echi Walubela Riosi niráa, echi mapu ne suwaba omérami ju, echi mapu ku owíntali echi Walubela Jesucristo mapalí Binói ma mukúami níili.¹³ Chabénala 'yémítamo mapurigá suwíami niráa níili iwígá niráa mapujítitamo ketasi bichíyami níili Riosi. Echalítamo ketasi cho napabúrami níili Jesucristo yuwa, chópitamo wabé chati sitíi oláami níili. Echalítamo achigórigá ologá piréali mapurigá echi auché jaré wichimóbachi piréami. Chopi jipi Riosi ma 'yemi mi 'yali mapurigátamo ne sinibí niráa pirélabo echi Walubela Jesucristo yuwa, mapujiti Riosi ma 'yemi mi ku wikáwali suwaba mapurigátamo chati sitíi olali.¹⁴ Jenalí wichimóbachi piréami pagótami ketasi ne sébali galá nijéwaga olali mapurigá Riosi nulali. Echijiti arígá 'wérali níili mapu Riosi tamujé tamí kastigo 'yama, chopi echi Walubela Jesucristo mi'lirúami níili tamujé chati sitíi olalila jiti, clavo jiti michónataga echo'ná kúrsichi, echijiti Riosi ma galá ku wikáwali suwaba mapu ikí tamujeta chati sitíi olali, si'néami mapu ikita ma galá bichíliko Jesucristo niráa.¹⁵ A'lí mapalí echi Walubela Jesucristo mukuli echo'ná kúrsichi tamujé chati sitíi olalila jiti, Binói echirigá wabé omérali suwaba echi jaré o'wéala chati sitíi iwígá mapu arígá wabé omérami níili. Ayénachó echi Walubela Jesucristo ne machiná niráa 'nérali mapurigá echi jaré o'wéala chati sitíi iwígá ma omératami níili, mapujiti aboni tibili mapurigá omératami niráa mapalí echi Walubela Jesucristo echirigá ni'yúrali.

**Galá níima mapu si'néami echi jaré Jesucristo jiti bichíyami
chopi asa echi jaré namuti ripá riwigachi jonsa nolínami**

¹⁶ Echijiti ketasi ariwesi 'yemi mapu echi auché jaré Juríosi pagótami 'yemi mi wi'nijima mapujítitamo ko'wá jaré namuti mapu aboni ketasi risensia niráa mayé, nirapé mapurigá aboni 'yemi mi wi'nijima mapujítitamo bají jaré bajíwami mapu aboni ketasi risensia niráa mayé. Ke siné ariwesi mapurigá aboni 'yemi mi wi'nijima mapujiti 'yémítamo ketasi omawa mapalí aboni arígá wabé omawa, nibilé mapalí 'yémítamo ketasi omawa mapalí echi michá bukulíwami ju, nirapé mapalí 'yémítamo ketasi isaba achigórigá mapurigá aboni olá echalí isábawachi rawé.¹⁷ Mapujiti ne suwaba echiyiri namuti chopi tamujé tamí binérali mapu churigá ikimea riwéalo ma nawáachi echi Walubela Jesucristo jenalí wichimóbachi.¹⁸ Ketasi ariwesi mapu echi auché jaré pagótami 'yemi mi 'yema echi mékowami mapu Riosi 'yemi mi 'yama. Aboni chopi nakimea 'yemi mi bichíranala mapu arígá 'wérali ju máputamo wabé o'wikebo echi jaré o'wéala Riosi kapitánawala, ayénachó mapu 'yémítamo risúu nílabo 'yemi aboni niráa. A'lí echiyiri binériami chopi wabé binera jaré namuti mapu aboni ke siné galá machí, mapujiti aboni arígá ne wabé nóchami ju. A'lí aboni chopi 'nata mapurigá echi auché jaré ke bichíyami pagótami 'nata.¹⁹ A'lí echiyiri pagótami ketasi napawíkami niráa 'yena echi Walubela Jesucristo

yuwa. Chopi Binói ne Walubela ju echí jaré napawika bichíyami yuwa, achigórigá mapurigá bilé rijói mo'ola ne bachá niráa ju, ne suwaba echí rijói sapala yuwa. Alí Jesucristo galá bichíira echí jaré napawika bichíyami achigórigá mapurigá bilé rijói ayénachó galá ochera mapalí binói galá ko'wá echi ko'wáami. Ayénachó Jesucristo galá napabú echi jaré bichíyami mapurigá aboni bilepi niráa níima, achigórigá mapurigá echi bilé rijói sapala bilepi niráa ju. Alí suwaba je'ná jerigá olárami ju mapurigá echi Walubela Riosi nakí.

²⁰Chopi 'yemi bichíyami ma suwíami niráa jútamo Jesucristo yuwa, mapurigátamo ma ketasi waminabi chati ologá pirélabo mapurigátamo chabénala chati ologá piréali. Echijiti 'yémítamo ma ketasi achigórigá 'nata jenaí wichimóbachi nirúami namuti jiti, mapurigá echi auché jaré pagótami sinibí 'nata. Nibilé cho 'wérali ju mapu 'yémítamo abijí nijéwaga olabo mapurigá echi auché jaré jenaí'í wichimóbachi piréami pagótami 'yemi mi nulé. ²¹Mapujiti echi jaré pagótami jenaí'í wichimóbachi piréami sinibí 'yemi mi je'ná jerigá nulé: ¡Ketasi chachesi je'ná! ¡Ketasi kosí echi auché bilé namuti, nibilé chapisi! ²²'Yémítamo echirigá nulérami ju, chopi ne suwaba echí jaré namuti suwaba suwábarami níima pe waminánomí mapalí 'yémítamo ma echirigá suwábabo karúmati. Ayénachó jenaí'í wichimóbachi piréami pagótami chopi ju mapu 'yemi mi echirigá binéraga nuleli. Riosi ketasi 'yemi mi echirigá nuleli. ²³Bichíwali ju mapu jaré pagótami mayé mapu aboni ne wabé machíami ju, mapujiti aboni galá nijewa echiyiri nulalíwami. Ayénachó echiyiri pagótami mayé mapu aboni galá nijéwaga olá mapurigá Riosi nulá, mapalí aboni wi'lí niráa amachí, ayénachó mapalí aboni risúu nila aboni niráa. Chopi mapalí aboni suní echirigá olayá, echalí aboni abijí ne wabé nakí chati sitíi olánala.

3 Chopi jipi 'yémítamo ma ku o'wíntarami niráa ju, echí Walubela Jesucristo yuwa, echi mapu echo'ná ripá riwigachi ku atí, echo'ná watoná Riosi yuwa. Echijiti jipi bachá niráa chopi ne wabé galabé ologá pirélasi, ayénachó ne wabé galabé 'natasi, mapujiti echiyiri oluwáwami ripá riwigachi jonsa simíbami ju. ²Ne sinibí galá 'natasi echiyiri ne wabé galabéala 'nalina, mapu echo'ná ripá riwigachi jonsa simíbami ju. Chopi ketasi ne wabé simírami 'natasi jenaí'í wichimóbachi nirúami namuti jiti. ³Mapujiti mapalí echi Walubela Jesucristo mukuli 'yemi chati sitíi olalila jiti, echalí Riosi 'yemi mi niralí mapurigá ma suwfámi niráa. Alí jípita ketasi machiná niráa ritiwá echi Walubela Jesucristo, chopi mapujiti Binói ma ku owíntarami ju, echijiti tamujé bichíyami bukulíwami niráa ku piré Binói yuwa, ayénachóta napawíkami ju Riosi yuwa. ⁴Tamujé bichíyami chópita Jesucristo jiti piré. Alí waminánomí mapalí Binói ne machiná niráa ku nawama jenaí'í wichimóbachi, echalí si'néami 'yemi máputamo Jesucristo niráa bichíiko, ne machiná niráa riwirúami níibo mulubé Binói yuwa, ne wabé o'wéala niráa, achigórigá mapurigá Binói ne wabé Walubela ju.

Echi jaré bichíyami bukulíwami ologá piré

⁵'Yémítamo ma suwíami niráa ju, echijiti ma ketasi waminabi nijéwaga olasi mapurigá 'yemi aboni chopi wabé chati sitíi olánali, achigórigá mapurigá echi auché jaré jenaí'í wichimóbachi piréami we olá. Ke wesi chuwé bilétari yuwa kochisí. Ke bilé namuti chati sitíi olasi. Nibilé chuwé chibi yiri olasi. Ketasi níilasi chati sitíi olánala. Ketasi korusi echi auché jaré níwala namuti, mapujiti átamo echirigá korúsagá, 'yémítamo achigórigá chati sitíi olá mapurigá echi jaré pagótami olá

mapu we o'wiké echí jaré amachíkalawami namuti. ⁶A'lí Riosi arigá walú kastigo 'yama si'néami echí jaré pagótami je'ná jeyiri oláami, si'néami mapu ikí ketasi galá nijéwaga olali mapurigá Binói nulali. ⁷A'lí 'yemi bichíyami ayénachó echirigá achigórigá chati sití ologá piréali chabénala, mapalítamo ketasi cho galá bichíyami níili. ⁸Chopi jipi ketasi waminabi echirigá olasi. Ketásirapé na'awasi 'yemi. Waminá ariwesi suwaba chati sití oluławamí. Ketasi chuillé sayéraga ra'íchasi auché jaré pagótami, nibilé siné chati sití ra'íchasi. ⁹Ketasi 'yékaka ra'ichási a'nagupi, mapujítitamo ma bukulíwami nakulíwarami ju. Mátamo ariweli mapurigátamo chabénala ologá piréali. ¹⁰Mátamo auché si'nú bukulíwami galabé oláami niwárami ju. Jipi jonsa 'yémítamo sinibí waminabi niwárami nílasabo echirigá galabé oláami niráa, mapuyénasítamo ne sébali galabé oláami niráa níbo mapurigá Riosi nakí, mapujiti Riosi Binói 'yemi mi 'yalí mapurigátamo echirigá bukulíwami niwárami níbo. A'lí bichétamo echirigá waminabi galabé oláami niráa niwárami nílasabo mapuyénasí 'yémítamo ne galá machiboa Binói Riosi. ¹¹Jipi si'néami 'yemi galá bichíyami chopi a yiri ju mapujítitamo Riosi kúchuwala ju. Echijiti 'yemi máputamo Griego anilíwami pagótami ju, ma ketasi waminabi 'natasi máputamo Griego chopi ju. A'lí 'yemi máputamo Juríosi anilíwami pagótami ju, ma ketasi waminabi 'natasi máputamo Juríosi chopi ju. Ayénachó 'yemi máputamo ma noligá sikirétami ju, ma ketasi waminabi 'natasi máputamo echirigá níili. Ayénachó 'yemi máputamo ketasi noligá sikirétami ju, ma ketasi waminabi 'natasi máputamo ketasi echirigá níili. A'lí 'yemi máputamo si'wina piréami ju, ma ketasi waminabi 'natasi máputamo echirigá si'wina piréami ju. A'lí 'yemi máputamo tarapé binératami niráa ju, ma ketasi waminabi 'natasi máputamo echirigá ju. A'lí tarapé chiré átamo pióntami níisa, nirapé chiré átamo ketasi pióntami níisa. Chopi ne wabé simírami galabé ju mapu echí Walubela Jesucristo ma galá bité echo'ná pachana 'yemi sulálachi niráa. A'lí echí Walubela Jesucristo ne wabé Walubela ju, ayénachó Binói echo'ná pachana si'néami 'yemi napawika bichíyami sulálachi atí.

¹²Echi Walubela Riosi 'yemi mi ne wabé galé. Ayénachó Riosi ma 'yemi mi chapili mapurigátamo Binói níwala pagótami níbo. Echijiti ne wabé natimaga pirélasi echí auché jaré pagótami. Ne wabé galabé oláami nílasi. Chopi tarapé nóchami niráa nílasi, nirapé mapurigá o'wéala niráa olasi. Chopi sinibí galá kilí ologá pirélasi, galá anáchaga mapalí auché jaré 'yemi mi risúu olá. ¹³Sinibí ne wabé galesi a'nagupi, kilí niráa anáchaga mapalí auché jaré ketasi olá mapurigá 'yémítamo nakí. A'nagupi ku wikawasi, mapalí auché jaré 'yemi mi sitila olá. A'lí achigórigá mapurigá echí Walubela Jesucristo 'yemi mi ku wikáwali, echirigá ayénachó ku wikawasi echí auché jaré mapu 'yemi mi sitila olá. ¹⁴Ne suwaba je'ná jerigá olasi 'yemi, ayénachó ne wabé galéami nílasi, mapujiti átamo echirigá a'nagupi galésagá, echalí ne si'néami 'yémítamo a'nawí chópirigá 'nátami níbo. ¹⁵Ne galabé kilí oláami nílasi pachana 'yemi sulálachi niráa, mapurigá Riosi Binói 'yemi mi 'yama mapurigátamo olabo, mapujiti Riosi echijiti 'yemi mi bayeli mapurigátamo napawika bichíyami níbo, Binói kúchuwala niráa. Ayénachó ne sinibí niráa walú natétara 'yasi Riosi.

¹⁶Sulachí niráa sinibí chopi ne galá 'natasi echí Walubela Jesucristo Ra'íchala. A'nagupi ne galá machigá binérasi echí Galabé Riosi Ra'íchala, mapurigátamo echirigá a'nagupi waminabi galá bichíratabo. Sinibí ne wabé kaníliga nawajisi echí jaré karúmati Riosi nawajíwala mapurigátamo sinibí echirigá walú natétara 'yabo Riosi ne sulachí niráa. ¹⁷A'lí ne suwaba mapu ikí 'yémítamo olá, ayénachó ne

suwaba mapu ikí 'yémitamo ra'icha, ne suwaba ne galabé niráa olasi, mapujítitamo ma galá bichíi echi Walubela Jesucristo riwalá niráa. A'lí sinibí walú natétara 'yasi Riosi Onorúami, mapurigá echi Walubela Jesucristo 'yemi mi ku'wira echirigá natétara ayá.

**Pablo ruyé echi jaré napawika bichiyami mapu churigá
galá níima mapurigá aboni galabé ologá pirélama**

¹⁸ 'Yemi muguí kunéami sinibí galá nijéwasi 'yemi aboni kunala, mapurigá galá níima máputamo olabo, mapujítitamo ma galá bichiyami ju echi Walubela Jesucristo niráa. ¹⁹ 'Yemi rijói jubéami ne galá galesi 'yemi aboni jubila, a'lí ketasi yónasi. ²⁰ 'Yemi kúcharami sinibí ne suwaba jiti galá nijéwasi 'yemi 'wénawala, mapujiti echi Walubela Riosi we kanila mapalítamo echirigá olá. ²¹ 'Yemi 'wéntami ketasi na'awatasi echi jaré 'yemi kúchuwala, mapurigá aboni ketasi mayema mapu ne wabé nóchali ju oluwawa mapurigá 'yémitamo nulé aboni. ²² 'Yemi pióntami ne galá nijéwasi echi jaré 'yemi o'wéalawala mapu 'yemi mi nulé jena'í wichimóbachi. Ne sinibí galá nijéwaga olasi mapurigá aboni 'yemi mi nulé, ketasi chopi nijéwasi mapalí aboni 'yemi mi galá ritiwá, mapurigá aboni echijiti galá kanílama 'yemi jiti, chopi ayénachó sinibí galá nijéwaga olasi mapalí aboni ketasi 'yemi mi ritiwá, mapujiti echi Walubela Riosi sinibí 'yemi mi ne galá ritiwá mapu churigátamo olá. ²³ A'lí karúmati mapuyíripi 'yémitamo olá, ne suwaba wabé galabé nílaga olasi, mapurigátamo echi Walubela Jesucristo nóchala olá, ketasi mapurigátamo echi jaré pagótami nóchala olá. ²⁴ Mapujiti 'yémitamo ma galá machí mapu echi Walubela Jesucristo 'yemi mi 'yama mapurigá natétawami niráa mapurigá 'yémitamo ne sinibí niráa ku pirélabo echo'ná ripá riwigachi, Riosi yuwa, mapujiti 'yémitamo olá echi Walubela Jesucristo nóchala, a'lí Jesucristo Binói ne bichíwali 'yemi Walubélawala ju. ²⁵ Chopi mapuyíripi chati sitíi olako arigá kastigo 'yárami níima, mapujiti aboni echirigá chati sitíi olali, mapujiti Riosi arigá kastigo 'yama ibili niráa, achigórígá mapurigá aboni chati sitíi olali, chu chireko mapuyíripi níisa.

4 'Yemi nuláami sinibí galabé 'nátaga, galá wachínaga olasi echi jaré 'yemi pióntawala yuwa. Ayénachó sinibí 'natásí mapurigá 'yemi aboni Walubélawala echo'ná ripá riwigachi atí.

² Sinibí niráa ra'ichási Riosi yuwa. A'lí ketasi ariwesi echirigá olayá, chopi sinibí galá 'nátaga ra'ichási Riosi yuwa, galá busuréami niráa. Ayénachó sinibí walú natétara 'yasi Riosi. ³ Ayénachó tansi Riosi tamujé tamí jiti mapurigá echi Walubela Riosi tamujé tamí ku'wírama mapurigata omérabo 'yena Riosi Ra'íchala nawésiya. Ayénachó tansi mapurigá Riosi tamujé tamí ku'wírama mapurigata galá omérabo machíratiya echi pagótami Jesucristo Ra'íchala, echi mapu chabé ki'yako ketasi machirúami níili. Jipi nijeni pachá bachárami ju mapujítini echirigá nawésali Binói Ra'íchala. ⁴ Sinibí echirigá tansi Riosi tamí jiti mapurigá nijeni galá oméraoma ne galá machíami niráa machíratiya echi pagótami Binói Ra'íchala, mapurigá galá níima mapurigá nijeni sinibí olama.

⁵ Sinibí ne galá 'nátaga, ne galabé olasi echi auché jaré pagótami mapu ke cho galá bichiyami ju. We ya echirigá olasi mapujiti 'yémitamo ketasi machí chu kilíbuko 'yémitamo auchecho siné riwiboa echi jaré aboni. ⁶ Sinibí ne galá galigá ra'íchasi echi auché jaré. Ketasi chuwé ra'íchasi. Sinibí galá 'natasí mapu churigátamo nijéwabo echi auché jaré mapu 'yemi mi rukué jaré namuti.

Echi Pablo ripóraga náwala echí jaré bichíyami echo'ná Kolósachi piréami

⁷Echi Tíkiko riwéami rijói 'yemi mi ruyema suwaba namuti mapu churigá nijeni atí. Échiko tamujé rijimala niráa ju, ne wabé galérami niráa. Ayénachó binói galá nójchali tamí yuwa mapurigá echí Walubela Jesucristo piónawala niráa, mapalita napawika 'yénali echí Walubela Jesucristo nójchala olayá. ⁸Je'ná jiti nijeni julama echo'ná 'yémichi mapurigá binói 'yemi mi ruyema mapu churigata muchuwi tamujé, ayénachó mapurigá binói 'yemi mi waminabi galá kanílatama. ⁹Ayena binói yuwa simea echí Onésimo riwéami rijói mapu nijeni ayénachó ne wabé galé. Échiko nijé rijimala niráa ju, mapujiti binói ne galá bichíyami ju. Ayénachó je'ná bilé echo'ná Kolósachi bitéami níili. A'lí mapalí aboni okuánika echo'ná sisáa, echalí aboni 'yemi mi galá ruyema ne suwaba mapurigá ikí jena'í Rómachi piréami napawika bichíyami yuwa.

¹⁰Echi Aristáruko riwéami rijói 'yemi mi ripóraga ra'icha, echí mapu tamí yuwa jena'í bachara atí. Echi Marko ayénachó 'yemi mi ripora, echí mapu echí Benabé yuwa najirémami niráa ju. Chabé jonsa 'yemi nulérami níili máputamo galá narepo echí Marko. Jipi ayénachó ne galá naresi, a binói nawásagá echo'ná mapo'ná 'yemi muchuwi. ¹¹A'lí echí Jesusi riwéami rijói mapu ayénachó Justo anilíwami ju, échiko 'yemi mi ripóraga ra'icha. A'lí je'ná bikiyá chopi ju, echí jaré Juríosi pagótami galá bichíyami, mapu tamí yuwa nójchaga nawesa Riosi Ra'íchala, mapurigá Riosi arígá galá nulema echí jaré pagótami pachana aboni sulálachi niráa, ne si'néami mapu ikí galá bichíima Jesucristo niráa. A'lí echí jaré bikiyá aboni sinibí tamí ne wabé kanírali. ¹²Ayénachó echí Epájasi riwéami rijói 'yemi mi ripora, echí mapu ayénachó echo'ná bitéami ju 'yemi yuwa. Échiko ayénachó Jesucristo piónawala ju. Ayénachó binói sinibí wisabé Riosi yuwa ra'íchaga tani mapurigá 'yémítamo galá ku'wíratami níibo, mapurigátamo waminabi galabé bichíibo, ayénachó mapurigátamo sinibí nakiboa olánala ne suwaba achigórigá mapurigá Riosi nakí. ¹³A'lí nijeni ayénachó 'yemi mi ruyé mapurigá echí Epájasi sinibí we 'nata 'yemi jiti, ayénachó mapurigá binói sinibí we 'nata echí auché jaré napawika bichíyami jiti, ne si'néami mapu ikí echo'ná Laoriséachi anilíwachi walúlachi piréami ju, ayénachó ne si'néami mapu ikí echo'ná Yeráporichi anilíwachi walúlachi piréami ju. ¹⁴Ayénachó 'yemi mi ripora echí Lúkasi, echí mapu ówami ju, echí mapu si'néamita ne wabé galé. Ayénachó 'yemi mi ripora echí Remási riwéami rijói.

¹⁵Ne galá ripórasi 'yemi echí jaré ritémtami echo'ná Laoriséachi piréami. Ayénachó ripórasi echí Nínjasí riwéami rijimala. Ayénachó galá ripórasi si'néami echí auché jaré napawika bichíyami ritémtami mapu ikí napawiko echo'ná binói bitélachi. ¹⁶Mapalí 'yémítamo ma galá 'nesa je'ná oselí osirúami, ayénachó 'nérasi echo'ná Laoriséachi piréami napawika bichíyami. A'lí ayénachó galá 'nesi 'yemi echí auché bilé oselí mapu nijeni oséli echo'ná Laoriséachi piréami napawika bichíyami, mapurigá si'néami 'yémítamo ayénachó kipubo mapurigá nijeni oséli echí jaré aboni. ¹⁷Ayénachó jeansi echí Arkipo riwéami rijimala: Sinibí ne suwaba galá nójchaga olá echí Walubela Jesucristo nójchala mapurigami 'yárami níili olánala.

¹⁸Nijé Pablo, ma ne jubá 'yemi nimí pe okuá ra'íchali je'ná jerigá osagá walú ripóraga náwala. Nijeni je'ná jerigá osali, nijé binói sikala jiti. Sinibí galá 'natasi mapurigá nijeni pachá bachárami ju jipi rawé. Nijeni nakí mapu Riosi 'yemi mi wabé galigá ku'wírama. ¡Echirigá níima!

Bachá Osirúami

mapurigá San Pablo oséli echo'ná

TESALÓNACHI PIRÉAMI

Echi Pablo galá osé echí jaré napawika bichíiyami

1 Nijé Pablo 'yemi mi osé, si'l'néami máputamo napawika bichíiyami ju Jesucristo niráa, echo'ná Tesalónachi anilíwachi piréami. Echi Silbano riwéami rijói, echí Timoteo ayénachó tamí yuwa muchuwi. Aboni ayénachó 'yemi mi ripora, si'l'néami 'yemi máputamo ma napawíkami ju Riosi Onorúami yuwa, ayénachó echí Walubela Jesucristo yuwa. Nijeni nakí mapu Riosi, tamujé Onolá, ayénachó echí Walubela Jesucristo 'yemi mi wabé galigá ku'wírama, ayénachó mapu 'yemi mi 'yama mapurigátamo galá kilí ologá pirélabo.

Echi jaré bichíiyami echo'ná Tesalónachi piréami ne galabé niráa bichíili

² Ne sinibita walú natétara 'ya Riosi si'l'néami 'yemi jiti. Ayénachótá sinibí 'nata 'yemi jiti mapalita Riosi yuwa tániga ra'icha. ³ Ayénachó mapalita tániga ra'icha tamujé Riósawala yuwa, echí mapu tamujé Onolá ju, tamujeta sinibí 'nata mapurigá 'yémitamo ne wabé galá bichíiga olali, ayénachó mapurigátamo ne wabé galigá nóchali, Riosi nóchala olayá, ayénachó mapurigátamo galá bichíili Jesucristo niráa, mapu Binói sinibí 'yemi mi waminabi ku'wírama. ⁴ 'Yemi ritémtami, Riosi 'yemi mi ne wabé galé. A'lí tamujeta galá machí mapu Riosi ma 'yemi mi chapili, Binói níwala niráa. ⁵ Chabénala mapalita bachá niráa 'yemi mi nawésali echí Galabé Riosi Ra'íchala, echalí tamujeta ketasi wepi wikabé ra'íchali tamujé aboni chopi ra'íchala. Chopi tamujeta ne wabé galá jiwériga niráa nawésali mapurigá echí Wabé Galabé Riosi Iwigala tamujé tamí 'yali nawésanala. A'lí echirigata ne galá bichíiga nawésali mapujítita galá bichíi mapu je'ná Galabé Riosi Ra'íchala ne bichíwali ju. 'Yemi aboni ne galá machí mapu churigá tamujeta galabé ologá nóchali echo'ná 'yémichi mapurigá 'yémitamo galá ku'wíratami níibo.

⁶ A'lí 'yemi aboni ayénachó sinibí echirigá achigórígá olali mapurigá tamujeta olali. Ayénachótamo olali mapurigá echí Walubela Jesucristo Binói olali. A'lí bichétamo ne wabé kaníili mapalítamo bichíili Riosi Ra'íchala, mapurigá echí Wabé Galabé Riosi Iwigala 'yemi mi kanílatali. Chópitamo arigá ne wabé risíu olárami níili mapujítitamo echirigá bichíili. ⁷ Echijiti we galá níima achigórígá olánalasa echí auché jaré napawika bichíiyami, achigórígá mapurigá 'yémitamo olá. Galá níima achigórígá olánalasa si'l'néami echí jaré napawika bichíiyami echo'ná Maseróniachi anilíwachi kawírali piréami, ayénachó si'l'néami echí jaré

napawika bichíiyami echo'ná Akáyachi anilwachi piréami. ⁸A'lí 'yémítamo ma galá machírali auché jaré pagótami echi Galabé Riosi Ra'íchala. A'lí ketasi chopi echirigá machíratami níili echo'ná Maseróniachi, echo'ná Akáyachi piréami, chopi ayénachó ne suníami piréami pagótami ma galá ruyérami ju mapurigá 'yémítamo ma galá bichíili Riosi. Echijiti ma ketasi arigá 'wérali ju mapu tamujeta abijí ruyebo aboni mapu churigá 'yémítamo ma galá bichíili. ⁹Si'winárigá aboni galá ku ruwigá nawesa mapu churigá 'yémítamo tamujé tamí nareli mapalita 'yénali 'yemi mi nawésiya Riosi Ra'íchala. Ayénachó aboni sinibí ruwigá nawesa mapu churigá 'yémítamo ma waminá ariweli echi jaré amachíkalawami namuti, mapurigátamo ku ro'wibo Riosi yuwa, ayénachó mapurigátamo chopi galá bichíiga o'wikébo echi ne bichíwali Walubela Riosi, echi mapu sinibí niráa bitéami ju. ¹⁰Ayénachó aboni we galá ku ruwigá nawesa mapu churigá 'yémítamo we buwé mapurigá echo'ná ripá riwigachi jonsa ku nawama echi Walubela Jesusi, echi bilepi Riosi Ranala, echi mapu Riosi ku owíntali mapalí Binói ma mukúami níili. A'lí echi bilepi Jesucristo ju mapu tamujé tamí ku wikawa, mapurigata ketasi walú kastigo 'yárami níibo, ketasi mapurigá echi auché jaré chati oláami pagótami 'yárami níima.

Echi Pablo we galá nawésali Riosi Ra'íchala echo'ná Tesalónachi

2 Kení ritémawa, 'yemi aboni ne galá machí mapu tamujeta ketasi wepi 'yénali mapalita echo'ná sili 'yemi 'nésiya. ²Chopi 'yémítamo ma galá machí mapurigá tamujé ne wabé risúa níilita chabénala mapalita nawesa 'yénali echo'ná Jilípochi anilwachi walúlachi, ayénachótamo machí mapurigá tamujeta ne wabé risúu olárami níili echo'ná. Chopi mapalita sili echo'ná 'yémichi, echalí Riosi tamujé tamí ku'wírali mapurigata tarapé majaga 'yemi mi nawésabo echi Wabé Galabé Riosi Ra'íchala, mapalí echi auché jaré pagótami arigá tamujé tamí ne wabé kichiga sayérali. ³Mapujiti tamujeta chopi nawésali echi ne Bichíwali. Tamujeta ketasi 'yemi mi 'yékanalaga nawésali, mapujítita chopi nakili máputamo galá bichíibo Riosi Ra'íchala. ⁴Chopi tamujeta nawésali Riosi Ra'íchala mapujiti Riosi Binói tamujé tamí chapili mapurigata echirigá nawésabo. A'lí ketásita nawesa mapurigata chopi kanílatabo echi jaré pagótami. Si'winárigá tamujeta nawesa mapujiti Riosi Binói tamujé tamí júuli echirigá nawésanala. A'lí Riosi tamujé tamí ne galá machí, tamujé sulálachi niráa. ⁵A'lí 'yemi aboni galá machí mapu tamujeta ke siné 'yemi mi ne su'wé anigá 'yékali, chopi mapurigá 'yémítamo bichíibo tamujé nawésawala. Nibilé chota 'yemi mi 'yékaka aneli máputa 'yemi amígowala ju, chopi mapurigá 'yémítamo tamujé tamí 'yabo wenomí. Riosi Binói galá machí mapu tamujeta ke siné echirigá olali. ⁶Tamujeta ke siné amí mapurigá echi jaré pagótami tamujé tamí o'wéalatama. Ketásita amí mapurigá 'yémítamo tamujé tamí echirigá o'wéalatama, nibilé cho mapurigá auché jaré pagótami echirigá tamujé tamí o'wéalatama. Chopi echi Walubela Jesucristo Binói tamujé tamí júuli 'yemi mi nawésanala, echijiti nakisáagá, tamujé ayénata galá omérabo 'yemi yuwa o'wéalatiya. ⁷Si'winárigá tamujeta sinibí ne wabé galigá oláami níili mapalita echo'ná 'yemi yuwa 'yénali, achigórígá mapurigá bilé mukí iyétami ne wabé galigá tibútaga ochébana binói kúchuwala. ⁸A'lí mapujiti tamujeta 'yemi mi echirigá ne wabé galé, echijítita ne wabé nakili 'yemi mi nawésanala echi Galabé Riosi Ra'íchala. Ayénachóta ne wabé nakili mapurigata sinibí 'yemi mi ku'wíraga pirélabo, mapujítita 'yemi mi

echirigá ne wabé simírami galeli. ⁹Keni ritémawa, 'yémitamo galá machí mapurigá tamujeta sinibí we nílaga nóchali mapurigata galá kopo. 'Yémitamo galá machí mapurigá tamujeta nóchali sinibí rawé, sinibí rokogó ayénachó, mapurigata ketasi wepi kopoja jaré 'yemi níwala ko'wáami, mapalita 'yénali 'yemi mi nawésiya echí We Galabé Riosi Ra'íchala.

¹⁰Ayénachó 'yémitamo galá machí mapurigá tamujé sinibí galabé niráa, ne galá wachínaga olali 'yemi napawika bichíiyami yuwa. Chópita ke siné chati sití olali mapurigá jaré omérama tamujé tamí wi'nijiya chati sití oláami niráa. A'lí Riosi Binói ayénachó echirigá galá machí. ¹¹Ayénachótamo galá machí mapu churigá tamujeta sinibí 'yemi mi waminabi bichíirataga nawésali, ayénachó mapurigata sinibí kanílatali 'yemi ibili niráa mapurigá bilé onorúami we galigá, kanílataga, galá ruyé echí jaré binói kúchuwala. ¹²A'lí tamujeta ma 'yemi mi nuleli máputamo sinibí galabé ologá 'yénabo, achigórigá mapurigá galá níima máputamo olabo, mapujiti 'yémitamo ma Riosi níwala ju. A'lí Riosi 'yemi mi bayeli mapurigátamo ayénachó o'wéalatami níbo Binói yuwa, echo'ná mapo'ná Riosi Binói wabé Walubela Nuláami ju.

¹³Echijiti tamujé ayénachó tarapé siné ariwé walú natétara ayá Riosi 'yemi jiti mapujítitamo galá bichíili Riosi Ra'íchala mapalí tamujeta 'yemi mi nawésali. Echalítamo ne galá bichíili tamujé nawésawala mapurigá ne bichíwali Riosi Ra'íchala niráa. Echalítamo ketasi mayeli mapu bilé rijói ra'íchala chopi níili. A'lí tamujé nawésawala ne bichíwali Riosi Ra'íchala niráa níili. A'lí echí Galabé Riosi Ra'íchala 'yemi mi niwá ne galá wachínaga oláami niráa, si'néami mapu ikítamo ne galá bichíi. ¹⁴Keni ritémawa mapalí 'yémitamo wabé risúu olárami níili echí auché jaré ke bichíiyami 'yemi pagótamawala jiti, echalí achigórigá ikili 'yemi mapurigá ikili echí auché jaré napawika bichíiyami Juríosi pagótami mapu Jesucristo níwala pagótami ju, echo'ná Juréachi anilíwachi kawírali piréami, mapujiti aboni ayénachó ne wabé risúu olárami níili echí auché jaré ke bichíiyami Juríosi jiti. ¹⁵Je'ná Juríosi aboni nulali mi'línala echí Walubela Jesucristo. A'lí chabénala niráa aboni ayénachó ko'yali echí jaré o'wéala nawésami mapu Riosi júuli nawésanala echo'ná abónichi. Ayénachó aboni tamujé tamí ku machí a'wali echo'ná aboni ri'obáwalachi jonsa. Aboni ketásirapé olá mapurigá Riosi nakí, chopi aboni wabé sayérami ju si'néami echí auché jaré pagótami. ¹⁶Ayénachó aboni ketasi nakí mapu tamujeta nawésabo echí auché jaré isena mapu ketasi Juríosi pagótami ju, mapujiti tamujeta we nakí nawésanala echí auché jaré isena pagótami mapurigá aboni ayénachó galá ku wikawárami níima. Chopi echí jaré Juríosi echirigá ologá waminabi ne wabé simírami chati sití olá. Echijiti jipi echí Walubela Riosi ne wabé simírami 'yama, a'lí echí jaré ke bichíiyami Juríosi pagótami walú kastigo 'yárami níima.

Echi Pablo we nakili auchecho siné 'nénala echo'ná Tesalónachi piréami ritémrtami

¹⁷Keni ritémawa, ne sinibí mapalí tamujeta pe wi'libé waná niráa muchúwi echo'ná 'yémichi jonsa, echalita ketasi 'yemi mi ritiwá, chópita sulachí niráa sinibí we galigá 'nata 'yemi jiti. Ayénachótá wisabé 'nátali mapurigata wabé simánali echo'ná 'yemi mi 'nésiya. ¹⁸Tamujeta we 'nátaga nakili mapurigata echo'ná simabo 'yemi mi 'nésiya. Nijé Pablo wisabé nakili máputa echirigá simabo, chopi echí riablo, Satanasi riwéami, sinibí tamujé tamí kumeli, mapurigata ketasi omérabo echo'ná simiba. ¹⁹Tamujeta 'yemi mi ne wabé 'nénali mapujiti waminánomí rawé mapalí

echi Walubela Jesucristo ku nawama, echalí tamujeta mayé máputa wabé kanílatami níibo mapujiti 'yémitamo ne galá bichíiyami ju Jesucristo niráa, ayénachóta ne wabé nóchami níibo mapujiti 'yémitamo galá bichíili tamujé nawésawala.²⁰ Ne bichíwali tamujeta wabé nóchami ju, ayénachóta wabé kanílatami ju, mapujiti 'yémitamo ma galá bichíili Jesucristo niráa.

3 Tamujeta ne wabé 'nata 'yemi jiti, ayénachóta ne wabé machináali mapu churigátamo muchúwi, echijiti nijeni nakili julánala echi rijimala Timoteo echo'ná 'yémichi. Echalita ra'íchaga katéwali mapurigá nijé, echi Silbano yuwa, jena'í Aténachi anilíwachi tibíbota.² Ayénachóta ra'íchaga katéwali mapurigá nijeni julama echi Timoteo echo'ná 'yemi mi 'némiya. Échiko sinibí we galá ku'wíraga nóchali tamujé tamí yuwa, Jesucristo Ra'íchala nawésiya, mapurigá bilé galabé pioni, Riosi piónawala niráa. A'lí echi Timoteo galá omero 'yemi mi waminabi bichíiratiya mapurigátamo waminabi kaníflaga bichíibo, Jesucristo niráa,³ mapurigá ke wesi 'yemi ariwébotamo bichíisiya mapujítitamo je'ná jerigá wabé risúu olárami ju. A'lí 'yemi aboni ma galá machí mapu tamujé máputa bichíi Jesucristo niráa, arigá risúu olárami níibota.⁴ Ayénachó chabénala mapalita abijí echo'ná 'yemi yuwa muchili, echalita bachá niráa aneli mapu tamujeta arigá wabé risúu olárami níibo. A'lí jípitamo ma galá machí mapurigá ma echirigá ikili.⁵ Echijiti mapalí nijeni echirigá ne wabé machináali mapu churigá 'yémitamo muchúwi, echalini echo'ná 'yémichi júuli echi Timoteo mapurigani galá machimea áchatamo abijí galá bichíili, mapujiti nijeni wabé majali mapu echi riablo, siné káachi 'yemi mi chati olírama. A'lí a echirigá ikisáagá, tamujé nóchala wepi nochárami níimi, mapurigata nóchaga 'yénali echo'ná 'yémichi, echi wabé Galabé Riosi Ra'íchala nawésiya.

⁶Chopi jipi echi Timoteo ma ku nawali echo'ná Tesalónachi jonsa. A'lí binói tamujé tamí ku ruyeli mapurigá 'yémitamo ne galá bichíiyami ju Jesucristo niráa, ayénachó mapurigátamo ne wabé galéami ju. Binói tamujé tamí ruyeli mapurigá 'yémitamo sinibí ne wabé galigá 'nata tamujé tamí jiti, ayénachó mapurigátamo ne wabé nakí tamujé tamí 'nénala, achigórígá mapurigá tamujé ayénachó ne wabé nakí 'yemi mi 'nénala.⁷Echijiti, 'yemi keni ritémawa, tamujeta arigá ne wabé kanílatami níili 'yemi jiti, mapuyénata ne wabé, risúu olárami níili, mapujítita nawésaga 'yénali Riosi Ra'íchala jena'í Aténachi anilíwachi. A'lí tamujeta chopi echirigá kanílatarami níili mapujiti echi Timoteo tamujé tamí ruyeli mapurigá 'yémitamo abijí ne galá bichíiyami níili.⁸ Jipi tamujeta auchecho ku kanífliga piré mapujítita machí mapu 'yémitamo ne galá bichíiga 'yena echi Walubela Jesucristo yuwa.⁹Tamujé sinibí ne walubé natétara 'ya echi tamujé Riósawala echi jaré 'yemi jiti mapujiti 'yémitamo tamujé tamí ne wabé simírami kanílatali bacháami Riosi yuwa, chópita ketasi chirigá omero echirigá ne wabé simírami niráa natétara ayá, mapurigá galá níimi máputa 'yabo mapujiti 'yémitamo echirigá tamujé tamí ne wabé simírami niráa kanílatali.¹⁰A'lí tamujeta sinibí rawé, sinibí rokogó, ne wabé táníga ra'icha Riosi yuwa mapurigá Binói tamujé tamí ku'wírama mapurigata echo'ná simabo, 'yemi mi 'nébiya, mapurigata echirigá omérabo 'yemi mi binériya mapurigátamo waminabi, ne sébali, ne galá bichíiyami níibo.

¹¹Echirigá tamujeta ne wabé nakí mapu Riosi Binói, tamujé Onolá, tamujé tamí ku'wírama, ayénachó mapu tamujé Walubélawala Jesucristo tamujé tamí ku'wírama mapurigata omérabo echo'ná simiba 'yemi mi 'nébiya.¹²Ayénachóta ne wabé nakí mapu echi Walubela Jesucristo 'yemi mi 'yama máputamo waminabi ne wabé

simírami galebo a'nagupi, ayénachó máputamo wabé galebo ne si'néami echi auché jaré pagótami, achigórigá mapurigá tamujeta ne wabé galé 'yemi. ¹³Echirigá tamujeta nakí mapu echi Walubela Jesucristo 'yemi mi waminabi bichíratama mapurigátamo sinibí ne galabé bichíiyami níibo ne sulachí niráa, mapurigátamo chopi Riosi níwala níibo, ayénachó mapurigá tamujé Riósawala 'yemi mi riwimea galabé oláami niráa, echalí ne jubá rawé mapalí tamujé Walubélawala Jesucristo ku nawama jena'lí wichimóbachi, ne si'néami echi jaré Binói níwala pagótami yuwa.

Riosi nakí máputa galabé ologá pirélabo

4 'Yemi keni ritémawa, jipi ne jubáami tamujeta 'yemi mi ne wabé nakigá je'ná jerigá nulé, achigórigá mapurigá echi Walubela Jesucristo tamujé tamí nuleli 'yemi mi nulénala, máputamo abijí waminabi wabé simírami galabé ologá 'yénabo, achigórigá mapurigá Riosi nakí. Tamujeta 'yemi mi echirigá binérali chabé chokichí jonsa, a'lí bicheta abijí 'yemi mi ané máputamo waminabi echirigá ologá pirélabo.

² 'Yémitamo ma galá machí mapu churigá tamujeta 'yemi mi nuleli olánala, mapurigá echi Walubela Jesucristo ayénachó tamujé tamí nuleli 'yemi mi nulénala.

³ A'lí Riosi ne wabé nakí mapu 'yémitamo chopi ne wabé galabé ologá pirélabo mapurigá Binói ma 'yemi mi galabérali, ayénachó Riosi ketasi nakí mapu ke wesi 'yemi chuwé bilétari yuwa kochimea. ⁴Chopi Riosi nakí mapu ibili 'yemi machiboa galabé ologá piréliya 'yemi aboni jubila chopi yuwa, máputamo galabé olabo 'yemi jubila, ayénachó máputamo galá galebo aboni. ⁵A'lí Riosi ketasi nakí máputamo chuwé bilétari yuwa kochiboa mapalítamo we 'nátaga nakí echirigá chati sitíi olánala, mapurigá we olá echi auché jaré pagótami mapu ketasi machí Riosi. ⁶Ayénachó Riosi ketasi nakí mapu 'yemi echirigá chati sitíi olabo, auché jaré 'yemi ritémawala sayéraga. Binói ketasi nakí mapu ke wesi 'yékaka ologá 'yésama auché bilé rijói upila, mapujiti echi Walubela Riosi walú kastigo 'yama si'néami echi jaré mapu ikí echirigá chati sitíi olako. Chabénala tamujeta ma 'yemi mi echirigá nawésaga aneli. ⁷Mapujiti Riosi tamujé tamí bayeli mapurigata Binói níwala pagótami níibo, mapurigata chopi galabé ologá pirélabo, ne galá bi'wíami suléami niráa. Riosi ketasi nakí máputa we chati sitíi chuwé ologá pirélabo, ne wabé chati sitíi suléami niráa. ⁸A'lí echi jaré mapu ikí ketasi galá nijéwaga olako je'ná mapu tamujeta binera, abóniko ketasi 'me tamujé tamí nirá, ayénachó aboni ke 'me nirá Riosi mapu tamujé tamí 'yali Binói Wabé Galabé Iwigala.

⁹Jipi ketasi arigá 'wéralli ju mapu nijeni 'yemi mi osema jeanigá máputamo a'nagupi galebo, ritémktami niráa, mapujiti 'yémitamo ma a'nagupi galé, mapurigá Riosi Binói 'yemi mi binérali máputamo galebo. ¹⁰A'lí 'yémitamo sinibí echirigá ne wabé galé echi auché jaré ritémktami ne suníami echo'ná Maseróniachi anilíwachi kawírali piréami. Jipi, 'yemi ritémktami, tamujeta 'yemi mi ané máputamo abijí waminabi wabé simírami galébotamo a'nagupi. ¹¹Ayénachóta 'yemi mi ané máputamo kilfi ologá pirélabo, máputamo ne galá nochabo 'yemi aboni nóchala olayá, ayénachó máputamo 'yemi aboni sikala jiti nochabo mapurigá tamujeta ma 'yemi mi nuleli. ¹²Galá níima máputamo sinibí echirigá olabo, mapurigá echi auché jaré ke bichíiyami ayénachó animea mapu 'yémitamo galá oláami ju. Ayénachó galá níima máputamo sinibí echirigá galá nochabo mapurigátamo sinibí níwabo suwaba mapu ikítamo newalé.

Echi Walubela Jesucristo ku nolínama jena'í wichimóbachi

¹³ *Yemi tamujé ritémawala, tamujeta wabé nakí máputamo galá machiboa mapu churigá ikimea echi auché jaré ritémtami yuwa, si'néami mapu ikí ma suwíami ju, mapurigá 'yémitamo ketasi o'monábo mapurigá echi auché jaré pagótami ne wabé o'mona, si'néami mapu ikí ketasi bichíiga buwé mapurigá echi jaré suwíami ku o'wínama echalí ne jubá rawé.* ¹⁴ *Echirigá mapurigá tamujeta galá bichíi mapu echi Walubela Jesucristo mukuli, ayénachó mapu Binói auchecho ku owíname mapalí Binói ma mukúami níili, echirigá achigórigá tamujeta galá bichíi mapu Riosi ku o'wíntama, echi Walubela Jesucristo yuwa, ne si'néami echi jaré bichíiyami mapu ikí Jesucristo niráa bichíiga suwíliko.*

¹⁵ *Echijiti tamujeta 'yemi mi je'ná jerigá ané, mapurigá echi Walubela Jesucristo tamujé tamí binérali, mapu tamujé bichíiyami máputa abijí tibibo a'kámi niráa echalí ne jubá rawé yénasí mapalí ku nawama jena'í wichimóbachi echi Walubela Jesucristo, tamujeta ketasi bachá niráa simabo, chótita napawika simabo echi auché jaré yuwa, si'néami echi jaré bichíiyami mapu ikí ma suwili.* ¹⁶ *Mapujiti echi Walubela Jesucristo Binói ku rikínama echo'ná ripá riwigachi jonsa. Echalí Binói mapurigá Nuláami niráa ne wabé o'weli ra'íchaga ku nolínama jena'í wichimóbachi. Echalí bilé walubela Riosi kapitánawala ayénachó o'weli ra'íchaga nawama. Ayénachó ne wabé iwéami anema echi Riosi níwala korneta anilíwami. Echalí ne bachá niráa ku o'wínama si'néami echi jaré ma suwíami mapu ikí Jesucristo niráa bichíiga suwili.* ¹⁷ *A'lí pe jubáami tamujé máputa abijí a'kámi tibiko echalí ne jubáami rawé yénasí, tamujeta echi jaré aboni yuwa ke sayiná torúami níibo echo'ná ripá nolírali mapurigata echo'ná ikárali naripabo echi Walubela Jesucristo. A'lí echalí jonsa tamujeta sinibí niráa echirigá muchibo echi Walubela Jesucristo yuwa.* ¹⁸ *Echijiti a'nagupi wabé kanílasi je'ná ra'íchali jiti.*

5 Kení ritémawa, ketasi arigá 'wéráli ju mapu nijeni 'yemi mi osema jeanigá mapu chu kilíbuko suwaba je'ná jerigá ikimea, mapujiti ke wesi ne galá machí. *'Yémitamo ma galá ruyérami ju, mapu ke wesi pagótami galá machimea chu kilíbuko ku nolínama echi Walubela Jesucristo.* ² *Yemi aboni ma galá machí mapu echalí rawé echi Walubela Jesucristo ke sayiná ku nawama jena'í wichimóbachi, mapalí echi jaré pagótami ketásirapé buwée pirélama. Echalí rawé echi Walubela Jesucristo ke sayiná nawama mapurigá echi jaré chigórami ke sayiná 'yena, rokogó niráa.* ³ *Waminánomí rawé mapalí echi auché jaré pagótami jena'í wichimóbachi piréami jeanigá pirélama mapu aboni ma we galá kilí ologá piré, echalí si'néami aboni ke sayiná suwaba suwábarami níima, achigórigá mapurigá ke sayiná okolá bilé mukí bocháami mapalí ma ranamea bilé tása múchali. A'lí echalí rawé echi jaré pagótami ke wesi galá omérama waminá júmsiya.* ⁴ *Yemi ritémtami mátamo ne galá machí je'ná jeyiri namuti. Echijiti 'yémitamo ketasi rokowárali niráa piréami ju, ketasi mapurigá echi auché jaré ke bichíiyami pagótami mapu rokowárali niráa piréami ju, mapujiti aboni ketasi machí churigá ikimea jena'í wichimóbachi. Echijiti 'yémitamo ketasi majáratami níibo mapalí ke sayiná sebama echalí echirigá ikíachi rawé. Chopi echalí ne jubá rawé echi auché jaré ke bichíiyami pagótami ne wabé majáratami níima achigórigá mapurigá echi pagótami majáratami ju bilé chigórami jiti mapu ke sayiná ne machiná nawá.* ⁵ *Mapujiti ne si'néami 'yemi bichíiyami ma bukulíwami niráa galabé ologá piré, mapujiti echi Walubela Riosi*

ma galá rayéntali echo'ná pachana 'yemi sulálachi niráa, mapurigátamo suwaba galá machiná niráa olabo mapurigá ne rawé oláami niráa. Tamujeta ketasi rokogó oláami niráa ju, ketasi mapurigá echi auché jaré chati sitífi chuwé oláami pagótami. Abóniko ketasi buwé mapurigá echi Walubela Jesucristo ku nolínama, echijiti aboni mapurigá rokogó kochíami niráa ju. ⁶Echijiti ne galá níima mapu tamujeta ketasi olabo mapurigá echi auché jaré ke bichíiyami pagótami, chopi máputa sinibí galá 'nagá, ne galá 'nátaga muchibo. ⁷A'lí echi jaré mapu we kochiko, abóniko rokogó we kochí. A'lí echi jaré mapu we tékako, abóniko rokogó we teka. ⁸Echijiti galá níima mapu tamujé bichíiyami sinibí galá 'nagá ne galá 'nátaga muchibo, mapujítita ne machiná oláami ju mapurigá ne rawé 'yénami niráa. Galá níima máputa ne sinibí galá bichíiyami níbo, ne galá galéami ayénachó. Echalí tamujeta sinibí ku'wíratami níbo mapurigá echi jaré sontarsi ku'wíratami níli mapalí aboni ne wabé biwárami jiero napáchami níli, mapurigá aboni ketasi chiwárami níima. A'lí tamujeta ne galá bichíi mapu Riosi tamujé tamí suwaba ku'wírama waminánomí rawé. Ne wabé galá ju máputa echirigá bichíi mapu Riosi tamujé tamí ku'wírama, mapujiti tamujeta ne bichíwali ku'wíratami níbo mapurigá echi jaré sontarsi ku'wíratami níli echo'ná mo'ochí mapalí aboni 'yénali echi wabé biwárami jiero ko'yáchaga. ⁹A'lí Riosi ketasi tamujé tamí chapili mapurigata chopi miná kastigo 'yárami níbo. Chopi Riosi tamujé tamí chapili mapurigá tamujé Walubélawala Jesucristo ne sébali tamujé tamí ku'wírama. ¹⁰A'lí echi Walubela Jesucristo mukuli tamujé tamí jiti mapurigata sinibí pirélabo Binói yuwa, echalí jonsa mapalí Binói ku nawama, abijí a'kámi níisagá, ayénachó ma suwíami níisagá kéremá. ¹¹Echijiti a'nagupi waminabi wabé kanílatasi, ayénachó a'nagupi waminabi galá bichíílatasi, achigórigá mapurigátamo sinibí olá.

Echi Pablo galá ruyé echi jaré bichíiyami

¹²Keni ritémawa, 'yemi nimí wabé tání mapurigátamo galabé nílabo echi jaré nawésami mapu 'yemi mi nawesa Riosi Ra'íchala. Echi jaré aboni 'yemi mi nulé, ayénachó aboni 'yemi mi ruyé mapurigá echi Walubela Jesucristo nakí. ¹³Ne wabé galabé níima máputamo sinibí echirigá wabé galabé nílabo echi jaré aboni, ayénachó máputamo wabé galebo, mapujiti aboni we nocha Riosi nóchala olayá. A'lí sinibí ne galá kilíi ologá pirélasi a'nagupi.

¹⁴Ayénachóta 'yemi mi nulé, 'yemi ritémrtami, máputamo galá ruwigá ruyebo echi jaré mapu ketasi nakí nochánala, mapu aboni arigá we nóchaga mema aboni ko'wámawala, ayénachó máputamo waminabi bichííratabo echi jaré mapu ketasi 'me galá bichíi, ayénachó máputamo galá ku'wírabo echi jaré mapu ketasi 'me jiwérami ju, ayénachó máputamo waminabi anáchaga, arigá galebo ne si'néami pagótami.

¹⁵Sinibí ne galá 'néniga tibusi mapurigá ke wesi 'yemi chati sitíila olabo echi auché jaré mapu arigá 'yemi mi sitíila olá. Si'winárigá sinibí chopi waminabi wabé galabé olasi a'nagupi, ayénachó galabé olasi ne si'néami echi auché jaré pagótami.

¹⁶Sinibí ne wabé galá kaníliga pirélasi. ¹⁷Sinibí galá tániga ra'ichási Riosi. ¹⁸Sinibí walú natétara 'yasi Riosi ne suwaba jiti mapurigá ikísimi, mapujiti Riosi nakí máputamo echirigá olabo, mapujítitamo bichíiyami ju Jesucristo niráa.

¹⁹Mapalí echi Wabé Galabé Riosi Iwigala tamujé tamí ra'icha pachana tamujé sulálachi niráa, echalí mapurigá na'í rajáami niráa ju. Ketasi siné cho'wasi echi

Galabé Riosi Iwigala, chopi sinibí galá nijéwaga olasi suwaba mapu Riosi Iwigala 'yemi mi nulé.²⁰ Sinibí ne galá galigá bichíisi mapurigá nawesa echi jaré mapu ikí Riosi júuli nawesánala.²¹ Mapalí jaré pagótami 'yemi mi nawesa, sinibí ne galá 'nátaga machisí acha achigó yiri jú, Riosi Ra'íchala yuwa. Ne galá bichíisi echi nawesálawami mapu achigó yiri ju Riosi Ra'íchala yuwa, chopi ketasi bichíisi mapalí ketasi achigó yiri ju, Riosi Ra'íchala yuwa.²² Ketasi biyiri chati sitíi olasi.

²³ Riosi Binói 'yemi mi 'ya mapurigátamo kilfi ologá pirélabo. Nijeni ne wabé nakí mapu Riosi Binói 'yemi mi suwaba galabératama, ayénachó mapurigátamo suwaba galá tibútarami níibo 'yemi iwigala, ayénachó 'yemi aliwala, ayénachó 'yemi sapala, mapurigátamo tarapé chati sitíi oláami níibo mapuyénasí tamujé Walubélawala Jesucristo ku nawama.²⁴ Echi Walubela Riosi 'yemi mi bayeli mapurigátamo galá bichíibo. A'lí Riosi ne wabé bichíwami ju. Ayénachó Riosi suwaba sunima ne suwaba je'ná jeyiri mapurigá Binói bachá niráa bichíwaga anili.

Echi Pablo ripóraga náwala echi jaré ritémptami

²⁵ *'Yemi keni ritémawa, sinibí Riosi yuwa tániga ra'ichási tamujé jiti.*

²⁶ Tamujeta 'yemi mi walú ripora, si'néami 'yemi ritémptami, ibili niráa.²⁷ Nijeni 'yemi mi nulé, echi Walubela jiti, máputamo galá machíami niráa ra'íchaga 'nebo je'ná oselí osirúami echalí mapalítamo napawika muchuwi, si'néami máputamo ikí galá bichíiyami ritémptami niráa ju.

²⁸ Tamujeta we nakí mapu tamujé Walubélawala Jesucristo sinibí 'yemi mi ne wabé galigá ku'wírama. ¡Echirigá níima!

Osá Osirúami

mapurigá San Pablo oséli echo'ná

TESALÓNACHI PIRÉAMI

Pablo osé echo'ná Tesalónachi piréami napawika bichíiyami ritémtami

1 Nijé Pablo, 'yemi mi osé si'néami máputamo napawika bichíiyami ju echo'ná Tesalónachi anilwachi walúlachi piréami. Echi Silbano, echi Timoteo ayénachó 'yemi mi ripora, 'yemi máputamo napawíkami ju Riosi yuwa, echi mapu tamujé Onolá ju, ayénachó máputamo napawíkami ju echi Walubela Jesucristo yuwa.² Nijeni nakí mapu echi Walubela Riosi, tamujé Onolá, ayénachó echi Walubela Jesucristo 'yemi mi wabé galigá ku'wírama, ayénachó mapu 'yemi mi 'yama mapurigátamo we galá kilí ologá pirélabo.

**Riosi walú kastigo 'yama echi jaré chati sitíi oláami echalí mapalí
echi Walubela Jesucristo ku nawama jena'í wichimóbachi**

³ Kení ritémawa arigá 'wéralli ju mapu tamujeta sinibí walú natétara 'yabo Riosi 'yemi jiti. Ne wabé galabé ju máputa echirigá natétara 'yabo Riosi mapujiti 'yémitamo sinibí waminabi galá bichíisimi, ayénachótamo si'néami sinibí waminabi galá galésimi a'nagupi. ⁴ Echijiti tamujé aboni ne wabé nójchaga ralíchata 'yemi jiti rugá, mapalita ra'icha echi auché jaréana piréami napawika bichíiyami ritémtami, mapujiti mapalí 'yémitamo ne wabé risúu ologá a'najátarami ju, echalí 'yémitamo arigá sinibí waminabi galá bichíisimi, ayénachó 'yémitamo arigá galá anacha mapalí echi auché jaré pagótami 'yemi mi ne wabé risúu olá. ⁵ A'lí mapalí 'yémitamo echirigá anacha, echalítamo ne galá machira echi auché jaré pagótami mapurigá Riosi ne wabé galabé ju, tarapé sitíraga, mapalí Binói 'yemi mi risensia 'yalí máputamo sinibí niráa muchibo echo'ná ripá riwigachi, mapo'ná Binói sinibí niráa Galabé Nuláami ju. A'lí jipi rawé 'yemi bichíiyami arigá ne wabé risúu olárami ju mapujítitamo bichíi Jesucristo niráa.

⁶ Pe waminánomí Riosi ne wabé risúu nílatama echi jaré chati sitíi oláami pagótami mapu 'yemi mi echirigá risúu olá jipi rawé, chopi mapalí Riosi echirigá risúu nílatama aboni, echalí Binói arigá ne galabé, tarapé sitíraga olama, mapujiti arigá 'wéralli ju mapu aboni kastigo 'yárami níima. ⁷ Ayénachó Riosi ne wabé galabé, tarapé sitíraga olama mapalí Binói 'yemi mi 'yama mapurigátamo galá ku isábabo, ne si'néami mapu ikítamo wabé risúu olárami ju jipi rawé, achigórígá mapurigá Binói tamujé tamí 'yama mapurigá tamujeta ayénachó galá isábabo. A'lí je'ná jerigá ikimea echalí ne jubá rawé mapalí echi Walubela Jesucristo ke sayiná ku nawama,

echo'ná ripá riwigachi jonsa, echi jaré wikabé wabé jiwérámi Riosi kapitánawala yuwa. Echalí echo'ná Binóichi moba, ne noligá ne wabé ratábama mapurigá ne walú rajáami niráa.⁸ Echalí echi Walubela Jesucristo ku nawama ne walú kastigo 'yámiya echi jaré mapu ketasi nakili bichífinala Riosi, ne si'néami mapu ikí ketasi nijéwanali echi we Galabé Ra'íchali, tamujé Walubela Jesucristo Ra'íchala.⁹ A'lí aboni ne sinibí niráa walú kastigo 'yárami níima, ayénachó aboni sinibí niráa waminá 'wigáami níima. A'lí aboni chakena waná ulútami níima mapurigá aboni ke siné muchima echi Walubela Jesucristo yuwa, ayénachó mapurigá aboni ke siné riwímea mapurigá Jesucristo ne Walubela niráa ju, ne wabé omériga oláami ju.¹⁰ Mapujiti echalí rawé echi Walubela Jesucristo ke sayiná ku nawama jena'í wichimóbachi, mapurigá Binói waminabi walubélaga anérami níima echi jaré Binói níwala pagótami jiti, ayénachó mapurigá ne si'néami aboni galá ba'yóriga riwímea Binói Jesucristo, ne wabé Walubela niráa. A'lí 'yémítamo ayénachó echirigá riwíboa echi Walubela Jesucristo mapujítitamo ma galá bichíili tamujé nawésawala.

¹¹ Echijiti ne sinibí rawé tamujeta we ra'icha Riosi yuwa, 'yemi jiti táníga, máputamo waminabi ne galá bichíiyami níibo, ayénachó mapurigá Riosi Binói galá nirama mapurigá 'yémítamo galá bichíili, echalí jonsa mapalí Binói 'yemi mi bayeli bichíinala. Ayénachóta tání mapu Riosi 'yemi mi ne wabé omératama mapurigátamo galá omérabo olayá suwaba mapu ikí 'yemi aboni nakí galabé niráa olánala, ayénachó máputamo omérabo olayá suwaba mapu ikítamo galá bichíiga olá, Riosi nóchala olayá.¹² Echalí tamujé Walubélawala Jesucristo waminabi wabé walubélaga anérami níima, mapujiti 'yémítamo echirigá galabé ologá piré. Ayénachó Jesucristo 'yemi mi 'yama máputamo wabé o'wéalatami níibo mapujiti tamujé Riósawala ne wabé galabé ju, ayénachó mapujiti echi Walubela Jesucristo ne wabé galabé ju.

**Echi bilé wabé omérami rijói wabé chati sitíi oláami,
mapu nolínama jena'í wichimóbachi**

2 Jipi 'yemi ritémtami, tamujeta galá bichíi mapu echi Walubela Jesucristo ke sayiná ku nawama jena'í wichimóbachi mapalí Binói tamujé tamí napabúmiya nawama mapurigata Binói yuwa napabúrami níibo. Chopi tamujeta 'yemi mi tání² máputamo ketasi siné si'winárigá bichíibo. Echijiti ketasi majáratami níisi a bilé chati iwígá 'yemi mi ra'íchasagá jeanigá mapu ma sébali echi Walubela Jesucristo rawéwala. Nirapé majáratami níisi a jaré pagótami 'yemi mi nawésaságá jeanigá mapu ma sébali echi Walubela Jesucristo rawéwala. Nibilé cho majáratami níisi, átamo siné káachi 'nésagá bilé oselí osirúami jeanigá mapu ma sébali echi Walubela Jesucristo rawéwala. Arigá ketasi bichíisi mapalí echi auché jaré pagótami 'yemi mi 'yékaka anema mapu echi oselí, nijé Pablo oselíwala ju, mapujiti nijeni ke siné echirigá anigá osímea.³ Ketasi ariwesi máputamo echirigá 'yékarami níibo, mapujiti ne bachá niráa mapalí echi Walubela Jesucristo ke cho ku nawá jena'í wichimóbachi, echalí arigá ikímea mapu echi jaré pagótami jena'í wichimóbachi piréami ne wabé sayérami nílama Riosi. Echalí ayénachó bachá niráa nolínama jena'í wichimóbachi echi bilé wabé omérami rijói, ne wabé simírami chati sitíi oláami, echi mapu arigá káraka suwábarami níima waminánomí.⁴ A'lí echi wabé simírami chati sitíi oláami rijói ne wabé sayérama echi Walubela Riosi, ayénachó sayérama suwaba karúmati mapu ikí echi jaré ke bichíiyami pagótami galá riosi ané, ayénachó

arigá sayérama ne suwaba echí jaré amachíkalawami namuti jena'í wíchimóbachi nirúami. A'lí echí wabé chatí sitíi oláami rijói echo'ná Riosi ri'obáwalachi nawagá asibáma jeanigá mapu binói ne bichíwali echí Walubela Riosi ju.

⁵ ¿Kéchatamo newalá mapurigá nijeni 'yemi mi je'ná jerigá aneli chabénala mapalini abijí echo'ná 'yemi yuwa asali? ⁶ Ayénachó jipi 'yémítamo galá machí chigá jú mapu ketasi ariwé mapurigá echí wabé simírami chatí sitíi oláami rijói ne machiná niráa nolínama jena'í wíchimóbachi. Chopi mapalí ma seba binói téawala, echalí 'nalina ma echí wabé simírami chatí sitíi oláami rijói ne bichíwali ne machiná niráa nolínama jena'í wíchimóbachi. ⁷ Mapujiti jipi echí wabé chatí sitíi oluwáwami we chiná niráa nocha echo'ná pachá echí jaré chatí sitíi oláami pagótami sulálachi. Chopi Bilé nirú mapu ketasi ariwé mapu echí pagótami ne wabé simírami chatí sitíi chuwé olama jipi rawé. A'lí mapalí Échiko waminá 'yératami níisa, echalí echí jaré chatí sitíi oláami pagótami ne bichíwali ne wabé simírami chatí sitíi chuwé olama. ⁸ Chopi echalí 'nalí rawé echí wabé simírami chatí sitíi oláami rijói ne machiná niráa nawama jena'í wíchimóbachi. A'lí echalí mapalí echí Walubela Jesucristo ne wabé ratábami niráa ku nolínama jena'í wíchimóbachi, echalí Binói waminá púchaga milimea echí wabé simírami chatí sitíi oláami rijói. ⁹ A'lí mapalí echí wabé simírami chatí sitíi oláami rijói echirigá nolínama jena'í wíchimóbachi, echalí échiko chopi nawama mapujiti echí Satanasi riwéami riablo we nulugá julama. A'lí echí wabé simírami chatí sitíi oláami rijói ne wabé omériami níima. Ayénachó binói wisabé, ne wabé 'yékaka niráa, ne wabé omériga olama mapurigá ke wesi pagótami omero olayá. ¹⁰ Ayénachó echí wabé simírami chatí sitíi oláami rijói suwaba karúmati echirigá ne wabé chatí sitíi ologá, ne wabé 'yékama echí jaré pagótami jena'í wíchimóbachi piréami, si'néami mapu ikí waminá 'wigáami níimako, mapujiti aboni ketasi nakili bichíinala echí ne Bichíwali, mapurigá aboni echirigá galá ku wikawárami níima. ¹¹ Echijiti Riosi ariwema mapurigá aboni ne wabé 'yékarami níima, mapurigá aboni chopi bichíima echí ne wabé 'yékalawami, ¹² mapurigá aboni walú kastigo 'yárami níima, si'néami mapu ikí ketasi nakili bichíinala echí ne Bichíwali, si'néami mapu ikí chopi waminabi wabé nakili olánala echí wabé chatí sitíi oluwáwami.

Echi jaré mapu Riosi chapili mapurigá aboni ku wikawárami níima

¹³ Chopi arigá 'wérali ju mapu tamujeta sinibí walú natétara 'yabo Riosi 'yemi jiti, si'néami máputamo ikí galá bichíiyami ritémtami ju, mapu echí Walubela Jesucristo 'yemi mi ne wabé galé, mapujiti echí Walubela Riosi 'yemi mi chapili ki'yá chokichí jonsa mapurigátamo ku wikawárami níibo, mapurigátamo ne galabé oláami niwárami níibo, echí we Galabé Riosi Iwigala jiti, mapujiti 'yémítamo galá bichíili echí ne Bichíwali. ¹⁴ Echijiti mapalí tamujé 'yemi mi nawésali echí we Galabé Riosi Ra'íchala, echalí Riosi 'yemi mi bayeli mapurigátamo galá bichíibo, ayénachó mapurigátamo wabé o'wélatarami níibo waminánomí, tamujé Walubélawala Jesucristo yuwa.

¹⁵ Sinibí waminabi ne galá bichíiga pirélasi, 'yemi ritémtami. Ketasi siné wikawási, chopi sinibí 'natasi mapurigá tamujeta 'yemi mi binérali mapalita 'yemi mi nawésali Riosi Ra'íchala, ayénachó mapalí tamujeta 'yemi mi oséli Riosi Ra'íchala. ¹⁶⁻¹⁷ A'lí tamujeta nakí mapu Jesucristo Binói 'yemi mi kanílatama sulachí niráa, ayénachó mapu Riosi Onorúami 'yemi mi echirigá kanílatama, ayénachó mapurigá Riosi 'yemi

mi waminabi galá bichíiratama mapurigátamo sinibí ne galabé niráa ra'ichábo, ayénachó mapurigátamo sinibí ne galabé niráa olabo. A'lí echi Walubela Riosi Onorúami níili mapu ne wabé galabé ologá, tamujé tamí ne wabé galeli. Ayénachó Binói tamujé tamí 'yali mapurigata ne sinibí niráa wabé kanílatami níibo, ayénachó mapurigata galá bichiíbo máputa ku'wíratami níibo, mapujiti Binói tamujé tamí ne wabé galeli.

**Echi Pablo táni mapu echi jaré ritémtami Riosi yuwa ra'íchaga
tánama mapurigá binói Pablo ku'wíratami níima**

3 ¹Yemi keni ritémawa, ne jubá niráa, 'yemi nimí táni máputamo Riosi yuwa ra'íchaga tánabo tamujé tamí jiti, mapurigá ke 'me ayó tamujeta galá omérabo nawésiya Riosi Ra'íchala ne suníami, ayénachó mapurigá wikabé pagótami galá bichíima, achigórigá mapurigá ikili chabénala echo'ná 'yémichi, mapalita 'yemi mi nawésali. ²Ayénachó tansi Riosi mapurigá tamujeta galá ku'wíratami níibo mapurigá echi jaré wabé chati sitíi oláami rijói, we kichíami, ketasi tamujé tamí chibi olama, mapujiti wikabé ketasi bichií Riosi. ³Chopi echi Walubela Jesucristo ne wabé bichíwaga oláami ju. A'lí Binói 'yemi mi waminabi galá bichíiratama, ayénachó 'yemi mi tibútama mapurigá echi chati sitíi oláami riablo ketasi 'yemi mi suwábama. ⁴A'lí echi Walubela Jesucristo tamujé tamí bichíirata mapu 'yémítamo sinibí galá olá achigórigá mapurigá tamujeta 'yemi mi nuleli. Ayénachó tamujé tamí bichíirata mapu 'yémítamo sinibí echirigá olísabo. ⁵Tamujeta ne wabé nakí mapu echi Walubela Jesucristo 'yemi mi ku'wírama mapurigátamo galá machiboa mapu chu yena 'yemi mi galé Riosi, ayénachó mapurigátamo sinibí kilí ologá anachabo mapurigá echi Walubela Jesucristo anáchali.

⁶'Yemi ritémtami, tamujé 'yemi mi nulé, tamujé Walubélawala Jesucristo nulalila jiti, máputamo waná ariwebo mapuyíripi rijimala mapu ke nakiko nochánala, mapuyíripi ketasi ologá bité mapurigá tamujé 'yemi mi binérali máputamo olabo. ⁷A'lí 'yémítamo ma galá machí mapu churigá galá níima olasa, mapurigátamo achigórigá olabo mapurigá tamujeta sinibí olá, mapujiti tamujé ke sineta ariweli nochá mapalita echo'ná 'yemi yuwa piréali. ⁸Nirapeta wepi chuillé ko'wali auché jaré níwala ko'wáami. Chópita 'wérali ologá sinibí rawé, sinibí rokogó, wabé nóchaga ko'wali mapurigata ketasi suwebo 'yemi níwala ko'wáami. ⁹A'lí echalita arigá risensia níwali máputa tabo mapurigá 'yémítamo tamujé tamí 'yabo echi ko'wáami, mapujiti echalí tamujeta 'yemi mi nawésiya 'yénali Riosi Ra'íchala. Chopi si'winárigá tamujeta sinibí we nóchaga ko'wali tamujé aboni ko'wáamawala mapurigata echirigá 'nérabo 'yemi mapu churigá galá níima mapu 'yémítamo ayénachó olabo. ¹⁰Mapujiti chabénala mapalita abijí echo'ná 'yemi yuwa muchili, tamujeta 'yemi mi je'ná jerigá nuleli: A bilé rijói ketasi nakisáagá nochánala, galá níima mapu ketasi cho ko'mea. ¹¹Mapujiti auché jaré tamujé tamí ané mapu jaré 'yemi ketasi nóchaga piré, máputamo wepi 'yénaga echo'ná auché jaréana bitichí, we nakí nulánala mapurigá echo'ná o'wéala niráa. ¹²Jipi tamujeta we táni echiyiri rijói mapu ibili niráa ne galá kilí nóchaga, galá mega ko'mea aboni níwala ko'wáami. A'lí tamujeta 'yemi mi echirigá nulé tamujé Walubélawala Jesucristo nulalila jiti.

¹³'Yemi keni ritémawa, ke siné ariwesi ne wabé galabé olayá. ¹⁴A'lí a bilé rijói ketasi galá nijéwasagá mapurigá tamujeta 'yemi mi je'ná jerigá osega nulé, ne galá machisí si'néami 'yemi mapu chigá jú echiyiri rijói. A'lí ketasi yuwa yénasí

echiyiri rijói yuwa, mapurigá binói echijiti we riwélama.¹⁵ Chopi ketasi waminá sayérasi echiyiri rijói, mapujiti arigá rijimala niráa ju. Si'winárigá wabé galigá ruyesi mapurigá galá nijéwama tamujé nulalila.

Pablo nakili mapu echi Walubela Jesucristo sinibí ku'wírama echi jaré bichíiyami

¹⁶ A'lí echi Walubela Jesucristo Binói sinibí 'yemi mi 'ya máputamo kilíi ologá piré. Nijeni wabé nakí mapu Binói 'yemi mi 'yama mapurigátamo arigá sinibí waminabi galabé kilíi ologá pirélabo. Ayénachóni nakí mapu echi Walubela Jesucristo sinibí níima ne si'néami 'yemi mi yuwa.

¹⁷ Nijé, Pablo, 'yemi mi je'ná jerigá osega ripora, nijé binói sikala jiti osogá, achigórigá mapurigá nijeni sinibí osá mapalini niwá bilé oselí. Nijeni sinibí je'ná jerigá osá. ¹⁸ Nijeni wabé nakí mapu echi Walubela Jesucristo sinibí ne wabé galigá ku'wírama si'néami 'yemi. ¡Echirigá níima!

Bachá osirúami
mapurigá San Pablo oséli echi
TIMOTEO

Pablo galá osé echi Timoteo

1 Nijé Pablo, nimí osé mápuni Jesucristo jiti julárami ju mapurigani nawisama Binói Ra'íchala. Alí Riosi Binói mapu tamujé tamí Ku'wíriami ju, échiko tamí echirigá nuleli mapurigani nawisama je'ná Galabé Ra'íchali. Ayénachó Jesucristo Binói echirigá tamí nuleli. Alí tamujeta Jesucristo jiti galá bichíiga buwé mapurigata galá ku'wíratami níibo. ²Mujé Timoteo, nijé nimí osé mápumi mapurigá nijé ranala niráa ju, mapujítimi galá bichíili Jesucristo niráa mapalí nijé nimí nawésali. Nijeni wabé nakí mapu Riosi, tamujé Onolá, mi wabé galigá ku'wírama, ayénachó mapu mi wabé natimama, ayénachó mapu Binói mi 'yama mapurigami sinibí galá kilí ologá bitélama. Ayénachóni ne wabé nakí mapu tamujé Walubélawala Jesucristo mi ayénachó echirigá 'yama.

**Echi Pablo ruyé echi Timoteo mapurigá ketasi ariwema mapu jaré 'yékami
nawésami arigá binérama echo'ná Ejésochi piréami pagótami**

³Chabénala nimí aneli mapurigami echo'ná Ejésochi anilíwachi ripima, mapuyénasí nijeni echo'ná bo'ómana Maseróniachi anilíwachi kawírali simili. Jipi abijí echo'ná tibí mapurigami nulema jaré echo'ná piréami mapu aboni ketasi 'yékaka binérama echi auché jaré echo'ná Ejésochi piréami. ⁴Ayénachó nijeni mi aneli mápumi nulema echo'ná Ejésochi piréami pagótami mapurigá aboni ketasi nijéwama echi jaré pagótami karúmati irétaga ra'íchami, mapu chopi we nílaka nakí machinala mapu chu riwéami nílo ne si'néami echi jaré ki'yá bachánala piréami tamujé pagótamawala, mapujiti echalí aboni echirigá chopi 'nátaga, ketasi waminabi galá bichíisama Riosi Ra'íchala, mapurigá Riosi nakí máputa chopi bichíibo.

⁵Echalí nijé nimí júuli echirigá nulénala echo'ná Ejésochi piréami pagótami, mapurigá a jaré aboni echirigá galá nijéwasagá, aboni ne galá galéami níima, mapujiti echalí aboni ne galá bi'wíami níima pachana aboni sulálachi niráa. Ayénachó nijé nimí echirigá júuli nulénala aboni mapurigá aboni ketasi waminabi o'monáratami níima mapurigá chati sitíi oláami niráa, chopi mapurigá aboni sinibí galá bichíyami níima. ⁶Chopi jaré aboni ketasi nakili echirigá olánala. Si'winárigá aboni sinibí wepi 'yena wikabé namutí ra'íchaga mapu ketasi galá ju. ⁷Aboni wabé nakí binéranalá Riosi nulalila echi auché jaré pagótami, chopi aboni ketasi ne galá

machí echi nulalíwami, nirapé cho ne galá machí echi auché jaré namuti mapu aboni galá bichíiga niráa binera echi auché jaré.

⁸Chopi tamujeta galá machí mapu echi Riosi nulalila we galabé olalíwami ju, ayena echirigá suwaba galá nijéwasagá. ⁹Si'néamita galá machí mapu ketasi arigá 'wérali ju nulékowa echi jaré galabé oláami pagótami mapurigá aboni echirigá galabé olama. Chopi ayena arigá 'wérali ju mapu echi jaré chuwé oláami pagótami nulérami níima mapu aboni ketasi waminabi echirigá olama. Ayénachó arigá 'wérali ju mapu echi jaré pagótami mapu ikí ketasi galá nijewa Riosi, ayena nulérami níima mapurigá galá nijéwama. Ayénachó arigá 'wérali ju mapu echi jaré Riosi sayérami pagótami nulérami níima mapurigá aboni ketasi waminabi echirigá sayérama Riosi. Ayénachó arigá 'wérali ju mapu echi jaré wabé chati sitíi oláami pagótami galá nijéwama Riosi nulalila, ayénachó mapu echi jaré mapu ikí ketasi o'wikéami ju Riosi arigá nulérami níima mapu aboni ne galá o'wikema, ayénachó mapu echi jaré mapu ketasi nakiko mapu auché jaré bichíima Riosi arigá nulema mapurigá aboni ketasi waminabi echirigá sayérama Riosi. Ayénachó 'wérali ju mapu echi jaré mapu ikí nakí ko'winália aboni 'wénawala, ayénachó echi jaré mapu ikí nakiko ko'winália auché jaré pagótami, si'néami galá nulérami níima Riosi nulalila jiti mapu ketasi echirigá olama. ¹⁰Ayénachó arigá 'wérali ju mapu echi jaré chuwé bilétari yuwa kochíami nulérami níima mapu aboni ketasi waminabi echirigá olama, ayénachó mapu echi jaré chati sitíi oláami rijói mapu auché jaré rijói chópika yuwa napawika echirigá wabé chati sitíi olako ayénachó nulérami níima mapu ketasi waminabi echirigá chati sitíi olama. Ayénachó 'wérali ju mapu echi jaré chigórami mapu chiná 'wisa auché jaré pagótami, arigá nulérami níima mapu ketasi echirigá 'wísama, ayénachó mapu echi jaré 'yékaka ra'íchami nulérami níima mapu ketasi waminabi 'yékaka ra'icháma, ayénachó mapu echi jaré mapu wepi 'yékaka aní mapu a bichíwali ju, ketasi waminabi echirigá 'yékaka animea. Ayénachó arigá 'wérali ju mapu echi auché jaré mapu ikí auché wiká karúmati chati sitíi olako nulérami níima mapu ketasi echirigá olama, ne si'néami mapu ikí ketasi galá nijéwaga olako mapurigá tamujeta binera mapu galá ju oluwawa. ¹¹A'lí nijeni sinibí binera echi ne bichíwali binérawami. A'lí je'ná Wabé Galabé binérawami je'ná jerigá ju: Mapu echi wabé Galabé Walubela Riosi we nakí mapu jena'í wíchimóbachi piréami pagótami ku wikáwarami níima. A'lí nijeni je'ná jerigá binera echi auché jaré pagótami, mapujiti Riosi Binói tamí júuli echirigá binéranala.

Echi Pablo walú natétara 'ya mapujiti Jesucristo wabé galigá ku'wírali binói

¹²Jipi nijeni walú natétara 'ya echi tamujé Walubélawala Jesucristo, echi mapu tamí ku'wírali mapurigani galá omérama echirigá binériya Binói Ra'íchala, mapujiti Binói tamí galá bichíyami niráa nirali, a'lí echijiti Binói tamí nochárali, Binói náchala olayá. ¹³Echi Walubela Jesucristo tamí 'yali suwaba je'ná jeyiri, chopi chabénala nijeni wabé chati sayériga ra'íchami níili echi Walubela Jesucristo sayériga. Ayénachó nijeni we kichiga a'najátali echi jaré mapu ikí bichíyami níili Binói niráa. Ayénachó nijeni ne wabé sitila aneli. Chopi Riosi arigá tamí wabé natimali, mapujiti echalí nijeni ketasi cho bichíyami níili, a'lí nijeni ketasi machili mapurigá nijeni olali. ¹⁴Echijiti nijeni mayé mapu tamujé Walubélawala Jesucristo ne wabé simírami tamí galeli, ayénachó tamí bichírali, ayénachó tamí 'yali mapurigá

nijeni wabé galema Binói Jesucristo, mapujiti Binói sinibí je'ná jerigá 'ya si'néami mapu ikí napawíkami ju Binói yuwa.

¹⁵ Je'ná jerigá ne bichíwali ju, ayénachó galá níima mapu si'néami pagótami je'ná jerigá galá bichíima: Mapu Jesucristo chopi nawali jena'í wichimóbachi mapurigá Binói omérama ku wikáwiya echi jaré chati sitíi oláami pagótami. A'lí nijé binói ne wabé simírami chati sitíi oláami níili, ketasi mapurigá echi auché jaré. ¹⁶ A'lí Riosi ne wabé simírami tamí natimali, mapalí Binói tamí ku wikáwali, mapurigá Jesucristo echirigá bachá niráa 'nérama mapurigá Binói ne wabé nakí ku wikawánala echi auché jaré wabé simírami chati sitíi oláami pagótami. A'lí Jesucristo echirigá tamí natimali mapurigá waminánomí si'néami pagótami galá machimea mapu Jesucristo Binói galá ku wikawama ne si'néami mapu ikí galá bichíimako Binói niráa, mapurigá aboni sinibí niráa pirélama Riosi yuwa. ¹⁷ Echijiti arigá 'wérali ju mapu tamujé sinibí waminabi 'natabo mapu echi Walubela Riosi ne Wabé Walubela ju, ayénachó mapurigata sinibí waminabi walubélaga anebo echi Binoí, ne sinibí niráa, mapujiti Riosi tamujé Walubela Silínawala ju, mapu ke siné mukumea, chopi ne sinibí niráa bitélama. A'lí echi Walubela Riosi Binói bi'nélipi ne wabé galá machíami ju, chopi tamujeta ketasi omero 'néniya echi Binoí. ¡Echirigá níima!

¹⁸ Mujé Timoteo mapurigá nijé ranala niráa ju, mapujítimi galá bichíili nijé nawésawala. Jipi nijeni mi je'ná jerigá nulé, achigórigá mapurigá echi auché jaré ritémtami bachá niráa mi jiti ruwigá anili mapurigá Riosi nuleli aníuala, mápumi sinibí galá bichíiga olama echi wabé chati sitíi oluwáwami sayéraga, mapurigá bilé sontarsi sayéraga nikowa echi jaré binói sayéraga. A'lí ami echirigá ologá mujé binói galá machimea mápumi ketasi chati sitíi olá. ¹⁹ Auché jaré ma waminá ku ariweli bichíisiya, mapujiti aboni waminabi chati sitíi olali mapalí aboni arigá galá machili, pachana aboni sulálachi niráa, mapu aboni we chati sitíi ologá 'yénali. ²⁰ A'lí echi Imeneo riwéami rijói echirigá olali, echi Alejanto ayénachó. A'lí nijeni ariweli aboni mapurigá echi Satanasi riwéami riabó waminá omérama aboni, mapurigá aboni echijiti galá binema mapurigá aboni ma ketasi chati ra'icháma, Riosi sayéraga.

Echi Pablo ruyé mapu churigá galá níima Riosi yuwa ra'ichásá

2 Ne bachá niráa nijeni 'yemi mi ané máputamo sinibí we tánabo Riosi, máputamo Riosi yuwa ra'íchaga we tánabo, ne si'néami pagótami jiti, ayénachó máputamo sinibí walú natétara 'yabo Riosi. ² Nijeni 'yemi mi echirigá ané máputamo sinibí tánabo Riosi ne si'néami echi jaré o'wéala silíami jiti, ayénachó ne si'néami echi auché jaré igúsuwami jiti, mapurigá tamujé omérabo ne galá kilí ologá piréliya, mapurigata sinibí olabo mapurigá Riosi nakí, ayénachó mapurigá echi auché jaré pagótami galá machimea mapu tamujeta galabé oláami ju. ³ Ne wabé galabé ju máputa echirigá tániga ra'ichábo Riosi yuwa. Ayénachó Riosi Binoí, mapu tamujé tamí Ku'wíriami ju, ne wabé nakí máputa echirigá ra'ichábo Binói yuwa. ⁴ A'lí Riosi ne wabé nakí mapu ne si'néami pagótami galá ku wikawarami níima, ayénachó mapu ne si'néami galá machimea echi ne Bichíwali. ⁵ A'lí bilepi Riosi chopi nirú. Ayénachó bilepi nirú Walubela Katéwaga Ra'íchami mapu Riosi yuwa katéwaga ra'ícha, tamujé chati sitíi oláami pagótami jiti. Échiko echi Walubela Jesucristo ju. A'lí Binói ayénachó bitéali jena'í wichimóbachi mapurigá Rijói niráa.

⁶Ayénachó echí Walubela Jesucristo a Binói niráa nijali mapurigá Binói mi'lirúami níima, si'néami pagótami chatí sitfi olalila jiti. A'lí mapalí ma sébali téitali, echalí Riosi júuli jaré je'ná jerigá nawesánala ne si'néami pagótami. ⁷A'lí nijeni echijiti nawesánala julárami níili mapurigani binérama echí auché jaré isena pagótami mapu ketasi Juríosi ju, mapurigá aboni ayénachó galá machigá bichíima echí ne bichíwali. A'lí nijeni je'ná jerigá ne wabé bichíwaga, ketasi 'yékaka aní, mapujítini galá bichíyami ju Jesucristo niráa.

⁸Echijiti nijeni ne wabé nakí mapu ne suníami piréami pagótami ne galá bichíiga, táníga ra'icháma Riosi yuwa. Chópini ketasi nakí mapu aboni chopí nakimea chatí sitfi sulega pirélanala mapalí aboni echirigá ra'icháma Riosi yuwa, nirapé mapurigá aboni na'awami níima, nirapé mapurigá a'nagupi nakichíami níima. ⁹Achigóríg nijeni nakí mapu echí jaré muguí galá pólaga napachama, ayénachó mapu aboni galá sélali i'wéli sipúchama, ketasi ne wabé simírami ba'yóraga. Ketasi galá níima mapu echí jaré muguí, ripabé niráa achagá, ne wabé simírami ba'yóraga tichima aboni kupala. Nirapé galá níima mapu aboni uchuchama echí ne wabé natéami oro anilíwami, nibilé cho echí wabé natéami perla anilíwami, nirapé mapu aboni ne wabé natéami sipuma. ¹⁰Chopi galá níima mapu echí jaré muguí bichíyami sinibí ne galabé niráa olasa, achigóríg mapurigá galá ju oluwawa echí jaré muguí mapu chopí nakí galabé olánala mapurigá Riosi Binói nakí. ¹¹Galá níima mapu echí jaré muguí galá kilí ke anigá kipusa mapalí nawisálawa Riosi Ra'íchala. Ketasi galá níima mapu aboni chuwé ku kuwana ra'íchaga nijéyama. ¹²Mapujítini nijeni ketasi risensia 'ya mapu echí jaré muguí binérama echí auché jaré echo'ná napawíkowachi, nibilé cho mapu aboni ne wabé o'wéalatama echí jaré rijói yuwa. Chopí galá níima mapu echí jaré muguí kilí niráa ketasi ra'íchaga kipusa. ¹³Mapujítini Riosi ne bachá niráa niwáli echí Arani riwéami rijói. A'lí jubáami niráa niwali echí Eba riwéami mukí. ¹⁴A'lí echí Arani ketasi 'yékarami níili, chopí echí mukí wabé 'yékarami níili. A'lí bachá niráa chatí sitfi olali, Riosi sayéraga. ¹⁵Echijiti Riosi 'yali mapurigá echí jaré muguí wabé okoka ranamea aboni tanala. Chopí aboni arigá ku wikáwarami níima a aboni galá bichíiságá Riosi, ayénachó a aboni galá galéami níiságá, ayénachó a aboni galabératami níiságá Riosi jiti, ayénachó a galá 'nátami níiságá.

**Arigá 'wérali ju mapu ne wabé galabé oláami níima si'néami
echí jaré mapu ikí nakiko o'wéala niráa níilanala echí
auché jaré napawika bichíyami ritémtami yuwa**

3 Je'ná jerigá ne bichíwali ju: A bilé rijói nakiságá walula niráa níilanala echí auché jaré napawika bichíyami ritémtami yuwa, echí nóchali mapu echí rijói nakí olánala we galabé nóchali ju. ²Chopi arigá 'wérali ju mapu ne wabé galabé oláami níima mapuyíripi rijói mapu walula níilanliko echí auché jaré napawika bichíyami ritémtami yuwa, mapurigá echiyiri rijói ke siné riwirúami níima mapurigá chatí sitfi oláami niráa. Arigá 'wérali ju mapu echiyiri rijói chopí bilepi mukí upélasa, ayénachó mapu binói galabé 'nátaga, galabé kilí ologá bitélama. Galá níima mapu echiyiri rijói galá nakíami níima narée echí jaré pagótami echo'ná binói bitélachi, ayénachó galá níima mapu echiyiri rijói galá binériami níisa Riosi Ra'íchala. ³Ayénachó arigá 'wérali ju mapu ketasi bajíami níima echí suguí si'néami echí jaré mapuyíripi nakiko o'wéala niráa nílama echí auché jaré napawika bichíyami ritémtami yuwa. Ayénachó arigá 'wérali ju mapu echiyiri rijói

ketasi kichíami níima auché jaré pagótami. Ayénachó arigá 'wérali ju mapu echiyiri rijói ketasi nakíami níima 'yékaka niráa ménala echi wenomí. Chopi sí'winárigá arigá 'wérali ju mapu echi jaré mapu ikí nakiko o'wéala niráa níilanala echi auché jaré napawika bichíyami ritémrtami yuwa sinibí ne wabé galabé oláami níima, kilí oláami niráa, ketasi korúkami niráa echi wenomí.⁴ Ayénachó arigá 'wérali ju mapu aboni ne galá nuléami níima sí'néami echi jaré mapu ikí napawika pireko echo'ná aboni pirélachi niráa, ayénachó mapu aboni galá omérama nulée mapurigá aboni kúchuwala sinibí ne galá nijéwami níima, ne galá o'wikéami niráa.⁵ Mapujiti a bilé rijói ketasi machisáaga nulée binói kúchuwala, échiko ketasi cho machí tibúu echi jaré wikabé ritémrtami mapu ikí galá bichíyami ju Riosi.⁶ A'lí arigá 'wérali ju mapu echi rijói mapuyíripi nakiko walula nílama echi auché jaré napawika bichíyami ritémrtami yuwa, ketasi ne bukulí bichíyami níima, mapurigá échiko ketasi wabé nóchami níima mapalí echirigá wilárami ju walula niráa, ayénachó mapurigá échiko ketasi chati sitíi oláami níima achigórigá mapurigá echi riablo chati sitíi olali mapujiti binói ne wabé nóchami níili.⁷ Ayénachó arigá 'wérali ju mapu echi rijói galá o'wikérami níima echi auché jaré ke bichíyami pagótami jiti, mapurigá echi rijói ketasi riwélatami níima mapurigá bilé chati sitíi oláami niráa, nirapé mapurigá echi chati sitíi olántarami níima echi riablo jiti.

Galá níima mapu echi jaré riákono anilíwami rijói sinibí galabé oláami níima

⁸ Ayénachó arigá 'wérali ju mapu echi auché jaré nagúurami rijoí, riákono anilíwami, ne galabé wachínaga oláami níima, tarapé 'yékami niráa, nirapé bajíami suguí. Ayénachó arigá 'wérali ju mapu aboni ketasi nakíami níima 'yékaka niráa ménala echi wenomí.⁹ Arigá 'wérali ju mapu aboni galá machíiami níima ne suwaba mapurigata bichíi Jesucristo niráa, ayénachó arigá 'wérali ju mapu aboni ne galabé oláami níima mapurigá aboni sinibí machimea, pachana aboni sulálachi niráa, mapu aboni ketasi chati sitíi oláami ju.¹⁰ Ayénachó arigá 'wérali ju mapu 'yémitamo chopi jawabo, riákono niráa, echi jaré rijói mapu ma galá machirúami ju mapurigá galabé oláami niráa. A'lí mapalí aboni ma chapirúami níisa riákono niráa, echalí galá níima aboni sinibí we galabé oláami níima. Chopi a jaré aboni riwirúami níisa, ketasi galabé oláami niráa, echalí ketasi galá níima mapu aboni waminabi riákono niráa níima.¹¹ Achigórigá galá níima mapu echi jaré riákono anilíwami rijói jubila ne galabé wachínaga oláami níima, ayénachó mapu aboni ketasi chuwé sitíi chati ra'íchaga 'yénami níima, echi auché jaré sayéraga, chopi mapurigá aboni sinibí ne galabé kilí oláami níima, ne galabé bichíwaga oláami niráa.¹² A'lí arigá 'wérali ju mapu echi jaré riákono anilíwami rijoí, ibili niráa, chopi bilepi mukí upélama. Ayénachó arigá 'wérali ju mapu aboni galá machimea nulée aboni kúchuwala, ayénachó mapu aboni galá machimea nulée ne sí'néami echi auché jaré echo'ná aboni pirélachi nóchami.¹³ Mapujiti echi auché jaré napawika bichíyami ritémrtami sinibí galabé oláami niráa anema echi jaré rijói mapu galabé olako, riákono niráa. Ayénachó echi galabé oláami riákono galá omérama nawésiya suwaba mapurigá tamujé galá bichíyami ju, Jesucristo niráa.

Tamujé bichílawala ne wabé walubela ju

¹⁴ Nijeni mayé mápuni ke 'me ayó echo'ná simea, mi 'némiya. Chopi jipi nijé nimí je'ná jerigá osé,¹⁵ mapurigá áni ketasi we yáati echo'ná simisáagá, echalí mujé

Timoteo arigá galá machimea mapu churigá galá níima olasa echo'ná echí jaré napawika bichíyami yuwa. A'lí si'néami echí jaré bichíyami, ne napawika niráa, mapurigá echí sinibí bitéami Riosi kalila niráa ju, mapujiti Riosi Binói galá bité echo'ná pachana aboni sulálachi niráa. A'lí echí jaré napawika bichíyami sinibí ne galá bichíiga piré, ayénachó aboni sinibí galá nawésa echí ne Bichíwali jena'í wichimóbachi. ¹⁶Ne bichíwali ju mapu tamujé bichílawala ne wabé walubela ju:

Riosi nawali jena'í wichimóbachi mapurigá Rijói niráa.

A'lí echí Wabé Galabé Riosi Iwigala nawésali jeanigá mapu Binói ne wabé galabé oláami níili.

A'lí echí jaré o'wéala Riosi kapitánawala galá riwali Binói echirigá oláachi.

A'lí echí jaré isena pagótami mapu ketasi Juríosi pagótami ju, arigá nawésarami níili jeanigá mapu Binói echí Bilepi Riosi Ranala níili.

A'lí jaré pagótami ne suníami jena'í wichimóbachi piréami arigá bichífíli Binói niráa.

A'lí Binói auchecho siné ku torúami níili echo'ná ripá riwigachi.

Jaré waminá ariwema bichíiya

4 A'lí echí wabé galabé Riosi Iwigala tamujé tamí ne machiná niráa machira mapu echalí ne jubá rawé jaré pagótami waminá ariwema bichíiya Riosi. A'lí aboni chopi bichíima jaré wabé 'yékami iwígá echí riablo níwala. Ayénachó aboni chopi bichíima mapurigá echí jaré riablo níwala chati sitíi oláami iwígá nakí mapu aboni bichíima. ²Ayénachó aboni galá bichíima mapurigá nawésama jaré wabé 'yékaka oláami pagótami, ne wabé ikaléami. A'lí echí jaré 'yékaka oláami pagótami ketásirapé o'mónami níima mapujiti aboni echirigá chati sitíi olá. A'lí aboni chopi waminabi chati sitíi olísama. ³A'lí echí jaré wabé 'yékami pagótami ketasi risensia 'yama mapurigá echí auché jaré pagótami galá niwima. Ayénachó aboni nulama mapu echí auché jaré pagótami ketasi ko'mea jaré ko'wáami. Chopi Riosi galá niwali suwaba ko'wáami mapurigá echí jaré galá bichíyami pagótami, mapu galá machiko echí ne bichíwali, ne suwaba walú natétara 'yasa ko'mea. ⁴Mapujiti ne suwaba ko'wáami mapu Riosi niwali galá ju ko'wáwa. Echijiti ketasi galá ju chijúnasa echí ko'wáami, chopi galá níima galá kosá, walú natétara agá Riosi, ⁵mapujiti echí jaré ko'wáami wabé galabératami ju, Riosi Ra'íchala jiti, mapalita walú natétara 'ya Riosi.

Echi Timoteo mapurigá bilé galabé oláami pioni níili, Jesucristo piónawala

⁶Mujé Timoteo, ami je'ná jerigá binérasagá echí jaré ritémtami, echalimi ne galá oláami níima, mapurigá bilé galabé oláami pioni, Jesucristo piónawala niráa, mapujítimi waminabi galá bichíratami níima echí Galabé Riosi Ra'íchala máputa ma galá bichíi, ayénachómi waminabi bichíratami níima echí galabé binélawami mapurigami ma galá nijewaga olá. ⁷Chopi ketasi bichíwi echí jaré pagótami irétawala mapu chopi mapurigá ke newalite ju. Si'winárigá sinibí nakiwi waminabi wabé 'wérali olánala mapurigá Riosi nakí. ⁸Echi nóchali galá ju, mapujiti mapalita jiwríga nocha, echalita iwéami níbo. Chopi mapalita 'wérali olá mapurigata waminabi galá bichíyami níbo Riosi, echalita ku'wíratami ju, abijí piréliya jena'í wichimóbachi, ayénachóta ku'wíratami níbo echo'ná ripá riwigachi, ne sinibí niráa, ne sinibí. ⁹Je'ná ra'íchali ne wabé bichíwali ju. Galá níima ne si'néami pagótami

je'ná jerigá galá bichíisa.¹⁰ Echijiti tamujeta ne wabé nocha, Riosi nóchala olayá. Ayénachóta echijiti wabé risúu olárami ju, mapujítita chopi bichíiga buwé mapurigá echí Sinibí Bitéami Riosi tamujé tamí ku'wírama. A'lí echi Walubela Riosi wabé omérami ju ku wikáwiya si'néami pagótami, ayénachó Binói ne bichíwali ku wikáwama si'néami mapu ikí galá bichíimako Binói niráa.

¹¹ Arígá 'wérali ju mápumi je'ná jerigá nulema echi jaré pagótami, ayénachó mápumi je'ná jerigá binéra ma aboni. ¹² Mujé Timoteo abijimi we ri'malí ju, echijiti sinibí ne galabé olá suwaba mapu ikimi olá, mapurigá echí jaré pagótami ketasi mi kichima mapujítimi ri'malí ju. Sinibí suwaba ne galabé olá mapurigá echí auché jaré bichíyami achigórigá olána lama. Echirigá sinibí ne galabé niráa ra'íchaga, ayénachó sinibí galabé ologá, ne wabé galéami nili, sinibí galabé olá mapurigá Jesucristo jiti bichíyami niráa, sinibí ne galá bichíwi Riosi, ayénachó sinibí galá oláami nili echi jaré mugúi yuwa. ¹³ A'lí mapuyéñasí nijeni ke cho nawá echo'ná mi yuwa ne sinibí galá 'neni Riosi Ra'íchala osirúami, echirigá galá námtaga auché jaré. Sinibí galá ruyegá bineri echi auché jaré ritémptami. ¹⁴ Ke siné ariwé Riosi Ra'íchala nawésiya, mapujiti mujemi 'yárami níli mapurigami galá omérama Riosi nóchala olayá, mapalí Riosi Binói júuli echi jaré o'wéala ochérami bichíyami moba mujé mo'olachi nochánala, aboni sikala jiti; ayénachó mapalí aboni bachá niráa anili mápumi galabé nawésami níima Riosi Ra'íchala.

¹⁵ Ne sinibí 'wérali niráa je'ná jerigá olá, mapurigá si'néami pagótami galá machimea mapurigami waminabi sísimá Riosi nóchala olayá. ¹⁶ A binói niráa ne galá tibuti, ayénachó sinibí chopi binera echi ne bichíwali Riosi Ra'íchala. Sinibí waminabi galabé ologá nochá, Riosi nóchala olayá. A'lí ami je'ná jerigá olásagá, mujemi galá ku'wíratami níima, ayénachó galá ku'wíratami níima si'néami echi jaré mapu kipunku, mapalimi nawésa Riosi Ra'íchala.

Pablo galá ruyé mapu churigá galá níima olásata echi auché jaré ritémptami yuwa

5 Ketasi wabé oyeri echi jaré rijói ma ochérami, chopi kilí niráa ruyé echi jaré ochérami mapurigá aboni galabé olama, achigórigá mapurigami kilí niráa ruyé mujé binói onolá niráa. Ayénachó echirigá kilí niráa ruyé echi auché jaré téuali achigórigá mapurigami kilí niráa ruyé mujé binói ritémawala niráa. ² Ayénachó kilí niráa ruyé echi jaré mugúi mapu ma 'wékami ju, achigórigá mapurigami kilí niráa ruyé mujé binói iyela niráa. Ayénachó galá kilí niráa ruyé echi jaré iwé, achigórigá mapurigami kilí niráa ruyé mujé binói 'wayela niráa. Sinibí ne wabé galabé niráa olá aboni yuwa.

³ Sinibí nulé echi jaré napawika bichíyami ritémptami mapurigá aboni ku'wírama echi jaré mugúi kunámami mapu aboni yuwa muchuwi, si'néami mapu ikí ne bichíwali ne wabé newaleámi juko. ⁴ Chopi a bilé mukí kunámami níwasagá binói kúchuwala kúruwi ma ochérami, a níwasagá omá binói usúula jaré kúruwi ma ochérami, echalí galá níima mapu echi mukí kúchuwala, binói usúula kérémá, galá ku'wírama aboni iyela, aboni su'ulá kérémá. Wabé galá ju mapu echi jaré kúruwi echirigá wabé galigá ku'wírama aboni iyela, aboni su'ulá kérémá, mapujiti echi jaré kúruwi ne bichíwali echirigá o'wiké. A'lí echirigá oluwáwami we galabé ju, ayénachó Riosi we nakí máputa echirigá ku'wírabo tamujé 'wénawala, tamujé su'ulá ayénachó. ⁵ A'lí echi jaré mugúi kunámami mapu ne a'wínali tibíliko, echi jaré mapu ke wesi ku'wírako, abóniko chopi galá bichíiga buwé mapurigá Riosi

ku'wírama aboni, ayénachó aboni sinibí rawé we táníga ra'ícha Riosi yuwa, sinibí rokogó ayénachó. Galá níima mapu echi jaré napawika bichíyami ku'wírasa echi jaré kunámami echirigá oláami. ⁶Chopi echi auché jaré kunámami mapu wepi chuillé ologá pireko mapurigá aboni chopí nakí olánala, abóniko abijí pirélaga, mapurigá ma suwíami niráa ju. Ketasi galá níima mapu echi jaré napawika bichíyami ku'wírama echirigá oláami kunámami. ⁷Mujé Timoteo ayénachó je'ná jerigá nulé echi jaré napawika bichíyami ritémtami, mapurigá aboni echirigá olama, ayénachó mapurigá ke wesi aboni wi'nijírami níima mapurigá ke nijéwami niráa. ⁸Mapujiti a jaré ketásirapé ku'wírasagá aboni níwala pagótami, a ketasi ku'wírasagá aboni 'wénawala kéremá, abóniko echirigá ologá ma ketasi galabé nirá echi galabé bichílawami. A'lí echirigá oláami waminabi wabé simírami chati sitíi oláami níima, ketasi mapurigá echi jaré ke bichíyami.

⁹Galá níima mapu echo'ná ibílana napawika bichíyamichi, echi jaré ritémtami biléana oselichi ro'wasa si'néami echi jaré mugúí kunámami riwalá mapu ikí narémako echi ko'wáami, mapu echi jaré napawika bichíyami ritémtami 'yama isena rawé niráa. Alí galá níima mapu echo'ná oselichi chopí ro'wárami níisa echi jaré mugúí kunámami riwalá mapu ikí ma usansa makói bamíbami juko, si'néami mapu ikí chopí bilepi rijói yuwa kunéami níliko. ¹⁰Ayénachó galá níima mapu echo'ná oselichi chopí ro'wárami níisa echi jaré mugúí kunámami riwalá mapu galabé oláami níliko, echi jaré mapu ma galá ochébanali aboni kúchuwala, ayénachó echi jaré mapu galá nareli auché jaré pagótami echo'ná aboni pirélachi, ayénachó echi jaré mapu galá, ke nóchaga, ku'wíraliko echi auché jaré ritémtami bichíyami, ayénachó echi jaré mapu galá ku'wírali echi auché jaré mapu ne wabé risúu níili, ayénachó echi jaré mapu galabé oláami níliko mapuyíripi oluwáwami mapu ikí aboni olali.

¹¹Chopi ketasi galá níima mapu echo'ná oselichi ro'wárami níisa echi auché jaré mugúí kunámami riwalá mapu ikí ketasi cho sébami juko usansa makói bamíbali, mapujiti siné káachi pe waminana echi jaré ke 'me 'wékami mugúí kunámami waminá ariwema olayá mapurigá Jesucristo nakí mapu aboni galabé ologá pirélama. Echalí siné káachi aboni chopí nakimea chuillé ologá pirélana, ayénachó aboni auchecho siné nakimea kunénala. ¹²Echalí echiyiri mugúí kunámami chati sitíi oláami niráa níima, mapujiti ma ariwesa olayá mapurigá aboni bichíwaga anili mapu abóniko chopí Jesucristo nóchala ologá pirélama, echalí aboni chopí chokila níima. ¹³Ayénachó a echi jaré mugúí kunámami chopí wikanáami bitichí 'yénsagá, echalí siné káachi aboni ne wabé nasínamí nílama, ayénachó sití ra'íchaga ruyami nílama, ayénachó wikabé namuti nakimea olánala mapu ketasi risensia ju mapu aboni olama, ayénachó wikabé namuti ra'icháma mapu ketasi galá ju. ¹⁴Echijiti nijeni chopí nakí mapu echi jaré kunámami, ke 'me 'wékami, auchecho siné kunema, mapurigá aboni galá kúchalama, ayénachó mapurigá aboni níwama aboni kalila, ayena mapurigá aboni sinibí galabé oláami níima, mapurigá echi jaré mapu tamujé tamí sayérami ju ketásirapé omérama sayériga ra'ícha. ¹⁵Mapujiti jaré mugúí kunámami ma ariweli echi Walubela Jesucristo yuwa najata. A'lí aboni ma auchecho siné nijéwaga olali mapurigá echi Satanasi riwéami riablo nulá.

¹⁶Chopi mapuyíripi galá bichíyami níwasagá bilé mukí kunámami, arigá galá níima mapu binói galá ku'wírama. Echalí ketasi arigá 'wérali níima mapu si'néami echi

auché jaré napawika bichíyami ku'wírama, chopi aboni galá omérama ku'wíriya echí auché jaré kunámami mapu ikí ne bichíwali a'wínali tibíliko.

¹⁷ Ne wabé galabé niráa nilasi si'néami echí jaré o'wéala ochérami bichíyami mapu galá machiko galá nuleya echí auché jaré napawika bichíyami ritémtami. Chopi waminabi 'wérali ju máputamo galabé nílabo echí jaré mapu we nocha Riosi Ra'íchala nawésaga binériya. ¹⁸ Ayénachó galá níima mapu aboni galá kóorami níima, mapujiti echo'ná Riosi nulalila oselíwalachi je'ná jerigá osirúami ju: Ketasi chu'wajíwasí echí jaré boisi mapalí moba rimisoka 'yena wikabé turío napabuka achárami mosiya. Galá níima mapu pe táa ko'mea. A'lí echijiti ayénachó galá níima mapu echí jaré o'wéala ochérami kóorami níisa, mapujiti ayénachó je'ná jerigá osirúami ju: Galá níima natétarami níisa ibili rijói mapu ikí we nocha.

¹⁹ Ketasi bichiwi mapalí bilepi rijói chopi mi ruyéeko, bilé walula ochérami bichíyami rijói wi'nijiga. Chopi ayena galá bichiwi mapalí okuá rijói chópirigá, a'nawí anisáagá, bakiyá kéremá. ²⁰ Chopi echo'ná bacháami si'néami echí auché jaré napawika bichíyami yuwa, ne galá oyeri echí jaré o'wéala ochérami mapu echirigá waminabi chati sitíi olísamiko, mapurigá echí auché jaré bichíyami ayénachó we majama chati sitíi olayá. ²¹ Jipi rawé mapalí Riosi tamí galá ritiwá, ayénachó mapalí Jesucristo tamí galá ritiwá, ayénachó mapalí echí jaré o'wéala Riosi kapitánawala tamí galá ritiwá, jipi rawé nijeni mi ne wabé nulé mápumi sinibí je'ná jerigá nijéwaga olama, ayénachó mápumi sinibí ne si'néami pagótami chopi a yiri nílama. ²² Ketasi we yáati niráa jawá auché jaré mapurigá o'wéala ochérami niráa, echí auché jaré napawika bichíyami yuwa. Chopi buwé mapuyénasími ne galá machimea churigá oláami ju aboni. Ke siné waminá wi'nijírami nili mapujítimi wilali pe bilé chati sitíi oláami rijoí, mapurigá walula niráa echí jaré napawika bichíyami yuwa. Ayénachó sinibí ne wabé galabé olá mujé binói niráa.

²³ Jipi jonsa ketasi waminabi chopi bají echí ba'wí, mapujítimi echijiti wisabé we nawilú ropachí, ayénachómi ketasi jiwera. Si'winárigá galá níima mápumi ayénachó pe táa bajisa echí uva ba'wila.

²⁴ Ketasi echirigá we yáati jawá jaré ritémtami mapurigá o'wéala ochérami niráa, mapalimi ketasi cho machí acha galá oláami ju. Jaré pagótami chati sitíi olalila ma galá machirúami ju, ne si'néami echí auché jaré pagótami jiti. Echijiti mujemi galá omérama machiyá mapu aboni chati sitíi oláami ju. A'lí auché jaré pagótami chati sitíi olalila ketasi cho machirúami ju, chopi siné káachi, ke 'me ayó ne suwaba galá machiná niráa machirúami níima. ²⁵ Ayénachó achigórigá echí jaré pagótami galabé olalila ma galá machiná niráa machirúami ju. Chopi a aboni galabé olalila ketasi cho machirúami níisagá, siné káachi ke 'me ayó suwaba galá machirúami níima.

6 Arigá 'wérali ju mapu echí jaré pióntami galá bichíyami ne galá nijéwaga olama mapurigá aboni o'wéalawala nulé, mapurigá echí jaré o'wéala ketasi sitila anema 'yemi Riósawala Riwalá, nibilé cho sitila anema mapu tamujeta galá bichí, jeanigá mapu 'yemi galá bichíyami pioni ketasi galabé olá. ² A'lí a jaré 'yemi galá bichíyami pióntami nulérami níisagá jaré o'wéala jiti mapu ayénachó galá bichíyami ju Jesucristo niráa, echalí ketasi galá níima máputamo kichibo 'yemi o'wéalawala. Ke bilé cho mayesi mapu aboni ketasi galá bichíyami ju Jesucristo niráa. Chopi galá níima máputamo waminabi wabé galá nochasa echí jaré 'yemi o'wéalawala yuwa, mapujiti echí jaré 'yemi o'wéalawala ayénachó galá bichíyami ju, ayénachó aboni wabé galérami ritémtami ju. Nijeni mi nulé,

mujé Timoteo, mápumi sinibí je'ná jerigá binéra, ayénachó mápumi je'ná jerigá ruwigá nawisama.

Echi galabé bichíilawami

³Chopi a bilé rijói 'yékaka binerasagá echi mapu ketasi bichíwali ju, echalí echiko ketasi chopi a yiri binera mapurigá tamujé Walubélawala Jesucristo sinibí galá ra'íchaga binérali, nibilé cho mapurigá tamujeta ne galá bichíi, nibilé cho mapurigata ne galá bichíiga binera echi jaré pagótami. ⁴A'lí echiyiri rijói ne wabé nóchami ju, ayénachó tarapé galá machíami ju, chopi wikabé namuti we chuwé ra'íchami ju. A'lí echiyiri ra'íchali ketasi galá ju, mapujiti mapalí echi pagótami echirigá ra'ícha, echalí aboni chopi wabé korúkami nílama, ayénachó aboni wabé sayéraga ra'íchami nílama, ayénachó chati 'nátami nílama, a'lí aboni ayénachó chati sitíi oláami mayema si'néami echi auché jaré pagótami. ⁵Ayénachó mapalí echi jaré pagótami echirigá 'nátami ju, echalí aboni sinibí a'nagupi nakichiga nakówami nílama, mapujiti aboni ketasi wachínaga 'nátami níima. Ayénachó aboni ketasi machimea echi ne bichíwali. A'lí aboni chopi binéra mapurigá aboni chopi bichíi, mapujiti aboni ne wabé nakimea ménala wenomí. Mujé Timoteo, ketasi yuwa iná echi yiri pagótami. ⁶Ne bichíwali ju mapu echi jaré pagótami mapu ikí galá bichíyami ju Riosi, ne sulachí niráa, ketasi ne bichíwali newaléami ju, mapujiti aboni ne wabé níwami ju kanílawami, mapalí aboni arigá tarapebi yiri níwami ju echi auché jaré namuti jena'í wichimóbachi nirúami. Echirigá ju mapu echi jaré mapu ikí galá bichíi Riosi ne galá kanila echi jaré namuti jiti mapu ikí aboni ma niwa jena'í wichimóbachi. ⁷Mapujiti tamujeta tarapebi yiri namuti pali mapalita ranarúami níili jena'í wichimóbachi. Nirapé omérabo ku toyá jaré namuti mapalita ma suwiba jena'í wichimóbachi. ⁸Chopi ayénata níwasagá echi ko'wáami máputa kopo, ayénachó níwasagá máputa galá napachabo, galá níima máputa echijiti ne galá kanílabo. ⁹Chopi echi jaré pagótami mapu simírami wikabé karúmati namuti níwanaliko, abóniko arigá chati sitíi olá, mapujiti aboni chopi nakí wikabé namuti jena'í wichimóbachi nirúami, a'lí ketasi bachá nakí Riosi níwala galabéala. Echijiti aboni mapurigá ke newalite niráa ju, mapujiti aboni ketasi nakí echi jaré namuti mapu ne bichíwali ku'wírama aboni, sinibí niráa. A'lí aboni suwaba 'wikama, ayénachó aboni walú kastigo 'yárami níima. ¹⁰Mapujiti jena'í wichimóbachi piréami pagótami karúmati chati sitíi olá chopi mapujiti aboni ne wabé simírami korú echi wenomí. A'lí jaré ma waminá ariweli bichiya echi ne Bichíwali, mapujiti aboni ne wabé simírami koruli echi wenomí. A'lí aboni echijiti ne wabé simírami o'monáratami níili sulachí niráa.

Galá níima mapu echi jaré bichíyami galá nakosa, echi chati sitíi oluwáwami sayéraga

¹¹Mujé Timoteo mápumi ma Riosi níwala ju, ariwé ne suwaba chati sitíi oluwáami. Sinibí ne galá wachínaga olá. Chopi galá 'natá echi Walubela Riosi. Ayénachó galá bichiwi Jesucristo, waminabi ne wabé galéami nílaka. Sinibí galá kilí ologá iyeni, tarapé aparúami niráa. ¹²Sinibí ne galá bichíiga mapurigá nikóaka olá suwaba chati sitíi oluwáwami sayéraga. Ne galá bichiwi mapurigami ne sinibí niráa bitélama. Echijiti Riosi Binói mi bayeli mapurigami galá bichíima. Ayénachó mujemi ma galá nawésali bacháami wikabé pagótami yuwa, mapurigami galá bichíi Jesucristo niráa.

¹³Echi Walubela Riosi ne galá machí mapurigá nijeni mi nulé, ayénachó Binói ju mapu galá iwita ne suwaba echi jaré namuti mapu ikí 'yena. A'lí echi Walubela Jesucristo ayénachó galá machí mapurigá nijeni mi nulé, a'lí Binói ayénachó ne galá nawésali echi mapu ne bichíwali ju, mapalí Binói pálati bacháami echi walula silíami Ponsio Pilato riwéami yuwa. Jipi nijeni mi ané, ¹⁴mápumi sinibí ne galá nijéwaga olama mapurigá nijeni mi nulé, mapurigá ke wesi omérama mi wi'nijiya mapuyénasí tamujé Walubélawala Jesucristo ku nawama jenaí wichimóbachi. ¹⁵Waminánomí mapalí ma galá sébachi ju, echi Walubela Riosi suwaba je'ná jerigá olama, mapujiti Binói bi'nélipi ju echi ne wabé Galabé Riosi, Suwaba Omérami, mapu galabé anérami níima ne si'néami pagótami jiti. Ayénachó Riosi echi ne Walubela Silfámi ju, ne si'néami echi auché jaré o'wéala isélkami nuléami. Binói ne wabé simírami Walubela ju, ne si'néami echi auché jaré o'wéala yuwa. ¹⁶A'lí Riosi bi'nélipi ju mapu tarapé siné mukú. Ayénachó Riosi bité mapo'ná ne wabé simírami ratábami ju, mapo'ná ke wesi omero mulubéaniya Binói yuwa. A'lí ke wesi pagótami riwali Riosi, nirapé siné. Ayénachó ke wesi omero 'néniya echi Walubela Riosi. ¡Sinibí ne wabé walubélaga anérami nílaka Riosi! ¡Sinibí ne suwaba omérami nílaka Riosi! ¡Echirigá níima!

¹⁷Mujé Timoteo galá nulé echi jaré wabé níwami pagótami jenaí wichimóbachi piréami mapu aboni tarapé nóchami níima. Ayénachó nulé mapurigá aboni ketasi mayema mapu aboni wabé ku'wíratami níima chopi mapujiti aboni wikabé namuti níwami ju. Siné káachi echi wikabé namuti aboni níwala ketasi sinibí niráa nirúlama. Si'winárigá we nulé mapu aboni chopi bichíima mapu aboni ku'wíratami níima echi Sinibí Bitéami Riosi jiti, echi mapu tamujé tamí ne wabé simírami 'ya suwaba namuti mapurigata echijiti ne wabé kanílabo. ¹⁸Ayénachó nulé mapu echi jaré wabé níwami pagótami ne wabé galabé olama, mapurigá aboni ayénachó ne wabé níwami níima echi galabé oluławámi 'nalina. Ayénachó nulé mapu aboni ne galá 'yáami níima jaré namuti aboni níwala echi auché jaré we newaléami pagótami. ¹⁹A'lí aboni echirigá ologá wabé níwami níima echo'ná ripá riwigachi, mapurigá aboni echijiti galá pirélama pe waminánomí, ayénachó mapurigá aboni sinibí niráa ku pirélama Riosi yuwa.

Ne jubáami echi Pablo galá nulé echi Timoteo

²⁰Mujé Timoteo sinibí ne sébali olá mapurigá Riosi mi nuleli olánala. Ketasi bichiwi echi auché jaré wabé ra'íchami pagótami mapu ketasi bichíyami ju Riosi. Aboni chopi a'nagupi sayéraga ra'ícha, mapujiti jaré aboni ne wabé simírami machíami niráa mayé aboni niráa. ²¹A'lí auché jaré ma ariweli najátiya Riosi mapujiti aboni chopi nakili ne wabé machíami niráa nílabiya mapurigá echi jaré wabé ra'íchami pagótami mayé aboni niráa.

Nijeni chopi nakí mapu Riosi mi wabé ku'wírama mujé Timoteo. ¡Echirigá níima!

Osá Osirúami

mapurigá San Pablo oséli echi

TIMOTEO

Echi Pablo galá osé echi Timoteo

1 Nijé Pablo nimí osé, mápumi julárami níili Jesucristo Ra'íchala nawisánala, mapurigá Riosi Binói nakili. Nijeni julárami níili nawésanala si'néami pagótami mapurigá Riosi bichíwaga anili mapu si'néami pagótami mapu ikí bichíima Jesucristo niráa, ne sinibí niráa pirélama Riosi yuwa. ²Mujé Timoteo, nijé nimí je'ná jerigá osé, mápumi mapurigá nijé binói ranala niráa ju, mapu nijé nimí ne wabé galé. Nijeni ne wabé nakí mapu echi Riosi Onorúami mi wabé galigá natimama. Ayénachóni ne wabé nakí mapu Riosi Onorúami mi 'yama mapurigami ne galá kilí ologá bitélama. Ayénachóni ne wabé nakí mapu tamujé Walubélawala Jesucristo mi ayénachó echirigá 'yama.

Echi Pablo nulé echi Timoteo Jesucristo jiti nawisánala

³Mapalini 'nata mujé jiti, echalini ne walú natétara 'ya Riosi, echi mapu nijeni ne galá bichíiga o'wiké, mapurigá nijé 'wénawala ayénachó o'wikeli echi Binói. Nijeni tarapé wi'nijírami niráa ju, nijé sulálachi niráa, mapujítini galá bichíi Riosi. A'lí nijeni walú natétara 'ya Riosi mapujítini sinibí rawé we 'nata mujé jiti, sinibí rokogó ayénachó, mapalini táníga ra'ícha Riosi yuwa. ⁴Nijeni sinibí we 'nata mapurigami nalaka ukuénali chabé mapalí nijé nimí ariweli. Echijítini ne wabé nakí auchecho siné mi 'nénala, mapurigani auchecho ne wabé kanílama. ⁵Ne sinibí nijeni we 'nata mapurigami ne wabé galá bichíi, achigórígá mapurigá mujé su'ulá, Loira riwéami, ne bachá niráa bichíili, ayénachó mapurigá mujé iyela, Eunise riwéami, ayénachó galá bichíili. A'lí nijeni galá machí mapurigá mujemi ayénachó ne galá bichíili.

⁶Echijiti nijé nimí ané mapu we galá níima mápumi auchecho siné we nílama Riosi nóchala olayá, mapurigami we nílaka olali ch-abé chokichí mapalimi bachá niráa julárami níili Riosi Ra'íchala nawisánala, mapalí nijé nimí echijiti wilali mapalini moba mujé mo'ólachi nocháli nijé sikala. ⁷Mapujiti Riosi ketasi tamujé tamí 'yali mapurigata ne wabé majabo. Chopi Riosi tamujé tamí wabé jiwratali Binói Iwigala jiti, mapurigata wabé galéami nfibo, ayénachó mapurigata ketasi chuwé olabo. ⁸Echijiti ke siné riweli tamujé Walubélawala Jesucristo jiti nawésiya. Nirapé cho riweli tamí jiti, chopi mapujiti nijeni pachá bachárami ju mapujítini bichíi Jesucristo niráa. Si'winárigá sinibí we galá anácha mapalimi arigá echijiti risúu olárami ju mapujítimi nawésa Riosi Ra'íchala, mapurigá Riosi Binói sinibí

mi galá jiwrata mapurigami echirigá galá anachama. ⁹A'lí Riosi tamujé tamí ku wikáwali mapurigata chati sittí olali. A'lí Binói tamujé tamí bayeli mapurigata ne galabé ologá pirélabo mapurigá Binói niráa. Chopi Riosi ketasi echirigá olali chopi mapujiti tamujé, siné káachi, ne galabé oláami níili. Echalí Riosi chopi tamujé tamí echirigá bayeli mapujiti Binói echirigá nakili olánala, mapujiti Binói tamujé tamí wabé galeli máputa bichíibo riwéali Jesucristo niráa. A'lí Riosi arigá tamujé tamí ne wabé galeli ki'yá chokichí jonsa mapalí je'ná kawí ketasi cho niwárami níili. ¹⁰Chopi jipi Riosi tamujé tamí galá machírali mapurigá Binói tamujé tamí ne wabé galé, mapujiti Binói ma ku'wíramiya júuli echi tamujé Walubélawala Jesucristo jena'í wíchimóbachi. Echi Walubela Jesucristo tamujé tamí ku Wikáwami ju. A'lí Jesucristo wabé omériga olali mapurigá echi mukuwáwami ma ketasi tamujé tamí omérama. Ayénachó Binói tamujé tamí galá machírali mapurigata omérabo sinibí niráa piréliya Riosi yuwa, ata galá bichiisagá echi wabé Galabé Riosi Ra'íchala.

¹¹A'lí echi Walubela Riosi tamí wilali mapurigani nawésami níima je'ná Galabé Ra'íchala. Ayénachó Riosi tamí júuli mapurigani nawésaga binérama echi jaré pagótami mapu ketasi Juríosi ju. ¹²Echijiti nijeni risúu olárami ju jena'í pachá bachárami niráa, chopi nijeni ketasi riwela mapujítini galá machí Chigá nijeni galá bichií. Ayénachó nijeni galá bichií mapu echi Walubela Jesucristo ne wabé omérami ju tamí tibútiya echalí ne jubá rawé yénasi.

¹³Ne galá bichiwi mujé Timoteo achigórigá mapurigá nijé nimí binérali echi wabé Galabé Riosi Ra'íchala. Sinibí galá bichiiga olá. Ayénachó ne wabé galéami nili mapujiti Jesucristo sinibí tamujé tamí 'ya máputa we galéami níibo mapalita galá bichií Binói niráa. ¹⁴Echi Walubela Riosi ma mí galá 'yali mapurigami omérama nawésiya Binói Ra'íchala. Sinibí ne galá tituba echi wabé galabéala mapu Riosi mí ma galá 'yali. A'lí echi wabé Galabé Riosi Iwigala mapu pachana tamujé yuwa bité, Échiko sinibí mi ku'wírama.

¹⁵Mujemi ma galá machí mapurigá si'néami echi jaré ritémtami echo'ná Ásiachi anilíwachi kawírali piréami, ma tamí ariweli. A'lí echi auché jaré yuwa, echi Jijelo riwéami rijói ayénachó tamí ariweli, echi Emójene riwéami rijói ayénachó.

¹⁶Nijeni wabé nakí mapu echi Walubela Riosi ne galá natimama si'néami mapu ikí echo'ná echi Onesíjoro riwéami rijói bitélachi piréami ju, mapujiti echi rijói wisabé tamí iwébanali sulachí niráa, mapalini jena'í pachá bachárami níili, ayénachó binói ketasi riwéali mapujítini pachá bachárami níili. ¹⁷Chopi si'winárigá mapalí echi Onesíjoro jena'í Rómachi asali, echalí binói 'wérali ologá, tamí áli, mapuyénasí binói galá tamí riwali. ¹⁸Nijeni ne wabé nakí mapu echi Walubela Jesucristo ne galá natimama echi Onesíjoro, mapurigá binói ne galá ku'wíratami níima echalí ne jubá rawé. Mujé Timoteo, galá machí mapurigá echi Onesíjoro tamujé tamí ne wabé ku'wírali chabénala mapalí tamujeta echo'ná Ejésochi muchili.

Echi Timoteo nulérami níili galabé olánala mapurigá bilé galabé oláami sontarsi, Jesucristo sontársawala

2 Mujé Timoteo mapurigá nijé binói ranala niráa jumi. Ne wabé galéami nili sulachí niráa, achigórigá mapurigata ne wabé galérami ju mapujítita napawíkami ju Jesucristo yuwa. ²A'lí achigórigá mapurigami galá kipuli tamí nawésachi Riosi Ra'íchala, echi jaré wikabé pagótami, jipi echirigá ayénachó

nawisánala julá auché jaré bichíwaga oláami ritémtami mapu mujemi mayé ne bichíwali omérama nawésiya auché jaré pagótami.

³ A'lí galá níima mapu mujemi galá anachama mapalimi risúu olárami ju mapujítimi nawésa Jesucristo jiti rugá. Echirigá ne galá anachá, mapurigá bilé galabé oláami sontarsi, Jesucristo sontársawala niráa. ⁴ A'lí ke wesi sontarsi wabé nílaka nochá auché jaré si'nú nóchali olayá. Si'winárigá ne si'néami echi jaré sontarsi chopi galá nijéwaga olá mapurigá sontarsi niráa, achigórigá mapurigá aboni walúlawala nakí. ⁵ Echirigá achigórigá echi mapu ralajípako chopi galá mé mapalí binói ne sébali galá ologá 'mawá mapurigá nulérami níili. ⁶ Ayénachó galá níima echalí 'wíwachi mapu echi mapu ichálíko ne bachá naresa binói níwala 'wíwami. ⁷ Ne galá 'natá mujé Timoteo mapurigá nijeni mí je'ná jerigá aneli. A'lí echi Walubela Jesucristo mí galá machírama ne suwaba.

⁸ Sinibí galá 'natá echi Walubela Jesucristo jiti, echi mapu echi walula silíami Rabiri riwéami kúchala kúchuwala niráa níili, echi mapu auchecho ku owíñali mapalí ma mukúámi níili. Nijeni sinibí je'ná jerigá ruwigá nawésa, mapalini nawésa Riosi Ra'íchala, mapurigá echi jaré pagótami ku wikáwarami níima. ⁹ Echijiti mapalini risúu olárami ju mapujítini nawésa je'ná Galabé Riosi Ra'íchala, echalini sinibí galá anácha. Ayénachó nijeni abijí galá anácha mapalini bulérami ju bilé jiero wiya jiti, mapurigá bilé wabé chati sitíi oláami niráa. Chopi echi Galabé Riosi Ra'íchala tarapé mapurigá bulérami niráa ju, echi jiero wiya jiti, mapujiti si'néami pagótami mapu ikí bichíimako ne galá ku wikáwarami níima. ¹⁰ Ayénachó nijeni echijiti arigá anácha mapalí nijeni risúu olárami ju, mapujítini we galé echi jaré mapu ikí Riosi ma chapili mapurigá aboni ku wikáwarami níima Jesucristo jiti. A'lí Riosi ayénachó chapili aboni mapurigá aboni ne wabé o'wéalatami níima, ayénachó mapurigá aboni sinibí niráa wabé kanílaga ku pirélama echo'ná ripá riwigachi. A'lí si'néami tamujé bichíyami echirigá 'yárami níibo mapujítita galá bichíi Jesucristo niráa.

¹¹ Je'ná ra'íchali ne bichíwali ju:

A tamujeta ma ko'wirúami niráa níisagá mapujítita bichíi Jesucristo niráa, a'lí tamujeta ayénachó auchecho siné ku pirélabo Binói yuwa.

¹² A tamujeta risúu olárami níisagá mapujítita bichíi Jesucristo niráa, ayénachóta Binói yuwa jawárami níibo mapurigá o'wéala niráa, mapujiti Jesucristo Binói ne wabé Walubela Silíami ju.

Chopi ata jeanisáagá máputa ketasi machí Binói Jesucristo, echalí Binói ayénachó jeanimea mapu Binói ketasi cho tamujé tamí machí.

¹³ Chopi a tamujeta ketasi galá bichíisasagá, echalí echi Walubela Jesucristo arigá sinibí niráa ne wabé bichíwaga olísiami níima, mapujiti Riosi sinibí wabé bichíwaga oláami ju.

A'lí Riosi ketasi omero Binói niráa 'yékaka aniyá.

Echi Pablo nakili mapu echi Timoteo bilé wabé galá oláami nóchami níima Jesucristo nóchala olayá

¹⁴ Mujé Timoteo je'ná jerigá ne galá machili echi auché jaré pagótami. Ayénachó ne galá ruyé mapurigá aboni ketasi wikabé ra'íchaga a'nagupi na'áwama. Je'ná a'nagupi na'áwaga ra'ichálawami tarapé galá ju. Siné káachi echi auché jaré mapu ikí nami echirigá ra'ichálawami sití cho 'natama. ¹⁵ Ne wabé 'wéralli

olá mujé Timoteo mapurigá Riosi nakí mápumi olama, Binói nóchala olayá, mapurigami ketásirapé riwélama, chopi mapurigami galá machimea nawésiya echí ne bichíwali Galabé Riosi Ra'íchala.¹⁶ Ke siné chuwé ra'ichá mujé, mapurigá auché jaré jena'í wíchimóbachi piréami we ra'ícha, mapujiti echí jaré pagótami echirigá ra'íchaga chopi waminabi ne wabé chati sitíi olásimi.¹⁷ A'lí aboni binélawala wabé chati sitíi olila echí auché jaré pagótami, mapurigá biléana wabé chati cháanami niráa, mapo'ná waminabi ne wabé cháansimi. A'lí echí Imeneo riwéami rijói echirigá we binera, echí Jileto riwéami ayénachó.¹⁸ Aboni ma ariweli echí ne bichíwali, mapujiti aboni we binéraga nawésa jeanigá mapu echí jaré suwíami ketasi auchecho siné ku o'wínama. A'lí aboni echirigá nawésaga, chopi olá mapurigá auché jaré ma ketasi waminabi bichíima echí ne Bichíwali.¹⁹ Ne wabé bichíwali ju echí Galabé Riosi Ra'íchala. A'lí echo'ná Riosi Ra'íchala oselíwalachi je'ná jerigá osirúami ju: Echi Walubela Riosi galá machí mapu chigá ju Binói níwala pagótami. Ayénachó je'ná jerigá osirúami ju: Waminá ariwesi chati sitíi olayá, ne si'néami 'yemi máputamo Jesucristo níwala ju.

²⁰ Mapujiti echo'ná biléana walubé kalírali nirúlama jaré bitoli echí wabé natéami oro jiti niwárami, ayénachó nirúlama jaré bitoli, plata jiti niwárami. A'lí echo'ná ayénachó nirúlama jaré kusí niwárami bitoli, ayénachó nirúlama jaré wícholí niwárami bitoli. A'lí jaré echí bitoli ro'wárami níima echí we galabéala namuti, chopi auché jaré ro'wárami níima echí wabé sitíala namuti.²¹ A'lí a bilé rijimala nakisáagá mapu binói galá nirárami níima, echí Walubela Jesucristo jiti, ne galabé oláami niráa Riosi nóchala olayá, echalí arigá 'wérali ju galá bi'wíami niráa bitélasa mapurigá Riosi nakí, ketasi chati sitíi oláami niráa. Echalí echiyiri rijimala mapurigá bilé bitoli ne wabé galabéala ro'wárami niráa níima. A'lí echiyiri rijimala galá omérama olayá suwaba galabé oluwáwami.²² Ketasi chuwé chati sitíi ologá biteli, ketasi mapurigá jaré ri'malí olá. Chopi sinibí galá wachínaga ologá biteli. Sinibí waminabi galá bichíyami nílaka Riosi. Ne wabé galéami nili. Ayénachó sinibí galá kilí ologá biteli mapurigá sinibí olá echí jaré mapu ikí galá bi'wíami suléami juko, echí jaré mapu sinibí tániga ra'ícha echí Walubela Riosi yuwa.²³ Ketasi nijewi mujé mapalí auché jaré a'nagupi ra'ícha mapurigá ke newalite niráa, mapujítimi galá machí mapu echirigá ologá, aboni chopi waminabi na'áwaga nakichima a'nagupi.²⁴ A'lí ketasi galá níima echirigá wabé yoka inasa mujé, mapujítimi echí Walubela Riosi piónawala niráa ju. Si'winárigá galá níima mápumi ne wabé galéami níima, si'néami echí auché jaré pagótami. Ayénachó galá níima mápumi galabé binériami níima Riosi Ra'íchala, ayénachó mápumi galá anáchami níima mapalí auché jaré mi wabé kumé.²⁵ Galá níima mápumi kilí ologá ruyema echí jaré mapu wabé sayérami ju Riosi Ra'íchala, mapurigá aboni ma ketasi echirigá olama. A'lí siné káachi pe waminana Riosi galá bichíratama aboni, mapurigá auchecho ku ro'wiga, aboni galá bichíima echí ne Bichíwali.²⁶ Echalí aboni galá ku 'natama. A'lí aboni echijiti auchecho ku botonárami niráa níima, mapujiti jipi aboni mapurigá bulirúami niráa ju, echí riablo jiti. A'lí echí riablo chopi olá aboni yuwa, mapurigá binói nakí olánala.

**Echalí ne jubá rawé jena'í wichimóbachi piréami
pagótami ne wabé chati sitíi oláami níima**

3 Ayénachó galá níima mapu mujé Timoteo galá machimea mapu echalí wabé waminánomí rawé si'néami mapu ikí galá bichíiko Riosi ne wabé risúu olárami níima. ² Mapujiti echi auché jaré ke bichiyami pagótami chopi aboni niráa galéami níima. Aboni ne wabé korúkami níima echi wenomí. Ayénachó aboni ne wabé o'wéalatama a aboni niráa. A'lí aboni ne wabé nóchami níima. Ayénachó aboni ne wabé sayéraga ra'íchama Riosi. Ayénachó aboni ketasi nijéwami níima aboni 'wénawala. A'lí aboni ketasi nakimea natétara ayá. A'lí aboni ketasi galá niráma echi bichífilawami mapurigá auché pagótami ne galá bichíima. ³ Echalí wabé waminánomí rawé echi jaré ke bichiyami pagótami ketásirapé galéami níima. Aboni ketasi ku wikáwama echi jaré aboni sayela. A'lí aboni ne wabé sitíi ra'íchami níima. Ayénachó aboni wabé jobátami níima. A'lí aboni ne wabé sayérami níima suwaba galabé oluwáwami. ⁴ Echalí rawé echi jaré ke bichiyami pagótami a'nagupi wi'nijíami níima, ayénachó aboni chuwé ke 'nátaga oláami níima, ayénachó echi jaré ke bichiyami pagótami, aboni niráa, ne bachá o'wéala niráa mayema. A'lí aboni ne wabé nakimea olánala mapurigá aboni kanílaga olá, chopi aboni ketasi nakimea bichífinala Riosi. ⁵ A'lí echi jaré ke bichiyami pagótami arigá ne wabé amachíami níima, chopi aboni ketasi machimea mapu Riosi ne wabé omérami ju galabéala ku niwayá echi pagótami.

Chopi mujé Timoteo, ketasi siné yuwa iná echiyiri pagótami. ⁶ Mapujiti jaré je'ná jeyiri rijói echo'ná jaréana kalírali mo'wisáa, ne wabé 'yékaka ané echi jaré ne wabé chati sitíi oláami muguí, ke newalite, echo'ná piréami. ⁷ A'lí je'ná jeyiri muguí sinibí niráa we bineka kipugú, chopi aboni ketasi galá omero machiyá echi ne Bichíwali. ⁸ Chabé ki'yá echi okuá rijói sukurúami, echi Jánesi riwéami, echi Jámberesi riwéami yuwa, ne wabé sayérali echi walula Moisesi mapu Riosi jiti julárami níili. Jipi rawé echi jaré chati sitíi oláami rijói echirigá achigórigá ne wabé sayérami ju echi ne Bichíwali. Ayénachó aboni ne wabé chati 'nátami ju, tarapé bichiyami Riosi niráa. ⁹ Chopi echi jaré chati sitíi oláami rijói arigá ketasi omérama olayá mapurigá wabé wikabé auché jaré ayénachó ketasi bichíima Riosi niráa, mapujiti ne si'néami echi auché jaré pagótami ne galá machíratami níima mapu echi jaré chati sitíi oláami rijói ke newalite ju, achigórigá mapurigá echi Jánesi, echi Jámberesi ayénachó machirúami níili mapurigá ke newalite niráa.

Ne jubáami niráa, echi Pablo ruyeli echi Timoteo mapu ne wabé galabé olama

¹⁰ Chopi mujé Timoteo ne galá nijéwaga olali mapurigá nijeni nawésaga binérali. Ayénachómi galá ologá bitéali mapurigá nijeni olali. Mujemi sinibí galabé olánali achigórigá mapurigá nijeni galabé olali. Ayénachómi galá bichíili mapurigá nijeni bichíi. Ayénachómi kilí ologá binérali echi auché jaré achigórigá mapurigá nijeni olali. Ayénachómi galá galéami níili mapurigá nijeni wabé galéami níili. Ayénachómi galá anáchali ¹¹ mapalimi risúu ologá a'najátarami níili, ayénachó mapalimi ne wabé risúu olárami níili echi auché jaré ke bichiyami pagótami jiti. A'lí mujemi ma galá machí mapurigá nijeni ikili echo'ná Antíokfachi, echo'ná Ikóniachi ayénachó, echo'ná Lístrachi asíchiko, mapurigani ne wabé risúu ologá a'najátarami níili, chopi echi Walubela Jesucristo sinibí tamí galá ku'wírali. ¹² A'lí ne si'néami echi jaré

bichíyami pagótami mapu ikí sinibí nakiko chopi galabé ologá pirélanala mapurigá Jesucristo nakí, abóniko arigá kichiga a'najátarami níima.¹³ Chopi echí auché jaré chati sitíi oláami pagótami, echí jaré wabé 'yékami ayénachó, si'néami waminabi nokuísama waminabi ne wabé chati sitíi olayá, ne wabé 'yékaka echí auché jaré pagótami, ayénachó wabé 'yékarami nílasagá echí auché jaré jiti.

¹⁴ Chopi waminabi galá bichíwi mujé Timoteo, mapurigami ma galá bineli Riosi Ra'íchala, mapujítimi galá machí mapu Riosi Ra'íchala ne bichíwali ju. Ayénachómi galá machí mapu chigá mi binérali echí Galabé Riosi Ra'íchala. ¹⁵ Galá 'natá mapurigami táaka jonsa galá machili echí We Galabé Riosi Ra'íchala osirúami, echí mapu ne wabé omérami ju galá machíriya echí jaré pagótami, mapurigá aboni galá ku wikáwarami níima mapalí aboni galá bichíima Jesucristo niráa. ¹⁶ Chabé ki'yá Riosi galá 'natárali jaré galabé oláami rijói mapurigá aboni osímea Riosi Ra'íchala achigórigá mapurigá Riosi Binói binérali aboni osayá. Echijiti ne suwaba Riosi Ra'íchala osirúami wabé galá ju tamujé tamí ne wabé galabé niráa binériya. Ayénachó Riosi Ra'íchala tamujé tamí oyérami ju mapalita ketasi galá bichíi. Ayénachó Riosi Ra'íchala tamujé tamí galá ruyé mapurigata ketasi waminabi chati sitíi olabo. A'lí Riosi Ra'íchala ayénachó galá binera echí jaré Riosi níwala pagótami mapurigá aboni omérama ne galá wachínaga ologá piréliya,¹⁷ mapurigá si'néami Riosi níwala pagótami galá omérama olayá karúmati galabé oluwáwami.

4 Waminánomí rawé echí Walubela Jesucristo ne wabé Walubela niráa ku nawama, justicia olámiya ne si'néami pagótami yuwa mapu ikí abijí piréami níima jena'í wichimóbachi, ayénachó ne si'néami echí jaré mapu ma suvíami níima. A'lí echí Binói Walubela Jesucristo galá machí mapurigani aní, ayénachó Riosi Onorúami galá machí mapurigani aní mapalini ne wabé mi nulé² mapurigami galá nawisama echí Galabé Riosi Ra'íchala. Ne sinibí galá bichíiga nawesi mapalí galá nílatirikó, ayénachó mapalí ketasi galá nílatirikó. Ne galá machili echí jaré pagótami mapu aboni chati sitíi oláami ju. Ayénachó galá nawésaga oyeli echí jaré chati sitíi oláami. A'lí galá nawésaga ruyé echí jaré bichíyami, sinibí ne galá kilí niráa binéraga echí jaré aboni. ³ Mapujiti pe waminánomí rawé jena'í wichimóbachi piréami pagótami ketasi risensia 'yama mapurigá aboni waminabi nawésarami níima echí Galabé Riosi Ra'íchala. Si'winárigá aboni chopi nakimea jaré pagótami ra'íchala námanala, mapurigá aboni chopi chuwé niráa 'nata. Echalí echí jaré pagótami chopi bayema echí jaré nawésami mapu ikí echirigá nawésaga, risensia 'yama mapurigá echí pagótami olama mapurigá aboni chopi nakimea olánala. ⁴ Echalí echí jaré pagótami ma ketasi nakimea kipúnala echí ne Bichíwali. Chopi aboni ne wabé nakimea echí pagótami irétawala kipúnala. ⁵ Chopi mujé Timoteo, sinibí ne galabé wachínaga 'natá. Sinibí galá anachá mapalimi risúu olárami ju. Sinibí galá nawesá echí Galabé Riosi Ra'íchala. Ne sébali galabé olá mapurigá Riosi mi nuleli.

⁶ Mapujiti ke 'me ayó nijeni ma mi'lirúami níima mapujítini bichíyami ju Jesucristo niráa. Ma ne mulubé ju mapalini mi'lirúami níima. ⁷ Mani ne sébali galá nikówali suwaba chati sitíi oluwáwami sayéraga. Mani ne sébali suwaba sunili nawésa Riosi Ra'íchala mapurigá bilé 'máami ma galá suní. Ne sinibí nijeni galá bichíili Riosi. ⁸ Echijiti nijeni arigá narema echí ne wabé galabéala, echí mapu echí Walubela Jesucristo tamí 'yama echalí ne jubá rawé, mapujítini galá wachínaga ologá biteáli. A'lí echí Walubela Jesucristo sinibí ne galabé justicia oláami ju. A'lí Binói ketasi

chopi tamí 'yama echí galabéala, chopí ayénachó 'yama ne si'néami echí jaré mapu ikí wabé galigá buweko mapu Binói ku nawama jena'í wichimóbachi.

Echi Pablo galá ruyé echí Timoteo

⁹Mujé Timoteo 'wérali olá we yáati wakiná siminala tamí 'némiya. ¹⁰Mapujiti echí Rémasi riwéami rijimala ma tamí ariweli. Binói ne wabé simírami galeli echí jaré jena'í wichimóbachi nirúami namuti. Echijiti binói echo'ná Tesalónachi anilwachi walúlachi simili. A'lí echí Kresente riwéami rijimala simili echo'ná Galákiachi anilwachi kawírali. A'lí echí Tito echo'ná Ralmásiachi anilwachi kawírali simili. ¹¹Chopi echí Lúkasi bi'neli tamí yuwa atí. Wakiná bayera echí Márkosí mapalimi wakiná simea, mapujiti binói galá omérama tamí ku'wíriya, Riosi nóchala olayá. ¹²A'lí echo'ná Ejésochi júulini echí Tíkiko. ¹³Wakiná to echí nijé níwala wi'llí napacha mapalimi wakiná simea. Nijeni ariweli echo'ná Tróachi anilwachi, echo'ná echí Karpo riwéami rijimala bitélachi. Ayénachó wakiná to echí jaré nijé níwala oselí. Chopí bachá niráa to echí jaré wichí osirúami. ¹⁴Echi Alejanto mapu jiero michoka niwáami ju karúmati, échiko tamí wabé sayérali. Echi Walubela Jesucristo ku natétama echí rijói, achigórígá mapurigá binói olali. ¹⁵Mujé Timoteo ayénachó a mujé binói niráa ne galá tibuti echí rijói jiti, mapujiti échiko chabé jonsa ne wabé sayérali mapu tamujeta nawésa.

¹⁶A'lí chabénala mapalí nijeni bachá niráa ni'yúraga ra'íchali bacháami echí jaré igúsuwami yuwa mapujiti aboni tamí wi'nijili, echalí ke wesi echí auché jaré ritémtami tamí ku'wírali, chopí ne si'néami tamí waminá bi'neli ariweli. Jipi nijeni ketasi nakí mapu Riosi echijiti waminabi wi'nijima aboni. ¹⁷Chopi echalí echí Walubela Jesucristo arigá tamí ne wabé ku'wírali. A'lí Binói tamí jiwratali mapurigani ne sébali nawésama echí galabé Riosi Ra'íchala, mapurigá ne si'néami echí auché jaré isena pagótami ayénachó galá kipuma. Echalí echí Walubela Jesucristo echirigá tamí ku'wírali mapurigani ketasi suwábarami níima mapurigá bilé wabé aparúami mawiyá wabé suwaba. ¹⁸Ayénachó echí Walubela Jesucristo sinibí tamí ku'wírama mapurigá echí wabé chati sitíi oluwáwami ketasi tamí omérama. Ayénachó Binói tamí tibútama mapurigani sebama echo'ná ripá riwigachi mapo'ná Binói we nulá mapurigá Walubela niráa. Galá níima mapu echí Walubela Jesucristo waminabi walubélaga anérámi níisa sinibí niráa, ne sinibí. ¡Echirigá níima!

Echi Pablo ripóraga náwala auché jaré ritémtami

¹⁹Mujé Timoteo galá ripori echí Priska riwéami mukí, echí binói kunala, Akila riwéami ayénachó. A'lí ayénachó galá ripori si'néami mapu ikí piré echo'ná echí Onesíjoro riwéami rijói bitélachi. ²⁰Echi Erasto riwéami rijimala echo'ná Koríntochi aripili. A'lí echo'ná Milétochi ariwélini echí rijimala Trójimo riwéami mapujiti binói nayúami níili. ²¹Mujé Timoteo we sapú wakiná simí, ke cho romó níliachi. Echi rijimala Eúbulo riwéami ayénachó mi ripora, echí Purénsia riwéami ayénachó, echí Lino riwéami ayénachó, echí Kalária riwéami mukí asífiko. Ne si'néami echí auché jaré ritémtami ayénachó mi galá ripora.

²²Nijeni nakí mapurigá echí Walubela Jesucristo mi yuwa asimea. Ayénachó mapurigá Riosi si'néami 'yemi mi ne wabé ku'wírama. ¡Echirigá níima!

Osirúami

mapurigá San Pablo oséli echi

TITO

Echi Pablo galá osé echi Tito

1 Nijé, Pablo, Riosi pióngawala ju. Echi Walubela Jesucristo tamí nawesánalaga júuli, mapurigani nawisama echi ne Bichíwali, mapurigá si'néami echi jaré mapu ikí Riosi bachá niráa chapili, ma galá bichíma Binói Ra'íchala. Ayénachó Riosi tamí júuli mapurigani binéraama mapurigá aboni galá machimea echi ne Bichíwali, ayénachó mapurigá aboni echijiti ku niwárami níima ne wabé galabé.² Ayénachó nijeni julárami níili nawesánala mapurigá aboni galá bichífiga buwema mapurigá waminánomí aboni sinibí niráa ku pirélama echo'ná ripá riwigachi. A'lí echi Walubela Riosi tarapé ikaléami ju. A'lí ki'yá chokichí jonsa mapalí ke cho niwárami níili je'ná kawí, echalí Riosi bichíwaga anili mapu sinibí niráa pirélama si'néami mapu ikí galá bichíma Jesucristo niráa.³ A'lí jipi mapalí ma sébali téitali, jipi bukulí jonsa, Riosi nulali mapurigá Binói Ra'íchala galá nawésarami níima echi jaré pagótami. Echijiti echi Walubela Riosi mapu tamujé tamí Ku'wíriami ju, tamí we nuleli Binói Ra'íchala nawisánala, mapurigá Riosi Binói chopi nakili nulayá.⁴ Jipi, mujé Tito, nimí je'ná jerigá osé. Mujemi ne bichíwali mapurigá nijé binói ranala niráa jumi mapujítimi galá bichííli achigórigá mapurigá nijeni bichíi. Wabeni nakí mapurigá Riosi Onorúami, echi Walubela Jesucristo yuwa, mapu tamujé tamí Ku'wíriami ju, sinibí mi wabé natimaka ku'wírama mapurigami kilí ologá bitélama.

⁵Echijiti chabénala nijé nimí ariweli echo'ná Krétachi anilíwachi nasipa walú ba'wírali nirúami kawí, mapurigami galá wachínaga katiwama suwaba Riosi nóchala echo'ná. Echalí nijé nimí nuleli mapurigami jawama jaré galabé bichíyami rijói echo'ná ibílana mapo'ná jaré bichíyami ritémtami sinibí napawí, mapurigá echi jaré mápumi echirigá jawa echo'ná nochama echi auché jaré napawika bichíyami yuwa mapurigá o'wéala ochérami niráa.⁶ Galá níima ibili o'wéala ochérami ne wabé galabé ologá pirélasa mapurigá aboni ke siné wi'nijírami níima mapurigá chati sitíi oláami niráa. Ayénachó arigá 'wéralli ju mapu ibili aboni mapu ikí jubéami ju, chopi bilepi mukí upéami níima; ayénachó mapu aboni kúchuwala galá bichíyami níima Riosi; ayénachó mapu aboni kúchuwala ketasi wi'nijírami níima mapurigá chuwé oláami niráa; ayénachó mapu aboni kúchuwala galá nijéwiyami níima aboni 'wénawala.⁷ Mapujiti arigá 'wéralli ju mapu echi jaré napawika bichíyami o'wéalawala galabé oláami níima, ayénachó mapu aboni ketasi wi'nijírami níima mapurigá chuwé

oláami niráa, ayénachó mapu aboni ketasi we nóchami níima, ayénachó mapu aboni ketasi na'awami níima, ayénachó mapu aboni ketasi bajíami níima echi suguí, ayénachó mapu aboni ketasi 'yékaka ologá 'yénami níima, ayénachó mapu aboni ketasi korúkami níima, mapujiti echi jaré napawika bichíyami o'wéalawala we nocha Riosi nóchala olayá.⁸ Chopi si'winárigá galá níima mapu aboni sinibí galá narema echi auché jaré ritémtami echo'ná aboni kalflachi. Ayénachó galá níima ibili aboni ne wabé galabé oláami níisa. Arigá 'wérali ju mapu aboni galabé 'nátami níima, ne wabé galabé wachínaga oláami niráa. Arigá 'wérali ju mapu ibili aboni chopi nakimea olánalá mapurigá Riosi nakí, ayénachó mapu aboni tarapé chuwé oláami níima.⁹ Ayénachó arigá 'wérali ju mapu ibili rijói mapu o'wéala ochérami niráa nocha echi auché jaré napawika bichíyami yuwa ne galá bichíyami níima echi Galabé Riosi Ra'íchala, mapurigá aboni bachá niráa binératami níili. A'lí ibili aboni ayénachó galá omérama binériya echi auché jaré, ayénachó aboni galá omérama bichíriya echi auché jaré mapu we sayéraga ra'ícha.

¹⁰ Echirigami chopi jawama jaré galabé oláami rijói mapurigá o'wéala ochérami niráa, mapujiti wikabé auché jaré we sayérami ju Riosi. A'lí jaré ibili echi Juríosí pagótami ne wabé simírami sayérami ju Riosi. A'lí echi jaré aboni ke newalite niráa ra'ícha, ayénachó aboni wabé 'yékami ju.¹¹ Arigá 'wérali ju mápumi ketasi ariwema mapu echiyiri binérami waminabi binérama echi jaré pagótami, mapujiti aboni wabé si'winárigá binera mapuyénasí ne si'néami echo'ná jaréana bitichí piréami pagótami wabé si'winárigá bichíima. Echalí aboni ketasi galá bichíima Riosi Ra'íchala, mapujiti echi jaré 'yékami binérami wepi binera echi mapu ketasi galá ju, mapujiti aboni 'yékaka niráa ménali wenomí.

¹² Chabé ki'yá bilé rijói nawésami echo'ná Krétachi bitéami jeanili: Ne si'néami jenaí Krétachi piréami pagótami ne wabé 'yékami ju. Ne si'néami wabé jobátami niráa ju. Aboni ne wabé simírami ko'wéami ju, ayénachó aboni ne wabé nasinákuli ju.¹³ Echi rijói ne bichíwaga anili. Echijiti nijeni nakí mápumi wabé oyérama echi jaré aboni, mapurigá aboni chopi bichíima echi mapu ne bichíwali ju.¹⁴ Ne galá oyéraga ané aboni mapurigá ketasi bichíima mapurigá echi jaré Juríosí pagótami 'yékaka ireta. Ayénachó oyéraga ané mapu aboni ketasi nijewaga olama mapurigá echi jaré pagótami nulá, ne si'néami mapu ikí ketasi bichíinali echi ne Bichíwali.

¹⁵ Echi jaré mapu ikí Riosi ma galabé niráa 'natáraliko, abóniko chopi ne galabé niráa 'nata suwaba namuti jiti. Chopi echi auché jaré ke bichíyami pagótami ketasi galabé 'natáratami ju, echijiti aboni chopi wabé chati sitíi 'nata suwaba namuti jiti, mapujiti aboni ne wabé chati sitíi 'natáratami ju. A'lí mapalí aboni we chati sitíi olá, echalí aboni ketásirapé o'mona.¹⁶ Echi jaré aboni sinibí aní mapu aboni galá bichíi Riosi, chopi aboni wabé 'yékaka echirigá aní, mapujiti aboni ketasi galabé olá, chopi echi auché jaré mapu ikí bichíi Riosi sinibí ne wabé galá olá. Echi jaré chati sitíi oláami chopi ne wabé simírami chati sitíi olá. Abóniko ketasi nijewami ju Riosi. A'lí aboni ketasi omero galabé olayá.

Echi galabé binérawami

2 Mujé Tito, galá níima mápumi sinibí ne galabé niráa ra'ichása achigórigá mapurigami ne galabé niráa binératami níili.² Galá nawésaga ruyé echi jaré ochérami mapu aboni ketasi tékami níima, chopi mapu aboni sinibí galabé oláami níima. Ayénachó nawésaga ruyé mapu aboni sinibí galabé 'nátami níima, ayénachó

mapu aboni sinibí galá bichiyami níima. Ayénachó nawésaga ruyé mapu aboni sinibí wabé galéami níima, ayénachó mapu aboni arigá anacháma mapalí aboni risúu olárami ju. ³ Ayénachó echirigá achigórigá ruyé mapu echi jaré 'wékami ne galá bichiyami níima Riosi, ayénachó mapu aboni ketasi chuwé sitíi chati ra'ícha 'yénami níima, auché jaré sayéraga. Ayénachó nawésaga ruyé mapu echi jaré 'wékami ketasi bajíami níima suguí. Galá níima mapu aboni chopi we galabé oláami níima, mapurigá echi auché jaré muguí echirigá riwisá, galá binema achigórigá galabé olayá. ⁴ Ayénachó galá níima mapurigá echi auché jaré muguí mapu ketasi 'me 'wékami ju galá binema galeya aboni kunala, ayénachó mapu aboni binema galeya aboni kúchuwala. ⁵ Ayénachó galá níima mapu echi jaré 'wékami galá binérama echi auché jaré muguí mapurigá aboni ketasi chuwé olama, chopi mapu ibili bilepi rijói yuwa bitélama. Ayénachó galá níima mapu echi jaré 'wékami binérama echi auché jaré muguí mapurigá aboni galá nocháma echo'ná ibílana aboni pirélachi, ayénachó mapu ibili galabé oláami níima, ayénachó mapu ibili ne galá nijewami níima aboni kunala, mapurigá ke wesi echi auché jaré omérama sayéraga ra'ícha echi Wabé Galabé Riosi Ra'íchala, siné káachi riwisá mapu jaré muguí bichiyami ketasi galá olá.

⁶Mujé Tito, nimí nulé mápumi achigórigá ruyema echi auché jaré ri'malí mapurigá aboni ne galabé wachínaga 'nátami níima. ⁷Ayénachó nijé nimí nulé mapu mujemi ne suwaba galabé olama, mapurigá echi auché jaré téuali echirigá riwisá ayénachó binema galabé olayá. Ne sinibí galá bineri echi Galabé Riosi Ra'íchala, galá wachínaga ologá mapurigá Riosi nakí. Sinibí galabéala 'nalí 'nátaga bineri, ne wabé galabé niráka Riosi Ra'íchala. ⁸Sinibí ne galá wachínaga ra'íchá mapurigá ke wesi mi wi'nijima mapurigá chuwé ra'íchami niráa. Echalí echi jaré mapu ikí mi kichiko ne wabé riwélama mapujiti aboni ketasi omérama sayéraga ra'ícha jeanigá mapu tamujeta chati sitíi oláami ju.

⁹Nijé nimí nulé mápumi ruyema echi jaré pióntami galá bichiyami mapu aboni ne galá nijewami níima echi jaré aboni o'wéalawala yuwa. Ne galá nawésaga bineri mapurigá echi jaré pióntami bichiyami sébali galá nocháma, mapurigá aboni o'wéalawala nulé, ayénachó mapu aboni ketasi ku kuwana ni'yókami níima. ¹⁰Ayénachó nulé mapu echi jaré galá bichiyami pióntami ketasi chigóoma echi jaré aboni o'wéalawala níwala namuti. Chopi galá níima mapu aboni sinibí ne galá wachínaga oláami níima, mapurigá aboni o'wéalawala echirigá riwisá animea mapu Riosi Ra'íchala binékowami ne wabé galabé ju. A'lí echi Walubela Riosi, mapu tamujé tamí Ku'wíriami ju, waminabi walubéraga anérami níima.

¹¹Echi Walubela Riosi ma tamujé tamí machírali mapurigá Binói ne wabé galéami ju, echijiti Binói ku wikáwama ne si'néami pagótami mapu ikí galá bichíima Jesucristo niráa. ¹²A'lí mapujiti Riosi echirigá ne wabé simírami galabé ju, echijiti tamujeta binératami ju máputa waminá ariwebo suwaba chati sitíi oluwáwami, ayénachó máputa tarapé chati sitíi oláralabu mapurigá echi auché jaré jena'í wichimóbachi piréami sinibí chati sitíi olánali. A'lí bicheta binératami ju máputa galabé wachínaga ologá pirélabo jena'í wichimóbachi, ne wabé galá 'nátami niráa, ayénachó máputa sinibí galá o'wikébo Riosi. ¹³Ayénachó tamujeta binératami ju máputa galá bichíiga buwebo mapuyénasí echi tamujé Walubélawala Jesucristo ku nawama jena'í wichimóbachi mapurigá ne Walubela niráa, mapujiti Binói tamujé Riósawala ju, ayénachó Binói tamujé tamí Walubela Ku'wíimi ju. Echalita 'nebo mapurigá ne

wabé galabé niráa sebama ne suwaba mapurigá ne bichíwaga anirúami ju echo'ná Riosi Ra'íchala oselíwalachi.¹⁴ Mapujiti echi Walubela Jesucristo, ki'yánala niráa, a Binói nijali tamujé tamí jiti mapurigá Binói waminá mi'lirúami níima echo'ná kúrsichi michóniga, tamujé chati sitíi olalila jiti. Jesucristo echirigá olali mapujiti Binói we nakili tamujé tamí ku wikawánala suwaba mapurigata chati sitíi olali, ayénachó mapurigá Binói tamujé tamí suwaba ku bi'wama, mapurigata Binói níwala pagótami níibo, ayénachó mapurigata ne wabé nakíami níibo galabé olánala.

¹⁵ Arigá 'wérali ju mapu mujemi sinibí je'ná jerigá galá nawésaga binéraama echi jaré pagótami, ne galá bichíraga aboni. Ayénachó we oyera echi jaré mapu ikí ketasi galá nijéwami ju. Ketasi ariwé mapurigá echi auché jaré pagótami mi ke 'me niráma.

Pablo ruyégá aní mapu churigá galá níima olasa si'néami echi jaré bichíyami

3 Mujé Tito, we galá ruyé echi jaré napawika bichíyami mapu aboni ne galá o'wikéami níima echi jaré aboni igúsawala, ayénachó echi auché jaré aboni o'wéalawala. Galá ruyé mapu aboni ne galá nijéwami níima, ayénachó mapu aboni sinibí nakíami níima galabéala 'nalí olánala.² Ayénachó galá ruyé mapu aboni ke wesi sitila anema. Ayénachó ruyé mapu aboni sinibí kilí ologá pirélama, ne galá natimáami niráa. Galá níima mapu echi jaré bichíyami sinibí kilí oláami nílama si'néami echi auché jaré pagótami yuwa.

³ Mapujiti chabénala tamujé aboni ayénachó ke newalite niráa níilate mapurigá echi auché jaré, ayénachóta ketasi nijéwami níili Riosi. Echalita chopi 'wigáami niráa 'yénali, ayénachóta chuwé ologá piréali. Echalita wabé chati sitíi olali, suwaba namuti chati sitíi oluwáwami, ayénachóta wabé korúkami níili. Echalita ne wabé nakichíami níili, ayénachóta wabé nakichiga 'yénali a'nagupi.⁴ Chopi wakinánala mapalí echi Walubela Riosi, mapu tamujé tamí Ku'wíimi ju, galá machírali jena'í wichimóbachi piréami mapu Binói ne wabé simírami natimáami ju, ayénachó mapalí Riosi galá machírali aboni mapu Binói ne wabé galé si'néami jena'í wichimóbachi piréami,⁵ echalí Riosi tamujé tamí ne wabé galigá ku wikáwali. Chopi tamujeta ketásirapé namuti galabé niráa olali mapurigá Riosi echijiti tamujé tamí ku wikáwama; mapujítita ketasi omérali galabé olayá. Echalí Riosi tamujé tamí ku wikáwali chopi mapujiti Binói tamujé tamí ne wabé natimali. Echalí Riosi tamujé tamí ku bi'wali pachana tamujé sulálachi suwaba mapurigata chati sitíi olali, mapurigata auchecho siné bukulíwami niráa ku ranarúami níibo. Ayénachó Riosi tamujé tamí ku bi'wali, echi Wabé Galabé Riosi Iwigala jiti, echi mapu Riosi tamujé tamí 'yali mapurigata bukulíwami niráa ku pirélabo sinibí niráa.⁶ Echalí Riosi tamujé tamí ne wabé simírami 'yali echi Galabé Riosi Iwigala mapujítita galá bichíili echi Walubela Jesucristo niráa, echi mapu tamujé tamí ku Wikáwami ju.⁷ A'lí Riosi tamujé tamí echirigá 'yali echi Galabé Riosi Iwigala, mapurigá Riosi Binói echijiti galá omérama tamujé tamí nareya mapurigá Binói kúchuwala niráa, mapujiti Riosi ne wabé galabé ju. A'lí Riosi echirigá olali mapurigá tamujeta echijiti 'yárami níibo mapurigata sinibí niráa pirélabo, achigórigá mapurigata bachá niráa bichíwaga anérami níili, mapurigá osirúami ju jena'í Riosi Ra'íchala oselíwalachi.

⁸ Je'ná jerigá mapurigá nijeni aní, ne bichíwali ju. Ayénachó nijeni nakí mápumi sinibí ne wabé nílaga je'ná jerigá nawésama echi jaré pagótami, mapurigá echi jaré mapu ikí galá bichíyami ju Riosi sinibí galabé ologá pirélama. Ne suwaba je'ná

jerigá mapurigá nijeni mi oséli ne wabé galabé ju. Ayénachó si'néami mapu ikí je'ná jerigá olako, galá ku'wíratami níima. ⁹Mujé Tito, ketasi ra'ichá wiká namuti jiti rugá mapu ke newalite niráa ju. Ketasi ra'ichá mapurigá jaré pagótami chopi nakí ra'ichánala aboni a'nayáwali jiti irétaga rugá. Ketasi cho wiká namuti jiti rukugá yóniga ra'ichá echí nulalíwami jiti mapurigá echí walula Moisesi osogá nulali, mapujiti suwaba je'ná jerigá ra'ichálawami ketasi galá ju.

¹⁰Mujé Tito, galá oyéraga ruyé mapuyíripi rijói mapu a'nagupi na'áwataga rojuana echí auché jaré napawika bichíyami, mapurigá echí rijói ketasi waminabi echirigá olama. A'lí a echí rijói waminabi echirigá na'áwataga rojonásagá echí auché jaré napawika bichíyami, echalí auchecho siné oyéraga ruyé mapurigá ketasi echirigá olama. A'lí a échiko arígá waminabi echirigá olásagá, echalí waminá julá echiyiri rijói echo'ná 'yemi napawika bichíyamichi jonsa, ¹¹mapujiti mujemi echijiti galá machimea mapu echiyiri rijói we chati sitfi ologá, ma si'wina wichili. Ayénachómí machimea mapu echiyiri rijói ma wi'nijírami ju mapujiti binói wabé chati sitfi olali.

¹²A'lí mapalí nijeni julama echí Artémasi riwéami rijimala echo'ná mujé yuwa, mapalini echo'ná julama echí Tíkiko riwéami kérémá, echalí we sapú echo'ná Nikópolichi anilíwachi simigá, mapujiti nijeni echo'ná asímea, mapujítini nakí mapurigani echo'ná bitélama jipi romó. ¹³Pe waminana echo'ná simírama echí Sénasi riwéami rijói mapu we machíami ju echí nulalíwami. Echí Apolo riwéami ayénachó echo'ná simírama. Suwaba galá ku'wíra aboni, ne suwaba mapu ikí aboni newalé, mapurigá aboni we kanílaga waminabi simama mapo'ná aboni simiba. ¹⁴Echirigá nulé echí jaré tamujé níwala napawika bichíyami mapurigá aboni echirigá ku'wírama echí Sénasi, echí Apolo, mapurigá echí jaré tamujé níwala ayénachó binema ne galabé ologá ku'wíriya echí jaré we newaléami mapu ikí Riosi jiti julárami ju nawésanala, mapurigá echí jaré tamujé níwala ritémtami sinibí galá ku'wírami níima.

¹⁵Si'néami echí auché jaré mapu tamí yuwa muchuwi mi galá ripora. Mujé ayénachó ripori echo'ná piréami napawika bichíyami, si'néami mapu ikí tamujé tamí wabé galé. Nijeni nakí mapu Riosi sinibí waminabi ku'wírama si'néami 'yemi. ¡Echirigá níima!

Osirúami

mapurigá San Pablo oseli echi

JILEMONI

Echi Pablo oseli echi Jilemoni riwéami rijói

¹Nijé, Pablo, jenaí' pachá bachara atí, mapujítini nawésali Jesucristo Ra'íchala. Jipi nimí je'ná jerigá osé, mujé Jilemoni riwéami, mápumi tamujé yuwa nóchami ju. Echi rijimala Timoteo ayénachó mi ripora. Tamujeta mi ne wabé galé. ²Ayénachóni osé echi auché jaré napawika bichíyami, si'néami mapu ikí sinibí napawiko echo'ná mujé bitélachi. Ayénachóni osé echi tamujé rijimala, echi Ápia riwéami mukí. Ayénachóni osé echi Arkipo riwéami rijói mapu achigórigá bichíiga nócha mapurigá tamujeta sinibí olá. ³Nijeni nakí mapu echi Walubela Riosi, tamujé Onolá, 'yemi mi ne wabé galigá ku'wírama, ayénachó mapurigá Riosi 'yemi mi 'yama mapurigátamo galá kilí ologá pirélabo. Ayénachóni nakí mapurigá echi Walubela Jesucristo echirigá 'yemi mi ku'wírama.

Echi Jilemoni ne wabé galéami níili, ayénachó ne galá bichíyami Riosi

⁴Sinibí mapalí nijeni ra'ícha Riosi yuwa, echalini walú natétara 'ya mapujítini we 'nata mi jiti. ⁵Mapujiti mani námali mapurigá mujemi wabé galigá bichíyami ju echi Walubela Jesucristo niráa, ayénachó mapurigami wabé galé si'néami pagótami mapu ikí Riosi níwala ju. ⁶A'lí bicheni táni Riosi mapurigá echi auché jaré mapu ma galá bichíili mapujiti mujemi galá bichíyami níili, ayénachó ne galá machimea ne suwaba echi ne wabé galabéala mapu tamujeta níwa mapujítita galá bichíili echi Walubela Jesucristo niráa. ⁷Nijeni ne wabé kanili, ayénachóni waminabi jiweratami ju, sulachí niráa, mapujiti mujemi echirigá ne wabé galéami ju, ayénachó rijimala, mapujiti echi auché jaré ritémtami ma we kanílatami ju, mujé jiti, aboni sulálachi niráa.

Pablo táni mapurigá bilé pioni, Onésimo riwéami, galá ku'wíratami níima

⁸A'lí mapujiti echi Walubela Jesucristo tamí júuli, Binói nóchala olánala, echijiti nijeni risensia níwa mapu nijeni mi nulema olánala mapurigá galá níima mápumi olama. ⁹Chopi si'winárigá nijé nimí wabé galigá táni mápumi echirigá olama. Nijeni mi echirigá risensia táni, mápuni ma ochérami ju. Ayénachó jipi nijeni pachá bachárami ju, mapujítini galá bichíili echi Walubela Jesucristo niráa. ¹⁰Perikó, nijeni nakí mápumi ku'wírama echi Onésimo riwéami rijói, echi mapu mujé piónawala níili. Échiko ma galá bichíili Jesucristo niráa, mapujiti nijeni galá nawésali echi

Binói mapalí nijeni jena'í pachá bachara asali, echijiti binói mapurigá nijé ranala niráa ju.

¹¹ Chabénala echi Onésimo, pióntami niráa níisa, ketasi galá ku'wíriami níili mi yuwa, chopi jipi binóima mi wabé galigá ku'wíriami ju. Ayénachó binói tamí wabé ku'wíriami ju. ¹² Jipi nijeni auchecho siné mi yuwa júla echi Onésimo. Nijeni nakí mapurigami galá narema échiko, achigórígá mapurigami sinibí tamí wabé galigá naré. ¹³ Nijeni nakíimili mapurigá binói tamí yuwa tibima mapurigá binói sinibí tamí ku'wírama, mujé jiti, mapuyénasíni jena'í pachá bachara atí, mapujítini nawésali echi Galabé Riosi Ra'íchala. ¹⁴ Chópini ketasi biyiri nakili olánala mapalimi ketasi cho tamí risensia 'yalí, mapurigá ketasi arigá 'wérali níima mapurigami tamí ku'wírama, mapalimi siné káachi ketasi nakisá. Nijeni chopi nakí mapurigami tamí ku'wírama mapalí mujé binói we galá nakí. ¹⁵ Mapujiti siné káachi echi Onésimo mi ariweli pe téeli niráa, mapurigá jipi jonsa echi binói sinibí niráa mi yuwa níima. ¹⁶ Chopi binóima ketasi mapurigá pióntami niráa níima. Si'winárigá echi binói mapurigá mujé rijimala niráa ju, ne wabé galérami. A'lí echirigá ne wabé simírami galabé ju. Nijeni ne wabé galé echi Onésimo, nijé rijimala niráa, chopi galá níima mapu mujemi waminabi ne wabé simírami galema echi binói, mapujiti mujé piónawala ju, ayénachó mapujiti echi binóima mapurigá mujé rijimala niráa ju, mapujítitamo okuánika galá bichíyami ju echi Walubela Jesucristo niráa.

¹⁷ A'lí a mujemi mayésagá mapu nijé binói mapurigá mujé panérawala ju, galá ku naré echi Onésimo, achigórígá mapurigá mujé sinibí we galigá tamí naré. ¹⁸ A'lí ami mayésagá mapu echi Onésimo mi wabé chati sitíi olali, ami mayésagá mapu échiko mi wiké bilé namuti kérémá, tamí 'nalí bujé ne suwaba. ¹⁹ Nijé, Pablo, nimí je'ná jerigá osé, nijé binói sikala jiti. Nijé nimí ku natétama ne suwaba. Chopi nijeni omérama mi 'natáratíya mapurigá chabénala mujemi bichíli Jesucristo niráa mapalí nijeni mi nawésali. Echijiti mujé binói ayénachó tamí wikéami niráa jumi, mapujiti jipi mujemi galá bichíli Jesucristo niráa, mapujiti nijeni mi echirigá nawésali. ²⁰ Ayena rijimala, perikó je'ná jerigá olá mapurigá nijeni mi ané, mapujiti tamujeta okuánika galá bichíyami ju echi Walubela Jesucristo niráa. Echirigá tamí kanílati sulachí niráa, ne galá nijéwaga mapurigá nijeni mi ané.

²¹ Nijé nimí je'ná jerigá osé mapujítini ne bichíwali mayé mapu mujemi ne galá nijéwaga olama mapurigá nimí ané. Ayénachóni galá machí mapu mujemi waminabi wabé echirigá olama, ketasi chopi mapurigá nijé nimí tání. ²² Achigórígá a'llari mapo'ná nijeni tibima echo'ná mujé bitélachi, mapujítini mayé mapu nijeni ke 'me ayó ku machí pátami níima, mapurigani omérama echo'mí simiyá, mapujiti 'yémítamo wabé tánali mapurigá Riosi tamí ku'wírama.

Auché jaré ritémtami walú ripóruga náwala

²³ Echi Epajorito riwéami rijói mi wabé ripora. Échiko ayénachó pachá bachárami ju tamí yuwa, mapujiti binói ayénachó nawésali Jesucristo Ra'íchala. ²⁴ Echi Marko ayénachó mi wabé ripora. Echi Aristarko ayénachó mi ripora, echi Rémasi ayénachó, echi Lúkasi asíchiko. Si'néami aboni tamí yuwa nóchami ju. ²⁵ Nijeni we nakí mapu tamujé Walubélawala Jesucristo ne wabé galigá ku'wírama ne si'néami 'yemi echo'ná piréami napawika bichíyami ritémtami. ¡Echirigá níima!

Echi Jaré

EBREO ANILÍHUAMI PAGÓTAMI

Jerigá Osélati

Riosi júuli kepu Raná ra'íchanala jena'í wíchimóbachi piréami pagótami

1 Chabé ki'yá Riosi wisabé ra'íchali echi jaré ki'yánala piréami tamujé pagótamawala. Echalí Binói wisabé niráa, si'winárigá ra'íchali echi jaré aboni, mapalí Riosi Binói júuli echi jaré Riosi jiti nawésami ra'íchanala Riosi Binói Ra'íchala niráa. ²Chopi jipi, bukulí rawé, Riosi Binói tamujé tamí galá ra'íchali mapalí Binói júuli kepu Raná tamujé tamí nawésanala Riosi Binói ra'íchala niráa. Alí ki'yá chokichí Riosi nuleli kepu Raná je'ná kawí niwánala, ayénachó Binói nuleli kepu Raná niwánala ne suwaba echi jaré o'weli namuti mapu ikita ritiwá echo'ná ripá riwigachi. Ayénachó Riosi 'yali echi Binói Ranala ne suwaba echi jaré namuti. ³Alí echi Walubela Riosi Ranala ne wabé ratábami ju mapujiti Binói Riosi Onorúami ne wabé Walubela ju. Alí echi Walubela Riosi Ranala achigó yiri ju Riosi Onorúami yuwa. Ayénachó echi Walubela Riosi Ranala, Binói walubela Ra'íchala jiti, galá jiwébana suwaba namuti mapu ikí nirú, mapurigá ketasi waminá suwibama. Alí mapalí echi Walubela Riosi Ranala ma katéwali mapu churigá galá ku bi'wama mapurigá tamujé pagótami chati sití olali, mapujiti Binói mukuli echi pagótami chati sití olalila jiti, echalí Riosi Ranala, ne wabé Walubela niráa, ma ku asíbali echo'ná ripá riwigachi, echo'ná watonachi mapo'ná echi Walubela Riosi Onorúami ne wabé omériga nulá.

Echi Walubela Riosi Ranala ne wabé simírami Walubela
ju, ketasi mapurigá echi jaré Riosi kapitánawala

Alí echi Riosi Ranala ma sébali ne wabé simírami Walubela níliya, ketasi mapurigá echi jaré o'wéala Riosi kapitánawala, mapujiti echi Walubela Riosi ma 'yali mapurigá echi bilepi Binói Ranala ne wabé simírami Walubela níima ketasi mapurigá echi jaré o'wéala Riosi kapitánawala. ⁵Mapujiti Riosi ke siné jeaneli nibilé Binói kapitánawala jeanigá:

Mujemi ju keni Raná;

Jipi rawé Nijé nimí iwítali.

Chopi Riosi ne bichíwali echirigá aneli echi Bilepi Binói Ranala. Ayénachó Riosi ke siné anili, ke bilé Binói kapitánawala jiti rugá, jeanigá:

Nijeni níima echi Binói Onolá.

Alí echi Binói, Nijé Ranala níima.

- Chopi Riosi ne bichíwali echirigá anili echi Bilepi Binói Ranala jiti rugá.
 6 Alí mapalí Riosi pali echi bilepi ne bacháwala Binói Ranala jena'í wichimóbachi,
 echalí Riosi jeaneli echi jaré Binói kapitánawala jeanigá:
 ¡Ne si'néami 'yemi waminabi walubéraga anesi echi Bilepi Riosi Ranala!
 7 Chopi mapalí Riosi ra'íchali echi jaré Binói kapitánawala jiti rugá, echalí jeanili:
 Riosi olá echi jaré Binói kapitánawala mapurigá iwigá niráa.
 Ayénachó Riosi olá echi jaré Binói níwala nagúurami mapurigá rajáami
 niráa.
 8 Chopi mapalí Riosi ra'íchali echi bilepi Binói Ranala, echalí jeanili:
 Mujemi Walubela Riosi ju. Alí Mujemi ne Walubela Nuláami níima ne sinibí
 niráa.
 Ayénachó Mujemi sinibí ne wabé wachínaga olama mapurigá ne Walubela
 Silíami niráa.
 9 Mujemi wabé galeli echi galabé wachínaga oluwáwami, chótími wabé
 kichili echi chati sitíi oluwáwami.
 Echijiti Mujé Riósawala mi ne wabé simírami 'yali kanílawami ketasi
 mapurigá Binói kanírali echi auché jaré mujé apanérawala.
 Riosi mi ne wabé simírami 'yali echi kanílawami mapurigá echi jaré
 ki'yánala piréami pagótami ne wabé simírami ro'weli echi akeite echo'ná
 moba bilé rijói mo'ólachi mapalí wilárami níili walula niráa.
 10 Ayénachó Riosi jeaneli echi bilepi kepu Raná:
 Walubela, ki'yá chokichí mujemi niwáli je'ná kawí. Ayénachó ne suwaba
 echo'ná ripá riwigachi nirúami niwárami níili Mujé Binói sikala jiti.
 11 Ne suwaba echi jaré namuti mapu Mujemi niwáli suwaba waminá
 suwibama.
 Chopi mujé sinibí niráa bitélama, ne sinibí.
 Pe waminana ne suwaba echi jaré namuti suwaba 'ocháarama mapurigá bilé
 napacha niráa.
 12 Alí mapurigami romínaga katewa bilé napacha,
 echirigá Mujemi ariwema echi jaré namuti mapu Mujemi niwáli.
 Alí ne suwaba nakulíwarami níima.
 Chopi Mujé Binói ke siné nakuliwa.
 Mujemi sinibí niráa bitélama.
 13 Alí Riosi ke siné jeaneli bilé Binói kapitánawala jeanigá:
 Tamí yuwa, keni watonachi asagá, mapuyénasíni ro'wábama echi jaré mujé
 sayéla mapurigami omérama moba ri'keka olayá,
 chopi Riosi ne bichíwali echirigá aneli echi Bilepi Binói Ranala.
 14 Ne si'néami echi jaré Riosi kapitánawala chopi iwigá niráa ju, mapu si'nabí
 nagúuraga olá Riosi nóchala olayá. Alí Riosi jula aboni ku'wíranala ne si'néami
 echi jaré pagótami mapu ikí ku wikawárami níima mapalí aboni galá bichíima
 Jesucristo niráa.

Ketasi ariwesi bichíiya

2 Echijiti arigá 'wérali ju máputa waminabi galá bichíiga nijéwabo echi ne
 Bichíwali máputa ma námali nawisálawachi, mapurigata ketasi chakena
 rrujuibo. ²Mapujiti Riosi ne galá machírali echi jaré ki'yá piréami pagótami mapu

Binói nulalila ne bichíwali níili, echi mapu echi jaré o'wéala Riosi kapitánawala ma osirúami niráa 'yali echi jaré ki'yá bachánala piréami pagótami. Alí echalí ki'yá rawé echi jaré pagótami mapu ikí chati sitíi ologá, ketasi galá nijéwaga olali mapurigá aboni echirigá nulérami níili, abóniko arigá walú kastigo 'yárami níili, mapalí Riosi Binói we galá wachínaga ologá waminá kastigo 'yali.³ ¿Churigá bicheta ku wikawárami níibo tamujé jipi piréami pagótami, ata ketasi bichíiga nijiyásagá mapurigá Riosi ne wabé simírami nakí tamujé tamí ku wikawánala jipi rawé? Je'ná Galabé Riosi Ra'íchala ne bachá niráa nawisárami níili echi Walubela Jesucristo jiti. Alí echi jaré mapu galá kipúliko, abóniko ayénachó galá machíratami níili mapu Riosi Ra'íchala ne bichíwali ju. Echalí aboni ayénachó echirigá achigórigá tamujé tamí bichíwaga ruyeli, mapurigá tamujeta ayénachó echirigá nawésabo echi auché jaré pagótami.⁴ Alí Riosi ayénachó galá machírali jipi piréami pagótami mapu Binói Ra'íchala ne bichíwali ju, mapujiti Riosi wisabé ne wabé omériga olali wikabé namuti mapurigá ke wesi pagótami omero olayá. Ayénachó Riosi 'yali mapurigá echi jaré bichíyami wisabé wabé omériga olama mapurigá ke wesi auché jaré pagótami omero olayá. Alí echi Wabé Galabé Riosi Iwigala 'yárami níili echi jaré galá bichíyami pagótami mapurigá aboni wisabé si'winárigá ne wabé omériga olama mapurigá Riosi chopi nakí.

Jesucristo bitéali jena'í wichimóbachi mapurigá Rijói niráa

⁵ Alí ki'yá chokichí mapalí Riosi niwáma riwéali je'ná kawí, echalí Riosi ketasi risensia 'yali echi jaré o'wéala Riosi kapitánawala mapurigá aboni nulama mapurigá o'wéala niráa jena'í wichimóbachi, chopi Binói 'yali mapu echi Bilepi Riosi Ranala mapurigá Walubela Nuláami níima jena'í wichimóbachi waminánomí rawé, mapurigá tamujeta rugá nawesa.⁶ Mapujiti echo'ná biléana Riosi Ra'íchala oselíwalachi je'ná jerigá ne bichíwaga osirúami ju:

¿Chuyená Walula ju echi Rijói, mapurigá Mujé Riosi galá 'nata Binói jiti?

¿Chuyená Walula ju echi Rijói, mapurigá Mujé Riosi galá natimá echi Binói?

⁷ Mujé Riosi pe téeli tabéala niráa niwálimi echi Rijói, ketasi mapurigá echi jaré o'wéala Mujé kapitánawala.

Chopi Mujemi arigá ma Walula niráa niwáli echi Rijói mapurigá ne Walubela Nuláami níima, ne suwaba echi jaré namuti yuwa mapu ikí Mujemi niwáli.

⁸ Echirigá Mujé Riosi nulali mapu echi Rijói ne Walubela níima suwaba namuti yuwa,

achigórigá mapurigá bilé rijói ne walula ju, mapalí binói galá omero si'néami echi jaré binói sayera.

Alí mapujiti Riosi ma echirigá 'yali mapurigá echi Rijói Walubela níima ne suwaba echi jaré namuti yuwa, alí tarapé biyiri namuti tibili mapu echi Rijói ke omérali. Chopi jipi rawé tamujeta ketasi cho abijí ritiwá mapu echi Rijói echirigá galá omero suwaba echi jaré namuti.⁹ Chopi jípita galá ritiwá Jesucristo ne wabé Walubela niráa, echi mapu Riosi pe téeli niráa tabéala niwáli echi jaré o'wéala Riosi kapitánawala yuwa. Alí Riosi ne wabé galigá nakili mapurigá echi Walubela Jesucristo ne wabé okoka mukumea echi jaré pagótami chati sitíi olalila jiti, mapurigá si'néami mapu ikí bichíima, galá ku wikawárami níima. Echijiti jipi rawé echi Walubela Jesucristo ne wabé walubératami ju, ayénachó Binói ne wabé walubéraga anérami ju, mapujiti Binói echirigá mukuli tamujé chati sitíi olalila jiti.

¹⁰ Alí echi Walubela Riosi ju mapu niwáli ne suwaba namuti. Ayénachó suwaba namuti abijí tibí mapujiti Riosi arigá tibuta ibili namuti. Alí Riosi nakí mapu ne si'néami Binói kúchuwala ayénachó o'wéalatami níima echo'ná ripá riwigachi, mapurigá Riosi Binói ne Walubela ju. Echijiti arigá 'wérali níili mapurigá Riosi ne wabé galabéraama echi Walubela Jesucristo, echi jaré namuti jiti, mapurigá Jesucristo ne wabé risúu olárami níili, mapurigá Jesucristo echijiti galá omérama ku wikáwiya echi jaré aboni. ¹¹ Alí Jesucristo ku bi'wá mapurigá echi jaré pagótami ma chati sitíi olali, mapalí aboni galá bichíi. Echalí echi jaré mapu iki bichíiko we onée Riosi Onorúami, achigórígá mapurigá Jesucristo onée. Echijiti echi Walubela Riosi Ranala ketasi riwela ritémptami niráa anée aboni. ¹² Mapujiti echo'ná Riosi Ra'íchala oselíwalachi je'ná jerigá osirúami ju mapurigá Binói jeanili:

Nijeni nawésama echi jaré keni ritémawa, Mujé jiti rugá.

Ayénachó nijeni nawajima mi nawajímiya echo'ná ne nasipa wiligá echi auché jaré napawika bichíyami yuwa.

¹³ Ayénachó Binói jeanili:

Nijeni galá bichíima Riosi.

Alí auchecho siné jeanili:

Jena'ini atí, echi jaré kúcharami yuwa mapu Riosi tamí 'yali.

¹⁴ Bilepi rijói kúchuwala, a bilepi cho iyéami, si'néami chopi a yiri sapéami ju, ayénachó chopi a yiri léwami ju. Echirigá ayénachó Jesucristo achigó yiri sapéami níili, ayénachó achigó yiri léwami níili mapurigá jena'í wichimóbachi piréami pagótami niráa, mapurigá Binói galá omérama mukuyá echi jaré pagótami jiti, mapurigá echirigá suwábama echi riablo, echi mapu galá omérali waminá ko'oyá echi jaré pagótami. ¹⁵ Alí echirigá ologá Jesucristo ma ku machí a'wali mapurigá ma ketasi pióntami niráa níima echi jaré pagótami jena'í wichimóbachi piréami mapu sinibí rawé ne wabé majaga piréali mapurigá pióntami niráa, mapujiti aboni arigá waminá suwímea riwéali. ¹⁶ Mapujiti ne bichíwali ju mapu Jesucristo ketasi ku'wírimiya nawali echi jaré Riosi kapitánawala, chopi Binói ne bichíwali ku'wírimiya nawali echi jaré wikabé Juríosi pagótami mapu echi Abrami kúchala kúchuwala ju. ¹⁷ Echijiti arigá 'wérali níili mapu Jesucristo, rijói niráa, niwárami níima achigó yiri mapurigá echi jaré Binói ritémawala niráa, mapurigá Binói níima bilé wabé natimáami, galá bichíyami, walubela sacerdote, mapurigá Binói olama Riosi nóchala olayá, mapurigá Binói ma mukugá echi jaré pagótami jiti, echirigá omérama ku wikáwiya echi pagótami chati sitíi olalila. ¹⁸ Alí mapujiti Jesucristo wabé risúu olárami níili, ayénachó mapujiti echi riablo chati sitíi olánaraga ra'íchali Binói, echijiti Binói ne wabé omero galá natimáa echi auché jaré mapu ayénachó chati sitíi oláratami ju.

Jesucristo waminabi wabé Walubela ju ketasi mapurigá echi walula Moisesi

3 Alí 'yemi keni ritémptami máputamo wabé galabératami níili chabé jonsa mapalítamo bachá niráa galá bichíili, 'yémítamo bayérami níili mapurigátamo Riosi níwala pagótami níibo. Jipi ne galá 'natasi mapurigá echi Walubela Jesucristo olali, mapujiti Binói Jesucristo, Riosi Onorúami jiti julárami níili, ayénachó Binói wilárami níili mapurigá Walubela Sacerdote niráa, echi mapu Walubela Katéwami ju Riosi yuwa, tamujé pagótami yuwa, mapurigá tamujeta galá bichiíiga nawesa. ² Mapujiti Jesucristo sinibí ne galá bichiíiga olali mapurigá Riosi nakili,

mapujiti Riosi wilali echí Binói mapurigá walubela sacerdote niráa. Alí echí walula Moisesi ayénachó achigórigá galá olali suwaba mapu ikí Riosi 'yali mapurigá Binói olama echo'ná echí jaré Riosi kúchuwala yuwa.³ Chopi galá níima mapu echí Walubela Jesucristo waminabi ne wabé simírami walubéraga anérami níima, ketasi mapurigá echí Moisesi. Alí echirigá ju achigórigá mapurigá bilé rijói onorúami ne wabé simírami walula ju, ketasi mapurigá echí jaré binói kúchuwala.⁴ Alí ibili echí jaré kúcharami arigá bilepi rijói kúchuwala ju, chopi echí Walubela Riosi niwáli ne si'léami echí jaré pagótami mapu ikí nirú.⁵ Echi walula Moisesi ne bichíwali galá olali echo'ná echí jaré Riosi kúchuwala yuwa, mapurigá Riosi piónawala niráa, mapujiti binói julárami níili nawésanala echí jaré Riosi kúchuwala echí jaré namuti jiti mapu Binói Riosi rumea riwéali pe waminánomí.⁶ Chopi echí Walubela Jesucristo sinibí ne suwaba galá bichíwaga olá tamujé tamí yuwa máputa Riosi kúchuwala ju, mapujiti Binói echí bilepi Walubela Riosi Ranala ju. Alí Jesucristo sinibí echirigá bichíwaga olama tamujé tamí yuwa, ata sinibí najátasaga Binói yuwa, ayénachóta sinibí galá bichíiságá echalí ne jubá yénasí, ayénachóta sinibí galá kanílasagá mapujítita galá bichíi Binói niráa.

Riosi pagótamawala arigá isábama

⁷Echijiti mapurigá echí Wabé Galabé Riosi Iwigala jeaní:

Jipi rawé átamo námasagá mapurigá Riosi aní,

⁸Ketasi biwárami níisi 'yemi sulálachi niráa, mapurigá echí jaré ki'yá piréami 'yemi pagótawala wabé biwárami suléami níili.

Alí aboni ketasi galá nijéwali Riosi, chopi aboni wabé yórali Riosi mapalí aboni 'yénali echo'ná biléana waná kawichí.

⁹Alí echí Wabé Galabé Riosi Iwigala waminabi jeaní:
Echo'ná waná kawichí echí jaré ki'yá piréami 'yemi pagótawala ketasi tamí nijéwali, chopi aboni tamí yórali nawosa makói bamíbali yénasí, mapalí aboni arigá galá riwali mapurigá Nijeni wisabé ne wabé omériga olali mapurigá ke wesi rijói omero olayá.

¹⁰Echijiti Nijeni yoli echí pagótami yuwa.

Alí Nijeni bichíwaga jeanili: Aboni sinibí we chuwé 'nátaga 'yena echo'ná aboni sulálachi.

Alí aboni ke siné nakili machináliya Nijé buwilá.

¹¹Echijiti Nijeni ne wabé yoli aboni yuwa. Ayénachó Nijeni ne bichíwaga jeanili mapu aboni ke siné tamí yuwa mo'wigá isábama.

¹²Keni ritémawa, a aboni niráa ne galá tibusi mapurigá ke wesi 'yemi chati sitíi sulérama, chopi mapurigá si'léami 'yémitamo sinibí ne galá bichíyami níibo, mapurigátamo ke siné ariwebo bichiya echí sinibí bitéami Riosi.¹³ Chopi sinibí rawé a'nagupi waminabi galá bichíratasi mapuyénasítamo abijí piré jena'lí wichimóbachi, ayénachó mapuyénasítamo abijí galá omérabo bichísiya echí Walubela Jesucristo niráa, mapurigá ke wesi 'yemi 'yékarami níibotamo, echí we chati sitíi oluwáwami jiti, ayénachó mapurigá ke wesi 'yemi echijiti ke nijéwiyami níibotamo Riosi, echo'ná pachana 'yemi sulálachi niráa.¹⁴ Mapujiti echí Walubela Jesucristo abijí tamujé tamí ku'wírama echalí ne jubá rawé yénasí, ata sinibí ne galá bichíiságá mapurigata chabé chokichí jonsa bichíili.

¹⁵ Alí echo'ná Riosi Ra'íchala oselíwalachi je'ná jerigá anirúami ju:
 Jipi a 'yémitamo námasagá mapurigá Riosi aní, ketasi biwárami nísi
 echo'ná 'yemi sulálachi niráa,
 mapurigá echi jaré ki'yá piréami 'yemi pagótawala wabé biwárami suléami
 níili,
 alí aboni ketasi galá nijéwali Riosi.

¹⁶ ¿Chigá biché níili echi jaré mapu galá namsa Riosi Ra'íchala arigá ketasi galá
 nijéwali? Ne bichíwali níili ne si'néami echi jaré mapu echi walula Moisesi ku
 machí a'wali echo'ná Ejíptochi anilíwachi kawírali jonsa. ¹⁷ Alí ¿chigá yuwa yoli
 Riosi nawosa makói bamíbali yénasí? Ne bichíwali níili echi jaré mapu ikí chati
 sitíi olali, echi jaré mapu ikí waminá suwili echo'ná waná kawichí. ¹⁸ Alí ¿chigá
 níili echi jaré mapu Riosi bichíwaga aneli mapu aboni ketasi oméraama mo'wigá
 isaba Binói yuwa? Ne bichíwali níili echi jaré mapu ketasi galá nijéwali Riosi.
¹⁹ Echirigata ma galá machí mapu aboni ketasi omérali mo'wiyá Riosi yuwa, mapujiti
 aboni ketasi bichíili Riosi.

Echo'ná Riosi Ra'íchala oselíwalachi

4 Echo'ná Riosi Ra'íchala oselíwalachi osirúami ju mapurigá Riosi ne bichíwaga
 anili mapurigá si'néami mapu ikí bichíima Jesucristo niráa, galá mo'wimea
 isábabiya Riosi yuwa, echo'ná ripá riwigachi. Echirigá jipi rawé mapuyénasí Riosi
 abijí echirigá tamujé tamí bichíwaga ané, ne galá níima ibili tamujé, aboni niráa
 tibusá, mapurigá ke wesi tamujé, siné káachi, ke 'me sebámire echirigá mo'wigá isaba
 Riosi yuwa, echo'ná ripá riwigachi. ² Mapujiti tamujé ayénachó galá nawésarami
 níili echi Galabé Riosi Ra'íchala, achigórígá mapurigá aboni nawésarami níili, chopi
 aboni ketásirapé ku'wíratami níili mapalí aboni námali echi Galabé Riosi Ra'íchala,
 mapujiti aboni ketasi galá bichíili. ³ Chopi tamujé máputa ma galá bichíili, tamujeta
 ju máputa mo'wiboa isábabiya Riosi yuwa echo'ná ripá riwigachi. Chopi Riosi
 anili mapu jaré ketasi echirigá mo'wili isábabiya Binói yuwa, mapalí Riosi jeanili:

Echijítini wabé yoka je'ná jerigá nulali: Aboni ketasi isábama tamí yuwa.
 Chopi ki'yá chokichí jonsa mapalí Riosi sunili niwayá je'ná kawí, echalí jonsa Riosi
 ma sunili Binói nóchala. ⁴ Mapujiti auché biléana echo'ná Riosi Ra'íchala oselíwalachi
 je'ná jerigá osirúami ju mapurigá Riosi anili echi kicháosa rawé jiti rugá:

Echalí kicháosa rawé echi Walubela Riosi galá isábali, mapujiti Riosi ma
 suwaba sunili Binói nóchala.

⁵ Alí auché biléana echo'ná Riosi Ra'íchala oselíwalachi je'ná jerigá osirúami ju
 mapurigá Riosi jeanili:

Echi jaré aboni ketasi mo'wimea mapurigá aboni tamí yuwa isábama.
⁶ Echirigá bichíwali ju mapu jaré abijí mo'wimea isábabiya Riosi yuwa, chopi
 echi jaré chabé ki'yá piréami mapu bachá niráa, námali mapurigá Riosi nakili ku
 wíkawánala echi pagótami, abóniko ketasi mo'wili isábabiya Riosi yuwa, mapujiti
 aboni ketasi galá nijéwali Riosi. ⁷ Echijítini Riosi auchecho bukulíwami ne bichíwaga
 anili mapu jipi galá níima echi jaré pagótami we 'yáati galá bichíisa, mapujiti Riosi
 Binói abijí tamujé tamí ra'ícha mapalita kipú mapurigá Riosi júuli echi walula
 Rabiri osínala mapurigá echi binói wabé wakinánala osali, mapurigá osirúami
 ju echo'ná Riosi Ra'íchala oselíwalachi, mapurigá tamujé aboni ma bukulí 'neli
 osirúami mapo'ná Riosi tamujé tamí jeaneli:

Jipi rawé a 'yémítamo galá námsagá mapurigá Riosi aní, ketasi biwárami suléami níisi.

⁸Mapujiti a echí Josué riwéami walula ne bichíwali 'yásagá mapurigá echí jaré Isaeli pagótami ne bichíwali isábama Riosi yuwa mapalí binói bayébali aboni echo'ná Kanánchi anilíwachi kawírali yénasí, echalí Riosi ma ketasi auchecho ra'ichámili wakinana jeanigá mapu waminánomí níima mapalí echí pagótami isábama riwéali Riosi yuwa. ⁹Echijiti ne bichíwali ju mapu echí jaré Riosi pagótamawala pe waminánomí ne bichíwali galá isábama Riosi yuwa. ¹⁰Mapujiti si'néami mapu ikí ma galá mo'wigá isábako Riosi yuwa, abóniko ma ketasi waminabi auché nócha, achigórigá mapurigá Riosi Binói ma ketasi nócha mapujiti Riosi ma sunili Binói nóchala. ¹¹Echijiti galá níima tamujeta we 'yáati ása mapurigata echirigá mo'wigá isábabo Riosi yuwa, mapurigá ke wesi tamujé ketasi bichíyami níibo, mapurigá echí jaré aboni ketasi bichíyami níili.

¹²Mapujiti Riosi Ra'íchala sinibí bitéami ju, ayénachó ne wabé omérami ju. Alí Riosi Ra'íchala waminabi ne wabé simírami oláami niráa ju, ketasi mapurigá mapuyíripi wi'lí ripiyá a'nagú okoná oláami niráa, mapujiti Riosi Ra'íchala ne wabé pachá seba echo'ná echí jaré pagótami sulálachi, mapurigá echí ripiyá wabé pachá chi'wana. Echirigá ayénachó Riosi Ra'íchala wabé pachá chi'wana mapuyénasí seba echo'ná pachana echí jaré pagótami aliwálachi, echo'ná aboni iwígálachi ayénachó, mapuyénasí Riosi Ra'íchala ne galá machiná niráa, machira mapurigá aboni 'nata, ayénachó mapurigá aboni chopí 'nátaga nakí olánala. ¹³Alí Riosi sinibí ne galá ritiwá ne suwaba namuti mapu ikí Binói niwáli, echijiti ke bilé wesi omero waminá ichipiya mapurigá Riosi ma ketasi riwimea. Alí arigá 'wérali ju ibili niráa tamujé ku ruyesa Riosi ne suwaba mapurigata ologá piréali jena'í wichimóbachi. Alí Riosi echirigá galá machiná ritiwá suwaba namuti, ayénachó Binói galá machí suwaba namuti.

Jesucristo ju echí ne Walubela Sacerdote

¹⁴Echi Walubela Jesucristo Riosi Ranala ju, ayénachó ne walubela sacerdote anilíwami ju. Binói ma bakili Riosi yuwa echo'ná ripá riwigachi. Echijiti galá níima mapu tamujeta sinibí waminabi galá bichíibo Binói niráa. ¹⁵Alí tamujé Walubela Sacerdótawala galá omero tamujé tamí natimaya máputa ketasi me jiwerámi ju, mapujiti Binói ayénachó chati sitíi oláratami níili, achigórigá mapurigá echí riablo sinibí tamujé tamí chati sitíi olánali, chopí echí Walubela Jesucristo tarapé siné echirigá nijéwaga chati sitíi olali. ¹⁶Echijiti galá níima tamujé sinibí ne galá bichíiga ra'íchasa Riosi yuwa mapalita risúu olárami ju, ayénachó mapalita newaléami ju. Alí echirigá bichíiga tamujeta mulubéanabo Riosi yuwa, echo'ná Binói niwala walubela asibálachi mapo'ná Riosi sinibí atí mapurigá Binói sinibí ne wabé galigá nulema echí jaré pagótami. Alí a tamujeta echirigá ologá, echalita ne galá natimátami níibo, ayénachó Riosi sinibí tamujé tamí ne wabé galigá ku'wírama mapalita newaléami ju.

5 Mapalí bilé rijói wilárami ju mapurigá walubela sacerdote niráa, échiko echirigá wilárami ju mapurigá binói sinibí olama Riosi nóchala olayá bacháami Riosi yuwa, echí auché jaré pagótami jiti, mapurigá binói ko'wisáa 'yama Riosi jaré namuti, mapurigá echí jaré pagótami chati sitíi olalila galá ku wikawárami níima. ²Alí mapujiti echí ne walubela sacerdote arigá chati sitíi oláami ju, achigórigá

mapurigá echí auché jaré pagótami chatí sitíi oláami ju, echijiti echí rijói walubela sacerdote galá omero natimáa echí auché jaré pagótami mapu ketasi galá machíami ju, ayénachó echí jaré mapu ma 'wigáami niráa ju. ³Echirigá echí ne walubela sacerdote sinibí ko'yagá 'yali Riosi jaré namuti echí auché jaré pagótami chatí sitíi olalila jiti, chopí mapujiti Binói ayénachó chatí sitíi oláami níili, echijiti arígá 'wéráli níili mapu binói ayénachó ko'yagá 'yama Riosi auché jaré namuti, echí binói chatí sitíi olalila jiti, achigórígá mapurigá binói ko'yagá 'yali echí jaré pagótami chatí sitíi olalila jiti.

⁴Alí ke wesi a binói niráa wiliba mapurigá walubela sacerdote niráa. Chopí Riosi wilá bilé rijói mapurigá walubela sacerdote níima, achigórígá mapurigá Riosi Binói wilí echi Aroni riwéami rijói mapurigá binói walubela sacerdote niráa níima. ⁵Alí echi Walubela Jesucristo tarapé cho echirigá walubélali Binói niráa mapurigá Binói arígá wilárami níima mapurigá Walubela Sacerdote niráa. Chopí Riosi Binói echirigá wilali echi Walubela Jesucristo. Alí Riosi Binói níili mapu chabénala jeaneli:

Mujemi ju keni Raná.

Jipi nijé nimí iwítali.

⁶Mapurigá ayénachó je'ná jerigá osirúami ju echo'ná auché biléana osirúamichi mapurigá Riosi jeaneli echi Walubela Jesucristo:

Mujemi Walubela Sacerdote níima ne sinibí niráa,

mapurigá echí Melkisereki riwéami rijói ayénachó walula sacerdote níili.

⁷Alí mapalí echi Walubela Jesucristo bitéali jena'í wichimóbachi mapurigá rijói niráa, echalí Binói ne o'weli ra'íchaga, ne wabé nalaka támiga ra'íchali Riosi yuwa. Alí Riosi galá omérali ku'wíriya echi Walubela Jesucristo mapurigá Binói ketasi mukumea, a Riosi echirigá nakisáagá. Echalí Riosi arígá galá kipuli echi Walubela Jesucristo echirigá aníachi, mapujiti Binói ne wabé galá bichíiga waminabi walubéraga aneli Riosi. ⁸Alí echi Walubela Jesucristo biley Riosi Ranala ju, chopí Binói arígá galá bineli nijéwiya Riosi mapalí Binói Jesucristo arígá wabé risíu olárami níili. ⁹Alí mapalí echi Walubela Jesucristo echirigá ne sébali riwíralati mapurigá echi galabé nijéwami Riosi Ranala niráa, echalí Binói ma galá omérali ne sinibí niráa ku wikáwiya ne si'néami echi jaré pagótami mapu ikí galá nijéwaga olako mapurigá Binói nulé aboni. ¹⁰Alí Riosi wilali echi Walubela Jesucristo ne Walubela Sacerdote niráa, achigórígá mapurigá echi Melkisereki walula sacerdote níili.

Echi jaré mapu ketasi bichíyami níima sinibí niráa, arígá kastigo 'yárami níima

¹¹Jipi tamujeta abijí wikabé namuti níwa máputa wabé nakí 'yemi mi ruyénala Jesucristo jiti rugá, mapurigá Binói ju echi ne Walubela Sacerdote niráa. Chopí je'ná jerigá ne wabé nójchali ju irétaga ruwáwa, mapujiti 'yémítamo ketasi 'me nakí binénala je'ná jeyiri. ¹²'Yémítamo ma galá omérali riwéali binériya Riosi Ra'íchala echi auché jaré pagótami, mapujiti 'yémítamo ma wisabé bamíbali jonsa galá nawésarami níili Riosi Ra'íchala. Chopí abijí arígá 'wéráli ju máputamo ne bukulíwami niráa auchecho siné binératami níibo Riosi Ra'íchala, achigórígá mapurigátamo chabé chokichí binératami níili. Echirigátamo we newalé echi leche niráa chópitamo ketasi cho omero ko'yá echi jaré ochérami ko'wámawala. ¹³Alí ne si'néami echi jaré mapu ikí abijí chopí bajiko echi leche niráa, echi jaré mapu ketasi cho galá machiko Riosi Ra'íchala, abóniko abijí mapurigá echi jaré kúuchi chí'íami niráa ju. Alí biché aboni ketasi cho machí galabé wachínaga ologá

piréliya mapurigá Riosi nakí. ¹⁴Chopi echí jaré ma ochérami we ko'wá karúmati echí auché jaré ko'wáami. Abóniko we nakí machináliya ne suwaba Riosi Ra'íchala, mapujiti aboni ma galá 'nátami ju. Alí aboni we 'nátaga, galá machí mapu chuyiri 'nalí ju echí galabé oluwáwami, ayénachó aboni galá machí mapu chuyiri 'nalí ju echí chatí sitíi oluwáwami.

6 Echijiti waminá bacháami nokuísabota echí Walubela Jesucristo bichísiya, mapuyénasíta ne sébali galá bichíyami níibota. Ketásita chopi ra'íchábo echí jaré namuti jiti máputa ne chokichí bichíili mapalita chótali Jesucristo yuwa najata. Chópita ayénachó waminabi ne wabé simírami ra'íchábo mapu churigá tamujeta omérabo ne sébali galabé niwárami níliya ata waminabi galá bichíisagá Jesucristo niráa. Mata galá bichíili echí Walubela Riosi niráa. Ketásita auchecho wisabé chotabo bichíiya mapurigata ne chokichí jonsa ma galá bichíili. Chabeta chatí sitíi oláami níilita, echijítita chopi suwíami níibo riwéali, chopi mata Riosi yuwa ju. ²ma ketasi galá ju máputa sinibí chopi wabé nawésaka ra'íchabo mapu churigá galá níima mapu echí jaré bichíyami ba'wí jiti pagótami níima, nirapé máputa sinibí ra'íchábo jeanigá mapu galá níima mapu echí jaré o'wéala si'winárigá nocháma aboni sikala echo'ná moba echí jaré bichíyami mo'ólachi. Mata galá bichíi mapu echí jaré suwíami ku o'wínama echalí ne jubá rawé, ayénachó mapu echí auché jaré ke bichíyami pagótami sinibí niráa kastigo 'yárami níima, echijiti ma ketasi 'wérali ju máputa sinibí nawésiga ra'íchábo mapu churigá echí jaré suwíami níima mapalí aboni ku o'wínama, nibilé cho mapu churigá echí jaré ke bichíyami sinibí niráa echirigá kastigo 'yárami níima. ³Chópita waminabi nokuísabo Riosi yuwa, a Binói tamujé tamí risensia 'yásagá.

⁴Alí jaré mapu we galá machíratami níili echí Galabé Riosi Ra'íchala arigá ketasi bichíili. Aboni galabé niráa mayeli echí galabéala mapu Riosi nijá, ayénachó aboni ma ra'ícharami níili echí Galabé Riosi Iwigala jiti, ⁵ayénachó aboni galabé niráa mayeli echí Galabé Riosi Ra'íchala, ayénachó aboni galá machili mapu waminánomí Riosi wabé omérami niráa nulama ne sinibí niráa, ⁶chopi aboni mapurigá waminá chakena rujuíimi niráa, arigá ketasi bichíili. Echijiti jípi aboni ma ketasi omero auchecho siné bukulíwami niráa ku ro'wí Riosi yuwa, mapujiti aboni ma ketasi nakí bichíinala. Alí echirigá ologá aboni ne noguí achigórigá risíu olá echí Walubela Jesucristo, mapurigá auchecho siné echo'ná biléana kúrsichi michóniya niráa, ayénachó mapurigá sitíla ané echí Walubela Jesucristo, bacháami wikabé pagótami yuwa. ⁷Echi jaré aboni mapurigá echí wi'yé ju mapo'ná we ukú, mapujiti a galá rakésagá karúmati namuti mapu ikí echí pagótami echo'ná ichá, echalí echí wi'yé galabé anérami ju echí Walubela Riosi jiti. ⁸Alí a echo'ná chopi a'wisáagá karúmati so'uwéami namuti, echí jaré namuti kasalá ayénachó, echalí echí wi'yé ketasi iré. Alí Riosi chopi we sitíi wi'yé anema, alí waminánomí suwaba waminá ikósarami níima.

Tamujé galá bichíi Riosi, echijiti waminabi nokuísabo galabé olayá

⁹Alí a tamujé arigá echirigá ra'íchásagá echí auché jaré pagótami jiti rugá, si'néami mapu ikí waminá ariweli bichíiya, ketásita echirigá ra'ícha 'yemi galá bichíyami ritémtami jiti rugá, mapujítita ne bichíwali mayé mapu Riosi waminabi wabé ku'wírama 'yemi, mapujítitamo ma ku wikawárami ju. ¹⁰Mapujiti Riosi ne wabé wachínaga oláami ju, alí Binói sinibí niráa 'natama mapurigá 'yémítamo

wabé galabé olali, ayénachó mapurigátamo ne wabé galigá ku'wírali echi auché jaré napawika bichiyami ritémtami, mapurigátamo abijí sinibí waminabi echirigá olísimí, mapujítitamo ne wabé galé Riosi.¹¹ Chopi tamujeta nakí mapu ibili 'yemi sinibí waminabi ne wabé nílasagá galá bichíbotamo mapuyénasí 'yemi abijí piré jená'lwichimóbachi, mapurigátamo ne sébali ku'wíratami níibo, mapurigátamo bichíi mapu Riosi 'yemi mi wabé ku'wírama. ¹²Echirigá tamujeta ketasi nakí mapurigá 'yémítamo nasinákuli níibo, chopi mapurigátamo sinibí achigórigá galá bichíiga olabo mapurigá echi auché jaré chabé bachánala piréami galá bichiyami ritémtami olali, si'néami mapu ikí ma narésimí echi ne wabé galabéala mapu Riosi bachá niráa bichíwaga aneli mapu abomi narema riwéali echo'ná ripá riwigachi.

¹³Alí mapalí Riosi ne bichíwaga aneli echi Abrami mapu binói ku'wíratami níima riwéali, echalí Riosi Binói chopi echirigá ne bichíwaga aneli, mapujiti ke téeli auché bilé walubela waminabi simírami walubela ketasi mapurigá Riosi niráa, echijiti Riosi ketasi echirigá bichíwaga aneli bacháami auché bilé walubela yuwa, chopi Riosi Binói echirigá bichíwaga aneli echi Abrami,¹⁴jeanigá: Ne bichíwali Nijé nimí wabé simírami ku'wírama. Ayénachó Nijé nimí 'yama mapurigá mujé kúchuwala auché jaré ne wikabé muwema.¹⁵Alí mapalí echi Abrami wikabé bamíbali kilí ologá buweli, echalí binói arígá echirigá 'yárami níili mapurigá Riosi bachá niráa ne bichíwaga aneli.¹⁶Mapujiti echi jaré pagótami aní mapu aboni ra'íchala ne bichíwali ju mapalí aboni jeaní: Riosi galá nami mápuni chopi bichíwaga aní. Alí aboni echirigá aní mapujiti Riosi ne wabé simírami Walubela ju, ketasi mapurigá echi jaré pagótami. Alí echi pagótami galá bichíima mapu ne bichíwali ju mapurigá bilé rijói echirigá ne bichíwaga aní.¹⁷Echijiti Riosi ayénachó bichíwaga anili mapu Binói ku'wírama riwéali echi Abrami. Echalí Riosi echirigá bichíwaga anili mapujiti Binói nakili ne galá machiná niráa machíranala mapu echi auché jaré pagótami ayénachó ne bichíwali narema achigórigá mapurigá Riosi bachá niráa bichíwaga anili mapu Binói 'yama riwéali.¹⁸Echirigá biché nirú okuá Ra'íchali mapu ketasi siné nakulíwarami níima. Riosi Ra'íchala sinibí ne bichíwali ju, ayénachó mapurigá Riosi Binói ne bichíwaga anili sinibí ne bichíwali ju, mapujiti Riosi ketasi bilé ikaléami ju. Alí Riosi sinibí tamujé tamí ne wabé natimaga kanílata echi okuá Ra'íchali jiti, máputa ma táñali mapu Binói tamujé tamí ku'wírama, ayénachó máputa ma galá bichíili mapurigá Riosi tamujé tamí bichíwaga aneli.¹⁹Alí tamujé aliwala echijiti sinibí niráa ne bichíwali galá tibútarami ju mapurigá bilé walú barko ne galá tibútarami ju mapalí bilé wabé jiwérami jiero wiya jiti bologá uchárami ju. Echirigá tamujé aliwala ayénachó ne bichíwali, bulirúami niráa, tibútarami ju echo'ná pachá echi ripá riwigachi nirúami Riosi Ri'obáwalachi, ne wabé pachánala, echo'ná kuwana, mapo'ná chukú echi wabé runáami mapuyiri kimá²⁰mapo'ná Jesucristo ma bakili mapurigá Binói echo'ná katiwama tamujé tamí jiti, mapujiti Jesucristo wilárami ju mapurigá Binói sinibí niráa ne Walubela Sacerdote níima, achigórigá mapurigá echi Melkisereki walubela sacerdote níili.

Jesucristo ne Walubela Sacerdote ju achigórigá mapurigá echi Melkisereki ne walubela sacerdote níili

7 Alí je'ná Melkisereki ne walula silíami níili echo'ná Salémachi anilíwachi. Alí binói ayénachó echi Ripabé Atíami Riosi níwala sacerdote níili. Alí mapalí echi Melkisereki natipámiya simili echi Abrami mapalí echi Abrami ma omérasa echi

auché jaré o'wéala, alí ku nawali echo'ná binói walúlawachi, echalí echi Melkisereki ne wabé galabéragera aneli echi Abrami. ²Echalí echi Abrami ku pali wikabé namuti mapu ikí binói ni'yúraga 'yeli echi auché jaré o'wéala. Alí echi Abrami pe bilé 'yesa galá 'yali echi Melkisereki ibílana makói namuti mapu ikí binói ku pali. Alí echi Melkisereki riwalá je'ná jerigá aniwáami ju: Walubela silíami, ne wachínaga oláami. Alí mapujiti walubela silíami níili echo'ná Salémachi anilíwachi, ayénachó je'ná jerigá aniwáami ju: Walubela silíami galabé kilí oláami, mapujiti Salémachi je'ná jerigá aniwáami ju: Mapo'ná echi pagótami galá kilí ologá piré. ³Ketasi osirúami ju echo'ná Riosi Ra'íchala oselíwalachi mapu churigá riwéami níili echi Melkisereki onolá, nibilé cho osirúami ju mapu churigá riwéami níili binói iyela. Ketasi cho osirúami ju mapu chu riwéami níili binói aparóchawala. Ketasi osirúami ju mapu chu kilíbuko jonsa echi Melkisereki ranarúami níili, nibilé cho mapu chu kilíbuko jonsa binói waminá mukuli. Echijiti echi Melkisereki ketasi achigó yiri níili echi auché jaré sacerdote, echi jaré Juríosi pagótami sacerdótawala yuwa, mapujiti ne si'néami aboni echi chabé ki'yá bitéami Lebí riwéami rijói kúchala kúchuwala níili. Chopi echi Melkisereki sinibí niráa níili Riosi sacerdótawala, ayénachó binói sinibí niráa echirigá níima Riosi sacerdótawala, achigórigá mapurigá echi billepi Riosi Ranala sinibí niráa ne Walubela Sacerdote níima.

⁴Galá 'natisi mapu chu yena walubela níili je'ná Melkisereki, mapujiti echi tamujé walúlawala Abrami pe bilé 'yesa galá 'yali echi Melkisereki ibílana makói namuti mapu ikí binói ni'yúraga 'yeli echi auché jaré o'wéala. ⁵Alí echi walula Moisesi osogá nulali mapu chopi echi jaré sacerdote mapu echi Lebí kúchala kúchuwala ju, sinibí pe bilé 'yesa chapimea ibílana makói namuti mapu ikí echi auché jaré pagótami galá meli. Alí echi auché jaré arigá aboni ritémawala niráa ju, mapujiti ne si'néami aboni echi bilé Abrami kúchala kúchuwala niráa ju achigórigá mapurigá echi jaré Lebí kúchuwala ayénachó echi Abrami kúchala kúchuwala ju. ⁶Alí echi Melkisereki ketasi bilé Lebí kúchala kúchuwala níili, chopi binói arigá pe bilé 'yeka chapili ibílana makói namuti mapu ikí echi Abrami meli. Alí echi walula Abrami níili mapu Riosi Binói bichíwaga aneli wikabé namuti. Ayénachó echi Melkisereki arigá wabé galabéragera aneli echi Abrami. ⁷Alí si'néami pagótami galá machí mapu aboni chopi waminabi o'wéalatami níima mapalí aboni wabé galabéragera anérami níima auché jaré jiti mapu waminabi o'wéala ju ketasi mapurigá aboni niráa. Echijiti echi jaré mapu ikí ne bichíwali echirigá galabéragera aneko auché jaré sinibí waminabi o'wéala ju ketasi mapurigá echi auché jaré pagótami mapu echirigá galabéragera anérami juko, echijiti echi Melkisereki waminabi walubela níili ketasi mapurigá echi walula Abrami. ⁸Jipi rawé tamujé Isaeli pagótami yuwa, echi jaré sacerdote mapu pe bilé 'yesa chapí ibílana makói namuti mapu ikí tamujeta me, abóniko chopi pagótami ju mapu pe waminánomí arigá suwimea, chopi echo'ná Riosi Ra'íchala oselíwalachi, echi Melkisereki jiti rugá, ketasi osirúami ju mapu binói waminá mukuli. ⁹Alí si'néami echi jaré sacerdote mapu jipi rawé pe bilé 'yesa chapiko ibílana makói namuti mapu ikí tamujeta me, ne si'néami aboni echi Lebí kúchala kúchuwala ju. Chópita galá omero aniyá mapu ne si'néami aboni, echi Lebí yuwa, ayénachó echirigá 'yali echi Melkisereki pe bilé namuti ibílana makói mapu ikí aboni meli. Alí aboni echirigá 'yali chabé ki'yá, echalí we yáati mapalí echi Abrami pe bilé 'yeka 'yali echi Melkisereki echi jaré namuti mapu ikí binói Abrami meli. ¹⁰Echalí ke cho ranarúami níili si'néami echi jaré sacerdote mapu

jipi rawé pe bilé 'yeka chapiko ibílana makói mapu ikí echi jaré Isaeli pagótami me. Chopi je'ná jerigá 'nátaga, omérabo aniyá mapu echi Abrami galá natétali si'néami aboni jiti mapalí echi Melkisereki natépali echi Abrami. Aboni ke cho ranarúami níili, chopi echi Abrami mapurigá si'néami aboni onolá niráa níima riwéali. Echalí echi Abrami echirigá galá natétali si'néami aboni jiti, mapalí binói natétali echi Melkisereki.

¹¹Echi jaré Lebí kúchala kúchuwala, mapu sacerdote níili, galá 'yali echi jaré Isaeli pagótami echi nulalíwami, Riosi nulalila. Alí aboni ayénachó echi Aroni riwéami rijói kúchala kúchuwala níili, mapu pe kinana bitéali. Alí a echi jaré sacerdote omérasagá ne galabé niráa niwayá echi pagótami mapu arigá galá nijéwaga olali mapurigá aboni echirigá nulérami níili, echalí ma ketasi arigá 'wérali nísimili mapu wakinana nawami auché bilé sacerdote mapu ketasi echi Aroni kúchala kúchuwala niráa níima, chopi mapu achigórigá mapurigá echi Melkisereki níisa. ¹²Mapujiti a auché jaré isena rijói jawárami níiságá mapurigá o'wéala sacerdote niráa, echalí arigá 'wérali níima mapurigá echi nulalíwami ayénachó nakulíwarami níisa, mapujiti osirúami ju echo'ná Riosi nulalila oselíwalachi mapu chopi echi jaré Aroni kúchala kúchuwala o'wéala sacerdote níima. ¹³Chopi echo'ná Riosi Ra'íchala oselíwalachi osirúami ju mapu tamujé Walubélawala Jesucristo ne walubela sacerdote níima. Alí Binói auché biléana rojuáami ju echi jaré Isaeli pagótami. Alí ke wesi echi auché jaré mapu echi Jurá anilíwami rojuáami níili ayénachó walubela sacerdote níili. ¹⁴Mapujiti galá machirúami ju mapu tamujé Walubélawala ranarúami níili jena'lí wichimóbachi mapurigá bilé echi jaré wikabé Jurá anilíwami rojuáami pagótami. Alí echi Moisesi tarapé siné rugá anili mapu echi jaré Jurá anilíwami rojuáami pagótami jawárami níima riwéali, o'wéala sacerdote niráa.

¹⁵Alí je'ná jerigá abijí waminabi wabé machiná ju a wilibásagá auché bilé si'nú walubela sacerdote mapu achigórigá mapurigá echi Melkisereki niráa níisa, ¹⁶Echi mapu chopi wilárami ju Walubela Sacerdote niráa mapujiti Binói ne wabé omériga ne sinibí niráa bité, ayénachó mapujiti Binói ketasi siné mukumea. Alí echi bilepi Walubela Sacerdote ketasi wilárami ju chopi mapujiti Binói bilé níili echi jaré Lebí kúchala kúchuwala, mapurigá echi Moisesi osogá nulali mapu echi jaré Lebí kúchala kúchuwala ibílapi niráa, chopi jawárami níima riwéali mapurigá o'wéala sacerdote niráa. ¹⁷Mapujiti echi Bilepi Walubela Sacerdote jiti rugá, je'ná jerigá osirúami ju mapurigá Riosi jeaneli:

Mujemi ne Walubela Sacerdote níima ne sinibí niráa, achigórigá mapurigá echi Melkisereki ayénachó walubela sacerdote níili.

¹⁸Echijiti echi nulalíwami ma nakubárami ju mapurigata chabénala nulérami níili, mapujiti echi jaré pagótami ketasi ku'wíratami níima riwéali echi nulalíwami jiti, mapujiti aboni ketasi omérali nijéwaga olayá mapurigá aboni nulérami níili. ¹⁹Alí echi nulalíwami, mapurigá echi walula Moisesi osali, ketasi omérali galabératiya echi jaré pagótami. Chopi tamujeta máputa ma galá bichíí Jesucristo niráa sinibita galá bichííga buwé mapurigá Binói Jesucristo tamujé tamí echirigá galabératama. Alí echirigá waminabi galabé ju, mapujítita mulubéana Riosi yuwa mapujítita ma galá bichííli Jesucristo niráa.

²⁰Alí Riosi Binói ne bichíwaga anili mapu echi Walubela Jesucristo wilárami níili, mapurigá ne Walubela Sacerdote niráa. ²¹Chopi Riosi ketasi siné bichíwaga

aneli ke wesi auché jaré o'wéala sacerdote jeanigá mapu aboni o'wéala sacerdote níima ne sinibí niráa, chopi echí Walubela Jesucristo jiti rugá, Riosi ne bichíwaga anili mapu Binói ne Walubela Sacerdote ju, mapalí Riosi je'ná jerigá aneli mapurigá osirúami ju echo'ná Riosi Ra'íchala oselíwalachi jeanigá

Echi Walubela Riosi ne bichíwaga anili, alí ma ketasi nakulíwama, chopi je'ná jerigá ne bichíwaga jeaneli:

Mujemi ne sinibí niráa ne Walubela Sacerdote jumi, achigórigá mapurigá echí Melkisereki walula sacerdote níili.

²² Echijiti waminabi wabé galabé ju mapurigá echí Walubela Jesucristo ne bichíwaga anili mapurigá Binói tamujé tamí ku'wírama riwéali, ketasi mapurigá suwaba mapu echí walula Moisesi osogá nulali jeanigá máputa ku'wíratami níbo riwéali, ata suwaba galá nijéwasagá mapurigá binói tamujé tamí osogá nuleli. ²³ Alí wikabé rijói ibílipi niráa ne walubela sacerdote nílasali, mapujiti aboni ibili niráa waminá suwísali, echijiti ma mukusá bilé, echalí auché bilé rijói wilárami níili mapurigá walubela sacerdote niráa. ²⁴ Chopi mapujiti je'ná Walubela Jesucristo ma ketasi auchecho siné mukumea, echijiti Binói ne sinibí niráa níima Walubela Sacerdote niráa. Alí echijiti auché jaré isena rijói ke siné echirigá jawásarami níima mapurigá walubela sacerdote niráa. ²⁵ Echi jaré pagótami chopi omero mulubéana Riosi yuwa mapalí aboni galá bichíi echí Walubela Jesucristo niráa. Alí echí Walubela Jesucristo Binói sinibí niráa bité, echijiti Binói galá omero ku wikáwiya si'néami echí jaré mapu ikí mulubéanako Riosi yuwa mapurigá aboni echirigá ku wikawárami níima ne sinibí niráa, ne sinibí. Alí echí Walubela Jesucristo sinibí niráa bité mapurigá Binói sinibí tánama Riosi aboni jiti.

²⁶ Echirigá mata riwali mapurigá echí Walubela Jesucristo ne bichíwali echiyiri ne wabé simírami galabé oláami Walubela Sacerdote ju mapurigá tamujé pagótami newaleli. Echi Walubela Jesucristo ne wabé galabé oláami ju. Alí Binói tarapé chati sitíi oláami ju, nirapé chibi síami niráa. Alí Binói ketasi olá mapurigá echí jaré chati sitíi oláami pagótami olá. Alí Riosi ma wilali echí Walubela Jesucristo echo'ná ripá riwigachi, ne wabé simírami ripabé niráa, ketasi mapurigá echí auché jaré namuti echo'ná ripá riwigachi nirúami niráa. ²⁷ Alí echí Walubela Jesucristo ketasi achigó yiri ju mapurigá echí auché jaré o'wéala sacerdote niráa, mapujiti arigá 'wérali níili mapu si'néami echí auché jaré o'wéala sacerdote sinibí rawé ko'wisáa 'yama Riosi echí jaré namuti. Ayénachó arigá 'wérali níili mapu aboni bachá niráa echirigá ko'wisáa 'yama Riosi jaré namuti mapujiti aboni niráa chati sitíi oláami níili, ayénachó pe wakinana arigá 'wérali níili mapu aboni ko'wisáa 'yama Riosi auché jaré namuti echí auché jaré pagótami chati sitíi olalila jiti, mapujiti echí Walubela Jesucristo sinepi niráa, a Binói niráa nijili mapurigá Binói mi'lirúami níima, ne si'néami echí auché jaré pagótami chati sitíi olalila jiti, alí ketasi arigá 'wérali ju mapurigá Binói auchecho siné echirigá mi'lirúami níima. ²⁸ Chabé ki'yá echí walula Moisesi osogá nulali mapu echí jaré rijói jena'í wichimóbachi piréami jawásarami níima riwéali, ibílipi niráa, mapurigá walubela sacerdote niráa. Alí echí jaré rijói jena'í wichimóbachi piréami arigá ketasi ne sébali galabé oláami ju. Chopi pe wakinánala mapalí echí Moisesi ma echirigá osogá nulali, echalí Riosi Binói bichíwaga anili mapu echí Bilepi Riosi Ranala ne Walubela Sacerdote ju. Alí echí bilepi Riosi Ranala ne wabé simírami galabé oláami ju ne sinibí niráa.

Echi Walubela Jesusi Katéwami ju mapurigá Riosi bukulíwami bichíwaga anili

8 Alí mapurigá tamujeta ma osogá anili, je'ná chopi waminabi walubéala ju: Tamujeta ma níwa echiyiri Walubela Sacerdote, echi mapu ma asíbali echo'ná ripá riwigachi, echo'ná watonachi mapo'ná Riosi níwala walubela asíbalachi ju, echo'ná mapo'ná echi Walubela Riosi atí. ² Alí Binói we olá, Walubela Sacerdote niráa, echo'ná pachá ri'obachi, ripá riwigachi nirúami, mapu echi ne bichíwali Riosi ri'obáwala ju, echi mapu echi Walubela Riosi Binói gayénali, echi mapu ke wesi rijói niwáli. ³ Mapujiti ne si'néami echi auché jaré o'wéala sacerdote jawárami ju mapurigá aboni 'yama Riosi jaré namuti kónawami, ayénachó mapurigá aboni ko'wisáa 'yama Riosi echi jaré namuti 'akami mapu ikí echi auché jaré pagótami pama riwéali. Echijiti arigá 'wérali ju mapu echi Walubela Jesucristo ayénachó níwama mapurigá Binói 'yama Riosi. ⁴ Alí jipi rawé a echi Walubela Jesucristo abijí jena'í wichimóbachi asísáagá, Binói ketasi níimi Walubela Sacerdote niráa, mapujiti abijí nirú jaré rijói sacerdote mapu abijí echirigá 'ya Riosi echi jaré namuti kónawami, mapu echi walula Moisesi osogá nulali, mapu 'yárami níima riwéali Riosi. ⁵ Alí echi jaré sacerdote jena'í wichimóbachi muchúami we nóchaga olá mapurigá sacerdote niráa echo'ná pachá echi walubé Juríosi pagótami ri'obáwalachi. Chopi echi jaré namuti echo'ná pachá walubé Juríosi ri'obáwalachi nirúami chopi péebi noguí achigó yiri ju echi auché jaré galabé namuti yuwa, echo'ná ripá riwigachi nirúami. Mapujiti echi walula Moisesi je'ná jerigá anérami níili mapalí binói nulérami níili niwánala echi ne bachá niwárami Riosi galila, mapalí Riosi Binói jeaneli: Nibira, mujemi niwáma ne suwaba namuti achigó yiri mapurigá Nijeni mi riwírali mapalimi tamí yuwa asali echo'ná ripá biléana rabó. ⁶ Chopi tamujé Walubela Sacerdótawala waminabi galabé nóchaga olá Walubela Sacerdote niráa, ketasi mapurigá echi auché jaré sacerdote jena'í wichimóbachi nirúami olá, mapujiti echi tamujé Walubela Sacerdote 'yárami níili mapurigá Binói nóchaga olama Walubela Katéwami Riosi yuwa, echi auché jaré pagótami yuwa, mapurigá Riosi Binói ne wabé galabé bichíwaga aneli echi Binói.

⁷ Mapujiti a echi jaré pagótami omérásagá nijéwiya mapurigá Riosi chabénala, bachá niráa, nuleli aboni, alí ma ketasi arigá 'wérali níimi mapurigá Riosi bukulíwami, auchecho siné katiwama aboni yuwa. ⁸ Chopi Riosi riwali mapu echi jaré pagótami ketasi galá nijéwami níili, mapurigá je'ná jerigá osirúami ju echo'ná Riosi Ra'íchala oselíwalachi:

Echi Walubela Riosi jeaní: Waminánomí rawé Nijeni bukulíwami auchecho siné katiwama echi jaré Israeli pagótami yuwa, echi jaré Jurá kúchala kúchuwala yuwa.

⁹ Chopi Nijeni ketasi achigórigá katiwama aboni yuwa mapurigá Nijeni ki'yánala katéwali aboni pagótamawala yuwa echalí rawé mapalí Nijeni ne sikachí niráa chapigá bayérali aboni echo'ná Ejíptochi anilíwachi kawírali jonsa.

Mapujiti echi jaré aboni pagótamawala echalí ki'yánala piréami ketasi nijéwaga olali mapurigá Nijeni katéwali aboni yuwa.

Ayénachó echi Walubela Riosi jeaní: Echijiti Nijeni waminá waná ariweli echi jaré ke nijéwami pagótami.

¹⁰ Alí echi Walubela Riosi jeaní:

Waminánomí rawé Nijeni je'ná jerigá katiwama echi jaré Israeli anilíwami pagótami yuwa:

Echalí Nijeni galá machírama aboni Nijé nulalila niráa, mapurigá aboni galá 'natáma Nijé nulalila jiti.

Ayénachó Nijeni osimea Nijé nulalila echo'ná pachana aboni sulálachi niráa, mapurigá aboni galá nakimea njéwiya.

Alí Nijeni níima aboni Riósawala.

Alí aboni Nijé Binói pagótamawala níima.

¹¹ Echalí rawé ma ketasi waminabi arigá 'wérali níima mapu ibili aboni waminabi binérama echi auché jaré echo'ná mulubé aboni yuwa piréami, nibilé mapurigá ibili binérama echi jaré aboni ritémawala jeanigá mapu galá níima mapu aboni galá machimea Riosi, mapujiti Riosi jeaní:

Echalí rawé ne si'néami pagótami galá tamí machimea.

Echalí echi jaré kuchípala galá tamí machimea, ayénachó echi auché jaré o'wéala galá tamí machimea.

¹² Mapujiti Nijeni suwaba ku wikáwama mapurigá aboni wabé chati sitíi olali. Alí Nijeni ketásirapé siné auchecho ku 'natama echi jaré aboni chati sitíi olalila jiti.

¹³ Alí mapalí Riosi aní mapu Binói bukulíwami, auchecho siné katiwama echi jaré pagótami yuwa, echalí Binói echirigá anigá ruyé mapu ma ocháarami ju echi katiwálawami mapurigá Binói bachánala katéwali echi jaré Israeli pagótami yuwa. Alí suwaba echi jaré namuti mapu ikí ma ocháarami ju, ayénachó suwaba mapu ikí ma ketasi iré, ne suwaba echiyiri ke 'me ayó waminá nakuma.

Echi jaré Juríosi pagótami ri'obáwala, echi Riosi ri'obáwala yuwa

9 Alí mapalí Riosi bachá niráa katéwali echi jaré Juríosi pagótami yuwa, echalí Binói nuleli mapu churigá nilátarikó mapu aboni chokoba jaga waminabi walubéragera anema Binói Riosi. Ayénachó nuleli mapurigá aboni echirigá olama echo'ná pachá biléanapi ri'obachi jena'lí wichimóbachi nirúami. ² Alí echi ri'obá je'ná jerigá katiwárami níili: Echo'ná pachá echi bachá yéachi, mapo'ná Galabéalachí anérámi níili, echo'ná nirúali bilé namuti rajécowami, kicháona rajáami. Ayénachó echo'ná nirúali bilé jubétami mapo'ná muchuwálati echi jaré pani mapu echo'ná 'yárami níili Riosi. ³ Alí echo'ná waminabi pachánala, echo'ná okoná yéachi simíraga, mapo'ná 'yérataga chukuli echi auché biléala chiní wabé ru'náami mapuyiri kimá, echo'ná pachá, ne Wabé Simírami Galabéalachí anérámi níili. ⁴ Alí echo'ná pachá ne wabé Simírami Galabéalachí nirúali bilé namuti jubétami, echi wabé natéami oro jiti niwárami, mapo'ná echi moluwá na'élati. Ayénachó echo'ná nirúali bilé mapuyiri kajoni, ayénachó moba buchuví uchérámi echi wabé natéami oro. Alí echi kajoni chopí niwárami níili mapurigá echi jaré Israeli pagótami galá newalamá mapurigá Riosi bachá niráa katéwali aboni yuwa. Alí echo'ná pachana kajónachi nirúali bilé taa mapuyiri sikolí, oro niwárami, pachánala buchiga muchúami echi maná anilíwami ko'wáami mapurigá Riosi chabénala njiali, ripá riwigachi jonsa. Ayénachó echo'ná pachana kajónachi nirúali echi Aroni níwala kusí, echi mapu auchecho ku sawarali. Ayénachó echo'ná pachana nirúali echi okuá rité chipérami niwárami, mapo'ná osirúami níili echi makói nulalíwami Riosi nulalila, mapurigá

Riosi katéwaga nuleli echi jaré pagótami. ⁵ Alí echi okuá kerubina anilíwami echo'ná we galá kajónachi moba a'nagú wéemi raweka jali. Echirigá aniwáami níili mapu echi Walubela Riosi, echo'ná nasipa asali. Alí okuánika echirigá pe buná uchuga moba pe na'ómali aboni analá jiti echo'ná ri'lé nasipa. Alí echo'ná nasipa níili mapo'ná echi jaré namuti lalá 'yárami níili Riosi, mapurigá echi pagótami chati sitíi olalila ku wikawárami níima. Alí jipi nijeni ketasi omero suwaba ruwigára'ícha ne suwaba je'ná jaré namuti jiti.

⁶ Alí mapalí karúmati je'ná namuti ma echirigá muchúami níisa echo'ná pachá echi walubé rióbachi echi Juríosi pagótami níwala, echalí echi jaré sacerdote sinibí wisabé mo'wili echo'ná pachá ne bachá bakiwáami galabéalachí mapurigá aboni nóchaga olama sacerdote niráa mapurigá Riosi nuleli aboni olánala. ⁷ Alí echo'ná waminabi pachánala, pachá echi osá bakiwáamichi galabéalachí, chopi bakí echi ne walubela sacerdote. Alí échiko sinibí bamíbali sinepi rawé niráa echo'ná bakili, ayénachó binói sinibí bamíbali echo'ná pachá togá bakili jaré namuti lalá echi Walubela Riosi 'yámia, mapurigá echi binói sacerdote chati sitíi olalila ku wikawárami níima, ayénachó mapurigá echi auché jaré pagótami chati sitíi olalila ku wikawárami níima. ⁸ Alí suwaba je'há jaré namuti jiti echi wabé Galabé Riosi Iwigala tamujé tamí machírata mapu ketasi cho iráparami níili echo'ná auché biléana yéachi, mapurigá tamujeta mo'wboa echo'ná pachá echi osá bakiwáami galabéalachí mapo'ná Wabé Simírami Galabéalachí anélati, ayénachó mapo'ná Riosi atí, mapuyénaší echi jaré sacerdote abijí sinibí rawé waminabi walubéragera anigá Riosi we mo'wili echo'ná pachá echi bachá bakiwáami galabéalachí. ⁹ Suwaba je'ná jerigá aniwáami ju mapu echi jaré pagótami ketasi omérali mulubéaniya mapo'ná Riosi asali mapujiti ketasi risensia níili mapu aboni simárama echo'ná bachá bakiwáami galabéalachí, mapurigá aboni echirigá mulubéanama Riosi yuwa. Alí aboni ketasi galá bichiiga mulubéana Riosi yuwa mapujiti aboni chopi nakí wikabé namuti mi'ágá 'yánala Riosi, ayénachó aboni we 'ya Riosi wikabé auché jaré namuti. Alí ne suwaba echiyiri namuti tarapé omero ne galabé ku bi'wíami niráa niwayá echi jaré pagótami sulálachi mapalí aboni abijí echirigá olako mapurigá Riosi waminabi walubéragera anérami níima. ¹⁰ Echi jaré pagótami nulérami níili mapu aboni ketasi ko'méa jaré karúmati ko'wáami, ayénachó mapu aboni ketasi bajima jaré karúmati bajíwami, ayénachó aboni nulérami níili mapu aboni wisabé si'winárigá ubama. Chopi aboni echirigá nulérami níili olánala jena'í wichimóbachi mapuyénaší Riosi ketasi cho si'winárigá nuleli aboni, mapujiti ne suwaba echi jaré nulalíwami si'nú nakulíwarami níima riwéali.

¹¹ Chopi echi Walubela Jesucristo ma nawali chabénala niráa. Alí jipi rawé echi Walubela Jesucristo ne Walubela Sacerdote ju echi ne wabé galabéala jiti mapu ma nawali. Alí jipi echi Walubela Jesucristo we olá sacerdote niráa echo'ná pachá biléana ne wabé simírami galabé ri'obachi, ne wabé simírami galabé niwárami, echi mapu ketasi pagótami niwáala ju. Echirigá aniwáami ju mapu echi wabé simírami galabé ri'obachi mapo'ná Jesucristo we olá sacerdote niráa, ketasi jena'í wichimóbachi nirúami ju, chopi echo'ná ripá riwigachi nirúami ju. ¹² Alí echi Walubela Jesucristo ma sinepi bakili echo'ná pachá echi ne wabé Simírami Galabéalachí mapurigá Binói sinepi sunima Walubela Sacerdote niráa olayá, mapurigá ma ketasi 'wérali níima mapu auché bilé walubela sacerdote auchecho siné echirigá olama. Chopi echi Walubela Jesucristo ketasi togá bakili echi jaré chibá owila lalá, nibilé cho

toga bakili echi jaré bisero lalá, chopi Binói bakili echo'ná ripá riwigachi nirúami ne wabé Simírami Galabéalachí galá riwíraga mapu Binói lalá ma ku'luwasa 'yárami níili Riosi. ¹³ Bichíwali ju mapu echi jaré toro lalá, ayénachó echi jaré chibá owila lalá, ayénachó echi bisero mukila ikósatami napisóolawala, ba'wí ro'wérami, ne suwaba galá omérami ju ku bi'wayá echi pagótami mapalí aboni pée uchérámi ju echi la jiti, ayénachó echi napisó ba'wí ro'wérami jiti, mapurigá aboni echirigá olasa galá omérama waminabi walubéraga anée Riosi echo'ná pachá echi walubé Juríosi pagótami ri'obáwalachi. ¹⁴ Chopi a echirigá ne bichíwali níiságá, waminabi ne wabé simírami omérami ju echi Walubela Jesucristo lalá, mapujiti echi Walubela Jesucristo a Binói niráa nijili, echi sinibí bitéami Riosi Iwigala jiti, echi Walubela Riosi ayá, mapurigá Binói mi'lirúami níima mapurigá suwaba echi jaré namuti ko'wirúami níili. Alí Jesucristo tarapé chati sitíi oláami níili. Alí echi Walubela Jesucristo lalá tamujé tamí ku bi'wá suwaba mapu ikita chati sitíi olali. Alí mapalita chati sitíi olali, echalí tamujé olalila we sitíi níili, ayénachó echirigá ologá tamujeta tarapé kaníili, chopi echi Walubela Jesucristo lalá tamujé tamí ku bi'wá mapurigata chopi ologá pirélabo mapurigá echi Sinibí Bitéami Riosi nakí.

¹⁵ Echijiti echi Walubela Jesucristo Walubela Katéwami ju mapurigá Riosi bukulíwami niráa bichíwaga aneli echi pagótami jena'í wichimóbachi piréami. Alí echi Walubela Jesucristo mi'lirúami níili mapurigá galá ku wikawárami níima echi pagótami chati sitíi olalila mapurigá aboni chati sitíi olali mapalí aboni ketasi galá nijéwaga olali mapurigá Riosi bachá niráa nuleli aboni. Ayénachó Jesucristo mukuli mapurigá si'néami mapu ikí Riosi bayeli arigá 'yárami níima mapurigá aboni sinibí niráa pirélama, mapurigá Riosi bichíyami anérami níima aboni. ¹⁶ Mapujiti mapalí bilé rijói ne bichíwaga niráa osá bilé oselí jeanigá mapu churigá rojonárami níima binói níwala namuti mapalí binói ma mukumea, alí echi jaré binói níwala namuti ketasi cho echirigá rojonárami níima mapalí abijí ketasi cho bichíwali riwirúami juko mapu ma mukuli echi rijói. ¹⁷ Mapujiti mapurigá echi rijói ne bichíwaga osali, ketasi cho olárami níima mapuyénasí abijí bité echi rijói. Chopi echirigá olárami níima mapalí ma mukú echi mapu echirigá ne bichíwaga osali. ¹⁸ Echijiti mapurigá Riosi chabé kí'yá, bachá niráa, ne bichíwaga aneli echi jaré Israeli pagótami, echirigá ayénachó chopi anérami níili mapalí echi jaré namuti lalá ma ku'luwárami níili. ¹⁹ Mapujiti mapalí echi walula Moisesi ma ruyeli echi jaré Israeli pagótami ne suwaba echi jaré nulalíwami jiti, mapurigá Riosi nuleli aboni, alí binói Moisesi chapili echi jaré bisero lalá, echi jaré chibá owila lalá ayénachó, ba'wí asíchiko. Echalí binói chapili pe taa bo'osali sitákami, bilé kusí sawéami, isopo anilíwami yuwa. Alí binói pakeli echi kusí sawéami, echi bo'osali yuwa echo'ná lárali, ba'wí nasóami. Alí binói kúuchi niráa bachímalí echi lá, ba'wí nasóami echo'ná oselichi mapo'ná osirúami níili Riosi nulalila. Alí binói ayénachó kúuchi niráa bachímalí echi lá, ba'wí nasóami echo'ná moba si'néami echi jaré pagótamichi. ²⁰ Echalí echi walula Moisesi jeaneli: Je'ná ju echi lá mapu ku'luwárami níili mapalí Riosi 'yemi mi ne bichíwaga aneli máputamo ku'wíratami níibo riwéali, átamo galá nijéwasagá mapurigá Riosi 'yemi mi nuleli. ²¹ Alí echi Moisesi ayénachó lá jiti kúuchi niráa bachímalí echi ri'obá. Ayénachó lá jiti kúuchi niráa bachímalí suwaba echi jaré namuti echo'ná pachá ri'obachi nirúami mapu ikí echo'ná néerati mapalí aboni waminabi walubéraga aneli Riosi echo'ná pachá ri'obachi. ²² Alí echo'ná Riosi nulalila osirúamichi nulárami níili mapu ne noguí

suwaba namuti chopi galá ku bi'wárami níima, echi lá jiti bachímaga olárami. Alí mapalí echi lá ketasi ku'luwárami níisagá, alí echi chati sitíi oluwáwami ketasi ku wikawárami níima.

**Echi jaré pagótami chati sitíi olalila chopi ku wikawárami
ju mapujiti Jesucristo mi'lirúami níili.**

²³ Alí echi jaré namuti echo'ná ri'obachi nirúami, ibili niráa, ne noguí achigó yiri ju echi auché jaré waminabi galabéala namuti yuwa mapu echo'ná ripá riwigachi nirúami ju. Alí arígá 'wérali níili mapu je'ná jaré namuti echo'ná pachá jena'í wichimóbachi nirúami ri'obachi arígá galabératami níima bacháami Riosi yuwa jaré namuti lalá jiti bachímaga. Chopi echi auché jaré waminabi galabé namuti echo'ná ripá riwigachi nirúami chopi galabératami níili bacháami Riosi yuwa echi Walubela Jesucristo lalá jiti. ²⁴ Mapujiti echi Walubela Jesucristo ke siné bakili echo'ná pachánala echi wabé simírami galabéalachí jena'í wichimóbachi nirúamichi ri'obá mapu pagótami jiti niwárami níili. Alí jena'í wichimóbachi nirúami ne wabé simírami galabéalachí chopi pe ne noguí achigó yiri níili echi ne wabé simírami Galabéalachí echo'ná ripá riwigachi nirúami yuwa. Chopi echi Walubela Jesucristo ma bakili echo'ná ne wabé simírami Galabéalachí, echo'ná ripá riwigachi nirúami, mapo'ná jipi rawé Binói we ra'ícha bacháami Riosi yuwa, tamujé tamí jiti. ²⁵ Alí echi jaré Juríosi pagótami ne walula sacerdótawala ne sinibí bamíbali bakí echo'ná pachá echi wabé simírami galabéalachí, jena'í wichimóbachi nirúami ri'obachi ne wabé pachánala, mapurigá binói 'yama Riosi echi lá mapu ke binói lalá ju, chopi echi Walubela Jesucristo ketasi echirigá wisabé niráa a Binói nijá mapurigá waminá mi'lirúami níima. ²⁶ Mapujiti a echirigá níisagá, echalí arígá 'wérali níimili chabé chokichí jonsa, mapalí jonsa je'ná wichimoba gayenárami níili, mapurigá echi Walubela Jesucristo wisabé, ibili bamíbali niráa, waminá mi'lirúami níimi. Chopi jipi mapalí ma mulubé ju mapalí ma suwibama suwaba namuti jena'í wichimóbachi nirúami, jipi bukulí rawé jonsa, echi Walubela Jesucristo sinepi niráa a Binói nijali mapurigá waminá mi'lirúami níima, mapurigá Binói echirigá waminá 'yema suwaba echi chati sitíi oluwáwami. ²⁷ Mapujiti arígá 'wérali ju mapu ne si'néami pagótami, ibili niráa, sinepi suwimea. Ayénachó 'wérali ju mapurigá ma suwisáa, aboni ibili niráa bacháami jábama Riosi yuwa, mapurigá si'néami mapu ikí ketasi ku wikawárami ju arígá kastigo 'yárami níima. ²⁸ Echirigá ayénachó echi Walubela Jesucristo sinepi nijírami níili mapurigá Binói mi'lirúami níima, mapurigá Binói echirigá 'yema wikabé pagótami chati sitíi olalila. Alí Binói Jesucristo auchecho siné ku nawama jena'í wichimóbachi mapurigá Binói ku'wírama si'néami echi jaré mapu ikí galá bichíiga buweko mapurigá Binói ku nawama. Chopi mapalí echi Walubela Jesucristo echirigá auchecho siné ku nawasa, echalí Binói ma ketasi auchecho siné mukumea, echirigá ku 'yémiya echi chati sitíi oluwáwami.

10 Mapujiti echi jaré pagótami chopi péebi niráa machíralati, Riosi nulalila jiti, mapurigá waminánomí aboni ne sébali ku'wíratami níima riwéali, echi Walubela Jesucristo jiti. Mapujiti echi nulalíwami ketasi omérali ne galabé wachínaga oláami niráa niwayá echi jaré pagótami mapu arígá mulubéanali Riosi yuwa, ne si'néami mapu ikí sinibí bamíbali ko'wigá 'yali Riosi echi jaré namuti mapurigá nulárami ju, echo'ná Riosi nulalílachi. ² Mapujiti a echi nulalíwami omérasagá wachínaga oláami niráa niwayá echi pagótami, alí aboni ma ketasi

waminabi echirigá ko'yagá 'yami Riosi echi jaré namuti. Chopi echi jaré pagótami mapu echirigá ko'yagá 'ya Riosi echi jaré namuti ma sinepi bi'wíami níisagá, alí aboni ma ketasi waminabi chati sitíi oláami mayemi.³ Chopi si'winárigá mapalí echi jaré pagótami echirigá ko'yagá 'ya Riosi echi jaré namuti, echalí aboni sinibí bamíbali we o'mónaga newalá aboni chati sitíi olalila jiti.⁴ Mapujiti echi jaré toro lalá, ayénachó echi jaré chibá owila lalá ketásirapé omero ku'wíriya echi pagótami mapurigá aboni chati sitíi olalila ku wikawárami níima.

⁵ Echijiti mapalí echi Walubela Jesucristo nawali jena'í wichimóbachi, echalí Binói jeaneli echi Riosi Onorúami:

Mujé ketasi nakí mapu echi jaré pagótami mi ko'yagá 'yama echi jaré namuti, nibilé mi nakí mapu aboni mi 'yama jaré namuti mapurigami echijiti ku wikawáma aboni chati sitíi olalila.

Chopi Mujemi tamí 'yali mapurigani bitélama mapurigá Rijói niráa.

⁶ Ayénachó echi Walubela Jesucristo jeaneli Riosi:

Mujemi ketasi galá nirali mapurigá echi jaré pagótami ko'yagá ikósali echi jaré namuti, nirapé mapurigá aboni ko'yagá 'yali jaré namuti mapurigá aboni chati sitíi olalila echijiti ku wikawárami níima.

⁷ Echalí echi Walubela Jesucristo waminabi jeaneli Riosi:

Nijeni mi jeaneli: Nibira, mani nawali jena'í wichimóbachi mapurigani chopi olama mapurigá mujemi nakí, achigórigá mapurigá osirúami ju tamí jiti rugá,

echo'ná Mujé Ra'íchala osurúmachi.

⁸ Alí echirigá anigá echi Walubela Jesucristo arigá aneli mapu Riosi ketasi nakí mapu echi pagótami ko'yagá 'yama echi jaré namuti, nibilé cho nakí mapu aboni ko'yagá ikósama jaré namuti mapurigá aboni chati sitíi olalila echijiti ku wikawárami níima, chopi echirigá arigá nulárami ju mapurigá echi walula Moisesi osogá nulali.

⁹ Alí pe wakinánala echi Walubela Jesucristo jeaneli Riosi:

Nijeni ma nawali jena'í wichimóbachi mapurigani chopi olama mapurigá Mujemi nakí.

Echirigá aniwáami ju mapu echi Walubela Jesucristo chopi olali mapurigá Riosi nakili, mapurigá ma ketasi arigá 'wérali níima mapurigá echi jaré pagótami waminabi ko'yagá 'yama Riosi echi jaré namuti, mapujiti echi Walubela Jesucristo a Binói niráa njiali mapurigá Binói mi'lirúami níima, echi jaré pagótami chati sitíi olalila jiti.¹⁰ Alí mapujiti echi Walubela Jesucristo chopi echirigá olámiya nawali mapurigá Riosi nakili, echijiti Riosi ma tamujé tamí wabé galabérali, mapujiti echi Walubela Jesucristo sinepi niráa a Binói njili mapurigá mi'lirúami níima, tamujé chati sitíi olalila jiti, chopi jipi echi Walubela Jesucristo ma ketasi auchecho siné mi'lirúami níima.

¹¹ Alí sinibí rawé echi jaré sacerdote ne bichíwali we nócha echo'ná pachá echi walubé Juríosi ri'obáwalachi, mapo'ná aboni wisabé niráa ko'yagá 'ya Riosi echi jaré achigó yiri namuti. Chopi aboni echirigá ologá ke siné omero ku wikáwiya echi jaré pagótami chati sitíi olalila.¹² Chopi mapalí echi Walubela Jesucristo ma sinepi niráa njiali a Binói niráa, mapurigá Binói mi'lirúami níima, echi jaré pagótami chati sitíi olalila jiti, alí Binói ma ku owinsa, echalí ku asíbali Riosi yuwa, echo'ná watonachi.¹³ Echalí jonsa echi Walubela Jesucristo chopi echo'ná Riosi yuwa watonachi atí, mapuyénasí echi jaré Binói asayela omératami níima, mapujiti

Riosi Onorúami echo'ná ri'léami echi Walubela Jesucristo ralálachi ro'wábama echi jaré Binói asayela, mapurigá jaré namuti rikékowami niráa.¹⁴ Mapujiti mapalí echi Walubela Jesucristo sinepi niráa a Binói nijali mapurigá mi'lirúami níima, echalí Binói echirigá ologá ne sébali galabératali echi jaré mapu Binói chapili mapurigá Binói níwala niráa, mapurigá aboni sinibí niráa echirigá galabératami níima.¹⁵ Ayénachó echi Wabé Galabé Riosi Iwigala tamujé tamí achigórigá ané; mapujiti bachá niráa jeaní:

¹⁶ Echi Walubela Riosi je'ná jerigá aní:

Waminánomí rawé Nijeni je'ná jerigá katiwama echi jaré Israeli pagótami yuwa:

Nijeni galá machíratama aboni, Nijé nulalila jiti, mapurigá aboni ne galá machimea Nijé nulalila, ne sulachí niráa.

Ayénachóni osimea Nijé nulalila echo'ná pachana abónichi niráa, mapurigá aboni sinibí 'natama Nijé nulalila jiti.

¹⁷ Alí echi Wabé Galabé Riosi Iwigala waminabi jeaní:

Nijeni ke siné ku auché 'natama mapurigá aboni chati sitíi olali. Nibilé sineni ku auché 'natama mapurigá aboni ketasi nijéwaga olali mapurigá Nijeni nuleli aboni.

¹⁸ Echirigá biché mapalí Riosi ma ku wikáwali echi jaré chati sitíi oluwáwami, echalí ma ketasi arigá 'wéralli ju mapurigá bilé namuti mi'lirúami níima mapurigá echi chati sitíi oluwáwami auchecho ku wikawárami níima.

Galá níima máputa mulubéanabo Riosi yuwa

¹⁹ Echijiti keni ritémawa, jipi tamujeta galá omero mo'wiýá echo'ná pachánala echi ne Wabé simírami Galabéalachi echo'ná ripá riwigachi nirúami mapo'ná Riosi atí, mapujiti echi Walubela Jesucristo lalá ma ku'luwárami níili tamujé tamí jiti.²⁰ Jípita galá omero echo'ná pachánala mo'wiýá, mapujiti Jesucristo bukulíwami buwirali mapurigá tamujeta, sinibí piréami niráa, echo'ná simáraga mo'wiboa, echo'ná ripá riwigachi wabé simírami Galabéalachi, achigórigá mapurigá echi Juríosi pagótami walubela sacerdótawala bakí echo'ná pachánala echi wabé simírami galabéalachi, jena'lí whichimóbachi nirúami ri'obachi. Alí Jesucristo echirigá buwirali mapalí Binói ma ku owinsa bakili echo'ná ripá riwigachi mapurigá Rijói niráa.²¹ Jipi echi Walubela Jesucristo tamujé Walubela Sacerdótawala ju. Jipi Binói galá nulé ne si'néami echi jaré Riosi kúchuwala.²² Echijiti galá níima máputa tarapé 'yékami sulélabo, chopi máputa galá bichíiga mulubéanabo Riosi yuwa, mapujiti Jesucristo ma tamujé tamí ku bi'wali tamujé sulálachi niráa, mapurigá tamujeta ma ke o'monabo mapurigá chati sitíi oláami niráa. Alí galá níima mapurigata ubáratami niráa níibo, ne galabéala ba'wí jiti, tarapé wikúamiti mapurigá echi Juríosi sacerdótawala olali.²³ Alí waminábita galá bichiga olabo achigórigá mapurigata ma galá bichíili. Ketásita si'winárigá bichííbo, mapujiti Riosi ne bichíwali olama achigórigá mapurigá tamujé tamí bichíwaga aneli mapu Binói olama riwéali, mapurigá osirúami ju echo'ná Riosi Ra'íchala oselíwalachi.²⁴ Alí ne galá níima mapu tamujeta a'nawita galá 'natasa, mapu churigata a'nagupi nagíurabo mapurigata ibili niráa waminabi wabé galéami níibo, ayénachó mapurigata ibili niráa waminabi galabé oláami níibo.²⁵ Alí ketasi galá níima máputa waminá ariwebo napawí echi auché jaré bichíyami yuwa, ketasi mapurigá jaré ma ketasi napawí echi auché jaré yuwa. Chopi galá níima tamujeta

a'nagupi waminabi galá bichíratasa. Jipi waminabi galá níima echirigá a'nagupi bichíratasa mapujítita galá machí mapu echi Walubela Jesucristo rawéwala ma ne mulubé nílasimí.

²⁶Mapujiti mapalí echi jaré pagótami ma galá machíratami níisa echi ne Bichíwali, alí a aboni waminabi nokuísagá chati sitíi olayá, ayénachó a aboni we nakisáagá echirigá chati sitíi olánala, echalí aboni ma ketasi ku wikawárami níima, mapujiti aboni ketasi galá bichíili mapurigá Jesucristo mi'lirúami níili aboni chati sitíi olalila jiti. ²⁷Echalí aboni wabé majaga buwema mapuyénasí Riosi ne wabé 'yoka, walú kastigo 'yama, mapalí Binói waminá ikósaga suwábama echi jaré Binói sayela. ²⁸Chabé kí'yá mapalí jaré pagótami ketasi galá nijéwaga olali mapurigá echi walula Moisesi osogá nulali, echalí echiyiri pagótami arigá waminá ko'wirúami níili, mapalí okuá testigo chópirigá wi'nijili aboni, bikiyá kéremá. Echalí echi jaré chati sitíi oláami tarapé natimaga arigá ko'wílati. ²⁹Alí jaré pagótami ke 'me nirá echi Walubela Riosi Ranala. Ayénachó aboni echirigá ologá wabé sitíi nirá echi Walubela Jesucristo lalá mapu sinepi ku'luwárami níili mapurigá aboni chati sitíi olalila ku bi'wárami níima, mapurigá Riosi bachá niráa ne bichíwaga anigá katéwali jena'lí wichimóbachi piréami pagótami yuwa. Alí echi jaré ke bichíyami pagótami mapurigá bilé namuti rimisókawami niráa mayé echi Walubela Riosi Ranala. Ayénachó echiyiri ke bichíyami pagótami ne wabé riwélata echi wabé Galabé Riosi Iwigala. Chopi echi Walubela Riosi arigá wabé galé si'néami pagótami. Echijiti galá níima mapu echiyiri chati sitíi oláami pagótami waminabi wabé simírami kastigo 'yárami níima, ketasi mapurigá echi auché jaré kastigo 'yárami níima mapu ketasi nijéwaga olali mapurigá echi walula Moisesi osogá nulali. ³⁰Alí tamujeta galá machí mapu echi Walubela Riosi jeanili: Nijeni chopi ju mápuni kastigo 'yama echi jaré chati sitíi oláami. Nijeni walú kastigo agá ku natétama aboni. Ayénachó jeanili: Echi Walubela Riosi waminá justikia olama echi jaré Binói pagótamawala yuwa. ³¹¡Ne wabé simírami majawíwami ju mapu echi sinibí bitéami Riosi sinibí niráa ne walú kastigo 'yama echi jaré chati sitíi oláami pagótami!

³²Chopi galá ku 'natasi 'yemi mapurigá chabénala rawé 'yémitamo ne wabé risúu olárami níili, mapalítamo ne chokichí machíratami níili echi Galabé Riosi Ra'íchala, ayénachó mapurigátamo galá bichífiga anáchali mapalítamo echirigá risúu olárami níili. ³³Echalí jaré 'yemi ne wabé risúu olárami níili, ayénachó jaré walú kastigo 'yárami níili, echi auché jaré pagótami riwírataga. Ayénachó auché jaré 'yemi risúu olárami níili chopi mapujítitamo achigórígá bichíili mapurigá echi jaré mapu bachá niráa risúu olárami níili. ³⁴Echalítamo ayénachó wabé natimali echi auché jaré ritémtami mapu pachá mo'wárami níili, mapujiti aboni nawésali Riosi Ra'íchala. Alí bichétamo arigá wabé kaníili mapalí echi auché jaré pagótami 'yemi mi chuwé 'yeli 'yemi níwala namuti, mapujítitamo galá machili máputamo níwami ju ne wabé simírami galabé namuti echo'ná ripá riwigachi nirúami, echi mapu ne sinibí niráa nirúlama. ³⁵Echijiti sinibí waminabi galá bichífiga mapurigátamo ma galá bichíili, mapujítitamo echijiti ne wabé simírami galabéala 'yárami níbo. ³⁶Galá níima mapu 'yémitamo sinibí kilfi ologá pirélabo mapurigátamo galá omérabo olayá mapurigá Riosi nakí, ayénachó mapurigátamo echirigá narepo mapurigá Riosi 'yemi mi bichíwaga aneli máputamo arigá 'yárami níbo. ³⁷Mapujiti echo'ná Riosi Ra'íchala oselíwalachi je'ná jerigá osirúami ju:

We yáati, ke 'me ayó nolínama echi mapu arigá nawama.

Échiko ketasi waminá wi'lí buwema.

³⁸ Chopi si'néami mapu ikí Nijeni nareko, abóniko ne galá bichiiga pirélama.

Chopi jaré tamí ariwesa, ku kuwana simásagá,

Nijeni ketasi kanílama echi jaré aboni jiti.

³⁹ Chopi tamujé ketasi ku kuwana ro'wíami ju, mapurigá auché jaré mapu ku ro'wiga 'wigá. Chopi tamujeta galá bichiyami ju Riosi. Echijiti tamujé aliwala sinibí niráa piréami níima.

Echi Bichiílawami

11 Mapalita galá bichií Riosi, echalita bichiíwali mayé máputa waminánomí narepo echi jaré namuti máputa we buwé, mapujiti Riosi bichiíwaga anili mapu tamujé tamí echirigá 'yama. Ayénachó mapalita galá bichií Riosi, echalí tamujeta ne bichiíwali mayé mapu arigá nirú echi jaré namuti máputa ke chirigá ritiwá jipi rawé. ² Echi jaré tamujé pagótamawala chabé ki'yá piréami galabé oláami anélati mapujiti aboni galá bichiíli Riosi.

³ Mapujiti tamujeta galá bichií Riosi Ra'íchala, echijítita galá machí mapu Riosi niwáli ne suwaba namuti mapalí Binói chopi ra'íchaga anili mapu echi jaré namuti arigá niwárami nílama. Echirigá echi jaré namuti mapu jípita ritiwá, ketasi niwárami níili auché jaré namuti jíti, mapujiti echalí ki'yá chokichí tarapé biyiri nirúali.

⁴ Echi chabé ki'yá bitéami Abeli galá bichiíli Riosi, echijiti binói bilé bo'wá mi'yagá 'yali Riosi. Alí echirigá ologá echi Abeli 'yali Riosi bilé waminabi galabéala namuti, ketasi mapurigá echi binói rijimala Kaíni riwéami 'yali. Echijiti Riosi anili mapu echi Abeli we galabé oláami níili. Ayénachó Riosi nareli echi jaré namuti mapu echi Abeli ko'yagá 'yali. Echijiti echi Abeli mapu arigá mukúami ju, abijí tamujé tamí galá binera, mapujítita nawésarami ju mapurigá echi Abeli echirigá galá bichiíli Riosi.

⁵ Echi Enoko riwéami rijói galá bichiíli Riosi, echijiti binói tólati echo'ná ripá riwigachi mapalí ke cho mukuli. Alí echi Enoko ma ketasi auché riwílati jena'í wichimóbachi, mapujiti Riosi ma toli. Alí echo'ná Riosi Ra'íchala oselíwalachi osirúami ju mapu chabénala mapalí echi Enoko ketasi cho tólati echo'ná ripá riwigachi, mapu echi Enoko chopi ologá bitéali mapurigá Riosi nakili. ⁶ Alí echi jaré pagótami ketasi chirigá omero olayá mapurigá Riosi nakí, mapalí aboni ketasi bichií Riosi, mapujiti arigá 'wérali ju mapu echi jaré mapu ikí nakiko mulubéanala Riosi yuwa, arigá galá bichiíga mayema mapu ne bichiíwali nirú Riosi. Ayénachó 'wérali ju mapu aboni bichiíma mapu Riosi galá ku'wírama echi jaré mapu ikí galá ága machináliko Binói Riosi.

⁷ Alí echi Noé galá bichiíli Riosi. Echijiti mapalí Riosi ruyeli echi Noé mapurigá pe wakinánala arigá ikimea mapurigá binói Noé ke cho siné riwali ikíachi, echalí echi Noé galá nijéwaga mapurigá Riosi nuleli, arigá niwáli bilé walubé barko anilíwami, mapuyiri kalí niráa, mapurigá echo'ná walubé ba'wírali moba inama. Echalí echi Noé echirigá niwáli echi barko mapurigá echi jaré binói kúchuwala ketasi waminá si'lima echi walubé ba'wí ukúuchi jena'í wichimóbachi. Echi Noé echirigá galá bichiíli Riosi, echijiti binói galá nijéwali mapurigá Riosi nuleli. Alí echirigá ologá echi Noé arigá wi'nijili echi auché jaré ke bichiyami pagótami jena'í wichimóbachi piréami. Ayénachó Riosi galá nirali echi Noé mapujiti binói echirigá bichiíli Riosi.

⁸Echi Abrami galá bichíili Riosi, echijiti binói galá nijéwali mapalí Riosi júuli echo'ná auché biléana kawírali simínala. Echalí Riosi bichíwaga aneli mapu arigá 'yama echi auché biléana kawírali mapurigá binói Abrami kawíwala niráa. Alí echi Abrami arigá simili echo'ná binói kawíwalachi jonsa, echo'ná echi auché biléana kawírali simiyá, tarapé cho machigá mapu kumi simea riwéalo. ⁹Echi Abrami ne galá bichíili Riosi, echijiti binói bitéali mapurigá si'wina bitéami niráa, echo'ná kawírali mapo'ná Riosi bichíwaga aneli mapu Binói 'yama mapurigá echi Abrami kawíwala niráa. Alí echo'ná ibílana echi Abrami pe téeli niráa bitélasali, mapuyiri chiní niwárami kalirasa. Alí pe kinánala echi Isaka ayénachó echirigá olali, echi Jakobo asfchiko. Alí aboni okuánika achigórígá ne bichíwaga anélati mapurigá Riosi bichíwaga aneli echi Abrami. ¹⁰Alí echi Abrami echirigá pe téeli niráa bitélasali echo'ná, mapujiti binói we nakigá buweli mapurigá binói bitélama echo'ná Walúlachi, ripá riwigachi nirúami, mapo'ná ibílana kalírali ne wabé jiwériga tigoka jawárami ju, echi Walúlachi mapu Riosi Binói a'láragera niwáli.

¹¹Alí echi Abrami upila, Sara riwéami, ayénachó galá bichíili Riosi, echijiti Riosi 'yali mapurigá echi Sara galá omérama bilé táchala ranaya mapalí binói ne wabé simírami wiláami níili mapuyenma ma ke omérama riwélio echi táchala ranaya. Echijiti echi Sara echirigá ne wabé wiláami níisa, arigá ranali bilé táchala towí, mapujiti binói galá bichíili mapu Riosi arigá 'yama riwéalo mapurigá Binói bachá niráa bichíwaga anili. ¹²Echirigá mapalí echi Abrami wabé ochérami níili, mapalí ma ne mulubé mukumea riwéali, echalí arigá ranarúami níili binói nolá. Alí wakinánokuá echi Abrami nolá kúchala kúchuwala ne wabé simírami wikabé muweli, mapu ikí echi jaré sopolí ripá riwigachi muchúami, ayénachó mapu ikí echi saté echo'ná walú ba'wírali suwé nirúami, mapu ketasi omérawami ju taráa.

¹³Alí ne si'néami je'ná jaré mapu ne galá bichíyami níili Riosi, arigá waminá suwili ke cho naresa mapurigá Riosi bichíwaga aneli mapu Binói 'yama riwéalo. Alí aboni echirigá galá bichíili, echijiti aboni mikabé niráa riwali echi jaré namuti. Echirigá aboni galá bichíiga, ne wabé kaníli mapurigá ma 'yárami niráa echi jaré namuti. Alí echirigá ologá aboni galá machírali echi auché jaré pagótami mapu echi jaré mapu ikí galá bichíili Riosi pe téelipi niráa piréami níima riwéali jena'í wichimóbachi, mapujiti aboni chopi echo'ná ripá riwigachi piréami níima riwéali ne sinibí niráa. ¹⁴Alí ne si'néami echi jaré mapu ikí echirigá bichíiga nawésako, abóniko ne galá machili echi auché jaré pagótami mapu aboni abijí 'yasa 'yena biléana kawí, mapu aboni kawíwala níima, mapujiti aboni ketasi jena'í wichimóbachi piréami níima sinibí niráa. ¹⁵Alí a aboni ne bichíwali 'natásagá jena'í wichimóbachi nirúami kawí jiti, mapo'ná jonsa aboni simíbali, echalí aboni ne bichíwali omérami ku siyá echo'ná. ¹⁶Chopi echi jaré bichíyami nakili bilé kawí ne wabé simírami galabéala, echi mapu echo'ná ripá riwigachi nirúami ju. Echijiti echi Walubela Riosi ketasi riwela mapalí Binói anérami ju aboni Riósawala, mapujiti Binói ma a'lárali biléana walúlachi mapo'ná echi jaré bichíyami sinibí niráa pirélama.

¹⁷Alí mapalí Riosi nakili machinália acha galá nijéwama echi Abrami, echalí Riosi machinálaga aneli echi Abrami mapu mi'agá 'yama binói ranala, Isaka riwéami. Alí echi Abrami ne galá bichíili Riosi, echijiti binói arigá nakili echirigá mi'agá 'yánala Riosi echi Isaka. Echalí echi Abrami arigá echirigá mi'agá 'yama riwéali Riosi echi bilepi kepu raná. Chopi chabénala, bachá niráa, Riosi arigá ne bichíwaga aneli echi Abrami jeanigá: ¹⁸Echi Isaka riwéami mujé ranala kúchala kúchuwala

ne wikabé muwema, alí ne si'néami aboni ne bichíwali mujé binói pagótamawala níima.¹⁹ Echirigá níili mapu echi Abrami galá machili mapu Riosi we omérami ju ku o'wíntiya echi jaré suwfíami. Ayénachóta omero aniyá mapu echi Isaka ne noguí mi'lirúami níili. Chopi binói ku 'yárami níili echi Abrami, galá ku bitéami niráa.

²⁰ Alí echi Isaka ayénachó galá bichíili Riosi. Echijiti echi Isaka galá omérali bichíwaga aniya echi okuá binói kúchuwala, echi Jakobo riwéami, echi Esaú riwéami, mapu Riosi bichíwali ne wabé ku'wírama aboni waminánomí.²¹ Echi Jakobo ayénachó galá bichíili Riosi, echijiti mapalí binói ma ke 'me ayó mukumea riwéali, echalí binói arígá ne galá bichíwaga anili mapu Riosi ne wabé ku'wírama riwéali echi José kúchala kúrowi okuánika. Alí echalí echi Jakobo waminabi walubéraga aneli Riosi, echo'ná binói tisólachi moba bunaga chukugá.²² Echi José galá bichíili Riosi, echijiti mapalí binói ma ke 'me ayó mukumea riwéali, echalí binói rugá anili mapurigá echi jaré wikabé Isaeli kúchala kúchuwala arígá ne bichíwali wabé wakinánomí ku simama echo'ná Ejíptochi anilíwachi kawírali jonsa. Ayénachó echi José galá nuleli echi jaré aboni mapu echalí ayénachó ku tomea binói José mukúami sapala.

²³ Alí echi Moisesi 'wénala ayénachó galá bichíili Riosi, echijiti mapalí echi Moisesi ranálati, echalí binói 'wénala wabé chiná niráa nasoli echo'ná pachá aboni pirélachi, bikiyá michá iyénasí, mapujiti binói 'wénala ne wabé ba'yórali echi táa towí. Ayénachó aboni ketasi majali mapujiti echi walula silfámi arígá ma nulali ko'winala echi kúuchi kúruwi.²⁴ Alí echi Moisesi ayénachó galá bichíili Riosi. Echijiti mapalí binói ma walú ochérali, echalí binói ketasi nakili mapurigá binói echi walula silfámi malala ranala anérami níima, echo'ná Ejíptochi bitéami.²⁵ Alí binói Moisesi waminabi nakili risúu olárami níilanala echi auché jaré Riosi pagótawala yuwa, chopi binói ketasi nakili wabé kaníliga chati sitíi oláñala, mapujiti echi jaré mapu echirigá kaníliga chati sitíi olako, pe téeli niráa echirigá kanili.²⁶ Echirigá echi Moisesi waminabi galabé nilali mapurigá binói risúu olárami nílama mapurigá echi Walubela Jesucristo risúu olárami níima riwéali. Chopi echi Moisesi ketásirapé echirigá galabé nírali ne suwaba echi jaré namuti níilawami echo'ná Ejíptochi nirúami, mapujiti binói chopi galabé nírali suwaba mapurigá binói 'yárami níima riwéali Riosi jiti waminánomí.²⁷ Echi Moisesi galá bichíili Riosi, echijiti binói ku simili echo'ná Ejíptochi anilíwachi kawírali jonsa, chopi ketasi echirigá ku simili mapujiti binói, siné káachi we majali echi walula silfámi, mapu wabé yóami níili. Echalí echi Moisesi chopi waminabi galá bichíiga ku simili, mapurigá galá riwalá niráa Riosi, echi mapu ketasi ritiwíwami ju.

²⁸ Echi Moisesi galá bichíili Riosi, echijiti binói we omáwali echalí omowálawachi mapalí echi kúuchi bo'wá ko'wílati. Echalí binói nulali echi la jiti uchénala ibílana yéachi mapo'ná piréali echi jaré Isaeli pagótami, mapurigá echi walubela Riosi kapitánawala mapu ko'wimea riwéali echi jaré bachá o'wéalapala bachirúami ketasi echirigá ko'wimea echi jaré Isaeli pagótami níwala o'wéalapala bachá jáwami kúrowi.²⁹ Alí echi jaré Isaeli pagótami galá bichíili Riosi, echijiti aboni galá omérali waminá bo'ómana nasipa simara, echo'ná walú ba'wírali Sitánachi anilíwachi simara, mapurigá echo'ná wi'yérali wakichéachi niráa. Chopi mapalí echi jaré Ejíptochi piréami achigórigá simáranali, echalí ne si'néami aboni waminá si'lili.

³⁰ Echi jaré Isaeli pagótami galá bichíili Riosi, echijiti suwaba najuli echi ripabé tigótami mapu noligá tigótami níili echo'ná walúlachi Jerikochi anilíwachi, mapalí

echi jaré Israeli pagótami galá bichíiga, noligá simáraga nolérali echo'ná walúlachi, isínapi niráa, kichao rawé yénasí. ³¹ Echi Ra'aba riwéami mukí mapu chabénala chati sitíi oláami níili, arigá galá bichíili Riosi. Echijiti binói ketasi mi'lirúami níili mapalí echí auché jaré ke nijéwami pagótami arigá waminá suwábarami níili. Echalí echí Ra'aba galá ku'wíratami níili mapujiti binói bachá niráa ku'wíraga nareli echí okuá Israeli rijói mapu chiná niráa, bachá 'nésiya mo'wili echo'ná walúlachi.

³² ¿Piri jítini rugá waminabi animea? Ketásini omero waminabi wi'lí ra'ícha echí Gereoni jiti rugá, nibilé cho echí Baraka jiti rugá, nibilé cho echí Sansoni jiti rugá, nibilé cho echí Jepaté jiti rugá, nibilé cho echí Rabiri jiti rugá, nibilé cho echí Samueli jiti rugá, nibilé cho echí auché jaré jiti rugá, si'néami mapu ikí Riosi jiti julárami níili nawisánala. ³³ Ne si'néami echí jaré aboni echirigá galá bichíili Riosi. Echijiti jaré aboni galá nayúrali sayériga nakoa auché jaréana piréami o'wéala. Alí auché jaré galá omérali wachínaga nuláa mapurigá o'wéala silíami niráa mapujiti aboni galá bichíili Riosi. Ne si'néami aboni galá ku'wíratami níili achigórigá mapurigá Riosi bachá niráa ne bichíwaga anili mapurigá aboni galá ku'wíratami níima. Alí jaré aboni ayénachó galá ku'wíratami níili mapalí Riosi 'yérali echí jaré wabé jobátami o'wéala namuti chumulá mapurigá echí jaré bichíyami ketasi waminá ko'wirúami níima echí jaré jobátami namuti jiti. ³⁴ Auché jaré ne galá bichíili Riosi, echijiti Binói galá cho'wali echí walú na'í wabé ratáami mapurigá aboni ketasi waminá ikósarami níima. Auché jaré ayénachó galá bichíili Riosi, echijiti aboni ketasi waminá ko'wirúami níili i'wéala ripiyá jiti mapalí jaré arigá nakili echirigá ko'winala aboni. Auché jaré mapu tarapé jiwerámi níili, arigá ne wabé jiwerámi niráa niwálati mapujiti aboni galá bichíili Riosi. Auché jaré mapu ayénachó galá bichíili Riosi, echijiti jiwerawami 'yárami níili mapurigá aboni galá omérama nakówaga nayúriya auché jaréana jonsa síami o'wéala sontarsi sayeria. ³⁵ Ayénachó nirúali jaré muguí mapu galá bichíili Riosi, echijiti aboni auchecho siné ku nareli, ku o'wíntarami niráa, jaré aboni níwala mapu ma suwfámi níili.

Chopi auché jaré galá bichíyami ritémtami ne wabé simírami risúu olárami nílasa, arigá waminá suwili. Echalí aboni arigá ko'wirúami níili mapujiti aboni ketasi nakili animala mapu aboni ketasi bichíili Riosi. Aboni chopí nakili mapu pe waminánomí aboni auchecho ku o'wínaga, waminabi galabéala niráa, sinibí pirélama Riosi yuwa. ³⁶ Auché jaré mapu galá bichíyami níili Riosi ne wabé sitíila anélati. Ayénachó jaré ne wabé wipisólati. Ayénachó aboni jiero wiya jiti bulirúami níisa, echo'ná pachá kumurachi mo'wálati. ³⁷ Auché jaré rité jiti basibuka ko'wirúami níili. Auché jaré nasipa ripunárami níili echí seruchi jiti. Auché jaré wabé risúu olárami níili. Auché jaré i'weli ripiyá jiti ko'wirúami níili. Alí auché jaré a'najátarami níлага, wikanáami 'yénali, bo'wá wichila chopí napáchaga, chibá wichila napáchaga ayénachó. Alí ne si'néami echí jaré aboni ne wabé risúwati niwálati. Si'néami aboni ne wabé sitíila olárami níili, ne wabé chibi olárami ayénachó. ³⁸ Alí si'néami je'ná galá bichíyami pagótami waminabi ne wabé simírami galabé oláami níili, ketasi mapurigá echí auché jaré jena'í wichimóbachi piréami mapu echirigá ne wabé risúu olali echí jaré bichíyami. Chopí aboni echirigá ne wabé risúu ologá a'najátarami níлага, kanápuromí 'yénali áya mapo'ná pirélama echo'ná jaréana mikabé waná kawichí mapo'ná tarapebi yiri nirúali, echo'ná jaréana ripá rabó omá, echo'ná jaréana risochí kéremá, echo'ná jaréana ri'lé wi'yérali jótachi omá. ³⁹ Ne si'néami je'ná jaré ne

galá bichíili Riosi, echijiti jipi rawé yénasí tamujeta abijí galá ra'ícha aboni jiti rugá. Chopi mapuyénasí aboni abijí piréali jena'í wichimóbachi echalí aboni ketasi cho 'yárami níili mapurigá Riosi bachánala ne bichíwaga aneli mapurigá aboni 'yárami níima riwéali.⁴⁰ Mapujiti Riosi arigá waminabi ne wabé galabé olama riwéali si'néami echi jaré Binói níwala yuwa. Ayénachó Riosi galá 'nátali tamujé jipi piréami bichíyami jiti. Alí ne si'néami echi jaré mapu ikita bichíyami ju Jesucristo niráa, chopi suwaba galabératami níibo mapujiti Jesucristo Binói echirigá tamujé tamí galabératama waminánomí. Alí Binói ketasi nakili mapu echi auché jaré mapu ma suwili, echirigá bachá niráa galabératami níima, chopi mapu waminánomí ne si'néamita sinepi niráa echirigá suwaba galabératami níibo.

**Sinibí waminabi nokuísabo bichiisiya Jesucristo
mapurigá ne galá machiná 'yénami niráa**

12 Ne si'néami je'ná jaré pagótami ne galá bichíili Riosi. Alí aboni ma echo'ná ripá riwigachi muchuwi mapujiti aboni echirigá bichiiga, je'ná jerigá ne wabé galabé oláami níili. Jipi aboni echo'ná muchuwi mapurigá tamujé tamí galá ritée niráa. Echijiti galá níima tamujeta waminá chakena ariwesa ne suwaba mapu ikí tamujé tamí kumé, mapujiti echi jaré namuti jiti tamujeta ketasi omero olayá mapurigá Riosi nakí. Ayénachó galá níima máputa waminá ariwebo echi chati sitíi oluwáwami mapu tamujé tamí ne buchuwí, ne noligá bulé. Echalí ayénachó galá níima máputa ne galá bichiiga, waminabi nokuísabo galabé olísiya mapuyénasíta piré jena'í wichimóbachi.² Sinibí waminabi nokuísabo bichiisiya Jesucristo, mapurigá ne galá machiná 'yénami niráa. Echi Walubela Jesucristo tamujé tamí bichírali, ayénachó Binói tamujé tamí sinibí niráa waminabi galabé niráa bichírama. Chabé ki'yá echi Walubela Jesucristo we nakili risúu nílaga mukunala echo'ná kúrsichi, jena'í wichimóbachi piréami pagótami chati sitíi olalila jiti. Alí Binói tarapé riwéali echirigá ne wabé risúu ologá mi'lirúami níliya, mapujiti Binói galá machili mapu a echirigá mi'lirúami níisagá, alí waminánomí Binói echijiti ne wabé simírami kaníliami níima. Alí pe wakinánala Jesucristo asíbali echo'ná ripá riwigachi, echo'ná echi Walubela Riosi Onorúami yuwa watonachi.

³ Ne galá 'natasí 'yemi mapurigá echi Walubela Jesucristo olali. Ayénachó 'natasí mapurigá Binói ne wabé simírami risúu olárami níili echi jaré chati sitíi oláami pagótami jiti. Alí echirigá 'nátaga ketasi nasínamí nísi Jesucristo yuwa najátiya, nibilé cho ariwesi bichiya echi Binói.⁴ Mapujiti 'yemi bichíyami arigá sinibí wabé sayera echi chati sitíi oluwáwami, chópitamo ketasi siné cho ko'wirúami níili mapujítitamo echirigá sayéraga olá.⁵ Yémitamo siné káachi ma ketasi 'nátaliré mapurigá Riosi 'yemi mi galá ruyé, mapujiti Riosi ne bichíwali 'yemi mi ruyé achigórigá mapurigá Binói ruyé echi auché jaré Binói kúchuwala, mapujiti echo'ná Riosi Ra'íchala oselíwalachi osirúami ju mapurigá Riosi 'yemi mi je'ná jerigá ruyé:

Keni kúchuwa, ketasi na'áwasi mapalí Nijeni 'yemi mi kastigo 'ya
mapujítitamo ketasi olali mapurigá Nijeni 'yemi mi nuleli.

Nibilé cho ariwesi bichiya mapalí Nijeni 'yemi mi we yona.

⁶ Mapujiti echi Walubela Riosi we galá binéraga ruyé si'néami echi jaré mapu ikí Binói galeko.

Ayénachó mapalí aboni chati sitíi olako, echalí echi Walubela Riosi arigá kastigo 'ya echi jaré mapu Binói naré mapurigá Binói kúchuwala niráa.

⁷Ne galá níima 'yemi arigá anachasa mapalí Riosi 'yemi mi kastigo 'ya. Echalí Riosi chopi 'yemi mi galá nisé, mapurigá Binói kúchuwala niráa, mapujiti ne si'néami echí jaré kúcharami arigá kastigo 'yárami ju aboni 'wénawala jiti. ⁸Alí a Riosi ketasi 'yemi mi péebi niráa echirigá kastigo 'yásagá, achigórigá mapurigá Binói kastigo 'ya ne si'néami echí auché jaré Binói kúchuwala, echalí 'yémítamo ketasi ne bichíwali Riosi kúchuwala níbitamo, chópitamo isena kúchuwala niráa níbo. ⁹Echirigá achigórigá cho níili chabénala mapalí tamujeta abijí we kúuchi níili. Echalí echí jaré tamujé 'wénawala tamujé tamí wabé ruyeli máputa ketasi chati sitíi oláami níbo. Alí tamujeta we galabé nílaga nijéwali aboni. Jipi waminabi ne wabé galabé níima máputa sinibí galá nijéwaga olabo mapurigá tamujé Onolá, ripá riwigachi atíami tamujé tamí nulé, mapurigata sinibí niráa pirélabo Binói yuwa. ¹⁰Echalí chabénala tamujé 'wénawala pe téeli bamíbali sinibí tamujé tamí we ruyeli máputa ketasi chati sitíi oláami níbo. Echalí aboni chopi tamujé tamí ruyeli mapurigá aboni galabé nírali, chopi echí Walubela Riosi tamujé tamí pée kastigo 'ya mapurigata ne bichíwali ku galabé 'natabo, ayénachó mapurigata galabé oláami niwárami níbo, achigórigá mapurigá Riosi Binói galabé oláami ju. ¹¹Ne bichíwali ju mapu tamujeta ke siné kanila echalí we 'yáati mapalita kastigo 'yárami juta, mapujiti echalita wabé okolá. Chopi waminánomí tamujeta galá wachínaga ologá pirélabo, ayénachóta galá kilíi ologá pirélabo, ata ne bichíwali binésagá galabé olayá mapujítita echirigá kastigo 'yárami ju Riosi jiti.

Ne wabé simírami majawíwami ju ke nijéwasagáta Riosi

¹²Echirigá biché galá ku jiwratasi 'yemi sikala mapu ma risíami ju, mapurigá echalítamo omérabo olayá mapurigá Riosi nakí. Ayénachó ku jiwratasi 'yemi chokóbala mapu ma ketasi jiwera, mapurigá echalítamo omérabo Riosi yuwa najata. ¹³Alí we ási bilé galabé wachíami buwé, mapurigátamo echo'ná 'yénabo. Echalí a bilé 'yemi ralala ke akánami níisagá, échiko ketasi waminabi bi'líma, chopi galá ku sa'wimea.

¹⁴Sinibí galabé olasi si'néami echí auché jaré pagótami yuwa. Ke wesi sayérasi echí auché jaré, chopi galabé ologá pirélasi, mapujiti ke wesi riwimea echí Walubela Jesucristo, a ketasi galabé ku niwárami níisagá. ¹⁵Ne galá tibútasi 'yemi aboni niráa, mapurigátamo sinibí ne galá bichíyami níbo, mapurigá ibili 'yemi echijiti galá ku'wíratami níbo, achigórigá mapurigá Riosi nakí 'yemi mi ku'wíranala. Echirigá olasi mapurigá ke wesi 'yemi wabé chati sitíi olírabortamo auché jaré pagótami, ketasi mapurigá bilé namuti we chati sitíi oméami mapu wabé nayútaga ko'yá echí pagótami. ¹⁶Echijiti ke wesi 'yemi chuwé bilétari yuwa kochisí. Sinibí we galá nílasi echí jaré Riosi níwala galabé namuti. Echi ki'yá bitéami Esaú ketasi galá nírali echí jaré namuti mapu binói narema riwéali mapujiti bachirúami níili, chopi binói ne suwaba waminá níjili, pe taa sinepi ko'wáami jiti nakulíwaga. ¹⁷Ayénachó 'yémítamo galá machí mapurigá pe kinana echí Esaú ne wabé nakili mapu binói echirigá galabéragera anérami níima binói onolá jiti mapujiti bachirúami níili. Chopi echalí echí Esaú arigá ketasi galabéragera anérami níili. Echalí echí Esaú ne wabé nalali, chopi binói arigá ketasi galabéragera anérami níili, mapujiti chabénala niráa binói chijúnali mapurigá binói galabéragera anérami níima riwéali.

¹⁸Alí echí Walubela Riosi ke siné 'yemi mi nuleli, 'yemi jipi piréami galá bichíyami ritémtami, máputamo mulubéanabo echo'ná biléana ripabé rabó ne wabé rajáachi,

mapurigá echí jaré Israeli pagótami mulubéanali echo'ná ripá rabó Sinaíchi anilíwachi mapalí ne wabé rajali. Echalí rawé echo'ná ripá rabó ayénachó ne wabé simírami rokowárali níili, ayénachó ne wabé iwéami ikali. Alí echí ripá rabó Sinaíchi anilíwachi ne bichíwali nirú, ayénachó echí pagótami abijí galá omero simara echo'ná. ¹⁹ Alí 'yémitamo ke bilé cho námali ne wabé iwéami anéachi echí korneta anilíwami, nibilé chótamo námali echí Walubela Riosi ripana jonsa wabé iwéami ra'íchachi, mapurigá echí jaré Israeli pagótami galá námali. Echalí ki'yá rawé echí jaré Israeli pagótami mapu echirigá námali Riosi ra'icháchanachi, we yáati ne wabé risúu anigá tánali mapu Riosi ma ketasi waminabi echirigá ra'icháma. ²⁰ Echalí aboni ketasi nakili mapu echí Walubela Riosi waminabi ra'icháma aboni yuwa, mapujiti aboni ne wabé majali mapujiti Riosi ma bachá niráa jeaneli: A bilé rijói simírasagá echo'ná ripá rabó mapo'ná Nijeni atí, ayénachó a bilé namuti echo'ná simírasagá, arigá 'wérali ju mapu echiyiri basibuka mi'lirúami níima, bilé silá jiti omá. ²¹ Echalí ki'yá rawé suwaba je'ná jeyiri mapu echí pagótami riwali, ne suwaba ne wabé simírami majárami níili. Echijiti echí walula Moisesi binói jeanili: ¡Nijeni ne wabé sayirúmaga majawá!

²² Bichíwali ju mapu Riosi ke siné 'yemi mi nuleli máputamo mulubéanabo echo'ná biléana ripá rabó ne wabé rajáachi. Chopi mapujítitamo ma galá bichíili Riosi, echijiti Riosi Binói 'yemi mi mulubéantali echo'ná Riosi níwala ripá rabó Siónachi anilíwachi, echo'ná echí Sinibí Bitéami Riosi walúlawalachi mapu echo'ná ripá riwigachi nirú, echí mapu bukulíwami Jerusalémachi anilíwachi ju. Ayénachótamo mulubéansa echo'ná ne wikabé mili o'wéala Riosi kapitánawala yuwa ²³ mapu napawika muchuwi mapurigá aboni sinibí niráa chopi waminabi walubéraga anema Riosi. Ayénachótamo mulubéansa ne si'néami echí jaré wikabé Riosi kúchuwala yuwa, ne si'néami mapu ikí aboni riwalá ma ro'wárami ju echo'ná ripá riwigachi. Ayénachótamo mulubéansa echí Walubela Riosi yuwa, echí mapu walubela justisia olama ne si'néami pagótami yuwa. Ayénachótamo mulubéansa ne si'néami echí jaré galá bichíyami pagótami aliwala yuwa, mapu echo'ná ripá riwigachi muchuwi, ne si'néami mapu ikí Riosi Binói ma suwaba ne wabé simírami galabé niráa niwáli. ²⁴ Ayénachótamo mulubéansa echí Walubela Jesucristo yuwa, echí mapu Walubela Katéwami ju Riosi yuwa, echí jaré pagótami jiti, mapurigá Riosi Binói auché osáala si'nú bukulíwami niráa bichíwaga anili. Ayénachótamo mulubéansa mapo'ná echí Walubela Jesucristo lalá bachíntami níili. Alí tamujeta sinibí binératami ju waminabi ne wabé simírami galabéala namuti, mapalita binératami ju echí Walubela Jesucristo lalá jiti rugá, ketasi mapurigá mapalita binératami ju echí ki'yá chokichí bitéami Abeli lalá jiti rugá.

²⁵ Echijiti we galá 'nátaga nijéwasi echí Walubela Riosi mapu 'yemi mi galá ruyé. Chabé ki'yá echí jaré pagótami arigá kastigo 'yárami níili, si'néami mapu ikí ketasi galá nijéwali mapalí Riosi ra'íchali aboni jena'í wichimóbachi. Alí jipi rawé echí Walubela Riosi ripá riwigachi atíami, arigá tamujé tamí ruyé Binói Ra'íchala jiti. Alí echalí chabé ki'yá echí jaré mapu ketasi galá nijéwali mapalí Riosi ra'íchali aboni jena'í wichimóbachi, aboni arigá kastigo 'yárami níili. Echijiti tamujé ayénachó waminabi walubé kastigo 'yárami níibo, ata ketasi galá nijéwasagá echí Walubela Riosi mapu tamujé tamí binéraga ruyé echo'ná ripá riwigachi jonsa. ²⁶ Chabé ki'yá mapalí Riosi ra'íchali echí pagótami, echalí Binói we nokérali echo'ná kawírali, chopi jipi echí Walubela Riosi jeaní: Auchecho siné Nijeni ne wabé iwéami nokérama jena'í

wichimóbachi, ayénachó Nijeni ne wabé iwéami nokéraama echo'ná ripá riwigachi. ²⁷ Alí mapalí Riosi je'ná jerigá anili: Auchecho siné Nijeni nokéraama suwaba je'ná kawí, echalí tamujeta machí mapu je'ná jerigá aniwáami ju: Mapalí Riosi auchecho siné nokéraama suwaba namuti mapu ikí Binói niwáli, echalí suwaba echiyiri namuti waminá 'yérami níima, mapurigá chopi tibima echi auché jaré galabéala namuti echo'ná ripá riwigachi nirúami mapu ke siné nokuáami ju. ²⁸ Mapujiti echi galabé kawí mapu Riosi tamujé tamí 'yama, ne sinibí niráa nirúlama. Echijiti galá níima máputa sinibí walú natétara 'yabo Riosi, ayénachó galá níima máputa waminabi walubéraga anebo echi Binói. Alí bicheta echirigá we galá majaga nijéwaga olabo mapurigá Riosi nakí. ²⁹ Mapujiti echi Walubela tamujé Riósawala ne wabé suwábiami ju, mapurigá biléana walú rajáachi niráa.

Mapu churigata ologá pirélabo mapurigá Riosi nakí

13 Sinibí ne galá galesi a'nagupi mapurigá ritémtni niráa. ² Sinibí galá 'natasi mapu arigá galá níima máputamo echo'ná 'yemi pirélachi narepo auché jaré si'wina piréami pagótami, mapujiti jaré ritémtni echirigá ologá, arigá naleli jaré o'wéala Riosi kapitánawala, tarapé machigá mapu Riosi kapitánawala níili.

³ Ne galá natimaga 'natasi si'néami echi auché jaré ritémtni jiti mapu ikí pachá mo'wárami juko, achigórigá mapurigá 'yémitamo ayénachó pachá mo'wárami muchuwa niráa aboni yuwa. Echirigá sinibí galá natimaga 'natasi si'néami echi auché jaré jiti mapu ikí risúu olárami ju, mapujiti 'yemi aboni ayénachó siné káachitamo risúu olárami níibo.

⁴ Ibili 'yemi rijói jubéami sinibí galabé ologá pirélasi ibili 'yemi aboni jubila chopi yuwa. Ayénachó ibili 'yemi muguí 'kunéami sinibí galabé ologá pirélasi ibili 'yemi aboni kunala chopi yuwa. Ketasi chuwé bilétari yuwa kochisi, mapujiti Riosi walú kastigo 'yama si'néami echi jaré ke cho jubéami, ayénachó si'néami echi jaré ke cho 'kunéami mapu ikí chuwé bilétari yuwa kochiko. Ayénachó Riosi walú kastigo 'yama echi jaré jubéami mapu ikí isena muguí yuwa kochiko, ayénachó echi jaré muguí 'kunéami mapu ikí isena rijói yuwa kochiko.

⁵ Ketasi korusi echi wenomí, chopi galá kaníflasi echi jaré namuti jiti mapu ikítamo ma níwa, mapujiti Riosi jeanili: Sinibí Nijé nimí tibútama. Nijeni tarapé siné mi wana bi'neli ariwema. ⁶ Echirigá tamujé bichíyami galata omero ne bichíwaga jeaniyá:

Echi Walubela Riosi ju mapu tamí ku'wira. Ketásini majama mapu ikí echi pagótami omero tamí chati sitíi olayá.

⁷ Ne galá galabéala 'nalí 'natasi echi jaré jiti mapu 'yemi napawika bichíyami o'wéala wala níili, ne si'néami mapu ikí 'yemi mi nawésali Riosi Ra'íchala. Sinibí galá 'natasi mapurigá aboni ne galabé ologá piréali mapuyénasí aboni abijí muchili jenalí wichimóbachi. Sinibí ne galá bichíisi Riosi, achigórigá mapurigá aboni galá bichíili.

⁸ Echi Walubela Jesucristo ke siné nakuliwa. Binói achigó yiri ju jipi, mapuyiri chabénala níili. Alí Binói ne sinibí echirigá achigó yiri chopi níima. ⁹ Ketasi bichíiga najátasi mapuyíripi pagótami mapu 'yemi mi si'nú niráa, si'winárigá binélako. Ne sinibí chopi galá bichíisi mapurigátamo ma galá binératami níili echi Wabé Galabé Riosi Ra'íchala. Ne wabé galabé ju mapu Riosi sinibí wabé kaligá tamujé tamí jiwérata sulachí niráa, chopi ketasi galá ju máputa chopi nijéwabo karúmati nulalíwami mapurigá echi jaré Juríosi pagótami tamujé tamí nulé. Abóniko chopi

tamujé tamí nulé máputa ketasi kopoá wikabé ko'wáami mapu arigá galabé ju ko'wawa. Alí echi jaré pagótami mapu echirigá nijéwa ketasi ku'wíratami ju ne sulachí niráa.

¹⁰Echi jaré sacerdote echo'ná walubé Juríosi pagótami ri'obáwalachi nóchami sinibí, kúuchi niráa, ko'wá echi sapá mapalí aboni ko'wigá 'ya Riosi echi jaré namuti. Chopi tamujeta galá bichíi mapu echi Walubela Jesucristo arigá mi'lirúami níili tamujé chati sitíi olalila jiti. Alí mapuyénasí echi jaré sacerdote abijí ko'yagá 'ya Riosi echi jaré namuti, echalí aboni ketasi omero bichíiya Jesucristo niráa. ¹¹Alí echi walula sacerdote echo'ná pachá ne wabé simírami galabéalachí uchémiya echi jaré namuti lalá, mapurigá echi jaré Juríosi pagótami chati sitíi olalila ku wikawárami níima, chopi echi jaré namuti sapala suwaba ikósarami ju waminá chakena mapo'ná ketasi wesi piré. ¹²Echijiti echi Walubela Jesucristo ayénachó waminá machímana torúami níili, echo'ná walúlachi jonsa, mapalí Binói waminá mi'lirúami níili, mapurigá Binói galá omérama ku galabé niwayá tamujé pagótami, mapujiti Binói lalá echirigá ku'luwárami níili. ¹³Echijiti jipi galá níima mapu tamujé bichíyami ayénachó risúu nílabo mapujiti tamujé Walubélawala echirigá wabé risúu olárami níili. Alí mapurigá Jesucristo echo'ná walúlachi jonsa togá machímana mi'lirúami níili, echirigá ayénachó 'wérali ju mapu tamujé jipi piréami, máputa galá bichíyami ju, ma ketasi achigórigá olabo mapurigá echi auché jaré pagótami, chopi máputa ayénachó risúu nílabo mapurigá Jesucristo risúu níili. ¹⁴Mapujiti jenaíwichimóbachi tamujeta ketasi níwa biléana walúlachi mapo'nata sinibí niráa pirélabo, chópita abo echi wabé galabé walúlachi mapo'nata sinibí niráa pirélabo waminánomí. ¹⁵Echijiti galá níima mapurigá tamujeta sinibí niráa waminabi walubéraga anebo Riosi, mapujiti Jesucristo tamujé tamí jiti mukuli. ma ketásita waminabi ko'wigá 'yabo Riosi echi jaré namuti, chópita sinibí echirigá waminabi walubéraga anebo Riosi. ¹⁶Ke siné ariwesi galabé olayá. Sinibí a'nagupi nachútaga olasi mapu ikítamo níwa, mapujiti Riosi waminabi wabé kaníila mapalita echirigá olá, ketasi mapurigata ko'yagá 'yabo Binói jaré namuti.

¹⁷Ne galá nijéwasi echi jaré 'yemi o'wéalawala mapu 'yemi mi binera Riosi Ra'íchala. Ne wabé galabé níflasi 'yemi o'wéalawala mapujiti aboni nulérami níili Riosi jiti 'yemi mi tibútanala, mapurigá 'yémítamo waminabi galá bichíyami níbo. Alí bichétamo galá machí mapu arigá 'wérali ju mapu aboni auchecho ku ruyema Riosi mapu churigá aboni 'yemi mi tibútali. Galá níima yémítamo echirigá ne wabé galabé níflasa aboni, mapurigá aboni echijiti galá kaníliga, ketasi o'mónaga nochama, mapujiti 'yémítamo ketásirapé kaníliga binebo, a aboni ne wabé o'mónami níiságá.

¹⁸Sinibí tansi Riosi tamujé tamí jiti. Tamujé sinibita mayé máputa galabé ologá piréali mapurigá Riosi nakí, mapujítita sinibí ne suwaba jiti ne wabé galabé olánali. ¹⁹Jipi nijeni 'yemi mi waminabi wabé tání mapu 'yémítamo tánabo Riosi mapurigá ke 'me ayó nijeni galá omérama ku simiyá echo'ná 'yemi yuwa. Tamujé Riósawala ne wabé Walubela ju

²⁰Echi Walubela Riosi ju mapu 'yemi mi 'yali mapurigátamo kilíi ologá pirélabo. Ayénachó Binói ju mapu ku owíntali echi tamujé Walubélawala Jesucristo, mapalí Binói ma mi'lirúami níili. Alí Jesucristo ne Walubela Niséami ju mapu tamujé tamí nisé, ne si'néami tamujé mapu ikita Binói pugula bo'wá niráa ju, mapujiti Binói wabé léntaga mi'lirúami níili tamujé chati sitíi olalila jiti. Alí Riosi Onorúami tamujé tamí bichíwaga ané mapu Binói tamujé tamí ku wikáwama mapujiti echi

Walubela Jesucristo echirigá mukuli tamujé chati sitíi olalila jiti. Echijiti nijeni nakí mapu echi Walubela Riosi ²¹'yemi mi galabératama mapurigátamo sinibí galabé olabo, achigórigá mapurigá Riosi Binói nakí. Ayénachó nijeni nakí mapu Riosi si'néami tamujé tamí ne wabé galabé oláami niwáma, achigórigá mapurigá Binói nakí máputa galabé oláami níibo, mapujítita bichiyámi ju Jesucristo niráa. Ayénachó nijeni nakí mapu echi Walubela Jesucristo sinibí niráa, ne sinibí waminabi walubéraga anérami níima. ¡Echirigá níima!

²²'Yemi keni ritémawa, njé 'yemi nimí táni mapurigátamo ne kilíi niráa galabeala 'natabo je'ná ra'íchali jiti mapurigá nijeni 'yemi mi galá ruwigá oseli, mapujiti nijeni 'yemi mi pe okuá oseli. ²³Jipi nijeni 'yemi mi ruyé mapurigá echi tamujé rijimala Timoteo riwéami ma ketasi waminabi pachá bachárami ju. Alí a binói we yáa ku nawásagá jena'ibi, echalí binói ayénachó tamí yuwa simea mapalini echo'ná 'yemi mi 'némiya simí.

²⁴Galá ripórasi si'néami echi jaré ritémtami mapu ikí 'yemi o'wéalawala ju. Ayénachó galá ripórasi ne si'néami echi jaré napawika bichiyámi ritémtami echo'ná piréami. Echi jaré ritémtami jena'í Itáliachi anilíwachi kawírali piréami ayénachó 'yemi mi galá ripóraga 'náwala.

²⁵Nijeni we nakí mapurigá Riosi si'néami 'yemi mi ne wabé galigá ku'wírama. ¡Echirigá níima!

Osirúami mapurigá

SANTIAGO

osáli

Echi Santiago osé echí jaré Isaeli pagótami galá
bichíyami, kanápuromí chijaga muchúami

1 Nijé, Santiago, echí Walubela Riosi piónawala ju, ayénachóni echí Walubela Jesucristo piónawala ju. Nijeni 'yemi mi walú ripora, 'yemi Isaeli anilíwami pagótami, máputamo galá bichíyami ju Riosi, máputamo ne buchuwímana jena'í wichimóbachi chijaga piré, makói miná okuá rojuáami niráa.

Riosi 'ya mapurigá ne galá machíami níima echí jaré mapu ikí galá bichíiko

² Yemi keni ritémawa, galá níima mapu 'yémitamo arigá wabé kanílasa mapalítamo chubiyíriti risúu nila. ³ Yémitamo ma galá machí mapu Riosi chopi ariwé máputamo risúu olárami níbo, mapurigá Binói galá machimea churigátamo bichíi, ayénachó mapurigátamo waminabi galabé kilí ologá pirélabo. ⁴ Sinibí waminabi echirigá kilí ologá pirélasi, mapurigátamo sébali ne wabé galabé oláami níbo, ne wabé galá bichíyami niráa.

⁵ A'lí a jaré 'yemi ketasi 'me galá machíami níisagá, galá tansi Riosi. A'lí Riosi 'yemi mi 'yama mapurigátamo ne galá machíami níbo, mapujiti Riosi sinibí 'ya mapurigá echí jaré bichíyami galá machíami níima, ayénachó Binói ke siné tamujé tamí riwélata. ⁶ Chopi ne galabé niráa bichíisi mapu Riosi ne bichíwali 'yemi mi 'yama mapurigátamo echirigá galá machíami níbo, mapalítamo echirigá táni. Sinibí ne galá bichiúga tansi, mapujiti echí jaré mapu ketasi mayeko mapu Riosi ayena ne bichíwali olama mapu ikí aboni táni, abóniko mapurigá echí walubé ba'wí apuláami niráa ju, echí mapu iká jiti nokérataga, kanápuromí torúami ju. ⁷ Mapujiti ketasi galá níima mapu echiyiri ke bichíyami pagótami mayema mapu aboni arigá narema jaré namutí echí Walubela níwala. ⁸ Mapuyíripi ketasi ne sinibí chopi yiri 'nátako, échiko ketasi omero sinibí chopi olayá.

⁹ Galá níima mapuyíripi rijói bichíyami mapu we risúwati juko, arigá wabé kanílasa, mapujiti Riosi nirá echiyiri mapurigá walula niráa. ¹⁰ Ayénachó galá níima mapu echí jaré ritémktami mapu ikí wabé níwami ju galá kanílasa mapalí Riosi 'ya mapurigá aboni ma ketasi wabé nóchami níima, chopi mapujiti aboni wabé níwami ju, mapujiti ne si'néami echí jaré wabé níwami pagótami arigá waminá suwimea, achigóngá mapurigá echí jaré siwáchali, kawichí nirúami, arigá waminá wakichema. ¹¹ Mapujiti mapalí echí rayénali machínaga, ma ne wabé ratabacha,

echalí echí kasalá waminá wakichésimi, ayénachó echí jaré siwáchali waminá wakichésaga rujuní. Ne suwaba echí jaré siwáchali ne wabé simati ju, chopi we yáati suwaba waminá suwiba. A'lí achigórigá suwábarami níima echí jaré wabé níwami rijoy, mapalí aboni abijí chopi ne wabé nílaga 'nátako echí jaré wikabé aboni níwala namuti jiti.

Echi jaré bichiyami arigá chati sitíi oláratami ju

¹²Ne wabé kaníliami ju si'néami echí jaré pagótami mapu ikí ketasi chati sitíi olako, mapalí aboni arigá chati sitíi oláratami ju. Abóniko ne wabé kanílama mapujiti mapalí aboni ketasi níjewaga olama mapurigá aboni chati sitíi oláratami ju, echalí aboni o'wéalatami niráa níima, mapujiti aboni 'yárami níima mapurigá sinibí niráa pirélama Riosi yuwa, mapujiti Riosi ne bichiwaga anili mapu echirigá 'yama echí jaré mapu ikí galeko Riosi. ¹³A'lí mapalí bilé rijói we chati sitíi oláratami níisagá, ketasi galá níima échiko mayesa mapu Riosi echirigá chati sitíi olárali, mapujiti ke wesi omero chati sitíi olária Riosi. A'lí Riosi ketasi chati sitíi olánali echí jaré pagótami. ¹⁴Si'winárigá echí jaré pagótami chopi níjewaga olá mapurigá aboni chati sitíi olárama, mapalí aboni arigá we nakí echirigá chati sitíi olánala. ¹⁵Bichíwali ju mapu echí jaré pagótami we chati sitíi olá mapujiti aboni chopi we nakí echirigá chati sitíi olánala, ayénachó pe waminánomí aboni waminá suwimea, mapujiti aboni ne sébali echirigá chati sitíi olali. ¹⁶'Yemi keni ritémawa mapu nijeni 'yemi mi ne wabé galé, chopi bichíisi echí mapu ne bichíwali ju. ¹⁷Echi Walubela Riosi echo'ná ripá riwigachi jonsa jula ne suwaba echí wabé galabéala máputa 'yárami ju, ayénachó Binói nijá ne suwaba mapu ikí ne sébali galabé níluami ju. Echi Walubela Riosi ju mapu niwáli echí rayénali, echí michá ayénachó, echí wikabé sopolí asíchiko. A'lí echí Walubela Riosi ke siné nakuliwa; Binói ketasi mapurigá biléana kárali ju, mapu we nakuliwa simí. ¹⁸A'lí Riosi ma tamujé tamí 'yali mapurigata sinibí niráa pirélabo mapujítita bichíli echí galabé Riosi Ra'íchala, echí mapu ne Bichíwali ju; mapujiti Riosi Binói echirigá nakili mapurigá tamujeta ne bachá niráa 'yárami níbo Riosi, ne bachá niráa suwaba echí auché jaré namuti yuwa mapu ikí Riosi niwáli, achigórigá mapurigá tamujé Israeli pagótami sinibí bachá niráa 'ya Riosi pe okuá tamujé níwala 'wírami niráa.

Echi bichíilawami mapu ne bichíwali ju

¹⁹Echijiti 'yemi keni ritémawa, wabé galérämi, galá níima mapu ne si'néami 'yemi, ibili niráa, sinibí we yáati ne galabela kipusa mapalí auché jaré 'yemi mi ra'ícha, acha galá ju; chopi ketasi galá níima máputamo chuwé, we yáati ku níjewaga na'áwasa. ²⁰Mapujiti bilé rijói wabé yóami ketasi olá echí galabéala mapurigá Riosi nakí máputa olabo. ²¹Echirigá biché suwaba waminá ariwesi mapu ikí ketasi galabé ju, ayénachó waminá ariwesi suwaba echí chati sitíi oluwáwami mapu arigá wabé nirú jena'í wichimóbachi. Ketasi nóchami níisi, chopi ne galá bichíisi echí nawisálawami mapurigátamo ma nawésarami níili Riosi Ra'íchala, echí mapu ichirúami niráa níili echo'ná 'yemi sulálachi; mapujiti Riosi Ra'íchala ne wabé omériami ju, mapurigátamo ku wikawárami níbo 'yemi chati sitíi olalila, átamo galá bichíisagá.

²²Sinibí ne galá níjewaga olasi achigórigá mapurigátamo nawésarami ju Riosi Ra'íchala. Ketasi wepi kipúami níisi, mapalítamo nawésarami ju, chopi ayénachó

echirigá galá nijéwaga olasi, mapujítitamo aboni niráa wabé 'yeka, átamo ketasi galá nijéwaga olásagá mapurigátamo nawésarami ju. ²³A'lí bilé rijói mapu galá nami echi nawisálawami, chopi ketasi galá nijéwaga olasa mapurigá nawésarami ju, échiko mapuyiri bilé rijói ju mapu we 'ne binói cho'olá echo'ná biléana sipéachi 'neni. ²⁴Échiko we galá 'ne mapu chu yiri ju binoy, chopi ma ku simisáa, we yáati ke newalá mapu chu yiri níili binoy. ²⁵Chopi echi rijói mapu sinibí galá 'nátako mapurigá binói nawésarami níili echi Galabé Riosi Ra'íchala, echi mapu sinibí ne galá bichíisimí, echi mapu sinibí galá nijéwaga olako achigórigá mapurigá nulárami ju echo'ná Riosi Ra'íchala oselíwalachi, échiko ku wikawárami níima, ayénachó ne wabé kaníliami níima mapujiti echirigá nijéwaga olá.

²⁶A bilé mayésagá mapu binói ne galá bichíyami ju, chopi arigá chuwé, sitíi chati ra'íchami níisagá, échiko a binói niráa ne wabé 'yeka. A'lí échiko ketasi chirigá ku'wíratami níima, arigá mayésagá mapu binói ne galá bichíyami ju. ²⁷Chopi echi auché jaré pagótami mapu ne galá bichíyami juko, echi jaré mapu ketasi chirigá chati sitíi olá bacháami Riosi Onorúami yuwa, abóniko sinibí galá ku'wira echi jaré ba'luguéchuli, echi jaré kunámani ayénachó, si'néami mapu ikí risúu olárami juko. A'lí biché echirigá bichíyami pagótami ketasi chati sitíi olá, ketasi mapurigá echi auché jaré jena'í wichimóbachi pirélami arigá chati sitíi olá.

Ketasi galá ju ke 'me nirawa auché jaré pagótami

2 ¹Yemi keni ritémawa, máputamo ne galá bichíyami ju echi tamujé Walubélawala Jesucristo niráa, echi mapu ne wabé simírami Walubela ju, 'yémitamo echirigá galá bichíyami ju, echijiti arigá 'wérali ju mapu 'yémitamo chópirigá nilábo ne si'néami echi auché jaré pagótami. ²A'lí siné káachi jerigá ikiáságá kérémá: Echo'ná mapo'nátamo napawí a 'yásagá bilé rijói ne wabé níwami, echi mapu galabé napáchami ju, echi mapu ayénachó we simati oro niwárami uchérami ju echo'ná binói makúsawalachi, a'lí ayénachó a echalí we yáati echo'ná nawásagá bilé rijói wabé risúwati, ne wabé sitíi napáchami, ³a'lí átamo ne galá narésagá echi wabé níwami rijoy, ayénachó átamo jeanésagá: ¡Jena'í wabé galabéalachi asagá! Chopi átamo jeanésagá echi rijói wabé risúwati: ¡Mujé wamí sitochi wiligá! ¡Jámi ri'lé wichí asagá omá! ⁴Echalítamo echirigá ologá, ketasi chópitamo we chijúnika olá, chópitamo wabé sitíi 'nátaga, rojuánaga niráa olá, mapujítitamo jaré we galabé mayé, chópitamo auché jaré ke 'me nirá.

⁵Yemi keni ritémawa mápuni ne wabé galé, galá namsi je'ná: Riosi ma chapili jaré wabé tisúwati pagótami jena'í wichimóbachi piréami mapurigá aboni galá bichíima; mapurigá aboni echirigá bichíiga, kóntami niráa 'yárami níima mapurigá aboni muchima echo'ná ripá riwigachi, mapurigá Riosi Binói bichíwaga anili mapu 'yárami níima ne si'néami echi jaré mapu ikí galeko Riosi. ⁶A'lí 'yémitamo si'winárigá ologá, ne wabé riwélata echi jaré wabé tisúwati pagótami, chopi echi auché jaré wabé níwami pagótami ju mapu 'yemi mi risúu olá, ayénachó aboni ju mapu 'yemi mi bayera echo'ná bacháami echi jaré igúsuwami yuwa, mapurigátamo wi'nijírami níibo. ⁷Ayénachó aboni ju mapu wabé sitila ané echi Walubela Jesucristo riwalá, chopi 'yémitamo Kristiano niráa anérami ju mapujítitamo galá bichíili Binói niráa.

⁸Chopi a ibili 'yémitamo ne bichíwali galá nijéwasagá mapurigá echi Walubela Riosi 'yemi mi nulé, mapurigá echo'ná Riosi Ra'íchala oselíwalachi je'ná jerigá osirúami ju: Ne wabé galé echo'ná mulubé mujé yuwa piréami, achigórigá mapurigami binói

niráa ne wabé galé. Echalí 'yémítamo echirigá ologá, ne bichíwali ne wabé galabé oláami níibotamo. ⁹Chopi 'yémítamo arigá we chati sitíi olá, átamo ketasi a'nawí chopi a yiri nirásagá ne si'néami echi auché jaré pagótami. Ayénachótamo ma wi'nijírami ju mapujítamo ketasi galá nijéwaga olá mapurigá nulárami ju echo'ná Riosi nulalila oselíwalachi. ¹⁰Mapujiti a bilé rijói ne noguí suwaba galá nijéwasagá Riosi nulalila, chopi arigá ketasi galá nijéwasagá pe bilé nulalíwami, échiko ma ketasi galá nijéwali mapurigá Riosi nulali. A'lí échiko wi'nijírami níima mapurigá ke nijéwami niráa, ne suwaba Riosi nulalila. ¹¹Mapujiti Riosi Binói jeanili: Ketasi chuwé bilétari yuwa kochí. A'lí Binói ayénachó jeanili: Ketasi mi'yá auché bilé. A'lí a bilé rijói ke siné chuwé bilétari yuwa kochisáagá, chopi a mi'llisáagá auché bilé, échiko arigá ketasi nijéwali mapurigá Riosi nulali. ¹²Chopi galabéala 'nalina ra'ichási. Ayénachó ne wabé galabé olasi, mapujiti 'yémítamo ma galá machí mapu Riosi 'yemi mi justicia olama, achigórigá mapurigá osirúami ju echo'ná Riosi nulalila oselíwalachi, ayénachó mapurigá osirúami ju jena'í oselichi echi Walubela Jesucristo Ra'íchala. ¹³Mapujiti echi jaré mapu ikí ketásirapé natimáliko echi auché jaré pagótami, abóniko tarapé natimaga wi'nijírami níima. A'lí echi jaré mapu ikí galá natimáliko echi auché jaré, abóniko tarapé wi'nijírami níima echalí ne jubá wi'nijíwachi rawé.

Galá níima mapu echi jaré mapu ikí galá bichiíko ayénachó galabé ologá pirélama

¹⁴Keni ritémawa, a bilé rijói jeanisáagá mapu galá bichiýami ju Riosi, chopi a ketasi galabé oláami níisagá, échiko tarapé cho galá bichiýami ju, a'lí tarapé ku wikawárami níima, arigá jeanisáagá mapu galá bichiýami ju. ¹⁵A'lí a bilé rijimala newalésagá napachala, ayénachó a newalésagá ko'wáami mapurigá galá ko'ogá, waminabi bitélama, ¹⁶chopi a bilé 'yemi jeanésagá echi risúwati rijimala: ¡Kaníliga ku simigá, galá napachasa, ne galá ko'wá! Chopi átamo ketasi 'yásagá mapu ikí binói newalé, echalítamo tarapé ku'wira echi risúwati rijimala. ¹⁷Echirigá ju mapalí bilé rijói wepi aní mapu binói galá bichií Riosi, chopi ketasi galabé olá; mapujiti a echi rijói ketasi galabé oláami níisagá, echalí échiko arigá ketasi galá bichiýami ju.

¹⁸Chopi siné káachi bilé rijói tamí Jeanesa: Mujemi galá bichií Riosi, chopi níjeni sinibí wabé galabé ologá bité. Echalí níjeni jeanema echi rijoy: Tamí 'neri mapurigami ayénachó galá bichií Riosi mapalimi echirigá galabé ologá bité, a'lí níjeni mi 'nérama mapurigani ayénachó ne galá bichií Riosi, ayénachó mapurigani galabé ologá bité mapujítini echirigá galá bichií Riosi. ¹⁹Mujemi galá bichií mapu bilepi nirú Riosi. Ne galá ju mápumi echirigá bichií, chopi echi jaré riablo kapitánawala ayénachó bichií mapu bilepi nirú Riosi, ayénachó aboni echijiti ne wabé sayirúmaga majawá, chopi aboni tarapé ku'wíratami ju mapujiti aboni ketasi galá olá mapurigá Riosi nakí. ²⁰Mujemi mapurigá ke newalite niráa ju. ¿Kéchami nakí machinala mapu a bilé rijói jeanisáagá mapu binói galá bichiýami ju Riosi, chopi a échiko ketasi galabé oláami níisagá, échiko arigá ketasi galá bichiýami ju? Echirigá oláami rijói chopi wepi echirigá ra'íchami ju mapu galá bichií Riosi. ²¹Echi ki'yá bitéami Abrami mapurigá tamujé Juríosi pagótami onolá niráa níili. A'lí Riosi aneli echi Abrami galabé wachínaga oláami niráa, mapujiti binói galá olali mapalí binói we yáati galá nijéwanali mapalí Riosi chopi machinálaga niráa aneli mapu echi Abrami mi'agá 'yama echi Isaka, echi mapu binói Abrami ranala níili. ²²Mami galá machí mapurigá echi Abrami galá machírali echi auché jaré

pagótami mapu binói bichíyami níili Riosi, mapalí binói echirigá olali. Ayénachómi galá machí mapurigá echi Abrami ne sébali galá bichíyami níili mapujiti binói echirigá olali.²³ Echirigá suwaba galá ikili mapurigá bachá niráa osirúami níili echo'ná Riosi Ra'íchala oselíwalachi mapo'ná je'ná jerigá anirúami ju: Echi Abrami galá bichíuli Riosi, echijiti Riosi aneli echi Abrami galabé wachínaga oláami niráa. A'lí echi Abrami anérami níili Riosi amígowala niráa.

²⁴Echirigá mátamo galá machí mapurigá Riosi ayénachó galá wachínaga oláami niráa ané bilé rijói mapalí échiko ma we galabé olá. A'lí Riosi ketasi chopi echirigá wachínaga oláami niráa ané echi rijói mapalí binói chopi aní mapu ne galá bichíi, mapalí binói ketasi ayénachó galabé olá.²⁵ A'lí achigórigá ikili echi Ra'aba riwéami mukí, echi mapu chabénala niráa wabé chati sitíi oláami mukí níili. Pe wakinana Riosi wachínaga oláami niráa aneli mapujiti echi Ra'aba galá olali mapalí nareli echi okuá rijói mapu bachá niráa julárami níili 'nénala echo'ná walúlachi. Echalí echi Ra'aba ku júuli aboni auché si'wina buwichí.²⁶ A'lí achigórigá mapurigá bilé rijói ma mukúami ju mapalí ma ketasi ariwéami ju, echirigá ayénachó bilé rijói bichífilawala ma mukúami niráa achó ju mapalí echi rijói wepi echirigá aníami ju mapu binói galá bichíyami ju Riosi, chopi ketasi galabé ologá bité.

Echi pagótami cha'mélawala

3 'Yemi keni ritémawa, ketasi galá níima mapu jaré 'yemi nawésaga binérasa echi auché jaré pagótami. 'Yemi máputamo nawésaga binera auché jaré sinibí ne galá 'natasi mapurigátamo binérabo, mapujiti mata galá machí mapu Riosi tamujé tamí wabé wi'nijima chuweta binérasagá auché jaré.² Si'néami tamujé wisabeta ketasi we galabé olá, chopi a bilé rijói ke siné chati sitíi ra'ichásagá, échiko we galá oláami ju; mapujiti a bilé rijói sinibí omérasagá galabé ra'ícha, échiko ayénachó omérama ne suwaba galabéuala olayá. Échiko ketasi chuwé olá, mapujiti ke siné chati sitíi olá mapalí binói arigá chati sitíi oláratami ju, chopi sinibí njewa echi galabéuala, achigórigá mapurigá bilé kawé ketasi chuwé biléanomí simí mapalí bilé rijói cho'ojíwasa galá nijiyara.³ Mapalita cho'ojíwasa nijiyara bilé kawé, echalita galá omero galá ro'wina echi kawé.⁴ Ayénachó 'natasi mapurigá echi jaré o'weli barko anilíwami ba'wechi moba lyénami wabé rakibúrami ju mapalí wabé iwéami iká, chopi echi rijói barko simíratami arigá pée ro'wina bilé taa namuti timón anilíwami jiti. A'lí echi walú barko ku ro'wina mapo'ná echi simíriami nakí.⁵ Echirigá achigórigá omériami ju echi pagótami cha'mélawala, mapujiti bilé rijói cha'mélawala we táa ju, chopi arigá wabé omériami ju wiká karúmati ra'ícha, mapurigá auché jaré pagótami echirigá nijéwaga wiká karúmati olama. ¡Ayénachó galá newalasi mapurigá bilé táa na'lí achigórigá omero galá suwábiya biléana wi'lé okórale!⁶ A'lí echi pagótami cha'mélawala arigá mapuyiri na'lí rajáami niráa ju, mapujiti aboni ne wabé na'áwaga ra'ícha. Aboni cha'mélawala we omériami ju sitila ra'ícha, ayénachó omériami ju chati sitíi olíliya aboni niráa. A'lí echi riablo ju mapu we rajé echi pagótami cha'mélawala, echijiti aboni echirigá ne wabé simírami na'áwaga ra'ícha.⁷ A'lí echi pagótami galá omero binériya ne suwaba namuti jobátami, echi jaré o'weli chuluguí ayénachó, echi jaré sinowi ayénachó, echi jaré o'weli namuti echo'ná ri'lé ba'wechi nirúami ayénachó. A'lí echi pagótami ne bichíwali ma binérali jaré ibili echiyiri namuti;⁸ chopi ke wesi pagótami galá omero aboni cha'mélawala binériya, mapurigá aboni sinibí galabé niráa ra'icháma.

Echi pagótami cha'mélawala wabé sitíiraga ra'íchami ju. A'lí ke wesi pagótami omero galabé ra'ícha sinibí niráa, mapujiti aboni cha'mélawala we buchíami niráa ju echí wabé chati chawé mukuwáami. ⁹ A'lí tamujeta walubéragera ané echí Onorúami, tamujé Riósawala, mapalita ra'ícha tamujé cha'mélawala jiti, ayénachó tamujeta wabé sitila ané echí auché jaré pagótami mapu Riosi ne noguí achigó yiri niwáli mapuyiri Binói Riosi niráa. ¹⁰ Echirigá tamujeta we galabéragera ra'ícha, a'lí bilénapi cha'mélawalachi jiti tamujeta ayénachó wabé sitíiraga ra'ícha. ¡Keni ritémawa, ketasi galá ju echirigá ra'ichálawa! ¹¹ Mapujiti echo'ná biléana bajichi ke siné ne napawika machíina echí galabé ba'wí, echí wabé chipúami ba'wí yuwa. ¹² Keni ritémawa, bilé chuná ke siné raké auché bilé si'nú rakala, ayénachó bilé uva anilíwami baniwala ke siné raké echí chuná rakala, nibilé cho omero sinepi niráa a'nawí machíina echí galabé ba'wí, echí wabé simírami koná akáami ba'wí yuwa, echo'ná biléana bajichi.

Echi ne bichíwali machiwáwami

¹³ A jaré 'yemi galá machíami níisagá, ne galá 'nátami ayénachó, galá níima máputamo ne wabé galabé ologá machírabo echí auché jaré máputamo ne bichíwali galá machíami ju. Echijiti sinibí galabé olasi, tarapé nóchami niráa, mapujítitamo ma galá machíami ju. ¹⁴ Chopi átamo we sitíi chati sulélasagá, a'nagupi nakichísagá, ayénachó átamo sinibí olásagá mapurigá 'yemi aboni chopi nakí olánala, echalí ketasi mayesi máputamo wabé galá machíami ju, mapujiti átamo echirigá olásagá 'yémitamo wabé 'yékami chopi níibo, ayénachótamo 'yékaka nawésami níibo. ¹⁵ A'lí mapalí Riosi 'yemi mi 'ya máputamo ne bichíwali galá machíami níibo, echalí 'yémitamo ketasi echirigá a'nagupi nakichibo, nibilé chótamo olabo mapurigá 'yemi aboni chopi nakí olánala, mapujiti átamo a'nagupi nakichísagá, echalítamo chopi machíami níibo mapurigá jena'í wichimóbachi piréami chati sitíi oláami pagótami we machíami ju, ayénachó mapurigá echí riablo 'yemi mi 'natárataga olá. ¹⁶ Mapujiti mapalí echí jaré pagótami a'nagupi nakichiga, wabé olá mapurigá aboni chopi nakí olánala, echalí aboni sinibí chuwe olá suwaba namuti chati sitíi oluwáwami. ¹⁷ Chopi echí auché jaré pagótami mapu ne bichíwali galá machíami ju mapujiti Riosi Binói echirigá machírali, aboni bachá niráa tarapé chati sitíi ologá piré. Aboni sinibí galabé kilí oláami ju, echijiti echí auché jaré pagótami sinibí galá omero aboni chópika katéwaga ra'ícha. A'lí aboni ne wabé natimáami ju, ayénachó aboni sinibí galabé olá, ayénachó aboni sinibí bichíwaga ra'ícha, tarapé 'yékaka niráa. ¹⁸ A'lí echí jaré mapu ikí nakiko kilí ologá pirélanala, aboni echirigá ologá waminabi 'yárami níima mapurigá aboni waminabi galabé wachínaga oláami níima.

Ketasi galá ju achigórigá olasa mapurigá jena'í wichimóbachi piréami olá

4 ¿Churékulátamo a'nagupi nakichiga wabé nakowa? Nijeni mayé mapu 'yémitamo chopi echirigá olá mapujiti 'yemi aboni wabé nakí echirigá chati sitíi olánala, mapujítitamo chati suléami ju. ² 'Yémitamo ne wabé korú jaré namuti máputamo ketasi níwa, echijítitamo nakówaka ko'yá auché jaré. A'lí 'yémitamo ne wabé simírami korúkami ju echí jaré namuti, chópitamo ketasi biyiri naré; echijítitamo a'nagupi na'lwaga nakowi. A'lí 'yémitamo ketasi naré echí jaré namuti máputamo nakí, mapujítitamo ketasi táni Riosi. ³ A'lí siné káachitamo ayena táni, chópitamo ketasi biyiri naré, mapujiti 'yémitamo ketasi galabela olánali mapalítamo echirigá táni.

¹Yémitamo chopi wabé nakí echi jaré namuti mapujítitamo wabé nakí mapurigátamo chuwé ologá suwábabo. ⁴'Yemi pagótami ke bichiyami, ¿kechátamo machí mapu átamo achigórigá olánalasagá mapurigá echi auché jaré jena'í wichimóbachi piréami chati sitíi olá, echalí 'yémitamo arigá we sayera Riosi? Mapuyíripi we nakiko olánala mapurigá echi auché jaré jena'í wichimóbachi piréami olá, échiko ma we sayérami ju Riosi. ⁵Ne bichíwali ju mapurigá osirúami ju echo'ná Riosi Ra'íchala oselíwalachi jeanigá: Echi Wabé Galabé Riosi Iwigala mapu Riosi tamujé tamí 'yali pachana tamujé sulálachi bitélanala, échiko tamujé tamí ne wabé simírami galé. ⁶Ayénachó Riosi tamujé tamí waminabi wabé ku'wira máputa galá bichiyami ju, mapujiti Binói wabé galabé oláami ju. Echijiti echo'ná Riosi Ra'íchala oselíwalachi je'ná jerigá osirúami ju: Riosi we sayera echi jaré wabé nóchami pagótami, chopi Binói we ku'wira echi jaré galá bichiyami mapu ketasi chuwé machiná niráami juko. ⁷Echijiti ne galá nijéwasi Riosi, chopi we sayérasi echi riablo, ayénachó ketasi nijéwaga olasi mapurigá echi riablo 'yemi mi nulé. Echalí échiko we yáati waminá másama echo'ná 'yémichi jonsa. ⁸Galá bichiiga mulubéanasi Riosi yuwa, allí Riosi ayénachó mulubéanama 'yemi yuwa. Wikáwali tánasi Riosi, 'yemi chati sitíi oláami pagótami; echalí 'yemi sikálachi ku bi'wfíami niráa níima. Wikáwali tánasi Riosi, 'yemi máputamo nakí galénala Riosi, chópitamo ayénachó sinepi niráa nakí achigórigá olánala mapurigá echi auché jaré jena'í wichimóbachi piréami pagótami we chati sitíi olá. Echirigá wikáwali tánasi Riosi, allí 'yemi sulálachi ne galá ku bi'wfíami niráa níima. ⁹Wabé o'mónami nílasi 'yemi. Ne wabé risúu anigá nalákasi. Ketasi waminabi achisí, chopi wabé nalákaka ukuénasi. Ketasi waminabi kanílasi, chopi wabé o'monasi. ¹⁰Mapurigá kuchípala niráa nílasi 'yemi, bacháami echi Walubela Riosi yuwa, allí Binói 'yemi mi ne wabé o'wéalatama.

Ketasi wi'nijisi echi auché jaré 'yemi ritémawala

¹¹'Yemi, keni ritémawa, ketasi sitíi anigá ra'ichási echi auché jaré 'yemi ritémawala sayéraga, mapujiti echi mapu chati anigá ra'íchako kepu rijimá sayéraga, ayénachó echi mapu we wi'nijiko kepu rijimá, échiko we sayéraga wi'nijí Riosi nulalila. A'lí ámi wi'nijísagá Riosi nulalila, echalimi ketasi nijéwami ju, chópimi wi'nijíami ju Riosi nulalila. ¹²Bilepi nirú echi Walubela Riosi mapu galabé wachínaga Wi'nijíami ju echi jaré pagótami. A'lí Binói ju mapu ayénachó nijali echi nulalíwami. A'lí echi Walubela Riosi galá omero ku wikáwiya echi pagótami, ayénachó omero waminá suwábiya aboni. Chopi mujé, ¿chigami mayé mápumi we wi'nijí echi auché bilé mujé rijimala?

Ketasi mayesi máputamo sinibí niráa pirélabo jena'í wichimóbachi

¹³Galá namsi je'ná, 'yemi máputamo jeaní: Jípita simabo echo'ná biléana walúlachi, ba'alí simábire omá. A'lí echo'nata muchibo bilé bamíbali. Echo'nata wikabé namuti ralisá, ku ralinéaga, we mepo wenomí. ¹⁴Chopi 'yémitamo ketasi machí mapu churigá ikimé ba'alínala rawé, mapujiti ¿chu kilíbita pirélabo jena'í wichimóbachi? Tamujeta arigá pe téeli rawé niráa pirélabo, a'lí bicheta we yáati suwiboa. Tamujeta pe téelipi pirélabo, achigórigá mapurigá echi bimolí, pe téelipi bimó, a'lí we yáati ku kawí. ¹⁵Chopi galá níima 'yémitamo je'ná jerigá anisá: A echi Walubela Riosi echirigá nakisáagá, tamujeta ayena abiíjí pirélabo ba'alí rawé. A'lí a Binói echirigá nakisáagá tamujeta je'ná jerigá olabo, auché jaré karúmati

olábiré omá. ¹⁶Si'winárigá 'yémítamo sinibí chopi wabé nóchaga niráa ra'ichánali. A'lí we chati sitíi oluwáwami ju máputamo echirigá wabé nóchaga niráa ra'ícha. ¹⁷A'lí echi mapu galá machiko galabé olayá, chopi a ketasi echirigá galabé olásagá, échiko arigá we chati sitíi olá.

Echi jaré wabé níwami jerigá ruyérami ju

5 Galá namsi je'ná, 'yemi ne wabé níwami pagótami, máputamo arigá chati sitíi oláami ju: Wabé o'mónaga nalákasi, mapujítitamo wabé risúu olárami níibo. ²Echi jaré wikabé 'yemi níwala namuti ma ketasi 'yemi mi ku'wírama. A'lí echi jaré galabé 'yemi níwala napacha ma mapurigá suwábarami niráa ju, mapurigá echi koséwali we suwaba. ³'Yemi níwala wenomí oro niwárami ma mapurigá we lasíbami niráa ju, 'yemi níwala wenomí plata niwárami ayénachó. 'Yémítamo ma wikabé napabuli wenomí mapurigá 'yemi aboni ne wabé kaníliga ologá pirélabotamo jipi rawé, mapalí ma ke 'me ayó suwibama je'ná kawí. Echijiti 'yémítamo ne wabé wi'nijírami níibo, ayénachó 'yémítamo suwaba suwábarami níibo, mapurigá echi jaré namuti mapu suwaba ikósaga suwábarami ju echi na'lí jiti. ⁴'Yémítamo ma wabé lyékali echi jaré nóchami mapu 'wiga nóchali echo'ná 'yemi kawíwachí, mapujiti 'yémítamo ke sébali natétali mapurigá aboni meli. Echijiti 'yémítamo ma wabé wi'nijírami ju. Echi Walubela Riosi mapu arigá nulé ne wabé wikabé Binói níwala o'wéala kapitani, Échiko we galá machí suwaba namuti. Échiko 'yemi mi wi'nijí mapujítitamo ma 'yékali echi jaré nóchami. ⁵'Yémítamo ma wabé kaníliga piréali jena'lí wichimóbachi, ayénachó 'yémítamo chopi olali mapurigá 'yemi aboni nakili olánala. Mátamo ne wabé saparáli, mapujítitamo ne wabé simírami níwami ju; achigórigá mapurigá echi jaré wáasi we sapará mapalí echi pagótami wabé simírami kowa; chopi ma seba mapalí 'yémítamo waminá ko'wirúami níibo. ⁶'Yémítamo ma wi'nijiga ko'yali echi auché jaré galabé wachínaga oláami. A'lí aboni ketasi nimili.

Echi jaré bichíyami kilí ologá buwé

⁷'Yemi keni ritémawa, echijiti kilí buwesi mapuyénasí echi Walubela Jesucristo ku nawama. Echi jaré mapu ikí ichálíko echi sunú wi'llibé niráa kilí buwé mapuyénasí bachá niráa ne galá ukú, ayénachó aboni waminabi buwé mapuyénasí ma seba romó 'wíwachi. Echalí aboni we 'wima echi galabé sunú. ⁸Ayénachó echirigá kilí ologá buwesi 'yemi bichíyami. Sinibí waminabi galá bichíisi, mapujiti echi Walubela Jesucristo ke 'me ayó ku nolínama. ⁹Keni ritémawa, ketasi wi'nijisi auché jaré 'yemi ritémawala galá bichíyami, mapurigá Riosi ketasi 'yemi mi wi'nijima, mapujiti Riosi Walubela Wi'nijíami ju. A'lí ke 'me ayó Riosi justicia olama ne si'néami echi jaré pagótami yuwa. ¹⁰Keni ritémawa ne galá 'natasi mapu churigá olali echi jaré chabé ki'yá piréami Riosi jiti nawésami. Aboni ketasi na'áwali mapalí aboni risúu olárami níili, chopi aboni kilí ologá buweli mapurigá Riosi ku'wírama aboni. Achigórigá olasi 'yemi jipi rawé. ¹¹Tamujeta wabé kaníliami niráa ané echi jaré ki'yá piréami, si'néami mapu ikí galá anáchali mapalí aboni echirigá risúu olárami níili. 'Yémítamo ma galá námali mapurigá oselichi osirúami ju mapurigá echi Joba riwéami rijói kilí ologá anáchali mapalí binói wabé risúu olárami níili; mapujiti echi Joba kilí ologá buweli mapurigá Riosi chopi ku'wírama. A'lí pe wakinana Riosi ne bichíwali wabé ku'wírali echi Joba, mapujiti echi Walubela Riosi ne wabé

natimáami ju, ne wabé galéami ayénachó.¹² Kení ritémawa mapalítamo ra'ícha, ketasi bilé siné chuwé niráa anisí Riosi riwalá anigá, nibilé siné chuwé niráa anisí Jesucristo riwalá anigá, nibilé siné chuwé niráa anisí jaré pagótami riwalá, nibilé siné chuwé niráa ra'ichási karúmati jiti rugá. Chopi mapalítamo jeaní: Ayena, ne bichíwalita bilé namuti olabo; echirigá chopi anisí. Ayénachó mapalítamo jeaní omá: Ketasi, tamujeta ketasi olabo bilé namuti; echalí echirigá chopi anisí, mapurigá Riosi ketasi 'yemi mi wi'nijima, chuwé ra'íchami niráa.

¹³A bilé 'yemi risúu nílasagá, galá níima échiko Riosi yuwa ra'ichása. A bilé 'yemi wabé kanílasagá, galá níima échiko nawajisa Riosi nawajíwala, mapurigá Riosi echijiti waminabi walubéraga anérami níima.¹⁴ A'lí a bilé 'yemi nayúami níisagá, galá níima binói bayesa echi jaré o'wéala ochérami napawika bichíyami, mapurigá aboni tánama mapurigá Jesucristo ku sa'wama echi nayúami, bachá niráa uchesa echi aceite, mapurigá echi Walubela Jesucristo riwalá waminabi walubéraga anérami níima.¹⁵ A'lí átamo galá bichíiga tánsagá, echalí echi nayúami galá ku sa'wárami níima, mapujiti echi Walubela Jesucristo ku sa'wasa, ku wilísama echi nayúami. A'lí a bilé chati sitíi oláami níisagá, Jesucristo ku wikawama mapurigá chati sitíi olali.¹⁶ Echijiti a'nagupi ku ruyesi mapurigátamo chati sitíi olali, ayénachó tansi Riosi a'nagupi rugá, mapurigátamo ibili ku sa'wárami níibo, mapujiti mapalí bilé galabé oláami rijói wabé táni Riosi, echalí Riosi ku nijéwage wabé omériga olama.¹⁷ Echi Elíasi mapu Riosi jiti nawésami níili, chopi rijói níili achigó yiri mapuyiri tamué. A'lí mapalí echi Elíasi tánali Riosi mapurigá ketasi ukumea, echalí arígá ketasi ukuli bakiyá bamíbali miná nasipa yénasí.¹⁸ A'lí mapalí echi Elíasi auchecho ku tánali Riosi mapu galá ukumea, echalí auchecho ku ukuli, a'lí auchecho galá rakeli suwaba namuti ichirúami.

¹⁹Kení ritémawa, a bilé 'yemi waminá ariwésagá bichíiya echi ne Bichíwali, a'lí a auché bilé 'yemi ku bichíiratasagá echi, mapurigá auchecho galá ku bichíima Riosi Ra'íchala,²⁰ echalí galá machisí 'yemi, mapuyíripi echirigá ku galá bichíiratasagá echi auché bilé mapurigá binói ma ketasi waminabi chati sitíi ologá bitélama, échiko wabé ku'wírama echi auché bilé mapurigá binói ketasi mukumea, ayénachó mapurigá echi wikabé binói chati sitíi olalila ku wikawárami níima.

Bachá osirúami mapurigá

SAN PEGRO

osali

Echi Pegro osé echi jaré bichíyami mapu wikaná chijanárami níili

1 Nijé Pegro, Jesucristo jiti julárami juni nawisánala. Nijeni 'yemi mi je'ná jerigá osé, 'yemi máputamo chijaga piré echo'ná wikanáami si'wina kawírali, echo'ná Póntochi anilíwachi, echo'ná Galásiachi anilíwachi ayénachó, echo'ná Kaparósiachi anilíwachi ayénachó, echo'ná Ásiachi anilíwachi ayénachó, echo'ná Bitíniachi anilíwachi asíchiko.

²Riosi Onorúami ma 'yemi mi chapili mapurigá Binói níwala niráa, mapurigá Binói nakili olánala chabé ki'yá jonsa. Alí echi Wabé Galabé Riosi Iwigala ma 'yemi mi galabérerali pachana 'yemi sulálachi mapujiti Jesucristo wabé léniga mukuli 'yemi chati sitíi olalila jiti. Alí bichétamo echirigá wabé galabératami níili mapurigátamo galá nijéwami níibo Riosi, ayénachó mapurigátamo ku bi'wárami níibo mapujiti Jesucristo echirigá léniga mukuli 'yemi jiti, mapurigá 'yemi chati sitíi olalila ku wikawárami níima. Nijeni nakí mapurigátamo suwaba ne galabé niráa ku'wíratami níibo, ayénachó mapurigátamo ne galá kilí ologá pirélabo.

Tamujeta bichíi máputa ne wabé galá ku'wíratami níibo

³Galá níima máputa waminabi wabé walubéraga anebo Riosi, echi mapu echi Walubela Jesucristo Onolá ju, mapujiti Riosi tamujé tamí ne wabé natimaga 'yalí mapurigata bukulíwami niráa pirélabo, mapujiti Jesucristo ku o'wíntarami níili mapalí Binói ma mukúami níili. Echijítita ne galá bichíiga buwé, ⁴mapurigata arigá narepo suwaba echi galabéala mapu Riosi tamujé tamí 'yama waminánomí, echi mapu Binói galá nuté echo'ná ripá riwigachi, mapo'ná tarapé nirú echi chati sitíi oluwáwami. Alí echi galabéala mapu Riosi 'ya, ne sinibí niráa nirúlama. Alí ke siné suwibama, ketasi mapurigá echi jaré namuti jena'í wichimóbachi nirúami. ⁵Alí mapujiti 'yémítamo ne galá bichíi Riosi niráa, echijiti echi Walubela Riosi 'yemi mi ne wabé jiwériga tibútama mapuyénasítamo ne bichíwali narepo echi galabéala mapu Riosi 'yemi mi 'yama, ayénachó mapuyénasítamo ne sébali galá ku'wíratami níibo, mapalí Jesucristo ku nolínama echalí ne jubá rawé.

⁶Echijiti 'yémítamo ne wabé simírami kanila, chopi siné káachi arigá 'wérali níima mapu 'yémítamo pe téeli niráa risúu olárami níibo. ⁷Mapujiti echi wabé natéami oro anilíwami wenomí, arigá galá bi'walíwami ju, ne wabé simírami ratabáchaga

echo'ná na'lrali mapuyénasí basunú, alí Riosi echirigá achigórigá galá machimea mapu churigá 'yémitamo galá bichíi Binói niráa, mapalítamo wabé risúu olárami ju mapurigátamo waminabi galá bichíyami níbo. Alí átamo abijí waminabi galá bichíisagá mapalítamo echirigá risúu olárami ju, echalí 'yemi bichíilawala waminabi ne wabé natéami níima, ketasi mapurigá echi oro mapu ketasi sinibí niráa nirúlama. Alí Riosi chopi ariwé mapurigátamo echirigá risúu olárami níbo mapurigátamo waminabi galá bichíyami níbo, mapuyénasí Riosi omérama aniyá máputamo galá bichíyami ju, ayénachó mapurigá Binói omérama 'yemi mi waminabi ne wabé simírami o'wéalatiya, echalí mapalí Jesucristo ku nawama jena'í wichimóbachi.

⁸ 'Yémitamo ne wabé galé echi Walubela Jesucristo, chópitamo ke siné riwali echi Binói. Alí mapujítitamo ne galá bichíi Jesucristo jipi rawé, mapalítamo ketasi cho ritiwá Binói, echijítitamo ne wabé simírami kaníila echi Walubela Riosi yuwa, mapurigátamo kanílabo echo'ná ripá riwigachi. Alí bichétamo ketasi chirigá omero ra'íchaga niráa ku ruyá mapu chuyena 'yémitamo echirigá ne wabé simírami kaníili. ⁹ Jípitamo ma ku wikawárami ju 'yemi aliwálachi niráa mapujítitamo echirigá galá bichíili Jesucristo niráa.

¹⁰ Chabé kilyá echi jaré o'wéala Riosi jiti nawésami ne wabé machináali mapu churigá ku wikawárami níbo riwéali 'yemi jipi piréami galá bichíyami pagótami. Alí mapalí Riosi galá machírali aboni, echalí aboni echo'ná oselichi osali mapurigá Riosi ne wabé galigá 'yama riwéali, mapurigá 'yémitamo ku wikawárami níbo ne wabé wakinánala.

¹¹ Echalí Jesucristo Iwigala echo'ná pachana echi jaré nawésamichi asali. Alí Jesucristo Iwigala bachá niráa echirigá machírali echi jaré nawésami mapu churigá Binói risúu olárami níima riwéali, ayénachó mapu churigá Binói wabé walubératami níima riwéali pe wakinana, chopi aboni ketasi cho machili Chigá níili mapu echirigá risúu olárami níima riwéali. Nibilé cho machili chu kilíbuko echirigá ikimea riwéali, chopi aboni ne wabé nakili machinala ne suwaba. ¹² Chopi Riosi machírali mapurigá echi jaré namuti mapu aboni osali ketasi osirúami níili mapurigá aboni chopi galá machimea chu aniwáami níili, mapujiti echi jaré namuti chopi osirúami níili mapurigá tamujé jipi piréami pagótami ne galata machiboa. Alí jipi 'yémitamo ne galá nawésarami níili suwaba je'ná Galabé Ra'íchali. Alí echi jaré mapu 'yemi mi nawésali, ne galá nulérami níili echirigá nawésanala, mapujiti echi Galabé Riosi Iwigala echirigá nuleli. Alí echi jaré o'wéala Riosi capitánawala ne wabé nakí machinala je'ná jeyiri namuti.

Riosi tamujé tamí bayé mapurigata ne galabé ologá pirélabo

¹³ Echijiti bachá niráa ne galá 'natasi mapu churigátamo ologá pirélabo, alí bichétamo ne bichíwali a'láratami níbo. Sinibí galá bichífiga pirélasi mapujiti Riosi ne wabé galigá 'yemi mi 'yama echi wabé Galabéala mapalí Jesucristo ku nawama jena'í wichimóbachi. ¹⁴ Mapujítitamo ma galá njéwiami ju Riosi, mapurigá Binói kúchuwala niráa, ma ketasi waminabi chuwe olasi mapurigátamo chabénala olali mapalítamo ketasi cho machíyami níili Riosi. ¹⁵ Chopi ne wabé galabé oláami nílasi 'yemi, mapujiti echi Walubela Riosi mapu 'yemi mi bayeli bichífinala, Échiko ne wabé simírami galabé oláami ju. ¹⁶ Mapujiti echo'ná Riosi Ra'íchala oselíwalachi je'ná jerigá osirúami ju mapurigá Riosi Binói jeaní: Ne galabé oláami nílasi 'yemi, mapujiti Nijeni ne wabé galabé oláami ju.

¹⁷ Alí 'yémitamo Onorúami niráa ané echi Walubela Riosi, echi mapu galá machí suwaba mapu ikí ibilíiga olá. Echijiti galá níima mapu 'yémitamo sinibí ne galá

nijéwabo Riosi, ne galá majáami niráa, ne sinibí mapuyénasítamo abijí piré jena'í wichimóbachi, mapujiti Riosi wabé wi'nijima echí chati sitíi oláami, chopi Binói galabé anema echí auché jaré galá oláami.¹⁸ Ne galá níima 'yémítamo echirigá nijéwasa, mapujítitamo galá machí mapurigá Riosi ma 'yemi mi ku wikáwali, mapurigátamo ma ketasi waminabi chuwé sitíi chati ologá pirélabo mapurigá 'yemi pagótamawala echirigá chuwé sitíi chati ologá piréali. Ayénachótamo galá machí mapu Riosi ne wabé simírami nakili mapurigá 'yémítamo echirigá ku wikawárami níibo, chopi Riosi ketasi natétali jaré namuti jiti mapu suwíbami ju mapurigá 'yémítamo echijiti ku wikawárami níibo. Riosi ketasi natétali echí ne wabé natéami oro jiti, nibilé cho natétali echí we natéami plata jiti,¹⁹ chopi Riosi nijali echí Walubela Jesucristo mapurigá Binói wabé léntiga mi'lirúami níima 'yemi chati sitíi olalila jiti, mapurigátamo ne bichíwali echijiti ku wikawárami níibo. Echalí echí wabé galabé Jesucristo lalá echirigá ku'luwárami níili mapurigá echí jaré Juríosi pagótami ku'lúwali echí jaré galabé bo'wá lalá; chopi echí Walubela Jesucristo lalá waminabi simírami galabé níili mapujiti Binói ke siné chati sitíi olali.²⁰ Alí ki'yá chokichí jonsa mapalí Riosi ketasi cho niwáli je'ná kawí, echalí Riosi galá 'nátaga a'lárali mapurigá echí Walubela Jesucristo je'ná jerigá olárami níima, chopi Jesucristo bukulí wabé wakinánala nawali jena'í wichimóbachi mapurigá Binói 'yemi mi wabé ku'wírama.²¹ Alí 'yémítamo ma galá bichíí Jesucristo niráa, echijítitamo ma ne galá bichíyami ju Riosi Onorúami, mapujiti echí Walubela Riosi ma ku owíntali echí Walubela Jesucristo mapalí Binói ma mukúami níili. Ayénachó Riosi ne wabé walubérali Jesucristo. Echijiti mapalí 'yémítamo echirigá bichíili Jesucristo niráa, echalítamo ayénachó galá bichíili echí Walubela Riosi Onorúami, ayénachótamo buwé mapurigá Échiko 'yemi mi waminabi ku'wírama.

²² Alí mapalítamo ma galá bichííga nijéwali echí ne bichíwali Riosi nawésawala, mapalí echí Wabé Galabé Riosi Iwigala 'yemi mi echirigá bichíírali, echalí jonsa 'yemi aliwala ma galá ku bi'wárami níili. Echijiti jípitamo galá galé echí auché jaré ritémtami. Alí ne galá ju máputamo echirigá galebo a'nagupi, ne sulachí niráa, ayénachó galá níima máputamo ne wabé simírami echirigá galebo a'nagupi.²³ Mapujiti 'yémítamo ma auchecho siné bukulíwami niráa ku ranarúami níili, chopi mapalítamo echirigá ku ranarúami níili 'yémítamo ma ketasi ranarúami níili echí pagótami kúchuwala niráa, echí mapu waminá suwí. Echalítamo chopi echirigá auchecho siné ku ranarúami níili, Riosi kúchuwala niráa, mapujítitamo galá bichíili Riosi Ra'íchala, echí mapu sinibí niráa bitéami ju, echí mapu ke siné suwibama.²⁴ Mapurigá osirúami ju echo'ná Riosi Ra'íchala oselíwalachi mapo'ná je'ná jerigá aní:

Ne si'néami pagótami jena'í wichimóbachi piréami waminá suwimea,
mapurigá echí kasalá we yáati waminá suwiba, ayénachó echí pagótami
o'wéalawala waminá suwibama mapurigá echí kasalá siwalá we yáati
waminá suwiba,
mapujiti echí kasalá waminá wakiché, ayénachó echí kasalá siwalá waminá
rujuní,

²⁵ chopi Riosi Ra'íchala sinibí niráa nirúlama.

Alí je'ná Galabé Riosi Ra'íchala ju mapurigá 'yémítamo ma nawésarami níili, mapurigátamo ku wikawárami níibo.

2 Echijiti waminá ariwesi suwaba chati sitíi oluwáwami. Ketasi wesi 'yékaka ra'ichási, nibilé siné 'yékasi echi auché jaré. Ketasi korúkasi auché jaré níwala namuti, nibilé cho kichisi auché jaré mapu ne wabé simírami machíami ju ketasi mapurigá 'yemi. Alí ketasi sitíi chati ra'ichási auché jaré jiti rugá.² Jipi 'yémítamo mapurigá echi jaré kúuchi múchali niráa ju, echijiti ne galá níima mapu 'yémítamo wabé nakiboa mapurigá Riosi 'yemi mi binérama Binói Ra'íchala, mapurigátamo waminabi galá bichíyami níibo, achigórigá mapurigá echi jaré múchali galá ochera mapalí aboni galá chi'í, mapujiti echi Galabé Riosi Ra'íchala mapurigá galabé leche niráa ju mapurigá 'yémítamo waminabi ochérabo galá bichíyami niráa, ayénachó mapurigátamo galá ku'wíratami níibo.³ Mapujiti mátamo galá machíili Riosi Ra'íchala, ayénachótamo ma galá machí mapu echi Walubela Riosi ne wabé simírami galabé ju.

Jesucristo mapurigá bilé galabé Rité ju, sinibí bitéami niráa

⁴ Galá bichíiga mulubéanasi echi Walubela Jesucristo yuwa. Binói mapurigá bilé galabé Rité niráa ju, alí Binói sinibí bitéami ju. Echi jaré pagótami waminá chakena pali echi Rité mapurigá tarapé natéami niráa, chopi Riosi ma chapili echi Rité mapurigá ne wabé simírami natéami niráa.⁵ Jesucristo ma 'yemi mi 'yalí mapurigátamo bukulíwami niráa sinibí pirélabo mapujítitamo Binói níwala ju, ayénachó Binói Galabé Iwigala pachana 'yemi yuwa bité, echijiti si'néami 'yemi napawika bichíyami ne napawika niráa mapurigá Riosi ri'obáwala ju. Alí ibili 'yemi mapurigá kúuchi rité ju echo'ná ri'obachi tigótami niráa. Échiko echi ne bichíwali Riosi ri'obáwala ju, tarapé ritiwíwami niráa. Echijiti ariwesi mapurigá Riosi 'yemi mi jawama mapurigá sacerdote niráa, mapurigátamo chopi olabo mapurigá Riosi nakí. Ayénachó máputamo ne wabé galá o'wikebo Riosi, sulachí niráa ne suwaba galá 'yasa mapurigá Riosi Binói nakí, mapujítitamo bichíi Jesucristo niráa.⁶ Echijiti ayénachó echo'ná Riosi Ra'íchala osilíwalachi je'ná jerigá osirúami ju:

Echo'ná Siónachi anilíwachi Riosi níwala walúlachi Nijeni julama Nijé

Ranala mapurigá Binói echi Galabé Rité níima, echi mapu bachá niráa tigótami ju echo'ná sitochi Riosi kalílachi.

Echi Rité ne wabé natéami ju.

Alí si'néami mapu ikí galá bichíiko Binói niráa ketasi riwélatarami níima.

⁷ Alí 'yemi galá bichíyami yuwa, echi Rité ne wabé natéami ju. Chopi echi auché jaré ketasi bichíyami yuwa, je'ná jerigá ikimea mapurigá osirúami ju echo'ná Riosi Ra'íchala osilíwalachi:

Echi Rité mapu echi jaré kaliráami waminá chakena pali mapurigá ke natéami niráa,

échiko echo'ná ri'lé sitochi ma bachá tigótami ju.

⁸ Ayénachó ikili mapurigá echo'ná osirúami ju jeanigá:

Nijé Ranala mapurigá bilé Rité níima mapo'ná aboni turúpama.

Alí Binói jiti jaré waminá i'mema, mapujiti aboni ketasi bichíinali Binói niráa.

Echijiti echi jaré aboni ma turúpali echi Rité jiti, mapujiti aboni ketasi bichíili Riosi Ra'íchala. Echalí aboni arígá chakena rujuili mapujiti echirigá nulárami níili mapu echi jaré ke bichíyami echirigá waminá rujuima.

Echi jaré Riosi níwala pagótami

⁹Chopi 'yémitamo chapirúami níili mapurigátamo galá o'wikéami níibo Riosi, mapurigá jaré sacerdote niráa, echi Walubela Riosi níwala. Riosi 'yemi mi waná rojuánali mapurigátamo Binói níwala pagótami níibo, ne galabé oláami niráa. Alí Riosi je'ná jerigá olali mapurigá 'yémitamo nawisabo mapurigá Riosi Binói ne wabé omériga oláami ju suwaba namuti mapu echi jaré pagótami ketasi omero olayá. Alí echi Walubela Riosi ju mapu 'yemi mi bayeli mapurigátamo 'machínabo echo'ná rokowárali jonsa, mapo'nátamo chopi chati sitíi ologá piréali, mapurigátamo mo'wiboa Riosi yuwa echo'ná mapo'nátamo chopi wabé galabé olabo, mapo'ná ne suwaba namuti ne galá machíami niráa machirúami ju. ¹⁰'Yémitamo chabénala ketasi Riosi níwala pagótami níili, chopi jípitamo ma Riosi níwala pagótami ju. Chabénala 'yémitamo ketasi machili mapurigá Riosi 'yemi mi natimali, chopi jípitamo galá machí mapurigá Riosi 'yemi mi ne wabé natimá.

Galá o'wikesi Riosi

¹¹'Yemi keni ritémawa wabé galérami, 'yémitamo ketasi sinibí niráa piréami ju jena'l' wichimóbachi, chópitamo echo'ná ripá riwigachi piréami níibo ne sinibí niráa. Echijiti nijeni 'yemi mi ne wabé táni mapurigátamo ma ketasi chuwé sitíi chati olabo, mapurigá 'yemi aboni, siné káachi, chopi nakí olánala. Alí 'yémitamo chopi waminá 'wigáami níima sinibí niráa mapujítitamo chati sitíi chuwé olánali, átamo ketasi ku wikawárami níisagá. ¹²Ne galabé ologá pirélasi echi auché jaré pagótami yuwa mapu ketasi cho machíami ju Riosi. Alí mapalí 'yémitamo echirigá olá, echalí aboni riwimea mapurigá 'yémitamo chopi olá echi wabé galabéala. Alí aboni ayénachó waminabi walubéraga anema Riosi mapalí Binói justicia olama. Chopi jipi iyénasí aboni, abijí wabé sayéraga ra'ícha 'yemi sayéraga, mapurigá 'yémitamo ne wabé chati sitíi oláami niráa.

¹³Ne galá nijéwasi si'néami echi jaré pagótami o'wéalawala, mapujítitamo galá bichíyami ju echi Walubela Jesucristo niráa. Ne galá nijéwasi echi ne walula bachá nuláami presidente, mapujiti échiko ne bachá walula ju. ¹⁴Ayénachó ne galá nijéwasi si'néami echi auché jaré igúsuwami mapu ikí echi walula presidente nulé kastigo 'yánala echi jaré chati sitíi oláami, echi jaré mapu binói ayénachó nulé galabé oláami niráa anénala echi auché jaré mapu ikí galabé olako. ¹⁵Mapujiti Riosi chopi nakí mapurigá 'yémitamo sinibí wabé galabé olabo, mapurigá echi auché jaré ke machíami, mapu ketasi cho bichíyami ju, ketasi omérama 'yemi mi sitila anigá sayériya.

¹⁶'Yémitamo ma ketasi nulérami ju wikabé namuti olánala, mapurigátamo nulérami níili echi nulalíwami jiti. Echijiti galá kanílaga pirélasi, chopi ketasi chuwé olasi. Sinibí ne wabé galá nijéwaga pirélasi Riosi, mapurigá Binói piónawala niráa. ¹⁷Ne galá o'wikesi si'néami galabé oláami pagótami. Ne wabé galesi si'néami echi auché jaré ritémrtami. Ne galá bichiíiga majasi Riosi. Ne galá o'wikesi echi ne walula bachá nuláami presidente.

Jesucristo ne galá anáchali mapalí Binói risíu olárami níili

¹⁸'Yemi máputamo pióntami ju, ne galá o'wikeka nijéwasi echi jaré o'wéala mapu 'yemi mi nuleko. Ketasi chopi echirigá nijéwasi echi jaré mapu galabé oláami ju,

chopi ayénachó echirigá o'wikeka nijéwasi echí auché jaré mapu wabé na'áwami ju.¹⁹ Mapujiti ne galabé oluwámami ju mapalí bilé rijói, Riosi jiti 'nátaga, arígá galá anacha mapalí binói risúu olárami ju, mapalí binói arígá ketasi biyiri namuti chati sitíi olálíko.²⁰ Chopi a 'yémítamo chati sitíi olásagá, ayénachó átamo echijiti kastigo 'yárami níisagá, echalí ke wesi 'yemi mi galabé oláami anema, arígátamo kilí niráa anachásagá. Alí a bilé rijói ne galabé olásagá, alí a binói arígá risúu olárami níisagá, echalí Riosi Binói anema mapu echí rijói galabé olá mapalí échiko kilí niráa anachasa.²¹ Echijiti Riosi 'yemi mi bayeli najátanala Binói yuwa, mapujiti echí Walubela Jesucristo ma wabé risúu níili 'yemi jiti. Alí galá níima 'yémítamo achigórígá risúu olárami níisa mapurigá Binói risúu olárami níili.²² Echi Walubela Jesucristo ke bilé siné chati sitíi olali. Alí Binói nirapé siné 'yékali echí auché jaré.²³ Alí mapalí echí auché jaré we sitila anigá ra'íchali, echalí Jesucristo ketásirapé ku kuwana sitila anigá nimili. Alí mapalí auché jaré wabé risúu olali Binói, echalí Jesucristo ketasi ku kuwana yónali, chopi Binói niráa 'yali Riosi. Alí echirigá buweli mapurigá Riosi chopi kastigo 'yama echí jaré Binói sayela, mapujiti Riosi sinibí galá wachínaga olá justicia.²⁴ Alí echí Walubela Jesucristo Binói walú kastigo 'yárami níili mapalí Binói klavo jiti michóniga mí'lirúami níili echo'ná kúrsichi, chopi Binói echirigá kastigo 'yárami níili tamujé chati sitíi olalila jiti. Alí echirigá olárami níili mapurigá tamujé bichíyami ma ketasi waminabi chati sitíi olabo, chopi mapurigata galá wachínaga ologá pirélabo. Echalí echí Walubela Jesucristo waminá mí'lirúami níili, mapurigá 'yémítamo galá bichíiga ku wikawárami níibo.²⁵ Chabénala 'yémítamo 'yénali mapurigá jaré bo'wá 'wigáami niráa, chopi jípitamo ma ku ro'wili echí Walubela Jesucristo yuwa. Alí Jesucristo ne galá tibútaga nisera 'yemi aliwala.

Galá níima echí jaré niwíkami je'ná jerigá ologá pirélasa

3 'Yemi muguí kunéami ne galá nijéwasi 'yemi aboni kunala, mapurigá a jaré aboni ketasi bichíisagá Riosi Ra'íchala, echalí aboni arígá bichííratami níima mapalí aboni ritiwá mapurigá 'yemi jubítami ne galá bichíiga olá. Alí aboni echirigá bichííratami níima mapalí 'yemi jubítami arígá ketásirapé nawésaga ruyé aboni.²⁶ Echalí aboni ne galá bichííma mapujiti aboni riwimea mapurigá 'yemi jubítami ne galabé ologá piré, ayénachó mapurigá 'yémítamo galá o'wiké Riosi.²⁷ Ketasi galá níima 'yemi muguí, chopi machímana niráa wabé ba'yórasha. Ketasi galá níima máputamo ripabé niráa achagá ne wabé simírami ba'yórasha tichisa 'yemi kupala, nirapé cho mapurigátamo uchuchasa echí jaré wabé natéami namuti oro niwárami, nirapé cho mapurigátamo ne wabé simírami natéami niráa sipusa,²⁸ chopi galá níima 'yémítamo wabé galéami nílasa. Alí átamo echirigá olásagá, echalí 'yémítamo sinibí niráa ba'yóami níibo, mapujítitamo wabé galéami níibo ne sulachí niráa, ayénachótamo wabé galá kilí ologá piréami níibo. Alí Riosi wabé kaníila mapalítamo echirigá ologá pireko.²⁹ Alí echirigá ikili echí jaré galabé oláami muguí, chabé ki'yá piréami, ne si'léami mapu ikí galá bichíiga o'wikeli Riosi. Alí aboni ayénachó galá o'wikeka nijéwali aboni kunala.³⁰ Echirigá olali echí Sara, echí mapu ne galá nijéwali echí Abrami, echí mapu ayénachó jeanigá aneli echí Abrami: Mujemi ju keni walula. Alí 'yemi jubítami ayénachó ne bichíwali galabé oláami níibo, mapurigá echí Sara niráa, átamo sinibí galabé olásagá, ayénachó átamo tarapé namuti majásagá.

⁷'Yemi rijói kunátami ne wabé galigá nisérasi 'yemi jubila. Galá o'wikesi aboni mapujiti echí jaré mugú ketasi 'me jiwela, ketasi mapurigá 'yemi rijói niráa. Ayénachó galá o'wikesi 'yemi jubila mapujiti aboni achigórígá 'yárami ju mapurigá aboni sinibí niráa pirélama, mapurigá 'yemi galá bichiyami rijói 'yárami níili, mapujiti Riosi 'yemi mi echirigá wabé galigá 'yali. Echirigá ologá pirélasi, mapurigátamo galá omérabo Riosi yuwa tániga ra'ícha.

Echi jaré mapu risúu olárami ju mapalí aboni chopi galabé olá

⁸Ne jubá 'yemi nimí ané mapu si'néami 'yémitamo a'nagupi nagúuraga pirélabo. A'nagupi wabé galigá natimasi mapurigá ritémptami niráa. Wabé galéami nílasi, tarapé nóchami niráa. ⁹Ketasi ku nimíkasi mapalí auché jaré 'yemi mi sitila olá, níbilé cho ku kuwana ni'yókasi sitila anigá mapalí aboni 'yemi mi sitila ané. Chopi si'winárigá wabé galigá ra'íchasi echí jaré aboni, mapujiti Riosi 'yemi mi bayeli mapurigátamo ayénachó galabé ra'ícharami níibo Riosi Binói jiti. ¹⁰Mapujiti echo'ná Riosi Ra'íchala oselíwalachi je'ná jerigá osirúami ju:

Ne si'néami echí jaré mapu ikí nakiko kaníliga pirélanala sinibí rawé,
galá níima abóniko we galabé, tarapé chati sitíi ra'ichásá,
ayénachó mapurigá aboni tarapé 'yékaka ra'ichásá.

¹¹ Galá níima echí jaré aboni waminá ariwesa suwaba chati sitíi oluwáwami,
mapurigá aboni chopi wabé galabé olama,
ayénachó galá níima aboni chopi sinibí galabé kilí ologá pirélasa.

¹² Mapujiti echí Walubela Riosi ne galá nisera si'néami echí jaré galabé
wachínaga oláami pagótami,
ayénachó Binói ne galá nami mapalí aboni tániga ra'ícha Binói yuwa, chopi
echí Walubela Riosi we sayera echí jaré mapu chati sitíi olako.

¹³ Alí a 'yémitamo chopi wabé galabé oláságá, echalí ke wesi omérrama 'yemi mi ne sinibí risúu olayá. ¹⁴ Chopi átamo risúu olárami níiságá mapujítitamo galabé wachínaga ologá piré, arigátamo wabé kaníliami níibo. Ke wesi majasi, nirapé majajasi. ¹⁵ Chopi echo'ná 'yemi sulálachi niráa, sinibí waminabi galá bichísi Jesucristo mapurigá ne Wabé Walubela niráa. Alí sinibí galá kariwesa muchisi mapurigátamo galá ruwigá binérabo echí auché jaré mapu ikí 'yemi mi rukué mapu píritamo galá bichíi. Chopi galá níima máputamo kilíi niráa, wabé galigá ku ruyebo. ¹⁶ Sinibí galabé ologá pirélasi, mapurigátamo echijiti wabé kaníliami sulélabo. Alí wabé riwélama echí auché jaré mapu 'yemi mi chopi sitíi oláami ané, mapalítamo arigá wabé galabé olá, mapurigá Jesucristo bichiyami niráa. ¹⁷ Átamo chati sitíi oláságá 'yémitamo risúu olárami níibo mapujítitamo ne bichíwali echijiti kastigo 'yárami níibo; chopi ketasi galá níima máputamo echirigá chati sitíi olabo. Waminabi galá níima máputamo risúu olárami níibo mapujítitamo galabé chopi olá, a Riosi echirigá nakisáagá.

¹⁸ Mapujiti echí Walubela Jesucristo Binói ayénachó ne wabé risúu olárami níili mapalí Binói waminá mi'lirúami níili ne si'néami tamujé chati sitíi olalila jiti. Alí echí Walubela Jesucristo ne wabé galabé wachínaga oláami níili, chopi Binói echirigá mukuli tamujé tamí jiti, máputa chati sitíi oláami ju, mapurigá Binói echijiti galá omérrama tamujé tamí ku toyá mapo'ná echí Walubela Riosi atí. Echalí Binói ne bichíwali mukúami níili, chopi auchecho ku biteáli Iwigá niráa. ¹⁹ Echalí Binói mapurigá Iwigá niráa simigá nawésali ne si'néami echí jaré

suwíami iwigala mapu pachá mo'warami niráa tibútarami níili.²⁰ Mapujiti chabé ki'yá je'ná jaré ketasi galá nijéwali Riosi, echalí mapalí echi Noé riwéami rijó bitéali. Echalí Riosi kilí niráa buweli mapuyénasí echi Noé sunili niwayá echi walú kalí ba'wechi moba iyénamí, arka anilíwami, mapujiti Riosi nakili mapurigá ne si'néami pagótami galá bichíima. Alí echalí chopi osá nawó pagótami galá bichíiga mo'wili echo'ná pachá árkachi mapurigá aboni echo'ná galá ku'wíratami níima, mapurigá aboni ketasi suwínea mapalí ripabé buchili ba'wí jena'í wichimóbachi.²¹ Jipi rawé mapalita ba'wí jiti pagótami ju, echalí tamujeta achigórígá ku'wíratami ju mapurigá aboni ku'wíratami níili, mapujiti mapalita ba'wí jiti pagótami ju, echalí tamujeta galá 'hera echi auché jaré pagótami mapurigata bachá niráa ma ku wikawárami níili, mapurigata ma ketasi kastigo 'yárami níbo. Mapujítita ma galá bichíili mapurigá echi Walubela Jesucristo ma ku owíñali mapalí Binói waminá mi'lirúami níili tamujé chati sitíi olalila jiti. Alí tamujeta ketasi ku wikawárami ju chopi mapujiti tamujé sapala pabákarami niráa níili echo'ná ba'wírali mapalita ba'wí jiti pagótami níili, chópita galá ku wikawárami ju mapalita echirigá ba'wí jiti pagótami ju, mapujítita ma tánali Riosi mapurigá Binói ku bi'wama mapurigata chati sitíi olali.²² Alí Jesucristo ku simili echo'ná ripá riwigachi mapo'ná Riosi yuwa echo'ná watonachi atí. Alí Jesucristo ne Walubela ju si'néami echi jaré o'wéala Riosi kapitánawala yuwa, ayénachó Binói ne Walubela ju si'néami echi auché jaré o'wéala yuwa. Alí ne si'néami echi jaré o'wéala galá nijéwami ju echi Walubela Jesucristo.

**Galá níima ibili niráa arigá galá nochasa mapurigá Riosi
Binói omératali ibili mapurigá nochama**

4 Alí mapujiti Jesucristo echirigá risúu olárami níili, ayénachó galá níima mapu ibili 'yemi galá bichíyami arigá waminabi nokuísabo galá bichísiya, mapalítamo siné káchchi wabé risúu olárami níibo mapujítitamo echirigá bichí. Mapujiti echi jaré mapu ikí wabé risúu olárami níili, mapujiti aboni bichíili Jesucristo niráa, abóniko ma ketasi nakimea chati sitíi olánala,²³ nibilé cho nakimea chuwé ologá pirélanala mapurigá aboni chopi olánali; chopi jipi jonsa aboni galabé ologá pirélama mapurigá Riosi nakí.²⁴ Mapujiti chabénala 'yémitamo wi'llibé rawé chuwé ologá piréali mapurigá we nakí olánala echi auché jaré pagótami, si'néami mapu ikí ketasi cho machí Riosi. Echalí chabénala 'yémitamo we chuwé olali mapurigá 'yemi aboni chopi nakili olánala. Echalítamo wabé tékali, mapalítamo napawika buchuwi anigá walú bajili suguí, ayénachó mapalítamo omáwali. Alí bichétamo chopi o'wikeli echi jaré amachíkalawami namuti, mapu Riosi 'yemi mi aneli máputamo ketasi o'wikebo.²⁵ Jipi rawé echi auché jaré echirigá oláami wabé charigá 'nata mapujiti 'yémitamo ma ketasi 'yena aboni yuwa mapalí aboni echirigá chati sitíi chuwé olayá. Echijiti aboni wabé sitíi chati ra'ícha 'yemi sayéraga.²⁶ Alí arigá 'wéralli ju mapu aboni ku ruyema echi Walubela Jesucristo mapu churigá aboni olali. Alí Jesucristo wilárami ju mapurigá binói justicia olama echi jaré abijí piréami yuwa, ayénachó echi auché jaré ma suwíami yuwa.²⁷ Mapujiti echi jaré pagótami mapu ma suwíami ju, arigá nawésarami níili Riosi Ra'íchala, mapurigá aboni aliwala sinibí pirélama mapurigá Riosi Binói sinibí bité. Chopi mapalí aboni abijí piréali jena'í wichimóbachi, echalí aboni arigá justicia olárami níili mapurigá si'néami echi auché jaré pagótami.

⁷Ke 'me ayó suwibama suwaba namuti. Echijiti galabé 'nátami nílasi 'yemi. Sinibí táníga ra'ichási Riosi yuwa. ⁸Arigá 'wérali ju máputamo a'nagupi ne wabé galebo, mapujiti átamo echirigá a'nagupi galésagá echalí 'yémítamo wisabé a'nagupi ku wikáwabo. ⁹Echo'ná 'yemi pirélachi we kaníliga naresi echi jaré ritémítami mikabé jonsa síami, mapurigá aboni 'yemi mi yuwa chi'llibama. ¹⁰A'nagupi nagúurasi mapuyena Riosi 'yemi mi ibili 'yali mapurigátamo nagúurabo. Echirigá a'nagupi nagúurasi achigórigá mapurigá Riosi 'yemi mi wikanáami si'winárigá ku'wira. ¹¹Alí a bilé 'yemi nawisásagá, galá níima échiko chopi nawisasa echi Galabé Riosi Ra'íchala. Alí a bilé 'yemi ku'wírasagá auché jaré, galá níima galabé niráa ku'wírasa mapurigá Riosi 'yemi mi jiwrata. Echirigá ne suwaba galá olasi mapurigá Riosi Binói waminabi walubéraga anérami níima, mapujiti Jesucristo ne wabé Walubela ju. Alí galá ju mapurigá Jesucristo sinibí niráa walubéraga anérami níima, ayénachó mapurigá Binói sinibí niráa suwaba omérami níima. ¡Echirigá níima!

Galá níima mapu echi jaré bichiyami galá anachama mapalí aboni risúu olárami ju

¹²'Yemi keni ritémawa, ketasi majasi mapalítamo ne wabé risúu olárami ju, mapurigá chabénala niráa 'yémítamo ke siné riwali echirigá ikíachi. Echirigá chopi ikimea 'yemi mi yuwa mapurigá Riosi galá machimea mapu chuyena galá bichiyami ju 'yemi. ¹³Chopi ne bachá niráa galá kanílasi mapujítitamo omero echirigá risúu olárami níliya, achigórigá mapurigá Jesucristo risúu olárami níli, mapurigátamo ayénachó ne wabé simírami kanílabo waminánomí, mapalítamo riwiboa Jesucristo ne wabé Walubela niráa ku nawáachi jenaí wichimóbachi. ¹⁴Alí 'yémítamo wabé kaníliami níbo, a jaré pagótami 'yemi mi wabé sitila ra'íchasagá mapujítitamo bichiyami ju Jesucristo niráa, mapujiti echi Galabé Walubela Riosi Iwigala 'yemi mi yuwa mulubé atí. Echi jaré aboni wabé sitila ané echi Walubela Jesucristo, chopi 'yémiko ne wabé Walubela ané echi Binói. ¹⁵Ke siné ko'wisí auché jaré, nibilé siné chigosi, nibilé chati sitíi olasi. Ketasi siné echomí así nílasi, auché jaré pagótami níwala ra'íchali katewa, mapalítamo ketasi así risensia ju. Mapujiti a 'yémítamo echirigá olásagá, echalítamo arigá risúu olárami níbo, chopi ketasi galá níima máputamo echirigá chati sitíi olabo. ¹⁶Si'winárigá átamo risúu olárami níisagá chopi mapujítitamo bichiyami ju Jesucristo niráa, echalí ketasi riwélasi, chopi waminabi walubéraga anesi Riosi, mapujítitamo Jesucristo níwala ju.

¹⁷Jipi ma mulubé seba mapalí echi jaré pagótami kastigo 'yárami níima. Alí jipi, ne chokichí niráa, tamujé máputa Riosi kíchuwala ju ayénachó ma péebi niráa kastigo 'yárami ju mapalita risúu olárami ju echi auché jaré jiti. Alí a tamujé echirigá péebi niráa kastigo 'yárami níisagá, pe waminánomí echi auché jaré ne wabé simírami kastigo 'yárami níima, si'néami mapu ikí ketasi níjewiami ju Riosi Ra'íchala. ¹⁸Alí a péeriko ku wikáwarami níisagá echi jaré galabé oláami pagótami, ¿churigá ikimea echi auché jaré wabé chati sitíi oláami yuwa? ¹⁹Alí a Riosi echirigá nakisáagá máputamo ne bichíwali risúu olárami níisagá mapujítitamo galá bichíi Binói niráa, galá níima mapu 'yémítamo waminabi olabo echi galabé oluwáwami. Ayénachó galá níima máputamo waminabi galá bichíibo Riosi, echi mapu 'yemi mi niwáli; mapurigá Binói tibútama 'yemi aliwala, mapujiti Riosi sinibí ne wabé bichíwaga oláami ju.

Echi Pegro galá ruyé echí auché jaré bichiyami

5 Jipi 'yemi nimí je'ná jerigá ruyé, 'yemi máputamo jawárami níli o'wéala ochérami niráa, echo'ná echí jaréana napawika bichiyamichi mapo'ná 'yémítamo piré. Nijeni ayénachó wilárami níli mapurigá bilé walula ochérami niráa, ayénachóni nawesa jeanigá mapu nijeni riwali mapurigá Jesucristo wabé risúu olárami níli. Alí waminánomí mapalí echí Walubela Jesucristo abijí waminabi walubéraga anérarami níima echo'ná ripá riwigachi, echalí nijeni ayénachó echo'ná Binói yuwa asimea, achigórígá mapurigá aboni ayénachó echo'ná Binói yuwa muchima. ²Galá nisérasi echí auché jaré Riosi níwala pagótami mapurigá bilé bo'wá niséami galá nisera binói pugula bo'wá, mapujiti Riosi Binói 'yemi mi nuleli tibúnala aboni. Ne galá kaníliga tibútasi echí jaré aboni mapurigá Riosi nakí. Ketasi chopi echirigá tibútasi mapurigá 'wéralli nulérami niráa, nibilé cho nakigá máputamo natétarami níibo, chopi sinibí wabé kaníliga nochasi suwaba Riosi nóchala olayá. ³Chopi ketasi ne wabé jiwériga nulesi echí jaré mapu Riosi 'yemi mi nuleli echirigá tibúnala, ketasi mapurigá 'yemi aboni piónawala niráa. Chopi sinibí galabé olasi aboni yuwa, mapurigá aboni ayénachó nakimea galabé olánala mapurigá 'yémítamo olá. ⁴Alí átamo echirigá oláami nísagá mapalí echí Walubela Jesucristo ku nawá, echalítamo 'yárami níbo jaré wabé galabé níjíwami, máputamo echijiti ne wabé o'wéalatami níbo, mapujiti Binói echí Walubela Bo'wá Niséami ju. Alí echí mapu Riosi níjá ketasi waminá suwibama, ketasi mapurigá echí jaré sawá sitúlaga niwárami, mapuyiri koyela, mapu we yáati waminá wakiché.

⁵Echirigá achigórígá 'yemi ri'malí bichiyami ne galá níjewasi echí jaré o'wéala ochérami bichiyami. Alí galá níima mapu ne si'néami 'yemi napawika bichiyami a'nagupi níjewama, ne wabé galá kilí ologá, mapujiti:

Riosi ne wabé sayera echí jaré wabé nóchami, chopi Binói galabé ologá

ku'wira echí auché jaré mapu ikí ketasi nóchami ju.

⁶Echijiti mapurigá kuchípala niráa nílasi bacháami Riosi yuwa, mapujiti Binói ne suwaba omériami ju. Alí waminánomí Riosi 'yemi mi o'wéalatama mapalí ma seba téitali. ⁷Sinibí ariwesi mapurigá Riosi 'yemi mi tibútama. Ketasi ne wabé nílaga 'natasi karúmati jiti, mapujiti Riosi Binói 'yemi mi ku'wírama.

⁸Sinibí wabé galabé 'nátami nílasi. Ne galá 'nagá 'yénasi, mapurigá echí riablo ketasi 'yemi mi 'yékama, mapujiti échiko 'yemi mi ne wabé sayera. Alí echí riablo we iyena mapurigá bilé wabé aparúami namuti, wabé rolóami, echí mapu we áa iyena mapu chigá mi'agá suwábama. ⁹Sinibí ne galá bichíiga sayérasi echí riablo, mapujítamo galá machí mapurigá echí auché jaré 'yemi ritémawala galá bichiyami, ne suníami jena'íwichimóbachi piréami, achigórígá risúu olárami ju echí riablo jiti. ¹⁰Chopi pe waminana mapalí 'yémítamo ma pe téeli niráa risúu olárami níisa, echalí Riosi 'yemi mi ne sébali galabé niráa ku niwáma. Alí bichétamo ne wabé galá bichiyami níbo. Alí Riosi sinibí 'yemi mi waminabi tibútama. Alí Riosi Binói ayénachó sinibí 'yemi mi wabé galigá ku'wírama. Ayénachó Binói tamujé tamí bayeli mapurigata sinibí niráa Binói yuwa muchibo echo'ná ripá riwigachi, echí Walubela Jesucristo yuwa. ¹¹Echi Walubela Jesucristo sinibí niráa ne suwaba omériami ju. ¡Echirigá níima! Binói sinibí niráa waminabi walubéraga anérami níima. ¡Echirigá níima!

Echi Pegro ripora echí jaré ritémtami

¹² *'Yemi nimí je'ná jerigá pe okuáa niráa osé. Alí nijeni júuli echí Silibano riwéami rijimá je'ná oselí tórataga. Nijeni mayé mapu échiko ne galá bichíyami ju. Nijeni 'yemi mi je'ná jerigá ruyé: Mapu Riosi ne bichíwali 'yemi mi ne wabé galé. Je'ná jerigá ne bichíwali ju, mapujiti Riosi 'yemi mi ne wabé simírami, wabé galigá ku'wírali. Sinibí waminabi galá bichíisi, mapurigá Binói 'yemi mi waminabi galema.*

¹³ *Echi jaré napawika bichíyami jena'lí Babilóniachi muchúami 'yemi mi ripora. Riosi ayénachó chapili aboni achigórigá mapurigá Binói 'yemi mi chapili. Echi Márkosí ayénachó 'yemi mi ripora. Binói mapurigá nijé ranala niráa ju. ¹⁴ A'nagupi ne wabé galigá ripórasí, ritémtami niráa.*

Nijeni nakí mapurigá 'yémitamo ne wabé galá kilí ologá pirélabo, si'néami mapu ikítamo Jesucristo níwala ju. ¡Echirigá níima!

Osá osirúami mapurigá

SAN PEGRO

osali

Echi Pegro auchecho siné osé echi jaré bichiyami

1 Nijé, Simoni Pegro, Jesucristo piónawala ju, ayénachó Jesucristo tamí júuli nawisánala. Jipi nijeni 'yemi mi je'ná jerigá osé, máputamo achigórígá ne wabé galá bichíili, mapurigá tamujeta bichíili. Alí 'yémítamo echirigá bichíili mapujiti tamujé Riósawala ne wabé wachínaga oláami ju, tamujé Walubélawala Jesucristo ayénachó, echi mapu tamujé tamí Ku'wíriami ju.

²Nijeni nakí mapurigátamo ne simírami niráa ku'wíratami níibo, ayénachó máputamo 'yárami níibo mapurigátamo wabé galá kilí ologá pirélabo, mapujítitamo ma galá machí Riosi, ayénachó mapujítitamo ma galá machí tamujé Walubélawala Jesucristo.

Mapurigá galá níima olasa echi jaré mapu galá bichíiko Riosi

³Riosi ne suwaba omérami ju, echijiti Binói tamujé tamí 'yali suwaba mapu ikita newalé mapurigata galabé ologá pirélabo, ayénachó mapurigata galá o'wikebo Binói Riosi. Alí Binói tamujé tamí machírali echi Walubela Jesucristo, echi mapu tamujé tamí bayeli mapujiti Binói ne Walubela ju, ayénachó mapujiti Binói wabé jiwériga olali wikabé namuti mapurigá ke wesi auché jaré omero olayá.

⁴Alí Jesucristo ayénachó tamujé tamí ne wabé bichíwaga aneli wikabé namuti mapurigá oselichi osirúami ju jena'í Riosi Ra'íchala oselíwalachi. Ayénachó Riosi ne wabé omérami ju achigórígá olayá mapurigá tamujé tamí bichíwaga aneli. Alí suwaba je'ná ne wabé simírami natéami ju. Ayénachó Riosi echirigá tamujé tamí ne bichíwaga aneli mapurigátamo echijiti galá omérabo na'ura, mapurigátamo ketasi nijéwaga olabo mapurigá echi auché jaré pagótami wabé nakí chati chuwé sitíi oláala. Alí bichétamo ayénachó echijiti achigó yiri níibo mapurigá Riosi Binói ju. ⁵'Yémítamo ma galá bichíi, echijiti arigá 'wérali ju máputamo ayénachó sinibí wabé galabé ologá pirélabo. Alí mapalítamo sinibí wabé galabé ologá piré, arigá 'wérali ju máputamo ayénachó galá machíami níibo. ⁶Alí mapalítamo galá machíami ju, ayénachó arigá 'wérali ju máputamo ketasi chuwé ologá pirélabo. Alí mapalítamo ketasi echirigá chuwé ologá piré, echalí arigá 'wérali ju máputamo chopi galabé kilí ologá pirélabo. Alí mapalítamo chopi echirigá kilí ologá piré, echalí arigá 'wérali ju máputamo galá o'wikebo Riosi. ⁷Alí mapalítamo echirigá galá o'wiké Riosi, echalí ayénachó arigá 'wérali ju máputamo galá natimapo echi auché jaré 'yemi ritémawala galá bichíyami.

Alí mapalítamo echirigá galá natimáami ju, echalí ayénachó arigá 'wérali ju máputamo ne wabé galéami níibo.

⁸ Alí átamo waminabi wabé echirigá olásagá, 'yémítamo galabé ologá pirélabo mapurigá tamujé Walubélawala Jesucristo nakí, mapujítitamo galá machili Jesucristo, alí bichétamo chopi nakili olánala mapurigá Binói nakí. ⁹ Chopi echi mapu ketasi echirigá olako, échiko ne noguí mapurigá ke machíliami niráa ju. Ayénachó échiko chopi omero 'nénlya echi jaré mulubé muchúami namuti. Alí échiko ketasi machí mapu binói chati sitíi olalila ma ku bi'wárami níili, suwaba mapu ikí binói chabénala chati sitíi olali. ¹⁰ Echijiti, keni ritémawa, waminabi wabé galabé ologá pirélasi, mapurigátamo echirigá galá machiboa mapu Riosi ne bichíwali 'yemi mi bayegá chapili. Alí átamo echirigá olásagá 'yémítamo ketasi siné chakena rujuibo, chópitamo sinibí galá bichíyami níibo. ¹¹ Alí Riosi 'yemi mi ne wabé simírami 'yama mapurigátamo galá mo'wiboa echo'ná ripá riwigachi, mapo'ná tamujé Walubélawala Jesucristo sinibí niráa nulama Walubela niráa. Ayénachó Binói tamujé tamí Ku'wíriami ju.

¹² Echijiti nijeni 'yemi mi sinibí waminabi 'natáratama je'ná jeyiri namuti, chopi 'yémítamo arigá ma galá machí suwaba. Ayénachótamo ne galá bichíi echi ne bichíwali, mapurigátamo galá ruyérami ju. ¹³ Nijeni mayé mapu wabé galá ju mapu nijeni 'yemi mi je'ná jerigá ruyema mapuyénasí nijeni abijí bité, mapurigátamo sinibí ne galá machísabo, ¹⁴ mapujiti echi tamujé Walubélawala Jesucristo ma tamí machírali mapu arigá 'wérali ju mapurigá nijeni ke 'me ayó waminá mukumea. ¹⁵ Chopi nijeni arigá ne suwaba 'wérali olama, mapuyénasíni omero, mapurigá mapalí nijeni ma waminá mukusá, echalí waminánomí 'yémítamo ayénachó sinibí galá 'natabo je'ná jeyiri namuti jiti.

Echi jaré mapu riwali mapalí Jesucristo ne wabé walubératami níili

¹⁶ Tamujeta ma 'yemi mi binéraga nawésali mapurigá echi tamujé Walubélawala Jesucristo ne wabé walubératami níili, ayénachó mapurigá Binói wabé omériga ku nawama jena'í wichimóbachi. Alí echirigá mapurigata 'yemi mi nawésali ne bichíwali níili, alí tamujeta ketasi nakili 'yemi mi 'yékanala, mapujiti tamujé ne aboni niráa, ne bichíwali galá riwali mapalí echi tamujé Walubélawala wabé ratábataga walubératami níili. ¹⁷ Mapujiti tamujé aboni ne galá riwali mapalí Riosi Onorúami ne wabé simírami ratábataga walubérati echi Walubela Jesucristo. Ayénachótá kipuli mapalí Riosi Binói ripá riwigachi jonsa ra'íchaga jeanili: ¡Je'ná ju keni Raná, mapu Nijeni ne wabé galé! Nijeni ne wabé kanila Binói jiti. ¹⁸ Echalí tamujé aboni galata námali mapalí, echo'ná ripá riwigachi jonsa, Riosi Binói echirigá ra'íchali Jesucristo jiti rugá, mapujiti tamujeta Binói yuwa 'yénali echo'ná galabéalachi ripá rabó.

¹⁹ Ayénachótá níwa Riosi Ra'íchala osirúami, mapurigá echi jaré chabé ki'yá piréami Riosi jiti nawésami osali, echi mapu ke siné nakuliwa. Alí Riosi Ra'íchala osirúami tamujé tamí ruyé mapurigá Riosi Binói ra'íchaga anili; echijiti waminabi ne wabé bichíwali ju. Alí Riosi Ra'íchala mapurigá bilé na'í rajáami niráa ju, mapu tamujé tamí galá ratábata pachana tamujé sulálachi niráa. Ne galá níima 'yémítamo galá níjewasa Riosi Ra'íchala mapuyénasí chi'limea echi galabé Rawé, Riosi Rawéwala, mapuyénasí ku nawama echi Walubela Jesucristo, echi mapu 'yemi mi ne galá machíratama echo'ná 'yemi sulálachi niráa. ²⁰ Ne bachá niráa galá machisí mapu ke

wesi omérama aboni niráa machiyá churigá aniwáami ju Riosi Ra'íchala osirúami, mapurigá osali echí jaré ki'yá piréami Riosi jiti nawésami rijói, mapujiti echí Wabé Galabé Riosi Iwigala chopi ju mapu echirigá galá machírata echí jaré pagótami.²¹ Mapujiti echí jaré chabé ki'yá piréami Riosi jiti nawésami ke siné osali mapurigá aboni chopi 'nátali, aboni niráa. Si'winárigá aboni sinibí osali mapurigá Riosi Binói nuleli aboni osínala, mapujiti Riosi echijiti chapili echí jaré aboni. Alí echí Galabé Riosi Iwigala galá machírali aboni mapurigá aboni osimea riwéali.

Echi jaré wabé 'yékaka nawésami

(Judas 4-13)

2 Chopi ayénachó nirúali jaré rijói wabé 'yékaka nawésami echo'ná echí jaré Isaeli anilíwami pagótami yuwa. Alí echirigá achigórígá nirúlama jaré 'yékaka binériami echo'ná 'yemi bichíyami yuwa. Alí echí jaré aboni chiná niráa, wabé chati sitíi ologá, si'winárigá binéraama echí mapu ketasi galá ju mapu 'yémítamo bichíibo. Alí aboni echirigá ologá sayéraama echí Walubela Jesucristo mapu aboni jiti mukuli. Echijiti aboni ke 'me ayó waminá suwábarami níima. ² Alí wikabé auché jaré pagótami ayénachó achigórígá chuwe sitíi ologá najátama echí jaré aboni yuwa. Echijiti wikabé pagótami wabé chati sitíi olalíwami niráa anema echí ne bichíwali bichílawami mapurigá tamujeta galá bichíi echí Wabé Galabé Riosi Ra'íchala. ³ Alí echirigá binéraga, aboni 'yemi mi wabé 'yékaka bichfiratama, mapujiti aboni wabé korúkami ju echí wenomí. Alí aboni ketasi ku wikawárami níima, chopi ke 'me ayó aboni suwaba suwábarami níima.

⁴Chabé ki'yá mapalí jaré o'wéala Riosi kapitánawala wabé chati sitíi olali, echalí Riosi ketasi ku wikáwali aboni, chopi echo'ná ri'lé riáblochi u'luka, echo'ná rokowárali ariweli aboni. Alí aboni jiero wiya jiti bulugá tibútarami níima, mapuyénasí Riosi waminabi walubé kastigo 'yama waminánomí. ⁵Alí Riosi nirapé cho ku wikáwali echí auché jaré ki'yá piréami chati sitíi oláami pagótami, chopi Binói walú júuli ba'wí mapurigá ripabé buchima jena'í wichimóbachi, mapurigá waminá suwaba suwibama si'néami echí jaré chati sitíi oláami pagótami. Echalí Riosi chopi ku'wili echí bilepi Noé riwéami rijói, echí mapu arigá nawésali jeanigá mapu echí jaré pagótami galá wachínaga ologá pirélama. Alí auché jaré kichao, echí binói Noé níwala pagótami, ayénachó asi ku'wírtami níili. ⁶Ayénachó Riosi nulali waminá suwábanala echo'ná Sorómachi anilíwachi walúlachi piréami wabé chati sitíi oláami pagótami, echo'ná Gomórachi anilíwachi walúlachi piréami chati sitíi oláami pagótami ayénachó. Echalí ne si'néami echí jaré chati sitíi oláami pagótami waminá ikósaga ko'wirúami níili. Alí Riosi echirigá walú kastigo 'yali aboni, mapurigá echijiti ne wabé majama wakinánala piréami pagótami, si'néami mapu ikí chati sitíi oláami nísimako. ⁷Chopi echalí rawé Riosi arigá ku'wili echí Lote riwéami rijói, echo'ná Sorómachi bitéami. Échiko galabé wachínaga oláami rijói níili. Alí echí Lote ma ne wabé o'mónali mapujiti sinibí rawé riwali mapurigá echí auché jaré chati sitíi oláami rijói echo'ná piréami chopi waminabi wabé simírami chati sitíi chuwé olali. ⁸Echalí echí galá oláami Lote arigá echo'ná bitéali echí jaré chati sitíi oláami pagótami yuwa. Chopi sinibí rawé échiko ne wabé o'mónali, binói sulálachi niráa, mapalí binói námali, ayénachó riwali aboni echirigá ne wabé simírami chati sitíi oláachi. ⁹Echirigata galá machí mapu echí Walubela Riosi galá omériami ju ku'wíriya echí jaré mapu ikí sinibí galá níjewaga olako mapurigá Binói nakí,

mapurigá aboni ke siné nijéwaga olama mapurigá echi riabkö nulé. Ayénachó Riosi galá omériami ju tibútasiya echi auché jaré chati sitíi oláami pagótami, mapurigá aboni chopi kastigo 'yárami níima echalí ne jubá rawé.

¹⁰Echalí Riosi bachá niráa walú kastigo 'yama echi jaré mapu ikí wabé chati sitíi chuwé olako, mapurigá aboni chopi nakí olánala. Ayénachó Riosi kastigo 'yama ne si'néami echi jaré mapu ikí ketasi nijéwanali. Echiyiri pagótami ketasi nakí mapurigá aboni si'nú, galabéala niráa, nakulíwarami níima. Aboni ne wabé jobátami ju. Alí aboni tarapé majáami ju sayéraga ra'íchiya echi riabkö níwala o'wéala, mapu arigá ne wabé simírami omériami ju, ketasi mapurigá aboni. ¹¹Chopi echi jaré o'wéala Riosi kapitánawala waminabi simírami omériami ju, ayénachó waminabi ne wabé o'wéala ju, ketasi mapurigá echi riabkö níwala o'wéala. Alí echi jaré Riosi kapitánawala ketasi nakili sitila anigá wi'nijiya echi riabkö níwala o'wéala, bacháami echi Walubela Riosi yuwa.

¹²Chopi echi jaré chati sitíi oláami rijói ke newalite ju. Aboni chopi mapurigá echi jaré jobátami namuti ju mapu tarapé 'nata. Echi jaré aboni chopi chati sitíi ologá piré mapurigá aboni chopi nakí olánala. Alí aboni chopi ranarúami ju jena'í wichimóbachi mapurigá aboni chapirúami nílaga, waminá suwábarami níima. Alí echi jaré aboni ne wabé sitila ané jaré namuti mapu aboni ketasi machí. Chopi si'néami aboni waminá suwábarami níima, achigórigá mapurigá echi jaré jobátami niráa. ¹³Alí aboni echirigá wabé risúu olárami níima, mapujiti aboni wabé risúu olali auché jaré. Alí aboni mayé mapu wabé kaníliami ju, mapalí aboni echirigá chati chuwé sitíi olá mapurigá aboni chopi nakí olánala. Chopi aboni wabé riwéliga olá, alí 'yemi napawika bichíyami ayénachó riwératami níibo mapalí echi auché jaré chati sitíi oláami pagótami 'yemi yuwa ko'wá, mapujiti aboni abijí wabé chati chuwé olama mapurigá aboni chopi nakí olánala.

¹⁴Alí aboni chopi wabé nakí mapuyíripi mukí mapu aboni ritiwá. Alí aboni sinibí nakí wabé chati sitíi olánala, ayénachó aboni ne wabé 'yeka echi auché jaré ketasi galá bichíyami pagótami. Aboni ne wabé machíami ju wabé chati sitíi olayá; echijiti aboni walubé kastigo 'yárami níima. ¹⁵Echi jaré aboni ma waminá 'wigáli mapujiti aboni ma ariweli galabé olayá. Aboni chopi olá mapurigá echi Balami riwéami nawésami rijói olali, echi mapu Beori riwéami rijói ranala níili, echi mapu wabé nakili ménala wenomí, wabé chati sitíi ologá. ¹⁶Chopi echi Balami wabé oyératami níili, mapalí binói echirigá chati sitíi olali, mapujiti bilé bulito mapu tarapé ra'íchami níili arigá ra'íchali mapurigá rijói niráa. Echalí echi bulito we ra'íchaga waminá oyérali echi Balami, alí binói ketasi waminabi simili chati sitíi olámiya.

¹⁷Alí si'néami je'ná jaré chati sitíi oláami rijói mapuyiri ju jaréana bajichi jótami, ke téami ba'wí. Ayénachó aboni mapuyiri jaré nolí ju, echi iká jiti torúami. Alí Riosi ma nulali mapurigá aboni sinibí niráa muchuwárami níima echo'ná ri'lé ne wabé simírami rokowárali. ¹⁸Aboni wabé nóchaga ra'ícha echi mapu ketasi galá ju. Alí mapalí auché jaré ma ariweli chati sitíi olayá mapurigá jena'í wichimóbachi piréami sinibí we chati sitíi olá, echalí je'ná jaré chati sitíi oláami rijói 'wérali olá mapurigá echi jaré auchecho siné wabé chati sitíi olama, jeanigá mapu we galá ju echirigá chati sitíi oluwawa, ayénachó mapu galá ju chati sitíi oluwawa suwaba mapu ikí echi pagótami nakí chati sitíi olánala. ¹⁹Echi jaré chati sitíi oláami pagótami 'yemi mi ané máputamo wabé kanílaga pirélabo, átamo auchecho siné chotásagá echirigá chati chuwé olayá, chopi aboni ketasi kanílaga piré. Alí aboni arigá wabé chati

sitíi olá, mapujiti aboni nulérami niráa ju echirigá chati sitíi olánala, echi riablo jiti, mapujiti aboni mapurigá echi riablo piónawala niráa ju. ²⁰Jaré ibili pagótami ma galá machili echi Walubela Jesucristo, echi mapu tamujé tamí Ku'wíriami ju, echijiti aboni ma ariweli echi chati sitíi oluwáwami, mapurigá sinibí we chati sitíi olá echi auché jaré pagótami jena'í wichimóbachi piréami. Chopi a jaré aboni pe waminánala auchecho siné ne wabé simírami chati sitíi olásagá, echalí aboni waminabi wabé simírami chati sitíi oláami níima, ketasi mapurigá bachánala. ²¹Alí waminabi galá níimili echi jaré pagótami ke siné machisá echirigá galá wachínaga olayá, mapurigá aboni ketasi echirigá auchecho siné ku ariwema. Chopi aboni ma galá machigá, alí biché ariweli nijéwiya echi Galabé Nulalíwami mapurigá aboni nulérami níili. ²²Echirigá aboni yuwa ma ne bichíwali ikili mapurigá echi jaré pagótami je'ná jerigá aní: Echi kochí waminá upéesa, auchecho pe echi ku ko'wá. Ayénachó echi kochi káraga ubáratami níisa, auché ku wisogáltali 'wiba.

Echi Walubela Jesucristo ne bichíwali ku nawama

3 Kení ritémawa, nijeni 'yemi mi ne wabé galé. Je'ná ma osá chokéami ju mapu nijeni 'yemi mi oseli. Alí nijeni 'yemi mi echirigá osá chokéami oseli mapujítini nakili mapurigátamo ne galá machíami niráa 'natabo mapurigá nijeni 'yemi mi ruyé. ²Ne galá ku 'natasi mapurigá echi jaré galabé oláami Riosi jiti nawésami rijói anili, echi jaré mapu chabé ki'yá nawésali. Ayénachó galá ku 'natasi mapurigá echi Walubela Jesucristo nulali, echi mapu wabé Ku'wíriami ju. Chabé chokichí echi jaré Riosi jiti julárami rijói 'yemi mi echirigá binérali mapurigá Jesucristo nulali.

³Ne bachá niráa galá machisí mapu echalí ne jubá rawé jaré wikabé pagótami wabé sitila anema echi Galabé Riosi Ra'íchala, ayénachó aboni wabé chati chuwé ologá pirélama mapurigá aboni chopi nakimea olánala. ⁴Echalí aboni jeanigá rukuema: ¿Churékula ke ku nawali echi Jesucristo mapurigá Binói bichíwaga niráa anili mapu ku nawama? Mapujiti chabé ki'yá jonsa mapalí jonsa suwili echi jaré ki'yá piréami tamujé pagótamawala, ne suwaba namuti sinibí chopi a yiri ju, mapalí jonsa niwálati je'ná kawí. ⁵Echi jaré pagótami echirigá aní mapujiti aboni ketasi nakí bichífinala mapurigá ki'yá jonsa nirúali suwaba namuti echo'ná ripá riwigachi nirúami mapu ikí Riosi niwáli. Alí aboni nibilé cho nakí bichífinala mapu chabé ki'yá nirúali je'ná kawí mapu Riosi niwáli nasipa echo'ná walú ba'wírali niráa, mapurigá jipi rawé yénasí jena'í kawírali suwé noligá maní echi walubé ba'wí. ⁶Alí aboni nibilé cho bichífinali mapurigá echalí ki'yánala je'ná kawí waminá nosobúrami níili mapalí ne wabé ripabé buchili ba'wí, ne suníami jena'í wichimóbachi. ⁷Jipi rawé je'ná kawí abijí tibí. Echo'ná ripá riwigachi nirúami namuti ayénachó abijí tibí. Jipi rawé echi Walubela Riosi echirigá galá tibuta mapurigá waminánomí ne suwaba ikósaga suwábarami níima, mapujiti echalí ne jubá wi'nijíwachi rawé Riosi nulama ne suwaba ikósanala. Alí echalí rawé echi jaré chati sitíi oláami pagótami waminá suwábarami níima.

⁸'Yemi keni ritémawa, nijeni 'yemi mi ne wabé galé. Ne galá níima mapu 'yémítamo sinibí ne galá 'natabo mapurigá, echi Walubela Riosi yuwa, bilé rawé wi'llibé niráa ju mapurigá bilé mili bamíbali niráa, ayénachó mapurigá Riosi yuwa bilé mili bamíbali wabé téeli ju mapurigá bilé rawé niráa. ⁹Chopi ne bichíwali ju mapu echi Walubela Jesucristo ke 'me ayó ku nawama jena'í wichimóbachi, mapurigá Binói bachá niráa bichíwaga anili. Jaré pagótami mayé mapu echi Walubela Jesucristo

wi'llibésika, ketasi ku nawasa, arigá ke ku nawama. Chopi Binói arigá ke 'me ayó nolínama. Echi Walubela Jesucristo ketasi cho ku nawá, chopi mapujiti Binói kilí niráa buwé mapurigá echí jaré pagótami wikáwali tánama Riosi. Jesucristo ketasi nakí mapu nibilé waminá 'wigama, chopi Binói nakí mapu si'lneámi pagótami ku ro'wima Riosi yuwa, mapurigá aboni ku 'wikáwarami níima.

¹⁰ Echirigá ke sayiná sebama echí Walubela Jesucristo níwala rawé, mapujiti Binói níwala rawé ke sayiná nolínama mapurigá bilé chigórami ke sayiná nawá, rokogó niráa. Echalí rawé ne suwaba echí jaré namuti rajáami sopolí waminá ikósaga suwábarami níima ne wabé chati anigá, ne wabé charigá majáriami niráa. Echalí karúmati namuti mapu ikí nirú káraga suwábarami níima, ne wabé simírami ratáami jiti ikósaga. Ayénachó je'ná kawí káraga ikótaga waminá suwibama, ne suwaba echí jaré namuti jena'lí wichimóbachi nirúami ayénachó.

¹¹ Ne bichíwali ju mapu ne suwaba namuti echirigá suwibama, echijiti waminabi galá níima mapu 'yémítamo sinibí galá bichíyami níibo, ayénachó máputamo sinibí wabé galigá pirélabo Riosi. ¹² Echijiti galá bichíiga buwesi mapuyénasí sebama echí Walubela Riosi níwala rawé; ayénachó sinibí 'wérali ologá nochasi, Riosi nóchala olayá, mapurigá we yáati, ke 'me ayó, sebama echalí rawé. Echalí ne suwaba echí jaré rajáami namuti echo'ná ripá riwigachi nirúami ne suwaba ikótaga waminá suwibama, ayénachó ne suwaba namuti jena'lí wichimóbachi nirúami ne suwaba ikótaga waminá basuma. ¹³ Alí tamujé bichíyami chónita buwé mapu nirúlama auché biléana bukulíwami riwigachi, mapurigá Riosi bachá niráa bichíwaga anili mapu nirúlama. Ayénachóta buwé mapu nirúlama auché biléana bukulíwami wichimoba, mapo'ná chopi nirúlama echí wabé galabé wachínaga oluwáwami, mapurigá Riosi bachá niráa bichíwaga anili mapu nirúlama.

¹⁴ Echijiti 'yemi keni ritémawa, wabé galérami, jipi mapalítamo abijí buwé mapurigá je'ná jerigá ikimea, sinibí ne wabé galabé olasi mapurigá Riosi 'yemi mi riwimea galabé kilfi ologá piréami, tarapé chati sitíi oláami niráa. ¹⁵ Galá ku 'natasi mapu Riosi chopi echirigá buwé mapurigá echí Galabé Riosi Ra'íchala waminabi nawisárami níima, mapurigá auché jaré pagótami galá bichíiga, galá ku wikáwarami níima. Alí tamujé rijimala Pablo, mapu wabé galérami ju, ayénachó 'yemi mi achigórigá oseli mapurigá Riosi ma 'yalí echí binói mapurigá wabé machíami níima. ¹⁶ Alí echí Pablo sinibí echirigá achigórigá osali. Ayénachó binói osali jaré namuti jiti rugá mapu echí jaré pagótami ke 'me omero machiyá. Alí echí jaré ke machíami pagótami mapu ketasi cho galá bichíi, sinibí echirigá si'lwinárigá machigá 'heni ne suwaba Riosi Ra'íchala osirúami. Alí aboni echijiti chopi waminá 'wigama.

¹⁷ Echijiti 'yemi keni ritémawa wabé galérami, sinibí ne galá 'nátaga pirélasi, mapujítitamo chabé chokichí jonsa galá machili je'ná jeyiri namuti. Echalítamo ketasi waminá chakena torúami níibo mapurigátamo achigórigá bichíibo mapurigá echí auché jaré chati sitíi oláami pagótami. Sinibí galabé 'nátaga pirélasi mapurigátamo waminabi galá bichíyami níibo. ¹⁸ Chopi waminabi ne galá machisí echí tamujé Walubélawala Jesucristo, echí mapu tamujé tamí Ku'wíriami ju. Ayénachó sinibí waminabi ne wabé galabé olasi, mapurigá Jesucristo 'yemi mi waminabi ne wabé galema. Ne galá níima mapu Jesucristo waminabi walubéragera anérami níima ne sinibí niráa. ¡Echirigá níima!

Bachá osirúami mapurigá

SAN JUANI

osali

Ne suwaba Riosi nawésawala Jesucristo jiti ruáami ju

1 Nijeni 'yemi mi osé echi Walubela Jesucristo jiti rugá, Echi mapu bachá niráa sinibí bitéali ki'yá chokichí mapalí ne suwaba echi jaré namuti mapu ikí nirú ketasi cho niwárami níili. Nijé binói galá námali mapalí echi Walubela Jesucristo ra'íchali, ayénachó nijé binói galá 'néniga riwali Jesucristo, ayénachóni riwali mapurigá Binói galabé ologá bitéali, ayénachó nijé binói nójchali echi Walubela Jesucristo jiti. Alí ne suwaba Riosi nawésawala Jesucristo jiti rugá nawésami. Alí sínéami pagótami mapu ikí bichíiko Jesucristo niráa ne sinibí pirélama. ² Alí nijeni galá riwali je'ná Jesucristo mapu galá 'ya mapurigá echi pagótami sinibí niráa pirélama. Ayénachó nijeni nawésali Jesucristo jiti rugá, mapu Binói 'yemi mi 'yama máputamo sinibí niráa pirélabo. Kilyá chokichí jonsa Jesucristo echi Onorúami yuwa asali, chopi chabé bukulí Binói nawali jena'í wichimóbachi. ³Echirigá nijeni 'yemi mi ruyé suwaba mapu nijeni riwali, ayénachó suwaba mapu nijeni námali, mapurigá 'yémítamo galá bichíiga napawíkami níibo tamujé yuwa máputa ma galá bichíili Jesucristo niráa, mapujiti tamujeta ne bichíwali napawíkami ju Riosi Onorúami yuwa, ayénachóta napawíkami ju Jesucristo yuwa, echi mapu bilepi Riosi Ranala ju. ⁴Echirigá nijeni 'yemi mi je'ná jerigá osé mapurigá 'yémítamo galá bichíiga, ne sébali kanílabo.

Riosi ne wabé Ratábami ju

⁵Alí nijeni 'yemi mi je'ná jerigá nawésaga ruyé, mapurigá Jesucristo tamí binérali: Mapu Riosi ne wabé simírami Ratábami ju. Alí Binói sinibí ne galabé machiná oláami ju, mapujiti Riosi yuwa tarapé nirú rokowárali. ⁶Alí a tamujeta jeansáagá máputa galá bichíiga napawíkami ju Riosi yuwa, chopi ata sinepi niráa sinibí chati sitíi olásagá, mapurigá echo'ná rokowárali piréami olá, echalita chopi wabé 'yékaka ra'íchami ju, ayénachóta wabé 'yékaka oláami ju. ⁷Chopi ata sinibí galabé olásagá mapurigá echo'ná galá rayénachi piréami niráa, mapurigá Riosi Binói galabé olá, ayénachó mapurigá Binói sinibí echo'ná galá rayénachi atí, echalita ne bichíwali a'nagupi napawíkami ju echi auché jaré galá bichíyami yuwa, ayénachó Jesucristo lalá tamujé tamí ku bi'wá ne suwaba mapurigata chati sitíi olali. Échiko bilepi Riosi Ranala ju.

⁸Alí ata jeanisáagá máputa ma ke chirigá omero chati sitíi olayá, echalita aboni niráa wabé 'yeka, ayénachóta ketasi bichíwaga aní. ⁹Chopi ata ku ruyésagá Riosi mapurigá tamujeta chati sitíi olali, echalí Binói tamujé tamí ku wikáwama tamujé chati sitíi olalila, ayénachó Binói tamujé tamí suwaba ku bi'wama mapurigata chati sitíi olali, mapujiti Riosi sinibí galabé wachínaga oláami ju. ¹⁰Chopi ata jeanisáagá máputa ke siné chati sitíi olali, echalita wabé 'yékami niráa Riosi, ayénachóta ketasi ne galá bichíili Binói Ra'íchala.

Jesucristo ju ne Walubela Ra'íchami tamujé tamí jiti rugá

2 Keni kúchuwa, nijeni 'yemi mi je'ná jerigá osé mapurigátamo ke siné chati sitíi olabo. Chopi a bilé arigá chati sitíi olásagá, tamujeta níwa bilé Walubela nígiúraga Ra'íchami mapu echo'ná bacháami Onorúami yuwa ra'ícha, mapujiti tamujé tamí ku'wíranali. Échiko, echi Walubela Jesucristo ju, mapu sinibí galabé wachínaga olá. ²Jesucristo mi'lirúami níili mapalí Binói kastigo 'yárami níili tamujé chati sitíi olalila jiti. Echalí Binói echirigá mi'lirúami níili ne si'néami jena'í wichimóbachi piréami chati sitíi olalila jiti.

³Alí ayena galá níjéwasagá Riosi nulalila, echalita galá machí máputa ma galá machí Riosi. ⁴Chopi a bilé jeanisáagá: Nijeni galá machí Riosi, alí a binói ketasi galá níjéwasagá Riosi nulalila, échiko we ikaléami ju, ayénachó binói wabé 'yékaka olá. ⁵Chopi echi jaré mapuyíripi galá níjéwaga olako mapurigá Riosi nulá, abóniko ne sébali galá galé Riosi. Alí bicheta echijiti galá machí máputa napawíkami ju Riosi yuwa. ⁶Arigá 'wérali ju mapu si'néami mapu ikí aniko mapu aboni ma napawíkami ju Riosi yuwa, sinibí galabé ologá pirélama mapurigá Jesucristo galabé ologá bitéali.

Echi bukulíwami nulalíwami

⁷'Yemi keni ritémawa ne wabé galérami, nijeni ketasi 'yemi mi osé auché bilé si'nú nulalíwami, chopi je'ná jerigá mápuni 'yemi mi osé achigó yiri ju mapurigátamo nulérami níili chabé chokichí jonsa, mapalítamo bachá niráa galá bichíili. Alí je'ná nulalíwami, chabé chokichí jonsa nirúami, achigó yiri ju mapurigá echi Galabé Riosi Ra'íchala nawisálawami máputamo ma námali. ⁸Chopi je'ná jerigá mapurigá nijeni 'yemi mi osé, arigá mapurigá auché bilé si'nú nulalíwami ju, echi mapu Jesucristo yuwa ne bichíwali ju, ayénachó 'yemi yuwa ne bichíwali ju. Alí echi rokowárari ma simírasimi, mapujiti echi ne bichíwali rajáami ma galá rajá, mapujiti echi Galabé Riosi Ra'íchala ma nawisárami ju.

⁹A bilé jeanisáagá mapu binói echo'ná galá rajáachi niráa, galabé ologá iyena, chopi a échiko arigá we kichísagá auché bilé rijimala galá bichíyami, échiko abijí echo'ná rokowárari niráa, wabé chati sitíi ologá iyena. ¹⁰Chopi echi mapu galá galeko echi auché jaré binói ritémawala galá bichíyami, échiko echo'ná galá rajáachi niráa, galabé ologá bité. Alí biché a echirigá olásagá, échiko tarapé chati sitíi olírama auché jaré. ¹¹Alí echi mapu we kichiko auché bilé binói rijimala galá bichíyami, échiko abijí chati sitíi ologá iyena echo'ná rokowárari. Alí échiko ketasi machí mapu kumi simí mapujiti binói ma ke machíliami niráa niwálati, mapujiti echo'ná rokowárari bité.

¹²Keni kúchuwa, nijeni 'yemi mi osé mapujiti Riosi ma 'yemi mi ku wikáwali mapurigátamo chati sitíi olali, mapujítitamo ma galá bichíili Jesucristo niráa. ¹³'Yemi 'wéntami, nijeni 'yemi mi osé mapujítitamo ma galá machili Echi mapu

ma bitéami níili ki'yá chokichí, mapalí ke cho niwálati suwaba echi jaré namuti. 'Yemi témalí, nijeni 'yemi mi osé mapujítitamo galá bichiiga ma omérali echi riablo.

¹⁴ Yemi keni kúchuwa, nijeni 'yemi mi je'ná jerigá oseli mapujítitamo ma galá machili echi Onorúami. ¹⁴ 'Yemi 'wéntami, nijeni 'yemi mi je'ná jerigá oseli mapujítitamo ma galá machili Echi mapu ma bitéami níili ki'yá chokichí mapalí ke cho niwálati suwaba echi jaré namuti. 'Yemi témalí, nijeni 'yemi mi je'ná jerigá oseli mapujítitamo jiwérámi ju, ayénachó mapujítitamo ma galá bichií Riosi Ra'íchala, ne sulachí niráa, ayénachó mapujítitamo ma galá bichiiga omérali echi riablo.

¹⁵ Ketasi galesi echi chati sitíi oluwáwami mapurigá jena'í wichimóbachi piréami we chati sitíi olá. Nibilé cho galesi jena'í wichimóbachi nirúami namuti. A bilé galésagá echi chati sitíi oluwáwami mapurigá jena'í wichimóbachi piréami we chati sitíi olá, échiko ketasi galá galé Riosi Onorúami, ¹⁶ mapujiti Riosi ketasi 'yali mapurigá jena'í wichimóbachi piréami echirigá chati sitíi olama. Jena'í wichimóbachi piréami pagótami we chati sitíi olá mapurigá aboni chopi nakí chati sitíi olána, ayénachó aboni ne wabé korú echi jaré namuti mapu ikí aboni chopi wabé ba'yóraga nakí 'nénala. Ayénachó aboni chopi nakí ne wabé nóchaga pirélanala. ¹⁷ Alí je'ná kawí waminá suwibásimi. Alí suwaba mapu ikí jena'í wichimóbachi piréami chati sitíi oláami pagótami nakí olána, ayénachó waminá suwibásimi, chopi echi auché jaré pagótami mapu ikí olako mapurigá Riosi nakí, abóniko sinibí niráa pirélama.

Riosi Ra'íchala ne bichíwali ju chopi jaré pagótami wabé 'yékami ju

¹⁸ Keni kúchuwa, ma ne jubá rawé ju. 'Yémitamo ma námali mapurigá jena'í wichimóbachi nolínama bilé walula mapu wabé sayérami ju, echi Walubela Jesucristo sayéraga. Jípita galá machí mapu ma ne jubá rawé ju, mapujiti wikabé ma sili mapu wabé sayérami ju Jesucristo sayéraga. ¹⁹ Echi jaré aboni ma ku ariwesa, waminá simíbali tamujé napawika bichíyamichi jonsa. Chopi aboni ketasi ne bichíwali galá bichíyami níili mapurigá tamujeta galá bichií, mapujiti a aboni ne bichíwali galá bichíyami níisagá, echalí aboni arígá tamujé tamí yuwa tibímili jipi yénasí, chopi aboni echirigá ku ariwesa ma ku simíbali, mapurigá ne galá riwirúami níima mapu jaré wikabé ketasi achigórigá bichíyami ju mapurigá tamujeta galá bichií.

²⁰ Chopi echi Walubela Jesucristo 'yemi mi 'yali echi Wabé Galabé Riosi Iwigala, alí si'néami 'yemi galá machíami ju. ²¹ Ne bichíwali ju mapu 'yémitamo ma galá machí echi ne Bichíwali. Jipi nijeni 'yemi mi osé mapujítitamo echirigá galá machí echi ne Bichíwali.

²² ¿Chigá ju echi ne wabé 'yékami? Ne si'néami wabé 'yékami ju mapu ikí aniko mapu echi Jesusi riwéami Rijói mapu echo'ná Nasarétachi bitéami níili ketasi ju Jesucristo echi mapu bilepi ju Riosi Ranala. Alí si'néami echirigá aníami pagótami ne wabé sayera echi Walubela Jesucristo. Abóniko aní mapu Riosi ketasi Jesucristo Onolá ju, ayénachó aboni aní mapu Jesucristo ketasi bilepi ju Riosi Ranala. ²³ Ne si'néami echi jaré mapu ikí aniko mapu Jesucristo ketasi echi Bilepi Riosi Ranala ju, abóniko ketasi cho Riosi tanala niráa ju. Chopi si'néami echi jaré mapu ikí aniko mapu aboni galá bichií echi Bilepi Riosi Ranala, abóniko ma Riosi tanala niráa ju.

²⁴ Echijiti ne sulachí niráa waminabi galá bichiisi echi Galabé Riosi Ra'íchala, mapurigátamo nawésarami níili chabé chokichí jonsa, mapalí jonsa 'yémitamo galá

bichíili. Alí átamo ne bichíwali galá bichíisagá, ne sulachí niráa, mapurigátamo nawésarami níili chabé chokichí jonsa, alí bichétamo sinibí napawíkami níibo echí bilepi Riosi Ranala yuwa, ayénachó echí Walubela Riosi Onorúami yuwa.²⁵ Echí Walubela Jesucristo ne bichíwaga anili mapu tamujé tamí 'yama mapurigata ne sinibí niráa pirélabo.

²⁶Nijeni 'yemi mi je'ná jerigá oseli, echí auché jaré jiti rugá, si'néami mapu ikí 'yemi mi wabé 'yékaka binera. ²⁷Alí 'yemi bichíyami ma níwa echí Wabé Galabé Riosi Iwigala echo'ná pachana 'yemi sulálachi, mapurigá Jesucristo ma 'yemi mi 'yalí. Echijiti ketasi 'wérali ju mapu auché jaré 'yemi mi binéra, mapujiti echí Wabé Galabé Riosi Iwigala Binói 'yemi mi binera ne suwaba. Alí biché mapurigá echí Wabé Galabé Riosi Iwigala 'yemi mi binera ne bichíwali ju, alí tarapé 'yékami ju. Echirigá waminabi nokuísi napawika niráa pirélasiya echí Walubela Jesucristo yuwa, mapurigá echí Wabé Galabé Riosi Iwigala 'yemi mi binera.

²⁸Jipi 'yemi keni kúchuwa sinibí echirigá napawíkami níisi Jesucristo yuwa, mapurigá waminánomí mapalí Binói ku nolínama, echalí tamujé ibili ketasi majabo, nibilé chota riwélabo, mapalita bacháami Binói yuwa jábabó. ²⁹Alí mapujiti 'yémítamo ma galá machí mapu echí Walubela Jesucristo ne galá wachínaga oláami ju, galá níima máputamo ayénachó machiboa mapu ne si'néami echí jaré pagótami mapu ikí ne bichíwali galá wachínaga olako, ne si'néami ma Riosi kúchuwala ju.

Echi jaré Riosi kúchuwala

3 Ne galá machisí mapu chuyena tamujé tamí ne wabé simírami galé Riosi Onorúami. Alí mapujiti Binói tamujé tamí echirigá galé, echijítita Binói kúchuwala niráa anérámi ju, ayénachóta ne bichíwali Binói kúchuwala ju. Alí echí auché jaré ke bichíyami pagótami jena'í wichimóbachi piréami ketasi tamujé tamí machí, mapurigá Riosi kúchuwala niráa, mapujiti aboni ketasi cho machili Riosi Binói. ²'Yemi keni ritémawa wabé galérami, mata Riosi kúchuwala ju, chónpita ketasi cho galá machíralati mapu chu yírita níibo waminánomí, chónpita galá machí mapu echalí mapalí Jesucristo ku nolínama, tamujeta achigó yiri níibo mapurigá Binói ju, mapujítita riwiboa Jesucristo mapurigá Binói ju. ³Alí ne si'néami mapu ikí je'ná jerigá bichiíga buweko mapurigá echí Walubela Jesucristo echirigá ku'wírama, abóniko ketasi waminabi chati sitíi ologá piré, achigórigá mapurigá Jesucristo Binói ke siné chati sitíi olá.

⁴Chopi ne si'néami echí jaré mapu ikí chati sitíi olako, abóniko ketasi njewa Riosi nulalila, mapujiti mapalí echí pagótami chati sitíi olako, echalí aboni ketasi njéwami ju Riosi nulalila. ⁵Echi Walubela Jesucristo nawali; jena'í wichimóbachi mapurigá Binói tamujé tamí ku 'yema tamujé chati sitíi olalila. Alí Jesucristo tarapé chati sitíi oláami ju. ⁶Echirigá biché ne si'néami echí jaré mapu ikí Jesucristo yuwa napawíkami ju, abóniko ketasi waminabi chati sitíi ologá piré; chopi si'néami echí auché jaré mapuyíripi chati sitíi ologá pireko, abóniko ke siné riwali, nirapé siné machili echí Walubela Jesucristo. ⁷Keni kúchuwa, ketasi ariwesi mapurigá auché jaré 'yemi mi 'yékama. Ne si'néami echí jaré pagótami mapu ikí galabé ologá pireko, abóniko chopi galabé oláami ju, achigórigá mapurigá Jesucristo galabé oláami ju. ⁸Alí echí jaré pagótami mapu ikí chati sitíi ologá pireko, abóniko chopi echí riabلو níwala ju, mapujiti echí riabلو sinibí we chati sitíi olá, ki'yá chokichí

jonsa. Echijiti echí Walubela Riosi Ranala nawali jena'í wíchimóbachi, mapurigá suwaba suwábama echí riabó olalila.

⁹ Alí ke wesi echí jaré Riosi kúchuwala waminabi chati sitíi ologá piré, mapujiti Riosi ma 'yali mapurigá aboni sinibí niráa piréami níima, alí aboni ketasi omérama waminabi chati sitíi ologá piréliya, mapujiti aboni ma Riosi tanala niráa ju. ¹⁰ Ne galá machiwámami ju mapu chigá ju echí jaré Riosi kúchuwala, ayénachó mapu chigá ju echí riabó kúchuwala, mapujiti si'néami mapu ikí ketasi galabé wachínaga olako, abóniko ketasi Riosi níwala ju. Ayénachó echí jaré mapu ikí ketasi galeko echí auché jaré aboni ritémawala, abóniko ketasi Riosi níwala ju. ¹¹ Mapujiti je'ná ju echí nawisálawami máputa námali ne chokichí jonsa: Máputa sinibí ne wabé galebo a'nagupi.

Galá galesi a'nagupi

¹² Chopi ketasi galá níima máputa wabé chati sitíi olabo mapurigá echí Kaini riwéami rijói olali. Échiko echí riabó níwala níili, alí waminá mi'yali binói rijimala. ¿Churékula waminá mi'yali? Echi Kaini waminá mi'yali binói rijimala mapujiti echí binói Kaini olalila wabé chati níili, chopi binói rijimala olalila galabé níili.

¹³ 'Yemi keni ritémawa, ketasi ne chati nílaga majasi, a echí auché jaré ke bichiyami pagótami 'yemi mi wabé kichísagá. ¹⁴ Chabénala mapalita chati sitíi ologá piréali tamujeta mapurigá suwíami niráa níili, chopi jipi tamujé galá machí máputa bukulíwami niráa ku piré, mapujiti tamujeta ma galá galé echí auché jaré tamujé ritémawala, galá bichiyami. Echi jaré mapu ketasi galeko echí auché jaré aboni ritémawala abóniko abijí mapurigá suwíami niráa ju. ¹⁵ Ne si'néami echí jaré mapu ikí kichiko auché jaré aboni ritémawala, abóniko we nakówami ju. Alí 'yémitamo galá machí mapu echí jaré mapu ikí nakówami juko, ke wesi sinibí piréami ju. ¹⁶ Tamujeta galá machí mapu chu yena galá níima máputa ne wabé simírami galebo echí auché jaré pagótami; mapujítita ma galá machí mapurigá Jesucristo a Binói niráa níjali mapurigá waminá mi'lirúami níima tamujé chati sitíi olalila jiti, mapujiti Binói tamujé tamí ne wabé simírami galeli. Alí echirigá ayénachó wabé galá níima mapurigá tamujeta ne wabé simírami galebo echí auché jaré tamujé ritémawala, mapalí siné káachi arígá 'wérati níimilé máputa waminabi ku'wíruami níibo, ata echirigá ne wabé simírami galésagá. ¹⁷ Alí a bilé rijói ne sébali níwaságá echí jaré namuti mapuyénasí binói galá omero kaníliga bitélasiya, chopi a binói riwisáagá auché bilé wabé risúwati rijimala mapu tarapé te mapu binói níilaga bitélama, alí a echí we níwami rijimala ketasi natimaga 'yásagá mapu ikí we newalé echí auché bilé, ¿churigá bichíwali níima mapu echí we níwami rijói galá galé Riosi, ne sulachí niráa? ¹⁸ 'Yemi keni kúchuwa, ketasi ne sébali ju máputa chopi ra'íchaga aniboa máputa wabé galé echí auché jaré pagótami. Chopi arígá 'wérati ju máputa ne bichíwali, ne sulachí niráa galebo aboni, ayénachó máputa wabé galigá ku'wírabo echí jaré aboni.

Echi jaré galá bichiyami ketasi majama Riosi

¹⁹ Alí ata echirigá olásagá, tamujeta galá machiboa mapu Riosi ne bichíwali ju, ayénachóta machiboa mapu tamujeta Binói kúchuwala ju. Echalita ketasi majabo Riosi mapalita arígá galá machí mapu Binói sinibí tamujé tamí ritiwá. ²⁰ Chopi a tamujé aboni we o'mónami níisagá, tamujé sulálachi niráa, mapujítita auché

siné chati sitíi olali, echalí Riosi Binói abijí waminabi wabé simírami tamujé tamí wi'nijí, mapujiti Binói ne galá machí suwaba máputa chati sitíi olali, mapujiti Riosi machí ne suwaba namuti, chopi tamujeta ketasi machí ne suwaba namuti. ²¹Echirigá biché, 'yemi ritémtami ne wabé galérami, ketasi biyiri chati sitíi olásagá, mapurigata echijiti o'monáratami níibo, echalita ketasi majabo Riosi. ²²Ayénachó Riosi tamujé tamí 'ya suwaba mapu ikita táni, mapujiti tamujeta echirigá ne galá njewa Binói nulalila, ayénachóta olá mapurigá Binói nakí máputa olabo. ²³Alí Riosi nulalila je'ná ju: Máputa galá bichíibo Jesucristo niráa, echi mapu bilepi Riosi Ranala ju; ayénachó máputa a'nagupi galebo mapurigá Jesucristo tamujé tamí nuleli. ²⁴Alí si'néami mapu ikí galá njewa Riosi nulalila, abóniko napawika piré Riosi yuwa, ayénachó Riosi pachana aboni yuwa bité. Alí tamujeta galá machí mapu Riosi pachana tamujé tamí yuwa bité, mapujiti Binói ma tamujé tamí 'yali echi Wabé Galabé Riosi Iwigala pachana tamujé sulálachi bitéranala.

**Echi Wabé Galabé Riosi Iwigala ayénachó echi wabé chati
si'nú iwigá mapu ne wabé sayérami ju Jesucristo**

4 ¹'Yemi ritémtami ne wabé galérami, ketasi bichíisi ne si'néami echi jaré mapu ikí aniko mapu Riosi júuli aboni nawisánala, chopi ne galá machisí ibili aboni, acha aboni ne bichíwali níwa echi Wabé Galabé Riosi Iwigala, mapujiti ne buchuwiámi jena'í wichimóbachi 'yena wikabé ne wabé 'yékami nawésami, jeanigá mapu Riosi Binói júuli aboni echirigá nawisánala. ²Alí je'ná jiti 'yémítamo galá omérabo machiyá echi jaré mapu ikí ma níwa echi Galabé Riosi Iwigala: Ne si'néami echi jaré mapu ikí galá bichíiga nawesa jeanigá mapu Jesucristo, echi Walubela Riosi Ranala, ne bichíwali nawali jena'í wichimóbachi mapurigá bilé rijói niráa, abóniko ayena níwa echi Wabé Galabé Riosi Iwigala. ³Alí si'néami pagótami mapu ikí ketasi aniko mapu Jesucristo ne bichíwali nawali jena'í wichimóbachi mapurigá bilé rijói niráa, abóniko ketasi níwa echi Wabé Galabé Riosi Iwigala, si'winárigá aboni chopi níwa echi we chati si'nú iwigá mapu wabé sayérami ju echi Walubela Jesucristo. Alí 'yémítamo ma galá námali mapu echi wabé sayérami iwigá nolínama riwéali jena'í wichimóbachi, chopi jipi échiko ma jena'í wichimóbachi iyena.

⁴Keni kúchuwa, 'yémítamo ma Riosi níwala ju, alí bichétamo ma omérali echi auché jaré wabé 'yékami nawésami, mapujiti echi Wabé Galabé Riosi Iwigala mapu pachana 'yemi yuwa atí, échiko ne wabé simírami Walubela ju, ketasi mapurigá echi wabé chati si'nú iwigá mapu pachana echi auché jaré jena'í wichimóbachi piréami pagótami yuwa atí, si'néami mapu ikí ke galá bichíyami ju. ⁵Echi jaré 'yékaka nawésami chopi jena'í wichimóbachi piréami ju. Echijiti aboni we ra'icha jena'í wichimóbachi nirúami namuti jiti rugá, alí echi auché jaré jena'í wichimóbachi piréami ke bichíyami pagótami ne wabé kaníliga kipunú. ⁶Chopi tamujé Riosi níwala juta. Alí ne si'néami pagótami mapu ikí galá machiko Riosi, abóniko galá kipunú mapalita nawesa Riosi Ra'íchala. Chopi echi auché jaré mapu ikí ketasi Riosi níwala juko, abóniko ketasi kipunú mapalita nawesa Riosi Ra'íchala. Alí je'ná jítita galá omérabo machiyá mapu chigá níwa echi Wabé Bichíwali Galabé Riosi Iwigala, ayénachó mapu chigá chopi níwa echi wabé 'yékami si'nú iwigá.

Riosi ne wabé galéami ju

⁷'Yemi keni ritémawa, ne wabé galérami, galá níima máputa a'nagupi ne wabé galebo, mapujiti Riosi Binói tamujé tamí 'ya máputa ne wabé galéami níibo. Alí ne si'néami pagótami mapu ikí wabé galéami juko, aboni ma Riosi kúchuwala niráa ju, ayénachó aboni galá machí Riosi. ⁸Si'néami echi jaré mapu ikí ketasi galéami juko, aboni ketasi cho galá machili Riosi, mapujiti Riosi ne wabé galéami ju. ⁹Alí Riosi ma tamujé tamí machírali mapurigá Binói tamujé tamí ne wabé simírami galeli; mapujiti Riosi júuli echi Bilepi Binói Ranala jena'í wichimóbachi, mapurigata ne sinibí niráa pirélabo, ata galá bichisagá mapu Binói mukuli tamujé chati sitíi olalila jiti. ¹⁰Echi galelíwami je'ná jerigá ju: Mapu Riosi Binói bachá niráa tamujé tamí ne wabé galeli, ayénachó mapu Binói júuli echi Bilepi Binói Ranala jena'í wichimóbachi mapurigá Échiko waminá mi'lirúami níima tamujé chati sitíi olalila jiti. Chopi tamujeta ketasi ne bachá niráa galeli Riosi.

¹¹'Yemi ritémwtami, ne wabé galérami, ne bichíwali ju mapu Riosi echirigá tamujé tamí ne wabé galeli; echijiti galá níima mapu tamujeta ayénachó wabé galebo a'nagupi. ¹²Ke wesi nirapé siné riwali Riosi; chopi ata a'nagupi galésagá, echalí Riosi pachana tamujé tamí yuwa bité, ayénachóta ne sébali galé Riosi. ¹³Alí je'ná jiti tamujeta galá machí máputa napawika piré Riosi yuwa, ayénachó mapu Riosi pachana tamujé tamí yuwa bité: Mapujiti Riosi ma tamujé tamí 'yali echi wabé galabé Binói Iwigala. ¹⁴Alí tamujé aboni ma galá riwali, ayénachóta nawésaga ruyé echi auché jaré pagótami mapu Riosi Onorúami júuli echi bilepi Kepu Raná, mapurigá jena'í wichimóbachi piréami pagótami ku wikawárami níima mapurigá aboni chati sitíi olali. ¹⁵Alí mapuyíripi galá bichiúga aniko mapu Jesucristo echi bilepi Riosi Ranala ju, Riosi sinibí pachana aboni yuwa bité, alí aboni sinibí napawika Riosi yuwa piré.

¹⁶Tamujeta ma galá machí mapu chuyena Riosi tamujé tamí galé, mapujiti chabé jonsa tamujeta galá machigá bichíli mapurigá Binói echirigá tamujé tamí ne wabé galé. Echi Walubela Riosi ne wabé galéami ju. Alí ne si'néami mapu ikí galá galigá pireko, abóniko napawika Riosi yuwa piré, ayénachó Riosi Binói pachana aboni yuwa bité. ¹⁷Je'ná jiti tamujeta ma ne sébali galá galé Riosi, mapurigata tarapé majáami níibo echalí ne jubá wi'nijíwachi rawé, mapujiti tamujé galá bichiúami jena'í wichimóbachi piréami wabé galéami ju, achigórígá mapurigá Jesucristo Binói ne wabé galéami ju. ¹⁸Alí echi jaré pagótami mapu ikí wabé galeko Riosi, abóniko tarapé majáami ju, mapujiti mapalí echi pagótami ne sébali wabé galé Riosi, echalí aboni ketasi waminabi majama, mapujiti aboni chopi bichiúma mapu Riosi sinibí wabé galigá ku'wírama aboni. Alí echi jaré mapu ikí wabé majáami juko, abóniko chopi echirigá majawá, mayega mapu aboni kastigo 'yárami níima. Echijiti si'néami mapu ikí majáami juko, abóniko ketasi ne sébali galé Riosi.

¹⁹Alí tamujeta we galá galé Riosi, mapujiti Binói bachá niráa tamujé tamí ne wabé galeli. ²⁰Chopi a bilé jeanisáagá: Nijeni wabé galé Riosi, chopi echalí arígá wabé kichísagá auché bilé rijimala, galá bichiúami, échiko arígá ne wabé 'yékami ju. Mapujiti a bilé ketasi galésagá binói rijimala mapu binói galá ritiwá, échiko ketasi omero galéa echi Walubela Riosi mapu binói ke siné riwali. ²¹Alí Riosi ma tamujé tamí je'ná jerigá nuleli: Mapu ne si'néami mapu ikí galeko Riosi, ayénachó galema echi auché jaré ritémwtami galá bichiúami.

**Ketasi chati sitíi olabo, ketasi mapurigá echí auché jaré
jena'í wichimóbachi piréami we chati olá**

5 Si'néami echí jaré mapu ikí bichíiko mapu echí Jesusi riwéami Rijói mapu echo'ná Nasarétachi bitéami níili billepi ju echí Walubela Riosi Ranala abóniko ma Riosi kúchuwala ju. Alí biché mapuyíripi galeko Riosi Onorúami, échiko ayénachó we galé echí jaré mapu ikí Riosi kúchuwala ju. ² Alí mapalita wabé galé Riosi, ayénachó mapalita galabé olá mapurigá Riosi nulá, echalita galá machí máputa ayénachó wabé galé echí auché jaré mapu ikí ma Riosi kúchuwala ju. ³ Mapujiti mapuyíripi pagótami galá galeko Riosi, abóniko ayénachó galá nijéwaga olá mapurigá Riosi nulá. Alí ketasi wabé nóchali ju echirigá nijéwaga oluwawa. ⁴ Mapujiti si'néami echí jaré mapu ikí ma Riosi kúchuwala juko, abóniko galá nayura, mapujiti aboni ketasi achigórígá chati sitíi olá, ketasi mapurigá echí auché jaré jena'í wichimóbachi piréami olá. Alí bicheta chopi omero echirigá nayúria mapujítita galá bichíi Jesucristo niráa. ⁵ Mapujiti echí jaré mapu ikí bichíiko mapu echí Jesusi riwéami Rijói mapu echo'ná Nasarétachi bitéami níili ne bichíwali echí billepi Riosi Ranala ju, abóniko chopi galá omero echirigá nayúria, mapurigá aboni ketasi chati sitíi olama, ketasi mapurigá echí auché jaré jena'í wichimóbachi piréami chati sitíi olá.

Jesucristo billepi ju Riosi Ranala

⁶ Mapalí Jesucristo iyénali jena'í wichimóbachi, echalí bichíwaga nawésarami níili mapu Jesucristo billepi ju Riosi Ranala. Jesucristo nawali echí ba'wí jiti, mapalí ba'wí jiti pagótami níili; ayénachó Binói nawali echí la jiti, mapalí wabé léntaga mi'lirúami níili echo'ná kúrsichi. Echirigá Jesucristo bichíwali nawali echí ba'wí jiti, chopi ayénachó nawali echí la jiti. Alí echí Wabé Galabé Riosi Iwigala achigórígá bichíwaga nawesa Jesucristo jiti rugá. Alí echí Wabé Galabé Riosi Iwigala sinibí ne wabé bichíwali nawesa. ⁷ Echirigá ju mapu echo'ná ripá riwigachi bikiyá nirú mapu ne bichíwaga nawesa jeanigá mapu Jesucristo ne bichíwali billepi Riosi Ranala ju: Echi Onorúami echirigá aní, ayénachó echí Galabé Riosi Ra'íchala echirigá aní, ayénachó echí Wabé Galabé Riosi Iwigala achigórígá aní. Alí je'ná bikiyá arigá Billepi niráa ju. ⁸ Alí mapalí Jesucristo bitéali jena'í wichimóbachi, echalí baiás chokéami ne bichíwali nawésarami níili jeanigá mapu Binói billepi ju Riosi Ranala: Echi Wabé Galabé Riosi Iwigala sinibí echirigá aní; alí Riosi Onorúami echirigá anili mapalí Jesucristo ba'wí jiti pagótami níili; ayénachó Riosi Onorúami auché siné echirigá anili mapalí Jesucristo chapirúami níili mapurigá Binói wabé léntaga mi'lirúami níima echo'ná kúrsichi. Echirigá baiás chokéami achigórígá ne bichíwali nawésarami níili jeanigá mapu Jesucristo billepi ju Riosi Ranala. ⁹ Alí tamujeta sinibí galá bichíi mapalí auché jaré pagótami bichíwaga aní mapu bilé namuti ne bichíwali ju, echijiti waminabi 'wérali ju máputa galá bichíibo echí mapu Riosi ne bichíwaga aní, mapujiti Riosi bichíwaga aní mapu Jesucristo billepi ju Binói Ranala. ¹⁰ Si'néami echí jaré mapu ikí bichíiko echí billepi Riosi Ranala, abóniko galá machí, ne sulachí niráa, mapu Jesucristo ne bichíwali billepi Riosi Ranala ju. Alí echí auché jaré mapu ikí ketasi bichíi Riosi, abóniko chopi wabé 'yékami niráa Riosi, mapujiti aboni ketásirapé bichíi mapurigá Riosi ne bichíwaga anili, Binói Ranala jiti rugá. ¹¹ Alí Riosi ma je'ná jerigá anigá nawésali echí billepi Binói Ranala jiti rugá: Mapu Riosi ma nijali máputa ne sinibí niráa pirélabo, ayénachó

mapu echi bilepi Riosi Ranala ju mapu tamujé tamí 'ya je'ná sinibí pirélawami.¹² Ne si'néami mapu ikí ma galá bichíiga níwako echi bilepi Riosi Ranala echo'ná aboni sulálachi niráa, abóniko ayénachó ma níwa je'ná sinibí pirélawami. Chopi echi auché jaré mapu ikí ke níwako echi bilepi Riosi Ranala echo'ná aboni sulálachi niráa, abóniko ketasi níwa echi sinibí pirélawami.

Ne jubáami echi Juani galá ruyé echi jaré bichíyami

¹³ Nijeni 'yemi mi je'ná jerigá osé, 'yemi máputamo ma galá bichíi echi bilepi Riosi Ranala niráa, mapurigátamo ne bichíwali machiboa máputamo ma sinibí piréami ju.

¹⁴ Alí tamujeta echirigá ne galá bichíi Riosi, ayénachóta ne bichíwali mayé mapu ayénata tánsagá mapurigá Riosi olama bilé namuti, mapurigá Binói chopi nakí olánala, echalí Riosi galá kipukú mapurigata tániga ra'ícha. ¹⁵ Alí echirigá mapurigata galá machí mapu Riosi galá kipukú mapalita tániga ra'ícha Binói yuwa, ayénachóta galá machí mapu mata 'yárami ju echi jaré namuti mapu ikita tánali.

¹⁶ Alí a bilé rijimala riwiságá mapu auché bilé rijimala we olá echi chati sitíi oluwáwami, chopi binói ketasi olá echi wabé simírami chati sitíi oluwáwami mapu arigá ke sayiná, we yáa mukuwáami ju, echalí galá níima mapu echi bacháala rijimala tániga ra'ichásá Riosi yuwa, mapurigá Riosi ku wikáwama echi auché bilé rijimala mapu chati sitíi olali. Chopi jaré arigá ne wabé simírami chati sitíi olá, alí aboni echijiti ke sayiná, we yáa suwimea. Nijeni ketasi aní mapu galá níima máputamo tánabo Riosi mapu echiyiri ku wikawárami níima. ¹⁷ Ne suwaba echi pagótami chati sitíi olalila ne wabé chati sitíi oluwáwami ju, chopi jaré chati sitíi oluwáwami ketasi we yáa, ke sayiná mukuwáami ju.

¹⁸ Galata machí mapu si'néami echi jaré mapu ikí ma Riosi kúchuwala juko, ma ketasi chati sitíi ologá piré, mapujiti echi Walubela Riosi Ranala tibuta aboni, alí echi riablo ketasi omérama olayá mapurigá aboni arigá chati sitíi olama.

¹⁹ Galata machí mapu tamujeta Riosi níwala ju, chopi ne si'néami echi auché jaré jena'í wichimóbachi piréami mapu ikí ke bichíyami juko, abóniko arigá waminá omératami ju echi riablo jiti.

²⁰ Alí bicheta ayénachó galá machí mapu echi Walubela Riosi Ranala ma nawali jena'í wichimóbachi. Alí Binói ma tamujé tamí 'yalí mapurigata galá machiboa echi ne Bichíwali Walubela Riosi. Alí tamujeta napawika piré echi yuwa mapu ne Bichíwali ju. Echirigá aniwáami ju máputa napawika piré echi bilepi Riosi Ranala yuwa, echi mapu echi Walubela Jesucristo ju. Échiko echi ne Bichíwali Riosi ju, ayénachó Binói njá mapurigá echi pagótami ne sinibí niráa pirélama. ²¹ 'Yemi keni kúchuwa, a aboni niráa ne galá tibútasi mapurigátamo ketasi bichíibo echi jaré amachíkalawami namuti mapu ketasi ne bichíwali Riosi ju. ¡Echirigá níima!

Osá osirúami mapurigá

SAN JUANI

osali

Juani osá echí ne Bichíwali jiti rugá, echí galelíwami jiti ayénachó

¹Nijé mápuni ma ochérami ju, 'yemi mi osé 'yemi napawika bichíyami máputamo Riosi jiti chapirúami níili, ayénachóni osé si'néami echí auché jaré mapu ikí ma bichíili 'yemi nawésawala, mapujiti aboni mapurigá 'yemi kúchuwala niráa ju, mapu nijeni ne bichíwali wabé galé mapujiti si'néamita ma galá bichíili echí ne Bichíwali. Alí ne si'néami echí auché jaré ritémtami mapu ikí ma galá machili echí ne Bichíwali ayénachó 'yemi mi ne wabé galé. ²Nijeni 'yemi mi ne wabé galé mapujiti a'nawita galá bichíili echí ne Bichíwali, ne sulachí niráa. Alí je'ná ne Bichíwali ne sinibí niráa tamujé tamí yuwa níima. ³Alí Riosi Onorúami, echí Walubela Jesucristo ayénachó, echí mapu bilepi ju Riosi Onorúami Ranala, sinibí 'yemi mi wabé ku'wírama, ayénachó 'yemi mi ne wabé natimaga 'yama máputamo galá kilíi ologá pirélabo, ayénachó máputamo galá bichíibo echí ne Bichíwali, ayénachó máputamo ne wabé galéami níibo.

⁴Nijeni ne wabé kaníili mapujítini riwali mapu jaré 'yemi napawika bichíyami galabé ologá piré mapurigá Riosi Onorúami tamujé tamí nuleli, mapurigá osirúami ju echo'ná Riosi Ra'íchala oselíwalachi, echí mapu ne Bichíwali ju. ⁵Jipi, 'yemi ritémtami ne wabé galérami, nijeni 'yemi mi wabé táni mapu ne si'néami tamujé bichíyami a'nagupi ne wabé galebo. Alí je'ná jerigá mapu nijeni 'yemi mi nulegá osé, ketasi mapurigá auché bilé si'nú bukulíwami nulalíwami ju, mapujítita achigórígá nulérami níili chabé ne chokichí jonsa. ⁶Alí ayénata galéságá Riosi, echalita galá nijéwaga olabo mapurigá Binói tamujé tamí nuleli. Alí 'yémítamo ma námali chabé chokichí jonsa mapurigá Riosi tamujé tamí nuleli máputa a'nagupi ne wabé galebo.

Echi jaré wabé 'yékami pagótami

⁷Jipi jena'í wichimóbachi 'yena wikabé wabé 'yékami pagótami mapu ketasi bichíiga nawesa mapu Jesucristo bilepi ju Riosi Ranala, ayénachó aboni ketasi bichíiga nawesa mapu echí bilepi Riosi Ranala arigá nawali jena'í wichimóbachi mapurigá bilé Rijói niráa. Si'néami echiyiri pagótami wabé 'yékami ju, ayénachó aboni ne wabé sayérami ju echí Walubela Jesucristo. ⁸Chopi 'yemi bichíyami a aboni niráa ne galá tibútasi mapurigátamo sinibí niráa waminabi galá bichíisabotamo, mapurigátamo echirigá ologá ne sébali ku natétarami níibo echalí ne jubá rawé, suwaba máputamo galá bichiíga olali, echí Walubela Jesucristo nóchala olayá.

⁹Alí mapuyíripi bichíisamiko auché si'nú nawisálawami mapu ketasi achigó yiri ju mapurigá Jesucristo tamujé tamí binérali, abóniko ketasi níwa Riosi. Chopi si'néami echí jaré mapu ikí bichíisamiko mapurigá Jesucristo tamujé tamí binérali, abóniko ayena níwa echí Onorúami, ayénachó aboni níwa echí Walubela Riosi Ranala. ¹⁰Alí a bilé nawásagá echo'ná 'yemi pirélachi mapu ketasi achigórigá je'ná jerigá nawésami ju, ketasi nakiísi mapu binói 'yemi mi binérama, nibilé cho naripasi echiyiri. ¹¹Mapujiti si'néami mapu ikí narépago echiyiri nawésami, abóniko echirigá ologá achigórigá chati sitíi oláami nílama, mapurigá echí 'yékaka nawésami niráa.

Juani nakili 'nénala echí jaré napawika bichíyami

¹²Abijí nirú wikabé ra'íchali mapu nijeni omérama 'yemi mi ruyée, chópini ketasi nakí mápuni oselichi chopi osogá echirigá ruyema, mapujiti nijeni nakí mápuni echo'ná 'yémichi simea, mapurigani ne binói niráa 'yemi mi ra'íchama, mapurigá si'néamita a'nawí echirigá ne sébali kanílabo.

¹³Jena'í piréami napawika bichíyami, mapu Riosi ayénachó chapili mapurigá Binói níwala niráa, si'néami 'yemi mi walú ripora. ¡Echirigá níima!

Baisá osirúami mapurigá

SAN JUANI

osali

Echi Juani galabé ané echi Kayo

¹Nijé mápuni ma ochérami ju, nimí je'ná jerigá osé, mujé Kayo riwéami, mápumi ne wabé galabé nijé amígowala ju, mapu nijeni ne bichíwali mi ne wabé galé.

²Mujé ne wabé galérami rijimala, nijeni sinibí táni Riosi mapurigá Binói mi 'yama mapurigami sinibí ne suwaba jiti wabé galabé ologá bitélasama, ayénachó mapurigami sinibí waminabi kanílasama, achigórígá mapurigami sinibí waminabi galá bichfisimi Jesucristo niráa. ³Máani ne wabé kaníili mapujiti jaré ritémtami echo'ná jonsa simíbami ma tamí ruyeli mapurigá mujemi sinibí galá bichíi, mapujítimi sinibí ne galabé ologá bité, achigórígá mapurigami nawésarami níili echi ne Bichíwali Riosi Ra'íchala. ⁴Alí nijeni sinibí echirigá ne wabé simírami kanila mapalini nami mapurigá echi jaré nijé kúchuwala ne wabé galabé ologá pirélasimi, mapurigá aboni nawésarami níili echi ne Bichíwali Riosi Ra'íchala.

⁵Mujé ne wabé galérami rijimala, mujemi wabé galabé olá ne suwaba mapu ikimi olá, echi auché jaré ritémtami ku'wíriya. Alí ne bachá niráa mujemi sinibí ne wabé ku'wira echi jaré ritémtami, auché jaréana okuá simíbami. ⁶Alí aboni ma galá nawésaga anili bacháami si'néami echi auché jaré napawika bichíyamichi yuwa, mapurigá mujemi echirigá ne wabé galigá olali. Galá níima mápumi echirigá ku'wírama echi auché jaré ritémtami, mikabé jonsa simíbami, mapurigá aboni wabé kaníliga ku simama echo'ná mapo'ná aboni nakí simánala, mapujiti Riosi Binói nakí mápumi echirigá ku'wírama. ⁷Mapujiti aboni chopi 'yénali Jesucristo nóchala olayá. Alí aboni ketasi biyiri nareli mapu echi auché jaré pagótami nakili 'yánala, si'néami mapu ikí ketasi cho bichíi Riosi. ⁸Echijiti arigá 'wér.ali ju mapu tamujeta ku'wírabo echi jaré nawésami, mapurigá aboni kaníliga 'yénama echi ne Bichíwali Riosi Ra'íchala nawésiya.

Echi Riótreve wabé sayérali echi Juani

⁹Chabénala nijeni oseli echi jaré napawika bichíyami, chopi echi Riótreve riwéami rijói ketasi nakili tamí nijéwanala. Échiko chopi nakí mapurigá walula niráa nílanala echi auché jaré ritémtami yuwa. ¹⁰Je'ná jiti mapalini echo'ná simea, nijeni galá ruyema ne si'néami mapurigá echi Riótreve wabé 'yékaka, sitíragá ruyé auché jaré tamí sayéraga, ayénachó binói waminabi chati sitíi olá, mapujiti binói ketasi risensis 'ya mapu echo'ná binói bitélachi chi'libama echi auché jaré mikabé

jonsa simíbami nawésami. Alí mapalí auché jaré ritémptami echo'ná piréami arigá nakí mapu echi jaré mikabé jonsa simíbami nawésami echo'ná aboni pirélachi chi'libama, echalí echi Riótreje ané mapu ketasi risensia ju, ayénachó ané mapu átamo arigá narésagá echi auché jaré mikabé jonsa simíbami nawésami echo'ná 'yemi pirélachi, echalí ma ketasi risensia níbotamo waminabi napawiya echi auché jaré napawika bichiyámi yuwa.

¹¹ Mujé wabé galérami rijimala, Kayo riwéami, ketasi olá mapurigá echi Riótreje chati sitíi olá, chopi sinibí galabé olá mapurigá echi auché jaré galabé oláami niráa, mapujiti echi jaré mapu ikí galabé olako, abóniko Riosi níwala ju, chopi echi auché jaré mapu we chati sitíi olako, abóniko ke siné cho bichíili Riosi.

Echi Rimétrio galabé oláami níli

¹² Alí ne si'néami echi auché jaré ritémptami aní mapu echi Rimétrio wabé galabé oláami ju, ayénachó ne bichíwali ju mapu binói galabé olá. Nijeni ayénachó bichíwaga aní mapu échiko galabé oláami ju, alí biché 'yémitamo galá machí mapu nijeni sinibí ne bichíwaga aní.

Juani ripóraga osé echi Kayo

¹³ Nijeni níwa auché jaré wikabé ra'íchali, mapu nijeni nakí mi ruyénala, chopi ketásini nakí oselichi chopi osogá mi ruyénala, ¹⁴ mapujiti nijeni mayé mapu ke 'me ayó nijeni mi 'nema. Echalita a'nagupi ra'ichábo.

¹⁵ Sinibí galá kilí ologá biteli. Echi jaré tamujé amígowala jena'í piréami walú ripóraga nawala. Perikó, ibili niráa galá ripora echi jaré nijé amígowala echo'ná piréami.

Osirúami mapurigá

SAN JÚRASI

osali

San Júrasi osé echi jaré mapu ikí Riosi ma bayeli

¹Nijé, Júrasi, echi Jakobo rrijimala juni, ayénachó nijeni Jesucristo piónawala niráa ju. Nijeni 'yemi mi osé je'ná oselí, ne si'néami 'yemi mapu ikí Riosi Onorúami ma bayegá galabérali mapurigátamo Riosi níwala níibo, ayénachótamo Riosi jiti tibútarami níili, mapujítitamo Jesucristo yuwa napabúrami níili. ²Nijeni nakí mapurigá Riosi 'yemi mi ne wabé simírami natimama, ayénachó mapurigá Binói 'yemi mi ne wabé simírami galema, ayénachó máputamo 'yárami níibo mapurigátamo wabé galá kilí ologá pirélabo.

Echi jaré 'yékaka binériami

(2 Pedro 2.1-17)

³'Yemi keni ritémawa wabé galérami, nijeni ne wabé nakili 'yemi mi osénala bilé oselí, mapurigani 'yemi mi waminabi binéra ma mapu churigá Riosi ma 'yemi mi ku wikáwali, achigórigá mapurigá Binói tamí ku wikáwali. Chopi jipi arígá 'wérali ju mapurigani 'yemi mi osema ruwigá máputamo galá tibupo mapurigá je'ná ne bichíwali bichíilawami ketasi waminá 'yékaka nakulíwarami níima, mapujiti chabé ki'yá jonsa echi jaré Riosi níwala pagótami sinepi niráa 'yárami níili je'ná ne bichíwali bichíilawami mapurigá aboni sinibí niráa je'ná jerigá bichíima. ⁴Mapujiti bukulí jonsa jaré pagótami wabé 'yékaka chati sitíi oláami ma 'yemi mi yuwa napawí mapurigá bichíyami niráa, chopi aboni ketasi galá bichíyami ju. A'lí wabé chabé jonsa osirúami níili echo'ná Riosi Ra'íchala oselíwalachi mapurigá Riosi arígá walú kastigo 'yama echiyiri chati sitíi oláami pagótami. Echi jaré aboni ne wabé simírami chati sitíi oláami ju, chopi aboni ne wabé 'yékaka aní mapu galá risensia ju echirigá chati chuwé ologá pirélawa, mapalita ma sinepi bichíili Riosi Ra'íchala. A'lí aboni waminabi aní mapu ata echirigá chati chuwé olásagá, Riosi ketasi tamujé tamí kastigo 'yama. A'lí echirigá 'yékaka nawésaga aboni arígá machira mapu aboni ketasi galá bichíyami ju Riosi, ayénachó mapu aboni ketasi bichíi Jesucristo niráa. Chopi echi Walubela Riosi tamujé Walubélawala ju, ayénachó tamujé bichíyami Binói níwala ju, ayénachó Jesucristo tamujé Walubélawala ju.

⁵'Yémítamo ma galá machí je'ná jeyiri, chopi nijeni nakí auchecho siné 'yemi mi ruyénala mapurigá chabé ki'yá mapalí echi Walubela Riosi ku'wíraga machí a'wali echi jaré Isaeli pagótami echo'ná Ejíptochi anilíwachi kawírali jonsa, a'lí pe

wakinánala Binói arigá suwaba suwábali echí jaré aboni mapu ikí ketasi bichíliko. ⁶Ayénachó Riosi sinibí niráa echo'ná wabé rokowárali jiero wiya jiti bulugá tibuta si'néami echí jaré Binói kapitánawala mapu ikí chabé ki'yánala wabé chati sitíi ologá waminá ariweli mapurigá Riosi wabé o'wéala niráa jáwali aboni. ⁷A'lí echo'ná Sorómachi anilíwachi walúlachi piréami pagótami, ayénachó echo'ná Gomórachi anilíwachi walúlachi piréami, ayénachó echo'ná auché jaréana mulubé o'wéalachi piréami pagótami, si'néami walubé kastigo 'yárami níili chabé ki'yá mapalí aboni suwaba ikósaga suwábarami níili echí sinibí rajáami na'í jiti mapujiti si'néami aboni achigórigá wabé simírami chati chuwé olali, ayénachó mapujiti aboni sinibí wabé nakili echirigá si'winárigá chati sitíi olána, achigórigá mapurigá echí jaré pe okuá Riosi kapitánawala chati sitíi olali. Echalí echí chati sitíi oláami pagótami echirigá ne walubé kastigo 'yárami níili mapurigá jipi piréami pagótami ne wabé majajáratami níima, ayénachó mapurigá aboni ketasi achigórigá chati chuwé olama.

⁸Chopi je'ná jaré jipi piréami chati sitíi oláami rijói arigá ketasi majawá. Aboni ketasi galá machigá, arigá wabé chati chuwé olá, aboni sapálachi niráa. A'lí aboni ketasi njewa echí Walubela Jesucristo, nibilé cho majáami ju sayéraga ra'íchiya echí riablo níwala o'wéala, mapu wabé simírami omériami ju, ketasi mapurigá aboni. ⁹Chopi chabé ki'yánala mapalí echí walula Riosi kapitánawala Migueli riwéami sayéraga ra'íchali echí riablo, mapalí aboni a'nagupi irétaga ra'íchali mapu chigá 'nalí chapimea riwéali echí Moisesi ma mukúami, echalí echí walula Riosi kapitánawala Migueli riwéami ketasi chirigá wabé yóniga wi'nijili echí riablo. Chopi echí Migueli jeaneli: Galá níima mapurigá echí Walubela Jesucristo mi wabé yóniga wi'nijima. ¹⁰Chopi echí jaré jipi piréami chati sitíi oláami rijói ne wabé sitíla ané echí jaré namuti mapu aboni ketasi machí. A'lí aboni wabé chati chuwé olá mapurigá echí jaré jobátami namuti mapu tarapé 'nátami ju, chopi arigá wabé chati chuwé olá. Echijiti je'ná jaré chati sitíi oláami rijói walubé kastigo agá, waminá suwábarami níima.

¹¹¡Báaji, echí jaré aboni ne wabé risúu nílama! Aboni chopi chati chuwé olali mapurigá echí Kaíni riwéami rijói olali. A'lí aboni waminá chakena simíbali mapujiti aboni wabé simírami koruli wenomí achigórigá mapurigá echí Balami riwéami rijói wabé koruli. A'lí aboni waminá suwábarami níima achigórigá mapurigá echí Koré riwéami rijói waminá suwábarami níili mapujiti binói wabé sayéralli Riosi nulalila. ¹²Ne wabé riwéalawami ju mapu echí jaré chati sitíi oláami pagótami 'yemi mi yuwa napawí, mapalítamo napawika wabé kaníliga ko'wá ritémtami niráa, mapujiti aboni chopi wabé ko'wéami ju, ayénachó wabé kaníliga bajíami ju, chopi aboni tarapé o'wikéami ju echí Walubela Jesucristo niráa. A'lí aboni mapurigá bo'wá niséami ju mapu aboni chopi niráa tibútaga, waminá ariwé echí jaré bo'wá. A'lí aboni kanápuromí torúami ju mapurigá echí nolí, iká jiti torúami, mapu ketasi ukúami ju. Ayénachó aboni achigórigá ju mapurigá jaré masana tarapé rakéami niráa, mapu osá niráa mukúami ju, ma galá opórami niráa. ¹³Ayénachó aboni achigórigá chuwé oláami ju mapurigá echí walú ba'wí mapalí we aparúami niráa apulaka chiponó echo'ná suwé. Abóniko wabé chuwé, ne wabé simírami riwélawami olá mapurigá echí walú ba'wí we chuwé chipoka, wabé simírami ronena. Ayénachó aboni achigórigá 'wigáami ju mapurigá jaré sopolí mapu waminá rujuní. A'lí aboni ma waminá wi'nijírami ju; echijiti aboni sinibí niráa muchuwárami níima echo'ná ne wabé simírami rokowárali.

¹⁴A'lí echí ki'yánala bitéami Enoka riwéami rijói ayénachó nawésali echí jaré chatí sitíi oláami pagótami jiti rugá, mapalí Riosi 'natárali mapu churigá nawisama. A'lí ki'yá chokichí mapalí echí bachá wilfámi rijói Arani riwéami bitéali, pe wakináala bitéali echí Enoka, mapujiti echalí mapalí echí Arani bitéali, echalí jonsa usani 'wéntami simáraga, a'lí ranálati echí Enoka. A'lí echí Enoka nawésali echí jaré chatí sitíi oláami pagótami jiti rugá mapalí jeanili: Nijeni riwíralati mapu churigá echí Walubela ku nolínama jena'í wichimóbachi, ne wabé simírami wikabé echí jaré Binói níwala pagótami yuwa, ¹⁵mapurigá Binói justicia olama ne si'néami echí chatí sitíi oláami pagótami. Echalí Binói ne wabé walubé kastigo 'yama si'néami echí jaré chatí sitíi oláami pagótami, mapujiti aboni ne sébali chatí sitíi olali mapalí aboni chatí sitíi ologá piréali. Ayénachó Binói walubé kastigo 'yama echí jaré chatí sitíi oláami pagótami mapujiti aboni wisabé wabé kichiga ra'íchali Binói sayéraga. ¹⁶Echi jaré chatí sitíi oláami pagótami wabé na'áwami ju, a'lí aboni tarapé siné galá kaníla. A'lí aboni ne sinibí olá mapurigá aboni chopí nakí olánala. Ayénachó aboni chopí galabé su'wé anigá ra'ícha echí auché jaré pagótami mapalí aboni echirigá 'yékaka niráa nakí 'yénala aboni níwala namuti.

San Júrasi galá ruyé echí jaré galá bichíyami

¹⁷Chopi ne galá ku 'natasi 'yemi ritémtami ne wabé galérami, mapurigá echí jaré ritémtami chabé jonsa 'yemi mi nawésali, si'néami mapu ikí Jesucristo jiti julárami níili nawisánala. ¹⁸Mapujiti aboni 'yemi mi nawésali jeanigá: Echalí ne jubá rawé jena'í wichimóbachi nirúlama jaré chatí sitíi oláami pagótami mapu ne wabé sitíila anema echí Galabé Riosi Ra'íchala, ayénachó aboni wabé chatí chuwé ologá pirélama mapurigá aboni chopí nakimea chatí sitíi olánala. ¹⁹A'lí je'há jaré chatí sitíi oláami pagótami ju mapu 'yemi mi wikanáami rojuana. A'lí aboni ketasi níwa echí Wabé Galabé Riosi Iwigala. Aboni chopí ologá piré mapurigá jena'í wichimóbachi piréami ke bichíyami pagótami olá.

²⁰Chopi 'yemi ritémtami wabé galérami, waminabi galá bichíisi echí Galabé Bichílawami. Sinibí Riosi yuwa ra'ichási, mapurigá echí Wabé Galabé Riosi Iwigala 'yemi mi jiwrata. ²¹Sinibí galá bichíisi mapurigá Riosi echijiti galá omérama 'yemi mi waminabi galée. Galá bichíiga buwesi echalí rawé yénasí mapalí tamujé Walubélawala Jesucristo wabé natimaga tamujé tamí 'yama mapurigata sinibí piréami níbota.

²²Galá bichíiratasí echí auché jaré mapu ketasi cho galá bichíi. ²³Galá bichíiratasí auché jaré mapurigá aboni ketasi kastigo 'yárami níima, sinibí niráa, echo'ná ri'lé riáblochi walubé rajáachi. Sinibí ne galá natimasi echí auché jaré ke bichíyami pagótami, chopí galá tibutasi 'yemi aboni niráa, mapurigátamo ketasi achigórigá chatí sitíi olabo. Sinibí ne wabé chijúnasi suwaba aboni chatí sitíi olalila, achigórigá mapurigátamo chijuna bilé napachala ne wabé choliwéami.

Ne jubáami niráa, echí Júrasi ne wabé walubéraga ané Riosi

²⁴⁻²⁵Echi bilepi suwaba omériami Riosi tamujé tamí Ku'wíimi ju. Échiko ne wabé omériami ju 'yemi mi tibútiya, mapurigátamo ketasi chatí sitíi olabo. A'lí echí Walubela Riosi 'yemi mi bayérama Binói yuwa mapo'ná suwaba namuti ne galabé ba'yóami níima. A'lí bichétamo tarapé wi'nijírami níbo, chópitamo ne wabé simírami kanílabo. Galá níima mapu echí Walubela Riosi chopí waminabi

walubéraga anérami níima, ayénachó mapu Binói chopi ne wabé Walubela níima, ayénachó mapu Binói Riosi chopi ne sinibí niráa wabé jiwériga nulema si'néami echi jaré pagótami, echi Walubela Jesucristo jiti, mapurigá Riosi sinibí ne Walubela níili, ayénachó mapurigá ne Walubela ju jipi rawé, ayénachó mapurigá ne Walubela níima sinibí niráa, ne sinibí. ¡Echirigá níima!

JESUCRISTO

bachá niráa machírali echi

JUANI

mapurigá ikimea echalí ne jubá rawé

1 Echi Walubela Riosi Onorúami je'ná jerigá riwírali echi Walubela Jesucristo, mapurigá Binói ayénachó echirigá machírama echi jaré Binói níwala galá bichíyami pagótami mapu Binói piónawala niráa ju, mapurigá aboni galá machimea suwaba mapurigá ke 'me ayó echirigá ikimea. A'lí Jesucristo júuli bilé Binói kapitánawala tamí je'ná jerigá riwíranala, mápuni Juani riwéami ju, mápuni Jesucristo piónawala niráa ju. ² A'lí nijeni nawésaga ruyé echi auché jaré pagótami ne suwaba mapu ikini echirigá riwali. A'lí ne suwaba mapu ikini echirigá ruyé, ne bichíwali ju. Ayénachó nijeni we nawesa Riosi Ra'íchala, jeanigá mapu ne Bichíwali ju, ayénachó mapu Jesucristo nawésawala ne Bichíwali ju.

³Ne galá kanlíiami nílaga mapuyíripi galá 'néniga machiko je'ná mapurigá osirúami ju, ayénachó galá kanlíiami nílaga si'néami mapu ikí galá kipunuko mapalí auché bilé galá 'néniga ruyé aboni je'ná jerigá mapurigá osirúami ju, mapalí aboni ayénachó galá nijéwaga olá mapurigá je'ná jerigá osirúami ju, mapujiti ke 'me ayó ne suwaba achigórigá ikimea mapurigá jena'í osirúami ju.

Echi Juani oseli kicháona piréami napawika bichíyami ritémtami

⁴Nijé Juani je'ná jerigá osé echi jaré napawika bichíyami, kicháona napawíami, echo'ná Ásiachi anilwachi kawíralí. Ne wabení nakí mapu Riosi Onorúami 'yemi mi waminabi ne wabé ku'wírama, ayénachó mapu Binói 'yemi mi 'yama mapurigátamo kilí ologá pirélabo. Echi Walubela Riosi ne wabé Walubela ju jipi rawé, ayénachó ki'yá chokichí ne Walubela níili, ayénachó Binói ne Walubela níima ne sinibí niráa. Ayénachóni nakí mapu echi Wabé Galabé Riosi Iwigala 'yemi mi echirigá 'yama. A'lí echi Wabé Galabé Riosi Iwigala ne wabé simírami galabé ju, kicháosa yénasí simírami, ayénachó echi Wabé Galabé Riosi Iwigala echo'ná bacháami Riosi yuwa atí, echo'ná wabé ripabé Binói asíbalachi. ⁵Nijeni ayénachó nakí mapu Jesucristo echirigá 'yemi mi 'yama. Echi Walubela Jesucristo sinibí ne Bichíwali aní. Chabé ki'yá mapalí Binói mukúami níili, echalí Jesucristo ne bachá ku owíñali mapurigá ne si'néami echi jaré galá bichíyami ritémtami mapu ikí ma suwíami ju, ayénachó ku o'wínama waminánomí. Echi Walubela Jesucristo nuléami ju ne si'néami echi jaré o'wéala jena'í wichimóbachi piréami yuwa. A'lí Jesucristo tamujé tamí ne wabé galigá ku bi'wama Binói lalá jiti, ne suwaba mapurigata chati olali, mapujiti

Binói wabé léntiga mi'lirúami níili tamujé chati olalila jiti. ⁶Ayénachó Jesucristo ma tamujé tamí jáwali mapurigata o'wéala niráa níibo Riosi yuwa, mapurigata chopi olabo mapurigá Riosi nakí, echi mapu Jesucristo Onolá ju. A'lí echi bilepi Jesucristo tamujé tamí jáwali mapurigata olabo mapurigá sacerdote niráa Riosi yuwa. ¡Galá níima mapurigá Jesucristo sinibí niráa waminabi walubéragera anérami níima ne sinibí niráa! ¡Echirigá nílaga!

⁷¡Galá machisí mapurigá Jesucristo echo'ná ripana nolírali ku nolínama, jena'í wichimóbachi ku nawayá! Echalí ne si'néami pagótami jena'í wichimóbachi tibíami galá riwimea Binói echirigá ku nawáachi. A'lí echi jaré rijói mapu clavo jiti michónali Jesucristo echo'ná kúrsichi ayénachó galá riwimea Binói echirigá ku nawáami. Echalí ne si'néami pagótami mapu ikí abijí tibímako jena'í wichimóbachi, ne wabé majaga, wabé nalákama mapalí aboni riwimea Jesucristo echirigá ku nawáachi. Ne bichíwali echirigá ikimea.

⁸Echi Walubela Jesucristo mapu ne suwaba omériami ju, Échiko je'ná jerigá aní: Nijeni ne bachá niráa ju, mapurigá echi binékowami "A" anilíwami ne bachá ju, ayénachóni ne jubá níima, mapurigá echi binékowami "Z" anilíwami ne jubá ju.

Echi Walubela Jesucristo arigá bitéami ju jipi rawé, ayénachó Binói bitéali kilyá chokichí, ayénachó ke 'me ayó Binói auchecho siné ku nolínama jena'í wichimóbachi.

Echi Juani mapurigá rimuka niráa riwali Jesucristo ne wabé Walubela niráa

⁹Nijé, Juani, 'yemi rijimala juni mápuni galá bichíi Jesucristo niráa, ayénachó nijeni achigórigá risúu olárami ju mapurigá 'yemi niráa, chópini arigá wabé walubératami níima achigórigá mapurigá 'yémítamo wabé o'wélatami níibo Jesucristo yuwa waminánomí. Ayénachó nijeni kilí ologá bité achigórigá mapurigá Riosi 'yemi mi 'ya máputamo kilí ologá piré. ¹⁰A'lí siné oméachi rawé echi Wabé Galabé Riosi Iwigala tamí machírali je'ná jeyiri namuti: Echalí nijeni ke sayiná námali kuwana ripopa bilé wabé iwéami Ra'íchami, ne wabé anéami mapurigá bilé korneta niráa, ¹¹mapu tamí jeanseli: Nijeni ne bachá ju, mapurigá echi binékowami "A" anilíwami ne bachá ju, ayénachóni ne jubá níima mapurigá echi binékowami "Z" anilíwami ne jubá ju. Biléana oselichi osá suwaba mapu ikimi ritiwá. A'lí náali echo'ná kicháona napawika bichíyamichi echo'ná Ásiachi anilíwachi kawírali. Echirigá náawali echo'ná Ejésochi anilíwachi, echo'ná Esamírnachi anilíwachi ayénachó, echo'ná Pérgamachi anilíwachi ayénachó, echo'ná Tiatírachi anilíwachi ayénachó, echo'ná Sálisichi anilíwachi ayénachó, echo'ná Jilaréjiachi anilíwachi ayénachó, echo'ná Laoriséachi anilíwachi asíchiko. ¹²A'lí bicheni jubá okuá ku kuwana 'neli mapu Chígá tamí ra'íchali. Echalini echo'ná riwali kichao oro niwárami, echi rajilí jawálawami. ¹³Ayénachó echo'ná mapo'ná echi kichao rajilí jawálawami jari nijeni riwali echo'ná nasipa wilíiami echi Walubela Jesucristo, echi mapu wilí napáchami níili ronochí yénasí sébami; ayénachó bilé mapuyiri puli, oro niwárami, echo'ná Binói sulálachi ayé norigá bulérami níili. ¹⁴Ayénachó Binói kupala ne wabé simírami rosákami níili, mapuyiri bo'osalí ne wabé rosákami, mapurigá kipá niráa. A'lí Binói busila ne wabé ratábami níili mapurigá walú rajáami niráa. ¹⁵A'lí Binói ralala ne wabé ratábami níili, mapurigá bilé namuti mapuyiri jiero lánami, mapurigá echi pagótami ne wabé simírami ratabáchaka, waminá basúnaga, ne wabé simírami ratábami niwá. A'lí mapalí echi Walubela Jesucristo ra'íchali, echalí ne wabé iwéami anéami níili, mapurigá sinepi niráa ne wabé simírami ané wikanáami bakochi.

¹⁶ A'lí Binói wilili kichao sopolí echo'ná Binói sikálachi watoná. A'lí echo'ná Binói chumulachí jonsa machínali bilé wi'libé ripiyá, okóna oláami. A'lí Binói cho'olá ne wabé ratábami níili mapurigá echí rayénali niráa, mapalí ne wabé galá rayena.

¹⁷ A'lí mapalí nijeni riwali, echalí echo'ná bacháami mapo'ná Jesucristo wi'lili, nijeni ri'lé bu'wíbali mapurigá ma mukúami niráa, mapujiti Binói ne wabé ratábami níili. A'lí nijeni ketasi omérali waminabi 'nénlya. Echalí Jesucristo tamí nochali Binói sikala jiti. A'lí Binói tamí jeaneli: Ketasi majá. Nijeni ne bachá ju, ayénachóni ne jubá níima. ¹⁸ Nijeni ju mápuni sinibí bité. Chabénala Nijeni waminá mukuli, chopi jípini ma ku bitéami ju, ne sinibí niráa. A'lí Nijeni wabé omériami ju mapurigani nulama mapurigá echí jaré pagótami waminá suwimea, ayénachóni níwa echí jaré irápala mapurigani ku irápama echo'ná mapo'ná echí jaré suwíami 'yératami ju. ¹⁹ Jipi biléana oselichi osá suwaba mapu ikimi riwali. Echirigá osá suwaba echí jaré namuti jiti rugá mapu ikí nirú jipi rawé, ayénachó osá echí auché jaré namuti jiti rugá mapu ikí ikimea waminánomí. ²⁰ Je'ná jerigá aniwáami ju echí jaré kichao sopolí mápumi riwali watoná níje sikálachi, ayénachó je'ná jerigá aniwáami ju echí kichao oro niwárami, echí rajilí jawárawami: Echi jaré kichao sopolí echí kichao Riosi kapitánawala ju, mapu Nijeni júuli tibúnala si'néami echí jaré napawika bichíyami ritémtami echo'ná kicháona o'wéalachí piréami. A'lí echí kichao oro niwárami, echí rajilí jawárawami, echí ju ne si'néami echí jaré napawika bichíyami ritémtami echo'ná kicháona o'wéalachí piréami.

**Jesucristo nuleli echí Juani osénala echí jaré napawika
bichíyami echo'ná Ejésochi piréami**

2 Echalí echí Walubela Jesucristo waminabi tamí jeaneli: Mujé, Juani, je'ná jerigá osé echí walula Riosi kapitánawala mapu galá tibuta echí jaré napawika bichíyami echo'ná Ejésochi piréami, mapurigá échiko jerigá ruyema si'néami aboni: Echi Walubela Jesucristo wilí kichao sopolí echo'ná Binói sikálachi watoná, ayénachó Binói echo'ná nasipa iyena mapo'ná echí kichao rajilí jawálawami jawi. Échiko 'yemi mi je'ná jerigá ané: ² Nijeni galá machí suwaba mapurigátamo olá. Nijeni galá machí mapurigátamo ne wabé simírami nocha, ayénachó mapurigátamo galá kilí ologá piré. Ayénachóni galá machí mapurigátamo ketasi wi'lí anacha echí jaré chati oláami pagótami yuwa 'yena. Nijeni galá machí mapurigá 'yémítamo bachá niráa galá rukugá machili echí jaré mapu 'yékaka chopi aní mapu Nijeni júuli aboni nawisánala. Echirigátamo galá machili mapu echí jaré aboni ne wabé 'yékami ju, mapujiti Nijeni ketasi júuli aboni nawisánala. ³ 'Yémítamo kilí ologá anáchali mapalítamo wabé risúu olárami níili mapujítitamo tamí bichíili, ayénachótamo ma ne wabé nóchali, Nijé nóchala olayá. A'lí bichétamo ketasi ariweli bichiya, chópitamo waminabi nokuísali Nijé nóchala olayá. ⁴ Chopi Nijeni 'yemi mi wi'nijí mapujiti jípitamo ketasi ne wabé simírami tamí galé, mapurigátamo tamí galeli chabé chokichí. ⁵ Echijiti galá ku 'natasi mapurigátamo ma ke 'me tamí galé, mapurigátamo chabé chokichí ne wabé simírami tamí galeli. Jipi auchecho tamí echirigá wabé simírami galesi. Suwaba auchécho galabé olasi mapurigátamo galabé olali chabé chokichí, mapujiti átamo ketasi echirigá olásagá, Nijeni ke 'me ayó ku nawama echo'ná 'yémichi. A'lí Nijeni ku 'yema echí oro niwárami rajilí wilalíwami, átamo ketasi tamí auchecho ku wabé simírami galésagá; mapujiti átamo ketasi tamí galésagá 'yémítamo arígá ketasi galá tamí bichíi, napawika

bichíyami niráa. ⁶Chópitamo arigá je'ná galá olá, máputamo we kichí mapurigá olá echi jaré mapu wabé binera chuwé ologá pirérana la echi auché jaré pagótami, mapurigá echi bilé Nikolasi riwéami rijói we binerali. Nijeni ayénachó wabé kichí aboni olalila. ⁷Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawika bichíyami ritémtami: Ne si'néami echi jaré pagótami mapu ikí tamí bichíiko, abóniko galá nayura. A'lí Nijeni 'yama mapurigá aboni ko'mea echi bilé namuti rakala mapu ichirúami ju echo'ná ripá riwigachi, echi mapu galá nijá mapurigá sinibí niráa pirélama si'néami mapu ikí ko'wako echi raká.

**Jesucristo nuleli echi Juani osénala echi jaré napawika
bichíyami ritémtami echo'ná Esamírnachi piréami**

⁸Ayénachó echi Walubela Jesucristo tamí jeaneli: je'ná jerigá osé echi walula Riosi kapitánawala mapu galá tibuta echo'ná Esamírnachi piréami napawika bichíyami ritémtami mapurigá échiko je'ná jerigá ruyema ne si'néami aboni: Nijeni ne bachá ju, ayénachó Nijeni jubá níima. Nijeni chabénala waminá mukuli, chópini auchecho ku bitéali. Nijeni 'yemi mi jeané: ⁹Nijeni galá machí suwaba mapurigá 'yémitamo olá. Galani machí mapurigátamo wabé risúu olárami ju, ayénachóni machí mapurigá 'yémitamo ne wabé tisúwati ju, chópitamo arigá ne wabé níwami ju Riosi yuwa. Ayénachóni galá machí mapurigá echi auché jaré 'yemi mi ne wabé sitila ané. Echi jaré aboni ne wabé nóchaga aní mapu aboni Juríosi pagótami ju, chopi aboni ketasi ne bichíwali Juríosi pagótami niráa ju. Abóniko chopi napawika niráa we o'wikéami ju echi Satanasi riwéami riablo. ¹⁰Ketasi majasi mapurigátamo karúmati jiti risúu olárami níibo waminánomí, mapujiti echi riablo ne bichíwali 'wérali olama mapurigá jaré 'yemi pachá mo'wárami níibo echo'ná kumurachi, mapurigá si'néami 'yemi wabé risúu olárami níibo makói rawé iyénasí. Chopi sinibí galá bichfisasi mapuyénasítamo waminá suwí, a'lí Nijeni 'yemi mi kóoga 'yama mapurigátamo sinibí niráa ku pirélabo. ¹¹Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawika bichíyami ritémtami: Ne si'néami echi jaré pagótami mapu ikí bichíiko Jesucristo niráa, abóniko galá nayura, a'lí aboni tarapé risúu olárami níima echalí ne jubá rawé, mapalí echi auché jaré ke bichíyami pagótami walú kastigo 'yárami níima.

**Jesucristo nuleli echi Juani je'ná jerigá osénala echi jaré napawika
bichíyami ritémtami echo'ná Pérgamachi piréami**

¹²Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Pérgamachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijeni níwa echi wi'llibé ripiyá, okoná oláami. Nijeni 'yemi mi jeané: ¹³Nijeni galá machí suwaba mapu ikí 'yémitamo olá, ayénachóni machí máputamo piré echo'ná biléana walúlachi mapo'ná echi Satanasi riwéami riablo we nulé echo'ná piréami pagótami mapurigá aboni walúlawala niráa, chópitamo sinibí arigá galá bichiña nawesa jeanigá máputamo galá tamí bichiña. A'lí bichétamo ketasi siné ariweli tamí bichiña, nibilé chótamo ariweli echalí rawé mapalí echi Antipasi riwéami rijimala waminá mi'lirúami níili echo'ná 'yemi walúlawalachi, mapo'ná echi Satanasi riwéami riablo we nuláami ju. A'lí echi Antipasi chopi echirigá mi'lirúami níili mapujiti binói

sinibí galá bichíwaga nawésami níili Nijé Ra'íchala.¹⁴ Chopi Nijeni arigá 'yemi mi wi'nijí pe okuáa namuti jiti: Jaré 'yemi arigá olá mapurigá echi Balami riwéami rijói binérali olánala, mapujiti échiko binérali echi Balaka riwéami walula silíami mapurigá binói chati olírama echi jaré Isaeli pagótami mapuyénasí aboni arigá ko'wali echi jaré namuti mapu bachá niráa 'yárami níili echi jaré amachíkarawami namuti, ayénachó mapuyénasí aboni wabé chati ologá chuwé bilétali yuwa kochili.¹⁵ Ayénachó echo'ná 'yémichi nirú jaré mapu we binera echi auché jaré pagótami chuwé ologá pirélanala, mapurigá echi Nikolasi riwéami rijói olali. A'lí Nijeni we kichí echirigá binékowami.¹⁶ Echijiti si'nú, bukulíwami ku galabé 'nátaga ku ro'wisi Riosi yuwa. A'lí átamo ketasi echirigá olásagá, Nijeni ke 'me ayó nawama echo'ná 'yémichi. Echalí Nijeni sayérama echi jaré mapu arigá olá mapurigá echi Nikolasi riwéami rijói binera. Nijeni sayéraga nikoma aboni echi wi'llibé ripiyá jiti mapu okoná oláami ju, echi mapu Nijé chumulachi jonsa machina. Echirigá aniwáami ju mapu Nijeni nikoma aboni sayéraga, Nijé Ra'íchala jiti.¹⁷ Si'néami 'yemi máputamo námiami juko, galá namsi mapurigá echi Wabé Galabé Riosi Iwigala jeané echi jaré napawíkami bichíyami ritémtami: Ne si'néami echi jaré pagótami mapu ikí galá tamí bichíiko, abóniko galá nayura, a'lí Nijeni 'yama mapurigá aboni ko'mea echi ko'wáami, ripá riwigachi jonsa nawáami, maná anilíwami, echi mapu chiná nasótami ju. Ayénachóni 'yama ne si'néami ibílipi rité tosákami. A'lí echo'ná ibílana ritérali auché si'nú ne bukulíwami riwalá osirúami nfíma, echi mapu ketasi wesi machimea. A'lí echi mapu naré, échiko chopi galá machimea.

**Jesucristo nuleli echi Juani je'ná jerigá osénala echo'ná
Tiatírachi piréami napawika bichíyami ritémtami**

¹⁸ Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Tiatírachi anilíwachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijé ju echi Walubela Riosi Ranala mápuni wabé ratábami niráa busé mapurigá rajáami niráa, Nijeni ayénachó ne wabé ratábami ralé mapurigá bilé namuti mapuyiri jiero lánami, mapurigá echi pagótami ne wabé ratabáchaka, waminá basúnaga, ne wabé simírami ratábami niwá. Nijeni 'yemi mi jeané:¹⁹ Nijeni galá machí suwaba mapu ikí 'yémitamo olá, máputamo ne wabé galéami ju, ayénachó máputamo galá tamí bichíi, ayénachó máputamo we nocha, Nijé nójchala olayá, ayénachó máputamo galá kilí ologá piré. Ayénachóni machí mapurigá jípitamo ne wabé simírami olá, ketasi mapurigátamo olali chabé chokichí mapalítamo bachá niráa tamí bichíili.²⁰ Chópini 'yemi mi wi'nijí bilé namuti jiti: 'Yémitamo arigá ariwé mapurigá echi we chati oláami mukí, Jesabeli riwéami, we binéraga chati olírata echi jaré Nijé níwala pagótami, mapurigá aboni chuwé bilétali yuwa kochimea, ayénachó mapurigá aboni we ko'wá echi jaré namuti mapu bachá niráa 'yárami níili echi jaré amachíkalawami namuti. A'lí echi Jesabeli we 'yékaka aní mapu binói galabé nawesa Riosi Ra'íchala, chopi ketasi bichíwali ju.²¹ Nijeni wi'llibé rawé bweli mapurigá echi mukí si'nú, bukulíwami ku galabé 'nátaga ku ro'wima tamí yuwa, chopi binói ketasi chirigá nakili ku ro'wínala tamí yuwa, chopi wabé chati chuwé olánali mapurigá echi pagótami chati olá mapalí aboni chuwé bilétali yuwa we kochí.²² Jipi Nijeni ne wabé nayútama echi mukí mapurigá binói chopi nayúu bu'wimea echo'ná biléana jubechi. Ayénachóni ne wabé risíu

nílatama si'néami echí jaré rijói mapu ne wabé chati ologá kochiko echí mukí yuwa. Echirigani olama a aboni ketasi si'nú, bukulíwami ku galabé 'nátaga ku ro'wisa tamí yuwa, mapurigá aboni echirigá ariwema chati olayá mapurigá echí mukí we chati olá.²³ Ayénachóni ko'wimea echí mukí kúchuwala. A'lí ne suníami piréami napawika bichíyami ritémptami galá machimea mapu Nijeni wabé simírami machíami ju echí jaré pagótami 'nátawala, mapalí aboni chiná niráa 'nata aboni sulálachi. A'lí Nijeni 'yemi mi ibili niráa kastigo 'yama, achigórigá mapurigátamo chati olali.²⁴ A'lí echí jaré mapu ikí bichíili mapurigá echí wabé chati oláami mukí binérali, abóniko aní mapu echí ne wabé simírami chati 'natálawami arigá galá ju, mapujiti echí ne wabé 'nátami Satanasi riwéami riablo 'nátawala ju. Chopi auché jaré 'yemi echo'ná Tiratírachi piréami ritémptami ketasi bichíili mapurigá echí chati oláami mukí binérali, nibilé chótamo machili echí wabé simírami chati 'natálawami. Jipi Nijeni 'yemi mi ané mápuni ketasi 'yemi mi 'yama auché jaré isena nulalíwami.²⁵ Chopi mapurigá Nijeni ma 'yemi mi nuleli, echirigá galá nijéwaga olasi mapuyénasí Nijeni ku nawama.²⁶ Ne si'néami echí jaré pagótami mapu ikí tamí bichíiko, abóniko galá nayura. Echijiti Nijeni jawama, o'wéala niráa, ne si'néami aboni mapu ikí sinibí galabé olako mapurigá Nijeni nakí mapurigá aboni olama, mapuyénasí aboni piré jena'í wichimóbachi. Echalí Nijeni jawama aboni mapurigá o'wéala niráa, mapurigá aboni nulema echí auché jaré pagótami ne suníami jena'í wichimóbachi piréami,²⁷ achigórigá mapurigá Nijé Onolá tamí wilali mapurigá Walubela niráa, mapurigani nulema jena'í wichimóbachi piréami pagótami mapurigá aboni Walubélawala niráa. Echalí aboni nulema echí auché jaré pagótami mapurigá ne wabé o'wéala niráa, ayénachó aboni ne wabé omériga olama mapurigá bilé rijói wipisoka mojuana bilé sikolí, bilé bareta jiti.²⁸ A'lí Nijeni ayénachó 'yama aboni echí walú sopolí ri'lisópali mapu bi'yá bijí machina.²⁹ Si'néami 'yemi máputamo námiami juko, galá namsi mapurigá echí Wabé Galabé Riosi Iwigala ané echí jaré napawika bichíyami.

**Echi Walubela Jesucristo nuleli echí Juani je'ná jerigá osénala
echo'ná Sárisichi piréami napawika bichíyami ritémptami**

3 Ayénachó echí Walubela Jesucristo tamí jeaneli: Je'ná jerigá osé echí walula Riosi kapitánawala mapu galá tibuta echo'ná Sárisichi anilíwachi piréami napawika bichíyami ritémptami, mapurigá échiko je'ná jerigá ruyema ne si'néami aboni: Nijeni suwaba níwa echí Wabé Galabé Riosi Iwigala, ayénachó Nijeni chapísá wilí echí kichao sopolí Nijé sikálachi niráa. Nijeni 'yemi mi jeané: Nijeni galá machí ne suwaba mapurigá 'yémitamo olá. Nijeni machí máputamo ketasi sinibí piréami ju, chopi echí auché jaré pagótami mayé máputamo arigá ologá piré mapurigá Nijeni nakí máputamo olabo.² Ne galá 'nagá, galá 'nátami nílasi, mapujiti 'yémitamo ketasi 'me galabé oláami ju. 'Yémitamo péebi galá olá, chopi jipi jonsa sinibí ne wabé galabé olasi, mapujiti Nijeni ma riwali mapu 'yémitamo ketasi ne sébali galabé oláami ju bacháami Riosi yuwa.³ Galá ku 'natasí mapurigátamo ma binératami nílili Riosi Ra'íchala. Ayénachó echirigá galabé olasi mapurigátamo binératami nílili. Si'nú bukulíwami ku galabé 'nátaga ku ro'wisi Riosi yuwa, mapujiti átamo ketasi echirigá olásagá Nijeni ku nawagá 'yemi mi ke sayiná kastigo 'yama, mapurigá bilé chigórami ke sayiná nawá, a'lí bichétamo ketasi machí mapu chuyénako Nijeni echirigá ku nawama.⁴ Chopi pe okuáa 'yemi echo'ná Sárisichi piréami ketasi

chónali 'yemi napáchala. Echirigá aniwáami ju mapu echi jaré pe okuáa 'yemi ketasi echirigá chati ologá piréali. Echijiti aboni ne wabé rosákami napáchaga tamí yuwa 'yénama echo'ná ripá riwigachi. A'lí galá ju mapu Nijeni echirigá 'yama, mapujiti aboni ketasi chati ologá piréali.⁵ Ne si'néami echi jaré pagótami mapu ikí galá tamí bichíiko, abóniko galá nayura. A'lí Nijeni 'yama mapurigá aboni ne galá tosákami napáchama echo'ná ripá riwigachi. A'lí aboni riwalá oselichi osirúami ju echo'ná ripá riwigachi. A'lí biché aboni sinibí niráa tamí yuwa pirélama echo'ná. A'lí Nijeni ke siné ku bi'wama aboni riwalá echo'ná osirúami, chopi Nijeni anema echi keni Onó mapu ibili aboni Nijé níwala ju, ayénachóni echirigá anema echi jaré o'wéala Riosi kapitánawala.⁶ Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Jesucristo nuleli echi Juani je'ná jerigá osénala echo'ná
Jilaréjiachi piréami napawika bichíyami**

⁷Ayénachó echi Walubela Jesucristo tamí jeaneli: Je'ná jerigá osé echi walubela Riosi kapitánawala mapu galá tibuta echo'ná Jilaréjiachi piréami napawika bichíyami ritémtami, mapurigá échiko je'ná jerigá ruyema ne si'néami aboni: Nijeni ne wabé simírami galabé ju, ayénachóni ne wabé bichíwali ju. Nijeni bilé ju echi walula silíami Rabiri riwéami kúchala kúchuwala. Nijeni ne Walubela Silíami níima jenaí wichimóbachi, echo'ná ripá riwigachi ayénachó. Echijiti mapalí Nijeni ma irapa, ke wesi omero ku 'yería, ayénachó mapalí Nijeni ku 'yérama, ke wesi omero ku irápia. Ayénachómi jeanema mapu Nijeni je'ná jerigá ané:⁸ Nijeni galá machí suwaba mapu ikí 'yémítamo olá. 'Yémítamo ketasi 'me jiwríga olá chópitamo arigá galá bichíli Nijé Ra'íchala, ayénachótamo galá nawésali jeanigá máputamo galá tamí bichíi. Echijiti echo'ná bacháami mapo'ná 'yémítamo simárabo, echo'ná Nijeni ma irápali biléana yéachi, a'lí ke wesi omérama ku 'yería.⁹ Auché jaré chati oláami pagótami we napawí echi Satanasi riwéami riablo o'wikénala. Abóniko we aní mapu aboni Juríosi anilíwami pagótami ju, chopi aboni ketasi ne bichíwali echirigá ju. Aboni chopi wabé 'yékaka echirigá aní. Nijeni olama mapurigá aboni echo'ná bacháami 'yemi napawika bichíyami yuwa sigá chokoba jábama. Echirigani olama mapurigá aboni galá machimea mapu Nijeni 'yemi mi ne wabé galeli.¹⁰ 'Yémítamo ma galá nijéwali Nijé nulalila, mapurigá Nijeni 'yemi mi nuleli kilí ologá pirélanala. Echijiti Nijeni 'yemi mi tibútama mapurigátamo ketasi risúu olárami níibo echalí ne jubá rawé mapalí echi auché jaré ne suníami jenaí' wichimóbachi piréami echirigá ne wabé simírami risúu olárami níima.¹¹ Nijeni ke sayiná, we yáa ku nolínama. Sinibí waminabi galabé niráa bichíisasi 'yemi, mapurigátamo ma tamí bichíili, mapurigá ke wesi omérama 'yemi mi chati olíriya, mapujiti a echirigá ikitáagá 'yémítamo ketasi narepo echi wabé galabé nijíwami mapu Riosi nakili 'yemi mi 'yánala.¹² Ne si'néami echi jaré pagótami mapu ikí tamí bichíiko, abóniko galá nayura. A'lí Nijeni jawama aboni bacháami tamí yuwa mapurigá aboni sinibí tamí yuwa muchima. A'lí aboni echirigá ne wabé jiwratami níima mapurigá jaré o'weli toni niráa, echo'ná walubé Riosi ri'obáwalachi jawárami. A'lí aboni sinibí niráa echo'ná Riosi yuwa muchima. A'lí echo'ná ibílana abónichi Nijeni osimea echi Nijé Riósawala riwalá, ayénachó Nijeni echo'ná ibílana abónichi osimea echi Nijé Riósawala níwala walúlachi riwalá, echi mapu Bukulíwami Jerusalémachi anilíwachi ju. A'lí echi Riosi níwala walúlachi

echo'ná ripá riwigachi jonsa nawáami ju, echo'ná jonsa mapo'ná Riosi atí. A'lí Nijeni ayénachó osimea echo'ná ibílana abónichi Nijé Binói riwalá ne bukulíwami.¹³ Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichíyami.

**Jesucristo nuleli echi Juani je'ná jerigá osénala echo'ná
Laoriséachi anilíwachi napawika bichíyami**

¹⁴Ayénachó echi Walubela Jesucristo tamí jeaneli: Je'ná jerigá osé echi walula Riosi kapitánawala mapu galá tibuta echo'ná Laoriséachi piréami napawika bichíyami ritémrtami, mapurigá échiko je'ná jerigá; ruyema ne si'néami aboni: Nijeni ne wabé Bichíwali ju, ayénachó Nijeni sinibí niráa ne wabé bichíwaga aní. A'lí Nijeni níili mapu ki'yá chokichí niwáli ne suwaba namuti mapu ikí Riosi niwáli. Nijeni 'yemi mi jeané:¹⁵ Nijeni galá machí suwaba mapu ikí 'yémitamo olá. Galani machí mapu 'yémitamo ketasi tamí kichí, ayénachó máputamo ketasi tamí wabé galé. Echijiti 'yémitamo ketasi mapurigá echi ba'wí ruláami ju mapu Nijeni we nakí bajínala; nibilé chótamo mapurigá echi ba'wí ratáami ju mápuni ayénachó we nakí bajínala, chópitamo mapurigá echi ba'wí péebi ratáami niráa ju, mapu tarapé ra'íami ju. A'lí átamo ketasi tamí wabé galésagá, galá níima máputamo arigá tamí kichisa, chopi máputamo ketasi níibo mapurigá echi ba'wí péebi ratáami niráa, mapu tarapé ra'íami ju.¹⁶ Chopi mapujiti 'yémitamo ketasi tamí wabé galé, ayénachó mapujítitamo ketasi tamí kichí, 'yémitamo chopi mapurigá echi ba'wí péebi ratáami niráa ju, mapu tarapé ra'íami ju. Echijiti Nijeni 'yemi mi waminá waná muchuwama, achigórígá mapurigá Nijeni machí pasá echi ba'wí péebi ratáami echo'ná Nijé rinílachi jonsa, mapujiti ketasi ra'íami ju.¹⁷ Nijeni 'yemi mi echirigá waná muchuwama mapujítitamo aní máputamo ne wabé níwami ju, ayénachó máputamo ketasi risúu nírali, ayénachó máputamo tarapebi yiri namuti newaleli. Chópitamo ketasi machí mapu, bacháami Riosi yuwa, 'yémitamo arigá mapurigá jaré wabé risúu olárami niráa ju, mapurigá ne wabé tisúwati niráa ayénachó, mapurigá ke 'machíliami niráa ayénachó, mapurigá machí sapéami niráa.¹⁸ Echijiti Nijeni 'yemi mi rugá ané mapu galá níima máputamo narepo echi oro anilíwami wenomí mapu wabé galabératami níili echo'ná ne wabé simírami ratáami na'írali, echi mapu Nijeni 'yemi mi 'yama mapurigátamo ne bichíwali wabé níwami níibo tamí yuwa. Ayénachó Nijeni 'yemi mi rugá ané mapu galá níima máputamo narepo echi ne wabé tosákami napacha mapu Nijeni 'yemi mi 'yama, mapurigátamo echi napachasa ketasi waminabi riwélabo mapurigá machí sapéami niráa, Ayénachó Nijeni 'yemi mi rugá jeané máputamo narepo echi busuchí owáami mapu Nijeni 'yemi mi 'yama, mapurigá echi uchésatamo ma galá ku 'machílabo.¹⁹ Nijeni yóniga galá ruyé ne si'néami echi jaré mapu ikí Nijeni wabé galé, mapurigá aboni ketasi chati olama. Echijiti galá níima máputamo galá bichíiga ku ro'wibo tamí yuwa, mapurigátamo chopi olabo mapurigá Nijé nakí.²⁰ Nibira, Nijeni sinibí echo'ná machika yéachi nipawa wilí. A'lí a bilé tamí námsagá, ayénachó a irápasagá, echalí Nijeni bakimea echo'ná pachá binói bitélachi. A'lí Nijeni ko'mea binói yuwa, ayénachó binói tamí yuwa ko'mea.²¹ Ne si'néami echi jaré pagótami mapu ikí tamí bichíiko, abóniko galá nayura. A'lí Nijeni risensia 'yama mapurigá aboni tamí yuwa muchima echo'ná Nijé níwala walubela asíbalachi, achigórígá mapurigá Nijé Binói ma galá bichíiga niyúrali, ayénachóni ma asíbali keni Onó yuwa, echo'ná Binói níwala walubela

asíbalachi. ²² Si'néami 'yemi máputamo námiami juko, galá namsi mapurigá echi Wabé Galabé Riosi Iwigala ané echi jaré napawika bichiyami.

**Echi Walubela Jesucristo sinibí wabé walubéraga
anérami ju echo'ná ripá riwigachi**

4 A'lí suwaba je'ná jerigá ma ikisá, echalí nijeni galá 'néniga riwali echo'ná ripá riwigachi biléana yéachi irápata wilíami. A'lí echi bilé wabé iwéami Ra'íchami, ne wabé anéami mapurigá bilé korneta niráa, echi mapu bachánala tamí ra'íchali, Échiko tamí jeaneli: ¡Wakiná muná! A'lí Nijeni mi 'nérama suwaba mapurigá ikimea waminánomí. ² Echalí we yáati nijeni galá nulérami níili echi Wabé Galabé Riosi Iwigala jiti. A'lí bicheni riwali biléana walubela asíbalachi echo'ná ripá riwigachi nirúami. A'lí bilé Walubela asali echo'ná echi walubela asíbalachi. ³ A'lí echi Walubela mapu echo'ná asali, Échiko ne wabé ratábami níili mapurigá galá rataba echi bilé wabé simati wabé natéami rité, jaspe anilíwami, ayénachó mapurigá we rataba echi auché bilé kornalina anilíwami. A'lí echo'ná Binói níwala walubela asíbalachi ne noligá wilili bilé wabé simati konomí, echi mapu we ratábali mapurigá echi auché bilé wabé simati rité, wabé natéami, esmeralda anilíwami we rataba. ⁴ A'lí echo'ná mapo'ná echi bilé walubela asíbalachi chukuli, ayénachó ne noligá nirúali auché jaré osá makói miná naó o'wéala muchíbala. A'lí bicheni riwali echo'ná muchúami osá makói miná naó o'wéala ochérami ne wabé tosákami napáchami. A'lí ibili aboni oro niwárami koyétarami níili echo'ná aboni mo'ólachi. ⁵ A'lí echo'ná echi ne walubela asíbalachi jonsa ne wabé ni'wili, ayénachó ne wabé iwéami aneli, ayénachó ne wabé ri'oli. A'lí echo'ná echi walubela asíbalachi bacháami kichao rajérami nirúali. A'lí echi kichao rajérami aniwáami níili mapu echi bilepi Wabé Galabé Riosi Iwigala echo'ná asali. ⁶ Ayénachó echo'ná echi ne walubela asíbalachi bacháami nirúali mapurigá biléana wi'lé ipó, ne wabé wi'lé mapurigá echi wi'libé ba'wichí niráa, a'nagú machíami niráa mapurigá echi sipejo ventana niwalíwami. Ayénachó echo'ná walubela asíbalachi ne noligá muchili naó namuti akami, mapu wikabé buséami níili echo'ná bacháami, jubáokuá ayénachó. ⁷ A'lí echi ne bacháala akami namuti mapuyiri bilé mawiyá níili. A'lí echi auché osáala mapuyiri bilé toro níili. A'lí echi auché bisáala mapuyiri rijói cho'ola chu'wéami níili. A'lí echi auché nawosa mapuyiri bilé a'wé i'nísiami níili. ⁸ A'lí echi naó akami namuti ibili niráa usani anéwami níili. Ayénachó ibili wikabé buséami níili echo'ná bacháami, echo'ná jubáami ayénachó. A'lí echi naó akami namuti sinibí rawé, sinibí rokogó tarapé aliweli jeaniyá:

Tamujé Walubélawala, Mujemi ne wabé simírami galabé ju. Mujemi suwaba namuti ne wabé omériami ju.

Mujuemi sinibí níili chokichí jonsa, ayénachó jípimi ne Walubela ju.

A'lí waminánomí Mujemi wabé omériga ku simea echo'ná ri'lé
wichimóbachi.

⁹ A'lí echi naó akami namuti sinibí galabéraga ané echi Walubela Jesucristo mapu echo'ná echi walubela asíbalachi atí, Echi mapu sinibí niráa bité, ne sinibí.

¹⁰ Ayénachó echi jaré osá makói miná naó o'wéala ochérami sinibí echo'ná bacháami chokoba jaba echi Walubela Jesucristo yuwa, mapu echo'ná echi walubela asíbalachi atí. A'lí aboni sinibí niráa echirigá o'wiké echi Walubela Jesucristo mapu sinibí niráa bité, ne sinibí. A'lí si'néami aboni echo'ná bacháami Binói níwala walubela

asíbalachi waminá a'wasá echí jaré aboni níwala oro niwárami koyela, a'lí si'néami aboni sinibí jeané:

¹¹ Tamujé Walubélawala, Mujemi tamujé Riósawala ju. Galá níima mapu

Mujemi chopi waminabi walubéraga anérami níima.

Ayénachó galá níima mapu Mujemi chopi waminabi galabé o'wikérami níima.

Ayénachó galá níima mapu mujemi chopi ne suwaba omériami níima, mapujiti Mujemi niwáli ne suwaba namuti.

Ayénachó Mujemi abijí oméligá olá mapurigá suwaba namuti abijí nirúlasama.

A'lí ki'yá chokichí ne suwaba namuti niwárami níili mapujiti Mujemi nakili echirigá niwánala.

Echi oselí osirúami mapu kicháona bawéraka 'yératami níili

5 A'lí nijeni riwali mapu echí Walubela echo'ná echí walubela asíbalachi atíami asali bilé oselí kabítami echo'ná Binói sikálachi watoná, echí mapu machímána osirúami níili, pachámana ayénachó. A'lí echí oselí kicháona niráa bawéraka 'yératami níili mapurigá ke wesi pagótami oméra ma ku ra'lana. ² Echalini riwali bilé walula Riosi kapitánawala wabé jiwérami, echí mapu o'weli ra'íchaga jeanigá rukueli: ¿Chigá ne wabé omériami ju mapurigá galá oméra ma ku ra'lana echí oselí mapu kicháona niráa bawéraka 'yératami ju?

³ A'lí ke wesi echo'ná ripá riwigachi muchúami riwílati mapu echiyena omériami níili mapurigá galá oméra ma ku ra'lana echí oselí, mapurigá galá 'nénama mapurigá osirúami níili. Nibilé wesi riwílati jena'í wichimóbachi muchúami echirigá omériami, nibilé wesi echí jaré ma suwíami riwílati echirigá omériami. Nibilé wesi riwílati mapu galá omériami níili 'nénia echí oselí. ⁴ A'lí nijeni wabé o'mónaga nalali mapujiti ke wesi riwílati echiyena omériami mapurigá oméra ma ku ra'lana echí oselí, mapurigá galá 'nénama mapurigá osirúami níili, nibilé cho mapurigá 'nema. ⁵ Echalí bilé echí jaré o'wéala ochérami tamí jeaneli: Ketasi waminabi nalá, mapujiti echí Walubela ma ni'yúrali. Échiko galá omero ku ra'lana echí oselí, ayénachó galá omero ku irápiya mapo'ná kicháona niráa bawéraka 'yératami níili. Echi Walubela echí jaré Jurá anilíwami Isaeli pagótami Walubélawala ju, ayénachó Binói ne wabé jiwérami ju mapurigá bilé mawiyá niráa. Échiko ayénachó echí Rabiri riwéami rijói kúchuwala kúchala ju.

⁶ A'lí bicheni 'néniga riwali echí Walubela. A'lí Binói mapurigá bilé Méchuli niráa níili, mapu chabénala ni'lirúami níili, chopi ma ku owínamí níili. A'lí Échiko echo'ná nasipa chukuli, echo'ná echí walubela asíbalachi, echo'ná nasipa echí jaré naó akami namuti yuwa, ayénachó echo'ná nasipa echí jaré osá makói miná naó o'wéala ochérami yuwa. A'lí Échiko kichao awéami níili, ayénachó kichao buséami níili. A'lí echí kichao Binói busila je'ná jerigá aniwáami ju: Mapu echí bilepi Wabé Galabé Riosi Iwigala julárami níili ne buchuwírama jena'í wichimóbachi. ⁷ A'lí echí Walubela echo'ná echí walubela asíbalachi atíami, Échiko abijí asali echí oselí echo'ná Binói sikálachi watonachi. A'lí echí auché bilé Walubela mapu Méchuli niráa níili, Échiko echo'ná nawagá chapili echí oselí mapu echí Walubela echo'ná walubela asíbalachi atíami asali echo'ná Binói sikálachi watonachi. ⁸ A'lí mapalí echí Méchuli galá chapili echí oselí,

echalí echí naó akami namuti bacháami chokoba jábali Binói yuwa, echí jaré osámakóy miná naó o'wéala ochérami ayénachó. A'lí echí jaré o'wéala ochérami iblípi niráa kami níili echí arpa anilíwami tákowami namuti. Ayénachó iblípi niráa kami níili kúuchi bitoli oro niwárami, ne buchíami echí moluwá. A'lí echí moluwá je'ná jerigá aniwáami ju: Echi mapu echí jaré Riosi níwala pagótami tániga ra'íchali Riosi yuwa. ⁹Echalí ne si'néami aboni jeanigá nawajili je'ná bukulíwami nawajíwami:

Walubela, Mujemi ne wabé galabé ju, echijiti Mujemi chopi omériami ju chapiyá echí oselí, ayénachó Mujemi chopi omériami ju ku irápiya mapo'ná kicháona niráa ne wabé iwéami bawéraka 'yératami níili, mapujiti Mujemi waminá mi'lirúami níili, chópimi ma ku owinali. A'lí bichemi tamujé tamí ku ralali mapurigata Riosi níwala pagótami níibo, mapalimi nijali Mujé Binói lalá, tamujé tamí jiti.

A'lí tamujé yuwa muchuwi jaré ibílana kanápuromí ne suníami jena'í wichimóbachi piréami, ayénachó jena'í tamujé yuwa muchuwi jaré pagótami isena ra'íchami, ne suwaba isena ra'íchali ra'íchami mapu ikí nirú ne suníami jena'í wichimóbachi, ayénachó tamujé yuwa muchuwi jaré ibílana o'wéalachí piréami mapu ikí nirú ne suníami jena'í wichimóbachi. Mujemi tamujé tamí ku ralali mapurigá si'néamita Riosi níwala pagótami níibo.

¹⁰ A'lí Mujemi tamujé tamí jáwali mapurigata o'wéala niráa níibo Riosi yuwa, ayénachó mapurigata olabo Riosi nóchala, mapurigá sacerdote niráa. A'lí waminánomí tamujeta o'wéala nuláami níibo echo'ná ri'lé wichimóbachi.

¹¹ A'lí nijeni auchecho siné 'hénali mapurigá Riosi tamí 'hérati. Echalini námali ra'íchachi ne wikabé o'wéala Riosi kapitánawala ne noligá echí Walubela asíbalachi jáwami, ayénachó noligá jari echí naó akami namuti yuwa, ayénachó noligá jali echí jaré osá makói miná naó o'wéala ochérami yuwa. A'lí echí jaré Riosi kapitánawala ne wabé simírami wikabé níili mapuyénasí ke wesi omero taraya. ¹² A'lí ne si'néami aboni o'weli ra'íchaga jeanili:

Echi Walubela mapu Méchuli niráa ju, Echi mapu chabénala mi'lirúami níili, ma ku owinami ju.

Échiko chopi wabé galabé ju, echijiti Binói chopi ne Walubela níima, ayénachó Binói chopi níwami níima suwaba namuti, ayénachó Binói chopi suwaba namuti machíami níima, ayénachó Binói chopi ne suwaba omériami níima, ayénachó Binói chopi galá o'wikérami níima, ayénachó Binói chopi ne wabé Walubela níima, ayénachó Binói chopi waminabi walubéraga anérami níima.

¹³ Ayénachó nijeni námali ra'íchami ne si'néami pagótami, ayénachó ne si'néami echí jaré o'wéala Riosi kapitánawala, ayénachó ne suwaba namuti mapu ikí Riosi niwáli, ne suwaba mapu ikí nirú echo'ná ripá riwigachi, ayénachó ne suwaba mapu ikí nirú jena'í wichimóbachi, ayénachó ne suwaba mapu ikí nirú echo'ná wi'yérali ri'lé, ayénachó ne suwaba mapu ikí nirú echo'ná walú ba'wírali. Echirigá nijeni námali ra'íchami suwaba namuti mapu ikí nirú. A'lí je'ná jerigá anili:

Ne sinibí niráa waminabi walubéraga anérami nílaga echí Walubela mapu echo'ná echí walubela asíbalachi atí, echí Méchuli ayénachó.

Okuana ne sinibí niráa waminabi wabé o'wikérami nílaga,
ayénachó ne wabé o'wéalatami nílaga,
ayénachó ne sinibí niráa suwaba omériami nílaga.

¹⁴ A'lí echi jaré naó akami namuti jeanili: ¡Echirigá nílaga! A'lí echi jaré osá makói miná naó o'wéala ochérami chokoba jábali echo'ná bacháami echi Walubela asíbalachi, ayénachó aboni waminabi wabé walubéraga aneli echi Walubela Riosi mapu sinibí niráa bitéami ju, ne sinibí.

Echi oselí mapu kicháona bawilaka 'yératami níli

6 A'lí nijeni riwali mapalí echi Méchuli irápali echo'ná biléana bachá mapo'ná echi oselí kicháona niráa ne wabé iwéami bawéraka 'yératami níli. Echalini námali bilé echi jaré naó akami namuti ne wabé o'weli ra'íchami mapurigá ri'óami niráa, echi mapu jeanili: ¡Wakiná simigá, 'neni!

² Echalí nijeni 'néniga riwali bilé kawé rosákami. A'lí echi mapu aseli echi kawé, asali bilé atá. A'lí échiko 'yárami níli bilé oro niwárami mapuyiri koyela, mapurigá bilé walubela niráa. A'lí échiko echi kawé asigá atíami, mapurigá walubela niráa simili, mapurigá waminá nikoma, ayénachó mapurigá nil'yúrama auché jaré pagótami sayéraga.

³ A'lí mapalí echi Méchuli irápali echo'ná osáana mapo'ná echi oselí wabé iwéami bawéraka 'yératami níli, echalí nijeni námali echi osáala akami namuti jeaníami: ¡Wakiná simigá, 'neni!

⁴ Echalí auché bilé kawé machínali, echi mapu sitákami níli. A'lí echi mapu aseli echi kawé 'yárami níli mapurigá wabé omériga olama, mapurigá ke wesi jena'í wichimóbachi piréami waminabi kilí ologá pirélama, chopi mapurigá aboni a'nagupi nakówaga ko'wimea. Ayénachó échiko 'yárami níli bilé wi'llibé ripiyá.

⁵ A'lí mapalí echi Méchuli irápali echo'ná bisáala mapo'ná echi oselí wabé iwéami bawéraka 'yératami níli, echalí nijeni námali echi bisáala akami namuti jeaníami: ¡Wakiná simigá, 'neni! A'lí nijeni 'néniga riwali bilé kawé chökami. A'lí echi mapu aseli echi kawé, échiko chapigá asali bilé namuti anáalawami echo'ná binói sikálachi. ⁶ A'lí nijeni námali bilé ra'íchami echo'ná nasipa echi jaré naó akami namuti yuwa atíami, echi mapu jeanili: Bilé kilo turío bilé rawé nójchaga natétawami ju. A'lí bikiyá kilo sebara anilíwami rakala ayénachó bilé rawé nójchaga natétawami ju. Chopi ketasi suwábasi echi aceite olivo anilíwami niwárami, nibilé cho suwábasi echi uva anilíwami rakéami namuti ba'wila.

⁷ A'lí mapalí echi Méchuli irápali echo'ná naóana mapo'ná echi oselí wabé jiwériga bawéraka 'yératami níli, echalini námali echi nawosa akami namuti jeaníami: ¡Wakiná simigá, 'neni!

⁸ Echalí nijeni 'néniga riwali bilé kawé báwami. A'lí echi mapu aseli echi kawé, Mukuwáwami riwéami níli. A'lí jubá okuá bilé cho inárali mapu walula ju echo'ná mapo'ná echi jaré suwíami aliwala muchuwi. A'lí echi mapu Mukuwáwami riwéami níli, échiko 'yárami níli mapurigá walubela nuláami níima echo'ná biléana mapo'ná naóana rojonárami ju ne suníami mapusí atí je'ná kawí. A'lí échiko wabé omériga olama mapurigá wikabé pagótami a'nagupi nakówaga suwimea, ayénachó mapurigá auché jaré wikabé wabé 'locheka suwimea, ayénachó mapurigá auché jaré wikabé ko'wirúami níima jena'í wichimóbachi nirúami jobátami namuti jiti.

⁹A'lí mapalí echi Méchuli irápali echo'ná malíana mapo'ná echi oselí wabé jiwériga bawéraka 'yératami níili, echalí echo'ná ri'lé pachá, mapo'ná echi jaré namuti ko'wagá, ikósaga, 'yálati Riosi, echo'ná nijeni riwali si'néami echi jaré pagótami aliwala mapu ikí chabénala ko'wirúami níili mapujiti aboni galá bichíili Riosi Ra'íchala, ayénachó mapujiti aboni echirigá nawésali echi auché jaré pagótami. ¹⁰Echalí si'néami aboni o'wéli ra'íchaga jeanili: Tamujé Walubélawala, Mujemi wabé galabé ju, ayénachómi sinibí olá achigórigá mapurigami bichíwaga aní mápumi olama. ¿Chu kil'bukomi galá wi'nijiga kastigo 'yama echi jaré pagótami echo'ná ri'lé wichimóbachi piréami mapu tamujé tamí ko'yali?

¹¹A'lí si'néami aboni 'yálati napachala wabé tosákami, ayénachó aboni anélati mapu abijí pe téeli buwema mapuyénaší echi auché jaré aboni ritémawala mapu achigórigá bichíyami ju Jesucristo niráa, ayénachó waminá ko'wirúami níima, si'néami mapu ikí echirigá ko'wirúami níimako mapujiti aboni achigórigá bichíi Jesucristo niráa.

¹²A'lí mapalí echi Méchuli irápali echo'ná usáana mapo'ná echi oselí ne wabé jiwériga bawéraka 'yératami níili, echalini riwali mapu ne wabé nokuali kawí, a'lí echi rayénali waminá chónali mapurigá bilé chiní chókami niráa. A'lí echi michá waminá suwaba sitánali mapurigá la niráa, ¹³ayénachó echi sopolí waminá ri'lé wi'yérali rujuili mapurigá echi chuná ke cho wáami waminá rujuní mapalí ne wabé iwéami iká. ¹⁴Echalí echo'ná ripá riwigachi ma ketasi siyónami níili. Suwaba ke ne ikili mapurigá bilé oselí ke ne ikí mapalí taa niráa kabítami ju. A'lí suníami ripá chulítami si'wina muchuwárami níili, ayénachó ne suníami echo'ná nasipa walubé ba'wírali nirúami kawí waminá si'wina muchuwárami níili. ¹⁵Echalí ne si'néami echi jaré o'wéala silíami jena'í wichimóbachi nuláami echo'ná risochíami ichípsali, echo'ná ritérali ayénachó. A'lí ne si'néami echi auché jaré o'wéala ayénachó echirigá ichípsali, ne si'néami echi jaré wabé níwami ayénachó, echi jaré o'wéala wikabé sontarsi nuléami ayénachó, echi jaré wabé jiwérarami asíchiko. A'lí ne si'néami echi jaré pióntami ayénachó echirigá ichípsali, ne si'néami echi auché jaré pagótami mapu ikí ketasi pióntami níili asíchiko. ¹⁶A'lí ne si'néami aboni o'wéli ra'íchaga jeaneli echi jaré chulítami, echi jaré o'wéli rité ayénachó: ¡Tamujé tamí tibati! ¡Tamujé tamí ichípati, mapurigá echi Walubela Riosi, echo'ná walubela asíbalachi atíami ketasi tamujé tamí riwímea, ayénachó mapurigá echi Méchuli ketasi tamujé tamí risíu ologá walubé kastigo 'yama!

¹⁷¡Ma seba ne jubá rawé! Jipi echi Walubela Riosi ma tamujé tamí walú kastigo 'yama. A'lí ke wesi omérama ku kuwana sayera echi Walubela Riosi.

Jaré Isaeli pagótami bawirárami níili

7 Pe wilibeko, je'ná jerigá ma ikisá nijeni ayénachó riwali naó o'wéala Riosi kapitánawala, echo'ná a'nagú naóana jáwami jena'í wichimóbachi, echi mapu iweli echi iká, mapurigá ma ketasi waminabi ikamea nibilé pe biléana jena'í wichimóbachi, nibilé cho pe biléana echo'ná moba echi walubé ba'wírali, nibilé cho pe biléana echo'ná jaréana okórali. ²Ayénachóni riwali auché bilé walula Riosi kapitánawala echo'ná panina machínami, mapokuá machina echi rayénali. A'lí échiko echi mapuyiri bawiráwami kami níili, echi Sinibí Bitéami Riosi níwala. Echalí echi bilé walula Riosi kapitánawala o'wéli ra'íchali echi auché jaré naó Riosi kapitánawala mapu 'yárami níili mapurigá aboni wabé omérama sitíi niwayá je'ná

kawí, ayénachó mapurigá aboni omérama sitfi niwayá echi walú ba'wírali. Echalí echi bilé walula Riosi kapitánawala jeaneli:

³ Ketasi cho sitfi niwási je'ná kawí, nibilé cho sitfi niwási echi walubé ba'wí, nibilé cho suwábasi echi jaré okó, mapuyénasí tamujeta ketasi cho bawirá echi jaré Riosi níwala pagótami echo'ná aboni kowálachi.

⁴ A'lí nijeni námali aníachi mapu chu kipu níilo mapu echirigá bawirárami níili: Bilé kiento nawosa makói waminá naó mili níili. A'lí ne si'néami aboni echi jaré Isaeli pagótami níili, echi mapu makói miná okuáana rojuákami ju. A'lí echo'ná ibílana rojuákamichi, makói miná okuá mili níili mapu echirigá bawirárami níili. ⁵ Echalí makói miná okuá mili bawirárami níili echi Jurá riwéami rijói kúchala kúchuwala. Ayénachó makói miná okuá mili bawirárami níili echi Reubení riwéami rijói kúchala kúchuwala. Ayénachó makói miná okuá mili bawirárami níili echi Gari riwéami rijói kúchala kúchuwala. ⁶ Ayénachó makói miná okuá mili bawirárami níili echi Aserí riwéami rijói kúchala kúchuwala. Ayénachó makói miná okuá mili bawirárami níili echi Netalí riwéami rijói kúchuala kúchuwala. Ayénachó makói miná okuá mili bawirárami níili echi Manasesí riwéami rijói kúchala kúchuwala. ⁷ Ayénachó makói miná okuá mili bawirárami níili echi Simeoni riwéami rijói kúchala kúchuwala. Ayénachó makói miná okuá mili bawirárami níili echi Lebí riwéami rijói kúchala kúchuwala. Ayénachó makói miná okuá mili bawirárami níili echi Isakari riwéami rijói kúchuala kúchuwala. ⁸ Ayénachó makói miná okuá mili bawirárami níili echi Sabuloni riwéami rijói kúchala kúchuwala. A'lí makói miná okuá mili bawirárami níili echi José riwéami rijói kúchala kúchuwala. Ayénachó makói miná okuá mili bawirárami níili echi Benjamini riwéami rijói kúchuala kúchuwala.

Ne wikabé pagótami tosákami napáchami

⁹ Pe wilibeko je'ná jerigá ma ikisá, nijeni riwali auché jaré ne wabé wikabé pagótami. Ne wabé wikabé níili, mapuyénasí ke wesi omérali taraya. A'lí aboni ibílana jena'í wichimóbachi jonsa síami níili. Ayénachó echo'ná muchili jaré ibili isena pagótami ne suníami jena'í wichimóbachi piréami, jaré ibili isena ra'íchami pagótami ayénachó. A'lí echi wikabé pagótami jali echo'ná bacháami echi Walubela Riosi asíbalachi, ayénachó echo'ná bacháami mapo'ná echi Méchuli asali. A'lí ne si'néami aboni tosákami napáchami níili, ayénachó ibili echi rakú sawala chapigá jali. ¹⁰ Echalí ne si'néami aboni o'wéli ra'íchaga jeanili:

Tamujé Riósawala mapu echo'ná walubela asíbalachi atí,
Echi ju mapu tamujé tamí ku 'yeli suwaba máputa chati olali.

Echi Méchuli ayénachó ju mapu tamujé tamí echirigá ku 'yeli suwaba
máputa chati olali.

¹¹ Echalí ne si'néami echi jaré o'wéala Riosi kapitánawala noligá jali echo'ná echi Walubela asíbalachi, ayénachó aboni noligá jali echi jaré o'wéala ochérámi yuwa, ayénachó echi jaré naó akami namuti yuwa. A'lí ne si'néami echi jaré wikabé Riosi kapitánawala chokoba jaga akaná uchúpaga waminabi wabé walubéraga aneli Riosi, jeanigá:

¹² ¡Echirigá nílaga! Galá níima mapu tamujé Riósawala ne sinibí niráa
galabéraga anérámi níisa,

ayénachó mapu Binói waminabi walubéraga anérami nísa.

Echi Walubela tamujé Riósawala ne suwaba namuti machíami ju.

Galá níima mapu si'néami pagótami walú natétara 'yasa Riosi.

Échiko chopi wabé Walubela ju, ayénachó Binói suwaba omériami ju.

Galá níima mapu Binói echirigá wabé walubéraga anérami nísa ne sinibí
niráa, ne sinibí. ¡Echirigá níma!

¹³ Echalí bilé echi jaré o'wéala ochérami tamí rukueli jeanigá: ¿Chigá ju echi
ne wabé wikabé pagótami mapu ne wabé tosákami napáchami ju? ¿Kumi okuá
jonsa sili?

¹⁴ A'lí nijeni jeaneli: Kení walúlawa, mujemi chopi machí chigá ju. Echalí binói
tamí jeaneli: Si'néami je'ná galá bichíyami pagótami ne wabé simírami risúu
olárami níili echo'ná wichimóbachi bukulí ne jubá rawé. Aboni ma galá bi'wíami
niwálati, mapujiti aboni chati olalila ku 'yérami níili, mapujiti Jesucristo wabé
léntiga mi'lirúami níili aboni chati olalila jiti, mapurigá echi Riosi níwala Méchuli
niráa. ¹⁵ Echijiti aboni bacháami ja echo'ná echi walubela asíbalachi mapo'ná Riosi
atí. A'lí aboni echo'ná pachá Riosi ri'obáwalachi jaga waminabi walubéraga ané
Riosi, sinibí rawé, sinibí rokogó ayénachó. A'lí Riosi mapu echo'ná echi walubela
asíbalachi atí, Échiko sinibí galá tibútama aboni, mapujiti Binói ne sinibí aboni
yuwa asimea. ¹⁶ A'lí aboni ma ketasi 'lochema, nibilé balámama. A'lí echi rayénali
ma ketasi ne wabé simírami ratáami rayenama echo'ná abónichi, ayénachó aboni
ketasi waminabi we ratálama, ¹⁷ mapujiti echi Méchuli mapu echo'ná nasipa echi
walubela asíbalachi atí, Échiko galá tibuka nisérama aboni, mapurigá bo'wá niráa.
A'lí echi Méchuli métama aboni mapo'ná walubé machina echi ba'wí mapu 'ya
mapu aboni sinibí niráa pirélama. A'lí Riosi galá ku kanílatama aboni, mapurigá
ma ketasi o'móniga nalákama.

Mapo'ná kicháona niráa bawirárami níli echi oselí

8 A'lí mapalí echi Méchuli irápali echo'ná kicháona mapo'ná echi oselí ne wabé
jiwériga bawirárami níli, echalí echo'ná ripá riwigachi pe téelipi ke aníga
wil'bali mapuyénasí nasipa "Hora" niráa. ² Echalí we yáati nijeni riwali echi jaré
kichao o'wéala Riosi kapitánawala mapu echo'ná bacháami jali mapo'ná Riosi Binói
asali. A'lí aboni ibílipi niráa 'yálati echi tákawami namuti, korneta anilíwami.
³ Echalí auché bilé Riosi kapitánawala echo'ná nawagá bacháami wil'bali echo'ná
jubétachi mapo'ná ikósalati echi moluwá. A'lí echi bilé Riosi kapitánawala chapigá
nawali bilé jarito oro niwálami sawili rajáami muchúwami. Échiko ikósanala 'yálati
walú moluwá mapurigá echo'ná ri'lé pe uchíi jubétachi oro niwárami ikósama,
echo'ná bacháami echi walubela asíbalachi, mapurigá echi moluwá molila munama
mapo'ná Riosi atí, achigórigá mapurigá echi jaré bichíyami pagótami ra'íchala
moyénali, mapalí aboni ra'íchali Riosi yuwa. ⁴ Echalí echi moluwá molila moyénali
echo'ná ripá mapo'ná Riosi atí, achigórigá mapurigá echi jaré bichíyami pagótami
ra'íchala ayénachó muyénali, suwaba mapu ikí echi jaré bichíyami pagótami tániga
ra'íchali Riosi yuwa. ⁵ A'lí echi bilé Riosi kapitánawala chapili echi jarito oro
niwárami, a'lí galá buchíwali echi sawili rajáami, echo'ná echi pe uchíi jubétachi
nirúami. Echalí echi Riosi kapitánawala suwaba waminá a'wali buchuwímana
jena'í wichimóbachi. A'lí we yáati wisabé ri'oli, ayénachó wabé channeli, ayénachó
wisabé ni'wili, ayénachó ne wabé nokuali kawí.

Echi kichao korneta anilíwami tákowami namuti

⁶ A'lí echi kichao o'wéala Riosi kapitánawala mapu chapigá jali echi kichao korneta anilíwami tákowami namuti, abóniko ma kariweli taya.

⁷ A'lí echi bacháwala Riosi kapitánawala tali binói níwala korneta. Echalí rijé rujuili jena'í wichimóbachi, ayénachó rujuili na'í, la nasówami. A'lí echi na'í jiti ne noguí nasipa jena'í wichimóbachi ikótali. Echalí ne noguí nasipa ikótali echi okó, ayénachó ne noguí nasipa ikótali echi kasalá siyónami.

⁸ A'lí echi osáala Riosi kapitánawala tali binói níwala korneta. Echalí mapuyiri bilé walubé kawí chulítami, we rajáami, pátami níili echo'ná walú ba'wírali. A'lí ne noguí nasipa echi walú ba'wí la najítali. ⁹ Ayénachó ne noguí nasipa echi jaré akami namuti echo'ná walú ba'wírali 'yénami waminá suwili. A'lí ne noguí nasipa echi jaré kalí ba'wechi moba 'yénami, barko anilíwami, suwaba suwábarami níili.

¹⁰ A'lí echi baisala Riosi kapitánawala tali binói níwala korneta. Echalí bilé walubé sopolí wichili echo'ná ripá riwigachi jonsa. Échiko ne wabé simírami rajáami níili, mapurigá bilé walú namuti rajérami. Echalí echi sopolí rajáami echo'ná moba wichíbali jena'í wichimóbachi nirúami bakochi, ne noguí nasipa, ayénachó echo'ná ne noguí nasipa mapomí ba'wí machíina. ¹¹ A'lí echi walubé sopolí rajáami Chipúami anilíwami níili. Echalí ne noguí nasipa echi ba'wí waminá chipúami najítali. A'lí ne wikabé pagótami waminá suwili, echi ba'wí jiti, mapujiti ne wabé simírami chipúami níili.

¹² A'lí echi nawosa Riosi kapitánawala tali binói níwala korneta. Echalí echi rayénali ne noguí nasipa chi'wanárami níili, ayénachó echi michá ne noguí nasipa, ayénachó echi jaré sopolí ne noguí nasipa, mapurigá ne noguí nasipa chonama. Echijiti isina rawé ne noguí nasipa ketasi rayénali, ayénachó isina rokogó ne noguí nasipa ketasi ratábali echi michá, echi jaré sopolí ketasi cho.

¹³ A'lí nijeni auchecho siné 'nénali. Echalini námali bilé Riosi kapitánawala echo'ná ne wabé ripana i'nika inárami, echi mapu o'wéli ra'íchaga jeanili: ¡Mbaji! ¡Echi pagótami echo'ná wichimóbachi piréami ne wabé simírami risíu olárami níima mapalí echi auché bikiyá Riosi kapitánawala isínipi niráa tama aboni níwala korneta!

9 A'lí echi malisa Riosi kapitánawala tali binói níwala korneta. Echalí nijeni riwali bilé sopolí mapurigá ripá riwigachi jonsa wichíami niráa. A'lí échiko 'yárami níili echi irápara mapurigá irápama echo'ná wabé ri'libé jochi mapo'ná ketasi suwíbami ju ri'lena, mapo'ná echi walubé na'í we rajá. ² A'lí échiko irápali echo'ná wabé ri'libé jochi. Echalí echo'ná jochi jonsa ne wabé ripabé moyénali walubé molí, mapurigá wabé molina biléana ne walubé na'írali. Echalí ne wabé mololi jena'í wichimóbachi, echijiti we na'oli echi rayénali. ³ A'lí echo'ná molírali jonsa 'machíinsa ne wikabé mapuyiri korochi, ne buchuwímana i'nika 'yénali jena'í wichimóbachi. A'lí echi wikabé mapuyiri korochi 'yárami níili mapurigá wabé omériga ikima echi pagótami, achígorigá mapurigá nikí echi jaré machili, jena'í wichimóbachi nirúami. ⁴ A'lí echi wikabé mapuyiri korochi nulérami níili mapurigá aboni ketasi suwábama echi kasalá siyónami, nibilé mapurigá suwábama echi auché jaré a'wíami namuti, nibilé mapurigá aboni suwábama echi okó, chopi aboni nulérami níili mapurigá ne wabé chati risíu olama echi jaré pagótami, si'néami mapu ikí ketasi bawirárami níili echo'ná aboni kowálachi mapurigá Riosi níwala pagótami niráa. ⁵ A'lí echi wikabé mapuyiri korochi ketasi 'yárami níili mapurigá

aboni ko'wimea echí jaré pagótami, chopi 'yárami níili mapurigá ne wabé okótama echí jaré pagótami malí michá yénasí. Echalí aboni ne wabé simírami okótali echí pagótami, mapurigá okó mapalí echí machili tamujé tamí ikí. ⁶ Echalí rawé jena'í wichimóbachi piréami pagótami we ama mapu churigá aboni omérama we yáa suwiyá, chopi aboni ketasi riwímea mapu churigá suwímea. Echalí aboni wabé nakímea suwinala, chopi aboni ketasi omérama suwiyá.

⁷ A'lí echí wikabé korochi mapuyiri kawé níili, ma kariwérami mapurigá echí jaré sontarsi asema ma nakóbiya simiba auché jaré sayérasiya. A'lí echo'ná echí korochi mo'ólachi koyératami níili mapuyiri koyela oro niwárami, ayénachó aboni mapuyiri rijói niráa chuwegwami níili. ⁸ A'lí aboni wabé i'weli kupéami níili, mapurigá muguí niráa; ayénachó aboni ramilá mapuyiri mawiyá ramilá níili. ⁹ A'lí aboni mapuyiri jiero napáchami níili. A'lí aboni analá wabé chaneli mapalí i'nika 'yénali, achigórigá mapurigá we chané wikabé troka anilíwami mapu kawé jiti banírawami ju, mapalí echí wikabé sontarsi nakónalaga simiba. ¹⁰ A'lí echí jaré wikabé mapuyiri korochi mapuyiri machili wasila waséami níili, ayénachó aboni wabé nikíami níili mapurigá echí jaré machili. Echijiti aboni wabé omériami níili risúu olayá echí pagótami malí michá yénasí. ¹¹ A'lí echí wikabé mapuyiri korochi níwali aboni walula kapitánawala, echí mapu walula silíami ju echo'ná wabé rillibé jochi mapo'ná ketasi suwíbami ju ri'lena. Échiko Abaroni riwéami ju, echí Ebreo anilíwami pagótami ra'íchala niráa, ayénachó Apolioni riwéami ju echí auché jaré Griego anilíwami pagótami ra'íchala niráa, echí mapu je'ná jerigá aniwáami ju: Echi suwábiami.

¹² Jena'í wichimóbachi piréami pagótami ma bachá niráa ne wabé simírami risúu olárami níili; chopi aboni abijí auché osá niráa echirigá ne wabé simírami risúu olárami níima.

¹³ A'lí echí usansa Riosi kapitánawala tali binói níwala korneta. Echalí níjeni námali bilé ra'íchami mapu echo'ná bacháami Riosi yuwa asali, echo'ná nasipa mapo'ná echí naó awá jali, echí mapu echo'ná echí uchíí oro niwárami jubechi jawárami níili. ¹⁴ Echalí echí ra'íchami aneli echí usansa Riosi kapitánawala, echí mapu chapigá wilili binói níwala korneta, jeanigá: Ku botoná echí naó o'wéala riablo kapitánawala mapu buliruka muchuwi echo'ná mulubé walú bakochi Eujarátachi anilíwachi.

¹⁵ Echirigá ma ku botonálati echí naó riablo kapitánawala mapu ma a'láruga muchuwárami níili mapurigá aboni waminá ko'wimea ne noguí nasipa echí jaré pagótami jena'í wichimóbachi piréami, mapalí ma seba tétili mapalí Riosi nakí mapu echirigá olárami níima. ¹⁶ Echalí níjeni námali mapu chu kipu ne wabé wikabé sontarsi 'yénali echí naó riablo kapitánawala yuwa, ayénachó si'néami aboni kawé aséami níili. Ne wabé wikabé, okuá kiento miyoní níili.

¹⁷ Echalí níjeni echirigá riwali echí wikabé kawé mapalí Riosi echirigá tamí riwírali. Iibili niráa asérami níili. A'lí echí wikabé aséami jiero napáchami níili, a'lí aboni jiero napáchala sitákami níili, siyónami ayénachó, sarówami ayénachó. A'lí echí wikabé kawé mapuyiri mawiyá mo'wéami níili, ayénachó echo'ná aboni cho'olachi jonsa machínali na'í, molí yuwa, echí wabé simírami chati asújiri anilíwami molila ayénachó. ¹⁸ Echalí ne noguí nasipa echí jaré pagótami jena'í wichimóbachi piréami waminá suwili echí na'í jiti, ayénachó echí molí jiti, ayénachó echí asújiri molila jiti, mapu echo'ná echí wikabé cho'olachi jonsa machínali. ¹⁹ Mapujiti echí

wikabé kawé wabé jiwerámi níili echo'ná aboni cho'olachi, ayénachó aboni wabé jiwerámi níili echo'ná aboni wasílachi, mapujiti aboni wasila mapuyiri sayawi níili, ayénachó aboni wasila mapuyiri sayawi mo'ola mo'wéami níili. A'lí aboni wabé uchuli echi jaré pagótami aboni wasila jiti.

²⁰ A'lí echi auché jaré pagótami mapu ketasi suwili mapalí echi wikabé kawé echirigá risúu olali echi pagótami, abóniko arigá ketasi wikáwali tánali Riosi, chopi aboni waminabi wabé chati chuwé olali, ayénachó aboni waminabi wabé o'wikeli echi jaré riablo kapitánawala, ayénachó aboni waminabi chokoba jaga o'wikeli echi jaré amachíkalawami namuti oro niwárami, echi jaré plata anilíwami niwárami ayénachó, echi jaré bronke anilíwami niwárami ayénachó, echi jaré rité niwárami ayénachó, echi jaré kusí niwárami asíchiko. A'lí echi jaré amachíkalawami namuti ketasi omero 'nena, nibilé cho omero nama, nibilé cho omero simiba. ²¹ A'lí echi pagótami wabé ko'yáami níili auché jaré, ayénachó aboni we sipabúami níili, ayénachó aboni chuwé bilétari yuwa kochíami níili, ayénachó aboni wabé chigórami níili, chopi aboni arigá ketasi wikáwali tánali Riosi, nibilé cho ariweli echirigá chati olayá.

Echi Riosi kapitánawala bilé oselí kami

10 Echalí nijeni riwali auché bilé walula Riosi kapitánawala ripá riwigachi jonsa rikínami. Échiko echo'ná nasipa nolfrali inárali, ayénachó bilé konomí noligá wilili echo'ná binói mo'olachi, ayénachó binói cho'olá wabé ratábari mapurigá echi rayénali, ayénachó binói ronola wabé ratábali mapurigá na'lí rajáami. ²Echi walula Riosi kapitánawala chapigá nawali bilé tάa oselí ra'lánárami echo'ná binói sikálachi. Echalí échiko binói ronola watonachi echo'ná moba walubé ba'wírali teka wilili, ayénachó binói ronola o'winachi echo'ná wi'yérali teka wilili. ³A'lí échiko o'weli sinali mapurigá bilé mawiyá o'weli kusú. A'lí mapalí echi sinali, echalí we yáati ne kicháosa ri'oli, chopi nijeni námali mapurigá jaré kichao o'weli ra'íchami niráa. ⁴A'lí mapalí nijeni echirigá kicháosa o'weli ra'ícharami níili, echalini osímea olali mapurigani námali. Chopi we yáati nijeni námali auché bilé Ra'íchami, echo'ná ripá riwigachi ra'íchami, mapu tamí jeanili: Ketasi osá mapurigami echi kichao jiti ra'ícharami níili, mapalí ne kicháosa ri'oli, chopi ke wesi ku ruyé mapurigami námali.

⁵Echalí echi walula Riosi kapitánawala mapu nijeni bachánala riwali binói ronola watonachi teka wilíami echo'ná moba walubé ba'wírali, ayénachó binói ronola o'winachi teka wilíami echo'ná moba wi'yérali, échiko ri'iná wilali watoná binói sikala. ⁶A'lí jeanili: Achigórigá mapurigá Riosi sinibí ne bichíwali aní, nijeni ayénachó 'yemi mi ne bichíwali ané mapu ma seba tétili mapalí Riosi ne bichíwali sunima olayá ne suwaba mapu ikí Binói nakí olánala, achigórigá mapurigá chabé ki'yá Binói júuli ruyénala jenalí wichimóbachi piréami pagótami mapu Binói ne bichíwali olama, ma sébachi jipi rawé. A'lí Riosi mapu echirigá júuli Binói piónawala ruyénala echi pagótami, echi Riosi ju mapu sinibí niráa bité, ne sinibí, ayénachó Binói níili mapu niwáli echo'ná ripá riwigachi, suwaba je'ná kawí ayénachó, echi walubé ba'wí ayénachó, ne suwaba namuti mapu ikí nirú ne buchuwímana ayénachó. ⁷Echalí echi bacháwala walula Riosi kapitánawala ayénachó bichíwaga anili mapu ke 'me ayó mapalí ma o'winama tάa echi kicháona korneta táami walula Riosi kapitánawala, echalí Riosi ma sunima olayá suwaba mapu ikí Binói nakili olánala

ki'yá jonsa. A'lí ketasi cho machirúami níili mapurigá Riosi nakili olánala, chopi Riosi arigá echirigá ruyeli echi jaré ki'yánala piréami nawésami mapu ayénachó Riosi piónawala niráa níili.

⁸Echalí echi ra'íchami mapu bachánala tamí ra'íchali ripá riwigachi jonsa, échiko auchecho siné tamí ra'íchali jeanigá: Simigá chapí echi taa oselí ra'lanárami mapu echi bilé Riosi kapitánawala chapigá wilí, echi mapu binói ronola watonachi echo'ná moba walubé ba'wírali teka wilí, ayénachó binói ronola o'winachi echo'ná wi'yéralli teka wilí.

⁹Echalini simili echo'ná mapo'ná echi walula Riosi kapitánawala wilili. A'lí bicheni aneli mapu tamí 'yama echi taa oselí. Echalí échiko tamí jeaneli: ;Chapigá ko'wa! Mujemi ne galá akárama mapurigá echi kolimena niráa, chopi mapalimi ma kosá echalí mujé ropálachi wabé chipúami nílama.

¹⁰Echalini chapili echi oselí mapu echi walula Riosi kapitánawala chapigá wilili, a'lí bicheni galá ko'wali. We galá akáami níili mapurigá kolimena niráa mapalini echirigá ko'wali, chopi mapalini ma kosá, echalí nijé ropálachi ne wabé chipúami nílasali. ¹¹Ayénachó tamí jeaneli: Abijí 'wérali ju mapu mujemi Riosi jiti nawisama wikabé isena pagótami jiti rugá, kanápuromí piréami, echi jaré mapu wikabé isena ra'íchami ju. Ayénachómi abijí nawisama wikabé o'wéala silíami jiti rugá.

Echi okuá rijói mapu Riosi júuli nawisánala

11 Echalí nijeni 'yálati bilé baká téatalawami, ayénachóni jeanélati: Simigá, teti echi walubé Riosi ri'obáwala, ayénachó teti echi jubechi mapo'ná echi jaré namuti ko'yagá 'yárami ju Riosi, ayénachó tará echi pagótami mapu echo'ná pachá Riosi ri'obáwalachi jaga walubéraga ané Riosi. ²Chopi ketasi teti echo'ná ri'obachi machímana ri'narátachi, mapujiti echo'ná ma 'yárami níili echi auché jaré isena pagótami. A'lí aboni echo'ná galabé walúlachi 'yénaga, mapurigá o'wéala niráa nulama nawosa makói miná okuá michá. ³Echalí Nijeni nawisánala julama echi okuá rijói Nijé jiti nawésami. A'lí aboni nawisama bilé mili, miná okuá kiento, miná usánasa makói rawé iyénasí. A'lí aboni ochókami napáchaga 'yénama mapurigá wabé o'mónami niráa, mapurigá echi auché jaré pagótami machimea mapu si'néami aboni chati oláami ju, ayénachó mapurigá aboni nakimea ku ro'wínala Riosi yuwa.

⁴Je'ná okuá nawésami rijói mapuyiri okuá olivo anilíwami rakéami namuti ju, ayénachó mapuyiri okuá rajilí jawálawami namuti ju, mapu echo'ná bacháami Riosi yuwa jawi, echi mapu Walubela Nuláami ju jena'í wichimóbachi. ⁵A'lí a jaré pagótami chibi olánalasagá echi okuá rijói Riosi jiti nawésami, echalí echo'ná aboni chumurachi jonsa machínama na'í mapu suwaba suwábama aboni asayela, mapujiti echi na'í jiti suwímea mapuyíripi mapu ikí chibi olánalako echi okuá rijói Riosi jiti nawésami. ⁶Je'ná okuá rijói Riosi jiti nawésami 'yárami níima mapurigá aboni omérama olayá mapurigá ketasi ukumea jena'í wichimóbachi mapuyénasí aboni echirigá nawesa 'yena, ayénachó mapurigá aboni omérama la niwayá echi ba'wí, ayénachó mapurigá aboni omérama karúmati jiti wabé risúu olayá echi pagótami jena'í wichimóbachi piréami, ne sinibí mapalí aboni nakí. ⁷Chopi mapalí echi okuá nawésami rijói ma sébali sunima nawésiya, echalí echi walula silíami echo'ná ri'libé jochi jonsa machíinami, mapo'ná ketasi suwíbami ju ri'lena, échiko wabé nikoma echi okuá nawésami rijói sayéraga, ayénachó binói wabé omériga waminá ko'wímea aboni. ⁸A'lí echi okuá suwíami echo'ná nasipa echi walubé

walúlachi ri'narátachi bitimea, echo'ná walúlachi mapo'ná tamujé Walubélawala Jesucristo echo'ná kúrsichi michóniga mi'lílati. Echo'ná ayénachó Sorómachi anilíwa mapujiti echo'ná piréami achigórigá chati oláami ju mapurigá echo'ná Sorómachi piréami chati oláami níili; ayénachó Ejíptochi anilíwa mapujiti echo'ná piréami pagótami ke bichiyami ju, achigórigá mapurigá echo'ná Ejíptochi piréami pagótami ke bichiyami níili. ⁹A'lí echo'ná piréami pagótami riwimea echo'ná bitíami echí okuá suwíami bikiyá rawé miná nasipa iyénasí. Echalí wikabé isena pagótami buchuwímana jena'í wichimóbachi piréami riwimea echí okuá suwíami echirigá bitíami, ayénachó jaré ibili isena ra'íchami pagótami riwimea, ayénachó jaré ibílana o'wéalachí piréami pagótami ne buchuwíamana jena'í wichimóbachi echirigá riwimea. A'lí echí jaré pagótami ketasi risensia 'yama mapurigá echí okuá suwíami waminá tótami níima. ¹⁰Echalí jena'í wichimóbachi piréami pagótami wabé kanílama mapujiti echí okuá rijói Riosi jiti nawésami ma ko'wílati, ayénachó aboni a'nagupi karúmati kónama, mapujiti echí okuá rijói Riosi jiti nawésami wabé risúu olali aboni, chopi okuánika ma ko'wirúami níili. ¹¹Chopi ma simírasa bikiyá rawé miná nasipa, echalí Riosi auchecho ku iwítali aboni. A'lí biché aboni ku o'winsa jábali. Echalí ne wabé majajali ne si'néami echí jaré pagótami mapu ikí riwáliko. ¹²Echalí echí okuá rijói Riosi jiti nawésami námali bilé o'wali Ra'íchami, mapu ripá riwigachi jonsa jeanigá ra'íchali: Wakiná ri'iná munasi.

A'lí aboni echo'ná ripá riwigachi muyénali biléana nolírali nasipa. A'lí echí wikabé aboni sayera galá riwali aboni echirigá ku simíbami. ¹³Echalí we yáati ne wabé nokuali kawí. A'lí echo'ná walúlachi bilepi kalí najuli ibílana mapo'ná makói nirúali. Echirigá ne wabé wikabé kalí najuli, ayénachó wikabé, mapuyénasí kichao mili pagótami echijiti waminá mitáchaga suwili. Echalí echí auché jaré pagótami ne wabé majajáratami níili, echijiti aboni walubéraga aneli Riosi, ripá riwigachi atíami.

¹⁴Jena'í wichimóbachi piréami pagótami ma osá chokéami wabé simírami chati risúu olárami níili, chopi ke 'me ayó aboni abijí auchecho siné baisáala echirigá ne wabé simírami risúu olárami níima.

Echi kicháosa korneta

¹⁵A'lí echí kicháosa walula Riosi kapitánawala tali binói níwala korneta. Echalí jaré o'wali ra'íchami echo'ná ripá riwigachi muchúami je'ná jerigá ra'íchachi námtami níili:

Tamujé Riósawala ma ne Walubela niráa nulama echo'ná wichimóbachi ne suníami o'wéalachí,

Binói Ranala Jesucristo yuwa.

A'lí biché Binói ne Walubela níima ne sinibí niráa.

¹⁶A'lí echí jaré osá makói miná naó o'wéala ochérami echo'ná bacháami Riosi yuwa muchili, echo'ná aboni níwala o'wéala muchíbalachi. Echalí aboni akaná uchúpaga waminabi ne wabé walubéraga aneli Riosi. ¹⁷Echalí aboni jeanili:

Tamujé mi walú natétara 'ya, mujé Walubela Riosi, ne suwaba omériami.

Mujemi ne Walubela ju jipi rawé, ayénachómi sinibí ne Walubela níili, ayénachómi sinibí niráa ne Walubela níima.

Jipi tamujé mi walú natétara 'ya mapujítimi ma wilíbali mapurigá ne Walubela niráa, ayénachómi ma o'wínali nulayá jena'í wichimóbachi.

¹⁸ Jena'í wichimóbachi piréami pagótami ma ne wabé na'áwali mi sayéraga, chopi ma seba mapalí Mujemi ma kastigo 'yama echi jaré ke bichiyami pagótami, ayénachó mapalí Mujemi justicia olama ne si'néami echi jaré pagótami mapu ikí ma suwíami ju.

Echalí Mujemi galabéala 'yama echi jaré Mujé piónawala mapu ikí nawesa mujé jiti rugá.

Echalí Mujemi echirigá galabéala 'yama ne si'néami echi jaré Mujé pagótamawala si'néami mapu ikí olali mapurigá Mujemi nakili.

Echalí Mujemi echirigá galabéala 'yama echi jaré mapu ikí kuchípala ju, ayénachó echi auché jaré mapu ikí o'wéala ju.

Jipi ma seba mapalí Mujemi waminá suwábama si'néami echi jaré chati oláami pagótami mapu ayénachó wikanáami suwábali jena'í wichimóbachi.

¹⁹ Echalí Riosi ri'obáwalachi echo'ná ripá riwigachi nirúami ma iráparami níli. A'lí biché echo'ná pachá riwirúami níli echi galabé kajoni mapu Riosi chabénala nulali niwánala mapurigá echi jaré Isaeli pagótami sinibí galá 'natama mapurigá Riosi bachá katéwali aboni yuwa. A'lí echalí we yáati ne wabé ni'wili, ayénachó ne wabé iwéami aneli, ayénachó ne wabé iwéami ri'oli, ayénachó ne wabé nokali kawí, ayénachó ne wabé rujuili rijé.

Echi bilé walubé mukí, echi walubé sitákami namuti wabé apalúami yuwa

12 A'lí ke sayiná bilé walubé namuti machínali echo'ná ripá nolírali: Bilé mapuyiri mukí, ne walubé, echo'ná riwirúami níli, ne noligá atíami echi rayénali mapurigá binói sipúchala niráa, ayénachó echi michá ri'léami asali echo'ná echi mukí ronólachi, ayénachó echo'ná binói mo'ólachi echi mukí koyétarami niráa níli, makói miná okuá sopolí jiti. ² A'lí echi mukí bocháami níli, echijiti binói wabé okoka ne wabé risíu anili mapujiti we yáati ranamea riwéali bilé táa. ³ Echalí echo'ná ripá nolírali ayénachó machínali auché bilé walubé majáriami namuti: Ke sayiná machínali bilé walubé sitákami namuti wabé aparúami. Échiko kichao mo'wéami níli, ayénachó makói awéami níli, ayénachó echo'ná ibíflana binói mo'ólachi echi wabé aparúami namuti, oro niwárami, koyétarami níli mapurigá kichao o'wéala silíami niráa. ⁴ A'lí echi walubé sitákami namuti, wabé aparúami, binói wasila jiti banisuka ri'lé wichí u'luli ne noguí nasipa echi jaré sopolí ripá riwigachi nirúami. Echalí echi walubé aparúami namuti bacháami chukúbali echi mukí yuwa, echi mapu ma ranamea riwéali bilé taá, mapurigá binói we yáati suwábama echi mukí ranala mapalí nawama. ⁵ A'lí echi mukí nawárali bilé taá towí, echi mapu ma ochérasa, ne wabé iwéami Nuláami níima riwéali, ne suníami jena'í wichimóbachi piréami yuwa, mapurigá ne wabé Walubela niráa. A'lí echi mukí Ranala waminá wísaka, echo'ná ripá riwigachi torúami níli, mapurigá Binói, Riosi yuwa asimea echo'ná Riosi níwala walubela asíbalachi. ⁶ Echalí echi mukí waminá másali, echo'ná biléana waná kawichí, mapo'ná Riosi ma a'lárali mapurigá echi mukí galá tibútarami níima bilé mili, miná okuá kiento, miná usansa makói rawé iyénasí.

⁷ A'lí pe wi'libeko echo'ná ripá riwigachi echi jaré wikabé o'wéala Riosi kapitánawala ne wabé nakówali echi walubé sitákami namuti sayéraga. Echalí echi ne walula Riosi kapitánawala, Migueli riwéami, we nikówali; ayénachó ne si'néami echi auché

jaré Riosi kapitánawala nakówali, echi wabé aparúami walubé sitákami namuti sayéraga, ayénachó sayéraga binói kapitánawala. Echalí echi wabé aparúami sitákami namuti ne wabé nikówali, ayénachó binói níwala kapitaní ne wabé nakówali,⁸ chopi aboni waminá oméralati. A'lí aboni waminá machí a'wálati, echo'ná ripá riwigachi jonsa. ⁹Echi walubé sitákami namuti, wabé aparúami, échiko echi riablo ju, echi mapu Satanasi riwé. Échiko sinibí wabé 'yékiami ju jena'í wichimóbachi piréami pagótami. Echi riablo mapuyiri bilé sayawi ju, ki'yá jonsa nirúami. A'lí echi riablo echo'ná ripá riwigachi jonsa machí pátami níili, jena'í wichimóbachi yénasí, ayénachó echi jaré wíkabé binói kapitánawala echirigá machí u'lútami níili echi riablo yuwa.

¹⁰Echalí nijeni námali bilé o'welí ra'íchami mapu echo'ná ripá riwigachi ra'íchali jeanágá: Ma sébali mapalí tamujé Riósawala ne sébali ku'wírama si'néami mapu ikí Binói pagótamawala ju. Jipi tamujé Riósawala sébali omériga olama, mapujiti Binói ne suwaba omériami ju. Jipi jonsa tamujé Riósawala sébali nulema si'néami pagótami, mapurigá aboni Walubela Silínawala niráa. Jipi jonsa echi Walubela Jesucristo mapu Riosi júuli, ne sébali wabé Walubela níima mapujiti ma machí pátami níili echi wabé wi'nijíami riablo. Échiko sinibí rawé, sinibí rokogó wabé wi'nijika ruyeli Riosi echi jaré bichíyami sayéraga. ¹¹Echi jaré bichíyami ma omérali echi riablo, mapujiti aboni galá bichíili mapurigá echi Riosi níwala Méchuli waminá mi'lirúami níili, aboni chati olalila jiti, ayénachó mapujiti aboni galá bichíili echi Galabé Riosi Ra'íchala, mapurigá aboni galá nawésali echi auché jaré pagótami. A'lí mapalí echi auché jaré pagótami wabé ko'wináali echi jaré bichíyami, echalí aboni ketasi majali mapurigá aboni echirigá ko'wirúami níima, chopi aboni waminabi galabé nírali mapurigá aboni waminá suwimea, mapurigá aboni echo'ná ripá riwigachi muchima. ¹²Echijiti ne wabé kanílasi 'yemi echo'ná riwigachi piréami. Chopi ne wabé simírami risíu olárami níima echi jaré mapu abijí jena'í wichimóbachi pireko, echi jaré echo'ná walú ba'wírali moba 'yénami ayénachó, mapujiti echi riablo ma ne wabé simírami yoka ku rikíñali echo'ná mapo'ná 'yémítamo muchuwi. A'lí echi riablo ne wabé simírami yoli echirigá, mapujiti binói galá machí mapu ke 'me ayó binói arigá waminá ri'lé walubé na'írali pátami níima, mapo'ná binói walú kastigo 'yárami níima ne sinibí niráa.

¹³A'lí mapalí echi riablo ma echo'ná ripá riwigachi jonsa pátami níili, jena'í wichimóbachi yénasí, echalí binói ne wabé risíu ologá a'najátáli echi mukí mapu chabénala ranali echi taá towí, binói ranala. ¹⁴Chopi echi mukí 'yárami níili mapuyiri okuá echi walubé a'wé analá, mapurigá omérama wabé sapú i'nisiya echo'ná waná kawichí mapalí echi riablo, mapurigá bilé walubé sinowi niráa, wabé najátama. Echalí echi mukí echirigá másali echo'ná waná kawichí mapo'ná Riosi ma a'lárali mapurigá echi mukí 'yárami níima ko'wáami bikiyá bamíbali miná nasipa yénasí. ¹⁵Echalí echi riablo, mapuyiri walú sinowi, machí pali walubé ba'wí echo'ná binói chumulachi jonsa, mapurigá walubé buwibama ba'wí mapurigá biléana bakochi niráa echo'ná jubáami mukírali, mapurigá echi mukí waminá apésarami níima echi walubé ba'wí jiti. ¹⁶Chopi echi kawí ku'wírali echi mukí, mapujiti echi kawí wi'lé chikali echo'ná mukírali jubá okuá, a'lí echi walubé ba'wí, mapuyiri biléana bakochi, suwaba echo'ná pachana wi'yérali bakili, kara mapu echi walú sinowi machí pali echo'ná binói chumulachi jonsa. ¹⁷Echijiti echi wabé aparúami riablo mapuyiri sinowi waminabi ne wabé yoli, echi mukí sayéraga. A'lí binói nikónalaga

simili, echi auché jaré echi mukí kúchuwala sayérasiya, si'néami mapu ikí olako mapurigá Riosi nuleli aboni olánala, si'néami mapu ikí sinibí galá bichiiga olako achigórigá mapurigá aboni nawésarami níli Jesucristo Ra'íchala.

Echi okuá wabé jobátami namuti

13 Echalí nijeni wilíbali echo'ná walubé ba'wírali suwé satérali. A'lí nijeni riwali bilé wabé aparúami namuti echo'ná walú ba'wírali jonsa machínami, echi mapu kichao mo'wéami níli, ayénachó makói awéami níli. A'lí echo'ná ibílana binói awálachi, échiko oro niwárami koyétarami níli mapurigá walula silíami niráa. A'lí echo'ná ibílana mo'ólachi bilé riwá osirúami níli, echi mapu ne wabé sitila anigá wabé sayérami níli echi Walubela Riosi sayéraga. ²A'lí echi wabé aparúami namuti mapu nijeni riwali mapuyiri bilé tigre anilíwami níli, chopi mapuyiri ojuí ronéami níli, ayénachó mapuyiri mawiyá chu'wéami níli. A'lí echi riablo 'yali mapurigá echi wabé aparúami namuti ne wabé jiwérami níima, ayénachó echi riablo wilali echi wabé aparúami namuti mapurigá walubela niráa, mapurigá échiko asimea echo'ná biléana ripabé wilíami walubela asíbalachi, ayénachó mapurigá binói wabé omériga olama mapurigá walubela niráa. ³Echalí nijeni riwali mapu biléana mo'ochí echi we aparúami namuti mo'ólachi chabénala mapurigá wabé simírami chi'wanárami niráa níli, mapuyénasí echi wabé aparúami namuti ma mukumea riwéali, chopi échiko arigá ma ku sa'wárami níli. Echijiti ne si'néami jena'í wichimóbachi piréami galá o'wikeka najáitali echi wabé aparúami namuti yuwa, ayénachó ne si'néami pagótami wabé walubéragera aneli echi wabé aparúami namuti. ⁴A'lí aboni ayénachó wabé o'wikeka walubéragera aneli echi wabé aparúami riablo mapujiti binói ma wilali echi wabé aparúami namuti mapurigá walubela silíami niráa. Echalí echi jaré pagótami jeanigá walubéragera aneli echi wabé aparúami namuti: Ke wesi auché bilé nirú echiyena walubela mapurigá echi wabé aparúami namuti. Ke wesi omérama echi wabé aparúami namuti.

⁵Echalí echi wabé aparúami namuti wabé nóchaga ra'íchali Riosi sayéragera, a'lí Riosi ketasi cho kastigo 'yali chopi Riosi ariweli mapurigá echi wabé aparúami namuti wabé nulama mapurigá walubela silíami niráa, nawosa makói miná okuá michá yénasí. ⁶A'lí echi wabé aparúami namuti echirigá wabé sitírarigá ra'íchali Riosi sayéragera, ayénachó wabé sitila aneli Riosi riwala, ayénachó sitila aneli Riosi ri'obáwala, ayénachó wabé sitírarigá ra'íchali echi jaré echo'ná ripá riwigachi muchúami sayéragera. ⁷Echalí echi wabé aparúami namuti 'yárami níli mapurigá wabé nikówaga waminá omérama echi jaré Riosi níwala pagótami, si'néami mapu ikí abijí tibili jena'í wichimóbachi, ayénachó 'yárami níli mapurigá walubela silíami níima ne suníami jena'í wichimóbachi, mapurigá ne si'néami pagótami silínawala níima ne suníami jena'í wichimóbachi piréami, ayénachó mapurigá ibili echi jaré wikabé isena ra'íchami pagótami silínawala níima ne buchuwímana jena'í wichimóbachi piréami. ⁸Echalí si'néami echi jaré jena'í wichimóbachi piréami pagótami mapu ikí ketasi Riosi níwala níli wabé o'wikeli echi wabé aparúami namuti. Chopi echi jaré Riosi níwala pagótami mapu ikí tibili jena'í wichimóbachi ketasi o'wikeli echi wabé aparúami namuti. A'lí ki'yá chokichí mapalí je'ná kawí niwárami níli, ne si'néami echi jaré pagótami riwalá mapu ikí bichíima riwéaliko ma osirúami níli echo'ná echi Méchuli osilíwalachi mapurigá aboni sinibí piréami níima riwéali. A'lí echi Méchuli níli mapu waminá mi'lirúami níli.

⁹Si'l'néami 'yemi mapu ikí mámiami juko, ne galá namsi je'ná: ¹⁰A jaré pachá mo'wásagá auché jaré mapu tarapé chibi nokuáami ju, abóniko ayénachó pe waminánomí achigórigá pachá mo'wárami níima. Alí a jaré pagótami waminá ko'wisáagá auché jaré, abóniko ayénachó achigórigá ko'wirúami níima pe waminánomí. Echijiti galá níima mapu si'néami echí jaré Riosi níwala pagótami galá kilí ologá piréami níima, ayénachó mapu aboni ne galá bichýami níima Jesucristo niráa.

¹¹Pe wilibeko nijeni riwali auché bilé wabé aparúami namuti jena'í wichimóbachi jonsa machínamí. Échiko okuá awéami níili mapurigá bilé táchil bo'wá, chopi binói wabé o'wéli niráa ra'íchali mapurigá echí wabé aparúami riablo. ¹²Alí je'ná osáala wabé aparúami namuti achigórigá ne wabé omériga nuléami níili jena'í wichimóbachi piréami pagótami, mapurigá echí bacháwala wabé aparúami namuti nuléami níili, mapujiti echí bacháwala echirigá 'yali mapu wabé omériga nulema. A'lí echí osáwala wabé aparúami namuti 'wériga nulega olali mapurigá si'néami jena'í wichimóbachi piréami bacháami chokoba jaga o'wikema echí bacháwala wabé aparúami namuti, echí mapu ku sa'wili mapalí binói chabénala wabé chi'wanárami níili, mapuyénasí arigá mukumea riwéali. ¹³Ayénachó echí osáwala aparúami namuti ne wabé omériga olali mapurigá ke wesi pagótami omérali olayá, mapujiti binói olali mapurigá na'í rikínama echo'ná ripá nolírali jonsa, mapalí echí jaré pagótami echo'ná 'nigá jalí. ¹⁴Echirigá echí osáwala wabé aparúami namuti wabé 'yékali jena'í wichimóbachi piréami pagótami mapalí binói 'wérali olali mapurigá ke wesi auché jaré omérali olayá, mapujiti echí bacháwala aparúami namuti 'yali mapu echirigá omériga olama. Echalí echí osáwala aparúami namuti nuleli echí pagótami niwánala bilé walubé amachíkalawami namuti mapuyiri echí bacháwala aparúami namuti, echí mapu arigá waminabi bitéali mapalí binói ripiyá jiti chi'wanárami níili. ¹⁵A'lí echí osáwala aparúami namuti ayénachó 'yárami níili mapurigá binói oméráma galá iwítiya echí walubé amachíkalawami namuti, echí mapu niwárami níili mapuyiri echí bacháwala aparúami namuti, mapurigá echí amachíkalawami namuti arigá ra'ichama, ayénachó mapurigá nulama ko'wínala si'néami pagótami mapu ikí ketasi bacháami chokoba jábaga o'wikeko echí binói amachíkalawami namuti. ¹⁶A'lí echí osáwala aparúami namuti waminabi omériga ologá, ayénachó nulali mapurigá ne si'néami pagótami bawirárami níima echo'ná aboni sikálachi watoná, echo'ná aboni kowálachi omá. Echalí binói nuleli echirigá bawiránala echí jaré kuchipala, ayénachó echí auché jaré o'wéala. Binói nuleli echirigá bawiránala echí jaré wabé níwami, ayénachó echí jaré tisúwati. Binói nuleli echirigá bawiránala echí jaré nuláami, ayénachó echí jaré pióntami. Echirigá echí osáwala aparúami namuti nuleli bawiránala ne si'néami pagótami. ¹⁷Echi wabé aparúami namuti nulali mapu echalí rawé ke wesi oméráma namuti ralayá, nibilé wesi oméráma namuti ralinea, chopi echí jaré mapu ikí bawirárami níimako mapurigá echí wabé aparúami namuti nulali, abóniko oméráma. Ayénachó echí jaré mapu ikí osirúami juko echo'ná abónichi echí namuti wabé aparúami riwalá, abóniko ayénachó oméráma. Ayénachó echí jaré mapu echo'ná abónichi osirúami ju echí namuti wabé aparúami níwala taráwami, abóniko ayénachó oméráma. ¹⁸A'lí echí jaré galá machíami pagótami chopi oméráma machiyá je'ná jeyiri. Echijiti 'yemi máputamo galá machíami ju, ne galá 'nátaga machisí chu kipu ju echí wabé aparúami namuti níwala taráwami,

mapujiti mapurigá echí pagótami tará, je'ná ju binói níwala taráwami: Usani kiento, usansa makói, miná usani.

Echi nawajíwami mapu echí 144,000 pagótami nawají

14 Pe wilibeko nijeni 'néniga riwali mapu echí Méchuli chukuli echo'ná galabé chulichi, Síónachi anilíwachi. A'lí Binói yuwa jali auché jaré wikabé, bilé kiento miná nawosa makói miná naó mili pagótami. A'lí echo'ná aboni kowálachi ibili osirúami níili echí Méchuli riwalá, ayénachó osirúami níili echí Binói Onolá riwalá. ²Echalí we yáati nijeni námali o'weli anéchanami echo'ná ripá riwigachi, mapurigá o'weli ané mapalí ne walubé bu'wiba ba'wí echo'ná wikanáami bakochi, ayénachó aneli mapurigá ukuí ne wabé iwéami ri'óami, ayénachó aneli mapurigá wikabé táami niráa, mapalí aboni sinepi niráa táchicaamí namuti, arpa anilíwami. ³Echalí echí wikabé pagótami echo'ná bacháami jali, echo'ná echí walubela asíbalachi, mapo'ná Riosi Binói atí, ayénachó aboni bacháami jali echí naó akami namuti yuwa, ayénachó bacháami jali echí osá makói miná naó o'wéala ochérami yuwa. A'lí echí wikabé pagótami nawajili bilé bukulíwami nawajíwami. A'lí ke wesi auché jaré omérati binée echí bukulíwami nawajíwami, chopi echí jaré wikabé, bilé kiento miná nawosa makói miná naó mili pagótami, abóniko chopi galá omérati binée echí nawajíwami. Abóniko ma Riosi jiti ku'wíratami níili, ayénachó aboni 'wísarami níili jena'í wichimóbachi jonsa. ⁴Je'ná wikabé pagótami ketasi bilé chati oláami ju, mapujiti aboni galá bichíili Jesucristo niráa. Abóniko we najata echí Méchuli, chuwé biléanomí mapo'ná Binói iyena. Je'ná jerigá aniwáami ju: Mapu aboni chopi olá mapurigá echí Walubela Jesucristo nulé aboni. Je'ná wikabé jena'í wichimóbachi piréami ma ku wíkatárami níili. A'lí aboni bachá niráa 'yárami níili Riosi, ayénachó aboni bachá niráa 'yárami níili echí Méchuli, mapurigá echí jaré Juríosi pagótami sinibí bachá niráa 'yali Riosi jaré pe okuá aboni níwala 'wírami namuti. ⁵A'lí aboni tarapé siné ikaleka ra'íchami níili, nirapé chati oláami níili bacháami Riosi yuwa.

Bikiyá o'wéala Riosi kapitánawala je'ná jerigá nawésali

⁶Echalí nijeni riwali auché bilé walula Riosi kapitánawala, echí mapu echo'ná ripabé nasipa nolírali i'nika iyénali. Échiko nawisáanalaga julárami níili echí Galabé Riosi Ra'íchala, echí mapu sinibí niráa ku'wírami ju echí pagótami. Échiko echirigá nawésanala julárami níili ne suníami jena'í wichimóbachi piréami pagótami, ne buchuwímana o'wéalachí piréami, mapu chubiyiri isena ra'íchali ra'íchami níili, ayénachó mapu chubiyiri jaré isena pagótami níili. ⁷Échiko o'weli ra'íchaga jeanigá nawésali: Ne wabé majaga walubéraga anesi Riosi, mapujiti ma sébali mapalí Binói walú kastigo 'yama si'néami mapu ikí chati oláami ju. Chokoba jaga o'wikesi echí Riosi mapu niwáli ne suwaba namuti echo'ná ripá riwigachi nirúami, Echi mapu niwáli je'ná kawí, Echi mapu ayénachó niwáli echí walubé ba'wí, Echi mapu ayénachó niwáli ne suníami bajichi.

⁸A'lí pe jubáami auché bilé walula Riosi kapitánawala ayénachó echo'ná ripabé nasipa nolírali i'nika yénali. Échiko ayénachó nawésali jeanigá: Ma suwaba najuli echo'ná walubé walúlachi Babilóniachi anilíwachi, mapujiti echo'ná piréami pagótami wabé simírami chati oláami níili, ayénachó aboni wabé chati olírali ne suníami jena'í wichimóbachi piréami pagótami.

⁹Echalí pe jubáami auché bisáwala walula Riosi kapitánawala echo'ná ripabé nasipa nolírali i'nika iyénali. Échiko o'weli ra'íchali jeanigá: A jaré chokoba jaga o'wikésagá echí wabé aparúami namuti, ayénachó a jaré chokoba jaga o'wikésagá echí walubé amachíkalawami namuti mapu niwárami níili mapuyiri echí wabé aparúami namuti, ayénachó a jaré arigá bawirárami níisagá echo'ná aboni kowárachi, echo'ná aboni sikálachi omá, mapurigá echí wabé aparúami namuti nulé, ¹⁰arigá 'wérali níima mapu aboni ne wabé walubé kastigo 'yárami níima, mapalí Riosi ne wabé yoga, walubé kastigo 'yama si'néami chati oláami pagótami. A'lí aboni wabé risúu olárami níima echo'ná wabé chati na'írali mapo'ná echí asújeri anilíwami ayénachó rajamea. Echalí echí jaré galabé Riosi kapitánawala galá riwimea mapalí aboni echirigá risúu olárami níima, ayénachó echí Méchuli echirigá riwimea. ¹¹A'lí aboni ne sinibí niráa echirigá wabé risúu olárami níima echo'ná wabé chati na'írali, mapo'ná sinibí ne wabé molínama. A'lí si'néami echí jaré mapu ikí chokoba jaga o'wiké echí bacháala wabé aparúami namuti ke siné isábama, nibilé siné rawé, nibilé siné rokogó, echí jaré mapu ikí chokoba jaga o'wikeko echí walubé amachíkalawami namuti ketasi cho, echí jaré mapu ikí bawirárami níimako mapurigá echí osáwala aparúami namuti nulé, ketasi cho. ¹²Echijiti galá níima mapu echí jaré Riosi níwala pagótami sinibí galabé kilí ologá pirélama, si'néami mapu ikí galá nijéwaga olá mapurigá Riosi nulé aboni, si'néami mapu ikí sinibí waminabi galá bichísamiko echí Walubela Jesucristo niráa.

¹³A'lí nijeni námali bilé Ra'íchami mapu echo'ná ripá riwigachi jonsa tamí jeaneli: Je'ná jerigá osá: Ne wabé kaníliami níima echí bichíyami mapu jipi jonsa suwiméako, si'néami mapu ikí bichíyami ju echí Walubela Jesucristo niráa. Echi Wabé Galabé Riosi Iwigala bichíwaga aní mapu aboni ne wabé kanílama, mapujiti ma ketasi 'wérali níima mapu aboni ne wabé nochama, chopí aboni ma galá isábama, ayénachó aboni galá ku natétarami níima mapujiti aboni ma galabé ologá piréali.

Si'néami chati oláami pagótami walú kastigo 'yárami níima

¹⁴A'lí nijeni 'néniga riwali bilé wabé rosákami nolí. A'lí echo'ná ripá moba nolírali asali bilé Walubela, a'lí échiko mapuyiri bilé rijói níili. Echo'ná Binói mo'ólachi échiko koyétarami níili bilé oro niwárami mapuyiri koyela, ayénachó bilé mapuyiri ripiyá chapigá asali ne wabé oláami. ¹⁵Echalí auché bilé walula Riosi kapitánawala machínali echo'ná ri'obachi jonsa, ripá riwigachi nirúami. Échiko o'wali ra'íchaga jeaneli echí Bilé mapu echo'ná ripá moba nolírali asali: Ma o'winá sikilée echo'ná wichimóbachi nirúami uva anilíwami rakéami namuti, mapujiti ma wáami ju, echijiti ma sébali sikirékowachi. Ma sébali ne jubá rawé, mapalí si'néami echí jaré wichimóbachi piréami pagótami justicia olárami níima.

¹⁶Echalí Echi mapu echo'ná ripá moba nolírali asali ma suwaba sikireli jena'í wichimóbachi nirúami uva anilíwami rakala. Je'ná jerigá aniwáami ju: Mapu ne si'néami pagótami jena'í wichimóbachi tibíami ma napabúrami níili, achigórígá mapurigá echí uva sikiréami waminá napabú echí uva rakala mapalí ma wáami ju.

¹⁷A'lí auché bilé walula Riosi kapitánawala machínali echo'ná ri'obachi jonsa ripá riwigachi nirúami. Échiko ayénachó bilé mapuyiri ripiyá chapigá iyénali, ne wabé oláami. ¹⁸Ayénachó auchecho bilé walula Riosi kapitánawala machínali echo'ná ri'obachi jonsa, mapo'ná echí jaré namuti ko'yagá ikósaga 'yálati Riosi. A'lí

échiko wabé omériami níili walubé na'í niwayá jena'í wichimóbachi. Echalí échiko o'weli ra'íchali echi auché bilé Riosi capitánawala mapu chapigá iyénali echi wabé oláami ripiyá, jeanigá: We yáti o'winá napabuya si'néami jena'í wichimóbachi tibíami pagótami, achigórigá mapurigá echi uva icháami waminá sikireka napabú suwaba echi uva rakala, mapujiti ma sébali ne jubá rawé mapalí si'néami pagótami justicia olárami níima.

¹⁹ Echalí echi walula Riosi capitánawala napabuli si'néami jena'í tibíami pagótami achigórigá mapurigá echi uva níwami ripúnaga napabú echi uva rakala. Echalí echi pagótami napabúrami níili mapurigá Riosi justicia olama aboni yuwa. A'lí Riosi walú kastigo 'yali echi pagótami, achigórigá mapurigá echi jaré uva níwami wabé kamina echi wikabé uva rakala mapurigá galá machínama echi ba'wila chopi. ²⁰ A'lí echi jaré wikabé pagótami echirigá ko'wirúami níili mulubé echo'ná walúlachi. Echalí ne walubé maníbali la mapurigá walubé maniba echi uva ba'wila mapalí echi jaré icháami kamina echi wikabé uva rakala, mapujiti mulubé echo'ná walúlachi ne wabé rokóami maníbali echi la mapuyénasí bilé kawé chumulachi sébali, ayénachó echi la wabé rokóami wi'libé ra'laka manili, mapuyénasí bikiyá kiento kilómetro niráa.

**Echi jaré kichao o'wéala liosi capitánawala mapu julárami níili kicháosa
niráa walú kastigo 'yánala jena'í wichimóbachi tibíami pagótami**

15 A'lí nijeni riwali auché jaré wabé simírami o'weli karúmati, ne wabé majáriami, echo'ná ripabé nolírali 'yénami. Nijeni riwali kichao o'wéala Riosi capitánawala echo'ná ripá 'yénami, echi jaré mapu ne wabé omériami níili nulayá mapurigá wiká karúmati jiti ma ne jubá ne kicháosa niráa ne wabé simírami risúu olárami níima jena'í wichimóbachi tibíami pagótami. A'lí echalí jonsa Riosi ma ketasi waminabi kastigo 'yama riwéali echi jaré pagótami jena'í wichimóbachi.

² Ayénachóni riwali biléana mapuyiri wi'llé ipó, ne wabé wi'límala mapurigá echi walú ba'wechi niráa. Echo'ná moba ne buchuwímana mapurigá sipée niráa níili, chopi ayénachó rajáami níili mapurigá na'í niráa. A'lí echo'ná moba jáwami riwálini ne si'néami echi jaré pagótami mapu ikí ma nayúrali echi bacháwala wabé aparúami namuti sayéraga, ne si'néami mapu ikí ke bilé cho amachíkali echi walubé amachíkalawami namuti mapu niwárami níili mapuyiri echi bacháwala wabé aparúami namuti, ne si'néami mapu ikí ke bilé siné bawirárami níili mapurigá echi bacháwala wabé aparúami namuti nuleli, ne si'néami mapu ikí ke bilé osirúami níili echo'ná abónichi echi bacháwala wabé aparúami namuti riwalá tarálawala. A'lí ne si'néami aboni níwami níili arpa anilíwami tákawami namuti mapu Riosi Binói 'yali. ³ Echalí ne si'néami aboni nawajía jali echi Moisesi nawajíwala, echi mapu Riosi piónawala níili, ayénachó aboni nawajía jali echi Méchuli nawajíwala jeanigá:

Mujé ne Walubela Riosi suwaba omériami ju. Mujemi ne wabé galabé olali suwaba mapu ikimi olali.

Mujemi sinibí ne wabé wachínaga olá, ayénachómi ne bichíwaga aní.

Mujemi ne Walubela Silíami ju si'néami jena'í wichimóbachi piréami pagótami silínawala.

⁴ Ne si'néami pagótami mi majaga o'wikema, Mujé tamujé Walubélawala. Ne si'néami pagótami mi walubéraga anema.

Mujemi chopi ne wabé galabé oláami ju, echijiti ne suníami piréami pagótami mi yuwa sigá wabé o'wikema, mapujiti aboni ma galá machíralati mapurigá Mujemi sinibí ne wabé wachínaga olali.

⁵A'lí ma je'ná jerigá ikisá, echalí we yáati nijeni riwali irápalawami echo'ná ripá riwigachi mapo'ná Riosi atí. ⁶Echalí echi kichao Riosi kapitánawala ku buyali echo'ná jonsa mapo'ná Riosi atí. Aboni wabé omériami níli nulayá mapurigá jena'í wichimóbachi tibíami pagótami kicháosa niráa ne wabé simírami risúu olárami níima. A'lí ibili echi kichao Riosi kapitánawala ne wabé bi'wíami napáchami níli, mapuyiri napoli ne wabé simírami rosákami niráa, ayénachó echo'ná sulachí, kayé noligá, ibili bulérami níli bilé oro niwárami mapuyiri puli. ⁷A'lí bilé echi naó akami namuti ibílipi niráa 'yali jarito oro niwárami echi jaré kichao Riosi kapitánawala. A'lí echi kichao jarito ne buchíami níli wabé chati namuti, risúu oláliami, mapurigá echi Sinibí Bitéami Riosi echijiti wabé risúu ologá walú kastigo 'yama jena'í wichimóbachi piréami pagótami. ⁸A'lí echo'ná pachá Riosi ri'obáwalachi ripá riwigachi nirúami, ne wabé buchili molí, mapujiti echi ne Walubela Riosi echo'ná pachá asali, ayénachó mapujiti Riosi ne suwaba omériami ju. Echalí ke wesi omérali mo'wiyá echo'ná pachá ri'obachi mapuyénasi echi jaré kichao Riosi kapitánawala ke cho sunili kicháosa niráa ne wabé simírami risúu olayá jena'í wichimóbachi tibíami ke bichíyami pagótami.

Echi kichao jarito ne buchíami echi wabé chati namuti, risúu oláliwami

16 Echalí nijeni námali bilé o'weli ra'íchami echo'ná pachá ri'obachi ra'icháchanachi, echi mapu jeaneli echi kichao Riosi kapitánawala: Simíbaga, suwaba ku'lwasi echo'ná wichimóbachi echi kichao jarito, echi mapu maníami ju echi wabé chati namuti risúu oláliwami, echi mapujiti Riosi wabé risúu ologá kastigo 'yama echi jaré ke bichíyami pagótami.

²Echalí echi bacháwala Riosi kapitánawala simigá ku'lúwali binói níwala jarito jena'í kawírali moba. A'lí we yáati si'néami echi jaré pagótami ne wabé charigá chánali, ne wabé chati júkami niráa. Echijiti aboni ne wabé okoli, si'néami mapu ikí bawirárami níli mapurigá echi bacháwala wabé aparúami namuti nuleli, si'néami mapu ikí chokoba jaga o'wikéliko echi walubé amachíkalawami namuti mapu niwárami níli mapuyiri echi bacháwala wabé aparúami namuti.

³A'lí echi osáwala walula Riosi kapitánawala ku'lúwali binói níwala jarito echo'ná walubé ba'wechi moba. Echalí echi walubé ba'wí suwaba waminá lá najítali, mapurigá bilé mukúami lalá niráa. A'lí suwaba namuti echo'ná walubé ba'wírali nirúami, we yáati waminá suwili.

⁴A'lí echi baisáala walula Riosi kapitánawala ku'lúwali binói níwala jarito echo'ná moba suníami bakochi jena'í wichimóbachi nirúami, echo'ná moba suníami bajichi ayénachó. Echalí suwaba echi ba'wí káraga lá najítali. ⁵A'lí bicheni námali ra'icháchanachi auché bilé Riosi kapitánawala, echi mapu nulérami níli tibútanala suníami jena'í wichimóbachi maníami ba'wí. Échiko jeanili: Mujé Riosi ne wabé simírami galabé oláami jumi, ayénachómi sinibí niráa echirigá galabé oláami níli. Mujemi ne wabé wachínaga olali mapalimi echirigá nulali kastigo 'yánala echi jaré ke bichíyami pagótami, ⁶mapujiti aboni ne wabé léntaga ko'yali jaré mujé níwala galabé bichíyami pagótami, jaré Riosi jiti nawésami pagótami ayénachó. A'lí jipi Mujé Riosi ayénachó 'yali

mapurigá aboni bajima lá, mapujiti galá níili mapu aboni echirigá kastigo 'yárami níimi.

⁷Ayénachó nijeni námali auché bilé Riosi kapitánawala ra'icháchanachi, echi mapu echo'ná pachá Riosi ri'obáwalachi asali, ne mulubé mapo'ná chukuli echi jubétachi mapo'ná chabénala echi jaré karúmati namuti ikósaga 'yálati Riosi. Échiko, Riosi yuwa ra'íchaga jeaneli: Mujé Walubela Riosi ne suwaba omériami jumi, ayénachómi ne bichíwali galá wachínaga olali mapalimi echirigá nulali.

⁸A'lí echi nawosa Riosi kapitánawala ku'lúwali binói níwala jarito echo'ná rayénalachi moba. A'lí echi rayénali echijiti waminabi ne wabé simírami ratábali, allí echi pagótami echijiti we rajali. ⁹Sí'néami jena'í wichimóbachi tibíami pagótami echirigá wabé rajali mapujiti echi rayénali ne wabé simírami ratábali, chopi aboni tarapé cho aliweli chati olayá, nibilé cho waminabi walubéragera aneli Binói. Echalí aboni chopi ne wabé sitila aneli echi Riosi mapu echirigá ne wabé omériga olali mapurigá aboni risúu olárami níima.

¹⁰A'lí echi malisa Riosi kapitánawala ku'lúwali binói níwala jarito echo'ná moba mapo'ná echi bacháwala wabé aparúami namuti asali mapurigá walubela silíami niráa. Echalí ke sayiná ne wabé rukuáwali echo'ná kanápuromí mapo'ná echi bacháwala wabé aparúami namuti wabé nuláami níili, ayénachó echo'ná tibíami pagótami ne wabé simírami okoli, ayénachó aboni ikili aboni cha'mélawala mapurigá echijiti ma ketasi 'me newalama mapurigá aboni ne wabé simírami okoli. ¹¹Echalí echi chati oláami pagótami ne wabé sitíila aneli echi Riosi, ripá riwigachi atíami, mapujiti aboni echirigá ne wabé risúu olárami níili, ayénachó mapujiti ma ne wabé chati chánali mapo'ná aboni rajali, chopi aboni tarapé cho ariweli chati olayá, nibilé cho walubela aneli Riosi.

¹²A'lí echi usansa Riosi kapitánawala ku'lúwali binói níwala jarito echo'ná moba walubé bakochi Eujarátachi anilíwachi. A'lí echo'ná bakochi suwaba wakicheli echi ba'wí, mapurigá echo'ná simárama echi jaré mikabé panina jonsa simíbami o'wéala silíami, wikabé aboni sontársawala yuwa.

¹³A'lí nijeni riwali bikiyá wabé chati isena aliwá. Echi bilé machínali echo'ná echi wabé aparúami riablo chumilachi jonsa, auché bilé machínali echo'ná echi bacháwala wabé aparúami namuti chumilachi jonsa, allí auché bilé machínali echo'ná echi osáwala wabé aparúami namuti chumilachi jonsa, echi mapu ne wabé 'yékaka nawésami níili. A'lí bikiyana echi wabé chati isena aliwá mapuyiri rimó sakuá níili. ¹⁴A'lí je'ná bikiyá chati isena riablo aliwala níili. Bikiyana wabé omériga olali mapurigá ke wesi pagótami omérali olayá. Echalí aboni napabú 'yénali ne suníami jena'í wichimóbachi nuláami o'wéala silíami, ne sí'néami aboni pagótamawala yuwa, mapurigá ne si'néami ne wabé nakoma echalí ne jubá rawé, mapalí echi suwaba omériami Walubela Riosi walú kastigo 'yama echi jaré ke bichiyami pagótami. ¹⁵Jesucristo jeaní: ¡Galá 'nesi! Nijeni ke sayiná ku nawama, mapurigá bilé chigórami ke sayiná nawá. Ne wabé kaníliami níima echi jaré pagótami mapu ikí aboni niráa tibuka muchímako; mapurigá aboni galá oláami níima echalí ne jubá rawé, mapurigá aboni ketasi riwélama mapurigá echi auché jaré chati oláami pagótami ne wabé riwélatami níima. ¹⁶Echalí echi bikiyá chati isena aliwá napabuli ne si'néami jena'í wichimóbachi nuláami o'wéala silíami, ne sí'néami aboni pagótamawala yuwa, echo'ná biléana mapo'ná Aramajérónachi anilíwachi ju, echi jaré Ebreo anilíwami ra'íchala niráa.

¹⁷A'lí echi kicháosa Riosi capitánawala ku'lúwali binói níwala jarito echo'ná ikárali. A'lí we yáati echi Walubela Riosi o'weli ra'íchali pachá echo'ná ripá riwigachi nirúami ri'obachi jonsa, mapo'ná Binói atí echo'ná walubela asíbalachi. Echalí Riosi jeanili: Jipi ma yénabisí ju.

¹⁸A'lí we yáati wisabé ne wabé ni'wili, ayénachó ne wabé aneli. A'lí wisabé ne wabé ri'oli, ayénachó ne wabé simírami iwéami nokali jena'í wichimóbachi. A'lí ki'yá chokichí jonsa ke siné echiyena iwéami nokalí mapalí jonsa piréali pagótami jena'í wichimóbachi. ¹⁹Echalí echi walubé walúlachi bikaná niráa rojonárami níili, mapujiti echi wi'yé wi'llibé rapali; ayénachó echi auché jaréana o'wéalachí jena'í wichimóbachi nirúami, suwaba waminá najuli. A'lí Riosi ku 'nátaga echi walubé walúlachi Babilóniachi anilíwachi jiti, ne walubé kastigo 'yánali echo'ná piréami pagótami, mapujiti aboni chati oláami níili. ²⁰A'lí echo'ná walubé ba'wírali nasipa nirúami kawí suníami waminá ko'ná botuwili, ayénachó suwaba chulítami waminá ri'narárami níili. ²¹A'lí ripá nolírali jonsa ne o'weli rujuili rijé jena'í wichimóbachi piréami pagótamichi moba. Echalí ibili rijé ne wabé bitéami níili, mapuyena nawosa makói kilo. A'lí jena'í wichimóbachi tibíami pagótami ne wabé sitila aneli Riosi, mapujiti aboni ne wabé simírami risíu olárami níili echi wabé o'weli rijé jiti.

Echi walula mukí chati sitíi oláami kastigo 'yárami níili

17 Echalí tamí yuwa nawali bilé echi jaré kichao o'wéala Riosi capitánawala, echi mapu ibílipi jarito kami níili. Échiko tamí jeaneli: Wakiná simí, nijé nimí 'nérama mapurigá walú kastigo 'yárami níima echi walula mukí, wabé chati sitíi oláami, echi mapu echo'ná moba wikanáami walú ba'wírali atí. ²Echi jaré o'wéala silíami jena'í wichimóbachi nuláami ma wabé chati sitíi ologá kochili echi chati sitíi oláami mukí yuwa. A'lí echi auché jaré pagótami jena'í wichimóbachi tibíami ma mapurigá tékali niráa ju, mapujiti aboni achigórigá chati olánali mapurigá echi chati sitíi oláami mukí olali.

³A'lí echi Wabé Galabé Riosi Iwigala tamí jerigá riwírali: Mapurigá bilé walula Riosi capitánawala echo'ná biléana waná kawichí tamí tora niráa, a'lí echo'nani riwali bilé mukí moba asígá atíami bilé wabé aparúami sitákami namuti, echi mapu buchuwímana ne noligá osirúami níili echo'ná binóichi wikabé ra'íchali mapu Riosi sayéraga aniwáami níili. A'lí echi wabé aparúami namuti kichao mo'wéami níili, ayénachó makói awéami níili. ⁴A'lí echi mukí sitákami sipúchami níili, chomítami ayénachó. A'lí échiko oro anilíwami jiti bayóratami níili, jaré wabé simati, wabé natéami rité jiti ayénachó, jaré perla anilíwami jiti ayénachó. A'lí echi mukí chapigá asali bilé jarito oro niwárami mapu ne buchíami níili echi jaré chati oluwáwami, mapurigá echi mukí wabé simírami chati oláami níili. ⁵A'lí echo'ná echi chati sitíi oláami mukí kowálachi bilé riwá osirúami níili, mapu ketasi galá machirúami ju. Je'ná jerigá osirúami níili: Je'ná mukí, Babilonia riwéami, ne si'néami echi jaré chati sitíi oláami mugú iyela niráa ju, ayénachó iyela ju si'néami echi jaré pagótami kanápuromí piréami mapu ikí chokoba jaga o'wiké echi jaré amachíkalawami namuti. ⁶Echalini riwali mapurigá echi mukí rikulí niráa níili mapujiti binói ma olali mapurigá wikabé pagótami wabé léntaga ko'wirúami níima, mapujiti aboni galá nawésali jeanigá mapu aboni galá bichíyami níili Jesucristo niráa. Echijiti echi mukí mapurigá rikulí niráa níili aboni lalá jiti. A'lí mapalini je'ná jerigá riwali, echalini ne wabé majali. ⁷A'lí echi walula Riosi capitánawala tamí jeanigá rukueli:

¿Churékulami echiyena majawá? Nijeni mi ruyema suwaba mapu churigá aniwáami ju echi mapu ketasi cho machirúami ju echi mukí jiti, ayénachó echi wabé aparúami sitákami namuti jiti, echi mapu echi mukí asigá atí, echi mapu kichao mo'wéami ju, ayénachó mapu makói awéami ju.⁸ Ayénachó echi walula Riosi kapitánawala tamí jeaneli: Echi wabé aparúami sitákami namuti mápumi riwalí échiko chabénala bitéali jenaí' wichimóbachi mapurigá rijói niráa, chopi jipi ma ketasi te, chopi pe minana échiko moka ku machínama echo'ná wabé ri'lé jochi jonsa mapo'ná ketasi suwíbami ju ri'lena; ayénachó échiko pe minana auchecho siné galá waminá mukumea. A'lí jenaí' wichimóbachi piréami pagótami, si'néami mapu ikí aboni riwalá ketasi osirúami ju echo'ná Riosi oselíwalachi mapo'ná ki'yá chokichí jonsa Riosi osali echi jaré pagótami riwalá mapu sinibí niráa piréami níima, abóniko ne wabé majáratami níima mapalí aboni riwimea echi wabé aparúami sitákami namuti, echi mapu chabénala bitéali jenaí' wichimóbachi, mapurigá rijói niráa, echi mapu ketasi te jipi rawé, echi mapu pe waminánomí auchecho ku bitélama.

⁹Echi jaré pagótami mapu galá machíami juko, abóniko chopi omero machiyá je'ná jeyiri: Echi kichao mo'ó, kicháona chulichi ju, echo'ná walúlachi nirúami, mapo'ná echi mukí atí, walula nuláami niráa.¹⁰ Ayénachó echi kichao mo'ó kichao o'wéala silíami ju, chopi malí echi o'wéala silíami ma omérata níili, auché bilé jipi abijí walubela silíami ju, chopi auché bilé ketasi cho nawali. A'lí mapalí échiko nawasa, arígá 'wéali níima mapu pe téeli niráa walula silíami níima.¹¹ A'lí echi wabé aparúami sitákami namuti mapu chabénala bitéali mapurigá rijói niráa, echi mapu jipi ketasi te, échiko níima echi osánaósa walula silíami, ayénachó échiko bilé níili echi auché jaré kichao. A'lí échiko pe waminana suwaba mukusá, ma echo'ná yénabisí níima.

¹²A'lí echi jaré makói awá mápumi riwali, ibili niráa o'wéala silíami ju, chopi aboni ketasi cho jawárami ju mapurigá o'wéala silíami niráa. Pe waminana abóniko pe téeli niráa jawárami níima mapurigá aboni o'wéala silíami níima, mapuyénasí echi wabé aparúami sitákami namuti ne walubela silíami níima.¹³ A'lí je'ná makói o'wéala silíami a'nawí chópirigá 'natama mapurigá aboni chopi nijéwaga ku'wírama echi wabé aparúami sitákami namuti, suwaba mapu ikí binói nakimea olánala.¹⁴ A'lí echi makói o'wéala silíami nakoma echi Méchuli sayéraga, chopi echi Méchuli galá oméraama aboni, mapujiti Binói ne Walubela ju si'néami ju si'néami echi auché jaré o'wéala yuwa, ayénachó ne Walubela Silíami ju si'néami echi auché jaré silíami yuwa. A'lí echi jaré mapu echi Méchuli yuwa muchuwi galá bayérami níili mapurigá aboni najátama Binói yuwa, ayénachó aboni chapirúami níili Riosi jiti, a'lí aboni galá bichíyami ju.

¹⁵Echalí echi walula Riosi kapitánawala ayénachó tamí jeaneli: Mujemi riwali echi chati oláami walula mukí echo'ná wikanáami o'weli ba'wírali moba atíami. Suwaba je'ná jerigá aniwáami ju: Echi mukí echirigá ne walula nuláami níima wikanáami piréami pagótami yuwa, ayénachó ne wikabé isena pagótami yuwa, ayénachó wikabé o'wéala silíami yuwa, ayénachó wikabé si'wináriga ra'íchami pagótami yuwa.¹⁶ A'lí echi makói awá mápumi riwali, echi wabé aparúami sitákami namuti awala, echi mapu o'wéala silíami ju, abóniko ne wabé kichima echi chati oláami walula mukí, ayénachó waminá waná bi'neli ariwema, machí sapéami niráa. A'lí abóniko suwaba waminá suwábama echi chati oláami walula mukí, ayénachó abóniko suwaba ikósama.¹⁷ Mapujiti Riosi Binói nakíili mapurigá aboni

echirigá kastigo 'yama echi chati oláami walula mukí, ayénachó mapurigá aboni a'nawí chópirigá 'natama mapurigá aboni chopi nijéwama echi wabé aparúami sitákami namuti mapuyénasí suwaba ikimea mapurigá Riosi bichíwaga anili mapu echirigá ikimea riwéali.¹⁸ A'lí echi walula mukí mápumi riwali, échiko echi walubé walúlachi ju. A'lí echo'ná walúlachi piréami o'wéala arigá nuléami ju ne si'néami echi auché jaré o'wéala silíami jena'í wichimóbachi nuláami.

Babilóniachi anilíwachi walúlachi suwábarami níima

18 Pe wilibeko, je'ná jerigá ma ikisáa, nijeni riwali auchecho bilé Riosi kapitánawala ripá riwigachi jonsa rikínamí. Échiko ne wabé walubela níili. A'lí échiko ne wabé ratábami níili; echijiti ne buchuwímana jena'í wichimóbachi ne wabé simírami machiná níili. ²Echalí echi walubela Riosi kapitánawala o'weli ra'íchaga jeanili: Ma galá suwábarami níima echi walubé walúlachi Babilóniachi anilíwachi. Jipi jonsa echi pagótami ma ketasi pirélama echo'ná, chopi pirélama echi jaré chati sitíi oláami riabulo aliwala, ayénachó suwaba chibi yiri chati sitíi oláami aliwá, ayénachó suwaba chibi yiri o'weli i'nika 'yénamí mapu wabé sitíi chijúntami ju. ³Ne si'néami chubiyiri pagótami suníami jena'í wichimóbachi piréami mapurigá tékuli niráa 'yena, mapujiti aboni achigórigá wabé chati sitíi olali mapurigá echo'ná Babilóniachi piréami olali, ayénachó echi auché jaré o'wéala jena'í wichimóbachi piréami achigórigá chati olali mapurigá echo'ná Babilóniachi piréami o'wéala chati sitíi olali. A'lí echi jaré wiká namuti ralinéwami jena'í wichimóbachi piréami ma simírami wikabé meli wenomí mapujiti echo'ná Babilóniachi piréami pagótami wikabé namuti ralali, suwaba mapu ikí aboni nakili ralinália mapurigá wabé kaníliga pirélama.

⁴Echalí nijeni námali mapalí Riosi Binói echo'ná ripá riwigachi jonsa ra'íchaga jeanili: Echo'ná walúlachi jonsa waminá simasi si'néami 'yemi máputamo Nijé níwala pagótami ju, mapurigátamo ketasi achigórigá chati sitíi oláami níibo mapurigá echo'ná piréami, ayénachó mapurigátamo ketasi achigórigá ne wabé risúu olálami níibo mapurigá echo'ná piréami wabé risúu olárami níima mapalí aboni kastigo 'yárami níima. ⁵Mapujiti echo'ná Babilóniachi piréami pagótami ne simírami wisabé wabé chati sitíi olali, mapuyénasí Riosi mayé mapu aboni ne sébali chati sitíi olali, ayénachó Riosi we 'nata mapurigá aboni wabé chati sitíi olali. ⁶Galá níima mapu echo'ná Babilóniachi piréami pagótami achigórigá risúu olárami níima mapurigá aboni risúu olali auché jaré pagótami, ayénachó galá níima mapu aboni waminabi ne wabé simírami, osá chokéami niráa, risúu olárami níima. Galá níima mapu aboni 'yárami níima bajínala echi mukuwáwami waminabi simírami osá chokéami wabé chati niráa, ketasi mapurigá aboni 'yalí bajínala echi auché jaré pagótami. ⁷Galá níima mapu echo'ná Babilóniachi piréami pagótami echiyena ne wabé simírami risúu olárami níima, ayénachó mapurigá aboni echiyena ne wabé simírami risúu nílama, achigórigá mapurigá aboni ne wabé simírami nóchami níili, ayénachó mapurigá aboni ne wabé simírami kaníliga olali suwaba mapu ikí aboni nakili oláala. Abóniko je'ná jerigá aní: Tamujé walúlawalachi ne wabé walubela ju. Ketásita waminá waná awínala ariwérami ju, nibilé sineta risúu nílabo. ⁸Ayénachó echijiti waminánomí echo'ná Babilóniachi piréami pagótami sinepi rawé niráa walú kastigo 'yárami níima, mapujiti jaré aboni ko'wirúami níima, auché jaré wabé simírami risúu olárami níima, auché jaré ne wabé simírami 'lochébanatarami

níima, ayénachó aboni walúlawalachi waminá suwaba ikósarami níima, mapujiti echí Walubela Riosi ne wabé omériami ju mapu nulali echirigá kastigo 'yánala.

⁹ A'lí sí'néami echí jaré o'wéala silíami jena'í wichimóbachi piréami mapu achigórogá chatí sitíi ologá piréali mapurigá echo'ná Babilóniachi piréami olali, echí jaré mapu wabé kaníliga olali suwaba mapu ikí echo'ná piréami olali, abóniko ne wabé nalákama, ayénachó aboni ne wabé risúu animea mapalí aboni ritiwá walubé molínachi mapalí echí walubé walúlachi suwaba rajínama. ¹⁰ Echalí mapalí echo'ná Babilóniachi piréami pagótami echiyena walubé kastigo 'yárami níima sí'néami echí auché jaré o'wéala ne wabé majaga, mikabé jaga, jeanimea: ¡Baji, 'yemi pagótami echo'ná walubé walúlachi Babilóniachi anilíwachi piréami, 'yemi máputamo ne wabé nuléami níili auché jaré pagótami! Jípitamo sinepi niráa suwaba kastigo 'yárami ju.

¹¹ Echalí echí jaré wiká namuti ralinéwami jena'í wichimóbachi piréami ne wabé nalákaka, wabé risúu animea mapujiti echo'ná walúlachi suwaba suwábarami níima, mapujiti echalí ma ke nirúlama pagótami mapu ralímea echí wikabé namuti mapu echí ralinéwami ralinéabiya pama. ¹² Mapujiti echo'ná Babilóniachi piréami wabé raláami níili echí oro, echí plata ayénachó, echí wabé natéami rité ayénachó, echí perla anilíwami ayénachó. Echo'ná piréami wabé raláami níili echí napoli wabé galabéala, echí chiní saláami ayénachó, chiní chomítuwami ayénachó, chiní sitákami asfchiko. Echo'ná piréami ayénachó wabé raláami níili su'weti júkami tabla ayénachó, auché jaré karúmati marfil anilíwami ayénachó, auché jaré tabla wabé natéami ayénachó, echí jiero lánami ayénachó, echí jiero ayénachó, echí rité rikóchali wabé ba'yóami ayénachó. ¹³ Echo'ná Babilóniachi piréami ayénachó we raláami níili echí kanela anilíwami kajela, echí jaré wabé su'weti júkami raká ayénachó, echí galabé moluwá ayénachó, echí wabé su'weti mira anilíwami ayénachó, auché jaré wabé su'weti júkami namuti ayénachó, echí uva ba'wila ayénachó, echí galabé aceite ayénachó, echí wabé galabé arina ayénachó, echí turío ayénachó, echí jaré namuti muruka uchékowami ayénachó, echí jaré bo'wá ayénachó, echí jaré kawé ayénachó, echí jaré karro anilíwami kaweti banírawami ayénachó, echí jaré pióntami ayénachó. A'lí aboni arígá raláami níili echí jaré pagótami aliwala ayénachó. ¹⁴ Ayénachó echí jaré wiká namuti ralinéwami jeanema echo'ná Babilóniachi piréami pagótami jeanigá: ¡Baji, 'yémítamo ma ketasi níwa echí jaré wikabé karúmati namuti wabé natéami máputamo ne wabé koruli! Jipi, mátamo wikáwali suwaba echí jaré galabéala namuti máputamo níwali, a'lí bichétamo ke siné auchecho riwiboa.

¹⁵ Echalí echí jaré rijói je'ná jeyiri karúmati namuti ralinéwami, echí jaré mapu ne wabé níwami nílali mapujiti echo'ná Babilóniachi piréami wabé ralali aboni níwala namuti, abóniko mikabé jaga. ne wabé majaga riwímea mapurigá echo'ná Babilóniachi piréami echirigá ne wabé risúu olárami níima, ayénachó aboni ne wabé nalákaka, risúu animea ¹⁶ jeanigá: ¡Baji, ne wabé simírami risúu olárami ju echo'ná Babilóniachi piréami pagótami! Abóniko ne wabé níwami níili mapurigá bilé mukí ne wabé simati napáchami, ne wabé ba'yóami chomítuwami sipúchami, sitákami ayénachó, echí mapu ayénachó wabé ba'yóratami ju echí oro jiti, jaré wabé ba'yóami rité jiti ayénachó, echí jaré perla anilíwami jiti ayénachó; ¹⁷ ¡chopi jipi, sinepi niráa, suwaba aboni níwala wabé galabéala karúmati ma suwaba suwábarami ju!

Echalí si'néami echí jaré rijói barko simíriami ne wabé majaga mikabé jábama, echí auché jaré pagótami echo'ná bárkochi muchiga 'yénami ayénachó, echí auché jaré bárkochi nóchami ayénachó, si'néami rijói echo'ná moba walubé ba'wírali nóchami ayénachó.¹⁸ A'lí ma riwisáa echí walubé walúlachi walú rajínaga molínachi, echalí si'néami aboni o'weli ra'íchaga jeanimea: ¡Ke siné nirúali auché biléana echiyena galabé walúlachi!

¹⁹ Ayénachó ne wabé o'mónami niráa aboni pásama wi'yé echo'ná aboni mo'ólachi, ayénachó ne wabé nalákaka, risúu anigá, o'weli ra'íchaga jeanimea: ¡Baji, ne wabé risúu olárami ju echo'ná Babilóniachi anilíwachi walúlachi piréami pagótami! Aboni ne wabé simírami níwami níili, echijiti si'néami echí jaré rijói mapu ikí níwa echí o'weli barko, echo'ná walubé ba'wírali moba 'yénami, si'néami we nóchaga, echí wikabé namuti echo'ná walúlachi toyá, ayénachó we níwami níili. ¡Chopi jipi echo'ná walúlachi piréami sinepi niráa waminá suwábarami ju!

²⁰ Ne wabé kanílasi si'néami 'yemi pagótami echo'ná ripá riwigachi muchúami mapujiti Riosi echirigá walú kastigo 'yama echo'ná Babilóniachi piréami pagótami, ayénachó echijiti kanílasi 'yemi o'wéala máputamo ki'yá chokichí julárami níili nawisánala Jesucristo jiti rugá, ayénachó echijiti kanílasi si'néami 'yemi máputamo wakinana julárami níili Riosi jiti nawisánala, ayénachó kanílasi ne si'néami 'yemi máputamo Riosi níwala pagótami ju, mapujiti mapalí Riosi echirigá risúu olama echo'ná Babilóniachi piréami pagótami, echalí Riosi echirigá 'yama walú kastigo mapujiti echo'ná piréami ma wisabé niráa 'yemi mi wabé risúu olali.

²¹ Echalí bilé wabé jiwerámi walubela Riosi kapitánawala chapigá mutuka bilé walubé rité mapuyiri bilé wabé walubé matá, echo'ná walubé ba'wírali ri'lé pali jeanigá: Achigórigá waminá ri'lé a'wátami níima echo'ná Babilóniachi piréami pagótami, a'lí aboni ke siné auché riwirúami níima. ²² A'lí echo'ná walúlachi ma ke siné auché námtami níima echí jaré tákawami namuti, arpa anilíwami; nibilé cho námtami níima echí kusela, nibilé cho námtami níima echí auché jaré korneta anilíwami, mapujiti echo'ná ma ke pirélama pagótami. A'lí ke wesi waminá nochama echo'ná walúlachi, mapuyíripi nóchali; nibilé waminabi batuka nochama echí jaré muquí, mapujiti ke wesi waminabi pirélama echo'ná. ²³ Jipi jonsa ke wesi pagótami waminabi pirélama echo'ná Babilóniachi, echijiti ma ketasi auché rajamea echí chopé echo'ná, nibilé wesi auchecho siné kaníliga omowama echo'ná, mapurigá echí pagótami olá mapalí jaré we niwí. Chabénala echo'ná Babilóniachi piréami we ralinéwami níili waminabi wabé wikabé namuti, ketasi mapurigá echí auché jaré ralinéwami kanápuromí jena'í wichimóbachi piréami, ayénachó echo'ná piréami we sipabúami níili; echijiti aboni ma ne wabé 'yékali suníami jena'í wichimóbachi piréami pagótami, chopi jipi jonsa ke wesi waminabi pirélama echo'ná.

²⁴ Echo'ná Babilóniachi piréami pagótami ko'yáami níili si'néami echí jaré mapu Riosi júuli nawisánala, ayénachó ko'yáami níili si'néami echí auché jaré Riosi níwala pagótami, si'néami mapu ikí ko'wirúami níili jena'í wichimóbachi, ki'yá chokichí jonsa.

19 Pe wilibeko, je'ná jerigá ma ikisáa, nijeni námali wikabé pagótami o'weli ra'ícháchanáchi echo'ná ripá riwigachi muchúami, echí jaré mapu jeanili: ¡Aleluya! ¡Riosi ne wabé Walubela ju! Mapujiti Binói ku wikawa si'néami mapu ikí galá bichíi.

Ayénachó Binói ne wabé Walubela ju, ne wabé omériami ayénachó, mapujiti tamujé Riósawala ju.

² Mapujiti Riosi ne wachínaga olá justicia, ne wabé bichíwali niráa.

Echijiti Riosi ma walú kastigo 'yali echí walula mukí chatí sití oláami, echí mapu wabé chatí sití olílali jena'í wichimóbachi piréami, mapujiti binóí ne wabé simírami chatí sití oláami níili; chopí Riosi ma ne wabé risúu olali echí mukí mapujiti échiko ma ko'yali wikabé pagótami mapu galá bichíyami níili Riosi.

³ Echalí echí wikabé pagótami auchecheo jeanili: ¡Aleluya, waminabi walubéraga anérámi nílaga Riosi! mapujiti echí walula mukí, chatí sití oláami, ne sinibí niráa wabé risúu olárami níima echo'ná ri'lé walubé na'írali!

⁴ Echalí echí jaré osá makói miná naó o'wéala ochérami, ayénachó echí jaré naó akami namuti, si'néami chokoba jaga, ri'lé wichí akaná uchúpali, echo'ná bacháami mapo'ná Riosi asali echo'ná walubela asíbalachi; ayénachó ne si'néami waminabi walubéraga aneli Riosi, ayénachó jeanili: ¡Echirigá níima! ¡Aleluya!

⁵ Echalí echo'ná echí Walubela Riosi asíbalachi jonsa námtami níili ra'icháchanáchi jeanágá:

Waminabi walubéraga anesi Riosi si'néami 'yemi pagótami mapu ikítamo bichíyami ju Riosi, si'néami 'yemi mapu ikítamo majawá Riosi.

Echirigá waminabi walubéraga anesi Riosi si'néami 'yemi kuchípala, ayénachó si'néami 'yemi o'wéala.

Walubé omowama mapalí echí Méchuli ma niwima

⁶ Echalí níjeni ayénachó námali ra'icháchanáchi mapurigá wikabé pagótami o'weli ra'ichami niráa. Ne wabé o'weli anéchanami níili mapurigá wikanáami bakochi niráa, ayénachó mapurigá wikabé wabé iwéami ri'óami niráa. Echalí si'néami echí wikabé pagótami je'ná jerigá anili:

¡Aleluya, waminabi walubéraga anérámi níraga Riosi! Mapujiti echí Walubela tamujé Riósawala ma chótali nulayá mapurigá ne wabé Simírami Walubela niráa, jena'í wichimóbachi.

¡Échiko tamujé Riósawala ju, ne suwaba omériami!

⁷ Galá níima máputa ne wabé kaníliga kachiboa, ayénachó máputa ne wabé simírami kanílabo, ayénachó máputa waminabi walubéraga anebo echí Walubela Riosi, mapujiti ma sébali mapalí echí Walubela Jesucristo niwima, mapujiti Échiko Riosi níwala Méchuli ju.

A'lí tamujé máputa Binóí upila níibo mata galá kariweli, mapujiti ne si'néami tamujé máputa ku wikawárami juko,

ne si'néamita napawíkami niráa mapurigá Binóí upila niráa níibo.

⁸ A'lí si'néami mapu ikita Riosi níwala ju, mapujítita ma ku wikawárami níili, tamujeta ma 'yárami níili mapurigata bukulíwami galabé rosákami niráa napachabo, mapuyiri nápoli.

A'lí tamujeta echirigá 'yárami níili mapurigata galabé wachínaga ologá pirélabo jena'í wichimóbachi. A'lí ne si'néamita ne napawíkami niráa, mapurigá echí Méchuli upila níibo.

⁹ Echalí echí walubela Riosi kapitánawala tamí Jeaneli: Mujé je'ná jerigá osá: Galá níima mapu ne wabé kanílama si'néami echí jaré mapu ikí bayérami níliko mapu ko'mea mapalí echí Méchuli wabé kaníliga omáwaga niwima.

Ayénachó tamí jeaneli: Riosi Binói je'ná jerigá ne bichíwaga anili.¹⁰ Echalí nijeni we yáati chokoba wilíbali echo'ná bacháami mapo'ná echí walubela Riosi kapitánawala wilili, mapurigani o'wikema binói, chopí echí walubela Riosi kapitánawala tamí jeaneli: Ketasi tamí o'wiké echirigá, mapujiti nijeni bilé pioni ju, Riosi piónawala niráa, achigórigá mapurigá mujé niráa, ayénachó mapurigá echí auché jaré mujé ritémawala niráa. ¡Chopi echirigá walubéraga ané echí bilepi Walubela Riosi!

A'lí si'néami mapu ikí ne bichíwali Riosi jiti julárami níili nawisánala, abóniko galá nawesa Jesucristo jiti rugá.

Echi kawé rosákami aséami

¹¹ Echalí nijeni riwali mapurigá echo'ná ripá riwigachi iráparami niráa níili. A'lí echo'ná jonsa machínali bilé kawé rosákami. A'lí echí kawé aséami je'ná jerigá riwéami níili: Echi ne Bichíwaga Oláami, ayénachó je'ná jerigá riwéami níili: Echi ne Bichíwaga Ra'íchami, mapujiti Binói tamujé tamí ne wabé wachínaga nulé, ayénachó Binói we nikówika sayera echí auché jaré we chati sitíi oláami.¹² A'lí Binói busila ne wabé ratábami níili mapurigá na'í niráa, ayénachó wikabé oro niwárami koyéami níili echo'ná Binói mo'ólachi, ayénachó echo'ná Binóichi osirúami níili bilé riwá mapu Binói chopí galá machili mapu chu aniwáami ju.¹³ Binói napáchami níili bilé wi'llibé napacha, la jiti yogárami, a'lí Binói je'ná jerigá riwéami ju: Riosi Ra'íchala.¹⁴ Ayénachó Binói yuwa najáltali si'néami echí jaré wikabé pagótami ripá riwigachi muchúami. A'lí si'néami aboni bukulíwami, galabé tosákami napáchami níili, mapuyiri napoli. Ayénachó si'néami aboni aséami níili kawé tosákami.¹⁵ A'lí echo'ná Binói chumilachi jonsa machínali mapuyiri bilé wi'llí ripiyá, wabé oláami, mapurigá echijiti chi'wanama echí wikabé chati sitíi oláami pagótami jena'í wichimóbachi tibíami. A'lí Binói ne wabé jiwériga nulema echí pagótami mapurigá Walubela niráa. A'lí mapalí Binói kastigo 'yama, echalí Binói wabé omériga olama mapurigá bilé rijói mapu echí wikabé uva rakala moba rimisoka echirigá machí pa echí uva ba'wila. Echalí Binói echirigá nulama mapu echí chati sitíi oláami pagótami walubé kastigo 'yárami níima, mapujiti echí Suwaba Omérami Riosi ne wabé yona mapujiti aboni ketasi si'nú bukulíwami ku 'nata, nibilé cho ariwé chati sitíi olayá.¹⁶ A'lí echo'ná Binói wi'llí napáchalachi, echo'ná moba Binói kasílachi osirúami níili je'ná riwá: Je'ná ju echí Ne Walubela Silíami, si'néami echí auché jaré o'wéala silíami Silínawala. Ayénachó je'ná riwá echo'ná osirúami níili: Je'ná ju Ne Walubela, si'néami echí auché jaré o'wéala Walubélawala.

¹⁷ Pe wilibeko nijeni riwali bilé walubela Riosi kapitánawala mapu echo'ná rayénachi wilili, echí mapu o'weli ra'íchaga bayeli suwaba echí jaré wilú mapu ikí ripá i'nika 'yena jeanigá: Wakiná simasi, ma napawisi ma kopoá echí mapu Riosi 'yemi mi 'yama máputamo kopoá. ¹⁸ Yémitamo ma kopoá wikabé o'wéala silíami sapala, ayénachótamo kopoá wikabé o'wéala sontarsi sapala, wikabé jobátami rijói sapala ayénachó, echí wikabé kawé sapala ayénachó, echí kawé aséami sapala ayénachó. Mátamo kopoá si'néami pagótami sapala mapuyíripi tibí jena'í wichimóbachi. Yémitamo ma kopoá echí nuláami rijói sapala, ayénachótamo kopoá echí jaré pióntami sapala. Mátamo kopoá echí jaré kuchípala sapala, ayénachótamo kopoá echí jaré o'wéala sapala.

¹⁹ Echalí nijeni riwali echí bacháwala wabé aparúami namuti, ne si'néami echí jaré o'wéala silíami jena'í wichimóbachi nuláami ayénachó, ne si'néami

aboni sontársawala ayénachó, si'néami mapu ikí ma nakóbiya napawili echi Walubela sayéraga mapu aseli echi kawé rosákami, Binói pagótamawala sayériya ayénachó.²⁰ Alí echi bacháwala wabé aparúami namuti chapigá bulirúami níli, echi wabé 'yékaka nawésami rijói ayénachó, echi mapu chabénala niráa wabé omériga olali bacháami echi bacháwala wabé aparúami namuti yuwa mapurigá ke wesi auché jaré pagótami omero olayá. A'lí echirigá ologá echi wabé 'yékaka nawésami rijói ne wabé 'yékali echi jaré pagótami mapu arigá ariweli mapurigá aboni bawirárami níima mapurigá echi osáwala wabé aparúami namuti nuleli, echi jaré aboni mapu ayénachó bacháami chokoba jaga amachíkali echi walubé amachíkalawami namuti mapu niwárami níli mapuyiri echi bacháwala wabé aparúami namuti. A'lí echalí echi wabé 'yékaka nawésami rijói napawika echi wabé aparúami namuti yuwa, okuánika akami niráa a'wátami níli echo'ná ri'lé riáblochi walubé na'írali mapo'ná ayénachó we rajá echi asújiri anilíwami.²¹ A'lí echi jaré wikabé aboni níwala pagótami waminá ko'wirúami níli echi wi'llí ripiyá jiti mapu machínali echo'ná echi Walubela chumilachi jonsa, echi mapu aséami níli echi kawé rosákami. A'lí suwaba echi wikabé wilú ne o'weli posali, aboni sapala ko'yá.

Bilé mili bamíbali mapalí Jesucristo ne Walubela níima jena'í wichimóbachi

20 Pe wilibeko nijeni riwali bilé walubela Riosi kapitánawala ripá riwigachi jonsa rikínami, echi mapu kami níli echi irápala, echo'ná wabé ri'lé jochi irápawami, mapo'ná ketasi suwíbami ju ri'lена. Ayénachó kami níli bilé walubé jiero wiya.² Echalí echi walubela Riosi kapitánawala chapili echi wabé aparúami riablo. Échiko mapuyiri bilé sayawi ju, ki'yá jonsa nirúami, echi mapu Satanasi riwé. A'lí echi walubela Riosi kapitánawala waminá bulali echi riablo mapurigá echirigá tibima bilé mili bamíbami yénasí.³ Ayénachó echi Riosi kapitánawala waminá wabé ri'lé jochi pali echi riablo mapo'ná ketasi suwíbami ju ri'lена, a'lí echo'ná ne wabé iwéami 'yérali mapurigá ke machínama, mapurigá echi riablo ketasi waminabi 'yékama jena'í wichimóbachi piréami pagótami, bilé mili bamíbali yénasí. Chopi ma simírasa bilé mili bamíbali, arigá 'wérali ju mapu echi riablo ku botonárami níima, pe téeli niráa.

⁴Echalí nijeni riwali wikabé o'wéala muchíbalachi, ayénachóni riwali echo'ná muchúami echi jaré mapu nulérami níli justicia olánala si'néami echi jaré pagótami mapu ikí ke bichíyami níli. Ayénachóni riwali echi jaré galá bichíyami pagótami aliwala, si'néami mapu ikí kutachí ripúnaga ko'wirúami níli ki'yá chokichí jonsa, mapujiti aboni nawésami níli Jesucristo jiti rugá, ayénachó mapujiti aboni bichíili Riosi Ra'íchala. Ke wesi aboni chokoba jaga walubéraga aneli echi bacháwala wabé aparúami namuti; nibilé cho ariweli mapurigá aboni bawirárami níima echo'ná aboni kowálachi, nibilé echo'ná aboni sikálachi, mapurigá echi osáwala wabé aparúami namuti nuleli. Nijeni riwali mapurigá je'ná jaré auchecho siné ku pirélama jena'í wichimóbachi waminánomí, ayénachó mapurigá aboni pe o'wéala níima Jesucristo yuwa bilé mili bamíbali yénasí, mapurigá aboni pe kuchípala nuláami níima, mapurigá aboni ku'wírama Jesucristo mapalí Binói ne Wabé Walubela níima jena'í wichimóbachi.⁵ Echalí níima echi ne bachá ku owínawachi rawé, chopi echi auché jaré suwíami ketasi cho abijí ku pirélama, chopi waminánomí auchecho ku pirélama mapalí ma simírasa echi

bilé mili bamíbali. ⁶¡Ne wabé kaníiami níima echí jaré mapu ikí ku o'wínama echalí ne bachá ku owínawachi rawé! Abóniko chopi galabé oláami ju mapurigá Riosi nakí. A'lí aboni ketásirapé auché osá suwímea, chopi aboni Riosi níwala sacerdote níima, Jesucristo níwala ayénachó. A'lí aboni pe kuchípala nuláami níima mapurigá aboni ku'wílama Jesucristo mapalí Binói ne Walubela níima jena'í wichimóbachi bilé mili bamíbali iyénasí.

⁷Chopi ma simírasa echí bilé mili bamíbali, echalí echí Satanasi riwéami riablo ku botánaga, waminá ku ni'yúbanarami níima. ⁸Echalí binói ne wabé yoga ku machínsa, ne wabé nakimea 'yékanala ne suníami jena'í wichimóbachi piréami pagótami. Echalí binói ku machínsa 'yékama echí Goga riwéami walubela silíami, ne si'néami echí pagótami ayénachó, echo'ná Goga kawíwalachi piréami. Echalí echí Satanasi napabuma ne si'néami aboni mapurigá nakoma, a'lí ne wabé simírami wikabé níima mapurigá echí saté echo'ná walubé ba'wírali suwé nirúami. ⁹Echalí aboni nolínama ne suníami jena'í wichimóbachi jonsa, a'lí noligá napawima echo'ná Jerusalémachi anilíwachi walúlachi mapo'ná muchima Riosi níwala pagótami, chopi echo'ná ripá riwigachi jonsa Riosi julama walú na'í mapurigá si'néami aboni suwaba ikósaga suwábarami níima. ¹⁰Echalí echí riablo mapu ne wabé 'yékali echí pagótami, échiko waminá ri'lé walubé na'írali pátami níima, mapo'ná ayénachó we rajá echí asújiri anilíwami, mapo'ná chabénala a'wátami níili echí wabé aparúami namuti, echí wabé 'yékami nawésami rijói yuwa. Echo'ná aboni ne wabé simírami risúu olárami níima ne sinibí rawé, ne sinibí rokogó, sinibí niráa, ne sinibí.

**Riosi justicia olama mapalí si'néami echí jaré chati sitíi oláami pagótami
bacháami jábama echo'ná Riosi níwala rosákami walubela asíbalachi**

¹¹Echalí nijeni riwali bilé rosákami walubela asíbalachi, ayénachóni riwali Echi mapu echo'ná asali. Échiko ne wabé simírami Walubela ju, echijiti bacháami jonsa mapo'ná Binói atí, je'ná kawí suwaba waminá ke 'ne ikimea, echo'ná ripá mapo'ná siyona ayénachó. A'lí ma ketasi nirúlama. ¹²Ayénachóni riwali si'néami echí jaré suwíami, echí jaré mapu o'wéala niráa níili, ayénachó echí jaré mapu kuchípala níili. Echalí nijeni riwali mapurigá ne si'néami echo'ná bacháami Riosi yuwa jábama. Echalí echí jaré oselí irápaga 'nérami níima. Ayénachó echí auché bilé oselí irápaga 'nérami níima, echí oselí mapo'ná osirúami ju si'néami riwalá mapu ikí sinibí niráa pirélama Riosi yuwa. Echalí echí jaré suwíami justicia olárami níima mapurigá aboni ologá piréali, mapurigá osirúami níili echo'ná echí jaré oselichi. ¹³Echalí nijeni riwali mapurigá ne si'néami echí jaré suwíami mapu ikí waminá ri'lé butuwíkami níili echo'ná walubé ba'wírali auchecho ku párami níima, ayénachó ne si'néami echí auché jaré mapu ikí suwíami ju auchecho ku párami níima echo'ná jonsa mapo'ná echí jaré suwíami aliwala muchuwi. Echalí ne si'néami echí jaré suwíami justicia olárami níima, a'lí ibili niráa kastigo 'yárami níima achigórigá mapurigá ibili chati sitíi olali. ¹⁴Echalí echí mukuwáami waminá ri'lé walubé na'írali pátami níima, ayénachó echo'ná a'wátami níima ne si'néami echí jaré suwíami mapu ikí ketasi ku wikkawárami níili. A'lí echalí mapalí aboni echo'ná ri'lé walubé na'írali a'wátami níima, echalí níima mapalí aboni osá niráa suwímea. ¹⁵A'lí echo'ná a'wátami níima si'néami echí jaré mapu ikí aboni riwalá ketasi osirúami níili echo'ná oselichi mapo'ná osirúami ju si'néami echí jaré pagótami riwalá mapu ikí sinibí niráa pirélama Riosi yuwa.

Ripá riwigachi auché si'nú bukulíwami, ayénachó auché si'nú kawí ne bukulíwami

21 Echalí nijeni riwali mapurigá ripá nolírali mapo'ná siyona auché si'nú bukulíwami nílama, mapujiti ripá nolírali mapo'ná siyona mapu tamujeta ritiwá waminá ke 'newa ikimea, ayénachó je'ná kawí mapo'nata piré waminá ke 'newa ikimea. A'lí echi walubé ba'wí ma ke nirúlama. ²Nijé, Juani, riwali mapurigá echi wabé galabé walúlachi rikínama echo'ná ripá riwigachi jonsa, mapo'ná Riosi atí. Echo'ná echi bukulíwami Jerusalémachi anilíwami níima. Suwaba ne galá ba'yóraga a'láratami níima mapurigá bilé tiwé ba'yóraga a'lará, binói niráa, mapalí ma niwima echi yuwa mapu binói kunala níima. ³Ayénachóni námali mapurigá waminánomí bilé o'weli ra'ichami echo'ná ripá riwigachi jonsa jeanigá: Nibira, jipi Riosi bité nasípomí echi jaré pagótami yuwa. Jipi jonsa Riosi bitélama aboni yuwa. A'lí aboni Riosi níwala pagótami níima. A'lí Binói Riosi aboni yuwa asimea. Sinibí niráa aboni Riósawala níima. ⁴Ayénachóni námali mapurigá waminánomí jeanimea: Riosi galá ku kaníflatama aboni, mapurigá ma ketasi o'móniga nalákama. Echalí jonsa echi pagótami ma ketasi suwímea, nibilé auché nalákama, nibilé auché risúu animea, nibilé auché okoma; mapujiti suwaba mapu ikí chabénala nirúaliko, ma suwaba simárali.

⁵Echalí nijeni námali ra'icháchanachi echi Walubela Jesucristo, echo'ná walubela asíbalachi atíami, echi mapu tamí jeaneli: Nibira, Nijeni bukulíwami niwáma suwaba namuti. Ayénachó tamí jeaneli: Oselichi osá suwaba je'ná ra'íchali, mapujiti ne bichíwali ju. Echijiti galá níima mapu ne si'néami pagótami galá bichíima ne suwaba.

⁶Ayénachó tamí jeaneli. Suwaba ma olárami ju. Nijeni ne bachá ju mapurigá echi binékowami "A" anilíwami ne bachá ju, ayénachóni ne jubá níima mapurigá echi binékowami "Z" anilíwami ne jubá ju. Nijeni 'yama mapurigá ne si'néami echi jaré pagótami mapu ikí balámako, ketasi biyiri natétaga galá bajima echo'ná bajichi mapo'ná maní echi ba'wí mapu njá mapurigá echi pagótami sinibí niráa pirélama. ⁷Echi jaré mapu ikí galá nayúraliko, abóniko narema suwaba je'ná jeyiri mapurigá kóntami niráa. A'lí Nijeni aboni Riósawala níima, ayénachó aboni Nijé kúchuwala níima. ⁸Chopi echi jaré wabé majáami walú kastigo 'yárami níima, echi jaré mapu ketasi bichíiko ayénachó, echi jaré wabé chati sitíi oláami ayénachó, echi jaré mapu ikí nakówaka ko'yáami ju ayénachó, echi jaré mapuyíripi chuillé bilétari yuwa kochíami juko ayénachó, echi jaré sukúrami ayénachó, echi jaré mapu ikí chokoba jaga o'wiké echi jaré amachíkalawami namuti ayénachó, ne si'néami echi jaré 'yékaka ra'íchami ayénachó; mapujiti ne si'néami je'ná jerigá chati sitíi oláami pagótami a'wátami níima echo'ná ri'lé riáblochi mapo'ná ne buchuwímana wi'lé ra'laka rajáami ju, mapo'ná we rajá echi asujiri anilíwami. Echalí níima mapalí aboni auché osá suwímea.

Echi ne bukulíwami Jerusalémachi

⁹Echalí tamí yuwa nawali pe bilé echi jaré kichao o'wéala Riosi kapitánawala mapu pe bachánala nijeni riwali ibílipi 'yénami echi kúuchi sikolí buchí maníami echi ne wabé simírami chati namuti mapu kicháosa chokéami wabé risúu nílatali echi jaré chati sitíi oláami pagótami jenaí' wichimóbachi piréami. A'lí echi bilé Riosi

kapitánawala tamí jeaneli: Echi Walubela Jesucristo echi Riosi níwala Méchuli ju. Wakiná tamí yuwa simí, nijeni mi 'nérama Binói upila, echi mapu bukulí niwíami níili Binói yuwa.

¹⁰Echalí mapalí echi Wabé Galabé Riosi Iwigala olali mapurigá nijeni riwimea mapurigá ikimea waminánomí, echalí nijeni riwali mapurigá echi walubela Riosi kapitánawala tamí niráa echo'ná ne wabé ripabé biléana walubé chulichi. A'lí echirigá tamí riwírali echi ne wabé galabé walubé walúlachi Jerusalémachi anilíwachi, echi mapu ripá riwigachi jonsa rikinali, echo'ná jonsa mapo'ná Riosi atí. ¹¹A'lí echi walúlachi ne wabé ratábali achigórigá mapurigá Riosi Binói ne wabé ratábami ju. Ne wabé simírami ratábali mapurigá bilé ták rité ne wabé natéami, mapurigá echi jaspe anilíwami rité, ne galá machíami mapuyiri sipée ventana niwalíwami. ¹²A'lí echo'ná walúlachi ne noligá ne wabé ru'náami niráa tigótami níili ne wabé ripabé, ayénachó echo'ná tigótachi nirúali makói miná okuá yewachi, mapo'ná makói miná okuá o'wéala Riosi kapitánawala tibuka jali. A'lí echo'ná makói miná okuá yewachi ibílipi niráa osirúami níili bilé riwá mapurigá anilíwami níili ibílana echi jaré makói miná okuá rojuámi, echi jaré Isaeli pagótami. ¹³A'lí bikaná yéatami níili riwili mapokuá machina rayénali, ayénachó bikaná niráa yéatami níili a'nagú 'nalika niráa, ayénachó bikaná yéatami níili tuni mapomí bokowí rayénali. ¹⁴A'lí echo'ná walúlachi mapo'ná noligá tigótami níili, echo'ná nirúali makói miná okuá o'weli rité, ri'lé bachá tigótami niráa. A'lí echo'ná ibílipi makói miná okuá ritérálichí osirúami níili ibili aboni riwalá mapurigá riwéami níili echi jaré makói miná okuá nawésami mapu echi Méchuli júuli nawisánala Binói Ra'íchala.

¹⁵Echi walubela Riosi kapitánawala mapu tamí yuwa ra'íchali, echi kami níili bilé kusí téetalawami, oro niwárami, mapurigá tétama echi walubé walúlachi, echo'ná noligá tigótami ayénachó, echo'ná nirúami yewachi. ¹⁶Echo'ná walúlachi sitóami níili. A'nagú kuwana chopi 'yékali níili. A'lí echi walubela Riosi kapitánawala téitali echi oro niwárami kusí jiti. A'lí okuá mili waminá okuá kiento kilómetro níili. Biléana ibílana a'nagú naóana kuwana chopi 'yékali níili, ayénachó a'nagú ri'winá chopi 'yékali níili. ¹⁷A'lí echi walubela Riosi kapitánawala ayénachó téitali echi walubé tigótami. Ne walú chipériga tigótami níili. Usansa makói miná naó metro níili chipérowala, mapujiti echi walubela Riosi kapitánawala níwala téawami achigó kilí níili mapu kilí jena'í wichimóbachi piréami pagótami níwala.

¹⁸Echo'ná walúlachi ne norigá tigótami níili echi wabé natéami jaspe anilíwami rité jiti. A'lí ne suwaba echi wabé natéami oro chopi jiti niwárami níili, ne galá machíami niráa, mapuyiri sipée ventana niwalíwami. ¹⁹A'lí echi makói miná okuá o'weli rité mapu ri'lé bachá tigótami níili echo'ná walubé tigótachi ibílana niráa wiká nasókami wabé ba'yóratami níili, mapujiti echo'ná moba ritéráli ochópana uchúcharami níili wikabé wabé simírami natéami kúuchi rité. Echo'ná echi rité ne bacháwala uchúcharami níili echi jaspe anilíwami wabé natéami kúuchi rité; echo'ná okoná ritéráli uchúcharami níili echi sájiro anilíwami wabé simati kúuchi rité; echo'ná bikaná ritéráli uchúcharami níili echi ágata anilíwami wabé simati kúuchi rité; echo'ná naóana ritéráli uchúcharami níili echi esmeralda anilíwami wabé simati kúuchi rité; ²⁰echo'ná malíana ritéráli uchúcharami níili echi ónise anilíwami wabé simati kúuchi rité; echo'ná usansa ritéráli uchúcharami níili echi kornalina anilíwami wabé simati kúuchi rité; echo'ná kicháosa ritéráli uchúcharami níili echi krisólito anilíwami wabé simati kúuchi rité; echo'ná osánaósá ritéráli

uchúcharami níili echi berilo anilíwami wabé simati kúuchi rité; echo'ná kimakóisa ritérali uchúcharami níili echi topasio anilíwami wabé simati kúuchi rité; echo'ná makóisa ritérali uchúcharami níili echi krisoprasa anilíwami wabé simati kúuchi rité; echo'ná makói miná biléana ritérali uchúcharami níili echi jasinto anilíwami wabé simati kúuchi rité; echo'ná makói miná okoná ritérali uchúcharami níili echi amatista anilíwami wabé simati kúuchi rité.²¹ A'lí echo'ná makói miná okuá yewachi, echi makói miná okuá 'yera niwárami níili echi wabé natéami perla anilíwami jiti, ibili 'yera bilé perla chopi jiti niwárami níili. A'lí echo'ná walúlachi ri'narátachi echi wabé natéami oro chopi níili, ne wabé machíami mapuyiri sipée, ventana niwalíwami.

²² Echalí nijeni ketasi riwali nibilé ri'obá echo'ná walúlachi, mapujiti echi Walubela Riosi ne suwaba omérami echo'ná atí, echi Méchuli ayénachó; echijiti echo'ná muchúami pagótami sinibí Riosi Binói yuwa ra'íchaga walubéraga anema echi Walubela Riosi, ayénachó aboni echi Méchuli Binói yuwa ra'íchaga waminabi walubéraga anema.²³ Echo'ná walúlachi ketasi 'wérali níima mapu echi rayénali rayenama, nibilé cho 'wérali níima mapu echi michá ratábatama echo'ná; mapujiti Riosi Binói ne wabé ratábata echo'ná walúlachi, ayénachó echi Méchuli ne wabé ratábata echo'ná.²⁴ A'lí si'néami pagótami mapu ikí ma ku'wírami juko, abóniko sinibí 'yénama echo'ná walúlachi mapo'ná echirigá rataba. Echo'ná ne wabé walúlachi níima mapujiti ne si'néami jena'í wichimóbachi nuláami o'wéala silíami ma ketasi waminabi mapurigá o'wéala niráa níima, chopi Riosi Walubela níima, echo'ná Binói walúlawalachi atíami.²⁵ Echo'ná walúlachi sinibí rawé ke siné 'yératami níima echi yéachi, a'lí echo'ná ke bilé siné rokogó níima.²⁶ Echo'ná walúlachi ne bachá walúlachi níima mapujiti ne suníami piréami o'wéala echo'ná sigá, waminabi walubela anilíwami nilama echi Riosi níwala walúlachi.²⁷ Ke siné nirúlama echo'ná walúlachi echi wabé chati sitíi namuti, nibilé wesi echo'ná mo'wimea mapu ikí wabé chati chuwé oláami ju, nibilé cho echi jaré mapu ikí 'ykaka oláami ju. Echo'ná walúlachi chopi mo'wimea echi jaré mapu ikí aboni riwalá echo'ná echi Méchuli osilíwalachi osirúami ju mapurigá aboni sinibí pirélama Riosi yuwa.

22 Echalí echi Riosi capitánawala tamí riwírali echo'ná bakochi mapo'ná simí echi ba'wí mapu nijá mapurigá echi pagótami sinibí pirélama. Echi ba'wí ne wabé simírami galabé níili, ne wabé galá machíami mapuyiri sipée ventana niwalíwami, tarapé wikúami niráa. A'lí echi galabé bakochi machífinali echo'ná Riosi níwala walubela asíbalachi jonsa, ayénachó echi Méchuli níwala walubela asíbalachi jonsa.² A'lí echo'ná walúlachi walubela ri'narátachi nasipa simí echi galabé bakochi. Ayénachó echo'ná a'nagú bo'onaga jawi echi galabé rakéami namuti, echi mapu nijá mapurigá echi pagótami sinibí pirélama. A'lí siné bamíbali echi rakéami namuti galá raké ibílipi michá niráa. A'lí echi rakéami namuti sawala ku sa'wáami ju kanápuromí piréami pagótami.³ A'lí echo'ná walúlachi tarapé nirúlama echi mapu Riosi wabé chati sitíi ané. A'lí echi Walubela Riosi Binói echo'ná walúlachi asimea, echo'ná Binói níwala walubela asíbalachi. Echi Méchuli ayénachó echo'ná walúlachi asimea, echo'ná Binói níwala walubela asíbalachi. A'lí si'néami pagótami mapu ikí Riosi piónawala niráa ju, abóniko sinibí niráa waminabi o'wikema echi Walubela Riosi.⁴ Echalí aboni galá machíami niráa riwimea Riosi, ayénachó echo'ná ibílana aboni kowálachi osirúami níima Riosi riwalá.⁵ Echo'ná ma ketasi waminabi chonama rokogó niráa. A'lí ma ketasi 'wérali níima mapurigá echo'ná piréami

pagótami karúmati rajema, nibilé cho mapurigá waminabi rayenama, mapujiti echí Walubela Riosi Binói galá ratábatama, echijiti aboni suwaba galá machíami niráa riwímea. A'lí Riosi 'yama mapurigá aboni ayénachó o'wéala nuláami níima sinibí bamíbali, ne sinibí.

Echi Walubela Jesucristo ke 'me ayó ku nawama

⁶A'lí echí walubela Riosi kapitánawala tamí jeaneli: Je'ná Ra'íchali ne bichíwali ju. Galá níima mapu ne si'néami pagótami galá bichíima. Echi Walubela Riosi mapu galá 'natárata echí jaré mapu osá Binói Ra'íchala, Échiko júuli Binói kapitánawala mapurigá galá riwírama echí jaré Riosi piónawala suwaba mapurigá ikimea ke 'me ayó.

⁷Echi Walubela Jesucristo jeaní: ¡Nijeni ma ke 'me ayó ku nawama! ¡Ne wabé kaníliami ju si'néami echí jaré mapu ikí galá bichíiga njéwako Riosi Ra'íchala mapurigá osirúami ju jena'í oselichi!

⁸Nijé Juani galá námali je'ná Ra'íchali, ayénachóni riwali je'ná karúmati. A'lí mapalini ma je'ná jerigá námiga riwisá, echalini we yáati chokoba wilíbali bacháami mapo'ná echí Riosi kapitánawala wilili, echí mapu tamí riwírali, mapurigani o'wikema echí walubela Riosi kapitánawala. ⁹Chopi échiko tamí jeaneli: ¡Ketasi tamí walubéraga ané mujé! Nijeni ayénachó bilé pioni ju, Riosi piónawala niráa, achigórigá mapurigá mujé niráa, ayénachó mapurigá echí auché jaré mujé ritémawala niráa, si'néami mapu ikí nawésako Riosi Ra'íchala, si'néami mapu ikí galá njéwako mapurigá osirúami ju jena'í oselichi. ¡Chopi echí bilepi Walubela Riosi walubéraga ané!

¹⁰Echalí echí Riosi kapitánawala ayénachó tamí jeaneli: Sinibí galá nawisá Riosi Ra'íchala mapurigá osirúami ju jena'í oselichi. Ke siné ariwé nawesa, mapujiti ke 'me ayó suwaba echirigá ikimea mapurigá osirúami ju jena'í oselichi. ¹¹Echalí jonsa si'néami mapu ikí chati sitíi oláami juko, abóniko sinibí niráa echirigá chati sitíi oláami níima; ayénachó si'néami mapu ikí sitíraga nokuáami juko, abóniko sinibí niráa echirigá sitíraga nokumea. A'lí si'néami mapu ikí galabé oláami juko, abóniko sinibí niráa echirigá galabé oláami níima; ayénachó si'néami mapu ikí nakiko olánlala mapurigá Riosi chopi nakí, abóniko sinibí niráa echirigá chopi olama.

¹²Echi Walubela Jesucristo jeaní: ¡Ne bichíwali, Nijeni ke 'me ayó ku nawama! Echalí Nijeni ibili niráa 'yama echí wabé galabéala. Echi jaré mapu ikí wabé galabé ologá piréaliko, abóniko waminabi ne wabé wikabé 'yárami níima; chopi echí auché jaré mapu ikí ketasi 'me galabé ologá piréaliko, abóniko ke 'me wikabé 'yárami níima. ¹³Nijeni ne bachá ju, ayénachóni ma ne jubá ju. Nijeni ne chokichí ju, mapurigá echí binékowami "A" anilwámi ne chokichí ju; ayénachóni ma ne jubáami ju mapurigá echí binékowami "Z" anilwámi ma ne jubáami ju.

¹⁴Ne wabé kaníliami ju si'néami echí jaré mapu ikí galá bichíyami juko. Abóniko mapurigá galabé bi'wíiami napáchami niráa ju, mapujiti aboni ma galá bichíili Jesucristo niráa. Echijiti aboni risensia níwa mapu ko'mea echí galabé namuti rakala, echí mapu njá mapurigá aboni sinibí niráa pirélama, ayénachó mapurigá aboni mo'wímea echo'ná walúlachi yéwachi. ¹⁵Chopi echo'ná machímana tibima si'néami echí jaré mapu ikí ke bichíyami juko, si'néami echí jaré sukurúami ayénachó, si'néami echí jaré mapu ikí chuwé bilétari yuwa kochiko ayénachó, si'néami echí

jaré mapu ikí chokoba jaga o'wikeko echí jaré amachíkawami namuti ayénachó, si'néami echí jaré 'yékiami pagótami ayénachó, si'néami mapu ikí wabé nakiko 'yékanala echí auché jaré.

¹⁶Nijé, Jesucristo, mani júuli Nijé kapitánawala suwaba je'ná jerigá ruyénala echí jaré wikabé napawika bichíyami ritémtami, echo'ná kicháona o'wéalachí napawíami. Nijeni ju mápuni niwáli echí walula silíami Rabiri riwéami, ayénachóni bilé ju echí binói Rabiri kúchala kúchuwala, ayénachó Nijeni mapuyiri echí wabé ratábami sopolí ju, echí mapu bi'yá chi'láachi machina.

¹⁷Echi Wabé Galabé Riosi Iwigala jeaní: ¡Wakiná simí! Ayénachó echí Méchuli upila jeaní: ¡Wakiná simí! A'lí galá níima mapu ikí námiko ayénachó jeansá: ¡Wakiná simí! Ne si'néami pagótami mapu ikí nakiko bajínala, wakiná simíbaga tarapebi yiri natétaga bajisi echí ba'wí mapu njá mapurigá echí pagótami sinibí niráa pirélama.

¹⁸Nijeni jerigá ruyé si'néami echí jaré pagótami mapu ikí námiko Riosi Ra'íchala mapurigá osirúami ju jena'í oselichi: A jaré napabúsagá auché jaré ra'íchali je'ná ne bichíwali Riosi Ra'íchala yuwa, echalí Binói Riosi ne wabé risúu olama echirigá oláami pagótami, achigórigá mapurigá osirúami ju jena'í oselichi mapu Riosi risúu olama echí jaré chati sitíi oláami pagótami. ¹⁹A'lí a jaré waminá 'yésagá jaré Riosi Ra'íchala mapurigá osirúami ju jena'í oselichi, echalí Riosi Binói waminá nakubama aboni riwalá echo'ná oselichi mapo'ná osirúami ju si'néami echí jaré pagótami riwalá mapu ne sinibí niráa pirélama. Ayénachó Riosi ketasi risensia 'yama mapu aboni muchima echo'ná Binói níwala galabé walúlachi. Jena'í oselichi osirúami ju mapurigátamo galá machiboa churigá ju Riosi walúlawalachi.

²⁰Echi Walubela Jesucristo mapu suwaba je'ná jerigá aní, Échiko ayénachó jeaní: Ayena, Nijeni ke 'me ayó ku nawama. ¡Echirigá níima! ¡We yáati ku nawá, Mujé Walubela Jesucristo!

²¹Nijeni nakí mapu echí Walubela Jesucristo 'yemi mi ne si'néami wabé ku'wírama. ¡Echirigá níima!